


Pavitra Polle



Aheri Gondi: Besta Kabur (Bible)

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files dated 1 May 2025

856c9a76-2de1-5675-855a-28be9a349068

Contents

मत्तयाल	1
मरकुस	61
लूकाल	98
योहान	167
प्रेरितुल्लकुना कबाहक	213
रोम	271
1 कुरैति	298
2 कुरैति	321
गलातिया	336
इपीसि	346
पिलिपिया	356
कुलुसि	363
1 तेसलोनि	369
2 तेसलोनि	374
1 तिमोति	378
2 तिमोति	386
तीतु	391
पिलेमोन	395
इब्रि	397
याकोब	418
1 पत्रु	425
2 पत्रु	432
1 योहान	436
2 योहान	443
3 योहान	445
यहुदा	447
पेन हुपिस्ता पोल्ले	449

मत्तयाल मत्तयाल रासतद बेसता कबुर

इद पुस्तकमता बारेमते गिचचो परिचयम

रासतोना पोरोल: मत्तयाल

रासता कालम: इसवि सन 50-60

इद पुस्तकम रासता मत्तयाल यहुदि मनकल आंदुर. ईर रोमि सरकारनाहाटी कर वसुल कियुंदुर ईचि ईन यहुदि लोकुलक हय्साकौंदुर. अय्नागानि येसु सामि केयतस्के ओना पज्जो होंचि ओना सिस्युड आतोर. यहुदिल्क पूसकियना सवालकुंक जवाब हियनाहाटी मत्तयाल इद पुस्तकमतुन रासतोर. इंका इद पुस्तकमतुन हदुवते, एनकटा कालमते पेनदा कबुरतोर वेहता बविस्यवानिगुडा येसु किरिस्तुना लोप्पो पुरागा आंतां इत्ता संगति मनाकु तेळियंता. अचोने आयका स्वर्ग राज्येम इत्ते बतल, स्वर्ग राज्येमता रहिवासिनलेसी बल्हा पिस्सा परांतोम, अद बल्हा मनंता? इसौंटा सवालकुना जवाबगुडा येसु सामि बेस वेसुडिं वेहचि तेळियागोटता बारेमते रासि मंता.

बगा बतल मंता

येसुना पुटमळ आनि बेर्समळ 1:1-2:23

स्वर्ग राज्येमता बारेमते वेहमळ 3:1-7:29

गालिलते येसु सेवा कबळ सुस्व कीतोर 8:1-10:42

येसुना विरोद कियमळ आनि लोल्लिं आयमळ 11:1-13:52

गालिलते येसुना सेवा कबळ मारमळ 13:53-18:35

किरिस्तु येस्सलेम दांतोर 19:1-25:46

येसुंक तिप्पल्क वासि, हासि मर्रा जीवाते तेदमळ 26:1-28:20

येसु सामिना पेदूदालकुना तंतुल्क

(लूकाल 3:23-38)

1 येसु किरिस्तुना* पेदूदालकुना तंतुल्कां इल्हा मंतां. येसुना एनकटा मातिर-दादाल अब्राहाम आंदुर. अब्राहामुना तंतुनाल दाविद राजाल पुटतोर, दाविदुना तंतुनाले येसु सामि वातोर.

2 अब्राहामुंक इसाक पुटतोर, इसाकुना मर्रि याकोब, याकोबुना मर्क यहुदल आनि ईना दादालोर-तम्मूहक.

3 यहुदाना मर्क पेरिस आनि जेराल, ईरा यावन पोरोल तामरि आंद. पेरिसुना मर्रि हेसरोन, हेसरोनुना मर्रि अराम,

4 अरामुना मर्रि अमिनादाब, अमिनादाबुना मर्रि नहसोन, नहसोनिना मर्रि सलमोन,

5 सलमोनुना मर्रि बोआज, बोआजुना यावन पोरोल राहोबी आंद. बोवाज आनि ओना मुत्तो स्तुंकु ओबेद पुटतोर. ओबेदुना मर्रि यिस्सल,

6 यिस्साना मर्रि दाविद राजाल.

दाविदुना मर्रि सुलेमान, सुलेमानना यावल मोदाला उरियाना मुत्तो मत्ता.

7 सुलेमानुंक रहोबाम पुटतोर. रहोबामुना मर्रि अबियेल, अबियेलुंक आस्यल पुटतोर.

8 आस्यना मर्रि येहोसपात, येहोसपातुना मर्रि योराम, योरामुना तंतुनाल उजियाल पुटतोर.

9 उजियाना मर्रि योताम आनि योतामुना मर्रि अहाज, अहाजना मर्रि हिजकियल.

10 हिजकियन हेंदाल मनसे पुटतोर, मनसेना मर्रि आमोन, आमोनुना मर्रि योसियाल.

* 1:1 किरिस्तु इत्ते “अबिसेकम आतोर” इंचि अर्तम. मनकन ओना पापालकुनाल पिसागोटनाहाटी पेन बोन अय्ते अबिसेकम कीसि लोहतनो, ओरे किरिस्तु आंद. † 1:1 तंतुल्क उंदे वंसम, पीळि.

11 इस्राएल लोकुकुन गुलाम कीसि बेबिलोन देसेमते ओयनेके योसियांक येकोनियेल आनि इंका ईना तम्मुहक आतुर.

12 बेबिलोन ओता पजा येकोनियंकु सलितिएल पुटतोर, सलितिएलुन मरि जेस्बाबेल.

13 जेस्बाबेलुना मरि अबियुद, अबियुदुना मरि एलकिमु, एलकिमुंकु अजिरल पुटतोर.

14 अजिरना मरि सादोक, सादोकुना मरि याकिम, याकिमुंकु एलहुदल पुटतोर.

15 एलहुदना मरि एलियाजर, एलियाजरना मरि मत्तन, मत्तानिकु याकोब पुटतोर.

16 याकोबुना मरि योसेप, योसेपुन मुत्तो मरियम. मरियम “किरिस्तु” इनना येसु सामिन यावल आंद.

17 ई परकारम अब्राहामुनगटाल दाविदुनदाका पडनालुं तंतुल्क. दाविदुनगटाल बेबिलोनते गुलाम कीसि ओयानदाका पडनालुं तंतुल्क. अल्हे बेबिलोनते यहुदिलुकुन गुलाम कीसि ओतागटाल अय्ते येसु किरिस्तु पुट्टनदाका पडनालुं तंतुल्क आतां.

येसुना पुटमळ

(लुकाल 2:1-7)

18 येसु किरिस्तुना पुटमळ इल्हा जर्गता. मरियमुन योसेपुंक तल्किस एर्ना बोट्टु कीतुर. योसेप मरियमुन इट्टक मुन्नेने पवित्र आत्माताः हेंदाल मरियमुंकु पीर आता.

19 मरियमुन तल्कता योसेप न्यायमते ताकाना मनकल मत्तोर. अद पीटे मत्ता संगति ओन्क तेळियतस्के दान अंतोरा मुन्ने बदनाम कियामान्नि इन्कुत्तोर. अदुनहाटीं बोर्के तेळियाकोटा मरियमुन होळसना विचारम कीसेक मत्तोर.

20 गानि इल्हा विचारम कीसेक मनानेके पेनदा दूताऽ कलाते वासि, “योसेपु, दाविदुन वंसमतोना, निमे मरियमुन नीवा मुत्तो इंचि ओप्कुनालय वेरियमा. बारित्ते दाना पीटे मनना पिडेम पवित्र आत्माहेंदाल आसि मंता.

21 अद पेडन कनंता, ओर ओना लोकुकुन ओरा पापालुकुनाल पिसागोटंतोर. अदुनहाटीं ओना पोरोल येसु दोस्सा,” इंचि वेहता.

22 मुन्ने पेनदा कबुरतोर रासता पोल्ले निजम आयनाहाटीं आता. अद पोल्ले इल्हा मंता.

23 “हुळाट, मरिमि आयवा पेगिड्क पीर आसि, वरोर मरिन कनांता.

ओना पोरोल इम्मानुएल दोस्सानुर.”*

इत्ते, “मनातोनि पेन मंता,” इंचि ई पोरोल्क अर्तम.

24 अस्के निद्रताल तेदतारित्ते योसेप पेनदा दूता वेहता परकारम कीतोर. ओर मरियमुन ओना मुत्तो इंचि स्विकारम कीतोर.

25 अयनागानि अद एर पूरानाल ओर दानतोनि मींडा हिल्लोर. ओर पेडन पोरोल येसु इंचि दोसतोर.

2

पंचगाल्क हूळानोर येसु सामिना काल्क मोळकालय वायमळ

1 येसु यहुदिया एरियाता बेतलहेम नाटे पुटतस्के अगा हेरोद इनना राजाल राज्येम कीसेक मत्तोर. अदे कालमते पोळ्द पेयसनाहेंदाल बोरो पंचांगम हूळानोर येस्सलेम सहरते वातुर.

2 वासि राजांक कलियसि, “पूने-पूने पुटता यहुदिलुकुना राजाल बगा मंतोर? पोळ्द पेयसनाहेके ओर पुटताप मोमोट उंदि सुक्कातुन हळतोम. ओना काल्क मोळकालय मोमोट वातोम,” इंचि राजन पूसकीतुर.

3 इद केंजसि हेरोद राजाल आनि येस्सलेम सहरअंता वेरियकुत्तुर.

‡ 1:18 पवित्र आत्मा पेनदा आत्मा, पेनदाहेंदाल दोर्कना आत्मा.
पेनदा दासिह्क. ☆ 1:23 यसायाह 7:14

§ 1:20 पेनदा दूता पेनदा पोल्लेतुन ब्रिमिपोर्नी पीसि वायना

4 अस्के हेरोद राजाल येस्सलेम सहरता पेद्दा पेर्मालोकुर्न* आनि अगाटा दर्मसास्त्रम कराहना गुस्लुकुन अंटोकुर्न केय्सि, “किरिस्तु बगा पुट्टनद मत्तोर?” इंचि पूसकीतोर.

5 अस्के ओर, “यहुदिया एरियाता बेतलहेम नाटेने,” इंचि वेहतुर.

6 एनकटा पेनदा कबुरतोर रासताप,

“ए यहुदिया एरियाता बूमिपोर्री मंदना बेतलहेम नाटेनोरिटा,

मिमेट मीवा नार, सिन्नादे इंचि इनकुन्मत.

बारित्ते नावा इस्त्राएल देसेमता लोकुलुकुन कापाळनोर,

आ राजाल मीवा नाटेनेन पुट्टनद मंता.”*

7 अस्के पोळ्द पेय्सनाहेंदाल वाता पंचांगम ह्ळानोकुर्न हेरोद राजाल सपुडदाका कलियसि “सुक्का बद वेलाक दिसता?” इंचि पूस कीसि एरपाट कीकुत्तोर.

8 पजा “मिमेट होंचि आ पुट्टा पेडन बेस पहकट आनि दिसतारित्ते नाकु वासि वेहट, अस्के ननागुडा होंचि ओना काल्क मोळ्ककन,” इंचि वेहचि ओर्कुन बेतलहेम नार लोहचीतोर.

9 पजा राजाल वेहता पोल्ले केंजसि आ पंचांगम ह्ळानोर अगटाल पेयस्तुर. मुन्ने बद सुक्का दिस्सि मत्तानो अद सुक्का ओरा मुन्ने-मुन्ने होंचि आ पेडल मत्ता जेगा पोर्रिन आगुता.

10 आ सुक्कातुन ह्ळसि ओर्कु इरगा आनंदम आता. पंचांगम ह्ळानोर येसु पुट्टगा बेतलहेम नाटे होत्तुर.

11 ओर लोता लोप्पो होंचि आ पेडन तल्लुर मरियमनगा ह्ळतुर. आ पेडाना काल्कनपोर्री अरसि मोळ्कतुर. आयंका ओर जोरानाल बंगारम, गंदकम,† ऊदु इसंटा एक्को दराता वस्तुक तेंडसि ओन्क हीतुर. 12 आयंका “मल्सि हेरोदनाहेके होनमट” इंचि पेन कलाते वेहताहेंका ओर इंकुंदि हर्रि पीसि ओरा देसेम पेय्सि होत्तुर.

येसुन पीसि इजिप्त देसेमते होनमळ

13 पंचांगम ह्ळानोर होत्तारित्ते, योसेपुंक उंदि पेनदा दूता कलाते दिस्सि, “निमे तेदा, पेडन आनि ओना तल्लुन पीसि इजिप्त देसेम पेय्सि होन. हेरोद राजाल पेडन हक्कनाहाटी पहकांतोर. अदुनहाटी नना नीकु मर्रा वेहनदाका अग्गेन मन्नु,” इंचि वेहता.

14 अस्के योसेप अदे नर्का पेडन आनि पेडाना तल्लुन पीकुंचि इजिप्त देसेम्कु पेय्सि होत्तोर.

15 हेरोद राजाल हासोननदाका अग्गेन मत्तोर. “नना नावा मर्रिन इजिप्त देसेमताल केयतन”* इंचि वेल्लेन वर्सा मुन्ने पेनदा कबुरतोरहेंदाल वेहामळ जर्गता, पोल्ले निजम आयगोम इंचि इदंता जर्गता.

हेरोद राजाल बेतलहेम नाटेना पिलाल्कुन हक्कंतोर

16 आ पंचांगम ह्ळाना लोकुलुक ओन नाडहे कीतद एरपाट कीसि, हेरोद राजांक इरगा होंग वाता. आ पंचांगम ह्ळानोरहेंदाल आ पेडल पुट्टा वेला एर्का कीकुंचि मत्ताहेंका बेतलहेम आनि पकापीसि मत्ता नाटेने मनना रौडु वर्सानोर, इंका रौडु वर्साकन्ना सिन्नोर्क अंटोर मांड्सा पिलाल्कुन हक्कट इंचि हेरोद राजाल आदेस हीतोर.

17 ई परकारम थिर्मयाह इनना एनकटा पेनदा कबुरतोर वेहता पेनदा पोल्ले निजम आता. अद पोल्ले इल्हा मत्ता:

18 *रेचेलना पिलाल्क हासि होत्तुर, इंचि रामाह इनना नाटे

दुक्कमते अळाना सप्पुड केंजावाता.

अद दाना पिलाल्कुनाहाटी अळसेके मत्ता,

बोर सम्मत किथिनागानि अद समत आयाहिल्ले.”*

* 2:4 पेद्दा पेर्मालोक ईर वेल्लेन मंदि मनांतुर. ☆ 2:6 मीका 5:2 † 2:11 गंदकम इद उंदि एक्को दराता वस्तु आंद.

☆ 2:15 होसे 11:1 ☆ 2:18 थिर्मयाह 31:15

योसेपना कुटुंबम इजिप्त देसेमताल मल्लिस वायमळ

19 कोन्नि रोजकुंक हेरोद राजाल हातोर. अस्के इजिप्तते मनना योसेपुनतोनि कलाते पेनदा दूता वासि,

20 “तेदा, पेडन हळ्कालय हळ्सेक मत्तोर हातोर, अदुनहेंके निमे पेडन आनि ओना तल्लुन पीसि इझ्राएल देसेमते मल्लिस होन,” इंचि इत्ता.

21 अस्के योसेपु पेडन आनि पेडाना तल्लुन पीसि इझ्राएल देसेमते मल्लिस होतोर.

22 गानि यहुदिया एरियाता हेरोद राजाल हातारित्ते “ओना जेगाते ओना मरि अर्केलाल राजाल हातोर,” इंचि तेळियतारित्ते ओर अगा होनालासि वेरियतोर. आयंका कलाते पेन वेहताहेंका ओर गालिल एरियाते होतोर.

23 अगा ओर नासरेत इनना नाटे होंचि जेगा पीतोर. इंचि “ओन नासरेततोर इंतुर.” इल्हा पेनदा कबुरतोर मुन्नेने वेहचि मत्तद इंदके निजम आता.

3

बापतिस्मा हियना योहान

(मरकुस 1:2-8; लूकाल 3:1-17; योहान 1:6; 1:19-28)

1-2 अदे कालमते, पेनदा पोरोलते एते मुळ्हाचि बापतिस्मा* हियना योहान यहुदिया एरियाता बय्लि जेगाते वातोर. वासि, “स्वर्ग राज्ये दग्गेर्क एत्ता, मिमेट मनसु मार्सकुंतु,” इंचेके वरगेयसि वेहालय दलगतोर.

3 एनकटा कालमते यसायाहल इनना पेनदा कबुरतोर, ई योहानुना बारेमते इल्हा वळिकसि मत्तोर गदा:

“सामिनाहाटीं हरिं तयार कीम्टु, ओना हरिं सवरगा कीम्टु,

इंचि केडाते केयानद उंदि अल्किर केंजावाता.”*

4 आ योहान लोटापेटा बूराते तयार कीता कपडिं केरसि तोल्दा पट्टा नडिक तासकुनुंदुर. ओर गोल्लाबामां† आनि तेने इवे तिडि तिनुंदुर.

5 येस्सलेम सहरताल, यहुदिया राज्येमता अन्नि जेगानाल आनि योर्दन बेरेटा सुट्ट-मट्टुना जेगाता लोकुल्क योहानुनगा वातुर.

6 वासि ओरा पापाल्क ओप्कुंचि ओनहेंदाल योर्दन बेरेटे बापतिस्मा येतकुत्तुर.

7 बापतिस्मा हियना जेगातगा वेल्लेन मंदि परिसिल्क, ‡सदुकिर्क§ वायानद हळसि योहान ओर्कुन, “ए कट्टला तरासनसंतोरिटा, पेनदा होंगुनाल तपिचकुनालय बापतिस्मा येतट इंचि मीकु बोर वेहतुर?

8 अयते मरि, निजमे मीवा मनसु मार्सकुत्तिर इंचि रूजुव कीसि हुस्पट.

9 वाट्टिदे, मोमोट अब्राहामुना वंसमतोरम आंदुम, इंचि बस्केने इनकुनमट. नना मीकु निजम वेहांतन, पेन अब्राहामनाहाटीं ई बंडानालगुडा पिलाल्क पुट्टिचि हिया परंता.

10 इंदके मराकुना हिहकुनगा मर्सु इरसि मंता. बव मराकुंक अयते बेसता पंडिं हादोंगों, अवुन नर्किसि तडमिते वाटमळ जर्गता.

11 मिमेट मीवा मनसु मार्सकुत्ताहाटीं नना मीकु एते मुळ्हाचि बापतिस्मा हीसेक मंतन. गानि नाकन्ना सक्तिमंतुड नावा पज्जोटाल वासंतोर. ओना हेरपुहकुन इटाना लायकगुडा नना हिल्लेन. ओर मीकु पवित्र आत्माते आनि तडमिते बापतिस्मा हीतोर.

12 ओना कयदे हेती मंता. ओर ओना कडातुन बेस साप कीतारित्ते गोहकुन तूरपाल्क पीसि गुम्मिते दोसंतोर, पोट्टुनबारे बस्केने पिर्स्वा तडमिते वाटसि बोळसंतोर,” इंचि इत्तोर.

* 3:1-2 बापतिस्मा येसुन पोरोलते एर तुंगमळ, उंदि दिक्सा, उंदि दंडकम. † 3:3 यसायाह 40:3 ‡ 3:4 गोल्लाबामा उंदि पुडि (ब्रिमिपोरॉ पिरकालम पेय्यंता). ‡ 3:7 परिसिल्क परिसिल्क इत्ते यहुदिल्लुकुन लोप्पोटद उंदि जाति आंद, ईर तिरियसि पुटमळतुन नमंतुर. § 3:7 सदुकिर्क सदुकिर्क यहुदिल्लुकुना लोप्पोटद उंदि जाति आंद. ईर मसाना नियमते ताकुंदुर आनि तिरियसि पुटमळतुन नम्माकोंदुर.

योहान येसुंक बापतिस्मा हीतोरे

(मरकुस 1:9-11; लूकाल 3:21-22; योहान 1:29-34)

13 पजा येसु, गालिल एरियाताल योर्दन बैरटगा, योहानुनाहेंदाल बापतिस्मा एतालय वातोरे.

14 अस्के “नना नीवा कयदाल बापतिस्मा येतकुनगोम, गानि निमे नहगा वासि बापतिस्मा एतकुन्मळा!” इंचि योहान येसुन आपालय हळतोरे.

15 अस्के येसु, “पेनदा इच्चागुडा मनम इल्हेन कियाना इंचि मंता. अदुनहाटी ई नीतिता दंडकम इल्हेने जर्गिकांटी,” इंचि इत्तोरे. इल्हा योहान येसुंक बापतिस्मा हियालय तयार आतोरे.

16 येसु बापतिस्मा एतसि एताल पलाते पेय्स्तस्के मब्बु बय्यारा आता. पेनदा आत्मा उंदि पावरेम पिट्टेतालेसी आसि येसुनपोर्री रेयतद येसु हळतोरे.

17 अस्केन स्वर्गमताल, “ईर ना पावरमगल्ला मर्रि आंदुर. ईर इल्ले नाकु बच्चोनो संबरम,” इंचि उंदि अल्किर केंजावाता.

4

देय्यमताहेंदाल येसुना परिकसा

(मरकुस 1:12-13; लूकाल 4:1-13)

1 पजा पेद्दा देय्यम येसुना पट्टु हळागोम इंचि पेनदा आत्मा ओन बय्लि जेगाते ओता.

2 अगा येसु नल्पै रोजकु, नल्पै नर्का उपासम मत्तोरे. अदुनहाटी येसुंक इरगा कर्वेस्ता.

3 अस्के आ पट्टु हळानोर येसुनगा वासि, “ओक्कला निमे पेनदा मर्रिन आते ई बंडां हारि आयि इंचि आदेस हीम,” इंचि इत्ता.

4 अस्के येसु इल्हा जवाब हीतोरे,

“मनकल सिराप वट्टि हारि तिचे पिस्सोर,

गानि पेनदा तोळदाल पेय्सना उंदि-उंदि पोल्लेताहेंदाल पिस्संतोरे.

इल्हा दर्मसास्त्रमते रासि मंता.”✧

5 पजा आ पेद्दा देय्यम येसुन येस्सलेम इनना पवित्र सहरते ओसि, गुळि पोर्री कोस्सक निल्हाचि इल्हा इत्ता.

6 “ओक्कला निमे पेनदा मर्रिन आते हिळु दुनका,

बारित्ते, नीकुन कापाळालय पेन दाना दूतांक आदेस हीता,

आनि आ दूतां वासि नीवा कालकुंक देब्बां दलगामनि इंचि,

नीकुन पोर्रीटद पोर्रिन अंदकुंतां,

इल्हा दर्मसास्त्रमते रासि मंता.”✧

7 अस्के येसु दान इल्हा इत्तोरे,

“निमे सामि इनना नीवा पेनदा पट्टु हळमा,

इल्हागुडा दर्मसास्त्रमते रासि मंता.”✧

8 पजा आ पेद्दा देय्यम येसुन उंदि एतु गुट्टापोर्री ओसि ओन्क दुनियाता अन्नि राज्येल्क, अबुना पेद्दातनाल्क बोत्तिगा हुपिच्चि,

9 “निमे नावा मुन्ने वंगिसि, नावा काल्क मोळकानय्ते, अवंता बोत्तिगा नीके हीतन,” इंचि इत्ता.

10 अस्के,

“ए देय्यमतुना हब्बेर होन, बारित्ते निमे नीवा पेनदुने मोळकना,

सिराप दानादे सेवा कियना, इल्हा दर्मसास्त्रमते रासि मंता.”✧

इंचि येसु दान इत्तोरे.

✧ 4:4 व्यवस्ताविवरन 8:3

✧ 4:6 बजन संहिता 91:11-12

✧ 4:7 व्यवस्ताविवरन 6:16

✧ 4:10

11 अल्हा इत्तरित्ते पेद्दा देय्यम ओन होळसि होत्ता. अस्के हुळट! पेनदा दूतां वासि येसुना सेवा कीतां.

येसु गालिल एरियाते सेवा कबळ सुस्व कीतोर

12 योहानुन जेलते वाटतुर इंचि येसुंक तेळियताहेंका ओर गालिल एरियाता नासरेत नाटेने होत्तोर.

13 अगटाल नासरेत नाटेने आगाकाँटा कपर्नाहूम इनना सहर होंचि मनालय दल्गतोर. आ सहर गालिल सेरवु पकापीसि मनना नप्तालि आनि जबलुन इनना एरियांक दल्गिसि मंता.

14 ओर अगा मत्ताहाटीं यसायाह इनना पेनदा कबुरतोनेतोनि पेन वेहता पोल्ले निजम आता. आ पोल्ले इल्हा मत्ता,

15 “जबलुन आनि नप्तालि एरियाता सेरवुना हरदाहेंदाल,

योर्दन बेरेटा हब्बेटा बाजूंक, यहूदि आयवोरा गालिल एरियाते,

16 बोर अय्ते लोकुल्क हीकटते उदिस मत्तुरो ओर पेद्दा वेलगुन हळतुर.

आनि बोरपोरो अय्ते हामुरता नीडा अर्सि मत्तानो,

ओर अंतोरपोरो वेल्गु अरता.”*

17 अस्केटाल येसु इल्हा वेहालय सुस्व कीतोर, “स्वर्ग राज्ये दग्गेर्क एत्ता इंचि मिमेट मनसु मार्सकुटु.”

येसु सिस्युल्कुन पेरीतोर

(मरकुस 1:16-20)

18 येसु गालिल समुद्रम ओड्डु पीसि होननेके वरोर सिमोनुन ओन पत्रुगुडा इनुंदुर आनि ओना तम्मुर अंदरियन हळतोर. ओर जिम्मां पिथ्यानोर आताहाटीं, समुद्रमते ओल्लां वाटसि जिम्मां पीसेक मत्तुर.

19 ओर्कुन हळसि, “नावा पज्जो वट, नना मीकुन मनकालोर्कुन नहगा थायानोर कीतन,” इंचि येसु इत्तोर.

20 अस्के ओर, बिराना ओरा ओल्लां अग्गेन होळसि ओना पज्जो होत्तुर.

21 अगटाल इंचिचो मुन्नेळ्क होत्तारित्ते येसु इव्वुर दादाल-तम्मुर इत्ते जब्दिना मर्कु याकोब आनि ओना तम्मुर योहानुन हळतोर. ओर ओना बाबोनतोनि डोंगापोरो ओल्लां सवरिच्चेके येसु ओर्कुन केयतोर.

22 अस्के ओर, बिराना ओरा बान आनि डोंगातुन होळसि ओना पज्जो होत्तुर.

गालिल एरियाते येसु तिरियसेक कीता कबाहक

(लूकाल 6:17-19)

23 यहूदिल्कुना दर्मसास्त्रम कराहना लोतागा* येसु पेनदा पोल्ले कराहतोर. स्वर्ग राज्ये बारेमते बेसता कबुर वेहचेके, लोकुल्कुना अन्नि तीरकुना रोगाल्कुन, कमजोरिन बेस कीसेके गालिल एरियाते पूरा तिरियतोर.

24 येसु कियना कबळ पूरा सिरिया देसेमंता तेळियसि होत्ता. दानहाटीं तीरतीराता रोगाल्कुनोर, नोपिनोर, देय्याल्क पीतोर, कुंदेल रोगमतोर आनि लकवा बिमारतोर इंसंटा लोकुल्कुन ओनगा तत्तुर. येसु ओर अंतोर्कुन बेस कीतोर.

25 गालिल एरिया, देकापोलिस एरिया, येस्सलेम सहर, यहूदिया एरिया आनि योर्दन बेरेटा हब्बेटाल वाता लोकुल्कुना मंदा येसुना पज्जो होनालय दल्गतुर.

5

1 वेल्लेटुर लोकुल्कुना मंदातुन हळसि येसु गुट्टापोरो होंचि उदतोर. उदतस्के सिस्युल्क इंका ओना दग्गेरा वातुर.

2 अस्के येसु ओर्क इल्हा कराहलय दल्गतोर.

* 4:16 यसायाह 9:1-2

* 4:23 दर्मसास्त्रम कराहना लोतागा यहूदिल्क पेनदुन मोळ्काना लोन.

पेन बोर्क आसिर्वाद हीता?
(लूकाल 6:20-26)

3 “बोर अय्ते आत्माताल गरिब* मंत्र पेन ओर्के आसिर्वाद† हीता, स्वर्ग राज्येम ओरदे आंद.

4 दुक्कमते मत्तोर्कुके पेन आसिर्वाद हीता, अद ओर्क दैरनेम हीता.

5 सादा सिंपल गुनम मत्तोर्कुके पेन आसिर्वाद हीता,

अद ई बूमि ओर्के हीसीता.

6 नीतिताहाटीं कर्वु दूपा इनाका कस्टम कियानोर्कुके पेन आसिर्वाद हीता,

पेन ओर्के समादानम हीता.

7 दया कियानोर्कुनपोर्रो पेन दया कीता,

पेन ओर्के आसिर्वाद हीता.

8 बोर ओना मनसु पेनदापोर्रो ईरतोर, पेन ओन्के आसिर्वाद हीता,

उंद रोजु ओरे पेनदुन हळांतोर.

9 पगातोर्कुन उंदि कियानोर्कुके पेन आसिर्वाद हीता,

ओर्कुने पेनदा पिलाल्क इंचि इंतुर.

10 पेनदा सत्तेमते ताकनाहाटीं तकलिप, दुक्कम अरानोर्कुके पेन आसिर्वाद हीता,

अद स्वर्ग राज्येम ओराहाटीगे मंता.”

11 “मिमेट नावा सिस्सुल्क आताहाटीं लोकुल्क मीवा अपमानम कीतुर, तिप्पल्क कीतुर, मीवा विरोदमते बच्चुंगो आबद्दम पोल्लें वेहांतुर, अस्के मीकुगुडा पेन आसिर्वाद हीता.

12 मीकन्ना मुन्नेटा पेनदा कब्रुतोर्कुनगुडा लोकुल्क इल्हेने तकलिप कीतुर. अदुनहाटीं मिमेट कुसिते मंटु, आनंदमते मंटु. स्वर्गमते मीकु पेद्दा इनाम दोर्कता.”

होव्वोर आनि वेडसि पोर्रोताल कराहता पोल्लें
(मरकुस 9:50; लूकाल 14:34-35)

13 मिमेट दुनियाताराहाटीं होव्वोरतसंतोर आंदिर. ओक्कला होव्वोर, होव्वोरलेसी रूसि वायाकॉटे अव्ते मर्रा बल्हा होव्वोर रूसि तरा परांतोम? अस्के अद बता कबळ्क ओज्जो. अद पलाते पोहचियना कबळ्के ओज्जंता, लोकुल्क दान जारसेके दांतुर.

14 गुट्टापोर्रो मत्ता नार दिसाकॉटा मन्नो. अल्हेने मिमेट दुनियाताहाटीं वेलगु आंदिर.

15 बोरे आयिर वेडसि निरिच्चि, दान गुल्ला हिळ्ळ ईर्र. एत्तुने उंदि दीसोडिपोर्रो ईर्रतुर. अस्के अद लोतोर अंतोर्कुके वेलगु हीता.

16 अदुनहाटीं मीवा पिस्वर लोकुल्कुना मुन्ने इल्हा मनना गदा मीवा वेलगुनसॉटा बेसता कबाह्कुन हळसि वैरतोर स्वर्गमता बाबानद कदर कियानुर.

दर्मसास्त्रमता बारेमते येसुना पोल्लें

17 नना मूसाना नियमतुन, पेनदा कब्रुतोर रासतदुन रद्द कियालय वातन इनकुनमट्टु. नना दान रद्द कियालय आयो गानि अव्ते नावा बारेमते रासता पोल्लेन पुरागा कियालय वातन.

18 नना मीकु निजम वेहचेके मंतन, बूमि मब्बु नासडेम आयानदाका दर्मसास्त्रमतद उंदि सिन्ना गीता, पोल्लेगुडा रद्द आयो.

19 मिमेट अंतोर आदेस परकारम ताकना. बोरे आयिर पेनदा सिन्ने आदेसतुनगुडा पालन कियाकॉटा, अल्हेने वैरतोन्कगुडा वेहानय्ते, ओर स्वर्ग राज्येमते सिन्नासि मनंतोर. गानि बोर अय्ते नियम परकारम ताकंतोर आनि इंकावरोर्क दाना परकारम ताकालय वेहांतोर ओर स्वर्ग राज्येमते बच्चोनी पेद्दा आयानुर.

* 5:3 आत्माताल गरिब बोर अय्ते ओना पिस्वरते ओन्क पेनदा अबसरम वेल्लेन मंता इंचि एएटा कीतोर ओरे आत्माताल गरिब.

† 5:3 आसिर्वाद गावाले मत्तद पेनदुन तल्सकुत्ताहेंका दोर्कते अद पेनदा आसिर्वाद आंद, इंतुर.

20 नना मीकु वेहासेक मंतन केंजट. दर्मसास्त्रम कराहना गुस्लकः आनि परिसिल्क ईरकन्ना मिमेट एक्को नीतिमंतुल्लक आयवा स्वर्ग राज्यमते नैगा पर्रिट.

होंगुना बारेमते येसु कराहता पोल्लें

21 मिमेट बोन हक्कमत, बोर अयते हक्कंतोर ओन्क कोरटताल सिक्सा आंता इंचि मीवा एनकटा पेद्दाल्कुंक पेन वेहतद मिमेट केंजसि मंतरि.

22 गानि नना मीकु वेहंतन गदा, बोर अयते ओना दंटातोनपोर्ी होंग आंतोर ओर पेनदा कोरटता सिक्सालायक आंतोर. अल्हेने बोर अयते ओना दंटातोना अपमानम कीतोर, ओर पेद्दाल्कुना कोरटता सिक्सालायक आंतोर. बोरन्ना अरे मुर्का इनानयते ओन्क देय्याल्क मनना अग्नि गुंडमताऽ सिक्सा आयार.

23 दानहाटीं निमे ओक्कला पेन गद्देतगा उपारम* वाटानेंके नीवा दंटातोर नीवा पोर्ी होंग आसि मंतोर इंचि मति वायानयते,

24 निमे आ उपारमतुन अग्गेन होळसिसि मुन्ने दंटातोनगा होन. दंटातोन समत कीतारित्ते वासि उपारम वाटा.

25 नीवा पगातोर नीकुन कोरटते ओयानेंके, निमे बिराना हरदेन ओन दोस्ती कीम. हिलाकोटे ओर नीकुन ओसि मजिस्टरूंक अप्पजेपनुर. मजिस्टर पोलिसुंक अप्पजेपनुर, पोलिस ओसि नीकुन जेलने वाटानुर.

26 नना नीकु निजम वेहांतन, कोत्तक-कोत्ता दोहनदाका निमे अगटाल पेय्सा पर्रिन.

बोगमतनम बारेमते येसु कराहता पोल्लें

27 बोगमतनमः कियमत इंचि एनकटा वेहतद मिमेट केंजसि मंतरि.

28 गानि नना मीकु वेहसेके गदा बोरन्ना आयिर, बदाना मुरतळता हेके पापि नदरते ह्ळानयते ओर ओना मनसुने दानतोनि बोगमतनम कीतापे.

29 अदुनहाटीं तिना कळुगिटा पापम किया वेहते, दान तेंडसि पोहतेने नीकु बेस मंनता. बारित्ते पूरा मेंदुल नरकमते होननदानकन्ना उंदि कळु होत्ते होन्नि.

30 अल्हेन ओक्कला नीवा तिना कय नीकुन पापम किया वेहते, दान नर्किसि पोहतेने बेस मंनता. बारित्ते नीवा पूरा मेंदुल नरकमते होननदानकन्ना मेंदुलता उंदि कय होत्ते होन्नि.

31 बोरन्ना ओना मुत्तोन होळसियाना मत्ते, दानकु ओर सोडसिट्टे हीसि होळसिय्यिर, इल्हा मूसाना नियमते वेहचि मंता.*

32 गानि नना मीकु वेहासेक गदा, बोरन्ना ओना मुत्तोन बोगमतनमता कारनम तप्पा वेंरे कारनमते होळसियानयते ओर दानतोनि बोगमतनम किया वेहांतोर. होळसीता मुत्तोनतोनि बोरन्ना मरमिं आयानयते ओरगुडा बोगमतनम कीतोर.

ओट्टु आनि पगाता बारेमते येसु कराहता पोल्लें

33 ओक्कला निमे ओट्टु तिनानयते, दान नेमुह्मा, गानि निमे तित्ता ओट्टुन पेनदाहाटीं पूरा कीम इल्हा मूसाना नियमते पेद्दाल्कुंक वेहतद मिमेट केंजतिर.

34 नना मीकु वेहासेक मंतन गदा, निमे ओट्टु तिनने तिनमा. स्वर्गम पेनदा राजगद्दे आंद, इंचि निमे दाना ओट्टु तिनमा.

35 अल्हेन बूमि, पेन काल्क ईर्ना जेगा आंद, अदुनहाटीं बूमि तोड इंचि दानदगुडा ओट्टु तिनमा. आनि येस्सलेम सहर पेद्दा महाराजानद इत्ते पेनदाद आंद, इंचि दानदगुडा ओट्टु तिनमा.

‡ 5:20 दर्मसास्त्रम कराहना गुस्लक दर्मसास्त्रम कराहना गुस्लक अग्नि तीरकुना कराहना कबळ कीतुर. 1 राजा 4:3, 2 राजा 18:18 § 5:22 अग्नि गुंडम बस्केळक बगाबगा पोत्तना पिर्वा तडमि, नरकम. * 5:23 उपारम गद्देपोर्ी वाटना पलारम. † 5:27 बोगमतनम मुत्तो मुय्दो मननेके, मुय्दो मुत्तो मननेके वेंरे मांडसातगा, मुरतळताग होत्ते, अद बोगमतनम आंद.

☆ 5:31 व्यवस्ताविवरन 24:1

36 नीवा तल्लातद उंदिका केल्लदुन तेल्लगा हिलाकोटे नल्लगा किया पर्रिन, बारित्ते अन्नि पेनदा कय्देन मंता, इंचि तल्लतदगुडा ओट्टु तिनमा.

37 दानहाटी नीवा वळ्ळुकुमळ हो इत्ते हो, हिलाकोटे हिल्ले इत्ते हिल्ले इंचि मन्नि. नीवा पोल्लेतुन निजम कियालय ओट्टु तिनानय्ते अद देय्यमताहेंदाल वाता.

बदला एतुमा

(लूकाल 6:29-30)

38 कळदुक बदला कळ, पलदुक बदला पल्लु तेंडाना इंचि मूसाना नियमते वेहता पोल्लेतुन मिमेट केंजतिर गदा.*

39 गानि नना मीकु वेहासेके मंतन गदा, मिमेट मीवा पगातोरकुंक एदुर तिरियमट्टु. ओक्कला बोरन्ना नीकुन तिना सेंपापोर्रो तंते निमे इंकुंदि सेंपागुडा तिरहा.

40 बोरन्ना नीपोर्रो केस कीसि नीवा कोट तेंडकुननय्ते ओन्क नीवा अंगिगुडा हीम.

41 अल्हेन बोरन्नागिटा नीकुन उंदि कोसेड लक्कु सामान पीसि वातिना, इंचि बल्मि कियानय्ते, निमे आ मनकनतोनि रौंडु कोसकुना लक्कु होन.

42 बोरन्ना नीकुन बतलन्ना तलकते अद ओन्क हीम. उदूदेरा तल्लिनगानि, हिल्ले इनमा.

अंतोरपोर्रो पावरम कीम्टु!

(लूकाल 6:27-28; 6:32-36)

43 “निमे नीवा दंटातोर्कुन पावरम कीम, पगातोर्कुन बारे हय्स्मा,” इंचि इत्तद मिमेट केंजतिर.*

44 गानि नना मीकु वेहानद बतल इत्ते, मीवा पगातोर्कुन पावरम कीम्टु. मीकुन तकलिप कियानोराहाटी मिमेट पारतना कीम्टु. अस्के मिमेट मीवा स्वर्गमते मनना बाबाना पिलाल्क आंतिर.

45 बारित्ते सेड्डोर्क, बेसतोर्क इव्वुर्किका पोळ्ळुनाहेंदाल वेलगु ओरे हीतोर. अल्हेन पापिल्लकुंक नीतिमंतुल्लकुंक पिर्गुडा ओरे हीतोर.

46 अयना मीकुन पावरम कियानोर्कुने मिमेट पावरम कीते मीकु पेनदाहेंदाल बता इनाम दोर्कता? कर वसुल कियानोरगुडा‡ अल्हे कीतुर.

47 निमे ओक्कला नीवा दंटातोर्कुनतोने बेस मत्ते, निमे वैरे बतल बेस कीसतिन? यहुदि आयवोरगुडा अल्हे कीतुर.

48 अदुनहाटी स्वर्गमते मंदना मीवा पेनबाबाल बल्हा पुरागा मंतोर अल्हे मिमेटगुडा मंटु.

6

दर्मम कियना बारेमते येसु कराहता पोल्लें

1 उसारते मंटु! मिमेट लोकुल्लकुंक हृप्सनाहाटी नीति कबाहक कियमट. अल्हा कीते, स्वर्गमते मनना मीवा पेनबाबानहेंदाल मीकु बतले इनाम दोर्का.

2 अदुनहेंके मिमेट बोनकन्ना दर्मम कियनेके डप हाटमट. बारित्ते अल्हा डोंगि लोकुल्लक मिटिंगुल्लकुना जेगाते,* हरकुन पीसि ओर्कुन कदर कियगोम इंचि कीतुर. नना निजम वेहंतन, बोर अय्ते अल्हा कीतुरो ओर्कु ओरा इनाम दोर्कता.

3 मिमेट बोनकन्ना दर्मम कियनेके मीवा तिना कय बतल कीतनो अद रोड्डा कय्दुक बिल्लकुल तेळियामन्नि.

4 अल्हा कीते मिमेट कियना दर्मम बोनकु तेळियाकोटा मनंता, अद बतल आंदो मीवा पेनबाबांक एर्के मंता. अदुन हळसे मीकु इनाम हीतोर.

* 5:38 निर्गमन 21:24 † 5:43 लैथ्यवस्ता 19:18 ‡ 5:46 कर वसुल कियानोर कर वसुल इत्ते गरपट्टि वसुल कियमळ, अद जमानाते ई गरपट्टि वसुल कियानोर इरगा बदमास मत्तुर. * 6:2 मिटिंगुल्लकुना जेगाते दर्मसास्त्रम कराहना लोहकुने.

पारतनाता बारेमते येसु कराहता पोर्ल्लें
(लूकाल 11:2-4)

5 अल्हेने बस्के अय्ते मिमेट पारतना कीतिरो, अस्के डोंगि लोकुलकुनलेसीं कियमट. डोंगि लोकुलक हरकुना मूलनपोर्रो, पंचादिं कियना जेगाने नित्तिसि पारतनां कीतुर, अल्हा कीते वेल्ले लोकुलक ओर्कुन हळंतुर इंचि ओर्कु अनपिचंता. गानि नना मीकु निजम वेहंतन, ओरा इनाम ओर्कु दोर्कुता.

6 गानि मिमेट पारतना कियना वेलाक लोता लोप्पोटा अरति होंचि तल्पु वाटकुंचि बोर्के दिसुवा मीवा पेनबाबांक पारतना कीम्ट. अस्के मीवा पेनबाबाल मीकु अद पारतनाता जवाब हीतोर.

7 वेरे जातितोर† पारतना कियनेके उंदे पोर्ल्लेतुन वेल्लेन मल्कां वळकांतुर, अल्हा कीते पेन ओरद केंजंता इंचि ओर्क अनपिचंता.

8 गानि मिमेट ओरा लेहका आयमट. बारित्ते मीकु बतल गावालाने अद तल्कका मुन्नेन पेनदुक एरपाट मनंता.

9 अदुनहाटीं मिमेट पारतना कियनेके इल्हा पारतना कीम्टु:

“ए स्वर्गमते मनना मावा पेनबाबा, नीवा पोरोलतुन अंतोर कदर कियिरकांटी.

10 निमेन मापोर्रो राज्ये मकीम, स्वर्गमते नीवा इच्चा बल्हा पूरा आंतानो, अल्हेन ई बूमिपोर्रोगुडा आयिकांटी.

11 माकु रोजता तिडि इय्यालागुडा हीम,

12 माकु विरोदमते कीता तप्पुकुन मोमोट बल्हा माप कीतोमो,
निमेगुडा मोमोट कीता तप्पुकुन माप कीम.

13 ‡माकुन पट्टुने अर्कांटा कापाळा, सेड्डातनमताल माकुन पिसागोट्टा.

बस्केळक राजाल निमेन आंदिन.

अदुनहाटीं ताकत आनि महिमा बस्केळक नीवदे आंद.” आमीन!§

14 मिमेट वेरेतोर तप्पुकुन माप कीते, स्वर्गमते मनना पेनबाबालगुडा मीकुन माप कीतोर.

15 गानि उंदि वेलाते मिमेट मनकालोरा तप्पुकु मापि कियाकॉटे स्वर्गमते मनना मीवा पेनबाबालगुडा मीकुन मापि किय्योर.

ओक्कापोद्दुना बारेमते येसु कराहता पोर्ल्लें

16 मिमेट बस्के ओक्कापोद्दु* मनंतिटो अस्के मिमेट जिब्बरा मोकोम कीसि मनमट. डोंगि लोकुलक अल्हेन कीतुर. ओर्कु अनपिचंता गदा जिब्बरा मोकोम कीसि मते लोकुलक ओर्कुन हळसि ईर ओक्कापोद्दु मंतुर इंचि इंतुर. गानि नना मीकु निजम वेहंतन, ओर्कु ओरा इनाम दोर्कुता.

17 अदुनहाटीं मिमेट बस्के अय्ते ओक्कापोद्दु मनंतिटो, अस्के तल्लाक निय होकसि मोकम नोर्राट.

18 अल्हा कीते ओक्कापोद्दु मत्तद बोर्के दिस्सो गानि बोर्के दिसुवा मीवा पेनबाबाल मात्रम ओक्का पोद्दुन हळांतोर. अदुनहेंके मीकु इनाम हीतोर.

दनमता बारेमते येसु कराहता पोर्ल्लें

(लूकाल 12:33-34; 11:34-36; 16:13)

19 मिमेट बूमिपोर्रो दनम जमा कीते अदुन सेदेल तिचि, सिल्लुम पीसि नासडेम आंता आनि दोंगाल्क दोसकुंचि ओतुर. अदुनहाटीं ई बूमिमे दनम जमा कियमट.

20 गानि मिमेट मीवाहाटीं स्वर्गमते दनम जमा कीम्ट, अगा अवुन सेदेल तिन्नो, सिल्लुम पिय्यो, दोंगाल्कगुडा दोसकुंचि ओयुर.

† 6:7 वेरे जातितोर वेरे हरदे ताकानोर, वेरे पेनदुक मोळ्कानोर. ‡ 6:13 इद वचनम कोन्नि पांडु लिपिने हिल्ले. § 6:13

आमीन इत्ते अल्हेन आयि, सहमत मंतन. इंचि अर्तम. * 6:16 ओक्कापोद्दु उपासम (12 गंटनदाका बतले तिना-उनाकॉटा पेनदा बक्वित्ते मनमळ.)

21 बारित्ते मीवा दनम बगा मत्ते अग्गेन मीवा मनसु मनंता.

22 मीवा कळ्ळु मेंदुलता वेडसि आंदु, अदुनहाटी मीवा कळ्ळु बेस मत्ते, मीवा मेंदुलंता वेलगु मनंता.

23 मीवा कळ्ळु बेस हिलाकोटे मीवा मेंदुलंता हीकटे मनंता. दानहाटी मिमेटगिटा पेनदा वेलगुन हळाकोटे मीवा पिस्वरंता हीकटे मनंता.

24 अल्हेन वरोर मनकल इव्वुर मालकुल्लुकुनगा सेवा किया पर्रीर. अल्हा सेवा कीते ओर वरोन बेस पावरम कीतोर, इंकावरोन हयसोर. हिलाकोटे वरोना पोल्ले बेस केजंतोर इंकावरोना पोल्ले बारे केजोर. इंचि मिमेट पेनदुन आनि दनमतुन उंदे मल्ला सेवा किया पर्रीर.

रंदि कियमट

(लूकाल 12:22-32)

25 अदुनहाटी नना मीकु वेहनद बतल इत्ते जीवा तिडिकन्ना मुक्केम, मेंदुल कपडीकन्ना मुक्केम आंदु, इंचि पिस्सनाहाटी तिनकोम बतल, उनकोम बतल, इंका मेंदुल्लाहेंका केर्कोम बतल इंचेके रंदि कियमट.

26 आ पिट्टेनहेके हुळट, अव वीतो आनि कोय्यो, अचोने आयका गुम्मिने जमागुडा किय्यो, अयनागानि मीवा स्वर्गमते मनना पेनबाबाल अवुंक तिडि हीतोर. मीकु अयते पेनदा मुन्ने पिट्टेकन्ना बच्चोनो विलवा मंता इदु मीकु एर्के मंता.

27 अयनागानि रंदि कीसि ओना आवसुन उंदि गंटा एक्को बेरसागोटतोर मीवा नड्डुम बोरन्ना मंतोरा?

28 मरि मिमेट केरना कपडिनहाटी रंदि बारि कीतिट? केडाते पूयाना आ पूतनहेके हुळट अव बल्हा बेर्ससंतांगो! अव कबळ किय्यो, कपडि इंका कुट्टो.

29 गानि नना वेहानद बतल इत्ते, सुलेमान राजाल वेल्लेन सिरमंत मंचिगुडा ओना कपडि आ पूतानाल उंदि पूतातच्चोगुडा सोकु मनाहिल्लें.

30 अरे विस्वासम तक्को लोक्किरिटा, जाडि इय्याला मंता, नाडि तडमिटे वेसि दांता. अयना पेनबाबाल अवुंक इच्चो बेसता कपडि हीतोर, अयते अवुंकन्ना बेसता कपडि मीकु हिय्या पर्रीरा?

31 अदुनहाटी बतल तिदकोम, बतल उंडकोम, बतल केर्कोम इंचि रंदि कीसेक मनमट.

32 विस्वासम कियवोरगुडा इव गावाले इंचि तनलाळसेक मनांतुर. गानि मीकु इव अन्नि गावाले इंचि स्वर्गमते मनना मीवा पेनबाबांक एर्के मंता.

33 अदुनहाटी मिमेट मुन्ने स्वर्ग राज्यमतुन आनि पेनदा नीतितुन पहकट, अस्के इव अन्निगुडा मीकु दोर्कनुं.

34 बस्केळक बद्दना बद रंदि मनंता. इंचि नाडीता रंदि इयालेन कियमट. नाडीता रंदि नाडीताहाटी होळसीम्पु.

7

बेरतोरपोरो तप्पु दोसना बारेमते येसुना विचाराल्क

(लूकाल 6:37-38; 6:41-42)

1 मिमेट बेरतोरपोरो दोसेम दोसमट, अस्के मीपोरोगुडा पेन दोसेम दोस्सो.

2 मिमेट बल्हा दोसेम दोस्सतिरो, अल्हेने मीपोरोगुडा पेन दोसेम दोस्संता. बद कोल्लाते मिमेट हीतिरो, अदे कोल्लाते मीकु हियमळ जर्गता.

3 अरे डोंगि मनका, नीवा कळ्ळे अरता सिल्कुन तेंडका, नीवा दंतातोना कळ्ळे अरता बुस्सितुन निमे बारि तेंडा हळंतिन?

4 नीवा कळ्ळेन सिल्कु अर्सि मननेके, “नीवा कळ्ळे अरता बुस्सितुन तेंडाहीम इंचि नीवा दंतातोना बल्हा इना पर्रीतिन?”

5 मोदाला नीवा कळदा सित्कुन तेंडा. अस्के नीवा दंटातोना कळदा बुस्सितुन तेंडालय नीकु बेस दिस्सार.

6 पवित्र वस्तुक नय्कुन मुन्ने वाटमट, पद्दिना मुन्ने मुच्याल्क पोच्चुमट. अल्हा कीते पद्दिं अवन काल्कुने जारांतां, नय्कु बारे मीपोरो अर्सि मीकुने कस्कंतां.

मीकु गावाले मत्तद पेनदुक वेहट
(लूकाल 11:9-13)

7 पेनदुन तल्कट मीकु हिय्यार, प्हकट मीकु दोर्कार, तल्पुन तनट तल्पु तेंडार.

8 बारिल्ले बोर अय्ते तल्कंतोर ओन्क हियमळ जर्गता, बोर अय्ते प्हकंतोर ओन्क दोर्कता, बोर अय्ते तल्पुन तनंतोर ओनाहाटी तल्पु तेंडमळ जर्गता.

9 मीलोप्पो बोरन्ना मनकल मंतोरा, ओना मरि हारि तल्कते बंडा हियानोर?

10 हिलाकोटे जिम्मा तल्कते तरास हियना मनकल मंतोरा? इल्हा बोरे किय्योर.

11 अय्ते मिमेट सेड्डोर्क आसिगुडा मीवा पिलाल्कुंक बेसतव हियना इंचि मीकु तेळियतस्के, स्वर्गमते मनना मीवा पेनबाबाल ओन तल्कानोर्कुंक वेल्लेन बेसतव हिय्योरा?

12 अदुनहाटी लोकुल्क मीवातोनि बल्हा मनना इंचि मिमेट इनकुंतिरो, अल्हेन मिमेट ओरतोनि मंट. इदे पोल्ले मूसाना नियम आनि पेनदा कबुरतोर रासतदगुडा वेहंता.

स्वर्गम आनि नरकमकु होनना हर्रि
(लूकाल 13:24)

13 नासडेमताहेके होनना हर्रि, तल्पु नेर्वुक नेरवु मंता, आ हरपीसि वेल्ले मंदि दांतुर. अदुनहाटी इर्कुटोम मत्ता हरपीसि होळियट.

14 पिस्वराताहेके होनना हर्रि आनि तल्पु वेल्ले इर्कुटोम मंता. आ हर्रि वेल्ले तक्को मंदिक दोर्कता.

डोंगि कबुरतोरा बारेमते येसु वेहता पोल्लें
(लूकाल 6:43-44; 13:25-27)

15 आबद्दम कबुरतोरागटाल उसारते मंट. ओर मिहगा सादा गोर्रैतालेसीं वांतुर गानि ओरा लोप्पो तोडेल्लिता* गुनम मंता.

16 ओर कियाना कबाहकुन हळसे ओर डोंगि कबुरतोर इंचि एरपाट कीतिर. बल्हा अय्ते हाहकुना जप्पिताल अंगुर पंडिं हादो, हिलाकोटे इरामुस्टी† मराकुनाल मरका पंडिं हादो,

17 अल्हेन बेसता मराकु बेसता पंडिं हादंतां, कराब मराकु कराब पंडिं हादंतां.

18 बेसता मराकु कराब पंडिं हादो कराब मराकु बेसता पंडिं हादो.

19 बव मराकु बेसता पंडिं हादो असोँटव अन्नि मराकुन नर्किसि तडमिंते वांटुर.

20 इंचि डोंगि कबुरतोर्कुन मिमेट ओर कियाना कबाहकुन हळसे एरपाट कीकिट.

21 नाकुन सामि सामि इनानोर अंतोर स्वर्ग राज्येमते होळ्युर. गानि स्वर्गमते मनना नावा पेनबाबाना मनसु मत्ताप बोर अय्ते ताकंतुर ओरै स्वर्ग राज्येमते होळियंतुर.

22 नना न्यायम कियाना आकिर रोजुने वेल्लेटुर नहगा वासि, सामि मोमोट नीवा पोरोलते बविस्वयानि‡ कीतोम, नीवा पोरोलते देय्याल्क-बूताल्कुन पेचाहतोम, नीवा पोरोलते बच्चुंगो अद्बूतामाता कबाहक कीतोम, इंचेके इनानुर.

23 अस्के ओर्कुन, ए सेड्डा कबाहक कियानोरिटा! नना मीकुन एरपाट किय्योन. मिमेट इगेटाल पेय्सि होंटु इंचि इंतन.

तेल्चि मत्तोर आनि तेल्चि हिल्वा मनकल
(लूकाल 6:47-49)

* 7:15 तोडेल्लि उंदि केडा जिवरासि पोरोल. † 7:16 इरामुस्टी इद उंदि सेदु (कयमुल) पंडिना मरा आंद. दीना कायां सेदु (कयमुल, ओगोर) मंतां. ‡ 7:22 बविस्वयानि मुन्ने जरगनदुन वेहामळ इत्ते बविस्वयानि हळमळ.

24 अदुनहाटीं नावा पोल्लें केंजसि दाना परकारम ताकाना हरेक मनकल, बंडा पुनादिपोर्री लोन दोहकुता तेल्विता मनकनलेसीं मंतोर.

25 पिर्न वाता, कम्मुड वाता, वळि-दुमारम वासि लोतुक दल्लिना गानि अद कूला हिल्ले. बारित्ते अद लोता पुनादि बंडातोनि दोहाचि मंता.

26 गानि नावा पोल्लें केंजसि, दाना परकारम ताकवा हरेक मनकल, उस्केते लोन दोहकुता तेल्वि हिल्लासंतोर आंदुर.

27 पिर्न वाता, कम्मुड वाता वळि-दुमारम वासि लोतुक दल्लिता अस्के अद लोन पूरा कूल्सि पाड आता, इंचि येसु इत्तोर.

28 येसु पेनदा पोल्लें कराहमळ महातस्के ओना कराहमळतुन केंजसि लोकुल्लक वेल्ले इचंन्रम आतुर.

29 बारित्ते येसु ओर्कु ओरा दर्मसास्त्रम कराहना गुस्कुनलेसीं आयो गानि अदिकारम मत्ताप कराहतोर.

8

येसु वरोन बिमार मनकन बेस कीतोर

(मरकुस 1:40-45; लूकाल 5:12-16)

1 येसु गुट्टा पोर्रीटाल हिळ्ळ रेयतस्के वेल्लेन लोकुल्लक ओना पज्जो-पज्जो वासेक मत्तुर.

2 ह्ळ्ळाट! अस्के वरोर कुस्टरोगम* आता मनकल येसुनगा वासि ओना काल्कुनपोर्री अर्सि, "सामि, निमे इन्कुल्ले नाकुन बेस किया परीतिन," इंचि इत्तोर.

3 अस्के येसु कय मुन्नेळ्ळ कीसि ओन इट्टिस इल्हा इत्तोर, "निमे बेस आयगोम इंचि नावा मनसु मंता, बेस आम" इंचि इत्ता इन्मळे आ कुस्टरोगम आसि मत्ता मनकल बेस आतोर.

4 पजा, "इगे जर्गतद बोर्के वेहमा. गानि निमे होंचि मीवा पेर्माकां ह्ळ्प्सा. कुस्टरोगमताल निमे बेस आता गवाइ इंचि मूसाल वेहता मोक्कु हीम. अदुन ह्ळ्ळसि निमे बेस आतिन इंचि लोकुल्लुकुंक एरपाट आंता," इंचि येसु ओन इत्तोर.

दरोगाना गट्टि विस्वासम

(लूकाल 7:1-10)

5 येसु कपर्नाहम सहर होत्तस्के ओनगा वरोर दरोगल‡ वासि,

6 "सामि, नावा जीतागाड लकवा बिमारते इरगा तकलिपने लोन मंतोर," इंचि सहायमहाटीं विनंति कीतोर.

7 अस्के, "नना वासि ओन बेस कीतिन," इंचि येसु दरोगन इत्तोर.

8-9 गानि आ दरोगल, "सामि, निमे नावा लोन वायानच्चो पेदु दातनम नहगा हिल्ले. ननागुडा वरोर अदिकारिना कयदा हिळ्ळ कबळ कीतिन; नावा कयदा हिळ्ळगुडा सिपाइल्लक मंतुर. नना अव्टेटाल वरोन 'होन' इत्ते ओर दांतोर, इंकावरोन 'वा' इत्ते ओर वांतोर. अचोने आयका नावा दासुन, 'इद कीम' इत्ते ओर कीतोर. अदुनहाटीं निमे सिराप उंदि पोल्ले इन, नावा जीतागाड बेस आंतोर." इंचि येसुन इत्तोर.

10 इद केंजसि येसुंक वेल्ले इचंन्रम आता. अस्के ओना पज्जो ताकसेक मत्तोर्कुन इल्हा इत्तोर, "नना मीकु निजम वेहांतन, इस्त्राएल लोकुल्लुकुन लोप्पोगुडा इच्चोन विस्वासम मत्ता मनकल नाकु बग्गेन दोर्का हिल्लोर.

* 8:2 कुस्टरोगम इद रोगम आतोर कयक-काल्कुन वेलाक मोंडि-मोंडि आंतां, इदुन मोंडि रोगम इंका इत्तुर. † 8:4 पेर्माक ईर पेन आनि लोकुल्लुकुन नड्डुडुम मंचि कबळ कियाना मनकल आनि लोकुल्लुकुनहेंदाल पेनदुक मोक्कु इंका हीतोर. ‡ 8:5 दरोगल 100 मंदि सिपाइल्लुकुनपोर्री वरोर अदिकारि मनांतोर ओन दरोगल इत्तुर.

11 इंका नना मीकु वेहंतन गदा, वेल्लेटुर लोकुलक पोळ्द पेयसनहेंदाल, पोळ्द अरानाहेंदाल वासि, अब्राहाम, इसाक, याकोब ईरतोनि स्वर्ग राज्यमते उद्दानुर.

12 गानि बोर अय्ते, 'मोमोट पेनदा संतानम आंदुम' इनकुंतुरो, ओर्कुन मात्रम पेन पलाते हीकटते वातसीता. अगा सिराप अळमळ, पल्लुकु कोर्कमळे मंता, "इंचि वेहतोर.

13 पजा येसु आ दरोगन, "निमे होन, नीवा विस्वासम बल्हा मंतनो अल्हेन नीकु जर्गता" इंचि इत्ता इनमडे ओना जीतागाड बेस आतोर.

येसु वेल्लेन मंदितुन बेस कीतोर
(मरकुस 1:29-34; लूकाल 4:38-41)

14 पजा येसु पन्नना लोन वातस्के ओना पोरड एळकि वासि मीडसि मत्तद हळतोर.

15 येसु दाना कयदुन इट्टा इट्टुडे एळकि रेय्ता. अस्के अद तेदसि येसुना सेवा कियालय दल्गता.

16 पजा पोळ्द होंचि लोकुलक देय्यालक पीतीर्कुन वेल्लेन मंदितुन येसुनगा पीसि वातस्के ओर उंदे पोल्लेते देय्यालकुन गेदमिसि, बिमार मत्ता अंतोर्कुन बेस कीतोर.

17 अद अल्हा बारि जर्गुता इत्ते एनकटा बस्केनो यसायाह इनना पेनदा कबुरतोर वेहता पोल्ले पुरागा आयना इंचि जर्गुता. यसयाल इल्हा वेहचि मत्तोर:

"ओर मना रोगालकुन तेंडसि पोहतोर मना बादन एतकुत्तोर."*

येसुना सिस्स्युड आयना विचारम
(लूकाल 9:57-60)

18 येसु ओना सुट्टु वेल्लेन मंदि मत्तद हळसि ओना सिस्स्युलकुन मिमेट समुद्रमता हब्बेटा बाजुंक होंट, इंचि आदेस हीतोर.

19 पजा वरोर दर्मसास्त्रम कराहना गुरु ओनगा वासि, "गुरु, निमे बगा दांतिनो अगा नना नीवा पज्जो वांतन." इंचि इत्तोर.

20 अस्के येसु ओन इल्हा इत्तोर, "नक्कांक बारे मनालय सोंरें मंतां, पिट्टेंक मनालय गूडां मंतां, गानि मनकना रूपमते पुटतोन नाकु मात्रम तल्ला ईरालयगुडा जेगा हिल्ले."

21 अस्के येसुना पज्जो वातोरवेटाल वरोर, "सामि, नाकुन मोदाला होनाहीम, नावा बाबाल हातास्के ओन गति कीसि वांतन." इंचि येसुन इत्तोर.

22 गानि, "हिल्ले, निमे इंदकेन नावा पज्जो वा. बोर अय्ते हाताप मंतुरो, ओरे ओरा हातोर गति किथ्थिर,"* इंचि येसु ओन इत्तोर.

येसु दुमारमतुन आपंतोर
(मरकुस 4:35-41; लूकाल 8:22-25)

23 पजा येसु डोंगाते एककुतंका ओना सिस्स्युलक इंका ओना पज्जेन एककुतुर.

24 अस्के समुद्रमते उंदि पेद्दा दुमारम वाता. आ दुमारम इच्चो पेद्देद मत्ता गदा, एता तळ्ने डोंगा मुळगालय दल्गता. गानि येसु मात्रम आ डोंगाते मीडसि मत्तोर.

25 अस्के सिस्स्युलक ओनगा होंचि ओन निद्रताल तेहाचि, "सामि, माकुन कापाळा, मनम नासडेम आसि होंचंतोम," इंचि इत्तुर.

26 अस्के, "अरे विस्वासम तक्को लोकुरिटा, बारि वेरियंतोर?" इंचि येसु ओर्कुन इत्तोर. पजा तेदसि आ वळि-दुमारमतुन आनि समुद्रमतुन गदरिचतोर अय्ते अव सांत आतां.

27 अद हळसि सिस्स्युलकुंक पेद्दा इचंत्रम आता. अस्के ओर, "अरे ईर बसोंटा मनकल रो, वळि, समुद्रमगुडा ईना पोल्ले केंजंता!" इंचि इत्तुर.

§ 8:11 अब्राहाम, इसाक, याकोब ईर इस्राएल लोकुलकुना पेद्दालक आंदुर. ☆ 8:17 यसायाह 53:4 * 8:22 बोर अय्ते हाताप मंतुरो, ओरे ओरा हातोर गति किथ्थिर इद पोल्ले विस्वासम कियवोर्क संबंदिस्तद आंद. येसुन विस्वासम कीतोर हासि मर्रां जीवाते तेदतुर इंचि अर्तम.

येसु इव्वुर मनकालोर्कुन पीता देय्याल्कुन गेदमंतोर
(मरकुस 5:1-20; लूकाल 8:26-39)

28 पजा ओर समुद्रमता हब्बेटा बाजुंक मनना गदरेकरकुना एरियक एव्वुर. अस्के इव्वुर देय्याल्क पीता मनकालोर तापळन बोग्ळाताहेंदाला† येसुनगा वातुर. ओर इरगा वेरियनाल मत्तुर इंचि ओर मत्ता हरदाहेके बोर ताकाकोदुर.

29 हुळाट! ओर इव्वुर येसुनगा वासि, “पेनदा मर्रीना, मातोनि नीकु बता कबळ? इत्ता वेलाकन्ना मुन्नेन निमे माकु सिक्सा हियालय वातिना?” इंचि मोत्कुत्तुर.

30 ओर नित्तिसि मत्तगटाल इच्चोन लक्कु पद्दिना मंदा मेय्सेके मत्ता.

31 अस्के, “ओक्कला निमे माकुन इरावेटाल तेंडानयते माकुन आ पद्दिना मंदाते होनाहीम,” इंचि आ देय्याल्क येसुन विनंति कीतां.

32 अयते ओर आ देय्याल्कुन, “होंट” इंचि इत्तोर, इत्तस्के आ देय्याल्क ओरावेटाल पेय्सि पद्दिना मंदाते होत्तां. हुळाट! पजा आ पद्दिना मंदा समुद्रम ओड्डुन पोरोटाल हिळत्तुक वितसि एते मुळ्ळिसि हासोत्तां.

33 अस्के आ पद्दिं मेहानोर नाटे वित्सि होंचि अगा जर्गतद आनि आ देय्याल्क पीतोरद बतल आता अन्नि वेहतुर.

34 हुळाट! अस्के पूरा नाटेना लोकल्क येसुंक कलियालय वातुर. वासि ओर बस्के अयते येसुन हळत्तुरो अस्के, “मावा एरियाताल पेय्सि होन,” इंचि ओन विनंति कीतुर. बारित्ते पद्दिं हाताहेंका अद नाटेनोरद वेल्लेन नुकसान आता.

9

वरोर कय्क-काल्क वायवा मनकन येसु बेस कीतोर
(मरकुस 2:1-12; लूकाल 5:17-26)

1 येसु डोंगाते उदिस सेरवु दाटसि ओना सहर मल्सि वातोर.

2 ह्ळा! अस्के इच्चुर लोकल्क वरोर लकवा बिमारतोन कटुलते वाटसि येसुनगा तत्तुर. ओरा विस्वासमतुन ह्ळसि येसु लकवा बिमारतोन, “कोको, दैरनेम इर्ना. नीवा पापाल्क मापि आतां,” इंचि इत्तोर.

3 अस्के ह्ळा, “ई मनकल पेनदा अपमानम कीसंतोर.” इंचि अगा मत्ता दर्मसास्त्रम कराहना गुस्लक ओर-ओर गुसगुसा इनालय दल्गुत्तुर.

4 ओरा विचाराल्क एरपाट कीसि येसु ओर्कुन इल्हा इत्तोर, “मी मनसुने मिमेट कराब विचाराल्क बारि कीतिर?

5 बद अल्कगा मंता? बिमारतोन, ‘नीवा पापाल्क मापि आतां इंचि इनमळा, हिलाकोटे तेदिस ताका इनमळा?’

6 गानि मनकना रूपमते पुटतोन नाकु बूमिपोरोटा पापाल्कुन माप कियना अदिकारम मंता इंचि मिमेट एरपाट कियमळ गावाले,” इंचि इत्तोर. आ लकवा बिमारतोनगुडा “तेदिस कटुल पीसि लोन होन,” इंचि वेहतोर.

7 ओर तेदिसि लोन होत्तोर.

8 अगा मत्ता लोकल्कुक अद ह्ळसि वेरियसि इचंन्रम आता. “इच्चोर पेद्दा अदिकारम पेन मनकालोर्कुंक हीता,” इंचि आ पेनदा स्तुति कीतुर.

येसु मत्तयाल इनना मनकन केयंतोर
(मरकुस 2:13-17; लूकाल 5:27-32)

† 8:28 तापळन बोग्ळा गदरेकर देसेमतोर हातोर्कुन सौरिने ईरुदुर.

9 आयंका येसु अगटाल होननेके मत्तयाल इनना वरोर मनकल कर वसुल कियना नाकातगा उद्दिदिसि मत्तद हळतोर. ओन नावा पज्जो वा! इंचि इत्तस्के ओर तेदसि ओना पज्जो होतोर.

10 पजा येसु मत्तयाना लोन गाटो तिचेके मननेके वेल्लेटुर कर वसुल कियानोर आनि पापि लोकुल्क वासि येसु आनि ओना सिस्स्युल्कनतोनि गाटो तिनालय उदतुर.

11 अदुन हळसि, “मी गुरु कर वसुल कियानोरतोनि आनि पापि लोकुल्कनतोनि गाटो बारि तितोर?” इंचि परिसिल्क ओना सिस्स्युल्कन पूसकीतुर.

12-13 अस्के येसु अद केंजसि ओर्कुन इल्हा इत्तोर, “बिमार हिल्वोर्कुंक डाक्टरना अक्सरम मन्नो गानि बिमार मत्तोर्कुंक डाक्टरना अक्सरम मनंता. अदुनहाटी, मिमेट होंट, होंचि ‘नना कोरानद दया आंद, मोक्कु आयो,’ इंचि दर्मसास्त्रमते रासि मनना पोल्लेता अर्तमतुन तेळियागोटकुंटु. बारित्ते नना नीतिमंतुल्कन केयालय आयो गानि पापि लोकुल्कन केयालय वातन,” इंचि इत्तोर.

ओक्कापोद्दुना बारेमते येसु कराहता पोल्लें
(मरकुस 2:18-22; लूकाल 5:33-39)

14 आयंका बापतिस्मा हियना योहानुना सिस्स्युल्क येसुनगा वासि, “गुरु, परिसिल्क आनि मोमोट ऊके ओक्कापोद्दु मनंतोम गानि नीवा सिस्स्युल्क बस्केने ओक्कापोद्दु मननुर. अल्हा बारि?” इंचि पूसकीतुर.

15 अस्के येसु ओर्क इल्हा वेहतोर, “मरमिन पेडल मरमिं वाता हेडमितोरतोनि मननेके, ओर्कु दुक्कम आयाना अक्सरम मनंतना? मन्नो. गानि मरमिन पेडल ओरागटाल लक्कु आयाना रोजकु वायनुं, अस्के ओर ओक्कापोद्दु मनानुर.”

16 पजा येसु ओर्कु रौडु सिन्ना वेसुडिं वेहतोर. “बारे आयिर, पडना कप्पिड हर्ते दानकु पूना कप्पिडता गंडा अंटा वाट्ति कुट्टोर. अल्हा कुट्टानयते अंटा वाटता कप्पिड गंडा पडना कप्पिडतुन इंचिचो हरहंता.

17 अल्हेने पूना अंगुर पानकमतुन पडना तोलपुर्काते बोरे दोस्सुर. ओक्कला दोस्सानयते आ तोलपुर्का पय्पि पानकम पौंगिस दांता आनि तोलपुर्कागुडा नासडेम आंता. इंचि पूना अंगुर पानकम पूना तोलपुर्कातेन दोसंतुर. अस्के रौडुगुडा बेस मनंता.” इंचि वेहतोर.

यायिर इनानोना मिय्यड आनि कप्पिड होनना मुरतळ
(मरकुस 5:21-43; लूकाल 8:40-56)

18 इव पोल्लें येसु ओरतोनि वळकसेके मन्नेकेन, दर्मसास्त्रम कराहना लोता वरोर अदिकारि अगा वासि, “नावा मिय्यड इंदकेने हाता गुरु, गानि निमे वासि दानपोर्गे कय इरते, दान्क मर्रा जीवा अरंता,” इंचि येसुना काल्कनपोर्गे अर्सि विनंति कीतोर.

19 अस्के येसु तेदसि, ओना सिस्स्युल्कनतोनि आ अदिकारिन पज्जो होतोर.

20-21 होननेके पनॅंड वर्सानाल उंदेतीर कप्पिड आयना मुरतळ कलियता. कलियसि, “नना सिराप येसुना कप्पिडतुन इट्टिनागानि बेस आंतन,” इंचि दाना मनसुने इनकुलता. आनि पज्जोटाल वासि ओना कप्पिडता अंचुन इट्टा.

22 इट्टारित्ते येसु पज्जो मल्सि हळसि, “दैरनेम इर्रा पेगिटुना, नीवा विस्वासमे नीकुन बेस कीता,” इंचि इत्तोर. अस्केने अद बेस आता.

23 पजा ओर दर्मसास्त्रम कराहना लोता अदिकारिना लोन होत्तस्के, हामुरता डोलकु-बाजें, लोकुल्क जमा आसि अळानद, मोल्कुनानद हळतोर.

24 अस्के येसु ओर्कुन “पलाते होंट पेगिड हाया हिल्ले, अद अयते मीडसि मंता.” इंचि इत्तोर. अस्के लोकुल्क येसुन कव्तर.

25 अगा मत्ता लोकुल्क पलाते पेयसतारित्ते, येसु पेगिड मत्ता अरंति होळियसि दाना कयदुन पीतोर अस्के अद तेदसि उद्दुता.

26 अद पोल्ले पूरा एरिया अंता तेळियसि होत्ता.

येसु इव्वुर गुड्डिडर्कुन आनि वरोन मूकन बेस कीतोर

27 येसु अगटाल पेय्सि होननेके, इव्वुर गुड्डोर्क ओना पज्जो-पज्जो होंचि, “ए दाविद राजाना वंसमतोना! निमे मापोर्रो दया कीम.” इंचि वरगेयतुर.

28 येसु लोता लोप्पो होळियतस्के ओर गुड्डिड ओनगा वातुर. अस्के येसु ओर्कुन, “नना बेस कीतन इंचि मीकु विस्वासम मंताना?” इत्तस्के, “हो सामि,” इंचि ओर इत्तुर.

29 “अल्हा अय्ते मीवा विस्वासम मत्तापे आयि,” इंचि येसु ओरा कळ्ळुकुन इटतोर.

30 अस्केन ओरा कळ्ळुकु दिसालय दलगतां. पजा येसु ओर्कु, “इद पोल्ले बोर्के तेळियामान्नि.” इंचि गट्टिगा हुकुम हीतोर.

31 गानि ओर अगटाल होंचि, ओना बारेमते पूरा एरिया अंता तेळियागोटतुर.

32 ओर इव्वुर अगटाल पेय्सि होननेके, लोकुल्लक वरोर देय्यम पीता मूकन येसुनगा तत्तुर.

33 येसु देय्यमतुन पेचाहतोर, अस्के मुन्ने वळ्ळुवा मूकल वळ्ळकालय दलगतोर. इदुन हळसि अंतोर लोकुल्लक इचंत्रमते, “इस्त्राएल देसेमते इल्हा आतद बस्केने हळ्ळा हिल्लोम,” इंचि इत्तुर.

34 गानि परिसिल्लक, “इर अय्ते देय्याल्लुकुना मुक्कयना बलमते देय्याल्लक तेंडांतोर,” इंचि इत्तुर.

केदनायवा लोकुल्लुकुन हळसि येसुंक पापम अनपिस्ता

35 पजा येसु अगाटा दर्मसास्त्रम कराहना लोतागा पेनदा पोल्ले कराहतोर. स्वर्ग राज्येम बारेमते बेसता कबुर वेहचेके, लोकुल्लुकुना अन्नि तीरकुना रोगाल्लुकुन, कमजोरिन बेस कीसेके अन्नि सहरकुने, नाहकुने तिरियतोर.

36 तिरियनेके येसुन नदर लोकुल्लुकुनपोर्रो होत्ता. कोहानोर हिल्ला गोर्रो बल्हा तकांचि, सिल्लर-सिल्लर आसि मनांतंगो अल्हा आ लोकुल्लक आसि मत्तुर, इंचि ओर्कुन हळसि येसुंक दया वाता.

37 अस्के ओर ओना सिस्स्युल्लुकुन “पंटा वेल्लेने पंडुता, गानि बूतिनोर तक्को मंतुर.

38 अदुनहाटीं पंटाता मालकुंक बूतिनोर्कुन पंटा कोय्यालय लोहा इंचि विनंति कीम्टु,” इंचि वेहतोर.

10

येसु ओना सिस्स्युल्लुकुन बेसता कबुर वेहालय लोहंतोर

(मरकुस 3:13-19; लूकाल 6:12-16)

1 येसु ओना पन्नेड सिस्स्युल्लुकुन दग्गेरा केय्सि, ओर्कु देय्याल्लक गेदमना अदिकारम हीतोर. अचोने आयका अन्नि तीरकुना रोगाल्लक, बादन बेस कियना अदिकारमगुडा हीतोर.

2 आ पन्नेडु मंदि प्रेरितुल्लुकुना पोरोली इल्हा मंतां: मोदाला सिमोन (ओन पन्नुगुडा इंतुर), ओना तम्मुर अंदरियल, जब्दिना इव्वुर मर्क याकोब, योहान,

3 पिलिप, बरतलमय, तोमल, कर वसुल कियना मत्तयाल, अल्पिना मर्री याकोब, तद्दि,

4 सिमोन कनानि, इस्कारियोत यहूदल (इर्र येसुन पीसि हीतोर).

5 ई पन्नेडु मंदि सिस्स्युल्लुकुंक येसु इसाँटा हुकुम हीसि लोहचीतोर: यहूदि आयवोरा नड्डुम होनमत, सामरिया लोकुल्लुकुना बद्दे नाटेने होळियमत.

6 दानकु बदलु इस्त्राएलता तप्सोत्ता आ गोर्रिनहेके होंट.

7 मिमेट होननेके, “स्वर्ग राज्येम दग्गेर्क एव्ता,” इंचि वेहासेक होंट.

8 रोगाल्लुकुन बेस कीम्टु, हातोर्कुंक जीवा अरहट, कुस्टरोगम आतोर्कुन बेस कीम्टु, देय्याल्लुकुन गेदमिसिम्टु. मीकु ई हक्कु पुक्कटते दोर्कुता इंचि मिमेट इंका इसाँटा सेवा पुक्कटते कीम्टु.

9 होननेके मी नडिक बंगारम, एंडि, रागिता कोत्तां इरमत.

10 जोरा ओयमत, एक्कोतव अंगिं, हेरपुह्क ओयमत. दुड्डुगुडा ओयमत. बारित्ते कबळ कियनोँक ओना बूति ओन्क दोर्कमळ गावाले.

11 मिमेट मोदाला बद् नाटे, बद् सहरते अय्ते दांतितो, अद् नाटे वरोर बेसता मनकना बारेमते जाडा कीम्टु. मिमेट अगटाल पेय्सि होननाल ओना लोने मंटु.

12 मिमेट लोते होळियनेके, “सांति मन्निकांटी,” इंचि होळियट.

13 ओक्कला आ लोन बेसतद् आते मिमेट हीता सांति अगा मन्ता. गानि ओक्कला आ लोन बेसतद् आयाकोटे मिमेट हीता आ सांति मिहागेन वापस वांता.

14 बोर अय्ते मीकुन लोप्पो वाया हिय्युरो मी पोल्ले केंजुरो अस्के ओना लोतालो मरि नाटेनालो पेय्सनेके मिमेट मी कादा दुब्बा अग्गेन दुल्पिसि* पेय्सट. ☆

15 नना मीकु निजम वेहासेक गदा, पेन न्यायम कियना रोजुने सदोम आनि गमोरा† सहरकुना परिस्तिती आ नाहकुंकन्ना बच्चोरो बेस मन्ता. ☆

वायना कस्टाल्कुना बारेमते येसु वेहांतोर
(मरकुस 13:9-13; लुकाल 21:12-17)

16 हुळाट, तोडेल्लिन लोप्पो गोर्रेन लोहताप नना मीकुन लोहचंतन, इंचि मिमेट तरासुनलेसी जेगर्ता आनि पावरेम पिट्टेनलेसी इमानदार मंटु.

17 मनकालोर मीकुन पंचादितोरा कय्दे अप्पजेपनुर आनि दर्मसास्त्रम कराहना लोहकुने ओसि मीकुन पोट्टे देब्बांगुडा तना परांतुर. इंचि मिमेट मनकालोरगटालगुडा जेगर्ता मंटु.

18 नाहेंका मीकुन ओर राज्यपाल आनि राजालोरा मुन्ने ओयानुर अस्के ओरा मुन्ने, विस्वासम कियवोरा मुन्ने नावा बारेमते मिमेट गवाइदार्क आकिट.

19-20 वळकानोर मिमेट आयो मीलोप्पो मनना पेनबाबाना आत्मा आंद. अदुनहाटी मीकुन बस्के अय्ते ओरा कय्दे अप्पजेपंतुरो अस्के अगा बतल वळकना, बतल वळकानायो इंचि रंदि कियमट. वेलापोर्रेन मिमेट बतल वळकुगोमो अद् मीकु पेन वेहंता.

21 कासा दादल-तम्मुहक पगां आसि हक्कालय अप्पजेपनुर. पिलाल्क ओरा तल्लुर-बाबोंक अड्डम तिरियसि ओर्कुन हक्का वेहांतुर.

22 नावा पोरोलताहेंका अंतोर लोकुल्क मीकुन हय्सुर. गानि बोर अय्ते आकिरदाका ओर्सकुंचेके ओप्के पीसि मन्तुर, ओर्के मुक्ति दोर्कता.

23 मीकुन उंदि नाटे तकलिप हियानय्ते मिमेट इंकुदि नाटे पेय्सि होंट. नना निजम वेहासेक मंतन, इष्राएलता अन्नि नाहकुने तिरियसि पेनदा बेसता कबुर वेहामळ मारवा मुन्नेने मनकना रूपमते पुटतो नना वांतन.

पेनदुक वेरियट, लोकुल्कुंक आयो!
(लुकाल 12:2-7)

24 गुंक्कन्ना सिस्युड पेदूदोड आयोर, अल्हेने मालकुंकन्ना जीतागाड पेदूदोड आयोर.

25 सिराप सिस्युड गुंनलेसी, जीतागाड मालकुनालेसी आयगोम अचोने सालु. ओक्कला लोता मालकुन नाकुने बेलजेबुल‡ इनानय्ते, लोते मनना मीवद् अंतोरद् बद् गति आयार!

26 गानि ओर्कु मिमेट वेरियमट. मुच्चिसि मत्तव अन्नि पोल्ले बय्यर आंता, तेळियाकोटा मत्तव अन्नि वस्तुक पलातुक वांतां.

27 नना मीकु हीकटते वेहतवुन, मिमेट वेलगुने होंचि वेहट. नना मी केव्कुने वेहतवुन मिमेट येनागर्पोर्रो एक्किसि वेहट.

28 बोर अय्ते मीवा मेंदुल्लुन हक्का परांतुर गानि मी आत्मातुन हक्का पस्स ओर्क मिमेट वेरियमट. गानि बोर अय्ते मेंदुल्लुन आनि आत्मातुन नरकमते वाट्टिसि नासडेम किय्या परांतोर ओन्के वेरियट.

* 10:14 कादा दुब्बा अग्गेन दुल्पिसि संबंदम नेमाहमळ, पेन मीकुन लक्कु कीता. ☆ 10:14 मरकुस 6:11; लुकाल 9:5

† 10:15 सदोम आनि गमोरा वेल्लेन वर्सा मुन्ने पेन ई सहरकुन नासडेम कीता. बारिले आ सहरकु वेल्लेन पापमते निडिस मत्तां.

‡ 10:15 उत्पत्ति 19:24-28 † 10:25 बेलजेबुल इद् अन्नि देय्यालकुंकन्ना पेदूदा देय्यम पोरोल आंद. इद् देय्यालकुना मुक्कल आंद.

29 रोंडु कोळका पिट्टें रोंडु कोलतांकु अम्मुड दांतां गदा! अयनागानि पेनबाबाना इच्चा हिल्ला अवुनाल उंदिगुडा बूमिपोर्रो अर्रो.

30 मीवा तल्लाता उंदि-उंदि केल्लु लेक्किस मंता.

31 अदुनहाटी वेरियमट! पेनदा मुन्ने मिमेट वेल्लेन कोळका पिट्टेंकन्ना बच्चोरो विल्ला मत्तोर आंदिर.

32 बोर अय्ते लोकुल्लुकुना मुन्ने नाकुन एरपाट कीतन इंचि ओप्कुंतोरो, ओन ननागुडा स्वर्गमते मनना पेनबाबाना मुन्ने नावा सिस्सुड इंचि ओप्कुंतन.

33 गानि बोर अय्ते लोकुल्लुकुना मुन्ने नाकुन एरपाट किय्योन इंतोरो, ननागुडा ओन नावा स्वर्गमते मनना पेनबाबाना मुन्ने एरपाट किय्योन इंतन.

येसु बारिक वातोर, अद वेहांतोर
(लूकाल 12:51-53; 14:26-27)

34-35 नना इद बूमिपोर्रो सांति हियालय वातन इंचि इनकुनमट. मरिनद बाबोनतोनि अर्राकोटा, मिय्याटद तल्लुनतोनि अर्राकोटा आनि कोळियाटद पोरळतोनि अर्राकोटा कियालय नना वातन. इंचि नना सांति हियालय आयो गानि ओर्कुन वेरे-वेरे कियालय वातन.

36 मनकना पगातोर ओना लोतोरके आयानुर.

37 बोर अय्ते तल्लुर-बाबोन पोरोर् नाकन्ना एक्को पावरम कीतोर, ओर नावा सिस्सुड आयनलायक हिल्लोर. बोर अय्ते मियाहक-मर्कुन पोरोर् नाकन्ना एक्को पावरम कीतोर, ओरगुडा नावा सिस्सुड आयनलायक हिल्लोर.

38 बोर अय्ते ओना सतता कूस पीसिS नावा पज्जो वायोन इंतोर, ओरगुडा नावा सिस्सुड आयनलायक हिल्लोर.

39 बोर अय्ते ओना जीवातुन पिसागोटालय ह्ळ्हांतोर, ओर ओना जीवातुन पोगोटकुंतोर. बोर ओना जीवातुन नावाहाटी पोगोटंतोर, ओन्क जीवा दोर्कता.

बोनकु इनाम दोर्कता?
(मरकुस 9:41)

40 बोर अय्ते मीकुन दग्गेरा कीतोर, ओर नाकुन दग्गेरा कीतापे. बोर अय्ते नाकुन दग्गेरा कीतोर, ओर नाकुन लोहता पेनदुनगुडा दग्गेरा कीतापे.

41 बोर अय्ते पेनदा कबुरतोन, कबुरतोर इंचि ओप्कुंतोर ओन्क पेनदा कबुरतोंकु दोर्कना इनाम दोर्कता. नीतिमंतुन नीतिमंतुड इंचि बोर ओप्कुंतोर ओन्क नीतिमंतुक दोर्कना इनाम दोर्कता.

42 ओक्कला बोरन्ना, ई सीदा-सादा सिस्सुल्लुकुना लोप्पोटाल वरोंकु, नावा सिस्सुड इंचि गिलासमेड सल्लाटेर उनालय हियानय्ते, नना मीक निजम वेहांतन, ओन्क तप्पाकोटा इनाम दोर्कता.

11

येसु आनि बापतिस्मा हियना योहान

1 येसु ओना पन्नेंडु सिस्सुल्लुकुंक आदेस हीतारित्ते, अगटाल पेय्से गालिल एरियाता नाहकुने प्रचार कियालय आनि पेनदा पोर्ल्लें कराहलय होत्तोर.

2-3 बापतिस्मा हियना योहान जेलने मत्तस्के किरिस्तुना कबाहकुना बारेमते केंजतोर. अस्के ओर ओना सिस्सुल्लुकुंक इल्हा पूसकियालय येसुनहेके लोहतोर. “बोर अय्ते पिसागोटनोर वायानद मत्ता ओन निमेन ना? हिलाकोटे मोमोट इकावरोना एदुर ह्ळमळा?”

4 येसु ओर्कु इल्हा जवाब हीतोर. “बतल अय्ते मिमेट केंजसंतोर, ह्ळसंतोर अवुन योहानुनगा होंचि वेहट.

5 गुड्डोर्क हळसंतुर, कुंटोर्क ताकसंतुर, कुस्टरोगम आतोर बेस आसंतुर, सेव्टोर्क केंजसंतुर, हातोर्कुंक जीवां अरसतां आनि गरिबोर्कुंक बारे बेसता कबुर एवसता.

6 बोर अय्ते नावा बारेमते अन्समन्स किय्योर, ओन्के आसिर्वाद दोर्कता,” इंचि इत्तोर.

7 योहानुना सिस्युल्क अगटाल पेय्से होत्तस्के, योहानुना बारेमते येसु लोकुल्क इल्हा वेहालय दल्यातोर, “मिमेट बय्छि जेगाते बतल हळालय होत्तिर? वळिक ऊंगना जाडितुना?

8 मिमेट बतल हळालय होचि मत्तिर? मेत्तटा कपडिं केर्ता मनकन हळालय होत्तिरा? मेत्तटा कपडिं केर्तानोर राजवाडाने मनांतुर.

9 अय्ते मरि मिमेट बतल हळालय होत्तिर? पेनदा कबुरतोन हळालय होत्तिरा? हो. नना मीकु वेहासेक मंतन, मिमेट बोन अय्ते हळतिर ओर पेनदा कबुरतोनकन्ना बच्चोरो पेद्दा मंतोर.

10 ओना बारेमते पेन इल्हा वेहचि मत्ता. हळा! नना नीकन्ना मुन्नेने नावा कबुरतोन लोहंतन, ओर नीवाहाटीं हर्रि तयार कीतोर. इंचि दर्मसास्त्रमते रासि मंता.”*

11 नना मीकु निजम वेहासेक मंतन, पुट्तोरावटेताल बापतिस्मा हियना योहानुंकन्ना पेद्दा बोर पुट्टा हिल्लुर. अयनागानि स्वर्ग राज्येमते सिन्ना मनकलगुडा योहानुंकन्ना पेद्दोडे.

12 बापतिस्मा हियना योहानुना रोजकुनस्केटाल अय्ते इदवेरदाकागुडा लोकुल्क स्वर्गमते जबरदास्तिते होळियसेक मंतुर. गानि बदमास लोकुल्क मात्रम अड्डम तिरियसि आपालय हळसंतुर.

13 बारित्ते योहानुन दाका मूसाल आनि अंतोर पेनदा कबुरतोर स्वर्ग राज्येमता बारेमते बविस्यवानि कीसेक मत्तुर.

14 मिमेटगिंटा अव बविस्यवानिन ओपकुनानय्ते, पेनदा कबुरतोर एलियाल वायनद मंता इंचि इत्तुर, ओर ईर योहान आंदुर.

15 बोर्कु केंजालय केव्क मंतां ओर केंजट.

16 “गानि नना ई पीळिता लोकुल्कन बोरा लोप्पो कल्पकन? मिमेट अय्ते बजारते उद्दिदिसि, वरोंक-वरोर केय्सि,

17 मोमोट मीहाटीं तूरीला उहकुतोम, गानि मिमेट एगारा हिल्लिर. मोमोट दुक्कमता पाटां पारतोम, गानि मिमेट अळा हिल्लिर, इंचि इनना पिलालकुनालेसीं मंतिर.

18 बारित्ते योहान बतल तिनाकोटा उनाकोटा वातोर. अयना लोकुल्क मात्रम ओन देय्यम पीता इंतुंदुर.

19 अल्हेन मनकना रूपमते पुटतोन नना तिचेके-उंचेके वातन गानि लोकुल्क मात्रम, हुळाट, ईर बच्चोर तितोर, बच्चोर उंतोर? कर वसुल कियानोर आनि पापि लोकुल्क ईना दंटातोर आंदुर, इत्तुर. गानि पेनदा बुद्दिद सत्तेमतद आंद इंचि, दाना बुद्दिदते ताकानोर कियाना कबाहकुन पोर्रोटाल तेळियंता,” इंचि वेहतोर.

विस्वासम कियवोरा पिस्वर बेस मन्ने
(लूकाल 10:13-15)

20 आयंका येसु बव नाहकुने एक्को अद्बूताल्क कीतीरो, आ नाहकुना लोकुल्क मनसु मार्सकुंचि पेनदाहेके तिरिया हिल्लुर. दानहाटीं येसु आ नाहकुन पोर्रो दोसेम दोसतोर.

21 “ए कोरजिना आनि बेतसेदा नाटेना लोकरिटा, मीकु गोसा तप्पो! ओक्कला मिहगा बव अद्बूताल्क आतां, अवे गिंटा सूर, सिदोन नाहकुने आसि मत्ते अगाटा लोकुल्क बिराना बोंतां हुट्टिस, मेंदुल्क बळ्ळि होकसि, दुक्कमते मनसु मार्सकुंचि मन्नेर.

22 गानि नना मीकु वेहासेक गदा, पेन न्यायम कियना रोजुने सूर आनि सिदोनतुरा परिस्तिति मीकन्ना बच्चोरो बेस मंता.”

23 “ए कपर्नाहुम सहरता लोकरिटा, मिमेट स्वर्गमते दांतोम इनकुंचतिरा? मिमेट नरकमते दांतिर. ओक्कला मिहगा जर्गता अद्बूताल्क सदोम सहरते जर्गिसि मत्ते, अद सहर इदवेरादाका आगवड.

24 गानि नना मीकु वेहासेक गदा, पेन न्यायम कियना रोजुने सदोम सहरता परिस्तिती मीकन्ना बच्चोरो बेस मनंता,” इंचि इत्तोर.

येसुन विस्वासम कीतोर्क सुकाल्क दोर्कतां
(लूकाल 10:21,22)

25 आ वेलाते येसु इल्हा इत्तोर: “ए नावा बाबा, बूमि आनि स्वर्गमता सामि, तेल्विगल्लोर्क आनि समजदार लोकुल्लकुनगटाल इव पोल्ले मक्किचि इरतिन, सादा-सिंपल लोकुल्लकुं क बारे इव पोल्ले हूपिस्तिन, इंचि नना नीवा स्तुति कीसेक मंतन.

26 हो बाबा! नीकु इदे बेस अनपिस्ताहाटी निमे इल्हा कीतिन.”

27 मर्री येसु लोकुल्लकुनतोनि इल्हा वळकुतोर. “नावा बाबाल नाकु अन्नि अप्पजेपतोर. बाबान तप्पा मर्रिन बोरै एरपाट किय्युर, मर्रिन तप्पा बाबान बोरै एरपाट किय्युर. मर्रि ओना इस्टमाताप बाबाना बारेमते बोरक अय्ते तेळियानाल वेहांतोर औरै बाबान एरपाट कीतुर.”

28 “अरे बर्वु कांजसि नेरबडता लोकुल्लकुनिता! मिमेट अंतोर नाहेके वट, नना मीकु आराम हीतन.

29-30 ना कांडी मिमेट तेहाकुंचि नावातोनि करियट, नना बेस आनि सादा-सिंपल मंतन. इंका नावा कांडी सवरगा मंता* नावा बर्वु अल्कगा मंता. इंचि मी आत्माकु सांति दोर्कता.”

12

नोमकेम रोजुना बारेमते येसु कराहता पोल्ले
(मरकुस 2:23-28; लूकाल 6:1-5)

1 उंदि नोमकेम रोजुने येसु आनि सिस्स्युल्लक पोलाल्लकुनाल होंचेके मत्तुर. अस्के सिस्स्युल्लकुं क कर्वेस्सि मत्ताहेंके हेनकु नल्सि तिचेक मत्तुर.

2 परिसिल्लक अदुन हळसि, “हळा! नोमकेम रोजुने बद्द कबळ अय्ते कियमळ नियम परकारम ओज्जोनो, अदे कबळ नीवा सिस्स्युल्लक कीसंतुर,” इंचि येसुन इत्तुर.

3 अस्के येसु ओर्कुन, “दाविदुं क आनि ओना दंटातोर्कुं क कर्वेस्तस्के ओर बतल कीतोर, मिमेट हदवा हिल्लिरा?

4 ओर पेनदा गुळिते होळियसि, पेनदुक मोळकता हारिन अंतोर तित्तुर. अव हारि तिनमळ इत्ते दर्मसास्त्रम परकारम विरोदमते मत्ता. अव हारि सिराप पेर्मालोर्क तप्पा इंका बोरै तिना पर्स्.

5 अचोने आयका पेर्मालोर्क नोमकेमता रोजु गुळिते कबळ कीतुर इत्ता संगति मूसाना नियमते मंता इद मीकु एर्के मंता. अल्हा कियमळ तप्पु आयो.

6-8 नना कोरानद दया आंद, मोक्कु आयो, इंचि ✪ दर्मसास्त्रमते रासि मनना पोल्लेना अर्तम मीकु तेळियसि मत्ते ई दोसेम हिल्लोरपोरै मिमेट दोसेम दोस्सा कोन्नेर. नना वेहनद बतल इत्ते, गुळिकन्ना पेद्दोड वरोर इगे मंतोर. बारित्ते मनकना रूपमते पुटतोन नना, नोमकेमता रोजुना मालकगुडा आंदुन.” इंचि इत्तोर.

कय वत्सोत्ता मनकन येसु बेस कीतोर
(मरकुस 3:1-6; लूकाल 6:6-11)

9 येसु अगटाल पेय्सि यहुदिल्लकुना दर्मसास्त्रम कराहना लोते होत्तोर.

10 अगा वरोर कय वत्सोत्ता मनकल मत्तोर. येसुन बल्हा तप्पुने पियना इंचि, “नियम परकारम, नोमकेम रोजुने बोना बेस कियमळ बेसा, बेस आयोना?” इंचि परिसिल्लक ओन पूसकीतुर.

11 अस्के येसु ओर्कुन इल्हा इत्तोर, “मिहागटाल बोनागन्ना उंदि गोरै मंता इनकुंदु, अदगिंटा नोमकेम रोजुने पोक्काते अरानय्ते दान तेंडिरा? तेंडित्तिर!

12 इगे अय्ते, गोरैकन्ना मनकना जीवाक बच्चोरो विलवा मंता! अदुनहाटी दर्मसास्त्रम परकारम नोमकेम रोजुने बेस किया परांतिर,” इंचि इत्तोर.

* 11:29-30 कांडी सवरगा मंता कराहमळ अल्कगा मंता.

✪ 12:6-8 होसे 6:6

13 अस्के येसु, “नीवा कय मुन्नेळ्क हहा,” इंचि कय वत्सोत्तोन इत्तोर. ओर कय मुन्नेळ्क हाहतस्के अद कय इंकुंदि कयदालेसी बेस आता.

14 पजा परिसिल्क अगटाल पलाते पेय्स्तर. पेय्सि, येसुन बल्हा हक्कना? इंचि येसुना विरोदमते वळ्क्कुत्तुर.

येसु, पेन पेर्कुत्ता सेवक आंदुर

15 ओर वळकानद कन्कुंचि येसु अगटाल पेय्सि होत्तोर. वेल्लेटुर लोकुल्क ओना पज्जो होत्तुर. अस्के येसु ओर्कुन अंटोर्कुन बेस कीतोर.

16 पजा, “नावा बारेमते बोर्के बतले वेहमट इंचि अंटोर्क हुकुम हीतोर.”

17 इत्ते यसायाह इनना पेनदा कबुरतोर इत्तव पोल्लें पूरा आयना इंचि येसु सामि इल्हा कीतोर.

18 यसयाना बविस्यवानि इल्हा मत्ता:

“ईर नावा सेवक आंदुर, ईन नना पेर्कुत्तन.

नना ईन पावरम कीतन ईना बारेमते कूस मंतन.

नना नावा पवित्र आत्मा ईना पोर्री ईरतन,

ईर नावा न्यायमतुन अन्नि जातिनोर्क वेहांतोर.

19 ईर बोनतोने तेरहानोर आयोर, जोरते वरगेयानोर आयोर,
हरकुन पीसि लोकुल्कुंक ईना अल्किर केंजा वायो.

20 नावा न्यायम गेल्सनाजेम ईर दुरसोत्ता बोंगुनगुडा उरहोर,
इंका पिर्रना वेडसितुनगुडा पिरहोर.*

21 दानहाटी अन्नि जातिनोर ईना पोरोलते आसेते मंदनुर.”*

येसु आनि देय्याल्कुना मुक्यल

(मरकुस 3:20-30; लूकाल 11:14-23)

22 पजा वरोर देय्यम पीता गुडिड-मूकन लोकुल्क येसुनगा तत्तुर. येसु ओन बेस कीतोर. अस्के आ मनकल हळालय-वळकालय दल्गतोर.

23 इदुन हळसि अगाटा अंटोर लोकुल्क इचंन्रमते, “वरोर दाविद राजाना तंतुने पुट्टनोर मत्तोर,
ओर ईर आयोर गदा?” इंचि इत्तुर.

24 गानि अगा मत्ता परिसिल्क दीन केंजसि, “ईर अय्ते बेलजेबुल इनना देय्याल्कुना मुक्यना
बलमते देय्याल्क तेंडांतोर” इंचि इत्तुर.

25 परिसिल्कुना मनसुना विचाराल्कुन एरपाट कीसि येसु ओर्कुन इल्हा इत्तोर, “बद राज्येम लोप्पो
वरोना पोल्ले-वरोर्क अर्काकोटा आंता, अद राज्येम पाडासि दांता. अल्हेने लोते आयि, नाटे आयि
वरोना पोल्ले-वरोर्क अर्काकोटे बतले नित्तापर्री.

26 अल्हेने देय्यम दाना दंताता देय्याल्कुन पेचाह्चि गेदुमते, अवुना लोप्पेन अर्काकोटा आंता.
अस्के अवुना राज्येम बल्हा नित्तंता?

27 मिमेट इत्ताप नना ओक्कला बेलजेबुलना सहायमते देय्याल्कुन गेदमंतन इन्कुट्ट. गानि
मीवा लोकुल्कगुडा देय्याल्कुन गेदमंतुर, ओरगुडा देय्यमता सहायमतोने गेदमंतुरा? अदुनहाटी मीवा
लोकुल्के मीवा न्यायम कीतुर.

28 गानि नना ओक्कला पेनदा आत्माता सहायमते देय्याल्कुन गेदमानय्ते, पेनदा राज्येम मीवा
दगर्गेक एव्ता इंचि एरपाट कीम्ट्ट.

29 बोरे आयिर, वरोर ताकतवर मनकना लोते होळियसि ओना सामानतुन दोंगा कियना इत्ते,
मोदाला आ ताकतवर मनकन दोहचि वाटतेन, दोंगा कियना परांतोर.

* 12:20 इद वचनमता अर्तम बतल इत्ते, विस्वासमते कमजोर मत्तोर्कुन आनि परेसानते मत्तोर्कुन येसु होळसोर. गानि ओर्कुं
सहायम कीतोर. ✪ 12:21 यसायाह 42:1-4

30 बोर अय्ते नावा दंटाते मन्नोर, ओर नावा विरोदमते मंतोर, बोर अय्ते नाकु सहायम किय्योर, ओर नाहगटाल पायिचना कबळ कीतोर.”

31 नना मीकु वेहनद बतल इत्ते, मनकना अन्नि पापाल्कुन, ओर कीता अपमानमतुन पेन मापि किय्यार. गानि पवित्र आत्माता अपमानम कियानोन मात्रम पेन माप किय्यो.

32 अल्हेने मनकना रूपमते पुटतोन नाकु विरोदमते बोर वळ्ळिकना, पेन ओना तप्पुकुन मापि किय्यार. गानि पवित्र आत्माकु विरोदमते वळ्ळकानोन मात्रम पेन माप किय्यो. इद कालमते आयि, वायना कालमते आयि, बस्केने माप किय्यो.

मरा आनि पंडि
(लूकाल 6:43-45)

33 पजा येसु परिसिल्कुनतोनिल्ला वळ्ळकालय दल्गुतोर. “केंजट, पंडितुन हळसे मिमेट मरातुन एरपाट कीकिर, मरा बेसतद इत्ते दाना कायां इंका बेसतवे. अल्हेने मरा कराबतद इत्ते दाना कायां इंका कराबतवे.

34 एकटूला तरास पोरिह्कुनसंतोरिटा, मिमेट कराबतोर आसि, मीवा तोळ्दाल बेसतां पोल्लें बल्हा पेय्सनुं? बारित्ते मनसुने मनना पोल्लेंगे तोळ्दाल पलाते पेय्सतां.

35 बेसता मनकल ओना मनसुने मनना बेसता पोल्लेंगे पेच्हांतोर, अल्हेने कराब मनकल ओना मनसुने मनना कराब पोल्लेंगे पेच्हांतोर.

36 इंका नना मीकु वेहानद बतल इत्ते, पज्जो-मुन्ने विचारम किय्याका मीवा तोळ्दाल पेय्सता उंद-उंदि वट्टि पोल्लेता लेक्का आकिर न्यायम कियनां रोजु पेन मीवाहेंदाल एतार.

37 मी पोल्लेना पोर्रैटाले मिमेट दोसेम हिल्लबोरा लेक्काते वांतोर, इंका मिमेट वळ्ळकता पोल्लेना पोर्रैटाले मीपोर्रै दोसेम दोसमळ जर्गीता.” इंचि इत्तोर.

यहूदि लोकुल्क येसुना परिक्सा हळंतुर
(मरकुस 8:11,12; लूकाल 11:29-32)

38 अस्के इच्चुर परिसिल्क आनि दर्मसास्त्रम कराहना गुरूल्क येसुनगा वासि, “गुरू, नीवा कयदाल माकु उंदि चिन्ह हळना मंता,” इंचि इत्तुर.

39 अस्के येसु ओर्कुन इल्हा इत्तोर, “सेड्डोर्क आनि बोगमतनम किय्याना पीळिता लोकुल्क, चिन्ह हूप्सा इत्तुर. गानि योनाल इनना पेनदा कबूरतोना चिन्ह तप्पा ओर्कु इंकुंदि चिन्ह हूपिचमळ जर्गी.

40 इत्ते योनाल बल्हा नर्का-पिय्यल मूड रोजकु पेदूदा जिम्माता पीटा लोप्पो मत्तोर, अल्हेने मनकना रूपमते पुटतोन नना, नर्का-पिय्यल मूड रोजकु बूमिता पीटा लोप्पो मनंतन.

41 योनाल वेहता कबूर केंजसि निनवे सहरतोर अय्ते ओरा मनसु मार्सकुत्तुर. गानि हुळ्ळट, योनांकन्ना पेदूदोड इंदके मी मुन्ने नित्तिसि मंतोर. अय्नागानि मिमेट मनसु मार्सकुंचेके हिल्लिर. अदुनहाटीं आकिर न्यायमता रोजुने निनवे सहरतोर नित्तिसि इद पीळिता लोकुल्कुनपोर्रै दोसेम दोस्सनुर.”

42 “अल्हेने सिबा देसेमता रानि सुलेमान राजाना तेल्विता पोल्लें केंजालय वेरे देसेमताल अगा वासि मत्ता. हुळ्ळट, सुलेमानुंकन्ना पेदूदोड वरोर मी मुन्ने नित्तिसि मंतोर. अय्नागानि मिमेट नावा बुद्धिता पोल्लें केंजसेक हिल्लिर. अदुनहाटीं आकिर न्यायमता रोजुने आ रानि इद पीळिता लोकुल्कुनपोर्रै दोसेम दोस्सार.”

43 “उंदि देय्यम बस्के अय्ते वरोर मनकानाल पेय्सि दांता, अस्के अद आराम किय्यालय एर हिल्ला जेगा पहकंता, गानि दान्क असंटा जेगा दोर्की.

44 अस्के अद देय्यम, ‘नना बद लोताल अय्ते पेय्सि वातानो, अदे लोते मर्रा मल्सि दांतन,’ इन्कुंता. मर्रा अगा होंचि हळतस्के मुन्नेटा लोन रिक्कम आताप, मंचिगा ऊसताप दानकु बेस दिसंता.

45 अस्के अद देय्यम तिरियसि होंचि दानकन्ना एक्को सेड्डातव एडुं देय्याल्कुन पीसि वांता. पजा अंटव कलियसि अदे लोते मनालय दलगंतां. इल्हा आ मनकना परिस्तिति मोदाटा परिस्तितिकन्ना एक्को कराब मनंता. इद कालमता लोकुल्कुना जीवाते पेनदा पोल्लेक जेगा हिलाकर्णे इसोंटा गोसे आथार,” इंचि इत्तोर.

येसुना निजम जीवातोर बोर?

(मरकुस 3:31-35; लूकाल 8:19-21)

46 मंदितोनि येसु वळ्कसेक मननेके ओना यावल, ओना तम्मुहक वासि, ओनतोनि वळकानद मंता इंचि लोता पलाते नित्तिसि मत्तुर.

47 अस्के, “गुरु, नीवा यावल, नीवा तम्मुहक नीतोनि वळकानद मंता इंचि पलाते नित्तिसि मत्तुर,” इंचि बोरो येसुक वेहतोर.

48 अस्के, “बद ना यावल, बोर ना तम्मुहक?” इंचि येसु ओन्क वेहता मनकन पूसकीतोर.

49 पजा ओना सिस्स्युल्कुनहेके कय हूपिच्चि, “हुळाट, ईर ना यावल, ईर ना तम्मुहक आंदुर.

50 बोर अयते नावा स्वर्गमता बाबाल वेहताप ताकंतोर, ओरे नावा तम्पुर, हेलड आनि यावनलेसी दग्गेटोर आंदुर,” इंचि येसु इत्तोर.

13

विज्जा तासानोना वेसुड

(मरकुस 4:1-9; लूकाल 8:4-8)

1 अदे रोजु येसु लोताल पेय्सि समुद्रम ओड्डुनगा होंचि उदतोर.

2 वेल्लेटुर लोकुल्क ओनगा जमा आताहेंका ओर उंदि डोंगा एक्किक्स उदतोर. लोकुल्क बारे ओना मुन्ने समुद्रम ओड्डुनपोरों नित्तिसि मत्तुर.

3 अस्के ओर वेल्लेन पोल्ले वेसुडिं वेहासेक कराहतोर.

अव्टेटाल उंदि वेसुडि इल्हा मंता: “केंजट, वरोर कास्तकारि मनकल विज्जां वीतालय पेयस्तोर.

4 ओर वीतनेके इच्चुं विज्जां हरदगा अरता, अस्के अवुन पिट्टें वासि पेर्सि तित्तां.

5 इच्चुं विज्जां बंडाना गेसेपोरों अरतां. अगा तोळि एक्को हिलुवादानकु आ विज्जां बिराने मोलियतां.

6 गानि हिहकु लोप्पोळ्क होनवाहेंका पोळ्द पेयस्तस्के मोल्कां वत्सि हासोत्तां.

7 इंका इच्चुं विज्जां हाहकुना पोदाने अरतां. हाहकुना पोदां इरगा बेर्सि अव विज्जन बेर्सा हिया हिल्लें.

8 इच्चुं विज्जां बेसता जेगाते अरतां. बेस पंटा पेयस्ता. अव उंद-उंदि मोदोल्कु बगा मुप्पै अंताल्क, बगा अरवै अंताल्क, बगा नूर अंताल्कुना पंटा पेयस्ता.

9 बोर्कु केंजालय केव्क मंतां ओर केंजट.”

वेसुडिं वेहचि वळकाना उद्देसम

(मरकुस 4:10-12; लूकाल 8:9,10)

10 पजा सिस्स्युल्क ओनगा वासि, “गुरु, निमे लोकुल्कुनतोनि वळकानेके वेसुडिं वेहासेक बारि वळकांतिन?” इंचि पूसकीतुर.

11 येसु अस्के ओर्कु इल्हा वेहतोर. “मीक अयते स्वर्ग राज्यमता बारेमता मर्ममतुन एरपाट कीकुनालय बुद्दि मंता, गानि ओर्कु हिल्ले.

12 बारित्ते, बोनगा अयते मंता, ओन्क पेन इंका हीता, अस्के ओन्क वेल्लेन आंता. गानि बोनगा अयते हिल्ले, ओनागटाल मात्रम मत्तदुनगुडा पेन वापस एतकुन्नार.

13 ओर हळ्ळ अयते हळंतुर, गानि ओर्कु अद दिस अरों. ओर केंजुड अयते केंजांतुर, गानि ओर्कु केंजा वायो, अद ओर्कु तेळियोगुडा. अदुनहाटीं नना वेसुडिं वेहासेक ओरतोनि वळकंतन.

14 यसायाह इनानोर ओरा बारेमते रासतद पेनदा पोल्ले इंदके इल्हा निजम आता:
“मिमेट केंजतिर निजमे, गानि बस्केने अर्तम कीकुन्निर.

कळकुने हळतिर, गानि अद मीकु तोसो.

15 ओर कळकुने हळसि, केळकुने केंजसि,

मनसुनाल अर्तम कीकुचि नाहेके तिरियतस्के ओर्कुन नना बेस कीकन.

इल्हा बस्केने जर्गामान्नि इंचि ओरा मनसु गट्टि पडता,

केव्क बारे मंदोम आसि केंजा वायाकोटा आतां, कळकुन बारे मुचकुतुर.”*

इद पोल्ले नावां केंजवोरा बारेमते निजम आता.

16 गानि मीवा कळकु हळतां, केव्क केंजतां इंचि मिमेट आसिर्वाद दोर्कतोर आंदिर.

17 नना मीकु निजम वेहांतन, इय्याला मिमेट बव हळसतिरो, केंजसतिरो, अवुन वेल्लेटुर पेनदा कबुरतोर आनि नीतिमंतुल्क हळालय, केंजालय तन्लाळुंदुर. गानि ओर्क हळालय, केंजालय दोर्काहिल्ले.

विज्जा तासानोना वेसुडिता अर्तम

(मरकुस 4:13-20; लूकाल 8:11-15)

18 मिमेट इंदके विज्जां वीतानोना वेसुडिता अर्तम केंजट.

19 स्वर्ग राज्येमता बारेमता कबुरतुन केंजसि बोर दान अर्तम कीकुन्नोर, ओना मनसुने बतल अय्ते वीतिस मत्तनो अदुन देय्यम वासि इग्गिस ओता. आ लोकुल्क इत्ते विज्जां अरता हर्दा जेगातसंतोर आंदुर.

20 बोर अय्ते पेनदा पोल्लेतुन केंजसि कूस आसि बिराना दान ओप्कुंतोर, ओर इत्ते विज्जां अरता बंडाना गेर्से जेगातसंतोर आंदुर.

21 ओनालोप्पो पेनदा पोल्लेता हिहकु गट्टि पळुवाहाटीं, ओर कोन्नि रोजके अय्ते निल्सि मनांतोर. पजा पेनदा पोल्लेताहाटीं तिप्पल्क, कस्टाल्क वातस्के, विस्वासमताल ओर बिराना लक्कु आंतोर.

22 बोर अय्ते पेनदा पोल्लेतुन केंजांतोर गानि सम्सारमता रंदि, दनमता आस्ति, इसोटा विचाराल्क ओर केंजता पोल्लेतुन ओनालोप्पो बेर्सा हिय्यो. अस्के अद पोल्लेताल बतल पायदा आयो. असंतोर इत्ते, विज्जां अरता हाहकुना पोदाना जेगातसंतोर आंदुर.

23 बोर अय्ते पेनदा पोल्लेतुन केंजसि, ओप्कुचि तेळियागोटकुंतोर, ओर इत्ते विज्जां अरता बेसता जेगातसंतोर आंदुर. ओर बेस पायदा तरांतोर. बगा मुप्पे अंताल्क, बगा अरवै अंताल्क, बगा नूर अंताल्क इल्हा पलांचंतोर.

हकोलिना वेसुडि

24 येसु इंकुंदि वेसुडि वेहतोर. बोर मनकल अय्ते ओना पोलमते गोहकुना बेस विज्जां वीततोर, आ मनकन लेहका स्वर्ग राज्येम मंता.

25 गानि अंतोर लोकुल्क मीडतद हळसि ओना पगातोर वासि गोहकुने हकोलि* वीतिस होत्तोर.

26 पजा गोहकु मोलिथ्सि पोर्टाक वासि मियतां, हकोलि इंका दिसतां.

27 अस्के नेदा मालकुनगा जीतागाहक वासि, “मालक, निमे अय्ते नीवा नेदे बेसता विज्जां वीत्सि मत्तिन गदा? मरि अगा हकोलि बेंदाल वातां?” इंचि पूसकीतुर.

28 अस्के “इद् बोरो पगातोर कीता कबळ आंद.” इंचि मालक इत्तोर. “अय्ते निमे बतल इंतिन मरि, मोमोट होंचि हकोलितुन पीक्सि पोहकोमा?” इंचि जीतागाहक मालकुन पूसकीतुर.

29 अस्के मालक, “मन्नि, हकोलितुन पीकनेके गोहकुनगिता पीकिकिट!

* 13:15 यसायाह 6:9-10 * 13:25 हकोलि तोडेंगा, इवुना विज्जा बदन्ना पंटाते अरानय्ते अद पंटातुन पाड कीस पोहांतां.

30 कोताक वयनदाका अव रोंडुगुडा कलियसे बेर्सीकांटी. पजा कोताक वातस्के कोय्यानोर्कुंक नना, 'मुन्ने हकोलिन कोय्सि, हेरकीं दोहाचि अवुन बोडसि पोहट. पजा नावा गोहकुन जमा कीसि गुम्मिते दोस्सट्ट इंतन,' इंचि जीतागाहकुंकु वेहतोर."

आवाल्कुना पेळैता वेसुड

(मरकुस 4:30-32; लूकाल 13:18,19)

31 पजा येसु ओर्कु इंकुंदि वेसुडि वेहतोर. "स्वर्ग राज्येम, आवाल्कुना उंदि पेडेतसोंटद आंद. आ पेडेतुन बोरो वरोर मनकल ओसि, ओना तोटाते वीततोर.

32 आवाल्कुना पेळे अन्नि पेडेकुंकन्ना सिन्नागा मनंता, गानि बेरस्तस्के अद तोटाते मनना अन्नि मराकुंकन्ना पेद्दा मरा आंता. मब्बुने परियना पिट्टें वासि दाना कोम्मांक गूडां दोहंतां."

33 येसु पजा ओर्कु इंकुंदि वेसुडि वेहतोर. "स्वर्ग राज्येम पुल्लटा पिडितसोंटद आंद. बदो उंदि मुरतळ पुल्लटा इच्चुर पिडितुन मूड तव्वना पिडिते कल्पता. अयते मेल्लगा-मेल्लगा आ पूरा पिडिअंता पुल्लगा आता."

34 इव अन्नि पोल्लें येसु लोक्कुलकुंक वेसुडिनेन वेहतोर. वेसुडि वेहाका ओर्कु बतले वेहाकोंदुर.

35 बारित्ते पेनदा कबुरतोरहेंदाल मुन्ने वेहचि मत्ता पोल्ले इंदके निजम आता, अद पोल्ले इल्हा मंता:

"नना नावा तोळ्दे वेसुडिं वेहंतन.

दुनिया पुटतस्केटाल मक्सि मत्ता पोल्लेन नना वळ्किसि वेहंतन."*

हकोलिना वेसुडता अर्तम

36 पजा येसु लोक्कुलकुन होळसिसि लोन होत्तोर. अस्के सिस्त्युलक ओनगा वासि, "गुरु, पोलमते वीतता हकोलिता वेसुडतुन माकु तेळियागोट्टिस वेहा." इत्तुर.

37 अस्के येसु ओर्कु इल्हा वेहतोर. "केंजट, बेसता विज्जां वीतानोर इत्ते मनकना रूपमते पुटतोन नना आंदुन.

38 पोलम इत्ते ई दुनिया आंदु. आनि बेसता विज्जां इत्ते पेनदुन 'मावा राजाल' इंचि विस्वासम कीतोर, हकोलि इत्ते देय्यालकुन पोल्लें केंजानोर आंदुर.

39 हकोलि वीतुता पगातोर इत्ते, देय्यम आंद. पंटा कोयना वेला इत्ते दुनिया मुंळगना आकिर वेला. कोय्यानोर इत्ते पेनदा दूतां आंद.

40 अस्के बल्हा हकोलितुन कोयसि, जमा कीसि तडमि दोसतुर, अल्हेने इद दुनिया मुंळगना आकिर वेलाते आथार.

41 बारित्ते अद वेलाते मनकना रूपमते पुटतोन नना, नावा दूतन लोहंतन. अव नावा राज्येमते मनना पापिर्कुन आनि पापम किया वेहानोर्कुन अंटोर्कुन पेच्हासि,

42 बस्केने पिर्कोटा पोत्तना तडमिते वाटसीतां. अगा बस्केळ्ळ अळमळ, किटुर-किटुर पल्कु कोर्कमळे मनंता.

43 अस्के नीतिमंतुलक बोर अयते मंतुरो ओर ओरा पेनबाबाना राज्येमते पोळ्दुन लेह्का मेर्सेके मनांतुर. बोर्कु केंजालय केव्क मंतां ओर केंजट."

पोलमते मकिस्ता दनमता वेसुड

44 स्वर्ग राज्येम बारेमते इंकुंदि वेसुड वेहंतन केंजट. उंदि पोलमते दनम मक्किचि मत्ता. बोरो वरोर मनकल आ मक्किचि मत्ता दनमतुन हळतोर. आनि मर्रा अग्गेन मक्किचि इरगा कूस आसि लोन होत्तोर. पजा ओर ओना लोन मत्तद-हिलवद अन्नि अमकुंचि वाता कोत्ताने अद पोलमतुन असकुत्तोर.

बेस मुच्च्याल्कुना वेसुड

45 स्वर्ग राज्येम बारेमते इंकुंदि वेसुड वेहासेक केंजट. वरोर व्यापारि बेसता मुच्च्याल्क पहकसेक मत्तोर.

46 अय्ते ओन्क उंदि वेल्ले दराता मुच्च्येम दिसता, अस्के ओर लोन होंचि ओनगा मत्तद-हिलवद अन्नि अमकुंचि वाता कोलताने अद मुच्च्येमतुन असकुत्तोर.

ओल्लता वेसुड

47 “स्वर्ग राज्येम बारेमते मर्रा उंदि वेसुड वेहासेक केंजट. उंदि ओल्ला मत्ता. अद ओल्लातुन बेरेडते इसुरतस्के अन्नि रकालकुना मीन्कु अरतां.

48 ओल्लामेड मीन्कु अरतस्के, मीन्कु पिय्यानोर दान ओड्डुंक इग्गुतुर बेसतवुन पेर्सि तोल्लिते वाटतुर, अल्हेने कराबतवुन बारे पोहचीतुर.

49 इद दुनिया मुळगना आकिर वेलातेगुडा अल्हेन आथार. पेनदा दूतां वासि, सेड्डोर्कुन नीतिमंतुल्लुकुनाल वेरे कीता.

50 कीसि ओर्कुन बस्केने पिर्रकोटा पोत्तना तडमिते वाटसीतां. अगा बस्केळ्ळ अळमळ, किटुर-किटुर पल्कु कोर्कमळे मन्ता,” इंचि वेहतोर.

51 पजा “इव अन्नि पोल्ले मीकु तेळियतां?” इंचि येसु सिस्स्युल्लुकुन पूसकीतोर. अस्के “हां गुरु, माकु तेळियतां,” इंचि ओर इत्तुर.

52 अस्के येसु “बोर मनकल अय्ते ओना कजानाताल पूनद-पळानद सोम्मून पलाते पेच्हांतोर, आ मनकन लेहकने स्वर्ग राज्येमता सिस्स्युड मत्ता हरेक दर्मसास्त्रम कराहना गुरु मनांतोर, ओर यहुदि लोकल्लुकुना पडाना आनि पूना बोदा रोंडु इंका करहा परांतोर.” इंचि ओर्कु वेहतोर.

येसु वापस ओना नार वांतोर

(मरकुस 6:1-6; लूकाल 4:16-30)

53 पजा इव वेसुडिं वेहमळ महासि येसु अगटाल पेयसतोर.

54 ओना नार वासि अगाटा दर्मसास्त्रम कराहना लोते होंचि लोकल्लुकुंक पेनदा पोल्ले कराहलय दल्यतोर. अस्के अव पोल्ले केंजसि अंतोर लोकल्लुक इचंन्रम आसि, “ईनकु इचचोर बुदिद, अदूबूताल्क कियना ताकत, बगटाल दोर्कता?

55 ईर अय्ते वडलना मर्रें गदा? ईना तल्लुर अय्ते मरियमे आंद, इंका याकोब, योसेप, सिमोन, यहुदल ईर अय्ते ईना तम्मूहके आंदुर.

56 अचोने आयका ईना हेलाहकगुडा मना नड्डुमे मंतां. अय्ते मरि ईन्कु इवन्नि पोल्ले, कबाहक बोर हीतुर?” इंचि नाटेनोर वळ्ळकुकुनुंदुर.

57 अदुनहाटी ओर येसुनपोरों होंग आतुर.

अस्के येसु ओर्कुन इल्हा इत्तोर, “पेनदा कबुरतोंकु ओना नाटे, ओना लोते तप्पा दुनियांता कदर दोर्कता.” इत्तोर.

58 ओर विस्वासम कियवाहाटी अगा येसु वेल्ले अदूबूतामाता कबाहक किया हिल्लोर.

14

बापतिस्मा हियना योहानुन हव्कंतुर

(मरकुस 6:14-29; लूकाल 9:7-9)

1 अद वेलाते गालिल एरियाता राजाल, हेरोद* इनानोर, येसुना बारेमते केंजतोर.

2 केंजसि “ई येसु इत्ते बापतिस्मा हियना योहान आंदुर. ओर हातोरारवेटाल मर्रा तेदतोर. अदुनहाटी ओर इसंटा अदूबूतामाता कबाहक कीसंतोर.” इंचि ओना सेवाकुल्लुकुंक वेहतोर.

* 14:1 हेरोद गालिल एरियाता ई हेरोद राजाल अघाय मत्तयाल 2:16-18 वचनाल्लुकुने रासता हेरोद राजाना मर्रि आंदुर. आ हेरोद राजाल येसु पुटतस्के हव्कालय हळतोर.

3-4 बारित्ते हेरोद राजाल ओना तम्मुर पिलिपुना मुत्तो हेरोदियान इरकुंचि मत्तोर अस्के, “नीवा तम्मुना मुत्तोन निमे निहगा इरमळ नियम परकारम बेस आयो,” इंचि योहान हेरोद राजांक वेहचि मत्तोर. अदुनहाटी हेरोद राजाल योहानुक बेडी वाटसि ओन जेलने वाटतोर.

5 अस्केटाल हेरोद राजाल योहानुन हक्कालय कोरसेके मत्तोर, गानि लोकुल्क योहानुन पेनदा कबुरतोर इंचि नम्मुंदुर, अदुनहेके राजाल लोकुल्कुक वेरियसि योहानुन हक्काकोंदुर.

6 गानि हेरोद राजाना पुटता रोजु मत्तस्के अगा हेरोदियाना मिथ्यड लोकुल्कुन मुन्ने एगरिसि ओन कूस कीता.

7 अस्के राजाल कूस आसि, “निमे बतल तलकंतिन अद नीकु हीतन” इंचि ओट्टु तिचि वेहतोर.

8 अस्के अद दाना तल्लुर वेहता परकारम, “बापतिस्मा हियना योहानुना तल्ला उंदि गिन्नेते वाटसि नाकु हीम,” इंचि इत्ता.

9 इद केंजसि राजांक इरगा दुक्कम वाता. गानि अगा मत्ता अंतोर हेडमितोराहाटी आनि तित्ता ओट्टुहाटी, अद तलकतद दान्क हीम्टु इंचि आदेस हीतोर.

10 जेलते मत्ता योहानुन हक्किसि ओना तल्ला कोय्सि थायलय मनकन लोहतोर.

11 अस्के योहानुना तल्ला गिन्नेते वाट्सि दान्क हीते अद ओसि दाना यावांक हीता.

12 पजा योहानुना सिस्थुल्क ओना पीनगुन ओसि बोंदा दोसतुर. होंचि इद पोल्लेतुन येसुक वेहतुर.

13 इद पोल्ले केंजसि येसु डोंगाते उदिस बदो अलग-सलग जेगाते पेय्सि होत्तोर.

येसु हेय्युं वेय्कुना मंदिक गाटो तासतोर

(मरकुस 6:30-44; लुकाल 9:10-17; योहान 6:1-14)

14 ओर होतद एरपाट आतारित्ते लोकुल्क ओरा नाहकुनाल ताक्सेक ओना पज्जो पेय्स्तुर. पजा येसु डोंगाताल रेय्तोर अस्के ओन्क अगा वेल्लेने मंदि दिसतुर. अय्ते येसुक ओरपोरों दया वासि, ओरा रोगाल्कुनंता बेस कीतोर.

15 पोळ्द होनना वेलाक सिस्थुल्क येसुनगा वासि, “मनम सुनसान जेगाते मंतोम, वेलागुडा बागेन आता. पोळ्द अर्राका मुन्नेन ईर दग्गेटा नाहकुने होंचि ओराहाटी तिनालय बतलन्ना अस्कुन्निर, ईरकुन लोहा,” इंचि इत्तुर.

16 अस्के “ओर्क बेके होनना अक्सरम हिल्ले, मिमेटे ओर्कु बतलन्ना तिनालय हीम्टु,” इंचि येसु इत्तोर.

17 अस्के सिस्थुल्क “महगा अय्ते सिराप हेय्युं हारि आनि रोंडु जिम्मां मंतां,” इंचि इत्तुर.

18 अस्के, “अय्ते अबुन नहगा पीसवटु,” इंचि येसु इत्तोर.

19 अगा मत्ता मंदितुन जाडि पोरो उद्दा वेहतोर. हेय्युं हारि, रोंडु जिम्मां पीसि पोरो ह्ळसि पेनदुक दन्यवाद कीतोर. पजा हारिन तुकडां कीसि आ तुकडन सिस्थुल्कुक हीतोर. सिस्थुल्क बारे लोकुल्कुक हीतुर.

20 अस्के ओर अंतोर पीरनिंडा तित्तुर. अंतोर तिननेके मिगुल्ता हारिना तुकडां ओर जमा कीतुर अय्ते पन्नेड तट्टां पेय्सांतां.

21 तित्ता मंदिताल हेय्युं वेय्कु मांडसे मत्तुर, इंका मुर्ताहक, पिलाल्कुनद अय्ते लेक्के हिल्ले!

येसु एतापोरों ताकतोर

(मरकुस 6:45-52; योहान 6:16-21)

22 पजा अस्केन येसु अंतोर लोकुल्कुन साल्ना कियाका मुन्नेन ओना सिस्थुल्कुन उंदि डोंगाते उपिच्चि ओनकन्ना मुन्नेन सेरवुना हब्बेटा बाजुंक दाटसि होनालय वेहतोर.

23 अंतोर लोकुल्कुन साल्ना कीता पजा, येसु वरों पारतना कियालय गुट्टापोरों होत्तोर. पोळ्द होनिनागानि ओर वरों अगा मत्तोर.

24 अद वेलाते सिस्स्युल्कुना डोंगा समुद्रम ओड्डुनाल वेल्लेन लक्कु होंचि मत्ता. अस्के ओर्क एदुर वळि वायालय दल्गताहेंका एता तडांक डोंगा डक्क-डिक्क आयालय दल्गता.

25 नर्कटां मूड-नालुं एगनेके येसु एता पोर्रोटाल ताकसेक ओरहेके वातोर.

26 ओर एता पोर्रोटाल ताकसेक वायानद हळसि, “देय्यम वासंता!” इंचि सिस्स्युल्क वेरियसि वरगेयालय दल्गुतुर.

27 अस्के येसु बिराने ओर्कुन, “ननाने आंदुन, वेरियमट, दैरेनेम इर्राट,” इंचि इत्तोर.

28 पजा पत्रु येसुन, “सामि, ओक्कला निमेने आयानयते नाकुन नीहेके एता पोर्रोटाल ताकसेक वायालय वेहा,” इंचि इत्तोर.

29 “अयते हीके वा,” इंचि येसु इत्तोर. अस्के पत्रु डोंगाताल रेय्सि एता पोर्रोटाल ताकसेक येसुनहेके होनालय दल्गुतोर.

30 गानि वळि वायानद हळसि, वेरियसि मुळगालय दल्गुतोर. अस्के “सामि, नाकुन पिसागोट्टा,” इंचि मोत्कुत्तोर.

31 अस्के बिराना कय हाहिसि येसु ओन पीसि, “अरे तक्को विस्वासमतोना, निमे नापोर्रो अनमानम बारि कीतिन?” इंचि इत्तोर.

32 पजा ओर इव्वुर डोंगा एकतस्के, वळि वायमळ आगुता.

33 अस्के, “सामि, निमे निजमे पेनदा मर्रिन” इंचि डोंगाते मत्तोर ओना काल्कुनपोर्रो अरतुर.

येसु वेल्लेन बिमारतोर्कुन बेस कीतोरे
(मरकुस 6:53-56)

34 पजा ओर अद समुद्रम दाटसि गेनेसरेत इनना नाटे वातुर.

35 अगाटा लोकुल्क येसुन एरपाट कीसि दग्गेर पट्टुकुनव अन्नि नाहकुंक कबुर लोहचि बिमार मत्तोर्कुन अंतोर्कुन पीसि वातुर.

36 पजा “सिराप नीवा कप्पिडता अंचुन इट्टा हीम,” इंचि विनंति कियुंदुर. बोर-बोर अयते ओना अंचुन इट्टुरो, ओर अंतोर पुरागा बेस आतुर.

15

मनकना रिवाज्कुंकन्ना पेनदा पोल्ले पेदुदेदि
(मरकुस 7:1-23)

1-2 पजा येस्सलेमतल इच्चुर परिसिल्क आनि दर्मसास्त्रम कराहना गुस्लक येसुनगा वासि, “नीवा सिस्स्युल्क पेदुदाल्कुना रीति-रिवाजुने बारि ताकुर? ओर तिनाका मुन्ने कय्यक बारि नोर्झर?” इंचि पूसकीतुर.

3 अस्के येसु ओर्क इल्हा जवाब हीतोर. “मिमेट अयते मीवां मुन्नेटा रीति-रिवाजकुन ताकसालय पेनदा आदेसतुन होळसेक मंतिर.

4 पेन अयते इत्ते गदा, निमे नीवा तल्लुर-बाबोना कदर कीम. अचोने आयका बोर अयते तल्लुर-बाबोन रांगंतोर, ओन हक्कमळे गावाले इंचिगुडा पेन इत्ता.

5 गानि मिमेट अयते, बोरन्ना मनकल ओना तल्लुर-बाबोन, नना मीकु हियानद पूरा पेनदुके हीतन, दानहाटी मीवा सहायम किया पर्रोन, इल्हा तल्लुर-बाबोना कदर इर्ना अक्सरम हिल्ले, इंचि कराहंतिर.

6 इत्ते मिमेट मीवा रीति-रिवाजकुनाहाटी पेनदा पोल्लेतुन होळसेक मंतिर.

7 ओर डोंगिरिटा, यसायाह इनना पेनदा कबुरतोर मीवसोटा डोंगिरा बारेमते निजमे वेहतोर, ओर इत्ताप

8 ईर लोकुल्क सिराप तोळ्देने नावा कदर कीतुर, गानि ईरा मनसु मात्रम नहागटाल बच्चोनो लक्कु मनंता.

9 ईर अंगडमे नावा आरादना कीसेके मनांतुर. बारित्ते ओराहाटीं मनकालोर तयार कीता रीति-रिवाजके निजमतव, अवुना पालन कियमळे दर्मम इंचि कराहंतुर,”* इल्हा वेहतोर.

10 अस्के येसु लोकुलकुन दग्गेर्क केय्पि इल्हा इत्तोर, “केंजट आनि अर्तम कीकुंटु.

11 बतल अय्ते तोळदाल लोप्पो दांतनो अद मनकन हेळ्हो, गानि बद अय्ते तोळदाल पलाते वांता, अदे मनकन हेळ्हंता.” इंचि इत्तोर.

12 पजा सिस्स्युल्क येसुनगा वासि, “निमे वेहतद केंजसि परिसिल्क होंग आतुर इद नीकु तेळियतना?” इंचि पूसकीतुर.

13 अस्के येसु जवाबुने, “स्वर्गमते मनना नावा बानाहेंदाल वाटुवद बदे मोल्का आयि, दान पीकिस पोहमळ जर्गता.

14 ओरद होन्नि, ओर गुड्डोर्कुंक हर्रि हृप्सना गुड्डोर्क आंदुर. ओक्कला वरोर गुड्डिड मनकल इंकावरोर गुड्डिड मनकंक हर्रि हृप्सालय होत्ते इव्वुरगुडा पोक्कातेन अर्रतुर,” इत्तोर.

15 पजा पत्रु, “निमे वेहता इद वेसुडितद अर्तम बतल माकु वेहा,” इंचि इत्तोर.

16 अस्के येसु ओर्कुन इल्हा इत्तोर. “मीकु इंदकेगुडा तेळिया हिल्लेना?

17 बतल अय्ते तोळदाल पीटि दांता, अदंता पजा पलाते अर्रता. इद मीकु इंकागुडा तेळियोना?

18 गानि बतल अय्ते तोळदाल पलाते पेयसंता, अद मनसुनाल वांता, अदे मनकन हेळ्हंता.

19 इत्ते कराब विचाराल्क, हक्कमळ, बोगमतनम, व्यबिचारम, दोंगातनाल्क, आबद्दम वळ्कमळ, अपमानम कियमळ इवन्नि पापि कबाह्क मनसुनाले पलाते पेयसंतां.

20 इवे पोल्लें मनकन हेळ्हंतां. गानि कय नोर्रकोटा तिनानय्ते मनकल हेळोर.” इंचि वेहतोर.

वेर जातिता मुरतळकु सहायम कीतोर
(मरकुस 7:24-30)

21 पजा येसु अगटाल पेय्पि सूर, सिदोन एरियाते होत्तोर.

22 अस्के ह्ळा! उंदि कनानि मुरतळ* येसुनगा वासि अळसेके, “सामि, दाविद राजाना वंसमतोना, नावा मिथ्यटुन देय्यम पीसि वेल्ले तकलिपने मंता, नापोर्री दया कीम” इंचि मोल्कुनालय दलगता.

23 गानि येसु मात्रम बतले वळकाकोटा सपुडदाका मत्तोर. अस्के सिस्स्युल्क येसुनगा वासि, “आ मुरतळ मना पज्जो मोल्कुंचेके वासंता दान वापस लोहचीम.” इंचि विनंति कीतुर.

24 अस्के येसु, “गानि नाकुन पेनबाबाल सिराप इस्त्राएलता तप्सोत्ता लोकुल्कुनाहाटी लोहचीतोर.” इंचि इत्तोर.

25 अयना आ मुरतळ मर्रा येसुनगा वासि टोंगरां ऊनसि, “सामि नाकु सहायम कीम,” इंचि इत्ता.

26 अस्के येसु, “पिलाल्कुना हारि तेंडकुंचि अवुन नय्कुंक वाटमळ बेस आयो,” इंचि जवाब हीतोर.

27 अस्के आ मुरतळ, “अद निजमे सामि, गानि मालक तिननेंके हिळु अरता अंटकुल्कुन अय्ते नय्के तितां गदा!” इंचि येसुन इत्ता.

28 अस्के “बाई नीवा विस्वासम गाट्टिदि. इंचि नीवा इच्चा मत्ताप नीकु जर्गीकांटी,” इंचि येसु इत्तोर. अस्केन दाना मिथ्यड बेस आता.

येसु नालुं वेय्कुंकन्ना वेल्ले मंदिक गाटो दोसतोर
(मरकुस 8:1-10)

29 पजा येसु अगटाल गालिलता सेरवुनहेके होत्तोर अगा उंदि गुट्टापोर्री एक्किस उदुतोर.

30 अस्के वेल्लेन मंदि लोकुल्क ओनगा वातुर. वायनेंके गुड्डोर्क, गूनोर्क, कुंटोर्क-तौटोर्क, मूकालोर्क आनि इंका वेर रोगाल्कुनोर्कुन पीसि ओनगा तायसि ओना काल्कुनगा इरतुर. येसु अंटोर्कुन बेस कीतोर.

* 15:9 यसायाह 29:13
इंका अद यहदि मुरतळ आयो.

* 15:22 कनानि मुरतळ इत्ते अद मुरतळ कनानि एरियाते मसुंदु, इंचि दान कनानि मुरतळ इंतुर.

31 अस्के म्कालोर्क वळकालय दल्गुतुर, कुंटोर्क ताकालय दल्गुतुर, तोंटोर्क सवरगा आतुर, गुड्डोर्क ह्ळालय दल्गुतुर. इवता ह्ळसि जमा आता लोकुलकुंक इचन्त्रम आता, आनि इस्राएलता पेनदा स्तुति कीतुर.

32 पजा येसु ओना सिस्स्युलकुन दगोर्क केय्से, “ईर लोकुलक नहगा मूड रोजकुनाल मंतुर, ईरगा तिनालय बतल हिल्ले. ईरकुन उपासम लोहुड बेस आयो. ओक्कला अल्हे लोहते कर्वेस्सि नड्डुम हरदे बगानना कूलाबडनुर. अदुनहाटी नाकु ई लोकुलकुन ह्ळसि पापम अनपिच्चंता,” इंचि इत्तोर.

33 अस्के, “इचचो वेल्ले लोकुलकुंक हालानाल तिडि, ई उस्के बूमिमे मनाकु बगा दोर्कार?” इंचि सिस्स्युलक येसुन इत्तुर.

34 अस्के, “मिहगा बच्चुं हारि मंतां?” इंचि येसु ओर्कुन पूसकीतस्के ओर “एडुं हारि आनि इच्चुं सिन्ने जिम्मां मंतां.” इंचि इत्तुर.

35 अस्के येसु मंदितुन हिळु बूमिपोर्रो उद्दा वेहतोर.

36 पजा येसु आ एडुं हारि आनि आ जिम्मान कय्दे पीसि पेनदुक दन्यवाद कीतोर. पजा अबुन तुकडां कीसि सिस्स्युलकुना कय्दे हीतस्के सिस्स्युलक आ हारि तुकडन अगा मत्ता मंदिकु तूसि हीतुर.

37 अगा मत्तोर अंटोरगुडा पीरनिंडा तित्तुर. पजा मिगुल्ला हारि तुकडन जमा कीते अब एडुं तट्टां आतां.

38 अगा तित्तोरव्टे मुर्ताहक, पिलालकुन होळसि नालुं वेय्कुना मंदि मांडसे मत्तुर.

39 पजा अगा मत्ता मंदितुन होनालय वेह्चि, ओर डोंगाते उद्दिदसि मगदान इनना एरियाक होत्तोर.

16

यहूदि पेद्दाल्क येसुना परिकसा ह्ळमळ

(मरकुस 8:11-13; लूकाल 12:54-56)

1 परिसिल्क आनि सदुकिर्क येसुनगा वातुर. ओर येसुना पट्टु ह्ळना उद्देसमते “निमे पेनदा अदिकारम पीसि वातिन इंचि नम्मालय, स्वर्गमताल माकु उंदि चिन्ह ह्पसा,” इंचि इत्तुर.

2 अस्के येसु ओर्कु इल्हा जवाब हीतोर. “पोळ्द होंचि मब्बु एर्गा आयानय्ते मिमेट परिर् वायो इंतुर,

3 हक्केर्कु मब्बु एर्गा, गुम्मरा आयानय्ते, इय्याला वळि दुमारम वांता बारे मिमेट इंतुर. मीकु मब्बुना रूपाल्कु एरपाट किया वांता, गानि वेलाना चिन्हन ह्ळसि अबुन मिमेट बारि एरपाट कीसेक हिल्लिर.

4 सेड्डोर्क आनि बोगमतनम कियाना पीळिता लोकुलक चिन्ह ह्पसा इत्तुर. गानि योनाल इनना पेनदा कबुरतोना चिन्ह तप्पा ओर्कु इंकुंदि चिन्ह ह्पिचमळ जर्गो,” इंचि इत्तोर. आनि ओर्कुन होळसि होत्तोर.

येसु यहूदिल्कुना बारेमते वेहांतोर

(मरकुस 8:14-21)

5 सिस्स्युलक समुद्रमता हब्बेर ओड्डुंक एव्तर, गानि ओर हारि ओयालय मसंगतुर.

6 पजा येसु ओर्कुन इल्हा इत्तोर, “परिसिल्क आनि सदुकिर्कुना पुल्लटा पिंडिता बारेमते जेगर्ता मंटु,” इत्तोर.

7 अस्के, “मनम हारि तर्रालय मर्गताहाटी ओर अल्हा इंतोर बारे,” इंचि ओर ओर वळ्कुकुत्तुर.

8 गानि येसु अदुन एरपाट कीसि, “अरे विस्वासम तक्को लोक्किरिटा, मनागा हारि हिल्लें इल्हा विचारम मिमेट बारि कीसेक मंतिट?

9 इदवेरदाकागुडा मीकु तेळिया हिल्लेना? हेय्युं हारिने, हेय्युं वेय्कुना मंदि तित्तदगुडा मीकु मति हिल्लेना? तित्तारित्ते बच्चुं तट्टाना हारि मिमेट जमा कीतिर मीकु मति हिल्लेना?

10 अचोने आयाका एडुं हारिनतोनि नालुं वेय्कुना मंदि तित्तस्के, बच्चुं तट्टाना हारि जमा कीतिर मीकु मति हिल्लेना?

11 नना वळकानद हारिना बारेमते आयो इंचि मीकु बल्हा तेळियसेक हिल्ले? नना बारे परिसिल्लक आनि सदुकिर्कुना पुल्लटा पिडिता बारेमते जेगर्ता मंटु इत्तन,” इंचि इत्तोर.

12 अस्के ओर्कु, “हारिना होयता पिडिता बारेमते उसारते मंटु,” इंचि वेहा हिल्लोर गानि परिसिल्लक आनि सदुकिर्कुना कराहना बारेमते उसारते मनालय वेहतोर इंचि तेळियता.

येसे किरिस्तु आंदुर

(मरकुस 8:27-30; लूकाल 9:18-21)

13 येसु कैसरिया पिलिपिया एरियाते होत्तारित्ते, “मनकना रूपमते पुटतोन नना बोन आंदुन इंचि लोकुल्लक इंतुर?” इल्हा येसु सिस्स्युल्लुकुन पूसकीतोर.

14 अस्के सिस्स्युल्लक इल्हा इत्तुर. “इच्चुर इंतुर निमे बापतिस्मा हियना योहानुन आंदिन, इंका इच्चुर इंतुर निमे एलियाल आंदिन, इंका बोरो इंतुर निमे यिर्मयाहन हिलाकोटे पेनदा कबुरतोर लोप्पोटाल बोनो वरोन आंदिन,” इत्तुर.

15 “अय्ते मरि, मिमेट, नना बोन आंदुन इंतुर?” इंचि येसु ओर्कुन पूसकीतोर.

16 “निमे जीवाते मनना पेनदा मरिं किरिस्तुन आंदिन,” इंचि सिमोन पत्रु इतोर.

17 अस्के येसु “योनाना मरिं सिमोनु! नीकु आसिर्वाद दोर्कुता. बारित्ते, इद पोल्ले नीकु बोर मनकल वेहा हिल्लोर, गानि नावा स्वर्गमता बाबाल नीवा लोप्पोटाल वेहतोर.

18 इंदके नना नीवा पोरोल पत्रु* इंचि इरसंतन, बारित्ते इदे बंडापोरोर् नना नावा कलिसिया †निलाहंतन. दीन हामुरता ताकतगुडा कूल्हा परी.

19 नना नीकु स्वर्ग राज्येमता तालम कय्क‡ हीसंतन, निमे बूमिपोरोर् बदन अय्ते दोहंतिनो, अदुन स्वर्गमतेगुडा दोहमळ जर्गता. निमे बूमिपोरोर् बदन अय्ते लेहांतिनो, अदुन स्वर्गमतेगुडा लेहमळ जर्गता.” इंचि इत्तोर.

20 पजा, “ननाने किरिस्तुन आंदुन इंचि मिमेट बोर्के वेहमट,” इंचि येसु ओर्क गट्टिगा हुकुम हीतोर.

येसु ओन्क वायना हामुरतुन वेहांतोर

(मरकुस 8:31-9:1; लूकाल 9:22-27)

21 अस्केटाल येसु ओना सिस्स्युल्लुकुंक इल्हा वेहालय दलग्तोर. “नाकु येस्सलेम होनापीता. अगा यहुदि पेद्रु दाल्क, पेद्रु दा पेर्मांतोर आनि दर्मसास्त्रम कराहना गुस्सुकुनाहेंदाल वेल्ले तिप्पल्लक कीसि नाकुन हक्कानुर. मूडोव रोजुने नना मर्रा जीवाते तेदंतन,” इत्तोर.

22 अस्के पत्रु ओन अलग ओसि, “अल्हा वळका मन्नि सामि! पेन दीन तपिचगोम. नीकु इल्हा बस्केने आयामान्नि,” इंचि ओन रांगतोर.

23 गानि येसु पत्रुनहेके तिरियसि हळसि, “अरे देय्यम, नावा मुन्नेटाल पेय्सि होन. निमे मनकालोरा तेल्चिते वळकसंतिन, पेनदा विचारमते वळकसेक हिल्लिन. निमे नावाहाटी उंदि आपत आंदिन.” इंचि इत्तोर.

24 अस्के येसु ओना सिस्स्युल्लुकुंक इल्हा वेहतोर. “ओक्कला बोरन्ना मनकल नावा पज्जो वायना इत्ते, ओर ओना पूरा इस्टाल्लक होळसिसि सतता कूस तेहकुंचि नावा पज्जो वायिर.

25 बोर अय्ते ओना जीवातुन पिसागोटालय हळांतोर, ओना जीवा होन्नार. गानि बोर अय्ते नावाहाटी जीवा होनागोटंतोर अद ओन्क दोर्कता.

26 ओक्कला मनकल पूरा दुनियातुन संपलिच्चि ओना जीवातुन पोगोटकुत्ते ओन्क बता पायदा आंता? हिलाकोटे मनकल ओना जीवाहाटी बदला बतल हियानुर?

* 16:18 पत्रु इत्ते बंडा इंचि अर्तम. † 16:18 कलिसिया संगम, येसु सामिनपोरोर् विस्वासम कियना लोकुल्लुकुना गुंपु.

‡ 16:19 तालम कय इगे अदिकारम इंचि अर्तम.

27 मनकना रूपमते पुटतोन नना नावा बाबाना महिमातेऽ दूतनतोनि वांतन, आ वेलाते बोरे मनकल आयिर, ओर कीता कबाहकुना परकारमे ओर्क इनाम हीतन.

28 नना मीकु निजम वेहांतन, इग्गे नित्तिसि मनानोरा लोप्पोटाल इच्चुर इल्हा मंतुर गदा, मनकना रूपमते पुटतोन नाकुन नावा राज्यमते वायनेके बदवेरदाका अयते हळुर, अदवेरदाका ओर्कु हामुर वायो,” इंचि इत्तोर.

17

येसुना रूपम मारियंता

(मरकुस 9:2-13; लूकाल 9:28-36)

1 हांरं रोजकु आतारित्ते येसु पन्न, याकोबुन आनि ओना तम्मुर योहानुन पीकुचि उंदि एत्तु गुट्टापोर्रो होत्तोर.

2 अगा ओरा मुन्ने ओना रूपम मारियता. ओना मोकम पोळ्ळुनलेसी मेर्सता, ओना कपडिं वेल्गुनलेसी तेल्लगा आतां.

3 हळ्हाट! मूसाल आनि एलियाल अगा वासि येसुनतोनि वळ्ळकानद ओर्कु दिसतुर.

4 अस्के पत्रु येसुन, “मनम इग्गे मनमळ बेस मंता सामि! नीवा मनसु मत्ते, उंदि नीहाटी, उंदि मूसानाहाटी, उंदि एलियानाहाटी इल्हा मूड गुडसें वाटंतन,” इंचि इत्तोर.

5 पत्रु वळ्ळकसेकेन मत्तोर, अस्केन उंदि तेल्ला मब्बु तेर्पे ओरापोर्रो नीडा कीता, आ मब्बुनाल उंदि इंसंटा अल्किर केंजावाता, “ईर नावा पावरमगल्ला मरि आंदुर, ईनतोनि नना कूस मंतन, मिमेट ईना पोर्ले केंजट.”

6 आ अल्किर केंजतस्के येसुनतोनि मत्ता सिस्स्युल्क वेरियसि बूमिपोर्रो मुसकिर कुच्चि अरतुर.

7 अस्के येसु ओरा दग्गेर वासि ओर्कुन इट्टिसि, “वेरियमट, तेदट” इत्तोर.

8 अस्के ओर तेदसि कळ्ळु विच्चि पोरो हळ्ळते, ओर्कु येसुक तप्पा अगा बोरे दिसा हिल्लुर.

9 ओर गुट्टा पोर्रोटाल हिळ्ळ रेय्नेके येसु सिस्स्युल्कुंक इल्हा आदेस हीतोर गदा, “मनकना रूपमते पुटतोन नना, हामुरताल मर्रा तेदनदाका, गुट्टापोर्रो मिमेट बतल अयते हळ्ळतिरो अद बोर्के वेहमट,” इत्तोर.

10 अस्के सिस्स्युल्क, “मरि किरिस्तुकन्ना मुन्ने, एलियाले वायमळ गावाले इंचि दर्मसास्त्रम कराहना गुस्लक बारि इंतुर?” इंचि पूसकीतुर.

11 अस्के येसु इल्हा जवाब हीतोर. “एलियाल तप्पाकोटा वांतोर, वासि मोदाला बल्हा मत्ता अल्हे अन्निन कीतोर.

12 गानि नना मीकु वेहानद बतल इत्ते, एलियाल वासे मंतोर गानि ओन बोरे एरपाट किया हिल्लुर. अदुनहाटी लोकुल्क ओरा मनसुक वाताप ओनतोनि कीतुर. मनकना रूपमते पुटतोन ननागुडा ओराहेंदाल अल्हेन तकलिप्कु बोगांचना मंता.” इंचि वेहतोर.

13 येसु बापतिस्मा हियना योहानुना बारेमते वेहासेक मंतोर इंचि सिस्स्युल्कुंक अस्के तेळियता.

येसु देय्यम पीता पेडन बेस कीतोर

(मरकुस 9:14-29; लूकाल 9:37-43)

14 येसु आनि ओना सिस्स्युल्क लोकुल्कुनगा वातस्के, वरोर मनकल येसुनगा वासि ओना मुन्ने टोंगरां ऊनसि,

15 “सामि! नावा मर्रिनपोर्रो दया कीम. ओन्क कुंदेल रोगम अरंता. अरतस्के ओर ऊके-ऊके तडमिते आनि एते अरंतोर, ओन्क इरगा तिप्पल्क आसेक मंता.

16 नना ओन नीवा सिस्स्युल्कुनगा तत्तन गानि ओर बेस किया पराहिल्लुर,” इंचि इत्तोर.

17 अस्के येसु ओर्कुन, “अरे विस्वासम तक्को आनि हर्रि तप्ता पीळितोरिटा, नना बदवेरदाका मीतोनि मनकन? बदवेरदाका नना मीकुन सहन कीकन? ओन नाहेके तटु.” इंचि इत्तोर.

18 ओन तत्तस्के येसु आ पेडन पीता देय्यमतुन गद्दरिच्चि गेदुमतोर. अस्केटद अस्केन आ पेडल बेस आतोर.

19 पजा बोर हिल्वस्के सिस्स्युल्क येसुनगा वासि, “आ देय्यमतुन मोमोट बारि गेदमा परा हिल्लोम?” इंचि पूसकीतुर.

20 अस्के येसु ओर्कु इल्हा वेहतोर. “मीवद पेनदापोर्रो गट्टिगा विस्वासम हिल्ले. नना मीकु निजम वेहांतन, ओक्कला मीलोप्पो आवाल्कुना पेळेतच्चो विस्वासम मनिनागानि, ‘ई गुट्टातुन इगेटाल अगा होन’ इंचि मिमेट वेहानय्ते अद होंदार. अस्के मिमेट अन्नि कबाहक किया परांतरि.*

21 गानि इंसंटा देय्याल्क सिराप पारतना आनि ओक्कापोद्दूक कीतिने दांतां,” इंचि येसु इत्तोर.*

ओना सतता हामुरता बारेमते वळकांतोर
(मरकुस 9:30-32; लूकाल 9:43-45)

22 ओर गालिलते वासि उंदि जेगाते जमा आतस्के येसु ओर्कुन इल्हा इत्तोर. “मनकना रूपमते पुटतोन नाकुन, लोकल्कुना कय्दे दोर्कापीसि हियानद मंता.

23 ओर नाकु हक्कानुर गानि, मूडोव रोजुने नाकु मर्रा जीवा अरार,” इत्तोर. इद केंजसि सिस्स्युल्कुंक इरगा दुक्कम अनपिस्ता.

24 अगटाल येसु कपर्नाहुम नाटेंक वातस्के गुळिना कर वसुलि कियानोर पत्रुनगा वासि, “मीवा गुरु, गुळिता कर दोहोरा?” इंचि पूसकीतुर.

25 अस्के पत्रु, “आ दोहंतोर!” इंचि इत्तोर. ओर लोता लोप्पो होत्तोर, होंचि येसुंक वेहाक मुन्नेन येसु, “सिमोनु, नीकु बतल अनपिच्चेक मंता? ई दुनियाते मनना राजुकु जकात आयि कर आयि बोराहेंदाल एतंतुर, ओरा मर्कुन हेंदाला मरि इंका बोरन्ना वेरेतोर हेंदाला?” इंचि पूसकीतोर.

26 अस्के पत्रु, “वेरेतोर हेंदाल,” इंचि इत्तरित्तेन येसु ओन, “अय्ते मर्क पिरि मंतुर मरि!

27 अयना ओर्कुन नाराज कियामन्नि इंचि निमे गालम वाटालय होन्नु आनि मुन्ने अरता जिम्मातुन पीसि दाना तोळ्दुन पर्हा, पर्हातारित्ते उंदि कल्दार दोर्कार. अद ओसि नावा आनि नीवा पोरोलते कर दोहासि हीम.” इंचि इत्तोर.

18

स्वर्ग राज्येमते पेहरोर बोर?
(मरकुस 9:33-37,42-48; लूकाल 9:46-48; 17:1-2)

1 आ वेलाते सिस्स्युल्क येसुनगा वासि, “स्वर्ग राज्येमते अंतोर्कन्ना पेद्दा बोर?” इंचि पूसकीतुर.

2-3 अस्के येसु वरोर सिन्ना पेडन केय्सि, ओरा नड्डुम निलाहचि इल्हा वेहालय दलगुतोर. “नना निजम वेहांतन, मीवा गुनाल्कुन मार्सकुंचि मिमेट पेडनलेसी आयवा,* स्वर्ग राज्येमते बस्केने होना परिर.

4 दानहाटी बोर अय्ते ओनाद ओरे ई सिन्ना पेडन लेहका सादा-सिंपल मनांतोर, ओरे स्वर्ग राज्येमते पेहरोर आंदुर.

5 बोर अय्ते नापोर्रो विस्वासम कियाना ई सिन्ना पेडनसंतोन बेस ह्ळांतोर, ओर नाकुन बेस ह्ळतापे.

6 गानि नापोर्रो विस्वासम कियाना ई सिन्ना पेडनसंतोन बोरन्ना पापमते अरहते, ओना बौळ्गेक जोत्ता बंडा दोहाचि ओन समुद्रमते लोतु एते ओसि मुळहमळे बेस मंता.

* 17:21 इद वचनम कोन्नि पांडु लिपिने हिल्ले.

* 18:2-3 पेडनलेसी आयवा ओनद-ओर सिन्नागासि तिरियमड, सिन्ना पेडांक कदर मन्नो.

7 पापमते अरहना पोल्ले ई दुनियाते वेल्लेन मंतां. अबुनहेंदाल दुनिया लोकुल्लुकुन पापमते अरहंता. अदुनहाटी ई दुनियाक बच्चोन गोसा वायार! पापमते अरहना पोल्ले अय्ते वायमळे गावाले, गानि अब बोनाहेंदाल अय्ते वांतांगो ओन्क बच्चोन गोसा वायार!”

8 ओक्कला नीवा कय आयि काल आयि नीकुन पापम किया वेहते दान नर्किसि पोहा. बारित्ते रौंडु कय्क, रौंडु काल्क मंचि बस्केळ्क पोल्सेके मनना तडमिता नरकमते होननदानकन्ना, अपंग हिलाकॉटे कूटाल आसि पिस्वरते होनमळे नीहाटी बेस.

9 अल्हेने, ओक्कला नीवा कळु नीकुन पापम किया वेहते दान तेंडसि पोहा. बारित्ते रौंडु कळ्क मंचि नरकमता तडमिते होननदानकन्ना गुड्डि आसि पिस्वरते होनमळे नीहाटी बेस मंन्ता.

10 हुळाट, नावापोरौ विस्वासम कीता ई सिन्नोरकुन बोने तेंडसि पोहमट. नना वेहनद बतल इत्ते, ओरा पेनदा द्तां स्वर्गमते मनना नावा पेनबाबांक बस्केळ्क कलियसेके मंन्तां.

11 अचोने आयका मनकना रूपमते पुटतोन नना तप्सोत्तोर्कुन पिसागोटलय वातन.†

12 “ओक्कला वरोर मनकानगा नूर् गौरि मंतां इनकुंट. अबुनाल उंदि गौरि तप्पिस होनानय्ते, कळ्मता टोबै तोम्मिद गौरिन ओर अग्गेन होळसिसि, तप्सोत्ता आ उंदि गौरितुन पहकालय होन्नोरा? दांतोर.

13 नना निजम वेहांतन, ओक्कला ओन्क होत्ता गौरि दोर्कानय्ते, आ टोबै तोम्मिद तप्पिस होनवा गौरिकन्ना, तप्सोत्ता आ उंदि गौरिपोरौ एक्को आनंदम आयानुर.

14 अल्हेने ई सिन्नोरकुनाल वरोर इंका नासडेम आयामन्नि इंचि स्वर्गमते मनना मीवा बाना मनसु मंन्ता.”

तपसोत्तोर्कुक बतल वेहना?

15 ओक्कला तम्मुर आयि दादाल आयि नीवा विरोदमते पापम कियानय्ते, निमे वरोने ओनगा होंचि ओर कीता पापम ओन्क तेळियागोट्सि वेहा. ओर ओक्कला नीवा पोल्ले केंजानय्ते निमे ओना मनसुन गेल्सताप.‡

16 उंदि वेला ओरगिंटा नीवा पोल्ले केंजुवस्के, वरोर-इव्वुरकुन नीवा पज्जो पीसि होन. बारित्ते, अगा बतल जर्गुतनो अदुन वेहालय ओर गवाइ मनांतुर.

17 ओक्कला ओर ओरा पोल्लेगुडा केंजाकुंटे कलिसियातोर्क वेहा. कलिसियातोर्क वेहतदगुडा केंजाकुंटे, ओर पेनदा मनकल आयोर इंचि इनकुन. हिलाकॉटे कर वसुल कियानसंतोर इनकुन.

18 “नना मीकु निजम वेहांतन, मिमेट बूमिपोरौ बदुन अय्ते दोहंतितोर, अदुन स्वर्गमतेगुडा दोहमळ जर्गता, मिमेट बूमिपोरौ बदुन अय्ते लेहांतितोर, अदुन स्वर्गमतेगुडा लेहामळ जर्गता.§

19 अचोने आयका नना वेहनद निजम बतल इत्ते, ई बूमिपोरौ मीवा लोप्पोटाल बोरन्ना इव्वुर उंदि आसि मीकु बतल अय्ते गावालेनो अद तल्कानय्ते स्वर्गमते मनना नावा पेनबाबाल तप्पाकॉटा हींतोर.

20 बारित्ते बगा अय्ते नावा पोरोलते इव्वुर-मुव्वुर उंदगा जमा आंतुरो, अगा ओरा नड्डुम नना मनांतन,” इंचि येसु इत्तोर.

वरोनद वरोर माप कियना

21 अस्के पत्रु येसुनगा वासि, “सामि, वरोर तम्मुर आयि दादाल आयि नावा विरोदमते पापम कियानय्ते, नना ओन बच्चुं मल्कां मापि कीकन? एडुं मल्कांगा?” इंचि पूसकीतोर.

22 अस्के येसु ओन्क, “एडुंगें मल्कां आयो, ओर बच्चुं मल्कां तप्पु कियिनगागानि ओन निमे माप कीसेक मन्नु,” इंचि वेहतोर.

23 पजा येसु इल्हा वेहालय दल्गुतोर, स्वर्ग राज्येम वरोर राजन लेहका मंन्ता. आ राजाल ओन्क बाकि मत्ता जीतागाहकुना हेंदाल बाकी वसुल कियना इंचि विचारम कीतोर.

† 18:11 इद वचनम कोन्नि पांडु लिपिने हिल्ले. ‡ 18:15 इद वचनमते मनना पोल्ले सिराप विस्वासम कीतोराहाटी रासतद आंद. § 18:18 इद वचनता अर्तम बतल इत्ते, मिमेट बोर्कुनना माप कीते पेन ओर्कुन माप कीता, मिमेट बोर्कुनना माप कियाकॉटे पेनगुडा ओर्कुन माप किय्यो.

24 बस्के अय्ते ओर वसुल कियालय सुस्व कीतोर, अस्के वरोर लक्सेना बाकि मत्ता जीतागान राजानहेके तत्तुर.

25 आ जीतागानगा ओना मालकुना बाकि दोहालय बतले मनाहिल्ले. अस्के ओर ओन्क आदेस हीतोर गदा, “ओर ओना मुत्तो-पिलाल्क, लोन-दारा अचोने आध्का ओनगा बतल अय्ते मंतनो अव अन्नि अम्मिसि, वाता कोत्तानाल बाकि दोहिरकांटी,” इंचि वेहतोर.

26 अस्के आ जीतागाल राजाना काल्कुनपोर्रो अर्सिं बात्मिलाडतोर, “राजा नाकु कोन्नि रोजकुना मुदत हीम, मेल्लगा-मेल्लगा नावा बाकि पुरागा दोहंतन,” इंचि इत्तोर.

27 अस्के आ मालकुंक ओना जीतागानपोर्रो दया वासि ओना बाकि अंता पुरागा माप कीसि होळसीतोर.

28 पजा आ जीतागाल अगटाल पेय्सि होननेके ओन्क नूर रूपें बाकि मत्ता ओना दंटाता जीतागाल हरदे कलियतोर. अस्के ई मुन्नेटा जीतागाल आ जीतागाना बोळ्गे पीसि, “नाकु हियना कोत्तां बस्के हीतिन? नाकु इंदकेटद इंदकेन हीम,” इंचि ओन इत्तोर.

29 पजा आ जीतागाल मुन्नेटा ओना दंटाता जीतागाना काल्कुना पोरो अर्सिं विनति कीसि, “निमे कोन्नि रोजकु ओपके पीम, नना नीवा बाकी नीकु हीतन,” इंचि इत्तोर.

30 अयना ओर बतले केंजाकोटा, ओर बाकि दोहनाल ओन जेलने वाटसीतोर.

31 अस्के अगा जर्गतद ओना दंटाता जीतागाहक हळ्ळतुर ओर्कु वेल्ले दुक्कम आता. ओरा मालकुनगा होंचि जर्गतव अंता वेहतुर.

32 अस्के मालक ओन केय्सि इत्तोर, “अरे तेल्वि तक्को जीतागा, नीकु इच्चोरगुडा दया वाया हिल्लेना? निमे नावा काल्क पीसि विनति कीतिन अय्ते नना नीवा पूरा बाकिंतन माप कीतन.

33 नना बल्हा नीवा पोरो दया कीतनो अल्हेने निमे नीवा दंटाता जीतागाना पोरो दया किया मत्तिन.”

34 इंचि मालक ओनपोरो होंग आसि ओन जेलने वाटसीतोर. ओना बाकि नेम्मनजेप ओन जेलनाल होळसा हिल्लोर.

35 इल्हेने मिमेटगुडा मीवा तम्मुन आयि दादान आयि मनसुनाल मापि कियाकांटे ई राजाल बल्हा कीतोरो अल्हेने नावा स्वर्गमते मनना बाबालगुडा मीकुन मापि किय्योर.

19

सोडसिट्टिता बारेमते येसु कराहता पोल्लें
(मरकुस 10:1-12)

1 इव अन्नि पोल्लें वेहामळ आतारित्ते येसु गालिल एरियाताल पेय्सि योर्दन बैरेडता हब्बेर ओड्डुंक मनना यहूदिया एरियाते होत्तोर.

2 अस्के वेल्लेन मंदि ओना पज्जो होत्तुर. येसु ओर्कुन बिमारकुनाल बेस कीतोर.

3 अगा इच्चुर परिसिल्कगुडा वातुर. येसुना पट्टु हळना इंचि, “मूसाना नियम परकारम, बद कारनमताहाटी अयना मुत्तोन होळसिय्या वच्चा?” इंचि येसुन पूसकीतुर.

4 येसु इल्हा जवाब हीतोर, “बस्के अय्ते पेन मनकन कीतानो, अस्केन ओर्कुन मांडसा मुरतळ इल्हा इंचि कीता. इदु मिमेट हदवा हिल्लिरा? ☆

5 दीनाहाटी मांडसा यावन-बाबान होळसिसि, ओना मुत्तोन पीसि मनांतोर. ओर इव्वुर उंदे मेंदुल आसि मनांतुर.

6 अदुनहाटी ओर इव्वुर उंदे मेंदुल आसि मनांतुर. इल्हा पेने ओर्कुन कल्पताहाटी, मनकल वैरे कियानायो,” इंचि इत्तोर.

7 इदु केंजसि, “अल्हा अय्ते मरि, मनकल ओना मुत्तोंक सोडसिट्टि हीसि होळसियना आदेस मूसाल बारिक हीतोर?” इंचि परिसिल्क मर्रा पूसकीतुर.

8 अस्के येसु ओर्कुन इल्हा इत्तोर. “मीवा मनसु बंडालेसीं मत्ताहाटीं मूसाल मुत्तोहकुन होळसिय्या वच्चु इत्तोर, गानि मुन्नेटाल इसोटा रिवाज मनाहिल्ले.

9 नना मीकु वेहासेक गदा, बोरन्ना ओना मुत्तोन बोगमतनमता कारनम तप्पा वेरे कारनमते होळसिसि इंकुंदानतोनि मरमिं आयानय्ते, ओर बोगमतनम कीतोर.” इल्हा इत्तोर.

10 इद केंजसि ओना सिस्स्युल्क ओन, “अय्ते मुत्तो मुय्दोन नड्डुम इसंटा लेक्का मत्ते मरमिं आयाकोटेन सूटि,” इंचि इत्तुर.

11 येसु ओर्कु इल्हा समजांस्तोर, “मिमेट इत्ता पोल्लेतुन ओप्कुनमळ अंटोर्क कुदुरो, गानि बोनकु अय्ते ई पोल्लेन पीसि ताकना ताकत पेन हीतनो ओरे ओप्कुना परांतोर.

12 बारित्ते बोरो-बोरो तल्लुकुना पीटाले आडिगुंलोर्क आसि पुटतोर मंतुर, मनकालोरा कयदालगुडा आडिगुंलोर्क आतुर मंतुर, आनि स्वर्ग राज्येमता हेंका इच्चुर मंदि मरमिं आयाकोटा मंतुर. इंचि बोर्क अय्ते ई पोल्ले नच्चंतंगो ओर इदुन ओपकुनिरकांटी.”

येसु पिलालकुंक आसिर्वाद हीतोर.

(मरकुस 10:13-16; लूकाल 18:15-17)

13 पजा इच्चुर लोकुल्क ओरा पिलालकुनपोर्री येसु कय इर्सि पारतना कियाना इंचि ओनगा पीसि वातुर, गानि सिस्स्युल्क ओर्कुन रांगतुर.

14 गानि येसु, “पिलालकुन नाहेके वायाहीम्ट, ओर्कुन आपमट. स्वर्ग राज्येम इसंटोरदे आंद,” इंचि इत्तोर.

15 पजा येसु पिलालकुनपोर्री कय इर्सि अगटाल पेय्सि होत्तोर.

दनवंतुड येसुन पूसकीतोर

(मरकुस 10:17-31; लूकाल 18:18-30)

16 वरोर मनकल येसुनगा वासि, “गुरु, बस्केळ्क पिस्सना पिस्वर गावाले मत्ते नना बव बेसता कबाहक कीते सरे?” इंचि पूसकीतोर.

17 अस्के येसु ओन इल्हा इत्तोर, “बेस इत्ते बतल, नाकुन बारि पूसकीतिन? बेसतद अय्ते सिराप पेन उंदे आंद. ओक्कला नीकु बस्केळ्क पिस्सना पिस्वर गावाले अनपिस्ते पेनदा आदेसकुना परकारम ताका,” इत्तोर.

18 “बव आदेसकु?” इंचि आ मनकल इत्तस्के, “बोने हळ्कमा, बोगमतनम कियमा, दोंगातनम कियमा, आबद्दम गवाइ हियमा,

19 नीवा तल्लुर-बाबाना कदर कीम. नीवद निमे बच्चोन पावरम कीतिनो, अचोने पावरम इंकावरोनगुडा कीम.” इंचि येसु वेहतोर.

20 अस्के, “नना अय्ते इव अन्नि कीसिकेन वातन, इंका नावा लोप्पो बतल तक्को मंता?” इंचि आ लेय्योड येसुन इत्तोर.

21 अस्के येसु इत्तोर. “ओक्कला नीकु सत्तेमते पुरागा आयानद मत्ते, होन, निहगा बतल अय्ते मंता अदुन पूरा अम्मिसि, गरिबोर्कुंक तूसि हीम. अस्के नीकु स्वर्गमते दनम दोर्कार. पजा नहगा वासि ना पज्जो ताका,” इत्तोर.

22 गानि ओनगा सोम्मू वेल्लेन मत्ताहाटीं ई पोल्ले केंजसि लेय्योड सिम्मरा आसि पेय्सि होत्तोर.

23 अस्के येसु ओना सिस्स्युल्कुन इल्हा इत्तोर. “नना मीकु निजम वेहांतन, स्वर्ग राज्येमते सिरमंत मनकल होळियमळ इत्ते वेल्लेन कस्टम.

24 नना मर्रां वेहांतन, पेनदा राज्येमते सिरमंत मनकल होळियमळकन्ना लोटापेटा सूदि बोंगाताल होनमळ अल्कगा मनंता,” इत्तोर.

25 इद केंजसि सिस्स्युल्कुंक वेल्लेन इंचत्रम आता. अदुनहाटीं, “अय्ते मरि मुक्ति बोर्क दोर्का परंता?” इंचि पूसकीतुर.

26 अस्के येसु सिस्युल्कनहेके ह्ळसि, “मनकालोरतोनि अय्ते इद आयापर्री, गानि पेन मात्रम अन्नि किया पर्रीता.” इंचि इत्तोर.

27 अस्के पत्रु येसुन इल्हा इत्तोर. “ह्ळ्हा, मोमोट अय्ते मत्तद-हिलवद अन्नि होळसिसि नीवा पज्जो वातोम. अय्ते माकु बतल दोर्कार?” इत्तोर.

28 “नना मीकु निजम वेहांतन, पूना दुनियाते, मनकना रूपमते पुटतोन नना नावा महिमाता राजगदूदेपोर्री उदूदंतन, अस्के नावा पज्जो मनानोर मिमेटगुडा पन्नेड राजगदूदेन पोर्री उदिदेसि, इस्राएलना पन्नेड गोत्राल्कुनोरा न्यायम कीकिर.

29 अचोने आयका नावाहाटी बोर अय्ते लोन-दारातुन, दादल-तम्मुह्कुन, अक्कल-हेलाह्कुन, तल्लुर-बाबोन, पिलाल्कुन, इंका बूमि-जेगान होळसीतुरो ओर्कु आ होळसीतवुंकनना नूर अंताल्क एकको दोर्कार. इंका ओर बस्केळ्क पिस्सना पिस्वरता वारसदार आयानुर.

30 गानि मुन्ने मत्तोर वेल्लेटुर पज्जो आयानुर. पज्जोटोर मुन्ने आयानुर,” इंचि येसु ओन इत्तोर.

20

वरोर नेदा मालकुना वेसुड

1 येसु मर्रा इल्हा इत्तोर. नना मीकु स्वर्ग राज्येम बारेमते उंदि वेसुड वेहंतन केंजट. वरोर मालक मत्तोर. ओर हक्केरेने तेदसि, ओना अंगुर बगिचाते कबळ कियालय बूतिनोराहाटी पलाते होत्तोर.

2 मनकंकटिकि उंदि रोजुना बूति हीतन इंचि करार कीसि, ओर्कुन अंगुर बगिचाते कबळ्क लोहतोर.

3 जावोळ्द पोळ्द आतस्के आ नेदा मालक हाटुमते होंचि ह्ळ्तोर, अस्के रिक्म मनानोर इच्चुर मंदि ओन्क दिसतुर.

4 मिमेटगुडा नावा अंगुर बगिचाते कबळ कियालय होंट. मीवा कबळलायक बूति मीकु हीतन, इंचि मालक ओर्क वेहतोर. अल्हा इत्तारित्ते ओरगुडा बगिचाते कबळ कियालय होत्तुर.

5 आ मालक पियाटील आनि पोट्टेकु मर्रा हाटुमते होत्तोर. रोंडु मल्कां इंका बूतिनोर्कुन तच्चि बगिचाते कबळ कियालय वेहतोर.

6 पोळ्द अर्रालय गंतामेड मत्तस्के आ मालक मर्रा उंदि मल्का हाटुमते होत्तोर, अस्के इंका इच्चुर मंदि रिक्म मत्तोर्कुन ह्ळ्तोर. “मिमेट इगे पोळ्दमेड वट्टेटे बारि नित्तिसि मंतिर?” इंचि मालक ओर्कुन पूसकीतोर.

7 अस्के, “माकुन बोर बूतिक केया हिल्लुर, दानहेंके मोमोट नित्तिसि मंतोम दादा!” इंचि ओर इत्तुर. अस्के, “अल्हा अय्ते मिमेट इंका नावा अंगुर बगिचाते कबळ कियालय होंट,” इंचि आ मालक ओर्कुन वेहतोर. अस्के ओर होत्तुर.

8 “पोळ्दु होत्तारित्ते अंटर बूतिनोर्कुन केय्सि, अंटोर्क बूति हीम, आकिर वातोरकुंक मुन्ने हीम, मुन्ने वातोर्कुंक आकिर हीम,” इंचि मालक ओना जीतागानकु वेहतोर.

9 पोळ्दु अर्रालय गंतामेड मत्तस्के बूतिक वातोर, बूति एतालय होत्तुर, अस्के ओर्कु पोळ्दमेटा बूति दोर्कुता.

10 अदुन ह्ळसि “माकु वेल्लेन कोत्तां दोर्कुनुं बारे,” इंचि हक्केरे वाता बूतिनोर इनकुत्तुर. गानि ओर्कु इंका अचोने बूति दोर्कुता.

11-12 आ बूति एततस्के ओर मालकुन इत्तुर, “ईर पज्जो वासि उंदि गंटा कबळ कीतुर, मोमोट अय्ते ईरकनना एकको कस्टमते, एर्ना एदिदेते कबळ कीतोम. गानि निमे माकु ओरा अचोने बूति हीतन, इद माकु नच्चा हिल्ले,” इंचि गुल्गतुर.

13 “नना नीकु बतल अन्यायम किया हिल्लेन, नना नीकु उंदि रोजुना बूति हीतन इंचि इत्तस्के निमे ओप्कुतिन गदा?

14 अद्दुनहाटीं निमे गुल्गाकोटो नीवा बूति पीसि होन. नीकु नना बच्चोन बूति हीतन, अचोने बूति ईर आकिरते वातार्क इंका हियना नावा मनसु मंता.

15 नना नावा कोत्तन नावा मनसु मताप कर्स कियना हक्कु नाकु हिल्लेना? नना बेस मनकन मत्ताहाटीं निमे नापोर्रो बारि अळसंतिन?" इंचि ओरा अळेटाल वरोन मनकन मालक इत्तोर.

16 इल्हा बोर अय्ते पज्जो मंतुर, ओर मुन्ने आयानुर, मुन्ने मत्तोर पज्जो आयानुर, इंचि वेह्चि, येसु वेसुडि वेहमळ आपतोर.

येसु ओना हायना हामुरतुन मर्रा वेहांतोर
(मरकुस 10:32-34; लूकाल 18:31-34)

17 येसु येस्सलेम होननेके, पन्नेंडु सिस्स्युल्कुन उंदि बाजुंक ओसि,

18 "हळ्हाट, मनम येस्सलेम होंचंतोम, अगा होत्ता पजा मनकना रूपमते पुटतोन नाकुन पेद्दा पेर्मालोर्कुना आनि दर्मसास्त्रम कराहना गुस्कुना कय्दे पीसि हियानुर. ओर नाकु हामुर सिक्साता आदेस हियानुर.

19 पजा यहूदि आयवोरा कय्दे अप्पजेपनुर, ओर नाकुन सिडांचनुर, नापोर्रो उस्कानुर, पोर्टेटे तन्नानुर, पजा नाकुन कूसुनपोर्रो मोल्लां कोह्कानुर. गानि मूडोव रोजुने नना मर्रा जीवाते तेदंतन,"* इंचि इत्तोर.

उंदि यावल येसुन विनंति कीता
(मरकुस 10:35-45)

20 अच्चोटेन जब्दिना मुत्तो दाना मर्क याकोब आनि योहानुन पीसि, येसुनगा वासि ओना काल्कुनपोर्रो अर्सि उंदि विनंति कीता.

21 "नीकु बतल गावाले?" इंचि येसु दान पूसकीतस्के, "निमे नीवा राज्यमते नावा इव्वुर मर्कुन, नीवा तिना बाजुंक वरोन, डेमा बाजुंक वरोन उद्दाना आदेस हीम" इंचि अद इत्ता.

22 जवाबुने, "मिमेट बतल पूसकीसतिरो, अद मीक तेळियसेक हिल्ले. नना बव कस्टाल्क अय्ते बोगांचना मंता, अबुन मिमेट बोगांचा परकिटा?" इंचि येसु इत्तस्के, "हो, मोमोट तयार मंतोम," इंचि ओर इत्तुर.

23 पजा येसु ओर्कुन इल्हा इत्तोर, "नना कस्टाल्क बोगांचताप मिमेट बोगांचा परकिट, निजमे! गानि राज्येम कियनेके, नावा तिना बाजुंक आनि नावा डेमा बाजुंक उपिच्चना अदिकार नाक हिल्ले. अव जेगां बोराहाटीं ना बाबाल तयार कीतोरो, ओरे अगा उद्दंतुर," इत्तोर.

24 आ दादाल-तम्मुना पोल्लें केंजसि, अगा मत्ता कळमता पदि मंदि सिस्स्युल्क ओरापोर्रो होंग आतुर.

25 अस्के येसु सिस्स्युल्कुन ओना दगोरा केय्सि, "यहूदि आयवोरा राजालोर ओरा जीतागाह्कुन, ओरा कय्दा हिळ् इरालय हळंतुर, अल्हेने ई दुनियाता पेद्दा मनकालोरगुडा सिन्ना मनकालोरपोर्रो अदिकारम ताकसालय हळंतुर, इद मीकु एर्के.

26 गानि मिमेट मात्रम ओरालेसी कियानायो. मी लोप्पोटाल बोर अय्ते पेद्दा आयालय हळ्हांतोरो, ओर मीवा सेवा कियानोर आयापीता.

27 इंका मी लोप्पोटाल बोर अय्ते लीडर आंतन इंतोरो, ओर मीवा दासुड आयापीता.

28 बारित्ते मनकना रूपमते पुटतोन नना, सेवा कियागोटकुनालय वाया हिल्लेन गानि वैरेतोरा सेवा कियालय आनि वेल्लेटोर्कुन पापमताल पेचाहलय, ओराहाटीं नावा जीवा हियालय वातन," इत्तोर.

येसु इव्वुर गुडोर्कुन बेस कीतोर
(मरकुस 10:46-52; लूकाल 18:35-43)

* 20:19 मर्रा जीवाते तेदंतन हासि अदे मेंदुलते मर्रा जीवा अरमळ.

29 येषु आनि ओना सिस्स्युल्क यरिहो सहरताल पेय्सि होननेके, ओना पज्जो लोकुल्कुना पेद्दा मंदा वाता.

30 अस्के हर्दा पक्कते इव्वुर गुड्डोर्क उद्दिदसि मत्तुर. मावा मुन्नेटाल येषु होंचंतोर, इंचि ओर्कु एरपाट आतस्के ओर येषुन, “ए सामि, दाविद राजाना वंसमतोना! निमे मापोर्रो दया कीम,” इंचि वरगेयतुर.

31 अस्के, “चुपचाप मंतु” इंचि लोकुल्क आ गुड्डोर्कुन रांगतुर. गानि आ गुड्डोर्क मात्रम, लंगांचि, “ए सामि, दाविद राजाना वंसमतोना, मापोर्रो दया कीम,” इंचि मोत्कुनालय दलगुतुर.

32 अस्के येषु आगसि, ओर्कुन केय्सि इल्हा इत्तोर. “नना मीहाटी बतल कियना इंचि मीवा मनसु मंता?” इत्तोर.

33 अस्के ओर, “माकु दिस्सानाल मावा कळ्कुन बेस कीम सामि!” इंचि येषुन इत्तुर.

34 येषुं ओरापोर्रो दया वासि ओरा कळ्कुन इत्तोर. इट्टा इट्टुडे ओरा कळ्कु बेस आसि, दिसालय दलगांतां. अस्के ओरगुडा येषुना पज्जो होत्तुर.

21

येसु येस्सलेमते होळियतोर

(मरकुस 11:1-11; लकाल 19:28-38; योहान 12:12-19)

1 ओर अंतोर येस्सलेम सहरता दगोरा जयतुन मराकुना गुट्टापोर्रो मनना बैतपागे इनना नाटेना दगोरा एव्तर. पजा येषु इव्वुर सिस्स्युल्कुन केय्सि,

2 ओर्क इल्हा वेहिंचि नाटे लोहतोर. “मी मुन्ने दिस्सना नाटे होंट, अगा एव्ता एव्वुडे मीकु उंदि दोहाचि मत्ता गाडदि आनि दाना पोरी दिंसांता. अवुन लेहकुंचि नहगा पीसि वट्ट.

3 ओक्कला अवुन पीसि वायनेके बोर्नना मीकुन बतलन्ना इत्ते, ‘सामिक इव्वुना अक्सरम मंता,’ इंचि वेहट. अस्के ओर अवुन बिराना ओम्टु इंचि इंतोर.”

4 एनकटा पेनदा कबुरतोर वेहता पोल्ले निजम आयगोम इंचि इल्हा जर्गता. अद पोल्ले इल्हा मंता:

5 “सियोनुना मिथ्यळ्क* वेहट गदा, हुळ्ळट, मीवा राजाल मीहेके वासंतोर,

ओर सांत बुद्दिदतोनि, बर्वु कांजना गाडदि पोरीनपोर्रो उद्दिदसि वासंतोर.”*

6 अस्के सिस्स्युल्क होंचि येषु वेहताप कीतुर.

7 सिस्स्युल्क गाडदि आनि गाडदि पोरीन येषुनगा पीसि वातुर. पजा अवुनपोर्रो ओरां कपडिं तारतुर. तारतारित्ते येषु आ गाडदि पोरीनपोर्रो उदुतोर.

8 आ गार्दिंते वेल्ले लोकुल्क येषुनहाटी ओर केर्ता कपडिं तेंडसि हर्दे तारतुर. इंकिच्चुर अय्ते मराकुना कोम्मां नर्किसि हर्दे तारतुर.

9 अचोने आयका,

“दाविद राजाना मारिक होसन्ना!† पेनबाबाना अदिकार पीसि वायानोंक,

आसिर्वाद दोर्किंकांटी! स्वर्गमता पेनबाबाना स्तुति आयिकांटी.”*

इल्हा वरगेयसेके येषुना पज्जो-मुन्ने लोकुल्कुना मंदा ताकसेक होनुंदुर.

10 येषु येस्सलेम सहरते होळियतोर, अस्के पूरा सहरअंता उंदे रोद्दा आता. “ईर बोर आंदुर?” इंचि अंतोर पूसकियुंदुर.

11 अस्के, “ईर गालिल एरियाता नासरेत नाटेना पेनदा कबुरतोर येषु आंदुर,” इंचि लोकुल्क वेहंदुर.

* 21:5 सियोनुना मिथ्यळ्क इत्ते येस्सलेम सहरता रहिवासि. बारित्ते येस्सलेम सहर सियोन इनना गुट्टापोर्रो मत्ता अदुनहाटी येस्सलेम सहरता लोकुल्कुन सियोनुना मिथ्यळ्क (रहिवासि) इंतुर. * 21:5 जकर्याह 9:9 † 21:9 होसन्ना इद पोल्ले पेनदा स्तुति कियनाहाटी यहदि लोकुल्क वापर कीतुर. * 21:9 बजन संहिता 118:25-26

येसु गुळिते दांतोर

(मरकुस 11:15-19; लूकाल 19:45-48; योहान 2:13-22)

12 पजा येसु अगाटा गुळिते होंचि, अगा अम्मानोर्कुन, अस्सानोर्कुन अंटोर्कुन पेच्हाचि गेदुमतोर. अचोने आयका अगा मत्ता कोत्तां अदला-बदला कियानोरा बल्लन पावेरेलक अम्मानोरा कुर्सिन मिडुहाचि वाटतोर.

13 पजा येसु ओर्कुन इल्हा इत्तोर. “नावा लोतुन, पारतना कियाना लोन इंतुर, इंचि दर्मसास्त्रमते रासि मंता, गानि मिमेट दीन दोंगालक मक्कना जेगा कीतिर,” इत्तोर.

14 गुळिते येसुनगा गुडुडोर्क, कुंटोर्क वातुर, ओर्कुन अंटोर्कुन येसु बेस कीतोर.

15 गुळितगा येसु कीता पेद्दा-पेद्दा इंचंत्रमता कबाहक ह्ळसि “दाविद राजाना मर्रिक होसन्ना” इंचि पिलालकुना मोल्कुन्मडतुन कैजसि अगा मत्ता पेद्दा पेर्मांलोर दर्मसास्त्रम कराहना गुस्लक इरगा होंगुंक वातुर.

16 अस्के ओर येसुन, “पिलालक नीकुन बतल इंचंतुर, अद निमे कैजतिना?” इंचि पूसकीतुर. अस्के येसु, “हो, कैजसंतन. ए पेनबाबा, निमे सिन्ना पिलालकुंक आनि पाल उनना पिलालकुंक स्तुति कियमळ कराहतिन, ✱ इंचि दर्मसास्त्रमते रासि मंता. अद मिमेट बस्केने हदवा हिल्लिरा?” इंचि ओर्कुन इत्तोर.

17 पजा येसु ओर्कुन अग्गेन होळसि, सहरता पलाते बेतानि सहर होंचि, अद नर्का अग्गेन मत्तोर.

कायां हादवा अंजिर मराकु येसु सापनेम हीतोर

(मरकुस 11:12-14; 11:20-24)

18 हक्केरे येसु वापस सहरताहेके होनेके ओन्क कर्वेस्ता.

19 अस्के हर्दा पक्काते उंदि अंजिर मरातुन ह्ळसि आ मरातगा होत्तोर. गानि आ मराकु आर्कि तप्पा बतागे मनाहिल्लें. अस्के, “इंका नीकु बस्केने कायां हादा मन्नि,” इंचि येसु आ मरातुन इत्तोर. अल्हा इत्ता इन्मळे आ मरा वतसि होत्ता.

20 अल्हा आतद ह्ळसि सिस्युल्कुंक इंचंत्रम आता. अस्के ओर, “अंजिर मरा इच्चोर बिराना बल्हा वतसि होत्ता?” इंचि येसुन इत्तुर.

21 अस्के येसु ओर्कु इल्हा जवाब हीतोर. “नना मीकु निजम वेहांतन, ओक्कला मीकु बतले अनमानम हिलाकौंटा पेनदापोर्री विस्वासम मनानय्ते, नना बल्हा अंजिर मरातुन कीतनो अल्हा मिमेटगुडा किया परातिर. अचोने आयो इद गुट्टातुन, ‘इग्गेटाल तेदसि समुद्रमते होंचि अर्रा,’ इंचि इनानय्ते, अद होंचि समुद्रमते अर्रता.

22 मिमेट विस्वासमतोनि पारतनाते बतल तल्किना अद मीकु दोर्कार,” इत्तोर.

पेद्दालक येसुना अदिकार तल्कतुर

(मरकुस 11:27-33; लूकाल 20:1-8)

23 पजा येसु गुळिते होळियसि पेनदा पोल्लें कराहसेके मननेके, अगा पेद्दा पेर्मांलोर आनि यहूदिल्लकुना पेद्दालक ओनगा वातुर. वासि, “निमे ई कबाहक बद अदिकारमते कीसंतिन? नीकु ई अदिकारम बोर हीतोर?” इंचि पूसकीतुर.

24 अस्के येसु ओर्क इल्हा जवाब हीतोर. “ननागुडा मीकुन उंदि सवाल पूसकीतन, मिमेट जवाब हियानय्ते, नना बद अदिकारमते इव कबाहक कीसंतन इत्तद वेहंतन.

25 अय्ते वेहट, योहानुंक बापतिस्मा हियाना अदिकारम बगाटाल दोर्कता? स्वर्गमताला हिलाकौंटे मनकालोरहेंदाल दोर्कतना?” इत्तोर.

अस्के ओर ओर इल्हा वळ्ळकुनालय दल्गतुर. “ओक्कला स्वर्गमताल दोर्कता इंचि मनम इनानय्ते, ‘योहानुन बारि विस्वासम किय्थिर?’ इंचि इनानुर.

26 ओक्कला मनकालोराहेंदाल दोर्कता इनानय्ते, लोकुल्लुकुना वेंरि! बारित्ते योहान पेनदा कबुरतोर् आंदुर इंचि लोकुल्लुक नम्मंतुर.”

27 अदुनहाटी ओर, “माक एर्का हिल्ले,” इंचि इत्तुर.

अस्के, “अल्हा अय्ते, इव कबाहक बद्द अदिकारमते कीसंतनो, ननागुडा मीकु वेहोन,” इंचि येसु इत्तोर.

इव्वुर मर्कुना वेसुडि

28 केंजट, नना उंदि सिन्ना वेसुड वेहंतन, दान केंजसि मिमेट बतल इनकुंतितो वेहट. वरोर मनकंक इव्वुर मर्क मत्तुर. उंदि मल्का आ मनकल ओना पेद्दा मरिनगा होंचि, “कोको, निमे इय्याला अंगुर बगिचाते होंचि कबळ कीम,” इंचि वेहतोर.

29 अस्के आ पेद्दा मरि “नना होनोन” इत्तोर गानि पज्जो ओर विचारम कीसि बगिचाते होत्तोर.

30 पजा आ मनकल ओना इंकावरोर मरिनगा होंचि, “कोको, इय्याला निमे अंगुर बगिचाते होंचि कबळ कीम” इंचि वेहतोर. अस्के आ मरि, “सरे दांतन बाबा!” इत्तोर, गानि ओर होनेन हिल्लोर.

31 अय्ते आ इव्वुर मर्कनाल बा मरि बाबोना पोल्ले केंजताप? इंचि येसु ओर्कुन पूसकीतोर्. अस्के ओर, “पेद्दा मरि केंजतोर्,” इंचि इत्तुर.

“नना निजम वेहंतन, बोगामोताहक आनि कर वसुल कियानोर मीकन्ना मुन्ने पेनदा राज्येमते दांतुर.

32 योहान मीकु सत्तेमता हर्रि हुप्सालय वातोर्, ओन मिमेट नम्मा हिल्लिर. गानि बोगामोताहक, कर वसुल कियानोर बारे ओन नमतुर, इद्द मीकु एर्के. अय्नागानि मीवा मनसु बदलांचि योहानुन नम्मालय मिमेट तयार आया हिल्लिर,” इंचि येसु इत्तोर.

बटाइतोना वेसुडि

(मरकुस 12:1-12; लूकाल 20:9-19)

33 पजा येसु इल्हा इत्तोर. केंजट, इंकुंदि वेसुडि वेहांतन, वरोर मनकल मत्तोर. ओर उंदि अंगुर तोटा कीतोर्. आ तोटा सुट्टु गूरे दोहाचि तोटाता लोप्पेन अंगुर पंडिना पानकम तेंडालय उंदि पोक्का तव्विसि गानगु तयार कीतोर्. दाना दग्गेरेने कावेलहाटी उंदि मंडा वाटतोर्. पजा तोटातुन वेंरेतोर्क बटाइक हीसि, वेंरे देसेम होत्तोर.

34 अंगुर पंडिं कोय्याना वेला वाता, अस्के पालुनाहाटी ओना दासुल्लुकुन बटाइतोर्हेके लोहतोर.

35 अस्के बटाइतोर् दासुल्लुकुन दोर्कापीसि, वरोन तंतुर, वरोन हव्वक्तुर, वरोनपोर्रो बारे बंडा हुक्तुर.

36 इद्द केंजसि बगिचाता मालक इंका एक्को दासुल्लुकुन लोहतोर. ओरतोनिगुडा बटाइतोर् मोदाला कीतापे कीतुर.

37 आकिरते, “नावा मरिन बेस कदर कियानुर,” इनकुंचि ओना मरिन ओरहेके लोहतोर.

38 गानि बटाइतोर्, ओना मरि वायानद हळसि, “ईर अय्ते वारसदार आंदुर, दट ओन हव्वकिसि, ओना जायदाद मनम एतकुनकोम,” इंचि ओर ओर इनकुत्तुर.

39 पजा ओन दोर्कापीसि तोटाता पलाते ओसि हव्वक्तुर.

40 अय्ते आ तोटाता मालक वायानय्ते, आ बटाइतोर्कुन बतल कियानुर?

41 ओर येसुन इत्तुर, “असोंटा दुस्टुल्लुकुन तंचि-तंचि हव्वकानुर आनि बोर् अय्ते पंटा पेय्स्तस्के ओन्क वेलापोर्रो त्स हीतोरो, ओन्क बटाइक हिय्यानुर,” इत्तुर.

42 पजा येसु ओर्कुन इल्हा इत्तोर. “मिमेट दर्मसास्त्रमते बस्केन हदवा हिल्लिरा? बद्द बंडातुन अय्ते मिस्त्रिल्लुक कबळ्ळक ओज्जो इंचि हय्या हिल्लुर, अदे बंडा सेंकु मूलाता पुनादि बंडाः आता. इद्द सामि कीता कबळ आंद, इद्द मना नदरते इंचंत्रमाता कबळ आंद,” इत्तोर.*

43 “मिमेट निजम इत्तिर. केंजट, दाना अर्तम इल्हा मंता. पेन मीकु हियना स्वर्ग राज्येमतुन तेंडसि, मीवा जेगाते दाना पोल्लेपोर्रो तिरियना वेंरे जाति लोकुल्लुकुंकी हीता.

‡ 21:42 पुनादि बंडा लोन दोहकाम्ने लोन गट्टिगा मननाहाटी लोतुक बंडातोनि पुनादि दोहांतुर. इगे पुनादि बंडा येसु आंदुर.

* 21:42 बजन संहिता 118:22-23

44 बोर अय्ते इद बंडापोर्रो अर्रतुर, ओर तुकडां-तुकडां आयनुर, गानि अद बंडा बोरपोर्रो अय्ते अर्रता, ओर पिच्चि-पिच्चि आयानुर,” इंचि इत्तोर.

45 पेद्दा पेर्मालोर्क आनि परिसिल्क येसु वेहता वेसुडिं केंजसि, येसु ओरा बारेमतेन वळ्कसंतोर इंचि एरपाट कीतुर.

46 पजा ओर येसुन दोर्का पियालय हळतुर, गानि लोकुल्लुकुन हळसि वेरियतुर. बारित्ते लोकुल्लुकु येसुन पेनदा कबुरतोर आंदुर इंचि नमतुर.

22

मरमिना बोजनम वेसुड
(लूकाल 14:15-24)

1 येसु मर्र्दि मल्ला, लोकुल्लुकुं वेसुडि वेहासेक इल्हा वळ्कालय दलगतोर.

2 स्वर्ग राज्येम वरोर राजानलेसी मंता. ओर ओना मर्रिना मरमिं कु उंदि कुळ्पु इरतोर.

3 आ कुळ्पुं कु बोर्कुं अय्ते केय्सि मत्तोर, ओर्कुं केय्सि तायालय, ओना दासुल्लुकुन लोहतोर. गानि ओर वायोम इंचि इत्तुर.

4 वायोम इंचि इत्तारित्ते, मर्रा इच्चुर दासुल्लुकुन राजाल इल्हा वेहट इंचि लोहतोर, “हुळ्ळाट, मीहाटी नना कुळ्पु इरतन, बल्सता कुर्रा आनि कौंदा कोयतन, कुसिरगुडा वेसि तयार मंता. अदुनहाटी मिमेट गाटो तिनालय ताकट इंचि इंटु,” इत्तोर.

5-6 राजाल वेहिनागानि, राजाना पोल्लेता कदर कियार्कोटा, इच्चुर ओरा पोलाल्लुकुनहेके होत्तुर, इच्चुर बारे ओरा कबळ दंदानहेके होत्तुर. इच्चुर बारे राजाना दासुल्लुकुन पीसि तंचि हळ्किसि पोहतुर.

7 अस्के राजां क इरगा होंग वाता. पजा राजाल ओना सिपाइल्लुकुन लोहचि, ओना दासुल्लुकुन हळ्कतोर्कु हळ्किसि ओरा सहरकु तडमि दोस्सा वेहतोर.

8 पजा राजाल ओना दासुल्लुकुं इल्हा वेहतोर. “मरमिना कुळ्पु तयार मंता. गानि केयता मनकालोर बेसटुर आयुर.

9 अदुनहाटी मिमेट हर्कुं पीसि, गल्ली, बजारकुन पीसि होंचि दोर्कुंतोर अंतोर्कुं गाटो तिनालय केय्सि तदु,” इंचि इत्तोर.

10 अस्के दासुल्लुकु, हर्कुं, गल्ली पीसि होंचि बेसतोर, सेड्डोर अंतोर्कुं जमा कीसि तत्तुर. अस्के मरमिना लोते हेडमितुर निडिस होत्तुर.

11 अस्के वाता हेडमितोर्कुं राजाल हळत्तस्के, मरमिन लोप्यो मरमिन लायक बेसता कपडिं केस्वा* वरोर मनकल ओन्क दिसतोर.

12 अस्के राजाल ओन, “निमे मरमिन लोप्यो बेसता कपडिं केस्वा, मरमिना मंडातां हिल्लु बल्हा वातिन?” इंचि ओन पूसकीतोर गानि आ मनकल बतले वळ्का हिल्लोर.

13 अस्के राजाल ओना जीतागाहकुन केय्सि, “ईना कय्क-काल्क दोहचि, पलाते हीकटते पोहचीम्ट. अगा मनानोर अळ्सेके, वरगेयसेके, पल्लुकु कोर्कसेक मनांतुर,” इंचि इत्तोर.

14 पजा, “केयतोर वेल्लेटुरे मंतुर. गानि पेर्कुत्तोरु मात्रम इच्चुरे मंतुर,” इंचि येसु वेसुड वेहामळ आपतोर.

येसुन तप्पुने दोर्का पियालय परिसिल्कना उपायाल्लुकु
(मरकुस 12:13-17; लूकाल 20:20-26)

15 पजा परिसिल्क अगटाल पेय्सि उंदगा जमा आसि, येसुन बल्हा किसन्ना ओर वळ्काना पोल्लेतेन ओना तप्पु दोर्का पियाना इंचि उपायम कियालय दलगतुर.

16 परिसिल्क येसुन पसांचना उपायाल्लुकु कीसि, ओरा इच्चुर सिस्सुल्लुकुन हेरोद राजाना मनकालोरतोनि ओनाहेके लोहचीतुर. ओर येसुनगा होंचि इल्हा इत्तुर. “गुरु, निमे निजम वळ्कानोन,

* 22:11 बेसता कपडिं केस्वा आत्मिक रीतिते बेस मनवोर, पडना पिस्वर होळसियवोर. † 22:12 मंडा इत्ते पंदिर आंद.

पेनदा हर्दा बारेमते सत्तेमते करहानोन आंदिन इंचि माक एरपाट मंता. बोर बतल इनिनागानि दाना पिकिरगुडा किथ्यिन, निमे लोकुकुना मोकम हळसि वळिकन, इर्दिका माकु एके.‡

17 अय्ते माकु वेहा. नियम परकारम, कैसर राजांक कर दोहमळ न्यायमेना आयोना? नीवा विचारमते बतल मंता?" इत्तुर.

18 ओरा कोटे उपायाल्क येसुक मुन्नेटाले एका मत्ताहाटी ओर ओर्कुन इल्हा इत्तोर. "ए डोंगिरिटा, बारि नावा पट्टू हळान्तिर?

19 मिमेट कर दोहना कोत्ता नाकु ह्पसट," इत्तोर. अस्के आ लोकुल्क ओन्क उंदि एंडि बंडि ह्पिस्तुर.

20 ह्पिस्तस्के, "इद एंडि बंडिपोर्री बोना पोट्टवा आनि पोरोल मंता?" इंचि येसु ओर्कुन पूसकीतस्के,

21 "कैसर राजानद," इंचि ओर इत्तुर. पजा येसु ओर्कु वेहतोर. "बद कैसर राजानद मंता, अद कैसर राजांक हीम्टु, बद अय्ते पेनदाद मंता, अद पेनदुक हीम्टु." इत्तोर.

22 येसुना पोल्ले केंजसि, ओर्कु इचंन्रम आता. पजा ओर अगटाल होत्तुर.

इच्चुर सदुकि लोकुल्क येसुन पसांचलय हळंतुर
(मरकुस 12:18-27; लूकाल 20:27-40)

23 अदे रोजु इच्चुर सदुकिर येसुनगा वातुर (ईर हासि मरी जीवाते तेदमळतुन ईर नम्मुर.)

24 वासि इल्हा सवाल पूसकीतुर, "गुग्, मसाना नियम परकारम, वरोर मनकल पिलाल्क आयाका मुन्नेन हायानय्ते ओना मुत्तोनतोनि ओना तम्मुर मरमिं आसि, हातोना वंसम बेर्सागोटालय पिलाल्कुकुन कना परांतोर.

25 अय्ते महगा एडुर दादाल-तम्मूहक मत्तुर. पेद्दा दादाना मरमिं आतां गानि पिलाल्क आयाका मुन्नेन ओर हातोर. पजा ओना मुत्तोन ओना तम्मुर मरमिं आतोर.

26 आ तम्मुरगुडा पिलाल्क आयाका मुन्नेन हातोर. पजा ओना पज्जोटोर दान मरमिं आतोर ओरगुडा हातोर. इल्हा एडुरगुडा दानतोनि मरमिं आसि पिलाल्क आयाका मुन्नेन हातुर.

27 अंतोर हाता पजा, आ मुरतळगुडा हाता.

28 अय्ते हातोर अंतोर मरी जीवाते तेदतस्के, आ एडुर लोप्पोटाल अद बोना मुत्तो आयार? बारित्ते, ओर एडुरगुडा दान मरमिं आसि मत्तुर," इत्तुर.

29 अस्के येसु ओर्क इल्हा जवाब हीतोर. "मिमेट दर्मसास्त्रमतुन आनि पेनदा ताकततुन एरपाट कियाका तप्पु अर्तम कीकुंचतिर.

30 बारित्ते हातोर मरी जीवाते तेदानुर अस्के, ओर मरमिं आयुर, मरमिं कीसिगुडा हिथ्युर. गानि ओर स्वर्गमता पेनदा दूतनलेसी मनांतुर.

31-32 गानि हातोर मरी जीवाते तेदानुर इंचि दर्मसास्त्रमते वेहचि मंता, अद बतल इत्ते, 'नना अब्राहाम, इसाक आनि याकोबुना पेनदुन आंदुन,'* इंचि पेन इत्ता. अदुन हद्विसि दाना अर्तम बस्केने एरपाट किय्या हिल्लिरा? इंचि अद हातोर पेन आयो गानि जीवाते मनानोरा पेन आंद," इल्हा येसु इत्तोर.

33 येसु इच्चोन वळकतारित्ते, अगा मत्ता लोकुल्क ओना पोल्ले केंजसि इचंन्रम आतुर.

अन्निकन्ना पेद्दा पोल्ले बद्दु?

(मरकुस 12:28-34; लूकाल 10:25-28)

34 येसु सदुकिर्कुन वळकाकोटा कीतोर इंचि परिसिल्लुकुंक तेळियतारित्ते ओर जमा आसि येसुनहेके वातुर.

‡ 22:16 इगे रोंडु पाटिं मंतां, उंदि परिसिल्लुकुना पाटिं इंकुदि हेरोद राजाना पाटिं. परिसिल्लुकुंक कैसर राजांक कर दोहमळ न्यायमेना, आयोना? गानि हेरोदना पाटितोर मात्रम कैसर राजांक कर दोहमळ गावाले इंतुर.

§ 22:17 कैसर इद राजाना पोरोल आयो. रोम सरकारते अन्तिकन्ना पेद्दा पदवि आंद. * 22:31-32 निर्गमन 3:6

- 35 ओरा लोप्पो मूसाना नियम बेस तेळियतोर वरोर मत्तोर, ओर येसुना पट्टु हळालय,
 36 “गुरु, मूसाना नियम लोप्पो अन्निकन्ना पेद्दा आदेस बद्द आंद?” इंचि येसुन सवाल पूसकीतोर.
 37 अस्के, “निमे नीवा सामि आता पेनदुन पूरा मनसुनाल, पूरा आत्माताल, पूरा बुद्धिदताल पावरम कीम.
 38 इदे अन्निकन्ना पेद्दा आनि मोदोलता आदेस आंद.
 39 रोंडो आदेस बतल इत्ते, नीवद निमे बच्चोन पावरम कीतिनो, अचोने पावरम इंकावरोनगुडा कीम.
 40 इव रोंडु आदेसकुना आदारम पोरैने मूसाना नियम आनि पेनदा कबुरतोर रासता पुस्तकाल्क मंतां.” इंचि येसु जवाब हीतोर.

येसु परिसिल्कन सवाल पूसकीतोर
 (मरकुस 12:35-37; लूकाल 20:41-44)

- 41 पजा परिसिल्क उंदगा जमा आसि मत्तस्के, येसु ओर्कुन उंदि सवाल पूसकीतोर.
 42 “किरिस्तुना बारेमते मीवद बतल विचारम मंता? ओर बोना मर्रि आंदुर?” अस्के, “ओर दाविदना मर्रि आंदुर,” इंचि परिसिल्क इत्तुर.
 43-44 अस्के येसु ओर्कुन इल्हा इत्तोर. “अथे, दाविद पवित्र आत्माते निंडसि इल्हा इत्तोर. सामि नावा सामिन इत्तोर, बदवेरदाका अथे नीवा पगातोर्कुन नीवा काल्कनगा तायोन, अदवेरदाका नावा तिना बाजुंक उद्दिदेसि मन.*
 45 कुद्दु दाविद ओन सामि इंचि इत्तोर अथे ओर दाविदना मर्रि बल्हा आया परांतोर?” इत्तोर.
 46 अस्के ओर बोरे येसुना पोल्लेक जवाब हिया पराहिल्लुर. आ रोजुनाल येसुन बद्दे सवाल पूसकियालय बोर्कु हिम्मत आयाहिल्ले.

23

दर्मसास्त्रम कराहना गुरुल्क आनि परिसिल्कुना होंग
 (मरकुस 12:38-40; लूकाल 11:37-52; 20:45-47)

- 1 सिस्युल्कन आनि अगाटा मंदितुन हळसि येसु इत्तोर गदा,
 2 “दर्मसास्त्रम कराहना गुरुल्क आनि परिसिल्कुंक मूसाना नियम कराहना हक्कु मंता.
 3-4 इंचि ओर तेहेते तेदा पर्खा मोता दोह्चि मनकालोरा हट्टनपोर्री ईर्रतुर गानि आ मोतातुन कांजसि ओयनेके वेल् दोस्सि आसरागुडा आयुर. अदुनहाटी ओर मीकु बतल-बतल वेहंतुरो अव अन्नि कीसेके ताकट, गानि ओर कीताप मात्रम कियमट.”
 5 ओर ओरा कबाहक लोकुल्क हळना इंचि कीतुर. पेनदा पोल्लेन रासि, तायित्कुने निहचि पेद्दा-पेद्दा दुम्में ओरा दंडा कयकुंक, कप्पक दोहकुंतुर. ओरा कपडिना कोंगुल्कु जिल्लर-जल्लर होळसीतुर. लोकुल्क ओर्कुन “सादु” इनागोम इंचि इल्हा कीतुर.*
 6 अचोने आयाका दर्मसास्त्रम कराहना लोहकुने, कुळपुकुने पेद्दाल्क उद्दाना जेगाते उदमळ इत्ते ओर्क वेल्ले इस्टम.
 7 हाट्टमकुने जोहार वेहागोटकुनमळ, मनकालोराहेंदाल गुरु इंचि केया वेहकुनमळ ओर्कु बेस अनपिच्चंता.
 8 गानि मिमेट अंतोर दादालोर-तम्मुह्क आंदिर, मीवा अंतोरा गुरु वरोरे. अदुनहाटी मिमेट मीकुन “गुरु” इंचि इनागोटकुनमट.
 9 स्वर्गमते मनना पेने मीवा बाबाल आंदुर, अदुनहाटी इद्द बूमिमे मिमेट बोने “बाबा” इंचि इनमट.

10 अल्हेने मीकु वरोरे सामि मंतोर, ओर किरिस्तु आंदुर. अदुनहाटीं मीकुन बोरे “सामि” इंचि केया मन्नि.

11 गानि बोर अय्ते पेनदा मुन्ने अंतोर्कन्ना पेद्दा आयालय ह्ळांतोर, ओर अंतोरा सेवा कियानोर आयिर.

12 बोर अय्ते, ओनद ओरे पेद्दा इनकुनानुर, पेन ओन सिन्ना किय्यार. अल्हेने बोर अय्ते पेनदाहाटीं सिन्ना आसि ताकांतोर, ओन पेन पेद्दा किय्यार.

13 अरे डोंगि परिसिल्क आनि दर्मसास्त्रम कराहना गुस्लुकुनिटा, मीक गोसा तप्पो. स्वर्ग राज्यमते होनानोरा हरि मिमेट बंद कीतिर. मिमेट अय्ते होन्निर, होनानोर्कुनगुडा होन्ना हिथ्यिर.

14 अरे डोंगि दर्मसास्त्रम कराहना गुस्लुकु आनि परिसिल्कुनिटा, मीकु गोसा तप्पो. मुंडामोस्ता मुर्ताह्कन मुळाहंतिर. अल्हेने लोकुल्लुकु ह्पसालय वेल्लेनजेम पारतना कीतिर. मिमेट डोंगिर्क आदिर! मीकु पेन एक्को सिक्सा हिथ्यार.*

15 अरे डोंगि दर्मसास्त्रम कराहना गुस्लुकु आनि परिसिल्कुनिटा! वरोन मीवा मतमते तायालय मिमेट देसे-देसेम तिरियसि बूमि-मब्बु उंदि कीतिर. ओर मीलोप्पो वातस्के, मिमेट ओन मीकन्ना एक्को पापमते अरहचि नरकमते लोहंतित, दानहाटीं मीकु बच्चोर पेद्दा गोसा वायार.

16 अरे, हरि ह्पसंतोम इनना गुड्डिर्कनिटा! मिमेट इंतोर गदा, बोर अय्ते पेनदा गुळिता ओट्टु तितोर, ओन्क बतल आयो. गानि बोर अय्ते गुळि लोप्पोटा बंगारमता ओट्टु तितोर, ओन्क मात्रम आ ओट्टु परकारम ताका पीता, इंचि इंतोर. दानहाटीं मीकु बच्चोर पेद्दा गोसा वायार.

17 अरे गुड्डिडर! बद पेद्देद, बंगारमा बंगारमतुन पवित्र कियना गुळिआ?

18 इंका इल्हा इंतोर गदा, बोरन्ना पेन गद्देता ओट्टु तिचि दान परकारम ताकाकोटे बतल आयो, गानि पेन गद्देपोर्रो वाटता उपारमता ओट्टु बोर अय्ते तितोर, ओन्क मात्रम आ ओट्टु परकारम ताका पीता.

19 अरे गुड्डिर्कनिटा! पेन गद्दे पेद्देदा मरि पेन गद्दे हेंदाल पवित्र आयना दानपोर्रो वाटता उपारम पेद्देदा?

20 अदुनहेंके बोर पेन गद्देता ओट्टु तितोर, ओर पेन गद्देपोर्रो मत्ता अन्निटवुना ओट्टु तित्तापे.

21 अल्हेने बोर अय्ते गुळिता ओट्टु तितोर, ओर गुळिते मनना पेनदा ओट्टु इंका तितोर.

22 बोर अय्ते स्वर्गमता ओट्टु तितोर, ओर पेनदा राजगद्दे आनि राजगद्देपोर्रो उदिस मनानोनद इंका ओट्टु तितोर.

23 अरे डोंगि दर्मसास्त्रम कराहना गुस्लुकु आनि परिसिल्कुनिटा, मीक गोसा तप्पो. बारित्ते मिमेट पुदिना, जिल्करा, सोप इसोंटा पंटातालगुडा पदि तूसकुनाल उंदि तूस पेनदुक हीतिर. गानि न्यायमते तिरियमळ, दया कियमळ, पेनदापोर्रो विस्वासम इरमळ इसोंटव दर्मसास्त्रमता बेसता पोल्लेन मिमेट होळसीतिर. पदि तूसकुनाल उंदि तूस पेनदुक हियमळ इद बेसे. गानि इद कीसेक-कीसेक अवुनगुडा होळसाकोटा ताका मत्तिर.

24 हरि ह्पसंतोम इनना गुड्डिर्कनिटा! मिमेट नुल्लेतुन बारे वडा पीसि उंतिर गानि लोटापेटातुन बारे ह्ळवा अल्हे मिगातिर.

25 अरे डोंगि दर्मसास्त्रम कराहना गुस्लुकु आनि परिसिल्कुनिटा, मीकु गोसा तप्पो. बारित्ते, मिमेट गिन्ने-गिलासकु सिराप लोकुल्लुकु दिसालय पलाताल तोमसि साप कीतिर, गानि लोप्पो मात्रम मीवा कराब गुनाल्क, पापाल्क निडिस मंतां.

26 अरे गुड्डि परिसिल्कुनिटा! मुन्ने मीवा गिलासकु-गिन्नेन लोप्पोटाल तोमसि नोरट्टु, अस्के अव पलातालगुडा बेस दिसंता.

* 23:14 इद वचनम कोन्नि पांडु लिपिने हिल्ले.

27 अरे डोंगि दर्मसास्त्रम कराहना गुस्लक आनि परिसिल्कुनिटा, मीकु गोसा तप्पो. बारित्ते मिमेट तेल्लटा सुन्ना होकता गोरिनसंतोर आंदिर. अव पलाताल ह्ळालय सक्कगा दिसतां, गानि लोप्पो ह्ळते, पीनगुना बोक्कां कळियसि होंचि गब्बु पीसि मनतां.

28 अल्हेने मिमेट इंका पलाताल लोकुलकुंक पक्का नीतिमंतुलकुन लेहका दिसतिर. गानि मीवा पीट लोप्पो नडेह कियना बुद्धि, पापमता कबाहक निंडिस मंता.

29 अरे डोंगि दर्मसास्त्रम कराहना गुस्लक आनि परिसिल्कुनिटा, मीकु गोसा तप्पो. बारित्ते, मिमेट पेनदा कबुरतोरहाटी गोरि दोहांतिर आनि नीतिमंतुलकुना गोरिन सोक कीतिट.

30 अल्हा कीसि मिमेट इंतिर, मोमोट पेद्दालकुना कालमते मंचि मत्ते, पेनदा कबुरतोर्कुन हक्कानेके, ओर्क सायता आया कोन्नेम.

31 इल्हा इंचि, “मोमोट पेनदा कबुरतोर्कुन हक्कतोर वंसमतोर्कुम आंदुम,” इंचि मीवद मिमेट उल्टा गवाइ वेहकुंतिर.

32 अयते मिमेट मीवा पेद्दालक सुस्व कीता पापमतुन पूरा कीम्ट.

33 ए तरासकुनसंतोरिटा! आनि नय तरास पोरिह्कनसंतोरिटा! मिमेट बल्हा अयना नरकमते होनमळ तप्पो.

34 अदुनहाटी नना मीहेके पेनदा कबुरतोर्कुन, बुद्धिमंतुलकुन आनि दर्मसास्त्रम कराहना गुस्लकुन लोहांतन. मिमेट ओराव्टेटाल इच्चुर्कुन हक्ककिर, इच्चुर्कुन कूसुंक वेलाड वाटकिर, इच्चुर्कुन मीवा दर्मसास्त्रम कराहना लोह्कुने ओसि पोद्देटे ते तनकिर, तंचि ओर्कुन नार-नार तिराहिचि तिप्पल्क कीकिर.

35 दीनहेंदाल, नीतिमंतुड आता आबेलनगटाल अयते गुळि आनि गद्दे नड्डुम मिमेट हक्कता बर्काना मरिं जकर्याहनगड्क, बचटुर नीतिमंतुलकुना नेत्तुर अयते ई बूमिपोर्रो पोगागोटमळ जर्गता, आ अंतोरा नेत्तुरता दोसेम पूरा मीपोर्रो अरार.

36 नना मीकु निजम वेहांतन, इव अन्नि पोल्ले ई पीळितोरपोरिन अरतां.

37 ए येस्सलेमतोरिटा, ए येस्सलेमतोरिटा! मिमेट पेनदा कबुरतोर्कुन हक्कानोर आंदिर, इंका पेन मिहगा लोहचीतोर पोरो मिमेट बंडां हुक्कानोर आंदिर. कोर्क दाना पीसेन रेक्काना हिळु बल्हा जमा कीतनो, अल्हेन ननागुडा मीवा पिलालकुन जमा कियना इंचि बच्चुंगो मल्कां कोरतन. गानि मिमेट मात्रम कोराहिल्लिर.

38 ह्ळ्हा, इंदके मी लोतुन मीहाटी कुल्ला होळ्ळसमळ जर्गता. पूरा लोन बतल हिलाकोटा आंता.

39 नना मीकु वेहानद बतल इत्ते, “सामिना पोरोलते वायानोर आसिर्वाद दोर्कतोर,” इंचि बदवेरदाका अयते मिमेट इन्निरो अदवेरदाका नाकुन मर्रा ह्ळिर.

24

गुळि नासडेम आसि दुनिया मुंळगना बारेमते

(मरकुस 13:1-37; लूकाल 17:26-36; 21:5-33)

1 येसु गुळिताल पलाते पेय्से होननेके, ओना सिस्युल्क ओन्क गुळिता बंगलां ह्पुसालय ओनगा होत्तुर.

2 गानि येसु ओर्कु इल्हा जवाब हीतोर. “मिमेट इवन्निन ह्ळसंतिर गदा! नना मीकु निजम वेहांतन, इव बंडां उंदानपोर्रो उंदि मनाकोटा कूल्हाना वेला वायनद मंता,” इत्तोर.

3 आयंका येसु जयतुन मराकुना गुट्टापोर्रो होंचि उदतोर. ओर ओटिगा मत्तद ह्ळसि ओना सिस्युल्क ओनगा होंचि इल्हा इत्तुर, “इवन्निन गटनां बस्के जर्गनुं माक वेहा. इंका निमे वायाना वेला आनि दुनिया मुंळगना आकिर वेला बस्के आंता इंचि मोमोट बव चिन्हां ह्ळसि एरपाट कीकोम?” इत्तुर.

4 अस्के येसु ओर्कु इल्हा जवाब हीतोर. “मीकुन बोर पसांचकोटा मिमेट उसारते मंटु.

5 नावा पोरोल एतसेके बच्चदुरो लोकुल्लक वांतुर. वासि, 'ननाने किरिस्तुन आंदुन' इंचि वेल्लेटोर्कुन पसांचंनुर.

6 मिमेट लडाईं आनि लडाईना पोल्लेना बारेमते केंजसि वेरियमट, अल्हा तप्पाकोटा आयानुंगे. गानि दुनियाता आकिर वेला अस्केने वायो.

7 देसेमपोर्रो देसेम, राज्यमपोर्रो राज्यम लडाईं आयनुं, वेरे-वेरे जेगाने बूकंपाल्क आयनुं, कर्व अरार.

8 गानि इल्हा आयमळ इत्ते एर पूरालय नोप्पि सुस्व आताप आंद."

9 "मिमेट नाकुन विस्वासम कीताहाटीं लोकुल्लक मीकुन तकलिप कियालय अदिकारिल्लुकुंक अप्पजेपंतुर, अस्के ओर मीकुन हक्कंतुर, नावा पोरोलताहेंका दुनियातोर बोरे मीकुन हय्सुर.

10 आ वेलाते बच्चदुरो विस्वासम कियानोर ओरा विस्वासम होळसंतुर. वरोंक-वरोर पगां आसि वरोंक-वरोर हयसाकोटा आंतुर.

11 बच्चदुरो आबद्दम कबुरतोर, पेनदा कबुरतोर्कुम इंचेके वांतुर, लोकुल्लुकुंक सेड्डा हरि हपसंतुर.

12 पापाल्क एक्को आसि वेल्ले मंदिता पावरम इंका तक्को आसेक दांता.

13 गानि बोर अय्ते पेनदापोर्रोटा विस्वासमते आकिरदाका निल्सि मनंतोर, ओनके मुक्ति दोर्कार.

14 पेनदा राज्यमता बारेमता बेसता कबुर दुनियाता अन्नि देसेल्लुकुना लोकुल्लुकुंक उंदि गवाइ इंचि तेळियागोटसि वेहतस्के, इद दुनियाता आकिर आयार."

15 दानिएल पोरोलता पेनदा कबुरतोर वेहताप, बोरे हय्सवसोंटा नासडेम कियाना वस्तु, गुळि लोप्पो पवित्र जेगाते नित्तिसि मत्तद मिमेट हळकिर (हद्वानोर इदुन अर्तम कीकुंदुर.)

16 अस्के बोर अय्ते यहुदिया एरियाते मंतुरो, ओर गुट्टनहेके वित्तिर,

17 बोर अय्ते लोतपोर्रो मंतोर, सामान पीसि वायालय लोप्पो होळियानायो,

18 बोर अय्ते नेलिने कबळ कीसेक मंतोर, कपडिं पीसि वायालय मल्सि लोन होनानायो.

19 अव रोजकुने पीट मत्ता मुर्ताह्कुंक आनि सिन्ने मर्तल्लुह्कुंक वेल्लेन तकलिप वांता.

20 पीनि कालमते अल्हेने नोमकेम रोजुने ई वित्तना वेला वायामान्नि इंचि मिमेट पारतना कीम्टु.

21 बारित्ते अद वेलाते इसोंटा तकलिप वायार गदा, दुनिया पुट्टस्केटाल अय्ते इदवेरादाका, बस्केन वाया हिल्ले. मुन्नेगुडा बस्केन वायो.

22 ओक्कला पेन अव रोजकुन तक्को कियाकोटा मंचि मत्ते, बोरे पिसाकोन्नेर. गानि पेर्कुत्ता लोकुल्लुकुनाहाटीं पेन अव रोजकुन तक्को किय्यार.

23 अद वेलाते ओक्कला बोरन्ना मीकुन किरिस्तु इगे मंतोर, अगा मंतोर इनानय्ते, मिमेट ओर्कुन नम्मूमट.

24 बारित्ते अव रोजकुने आबद्दम किरिस्तुल्लक, पेनदा आबद्दम कबुरतोर वायानुर. आनि कुदुरते पेन पेर्कुत्ता लोकुल्लुकुन पसांचलय पेदूदा-पेदूदा चिन्हां, इंचंत्रमता कबाहक कीसि हप्सानुर.

25 हूळाट! नना अय्ते इव पोल्लें मीक मुन्नेने वेहचीतन.

26 दानहाटीं "किरिस्तु केडाते मंतोर" इंचि मीकु बोरन्ना वेहानय्ते, मिमेट अगा होनमट. इंका "किरिस्तु लोप्पोटा अरंते मंतोर" इंचि मीकु वेहानय्ते मिमेट ओनापोर्रो विस्वासम इरमट.

27 बारित्ते बल्हा अय्ते पोळ्द पेयसनाहेके मेसंते दाना वेलगु पोळ्द अरानगाहक दिसंता, मनकना रूपमते पुटतोन नना वायानस्केगुडा अल्हे आयार.

28 अल्हेने बगा अय्ते पीनगु मनंता अग्गेन गदूदलि जमा आंतां.

29 आ रोजकुना तकलिपकु मारता मास्डे,

"पोळ्दुंक हीकट मुच्चका वायार, वेळसि वेल्लु हियाकोटा आयार,

मब्बुनाल सुक्कां हिळु अरानुं, मब्बुने मनना अन्नि सक्तिन कदलिच्चमळ जर्गता."*

30 पजा मनकना रूपमते पुटतोन नना वायना चिन्ह स्वर्गमते दिस्सार, अस्के बूमि पोरोटोर अन्नि जातिना लोकुल्क वेल्ले दुक्कम कियानुर. पजा मनकना रूपमते पुटतोन नना पेद्दा महिमा आनि ताकततोनि मब्बु तेर्पेनपोर्रो उद्दिदिसि वायानेके लोकुल्क हळानुर.

31 अस्के तूताकोमता पेद्दा आवाजुनतोनि, नना नावा दूतन बूमिपोर्रो लोहांतन. आ दूतां बूमिपोर्रो नालुं मूलानाल, मब्बुना ई कोस्साताल अय्ते आ कोस्सादाका नना पेर्कुत्ता लोकुल्कुन जमा कीतां.

32 इंदके अंजिर मराताल उंदि पोल्ले करियट. अंजिर मराता कोम्मांक इग्गुर बस्के अय्ते वांता, अस्के एद्दि कालम दग्गेरा एव्ता इंचि मिमेट एरपाट कीतिर.

33 इल्हा इव अन्नि गटनां जर्गनद हळसि, ओर दग्गेरा मंतोर, गल्मातगेन मंतोर इंचि मिमेट एरपाट कीतिर.

34 नना मीकु निजम वेहांतन, बदवेरदाका अय्ते इव अन्नि पोल्ले पुरागा आयोंगो, अदवेरदाका ई पीळि मुळगो.

35 इद बूमि, मब्बु नासडेम आसि होंदार, गानि नावा पोल्ले बस्केने नासडेम आयों.

36 अद रोजु, अद गळिया बोर्के तेळियो. स्वर्गमता दूतांक आयि, मनकना रूपमते पुटतोन नाकु आयि बोर्के तेळियो. गानि सिराप पेनबाबाके तेळियंता.

37 नोहाना रोजकुने बल्हा जर्गतनो, मनकना रूपमते पुटतोन नना वायानस्केगुडा अल्हे जर्गार.

38 कम्मुड वासि नोहाल डोंगाते नेंगनादाका लोकुल्क तिचेके-उंचेके मरमिं कीसेके, आसेके मत्तुर.

39 कम्मुड वासि ओर्कुन तंचि ओयनदाका ओर्कु तेळिया हिल्ले.

मनकना रूपमते पुटतोन नना वायानस्केगुडा अल्हे जर्गार.

40 आ वेलाते नेदे इव्वुर कबळ कीसेके मनानुर, ओराव्टेताल वरोन तेहाकुंचि ओयमळ जर्गता, इंकावरोन अग्गेन होळसमळ जर्गता.

41 रोंडु मुर्ताह्क गट्का नोरसेक मनांतां, उंदितुन ओयमळ जर्गता, इंकुंदितुन अग्गेन होळसमळ जर्गता.

42 बद रोजु मीवा सामि वायानुर अद मीकु एरपाट हिल्ले, अदुनहाटी मिमेट तेळ्विते मंट.

43 गानि मिमेट उंदि पोल्ले बेस तेळियागोट्कुट्टु. अद बतल इत्ते, दोंगल नर्कटा बद वेलाक वांतोर इंचि ओक्कला लोता मालकुंक मुन्नेन तेळियसि मत्ते ओर तेळ्वितेन मनांतोर आनि आ दोंगन लोते होळिया हिय्योर.

44 अल्हेने मिमेट इनकुनवा वेलाते मनकना रूपमते पुटतोन नना वांतन. अदुनहाटी मिमेटगुडा बेस तयारते मंट.

तेळ्वि मत्ता सेवक बोर?

(लूकाल 12:41-48)

45-46 मालक हिल्वस्के ओनगा कबळ कियानोर्कुंक वेलापोर्रो गाटो-जावा दोस्सालय, वरोर बेस तेळ्विगल्लोड, विस्वासमलायक सेवक मालाकुंक गावाले. अय्ते असोटा सेवक बोर मंतोर? बोर सेवक अय्ते, मालक मल्लिसि वातस्के वेहता कबळ बरोबर कीसेक मनांतोर, ओरे सेवक बेस आसिर्वाद दोर्कुंतोर आंद.

47 नना मीक निजम वेहांतन, मालक आ सेवाकुन ओना पूरा आस्ति-पास्तिनपोर्रो अदिकारि इंचि ईरंतोर.

48 गानि ओक्कला आ दुस्ट सेवक ओना मनसुने, “नावा मालक वायालय अय्ते इंका आल्सेमे मंता” इनकुंचि,

49 ओना दंटाता सेवाकुल्कुन तन्नुड-गुदुडुडु कियमळ, इरगा तिचि-उंचि बदमासिं कियमळ सुस्व कीतोर इनकुन!

50 अस्के आ सेवक विचारमगुडा किय्योर असोटा रोजुने, गळियाते ओना मालक वायानुर.

51 वासि, आ सेवाकुंक पेट्टा सिक्का हीसि, ओन डोंगि लोकुलकुने कल्पानुर. अगा सिराप अळमळ, पल्कु कोर्कमळे मनंता.

25

पदि लेय्यना वेसुड

1 येसु मर्रा उंदि वेसुड वेहालय सुख कीतोर. ओर इतोर, स्वर्ग राज्येम बारेमते नना उंदि वेसुड वेहंतन केंजट. पदि लेय्यां कंदिलि पीसि वरोर मरमिना पेडांक कलियालय होत्तां.

2 अवनगटाल हेय्युं तेल्वि हिल्वव मत्तां, हेय्युं बारे तेल्वितव मत्तां.

3 तेल्वि हिल्वा लेय्यां कंदिलि पीसि अय्ते होत्तां, गानि अवुनतोनि निय ओया हिल्लें.

4 तेल्विता लेय्यां बारे कंदिलिनतोनि डब्बाने निय इंका पीसि होत्तां.

5 मरमिना पेडल वायालय आलसेम आताहेंके, अव निद्र वासि मीडतां.

6 नड्डुम नर्का, “मरमिना पेडल वासेक मंतोर, ओन्क कलियालय दट,” इंचि लोल्लि केंजावाता.

7 अस्केने अव पदि लेय्यां बिराना तेदसि, कंदिलि तयार कीतां.

8 तेल्वि हिल्वा लेय्यां, तेल्विता लेय्यान, “मिहगटा निय इच्चुर माकु हीम्पु, मावा कंदिलि पिरालय आतां,” इंचि इत्तां.

9 गानि, “इद निय बोनकु इंचि बोनकु हालंता? इत्ते माकु इंका हालो, मीकु इंका हालो, अल्हा आयो गानि, मिमेट दुकानमते होंचि मीवाहाटी निय अस्सि तट्टु,” इंचि तेल्विता लेय्यां इत्तां.

10 अव निय अस्सालय दुकानमते होत्तस्के मरमिन पेडल एवतोर. तयारते मत्तव लेय्यां मरमिन पेडनतोनि मरमिंकु होत्तां, पज्जो तल्पु वाटसीतुर.

11 गडसेम मत्तारित्ते, दुकानमते होत्तव हेय्युं तेल्वि हिल्वा लेय्यां मरमिना लोन वासि, “सामि-सामि, मोमोट वातोम, तल्पु तेंडा!” इंचि केयालय दलगातां.

12 अस्के मरमिन पेडल, “मिमेट बोर आंदिर? नना निजम वेहचंतन, मीकुन बिल्कुल एरपाट किय्योन,” इंचि लोपोटाल अवुन इतोर.

13 पजा येसु सिस्युलुकुन इल्हा इतोर. “मनकना रूपमते पुटतोन नना वायानदगुडा इल्हे मनंता. अद रोजुन आनि वेलातुन मिमेट बिल्कुल एरपाट किय्यिर. अदुनहाटी मिमेट तेल्विते मंटु,” इतोर.

मुञ्चुर सेवाकुलुकुना वेसुडि
(लूकाल 19:11-27)

14 पजा येसु इंकुंदि वेसुडि वेहतोर. स्वर्ग राज्येम वरोर मनकनलेसीं मंता, बोर अय्ते, पय्नेम होनाका मुन्ने ओना दासुलुकुन केय्सि ओनगा मत्ता दनम ओर्कु अप्पजेटोर.

15 ओर ओरा उसारतनमतुन हळसि, वरोंक बंगारमते निडसि मत्ता हेय्युं मुल्लें हीतोर, वरोंक रोंडु मुल्लें हीतोर. इंकावरोंक उंदि मुल्ले हीतोर. पजा ओर पय्नेम होतोर.

16 बोनकु अय्ते हेय्युं मुल्लें दोर्कतंगो ओर बिराने अव कोत्तन दंदाते दोस्सि, इंका हेय्युं मुल्लेना कल्दार्क संपलिच्चोर.

17 अल्हेने रोंडु मुल्लें दोर्कतोर इंका दंदा कीसि, रोंडु मुल्लें एक्को संपलिच्चोर.

18 गानि उंदि मुल्ले दोर्कतोर बारे, लोन ओसि पोक्का तव्वि ओना मालक हीता मुल्लेतुन मक्किचि इरतोर.

19 वेल्लेन रोजकु आतारित्ते आ दासुलुकुना मालक मल्लि वासि, ओर हीता दनमता हिसाब तल्कतोर.

20 अस्के बोनकु हेय्युं मुल्लें दोर्किस मत्तां, ओर इंका एक्को हेय्युं मुल्लें तच्चि, “मालक, निमे नाकु बंगारमते निडसि मत्ता हेय्युं मुल्लें हीसि मत्तिन. हळा, नना अव कोत्तना दंदा कीसि, इंका हेय्युं मुल्लें संपलिच्चन,” इंचि इतोर.

21 अस्के मालक कूस आसि, “वा रे वा, निमे बेस विस्वासमलायक दासुन आंदिन. इच्चोटा पोल्लेतगा निमे विस्वासमलायक मंतिन, अदुनहाटीं नना नीकु वेल्लेटोरपोर्रो अदिकारम हीतन. निमे लोपो होंचि मालकुनतोनि कूळसि कुसिते मन,” इत्तोर.

22 पजा बोनकु अयते रोंडु मुल्लें दोर्किस मत्तां, ओरगुडा मालकनगा वासि, “मालक, निमे नाकु बंगारमते निंडसि मत्ता रोंडु मुल्लें हीसि मत्तिन. ह्ळा, अव कोत्तना दंदा कीसि, इंका रोंडु मुल्लें संपलिचत्तन,” इंचि इत्तोर.

23 अस्के मालक कूस आसि, “वा रे वा, निमे बेस विस्वासमलायक दासुन आंदिन. इच्चोटा पोल्लेतगा निमे विस्वासमलायक मंतिन, अदुनहाटीं नना नीकु वेल्लेटोरपोर्रो अदिकारम हीतन. निमे लोपो होंचि मालकुनतोनि कूळसि कुसिते मन,” इत्तोर.

24 पजा उंदि मुल्ले दोर्कतोर मालकुनगा वासि, “मालक, निमे कळक मनकन आंदिन, निमे वीतवगा कोय्यंतिन, सल्लुवगा जमा कीतिन इंचि नाकु एरपाट.

25 अदुनहाटीं नना वेरियसि निमे हीता मुल्लेतुन ओसि पोक्का तव्वि मक्किचि इरतन. इदे, नीवा मुल्ले नीकु वापस हीसंतन,” इंचि इत्तोर.

26 गानि ओना मालक ओन्क इल्हा जवाब हीतोर. “निमे दुस्ट, लंडु दासुन आंदिन. नना वीतवगा कोय्यानोन, सल्लुवगा जमा कियानोन इंचि नीकु एरपाटे मत्ता.

27 अयते निमे नावा दनमतुन बोर्कन्ना वड्डिक हिथ्या मत्तिन. नना मल्लिसि वातस्के नावा दनमतुन वड्डितोनि एक्कुंचि मन्नेन,” इत्तोर.

28 पजा मालक ओना दासुलकुन केय्सि, “मिमेट ओनागटाल मुल्ले एतसि, पदि मुल्लें मत्तोनगा हीम्ट.

29 बारित्ते, बोनगा अयते पेनदा पोल्लेन तेल्लिचकुनना बुद्धि मंता, पेन ओन्क इंका हीता. अस्के ओन्क वेल्लेन आंता. गानि बोनगा पेनदा पोल्लेन तेल्लिचकुनना बुद्धि हिल्ले, ओनगा मत्ता बुद्धितुनगुडा पेन वापस एतकुन्नार.

30 अयते ई कबळक ओज्जुवा दासुन पलाते हीकटते पोहचीम्ट. अगा मननोर अब्बेसेके, वरगेयसेके, किटुर-किटुर पल्लु कोर्कसेक मनांतुर,” इंचि मालक वेहतोर.

आकिरता न्यायम

31 मर्रा येसु इल्हा वळकालय दल्लुतोर. बस्के अयते मनकना रूपमते पुटतोन नना नावा महिमाते राजाल आसि अन्नि दूतनतोनि वांतन, अस्के नावा अदिकारमते राजगदूदेपोर्रो उदूदंतन.

32 पजा नावा मुन्ने दुनियाता अन्नि देसेल्लकुना लोकुल्लक जमा आयनुर. अस्के गोल्लल एटिनाल गोर्रें बल्हा वेरे कीतोर, अल्हेने लोकुल्लकुन नना वरोनगाटाल वरोन वेरे कीतन.

33 अल्हा कीसि नना गोर्रें बारे तिना बाजुंक, एटिन बारे डेमा बाजुंक कीतन.

34 अस्के राजाल तिना बाजुनोर्कुन इनानुर, “वट्टु, ना बाबाना आसिर्वाद् मीकु दोर्कुता, मीवाहाटीं दुनिया पुटतस्केटाले राज्येम तयार कीसि मंता, दान एत.

35 इद राज्येम मीवादे आंदु, बारित्ते नना कर्वुने मत्तस्के नाकु मिमेट तिनालय हीतिर, नाकु दूपातस्के उनालय एर हीतिर. नना मीकु एरपाट हिलाकुना गानि मीवा लोहकुने मनालय जेगा हीतिर.

36 नाकु केरालय कपडिं हिल्लवस्के मिमेट नाकु कपडिं हीतिर, नना बिमारते मत्तस्के मिमेट नावा सेवा कीतिर. नना जेलने मत्तस्के मिमेट नाकु कलियालय वातिर.”

37 अस्के तिना बाजुंक मत्ता नीतिमंतुल्ल ओन इनानुर, “सामि, नीकु कर्वेस्तद ह्ळसि बस्के तिनालय हीतोम? नीकु दूपातद ह्ळसि बस्के एर उनालय हीतोम?

38 निमे एरपाट हिलाकुना गानि बस्के नीकुन लोन ओसि मनालय जेगा हीतोम? नीकु कपडिं हिल्लवद ह्ळसि बस्के कपडिं केरालय हीतोम?

39 निमे बिमार मत्तस्के, जेलते मत्तस्के बस्के मोमोट नीकु कलियालय वातोम?”

40 अस्के राजाल, “नना मीकु निजम वेहासेक मंतन, इगे मत्ता नावा कदर हिलुवा विस्वासुल्कुनाल बोन वरोन बेस ह्ळिना, नाकुन बेस ह्ळतापे,” इंचि ओर्कुन इनानुर.

41 पजा ओना डेमा बाजुंक मत्तोर्कुन, “सापनेमते मनानोरिटा, नहागटाल पेय्सि होंट. देय्याल्कुना मुक्यानाहाटीं आनि अबुना दूतनहाटीं तयार कीता बस्केळ्ळक पोत्सेके मनना तडमिते होंचि अर्द.

42 बारित्ते नना कर्वुनि मत्तस्के, नाकु तिनालय तिडि हिय्या हिल्लिर. नाकु दूपातस्के उनालय एर हिय्या हिल्लिर.

43 नना एरपाट हिलवोन लेह्का मत्तस्के नाकु मीवा लोहकुने जेगा हिय्या हिल्लिर. नाकु कपडिं हिल्वस्के मिमेट केरालय कपडिं हिय्या हिल्लिर, नना बिमार मत्तस्के, जेलने मत्तस्के मिमेट नाकु कलियालय इका वाया हिल्लिर, दानहाटीं इदे मीवा सिक्सा आंद,” इंचि सामि इनानुर.

44 अस्के ओर, “सामि, नीकुन मोमोट, कर्वेस्सि मत्तस्के, दूपातस्के, एरपाट कियवस्के, कपडिं हिल्वस्के, बिमार मत्तस्के आनि जेलने मत्तस्के ह्ळसि बस्के सेवा किया हिल्लोम?” इंचि इनानुर.

45 अस्के राजाल ओर्कुन, “नना मीकु निजम वेहासेक मंतन, इगे मत्ता नावा कदर हिलुवा विस्वासुल्कुनाल बोन वरोनगुडा बेस ह्ळकाकोटे, अस्के नाकुनगुडा बेस ह्ळवापे!” इंचि इनानुर.

46 पजा “ई सेडुडा लोकुल्कुंक मारवा सिक्सा आंता. नीतिमंतुल्कुंक बारे बस्केळ्ळक पिस्सना पिस्वर दोर्कता,” इंचि येसु इत्तोर.

26

यहूदि पेद्राल्क येसुन ह्ळकाना उपायाल्क कीतुर

(मरकुस 14:1-2; लूकाल 22:1-2; योहान 11:45-53)

1-2 इव अन्नि पोल्ले वेहमळ आतारित्ते येसु सिस्युल्कुन इल्हा इत्तोर. “नाडि आयो मन्ने दाटसि होनना पंडुगु* मंता इंचि मीकु एरपाटे. मनकना रूपमते पुटतोन नाकुन कृसुनपोर्रो वेल्लाड वाटालय, पगातोरा कय्दे पीसि हियमळ जर्गता,” इत्तोर.

3 अस्के कयपा इनना पेद्रा पेर्माना मिद्रुदेते, पेद्रा पेर्मांलोर आनि यहूदिरा पेद्राल्क जमा आतुर.

4 येसुन सप्पुडडाका दोर्कापीसि ह्ळककोम, इंचि ओर मीटिंगते उपायम कीतुर.

5 गानि “पंडुगु रोजकुना लोप्पो ह्ळका मन्नि, अल्हा कीते लोकुल्क गडबड किया परांतुर,” इंचि इन्कुत्तुर.

उंदि मुरतळ येसुनपोर्रो अत्तर निय वळियता

(मरकुस 14:3-11; योहान 12:1-8)

6 पजा येसु बेतानिया इनना नाटे होंचि, कुस्टरोगम आसि मत्ता सिमोनिना लोन आगतोर.

7 अस्के उंदि मुरतळ वेल्ले दरता अत्तर निय उंदि गुर्गिते पीसि येसुनगा वाता. ओर गाटो तिनालय उदुदिसि मत्तस्के अद मुरतळ आ नियदुन ओना तल्ला पोर्रोटाल वळियता.

8 अदुन ह्ळसि अगा मत्ता सिस्युल्कुंक होंग वासि, “ई अत्तर नियदुन वाट्टेदे बारि पोचीतिन?

9 इद अत्तर निय वेल्ले दरते अम्मिसि अव कोत्तां गरिबोर्कुंक हिया वायवड गदा!” इंचि इत्तुर.

10 येसु ओर वळकानदुन एरपाट कीसि इल्हा इत्तोर. “दान बारिक तकलिप कीसतिर? अद नावाहाटीं बेसता कबळे कीता.

11 गरिबोर्क अय्ते बस्केळ्ळक मिहगा मनांतुर, गानि नना बस्केळ्ळक मिहगा मनानोन आयोन.

12 नावा हामुर एव्ता इंचि नावा मेंदुल्क अत्तर निय होकताप, अद इल्हा कीता.†

13 नना मीक निजम वेहांतन, पूरा दुनियाते, बगा-बगा पेनदा बेसता कबुर वेहमळ जर्गता, अगा ई मुरतदुन, आनि इद कीता कबळतुन मति कियानुर,” इत्तोर.

* 26:1-2 दाटसि होनना पंडुगु इजिप्त देसेमता गुलामगिरिताल यहूदि लोकुल्कुन पेन पेचाहचि तत्ता मतिते, इद पंडुगु कीतुर.

† 26:12 अद कालमते यहूदि लोकुल्क बोर्नना हाते, हातोना पीनगुंक बेस गब्बु वायना वस्तुकुन पावडर कीसि होकुंदुर. इद ओरा रिवाज मत्ता.

- 14 पजा, पन्नेड सिस्स्युल्कुनाल वरोर इस्कारियोत यहदल मत्तोर. ओर पेद्दा पेर्माँलोरगा होत्तोर.
 15 होंचि, “नना मीक येसुन पीसि हीते, मिमेट नाकु बतल हीतिर?” इंचि इत्तोर. अस्के ओर ओन्क मुप्पै एंडि रूपै हीतुर.
 16 अस्केटाल ओर येसुन पीसि हियालय मोका हूळसेक मत्तोर.

येसुना आकिरता बोजनम

(मरकुस 14:12-26; लूकाल 22:7-23; योहान 13:21-30)

17 पुल्लगा आयवा पिडिता हारिना पंडुगुना मोदाटा रोजु, † सिस्स्युल्क येसुनगा वासि, “गुरु, दाटसि होनना पंडुगुना गाटो तिनना तयारि बगा कीकोम इंचि नीवा मनसु मंता?” इंचि इत्तोर.

18 अस्के येसु ओर्कुन इल्हा इत्तोर. “सहरते पलाना मनकानगा होंचि, नावा आकिर वेला दगोरा एव्ता. नीवा लोन नना नावा सिस्स्युल्कुनतोनि दाटसि होनना पंडुगु कियालय वांतन इंचि मावा गुरु वेहतोर इल्हा ओन्क वेहत.” इत्तोर.

19 अस्के येसु वेहतापे सिस्स्युल्क होंचि, दाटसि होनना पंडुगुना गाटो तयार कीतुर.

20 पोळ्द होत्तारिते, येसु ओना पन्नेडु सिस्स्युल्कुनतोनि गाटो तिनालय उदतोर.

21 तिननेके येसु ओर्कुन, “हीके केंजट नना निजम वेहचंतन, मिहगटाल वरोर नाकुन पगातोर कयदे पीसि हीतोर.” इंचि इत्तोर.

22 इदुन केंजसि ओर्कु वेल्लेन दुक्कम आता. अदुनहाटी, “ओन नना अयते आयोन गदा सामि?” इंचि वरोन पज्जो वरोर येसुन पूसकीतुर.

23 अस्के, “नावातोनि गिन्नेते कलियसि तिनानोरे नाकुन पीसि हियनुर. ☆

24 दर्मसास्त्रमते रासि मत्ताप, मनकना रूपमते पुटतोन नना अयते दांतने. गानि बोनाहेंदाल अयते नाकुन पीसि हियमळ जर्गता, आ मनकल पुट्टाकौटेन बेस आसि मनवळ,” इत्तोर.

25 अस्के येसुन पीसि हियना यहदल, “ओन नना अयते आयोन गदा गुरु?” इंचि पूसकीतस्के, “निमे इत्तिन अल्हेने!” इंचि येसु इत्तोर.

26 गडसेम आतारित्ते ओर तिननेके, येसु हारितुन पीसि पेनदुक दन्यवाद कीतोर. पजा हारितुन तुकडां कीसि ओना सिस्स्युल्कुंक हीसेक. “तिट्ट, इद नावा मेंदुल आंद,” इंचि इत्तोर.

27 इंका ओर अंगुर पंडिना पानकमता गिलास कयदे पीसि, पेनदुक दन्यवाद कीतोर. पजा ओर्कु हीसि, “मिमेट अंतोर दीन उंटु.

28 बारित्ते इद पूना करारता नेत्तुर आंदु. वेल्लेटुर लोकुल्कुना पापालक मापि कियालय पोंगसेक मंता.

29 नना मीक वेहांतन, नावा बाबाना राज्यमते पूना तरिकाते ई अंगुर पानकम उनाना रोजुनदाका, मर्रा बस्केने अंगुर पानकम उन्नोन,” इंचि येसु इत्तोर.

30 पजा ओर, पेनदा स्तुति कियाना उंदि पाटा पारसि, जय्तुन मराकुना गुट्टापोर्रो होत्तुर.

पत्रु तपिच्चुकुनना बारेमते येसु मुन्नेने वेहतोर

(मरकुस 14:27-31; लूकाल 22:31-34; योहान 13:36-38)

31 अस्के येसु ओर्कुन इल्हा इत्तोर. “इय्याला नर्कळ्ळ मिमेट अंतोर नाकुन होळसि वित्तंतिर, बारित्ते, गौरी कोहानोन नना हव्कंतन, मंदता गौरी बेंदव-हेके पायसि वित्तंता. ☆ इंचि दर्मसास्त्रमते रासि मंता.

32 गानि नना हासि, मर्रा जीवाते तेदतंका, मीकन्ना मुन्ने गालिल एरियाते दांतन,” इत्तोर.

33 अस्के पत्रु, “अंतोर नीकुन होळसि होनिनागानि, नना नीकुन बस्केने होळसि होन्नोन गुरु,” इंचि येसुन इत्तोर.

† 26:17 पुल्लगा आयवा पिडिता हारिना पंडुगुना मोदाटा रोजु पुल्लगा आयवा हारिना पंडुगुना मोदाटा रोजु इत्ते दाटसि होनना पंडुगु. अदे रोजु ओर दाटसि होनना पंडुगुना बोजनाल्कुनाहाटी तयारि कीतुर. ☆ 26:23 बजन संहिता 41:9 ☆ 26:31 जकर्याह 13:7

34 “नना नीकु निजम वेहचंतन, इय्याला नर्कडकु गोगोड कूसाका मुन्ने निमे मूड मल्लां नाकुन एरपाट किय्योन इंतिन,” इंचि येसु पत्रुन इत्तोर.

35 गानि, “ओक्कला नाकु नीतोनि हामुर वायिना बेसे, नीकुन नना एरपाट किय्योन इंचि बस्केने इन्नोन,” इंचि पत्रु इत्तोर. अंतोर सिस्स्युल्कगुडा अल्हे इत्तुर.

गेतसेमनि जेगातगा येसु पारतना कीतोर

(मरकुस 14:32-42; लूकाल 22:39-46)

36 येसु, ओना सिस्स्युल्कनतोनि गेतसेमनि इनना जेगातगा एवतस्के, “नना इच्चुर मुन्ने होंचि पारतना कीसि वायनदाका मिमेट इग्ने उद्दिदिसि मंटु,” इंचि इत्तोर.

37 पजा पत्रुन आनि जब्दिना इव्वुर मर्कुन पीसि ओनतोनि ओतोर. अगा ओर वेल्ले दुक्कमते सिम्मरा आतोर.

38 अस्के ओर्कुन, “नावा जीवा दांता बारे इत्ताप नाक वेल्ले दुक्कम आसेक मंता. मिमेट नातोनि इग्ने आगसि तेल्विते मंटु,” इंचि इत्तोर.

39 इच्चुर मुन्ने होंचि बोक्बोर्ले अर्सि ओर इल्हा पारतना किय्यालय दल्युतोर, “ए बाबा, ओक्कला कुदुरते, नावा इद गोसा तप्पिसि होन्नि, गानि इद नावा विचारम मत्ताप आयो, नीवा विचारम मत्तापे आयि.”

40 पजा सिस्स्युल्कनगा वासि हळते ओर निद्रा होंचि मत्तुर. अस्के येसु पत्रुन इल्हा इत्तोर. “मिमेट उंदि गंतामेडगुडा नातोनि तेल्विते मंदा पर्रिरा?

41 मिमेट पट्टुने अर्काकोटा मननाहाटी तेल्विते मंचि, पारतना कीसेके मंटु. नना वेहताप किय्यालय मीवा आत्मा तयार मंता, गानि मीवा मेंदुल कमजोर मंता,” इत्तोर.

42 येसु मसंदि मल्ला होंचि, “नावा बाबा, नना इदुन उन्ने पीता इनानयते, नीवा विचारमे पूरा आयि,” इंचि पारतना कीतोर.

43 येसु मर्रा वासि हळतस्के, ओर मंचि निद्रते मत्तुर.

44 ओर्कुन अग्गेन होळसि येसु मर्रा पारतना किय्यालय होत्तोर. अस्केगुडा मुन्ने कीतापे पारतना कीतोर.

45 पजा सिस्स्युल्कनगा वासि ओर्कुन इल्हा इत्तोर. “मिमेट इंदकेगुडा मीडसेक, आराम कीसेके मंतरिरा? हुळाट, मनकना रूपमते पुटतोन नाकुन पापिर्कुना कय्दे पीसि हियना वेला एव्ता.

46 तेदाट, मनम दाकोम. नाकुन पीसि हियानोर दग्गेरेन एव्वोर,” इत्तोर.

येसुन पीतुर

(मरकुस 14:43-50; लूकाल 22:47-53; योहान 18:3-12)

47 येसु इव पोल्लें इंचेकेने मत्तोर, अच्चोटेन पन्नेंडु सिस्स्युल्कना लोप्पोटोर वरोर यहदल इनानोर अगा वातोर. ओनातोनि पेद्दा पेर्मांलोर आनि यहदि पेद्दालक लोहता, गुळि कावेल कियानोरा गेंग कसेहक, गुत्पां, पीसि वातुर.

48 येसुन पीसि हियानोर, “नना बोन अयते बुरांतनो, ओरे येसु आंदुर, ओन दोर्का पीटु,” इंचि मुन्नेन ओर्क उंदि चिन्ह वेह्चि मत्तोर.

49 पजा यहदल बिराना येसुनगा होंचि, “जोहार गुरु” इंचि ओन बुरतोर.

50 अस्के येसु, “ना दंतातोना, निमे बद कबळ्ळक वातिन अद कीम,” इंचि इत्तस्के, अगा मत्ता मत्तोर मुन्नेळ्ळक वासि येसुनपोर्रो कय वाट्सि ओन दोर्का पीतुर.

51 अच्चोटेन येसुनतोनि मत्तोरव्टे वरोनगा कसेर मत्ता, ओर दान तेंडसि पेद्दा पेर्मांनो वरोर दासुन हळ्कालय कसेरते हीतोर गानि, अद कसेर सिराप ओना केवदुन नेमाहकुचि होत्ता.

52 अस्के येसु ओन, “नीवा कसेर नीवा नडिके मन्नि, बारित्ते कसेर पियानोर कसेरतेन हांतोर.

53 नना नावा बाबान तल्लिस मत्ते, उंदि गेंगुने वेय्कुना दूतां मनना पन्नेंडु गेंगुल्कुंकन्ना बच्चुंगो वेय्कुना पेनदा दूतन नाकुन पिसागोटालय लोहचि मन्नेर, इद नीकु तेल्वियोना?

54 इल्हा आते दर्मसास्त्रमते नावा बारेमते रासता पोल्ले बल्हा निजम आयनुं? अव्ते इल्हा आयमळ गावाले, इंचि रासतद मंता,” इंचि येसु इत्तोर.

55 अस्के येसु मंदिंतुन इल्हा इत्तोर. “बरोन दोंगन पिथ्यालय वाताप मिमेट कसेहक, गुत्पां पीसि नाकुन पिथ्यालय वातिरा? नना अय्ते रोजे गुळिते कराहसेक मीतोनि मनुंदुन, अस्के नाकुन पिथा हिल्लिर.

56 गानि दर्मसास्त्रमते नावा बारेमते पेनदा कबुरतोर रासता पोल्ले पूरा आयाना इंचि इल्हा जर्गता,” इत्तोर. पजा ओना सिस्स्युल्क अंतोर ओन होळसि तेगा विततुर.

पेद्रुदाल्कुना मुन्ने येसुना जवाब

(मरकुस 14:53-65; लूकाल 22:54-55; 22:63-71; योहान 18:13-14; 18:19-24)

57 लोकुल्क येसुन पीसि कयपा इनना पेद्रुदा पेर्मानगा ओतुर. अगा दर्मसास्त्रम कराहना गुस्ल्क आनि यहुदि पेद्रुदाल्क जमा आसि मत्तुर.

58 गानि पत्रु लक्कुटाले येसुना पज्जो-पज्जो पेद्रुदा पेर्माना दारादाका होत्तोर. अगा बतल आयार इंचि ह्ळालय, दाराते होंचि कावेल क्रियानोरतोनि उदतोर.

59 पेद्रुदा पेर्मात्तोर आनि पंचादितोर अंतोर येसुंक हामुरता सिक्सा हियानाहाटी ओना विरोदमते तप्पुड गवाइ पह्कतुर.

60-61 गानि बच्चुटुरो वासि ओना विरोदमते आबदूदम गवाइ हिथ्यिना, ओर्कु उंदिगुडा तप्पु दोर्काहिल्ले. आकिरते इब्बुर वासि, “पेनदा गुळितुन कूलाह्वि दान मूड रोजकुने मर्रा दोहा परांतन इंचि ओर इत्तोर,” इसोंटा गवाइ हीतुर.

62 अस्के पेद्रुदा पेर्मल तेदसि, “इंर नीकु विरोदमते बल्हा गवाइ हीसंतुर ह्ळा, निमे बतले जवाब हिथ्यिना?” इंचि येसुन इत्तोर.

63 गानि येसु चुपचाप मत्तोर. अस्के पेद्रुदा पेर्मल येसुन इल्हा इत्तोर. “जीवाते मनना पेनदा ओट्टु तिचि नीकुन पूसकीसंतन, ओक्कला निमे पेनदा मर्रि, किरिस्तुन आते माक वेहा,” इत्तोर.

64 अस्के येसु ओन इल्हा इत्तोर. “निमे इत्तिन अद निजमे! गानि नना मीकु वेहांतन, इंका मुन्ने मिमेट मनकना रूपमते पुटतोन नाकुन ताकतवर पेनदा तिना बाजुंक उद्दिदसि मत्तद आनि मब्बु तेर्पेनपोर्री उद्दिदसि वायानेके ह्ळकिर,” इत्तोर.

65 अस्के, पेद्रुदा पेर्मल होंगुने ओना कपडिं हराहकुंचि, “इंर पेनदा अपमानम कीतोर. मनाकु इंका बतल गवाइ गावाले? ओना पोल्ले मिमेट केंजतिरे गदा!

66 अय्ते मिमेट बतल इतिर?” अस्के यहुदिल्क, “ओर हामुर सिक्सालायक मंतोर,” इंचि इत्तुर.

67 अस्के इच्चुर लोकुल्क येसुना तोड्डिड पोर्री उस्किसि, ओन तंचि-गुद्दिदसि,

68 “ए किरिस्तु, नीकुन बोर तंतुर, माकु बविस्स्यवानि वेहा,” इंचि इत्तुर.

पत्रु येसुन एरपाट क्रियोन इत्तोर

(मरकुस 14:66-72; लूकाल 22:56-62; योहान 18:15-18; 18:25-27)

69 हीके पत्रु पेद्रुदा पेर्माना दारातेने उदिस मत्तोर, अस्के उंदि दासि ओनगा वासि, “गालिल एरियाता येसुनतोनि निमे इंका मत्तिन गदा?” इंचि इत्ता.

70 अस्के पत्रु “निमे बतल इंचांतिनो नाकु तेळिया हिल्ले!” इंचि ओर अगा मत्तोर अंतोर मुन्नेन इत्तोर.

71 आयंका ओर दाराताल पेथ्से गलमातगाहकु होत्तोर. अस्के इंकुंदि दासि ओन ह्ळसि, “इंर इंका नासरेत नाटेना येसुनतोनि मत्तोर,” इंचि अगा मत्तोर्कुंक वेहता.

72 अस्के पत्रु मर्रा उंदि मल्का, ओट्टु तिचि, “नना ओन बिल्कुल एरपाट क्रियोन,” इंचि इत्तोर.

73 गडसेम मत्तारित्ते, अगा नित्तिसि मत्तोर इच्चुर लोकुल्क पत्रुनगा वासि, “निमे निजम ओना दंटातोने! नीवा वळकुड केंजसि निमे गालिल एरियातोनि इंचि तेळियंता,” इंचि इत्तुर.

74 अस्के पत्र, “नना ओट्टु तिचि वेहचंतन, नना आबद्दम वळ्ळकानय्ते पेन नाकुन तिन्नि, आ मनकन नना बिल्कुल एरपाट किय्योन,” इंचि इत्ता इनुडे गोगोड कूसता.

75 “इय्याला नर्कळ्ळक गोगोड कूसाका मुन्ने, निमे नाकुन मूड मल्कां, एरपाट किय्योन इंतिन” इंचि येसु पत्रुक मुन्ने वेहिचि मत्ता, पोल्ले मति वासि, ओर पलाते होंचि वेल्ले दुक्कमते इरगा अळतोर.

27

रोमि राज्यपाल पिलातुसना मुन्ने येसु

(मरकुस 15:1; लूकाल 23:1-2; योहान 18:28-32)

1 पंग आतारित्ते पेद्दा पेर्मालोर्क आनि यहुदि पेद्दाल्क अंतोर येसुन हळ्ळकाना निरनायम कीतुर.

2 पजा ओन दोहिचि वाट्टिस ओसि, पिलातुस राज्यपालुंक अप्पजेपतुर.

यहुदल उर्रि दोस्सि हांतोर

(प्रेरितुल्कुना कबाहक 1:18-19)

3 येसुंक हामुरता सिक्सा दोर्कता इंचि, येसुन पीसि हीता यहुदांकु तेळियतारित्ते वेल्ले पस्तांचतोर. पजा ओर पेद्दा पेर्मालोर्क, यहुदि पेद्दाल्कुंक आ मुपै एंडि कल्दार्क मलाहिचि हीसेक,

4 “नना तप्पु हिल्ला मनकन हळ्ळकालय पीसि हीसि पापम कीतन” इंचि इत्तोर.

अस्के ओर, “माकु बतल कियना मंता? नीवद निमे हळ्ळकुन” इंचि इत्तुर.

5 अस्के यहुदल आ एंडि कल्दार्कुन गुळिते विसिरसि, अगटाल पलाते होंचि उर्रि दोसकुत्तोर.

6 पेद्दा पेर्मालोर्क अव कोत्तन जमा कीसि, “वरोन हळ्ळकालय हीता कोत्तन, मना नियम परकारम दान पेटीते वाटा वायो,” इंचि इत्तुर.

7 दानहाटी ओर अव कोत्तनतोनि, येस्सलेमते बोरन्ना पलाताल वातोर हायानय्ते ओर्कुन बोँदा दोसालय आंता, इंचि वरोन कुम्माना नेलि अस्तुर.

8 इंदके इंका आ नेदुन “नेत्तुर नेलि” इंचि इत्तुर.

9 अस्के यिर्मयाह इन्ना पेनदा कबुरतोर इत्ता पोल्ले निजम आता, अद इल्हा मत्ता:

“इस्त्राएल लोकुल्क ओना दरा, मुपै एंडि कल्दार्क कीतुर, अव ओर तेंडकुत्तुर.

10 पेन नाकु वेहाताप, आ मुपै एंडि कल्दार्कुनतोनि, कुम्माना नेलि अस्तुर.”*

पिलातुस येसुन पूसकीतोर

(मरकुस 15:2-15; लूकाल 23:3-5; 23:13-25; योहान 18:33-38)

11 पजा येसुन पिलातुस राज्यपालना मुन्ने निपिस्तस्के, राज्यपाल ओन, “निमे यहुदिल्लुकुना राजाना?” इंचि पूसकीतोर. अस्के “निमे इंचेकेने गदा,” इंचि येसु इत्तोर.

12 पेद्दा पेर्मालोर्क आनि यहुदि पेद्दाल्क ओनापोर्गे दोसेल्क दोसतुर. गानि येसु बतले जवाब हिया हिल्लोर.

13 अस्के पिलातुस येसुन, “ईर नीवा पोर्गे बच्चुंगो तप्पुक दोस्सेक मंतुर, नीकु केंजा वासेक हिल्लेना?” इंचि इत्तोर.

14 गानि ओर उंदि पोल्ले इंका वळ्ळका हिल्लोर. अदुनहाटी पिलातुसुंक वेल्ले इचंत्रम आता.

15 दाटसि होनना पंडुगुना रोजुने, लोकुल्कुनाहाटी बोन्ना वरोन कैदिन होळसनद राज्यपालना रिवाज मत्ता.

16 अद वेलाते अगा जेलने वरोर पोरोल पेय्स्ता “बरब्बल” इन्ना कैदि मत्तोर.

17 लोकुल्क अगा जमा आतारित्ते पिलातुस ओर्कुन, “नना बोन होळसकन इंचि मीवा मनसु मंता, बरब्बन होळसकना हिलाकोटे किरिस्तु इन्ना येसुना?” इंचि पूसकीतोर.

* 27:10 यिर्मयाह 32:6-9; जकर्याह 11:12-13

18 येसु तप्पु कियाकोन्ना ओना कबाह्कुन ह्ळसि कळ्ळक पोतताहेंकेन ओन तच्चि नाक अप्पजेपतुर इंचि पिलातुसुंक एरपाटे मत्ता.

19 अचोने आय्का पिलातुस न्यायम कियालय बस्के अय्ते गद्देपोर्रो उदतोर अस्के ओना मुत्तोनाहेंदाल उंदि कबुर वाता, अद इल्हा मत्ता, “नाकु उंदि कला वाता, ओर तप्पु हिलुवा मनकल आंदुर. ओन निमे बतले कियमा. नना ओनाहाटी इय्याला पोद्दला दुक्कमते मत्तन.”

20 गानि हीके पेद्दा पेर्मालोर आनि पेद्दाल्क, बरब्बन होळसिसि येसुन ह्ळकना इंचि इनालय लोकल्लुकुंक एक्किस्तुर.

21 राज्यपाल ओर्कुन, “नावा मुन्ने बरब्बल आनि येसु इव्वुर मंतुर, नना मीवाहाटी ईरा इव्वुरा लोपोटाल बोन होळसना इंचि मीवा मनसु मंता?” इंचि पूसकीतोर. अस्के ओर, “बरब्बन” होळसना इंचि इत्तुर.

22 “अय्ते मरि, ‘किरिस्तु’ इनना येसुन बतल कियना?” इंचि पिलातुस ओर्कुन पूसकीतोर. अस्के “ओन क्कसुनपोर्रो मोल्लां कोहकिस ह्ळ्का,” इंचि इत्तुर.

23 “बारि, ओर बतल तप्पु कीतोर?” इंचि पिलातुस पूसकीतस्के, “ओन क्कसुनपोर्रो मोल्लां कोहकिस ह्ळ्का” इंचि ओर जोरसे वरगेयतुर.

24 इच्चो वेल्ले लोकल्लुकुना मुन्ने नावद बतले ताका पर्रो. ओर लोल्लि कीतुर इल्हा पिलातुस इनकुंचि, इच्चुर एर पीसि लोकल्लुकुना मुन्ने कय्क नोर्सि, “ईना हामुटे नावद कय हिल्ले, मिमेटे दीना जबाबदारी मंतिर,” इंचि इत्तुर.

25 अस्के ओर अंतोर वरगेयसि, “ईना हामुटा जबाबदारी मावा पोर्रो आनि मावा पिलाल्लुकुना पोर्रेन मान्निकांटी,” इंचि इत्तुर.

26 अस्के पिलातुस, बरब्बन होळसिसि, येसुन बारे पोद्देते तंचि, क्कसुनपोर्रो मोल्लां कोहकिसि ह्ळ्कालय सिपाइल्लुकुना कय्दे अप्पजेपतोर.

येसुन क्कसुनपोर्रो वेलाड वाटतुर

(मरकुस 15:16-32; लूकाल 23:11; 23:26-43; योहान 19:2-3; 19:17-27)

27 पजा सिपाइल्लुकु येसुन पीसि राज्यपालना किल्लाते ओतुर. अगा सिपाइल्लुकुना पूरा गेंगुन केया वेह्चि ओना सुट्टु जमा कीतुर.

28 ओना कपडिं कुळाह्चि, ओन्क एरां रंगुना कोट केराहतुर.

29 हाह्कुना वेलिता किरिटम कीसि ओना तल्लक दोसतुर, ओना तिना कय्दुक उंदि दुरसोत्ता कट्टे हीतुर. सिपाइल्लुकु ओना मुन्ने टोंगरां ऊनसि, “यहुदिल्लुकुना राजांक बस्केने हामुर हिल्ले,” इंचि ओन इरगा कारेड्डाल्क कीतुर. 30 आयंका ओर ओनपोर्रो उस्कतुर, ओनागटा कट्टे इगकुंचि अदे कट्टेते ओना तल्लापोर्रो तंतुर.

31 ओन इरगा कारेड्डाल्क कीतारित्ते ओर केर्सि मत्ता कोट तेंडसि, ओना कपडिं ओन्के केराहतुर आनि क्कसुनपोर्रो वेलाड वाटालय पलाते पीसि ओतुर.

32 येसुन पीसि पलाते होननेके, कुरेनि सहरतोर वरोर सिमोन इनना मनकल कलियतोर. सिपाइल्लुकु ओन वेराह्चि येसुना क्कस कांजा वेहतुर.

33 आयंका ओर गोलगोता इत्ते, “तला बोर्सेम” इनना जेगातगा एवतारित्ते,

34 अंगुर पंडिना पानकमते कयमुल* कल्पिसि येसुंक उनालय हीतुर, ओर दान नाकिसि ह्ळसि, उन्नोन इत्तोर.

35-37 अस्के ओन क्कसुनपोर्रो वेलाड वाटतुर. वाटतारित्ते, “येसु, यहुदिल्लुकुना राजाल आंदुर,” इंचि उंदि ओना तप्पु ह्ळ्पना बोर्ड रासि येसुना तल्लापोर्रो वेलाड वाटतुर. पजा सिपाइल्लुकु सिट्टिं वाट्टिस ओना कपडिन पंचकुत्तुर. आनि ओना कावेल कीसेके अग्गेन उद्दिदिसि मत्तुर.

* 27:34 कयमुल सेदु इंचि अर्तम.

38 इंका इच्चुर दौगाल्कनगुडा ओना पक्का पीसि हीके वरोन हेके वरोन कूसुनपोर्रो मोल्लां कोहकतुर.

39-40 हारि पीसि होनानोर-वायानोर तल्लां ऊपसेके, “ओ! गुळितुन कूलाह्चि मूड रोजकुने दोहानोन, ओक्कला निमे पेनदा मरिन आते, कूसताल रेय्से निमे नीवा जीवातुन पिसागोटकुन,” इंचि कारेड्डाल्क कियुंदुर.

41 अचोने आयका पेद्दा पेर्मालोर, दर्मसास्त्रम कराहना गुस्लक आनि यहुदि पेद्दाल्कगुडा अल्हे कारेड्डाल्क कीतुर.

42 अब्बेटाल इच्चुर, “ईर अयते इंकावरोन पिसागोटतोर गानि ओनद ओरे पिसागोटकुना परसेके हिल्लोर. ईर इस्माएलतोर राजाल गदा! अयते कूसुनपोर्रोताल हिळ्ळु रेय्से वायिरकांटी, अस्केने मोमोट ईनपोर्रो विस्वासम ईरा परकोम,” इंचि इत्तुर.

43 इंका इच्चुर बारे, “ओन्क अयते पेनदापोर्रो बरोसा मंता. इंका ओर, ‘नना पेनदा मरिन आंदुन,’ इंचि इत्तोर. अदुनहाटी इंदके पेनदा मनसु मत्ते ओन पिसागोट्टि,” इंचि इत्तुर.

44 अल्हेने येसुना पक्काते कूसुंक वेलाड वाट्सि मत्ता दौगाल्कगुडा ओना अपमानम कीतुर.

येसुना हामुर

(मरकुस 15:33-41; लूकाल 23:44-49; योहान 19:28-30)

45 पजा पिय्यटा पन्नेड एगानस्केटाल अयते मूड एगनदाका पूरा बूमिअंता हीकट आता.

46 दगोरा-दगोरा मूड एगनेके येसु अब्बसेके जोरसे वरगेयसि, “एलि, एलि, लमा सबकतनि.” इत्ते, “ना पेनदुना, ना पेनदुना निमे नाकुन बारि होळसीतिन?” इंचि इत्तोर.

47 अस्के अगा नित्तिसि मत्तुर इच्चुर लोकुल्क, “ओर एलियान केयसंतोर बारे” इत्तुर.

48 पजा ओराब्बेटाल वरोर मनकल वितसि हौचि पुल्लटा अंगुर पंडिना पानकमते मुळाहता स्पंजं तत्तोर आनि दुड्डुना कोस्सक ताससि येसुना तोळ्ळुदगा नाकालय हीतोर.

49 अस्के कळमतोर, “जेरासेप आगाट, एलियाल ईन पिसागोटालय वांतोरा वायोरा हळकोम,” इंचि इत्तुर.

50 येसु मस्दाम अब्बसेके जोरसे वरगेयसि जीवा होळस्तोर.

51 हुळाट! अस्केने गुळिता परदा, पोर्रोताल हिळ्ळुदाका हारि रौडु तुकडां आता, बूमि अदुलता, गुट्टां नेर् हीसि पैतां.

52 पेनदा लोकुल्क बोर अयते हातुर ओराब्बेटाल वेल्ले मंदि जीवा अरिं बौदानाल मर्रा तेदतुर.

53 येसु मर्रा जीवाते तेदतस्के, ओर अंतोर बौदानाल पेय्से येस्सलेम इनना पवित्र सहरते वेल्लेट्टुर लोकुल्कुंक दिसतुर.

54 अगा जर्गुता गटनां आनि बूमि अदुलतद हळसि, नूर मंदि सिपाइल्कुना पोर्रो मनना अदिकारि आनि येसुनगा कावेल कीसेक मत्ता सिपाइल्क वेल्ले वेरियतुर. वेरियसि, “ईर निजमे पेनदा मरि आंदुर” इंचि इत्तुर.

55 येसुना सेवा कीसेक गालिल एरियाताल वातव वेल्लेने मुर्ताहक अगा लक्कुटाल हळसेक मत्तां.

56 अबुने मरियम मगदलेनि, याकोब आनि योसेप ईरा यावल मरियम आनि जब्दिना मर्कुना यावल, इव अन्नि अगा मत्तां.

येसुना गति कियुड

(मरकुस 15:42-47; लूकाल 23:50-56; योहान 19:38-42)

57 आयंका पोळ्ळु होनना वेलाक अरिमताइ नाटेनाल वरोर योसेप इनना सिरमंत मनकल वातोर. ओर इंका येसुना सिस्सुड मत्तोर.

† 27:48 स्पंज गाडी, बसुना सीट लोप्यो मेल्लगा मनालय स्पंज दोसंतुर.

58 योसेप पिलातुसुनगा होंचि, येसुना पीनगु गावाले इंचि इत्तोर. अस्के पिलातुस, “येसुना पीनगु, योसेपुंक हीम्टु,” इंचि सिपाइल्लुकुक आदेस हीतोर.

59 योसेपु आ पीनगुन पूना कपडिते हुटतोर.

60 बंडातुन तुल्हाचि ओनाहाटी तयार कीता पूना बोंदाते, येसुना पीनगुन ईर्सि, बोंगाकु उंदि पेद्रुदा बंडातुन अड्डम दोसतोर. पजा अगटाल पेय्सि होत्तोर. 61 गानि मगदलेनि नाटेना मरियम आनि इंकुंदि मरियम इव बोंदा मुन्ने उदिस मत्तां.

येसुना बोंदक कावेल कियमळ

62 नोमकेमता मुन्नेटा रोजुने पेद्रुदा पेर्मालोर्क आनि परिसिल्क पिलातुसुक कलियसि,

63 “महाराज, आ बोंकिच्चना मनकल जीवाते मननेके, ‘नना हासि मूड रोजकुंक मर्रा जीवाते तेदंतन’ इंचि इत्तोर, अद माकु मते मंता.

64 दानहाटी मूड रोजकुनदाका ओना बोंदातगा कडक कावेल इरानद आदेस हीम. बारित्ते ओना सिस्युलक बस्केनना वासि दोंगातनमते ओना पीनगुन ओयानुर आनि ‘येसु मर्रा जीवाते तेदतोर’ इंचि लोकुकुन बोंकिचानुर. इल्हा गिंटा आयानयते मुन्नेटकना इंका वेल्ले बेकार आंता,” इंचि वेहतुर.

65 अस्के पिलातुस, “मिमेट सिपाइल्लुकुन ओम्टु, ओसि ओना बोंदातगा कडक कावेल इरंट,” इंचि वेहतोर.

66 अस्के ओर सिपाइल्लुकुन ओसि येसुना बोंदातगा कडक कावेल इरतुर. बोंदक अड्डम दोसता बंडाकु सरकार सिक्का वाटसि अगा कावेल कीसेके मत्तुर.

28

येसु जीवाते तेदतोर

(मरकुस 16:1-10; लूकाल 24:1-12; योहान 20:1-10)

1 नोमकेम आतारित्ते इंकुंदि रोजु अयतारम पंग आयनेके मगदलेनि नाटेना मरियम आनि दाना दंटातद इंकुंदि मरियम, बोंदातुन ह्वाललय होत्तां.

2 अस्के उंदि पेनदा दूता स्वर्गमताल अगा रेयताहाटी अगा पेद्रुदा बुंकप आता. पजा आ पेनदा दूता बोंदक अड्डम मत्ता बंडातुन तेंडसि, अदे बंडापोर्री उद्रुता.

3 दाना रूपम पोळ्दुनालेसी जगा-जगा मेर्सेक मत्ता, दाना अंगि बारे बर्पलेहका तेल्लगा मत्ता.

4 दान ह्ळसि कावेल कियानोर इरगा वेरियसि, गजा-गजा वनकुसेक, अल्हेने हाताप आतुर.

5 अस्के पेनदा दूता इल्हा इत्ता. “वेरियमट, कूसुनपोर्री वेलाड वाट्सि हक्कता येसुन मिमेट प्हकसेक मतिट, इद नाकु एपाटे मंता.

6 गानि ओर इगे हिल्लोर, ओर वेहताप मल्सि जीवाते तेदतोर. वटु, ओना पीनगु इरता जेगातुन हुळाट.

7 इंका बिराना होंचि ओना सिस्युलुकुक, ओर हामुरताल जीवाते तेदतोर, ओर मीकन्ना मुन्नेने गालिल एरियाते होंचेक मंतोर, अगा ओर मीकु दिस्सानुर, इंचि वेहट. बतल अयते नना मीकु वेहतन, अदुन मति इरंट,” इंचि आ मुर्ताहकुन इत्ता.

8 अस्के आ मुर्ताहक वेरेंते, वेल्लेन आनंदमते, बोंदातगाटाल जटपेट पेय्सि ओना सिस्युलुकुक इद कबुर वेहालय विततां.

9 अगटाल पेय्सि होननेके, येसु अवुक कलियसि अवुन, “बेस पिस्सट,” इंचि इत्तोर. पजा अव ओना दग्गेर होंचि काल्क मोळकतां.

10 अस्के येसु अवुन, “वेरियमट होंट, नावा तम्महुकुक गालिल एरियाहेके होनालय वेहट, अग्गेन ओर नाकुन ह्ळंतरु,” इंचि इत्तोर.

कावेल कियानोरा आबद्रुदम गवाइ

11 अव सिस्स्युल्कुंक वेहालय होंच्चेकेन मत्तां, अच्चोटेन बोंदातगा कावेल कीसेक मत्तोर इच्चुर सिपाइल्क सहरते होत्तुर, होंचि अगा जर्गुतदंता पेद्दा पेर्मालोर्कुंक वेहतुर.

12 अस्के ओर यहूदि पेद्दाल्कुंक कलियसि उंदि उपायम कीतुर. सिपाइल्कुंक वेल्लेन कोत्तां हीसि वेहतुर गदा,

13 “मोमोट निद्रते मननेके ओना सिस्स्युल्क नर्का वासि ओना पीनगुन दोंगातनमते ओतुर, इल्हा लोकुल्कुंक वेहट.

14 ई पोल्ले गिंटा राज्यपालना केव्दे अरान्यते मोमोट ओन समत कीसि मीकु पोल्ले वायकुंटा कीतोम,” इंचि इत्तुर.

15 अस्के ओर कोत्तां एतसि वेहताप कीतुर, ई पोल्ले यहूदिल्कुना लोप्पो इदवेरादाका इंका इल्हे ताकसेक मंता.

येसु सिस्स्युल्कुनतोनि वळकांतोर

(मरकुस 16:14-18; लूकाल 24:36-49; योहान 20:19-23; प्रेरितुल्कुना कबाह्क 1:6-8)

16 अद आतंका पदाकौंडु मंदि सिस्स्युल्क गालिल एरियाते येसु वेहता गुट्टापोर्रो होत्तुर.

17 अगा येसुन हळसि ओन मोळ्कतुर. अयनागानि इच्चुर सिस्स्युल्कुंक अनमानम मत्ता.

18 अस्के येसु ओरा दग्गेर होंचि ओर्कुन इल्हा इत्तोर. “स्वर्गमते आनि बूमिपोर्रोटा अदिकारम अंता नाकु हीसि मंता.

19 अदुनहाटी मिमेट होंचि दुनियाता अन्नि देसेल्कुना लोकुल्कुन सिस्स्युल्क कीम्टु. ओर्कु बाबाना पोरोलते, मरिना पोरोलते आनि पवित्र आत्माता पोरोलते बापतिस्मा हीम्टु.

20 नना मीकु हीता आदेस परकारम ओर्कु ताकालय करहट, ई दुनिया मुंळगना आकिर वेलादाका नना बस्केळक मीतोने मनंतन,” इत्तोर.

मरकुस मरकुस रासता बेसता कबुर

इद पुस्तकमता बारेमते गिचचो परिचयम

रासतोना पोरोल: मरकुस

रासता कालम: इसवि सन 60-64

मरकुस येसुना वरोर सिस्युड मत्तोर. पेनदा मरिं येसु किरिस्तु लोकुकुनाहाटीं बतल-बतल कीतोर, इवुना बारेमते ओर इद पुस्तकमते रासतोर. इद बेसता कबुर, असल अयते सामिन विस्वासम कियवोराहाटीं रासतोर. अदुनहाटीं येसु सामि कराहता पोल्लेकन्ना, ओर कीता इचंन्रमाता कबाहकनपोरों एक्को जोर हीसि रासि मंता.

अस्के येसु सामि देय्यालक पीसि मत्ता बचटूकुनो ओरव्टेताल देय्यालकुन गेदमिसि, ओर्कुन बेस कीतोर. अल्हेने बचचुटुरो एळिकने, तकलिपकुने मत्तोर्कुन, गुडिडर्कुन गूनिर्कुन बेस कीतोर. येसु सामि लेक्का हिल्वचचुं अदूबूतमातव आनि महिमातव कबाहकगुडा कीतोर. हेय्युं वेय्यकुना मंदिक हेय्युं हारिने पीरमेड गाटो दोसमळ, हातोर्कुं जीवा अरहमळ, एतपोरों ताकमळ इल्हा वेल्लेने इचंन्रमाता कबाहक कीतोर.

असल येसु इगे बूमिपोरों बल्हा पिसतोर, बतल-बतल कीतोर, कूसुन पोरों मोल्लां कोहिकिसि वेलाड वाटसि हक्कता पजा मूड रोजकुने बल्हा तेदतोर, मर्रां मल्लिस् स्वर्गमते होंचि पेनबाबाना पक्कते उद्दिदिसि दुनियातुन बल्हा ताकिचेके मंतोर, इवनि इद पुस्तकम हदविते तेळियंता.

अदुनहाटीं बोर-बोर अयते पेन पोरों विस्वासम कीसि दान मोळकंतुरो ओर्क बस्केळक पिस्सना पिस्वर दोर्कता इंचि इद पुस्तकमते रासि मंता.

बगा बतल मंता

बेसता कबुर सुस्व आयमळ 1:1-13

गालिलते लोकुकुना नड्डुम येसु सेवा कबळ कीतोर 1:14-9:50

गालिल एरियाताल येस्सलेमदाका येसुना सेवा कबळ 10:1-52

येस्सलेमते येसुना आकिर वारम 11:1-15:47

येसु हासि मर्रां जीवाते तेदमळ 16:1-8

येसु सिस्युकुनतोनि वळिकिसि स्वर्गमते होनमळ 16:9-20

बेसता कबुर सुस्व आयमळ

(मत्तयाल 3:1-11; लूकाल 3:2-16)

1 पेनदा मरिं, येसु किरिस्तुना बेसता कबुर इल्हा सुस्व आता.

2 पेनदा कबुरतोर यसायाहना पुस्तकमते, “हळा! नना नीकन्ना मुन्नेने नावा कबुरतोन लोहंतन. ओर नीवाहाटीं हरिं तयार कीतोर.” इंचि रासि मंता.☆

3 वरोना अल्किर बय्लि जेगाते, “सामिनाहाटीं हरिं तयार कीम्टु, ओना हरिं सवरगा कीम्टु,” इंचि केजा वासेक मंता,☆ इल्हा बापतिस्मा हियना योहानुना बारेमतेन पेन वेहचि मत्ता.

बापतिस्मा हियना योहान

4 पेनदा कबुरतोर रासतापे बापतिस्मा हियना योहान बय्लि जेगाते वासि लोकुकुकुं इल्हा वेहालय दलगतोर, “कीता पापालकुन ओपुकुचि मनसु मार्सकुचि बापतिस्मा येतानयते, पेन मीवा पापालकुन मापि कीता.”

5 इद केंजसि पूरा यहूदिया राज्येमते, येस्सलेम सहरते मंदना लोकुल्क ओनगा वातुर, वासि ओरा पापालक ओफ्कुंचि, ओनहेंदाल योर्दन बेरेटे बापतिस्मा येतकुत्तुर.

6 योहान लोटापेटा बूराते तयार कीता कपडिं केरसि तोल्दा पट्टा नडिक तासकुनुंदुर. ओर गोल्लाबामां आनि तेने इवे तिडि तिनुंदुर.

7 “नाकन्ना सक्तिमंतुड नावा पज्जोडाल वासंतोर. नना ओना मुन्ने वंगिसि, ओना बूटकुना नोंडेन लेहना लायकगुडा हिल्लेन.

8 नना मीक एतोनि बापतिस्मा हीतन गानि ओर मीक पवित्र आत्माते बापतिस्मा हियानुर,” इंचि योहान वेहुंदुर.

येसु बापतिस्मा येतमळ

(मत्तयाल 3:13-17; लूकाल 3:21-22)

9 अव रोजकुने येसु गालिल एरियाता नासरेत सहरताल वासि, योर्दन बेरेटे योहानुनाहेंदाल बापतिस्मा येतकुत्तोर.

10 येसु बस्के अय्ते एताल पलाते वातोर, अस्केने मब्बु बैय्यरा आयानद आनि पवित्र आत्मा पावरेम पिट्टेलेसी ओनपोर्री रेयानद हळतोर.

11 अचचोटेन मब्बुनाल, “निमे नावा पावरमगल्ला मर्रिन आंदिन. नीहेंदाल नना वेल्लेने कूस मंतन,” इंचि उंदि अल्किर केंजावाता.

पेनदा दूतां येसुना सेवा कियमळ

(मत्तयाल 4:1-11; लूकाल 4:1-13)

12 अद आता पजा पेनदा आत्मा बिराना येसुन बय्लि जेगाताहेके लोहता.

13 अगा नल्पै रोजकु केडा जिवरासिना नड्डुम मननेके, देय्यम येसुनगा वासि, ओना पट्टु हळता. पजा पेनदा दूतां वासि ओना सेवा कीतां.

येसु पेनदा पोर्ल्लें वेहालय सुस्व कियमळ

(मत्तयाल 4:12-17; लूकाल 4:14-15)

14-15 हेरोद राजाल योहानुन जेलते वाटता पजा, येसु गालिल एरियाते वासि, “पेन इत्ता वेला पुरागा आसि, पेनदा राज्येम दमगेर्क एव्ता. अदुनहाटीं मिमेट मनसु मार्सकुंचि पेनदा बेसता कबुरपोर्री विस्वासम ईरट,” इंचि वेहालय दलगतोर.

येसुना मोदाटा सिस्थुल्कु

(मत्तयाल 4:18-22; लूकाल 5:1-11)

16 येसु गालिल समुद्रम ओड्डु पीसि होननेके सिमोनुन आनि ओना तम्मुर अंदरियन हळतोर. ओर जिम्मां पिय्यानोर आताहाटीं, समुद्रमते ओल्लां वाटसि जिम्मां पीसेक मत्तुर.

17 अस्के, “नावा पज्जो वट, नना मीकुन मनकालोर्कुन नहगा तायानोर कीतन,” इंचि येसु ओर्कुन इत्तोर.

18 अस्के ओर, बिराना ओरा ओल्लां अग्गेन होळसि ओना पज्जो होत्तुर.

19 येसु इंकिचचो मुन्नेळक होत्तारित्ते जब्दिना मर्कु याकोब आनि ओना तम्मुर योहान डोंगाते ओल्लां सवरिचनेके हळतोर.

20 येसु ओर्कुन बिराना केयतस्के, ओर ओरा बाबाल जब्दिन आनि बूतिनोर्कुन अग्गेन डोंगाते होळसि ओना पज्जो होत्तुर.

येसु देय्यम पीतोन बेस कीतोर

(लूकाल 4:31-37)

21 ओर अंटोर कूळसि कपर्नाहुम सहरते होत्तुर. अगा येसु नोमकेम रोजुने दर्मसास्त्रम कराहना लोते होंचि पेनदा पोर्ल्लें कराहलय दलगतोर.

22 येसु पेनदा पोल्लें ओरा दर्मसास्त्रम कराहना गुरूकुनलेसीं आयो गानि अदिकारम मत्ताप कराहतोर. अदुनहाटीं ओना कराहमळतुन केंजसि लोकुलक वेल्ले इंचंन्रम आतुर.

23 अदे दर्मसास्त्रम कराहना लोते वरोर देय्यम पीता मनकल मत्तोर.

24 ओर येसुन हळसि, “निमे बोन आदिनो नाक एरपाटे, निमे नासरेत सहरता येसुन, पेनदा पवित्र मनकन आंदिन. मातोनि नीकु बाता कबळ? माकुन नासडेम कियालय वातिना?” इंचि वरगेयसि इत्तोर.

25 अद केंजसि, “निमे चुपचाप मन, ओनागटाल पलाते पेयसा,” इंचि येसु जोरसे गदरिचोर.

26 अस्के आ देय्यम ओन गजा-गजा ऊपसि जोरसे वरगेयसेके ओना लोप्पोटाल पेयसि होत्ता.

27 अदुन हळसि अगा मत्तोर अंतोर इंचंन्रम आसि, वरोंक-वरोर इल्हा वळकालय दल्गतुर, “इद बसोंटा पोल्ले, इद अथे पूना बोदा आंदु, ईर अदिकारमते देय्यालुकुन ओना लोप्पोटाल पेयसि होंटु इंचि आदेस हीतोर, अव ईना पोल्ले केंजसेक मंतां.”

28 इल्हा येसु अगा कीता गटनना बारेमते पूरा गालिल एरिया आनि सुट्टु-मट्टु मत्ता अन्नि नाहकुने तेळियसि होत्ता.

येसु वेल्लेटोर्कुन बेस कियमळ

(मत्तयाल 8:14-17; लूकाल 4:38-41)

29 येसु आनि ओना सिस्युलुकु सिमोन, अंदरियल, याकोब, योहान दर्मसास्त्रम कराहना लोताल बिराना पलाते पेयसि सिमोन आनि अंदरियना लोन होत्तुर.

30 अगा सिमोनुना पोरड एळकि वासि मीडसि मत्ता. इद पोल्ले अगा मत्तोर बोरो येसुंक वेहतुर.

31 येसु होंचि दाना कय पीसि तेहतोर. अस्के दाना एळकि रेयसि, अद ओरा सेवा कियालय दल्गता.

32 पजा पोळ्द होंचि, लोकुलक बिमारते मत्तोर्कुन, देय्यालुकु पीतोर्कुन अंतोर्कुन येसुनगा पीसि वातुर.

33 पूरा सहरतोर येसु मत्ता लोता गलमातगा जमा आतुर.

34 येसु तीरतीरकुना बिमार्क मत्तोर वेल्लेटोर्कुन बेस कीतोर, देय्यालुकु पीसि मत्ता वेल्लेटोर्कुना देय्यालुकुन पेचाह्चि गेदुमतोर. अव ओन एरपाट कियुंदुं, अदुनहाटीं ओर अवुन वळका हिया हिल्लोर.

येसु वरोरे पारतना कियमळ

(लूकाल 4:42-44)

35 येसु इंकुंदि रोज हक्केरेने बय-बय आयानेके तेदसि बोरे हिल्वगा होंचि पारतना कीतोर.

36 सिमोन आनि ओना दंटातुर तेदता पजा येसुन पहकालय दल्गतुर.

37 पह्किसि-पह्किसि दोर्किच्चि, “नीकुन अंतोर पह्कसेक मंतुर,” इंचि येसुन इत्तुर.

38 अस्के येसु ओर्कुन इल्हा इत्तोर, “मनम पकापीसि मत्ता नाहकुने दाकोम, आ नाहकुने पेनदा पोल्लें वेहमळ गावाले. इद कबळताहाटीगे नना वातन.”

39 अल्हा ओर पूरा गालिल एरियाते तिरियसेके, ओरा दर्मसास्त्रम कराहना लोहकुने होंचि पेनदा पोल्लें वेहचेके, देय्यालुकु पीसि मत्तोरगटाल देय्यालुकुन पेचाह्चि गेदुमसेके होत्तोर.

येसु कुस्ट रोगमतोन बेस कियमळ

(मत्तयाल 8:1-4; लूकाल 5:12-16)

40 अल्हा होंचेके मननेके वरोर कुस्टरोगम आता मनकल येसुनगा वासि, ओना कालुकुनपोरों अर्सि, “निमे इन्कुत्ते नाकुन बेस किया परीतिन,” इंचि येसुन विनंति कीतोर.

41 येसुंक ओनपोरों दया वाताहेंका कय मुन्नेळ्क कीसि ओन इट्सि, “निमे बेस आयगोम इंचि नावा मनसु मंता. निमे बेस आम” इंचि इत्तोर.

42 इत्ता इनुडे ओना कुस्टरोगम होत्ता ओर बेस आतोर.

43-44 अस्के, “ह्ळा! इगे जर्गतद बोर्के वेहमा. गानि निमे होचि मीवा पेर्माक ह्पसा. कुस्टरोगमताल निमे बेस आता गवाइ इंचि मूसाल वेहता मोक्कु हीम. अदुन ह्ळसि निमे बेस आतिन इंचि लोकुलकुंक एरपाट आंता,” इंचि येसु ओन्क गट्टिगा वेहतोर.

45 गानि आ मनकल अगटाल पेय्सि अद पोल्ले अंटोर्क वेहालय दलगतोर. अस्के, “अंटोर्क तेळियता, नाकुन ह्ळसि लोकुलक मंदांनं-मंदां वांतुर,” इन्कुंचि येसु कळमता नाह्कुने होना हिल्लोर. ओर अल्किर हिल्ला जेगाते मत्तोर, अगागुडा लोकुलक नालं-मूलानाल ओना जाडा पीसि होत्तुर.

2

लकवा बिमारतोन बेस कियमळ
(मत्तयाल 9:1-8; लकाल 5:17-26)

1 कोन्नि रोजकु आतारित्ते येसु कपर्नाहुम सहरते मल्सि वातोर, ओर लोन मंतोर इंचि लोकुलकुंक तेळियसि होता.

2 अस्के लोतागा इच्चोर वेल्ले लोकुलक जमा आतुर गदा, गल्माते नित्तालय जेगागुडा मनाहिल्ले. येसु ओर्कु पेनदा पोल्ले कराहतोर.

3 अद वेलाते नालुर मनकालोर वरोर लकवा बिमारतोन पीसि येसुनगा वातुर.

4 गानि वेल्ले गर्दि मत्ताहाटीं ओर येसुनगा ओया पराहिल्लुर. अयते ओर लोतपोर्ी कटुल पियानच्चो बोंगा कीसि लकवा बिमारतोन येसुनगा रेहतुर.

5 येसु ओरा विस्वासमतुन ह्ळसि, आ लकवा बिमारतोन, “कोको, नीवा पापालक मापि आतां,” इंचि इत्तोर.

6-7 अस्के अगा उद्दिदिसि मत्तोर लोप्पोटाल इच्चुर दर्मसास्त्रम कराहना गुस्लक, “ईर इल्हा बारि वळकसंतोर? ईर पेनदा अपमानम कीतोर. पेन तप्पा इंका बोरे पापालकुन मापि किया पर्स्,” इंचि ओर-ओरे मनसुने विचारम कियालय दलगतुर.

8 ओर-ओरे विचारम कियानद येसु ओना मनसुने बिराना एरपाट कीसि, “मी मनसुने मिमेट इसोटा विचारम बारि कीतिर?

9 बद अल्कगा मंता? लकवा बिमारतोन, ‘नीवा पापालक मापि आतां इंचि इनमळा हिलाकोटे, नीवा कटुल तेहकुंचि ताका’ इनमळ?” इंचि पूसकीतोर.

10 पजा, “गानि मनकना रूपमते पुटतोन नाकु, ई बूमिपोर्ीटा पापालक मापि कियाना अदिकारम मंता इंचि मीक तेळियोना?” इंचि इत्तोर. पजा आ लकवा बिमारतोन,

11 “नना नीकु वेहासेके, तेदसि नीवा कटुल तेहकुंचि लोन होन,” इंचि इत्तोर.

12 इत्ता इनुडे ओर तेदसि कटुल पीसि अंटोर मुन्नेटाल पेय्सि होत्तोर. अदुन ह्ळसि अंटोर इचंत्रम आतुर. “इल्हा मोमोट बस्केने ह्ळा हिल्लोम” इंचि पेनदा स्तुति कियालय दलगतुर.

येसु लेविन केयमळ
(मत्तयाल 9:9-13; लकाल 5:27-32)

13 येसु मर्रा उंदि मल्का समुद्रम ओड्डुंक होत्तोर. वेल्लेटुर लोकुलक ओनगा वातुर अस्के येसु ओर्कु पेनदा पोल्ले कराहलय दलगतोर.

14 कराहमळ आतस्के अगटाल होननेके अल्पिना मर्री लेवि, कर वसुल कियाना नाकातगा उद्दिदिसि मत्तद ह्ळतोर. ह्ळसि ओन, “नावा पज्जो वा,” इंचि इत्तस्के ओर तेदसि ओना पज्जो होत्तोर.

15 पजा येसु लेविना लोन गाटो तिंचेके मननेके वेल्लेटुर कर वसुल कियानोर आनि पापि लोकुलक वासि येसु आनि ओना सिस्युल्कुनतोन गाटो तिनालय उदतुर. ओरव्टे वेल्लेटुर येसुन विस्वासम कीतोर मत्तुर.

16 कर वसुल कियानोरतोन आनि पापि लोकुलकुनतोन येसु गाटो तिनानद परिसिल्क आनि दर्मसास्त्रम कराहना गुस्लक ह्ळतुर. ह्ळसि, “कर वसुल कियानोरतोन आनि पापि लोकुलकुनतोन येसु गाटो बारि तितोर?” इंचि ओर येसुना सिस्युल्कुन पूसकीतुर.

17 अद केंजसि येसु ओर्कुन इल्हा इत्तोर, “बिमार हिल्लोर्कुंक डाक्टरना अक्सरम मन्नो गानि बिमार मत्तोर्कुंक डाक्टरना अक्सरम मनंता. नना नीतिमंतुल्कुन केयालय आयो गानि पापि लोकुल्कुन केयालय वातन,” इंचि इत्तोर.

18 बापतिस्मा हियना योहानुना सिस्स्युल्क आनि परिसिल्क ओक्कापोद्दु मनुंदुर. अय्ते इच्चुर लोकुल्क वासि, “योहानुना सिस्स्युल्क आनि परिसिल्क ओक्कापोद्दु मनुंतुर. गानि नीवा सिस्स्युल्क मन्नुर. अल्हा बारि?” इंचि येसुन पूसकीतुर.

19 अस्के येसु ओर्क इल्हा वेहतोर, “मरमिन पेडल मरमिं वाता हेडमितोरतोनि मननेके ओर्कु ओक्कापोद्दुना अक्सरम मनंतना? मन्नो. बदवेरादाका मरमिन पेडल ओरतोनि मनंतोर अदवेरादाका ओर ओक्कापोद्दु मन्नुर.

20 गानि मरमिन पेडल ओरागटाल लक्कु आयाना रोजकु वायनुं, अस्के ओर ओक्कापोद्दु मनानुर.”

21 “बोरे आयिर पडना कप्पिड हर्ते, दानकु पूना कप्पिडता गंडा अंटा वाट्सि कुट्टोर. ओक्कला ओर अल्हा कियानय्ते अंटा वाटता पूना कप्पिडता गंडा इगका होंचि पळाना कप्पिडतुन इंचिच्चो हरहंता.

22 अल्हेने पूना अंगुर पानकमतुन पळाना तोलपुर्काति बोरे दोस्सुर, अल्हा दोसते अद अंगुर पानकम, पळाना तोलपुर्कातुन हराहिचि पोंगिस दांता. आनि तोलपुर्कागुडा नासडेम आंता. अदुनहाटीं पूना अंगुर पानकम, पूना तोलपुर्कातेन दोसंतुर,” इंचि येसु इत्तोर.

नोमकेम रोजुना मालक येसु आंदुर

(मत्तयाल 12:1-8; लूकाल 6:1-5)

23 उंदि नोमकेम रोजुने येसु आनि सिस्स्युल्क पोलाल्कुनाल होंचेके मत्तुर, होननेके ओना सिस्स्युल्क हेनकु नल्सि तिचेक मत्तुर.

24 परिसिल्क अदुन ह्ळसि, “बद कबळ अय्ते नोमकेम रोजुने कियमळ नियम परकारम ओज्जोनो, अदे कबळ नीवा सिस्स्युल्क बारि कीसंतुर?” इंचि येसुन इत्तुर.

25 अस्के येसु ओर्कुन, “दाविदुंक आनि ओना दंटातोर्कुंक कर्वेस्तस्के ओर बतल कीतोर मिमेट हदवा हिल्लिरा?

26 अबियातार इनानोर पेद्दा पेर्मल मननेके दाविद पेनदा लोते होळियसि पेनदुक मोळकता हारिन तित्तोर, ओना दंटातोर्कुंकगुडा हीतोर. अव हारि तिनमळ इत्ते दर्मसास्त्रम परकारम विरोदमते मत्ता. अव हारि सिराप पेर्मालोर्क तप्पा इंका बोरे तिना पर्सुर,” इंचि ओर्कुन इत्तोर.

27 मर्रा ओरतोनि, “नोमकेम रोजु मनकनाहाटीं कीसि मंता, मनकल नोमकेम रोजुनाहाटीं आयो.

28 अदुनहाटीं मनकना रूपमते पुटतोन नना, नोमकेमता रोजुना मालकगुडा आंदुन,” इंचि येसु इत्तोर.

3

वतसि होत्ता कयदोन येसु बेस कियमळ

(मत्तयाल 12:9-14; लूकाल 6:6-11)

1 येसु मर्रा उंदि मल्का दर्मसास्त्रम कराहना लोते होत्तोर. अगा वरोर कय वत्सोत्ता मनकल मत्तोर.

2 नोमकेम रोजुने येसु ओन बेस कियानय्ते ओन तप्पुने पीकोम इंचि इच्चुर लोकुल्क ह्ळसेक मत्तुर.

3 “अंटोरा मुन्ने वासि नित्ता,” इंचि येसु, कय वत्सोत्तोन इत्तोर.

4 पजा, “नियम परकारम, नोमकेम रोजुने बेस कियमळ मंचिदा, कराब कियमळ मंचिदा? हिलाकोटे पिसागोटते मंचिदा, हक्कते मंचिदा?” इंचि पूसकीतोर. गानि ओर चुपचाप मत्तुर.

5 ओर्क बोर्के जीवा नोय्यो इंचि कन्कुचि येसुंक दुक्कम वासि, ओर अंतोरहेके होंगुने हळतोर. पजा, “नीवा कय मुन्नेळ्क हहा,” इंचि आ कय वत्सोत्तोन इत्तोर. ओर कय मुन्नेळ्क हाहतस्के ओना कय बेस आता.

6 पजा परिसिल्क अगटाल पलाते पेय्सि, हेरोद राजाना लोकुल्कुंक होंचि कलियतुर. कलियसि येसुन बल्हा हळ्कना? इंचि येसुना विरोदमते वळ्कुकुत्तुर.

वेल्लेटुर लोकुल्क येसुना पज्जो वांतुर

7-8 येसु ओना सिस्युल्कुन पीसि अगटाल पेय्सि समुद्रमहेके होत्तोर. येसु कियाना इंचंत्रमता कबाहक केंजसि गालिल एरिया, यहुदिया एरिया, येस्सलेम सहर, इदुमिया एरिया, सूर, सिदोन इनना सहरकुनाल, योर्दन बेरेटा हब्बेटाल, आनि पकापीसि मत्ता नाहकुनाल वेल्लेटुर लोकुल्क ओनगा वातुर.

9-10 बिमार मत्तोर्कुन वेल्लेटोर्कुन येसु बेस कीतोर. अदुनहाटीं बिमार लोकुल्क येसुन इट्टानाहाटीं वरोंक-वरोर दोब्सेके वासेक मत्तुर. ओरपोर्री अर्काकोटा लक्कु मंदना इंचि, “उंदि सिन्ना डोंगा नाहाटीं तयार कीम्टु,” इंचि येसु ओना सिस्युल्कुंक वेहतोर.

11 देय्याल्क पीसि मत्ता लोकुल्क येसुन बस्के अथे हळ्दुरो अस्के, “निमे पेनदा मर्रिन!” इंचि वरगेयसि ओना मुन्ने हिळ्ळ अर्रंदुर.

12 गानि येसु मात्रम, “नावा बारेमते बोर्के बतले वेहमत,” इंचि आ देय्याल्कुंक गट्टिगा हुकुम हीतोर.

येसु पन्नेड मंदितुन सिस्युल्क इंचि निलाहमळ
(मत्तयाल 10:1-4; लूकाल 6:12-16)

13 पजा येसु गुट्टापोर्री होत्तोर. आ मंदिताल येसु बोर्कुनय्ते कोरतोर, ओर्कुन ओनगा केयकुत्तोर.

14-15 ओर ओनतोन मनालय, पेनदा बेसता कबूर वेहनाहाटीं लोहालय इंचि पन्नेड मंदितुन पेरतोर. पेरसि ओर्कु प्रेरितुल्क इंचि पोरोल दोसतोर. ओर्क देय्याल्क गेदमना अदिकारम हीसि निलाहतोर.

16 ओरा पोरोलीं इल्हा मंतां: सिमोन, इनकु येसु पत्रु इंचि पोरोल दोसतोर,

17 जब्दिना मर्क याकोब आनि ओना तम्मुर योहान. ईर इव्वुर्कुन बोनेर्गेस इंचि येसु पोरोल दोसतोर, इत्ते गर्जना कियानोर इंचि अर्तम.

18 अंदरियल, पिलिपु, बरतलमय, मत्तयाल, तोमल, अल्पिना मर्रि याकोब, तद्दि, सिमोन कनानि,

19 आनि येसुन दोकाते पीसि हियानोर इस्कारियोत नाटेना यहुदल.

येसु आनि बेल्लाबुल इनना देय्याल्कुना मुक्क्यल
(मत्तयाल 12:22-32; लूकाल 11:14-23)

20 पजा येसु उंदि लोन होत्तोर. अगागुडा इच्चोर वेल्ले मंदि जमा आतुर गदा, येसुंक, ओना सिस्युल्कुंक गाटो तिनालयगुडा वेला दोर्काहिल्ले.

21 येसु पिसा-पिसा कीसंतोर इंचि लोकुल्कुनहेंदाल ओना लोतोर केंजसि ओन लोन तायालय होत्तुर.

22 येस्सलेमताल वाता दर्मसास्त्रम कराहना गुस्लुकु, येसु देय्याल्कुन गेदुमसेके इंचि, “ईना लोप्पो ‘बेलजेबुल’ इनना देय्याल्कुना मुक्क्यल होळियसि मंता, दाना बलमते ओर देय्याल्क तेंडांतोर,” इंचि इत्तुर.

23 अदुनहाटीं येसु ओर्कुन दगोरा केय्सि ओर्कु वेसुडिते वेहातोर. “देय्यम दाना देय्याल्कुन बल्हा तेंडा परांता?

24 ओक्कला, उंदि राज्यमते मनानोरा लोप्पो वरोनद-वरोक अर्काकोटे अद राज्यम निल्ला परांतना? बस्केने निल्ला पर्री.

25 अल्हेने उंदि लोता लोप्पो वरोनद-वरोक अर्काकोटे अद लोन गट्टिगा मन्नो.

26 अदुनहाटीं देय्यम दाना दंटाता देय्याल्कुना विरोदमते नितते, अवुना राज्येम बल्हा नित्तांता? नित्तापर्री, गानि नासडेम आंता.

27 बोरे आयिर! वरोर ताकतवर मनकना लोते होळियसि ओना सामानतुन दोंगा कियना इत्ते, मोदाला आ ताकतवर मनकन दोहचि वाटतेन दोंगा क्रिया परंतोर.

28 नना मीक निजम वेहांतन, मनकालोरा अन्नि पापाल्कुन, ओर कीता अपमानमतुन पेन मापि किय्यार.

29 गानि पवित्र आत्माता अपमानम कीते, ओर बोरे आयिर, ओन्क बस्केने मापि हिल्ले. असोंटा तप्पु कीता लोकुल्क बस्केळ्क पापमता दोसेमतेन मनंतुर,” इंचि वेहतोर.

30 अल्हा बारि वेहतोर इत्ते, “ओनालोपो देय्यम मंता,” इंचि दर्मसास्त्रम कराहना गुस्लक ओन इत्तुर.

येसुना यावल आनि तम्मुहक

(मत्तयाल 12:46-50; लूकाल 8:19-21)

31 पजा येसुना यावल, ओना तम्मुहक ओर मत्ता लोतगा वातुर. ओर लोता पलाते नित्तिसि येसुन केयट इंचि लोहतुर.

32 लोकुल्क येसुना सुट्टु उद्दिदिसि मत्तुर. अस्के, “नीवा यावल, नीवा तम्मुहक, हेलाहक पलाते एदुर हळसेक मंतुर,” इंचि ओर वेहतुर.

33 अय्ते, “बद नावा यावल, बोर ना तम्मुहक?” इंचि येसु ओर्कुन इत्तोर.

34 अस्के ओना सुट्टु उद्दिदिसि मत्तोरहेके हळसेक, “ईर नावा यावल, ईर ना तम्मुहक आंदुर.

35 बोर अय्ते पेनदा इच्चा परकारम ताकंतुरो ओरे नावा तम्पुर, हेलड आनि यावनलेसीं दगोटोर आंदुर,” इंचि वेहतोर.

4

विज्जां वीताना कास्तकारि मनकना वेसुडि

(मत्तयाल 13:1-9; लूकाल 8:4-8)

1 येसु मरुंदि मल्का गालिल समुद्रम ओड्डुनगा होंचि पेनदा पोल्ले कराहलय दल्गतोर. अस्के ओनगा वेल्लेटुर लोकुल्क जमा आताहेंका ओर उंदि डोंगा एक्किस उदतोर. लोकुल्क बारे बूमिपोर्रीं नित्तिसि मत्तुर.

2 अस्के ओर वेल्लेन पोल्ले लोकुल्कुंक वेसुडिं वेहासेक कराहतोर. उंदि वेसुडि इल्हा मत्ता.

3 “केंजट, वरोर कास्तकारि मनकल विज्जां वीतालय पेय्स्तोर.

4 ओर वीतनेके इच्चुं विज्जां हरदगा अरतां, अस्के अवुन पिट्टें वासि पेर्सि तित्तां.

5 इच्चुं विज्जां बंडाना गेर्सेपोर्रीं अरतां. अगा तोळि एक्को हिल्लादानकु आ विज्जां बिराने मोलियतां. गानि हिहकु लोप्पोळ्क होनवाहेंका पोळ्द पेय्स्तस्के अव वत्सि हासोत्तां.

6 गानि हिहकु लोप्पोळ्क होनवाहाटीं पोळ्द पेय्सि वेल्ले एद्दि आतस्के अव वतसि कर्विसि होत्तां.

7 इंका इच्चुं विज्जां हाहकुना पोदाने अरतां. हाहकुना पोदां इरगा बेर्सि, अव विज्जन बेर्सा हिया हिल्लें, अदुनहाटीं पंटा पेय्सा हिल्ले.

8 इच्चुं विज्जां बेसता जेगाते अरतां. अव बेस मोलियसि, बेर्सि बेस पंटा पेय्स्ता. बगा मुपै अंताल्क, बगा अरवै अंताल्क, बगा नूर अंताल्कुना पंटा पेय्स्ता,” इंचि वेसुडि महतोर.

9 पजा मर्रा ओर्कुन, “बोर्कु केंजालय केळ्क मंतां ओर केंजट,” इंचि येसु इत्तोर.

वेसुडिं वेह्चि वळ्काना कारनम येसु वेहंतोर

(मत्तयाल 13:10-17; लूकाल 8:9-10)

10 येसु वरारे मत्तद हळसि अगा मत्तोर लोप्पोटाल इच्चुर लोकुल्क आनि ओना पन्नेड सिस्स्युल्कु ओनगा होंचि “ई वेसुडिता अर्तम वेहा,” इंचि येसुन इत्तुर.

11 येसु ओर्कुन, “मीक अय्ते पेनदा राज्येमता बारेमता मर्ममतुन एरपाट कीकुनालय बुद्धि मंता, गानि पलातोर्कुंक बारे इद मर्मम तेळियालय वेसुडिने वेहा पीता.”

12 बारिल्ले,

“ओर हळुळ अय्ते हळंतुर, गानि अदुन एरपाट किय्युर.

केंजुड अय्ते केंजांतुर, गानि अद ओर्क तेळियो.

ओक्कला ओर एरपाट कीकुंचि मत्ते, तेळियागोटकुंचि मत्ते,

पेनदागा मल्लिस वायेर, पेन ओर्कुन मापि कियवळ,”

इंचि इत्तोर.

कास्तकरि मनकना वेसुडिता अर्तम

(मत्तयाल 13:18-23; लूकाल 8:11-15)

13 मर्रा येसु ओर्कुन इल्हा इत्तोर. “मीक इद वेसुडिता अर्तम तेळिया हिल्लेना? इदे मीक तेळियाकोटे इंका वेरे वेसुडि मीक बल्हा तेळियानुं?

14 इगे वीतानोर इत्ते पेनदा पोल्लेतुन वेरेतोर्क वेहानोर आंदुर.

15 इच्चुर लोकुल्क विज्जां अरता हर्दा जेगातसंतोर आंदुर. ओर पेनदा पोल्लेतुन केंजांतुर, केंजतारिल्ले देय्यम बिराना वासि ओर केंजतवुन तेंडसि पोहंता.

16 विज्जां अरता बंडाना गेर्से जेगातसंतोर बोर इत्ते, बोर अय्ते पेनदा पोल्लेतुन केंजसि कुसिते बिराने ओप्कुंतुर.

17 गानि ओरा मनसुने पेनदा पोल्लेता हिह्कु गट्टिट पळुवाहाटीं कोन्नि रोजके विस्वासमते मनांतुर. पेनदा पोल्लेताहाटीं तिप्पल्क, कस्टाल्क वाते विस्वासमताल ओर बिराना लक्कु आंतुर.

18 विज्जां अरता हाह्कुना पोदाना जेगातसंतोर बोर इत्ते, बोर अय्ते पेनदा पोल्ले केंजांतुर,

19 गानि सम्सारमता रंदि, दनमता आस्ति, दिसतवंता गावाले इत्ता मनसु, इवन्नि मत्ताहाटीं पेनदा पोल्लेतुन ओनालोप्पो बेर्सा हिय्यो. पजा अद पोल्लेहेंदाल ओन्क बतल पायदा आयो.

20 बोर अय्ते पेनदा पोल्लेतुन केंजसि, ओप्कुंचि बेस पायदा तरांतोर, ओर इत्ते, विज्जां अरता बेसता जेगातसंतोर आंदुर ओर मुपै अंताल्क, अरवै अंताल्क आनि नूर अंताल्क इल्हा पलांचंतोर,” इंचि इत्तोर.

वेडसिता वेसुडि

(लूकाल 8:16-18)

21 येसु मर्रादि वेसुडि वेहतोर. “बोरे आयिर वेडसि निरिच्चि गंजुना हिळ मुच्चोर, कटुल हिळगुडा ईररोर. गानि वेल्गु दिसगोम इंचि दान उंदि दीसोडिपोर्रो ईरतोर.

22 मक्किस् मत्तव अन्नि दिसि अर्राकोटा मन्नों, आनि मर्ममते मत्तव बवे पलाते अर्राकोटा मन्नों.

23 बोर्कु केंजालय केव्क मंतां ओर केंजट,” इंचि येसु इत्तोर.

24 मर्रा येसु ओर्कुन इल्हा इत्तोर. “मिमेट बेस उसारते केंजट, बद कोल्ताते मिमेट हीतिरो, अदे कोल्ताते मीकु हियमळ जर्गता, इंका दानकन्ना एक्कोगुडा हियमळ जर्गता.

25 बारिल्ले, बोनगा अय्ते मंता, ओन्क पेन इंका हीता. गानि बोनगा अय्ते हिल्ले, ओनगा मत्तदुनगुडा पेन वापस एतकुन्नार,” इंचि इत्तोर.

विज्जां बेर्समळ

26 मर्रा येसु इल्हा वेहतोर. “पेनदा राज्येम इल्हा मंता, वरोर मनकल ओना नेलिते विज्जां वीतंतोर.

27 ओर नर्कळ्क मीडंतोर, पोद्दला तेळिते मंनंतोर. अद विज्जा मोलियसि बेस्सेकेन दांता. अद विज्जा बल्हा मोलियता, बल्हा बेर्साता इत्तद ओनकु तेळियो.

28 बूमि दानद अदे पंटातुन पंडागोटंता. अद बल्हा इत्ते मोदाला मोल्का मोलियंता, कर्ने बेर्सता, पोर्टक वांता, हेन्नु पेय्सि पेडेक निडंतां.

29 गानि बस्के अय्ते पेडेक मुदरंतां अस्के नेलिता मालक पंटा कोतक वाता इंचि हेटेळ पीसि कोय्यंतोर.”

पेनदा राज्येम आवाल्कुना पेडेतसोंटद

(मत्तयाल 13:31-32,34-35; लूकाल 13:18-19)

30 मर्रा येसु ओर्कु इल्हा वेहतोर, “पेनदा राज्येम बल्हा मनंता इंचि वेहकन? बद वेसुडि वेहिचि तेल्पिचकन?

31 पेनदा राज्येम आवाल्कुना उंदि पेडेतसोंटद आंद. अद बूमिपोर्रो वीततस्के, अन्नि पेडेकुंकन्ना सिन्ना पेडे मनंता.

32 गानि अद बेर्सतस्के अगा मनना अन्नि कुसिर कायाना मराकुंकन्ना पेद्दा मरा आंता. दाना पंगां पोळ्गुंक-पोळ्गु बेर्सि, पिट्टे इंका नीडाते गूडां किया परांतां,” इंचि इत्तोर.

33 येसु इसोंटव बच्चुंगो वेसुडिं वेहिचि, ओर्क पेनदा पोल्ले तेळियानाल वेहंदुर.

34 वेसुडि वेहाका येसु ओर्कु बतले वेहाकोंदुर. गानि सिराप ओना सिस्सुल्क मत्तस्के अव वेसुडिना अर्तम ओर्क तेळियागोटिस वेहंदुर.

येसु वळि दुमारमतुन आपंतोर

(मत्तयाल 8:23-27; लूकाल 8:22-25)

35 अद रोज पोळ्द होनना वेलाते, “मनम हब्बेता बाजुंक दाकोम दट,” इंचि येसु ओना सिस्सुल्कुन इत्तोर.

36 ओना सिस्सुल्क अगाटा मंदितुन अग्गेन होळसि, येसु उद्विदिस मत्ता डोंगाते उद्विदिस होनालय पेय्सतुर. ओरा पज्जो इंकिच्चुं डोंगांगुडा पेय्सतां.

37 अस्के उंदि पेद्दा वळि-दुमारम वाता. पेद्दा-पेद्दा तळां डोंगाक दल्लिसि एर निंडालय दल्लाता.

38 गानि येसु डोंगाता पज्जोटा बाजुंक होंचि मेत्तापोर्रो मीडसेक मत्तोर. अस्के सिस्सुल्कु येसुन तेहचि, “गुरु! मनम नासडेम आसि होनिनागानि नीकु बतल पिकिर हिल्लेना?” इंचि इत्तुर.

39 अस्के ओर तेदसि, वळि-दुमारमतुन आनि समुद्रमतुन, “आगा, चुपचाप मन” इंचि गदरिचतोर, अस्के वळि-दुमारम मग्गिसि, अगा पूरा सांत आता.

40 अस्के येसु सिस्सुल्कुन, “मिमेट बारि वेरियंतिर? मीकु गिच्चचोगुडा विस्वासम हिल्लेना?” इंचि इत्तोर.

41 ओर इरगा वेरियसि, “ईर बोर आंदुर? वळि, समुद्रमगुडा ईना पोल्ले केंजंता,” इंचेके ओर-ओरे वळ्ळकुकुत्तुर.

5

देय्यम पीतोन बेस कियमळ

(मत्तयाल 8:28-34; लूकाल 8:26-39)

1 अस्के ओर समुद्रमता हब्बेता बाजुंक मनना गिरासेन इनना एरियक एत्तुर.

2 येसु डोंगाताल रेयतस्के वरोर देय्यम पीता मनकल तापळन बोळ्ळाताहेंदाल वासि येसुंक कलियतोर.

3-4 ओन बच्चुंगो मल्कां बेडिने, गोल्सुकुने दोहचि वाटतुर, गानि ओर बेडिन उराहचि पोहतोर, गोल्सुकुन नेम्हाचि पोहतोर. ओन बोर आपा पराहिल्लुर. ओर तापळानेन मनुंदुर, ओन बोर गोल्सुकुने दोहा पराकोंदुर.

5 ओर नर्का-पिय्यल तापळाने, गुट्टाने तिरियसेक वरगेयसेक मनुंदुर. ओनद ओरे बंडाने कोहककुंचि नोपि कीकुंनुंदुर.

6 ओर लक्कुटाले येसुन हळसि, विच्चि वासि ओना काल्क मोळ्कतोर.

7-8 अस्के, “ओनागटाल पलाते पेयसा,” इंचि येसु आ मनकन पीता देय्यमतुन इत्तोर. अदुनहाटी ओर येसुन, “ए अन्निटकन्ना पेद्रुदा पेनदा मरिं येसु, नातोनि नीकु बता कबळ? निमे नाकुन तकलिप किय्योन इंचि पेनदा ओट्टु तिचि वेहा,” इंचि जोरसे वरगेयसि इत्तोर.

9 मर्रा, “नीवा पोरोल बतल?” इंचि येसु पूसकीतोर. अस्के ओनालोप्पो मत्ता देय्यम, “मोमोट वेल्लेन मंदा आसि मंतोम, इंचि नावा पोरोल ‘मंदा’ आंद,” इल्हा जवाब हीता.

10 ओनालोप्पो मत्ता देय्याल्क, “माकुन इद एरियाताल पलाते गेदुममा,” इंचि येसुन बच्चोरो विनंति कीतां.

11 अद वेलाते गुट्टा पक्काते पद्दिना मंदा मेय्येके मत्ता.

12 पजा, “माकुन आ पद्दिना मंदाते होनाहीम,” इंचि आ देय्याल्क येसुन विनंति कीतां.

13 अस्के येसु अवुन होना वेहतोर अय्ते, आ देय्याल्क ओनागटाल पेय्यि पद्दिना मंदाते होत्तां. अव पद्दिं रोंडु वेयकुनदाका मत्तां. पजा आ पद्दिना मंदा समुद्रम ओड्डुन पोरोटाल हिळतुक वित्ति समुद्रमते मुळ्गिसि हासोत्तां.

14 अद हळसि पद्दिं मेहानोर वित्ति होंचि, सहरते, पक्का पीसि मत्ता नाह्कुने अगा जर्गतद वेहतुर. अस्के आ देय्याल्क पीतोरद बतल आता इंचि लोकुल्क हळालय अगा वातुर.

15 येसुनगा वासि हळतुर अय्ते, देय्याल्क पीसि मत्ता मनकल पुरागा बेस आसि, कपडिं केसि उद्दिदिसि मत्तद ओर्क दिसतोर. अल्हा मत्तद हळसि ओर्क वेरें दल्गता.

16 येसुना कबाह्कुन हळतोर अगा बोर अय्ते मत्तुरो ओर, देय्याल्क पीसि मत्ता मनकल बल्हा बेस आतोर, पद्दिंके बल्हा-बतल आता इवन्नि पोर्ले लोकुल्कुक वेहतुर.

17 इवन्नि पोर्ले केंजसि, “निमे मा एरियाताल पेय्यि होन,” इंचि लोकुल्क येसुन विनंति कियालय दल्गातुर.

18 अस्के येसु होनालय डोंगाते उदसेके मननेके, देय्याल्कुनाल बेस आता मनकल वासि, “नाकुन नीवातोनि वाया हीम,” इंचि येसुन विनंति कीतोर.

19 गानि येसु ओप्फुन्ना हिल्लोर, “सामि नीपोरें दया कीसि नीहाटी बल्हा बतल कीतोर, लोन होंचि नीवा लोतोरुंक वेहा,” इंचि इत्तोर.

20 अय्ते ओर मनकल अगटाल देकापोलिस एरियाते होंचि, येसु ओनाहाटी बतल-बतल कीतोर ओर अन्नि पोर्ले वेहालय दल्गातोर. अद केंजसि अंतोर इंचत्रम आतुर.

उंदि मुरतटुन बेस कियमळ

(मत्तयाल 9:18-26; लूकाल 8:40-56)

21 येसु डोंगाते उद्दिदिसि समुद्रमता हब्बेटा ओड्डुंक मर्रा मल्सि होत्तोर. ओन हळसि वेल्लेटुर लोकुल्क ओनगा जमा आतुर. ओर समुद्रम ओड्डुनगा मत्तोर.

22 अस्के दर्मसास्त्रम कराहना लोता वरोर याईर पोरोलतोर अदिकारि येसुनगा वातोर. वासि ओना काल्कुनपोरें अर्सि,

23 “नावा सिन्ना मिथ्यड बेस हिलाका हायनाल आसि मंता. निमे वासि दानपोरें कय इरते, अद बेस आसि दाना जीवा पिस्संता,” इंचि विनंति कीतोर.

24 येसु आ अदिकारिनतोनि होत्तोर. ओना पज्जो वेल्लेन मंदि पेय्यि ओना सुट्टु वेल्ले गर्दि कीसि पोरो-पोरें अर्नालय आयुंदुर.

25 आ गर्दिते पन्नेड वर्सानाल उंदेतीर कप्पिड आयना उंदि मुरतळ मत्ता.

26 अद वेल्लेटुर वैदकुल्कुंक हुपिस्ता. दानगा मत्ता कोत्तांता मार्ता गानि दाना बिमार बेस आयाका एक्कोने आसेके होत्ता. इल्हा अद वेल्लेने तकलिप बोगांचेक मत्ता.

27-28 अद मुरतळ येसुना बारेमते केंजसि मत्ता. दाना मनसुने, “नना सिराप येसुना कप्पिडतुन इट्टिटानागानि बेस आंतन,” इंचि इनकुत्ता. अदुनहाटीं गर्दिते येसुना पज्जो वासि ओना कप्पिडतुन इट्टा.

29 इट्टा इट्टुडे दाना कप्पिड आयमळ बंद आसि बिमार बेस आता इंचि दानकु अनपिस्ता.

30 अदे वेलाते येसुंक ओना लोप्पोटाल ताकत पेयसता इंचि अनपिस्ता. अस्के पज्जो मल्लिस, “नावा कपडितुन बोर इटतुर?” इंचि येसु पूसकीतोर.

31 ओना सिस्युल्कु ओन, “गर्दिते लोकुल्क वरोनपोर्रो-वरोर अरानद निमे हळसेक मंचिगुडा, नावा कपडितुन बोर इटतुर? इंचि पूसकीसेके मंतिन,” इंचि इत्तुर.

32 गानि, “नाकुन बोरन्ना इटसि मंदगोम,” इंचि येसु अंतोरहेके हळसेक मत्तोर.

33 अस्के अद मुरतळकु, बेस आतद तेळियताहाटी, वैरेंक वनकुसेक येसुनगा वासि ओना काल्कुना पोर्रो अर्सि अगा जर्गतद सत्तेम-सत्तेम वेहता.

34 अस्के येसु आ मुर्ताटुन, “पेगिटुना, नीवा विस्वासमे नीकुन बेस कीता. इसोटा बिमार मर्रा बस्केने वायो, सांतिते होन,” इंचि इत्तोर.

येसु हाता पेगिटुन जीवा अरहमळ

35 येसु अल्हा वळकसेक मननेके, दर्मसास्त्रम कराहना लोता आ अदिकारिना लोताल इच्चुर लोकुल्क वासि, “नीवा मिथ्यड हाता, इंदके गुस्न तकलिप कियमा,” इंचि वेहतुर.

36 ओर वळकानदुन केंजवाप कीसि येसु आ दर्मसास्त्रम कराहना लोता अदिकारिनतोनि, “निमे वेरियमा, विस्वासम इर्रा,” इंचि इत्तोर.

37 येसु अगटाल पेयसनेके पन्नन, याकोबुन आनि याकोबुना तम्मुर योहानुन ओनतोनि पीकुत्तोर. ओर्क तप्पा बोने ओना पज्जो वाया हिया हिल्लोर.

38 ओर दर्मसास्त्रम कराहना लोता अदिकारिना लोन होतस्के अगा लोकुल्क इरगा अळानद, मोत्कुनानद हळतोर.

39 अस्के येसु लोप्पो होळियसि, “मिमेट अडमळ-मोत्कुनमळ बारि कीसेक मंतिर? अद पेगिळ हाया हिल्ले, मीडसि मंता,” इंचि इत्तोर.

40 अल्हा इत्तद केंजसि ओर येसुन कव्तर. गानि येसु ओर अंतोर्कुन पलाते लोहतोर. पेगिटा तल्लुर-बाबोन, ओनतोनि बोर अयते मत्तुर ओर्कुन पीकुंचि पेगिड मीडसि मत्ता अरति होत्तोर.

41 होंचि अद पेगिटा कयदुन पीसि, “तलिता कुम” इंचि इत्तोर. इत्ते, “पेगिटुना, नना वेहासेक, तेदा!” इंचि अर्तम.

42 अल्हा इत्ता इनुडे, आ पन्नेड वर्सांना पेगिड तेदिस ताकालय दल्गता. अदुन हळसि, अगा मत्तोर वेल्लेन इचंन्रम आतुर.

43 “इगे जर्गतद बोर्के तेळिया मनि” इंचि ओर्कु गट्टिगा हुकुम हीतोर. पजा “अद पेगिड्क बतलन्ना तिनालय हीम्टु,” इंचि वेहतोर.

6

येसुन ओना संतम नाटेनोरे ओप्कुना हिल्लुर
(मत्तयाल 13:53-58; लूकाल 4:16-30)

1 येसु अगटाल पेयसि ओना सहरते होत्तोर, ओना सिस्युल्कगुडा ओना पज्जो होत्तुर.

2 नोमकेम रोञ्जे दर्मसास्त्रम कराहना लोते होंचि पेनदा पोल्लें कराहसेक मत्तोर. वेल्लेदुर लोकुल्क अव पोल्लें केंजसि, “ईर इच्चोर बेस बल्हा वेहासेक मंतोर? ईनकु इच्चोर बुद्दि बगाटाल वाता? ईर अद्बूतामाता कबाहक बल्हा कीसेक मंतोर?”

3 ईर अयते मरियमुना मरि वडलल आंदुर, याकोब, योसेस, सिमोन, यहुदल, ईरा दादल आंदुर. इगे मनातोनि उद्दिदिसि मनानव ओना हेलाहके आंदु,” इंचि इनालय दल्गतुर. अदुनहाटी ओर येसुन ओप्कुना हिल्लुर.

4 अस्के येसु ओर्कुन, “पेनदा कबुरतोंक ओना संतम नाटेने, ओना जीवातोरगा आनि ओना लोन होळसिसि, कळमतव अन्नि जेगाने मान-मर्यादा दोर्कता,” इंचि इत्तोर.

5 अगा येसु बतले अद्बूतामाता कबाहक किया हिल्लोर, सिराप बिमार मत्तोर्कुन इच्चुर्कुन इट्टिसि बेस कीतोर.

6 येसुन ओर विस्वासम कियवाहाटी ओन्क इंचत्रम आता. पजा नार-नार होंचि पेनदा पोल्ले कराहसेके तिरियतोर.

येसु पन्नेड सिस्युल्कुन लोहमळ

(मत्तयाल 10:1,5-15; लूकाल 9:1-6)

7 उंदि रोज येसु पन्नेड मंदि सिस्युल्कुन दगैरा केयतोर. ओर्कुन इव्वुर-इव्वुर दंटा कीसि, ओर्क देय्याल्क गेदमना अदिकारम हीसि सेवा कियालय लोहतोर.

8-9 अदिकारम हीसि ओर्कु इल्हा वेहतोर, “मिमेट होननेके मीतोनि गाटो आयि, जोरा आयि, कोत्ताना संचि आयि, एककोतव अंगि आयि ओयमट. सिराप कयदे दुड्डु, काल्कुंक हेरपुहक ओम्ट.

10 मिमेट बद लोन अयते दांतितो, अगटाल पेयसनदाका अदे लोते मंट.

11 बोर अयते मीकुन ओप्कुन्नुर, मीवा पोल्ले केंजुर अगटाल पेयसनेके ओर्क विरोदमते गवाइलेसी मीवा काल्कुना दुम्मु दुल्पट. नना मीक निजम वेहासेक मंतन, न्यायमता रोजुने आ नाटुक वाता गोसाकन्ना सदोम, गमोरा सहरकुंक वायाना गोसा बच्चोरो तक्को मनंता,” इंचि वेहतोर.

12 अस्के सिस्युल्कु अगटाल होंचि, “मीवा पापालक ओप्कुंचि, मनसु मार्सकुंटु” इंचि लोकल्कुंक प्रचार कीतुर.

13 देय्याल्क पीतोरगटाल बच्चुंगो देय्याल्कुन गेदुमतुर. बिमारते मत्तोर्कुन निय होकसि बेस कीतुर.

हेरोद राजल येसुन बापतिस्मा हियना योहान इनकुंतोर

(मत्तयाल 14:1-12; लूकाल 9:7-9)

14 येसुना पोरोल अंतोर्क तेळियसि होत्ता. हेरोद राजालगुडा येसुना बारेमते केंजतोर. अस्के ओर इल्हा इत्तोर, “बापतिस्मा हियना योहान हातोरारवेटाल मर्रा तेदतोर. अदुनहाटी ओर इसंटा अद्बूतामाता कबाहक कीसंतोर.”

15 अल्हेने इच्चुर बारे, “पेनदा कबुरतोर एलियल आंदुर,” इंचिच्चुर बारे, “एनकटा पेनदा कबुरतोर लोप्पोटाल बोरन्ना वरोर मंदनुर,” इंचि इत्तुर.

16 गानि हेरोद राजाल इदुन केंजसि, “बापतिस्मा हिश्यना योहानुना तल्ला नना कोय्यागोटतन, ओर हातोरारवेटाल मर्रा जीवाते तेदतोर,” इंचि इत्तोर.

17-18 बारित्ते, हेरोद राजाल ओना तम्मुर पिलिपुना मुत्तो हेरोदियान इरकुंचि मत्तोर. अयते योहान हेरोद राजानगा होंचि, “नीवा तम्मुना मुत्तोन निमे निहगा इरमळ नियम परकारम बेस आयो,” इंचि वेहुंदुर. अल्हा वेहतादान्कु हेरोदियनहाटी हेरोद राजाल सिपाइल्कुन लोहचि योहानुन जेलने वाटा वेहतोर.

19-20 अयनागानि मोका दोर्कते योहानुन हक्कालय हेरोदियल हळुंदु, गानि अद हक्का पराहिल्ले. बारित्ते योहान नीतिमंतुड, पवित्र मनकल इंचि हेरोद राजाल वेरियुंदुर. अदुनहाटी ओर जेलते मननेके ओन्क बतल आयामन्नि इंचि ओन कापाळसि ईरुंदुर. हेरोद राजाल योहानुना पोल्ले केंजसि परेसान आसिगुडा कुसिते केंजुंदुर.

21 उंदि रोज हेरोदियांक मोका दोर्कता. हेरोद राजाल ओना पुटता रोज मंता इंचि ओनगा मनना पेदुदाल्कुन, सिपाइल्कुना अदिकारिल्लुकुन आनि गालिल राज्यमता लीडर्कुन बोजनमहाटी केयतोर.

22 अस्के हेरोदियाना मिय्यड अगा वासि हेरोद राजाल अल्हेने हेळमितोरा मुन्ने एगरिसि ओर्कुन कूस कीता. अस्के राजाल आ पेगिटुन केय्सि, “नीकु बतल गावाले नाकुन तल्का, नना अद हीतन,” इंचि इत्तोर.

23 अल्हेने, “नावा सगम राज्येमगुडा नीकु हियालय तयार मंतन,” इंचि ओट्टु तित्तोर.

24 अस्के अद पेगिळ दाना यावानगा पलाते होंचि, “बतल तल्ककन” इंचि पूसकीता. अस्के, “बापतिस्मा हियना योहानुना तल्ला तल्का,” इंचि दाना यावल वेहता.

25 गाबरते आ पेगिड हेरोद राजानगा बिराना लोप्पो होंचि, “बापतिस्मा हियना योहानुना तल्ला उंदि गिन्नेते वाटसि नाकु हीम,” इंचि इत्ता.

26 इद केंजसि राजांक इरगा दुक्कम वाता. गानि अगा मत्ता अंटोर हेडमितोराहाटीं आनि तित्ता ओट्टुहाटीं, दानकु हीतन इत्तद हिय्योन इना पराहिल्लोर.

27 अस्के राजाल, जेलते मत्ता योहानुना तल्ला कोय्सि ता इंचि वरोर सिपाइंक बिराना आदेस हीसि लोहतोर.

28 आ सिपाइ जेलते होंचि, योहानुना तल्ला कोय्सि, उंदि गिन्नेते वाट्सि तच्चि पेगिड्क हीतोर, अस्के आ पेगिड अदुन दाना यावांक हीता.

29 इद पोल्ले योहानुना सिस्युल्कुंक तेळियता. अस्के ओर होंचि ओना पीनगुन ओसि बोंदाते इरतुर.

हेय्युं वेय्कुना मंदिक गाटो दोसमळ

(मत्तयाल 14:13-21; लूकाल 9:10-17; योहान 6:1-14)

30 नार-नार होंचि मत्ता येसुना प्रेरितुल्क, येसुनगा मल्सि वातुर. ओर होंचि लोकुल्कुंक बतल-बतल कीतुर, बतल-बतल कराहतुर इवान्नि पोल्ले येसुंक वेहतुर.

31 ओरगा वायानुर-होनानुर लोकुल्क वेल्लेटुर मत्तुर, ओर्क गाटो तिनालयगुडा वेला दोर्काकोंदु, अदुनहाटीं, “मीक अराम किया पीता, बोरे हिल्वा जेगातगा दाकोम दट,” इंचि येसु ओर्कुन इत्तोर.

32 अस्के ओर उंदि डोंगाते उदुदिसि बोरे हिल्वा जेगाते होत्तुर.

33 गानि वेल्लेटुर लोकुल्क ओर्कुन होननेके ह्ळसि एरपाट कीतुर. अदुनहाटीं अन्नि सहरकुनाल विच्चि वासि, ओर्कन्ना मुन्नेने अगा जमा आतुर.

34 येसु डोंगाताल रेयसि अद जेगातगा वेल्लेने मंदितुन ह्ळतस्के, कोहानोर हिल्वा गोरें बल्हा मनांतंगो ओर अल्हा आसि मत्तुर. अदुनहाटीं ओनकु ओरपोरों दया वासि ओर ओर्क पेनदा पोल्ले कराहलय सुस्व कीतोर.

35-36 पोळ्द होनना वेलाक सिस्युल्क येसुनगा वासि, “मनम सुनसान जेगाते मंतोम, वेलागुडा बागेन आता. लोकुल्कुन लोहचीम, ओर दग्गेटा नाह्कुने होंचि, ओराहाटीं तिनालय बतलन्ना अस्कुंतुर,” इंचि इत्तुर.

37 गानि, “मिमेटे ओर्क हीम्टु,” इंचि ओर्कुन येसु इत्तोर. अस्के ओर इत्तुर गदा, “रोंडु नुह्कुना दिनारकुनतोनि* अंटोराहाटीं तिडि अस्सि तच्चि हियमळा बतला?” इंचि पूसकीतुर.

38 “मिहगा बच्चुं हारि मंतां, होंचि ह्ळट,” इंचि येसु इत्तोर. ओर अवुन ह्ळसि, “हेय्युं हारि, रोंडु जिम्मां मंतां,” इंचि वेहतुर.

39 अस्के येसु, “अंटोर लोकुल्कुन पच्चाटा जाडि पोरों गृप-गृपुने उप्सट,” इंचि सिस्युल्कुंक आदेस हीतोर.

40 ओर अंटोर गृप-गृपकुने उदतुर, उंदि गृपुने एबै, नूर इल्हा मत्तुर.

41 अस्के येसु अव हेय्युं हारि, रोंडु जिम्मां कय्दे पीसि, स्वर्गमताहेके ह्ळसि पेनदुक दन्यवाद कीतोर. अवुन तुकडें कीसि, “ओर्क पांचि हीम्ट” इंचि सिस्युल्कुंक हीसीतोर. अल्हेने अव रोंडु जिम्मानगुडा तुकडां कीसि हीतोर.

* 6:37 दिनार इद कोत्ता आंद. उंदि दिनार इत्ते उंदि रोजुना ब्रिततचो दाना विल्ला मनंता.

42 ओर अंतोर पीरनिंडा तित्तर.

43 तिनुड आतस्के मिगुल्ता हारिना आनि जिम्माना तुकडां जमा कीते पन्नेंड तट्टां निंडतां.

44 हारि तित्तोरव्ते, सिराप मांडसे हेय्युं वेय्कुना मंदि मत्तर.

येसु एतपोर्रो ताकमळ

(मत्तयाल 14:22-33; योहान 6:16-21)

45 अद आता पजा येसु बिराना ओना सिस्स्युल्कुन डोंगाते उपिच्चि, “मिमेट अंतोर समुद्रमता हळबेटा बाजुंक मंदना बेतसेदा सहरते नाकन्ना मुन्नेने होंट,” इंचि इत्तोर. अगा मत्ता लोकुल्कुन ओरा नाहकुनहेके होनालय साला कीतोर.

46 ओर्कुन साला कीता पजा, येसु पारतना कियालय गुट्टापोर्रो होतोर.

47 पोळ्द होत्ता पजा सिस्स्युल्कुना डोंगा नड्डुम समुद्रमते मत्ता, गानि येसु वररे ओड्डुनपोर्रो मत्तोर.

48 समुद्रमते वळि-दुमारम डोंगाक एदुर तेदताहाटी सिस्स्युल्कुंक डोंगा ताकसालय तकलिप होंचेके मत्तद येसु हळतोर. हळसि, नर्कटां मूड-नालुं एगाना वेलाते येसु सिस्स्युल्कुना डोंगातेके एतपोर्रो ताकसेक होत्तोर. ओर ओरगटाल मुन्ने पेय्से होननदे मत्ता,

49-50 गानि येसु एतपोर्रो ताकानद हळसि देय्यम इंचि मोत्कुत्तर, बारित्ते अंतोर ओन हळसि वेरियतुर. अस्के येसु, “वेरियमट! ननाने आंदुन. दैरनेमते मंटु!” इंचि इत्तोर.

51 पजा सिस्स्युल्कुना डोंगाते येसु एक्कुता एक्कुडे वळि-दुमारम बंद आता. अद हळसि ओर्क वेल्ले इचंत्रम आता.

52 बारित्ते मुन्ने हेय्युं वेय्कुना मंदिक गाटो दोसतद हळसि मत्तर, अयनागानि येसु सामिना बलमतुन ओर एरपाट किया हिल्लुर. ओरा मनसुक बंडालेसीं आसि होत्तां.

बिमर मत्तोर्कुन येसु बेस कीतोर

(मत्तयाल 14:34-36)

53 पजा ओर अद समुद्रम दाटसि गेनेसरेत इनना नाटे एव्वि, अगा डोंगातुन आपतुर.

54 ओर डोंगाताल रेयनेकेन वेल्लेटुर लोकुल्क हळसि येसुन एरपाट कीतुर.

55 पकापीसि मत्ता नाहकुने विच्चि होंचि बिमार मत्तोर्कुन कट्टुल्कुने वाटसि येसु बगा मंतोर इंचि तेल्पिचकुंचि, अगा-अगा कांजसेक ओयुंदुर.

56 येसु नाटेने, सहरते, नेलिने बद-बद जेगाते अय्ते होनुंदुरो, अगाटा बिमार मत्तोर्कुन चौकते तच्चि मीडिच्चि, “सिराप नीवा कप्पिडता अंचुन इट्टा हीम,” इंचि येसुन विनंति कियुंदुर. अल्हा बोर-बोर अय्ते ओना अंचुन इट्टुरो, ओर अंतोर पुरागा बेस आतुर.

7

पेद्दाल्कुना रीति-रिवाजता बारेमते कराहमळ

(मत्तयाल 15:1-9)

1 उंदि रोजु येस्सलेमताल इच्चुर परिसिल्क आनि दर्मसास्त्रम कराहना गुस्लक येसुनगा जमा आतुर.

2 येसुना इच्चुर सिस्स्युल्कु यहूदि लोकुल्कुना रीति-रिवाज परकारम सुद्द आयाकॉटेन इत्ते, कय्क नोरकिने तिनानद ओर हळतुर.

3 बारित्ते, परिसिल्क आनि यहूदिल्क अंतोर पेद्दाल्कुना रीति-रिवाज मत्ताप कय नोरका तिन्नु.

4 इंका ओर हाटुम होंचि वायना गानि एर तुंगाका तिन्नु. अचोने आयका वाटिं, तालि, रागिता बोळिं नोरमळ इसोंटव पेद्दाल्कुनाल ताकसेक वाता रीति-रिवाजकुन नोमंतुर.

5 अय्ते, “नीवा सिस्स्युल्क, पेद्दाल्कुना रीति-रिवाजुने बारि ताकुर, तिनाका मुन्ने ओर कय्क बारि नोर्स?” इंचि परिसिल्क आनि दर्मसास्त्रम कराहना गुस्लक येसुन पूसकीतुर.

6 अस्के येसु ओर्कुन इल्हा इत्तोर, “यसायाह इनना पेनदा कबुरतोर, मीवसोंटा डोंगिरा बारेमते निजमे बविस्वयवानि कीतोर: ‘ईर लोकुल्क सिराप तोळ्दने नावा कदर कीतुर, गानि ईरा मनसु मात्रम नहागटाल बचचोनो लक्कु मन्ता.

7 ईर अंगडमे नावा आरादना कीसेके मनांतुर. बारित्ते, ओराहाटी मनकालोर तयार कीता रीति-रिवाजके निजमतव, अबुना पालन कियमळे दर्मम इंचि कराहंतुर, * इल्हा रासि मन्ता.

8 मिमेट पेन हीता आदेसतुन होळसि, मनकल तयार कीतव रीति-रिवाजकुन पीसि ताकसेक मंतिर,” इंचि इत्तोर.

9 मर्रा ओरतोनि, “मीवा रीति-रिवाजकुन पीसि ताकानाहाटीं, पेनदा आदेसतुन लक्कु कियमळ मीक बेस अनपिच्चंता,” इंचि इत्तोर.

10 “निमे नीवा तल्लुर-बाबोना कदर कीम, बोर अय्ते तल्लुर-बाबोन रांगंतोर, ओन हक्कमळे गावाले,” इंचि मूसाल इत्तोर.

11-12 गानि, “मिमेट अय्ते, बोरन्ना मनकल ओना तल्लुर-बाबोन, नना मीकु हियानद पेनदुक कोर्बान* इंचि हीतन इनानय्ते, मिमेट ओन ओना तल्लुर-बाबोना सेवा क्रिया हिथ्यिर, इंचि कराहंतिर.

13 इल्हा मिमेट तयार कीता, मीवा रीति-रिवाजकुनाहाटीं पेनदा पोल्लेतुन होळसेक मंतिर. इल्हा इंका बचचुंगो कबाहक कीतिर,” इंचि वेहतोर.

मनकन हेळहना पोल्लें

14 मर्रादि मल्का येसु लोकुल्कन दगेर्क केय्सि, “मिमेट अंतोर नना वेहानद केंजट आनि अर्तम कीकुटु,” इंचि वेहालय सुस्व कीतोर.

15-16 “पलाताल मनकना पीटे होनानव ओन हेळ्हों, गानि मनकना तोळ्दाल पलाते पेय्सना पोल्लेंगे ओन हेळ्हंतां,” इंचि वेहतोर. बोर्कु केंजालय केव्क मंतां ओर केंजट.†

17 पजा येसु लोकुल्कन होळसिसि, सतता लोन होत्तोर. अस्के ओना सिस्युल्कु ओर वेहता वेसुडिता अर्तम पूसकीतुर.

18 अस्के येसु ओर्कुन इल्हा इत्तोर. “पलाताल बतल अय्ते पीटे दांता, अद मनकन हेळ्हो इंचि मीकु इंकागुडा तेळियोना?

19 पलाताल होनानद ओना मनसुने होन्नो गानि ओना पीटे दांता. पजा पलाते अर्ता,” अल्हा वेह्चि, तिनानव अन्नि तिडिं तिनालय बेसतवे इत्तोर.

20 पजा ओर इल्हा वेहतोर, “मनकना लोप्पोटाल बतल अय्ते पलाते पेय्संता अदे मनकन हेळ्हंता.

21 बारित्ते मनकना मनसुनाल कराब विचाराल्क, बोगमतनम, दोंगातनाल्क, हक्कमळ, व्यबिचारम,

22 आस्ति कियमळ, दुस्त गुनम, डोंगिगुनम, मेंदुलता आसे, कळ्क पोतमळ, अपमानम कियमळ, गरी आनि मुर्का गुनाल्क पलाते पेय्संतां.

23 इव अन्नि सेड्डा पोल्लें मनकना तोळ्दाल पलाते पेय्सि, मनकन हेळ्हंतां,” इंचि वेहतोर.

यहूदि आयवा मुरतटा विस्वासम

(मत्तयाल 15:21-28)

24 पजा येसु अगटाल तेदसि सू, सिदोन एरियाते होत्तोर. अगा मनानद बोनके तेळिया मनि इनकुंचि, ओर उंदि लोन होंचि आगतोर. गानि मक्का परा हिल्लोर.

25-26 उंदि युनानि मुरतळ येसुना बारेमते केंजता. अद सिरिया देसेमता पोनिशिया इनना नाटे पुटदद आंदु. दाना सिन्ना मिथाटुन देय्यम पीसि मत्ताहाटीं अद येसुनगा वासि, ओना काल्कुनपोर्री अरता. अर्सि “देय्यमतुन पेच्हाचि गोदमा,” इंचि येसुन विनंति कीता.

* 7:7 यसायाह 29:13

* 7:11-12 कोर्बान पेनदुक मोक्कु हीता वस्तुकुन कोर्बान इंचि इनुंदुर.

† 7:15-16 इद वचनम कोन्नि पांडु लिपिने हिल्ले.

27 येसु अदुन, “पिलाल्क मोदाला पीरनिंडा तिनिरकांटी, पिलाल्कुना हारि तेंडकुंचि नय्कुंक वाटमळ बेस आयो,” इंचि इत्तोर.

28 गानि आ मुरतळ, “निजमे सामि! पिलाल्क तिननेके हिळ अरता अंटकुल्कुन अय्ते नय्के तिंतां गदा!” इंचि येसुंक जवाब हीता.

29 अस्के, “निमे इल्हा इत्ताहाटी, नीवा मिय्यटाल देय्यम पेय्से होत्ता. निमे लोन होन,” इंचि येसु इत्तोर.

30 अद मुरतळ लोन होंचि हळतस्के, दाना मिय्यड कटुलते मींडसि मंता, दानाल देय्यमगुडा पेय्से होत्ता इंचि अद हळता.

पनकना-सेव्दि मनकन येसु बेस कियमळ

31 अद आता पजा येसु सूर एरियाताल मल्सि सिदोन होत्तोर. अगटाल देकापोलिस एरिया दाटसि गालिल समुद्रमतगा वातोर.

32 अस्के इच्चुर लोकुल्क, वरोर पनकना-सेव्दि मनकन येसुनगा पीसि वासि, “नीवा कय ईना पोरो ईरा,” इंचि विनति कीतुर.

33 येसु आ पनकना-सेव्दि मनकन मंदिताल पक्कक ओसि, ओना केव्कुने सतता वेल्कु दोसतोर, आयंका आ वेल्कुना पोरो उस्किसि ओना नाल्केतुन इटतोर.

34 मळबुनहेके हळसेक जोरसे नेस्किसि “एप्पता” इत्तोर. इत्ते कुल्ला आम इंचि अर्तम.

35 अस्केने ओना केव्क केंजा वायालय दल्यतां, ओना नाल्केगुडा मेसलिसि ओर साप वळ्कालय दल्यतोर.

36 इद पोल्ले बोर्के वेहमट इंचि येसु ओर्कु गट्टिगा वेहतोर गानि लोकुल्कुंक ओर वेहतादानकन्ना एक्को वेहासेक होत्तुर.

37 केंजता लोकुल्क अंटोर इचंत्रम आसि, “ओर बतलय्ते कीतोर, बेस कीतोर. सेव्दोर्कुन केंजा वायानाल, म्कालोर्कुन वळ्का वायानाल कीतोर,” इंचि इत्तुर.

8

नालुं वेय्कुना मंदिक येसु गाटो दोसंतोर
(मत्तयाल 15:32-39)

1 अव रोजकुने मसंदि मल्का येसुनगा वेल्लेन लोकुल्क जमा आतुर. ओरगा तिनालय बतले मनाहिल्ले. अदुनहाटी येसु ओना सिस्युल्कुन दग्गेर्क केय्से,

2 “ईर लोकुल्क नहगा मूड रोजकुनाल मंतुर, ईरगा तिनालय बतल हिल्ले. अदुनहाटी नाक ई लोकुल्कुन हळसि पापम अनपिचंचंता.

3 इच्चुर लोकुल्क वेल्ले लक्कुटाल वातोर मंतुर. ननागिंटा ईर्कुन कर्वुने लोन लोहानय्ते, नड्डुम हर्दे बगानना कूलाबडनुर,” इंचि इत्तोर.

4 अस्के, “ई उस्के बूमिते इच्चो वेल्ले लोकुल्कुंक हालानाल तिडि बगाटाल तरा परकोम?” इंचि सिस्युल्क येसुंक जवाब हीतुर.

5 अस्के, “मिहगा बच्चुं हारि मंतां?” इंचि येसु ओर्कुन पूसकीतस्के, ओर, “एडुं हारि मंतां” इंचि इत्तुर.

6 पजा येसु मंदितुन हिळ बूमिपोरो उद्दा वेहतोर. आ एडुं हारि पीसि पेनदुक दन्यवाद कीतोर. हारिन तुकडां कीसि, “ओर्क तूसि हीम्टु” इंचि सिस्युल्कुंक हीतोर. अस्के सिस्युल्कु मंदिकु तूसि हीतुर.

7 ओरगा इच्चुं सिन्ना जिम्मांगुडा मत्तां. येसु अवुनहाटीगुडा पेनदुक दन्यवाद कीसि “लोकुल्कुंक तूसि हीम्टु” इंचि सिस्युल्कुंक आदेस हीतोर.

8 अगा मत्तोर अंटोरगुडा पीरनिंडा तित्तर. पजा मिगुल्ता हारि तुकडन जमा कीते, अव एडुं तट्टां निंडतां.

9-10 अगा तित्तोरव्ठे दग्गेरा-दग्गेरा नालुं वेय्कुना लोकुल्क मत्तर. ओर अंटोर्कुन साल्ना कीसि, येसु बिराना ओना सिस्स्युल्कुनतोनि उंदि डोंगाते उद्दिदिसि दलमनुता एरियाक होत्तोर.

परिसिल्क येसुना पट्टु हळंतुर

(मत्तयाल 16:1-4; लूकाल 11:16,29)

11 पजा येसुना पट्टु हळना इंचि, “निमे पेनदा अदिकारम पीसि वातिन इंचि नम्मालय, स्वर्गमताल माकु उंदि चिन्ह हुप्सा,” इंचि परिसिल्क ओन पूसकियालय दल्गतुर.

12 अस्के येसु आत्माते जोरते नेस्किसि, “इद पीळितोर चिन्ह हुप्सा इंचि बारि इंतुर? नना मीक निजम वेहंतन, इद पीळितोर्के बदे चिन्ह हुपिचमळ जर्गो,” इंचि इत्तोर.

13 पजा ओर्कुन अग्गेन होळसि, डोंगाते उद्दिदिसि समुद्रमता हब्बेटा ओड्डुंक होत्तोर.

यहुदिल्कुनाल जेगर्ता मंटु

(मत्तयाल 16:5-12)

14 सिस्स्युल्कु हारि ओयालय मरंगतुर. आनि ओरगा डोंगाते उंदे हारि मत्ता.

15 अस्के येसु ओर्कुन इल्हा जेगर्ता कीतोर. “परिसिल्क आनि हेरोदना पुल्लटा पिंडिता बारेमते जेगर्ता मंटु,” इत्तोर.

16 अद केंजसि, “मनागा अयते हारि हिल्लें,” इल्हा इंचेके सिस्स्युल्कु ओर-ओरे वळ्कुकुत्तुर.

17 येसु अदुन एरपाट कीसि, “हारि हिल्लें इल्हा विचारम मिमेट बारि कीसेक मंतिट? इदवेरदाकागुडा मीकु तेळिया हिल्लेना? एरपाट कीसेक हिल्लिरा? मीवा मनसु बंडा आताना?

18 मीक कळ्कु मंचिगुडा हळा परसेक हिल्लिरा? केव्क मंचिगुडा केंजा परसेक हिल्लिरा? मिमेट मति मर्गातिरा?

19 नना हेय्युं वेय्कुना मंदिहाटी हेय्युं हारि उराहचि दोसतन, अस्के बच्चुं तट्टाना हारि मिमेट जमा कीसि निहतोर?” इंचि पूसकीतोर. अस्के, “पन्नेड तट्टां” इंचि ओर जवाब हीतुर.

20 आनि “अल्हेने, एडुं हारिनतोनि नालुं वेय्कुना मंदि तित्तस्के, बच्चुं तट्टाना हारि तुकडां जमा कीतिर?” इंचि येसु पूसकीतोर. अस्के, “एडुं तट्टां” इंचि ओर वेहतुर.

21 “अयते मीकु इंकागुडा तेळियसेक हिल्लेना?” इंचि येसु इत्तोर.

येसु बेतसेदा नाटेना गुड्डिड मनकन बेस कीतोर

22 ओर बेतसेदा इनना नाटे एव्ता पजा इच्चुर लोकुल्क वरोर गुड्डिडन येसुनगा पीसि वासि, “निमे ईन इट्टा,” इंचि विनंति कीतुर.

23 येसु आ गुड्डिडना कय पीसि नाटेना पलाते ओतोर. ओसि गुड्डिडना कळ्कुने उस्कतोर. पजा ओनपोर्रो कय ईर्सि, “इंदके नीकु बतलन्ना दिस्सेक मंतना?” इंचि पूसकीतोर.

24 अस्के आ गुड्डिड मनकल पोर्रो हळसि, “मनकालोर दिस्सेक मंतुर गानि ओर मराकु ताकताप मागुर-मागुर दिस्सेक मंतुर,” इंचि इत्तोर.

25 अस्के येसु मरा उंदि मल्का ओना कय्क, आ गुड्डिडना कळ्कुना पोर्रो इरतोर. ओर उंदेतीर हळता पजा नदर वाता. ओन्क अन्नि साप-साप दिसालय दल्गतां.

26 अस्के, “निमे नाटे होळियाकोटा, सवरगा नीवा लोन होन,” इंचि येसु ओन लोहचीतोर.

येसुन “किरिस्तु” इंचि पत्रु ओपुंकुतोर

(मत्तयाल 16:13-20; लूकाल 9:18-21)

27 येसु, ओना सिस्स्युल्क कैसरिया पिलिपि सहरता पकापीसि मत्ता नाह्कुने होत्तुर. होननेके, “नना बोन आंदुन इंचि लोकुल्क इंतुर?” इंचि येसु सिस्स्युल्कुन पूसकीतोर.

28 अस्के सिस्युल्क इल्हा वेहतुर. “इच्चुर इंतुर निमे बापतिस्मा हियना योहानुन आंदिन, इंका इच्चुर इंतुर निमे एलियाल आंदिन, इंका बोरो इंतुर निमे पेनदा कबुरतोरा लोप्पोटाल बोनो वरोन आंदिन,” इत्तुर.

29 “अय्ते, नना बोन आंदुन इंचि मिमेट इंचेके मंतिट?” इंचि येसु ओर्कुन पूसकीतस्के, “निमे किरिस्तुन आंदिन,” इंचि पत्रु इत्तोर.

30 अस्के, “नावा बारेमते बोर्के वेहमट,” इंचि येसु ओर्क गट्टिगा वेहतोर.

येसु ओना हामुरता बारेमते वेहंतोर

(मत्तयाल 16:21-28; लूकाल 9:22-27)

31 पजा ओना सिस्युल्कुंक इल्हा कराहलय दल्गतोर. “यहृदि पेद्दाल्क, पेद्दा पेर्माँलोर आनि दर्मसास्त्रम कराहना गुस्कुनाहेँदाल मनकना रूपमते पुटतोन नाकु तिप्पल्क अर्रापींता. ओर ह्यसाकॉटा आसि नाकुन हक्कानुर. गानि नना हासि मूड रोजकुंक मर्रा जीवाते तेदंतन,” इत्तोर.

32-33 येसु इद पोल्लेतुन कुल्ला-कुल्ला वेहतोर. अय्ते पत्रु येसुन अलग ओसि रांगतोर. गानि येसु सिस्युल्कुनहेके तिरियसि ह्ळसि पत्रुन, “अरे देय्यम, नावा मुन्नेटाल पेय्शि होन. निमे मनकालोरा तेल्विते वळ्कसंतिन, पेनदा विचारमते वळ्कसेक हिल्लिन,” इंचि ओन रांगतोर.

34 पजा येसु ओना सिस्युल्कुन आनि लोकुल्कुन ओनहेके केय्शि इल्हा वेहालय दल्गतोर, “ओक्कला बोरन्ना मनकल नावा पज्जो वायना इत्ते, ओर ओना पूरा इस्टाल्क होळसिसि सतता कूस तेहकुंचि नावा पज्जो वायिर.

35 बारित्ते, बोर अय्ते ओना जीवातुन पिसागोटालय ह्ळंतोर, ओर ओना जीवातुन पोगोटकुंतोर. गानि बोर अय्ते नाहाटीं आनि बेसता कबुरताहाटीं जीवा हींतोर, ओर ओना जीवातुन कापाळकुंतोर.

36 ओक्कला मनकल पूरा दुनियातुन संपलिच्चि, ओना जीवातुन पोगोटकुत्ते ओन्क बता पायदा आंता?

37 हिलाकॉटे मनकल ओना जीवाहाटीं बदला बतल हियानुर?

38 बोगमतनमते, पापमते निडिस मत्ता इद पीळितोर नड्डुम बोर अय्ते नाकुन, नावा पोल्लेन वेहालय सिग्गु अरंतोर, मनकना रूपमते पुटतोन नना बस्के अय्ते पवित्र दूतनतोनि, नावा बाबाना महिमाते वाकन, अस्के असॉटा मनकन नावोर इनालय ननागुडा सिग्गु अरंतन,” इंचि वेहतोर.

9

1 मर्रा येसु ओर्कुन इल्हा इत्तोर. “नना मीकु निजम वेहांतन, इग्गे नित्तिसि मनानोरा लोप्पोटाल इच्चुर इल्हा मंतुर गदा, पेनदा राज्येमतुन दाना ताकततोनि वातद ह्ळवा, ओर्कु हामुर वायो,” इत्तोर.

येसुना रूपम मारियमळ

(मत्तयाल 17:1-13; लूकाल 9:28-36)

2 हांरु रोजकु आतारित्ते येसु पत्रुन, याकोबुन आनि योहानुन पीकुंचि उंदि एत्तु गुट्टापोर्रो होत्तोर. अगा ओरा मुन्ने ओना रूपम मारियत्ता.

3 ओना कपडिं इच्चोर तेल्लगा मेर्सेक मत्तां गदा, बूमि पोर्रोटोर बोरे साकलल अच्चोर तेल्लगा आयनाल हुक्का पर्रीर.

4 अस्के मूसाल आनि एलियाल* येसुनतोनि वळ्कानद ओर ह्ळतुर.

5-6 ह्ळसि ओर इरगा वेरियतुर. अदुनहाटीं पत्रु येसुनतोनि बतल वळ्कना अद तेळियका, “गुस! मनम इग्गे मनमळ बेस मंता. उंदि नीहाटी, उंदि एलियानाहाटी, उंदि मूसानाहाटीं मोमोट मूड गूळसें वाटंतोम,” इंचि इत्तोर.

7 अस्केने उंदि मब्बु तेर्पे वासि ओर्कुन मुत्ता. आ मब्बुनाल, “ईर नावा पावरमगल्ला मर्री आंदुर, ईना पोल्लें केंजट,” इंचि ओर्क अल्किर केंजावाता.

* 9:4 मूसाल आनि एलियाल मूसाल आनि एलियाल पेनदा कबुरतोर आंदुर.

8 अस्के अचानक ओर नालुं-मूलां हळतुर गानि येसुंक तप्पा अगा बोरे दिसा हिल्लुर.

9 ओर गुट्टा पोरोटाल हिळु रेथ्मेके, “मनकना रूपमते पुटतोन नना हामुरताल मरा तेदनदाका, गुट्टापोरो मिमेट बतल अथे हळतिरो अद बोर्के वेहमत,” इंचि येसु ओर्क गट्टिगा वेहतोर.

10 ओर अद पोल्लेतुन ओरा मनसुनेन इरतुर गानि “हातारा लोप्पोटाल मरा जीवाते तेदमळ, इत्ते बतल?” इंचि ओर वरोक-वरोर वळककुनालय दलगतुर.

11 पजा ओर येसुन, “किरिस्तुंकन्ना मुन्ने, एलियाले वायमळ गावाले इंचि दर्मसास्त्रम कराहना गुस्लक बारि इंतुर?” इंचि पूसकीतुर.

12 अस्के येसु ओर्क इल्हा वेहतोर. “एलियाल तप्पाकोटा मोदाला वांतोर. वासि मोदाला बल्हा मत्ता अल्हे अन्निन कीतोर. गानि मनकना रूपमते पुटतोन नाकु वेल्ले तकलिप बोगांचा पीता, नाकुन हय्सुर इंचि दर्मसास्त्रमते बारि रासि मंता?

13 गानि नना मीकु वेहानद बतल इत्ते, एलियाल वासे मंतोर. ओना बारेमते दर्मसास्त्रमते बल्हा रासि मंता, अल्हेने लोकुलक ओरा मनसुंक वाताप ओनतोनि कीतुर,” इंचि येसु ओर्क वेहतोर.

देय्यम पीता पेडन येसु बेस कीतोर

(मत्तयाल 17:14-20; लूकाल 9:37-43)

14 पजा येसु आनि सिस्युलक, हिळु मत्ता सिस्युलकुनगा वासि हळतस्के, ओरा सुट्टु वेल्लेन लोकुलक जमा आसि मत्तुर. आनि दर्मसास्त्रम कराहना गुस्लक ओरतोनि लोल्लि कीसेके मत्तुर.

15 अगा मत्ता लोकुलक येसुन हळसि इचंन्रमते अरतुर, पजा अंटोरगुडा बिराना विच्चि होंचि ओन्क जोहार कीतुर.

16 अस्के येसु, “मिमेट ईरतोनि बारि वदुरकुंचेक मंतिट?” इंचि दर्मसास्त्रम कराहना गुस्लकुन पूसकीतोर.

17 अस्के आ मंदिताल बोरो वरोर येसुन, “गुरु, ना मर्रिक मूका-देय्यम पीता, ओन निहगा पीसि तत्तन.

18 देय्यम ओन बस्के अथे पीता, अस्के ओन अग्गेन हिळु हुकंकता. ओना तोळदाल पोंगुर पेयसंता. ओर करां-करां पल्कु कोर्कसेके अल्हेने गट्टिगा आंतोर. इद देय्यमतुन ओना लोप्पोटाल गेदमट इंचि नीवा सिस्युलकुंक वेहतन गानि ओरतोनि आया पराहिल्ले,” इंचि वेहतोर.

19 अस्के येसु ओर्कुन, “अरे विस्वासम तक्को पीळितोरिता! नना बदवेरदाका मीतोनि मनकन? बदवेरदाका नना मीकुन सहन कीकन? ओन नाहेके पीसि वट,” इंचि इतोर.

20 ओर आ पेडन येसुनगा पीसि वातुर. देय्यम येसुन हळता-हळ्ळे, पेडन तेल्हाचि हिळु अरहता. आ पेडल तोळदाल पोंगुर पेचाहसेके पोर्लालय दलगतोर.

21-22 अस्के, “नी मर्रिक इल्हा बस्केटाल आसेक मंता?” इंचि येसु पेडाना बाबोन पूसकीतोर. अथे ओर, “सिन्स्केटाले इल्हा आसेक मंता. बच्चुंगो मल्कां तळमिंते अरहचि, एते अरहचि हळ्कालय हळता गानि निमे मापोरो दया वासि, माहाटीं बतलन्ना सहायम कियापर्ते कीम,” इंचि इतोर.

23 येसु ओन, “कियापर्ते कीम, इत्ते बतल इत्ताप? पेनदापोरो विस्वासम कियानोर्क अन्नि आया परांता,” इंचि इतोर.

24 अस्केने पेडाना बाबल कांडेर तेंडसेके, “नना विस्वासम कीतन सामि, नावा विस्वासम गट्टिगा आयालय सहायम कीम” इंचि इतोर.

25 वेल्लेटुर लोकुलक विच्चि वासि गर्दि कियानद हळसि येसु आ देय्यमतुन, “सेव्ति-मूका देय्यमतुना, नना नीकु हुकुम हीतन, ईनगटाल पलाते पेयसा, ईन मरा बस्केने पिय्या,” इंचि गदारिचतोर.

26 अस्के आ देय्यम ओन जोरसे तेल्हाचि, वरगोय्सि आ पेडाना लोप्पोटाल पेय्सि होत्ता. अस्के पेडल हातोनलेसीं आतोर. वेल्लेटुर लोकुलक ओन हातोर इत्तुर.

27 गानि येसु ओना कय पीसि तेहातस्के ओर तेदसि निल्तोर.

28 पजा येसु लोन होतस्के बोरे हिल्वद हूळसि सिस्स्युल्क येसुनगा वासि, “आ देय्यमतुन मोमोट बारि गेदमा परा हिल्लोम,” इंचि पूसकीतुर.

29 येसु ओर्कुन, “इसॉटा देय्यमतुन सिराप पारतनातोने गेदमा परांतोम,” इंचि इत्तोर.

येसु ओना हामुरता बारेमते वेहंतोर

(मत्तयाल 17:22-23; लूकाल 9:43-45)

30-31 पजा ओर अगटाल पेय्सि गालिलि राज्येमताल होंचेक मत्तुर. ओर होनानद बोर्कन्ना तेळियमळ येसुंक इस्टम मनाहिल्ले. बारित्ते येसु ओना सिस्स्युल्कुक, “मनकना रूपमते पुटतोन नाकुन, वरोर दोकाते पीसि, लोकुल्कुना कय्दे हीतोर. ओर नाकुन हक्कानुर गानि, मूड रोजकु आतंका नना मरा जीवाते तेदंतन,” इंचि कराहचेके मत्तोर.

32 गानि येसु वेहता पोल्ले ओर्क तेळिया हिल्ले. आनि ओन पूस कियालयगुडा ओर वेरियतुर.

अंटोर्कन्ना पेद्दा बोर इंचि येसु वेहमळ

(मत्तयाल 18:1-5; लूकाल 9:46-48)

33 ओर कपर्नाहमते एवसि उंदि लोते मत्तस्के, “हर्रि पीसि वायानेके मिमेट बतल वळकसेक वातिट?” इंचि येसु सिस्स्युल्कुन पूसकीतोर.

34 गानि “अंटोर्कन्ना पेद्दा बोर?” इंचि ओर वरोंक वरोर वळकसेक वातुर. अदुनहाटीं ओर चुपचाप मत्तुर.

35 अस्के येसु उदिदिसि ओना पन्नेंड सिस्स्युल्कुन केय्सि ओर्कुन इल्हा इत्तोर. “बोर अय्ते पेद्दा आंतन इनकुंतोरो, ओर अंटोर्कन्ना सिन्नोड आसि अंटोरा सेवा कियानोर आयापीता,” इंचि ओर्क वेहतोर.

36 वेह्चि, वरोर सिन्ना पेडन ओरा नड्डुम निलाहतोर. पजा ओन दग्गेरा पीकुंचि ओर्कुन इल्हा इत्तोर.

37 “बोर अय्ते ई सिन्ना पेडनलेसीं आसि मनानोन नावा पोरोलते ओप्कुंतुरो, ओर नाकुनगुडा ओप्कुंतुर. बोर अय्ते नाकुन ओप्कुंतुर ओर सिराप नाकुने आयो गानि नाकुन लोहतोनगुडा ओप्कुंतुर,” इंचि वेहतोर.

मनाकु विरोदमते हिल्वोर मनोरें आंदुर

(लूकाल 9:49-50)

38 अस्के योहान येसुन, “गुरु! वरोर मनकल नीवा पोरोलते देय्याल्कुन पेचाहनेके मोमोट हूळतोम, मालेसीं ओर नी पज्जो ताकानोर आयोर. अदुनहाटीं अल्हा कियमा इंचि मोमोट ओन आपतोम,” इत्तोर.

39 अस्के येसु ओन इल्हा इत्तोर. “बोर अय्ते ना पोरोलते अद्बूतामाता कबाहक कीतोरो, ओर नावा विरोदमते बिराना कराब वळका परोरें, अदुनहाटीं ओन आपमट.

40 बारित्ते बोर अय्ते मनाकु विरोदमते हिल्लोर, ओर मना बाजुनोरें.

41 नना मीक निजम वेहांतन, मिमेट किरिस्तुना सिस्स्युल्क इंचि मीक बोरन्ना गिलासमेड एर उनालय हियानय्ते, ओन्क तप्पाकोंटा इनाम दोर्कता.

42 नापोरें विस्वासम कियना ई सिन्ना पेडानसंटोन बोरन्ना पापमते अरहते, ओना बोंळगेक जोत्ता बंडा दोहचि समुद्रमते दोब्बुतेने बेस मनंता.

43-44 ओक्कला नीवा कय नीकुन पापम किया वेहते, दान नर्किसि पोहा. बारित्ते रोंडु कय्क मंचि बस्केने पिर्ककोंटा बगाबगा पोत्तना तडमि मनना नरकमते होननदानकन्ना, तोंटि कय आसि पिस्वरते होनमळे नीहाटीं बेस.†

45-46 अल्हेने, ओक्कला नीवा काल नीकुन पापम किया वेहते, दान नर्किसि पोहा. बारित्ते रोंडु काल्क मंचि नरकमते होननदानकन्ना, कूटाल आसि पिस्वरते होनमळे नीहाटीं बेस मनंता.‡

† 9:43-44 इद वचनम कोन्नि पांडु लिपिने हिल्ले.

‡ 9:45-46 इद वचनम कोन्नि पांडु लिपिने हिल्ले.

47-48 अल्हेने, ओक्कला नीवा कळू नीकुन पापम किया वेहते, दान तेंडसि पोहा. बारित्ते रोंडु कळ्ळु मांचि नरकमते होननदानकन्ना, उंदि कळ्ळे पेनदा राज्येमते होनमळे नीहाटीं बेस मनंता.

49 बारित्ते हरेक मनकन तळमितोनि होव्वोरलेसीं कियमळ जर्गता.

50 होव्वोर बेसे मनंता गानि होव्वोर, होव्वोरलेसीं रुसि वायाकॉटे अव्टे मर्रा बल्हा होव्वोर रुसि तरा परांतोम? अल्हेने मिमेटगुडा होव्वोर रुसिते बेस वरोंक-वरोर कलियसि-मेलियसि सातिते मंदना, ” इंचि येसु वेहतोर.

10

सोडसिट्टिता बारेमते परिसिल्क पूसकीतुर

1 पजा येसु अगटाल पेय्सि योर्दन बरेड डाट्सि यहुदिया एरियाते होत्तोर. अगागुडा लोकुल्क मंदांनां मंदां ओनगा जमा आयालय दल्गतुर. अस्के येसु ओना अलवट परकारम ओर्क कराहलय दल्गतोर.

2 अगा इच्चुर परिसिल्कगुडा वातुर. वासि येसुना पट्टु हळानाहाटीं ओन इल्हा पूसकीतुर. “नियम परकारम, वरोर मनकल ओना मुत्तोन होळसिय्या वच्चा?” इत्तुर.

3 अस्के येसु ओर्कुन, “मूसाल मीक बद आदेस हीतोर?” इंचि पूसकीतोर.

4 अय्ते, “वरोर मनकल सोडसिट्टि हीसि, मुत्तोन होळसियना इंचि मूसाना आदेस मंता,” इंचि ओर येसुन इत्तुर.

5 अस्के येसु ओर्कुन इल्हा इत्तोर. “मीवा मनसु बंडालेसीं मत्ताहाटीं मूसाल ई आदेसतुन मीकु रासतोर.

6 गानि बस्के अय्ते पेन ई दुनियातुन कीतानो, अस्केन ओर्कुन मांडसा मुरतळ इल्हा इंचि कीता.

7 अदुनहाटींगे मांडसा ओना यावन-बाबन होळसिसि, ओना मुत्तोनतोनि कलियसि मनंतोर.

8 ओर इव्वुर उंदे मेंदुल आसि मनांतुर. ओर वें-वें आयुर गानि उंदे मेंदुल आंतुर.

9 इल्हा पेने ओर्कुन कल्पताहाटीं मनकल वें कियानायो,” इंचि वेहतोर.

10 पजा, येसु लोन मत्तस्के इदुना बारेमते सिस्स्युल्कु मर्रा उंदि मल्का ओन पूसकीतुर.

11 अस्के येसु ओर्कु इल्हा वेहतोर, “बोरन्ना ओना मुत्तोन बोगमतनम कारनम तप्पा वें कारनमते होळसिसि इंकुदानतोनि मरमिं आयानय्ते, ओर मोदाटा मुत्तोनो विरोदमते बोगमतनम कीताप आंतोर.

12 अल्हेने ओक्कला मुत्तो दाना मुय्दोन होळसिसि इंकावरोनतोनि मरमिं आयानय्ते, अद बोगमतनम कीतद आंता.”

येसु सिन्ना पिलाल्कुंक आसिर्वाद हीतोर

13 उंदि रोज लोकुल्क ओरा पिलाल्कुनपोर्रीं येसु कय इर्सि आसिर्वाद हियना इंचि ओनगा पीसि वातुर, गानि सिस्स्युल्क ओर्कुन रांगतुर.

14 गानि येसु ओर रांगानद हळसि ओर्कुन इल्हा इत्तोर. “पिलाल्कुन नाहेके वायाहीम्ट, ओर्कुन आपमट. पेनदा राज्येम इंसंतोरदे आंद,

15 नना मीक निजम वेहंतन, बोरे आयिर पेनदा राज्येमतुन सिन्ना पिलाल्कुनालेसीं आसि स्विकार किय्युर, ओर पेनदा राज्येमते बस्केने होळिया पर्र,” इंचि वेहतोर.

16 पजा आ पिलाल्कुन एल्कुचि, ओरा तल्लापोर्रीं कय इर्सि आसिर्वाद हीतोर.

सिरमंत मनकल पेनदा राज्येमते होनमळ वेल्ले कस्टम

17 येसु अगटाल पेय्सि हरिं पीसि होननेके, वरोर मनकल विच्चि वासि काल्कुनपोर्रीं अर्सि, “गुरु, निमे बेसतोन आंदिन. बस्केळ्ळक पिस्सना पिस्वरता वारसदार आयानाहाटीं नना बतल कीते बेस?” इंचि पूसकीतोर.

18 अस्के येसु ओन इल्हा इत्तोर, “नाकुन बारि बेसतोर इतिन? बोरे बेसतोर आयोर, सिराप पेन उंदे बेसतद आंद.

19 नीकु पेनदा आदेसकु अयते एरपाटे मंतां: बोने हळुकुमा, बोगमतनम कियमा, दोंगातनम कियमा, आबदूदम गवाइ हियमा, इंकावरोन पसांचमा, नीवा तल्लुर-बाबोना कदर कीम,” इत्तोर.

20 अस्के, “गुफ़, नना अयते इवन्नि सिन्नास्केटाल कीसेकेन वातन,” इंचि ओर येसुन इत्तोर.

21 येसु ओनहेके हळतोर. पावरम अनपिच्चि, ओन इल्हा इत्तोर. “निहगा उंदि पोल्ले तक्को मंता. होन, निहगा बतल अयते मंता अदुन पूरा अम्मिसि, गरिबोर्कुंक तूसि हीम. अस्के नीकु स्वर्गमते दनम दोर्कार, पजा नहगा वासि ना पज्जो ताका,” इत्तोर.

22 ओनगा सोम्मु वेल्लेन मत्ताहाटी, येसुना पोल्ले केंजसि ओना मोकम सिम्मरा आता. पजा दुक्कमते अगटाल पेय्सि होत्तोर.

23 अस्के येसु नालुं-मूलां हळसि सिस्स्युल्कुन इल्हा इत्तोर. “सिरमंतुल्क पेनदा राज्येमते होळियमळ इत्ते वेल्लेन कस्टम!” इत्तोर.

24-25 ओना पोल्ले केंजसि सिस्स्युल्क इंचंन्रम आतुर. गानि येसु मरुंदि मल्का सिस्स्युल्कुन इल्हा इत्तोर, “पिलाल्कुनिटा! वरोर सिरमंत मनकल पेनदा राज्येमते होळियमळकन्ना लोटापेटा सूदि बोंगाताल होनमळ अल्कगा मनंता,” इत्तोर.

26 इद केंजसि सिस्स्युल्कुंक वेल्लेन इंचंन्रम आता. अस्के ओर-ओरे, “अल्हा अयते मुक्ति बोर्क दोर्का परंता?” इंचि वळकालय दल्गतुर.

27 अस्के येसु ओराहेके हळसि, “मनकालोरतोनि अयते इद आयापररी गानि पेनतोनि आंता. बारित्ते पेन अन्नि किया परंता,” इंचि इत्तोर.

28 अस्के पत्र, “हळा, मोमोट अयते मत्तद-हिलवद अन्नि होळसिसि नीवा पज्जो वातोम,” इंचि येसुन इत्तोर.

29-30 येसु ओन, “नना निजम वेहांतन. बोरे आयिर नावाहाटी, बेसता कबुरताहाटी ओना लोन दारातुन, तम्मूहक-दादालोर्कुन, अक्कल-हेलाहकुन, तल्लुर-बाबोन, पिलाल्कुन, बूमि-जेगातुन होळसीतोर. ओन्क इंदकेने नू अंताल्क एक्को लोन दारा, तम्मूहक-दादालोर्क, अक्कल-हेलाहक, तल्लुहक, पिलाल्क, बूमि-जेगा दोर्कार. ओन्क कस्टाल्क वायानुं गानि वायाना कालमते ओन्क बस्केळ्क पिस्सना पिस्वर दोर्कका मनो.

31 गानि मुन्ने मत्तोर वेल्लेटुर पज्जो आयानुर, पज्जोटोर मुन्ने आयानुर,” इंचि वेहतोर.

येसु ओना हामुरता बारेमते मर्रा उंदि मल्का वेहंतोर

32-34 येसु आनि ओनतोनि मत्तोर येस्सलेमतेके होंचेके मत्तुर. येसु अंटोर्कन्ना मुन्ने मत्तोर. ओना सिस्स्युल्क इंचंन्रमते मत्तुर, ओना पज्जो ताकानुर वेंरिंते मत्तुर. अस्के येसु ओना पन्नेड सिस्स्युल्कुन बाजुंक ओसि, “हळुआट, मनम येस्सलेम होंचंतोम, अगा होत्ता पजा मनकना रूपमते पुटतोन नाकुन पेदूदा पेर्मालोर्कुना आनि दर्मसास्त्रम कराहना गुस्कुना कयदे पीसि हियानुर. ओर नाकु हामुर सिक्साता आदेस हीसि, यह्दि आयवोरा कयदे अप्पजेपनुर. अस्के ओर नाकुन सिडांचनुर, नापोररी उस्कानुर, पोट्टेटेते तन्नानुर, हक्कानुर. गानि मूड रोजकुंक नना मर्रा जीवाते तेदंतन,” इंचि मुन्ने जर्गना बारेमते सिस्स्युल्कुंक मर्रा वेहतोर.

याकोब, योहान येसुन विनंति कीतुर

35 पजा जब्दिना मर्क याकोब आनि योहान येसुनगा वासि, “गुफ़, मोमोट बतल अयते तल्कंतोम अदुन माहाटी निमे कियमळ गावाले इंचि मा मनसु मंता,” इंचि इत्तुर.

36 येसु ओर्कुन इल्हा इत्तोर. “मीहाटी नना बतल कियाना इंचि मीवा मनसु मंता,” इंचि पूसकीतोर.

37 अस्के ओर, “निमे नीवा महिमाते राज्येम कियनेके नीवा तिना बाजुंक वरोन, डेमा बाजुंक वरोन उदूदाहीम,” इंचि येसुन इत्तुर.

38 गानि येसु ओर्कुन, “मिमेट बतल पूसकीसंतितो अद मीक तेळियसेक हिल्ले. नना बव कस्टाल्क अयते बोगांचना मंता, अवुन मिमेट बोगांचा परकिटा? हिलाकोंटे नना बव बापतिस्मा एतंतनो, अद मिमेट एता परकिटा?” इंचि पूसकीतोर.

39 अस्के “हो, मोमोट तयार मंतोम,” इंचि ओर इत्तुर. अस्के येसु ओर्कुन इल्हा इत्तोर, “नना कस्टाल्क बोगांचताप मिमेट बोगांचा परकिट आनि नना एताना बापतिस्मा मिमेटगुडा एता परकिट.

40 गानि नावा तिना बाजुंक आनि नावा डेमा बाजुंक उपिचचना अदिकार नाक हिल्ले. अव जेगां बोराहाटीं अयते तयार कीसि मंतांगो, ओरे अगा उद्दंतुर,” इत्तोर.

41 ओर इत्ता पोल्लें केंजसि, अगा मत्ता कळमता पदि मंदि सिस्युल्क, याकोब, योहानुना पोर्रीं होंग आतुर.

42 अस्के येसु सिस्युल्कुन ओना दगोरा केय्मि, “यहुदि आयवोरा राजालोर ओरा जीतागाह्कुन, ओरा कय्दा हिळ् इर्गालय हळंतुर, अल्हेने ई दुनियाता पेद्दा मनकालोरगुडा सिन्ना मनकालोरपोर्रीं अदिकारम ताकसालय हळंतुर, इद मीकु एर्के.

43 गानि मिमेट मात्रम ओरालेसीं कियानायो. मी लोप्पोटाल बोर अयते पेद्दा आयालय हळांतोरो, ओर मीवा सेवा कियानोर आयापीता.

44 अल्हेने मी लोप्पोटाल बोर अयते लीडर आंतन इंतोरो, ओर मीवा दासुड आयापीता.

45 बारित्ते मनकना रूपमते पुटतोन नना सेवा कियागोटकुनालय वाया हिल्लेन गानि वैरेतोरा सेवा कियालय आनि वेल्लेटोर्कुन पापमताल पेचाहलय ओराहाटीं नावा जीवा हियालय वातन,” इत्तोर.

गुड्डि बरतलमयना कळकुंक नदर वायमळ

46 पजा येसु, ओना सिस्युल्कु यरिहो सहरते एव्तर. अगटाल मर्ग पेय्सनेके लोकुल्कुना पेद्दा मंदा ओरतोनि पेय्सता. तिमाउसना मरिं बरतलमय इनानोर गुड्डि बिच्चागाड हर्दा पक्काते उद्दिदिसि मत्तोर.

47 नासरेत सहरता येसु इगोटाल होंचेके मंतोर इंचि ओन्क तेळियतस्के ओर, “येसु, दाविद राजाना वंसमतोना! नापोर्रीं दया कीम,” इंचि जोरसे वरगेयतोर.

48 अस्के वेल्लेटुर लोकुल्क ओन, “चुपचाप मन” इंचि रांगतुर, गानि, “दाविद राजाना वंसमतोना, नापोर्रीं दया कीम,” इंचि ओर जोरसे मोल्कुनालय दलगतोर.

49 अस्के येसु आगसि, “ओन केयट,” इंचि इत्तोर. अस्के ओर आ गुड्डिन केय्मि, “दैनेम इर्ग, येसु नीकुन केयसंतोर तेदा,” इंचि इत्तुर.

50 अस्के ओर मुचकुंचि मत्ता कप्पिडतुन तेंडसि पोहचि बिराना तेदसि येसुनगा वातोर.

51 अस्के येसु ओन, “नना नीहाटीं बतल कियना इंचि नी मनसु मंता?” इंचि पूसकीतोर. अस्के, “गुरु, नावा कळकुना नदर दिस्सानाल कीम,” इंचि येसुन इत्तोर.

52 अयते येसु, “निमे होन, नीवा विस्वासमे नीकुन बेस कीता,” इंचि इत्तोर. अल्हा इत्ता इनुडे ओना कळकुंक नदर वासि ओरगुडा येसुना पज्जो होत्तोर.

11

येसु येस्सलेम होनमळ

1 पजा ओर अंतोर येस्सलेम सहरता दगोरा जय्तुन मराकुना गुट्टापोररीं मनना बैतपागे आनि बेतानिया इनना नाहकुना दगोरा एव्तर. पजा येसु ओना इव्वुर सिस्युल्कुन केय्मि,

2 ओर्क इल्हा वेह्चि नाटे लोहतोर. “मी मुन्ने दिस्सना नाटे होंट. अद नाटे होळियता होळयुळे, बस्केने बोरे उद्दुवद उंदि गाडदि पोरी दोह्चि मत्तद मीकु दिसंता, दान लेहकुंचि पीसि वट्ट.

3 ओक्कला अदुन पीसि वायनेके, इल्हा बारि कीसंतितोर? इंचि बोर्नना पूसकीते, सामिक दीना अक्सरम मंता इंचि वेहट. अस्के ओर बिराना अदुन इग्गे लोहानुर,” इत्तोर.

4 येसु वेहताप ओर अद नाटे होत्तुर. अगा हर्दा पक्काते उंदि लोता तल्पुना दग्गेरा गाडदि पोरि दोहचि मत्तद ओर्क दिसता. अस्के अदुन लेहतुर.

5 अगा नित्तिसि मत्तुर इच्चुर लोकुल्लक हळसि, “मिमेट बतल कीसंतिर? गाडदि पोरिन बारि लेहसंतिर?” इंचि पूसकीतुर.

6 ओर येसु वेहतापे ओर्क वेहतस्के, आ लोकुल्लक ओर्कुन होना हीतुर.

7 ओर अद गाडदि पोरिन येसुनगा तच्चि, दानपोर्री ओरा कपडिं वाटतुर. अस्के येसु दानपोर्री उद्दतोर.

8 वेल्लेटुर लोकुल्लक ओर केर्ता कपडिं तेंडसि, येसु होनना हर्दे तारतुर. इंचिच्चुर लोकुल्लक अय्ते नेल्लिने मत्ता मराकुना कोम्मां नर्किसि हर्दे तारतुर.

9-10 येसुना पज्जो-मुन्ने ताकाना लोकुल्लक वरगेयसेके इल्हा इनुंदुर, “सामिना पोरोलते वायानोंक, पेनदा आसिर्वाद दोर्किकाटी, होसन्ना! होसन्ना!* दाविदनालेसी राज्येम कियालय वायानोंक, पेनदा आसिर्वाद दोर्किकाटी, स्वर्गमते मंदना पेनदुक दन्यवाद,” इंचि इत्तुर.

11 इल्हा येसु येस्सलेम सहरते होळियतोर. पजा गुळितगा होंचि, सुट्टु अन्नि वस्तुकुन तिरियसि हळतोर. पोळ्दु होत्ता इंचि ओना पन्नेंड सिस्युल्लुकुन पीसि बेतानिया नाटे होत्तोर.

पंडि हिल्लुवा अंजिर मरा

12 इंकुंदि रोजु येसु बेतानिया नाटेनाल वायनेके ओन्क कर्वेस्ता.

13 हरदाल इच्चुर लक्कु उंदि पच्चटा अंजिर मरातुन हळसि, दानकु पंडिं मंतां बारे इंचि आ मरातगा होत्तोर. गानि आ मराकु आर्कि तप्पा बतागे मनाहिल्लें. बारित्ते अद पंडिं हादाना वेला आयो.

14 अस्के येसु अद मरातुन, “इंदकेटाल नीवा पंडिं बस्केने बोरे तिन्नु,” इंचि इत्तोर. अद पोल्लेतुन ओना सिस्युल्लुकु केंजतुर.

गुळितगा अम्मनोर्कुन येसु गेदमंतोर

15 ओर येस्सलेम एत्ता पजा येसु गुळिते होत्तोर. अगा गुळिते बोरे अय्ते अम्ममुमळ-अस्सुड कीसेक मत्तुर, ओर्कुन पलाते गेदुमतोर. अल्हेने कोत्तां अदला-बदला कियानोरा बल्लन आनि मोक्कु हियालय पावरेम पिट्टें अम्मनोर्कुना कुर्सिन मिळहाचि वाटतोर.

16 अल्हा कीसि गुळिताल बोने बदे वस्तु पीसि होनुळ-वायुळ किया हिया हिल्लोर.

17 पजा ओर्क इल्हा वेहालय दल्गतोर. “नावा लोतुन दुनियाता अंटोर लोकुल्लक पारतना कियाना जेगा इनानुर, इंचि दर्मसास्त्रमते रासि हिल्लेना? गानि मिमेट दीन दोगाल्क मक्कना जेगा कीतिर,” इत्तोर.

18 इल्हा अंटोर लोकुल्लक येसु वेहाना पोल्लें केंजसि इचंन्रम आयुंदुर. अदुनहाटीं पेर्मांलोर, दर्मसास्त्रम कराहना गुस्लक येसुन हक्कालय हळुंदुर. गानि ओन अल्हा बतलन्ना कियालय ओर वेरियुंदुर.

19 पजा येसु, ओना सिस्युल्लुकु पोळ्दु होत्तारिते येस्सलेमताल पेय्सि होत्तुर.

वतसि होत्ता अंजिर मरा

20 इंकुंदि रोजु हक्केरेने मर्रा येस्सलेमतेके वायानेंके ओर अद अंजिर मरातुन हळतुर, अस्के अद मरा हिहकुनाल अय्ते कोस्सादाका पूरा वतसि होंचि मत्ता.

21 येसु अद मरातुन इत्ता पोल्ले पन्नुंक मति वाता. अस्के ओर येसुन, “अद हळा गुरु!† निमे सापनेम हीता अंजिर मरा वतसि होत्ता,” इंचि इत्तोर.

* 11:9-10 होसन्ना इत्ते-पेनदुन तल्सकुनमळ. † 11:21 गुरु गुरु, रब्बी उंदे पोल्ले आंदुर.

22-23 अस्के येसु ओर्कु इल्हा जवाब हीतोर. “मिमेट पेनदापोर्रो विस्वासम इर्राट. नना मीकु निजम वेहांतन, बोरन्ना इद गुट्टातुन, ‘इग्गेटाल तेदसि समुद्रमते होंचि अर्रा’ इंचि बतले अनमानम हिलाकोटा विस्वासमते इनानयते, अद होंचि अर्रा.

24 अदुनहाटी नना मीकु वेहांतन, मिमेट विस्वासमतोनि पारतनाते बतल तल्किना, अद मीकु दोर्कता इंचि विस्वासम कीम्टु, अस्के अद मीवादे आंता.

25 अल्हेने मीवा मनसुनेगिटा बोना पोरोरनना पगा मत्ते, मिमेट पारतना कियालय निततस्के मुने ओन मापि कीम्टु. अस्के स्वर्गमते मंदना पेनबाबालगुडा मीवा तप्पुकुन मापि कीतोर.

26 मिमेटगिटा इंकावरोना तप्पुकुन मापि कियाकोटे, स्वर्गमते मंदना पेनबाबालगुडा मीवा तप्पुकुन मापि कियोर,” इंचि वेहतोर.‡

येसुना अदिकारमता बारेमते पूसकियमळ

27 ओर येस्सलेम सहरते मर्रा वातस्के, येसु गुळिते तिरियसेक मत्तोर. अस्के पेर्माँलोर, दर्मसास्त्रम कराहना गुस्लक आनि यहुदि पेद्रू दाल्क येसुनगा वातुर. वासि,

28 “निमे ई कबाहक बद अदिकारमते कीसंतिन? नीकु ई कबाहक कियालय अदिकारम बोर हीतोर?” इंचि पूसकीतुर.

29 अस्के येसु ओर्कुन इत्तोर. “ननागुडा मीकुन उंदि सवाल पूसकीतन. मिमेट जवाब हियानयते, नना बद अदिकारमते इव कबाहक कीसंतन इत्तद वेहंतन.

30 अयते जवाब हीम्टु, योहानुंक बापतिस्मा हियाना अदिकारम बगाटाल दोर्कता? स्वर्गमताला हिलाकोटे मनकालोराहेंदाल दोर्कतना?” इत्तोर.

31-32 अस्के, ओर-ओरे इल्हा वळ्ळकुकुनालय दल्गतुर, “ओक्कला स्वर्गमताल दोर्कता इंचि मनम इनानयते, ‘मिमेट योहानुन बारि नम्मिर’ इंचि इनानुर. ओक्कला मनम मनकालोराहेंदाल दोर्कता इनानयते, लोकुल्कुना वेंरे! बारित्ते योहान निजमे पेनदा कबुरतोर इंचि ओर नम्मंतुर,” इत्तुर.

33 अदुनहाटी ओर, “माक एर्का हिल्ले,” इंचि इत्तुर. अस्के, “अल्हा अयते, इव कबाहक बद अदिकारमते कीसंतनो ननागुडा मीकु वेहोन,” इंचि येसु इत्तोर.

12

1 अस्के येसु ओर्कु उंदि वेसुडि वेहमळ सुस्व कीतोर, “वरोर मनकल अंगुर तोटा कीतोर. आ तोटा सुट्टु ग्रे दोहाचि तोटाता लोपेन अंगुर पंडिना पानकम तेंडालय उंदि पोक्का तक्सि, दाना दग्गेरेने कावेलहाटी उंदि मंडा वाटतोर. पजा तोटातुन वेरेतोरक बटाइक हीसि, वेंरे देसेम होत्तोर.

2 पजा बस्के अयते अंगुर पंडिं कोय्याना वेला वाता, अस्के ओरगटाल पंडिना तूस एतालय ओना वरोर दासुन बटाइतोरहेके लोहतोर.

3 गानि बटाइतोर आ दासुन पीसि पक्का तंचि, उत्ता कय्के वापस लोहतुर.

4 पजा मालक इंकावरोन दासुन बटाइतोरहेके लोहतोर. आ बटाइतोर ओना तल्ला पयाहचि ओन कदर हिलाकोटा कीसि लोहतुर.

5 मालक मर्रा इंकावरोन दासुन ओरहेके लोहतोर, ओर ओन हक्कतुर. अस्के मालक इल्हा इंका वेल्लेन दासुल्कुन लोहतोर. गानि बटाइतोर इच्चुर्कुन तंतुर, इच्चुर्कुन बारे हक्कतुर.

6 आकिरते मालकनगा ओना पावरमगल्ला मर्रि वरोरे मिगिल्सि मत्तोर. अस्के मालक, ‘नावा मर्रिन बेस कदर कियानुर’ इनकुंचि ओरहेके लोहतोर.

7 गानि बटाइतोर ओर वायानद ह्व्सि, ‘ईर अयते वारसदार आंदुर. दट ओन मनम हक्ककोम, अस्के ओना जायदाद मनाक आयार,’ इंचि वरोंक-वरोर इत्तुर.

8 पजा ओन दोर्कापीसि हक्किसि, तोटाता पलाते ओसि पोहचीतुर.

9 इंदके अंगुर तोटाता मालक वासि ओर्कुन बतल कियानुर? ओर वासि बटाइतोर्कुन हक्किसि अद तोटातुन वेरेतोरक अप्पजेपनुर,” इत्तोर.

‡ 11:26 इद वचनम कोन्नि पांडु लिपिने हिल्ले.

10-11 पजा येसु ओर्कुन इल्हा इत्तोर. “मिमेट दर्मसास्त्रमते बस्केन हदवा हिल्लिरा? “बद बंडातुन अय्ते मिस्त्रिल्लक, कबळक ओज्जो इंचि हयसा हिल्लुर, अदे बंडा, सेंकु मूलाता पुनादि बंडा आता.

इद सामि कीता कबळ आंद, इद मना नदरते इचंन्रमाता कबळ आंद,” इत्तोर.

12 पजा दर्मसास्त्रम कराहना गुस्लक आनि पेद्दा पेर्माँलोक, येसु वेहता वेसुडिं केंजसि, “ईर मनाकुने इंचंतोर,” इंचि एरपाट कीतुर. अदुनहाटी ओर येसुन दोर्का पियालय हळतुर. गानि लोकुल्लकुना वेंरेंक ओन पिय्याकेन होळसि होत्तुर.

कैसर राजांक कर दोहना बारेमते

13 पजा, येसुन ओना पोल्लेन लोप्पेन दोर्का पिय्याना इंचि इच्चुर परिसिल्लुकुन आनि इच्चुर हेरोद राजाना मनकालोर्कुन येसुनगा लोहतुर.

14 ओर येसुनगा वासि इल्हा इत्तुर. “गुग्, निमे निजम वळकानोन आदिन, बोर बतल इनिनागानि दाना पिकिरगुडा किथ्यिन, निमे लोकुल्लकुना मोकम हळसि वळ्ळिकन, इंका पेनदा हर्दा बारेमते सत्तेमते कराहंतिन इंचि माक एरपाटे मंता. इंदके माकु वेहा, नियम परकारम, कैसर* राजांक कर दोहमळ न्यायमेना, आयोना?” इत्तुर.

15 येसु ओरा मनसुना कराब पिलान एरपाट कीसि, ओर्कुन इल्हा इत्तोर. “मिमेट बारि नावा पट्टु हळांतिर? नाकु उंदि एंडि बंडि हुप्सट,” इत्तोर.

16 ओर उंदि एंडि बंडि हुपिस्तुर. अस्के येसु ओर्कुन इल्हा इत्तोर. “इद एंडि बंडिपोर्रो बोना पोटुवा आनि पोरोल मंता?” इत्तोर. “कैसर राजानद” इंचि ओर इत्तुर.

17 पजा येसु, “बद कैसर राजानद मंता, अद कैसर राजांक हीम्ट. बद अय्ते पेनदाद मंता, अद पेनदुक हीम्ट,” इंचि ओर्कुन इत्तोर. अस्के ओना पोल्ले केंजसि ओर वेल्लेने इचंन्रम आतुर.

सदुकिर येसुन पसांचालय हळंतुर

18 इच्चुर सदुकिर येसुनगा वातुर (हासि मर्रा जीवाते तेदमळतुन ईर नम्मुर.) वासि इल्हा सवाल पूसकीतुर.

19 “गुग्, मूसाना नियम परकारम, वरोर मनकल पिलाल्क आयाका मुन्नेन हासि होंचि ओना मुत्तो मत्ते, दानतोनि ओना तम्मुर मरमि आसि, हातोना वंसमताहाटी पिलाल्क कनना इंचि रासि मंता.

20 अय्ते, एडुर दादाल-तम्मुह्क मत्तुर. ओरा लोप्पोटाल पेद्दोड मरमि आतोर, गानि पिलाल्क आयाका मुन्नेन ओर हातोर.

21 हातस्के ओना पज्जोटोर दानतोनि मरमि आतोर, ओरगुडा पिलाल्क आयाका मुन्नेन हातोर. अल्हेने ओना पज्जोटोरगुडा दानतोनि मरमि आतोर, ओरगुडा पिलाल्क आयाका मुन्नेन हातोर.

22 इल्हा ओर एडुरगुडा दानतोनि मरमि आसि पिलाल्क आयाका मुन्नेन हातुर. आकिरते अद मुरतळगुडा हाता.

23 अय्ते हातोर अंतोर मर्रा जीवाते तेदतस्के, आ एडुर लोप्पोटाल अद बोना मुत्तो आयार? बारित्ते ओर एडुरगुडा दान मरमि आसि मत्तुर,” इत्तुर.

24 अस्के येसु ओर्कुन इल्हा इत्तोर. “मिमेट दर्मसास्त्रमतुन आनि पेनदा ताकततुन एरपाट कियाका दान मिमेट तप्पु अर्तम कीकुंचतिर.

25 बारित्ते ओर हामुरताल जीवाते तेदानुर अस्के, ओर मरमि आयुर, मरमि कीसिगुडा हिय्युर. गानि ओर स्वर्गमता पेनदा दूतनलेसी मनांतुर.

26 हातुर मर्रा जीवाते तेदाना बारेमते पेन, ‘नना अब्राहामुना पेनदुन, इसाकुना पेनदुन आनि याकोबुना पेनदुन’ इंचि दर्मसास्त्रमते पोत्तना पोदाता गटना जर्गनिके मूसांक वेहता, अदुन मिमेट हदवा हिल्लिरा?

* 12:14 कैसर इद राजाना पोरोल आयो. रोम सरकारते अन्वितकन्ना पेद्दा पदवि आंद.

27 अद हातोर पैन आयो गानि जीवाते मत्तोर पैन आंद. मिमेट वेल्ले तप्पु कीसेक मंतिट,” इंचि इत्तोर.

अन्निकन्ना पेद्दा आदेस

28 ओर वदुरकुंचेक मत्तद केंजसि, अचचोटेन वरोर दर्मसास्त्रम कराहना गुरु अगा वातोर. येसु ओर्क बेस जवाब हीतद हूळसि, “गुरु, पेन हीता आदेसकुनाल मेन आदेस बद आंद?” इंचि पूसकीतोर.

29 अस्के येसु ओन्क इल्हा जवाब हीतोर. “ए इम्प्राएल! इद केंजा, अन्नि आदेसकुनाल इद मेन आदेस आंद: मावा पेने सामि आंदुर.

30 निमे नीवा सामि आता पेनदुन पूरा मनसुनाल, पूरा आत्माताल, पूरा बुद्दिदताल, पूरा ताकतताल पावरम कीम.

31 रौंडो आदेस बद इत्ते, नीवद निमे बचचोन पावरम कीतिनो, अचोने पावरम इंकावरोनगुडा कीम. इव रौंडुन होळसि वैरे पेद्दा आदेस बददे हिल्ले,” इत्तोर.

32 अस्के दर्मसास्त्रम कराहना गुरु येसुन, “गुरु, निमे सत्तेम वळ्ळकतिन. पेन उंदे आंद, दान्क तपिच्चि इंकुंदि पेन हिल्ले.

33 अदुनहाटी कमुर्बलि कियानदानकन्ना, मोक्कुल्क हियनदानकन्ना पूरा मनसुनाल, पूरा आत्माताल, पूरा बुद्दिदताल, पूरा ताकतताल मनम पेनदुन पावरम कियमळे बेस आंद. अल्हेने मनद मनम पावरम कीतचोने इंकावरोनगुडा पावरम कियना.” इंचि इत्तोर.

34 अल्हा ओर तेल्विते वेहतद केंजसि येसु ओन, “निमे पेनदा राज्येमकु वेल्ले लक्कु हिल्लिन,” इंचि इत्तोर. दाना पजा येसुन बददे सवाल पूसकियालय बोर्कु हिम्मत आयाहिल्ले.

किरिस्तु बोना मरि आंदुर?

35 येसु गुळिते पेनदा पोल्लें कराहनेके ओर्कुन इल्हा इत्तोर. “किरिस्तु दाविदना मरि आंदुर, इंचि दर्मसास्त्रम कराहना गुरुल्क बल्हा इना परांतुर?” इत्तोर.

36 इद पोल्लेतुन कुद दाविद पवित्र आत्माते निडसि इल्हा इत्तोर, “बदवेरदाका अयते नीवा पगातोर्कुन, नीवा काल्कुनगा तरौन,

अदवेरदाका नावा तिना बाजुंक उद्दिदिसि मन,

इल्हा सामि, नावा सामिन इत्तोर.”

37 इल्हा दाविद ओन, सामि इंचि इत्तोर. अयते किरिस्तु दाविदना मरि बल्हा आया परांतोर? इत्तोर. अगा मत्ता लोकुल्क येसुना पोल्लें बचचोरो गम्मतते केंजतुर.

दर्मसास्त्रम कराहना गुरुल्कुनलेसी किय मनि

38 येसु ओर्क कराहसेके इल्हा इत्तोर. “दर्मसास्त्रम कराहना गुरुल्कुनाल उसारते मंदु. पोर्रीटाल हिळदाका पोळ्गु अंगि केर्सि तिरियमळ, हाटुमकुने जोहार वेहागोटकुनमळ ओर्क बेस अनपिचंचता.

39 इंका दर्मसास्त्रम कराहना लोहकुने, कुळ्पुकुने पेद्दाल्क उद्दाना जेगाते उदमळ इत्ते ओर्क वेल्ले इस्टम.

40 ईर मुंडामोस्ता मुर्ताहकुन मुळहंतुर, लोकुल्कुंक हुप्सालय वेल्लेनजेम पारतना कीतुर. गानि ईर्क मात्रम पेन अंतोर्कन्ना एक्को सिक्सा हियार,” इंचि इत्तोर.

मुंडामोस्ता मुरतळ रौंडु कोत्तां वाटमळ

41 येसु गुळिते दान पेटीता मुन्ने उद्दिदिसि, लोकुल्क दान पेटीते कोत्तां वाटनद हूळसेक मत्तोर. वेल्लेटुर सिरमंत लोकुल्क वेल्लेने कोत्तां वाटतुर.

42 पजा मुंडामोस्ता उंदि गरिब मुरतळ वासि रौंडु रागि कोत्तां वाटता. अवुना विलुवा वेल्ले तक्को मत्ता.

43-44 अस्के येसु ओना सिस्युल्कुन दग्गेरा केय्सि इल्हा इत्तोर. “नना मीक निजम वेहांतन, ई मुंडामोस्ता गरिब मुरतळे अंतोर्कन्ना एक्को दानम कीता. बारित्ते इग्गे सिरमंत लोकुल्क ओरा

दनमताल दानम कीतुर, गानि इद गरिब मुंडामोस्ता मुरतटगा रोंडे रागि कोत्तां मत्तां. अद अबुनगुडा इत्ते दाना पिस्वरताहाटीं इरतादानगुडा पेनदुक वाटसीता,” इत्तोर.

13

गुळि नासडेम आयाना बारेमते येसु वेहमळ

1 येसु गुळिताल पलाते पेय्सि वातस्के ओना सिस्युल्कुनाल वरोर सिस्युड येसुन, “गुरु, हळा! बच्चोर पेद्दा बंडां, बच्चोर बेसता बंगलां,” इंचि इत्तोर.

2 अस्के येसु ओन इल्हा इत्तोर. “बंडाने दोहतव पेद्दा-पेद्दा बंगलां हळसेक मंतिन गदा, अव बंडां उंदानपोर्रो उंदि मनाकोटा कूल्हाना वेला वायनद मंता,” इत्तोर.

3 येसु अगटाल पेय्सि गुळिकु मुन्ने मंदना जयतुन मराकुना गुट्टापोर्रो होंचि उदतोर. ओर ओटिगा मत्तद हळसि, पत्रु, याकोब, योहान आनि अंदरियल ओनगा होत्तुर.

4 होंचि, “इवान्नि गटनां बस्के जर्गनुं माक वेहा. इंका इव गटनां जर्गना मंता इन्नेके माकु बतल चिन्ह दिस्सार?” इत्तुर.

5 अस्के येसु ओर्कु इल्हा वेहालय दल्गतोर, “मीकुन बोर पसांचकोटा मिमेट उसारते मंटु.

6 नावा पोरोल एतसेके बचुद्रो लोकुल्क वांतुर. वासि, ‘ओन ननाने आंदुन’ इंचि वेल्लेटोर्कुन पसांचनुर.

7 मिमेट लडाईं आनि लडाईना पोल्लेना बारेमते केंजसि वेरियमट, अल्हा तप्पाकोटा आयानुंगे. गानि दुनियाता आकिर वेला अस्केने वायो.

8 देसेमपोर्रो देसेम, राज्यमपोर्रो राज्येम लडाईं आयनुं, वेरे-वेरे जेगाने बूंकपाल्क आयनुं, कर्वु अरार. गानि इल्हा आयमळ इत्ते एर पूरालय नोप्पि सुस्व आताप आंद.

9 गानि मिमेट उसारते मंटु. बारित्ते मीकुन पंचादितोरा कय्दे अप्पजेपनुर आनि दर्मसास्त्रम कराहना लोहकुने ओसि तनानुर. पजा नावा बारेमते गवाइ वेहालय मीकुन राज्यपाल आनि राजालोरा मुन्ने निलाहनुर.

10 गानि दीनकन्ना मुन्ने अन्नि देसेल्कुने तप्पाकोटा पेनदा बेसता कब्रु वेहमळ जर्गगोम.

11 अद वेलाते मीकुन पीसि ओसि पूसकियानुर. अस्के अगा बतल वळकना, बतल वळकानायो इंचि मोदाले रंदि कियमट. वळकानोर मिमेट आयो गानि पवित्र आत्मा आंद. अदुनहाटीं मीवा मनसुने बतल वळकागोम इंचि अनपिंचंतनो अदे वळकट.

12 इंका बल्हा जर्गता इत्ते, कासा तादल-तम्मुहक पगां आसि हळ्कालय अप्पजेपनुर. पिलाल्क ओरा तल्लुर-बाबोंक अड्डम तिरियसि ओर्कुन हळ्का वेहांतुर.

13 नावा पोरोलताहेंका अंटोर लोकुल्क मीकुन हय्सुर. गानि बोर अय्ते पेनदापोर्रोटा विस्वासमते आकिरदाका निल्सि मनंतोर, ओनके मुक्ति दोर्कार.

14 गानि बस्के अय्ते, बोरे हय्सवसोंटा नासडेम कियाना वस्तु, गुळि लोप्पो बगा अय्ते मंदनायो अगा नित्तिसि मत्तद मिमेट हळकिर, अस्के बोर अय्ते यहुदिया एरियाते मंतुरो, ओर गुट्टनहेके वित्तिर (हद्वानोर इदुन अर्तम कीकुटु)

15 बोर अय्ते लोतपोर्रो मंतोर, बवे वस्तुक पीसि वायालय लोप्पो होळियानायो.

16 बोर अय्ते नेलिने कबळ कीसेक मंतोर, कपडिं पीसि वायालय मल्सि लोन होनानायो.

17 अव रोजकुने पीट मत्ता मुर्ताहकुंक आनि सिन्ने मर्तल्लुहकुंक वेल्लेन तकलिप वांता.

18 अव तकलिपकु पीनि कालमते वायामन्नि इंचि पारतना कीम्टु.

19 बारित्ते पेन कीता ई दुनिया पुट्टस्केटाल अय्ते इदवेरादाका बस्केन वायवसोंटा तकलिप अव रोजकुने वायाना मंता आनि मुन्नेगुडा असोंटा तकलिप बस्केने वायो.

20 ओक्कला सामि अव रोजकुन तक्को कियकोटा मंचि मत्ते, बोरे पिसाकोन्नेर. गानि बोर्कुनय्ते पेन पेरता, ओराहाटीं अव रोजकुन तक्को कीता.

21-22 अव रोजकुने आबद्दम किरिस्तुल्क, पेनदा आबद्दम कबुरतोर वायानुर. आनि कुदुरते पेन पेर्कुत्ता लोकुल्कुन पसांचलय चिन्हां, इचंत्रमता कबाहक कीसि हुप्सानुर. अदुनहाटी ओक्कला बोरन्ना मीकुन, 'ह्वाट, किरिस्तु इगे मंतोर, अगा मंतोर' इनान्यते मिमेट ओर्कुन नम्मुमट.

23 गानि मिमेट उसारते मंटु; इव अन्नि पोल्लें नना मीक मुन्नेने वेहचीतन.

24 गानि अव रोजकुने तकलिपकु मारतस्के पोळ्दुंक हीकट मुच्चका वायार, वेळसि वेल्लु हियाकोटा आयार.

25 मब्बुनाल सुक्कां हिळु अरानुं, मब्बुने मनना अन्नि सक्तिन कदलिच्चमळ जर्गता.

26 अस्के मनकना रूपमते पुटतोन नना, पेद्दा बलम आनि महिमातोनि मब्बु तेर्पेनपोरी उद्दिदिसि वायानेके लोकुल्क ह्वाणुर.

27 अस्के नना नावा दूतन बूमिपोरी लोहांतन. आ दूतां बूमिपोरी नालुं मूलानाल, मब्बुना ई कोस्साताल अयते आ कोस्सादाका नना पेर्कुत्ता लोकुल्कुन जमा कीतां," इत्तोर.

येसुना मल्लिस वायाना बारेमते वेहमळ

28 "अंजिर मराताल उंदि पोल्ले करियट. अंजिर मराता कोम्मांक इग्गुर बस्के अयते वांता, अस्के एद्दि कालम दग्गेरा एत्ता इंचि मिमेट एरपाट कीतिर.

29 इल्हा इव अन्नि गटनां जर्गनद ह्वाळसि ओर दग्गेरा मंतोर, गल्मातगेन मंतोर इंचि मिमेट एरपाट कीतिर.

30 नना मीकु निजम वेहांतन, बदवेरदाका अयते इव अन्नि पोल्लें पुरागा आयोंगो, अदवेरदाका ई पीळि मुळगो.

31 इद बूमि, मब्बु नासडेम आसि होंदार, गानि नावा पोल्लें बस्केने नासडेम आयों.

अद वेला बोनके तेळियो

32 "अद रोजु आयि, अद गळिया आयि बोर्के तेळियो. स्वर्गमता दूतांक आयि, मनकना रूपमते पुटतोन नाकु आयि बोर्के तेळियो. गानि सिराप पेनबाबांके तेळियंता.

33 अद वेला बस्के वांतानो मीक तेळियो. अदुनहाटी मिमेट तेळिवेते, उसारते मंटु.

34 इद वरोर मनकनलेसीं मंता, बोर अयते पय्नेम होनाका मुन्ने, ओना जीतागाहकुन केय्सि, बोना कबळ ओनकु अप्पजेपसि, लोतुन कावेल कियानोन 'तेळिवेते मन' इंचि आदेस हीतोर.

35 लोता मालक पोळ्द होंचि वांतोरो, नळजाम नर्का वांतोरो, गोगोड कूसानेके वांतोरो, हक्केरे वांतोरो, बस्के वांतोरो मीक एरपाट हिल्ले. अदुनहाटी मिमेट तेळिवेते मंटु.

36 ओर अचानक वासि, मीकुन निद्र होंचि मत्तद ह्वा मनि इंचि मिमेट तेळिवेते मंटु.

37 इद नना मीक वेहतन, अल्हेने अंटोर्कगुडा अदे वेहासेक मंतन. तेळिवेते मंटु," इंचि येसु ओर्क वेहतोर.

14

येसुन हक्कना पिलान कीतुर

(मत्तयाल 26:1-5; लकाल 22:1-2; योहान 11:45-53)

1 रोंडु रोजकुना पजा दाटसि होनना पंडुगु आनि पुल्लगा आयवा पिडिता हारिना पंडुगु आयाना मत्ता. अस्के येसुन सप्पुडदाका दोर्कापीसि हक्ककोम इंचि पेर्मालोर्क, दर्मसास्त्रम कराहना गुस्लक पिलान कीसेक मत्तुर.

2 गानि, "पंडुगु रोजकुना लोप्पो हक्का मन्नि, अल्हा कीते लोकुल्क गडबड किया परांतुर," इंचि ओर इनकुत्तुर.

येसुना तल्लापोरी अत्तर निय वळियमळ

(मत्तयाल 26:6-13; योहान 12:1-8)

3 अद बेलाते येसु बेतानिया नाटे, मुन्ने कुस्टरोगम आसि मत्ता सिमोनना लोते गाटो तिनालय उद्दिदिसि मत्तस्के, उंदि मुरतळ तेल्लाटा बंडा गुर्गिते जटामासि* मराताल तयार कीतद, वेल्ले दराता पिब्बर अत्तर निय पीसि वाता. अद गुर्गिता बुच्चातुन पयाहचि येसुना तल्लापोर्रो वळियता.

4 अदुन हळसि, अगा मत्तोर्क इचचुर्कु होंग वासि, “इद अत्तर निय अट्टिदे बारि नासडेम कीतिन?

5 इदुन अम्मिसि मत्ते मूड नुहकुंकन्ना एक्को एंडि रूपे वायवहकु. अबुन गरिब लोकुकुकुंक हियालय ओज्जुवाहक,” इंचि दान तेराहतुर.

6 गानि येसु ओर्कुन इल्हा इत्तोर. “दीन बतल इनमट, मिमेट दीन बारि तकलिप कीसंतरि? इद नावाहाटी बेसे कीता.

7 गरिब लोकुकुकु मीवातोनि बस्केळक मनंतुर, मिमेट बस्के इनकुत्ते अस्के ओर्क बेस किया परांतरि, गानि नना मीवातोनि बस्केळक मन्नोन.

8 नावा मेंदुल्लुन बोंदा दोस्साका मुन्नेने अद मुरतळ नाक निय होकता. अद किया परतच्चोन कीता.

9 नना मीक निजम वेहांतन. पूरा दुनियाते बगा-बगा पेनदा बेसता कबुर वेहमळ जर्गता, अगा ई मुरतटुन आनि इद कीता कबळतुन मति कियानुर,” इत्तोर.

इस्कारियोत यहदल येसुन पीसि हियालय हळांतोर
(मत्तयाल 26:14-16; लूकाल 22:3-6)

10 पजा, पन्नेड सिस्स्युलुकुनाल वरोर इस्कारियोत यहदल मत्तोर. येसुन पीसि हियालय ओर पेद्दा पर्मालोरगा होत्तोर.

11 अद केंजसि ओर कूस आसि, ओन्क कोत्तां हीतोम इंचि ओप्कुत्तुर. अदुनहाटी ओर येसुन पीसि हियालय मोका हळसेक मत्तोर.

सिस्स्युलुकु पंडुगुना गाटो तयार कीतुर
(मत्तयाल 26:17-25; लूकाल 22:7-14,21-23; योहान 13:21-30)

12 पुल्लगा आयवा पिंडिता हारिना पंडुगुना मोदाटा रोजु, दाटसि होनना पंडुगुना गोर्रो पोरिन मोक्कु हियंदुर. अदे रोजुने येसुना सिस्स्युलुकु, “गुरु, दाटसि होनना पंडुगुना गाटो तिनना तयारि बगा कीकोम इंचि नीवा मनसु मंता?” इंचि ओन इत्तुर.

13 येसु ओना इव्वुर सिस्स्युलुकुन केय्पि ओर्क इल्हा वेह्चि लोहतोर. “मिमेट सहरते होंट. अगा वरोर मनकल अळकाते एर पीसि होननेके कलियंतोर, ओना पज्जेन होंट.

14 ओर बद लोन अथ्ते दांतोर, अद लोता मालकुन, ‘नना नावा सिस्स्युलुकुनतोनि कलियसि, दाटसि होनना पंडुगुना गाटो तिननाहाटी हेळमितोर आगाना अर्रा बगा मंता? इंचि गुरु पूसकीसंतोर,’ इल्हा इंट.

15 अस्के ओर मीकु मिद्दे पोर्रोटा पेद्दा अर्रा सजांचि तयार कीसि मत्तद हुप्सानुर, अदे अर्राते पंडुगुना गाटो मनाहाटी तयार कीम्पु,” इत्तोर.

16 सिस्स्युलुकु अगटाल पेय्पि सहरते होत्तस्के, ओर बल्हा वेहतोर अल्हेने अगा मत्ता, पजा ओर अग्गेन दाटसि होनना पंडुगुना गाटो तयार कीतुर.

17 पोळ्द होत्तारिते, येसु ओना पन्नेडु सिस्स्युलुकुनतोनि अगा वातोर.

18 ओर गाटो तिचेके मत्तुर अस्के येसु, “नना मीक निजम वेहसेक मंतन, मीवा लोप्पोटाल वरोर नाकुन पीसि हीतोर, ओर नावातोनि उद्दिदिसि गाटो तिचेके मंतोर,” इंचि ओर्कुन इत्तोर. 19 अद केंजसि ओर्क वेल्लेन दुक्कम अनपिस्ता, ओर वरोन पज्जो वरोर, “ओन नना अथ्ते आयोन गदा?” इंचि येसुन पूसकियालय दलगतुर.

20 अस्के येसु, “ओर पन्नेड मदिताल वरोर आंदुर, ओर नावातोनि गिन्नेते हारि मुळाह्चि तिनानोर.

* 14:3 जटामासि जटामासि पोरोलता उंदि सेंट मरा.

21 दर्मसास्त्रमते रासि मत्ताप, मनकना रूपमते पुटतोन नना अय्ते दांतने. गानि बोनाहेंदाल अय्ते नाकुन पीसि हियमळ जर्गता, आ मनकल पुट्टाकोटेन बेस आसि मनवळ,” इत्तोर.

सिस्थुल्लुकुनतोनि आकिर मल्का गाटो तिनमळ

(मत्तयाल 26:26-30; लूकाल 22:14-20; 1 कुरैति 11:23-25)

22 अल्हा ओर तिचेके मनैकेने, येसु हारितुन येत्सि, पेनदुक दन्यवाद कीसि तुकडां कीतोर. अबुन सिस्थुल्लुकुंक हीसि, “तिट, इद नावा मेंदुल आंद,” इंचि इत्तोर.

23 मर्रा ओर, उंदि तालिते अंगुर पानकम येत्सि, पेनदुक दन्यवाद कीसि ओर्क हीतोर. अदुन ओर अंतोर उट्टुर.

24 पजा, “इद करारता नावा नेत्तुर आंद, इद नेत्तुर वेल्लेटोराहाटी पोंगागोटमळ जर्गता.

25 नना मीक निजम वेहांतन, पेनदा राज्येमते पूना तरिकाते अंगुर पानकम उनाना रोजुनदाका, मर्रा बस्केने अंगुर पानकम उन्नोन,” इंचि वेहतोर.

26 पजा ओर, पेनदा स्तुति कियाना उंदि पाटा पारसि, जय्तुन मराकुना गुट्टापोर्रो होत्तुर.

पत्रु आबद्दम वळकंतोर इंचि येसु वेहमळ

27 अस्के येसु ओर्कुन इल्हा इत्तोर. “गोर्गे कोहानोन नना हळकंतन, मंदता गोर्गे बेंदव-हेके पायसि वित्तांतां, इंचि दर्मसास्त्रमते रासि मंता. अदुनहाटी मिमेट अंतोर नाकुन होळसि वितकिर.

28 गानि, नना हासि मर्रा जीवाते तेदतंका, मीकन्ना मुन्ने गालिल एरियाते दांतन,” इत्तोर.

29 अस्के पत्रु, “अंतोर नीकुन होळसि वित्तिना गानि नना नीकुन होळसि वित्तोन,” इंचि येसुन इत्तोर.

30 अस्के येसु, “नना निजम वेहासेक मंतन, इय्याला नर्कळक रौडु मल्कां गोगोड कूसाका मुन्ने, निमे नाकुन मूड मल्कां ‘एरपाट किय्योन’ इंचि इनकिन,” इंचि ओन इत्तोर.

31 गानि पत्रु इंका जोसने, “ओक्कला नाकु नीतोनि हामुर वायिना बेसे, नीकुन नना एरपाट किय्योन इंचि बस्केने इन्नोन,” इंचि इत्तोर. अद केंजसि, कळमतोरगुडा पत्रु इत्तापे इत्तुर.

येसु गेत्सेमनितगा पारतना कियमळ

32 अगटाल ओर गेतसेमनि इनना जेगातगा होत्तुर. अगा एवतस्के, “नना पारतना कियानादाका इग्गेने उद्दिदसि मंटु,” इंचि ओना सिस्थुल्लुकुन इत्तोर.

33 पजा पत्रुन, याकोबुन, योहानुन ओनतोनि ओतोर. येसु अद वेलाते वेल्ले दुक्कमते, सिम्मरा आतोर.

34 अस्के ओर्कुन, “नावा जीवा दांता बारे इत्ताप नाक वेल्ले दुक्कम आसेक मंता. मिमेट इग्गेने आगसि, तेल्विते मंटु,” इंचि इत्तोर.

35 इच्चुर मुन्ने होंचि बोकबोर्ले अर्सि पारतना कीतोर, “आया परते इद तकलिपता वेला तप्पि होन्नि.

36 बाबा! नावा बाबा, नीतोनि अन्नि आया परांता, इद तकलिपता वाटितुन लक्कु कीम. गानि नावा इच्चा मत्ताप आयो, नीवा इच्चा मत्तापे आयि,” इंचि इत्तोर.

37 पजा सिस्थुल्लुकुनगा वासि हळते ओर निद्रा होंचि मत्तुर. अस्के येसु सिमोन पत्रुन इल्हा इत्तोर. “सिमोन, मंचिगा मीडसंतिरा? उंदि गंटामेडगुडा नातोनि तेल्विते मंदा परिना?

38 मिमेट पट्टुने अर्काकॉटा मननाहाटी तेल्विते मंचि पारतना कीसेके मंटु, नना वेहताप कियालय मीवा आत्मा तयार मंता गानि मीवा मेंदुल कमजोर मंता,” इत्तोर.

39 अस्के येसु मर्रांदि मल्का होंचि, मुन्ने कीतापे मर्रा पारतना कीतोर.

40 येसु मर्रा वासि हळतस्के, ओर मंचि निद्रते मत्तुर. येसुंक बतल जवाब हियना ओर्क तेळिया हिल्ले.

41 येसु मूडोव मल्ला ओरगा होंचि ओर्कुन इल्हा इत्तोर. “मिमेट इंदकेगुडा मींडसेक, आराम कीसेके मंतरा? इद वेल्लेन आता, मनकना रूपमते पुटतोन नाकुन पापिर्कुना कय्दे पीसि हियना वेला एत्ता.

42 तेदाट, मनम दाकोम. नाकुन पीसि हियानोर दग्गेरेन एत्तोर,” इत्तोर.

येसुन पीसि हियमळ

(मत्तयाल 26:47-56; लूकाल 22:47-53; योहान 18:3-12)

43 येसु वळ्कसेकेन मंतोर, अच्चोटेन पन्नेंड सिस्युल्कुना लोप्पोटोर वरोर यहूदल वातोर. ओनतोनि पेर्मालोर्क, दर्मसास्त्रम कराहना गुस्लक, यहूदि पेद्दाल्क लोहचीता लोकुल्कुना पेद्दा मंदा ओर कसेह्क, दूडुडुक पीसि वातुर.

44 येसुन पीसि हियानोर, “नना बोन अय्ते बुरीतनो, ओरे येसु आंदुर. ओन दोर्कापीसि जेगतांते ओम्टु,” इंचि मुन्नेन ओर्क उंदि चिन्ह वेह्चि मत्तोर.

45 अदुनहाटीं ओर वाता वायुडे येसुनगा होंचि, “गुः!” इंचि ओन बुरतोर.

46 अस्के ओर ओनापोर्रो कय वाट्सि, ओन दोर्का पीतुर.

47 अच्चोटेन अगा दग्गेरा नित्तिसि मत्तोरगटाल वरोर ओना कसेर तेंडसि, पेद्दा पेर्माना वरोर दासुना केव नेम्मानाल हीतोर.

48 अस्के येसु ओर्कुन, “वरोन दोंगन पिथ्यालय वाताप मिमेट कसेह्क, गुत्पां पीसि नाकुन पिथ्यालय वातिरा?

49 नना अय्ते रोजे गुळिते कराहसेक मीतोनि मनुंदुन, अस्के नाकुन पिया हिल्लिर. गानि दर्मसास्त्रमते नावा बारेमते रासता पोल्लें पूरा आयाना इंचि, इल्हा जर्गाता,” इत्तोर.

50 पजा ओना सिस्युल्क अंतोर ओन होळसि तेगा विततुर.

51 वरोर लेय्या मनकल ओना मेंदुल्क सिराप चादर हुटकुंचि येसुना पज्जो होंचेके मत्तोर. लोकुल्क ओनगुडा पीतुर,

52 गानि ओर चादर होळसिसि कुळ्केंगे वीततोर.

यहूदि पेद्दाल्कुना मुन्ने येसुन निपिचमळ

(मत्तयाल 26:57-68; लूकाल 22:54-55,63-71; योहान 18:13-14,19-24)

53 ओर येसुन पेद्दा पेर्माना लोन ओतुर. अगा अंतोर पेर्मालोर्क, यहूदि पेद्दाल्क, दर्मसास्त्रम कराहना गुस्लक जमा आतुर.

54 गानि पत्र लक्कुटाले येसुना पज्जो-पज्जो पेद्दा पेर्माना दारादाका होत्तोर. अगा सिपाइल्कुनतोनि तडमितगा सेका कासेक मत्तोर.

55 अगा पेद्दा पेर्मालोरे आनि पंचादितोर अंतोर येसुंक हामुरता सिक्सा हियानाहाटीं, ओना विरोदमते तप्पुड गवाइ पहकतुर, गानि ओर्क उंदिगुडा तप्पुड गवाइ दोर्काहिल्ले.

56 बारित्ते येसुना विरोदमते वेल्लेटोरे आबद्दम गवाइ वेहतुर, गानि ओरा गवाइ वरोनद वरोंक कलिया हिल्ले.

57-58 अस्के इच्चुर लोकुल्क नित्तिसि, “मनकालोर दोहता गुळितुन कूलाहिचि, मूड रोजकुने मर्रां दोहंतन, गानि अद मनकालोर दोहतद आयो, इनानेके मोमोट केंजतोम,” इंचि येसुना विरोदमते गवाइ हीतुर.

59 गानि इवनेगुडा वरोना गवाइ वरोंक कलिया हिल्ले.

60 अस्के पेद्दा पेर्मल नड्डुम नित्तिसि, “इर नीकु विरोदमते बल्हा गवाइ हीसंतुर हळा, निमे बतले जवाब हिथ्यिना?” इंचि येसुन पूसकीतोर.

61 गानि ओर चुपचाप मत्तोर, बतले जवाब हिया हिल्लोर. अस्के मसुंदि मल्ला पेद्दा पेर्मल येसुन, “निमे कदरगल्ला पेनदा मर्रिं किरिस्तुन आदिना?” इंचि पूसकीतोर.

62 अस्के येसु इत्तोर. “हो, ननाने आंदून. आनि मनकना रूपमते पुटतोन नाकुन ताकतवर पेनदा तिना बाजूंक उद्दिदिसि मत्तद आनि मब्बु तेर्पेनतोन बायानद मिमेट हळकिर,” इत्तोर.

63 अस्के पेद्दा पेर्मल ओना कपडिं हराहकुचि, “मनाक इंका बतल गवाइ गावाले?”

64 ईर पेनदा अपमानम कीतद मिमेट केंजतिरे गदा! अयते मिमेट बतल इतिर?” इंचि पेर्मल इत्तस्के, ओर अंतोर, “ओर हामुर सिक्सालायक मंतोर,” इंचि इत्तुर.

65 अस्के इच्चुर लोकुलक येसुनपोर्ी उस्कतुर, इंका इच्चुर बारे ओना कळकुन मुच्चिसि तंचेके, “निमे बविस्थवानि वेहानोनाते, नीकुन बोर तंतुर वेहा,” इंचि इत्तुर. अल्हेने कावेल कियानोरगुडा ओन सेंपापोर्ी तंतुर.

येसुन एरपाट किय्योन इंचि पत्रु इनमळ

66 अव अन्नि आयानेके पत्रु हिळु दाराते उद्दिदिसि मत्तोर, अस्के पेद्दा पेर्मानगा पासि कबळ कियानद उंदि मुरतळ वाता.

67 वासि, पत्रु तळमि सेका कासेक मत्तद हळसि, “निमेगुडा नासरेत नाटेना येसुनतोन मत्तिन गदा!” इंचि इत्ता.

68 गानि पत्रु अद पोल्लेतुन ओप्फुना हिल्लोर. “निमे बतल इंचतिनो, नाक तेळियो, नना एरपाट किय्योन,” इंचि पलाता गलमातगा होत्तोर, अच्चोटेन गोगोड कूसता.

69 अद पासि कबळ कियाना मुरतळ पत्रुन हळसि, “ईर तप्पाकोटा ओरा लोप्पोटोरे वरोर आंदुर,” इंचि अद मर्रा उंदि मल्का अगा नित्तिसि मननोरतोन इत्ता.

70 गानि पत्रु मर्रा ओप्फुना हिल्लोर. गडसेम मत्तस्के अगा नित्तिसि मत्तोर पत्रुन, “निजमे, निमे ओरा लोप्पोटोने आंदिन, बारित्ते निमेगुडा गालिल राज्येमतोन आंदिन,” इंचि इत्तुर.

71 अस्के पत्रु ओर्कुन, “नना ओट्टु तिचि वेहसेक मंतन, नावा पोल्ले आबद्दम आते नाकु सापनेम दल्गि! मिमेट बोना बारेमते वळकसतिरो, आ मनकन नना निजम एरपाट किय्योन,” इंचि इत्तोर.

72 अल्हा इत्ता इनुडे गोगोड रोंडो मल्का कूसता. येसु पत्रुंक मुन्नेने वेहिचि मत्तोर, “गोगोड रोंड मल्कां कूसाका मुन्ने, निमे नाकुन मूड मल्कां एरपाट किय्योन इतिन,” इंचि. आ पोल्ले पत्रुंक मति वाता. अस्के वेल्ले दुक्कमते अळतोर.

15

येसुन पिलातुसना कय्दे अप्पजेपमळ

1 बल्हा अयते पंग आता अल्हा पेद्दा पेर्मांलोर, यहुदि पेद्दाल्क, दर्मसास्त्रम कराहना गुस्लक आनि पूरा पंचादितोर उंदि निरनायम कीसि, येसुन दोह्चि वाट्टिसि ओसि, पिलातुस राज्यपालुंक अप्पजेपतुर.

2 पजा पिलातुस, “निमे यहुदिल्लुकुना राजाना?” इंचि येसुन पूसकीतोर. “निमे इत्तापे” इंचि येसु जवाब हीतोर.

3 अस्के पेद्दा पेर्मांलोर ओनापोर्ी वेल्लेन पोल्लेना दोसेल्क दोसतुर.

4 अदुनहाटीं पिलातुस येसुन मर्रा पूसकीतोर, “हळा ओर नीवा पोर्ी बच्चुंगो तप्पुक दोस्सेक मंतुर, निमे बतले जवाब हिच्यिना?” इंचि इत्तोर.

5 गानि येसु बतले जवाब हिया हिल्लोर, इंचि पिलातुस इंचंत्रम आतोर.

येसुंक हामुरता सिक्सा हियमळ

6 दाटसि होनना पंडुगुना रोजुने, लोकुलकुंक इस्टमातोन एटा वरोन जेलनाल होळिसियाना रिवाज मत्ता.

7 बरब्बल इनना वरोर मनकल ओना दंटातोरतोन जेलने मत्तोर. ओर ओना दंटातोरतोन कलियसि, बचुटूरो लोकुलकुन हळ्किसि मत्तोर.

8 लोकुलक पिलातुसनागा वासि, “एटा मावाहाटीं बल्हा कियिदिनो अल्हेने कीम,” इंचि इत्तुर.

9-10 पेर्मांलोरुर्क येसुनपोर्रो कळ्ळक पोतताहेंकेन ओन तच्चि नाक अप्पजेपतुर इंचि पिलातुस एरपाट कीकुत्तोर. अदुनहाटीं पिलातुस ओर्कुन, “मीवा बतल विचारम मंता, यहुदिल्कुना राजान मीहाटीं होळसीकाना?” इंचि पूसकीतोर.

11 गानि पेर्मांलोरुर्क, “मावाहाटीं बरब्बने होळसीम इंचि मिमेट इंटु,” इल्हा लोकुलकुन एकिकस्तुर.

12 मर्ना पिलातुस ओर्कुन, “अयते मिमेट यहुदिल्कुना राजाल इंचि बोनयते इंतोर, ओन नना बतल कीकन,” इंचि पूसकीतोर.

13 अस्के, “ओन कूसुनपोर्रो वेलाड वाटा!” इंचि ओर वरगेयतुर.

14 अस्के पिलातुस, “बारि, ईर बतल तप्पु कीतोर?” इंचि ओर्कुन पूसकीतोर. गानि ओर इंका जोरते, “ओन कूसुनपोर्रो वेलाड वाटा!” इंचि वरगेयतुर.

15 पिलातुसुंक लोकुलकुन कूस कियाना मत्ता इंचि ओराहाटीं बरब्बन होळसिसि येसुन बारे पोर्ट्टे देब्बां तंचि कूसुनपोर्रो वेलाड वाटालय सिपाइल्कुना कयदे अप्पजेपतोर.

सिपाइल्क येसुन अपमानम कियमळ

(मत्तयाल 27:27-31; योहान 19:2-3)

16 पजा सिपाइल्क येसुन पीसि राज्यपालना पिरटोरियम इनना किल्लाते ओतुर. अगा सिपाइल्कुना पूरा गेंगुन केय्से जमा कीतुर.

17 ओर येसुंक नेडि पंडि रंगुना कोट केराह्चि, हाह्कुना वेलितुन किरिटम कीसि ओना तल्लक दोसतुर.

18 अस्के ओर, “यहुदिल्कुना राजांक जय!” इंचेके ओन्क जोहार कीतुर.

19 पजा ओर ओना तल्लापोर्रो दुड्डुने तंतुर, ओनपोर्रो उस्कतुर, ओर ओना मुन्ने वंगिस जोहार कीतुर.

20 ओन इरगा कारेड्डाल्क कीतारित्ते, ओन्क केराहता नेडि पंडि रंगुना कोट तेंडसि, ओना कपडिं ओन्के केराहतुर. अस्के ओन कूसुनपोर्रो वेलाड वाटालय पलाते ओतुर.

येसुन कूसुनपोर्रो वेलाड वाटमळ

(मत्तयाल 27:32-44; लूकाल 23:26-39; योहान 19:17-19)

21 सिपाइल्क येसुन पीसि पलाते होननेके, सिकंदर आनि स्पुसना बाबाल सिमोन इनानोर नेलिनाल अदे हरि पीसि वासेक मत्तोर. ओर कुरेनि सहरतोर मत्तोर. सिपाइल्क ओन वेराहचि येसुना कूस कांजा वेहतुर.

22 ओर गोलगोता इनना जागातगा येसुन पीसि वातुर. गोलगोता इत्ते तल्ला बोरसेम इंचि अर्तम.

23 अगा ओर, मूर्* इनना मत्तु अंगुर पंडिना पानकमते कल्पिसि येसुंक उनालय हीतुर, गानि ओर उना हिल्लोर.

24 अस्के ओन कूसुनपोर्रो वेलाड वाटतुर. पजा ओना कपडिन बद बोर एताना इंचि सिट्टिं वाट्टिस पंचकुत्तुर.

25 येसुन कूस पोर्रो मोल्लाने कोह्किसि वेलाड वाटतस्के हक्केटां तोम्मिद एगिस मत्तां.

26 ईर “यहुदिल्कुना राजाल” आंदुर इंचि, उंदि बल्लापोर्रो कसूर रासि ओना तल्लातगा कूसुंक तासतुर.

27 येसुनतोनि इंका इव्वुर दोंगाल्कुन, तिना बाजुंक वरोन, डेमा बाजुंक वरोन कूसकुन पोर्रो वेलाड वाटतुर.

28 इदुनहेंदाल दर्मसास्त्रमते रासि मत्ताप, “ओर दोंगाल्कुना लेक्काते वातोर”† इद पोल्ले पूरा आता.†

* 15:23 मूर् मूर् इत्ते नोप्पि तक्को कियाना उंदि मत्तु.

☆ 15:28 यसायाह 53:12

† 15:28 इद वचनम कोन्नि पांडु लिपिने हिल्ले.

29-30 अद हरि पीसि होनानोर-वायानोर तल्लां ऊपसेके, “ओ! गुळितुन कूलाहिचि मूड रोजकुने दोहानोन, कूसताल रेय्शि निमे नीवा जीवातुन पिसागोटकुन,” इंचि अपमानम कियुंदुर.

31 अल्हेने पेर्माँलोक, दर्मसास्त्रम कराहना गुस्लकगुडा, “ओर इंकावरोन पिसागोटतोर गानि ओनद ओर पिसागोटकुना परसेके हिल्लोर.

32 इस्राएलतोर राजाल किरिस्तु कूसुनपोर्रोँटाल हिळु रेय्शि वायिरकांटी, अस्के मोमोट हळसि, ईनपोर्रोँ विस्वासम ईरा परकोम,” इंचेके ओना कारेड्डाल्क कीतुर. येसुना पक्काते कूसुंक वेलाड वाट्सि मत्ता दोंगाल्कगुडा ओना अपमानम कीतुर.

येसुना हामुर

(मत्तयाल 27:45-56; लूकाल 23:44-49; योहान 19:28-30)

33 अस्के पिथ्यटा पन्नेड एगानस्केटाल अय्ते, मूड एगनदाका पूरा बूमिअंता हीकट आता.

34 पिथ्यटा मूड एगनेके येसु अळसेके जोरसे वरगेयसि, “एलि, एलि, लमा सबकतनि?” इंचि इत्तोर. इत्ते, “ना पेनदुना, ना पेनदुना निमे नाकुन बारि होळसीतिन?” इंचि इत्तोर.

35 अस्के अगा नित्तिसि मत्तुर इच्चुर लोकुल्क, “ह्ळ्याट! ओर एलियान केयसंतोर,” इंचि इत्तुर.

36 ओरा लोप्पोटाल वरोर विच्चि होंचि स्पंजतुन पुल्लाटा अंगुर पानकमते मुळहाचि, दुड्डु कोस्सक तासिसि ओनकु उनालय हीतोर. हीसि, “आगा! एलियाल ओन हिळु रेहालय वांतोरा वायोरा? हळकोम,” इंचि इत्तोर.

37 अस्के येसु पेद्दा आवाजते वरगेयसि जीवा होळसीतोर.

38 अस्के गुळिता परदा पोर्रोँटाल हिळुदाका हर्सि रोंडु तुकडां आता.

39 अस्के नूर मंदि सिपाइल्कुना पोर्रोँ मनना अदिकारि येसुना कूसता मुन्नेने नित्तिसि मत्तोर. ओर येसु वरगेयसेके जीवा होळसनद हळतोर, हळसि, “ईर निजमे पेनदा मरि आंदुर,” इंचि इत्तोर.

40 अगा मगदलेनि नाटेना मरियम, सिन्ना याकोब, योसेसना यावल मरियम, सलोमि इव मुर्ताहकगुडा लक्कुटाले नित्तिसि हळसेक मत्तां.

41 येसु गालिलि एरियाते मत्तस्के, इव मुर्ताहक ओना पज्जो होंचि सेवा कियुंदुं. इवे आयाका ओना पज्जो येस्सलेमदाका वातव इंका वेल्लेन मुर्ताहक मत्तां.

येसुन बोँदा दोसमळ

(मत्तयाल 27:57-61; लूकाल 23:50-56; योहान 19:38-42)

42 नोमकेन रोजुना मुन्नेटा रोजु येसु हातोर, अद नोमकेमता तयारिता रोजु आंदु. अस्के पोळ्दु होंचि मत्ता.

43 अरिमताइ नाटेनोर योसेपु इनानोर वरोर मत्तोर. ओर यहुदिल्लकुना पंचादिता वरोर मेंबर मत्तोर. लोकुल्क ओन्क कदर हियुंदुर. ओर पेनदा राज्येम बस्के वायार इंचि एदुर हळसेक मनुंदुर. ओर दैरनेमते पिलातुसनागा होंचि, “येसुना पीनगुन नाक हीम,” इंचि तल्कतोर.

44 अस्के पिलातुस, “अरे! इच्चोन बिराना हातोरा” इंचि इचंन्रम आतोर. पजा नूर मंदि सिपाइल्कुना पोर्रोँ मनना अदिकारिन केय्शि, “येसु हातोरा?” इंचि पूसकीतोर.

45 येसु हातोर इंचि ओर अदिकारि वेहतस्के, ओना पीनगुन ओया परांतिन इंचि पिलातुस योसेपुन इत्तोर.

46 अस्के योसेपु उंदि पूना कपडि अस्तोर. येसुन कूसतगटाल हिळु रेहचि, अद कपडितुन हुटोर. हुटसि, बंडातुन तुलाहिचि तयार कीता बोँदाते दोसतोर. पजा दाना बोँगाकु उंदि पेद्दा बंडा अड्डम दोसतोर.‡

47 येसुन बोँदाते दोसता जेगातुन मगदलेनि नाटेना मरियम, योसेसुना यावल मरियम इव हळतां.

‡ 15:46 अद कालमते गुट्टांकु सोंरें तवसि ईरुंदुर. बोर्नना हाते अवने ओसि दोसुंदुर.

16

येसु मरा जीवाते तेदमळ

(मत्तयाल 28:1-8; लूकाल 24:1-12; योहान 20:1-10)

1 नोमकेमता रोज मारतारित्ते, मगदलेनि नाटेना मरियम, याकोबुना यावल मरियम आनि सलोमि इव येसुना पीनगुंक होकालय, गमागमा गब्बु वायानव वस्तुक अस्तां.

2 वारमता मोदाटा रोज अयतारम हक्केरेने पोळ्दु पेयसता पेयसुळे बोंदातगा होतां.

3 अव होननेके, “अद बोंदक अड्डम दोसता बंडातुन मनाहाटी बोर गुळाहनुर?” इंचि अवुनद अवे वळकसेक होतां.

4 अगा एवसि हळते, अच्चोन पेद्दा बंडा गूळसि मत्तद अवुंक दिसता.

5 अव बोंदाते होळियतस्के वरोर लेय्या मनकल तेल्लाटा कपडिं केरिं तिना बाजुंक उदिद्स मत्तद हळसि अव वेरियातां.

6 ओर अवुन इल्हा इतोर. “वेरियमट, क्रूसुनपोर्रो वेल्लाड वाट्रिस हळकता, आ नासरेत नाटेना येसुन मिमेट प्हकसेक मंतिट, ओर इग्गे हिल्लोर, जीवाते तेदतोर. इद हुळ्याट, ओना पीनगु इरता जेगा.

7 ओर मीक वेहता परकारम, मीकन्ना मुन्नेने गालिल एरियाते होंचेक मंतोर, अदुनहाटी मिमेट होंचि ओना सिस्युल्कुंक आनि पत्रुंक वेहाट, अगा ओर मीकु दिस्सानुर,” इतोर.

8 अव मुर्ताहक इरगा वेरियसि वनकालय दल्गतां. अदुनहाटी अव बोंदातगाटाल पलाते पेय्सि विच्चि, आ वेंरेंक बोर्क बतल वेहा हिल्लें.

मगदलेनि नाटेना मरियमुंक येसु दिसंतोर

9 वारमता मोदाटा रोज इत्ते अयतारम रोज, येसु हामुरताल जीवाते तेदतोर. तेदता पजा मोट्टा मोदाला मगदलेनि नाटेना मरियमुंक दिसतोर. इदे मरियमुनगाटाल एडुं देय्याल्कुन येसु गेदमिस मत्तोर.

10 अद अगटाल पेय्सि, येसुनतोन मत्ता सिस्युल्कुनगा होता. ओर वेल्लेने दुक्कमते अळसेके मत्तुर, ओर्क येसुना बारेमते वेहता.

11 येसु जीवाते तेदतोर, अद येसुन हळता इत्ता पोल्लेतुन ओर केंजतुर गानि विस्वासम किया हिल्लुर.

12 अद आता पजा, ओरा लोप्योटाल इव्वुर येस्सलेमताल उंदि नार होंचेके मननेके, ओर्क वेंरें रूपमते येसु दिसतोर.

13 ओर पज्जो मल्लिस होंचि, कळमतोर्कुंक इद पोल्ले वेहतुर, गानि ओर ईरा पोल्लेने विस्वासम किया हिल्लुर.

येसु ओना सिस्युल्कुनतोन वळकंतोर

(मत्तयाल 28:16-20; लूकाल 24:36-49; योहान 20:19-23; प्रेरितुल्कुना कबाहक 1:6-8)

14 पजा पदाकोंडु मंदि सिस्युल्कु उदिदिसि गाटो तिचेके मननेके येसु ओर्क दिसतोर. “नना जीवाते तेदतन इंचि वेल्लेटुर मीक वेहिनागानि मिमेट बारि विस्वासम किया हिल्लिर? मीवान मनसुक बंडालेसी मारियातां,” इंचि तेराहतोर.

15 पजा ओर्कु इल्हा वेहतोर. “मिमेट होंचि दुनियाता अन्नि देसेल्कुना लोकुल्कुंक बेसता कबुर प्रचार कीम्ट.

16 बोर अयते विस्वासम कीसि, बापतिस्मा एतंतोर ओनके मुक्ति दोर्कता, गानि बोर अयते विस्वासम किय्योर, ओनकु पेन सिक्साता आदेस हिय्यार.

17 नाकुन विस्वासम कियानोनगा इव चिन्हां मनतां, ओर नावा पोरोलते देय्याल्कुन गेदमानुर, वेंर-वेंरें बासाने वळकानुर,

18 तरासकुन पियानुर, बदे विसम वस्तु उनिनागानि ओर्क बतल आयो, बिमार्क मत्तुरा पोरो ओरा कय्क इरते, ओर बेस आयानुर,” इंचि वेहतोर.

येसु स्वर्गमते होनमळ

(लूकाल 24:50-53; प्रेरितुल्कुना कबाहक 1:9-11)

19 येसु सामि ओना सिस्स्युल्कुनतोनि इव पोल्ले वेहता पजा, पेन ओन स्वर्गमते तेहकुत्ता. अस्के ओर दाना तिना बाजुंक उदूतोर.

20 पजा येसुना सिस्स्युल्कु नालुं-मूलां होंचि अन्नि जेगाने ओना बारेमते प्रचार कीतुर. सामि ओरतोनि मंचेके कबळ कियुंदुर. कबळ कियनेके जर्गना चिन्हाना हेंदाल सामि ओना पोल्ले निजम इंचि रूजुव कियुंदुर. आमेन.*

* 16:20 इद वचनम कोन्नि पांडु लिपिने हिल्ले.

लूकाल

लूकाल रासतद बेसता कबुर

इद पुस्तकमता बारेमते गिचचो परिचयम
 रासतोना पोरोलः डाक्टर लूका
 रासता कालमः इसवि सन 70

इद पुस्तकमतुन रासता लूकाल बेस डाक्टर मत्तोर. येसु तिरियसि स्वर्गमते होत्तस्के ई लूकाल पौलुसुनतोनि कलियसि वेल्लेन वर्सनदाका येसु सामिना सेवाते मत्तोर. येसु हासि मर्ना जीवाते तेदतंका बचचोनो वर्साकु ई पुस्तकमतुन लूकाल रासतोर. अद कालमते तियपिल्लस इननोर वरोर सायाब मत्तोर, ओन्क येसु सामिना बारेमता निजम बेस तेळियना इंचि इद पुस्तकमतुन ओनाहाटीं रासतोर. लूकाल रासतद इद पुस्तकम वेसुड आयो. गानि येसु निजमे मनकल आसि इद दुनियाते वातोर इत्तदुन हुपसंता. इद पुस्तकम रासमळ मारतारित्ते लूकाल पवित्र आत्माता कबाहक इनना इंकुंदि पुस्तकम रासतोर.

लूकाल इद पुस्तकमहेंदाल बतल वेहांतोर इत्ते, लोकुल्लकुन पेन वेल्लेन पावरम कीता, इंका लोकुल्लकुन पिसागोटनाहाटीं वरोन मिहगा लोहंतन इंचि अद वेल्लेन वर्सा मुन्ने वेहाचि मत्ता. दीनाहाटींगे पेनदा मरिं इत्ते येसु सामि लोकुल्लकुन पिसागोटनोर आसि, इद दुनियाते वातोर. इचचोने आयका पेन अंतोर्कुन उंदाचचोने पावरम कीता. अव्टे दुनियाता नदरते सिन्ना जातितोर आयिर, मुर्ताहक आयिं, वेरे जातितोर आयिर, बोरन्ना आयिर अंतोरपोर्रीं येसु सामि उंदाचचोने पावरम हुपिस्तोर. मिमेट लोकुल्लक इद दुनियाते कदर दोर्किचकुनमळतुन होळसिसि पेनदुन बदवेरदाका अय्ते पहकिरो, अदवेरदाका मीकु पेन हियना पिस्वर दोर्को, मिमेट पेनदा राज्येमते होळियागुडा पर्रिर. बारित्ते बोर मनकल अय्ते सिना पिलालकुनालेसीं सादा-सिंपल आयाना मनसु इरीतोर, असंतोनाहाटीं पेनदा राज्येम मंता. हरिं तप्सि होत्तोर्कुन पहकालय आनि ओर्कुन पिसागोटलय येसु सामि इद दुनियाते वातोर, इंचि लूकाल इद पुस्तकमते रासतोर.

बगा बतल मंता

जोहार आनि परिचयम 1:1-4

बापतिस्मा हियना योहान आनि येसुना पुटमळ, बेर्समळ 1:5-2:52

येसुना सेवा कबळता तयारिं 3:1-4:13

गालिलते येसु सेवा कबळ सुख कीतोर 4:14-9:50

गालिल एरियाताल येस्सलेमदाका येसुना सेवा कबळ 9:51-19:27

येस्सलेमते येसुना सेवा कबाहक 19:28-21:38

येसु हासि तेदसि, स्वर्गमते होनमळ 22:1-24:53

लूकाल येसुना बारेमते रासंतोर

1-4 तियपिल्लस सायाब, * मावा नड्डुम येसु कीता कबाहकुना बारेमते वेल्लेन लोकुल्लक रासालय कोसिस कीतुर. बोर अय्ते जर्गुता आ गटनन कळकुने हळतुर आनि पेनदा बेसता कबुरतुन कराहतुर, औरे माकु ई पोल्लें एव्विचि हीतुर. माकु एव्ता पोल्लेन ननागुडा बेस हदविसि, परमेरका कीसि तेळियागोटकुत्तन. अदुनहाटीं इव अन्नि पोल्लेन बेस उंदान पज्जो उंदि नीकु रासि लोहना इंचि नाकु अनपिस्ता. दीनहेंदाल निमे बतल अय्ते करियतिनो, अदे निजम इत्ता संगति नीकु तेळियंता.

जकरयाल आनि एलिसिबांक संतानम दोर्कना कबुर

* 1:1-4 तियपिल्लस इर वरोर पेदुदे सायाब आंदुर. तियपिल्लस कुदुदु इद पुस्तकमतुन रासालय लूकांक वेहतोर.

5 यहूदिया एरियापोर्रो पेद्रुदा हेरोद राजाल राज्येम कियना कालमते, जकर्याह पोरोलता यहूदि जातितोर वरोर पेर्माल मत्तोर. ओर आबिया इनना पेर्मालोरा गेंगुना मेंबर मत्तोर.† जकरयाहनलेहका ओना मुत्तो एलिसिबालगुडा हास्न‡ इनना पेर्माना वंसमतदे मत्ता.*

6 ओर इव्वुगुडा पेनदा नदरते नीतिमंतुल्क मत्तुर आनि सामि वेहता अन्नि नियमकु आनि आदेसकुन पीसि दोसेम हिलाकोटा ताकुंदुर.

7 गानि एलिसिबाल गोडमुरादि मत्ता. अल्हेने ओर इव्वुर वेल्लेन मातरालोर आसि मत्तुर अदुनहाटी ओर्कु पिलाल्क आया हिल्लुर.

8 बस्के अय्ते जकरयाना गेंगुनोरद येस्सलेम सहरते मनना गुळिते सेवा कियना वेला वाता, अस्के ओर अगा पेर्माल इंचि पेनदा सेवा कीसेक मत्तोर.

9 पेर्मालोरा रिवाज मत्ताप सिट्टिं वाटसि पेनदा गुळिते गुगलेम वाटालय जकरयान पेरतुर.

10 ओर गुगलेम वाटना वेलाते पलाते जमा आता अंटोर लोकुल्क पारतना कीसेक मत्तुर. §

11 अच्चोटेन ओन्क उंदि पेनदा दूता, गुगलेम वाटना गद्देता तिना बाजुंक नित्तिसि मत्तद दिसता.

12 जकर्याहल पेनदा दूतातुन हूळसि उल्किसि अर्सि इरगा वेरियकुत्तोर.

13 पजा पेनदा दूता ओन, “जकर्याह, वेरियमा. पेन नीवा पारतनातुन केंजता. नीवा मुत्तो एलिसिबाल नेला तपसि वरोर पेडन कनंता, निमे ओना पोरोल योहान* इंचि इर्गा.

14 पेडल पुटताहाटी नीकु अय्ते वेल्लेन कुसि आंता. अचोने आयका वेल्लेन लोकुल्कुंक इंका आनंदम आंता.

15 बारित्ते आ पेडल सामिना नदरते पेद्रुदोर आंतोर. ओर अंगुर पंडिना पानकम आयि इंका वैरे बदे कल्लु उन्नोर.* अचोने आयका यावाना पीटि मननास्केटाले ओर पेनदा पवित्र आत्माते निडसि मनांतोर.

16 मीवा वेल्लेन इस्राएल लोकुल्कुन ओर मीवा पेनदाहेके तिरहंतोर.

17 ओर, बाबुर्कुना मनसुन मर्क-मियाहकुनहेके तिरहंतोर. पेनदा पोर्ल्लें केंजवोर्कुन नीतिमंतुल्कुना तेल्चि दोर्किचुकुना वेहंतोर. सामि मीवा नड्डुम वायका मुन्ने सामिनाहाटी लोकुल्कुन तयार कियालय ई पेडल एलियाहनगा‡ मत्ता गुनम आनि ताकततोनि सामि वायना कबुरतुन सामि वायका मुन्नेन वेहांतोर,” इंचि इत्ता.

18 पजा, “नना अय्ते मातरन आतन. इंका नावा मुत्तोगुडा वेल्लेन मातरि आता. अय्ते निमे इत्ता पोर्ल्ले निजम आयार इंचि नाकु बल्हा तेळियार?” इंचि जकर्याहल पेनदा दूतातुन पूसकीतोर.

19 अस्के पेनदा दूता, “निमे नाकुन बोर इनकुंचंतिन? नना गब्रिएल‡ दूतातुन आंदुन. नना पेनदा मुन्ने नित्तिसि मनानदुन आंदुन. नीवातोनि वळ्कानाहाटी, इद बेसता कबुर वेहनाहाटी पेने नाकुन लोहता.

20 नना वेहता पोर्ल्लें अय्ते वेला वातस्के निजम आयानुगे, अयना निमे नावा पोर्ल्लेपोर्रो विस्वासम इर्गा हिल्लिन. अदुनहाटी नावा पोर्ल्ले निजम आयानदाका नीकु वळ्का वायो, निमे मूकन आसि मनांतिन,” इंचि वेहता.

21 इदंता जर्गिके पलाते नित्तिसि पारतना कीसेक मत्ता लोकुल्क इंचंत्रम आसि, जकर्याहल गुळिता लोप्पो इच्चोन आलसेम बारि कीसंतोर, इंचेके एदुर हूळसेक मत्तुर.

† 1:5 ओर आबिया इनना पेर्मालोरा गेंगुना मेंबर मत्तोर दाविद राजाल इस्रोतव इरवै नालुं गेंगुल्क तयार कीसि मत्तोर. अय्ते अबियाना गेग एनमिदोव गेग मत्ता. उंदि गेंगनोर एडादिक रोंडु मल्कां गुळिते वारममेळ कबळ कियंदुर. 1 इतिहास 24:10 ‡ 1:5 हास्न ईर मूसाना दादाल आंदुर. अंटोर पेर्मालोर ईना वंसमताल वातुर. * 1:5 निर्गमन 29:9 § 1:10 सिराप पेर्मालोर्कुके गुळिते मनना पवित्र जेगाते होनना अदिकारम मत्ता. कळ्मालोर अंटोर पलाते पंदिरेन हिळ् नित्तिसि मनांतुर. * 1:13 योहान इत्ते पेन दया हुमिस्ता इंचि अर्तम. ☆ 1:15 गिनति 6:1-4 † 1:17 एलियाह ईर वरोर पेनदा कबुरतोर आंदुर. ई एलियाल येसु सार्मिकन्ना एनमिदि न्हुकुना वर्सा मुन्ने मत्तोर. ‡ 1:19 गब्रिएल इद पेनदा उंदि दूता पोरोल आंद. इद दूता हमेसा पेनदा दग्गो मनांता. इद दूताता बारेमते दानियेले 8:9 ते मंता.

22 पजा जकरयाल गुळिताल पलाते वातोर. गानि ओर लोकुलकुनतोनि वळका पराहिल्लोर. अस्के लोकुलक, “गुळिता लोप्पो ईर बतलो दर्सनम हळतोर बारे! अदुनहाटीं वळका पराका सयों कीसंतोर,” इंचि इनकुत्तुर.

23 इल्हा ओना सेवा कियना रोजकु मारतां, अस्के ओर ओना लोन होत्तोर.

24 कोन्नि रोजकु आता पज्जो, ओना मुत्तो एलिसिबाल नेला तपता. नेला तपतस्के अद हेय्युं नेल्लुकुनदाका लोताल पलाते पेयसाकोंटा लोप्पेन मत्ता.

25 अस्के अद, “नाकुन गोडमुरंद इंचि लोकुलक कव्वुंदुर. गानि लोकुलकुना नड्डुम नावा सिग्गु होनानायो इंचि सामि नाकु इल्हा सहायम कीतोर,” इंचि इत्ता.

येसु पुट्टना कब्रु

26 एलिसिबाल नेला तप्पि हारुं नेल्लक आसतां. अवे तूकुलकुने पेन, गब्रिएल इनना दाना दूतातुन गालिल एरियाता नासरेत पोरोलता सहरते मनना,

27 उंदि मरमिं आयवा पोरिनगा लोहता, आ पोरिन पोरोल मरियम. आ पोरिनद दाविद राजाना वंसमते पुटता योसेप इनना वरोर मनकनतोनि एरां बोट्टु आसि मत्ता. S

28 आ गब्रिएल दूता दाना दग्गेर्क होंचि दानतोनि, “पेनदा आसिवांद दोर्कुता बाई, नीकु जोहार! पेन नीकु तोळ मंता,” इंचि इत्ता.

29 पेनदा दूताता पोले केजसि मरियम वेल्लेन परेसान आता. ई जोहारता अर्तम बतल आयावच्चु, इंचि इचंन्रमते अरता.

30 अस्के पेनदा दूता दान, “मरियम, वेरियमा! पेन नीपोर्रो दया कीता.

31 केजा! निमे नेला तप्पतिन आनि वरोर मांडूसा पेडन कनांतिन. निमे ओना पोरोल येसु (इत्ते पेन पिसागोटंता) इंचि दोस्सा.

32 ओन अंतोर ‘अन्निटकन्ना पेद्दा पेनदा मरि’ इंचि इनानुर, इल्हा ओर पेद्दा पोरोलता मनकल आयानुर. ओना वंसमता पेद्दा मनकल दाविद राजानलेसी पेन ओनगुडा राजाल कीता.

33 अचोने आयका ओर इस्राएल लोकुलकुनपोर्रो* राज्येम कीतोर. इंका ओना राज्येम बस्केने मारो,” इंचि इत्ता.

34 अस्के मरियम पेनदा दूतातुन, “नावां अयते मरमिं इंका आया हिल्ले, नाकु मुय्दोगुडा हिल्लोर. अयते मरि इद बल्हा निजम आयार?” इंचि पूसकीता.

35 अस्के पेनदा दूता इल्हा इत्ता, “पेनदा पवित्र आत्मा नीवा पोरो वांता आनि अन्निटकन्ना पेद्दा पेनबाबाना ताकतहेंदाल नीवा पोरो उंदि नीडा अरंता, अस्के निमे नेला तप्पतिन. दानहाटीं नीकु पुट्टना पेडल पवित्र मनांतोर, ओन ‘पेनदा मरि’ इंचि इंतुर. ☆

36 केजा! नीवा जीवातद एलिसिबा मातिरगुडा नेला तप्पि मंता. अंतोर लोकुलक दान गोडमुरंद इंचि इनुंदुर, गानि अद नेला तप्पि हारुं नेल्लक आसता.

37 पेन अन्नि कबाहक क्रिया परंता, अद क्रिया परवद बतले हिल्ले,” इत्ता.

38 अस्के मरियम, “नना अयते पेनदा सेवा कियनदुन आंदुन, निमे इत्तापे नाकु जर्गिकांटी,” इंचि इत्ता. पजा पेनदा दूता अगटाल पेय्पि होत्ता.

मरियम जकरयाल आनि एलिसिबानगा दांता

39 पजा अवे रोजकुने मरियम बतल कीता इत्ते, बिराना तयार आसि गाबरते गुट्टान लोप्पो मनना यहुदिया एरियाता उंदि नाटे होत्ता. †

40 नाटे एवतस्के अद जकर्याहना लोन होंचि एलिसिबांक जोहार कीता.

S 1:27 दाविद राजाल हासि वेय वर्सा आतस्के पेनदा दूता, मरियमुनतोनि वळकता. * 1:33 इस्राएल लोकुलक ईर अंतोर लोकुलक याकोब इनना पेद्दा मनकना वंसमतोर आंदुर. ☆ 1:35 यसायाह 7:14 † 1:39 नासरेत नार जकरयाना नाटुक 150 किलोमिटर लक्कु मत्ता. अद कालमते लोकुलक गाडदिन पोरो उदिदसि, ताकसेक होनुंदुर.

41 मरियम वळकुता पोल्लेतुन केंजसि एलिसिबाना पीटे मत्ता पिडेम मेसुलता, अस्के एलिसिबाल पवित्र आत्माते निडिसि होत्ता.

42 निडिसि होंचि अद पेद्दा आवाजते, “अन्नि मुरताह्कुंकन्ना निमे एक्को आसिर्वाद दोर्कुता मुरताटुन आदिन मरियम! अल्हेने नीवा पीटे मनना पिडेमगुडा वेल्लेन आसिर्वाद दोर्कुतद आंद.

43 नावा सामिना यावल नाकु कलियालय वायमळ इत्ते गम्मत पोल्ले आयो. इचचोर वेल्ले कदर नाकु बगाटाल दोर्कुता?

44 ह्ळा! नीवा अल्किर केंजता केंजुडे नावा पीटे मत्ता पिडेम कुसिते मेसुलता.

45 इंका निमे पेन वेहता पोल्लेतुन निजम आयि इंचि विस्वासम कीतिन, अदुनहाटी निमे वेल्लेन आसिर्वाद दोर्कुतदुन आदिन,” इंचि एलिसिबाल इत्ता.

मरियम पेनदुन तल्सकुंता

46 पजा मरियम इल्हा इनालय दल्गता:

“नना नावा मनसुनाल पेनदुन तल्सकुंतन.

47 नाकुन पिसागोटना पेन नावा आत्माकु कुसि हीता.

48 नना दाना उंदि सिन्ना दासिदान आंदुन,

अयना पेन नावापोर्री दाना दया हुपिस्ता.

ह्ळा! इंदकेटाल पीळि-पीळिना अंतोर लोकुल्क,

नाकुन, ‘पेनदा आसिर्वाद दोर्कुतद,’ इंचि इनानुर.

49 बारित्ते अन्निटकन्ना पेद्दा पेन नावाहाटी, पेद्दा-पेद्दा कबाहक कीता.

दानद पोरोल पवित्रमाता पोरोल आंद.

50 दानकु वेरियसि दाना कदर कीसेके ताकानोरपोर्री,

दाना दया पीळि-पीळिनदाका मनंता.*

51 अद दाना ताकत हुपिस्ता, गर्रा मत्ता लोकुल्कुन,

ओरा विचाराल्कुन पीसि हिके-हेके पायिस्ता.

52 राज्येम कियानोर्कुन, ओरा राजगद्दे पोर्रीटाल अद हिळ्ळ रेहता.

कदर हिलवोर्कुन बारे पेद्दा कीता.

53 हिल्वोंक गावाले मत्तव हीसि समादानम कीता.*

सिरमंत लोकुल्कुन बारे उत्ता कय्क लोहता.

54-55 अद मना एनकटा पेद्दाल्कुंक हीता पोल्ले परकारम,

दाना सेवा कियना इस्राएल लोकुल्कुंक सहायम कीता.

इत्ते अब्राहाम आनि ओना वंसमतोरपोर्री, बस्केळ्ळक दया कियानदुन मति इरता,”

इंचेके मरियम पाटा पारता.

56 इल्हा मरियम एलिसिबानगा मूड नेलकु मत्ता. पजा दाना लोन अद होत्ता.

बापतिस्मा हियना योहानुना पुटमळ

57 एलिसिबांक नेलां निडिसि अद पेडन कंता.

58 दानकु मर्री पुटतोर इंचि दाना पक्का पीसि मत्ता लोहकुनोर्क, जीवातोर्क तेळियता अस्के, पेन दानपोर्री वेल्लेन दया कीता, इंचि दानातोनि अटोरगुडा वेल्लेन कूस आतुर.

59 आ पेडल एनमिदि रोजकुनोर आतस्के ओना कतना* कियनाहाटी ओर अटोर वातुर. वासि आ सिन्ना पेडाना पोरोल ओना बाबोना पोरोल पोर्रीटाल जकर्याह इंचि दोस्सनद मत्ता.

60 गानि पेडाना यावल मात्रम, “मन्नि, ई पेडन पोरोल ‘योहान’ इंचि दोसगोम,” इत्ता.

61 अस्के दान ओर अंटोर, “निजमे गानि, मीवा जीवातोर लोप्पो ई पोरोलतोर बोरे मनकल हिल्लोर गदा,” इंचि इत्तुर.

62 पजा ओर ओना बाबान सय्गे कीसि, “निमे ई पेडन पोरोल बतल इरीतन इंचि इनकुंचतिन?” इंचि पूसकीतुर.

63 अस्के आ पेडाना बाबाल रासालय उंदि पाटि तल्कतोर आनि, “ओना पोरोल योहान आंद” इंचि रासतोर. अस्के रासतदुन हूळसि अंटोर्क इंचंत्रम आता.

64 अस्केन जकरयांक तोड्डि वाता. अस्के ओर वळ्कसेक पेनदा स्तुति कियालय दल्गतोर.

65 अगा पकापीसि मत्तोर अंटोर इरगा वेरियतुर. इद संगति यहुदिया एरियाता गुट्टन पीसि मत्ता नाहकुने तेळियसि होत्ता.

66 ई संगति केंजता हरेक मनकल विचारम कीसि, “ई पेडल मुन्ने ताकसि बतल आयानुर?” इंचि इनुंदुर. बारित्ते आ पेडन पोरो निजम पेनदा कय मत्ता.

जकरयाल पेनदुन तल्सकुंतोर

67 पजा आ पेडाना बाबो जकर्याहल पवित्र आत्माते निंडिसि होंचि, इल्हा बविस्यवानि वेहालय दल्गतोर.

68 “मावा इस्राएलतोर पेनदुन नना तल्सकुंतन, बारित्ते अद दाना लोकुल्कुंक, सहायम कियालय वासि ओर्कु मुक्ति हीता.

69-70 पेन दाना पवित्र कबुरतोरहेंदाल वेल्ले वर्साना मुन्ने इत्ताप, अद मावाहाटी दाना सेवक दाविदना वंसमताल, वरोन वेल्लेन ताकत मत्ता मुक्ति हियानोन लोहचीता.

71 मावा पगातोरगटाल आनि हयस्वोरगटाल माकु मुक्ति हीता.

72 मावा एनकटा तादो-बाबुरापोरो दया कीतन इत्ता.

ओरतोनि कीता पवित्र करारतुन बस्केने मति मरगोन इंचि इत्ता.

73 ई करार मावा एनकटा पेद्दा मनकल, अब्राहामुनतोनि तित्ता ओट्टु आंद.

74-75 अद करार इल्हा मत्ता गदा,

मिमेट पिसतच्चुं रोजकु नीतिते आनि पवित्र मंचेके,

वेरियाकौटा नावा सेवा कियनाहाटी, नना मीकुन मीवा पगातोर कयदाल होळसीतन.

76 ए नावा सिन्ना पेडा! इंदके नीकुन अन्निटकन्ना पेद्दा पेनदा कबुरतोर इंचि इंतुर.

बारित्ते निमे सामिना हरि तयार कियालय, ओना मुन्ने-मुन्ने ताकतिन.*

77 मीवा पापालक मापि आतेने मीकु मुक्ति दोर्कता,

इत्ता संगतितुन निमे ओना लोकुल्कुंक वेहांतिन.

78 बारित्ते पेन दाना पेद्दा दया मनापोरो हुप्पिचि, स्वर्गमताल वरोर पोळ्दुनसंतोन लोहंता.

79 हामुर इनना नीडा आनि पापमता हीकटते मनना मनापोरो,

ओर वेल्गु अराहचि, मनाकुन सांतिता हर्दे ताकसंतोर.” इंचि इत्तोर.

80 इल्हा आ पेडल पेद्दा बेर्सतोर. अल्हे आत्मातेगुडा बेस गट्टिगा आतोर. ओर ओना इस्राएल लोकुल्कुंक पेनदा पोर्ले वेहना वेला एवनदाका ओर बय्लि जेगाने मत्तोर.

2

येसुना पुट्मळ

1 योहान पुट्मळस्के, रोम सरकारता राजाल कैसर* अगस्तुस ओना कय हिळु मनना अन्नि देसेल्कुना लोकुल्कुनद सिरगंति कियना इंचि आदेस हीतोर.†

* 1:76 मलाकी 3:1 * 2:1 कैसर इद राजाना पोरोल आयो. रोम सरकारते अन्निटकन्ना पेद्दा पदवि आंद. † 2:1 कर वसूल कियनाहाटी राजाल सिरगंति कियालय आदेस हीतोर.

2 कुरिनियुस इनना पोरोलतोर सिरिया एरियाता राज्यपाल मननेके ई सिरगंति आता. इदे मोट्टा मोदाटा सिरगंति आंद.

3 अय्ते सिरगंतिता आदेस दोर्कुताहेंके अंटोर लोकुल्क पोरोलीं रासागोटकुनालय बोना नाटे ओर होत्तुर.

4 अल्हेन योसेप दाविद राजाना वंसमतोर मत्तोर. अदुनहाटी ओर गालिल एरियाता नासरेत नाटेनाल यहुदिया एरियाता दाविद राजाना पुटता नार बेतलहेम इनना नाटेंक होत्तोर.✠‡

5 ओर सिरगंतिहाटीं नार होननेके ओनतोनि एर्ण बोट्टु आसि मत्ता मरियमुन पीसि होत्तोर. अस्के अद पीटे मत्ता.

6 ओर अगा मननेकेन दाना एरपूराना वेला वाता.

7 अद दाना तोल्सूर मरिन कंता. अगा ओर्कु अगालय बेस जेगा दोर्कुवाहेंके मरियम आ पेडन पेगुने हटता, हटसि कोळकते कोंदाक कुटार तासाना डालाते वाटसि इरता.

गोर्रे मेहानोरतोनि पेनदा दूताता वळकुमळ

8 अय्ते अदे नर्का इच्चुर गोर्रे मेहानोर नाटेना पलाते नेलिने ओर ओरा गोर्रेना कावेल कीसेक मत्तुर.

9 अस्के अचानक ओरा मुन्ने उंदि पेनदा दूता वासि नितता. अस्के सामिना महिमाता वेल्गु ओरा सुट्टु एल्गता. अदुन हळसि गोर्रे मेहानोर इरगा वेरियकुत्तुर.

10 अस्के पेनदा दूता ओर्कुन, “मिमेट वेरियमट. नना मीवाहाटीं उंदि बेस कबुर पीसि वातन. इद कबुर अंटोर लोकुल्कुंक बेस आनंदम हीता.

11 इय्याला दाविद राजाना नाटे, मीकुन पिसागोटनोर पुटतोर, ओरे किरिस्तु^S सामि आंदुर.

12 ओन मिमेट एरपाट कियना चिन्ह बतल इत्ते, उंदि कोळकते पेगुने हटसि कोंदांक कुटार तासाना डालाते वरोर सिन्ना पेडल मीकु दिस्सानुर,” इंचि इत्ता.

13 अल्हा इत्ता इन्मळे इंका वेल्लेन पेनदा दूतां वातां. वासि अगा मत्ता पेनदा दूतातोनि कलियसि पेनदुन तल्सकुंचेके,

14 “स्वर्गमते पेनदा कदर आयि, बूमिपोरो अद पावरम कीता लोकुल्कुंक सांति दोर्किंकांटी,” इंचि इनालय दल्गतां.

15 पजा पेनदा दूतां ओर्कुन होळसिसि स्वर्गमते मल्सि होत्तां. अस्के आ गोर्रे मेहानोर वरोक-वरोर, “अय्ते ताकट! मनम बेतलहेम नाटे दाकोम. होचि, सामि मनाकु वेहताप जर्गुता गटनातुन हळकोम,” इंचि इनालय दल्गुतुर.

16 पजा ओर अगटाल बिराना होचि अगा मरियमुन, योसेपुन हळतुर. इंका अगा कोळकते कोंदांक कुटार तासाना डालाते सिन्ना पेडल मत्तदगुडा हळतुर.

17 हळसि, ओर्कु आ पेडाना बारेमते पेनदा दूता बतल वेहतानो, अद पोल्लेतुन आ गोर्रे मेहानोर अंटोर्क वेहतुर.

18 ओर वेहता पोल्लेतुन केंजता हरेक मनकल इचंत्रमते अरतोर.

19-20 पजा आ गोर्रे मेहानोर ओर्क पेनदा दूता बतल अय्ते वेहता, अल्हेन जर्गुतदुन केंजसि, हळसि ओर पेनदुन इरगा स्तुति कीसेके मल्सि होत्तुर. गानि मरियम मात्रम अव अन्नि पोल्लेन दाना मनसुने इरकुचि इदुना अर्तम बतल मरि, इंचेके ऊके विचारम कीसेके मनुंद.

सामिना कय्दे येसुन अप्पजेपंतुर

21 इल्हा आ पेडल पुटसि एनमिदि रोजकु आतस्के ओनाद कतना रिवाज कीतुर. मरियम नेला तप्पका मुन्नेन पेनदा दूता दानकु वेहता परकारम, आ पेडाना पोरोल “येसु” इंचि इरतुर.

✠ 2:4 मीका 5:2 ‡ 2:4 नासरेत नाटेनाल बेतलहेम नार वेल्लेन एत्तुने मंता. आनि दग्गेर-दग्गेरा 150 किलोमिटर लक्कु

मंता. § 2:11 किरिस्तु किरिस्तु इत्ते युनानि बासाते निय होकसि निलाहता वरोर मनकल इंचि अर्तम. यहुदि जातिते पेर्मान, राजान निलाहनेके ओर्कु निय होकसि निलाहंतुर. मनकन ओना पापमताल पिसागोटलय पेन बोन अय्ते निल्हाचि लोहता ओरे किरिस्तु.

22-24 पजा मूसाना नियम परकारम दाना सुद्दिदकरन कियाना वेला वातस्के ओर येस्सलेम गुळिते होतुर. होचि “रोंडु पावरेल्लक हिलाकोटे रोंडु गुळ्वां अयना मोक्कु हियना.”* इंचि मूसाना नियमते रासि मत्ताप मोक्कु हीतुर. अल्हेने मूसाना नियमते, “तोल्लसूर पेडन बस्केळ्ळक सामिक हियना.” इंचि वेहचि मंता. अदुनहाटीं सामिना कय्दे येसुन अप्पजेपतुर. इल्हा ओर सामिना नियम परकारम मोक्कु हियालय येस्सलेम होतुर.

सिमोन येसुना बारेमते पेनदा पोल्ले वेहांतोर

25 अवे त्कुल्लकुने येस्सलेमते सिमोन पोरोलतोर वरोर मनकल मनुंदुर. ओर नीतिमंतुड आनि पेनदा पोल्लेपोर्रीं ताकानोर मत्तोर. इस्राएलता लोकुल्लकुंक पेन बस्के सुकम-सांति हीतनो इंचेके ओर एदुर हळसेक मनुंदुर. ओनतौनि पवित्र आत्मा मत्ता.

26 इंका पवित्र आत्मा, “बदवेरदाका अय्ते निमे, ‘पेन लोहना किरिस्तुन’ हळिन, अदवेरदाका नीकु हामुर वायो,” इंचि ओन्क वेहचि मत्ता.

27 पजा पवित्र आत्मा सिमोनुंक वेहताहेंका, योसेप आनि मरियम गुळितगा वाता रोजे ओरगुडा गुळितगा होतोर. मूसाना नियम परकारम दंडकाल्क कियानाहाटीं पेडाना तल्लुर-बाबो पेडन अगा पीसि वातुर.

28 सिमोन आ पेडन ओरागटाल तेंडकुंचि एतकुत्तोर, एतकुंचि पेनदुन इल्हा स्तुति कियालय दल्गुतोर:

29 “ए सामि, निमे नाकु हीता पोल्ले परकारम नीवा सेवक आता नना,

इंदके सांतिते हाया परांतन.

30 बारित्ते निमे परकुत्ता पिसागोटनोन नना नावा कळ्ळुन निंडा हळतन,

31 निमे ओन दुनियाता अंटोर लोकुल्लकुना मुन्ने पेर्कुत्तिन,

32 वेरे जातिनोर्क बेसता हरिं हुप्सना वेल्गु,

नीवा इस्राएल लोकुल्लकुंक पेनदाहेंदाल दोर्कुता पेद्दातनम ओरे आंदुर.”

33 सिमोन मातरल येसुना बारेमते वळकाना पोल्ले केंजसि, ओना यावल-बाबल इंचंत्रमते अरतुर.

34 पजा सिमोन ओर्क आसिवादि हीसि, येसुना यावल मरियमुंक इल्हा वेहतोर: “हळा, इस्राएलते ई पेडनहेंदाल वेल्लेन मंदि लोकुल्लकुंक नस्टम जगारि अल्हेने वेल्लेन मंदि लोकुल्लकुंक बेसगुडा जगारि. ई पेडल इत्ते पेनदाद उंदि चिन्ह आंदुर. ई चिन्हातुन वेल्लेन मंदि पास्कानुर.

35 इदुनहेंदाल वेल्लेन मंदिता मनसुना विचाराल्क पलाते अरंनुं. गानि नीकु मात्रम उंदि कसेर नीवा गुडेटाल आरपार पेय्शि होत्ताचोन दुक्कम वायार.”

हन्नाल येसुना बारेमते अंटोर्क वेहंता

36 अगा पेनदा कबुर वेहना उंदि मातिर मनुंदु, दान पोरोल हन्ना. अद अस्सेर वंसमते पुटता पनुएल पोरोलतौना मिथ्यड आंद. अद वेल्लेन मातिर आसि मत्ता. मरमि आता एडुं वसनिन दाना मुय्दो हासोत्तोर.

37 इल्हा अद मुंडामोससि एनबै नालुं वर्सां आतां. अद रोज-रोज गुळिते वासेके मनुंदु. अद बस्केळ्ळक ओक्कापोद्दु मंचेके पेनदुक पारतना कियुंदु.

38 सिमोन मातरल योसेप आनि मरियमुनतौनि वळ्ळसेकेन मत्तोर, अस्केन अद ओरा दग्गेर्क वासि पेनदुक दन्यवाद कीता. पजा बोर लोकुल्लक अय्ते, पेन इस्राएल लोकुल्लकुन ओरा तिप्पल्लकुनाल बस्के पेच्चार इंचेक एदुर हळसेक मत्तुरो, आ अंटोर लोकुल्लकुंक आ पेडाना बारेमते अद वेहता.

39 इल्हा सामिना नियम परकारम कियानव अन्नि दंडकाल्क कियमळ मारतारित्ते योसेप आनि मरियम गालिल एरियाते मनना ओरा नासरेत इनना नाटेंक मल्लि होत्तुर.

* 2:22-24 लैव्यवस्ता 12:1-8ते वेहताप उंदि मुरतळ मरिन कनानय्ते नल्लै रोजकुनदाका मुद्दुड मंता.

40 पजा आ पेडल पेद्दा बेर्सतोर. ओन्क पेन ताकत अल्हेने बुद्दिगुडा बेस हीता. दाना दया ओनपोर्रो मत्ता.

येसु येस्सलेम सहरतेन आगांतोर

41 दाटसि होनना पंडुगुनाहाटी† येसुना यावल-बाबल एटा येस्सलेम सहर होनुंदुर.

42 अय्ते येसु पन्नेंड वर्सानोर आतोर, अस्केगुडा एटा होत्ताप येसुन पीसि पंडुगुनाहाटी येस्सलेम होत्तुर.‡

43 पंडुगु मारतंका येसुना यावल-बाबल ओरा नार मल्सि होनालय पेय्सतुर. गानि पेडल येसु मात्रम येस्सलेमतेन आगिसि मत्तोर. अयना इद संगति मात्रम ओना यावल-बाबांक बिल्कुल एरपाट आयाहिल्ले.

44 मनातोनि कलियसि ताकाना मंदितेन मंतोर बारे, इनकुंचि ओर इंकुंदि रोजमेड ताकसेक होत्तुर. पजा ओर ओरा जीवातोकुंन, एरपाटतोकुंन पूसकीसेके पहकालय दल्गुतुर.

45 हीके-हेके पहिकिसि ह्ळतुर गानि येसु ओर्कु दिसा हिल्लोर. अदुनहाटी ओर मर्रा ओन पहकसेक-पहकसेक येस्सलेम वापस होत्तुर.

46 मूड रोजकु आतस्के गुळितगा येसु ओर्कु दिसतोर. अगा ओर यहुदि गुस्कुनतोनि उद्दिसि ओरा पोल्ले केंजसेके इंका ओर्कुन सवालक पूसकीसेके मत्तोर.

47 येसुना उसारतनमतुन आनि जवाब हियानदुन ह्ळसि अगा मत्तोर अंतोर इचंत्रमते अरतुर.

48 ओना यावल-बाबल गुडा ओन ह्ळसि इचंत्रम आतुर. पजा ओना यावल ओन, “निमे मावातोनि इल्हा बारि कीतिन पेडा? नीवा बाबल, नना इरगा परेसान आसि नीकुन बगा-बगा पहकतोम नीकु एके ना?” इंचि पूसकीता.

49 अस्के येसु ओर्कुन, “मिमेट नाकुन बारिक पहकतिट? नना नावा बाबाना लोतेन मनमळ बेस इंचि मीकु तेळियोना?” इंचि इत्तोर.

50 गानि येसु वळकुता पोल्लेना अर्तम मात्रम ओना यावल-बाबांक तेळिया हिल्ले. §

51 पजा येसु ओना यावल-बाबानतोनि कलियसि नासरेत नार होत्तोर. तल्लुर-बाबो वेहता पोल्ले पोर्रेन ताकसेक मनुंदुर. ओना यावल इव अन्नि पोल्ले दाना मनसुने इरसि विचारम कीसेके मनुंदु.

52 इल्हा येसु, बुद्दिदेते, ताकतते बेर्सेके होत्तोर. इंका पेन आनि मनकालोरा नदरतेगुडा बेस ताकुंदुर.

3

योहान पेनदा पोल्लेन वेहांतोर

(मत्तयाल 3:1-6; मरकुस 1:1-5; योहान 1:19-28)

1 तिबेरियुस कैसर इनना वरोर राजाल पूरा रोम राज्येमपोर्रो पेद्दा राजाल मत्तोर. ओर राज्येम कियालय दल्लिसि पदिहेन वर्सा पूरा आतां. अवे त्कुल्कुने पुंतुस पिलातुस इनानोर यहुदिया एरियाता राज्यपाल मत्तोर. अंतिपस हेरोद राजाल गालिल एरियाता राज्यपाल मत्तोर. इंका ओना तम्मुर पिलिप इतुरिया आनि तारकोनितिस इव एरियान पोर्रो राज्यपाल मत्तोर.* लिसानियास इनानोर बारे अबिलेन इनना एरियाता राज्यपाल मत्तोर.

2 अस्के हन्नाल आनि ओना हडे कयपाल इनानोर इव्वुर पेद्दा पेर्मांलोर मत्तुर. अवे त्कुल्कुने बतल आता इत्ते जकर्याहना मर्रि योहान बय्लि जेगाते मननेके ओनगा पेनदा वचनम एत्ता.

† 2:41 दाटसि होनना पंडुगु इजिप्त देसेमता गुलामगिरिताल यहुदि लोक्कुन पेन पेचाहचि तत्ता मतिते, इद पंडुगु कीतुर. गुलामगिरिताल पलाते अरता रोज इजिप्त देसेमता हेरेक लोता पेद्दा मर्रिन पेनदा दूता ह्ळकुता. गानि यहुदिल्लुना लोतोकुंनल बोरे हाया हिल्लुर. ‡ 2:42 यहुदि जातितोर वरोर पेडल पन्नेंड वर्सानोर आतस्के, ओन्क यहुदि जातितोरा अन्नि रिवाजकु आनि मूसाना नियमकुना पालन किया पीता.

§ 2:50 स्वर्गमते मनना पेनबाबाना बारेमते येसु वळकुतोर, गानि ओना यावल-बाबांक मात्रम इद संगति तेळिया हिल्ले. * 3:1 अंतिपस हेरोद राजाल आनि पिलिप ईर इव्वुरगुडा लकाल 1:5 ने मनना पेद्दा हेरोद राजाना मर्कु मत्तुर.

3 अस्के ओर योर्दन बैरेटा सुट्टु-मट्टुना एरियंता इल्हा वेहासेके तिरियुंदु, “कीता पापाल्कुन ओक्कुंचि मनसु मार्सकुंचि बापतिस्मा येतानय्ते, पेन मीवा पापाल्कुन मापि कीता.”

4 इल्हा यसायाह इनना पेनदा कबुरतोर वेल्लेन वर्सा मुन्ने रासतद इंदके निजम आता. अद पोल्ले इल्हा मत्ता:

“बय्लि जेगाते केयानद उंदि अल्किर केंजा वांता,
सामि मीवा मनसुने वायनाहाटी हरि तयार कीम्ट,
इंका ओना हर्कुन सवरगा कीम्ट.

5 इत्ते, अन्नि लोदिदं-लौंका निंडमळ गावाले,
अन्नि गुट्टां-गट्टुक समानम आयमळ गावाले.
वंकर-डिंकर मत्ता हर्कु अन्नि, सवरगा आयमळ गावाले.
उतार-बोगडा मत्ता हर्कुगुडा, समानम आयमळ गावाले.

6 अस्के अंतोर लोकुल्क पेन मुक्ति हियानदुन हळंतुर.” ✱

योहान लोकुल्कुन तेरहंतोर
(मत्तयाल 3:7-12)

7 योहानुनाहेंदाल बापतिस्मा† येतानाहाटी लोकुल्क पेद्दा मंदांनां-मंदां वातुर. अस्के बापतिस्मा हियना योहान ओर्कुन, “ए कट्टला तरासनसंतोरिता! पेनदा होंगुनाल तपिचकुनालय बापतिस्मा येतट इंचि मीकु बोर वेहतुर?

8 अय्ते मरि, निजमे मीवा मनसु मार्सकुत्तिर इंचि रूजुव कीसि हुप्सट. वट्टिदे, मोमोट अब्राहामुना वंसमतोरम आंदुम, इंचि बस्केने इनकुनमट. नना मीकु निजम वेहांतन, पेन अब्राहामनाहाटी ई बंडानालगुडा पिलाल्क पुट्टिचि हिया परंता.

9 इंदके मराकुना हिहकुनगा मर्सु इरसि मंता. बव मराकुंक अय्ते बेसता पांडि हादोंगों, अबुन नर्किसि तडमिते वाटमळ जर्गता,” इंचि इत्तोर.

10 “अय्ते इंदके मोमोट बतल कियना मरि?” इंचि आ लोकुल्क योहानुन पूसकीतुर.

11 अस्के योहान, “बोनगा रोंडु अंगिं मंतां, ओर ओनद उंदि अंगि, अंगि हिल्वोंकु हियना आनि बोनगा अय्ते गाटो मंता, ओरगुडा हिल्वोंकु तूस कीसि हियना,” इंचि वेहतोर.

12 बापतिस्मा येतनाहाटी अगा कर वसुल कियानोरगुडा वासि मत्तुर. ओर लोकुल्कुन वेल्लेन मुळाहिचि मत्तुर. ओरगुडा, “मोमोट बतल कीकोम गुरूजी?” इंचि पूसकीतुर.

13 अस्के योहान, “सरकार मीकुन बच्चोन जमा कियालय वेहता, अचोने जमा कीम्टु, दानकन्ना एक्को जमा कियमट,” इंचि ओर्कु वेहतोर.

14 अस्के इच्चुर सिपाइल्कगुडा ओनगा वासि, “अय्ते मोमोट बतल कीकोम मरि?” इंचि पूसकीतुर. अस्के योहान ओर्क, “मीकु दोर्कना पगारतेन मिमेट कूस मंडु, बोरहेकटाले आयि बेदरिच्चि हिलाकोट्टे आबद्दम तप्पु दोस्सि कोत्तां येतमट,” इंचि वेहतोर.

15 पेन लोहना पिसागोटनोर बिरानेन वायानुर इंचेके लोकुल्क बेस आसेते एदुर हळसेक मत्तुर. अदुनहाटी योहानुन हळसि, वायनद मत्ता किरिस्तु ईर अय्ते आयोर गदा, इल्हा अंतोर ओरद-ओर मनसुल्कुने इनकुनुंदुर.

16 अस्के योहान ओरा मनसुना विचारमतुन एरपाट कीसि ओर अंतोर्कुन, “नना अय्ते मीकु बापतिस्मा एततोने हीतन. गानि बोर अय्ते वायानोर मंतोर, ओर नाकन्ना एक्को ताकततोर मंतोर. ओर केरसि मत्ता हेरपुहकुन इट्टना विलुवागुडा नाकु हिल्ले. ओर मीकु पवित्र आत्मा आनि तळमितोनि बापतिस्मा हीतोर.

✱ 3:6 यसायाह 40:3-5 † 3:7 योहानुनाहेंदाल बापतिस्मा योहानुना बापतिस्मा इत्ते, नावा पळाना पिस्वरतुन होळसि, पूना पिस्वर पिस्संतन इंचि हुप्सालय एते मुडगिसि तेदमळ.

17 ओना कयदे हेती मंता. ओर ओना कडातुन बेस साप कीतारित्ते गोहकुन तूरपाल्क पीसि गुम्मिते दोसंतोर, पोट्टुनबावे बस्केने पिर्फ्वा तडमिते वाटसि बोळसंतोर,” इंचि इत्तोर.

18 इल्हा योहान वेल्लेन पोल्लेन कराहसेक, ओर्क बेसता कबुर वेहुंदुर.

योहान येसुक बापतिस्मा हीतोर

(मत्तयाल 3:13-17; मरकुस 1:9-11)

19-20 पजा बतल आता इत्ते, गालिल एरियाता राजाल हेरोद, ओना तम्मुर पिलिप पिस्सि मननेकेन ओना मुत्तो हेरोदियास इनानदान ओनगा तच्चि इरकुत्तोर. हेरोद राजाल ओना अंगेनतोन कीता पापम, इंका वैरे-वैरे वेल्लेन तप्पु कबाहकुनाहाटी हेरोद राजान योहान तेराहतोर. अदुनहाटी हेरोद राजाल योहानुन जेलने वाटसि, ओना तप्पुकुने इंकुंदि तप्पु कल्पकुत्तोर.*

21 योर्दन बेरेटे योहान वेल्लेन लोकुकुक बापतिस्मा हीसेक मत्तोर. अस्के येसुगुडा अगा वासि योहानुना कयदे बापतिस्मा एततोर. बापतिस्मा एततंका येसु पारतना कियनेके मब्बु अंता बैयरा आता.

22 अस्के पवित्र आत्मा पावरेम पिट्टे रूपमते वासि ओनपोर्गे रेयतस्के, स्वर्गमताल उंदि अल्किर इल्हा केजावाता. “निमे नावा पावरमगल्ला मरिन आदिन, नना नीकुन वेल्लेन जीवा कीतन, नीवा लोप्पो नना वेल्लेन आनंदमते मंतन.”

योसेपुना वंसम

(मत्तयाल 1:1-17)

23 येसु सेवा कियना कबळः सुस्व कीतस्के ओर दग्गेर-दग्गेरा मुप्पे वर्सानोर मत्तोर. लोकुकुक येसुन, योसेपुना मरि इनकुनुंदुर. योसेप एलि पोरोलतोना मरि आंदुर.

24 एलिना बाना पोरोल मत्तातु, मत्तातुना बाना पोरोल लेवि, लेविना बाना पोरोल मल्कि, मल्किना बाना पोरोल यान्ना, यान्नाना बाना पोरोल योसेपु.

25 योसेपुना बाना पोरोल मत्तियाल, मत्तियाना बाना पोरोल आमोस, आमोसुना बाना पोरोल नाहोम, नाहोमुना बाना पोरोल एस्लि, एस्लिना बाना पोरोल नागय्या.

26 नागय्याना बाना पोरोल मयातु, मयातुना बाना पोरोल मत्तियाल, मत्तियाना बाना पोरोल सिमय्या, सिमय्याना बाना पोरोल योसेकु, योसेकुना बाना पोरोल योदाल.

27 योदाना बाना पोरोल योहानन, योहानननुना बाना पोरोल रेसाल, रेसाना बाना पोरोल जेस्बाबेल, जेस्बाबेलना बाना पोरोल सलितिएल, सलितिएलना बाना पोरोल नेरी.

28 नेरीना बाना पोरोल मल्कि, मल्किना बाना पोरोल अदिदि, अदिदिना बाना पोरोल कोसाम, कोसामुना बाना पोरोल एलमादामु, एलमादामुना बाना पोरोल एराल.

29 एराना बाना पोरोल यहोसु, यहोसुना बाना पोरोल एलियाजर, एलियाजरना बाना पोरोल योरिमु, योरिमुना बाना पोरोल मत्तातु, मत्तातुना बाना पोरोल लेवि.

30 लेविना बाना पोरोल सिमोन, सिमोननुना बाना पोरोल यहुदल, यहुदाना बाना पोरोल योसेपु, योसेपुना बाना पोरोल योनामु, योनामुना बाना पोरोल एलकिमु.

31 एलकिमुना बाना पोरोल मल्लयाल, मल्लयाना बाना पोरोल मिन्नाल, मिन्नाना बाना पोरोल मत्तातु, मत्तातुना बाना पोरोल नातानु, नातानुना बाबल दाविद राजाल.

32 दाविद राजाना बाना पोरोल थिस्सल, थिस्साना बाना पोरोल ओबेद, ओबेदुना बाना पोरोल बोआज, बोआजुना बाना पोरोल सलमोन, सलमोननुना बाना पोरोल नहसोन.

33 नहसोननुना बाना पोरोल अमिनादाब, अमिनादाबुना बाना पोरोल अदमिन, अदमिननुना बाना पोरोल अरनि, अरनिना बाना पोरोल हेसरोन, हेसरोनुना बाना पोरोल पेरस, पेरसना बाना पोरोल यहुदा.

34 यहुदाना बाना पोरोल याकोब, याकोबुना बाना पोरोल इसाक, इसाकुना बाना पोरोल अब्राहाम, अब्राहामुना बाना पोरोल तेराहाल, तेराहाना बाना पोरोल नाहोर.

* 3:19-20 मत्तयाल 14:3; मरकुस 6:13 † 3:23 येसु सेवा कियना कबळ लोकुकुक पेनदा पोल्लेन कराहना कबळ.

35 नाहोस्ना बाना पोरोल सस्मा, सस्माना बाना पोरोल रेऊ, रेऊना बाना पोरोल पेलेग, पेलेगुना बाना पोरोल एबेराल, एबेरालना बाना पोरोल सेलाल.

36 सेलाना बाना पोरोल केनान, केनानुना बाना पोरोल अरपक्सद, अरपक्सदना बाना पोरोल सेमु, सेमुना बाना पोरोल नोहाल, नोहाना बाना पोरोल लामेक.

37 लामेकुना बाना पोरोल मतुसेल, मतुसेलना बाना पोरोल हनोक, हानोकुना बाना पोरोल यारेद, यारेदुना बाना पोरोल महलेल, महलेलना बाना पोरोल केनान.

38 केनानुना बाना पोरोल अनोस, अनोसुना बाना पोरोल सेतु, सेतुना बाना पोरोल आदाम, आदाम पेनदा मरिं मत्तोर.

4

पेद्दा देय्यम येसुना परिकसा येतंता

(मत्तयाल 4:1-11; मरकुस 1:12-13)

1 पजा येसु योर्दन बेरेटाल बापतिस्मा एतसि पवित्र आत्माते निंडतस्के, पेनदा आत्मा ओन बय्लि जेगाते पीसि ओता.

2 अगा नत्तै रोजकुनदाका पेद्दा देय्यम ओना पट्टु हळता. अव रोजकुने येसु बतले तिना हिल्लोर. अदुनहाटीं अव रोजकु मारतस्के येसुंक इरगा कर्वेस्ता.

3 अस्के पेद्दा देय्यम ओनगा वासि, “ओक्कला निमे पेनदा मरिंन आते ई बंडां हारिं आयिं इंचि आदेस हीम,” इंचि ओन इत्ता.

4 इत्तस्के,

“मनकल सिराप वट्टि हारिं तिचे पिस्सोर,

गानि पेनदा तोळदाल पेय्सना, उंदि-उंदि पोल्लेताहेंदाल पिस्संतोर.

इल्हा दर्मसास्त्रमते रासि मंता,”* इंचि येसु दान्क जवाब हीतोर.

5 पजा पेद्दा देय्यम येसुन उंदि एत्तु जेगाते पीसि ओसि, उंदे मल्का दुनियाता अन्नि राज्येल्क हुपिस्ता.

6 हुपिच्चि, “इव अन्नि राज्येल्कनपोर्रीं अदिकारम आनि अवुना पेद्दातनम नीकु हीतन. बारिल्ले अव अन्नि राज्येल्क नाके हियमळ जर्गता. नना इद अदिकारम बोन्क इत्ते ओन्क हिया परांतन.

7 अदुनहाटीं, निमे नावा काल्क मोळकानय्ते इव अन्नि नीवांगे आंतां,” इंचि पेद्दा देय्यम इत्ता.

8 अस्के,

“निमे नीवा पेनदुने मोळकना, सिराप दानादे सेवा कियना,*

इल्हा दर्मसास्त्रमते रासि मंता,”

इंचि येसु दान इत्तोर.

9 आयंका पेद्दा देय्यम येस्सलेमते मनना गुळितगा येसुन ओसि, गुळि पोर्रीं कोस्सक निल्लहाचि इल्हा इत्ता, ओक्कला निमे पेनदा मरिंन आते हिळु दुनका.

10 बारिल्ले,

“नीकुन कापाळालय पेन दाना दूतांक आदेस हीता,

आनि आ दूतां वासि, नीवा काल्कुंक देब्बां दल्गामन्नि इंचि,

नीकुन पोर्रीटद पोर्रींन अंदकुंतां,

11 इल्हा दर्मसास्त्रमते रासि मंता.”*

12 अस्के येसु दान्क इल्हा जवाब हीतोर.

“निमे सामि इनना नीवा पेनदा पट्टु हळमा, इल्हागुडा वेहतद मंता.”*

* 4:4 व्यवस्ताविवरन 8:3

* 4:8 व्यवस्ताविवरन 6:13

* 4:11 बजन संहिता 91:11-12

* 4:12

13 इल्हा पेद्दा देय्यम अन्नि तीस्कुने येसुना पट्टु हळतारित्ते, दान्क इंकुदि मोका दोर्कनदाका ओन होळसि होता.

येसु सेवा कबळ सुस्व कीतोर

(मत्तयाल 4:12-17; मरकुस 1:14-15)

14 पजा येसु पवित्र आत्माता ताकतते निंडसि गालिल एरियाते वापस वातोर, अस्के गालिल एरियाता अन्नि नाहकुनोर ओना बारेमतेन वळ्कुंदुर.

15 येसु ओरा दर्मसास्त्रम कराहना लोहकुने होंचि पेनदा पोल्लें करहुंदुर. अंतोर ओन बेस कराहतोर इंचि कदर हिय्युंदुर.

येसुन ओना नाटेनोर हयसा हिल्लुर

(मत्तयाल 13:53-58; मरकुस 6:1-6)

16 पजा येसु सिन्नास्केटाल बेर्साता नार नासरेतते होत्तोर. वारमता नोमकेम रोजुने ओना अलवट परकारम दर्मसास्त्रम कराहना लोते होंचि, दर्मसास्त्रम हदवालय निततोर.

17 अस्के यसायाह इनना पेनदा कबुरतोर रासता पुस्तकम ओन्क हीतुर. ओर आ पुस्तकमते उंदि पोल्ले दोर्किच्चि, इल्हा हदवालय सुस्व कीतोर:

18 “पेनदा पवित्र सेवक इल्हा वेहचंतोर, पेनदा आत्मा नावापोर्रो वाता.

गरिबोर्कुंक बेसता कबुर वेहालय, पेन नाकुन अबिसेकम कीता.

दोहचि वाटसि ओतोर्कुन, पेन होळसीता इंचि वेहालय,

गुड्डोर्कुन, मिमेट हळंतोर इंचि वेहालय,

तकलिपते मनानोर्कुन, तकलिपताल तेंडालय,

19 पेन दया कियना वेला एत्ता, इंचि वेहालय नाकुन लोहता.”*

इल्हा रासि मत्तदुन हदुवतोर.

20 हदुवमळ आतारित्ते, पुस्तकमतुन बंद कीसि वरोर चपरासिक हीसि कराहलय येसु हिळु उदुतोर. आ दर्मसास्त्रम कराहना लोते मत्ता अंतोरा नदर ओनहेकेन मत्ता.

21 अस्के, “इय्याला मिमेट केंजतव दर्मसास्त्रमता पोल्लें, मीवा मुन्ने नावा कयदाल पूरा आतां,” इंचि येसु ओर्कुन इत्तोर.

22 “ओर बेस वेहतोर, बेस-बेसतां पोल्लें ओना तोळदाल पेय्सुंदुं,” इंचेके ओर अंतोर इचंत्रम आतुर. आसि ओर, “ईर अय्ते योसेपुना मर्रे गदा?” इंचि इत्तुर.

23 अस्के येसु ओर्कुन इल्हा इत्तोर, “ ‘मत्तु हियानोना! नीवद निमेने बेस कीस हुप्सा,’ इंचि उंदि सात्रम मत्ताप, मिमेट इंका नाकुन तप्पाकोटा इतिर, इत्ते, ‘कपर्नाहुमते निमे कीता अदूबूताल्कुना बारेमते मोमोट केंजतोम, अव अदूबूताल्क नीवा संतम नाटेनेगुडा कीम,’ इंचि इतिर.

24 नना मीकु निजम वेहांतन, बोरे पेनदा कबुरतोक आयि, ओना नाटेनेन ओन्क कदर मन्नो.

25 अद बल्हा इत्ते, पेनदा कबुरतोर एलियाहना* कालमते बतल जर्गुता मीकु एर्केना? अस्के पूरा देसेमते मूड वर्सा हांर नेल्कुनदाका परिर् वाया हिल्ले, अदुनहाटीं वेल्ले कर्वु अर्सि मत्ता. नना मीकु निजम वेहांतन, अद वेलाते इस्त्राएल देसेमते वेल्लेने मुंडामोस्ता मुर्ताहक मत्तां.

26 गानि बदे मुंडामोस्ता मुरतटगा सहायम कियनाहाटीं पेन एलियान लोहा हिल्ले. ओन सिराप सिदोन सहर दगोटा सारपत नाटेना वैरे जातिता मुंडामोस्ता मुरतटगा लोहता.*

27 अल्हेने पेनदा कबुरतोर एलिसाना† कालमते इंका कुस्टरोगम आतोर इस्त्राएल देसेमते वेल्लेटुरे मत्तुर. गानि ओराव्टेटाल वरोन इंका बेस कियालय पेन एलिसान लोहा हिल्ले. सिराप सिरिया देसेमता

* 4:19 यसायाह 61:1-2; 58:6 * 4:25 एलियाह एलिया इनना पेनदा कबुरतोर येसुंकन्ना 850 वर्सा मुन्ने मत्तोर.

* 4:26 1 राजा 17 † 4:27 पेनदा कबुरतोर एलिसाना एलियाल होत्तंका ओना जेगाते एलिसा इनना पेनदा कबुरतोर पेनदा कबुर वेहना कबळ कियुंदुर.

नामान इनानोने बेस कीतोर, ✱ इल्हा बोरे पेनदा कबुरतोंक आयि, ओना नाटेनेन ओन्क कदर मन्नो, ”
इंचि वेहतोर.

28 इग्राएल लोकलुकुन होळसि, वेंरे देसेमता लोकलुकुन पेन सहायम कीता इंचि येसु वेहतस्के,
दर्मसास्त्रम कराहना लोते उदिस मत्तोर अंटोर्क इरगा होंग वाता.

29 होंग वातस्के ओर तेदसि, येसुन ओरा नाटेनाल पलाते गुंजिस ओतुर. ओरा नार उंदि गूट्टापोरों
मत्ता. येसुन गूट्टा पोरोटाल दोब्बिसि हियालय एत्तु मत्तगा ओतुर.

30 गानि येसु ओरा नड्डुमताल पेय्सि होत्तोर.

देय्यम पीतोन येसु बेस कीतोर
(मरकुस 1:21-28)

31 अगटाल येसु ओना सिस्युलुकुनतोनि गालिल एरियाता कपर्नाहुमः नाटे होत्तोर. अगा वारमता
नोमकेम रोजुननाड पेनदा पोल्लेँ कराहमळ सुस्व कीतोर.

32 ओर इच्चोन अदिकारमते करहुंदुर गदा, ओना कराहमळतुन केंजसि लोकलुक इचंत्रम आतुर.

33 अगा दर्मसास्त्रम कराहना लोते वरोर देय्यम पीता मनकल मत्तोर. ओर येसुन हळसि जोरते
वरगेयसि केयतोर,

34 “ए नासरेत नाटेना येसु! मातोनि नीकु बाता कबळ? माकुन नासडेम कियालय वातिना? निमे
बोन आदिनो नाक एरपाटे, निमे नासरेत सहरता येसुन, पेनदा पवित्र मनकन आदिन,” इत्तोर.

35 अस्के येसु ओनालोप्पो मत्ता देय्यमतुन, “चुपचाप मन! ओनागटाल पलाते पेयसा,” इंचि
गदरिचतोर. अस्के, अद ओन हिळु अरहचि, ओन्क बतले नोपि कियाकोटा, ओना लोप्पोटाल
पेय्सि होत्ता.

36 अगा मत्तोर लोकलुक इचंत्रम आसि, वरोंक-वरोर वळकालय दलगतुर, “इद बसोंटा पोल्ले
आंदु? ओर अदिकारमते, ताकतते देय्यालुकुंक आदेस हीतोर, अव पेय्सि दांतां!” इंचि इत्तुर.

37 इल्हा येसुना पोल्लेँ सुट्टु-मट्टु मत्ता अन्नि नाहकुने तेळियसि होत्ता.

येसु उंदि बिमार मुरताटुन बेस कीतोर
(मत्तयाल 8:14-15; मरकुस 1:29-31)

38 येसु दर्मसास्त्रम कराहना लोताल पेय्सि सिमोन इननोना लोन होत्तोर. अगा सिमोनना पोरळकु
बागा एळकि वासि मत्ता. दाना एडकितुन बेस कियालय ओर येसुन विनंति कीतुर.

39 अस्के येसु दाना दग्गेरा नित्तिसि एडकितुन गदरिचतस्के दाना एळकि रेय्ता. पजा अद बिराना
तेदसि, ओरा सेवा कियालय दलगता.

येसुनाहेंदाल वेल्लेटुर बेस आतुर
(मत्तयाल 8:16-17; मरकुस 1:32-34)

40 पजा पोळद होनना वेलाक तीरतीरकुना बिमार्क मत्तोर्कुन लोकलुक ओनगा पीसि वातुर. अस्के
येसु वरोन-वरोनपोरों कय इरसि, ओर्कुन बेस कीतोर. §

41 वेल्लेटोर्कुन देय्यालुक पीसि मत्तां. अव देय्यालुकुन येसु गददरिचिचि पेचाहतोर. देय्यालुक
ओरागटाल पेयसनेके, येसु किरिस्तु आंदुर इंचि एरपाट कीसि, “निमे पेनदा मरिन आदिन” इंचेके
जोरते वरगेयसेके पेयसुंदु. गानि येसे किरिस्तु आंदुर इंचि अव एरपाट कियुंदु इंचि येसु अवुन वळका
हिया हिल्लोर.

येसु वेंरे-वेंरे नाहकुने दांतोर
(मरकुस 1:35-39)

✱ 4:27 2 राजा 5:1-14 ‡ 4:31 कपर्नाहुम कपर्नाहुम नार नासरेत नाटक मुपै किलोमिटर लक्कु मंता. अद गालिल
सेरबुना ओड्डुनपोरों मंता. § 4:40 नोमकेम रोजुने यहदिलुकु बतले कबळ कियाकोदुर, पय्नेम होनाकोदुर. सेनेरम पोळद
होतस्के नोमकेम रोज मासुंदु. अदुनहाटी पोळद होंचि बिमारकुनोर्कुन येसुनगा तत्तुर.

42 पंगातस्के येसु, नाटुन होळसि बोरे हिल्वगा ओटिगा होतोर. गानि लोकुल्क ओन पत्किसि-पत्किसि दोर्किच्चि, निमे माकुन होळसि होनमा इंचि आपालय हळतुर.

43 गानि येसु ओर्कुन इल्हा इतोर. “पेन मनकालोरगा राज्येम कियना बेसता कबुरतुन नाकु वेरे नाहकुने इका वेहा पीता. इदे कबळताहाटी पेन नाकुन लोहता,” इतोर.

44 पजा येसु, यहुदिया एरियाते यहुदिल्कुना दर्मसास्त्रम कराहना लोहकुने होंचि पेनदा पोल्ले वेहुंदुर.

5

पत्रु, याकोब आनि योहान येसुना पज्जो दांतुर
(मत्तयाल 4:18-22; मरकुस 1:16-20)

1 उंदि रोजु येसु गेनेसरेत* इनना समुद्रमतगा नित्तिसि पेनदा पोल्ले वेहासेक मत्तोर. येसु ओड्डुनपोरी नित्तिसि पेनदा पोल्ले वेहनेके, आ पोल्ले केंजालय अगा वेल्लेने लोकुल्क ओना सुट्टु जमा आतुर.

2 अस्के येसु समुद्रम ओड्डुनगा रौडु डोंगन हळतोर. जिम्मां पियानोर डोंगानाल रेय्सि ओरा ओल्लां नोर्सेक मत्तुर.

3 येसु, अव डोंगानाल वरोर सिमोन पत्रु इननोना डोंगाते एकतोर. एकसि, अंटोर्क बेस केंजा वायना इंचि अद डोंगातुन ओड्डुनाल इच्चुर लक्कु ओसि निप्पा इंचि वेहतोर. ओर डोंगातुन लक्कु निपिस्ता पजा, येसु डोंगाते उद्दिदिसि लोकुल्कुक पेनदा पोल्ले वेहालय दलगतोर.

4 पेनदा पोल्ले वेहमळ आता पजा, “डोंगातुन वेल्ले लोतु मत्तगा ओसि मिमेट ओल्लां मर्रा वाटट,” इंचि येसु सिमोनन इतोर.

5 अस्के, “गुरु! मोमोट नर्का पल्ही तिप्पल्क अरतोम, माकु उंदिका जिम्मा दोर्काहिल्ले, गानि निमे इंचेके मंतिन अदुनहाटी नना ओल्ला वाटंतन,” इंचि सिमोन इतोर.

6 पजा सिमोन आनि ओना दंटातुर येसु वेहताप कीतुर अयते वेल्लेने जिम्मां अर्सि ओरा ओल्लां हरालय आतां.

7 ओल्लां हरतां बारे इंचि वेरे डोंगाते मत्ता ओरा दंटातोर्कुन आसरा आयालय सय्ये कीसि केयतस्के, ओर वासि रौडु डोंगाने जिम्मां निहतुर, अस्के ओरां रौडु डोंगा इका मुळगालय आतां.

8-9 वेल्लेने जिम्मां अरतद हळसि, सिमोन पत्रु आनि ओना दंटातुर वेल्ले इंचंत्रम आतुर. अस्के सिमोन येसुना काल्कुना पोरी अरसि, “सामि, नना पापि मनकन आंदुन, नीवा दग्गेरा मनना लायक हिल्लेन,” इंचि इतोर.

10 अल्हेने जब्दि इननोना मर्क याकोब, योहान, ईर सिमोन पत्रुना दंटातोरे आंदुर, इंचंत्रम आतुर. अस्के, “निमे वेरिय्या, गानि इंदकेटाल निमे मनकालोर्कुन पीसि वायानोन आकिन,” इंचि येसु सिमोनन इतोर.

11 पजा ओर ओरा डोंगां ओड्डुंक तत्तुर. तच्चि अव अन्नि अग्गेन होळसि ओना पज्जो होतुर.

येसु कुस्ट रोगमतोन बेस कीतोर
(मत्तयाल 8:2-4; मरकुस 1:40-44)

12 उंदि रोजु येसु उंदि सहरते मत्तोर. अगा वरोर मनकल कुस्टरोगमते पूरा निडसि मत्तोर. ओर येसुन हळसि ओना काल्कुनपोरी अर्सि, “सामि, निमे इन्कुत्ते नाकुन बेस किया परांतिन,” इंचि विनंति कीतोर.

13 अस्के येसु कय मुन्नेळक कीसि ओन इट्सि इल्हा इतोर, “निमे बेस आयगोम इंचि मनसु मंता, बेस आम,” इंचि इत्ता इन्मळे ओना कुस्टरोगम पुरागा होत्ता.

* 5:1 गेनेसरेत दीन गालिल इंचिगुडा इतुर.

14 पजा, “इगे जर्गतद बोनके वेहमा. गानि निमे होंचि मीवा पेमीक हुप्सा. पजा मूसाल वेहता मोक्कु हीम. अस्के निमे बेस आतिन इंचि लोकुलकुंक एरपाट आंता,”^{*} इंचि येसु ओन्क गट्टिगा वेहतोर.

15 निमे बोर्के वेहमा इंचि येसु वेहचि मत्तोर गानि ओना पोल्ले मुन्नेटकन्ना एक्को लोकुलकुंक तेळियसेक होत्ता. अदुनहाटी वेल्लेन लोकुलक ओना पोल्लें केंजालय, बिमारकुनाल बेस आयालय ओना पज्जो-पज्जो वायुंदुर.

16 गानि येसु बोरे हिल्वगा अलग-सलग होंचि पारतना कियुंदुर.

येसु लकवा बिमारतोन बेस कीतोर

(मत्तयाल 9:1-8; मरकुस 2:1-12)

17 येसु उंदि रोज वरोन लोन पेनदा पोल्लें वेहनेके, अगा परिसिल्क,[†] आनि दर्मसास्त्रम कराहना गुस्लक उदिस मत्तुर. ओर गालिल आनि यहुदिया एरियाना अन्नि नाहकुनाल, अल्हेने येस्सलेम सहरताल वासि मत्तुर. पेनदा ताकत येसु सामिनगा मत्ताहेंके बिमारतोकुंन बेस कियुंदुर.

18 हूळा! अस्के इच्चुर लोकुलक वरोर लकवा बिमारतोन कटुलते वाटसि येसुनगा तत्तुर. तच्चि येसु उद्दिदिस मत्तगा लोप्पो ओयालय हूळतुर.

19 गानि अगा वेल्ले गर्दि मत्ताहाटी ओर लोता लोप्पो ओया पराहिल्लुर. अस्के ओर बतल कीतुर इत्ते लोतपोर्रो एकतुर, कटुल पियानच्चो बोंगा कीसि येसु लोप्पो बगा अय्ते उदिस मत्तोरो ओन्क सवरगा आ लकवा बिमारतोन कटुलक कटुले ओना मुन्ने रेहतुर. 20 येसु, ओरा विस्वासमतुन हूळसि, “कोको, नीवा पापालक मापि आतां,” इंचि लकवा बिमारतोन इत्तोर.

21 अस्के दर्मसास्त्रम कराहना गुस्लक आनि परिसिल्क केंजसि, “पेनदा अपमानम कियानोर, ई बोर आंदुर? पेनदुन होळसि इंका बोरे पापालकुन मापि किया पर्र,” इंचि ओर-ओरे मनसुने विचारम कियालय दल्गतुर.

22 येसु सामि, ओरा मनसुना विचारमतुन एरपाट कीसि, “मी मनसुने इसोंटा विचारम बारि कीतिर?

23 बद अल्कगा मंता? ई बिमारतोन, ‘नीवा पापालक मापि आतां’ इनमळा? हिलाकोटे, ‘तेदिस ताका’ इनमळा?

24 गानि मनकना रूपमते पुटतोन नाकु, ई बूमिपोर्रोटा पापालकुन मापि कियना अदिकारम मंता इंचि मीकु हुप्संतन,” इत्तोर. इंचि, “नना नीकु वेहासेके, निमे तेदसि कटुल पीसि लोन होन,” इंचि लकवा बिमार आतोन इत्तोर.

25 अस्के ओर बिराना अंठोरा मुन्ने तेदसि, बद कटुलते अय्ते ओर मींडसि मत्तोर अद कटुल पीकुंचि, पेनदुन तल्सकुंचेके लोन होत्तोर.

26 अद हूळसि, अगा मत्तुर अंठोर वेल्लेन इंचंत्रम आसि, पेनदुन तल्सकुनालय दल्गतुर. पजा वेरियसि, “इदवेरादाका मोमोट बस्केने इसोंटा इंचंत्रम आयना कबाहक हूळा हिल्लोम,” इंचि इनालय दल्गतुर.

कर वसुल कियना लेवि इनानोन येसु केयतोर

(मत्तयाल 9:9-13; मरकुस 2:14-17)

27 पजा येसु अगटाल होननेके, कर वसुल कियना नाकातगा लेवि‡ पोरोलता वरोर कर वसुल कियानोन हूळतोर. हूळसि ओन, “नावा पज्जो वा,” इंचि इत्तस्के

28 ओर, ओनगा मत्तव अन्नि अग्गेन होळसि ओना पज्जो होत्तोर.

29 पजा लेवि येसुन ओना लोन केय्सि, उंदि पेद्दा बोजनम हीतोर. अगा वेल्लेटुर कर वसुल कियानोर, इंका वैरेटोर लोकुलक येसुनतोन उद्दिदिस गाटो तिचेके मत्तुर.

^{*} 5:14 लैब्यवस्ता 14:1-32 † 5:17 परिसिल्क इत्ते इगे परिसिल्कुना गेंगोर मत्तुर.

‡ 5:27 लेवि लेवि येसुना सिस्सुड आतोर, पजा ईना पोरोल मत्तयाल इंचि अरता. मत्तयाल रासतद बेसता कबूर ई रासतोर.

30 अस्के परिसिल्क आनि ओरा दर्मसास्त्रम कराहना गुस्लक येसुना सिस्स्युल्कुनगा वासि, “कर वसुल कियानोरतोनिS आनि पापि लोकुल्कुनतोनि मिमेट तिनुळ-उनुळ बारि तितिर,” इंचि गुल्गालय दल्गत्तुर.

31 अस्के येसु ओर्कु इल्हा जवाब हीतोर, “बिमार हिल्वोर्कुंक डाक्टरना अक्सरम मन्नो गानि बिमार मत्तोर्कुंक डाक्टरना अक्सरम मन्ता.

32 नना नीतिमंतुल्कुन केयालय आयो गानि पापि लोकुल्कुन मनसु मार्सकुननाहाटी केयालय वातन,” इंचि इत्तोर.

ओक्कापोद्दुना बारेमते येसु कराहता पोल्ले
(मत्तयाल 9:14-17; मरकुस 2:18-22)

33 पजा अगा मत्ता लोकुल्क येसुन इल्हा पूसकीतुर, “योहानुना सिस्स्युल्क अयते ऊके ओक्कापोद्दु मनंतुर, पारतनागुडा कीतुर. अल्हेने परिसिल्कुना सिस्स्युल्कगुडा कीतुर, गानि नीवा सिस्स्युल्क अयते बस्केळक तिचेक-उंचेके मनंतुर. अल्हा बारि?”

34 अस्के येसु ओर्क इल्हा वेहतोर, “मरमिन पेडल मरमिं वाता हेडमितोरतोनि मननेके, ओर्कुन ओक्कापोद्दु मना वेहा परकिटा? वेहा परिर.

35 गानि मरमिन पेडल ओरागटाल लक्कु आयाना रोजकु वायनुं, अव रोजकुने ओर ओक्कापोद्दु मनानुर.”

36 पजा, येसु ओर्क इंकुंदि वेसुडि वेहतोर. “बोरे आयिर, पूना कप्पिडतुन हराह्चि पळाना कप्पिड्क अंटा वाटिस कुट्टोर. ओक्कला ओर अल्हा कियानयते पूना कप्पिड अयते हेळसि दांते, अल्हेने पूना कप्पिडता तुकडा पळाना कप्पिड्क सोकगुडा दिस्सो.

37 अल्हेने पूना अंगुर पानकमतुन, पळाना तोलपुर्कते बोरे दोस्सुर. अल्हा दोसते अद अंगुर पानकम, पळाना तोलपुर्कतुन हराह्चि पोंगिस दांता. पजा आ तोलपुर्कागुडा नासडेम आंता.

38 अल्हा कियवा पूना अंगुर पानकम पूना तोलपुर्कतेन दोसना. अस्के तोलपुर्कतुन हरहो.

39 बोरे आयिर, पळाना अंगुर पानकम उट्टारित्ते, पूना अंगुर पानकम गावाले इन्नोर. ओर पळाना अंगुर पानकमे बेस मंता इंचि वेहांतोर.”

6

नोमकेम रोजुना मालक येसु आंदुर
(मत्तयाल 12:1-8; मरकुस 2:23-28)

1 उंदि नोमकेम रोजुने येसु पोलाल्कुनाल होंचेके मत्तोर. होननेके ओना सिस्स्युल्क हेनकु उरहाचि कयदे नल्सि तिचेके होत्तुर.

2 इच्चुर परिसिल्क अदुन हळसि, “नोमकेम रोजुने बद कबळ अयते कियमळ नियम परकारम ओज्जोनों, अदे कबळ मिमेट बारि कीसंतिर?” इंचि येसुन पूसकीतुर.

3 अस्के येसु ओर्कुन, “दाविदुंक आनि ओना दंतातोर्कुंक कर्वेस्तस्के ओर बतल कीतोर, मिमेट हदवा हिल्लिरा?

4 ओर पेनदा लोते होळियसि, पेनदुक मोळकता हारिन तित्तोर,✱ ओना दंतातोर्कुंकगुडा हीतोर.✱ अव हारि तिनमळ इत्ते दर्मसास्त्रम परकारम विरोदमते मत्ता. अव हारि सिराप पेर्मालोर्क तप्पा इंका बोरे तिना पर्र,” इंचि इत्तोर.

5 पजा, “मनकना रूपमते पुटतोन नना, नोमकेमता रोजुना मालकगुडा आंदुन,” इंचि येसु ओर्कुन इत्तोर.

S 5:30 कर वसुल कियानोर ईर रोम सरकारनाहाटी कर वसुल कियुंदुर. आनि यहूदि लोकुल्क रोम सरकारनाहाटी कबळ कियानोर्कुन हय्साकोंदुर. ✱ 6:4 लैव्यवस्ता 24:9 ✱ 6:4 1 समएल 21:1-6

नोमकेम रोजुने येसु वरोर मनकन बेस कीतोर
(मत्तयाल 12:9-14; मरकुस 3:1-6)

6 अल्हेने इंकुंदि नोमकेम रोजुने येसु दर्मसास्त्रम कराहना लोन होंचि कराहसेक मत्तोर. अगा वरोर तिना कय वत्सोत्ता मनकल मत्तोर.

7 अद लोतगा इच्चुर दर्मसास्त्रम कराहना गुस्लक आनि परिसिल्क मत्तुर. नोमकेम रोजुने येसु ओन बेस कीतोर किय्योरा? बेस कियानय्ते, नोमकेम रोजुने बल्हा बेस कीतोर इंचि तप्पुने पियालय हळसेक मत्तुर.*

8 गानि येसु मात्रम ओरा विचाराल्कन एरपाट कीसि, “तेदसि अंटोरा मुन्ने नित्ता,” इंचि कय वत्सोत्तोन इत्तोर, इत्तस्के ओर तेदसि मुन्ने वासि निततोर.

9 पजा येसु ओर्कुन इल्हा पूसकीतोर, “नना मीकुन उंदि पोल्ले पूसकीतन वेहाट. नियम परकारम, नोमकेम रोजुने बेस कियमळ मंचिदा, कराब कियमळ मंचिदा? हिलाकोटे उंदि जीवातुन पिसागोटते मंचिदा, नासडेम कियमळ मंचिदा? बद बेस” इत्तोर.

10 येसु अंटोरहेके हळतोर. पजा, “नीवा कय मुन्नेळ्क हहा,” इंचि आ कय वत्सोत्तोन इत्तोर. ओर कय मुन्नेळ्क हाहतस्के ओना कय बेस आता.

11 गानि परिसिल्कुंक आनि दर्मसास्त्रम कराहना गुस्लकुंक होंग वासि, ओर पलाते पेय्स्तुर. पेय्स्से, येसुन बतल कीते सरे? इंचि ओर-ओरे विचाराल्क कियालय दल्गतुर.

येसु पन्नेंड मंदि प्रेरितुल्कन पेरतोर
(मत्तयाल 10:1-4; मरकुस 3:13-19)

12 पजा उंदि रोज पारतना कियालय येसु गुट्टापोर्री होत्तोर. अगा ओर नर्का-पल्हें पेनदुक पारतना कीतोर.

13 पंगातस्के ओना सिस्स्युल्कन अंटोर्कुन दगोर्क केय्स्सि ओराव्हेटाल पन्नेंड मंदिनुन पेरतोर. पेरसि ओर्कुं, प्रेरितुल्क इंचि पोरोल दोसतोर. येसु पन्नेंड मंदिनुन पेरकुत्तोर ओरे प्रेरितुल्कां इंचि पोरोल दोसतोर.

14 पन्नेंड मंदि बोर-बोर इत्ते, सिमोन (ईन पत्रु इंचि येसु पोरोल दोसतोर),[☆] सिमोनना तम्मुर अंदरियल, जब्दिना मर्क याकोब आनि योहान, पिलिप, बरतलमय,

15 मत्तयाल (ईर कर वसुल कियना लेवि आंदुर, ईन मत्तयालगुडा इत्तुर), तोमल, अल्पिना मर्री याकोब, सिमोन जिलोति[‡]

16 तद्दिदे यहदल (ईना बाना पोरोल याकोब) आनि इस्कारियोत नाटेना यहदल (ई यहदले आकिरते येसुन पगातोर कय्दे पीसि हीतोर).

बिमार मत्तोर्कुन येसु बेस कीतोर
(मरकुस 3:7-12)

17 पजा येसु ओना सिस्स्युल्कनतोनि गुट्टा पोर्रीटाल हिळ्ळ रेय्स्सि, सपाट जेगाते वासि निततोर. अगा ओना वेल्लेन मंदि सिस्स्युल्क मत्तुर. अचोने आयाका पूरा यहुदिया एरिया, येस्सलेम सहर, समुद्रम ओड्डु पीसि मत्ता सू, सिदोन इनना सहरकुनाल वेल्लेटुर लोकुल्क ओनगा जमा आसि मत्तुर.

18 ओर अंटोर येसु वेहता पोल्लें कैजालय, बिमारकुनाल बेस आयालय वासि मत्तुर. बोर्कु अय्ते देय्याल्क पीसि मत्तंगो ओरगुडा वासि बेस आतुर.

19 ओनागटाल पेनदा ताकत वासि ओर अंटोर्कुन बेस कियुंदु, अदुनहाटीं आ मंदि अंता ओन इट्टालय हळसेक मत्तुर.

* 6:7 मनकन बेस कियमळ इद इंका उंदि कबळ्लेसी मंता इंचि परिसिल्क इनुंदुर. अदुनहाटीं नोमकेम रोजुने ओर बतले कियनाकोंदुर. गानि पेनदा साब्रमते असोंटा नियम रासि हिल्ले. † 6:13 प्रेरित इद पोरोल्क, पेन लोहचीतोर इंचि अर्तम. येसु पन्नेंड मंदिनुन पेरकुत्तोर ओरे प्रेरितुल्क आंदुर. ☆ 6:14 योहान 1:42 ‡ 6:15 जिलोति रोम सरकारता विरोद कियना पारिंतोर.

पेन बोर्कुन बेस हळंता?
(मत्तयाल 5:1-12)

20 पजा येसु ओना सिस्युल्कुन हळसि इल्हा इत्तोर,
“मिमेट बोर अय्ते गरिब मंतिरो, पेन मीकु आसिर्वाद हीता,
पेनदा राज्येम मी असंतोरदे आंदु.

21 मिमेट बोर अय्ते इंदके कर्बुने मंतिट,
पेन मीकु आसिर्वाद हीता, मीवा करवु सल्लारंता.

बोर अय्ते इंदके अळसेके मंतिट, पेन मीकु आसिर्वाद हीता,
वायना रोजकुने मिमेट कळ्सेक मनंतिर.

22 मनकना रूपमते पुटता पेनदा मरिंना सिस्युल्क आताहाटी,
बस्के अय्ते लोकुल्क मीकुन हय्साकोंटा आंतुर, गेदमिसीतुर,
अपमानम कीतुर, मिमेट हेळसोत्तिर इंचि, मीवा पोरोल एताकोंटा आंतुर,
अस्के मीकु पेन आसिर्वाद हीता.

23 ओरा एनकटा पेद्दाल्कगुडा मीकन्ना मुन्नेटा पेनदा कबुरतोर्कुन,
इल्हेने तकलिप कीतुर. अदुनहाटी हळ्ळाट! मीक तकलिप वातस्के,
मिमेट कुसिते एगरट, स्वर्गमते मीकु पेद्दा इनाम मंता.”
इंचि इत्तोर.

24 मर्रां येसु इल्हा इत्तोर,

“ए दनवंतुल्कुनिटा! मीकुन पेन बेस हळो,
बारित्ते, मीकु सिराप इग्गेटा सुकम-सांते दोर्कता.

25 इंदके पीरनिंडा तिनना लोकुरिटा! मीकुन पेन बेस हळो, मुन्ने मिमेट कर्बुने मंदकिर.
इंदके कव्वाोनोरिटा! मीकुन पेन बेस हळो, वायना रोजकुने मिमेट दुक्कमते अळकिर.

26 इंदके अंतोराहेंदाल कदर दोर्किचकुत्तोरिटा! मीकुन पेन बेस हळो,
बारित्ते बोर अय्ते मीक कदर हीतुर, ओरा एनकटा पेद्दाल्कगुडा,
मुन्नेटा पेनदा आबद्दम कबुरतोर्क कदर हियुंदुर.
आ आबद्दम कबुरतोर्क दोर्कताप, मीकुगुडा सिक्सा दोर्कार.”

पगातोर्कुन पावरम कियना
(मत्तयाल 5:38-48; 7:12)

27 इंदके नावा पोल्लें केंजानोरिटा! नना मीक वेहानद बतल इत्ते, मीवा पगातोर्कुन पावरम कीम्ट.
मीकुन हय्सवोर्कुन बेस हळ्ळाट.

28 बोर अय्ते मीकु सापनेम हीतोर ओन्क आसिर्वाद हीम्ट. बोर अय्ते मीकुन सिडांचंतोर,
ओनाहाटी पारतना कीम्ट.

29 बोरन्ना नीवा सेंपापोरें तंते ओनाहेके इंकुंदि सेंपागुडा तिरहा. बोरन्ना नीवा कोट तेंडकुत्ते, ओन
नीवा अंगिगुडा ओया हीम.

30 बोरन्ना नीकुन बतलन्ना तल्कते, अद ओन्क हीम. बोरन्ना मिहागटाल बतलन्ना तेंडकुत्ते,
अदुन वापस तल्कमट.

31 लोकुल्क मीवातोनि बल्हा मनना इंचि मिमेट इनकुंतिरो, अल्हेन मिमेट ओरतोनि मंटु.

32 मीकुन पावरम कियानोर्कुने मिमेट पावरम कीति, मीकु पेनदाहेंदाल बता पायदा दोर्कता?
पापिर्कगुडा ओर्कुन पावरम कियानोर्कुन पावरम कीतुर.

33 मीकुन बेस हळानोर्कुंके मिमेट बेसता कबाहक कीसि हीते, मीकु पेनदाहेंदाल बतल पायदा
दोर्कता? पापि लोकुल्कगुडा अल्हे कीतुर.

34 बोर वापस हीतुरो ओर्के बाकिक हीते, मीकु पेनदाहेदाल बतल पायदा दोर्केता? पापि लोकुलकगुडा वापस दोर्केतां इत्ता आसेते बाकिक हीतुर.

35 अल्हा क्रियाकोटा मिमेट मीवा पगातोर्कुन पावरम कीसि ओर्कुन बेस हुळाट. बाकि वापस दोहंतोर इंचि आसे इर्कोटा बाकि हीम्ट. अस्के पेन मीकु पेद्दा इनाम हियार, मिमेट अन्नितकन्ना पेद्दा पेनदा मर्क-मियाह्क आकित. बारित्ते, बोर अयते पेनदुन मति किय्युर आनि कराब मंतुर असोटा लोकुलकुनपोर्रो इंका पेन दया कीता.

36 मीवा पेनबाबाल दया कियानोर आंदुर, अदुनहाटीं मिमेटगुडा दया कियानोर आम्ट.

इंकावरोन पोर्रो तप्पु दोसमट
(मत्तयाल 7:1-5)

37 “मिमेट वैरेतोरपोर्रो दोसेम दोसमट, अस्के मीपोर्रोगुडा पेन दोसेम दोस्सो. मिमेट वैरेतोर्कुन, ‘दोसिल्क,’ इंचि इनमट, अस्के पेन मीकुनगुडा ‘दोसिल्क,’ इंचि इन्नो. मिमेट वैरेतोर्कुन मापि कीम्ट, अस्के मीकुनगुडा पेन मापि किय्यार.

38 अब्सरम मत्तोर्कु बीसकेतनम क्रियाकोटा हीम्ट, अस्के पेन मीकुगुडा हिय्यार. तव्वाते बेस निहचि, अदमिसि, कुदलिचि, पोंगानाल मीवा ओटिते वाटताप, पेन मीकु हिय्यार. बारित्ते, बद कोल्लाते मिमेट हीतिरो, अदे कोल्लाते मीकु हियमळ जर्गता.५”

39 मर्रा येसु ओर्क उंदि वेसुडि वेहतोर: “वरोर गुड्डि मनकल, इंकावरोर गुड्डि मनकंक हर्रि हुप्सा परांतोरा? अल्हा कीते, ओर इव्वुरगुडा पोक्कातेन अर्रतुर.५

40 सिस्सुड ओना गुंक्कन्ना पेद्दा आया परोर, गानि गुंन्ना पूरा करियसि ओर गुंनलेसीं आंतोर.

41 “नीवा कळ्दे अरता सिक्कुन तेंडका, नीवा दंटातोना कळ्दे अरता बुस्सितुन निमे बारि तेंडा हळंतिन?

42 नीवा कळ्देन सिक्कु अर्सि मननेके, नीवा कळ्दे अरता बुस्सितुन तेंडाहीम इंचि नीवा दंटातोना बल्हा इना परांतिन? ए डोंगि मनका! मोदाला नीवा कळ्दा सिक्कुन तेंडा. अस्के नीवा दंटातोना कळ्दा बुस्सितुन तेंडालय नीकु बेस दिस्सार.”

रोंडु तीरकुना पंडिं
(मत्तयाल 7:16-20; 12:34-35)

43-44 “पंडितुन हळ्से, मिमेट मरातुन एरपाट कीकिर. बेसता मराकु कराब पंडिं हादों, कराब मराकु बेसता पंडिं हादों. हाह्कुना जप्पिताल अंगुर पंडिं हादों हिलाकोटो ईरामुस्टी मराकुनाल मरका पंडिं हादों.

45 बारित्ते, मनसुने मनना पोल्लेगे तोळ्दाल पलाते पेयसंतां. अदुनहाटीं बेसता मनकल ओना मनसुने मनना बेसता पोल्लेगे पेच्हांतोर, अल्हेने कराब मनकल ओना मनसुने मनना कराब पोल्लेगे पेच्हांतोर.”

रोंडु तीरकुना लोकुलक
(मत्तयाल 7:21-29)

46 “नना वेहता पोल्लेन केंजिर अयते नाकुन सामि सामि इंचि बारि इंतरि?

47 बोरे आयिर नहगा वासि, नावा पोल्ले केंजिसि, दाना परकारम ताकाना हरेक मनकल, ओर बसंतोर आंदुर वेहंतन केंजाट.

48 ओर बसंतोर इत्ते, लोन दोहनेके पायवा लोत तव्विसि, बंडातोनि पुनादि दोहचि लोन दोहतोर. बस्के अयते कम्मुड वाता, एता तडां वासि लोतुक दल्यातां. अयनागानि अद लोन कूला हिल्ले. बारित्ते, अद लोन गट्टिगा दोहचि मत्ता.

49 गानि नावा पोल्लें केंजसि दाना परकारम ताकवा मनकल बसंटोर इत्ते, लोन दोहनेके पुनादि दोहाकेन बूमिपोर्री लोन दोहतोर. बस्के अयते एता तडां वासि लोतुक दल्गतां. अस्के अद लोन पूरा कूल्लिस पाड आता,” इंचि येसु ओर्कुन इत्तोर.

7

येसु वरोर अदिकारिना सेवाकुन बेस कीतोर
(मत्तयाल 8:5-13)

1 लोकुकुकुंक वेहना मत्ता अन्नि पोल्लें वेहतारित्ते येसु कपर्नाहुम होत्तोर.

2 अगा वरोर रोम सरकारता दरोगाल मत्तोर. ओना वरोर दासुड बिमारते हायनाल आसि मत्तोर. ओन दरोगाल बागा पावरम कियुंदुर.

3 आ दरोगाल येसुना बारेमते बस्के अयते केंजतोर, अस्के इच्चुर यहुदि पेद्र दाल्कुनतोनि, “मिमेत येसुनगा होंचि, ‘दरोगाना दासुड बागा बिमारते मंतोर, ओन बेस कियालय नीकुन वा इंचि वेहालय माकुन लोहतोर,’ इंचि वेहाट,” इत्तोर.

4-5 ओर येसुनगा वासि, “आ दरोगाल बेसतोर आंदुर, ओर मावा यहुदि लोकुकुकुन पावरम कीतोर. ओर मावाहाटी दर्मसास्त्रम कराहना लोनगुडा दोहचीतोर, अदुनहाटी निमे ओन्क सहायम कीम,” इंचि येसुन बतिमलाडसेके विनंति कीतुर.

6 अस्के येसु ओरतोनि पेय्सतोर. ओर दरोगाना लोतुक दगोरा एवतस्के, ओर ओना दंटातोर्कुन येसुनहेके इल्हा वेहालय लोहतोर. “सामि, निमे तकलिप अरमा. निमे नावा लोन वायानच्चो पेद्र दातनम नहगा हिल्ले.*

7 अचोने आयका नना नीकु कलियाना लायकगुडा हिल्लेन. अदुनहाटी निमे सिराप उंदि पोल्ले इन, नावा जीतागाड बेस आंतोर.

8 बारित्ते, ननागुडा वरोर अदिकारिना कयदा हिळु कबळ कीतन. नावा कयदा हिळुगुडा सिपाइल्क मंतुर. नना बोना वरोन ‘होन’ इत्ते ओर दांतोर, इंकावरोन ‘वा’ इत्ते ओर वांतोर. इंका नावा दासुन, ‘इद कीम’ इत्ते ओर कीतोर.”

9 इद केंजसि येसुंक वेल्ले इंचंत्रम आता. अस्के पजोळ्क तिरियसि, ओना पज्जो वासेक मत्ता मंदितुन इल्हा इत्तोर, “नना वेहानद केंजट, इस्राएल लोकुकुकुन लोप्पोगुडा इच्चोन विस्वासम मत्ता मनकल नाकु बग्गेन दोर्का हिल्ले.”

10 येसु सामिनहेके लोहचीता दंटातोर मल्लिस दरोगाना लोन वातस्के ओना दासुड बेस आसि दिसतोर.

येसु वरोर हाता मनकन जीवा अरहंतोर

11 पजा येसु नाईन इनना नाटेनहेके पेय्सतोर. ओनतोनि ओना सिस्स्युल्क इंका वेल्लेटुर लोकुकुल्क मत्तुर.

12 येसु नाटेने होळियाना गेटुना दग्गेर्क एवतोर, अच्चोटेन वरोन हातोन बोदा दोसालय ओसेके मत्तुर. हातोना यावल मुंडामोसि मत्ता. दानकु ईर वरोर मर्री मत्तोर. नाटेनोर वेल्लेटुर लोकुकुल्क दानतोनि पेय्सतुर.

13 येसु सामिक दान हळसि दया वाता, अस्के “निमे अळमा बाई,” इंचि,

14 दगोरा होंचि पाडेतुन इत्तोर. अस्के पाडेतुन कांजानोर अग्गेन आगतुर. अस्के येसु, “पेडा तेदा!” इंचि हातोन इत्तोर. †

15 इत्तस्के, आ हासोत्ता पेडल तेदिस उद्दिदिसि वळकालय दल्गतोर. पजा येसु ओन ओना यावंक अप्पजेपतोर.

16 अगा मत्तोर अंतोर्क वेरें दल्गता, ओर वेरियसि, “पेन दाना लोकुकुकुंक सहायम कियालय वाता, मना नड्डुम दाना पेद्र दा कबुरतोन लोहचीता,” इल्हा इंचेके पेनदुन तल्सकुनालय दल्गतुर.

* 7:6 यहदिल्क वेरे जातितोर लोहकुने होनाकोंदुर. † 7:14 मसाना नियम परकारम, पाडेतुन इत्ते मुद्रुड इंचुंदुर.

17 येसुना इद पोल्ले यहुदिया एरिया आनि पक्का पीसि मत्ता अन्नि नाहकुने तेळियसि होत्ता.

योहान ओना सिस्स्युल्कुन येसुनहेके लोहंतोर
(मत्तयाल 11:2-6)

18-19 जर्गतव इव अन्नि पोल्लेना बारेमते, बापतिस्मा हियना योहान जेलने मननेके ओना सिस्स्युल्क होचि ओन्क वेहतुर. अस्के ओर, ओना सिस्स्युल्कुनाल इव्वुर्कुन केय्सि, “बोर अयते पिसागोटनोर वायानद मत्ता, ओन निमेन ना? हिलाकॉटे मोमोट इंकावरोना एदुर हळमळा?” इंचि पूसकियालय ओर्कुन सामिनगा लोहतोर.

20 अस्के ओर सामिनगा वासि, “गुरु, ‘बोर अयते पिसागोटनोर वायानद मत्ता, ओन निमेन ना? हिलाकॉटे मोमोट इंकावरोना एदुर हळमळा?’ इंचि नीकुन पूसकियालय, बापतिस्मा हियना योहान माकुन लोहतोर,” इंचि इत्तुर.

21 अस्केने येसु, बिमार मत्तोर्कुन, नोपिनोर्कुन, देय्याल्क पीसि मत्तोर्कुन इल्हा वेल्लेटोर्कुन बेस कीतोर, वेल्लेटुर गुड्डोर्कुना कळकु दिस्सानाल कीतोर.

22 पजा ओर्कु इल्हा जवाब हीतोर. “इंदके मिमेट बतल अयते हळतिर, केंजतिर अद होचि योहानुंक वेहट. गुड्डोर्क हळसंतुर, कुंटोर्क ताकसंतुर, कुस्टरोगम आतोर बेस आसंतुर, सेव्टोर्क केंजसंतुर, हातोर्कुंक जीवां अरसंतां आनि गरिबोर्कुंक बारे बेसता कबुर एवसंता.

23 बोर अयते नावा बारेमते अन्समन्स किय्योर, ओन्के आसिर्वाद दोर्कता,” इंचि इत्तोर.

येसु योहानुना बारेमते वेहंतोर
(मत्तयाल 11:7-19)

24 योहानुना सिस्स्युल्क अगटाल पेय्सि होत्तस्के, योहानुना बारेमते लोक्कुंक येसु इल्हा वेहालय दल्गतोर, “मिमेट बय्लि जेगाते बतल हळालय होत्तिर? वळिक ऊंगना जाडितुना?

25 हिलाकॉटे मिमेट बतल हळालय होचि मत्तिर? मेत्तटा कपडिं केर्ता मनकन हळालय होत्तिरा? हुळाट! मेत्तटा कपडिं केर्तानोर आनि सिरमंतुल्क राजवाडाने मनांतुर, बय्लि जेगाते आयो!

26 अयते मरि मिमेट बतल हळालय होत्तिर? पेनदा कबुरतोन हळालय होत्तिरा? हो! नना मीकु वेहासेक मंतन, मिमेट बोन अयते हळतिर ओर पेनदा कबुरतोनकन्ना बच्चोरो पेद्दा मंतोर.

27 ओना बारेमते पेन मुन्नेने इल्हा वेहचि मत्ता.

“हळा! नना नीकन्ना मुन्नेने नावा कबुरतोन लोहंतन,

निमे वायानाहाटीं ओर हरिं तयार कीतोर.”[☆]

इंचि दर्मसास्त्रमते रासि मंता.

28 “नना मीकु वेहानद बतल इत्ते, पुटुरावेटाल योहानुंकन्ना पेद्दा बोरे हिल्लोर. अयनागानि पेनदा राज्येमते सिन्ना मनकलगुडा योहानुंकन्ना पेद्दोडे,” इंचि वेहतोर.

29 अस्के वेल्लेटुर लोक्कुल्क आनि कर वसुल कियानोरगुडा येसु वेहता पोल्लेन केंजतुर. केंजसि, पेनदा हरिं नीतिता हरिं, इंचि इत्तुर. ओर्क अंतोर्क योहान मोदालेन पेनदा पोरोलते बापतिस्मा हीसि मत्तोर.

30 गानि परिसिल्क आनि मूसाना नियम बेस तेळियतोर बारे योहानुनाहेंदाल पेनदा पोरोलते बापतिस्मा एतुवा, पेन ओर्क हुपिस्ता हर्दे ताका हिल्लुर.

31-32 मर्रा येसु इल्हा वळकालय दल्गतोर, “ई पीळिता लोक्कुल्क बोरालेसीं मंतुर इंचि, ओर्कुन बोरा लोप्पो कल्पकन? मिमेट अयते चौकुने उद्दिदिसि, वरोंक-वरोर केय्सि,

“मोमोट मीहाटीं दुक्कमता पाटां पारतोम, अयना मिमेट अळा हिल्लिर.

मोमोट मीहाटीं त्रीला उहकुतोम, गानि मिमेट एग्रा हिल्लिर,

इंचि इनना पिलाल्कुनालेसीं मंतिर.”

33 “अल्हेने बापतिस्मा हियना योहान एक्कोते एक्को ओक्कापोद्दु मनुंदुर. अंगुर पंडिना पानकमगुडा उनाकोंदुर, अयना मिमेट ओन, देय्यम पीता इंचि इत्तिर.

34 गानि मनकना रूपमते पुटतोन नना तिचेके-उंचेके वातन. गानि मिमेट मात्रम, ‘हुळाट, ओर बच्चोर तितोर, बच्चोर अंटोर? कर वसुल कियानोर आनि पापि लोकुल्क ओना दंटातोर आंदुर,’ इंचि नाकुन इत्तिर.

35 गानि पेनदा बुद्दि नीतितद आंद इंचि, दाना बुद्दिदेते ताकानोर कियाना कबाहकुन पोर्रोटाल तेळियंता.”

पापि मुरतळ येसुना काल्कुंक अत्तर निय होकता

36 उंदि मल्का सिमोन इनना वरोर परिसि मनकल ओना लोन गाटो तिनालय येसुन केयतोर. अस्के येसु ओना लोन होंचि गाटो तिनालय उदतोर.

37 हुळाट! आ नाटेने उंदि पापि मुरतळ मत्ता. येसु वरोर परिसिन लोन गाटो तिचंतोर इंचि दान्क तेळियतस्के अद उंदि बंडाता गुर्गिते बेस गमागमा गब्बु वायना अत्तर निय पीसि वाता.

38 वासि येसुना पज्जो नित्तिसि अळसेके दाना कळ्कुनाल पोंगाना एरतोनि येसुना काल्कुन नहालय दलगता. पजा दाना केल्कुनतोनि उसुमसेके, ओना काल्कुन बुर्सेके अत्तर निय होकुंदु.‡

39 अल्हा कियानद हळसि, बोर अयते येसुन केयतोर ओ आ परिसि इल्हा इन्कुत्तोर गदा, “इद अयते पापि मुरतळ आंदु! ईर निजमे पेनदा कबुरतोर आसि मत्ते, ओन इट्टानद बसोंटा मुरतळ आंद इंचि ओन्क तेळियसि मनवळ. पापि मुरतळ इटते मूट्टुळ इंचि दान इट्टा हियाकोन्नेर,” इंचि ओर इनकुत्तोर.

40 अस्के येसु ओना मनसुन एरपाट कीसि, “सिमोन, नीकुन उंदि पोल्ले पूसकियना मंता,” इंचि इत्तस्के ओर, “वेहा गुरूजी,” इंचि इत्तोर.

41 अस्के येसु उंदि वेसुड वेहतोर, “इव्वुर मनकालोर वरोर सावकारनगटाल बाकि तेंडतुर, वरोर बारे हेय्युं न्हकु, इकावरोर बारे एबै एंडि बॉडि.

42 गानि ओर बाकि दोहा पराहिल्लुर. अदुनहाटीं सावकार ओरा इव्वुरा बाकितुन मापि कीतोर. अयते इंदके ओरा इव्वुरा लोप्पोटाल सावकारन बोर एक्को पावरम कीतोर, वेहा?” इंचि पूसकीतोर.

43 अस्के, “बोर अयते एक्को बाकि मत्तोर, ओरे एक्को पावरम कियानुर बारे,” इंचि सिमोन इत्तोर. इत्तस्के, “निमे बरोबर वेहतिन,” इंचि येसु ओन इत्तोर.

44 येसु मुरतटहेके तिरियसि सिमोनन इल्हा इत्तोर, “निमे ई मुरताटुन हळा. नना नीवा लोन वातन, निमे नावा काल्क नोर्रालय एरगुडा हिय्या हिल्लिन. गानि इद बारे दाना कांडेहकुनतोनि नावा काल्कुन नाहचि, केल्कुने उसुमता.‡

45 निमे नाकुन बुर्सि जोहार किया हिल्लिन, गानि नना लोप्पो होळियतस्केटाल इद नावा काल्कुन बुर्सेके मंता.

46 निमे नावा तल्लक निय होकसि नाकु कदर हिया हिल्लिन, गानि इद नावा काल्कुंक वेल्लेन दराता अत्तर निय होकता.

47 अदुनहाटीं नना नीकु वेहानद बतल इत्ते, दाना अन्नि पापाल्क मापि आतां इंचि अद वेल्लेन पावरम कीता, गानि बोनद इच्चुने पापम मापि आता, ओर इच्चुने पावरम कीतोर.”

48 पजा येसु, “नीवा पापाल्क मापि आतां,” इंचि आ मुरतटुन इत्तोर.

49 अस्के, “ईर बोर आंदुर, ओनद ओर पेन इन्कुंचि, पापाल्कुन मापि कीतोर?” इल्हा ओनतोनि गाटो तिचेक उदिस मत्तुर अंटोर ओरद-ओरे वळ्कुकुनालय दलगुत्तुर.

‡ 7:38 यहूदिलक गाटो तिनालय उदतस्के ओर मडगदूदे वाट्सि उद्दुर. टेबलहेके वगिसि, काल्कुन गोडचो पज्जोळ्क मल्हाचि उद्दुर. अदुनहाटीं आ मुरतळ पज्जोटाल वासि येसुना काल्कुन बुर्सेके निय वळियापती. § 7:44 यहूदि रिवाजते, लोन बोर्नना वाते ओर्कु काल्क नोर्रालय एर हीसि बुर्ली बुर्लीतुर.

50 पजा, “निमे नावापोर्रो विस्वासम कीताहाटीं पेन नीकु मुक्ति हीता, निमे सांतिते होन,” इंचि येसु आ मुरतटुन इत्तोर.

8

इच्चुं मुर्ताहक येसुना पज्जो दांतां

1 पजा इल्हा जर्गुता गदा, येसु अन्नि सहरकुने, नाहकुने पेनदा राज्येमता बारेमता बेसता कबुर वेहासेके तिरियालय दल्गतोर. ओनतोनि पन्नेड मंदि प्रेरितुल्क मत्तुर.

2 अगा देय्याल्कुनाल, बिमारकुनाल बेस आतव इच्चुं मुर्ताहकगुडा ओरतोनि मत्तां. अव मुर्ताहकुनाल उंदि मगदलेनि नाटेनद मरियम पोरोलता मुरतळ मत्ता. येसु दानगटाल एडुं देय्याल्कुन पेचाह्चि मत्तोर.

3 इंकुंदि मुरतळ योहानि इनानद, हेरोद राजाना दिवांजि कोजा इननोना मुत्तो मत्ता. अल्हेने सुसान्नल आनि वेल्लेन मुर्ताहकगुडा मत्तां. इवन्नि मुर्ताहक येसु आनि ओना सिस्स्युल्कुना सेवाताहाटीं अवुना संतम कोत्तन कर्स कियुंदुं.

विज्जां तासाना वेसुडि

(मत्तयाल 13:2-15; मरकुस 4:1-12)

4 अल्हेने उंदि रोजु वेरे-वेरे नाहकुनाल वेल्लेटुर लोकुल्क येसुनगा वासि जमा आसेक मत्तुर, अस्के येसु ओर्क उंदि वेसुड वेहतोर. अद इल्हा मत्ता.

5 “वरोर कास्तकारि मनकल विज्जां वीतालय पेय्स्तोर, विज्जां वीतनेके इच्चुं विज्जां हरदगा अरतां. अव विज्जन हर्रि पीसि होनानुर-वायानुर जारतुर, पजा अवुन पिट्टे वासि पेर्सि तित्तां.

6 इच्चुं विज्जां बंडाना जेगाते अर्सि अव मोलियतां. गानि अगा पदन दोर्कवाहाटीं वत्सि हासोत्तां.

7 इच्चुं विज्जां हाहकुना पोदाने अरतां. अवुनतोनि हाहकुना पोदांगुडा बेर्सि अव विज्जन बेर्सा हिया हिल्ले.

8 इच्चुं विज्जां बेसता जेगाते अरतां. अव बेस मोलियसि नूर अंताल्कुना पंटा पेय्स्ता,” इंचि वेहचि, “बोर्कु केंजालय केव्क मंतां ओर केंजट,” इंचि जोरते इत्तोर.

9 “ई वेसुडिता अर्तम बतल गुफु?” इंचि ओना सिस्स्युल्कु पूसकीतुर.

10 अस्के येसु ओर्कुन इल्हा इत्तोर, “मीक अयते पेनदा राज्येमता बारेमता मर्ममतुन एरपाट कीकुनालय बुदिद मंता. गानि वेरेतोर्कुंक बारे वेसुडिने वेहांतन. इल्हा कीते

“ओर नावा कबाहकुन ह्ळांतुर, गानि अव कबाहकुन अर्तम कीकुन्नुर.

ओर केंजांतुर गानि तेळियागोटकुन्नुर.”✱

विज्जां वीताना वेसुडिता अर्तम

(मत्तयाल 13:18-23; मरकुस 4:13-20)

11 “इद वेसुडिता अर्तम इल्हा मंता, विज्जां इत्ते पेनदा पोल्ले आंदु.

12 बोर अयते पेनदा पोल्लेतुन केंजतुर गानि, ओर विस्वासम कीसि ओर्कु मुक्ति दोर्कामनि इंचि देय्यम वासि ओर केंजतवुन ओरा मनसुनाल तेंडसि पोहंता. असंतोर इत्ते, विज्जां अरता हर्दा जेगातसंतोर आंदुर.

13 विज्जां अरता बंडाना गेर्से जेगातसंतोर बोर इत्ते, बोर अयते पेनदा पोल्लेतुन कुसिते केंजसि दान ओप्कुंतुर. गानि ओरा मनसुने पेनदा पोल्ले गट्टिट पळुवाहाटीं, ओर कोन्नि रोजके विस्वासमते मंतांतुर. पजा पट्टु ह्ळना वेला वातस्के विस्वासमताल ओर लक्कु आंतुर.

14 विज्जां अरता हाहकुना पोदाना जेगातसंतोर बोर इत्ते, बोर अयते पेनदा पोल्ले केंजांतुर गानि विस्वासमते मननेके सम्सारमता रंदि, दनमता आस्ति, दुनियाता सुकाल्क इव अन्नि ओर्कुन पेनदा पोल्लेन लोप्पो बेर्सा हिय्यो. अदुनहाटीं पेनदा पोल्लेनहेंदाल ओर्क बतल पायदा वायो.

15 गानि विज्जां अरता बेसता जेगातसंटोर बोर इत्ते, बोर अय्ते पेनदा पोल्लेन सत्तेम, बेस मनसुने केंजसि, अव पोल्लेन मनसुने ईरंतुर. पजा ओर्क बच्चोन तकलिप वायना गानि ओप्केते बेसता कबाहक कीतुर, असंटोर इत्ते विज्जां अरता बेसता जेगातसंटोर आंदुर,” इंचि इत्तोर.

पेनदा पोल्ले वेलगु हीता
(मरकुस 4:21-25)

16 “बोरे आयिर वेडसि निरिच्चि गंजुना हिळु मुच्चोर, कटुल हिळुगुडा ईरंतुर. गानि लोप्पो होळियानोर्क बेस वेलगु दिसगोम इंचि दान उंदि दीसोडिपोर्री ईरंतोर.

17 अल्हेने मक्किस मत्तव अन्नि दिसि अर्राकौटा मन्नों, आनि मर्ममते मत्तव बवे पलाते अर्राकौटा मन्नों.

18 अदुनहाटीं बेस मनसु तासि केंजट. बारिल्ले, बोनगा अय्ते पेनदा पोल्लेन तेल्लिचकुनना बुद्दिद मंता, पेन ओन्क इंका हीता. गानि बोनगा अय्ते पेनदा पोल्लेन तेल्लिचकुनना बुद्दिद हिलाकोन्ना, मंता इनकुंतोर, अदुनगुडा पेन एतकुन्नार,” इंचि येसु ओर्कु वेहतोर.

येसुना सिस्सुल्के ओना निजम जीवातोर
(मत्तयाल 12:46-50; मरकुस 3:31-35)

19 अस्के येसुना यावल, ओना तम्मूहक ओनगा कलियालय वातुर. गानि गर्दि मत्ताहाटीं ओर ओनकु कलिया पराहिल्लुर.

20 अदुनहाटीं, “नीवा यावल, नीवा तम्मूहक नीकु कलियालय पलाते नित्तिसि मंतुर,” इंचि बोरो येसुक वेहतोर.

21 अस्के, “बोर अय्ते पेनदा पोल्लें केंजसि अल्हेने ताकंतुरो, ओर्कुने नावा यावल, नावा तम्मुर इंतन,” इंचि येसु ओर्कुन इत्तोर.

येसु वळि-दुमारमतुन आपंतोर
(मत्तयाल 8:23-27; मरकुस 4:35-41)

22 उंदि रोज येसु ओना सिस्सुल्कुनतौनि डोंगाते उद्दिदिस, “मनम समुद्रमता हब्बेटा बाजुंक दाकोम दट,” इंचि इत्तस्के ओर होनालय पेयसतुर.

23 ओर डोंगाते उद्दिदिस होननेके येसु निद्रा होत्तोर. अस्के समुद्रमते पेद्दा वळि-दुमारम वाता. अदुनहेंदाल डोंगाते एर निडालय दल्लिसि, ओर वेल्ले दोकाते मत्तुर.

24 अस्के सिस्सुल्क येसुनगा होंचि, “गुरु, गुरु मनम नासडेम आसि होंचंतोम,” इंचि इत्तुर. अस्के ओर तेदसि वळि-दुमारमतुन, एता तडान गदरिचतोर अय्ते वळि-दुमारम आगता, तडांगुडा दिसाकौटा आतां.

25 अस्के, “मिमेट नावापोर्री विस्वासम बारि ईरां हिल्लिर?” इंचि येसु ओर्कुन इत्तोर. गानि ओर इरगा वेरियसि, इचंन्रमते, “ईर आदेस हीते ईना पोल्ले वळि, एता तडांगुडा केंजतां, ईर बोर आंदुर?” इंचि ओर ओरे वळककुत्तुर.

देय्यम पीता मनकन येसु बेस कीतोर
(मत्तयाल 8:28-34; मरकुस 5:1-20)

26 पजा ओर गिरासेन इनना वेंरे देसेमते एत्तुर, अद जेगा गालिल समुद्रमता हब्बेटा बाजुंक मत्ता.

27 येसु डोंगाताल बल्हा रेयतोर अल्हेने अद सहरतोर वरोर देय्याल्क पीसि मत्ता मनकल अगा वातोर. ओर वेल्लेने रोजकुनाल कपर्डि केर्राकौदुर, लोन मनाकौदुर, ओर तापळानेन मनुंदुर.

28-29 देय्यम ओन ऊके-ऊके पिय्युंदु, लोकुल्क ओन गोल्लसुकुने दोहचि कावेल मनुंदुर. गानि ओर गोल्लसुकुन नेमहुंदुर, अस्के देय्यम ओन बोरे हिल्वगा ओयुंदु. येसु अद देय्यमतुन ओनागटाल पेय्सि होनालय आदेस हीतोर. अदुनहाटीं ओर येसुन हळसि, “ए अन्नितकन्ना पेद्दा पेनदा मर्रि येसु,

नातोनि नीकु बता कबळ? नाकु तकलिप हियमा इंचि नीकु विनंति कीतन,” इल्हा जोरसे वरगेयसि ओना मुन्ने अरतोर.

30 “नीवा पोरोल बतल?” इंचि येसु पूसकीतोर. ओनकु वेल्लेने देय्याल्क पीसि मत्ताहाटी, “मोमोट वेल्लेन मंदा आसि मंतोम, इंचि नावा पोरोल मंदा आंद,” इंचि अब येसुन इत्ता.

31 पजा देय्याल्क येसुनतोनि, “माकुन नरकमता लोतु जेगाते होनना आदेस हियमा,” इंचि बच्चोरो विनंति कीतां.

32 अगा गुट्टापोर्रो पद्दिना उंदि मंदा मेय्सेके मत्ता. “माकुन आ पद्दिना मंदा लोप्पो होनाहीम,” इंचि देय्याल्क येसुन विनंति कीतां, अस्के येसु अबुन पद्दिना मंदा लोप्पो होना हीतोर.

33 अस्के आ देय्याल्क मनकना लोप्पोटाल पेय्सि पद्दिना मंदाते होंचि होळियतां. अस्के आ पूरा मंदा ओइडुन पोरोटाल हिळतुक वित्ति सेरवुने मुळिगसि हासोत्तां.

34 पजा आ पद्दिं मेहानोर इल्हा आतद हळसि वित्ति होंचि अद सहरते अल्हेने पक्का पीसि मत्ता नाहकुने इद पोल्लेतुन वेहातुर.

35 बतल आता इंचि हळालय अगाटा लोकुल्क येसुनगा वातुर. अगा वासि हळतुर अयते, देय्याल्कुनाल इळबळता मनकल ओर बेस आसि, कपडिं केर्सि येसुना कालकुनगा उद्दिदेसि मत्तोर. अल्हा मत्तद हळसि ओर्क वेंर दलगता.

36 येसुना कबाहकुन हळतोर अगा बोर अयते मत्तुरो ओर, देय्याल्क पीसि मत्ता मनकल बल्हा बेस आतोर इंचि लोकुल्कुंक वेहतुर.

37 अस्के गिरासेन एरियाता अंतोर लोकुल्क बागा वेरियसि, “निमे महागटाल पेय्सि होन,” इंचि येसुन विनंति कीतुर. अदुनहाटी येसु, ओना सिस्सुल्क होनालय डोंगाते उदतुर.

38 उदता पजा, “नाकुन नीवातोनि वाया हीम गुरु,” इंचि देय्याल्कुनाल बेस आता मनकल येसुन विनंति कीतोर. गानि येसु ओन,

39 “निमे लोन होंचि नीवाहाटी पेन बतल कीता अद वेहा,” इंचि मल्हाचि लोहतोर. अस्के ओर मल्सि होंचि, येसु ओनाहाटी बतल-बतल कीतोरो अब अन्नि, सहरते अंतोर्क वेहाचेके तिरियतोर.

हासोत्ता पेगिटुन, बिमार मुरतटुन येसु बेस कीतोर
(मत्तयाल 9:18-26; मरकुस 5:21-43)

40 पजा येसु गालिल एरियाते मल्सि वातस्के ओन एदुर हळसेक मत्तोर वेल्लेटुर लोकुल्क कुसिते ओन्क कलियतुर.

41-42 अचोटेन दर्मासस्त्रम कराहना लोता अदिकारि याईर इननोर अगा वातोर. ओन्क पन्नेंड वर्सानद उंदे मिय्यड मत्ता, अद हायनाल आसि मत्ता. अदुनहाटी ओर येसुना कालकुनपोर्रो अर्सि, “नावा लोन वा,” इंचि विनंति कीतोर. अस्के येसु आ अदिकारिनतोनि होनालय पेय्सतोर. अगा ओना सुट्टु वेल्ले गर्दि मत्ताहेंके लोकुल्क दोब्बें-नूकें कीसि येसुन इटसेक मत्तुर.

43 आ गर्दिंते उंदि मुरतळ मत्ता, दानकु पन्नेंड वर्सानाल उंदेतीर कप्पिड होनुंद. अद वेल्लेटुर वैदकुल्कुंक हुपिच्चि दाना पूरा कोत्तां महता* गानि दान बोरे बेस किया पराहिल्लुर.

44 अद मुरतळ येसुना पज्जो वासि, सिराप ओना कप्पिडता अंचुन इत्ता अयते अस्केटद अस्केने दाना कप्पिड आयमळ बंद आता.

45 अस्के, “नाकुन बोर इटतुर?” इंचि येसु पूसकीतोर. अगा मत्तुर अंतोर, “नना आयोन, नना आयोन,” इंचि इननेके, “अंतोर नीवा सुट्टु आसि दोब्बें-नूकें कीसंतुर गुरु, बोरन्ना दल्गिसि मनानुर,” इंचि पत्रु इत्तोर.

46 गानि, “ना लोप्पोटाल ताकत पेय्सता इंचि अनपिस्ता. बेस आयानाहाटी बोरो नाकुन इत्तोर,” इंचि येसु इत्तोर.

* 8:43 इद वचनम कोन्नि पांडु लिपिने हिल्ले.

47 पजा अद मुरतळ, “नना इटतद एरपाट कीतोर,” इनकुंचि वेंरक वनकुसेक वासि ओना काल्कुना पोरो अर्सि, अगा अंटोर लोकुकुन मुन्ने अद येसुन बारि इट्ता अद बल्हा बिराना बेस आता इंचि वेहता.

48 अस्के, “पेगिटुना! नीवा विस्वासमे नीकुन बेस कीता. सांतिते होन,” इंचि येसु दान इत्तोर.

49 येसु अल्हा वळ्ळकसेक मननेके दर्मसास्त्रम कराहना लोता आ अदिकारिना लोताल बोरो वरोर वासि, “नीवा मिय्यड हाता, गुप्न लोन ओयालय तकलिप कीसि इंका बाता पाय्दा हिल्ले,” इंचि अदिकारिन इत्तोर.

50 अस्के अदुन केंजसि, “निमे वेरियमा, विस्वासम इरी! अद बेस आंता,” इंचि येसु आ अदिकारिक जवाब हीतोर.

51 येसु ओना लोन वातोर, वासि पेगिळ मत्ता अरति बोर्कुने होळिया हिया हिल्लोर, सिराप पत्रुन, योहानुन, याकोबुन आनि पेगिटा तल्लुर-बाबोन पीसि लोपो होळियतोर.

52 अंटोर पेगिटाहाटी अळमळ-मोत्कुनमळ कीसेके मत्तुर. गानि येसु ओर्कुन, “अळमट! अद हाया हिल्ले, मीडसि मंता,” इंचि इत्तोर.

53 अद पेगिळ हाता इंचि ओर अंटोर्क एरपाट मत्ता. अदुनहाटी येसु इत्ता पोल्ले केंजसि ओर कव्तर.

54 पजा येसु आ पेगिटा कय पीसि, “पेगिटुना, तेदा!” इंचि केयतोर.

55 अस्केन दाना जीवा मल्सि वासि, अद बिराना तेदिस उदता. अद पेगिड्क बतलन्ना तिनालय हीम्टु इंचि येसु वेहतोर.

56 अद ह्ळसि, दाना तल्लुर-बाबो इचंत्रम आतुर. गानि, “इगे आता पोल्लेतुन बोर्के वेहमटु,” इंचि येसु ओर्कु गट्टेगा हुकुम हीतोर.

9

येसु ओना पन्नेड सिस्युल्कुन सेवाताहाटी लोहतोर
(मत्तयाल 10:5-15; मरकुस 6:7-13)

1 येसु ओना पन्नेड सिस्युल्कुन केय्सि ओर्क अन्नि देय्याल्कुन पेचाहनद, बिमार मत्तोर्कुन बेस कियना ताकत, अदिकारम हीतोर.

2 पजा येसु ओर्कुन, पेनदा राज्येम बारेमते बेसता कबुर वेहालय, बिमार मत्तोर्कुन बेस कियालय लोहतोर.

3 ओर्कुन लोहनेके इल्हा इत्तोर, “मिमेट सेवा कियालय होननेके मीवातोनि दुड्डु, जोरा आयि, गाटो आयि, कोत्तां, एक्कोतव अंगि ओयमट.

4 उंदि नाटे होत्तस्के मिमेट बद लोन अयते दांतितो, अद नार होळसनदाका अदे लोते मंट.

5 बद नाटेना लोकुल्क मीकुन मना हिय्युरो, अद नाटेनाल पेय्सनेके ओर कीता तप्पुन ह्पुसालय उंदि गवाइ लेह्का मननाहाटी, मिमेट मीवा काल्कुना दुम्पु दुल्पिसि पेय्सट” इंचि वेहतोर.

6 अस्के ओर अगटाल पेय्सि, नार-नार बेसता कबुर वेहासेके, बिमार मत्तोर्कुन बेस कीसेके होत्तुर.

हेरोद राजाल येसुनाहाटी विचारमते अरतोर
(मत्तयाल 14:1-12; मरकुस 6:14-29)

7-8 पजा गालिल एरियाता राजाल हेरोद, बस्के अयते येसु कियना कबाहकुना बारेमते केंजतोरो अस्के बतल जर्गसंता ओन्क बतले तेळिया हिल्ले. बारित्ते इच्चुर लोकुल्क, “योहान हातोराव्टेताल मर्रा तेदतोर,” इंचि इनुंदुर. इंका इच्चुर लोकुल्क, “पेनदा कबुरतोर एलियल मर्रा वातोर,” इंचि इनुंदुर आनि इच्चुर लोकुल्क बारे, “एनकटा पेनदा कबुरतोर लोपोटाल बोरो वरोर जीवाते तेदतोर,” इंचि इनुंदुर.

9 गानि, “नना अयते योहानुना तल्ला कोय्यागोटतन, इंदके इसोटा पोल्ले केंजसेक मंतन, अयते ईर बोर आंदुर?” इंचि हेरोद राजाल ओन ह्ळना विचारम कीतोर.

येसु हेय्युं वेय्कुना मंदिक गाटो दोसमळ

(मत्तयाल 14:13-21; मरकुस 6:30-44; योहान 6:1-14)

10 पजा प्रेरितुल्क मल्सि वातस्के ओर बतल-बतल कीतुर अव अन्नि येसुंक वेहतुर. वेहतस्के, येसु ओर्कुन लोकुल्कुनाल अलग कीसि बोर्के तेळियाकोटा बेतसेदा इनना सहर पीसि ओतोर.

11 गानि येसु बगा मंतोर इंचि लोकुल्कुंक तेळियतस्के ओर ओन दोर्काबेटसि ओना पज्जो होत्तुर. अय्ते येसु कुसिते ओरतोनि कलियसि ओर्कु पेनदा राज्येमता बारेमते वेहतोर. पजा ओरागटाल बोर्क बेस आयानद मत्ता ओर्कुन बेस कीतोर.

12 पोळ्द होनना वेलाक पन्नेंडु सिस्स्युल्क येसुनगा वासि, “मनम सुनसान जेगाते मंतोम, अदुनहाटी लोकुल्कुन लोहचीम, ओर दग्गेटा नाहकुने, नेलिने होंचि तिनालय गाटो, मीडालय जेगा दोर्किचकुंतुर,” इंचि इत्तुर.

13 अस्के, “मिमेटे बतलन्ना ओर्क तिनालय हीम्ट,” इंचि येसु ओर्कुन इत्तोर. “महगा सिराप हेय्युं हारि, रोंडु जिम्मां मंतां, अवुन तप्पा बतले हिल्ले. मोमोट होंचि ई अंतोर लोकुल्कुनाहाटी गाटो अस्सि तायना इंचि निमे इंचेकेना?” इंचि ओर इत्तुर.

14 अगा दग्गेर-दग्गेरा हेय्युं वेय्कुना मंदि मांडसा मत्तुर. गानि येसु सिस्स्युल्कुनतोनि, “ओर्कुन एबै-एबै मंदि कीसि उपसट,” इंचि इत्तोर.

15 येसु वेहताप ओर अंतोर्कुन उपिस्तुर.

16 पजा येसु हेय्युं हारि, रोंडु जिम्मां पीसि, स्वर्गमताहेके हळसि पेनदुक दन्यवाद कीसि अवुन तुकडां कीतोर. कीसि, “इवुन लोकुल्कुंक हीम्ट,” इंचि सिस्स्युल्कुंक वेहतोर.

17 लोकुल्कुंक हीतस्के, ओर पीरनिडा तित्तुर. मिगुल्ता तुकडां जमा कीते अव पन्नेंड तट्टां निंडतां.

येसुए किरिस्तु आंदुर

(मत्तयाल 16:13-19; मरकुस 8:27-29)

18 उंदि रोज येसु वरारे पारतना कीसेक मननेके, ओना सिस्स्युल्कगुडा ओनतोनि मत्तुर. अय्ते, “नना बोन आंदुन इंचि लोकुल्क इंतुर?” इंचि येसु ओर्कुन पूसकीतोर.

19 अस्के ओर इल्हा जवाब हीतुर. “इच्चुर बारे नीकुन बापतिस्मा हियना योहान इंतुर. गानि इच्चुर बारे निमे एलियाल आंदिन इंतुर. इकिच्चुर बारे एनकटा पेनदा कबुरतोर लोप्पोटाल बोरो वरोर जीवा अरतोर इंतुर,” इत्तुर.

20 “गानि मिमेटे बतल इंतुर?” इंचि येसु सिस्स्युल्कुन मर्रा पूसकीतोर. अस्के, “निमे पेन लोहता पिसागोटनोन किरिस्तुन आंदिन,” इंचि पत्रु इत्तोर.

21 गानि, “इद पोळ्ले मिमेटे बोर्के वेहमत,” इंचि येसु ओर्क गट्टिगा हुकुम हीतोर.

येसु ओना हामुरता बारेमते वेहांतोर

(मत्तयाल 16:20-28; मरकुस 8:30-9:1)

22 पजा ओर्क इल्हा वेहालय दल्गतोर. “यहुदि पेद्दाल्क, पेद्दा पेर्मांलोर आनि दर्मसास्त्रम कराहना गुस्कुनाहेंदाल मनकना रूपमते पुटतोन नाकु तिप्पल्क अर्रापीता. ओर हय्साकोटा आसि नाकुन हळ्कानुर. गानि मूडोव रोजुने नना मर्रा जीवाते तेदंतन,” इत्तोर.

23 पजा येसु अंतोर लोकुल्कुन इल्हा इत्तोर. “ओक्कला बोरन्ना मनकल नावा पज्जो वायना इत्ते, ओर ओना पूरा इस्टाल्क होळसिसि, दररोज सतता कूस तेहकुंचि नावा पज्जो वायिर.

24 बोर ओना जीवातुन पिसागोटालय हळंतोर, ओर ओना जीवातुन पोगोटकुंतोर, ओन्क बस्केळ्क पिस्सना पिस्वर दोर्को गानि नावाहाटी बोर अय्ते जीवा हीतोर, ओन्क बस्केळ्क पिस्सना पिस्वर दोर्कता.

25 ओक्कला मनकल पूरा दुनियातुन संपलिच्चि, जीवा पोगोटकुत्ते हिलाकोटे नासडेम आते, ओन्क बता पायदा आंता?

26 बोर अय्ते नाकुन, नावा पोल्लेन वेहालय सिग्गु अर्रंतोर, मनकना रूपमते पुटतोन नना बस्के अय्ते नावा महिमाते,* नावा बाबाना महिमाते, पवित्र पेनदा दूताना महिमाते वांतन, अस्के असोंटा मनकन नावोर इनालय ननागुडा सिग्गु अर्रंतन.

27 गानि, नना मीकु निजम वेहांतन, इग्गे नित्तिसि मनानोरा लोप्पोटाल इच्चुर इल्हा मंतुर गदा, ओर पेनदा राज्येमतुन ह्ळवा, ओर्कु हामुर वायो.”

मूसाल आनि एलियाल येसुनतोनि दिसमळ
(मत्तयाल 17:1-8; मरकुस 9:2-8)

28 इव पोल्लेन वेह्चि एनमिदि रोजकु आतां बारे! येसु पत्रुन, योहानुन, याकोबुन पीसि येसु गुट्टापोर्रो पारतना कियालय होत्तोर.

29 ओर पारतना कियानेकेन ओना रूपम मारिय्ता. ओना कपडिं तेल्लगा मेसालय दलग्तां.

30-31 ह्ळट! अचानक येसुनगा मूसाल आनि एलियाल महिमाते वासि, येसुना हामुर येस्सलेमते बल्हा पूरा आंता, इंचि वळकसेक मत्तुर.

32 पत्रु आनि ओना दंटातुर निद्रा होंचि मत्तुर. पजा ओर निद्रताल तेदतस्के येसुना महिमाता वेल्गुन ह्ळतुर. अचोने आयाका ओनतोनि इव्वुर मनकालोर नित्तिसि मत्तदगुडा ह्ळतुर.

33 पजा मूसाल आनि एलियाल येसुनगटाल होननेके, “गुरु, मनम इगे मनमळ बेस मंता. अय्ते मनम मूड डेरॉ वाटकोम. उंदि नीहाटी, उंदि मूसानाहाटी उंदि एलियानाहाटी,” इंचि पत्रु येसुन इत्तोर. (ओर ई पोल्लेन वळकनेके विचारम कियाकोटिन वळकतोर.)

34 ओर ई पोल्लेन वळकसेके मननेकेन उंदि मब्बु तेर्पे वासि ओर्कुन मुच्का होत्ता, अस्के ओर मुव्वुर वेरियतुर.

35 ओर्कु मब्बुनाल, “ईर नावा मर्रि आंदुर, ईन नना पेर्कुत्तन, ईनां केंजट,” इंचि पेनदा अल्किर केंजावाता.

36 अद अल्किर मग्तस्के ओर्क अगा येसु वर्रोरे दिसतोर. पजा ओर चुपचाप मत्तुर. अगा ह्ळतद आ रोजकुने ओर बोर्के वेहा हिल्लुर.

देय्यम पीतोन येसु बेस कीतोर
(मत्तयाल 17:14-18; मरकुस 9:14-27)

37 इंकुंदि रोज ओर गुट्टा पोर्रोटाल हिळु रेयतस्के वेल्लेन लोकुल्क येसुंक कलियालय वातुर.

38 अस्के आ मंदिताल वरोर मनकल जोरते वरगेयसि, “गुरु, नना नीवा काल्क मोळकंतन, नावा मर्रिनपोर्रो दया कीम, नाकु ओर वर्रोरे मर्रि आंदुर.

39 ओन देय्यम पीतस्के ओर बागा वरगेयंतोर, ओना तोळदाल पोंगुर पेयसानाल ओन तेलहंता, अद ओन बस्केने होळसो, तकलिप कीसेकेने मंता.

40 अदुन गेदमालय नना नीवा सिस्युल्कुंक विनति कीतन, गानि ओरतोनि आया पराहिल्ले,” इंचि इत्तोर.

41 अस्के येसु ओर्कुन, “अरे विस्वासम तक्को आनि हर्रि तप्ता पीळितोरिटा, नना बदवेरदाका मीतोनि मनकन? इंका बदवेरदाका नना मीकुन सहन कीकन? नीवा मर्रिन इग्गे पीसि वा,” इंचि आ मनकन इत्तोर.

42 आ पेडल येसुनहेके वायानेकेन देय्यम ओन हिळु अरहचि तेलहता. अस्के येसु आ देय्यमतुन गदरिचतोर. पजा पेडन बेस कीसि ओना बाबांक अप्पजेपतोर.

43 अस्के अंतोर लोकुल्क पेनदा ताकततुन ह्ळसि इचंत्रम आतुर.

येसु ओना हामुरता बारेमते वेहतोर
(मत्तयाल 17:22-23; मरकुस 9:30-32)

* 9:26 महिमा इगे महिमाता अर्तम तेल्लगा जगा-जगा मेसमळ. ई मेसमळ ओना पेददातनमतुन हुप्संता.

येसु बतल अयते कीतोरो अद हळसि अंटोर लोकुल्लक इंचंत्रमते मननेके येसु ओना सिस्स्युल्लुकुन इल्हा इत्तोर,

44 “इंदके नना मीकु बतलयते वेहांतनो, अव पोल्लेन मिमेट बेस केंजट. मनकना रूपमते पुटतोन नाकुन, लोकुल्लुकुना कयदे पीसि हियानद मंता.”

45 गानि येसु वेहता पोल्ले ओर्क तेळिया हिल्ले. अद पोल्ले ओर्क तेळियामन्नि इंचि मक्किचि मत्ता. आनि इदुना बारेमते ओन पूस कियालयगुडा ओर वेरियतुर.

अंटोर्कन्ना पेद्दा बोर?

(मत्तयाल 18:1-5; मरकुस 9:33-37)

46 पजा, “मनालोप्पो अंटोर्कन्ना पेद्दा बोर?” इदुना बारेमते सिस्स्युल्लुकुं ओर्क-ओर्के पोल्लें आतां.

47 गानि येसु ओरा मनसुना विचाराल्लुकुन एरपाट कीसि, वरोर सिन्ना पेडन ओना दग्गेरा निलाहतोर.

48 निल्लाचि, “बोर अयते ई सिना पेडनसंटोन नावा पोरोलते स्विकार कीतोर ओर नाकुन स्विकार कीतापे. अल्हेने बोर अयते नाकुन स्विकार कीतोर ओर नाकुन लोहता पेनदुन इंका स्विकार कीतोर. अदुनहाटी बोर अयते मीलोप्पो अंटोर्कन्ना सिन्ना मंतोर, ओर अंटोर्कन्ना पेद्दोड आंदुर,” इंचि येसु ओर्कुन इत्तोर.†

मीकु विरोद कियवोर मीवोर आंद

(मरकुस 9:38-40)

49 अस्के, “गुरु, वरोर मनकल नीवा पोरोलते देय्याल्लुकुन पेचाहनेके मोमोट हळतोम. मालेसीं ओर नी पज्जो ताकानोर आयोर, अदुनहाटी अल्हा कियमा इंचि मोमोट ओन आपतोम,” इंचि योहान जवाब हीतोर.

50 इत्तस्के, “बोर अयते मीक विरोदमते हिल्लोर, ओर मीवोरे आंदुर, अदुनहाटी ओन आपमत,” इंचि येसु योहानुन वेहतोर.

सामरिया सहरते येसुंक कदर दोर्की

51 येसु स्वर्गमते होनना रोजकु दग्गेरा वासेक मत्तां. अदुनहाटी ओर येस्सलेम होनालय गट्टि निरनायम कीतोर.

52 ओर पेयसका मुन्ने ओना कबुरतोर्कुन लोहतोर. ओर ओन्क जेगा तयार कियालय सामरिया लोकुल्लुकुना उंदि नाटे एत्तुर.

53 गानि येसु येस्सलेम होनालय पेयसतोर इंचि सामरि जातिता लोकुल्लक ओन अगा आगा हिया हिल्लुर.‡

54 ओर्कुन अगा आगा हिया हिल्लुर अयते ओना सिस्स्युल्लुकु याकोब आनि योहान इल्हा इत्तुर, “सामि! ओर्कुन हक्कालय, मब्बुनाल तडमि अरि इंचि मोमोट आदेस हिय्याना, इंचि नीवा विचारम मंताना?”

55 अस्के येसु ओरहेके तिरियसि ओर्कुन तेराहतोर.§

56 पजा ओर अगटाल वैरे नाटे होत्तुर.

येसुना पज्जो ताकमळ

57 ओर हरपीसि होंचेक मननेके बोरो वरोर मनकल येसुनगा वासि, “निमे बगा-बगा दांतिनो, अगा-अगा नना नीवा पज्जो वांतन,” इंचि इत्तोर.

† 9:48 पेद्दालक वळकानेके सिन्ना पिलाल्लुकुं इलुवा मन्नो. ई सिन्ना पेडनसंटा इलुवा हिल्लुवा मनकल पेनदा नदरते पेद्दोड आंद.

‡ 9:53 यहदि लोकुल्लक सामरि जातितोर्कुन इट्टुते मुट्टुळ इंचुंदुर. अल्हेने सामरि जातितोर गेरजिम इना गट्टातगा मोळ्ळुंदुर, यहदि जातितोर बारे येस्सलेम गुळितगा मोळ्ळुंदुर. अदुनहाटी सामरि जातितोर ओर्कुन अगा आगा हिया हिल्लुर. § 9:55 कोन्नि युनानि पुस्तकाल्लुने इल्हा रासि मंता: येसु ओर्कुन, “मिमेट बद आत्माते मंति मीक तेळियोना? मनकंक पुटतोर मनकना आत्मातुन हक्कालय आयो गानि ओनकु मुक्ति हियालय वातोर,” इंचि इत्तोर.

58 अस्के येसु ओन इल्हा इत्तोर, “नक्कांक बारे मनालय सौर्रे मंतां, पिट्टेक मनालय गूडां मंतां, गानि मनकना रूपमते पुटतोन नाकु मात्रम तल्ला इर्रलियगुडा जेगा हिल्ले.”

59 पजा येसु इंकावरोन, “नावा पज्जो वा” इत्तोर. गानि, “सामि, नाकुन मोदाला होनाहीम, नावा बाबाल हातास्के ओन गति कीसि वांतन,” इंचि ओर येसुन इत्तोर.

60 अस्के येसु ओन इत्तोर, “बोर अय्ते हाताप मंतुरो, ओर ओरा हातोरा गति किथ्यिर. निमे मात्रम होचि पेनदा राज्येम बारेमता बेसता कबुर वेहा.”

61 इंकावरोर मनकल इत्तोर, “नना नीवा पज्जो वांतन सामि, गानि मुन्ने नना लोन होचि, नावा लोतोरुकुंक वेहचि वांतन.”

62 अस्के येसु ओन इत्तोर, “पज्जो वांतन इंचि पेय्से, मर्रा पजोळ्क मल्सि हळना मनकल पेनदा राज्येमता सेवा कियनालायक हिल्लोर,” इंचि इत्तोर.

10

येसु डेब्बै रौड सिस्युल्कुन सेवाहाटी लोहातोर

1 अद आता पजा सामि, इंका डेब्बै रौड मंदि सिस्युल्कुन पेरतोर. पेरसि, बव नाहकुने अय्ते ओन्क होनना मत्ता अव नाहकुने ओना सिस्युल्कुन इव्वुर-इव्वुर्कुन कीसि मुन्ने लोहातोर.

2 ओर्कुन लोहानेके इल्हा वेहातोर, “पंटा वेल्लेने पंडुता गानि बूतिनोर तक्को मंतुर. अदुनहाटी पंटाता मालकुंक बूतिनोर्कुन पंटा कोय्यालय लोहा इंचि विनंति कीम्टु.*

3 मिमेट होंट! हुळट, तोडेल्लिन लोप्पो गौर्रे पोरिह्कन लोहाताप नना मीकुन लोहचंतन.☆

4 मीवातोनि कोत्ताना संचि, जोरा आयि, हेरपुह्क आयिं पियमट. हार्रि पीसि होननेके बोर कलियते ओर्कु जोहारगुडा वेहमट.†

5 मिमेट बद लोन अय्ते दांतिटो, मोदाला, ‘इद लोतुक सांति दोर्कि’ इंचि इंट.

6 अद लोते सांति गावाले इनना मनकल मत्ते अद सांति ओनगा दांता, गानि अगा गिंटा सांति गावाले इनना मनकल हिलाकोटे आ सांति मिहागेन वापस वांता.

7 कबळ कियानोर्कु बूति दोर्कता. अदुनहाटी मिमेट बद लोन अय्ते दांतिटो अद लोतुर बतल हीतुरो अद तिचेक-उंचेके अदे लोते मंटु, अलग-अलग लोहकुने मनमट.

8 मिमेट बद सहरते दांतिरो, अद सहरतोर मीकु बेस मान-मरयादा कीते, ओर मीक बतल तिनालय हीतुर अदे तिंटु.

9 अगाटा बिमारतोर्कुन बेस कीसि, ‘पेनदा राज्येम दगोर्क एव्ता’ इंचि ओर्क वेहाट.

10-11 गानि मिमेट बदन्ना सहरते होतस्के ओर मीकुन बेस मान-मरयादा कियाकोटे, अगाटा हरकुने होचि, ‘मिमेट माकु मरयादा कियुवा विरोदमते, मावा काल्कुंक अंतता मीवा सहरता दुब्बागुडा मोमोड इगोन दुल्पसंतोम. अय्नागानि इद मतिते इर्रट, पेनदा राज्येम दगोर्क एव्ता,’ इंचि ओर्क वेहाट.

12 नना मीकु वेहासेक गदा, न्यायम कियना रोजुने, ☆ सदोम सहरता परिस्तिति आ नाहकुंकन्ना बच्चोरो बेस मनंता,” इंचि येसु ओर्क वेहतोर.

येसुना पोल्ले केंजवोरा नाहकु
(मत्तयाल 11:20-24)

13 येसु मर्रा इत्तोर, “ए कोरजिना आनि बेतसेदा नाटेना लोकरिटा! मीकु गोसा तप्पो! ओक्कला मिहगा बव अदूबूताल्क आतां, अवे गिंटा सूर, सिदोन नाहकुने आसि मत्ते, अगाटा लोक्कुलक बिराना बोंतां हृदिस, मैदुल्क बूळ्दि होकसि उद्दिसि दुक्कमते मनसु मार्सकुंचि मन्नेर.

* 10:2 इद वचनता अर्तिम बतल इत्ते, वेल्लेन लोक्कुलक येसु वेहता पोल्ले केंजालय तयार मंतुर, गानि ओर्कु कराहलय, वेहालय मात्रम लोक्कुलक तक्को मंतुर. इगे पंटा इत्ते केंजना लोक्कुलक, पंटा मालक इत्ते पेनबाबाल आनि बूतिनोर इत्ते पेनदा पोल्ले कराहनोर.

☆ 10:3 मत्तयाल 10:16 † 10:4 यहूदि जातितोर बेकेनना पय्नेम होननेके नड्डुम हरदे बोर्नना एरपाटनोर कलियानय्ते वरौक-वरोर ऊके-ऊके सुक-दुक्काल्क वेहकुन्तुर. अदुनहाटी सेवक होननेके अल्हा कीते अगोन वेला आंता इंचि येसु ओर्कु इल्हा वेहातोर. ☆ 10:12 उत्पत्ति 19:24,25

14 गानि पेन न्यायम कियना रोजुने सूर आनि सिदोनतुरा परिस्तिति मीकन्ना बच्चोरो बेस मनंता.

15 ए कपर्नाहूम सहरता लोकरिटा! मिमेट स्वर्गमते दांतोम इनकुंचतिरा? मिमेट नरकमते दांतिर.”

16 “सिस्त्युल्कुनिटा! बोर मीवा पोल्लें केंजंतोरो, ओर नावा पोल्लें केंजंतोरो. बोर मीकुन हय्सोर ओर नाकुन हय्सोर. नाकुन हय्सवोर नाकुन लोहता पेनदुनगुडा हय्सोर,” इंचि येसु वेहातोर.

येसुना सिस्त्युल्कु कूस आंतुर

17 पजा, येसु लोहता डेबै रौंडु मांदि सिस्त्युल्कु वेल्लेन कुसिते मल्लिस वासि, “सामि, नीवा पोरोल्ले देय्याल्कगुडा मावा पोल्लेतुन केंजतां,” इंचि येसुक वेहतुर.

18 अस्के येसु ओर्कुन इल्हा इत्तोर, “नना पेदूदा देय्यमतुन मब्बुनाल पिळ्ळुनलेसीं अरनेके हळतन.

19 केंजट, नना मीकु तरासकु, मिच्चोन जारानद आनि पगातोरा पूरा बलमतुन गेल्लसानद अदिकारम हीतन. मीपोर्रीं बोर अन्यायम किया पर्र.

20 अयना मीवा पोल्ले देय्याल्क केंजतां इंचि कूस आयमत, गानि मीवा पोरोल्ले स्वर्गमते रासि मंता इंचि कूस आम्टु,” इंचि वेहतोर.

येसु पेनबाबांक दन्यवाद कीतोर

(मत्तयाल 11:25-27; 13:16-17)

21 अस्केने येसु पवित्र आत्माते निडसि कूस आसि इल्हा इत्तोर, “ए नावा बाबा, बूमि आनि स्वर्गमता सामि, तेल्विगल्लोर्क आनि समजदार लोकुल्कुनगटाल इव पोल्लें मक्किचि इरतिन, सादा-सिंपल लोकुल्कुंक बारे इव पोल्लें हुपिस्तिन, इंचि नना नीवा स्तुति कीसेक मंतन. हो बाबा! नीकु इदे बेस अनपिस्ताहाटीं निमे इल्हा कीतिन.

22 नावा बाबाल नाकु अन्नि अप्पजेपतोर. बाबान तप्पा मर्रिन बोर एरपाट किय्युर, मर्रिन तप्पा बाबान बोर एरपाट किय्युर. मर्रि ओना इस्टमाताप बाबाना बारेमते बोर्क अयते तेळियानाल वेहांतोर ओर बाबान एरपाट कीतुर,” इंचि इत्तोर.

23 पजा ओर ओना सिस्त्युल्कुन पक्कक ओसि ओर्कुन इल्हा इत्तोर, “मिमेट हळानवुन हळना मीवा कळ्कु वेल्लेन आसिर्वाद दोर्कतव आंदुं.

24 बारिल्ले नना मीकु वेहांतन, इय्याला मिमेट बव हळसंतिरो, केंजसंतिरो, अवुन वेल्लेटुर पेनदा कबुरतोर आनि राजालोर हळालय, केंजालय तन्लाळ्ळुदुर. गानि ओर्क हळालय, केंजालय दोर्काहिल्ले,” इंचि इत्तोर.

25 अच्चोटेन मूसाना नियम बेस तेळियतोर वरोर गुरु निततोर. नित्तिसि येसुना पट्टु हळानाहाटीं, “गुरु, बस्केळ्ळक पिस्सना पिस्वरता वारसदार आयानाहाटीं नना बतल कीते बेस?” इंचि पूसकीतोर.

26 अस्के येसु ओन, “मूसाना नियमते बतल रासि मंता? दानहेंदाल नीकु बतल तेळियता?” इंचि इत्तोर.

27 इत्तस्के आ गुरु, “निमे नीवा सामि आता पेनदुन पूरा मनसुनाल, पूरा आत्माताल, पूरा ताकतताल, पूरा बुदिदिताल पावरम कीम. अल्हेने नीवद निमे बच्चोन पावरम कीतिनो अचोने पावरम इंकावरोनगुडा कीम. इल्हा रासि मंता,” इंचि जवाब हीतोर.

28 अस्के येसु ओन, “निमे बरोबर वेहतिन, अल्हेने निमेगुडा कीम, अस्के नीकु बस्केळ्ळक पिस्सना पिस्वर दोर्कता,” इंचि इत्तोर.

29 ओर, नना नीतिमंतुन इंचि हुप्सालय, “नावा पक्कातोर इत्ते बोर आंदुर?” इंचि येसुन पूसकीतोर.

सामरि जातिता मनकना वेसुडि

30 अल्हा पूसकीतस्के येसु ओन्क उंदि वेसुड वेहातोर: “वरोर मनकल येस्सलेम सहरताल यरिहो इनना नार होंचेके मत्तोर. होननेके नड्डुम हरदे ओन दोंगाल्क पीतुर. ओर ओनगा मत्ता सामानतुन इगुकुत्तुर, कपडिं तेंडकुत्तुर. पजा ओन पक्का तंचि, डुक-डुक जीवा मननेके होळसि होत्तुर.”

31 “पजा बतल आता इत्ते, अदे हरपीसि वरोर पेर्माँल होंचेक मत्तोर. आ पेर्माँल हिळु अरसि मत्ता मनकन हळसि होरियसि होत्तोर.

32 ओर होतस्के वरोर लेवि जातिताः मनकल अदे हरिँ पीसि वातोर. ओर इंका हिळु अरसि मत्ता मनकन हळसि होरियसि होत्तोर.

33 ओर होत्ता पजा, अदे हरिँ पीसि वरोर सामरिया मनकलऽ अगा एवतोर. एवतस्के हिळु अरसि मत्ता मनकन हळसि ओनकु इरगा जीवा नोता.

34 ओर ओनगा वासि ओन्क देब्बां आतगा, अवुनपोर्रोँ निय, अंगुर पडिना पानकम* होकसि पट्टे दोहतोर. दोहता पजा, आ सामरि मनकल हिळु अरसि मत्ता मनकन ओना गाड्दिपोर्रोँ वाटसि, उँदि लाजुने ओसि ओन बेस हळकुत्तोर.

35 इंकुँदि रोज लाजता मालकुंक रोंडु एँडि कोत्तां हीसि, ईन बेस हळ्वा, ईनाहाटीँ एक्को कोत्तां कर्स आयानय्ते, नना मल्लिस वातस्के अव नीकु हीतन इत्तोर.”

36 पजा येसु, “दोंगालकुन कय्दे देब्बां तित्ता मनकंक मुव्वुर मनकालोर कलियतुर. आ मुव्वुर लोपुपो नीवा विचारमते ओना पक्कातोर बोर आंदुर?” इंचि ओन पूसकीतोर.

37 अस्के आ गुडु, “बोर अय्ते ओन हळसि ओनपोर्रोँ दया कीतोर और,” इंचि इत्तोर.

अस्के येसु, “होन, ओर कीताप निमेगुडा कीम,” इंचि ओन इत्तोर.

मरियम आनि मार्ता

38 पजा येसु, ओना सिस्युल्कु हरिँ पीसि होननेके, उँदि नाटेनगा एवतुर. अगा उँदि मार्ता इनना मुरतळ मत्ता. अद येसुन दाना लोन ओसि बेस हळकुत्ता.

39 दान्क मरियम इनना उँदि हेलड मत्ता. अद सामिना कालकुनगा उँदिदिसि ओर वेहना पोल्लेँ बेस केंजसेक मत्ता.

40 गानि दाना अक्कल मार्ताँल सेवा कीसि-कीसि, पूरा मोता दान पोरोँने अरताप आता. अदुनहाटीँ अद येसुनगा वासि, “सामि, नावा हेलड पूरा कबळ नावा पोरोँने वाटसि हीता, इद निमे हळसेक हिल्लिना? नाकु आसर आयालय दानकु वेहा,” इंचि इत्ता.

41 अस्के सामि दानकु इल्हा जवाब हीतोर. “मार्ता, निमे वेल्लेन कबाहकुना बारेमते विचारम कीसि गाबर आँतिन.

42 गानि असल उँदे कबळ कियना अवसरम मंता. मरियम आ बेस कबळतुन पेरकुत्ता. अदुनहाटीँ दानगटाल अद कबळतुन बोरे इगुकुन्ना पस्स,” इत्तोर.

11

येसु कराहता पारतना

(मत्तयाँल 7:7-11)

1 उँदि मल्का येसु उँदि जेगाते पारतना कीसेक मत्तोर. पारतना आतंका ओना सिस्युल्कुनाल वरोर सिस्युड ओन, “सामि, योहान ओना सिस्युल्कुंक बल्हा पारतना कियमळ कराहतोरो, अल्हेन निमे माकुगुडा पारतना बल्हा कियमळो करहा,” इंचि इत्तोर.

2 अस्के येसु ओर्कुँन, मिमेट पारतना कियनेके इल्हा इंद्रु, “ए मावा पेनबाबा, नीवा पोरोलतुन अंतोर कदर किथिरकाँटी.

निमेन मापोर्रोँ राज्येम कीम.

3 माकु रोजता तिँडि इय्यालागुडा हीम.

4 माकु विरोदमते कीता तप्पुकुन मोमोट बल्हा माप कीतोमो, निमेगुडा मोमोट कीता तप्पुकुन माप कीम, माकुन पट्टुने अर्राँकोटा कापाळा.”

‡ 10:32 लेवि जाति लेवि जातिता मनकालोर गुळिते कबळ कीतुर.

§ 10:33 सामरिया मनकल सामरियाता एरियाता

लोकुल्क सिन्ना जातितोर इंचि यहदिल्क ओर्कुँन इटते मुट्टळ इनुँदुर.

* 10:34 इस्राएल लोकुल्क अंगुर पडिना पानकमतुन

उननाहाटीँ, देब्बां दल्लातगा होकनाहाटीँ कियुँदुर.

तल्कते पेन हीता
(मत्तयाल 6:9-13)

5-6 पजा येसु ओर्कु इल्हा वेहालय दल्गतोर. “मीवाव्टेताल बोरो वरोर, मीवा दंटातोनागा नडजाम नर्का होंचि, अरे दादा, नहगा इंदकेन वरोर दंटागाल वातोर. गानि ओन्क अट्टिस दोसालय नहगा बतले हिल्ले. अदुनहाटीं नाकु इच्चुं परिक बदल हीम, इंचि इत्तोर इनकुट!

7 अस्के आ दंटागाल लोप्पोटाले, नना नावा पिलाल्कुनतोनि मीडिसि मंतन, नना तेदते ओरगुडा तेदांतुर, इंका तल्पुगुडा लोप्पोटाल गट्टिगा वाटतन. अदुनहाटीं नना इंदके तेदिस नीकु बतल हिया परोन. नाकुन वट्टिटेदे परेसान कियमा, इंचि इंतोर.

8 नना मीकु वेहानद बतल इत्ते, आ दंटागाल ‘नावा दंटागाल वातोर,’ इंचि तेदसि ओन्क परिक हिय्या हिल्लोर. गानि ओना दंटागाल ओन उंदेतीर, हीम-हीम इंचेके बातिमलाडताहाटीं ओर तेदसि ओन्क गावाले मत्ताचोन परिक तप्पाकोंटा हीतोर.

9 अदुनहाटीं नना मीकु वेहचंतन पेनदुन तल्कसेक मंडु, मीकु हिय्यार. प्हकसेक मंडु, मीकु दोर्कार. तल्पुन टोक-टोक कीसेक मंडु, मीवाहाटीं तल्पु तेंडार.

10 बारित्ते बोर अय्ते तल्कंतोर ओन्क हियमळ जर्गता. बोर अय्ते प्हकंतोर ओन्क दोर्कता. बोर अय्ते तल्पुन तनंतोर ओनाहाटीं तल्पु तेंडमळ जर्गता.

11-12 मीलोप्पो बोरन्ना बाबो मंतोरा ओना मरिं, जिम्मा तल्कते ओन्क तरास हियानोर? * हिलाकोंटे मेंज तल्कते ओन्क मिच्चो हियानोर मीलोप्पो बोरन्ना बाबो मंतोरा? हिल्लोर.

13 अय्ते मिमेट सेड्डोर्क आसिगुडा मीवा पिलाल्कुंक बेसतद हियमळ तेळियतस्के, स्वर्गमते मनना पेनबाबाल, ओन तल्कानोर्कुंक पवित्र आत्मा बच्चोन वेल्ले हियनुर?”

येसुना ताकत पेनदागटाल मंता
(मत्तयाल 12:22-30; मरकुस 3:20-27)

14 वरोर मनकन देय्यम पीताहाटीं ओर मूकल आसि मत्तोर. पजा येसु आ मनकानाल अद देय्यमतुन पेच्हाचि गेदुमतोर, अस्के आ मूकल वळकालय दल्गतोर. इदुन हळसि अगा मत्ता अंतोर लोकुल्कुंक वेल्लेन इंचत्रम आता.

15 गानि अव्टेताल इच्चुर मंदि, “बेलजेबुल इनना देय्याल्कुना मुक्यना बलमते ओर देय्याल्क तेंडांतोर,” इंचि इनालय दल्गुतुर.

16 इंका इच्चुर बारे ओना पट्टु हळना इंचि ओनाहेंदाल स्वर्गमताल उंदि चिन्ह हुप्सा इत्तुर.

17 ओरा मनसुना विचाराल्कुन एरपाट कीसि येसु ओर्कुन इल्हा इत्तोर, “बद राज्येम लोप्पो वरोना पोल्ले-वरोंक अर्काकोंटा आंता, अद राज्येम पाडासि दांता. अल्हेन उंदि लोते मनानोरा नड्डुम वरोनद वरोंक अर्काकोंटा मत्ते अद लोनगुडा नासडेम आसि दांता.

18 मिमेट इत्तिर गदा, नना बेलजेबुल इनना देय्यमता सहायमतोनि देय्याल्क गेदुमतन इंचि. अल्हा अय्ते देय्यम दाना दंटाता देय्याल्कुना विरोदमते नितते, अवुना राज्येम बल्हा नितंता?

19 सरे! मिमेट इत्ताप, नना बेलजेबुलना सहायमते देय्याल्कुन गेदमंतन इन्कुट. गानि मीवा लोकुल्कगुडा देय्याल्कुन गेदमंतुर, ओरगुडा देय्यमता सहायमतोने गेदमंतुरा? अदुनहाटीं मीवा लोकुल्के मीवा न्यायम कीतुर.

20 गानि नना ओक्कला पेनदा बलमते देय्याल्कुन गेदमानय्ते, पेनदा राज्येम मीवा दगेर्क एत्ता इंचि एरपाट कीम्तु.”

21 “वरोर ताकतवर मनकल गोर्का, कसेहक, तुपाकी पीसि ओना लोता कावेल कीतिने, ओना लोता लोप्पो मनना अन्नि सामान बेस सांतिते मनंतां.

22 गानि ओनकन्ना एक्को ताकतवर मनकल वासि ओनतोनि लडाइ कीसि ओन ओळिच्चानय्ते, बव गोर्का, कसेहकन पोर्गे वेल्लेन वर्सानाल बरोसा इत्तोर, अवुन इग्गुक्कुचि ओनगा मत्ता मालुन दोसकुंतोर. पजा अंटोर्कुंक पंचि हीतोर.”

* 11:11-12 इद वचनम कोन्नि पांडु लिपिने हिल्ले.

23 “बोर अयते नावा दंताते मन्नोर, ओर नावा विरोदमते मंतोर, बोर अयते नाकु सहायम किय्योर, ओर नाहगटाल पायिचना कबळ कीतोर.”

24 “उंदि देय्यम बस्के अयते वरोर मनकानाल पेय्सि दांता, अस्के अद आराम कियालय एर हिल्वा जेगा पव्हकंता. गानि दान्क असंटा जेगा दोर्को. अस्के अद देय्यम, नना बद लोताल अयते पेय्सि वातानो, अदे लोते मर्रा मल्सि दांतन, इन्कुंता.

25 मर्रा अगा होंचि हळतस्के मुन्नेटा लोन रिक्कम आताप, मंचिगा ऊसताप दानकु बेस दिसंता.

26 अस्के अद देय्यम तिरियसि होंचि दानकन्ना एक्को सेड्डातव एडुं देय्याल्कुन पीसि वांता. पजा अंटव कलियसि अदे लोते मनालय दल्यंतां. इल्हा आ मनकना परिस्तिती मोदाटा परिस्तितिकन्ना एक्को कराब मनंता.”

निजम आसिर्वाद

27 पजा बतल आता इत्ते, येसु इव पोल्ले वेहसेकेन मत्तोर, अचचोटेन अगा मत्ता मंदिताल उंदि मुरतळ लगांचि, “नीकुन कंचि, पाल उहचि, बेरसागोटता आ तल्लुर वेल्लेन आसिर्वाद दोर्कुतद आंदु,” इंचि इत्ता.

28 अस्के येसु, “गानि बोर अयते पेनदा वचनाल्क केंजसि अबुन पीसि ताकंतोरो ओर एक्को आसिर्वाद दोर्कुतोर आंद,” इंचि इत्तोर.

लोकुल्क चिन्ह तल्कंतुर

(मत्तयाल 12:38-42; मरकुस 8:12)

29 वेल्लेन लोकुल्क जमा आयानद हळसि येसु इल्हा वळकालय दल्यंतोर: “इद पीळितोर कराब लोकुल्क आंदुर. अदुनहाटी चिन्ह हुप्सा इंचि पूस कीसंतुर. गानि योनाल इनना पेनदा कबुरतोना चिन्ह तप्पा ओर्कु इंकुंदि चिन्ह हुपिचमळ जर्गो.”†

30 बल्हा योनाल निनवे सहरता लोकुल्कुनाहाटी चिन्ह आतोर, अल्हेन मनकना रूपमते पुटतोन नना, ई पीळितोरहाटी चिन्ह आंतन.

31 अल्हेने सिबा देसेमता रानि सुलेमान राजाना तेल्विता पोल्ले केंजालय वेरे देसेमताल अगा वासि मत्ता. हळ्याट, सुलेमानुंकन्ना पेदूदोड वरोर मी मुन्ने नित्तिसि मंतोर. अय्नागानि मिमेट नावा बुद्धिता पोल्ले केंजसेक हिल्लिर. अदुनहाटी आकिर न्यायमता रोजुने आ रानि इद पीळिता मनकालोरपोर्रो दोसेम दोस्सार.

32 योनाल वेहता कबुर केंजसि निनवे सहरतोर अयते ओरा मनसु मार्सकुत्तुर. गानि हळ्याट, योनांकन्ना पेदूदोड इंदके मी मुन्ने नित्तिसि मंतोर. अय्नागानि मिमेट मनसु मार्सकुंचेके हिल्लिर. अदुनहाटी आकिर न्यायमता रोजुने निनवे सहरतोर नित्तिसि इद पीळिता लोकुल्कुनपोर्रो दोसेम दोस्सनुर.”

वेळसि आनि वेल्गु

(मत्तयाल 5:15; 6:22-23)

33 “बोरे आयिर वेडसि निरिचिचि दान गुल्ला हिळ मुच्चोर, साटुंकगुडा इर्रो. गानि लोप्पो होळियानोर्क बेस वेल्गु दिसगोम इंचि दान उंदि दीसोडिपोर्रो इरंतोर.

34 नीवा कळ नीवा मेंदुल्क वेडसिलेह्का आंदु. नीवा कळ बेस मत्ते नीवा मेंदुलंता बेस वेल्गु मनंता. ओक्कला नीवा कळ बेस हिलाकोटे नीवा मेंदुलंता हीकटे मनंता.

35 अदुनहाटी नीवा लोप्पो मनना वेल्गु पिरसोन्नाकुंटा बेस कापाडकुन.

36 नीवा पूरा मेंदुल पुरागा वेल्गुने मत्ते, अद वेडसि एल्गुताप बेस एल्गुसेके मनंता आनि गिचचो मेंदुलगुडा हीकटते मन्नो.”

† 11:29 योनाना उदाहरन हीसि येसु ओन्क वायना हामुर, हासि मूड रोजुकु बोदाते मनमळ आनि मूडो रोजुननाड मर्रा जीवाते तेदमळता बारेमते वेहतोर.

येसु परिसिल्कुनपोर्रो होंग आंतोर

(मत्तयाल 23:1-36; मरकुस 12:38-40; लकाल 20:45-47)

37 इल्हा येसु ओना वळकुमळ मारतस्के वरोर परिसि ओना लोन येसुन गाटो तिनालय केयतोर. अयते येसु ओना लोन होंचि लोपो होळियसि गाटो तिनालय उदुतोर.

38 येसु यहूदिल्कुना रिवाज परकारम तिनाका मुन्ने कय्कु नोरसि गाटो तिनालय उद्दा हिल्लोर. अदुन हळसि आ परिसिंक इचंत्रम आता.

39 अस्के सामि ओन इल्हा इतोर, “मिमेट परिसि लोकुल्क गिन्ने-गिलासकु सिराप लोकुल्कुंक दिसालय पलाताल तोमसि साप कीतिर, गानि लोपो मात्रम मीवा कराब गुनाल्क, वेल्लेन लालच निडसि मनंता.

40 अरे बुदिदे तक्को लोक्किरिटा! पलाताल तयार कीता पेने लोपोटाल तयार कीता.

41 अदुनहाटी मिहगा बतल अयते मंतनो अदुन गरिब लोकुल्कुंक मनसुनाल हीम्ट. अस्के मीहाटी अग्नि साप मनंता.

42 अरे परिसिल्कुनिटा! मीकु गोसा तप्पो. बारित्ते मिमेट मीवा तोटाते पुटता पुदिना, इंका वेरे अग्नि पंटाता पदि तूसकुनाल उंदि तूस पेनदुक हीतिर. गानि न्यायमतुन आनि पेनदा पावरमतुन मात्रम मिमेट मति किय्थिर. पदि तूसकुनाल उंदि तूस पेनदुक हियमळ इद बेसे. गानि इद कीसेक-कीसेक न्यायमतुन आनि पेनदा पावरमतुनगुडा होळसाकॉटा ताका मत्तिर.

43 परिसिल्कुनिटा मीकु गोसा तप्पो, दर्मसास्त्रम कराहना लोहकुने पेद्दाल्क उद्दाना जेगा मीकु गावाले इनकुंतिर. हाटुमकुने जोहार वेहागोटकुनमळ इत्ते वेल्ले इस्टम.

44 मीकु गोसा तप्पो. बारित्ते, अगा बोंदा मंता इंचि तेळियका लोकुल्क जारसेके दांतुर, मिमेट आ बोंदानसंतोर आंदिर.”

येसु आनि दर्मसास्त्रम कराहना गुरूक

45 अस्के दर्मसास्त्रम बेस तेळियतोर वरोर गुरु वासि येसुन, “गुरु, निमे इसॉटा पोल्ले वळ्किसि मावदगुडा अपमानम कीसतिन,” इंचि इतोर.

46 अस्के येसु इल्हा इतोर. “अरे मूसाना नियम बेस तेळियतोरिटा, मीकु सिक्सा तप्पो. बारित्ते मिमेट लोकुल्कुनपोर्रो, तेहते तेदा पर्खा मोताः तासंतिट, गानि मिमेट मात्रम अद मोतातुन तेहालय उंदि वेल्लुगुडा तासिर.

47 इंचि मीकु गोसा तप्पो. बारित्ते, मीवा एनकटा पेद्दाल्क हक्कता पेनदा कबुरतोरहाटी गोरि दोहांतिर.

48 इल्हा कीसि, मीवा एनकटा पेद्दाल्कुने आनि ओर कीता कबाहकुने मिमेट कलियसि मंतिर इत्ताप मिमेटे गवाइ मंतिर. बारित्ते मीवा एनकटा पेद्दाल्क पेनदा कबुरतोर्कुन हक्कतुर, मिमेट बारे ओरा गोरि दोहचतिर.

49 अचोने आयका पेन दाना बेस बुदिदिते मीवा बारेमते इल्हा वेहता, नना पेनदा कबुरतोर्कुन आनि प्रेरितुल्कुन ओरगा लोहांतन. अस्के ओर, ओरावेटाल इच्चुर्कुन हक्कानुर, इच्चुर्कुन बारे इरगा तिप्पल्क कियानुर.”

50 “दीनहेंदाल, ई दुनिया पुटतस्केटाल बच्चोन मंदि पेनदा कबुरतोर नेत्तुर अयते पोंगागोटमळ जर्गतनो, आ ओरा अंतोरा नेत्तुरता हिसाब ई पीळितोरहेंदाल एतमळ जर्गता.

51 इत्ते आबेलनगटाल अयते, गुळि आनि गद्दे नड्डुम हक्कता जकर्याहनगड्क. हां, नना मीकु निजम वेहांतन, ईर अंतोरा नेत्तुरता हिसाब ई पीळिता लोकुल्कुनहेंदाले एतमळ जर्गता.

52 अरे मूसाना नियम बेस तेळियतोरिटा, मीक गोसा तप्पो. बारित्ते मिमेट पेनदा तेल्विता तालम कयदुन तेंडकुत्तिर. गानि मिमेट कुद्दु अयते होळिया हिल्लिर, होळियानोर्कुनगुडा आपिसि इरतिर.”

‡ 11:46 तेहते तेदा पर्खा मोता इने, तेहते तेदा पर्खा मोता इत्ते यहूदिल्कुना वेल्लेन नियमकु आंदुं. आ नियमकुना पालन कियमळ वेल्लेन कस्टम. दर्मसास्त्रम कराहना गुरूक लोकुल्कुंक वेल्लेन नियमकुना पालन कियालय वेहांतुर गानि लोकुल्कुंक मात्रम पालन कियालय सहायम किय्युर.

53 पजा येसु अगटाल होनालय पेयसतोर अस्के, परिसिर्क आनि दर्मसास्त्रम कराहना गुस्लक ओन्क अड्डम तिरियसि, ओन रकारकालकुना सवालक पूस कीसि परेसान कियालय दलगुतर.

54 येसु बतलन्ना वळकते ओर वळकना पोल्लेने ओन दोर्का पियना विचारम ओरा मनसुने मत्ताहाटी ओर अल्हा कियालय दलगुतर.

12

परिसिल्कनलेसी आयमट

1 अचचोटेन अगा वेयकुना मंदि जमा आसि, इरगा गर्दि आताहेंका वरोंक वरोर जारसेके मत्तुर. अस्के येसु मोट्टा मोदाला ओना सिस्युल्कनतोनि इल्हा वळकालय दलगतोर. “परिसिल्क डोंगिर्क आंदुर, ओरा पुल्लटा पिंडिता* बारेमते जेगर्ता मंट.

2 मुच्चिसि मत्तव अन्नि पोल्लें बय्यर आंता, तेळियाकॉटा मत्तव अन्नि वस्तुक पलातुक वांतां.

3 अदुनहाटी मिमेट हीकटते वळकता पोल्लें वेलगुने केंजमळ जर्गता. आनि लोता लोपोटा अरंते होचि गुसागसा वळकता पोल्लें येनागर्गपोरों एक्किसि वेहमळ जर्गता.”

सिराप पेनदुके वेरियट!

(मत्तयाल 10:28-31)

4 “इंचि नावा दंतातोरिटा, नना मीकु वेहानद बतल इत्ते, बोर अय्ते मीवा मेंदुलतुन हव्का परांतुर ओर्क मिमेट वेरियमट. ओर दानकन्ना एक्को बतल किया पसर.

5 मिमेट बोर्कु वेरियगोमो नना वेहांतन. मीकुन हव्कुतंका नरकमते वाटना अदिकारम बोन्क अय्ते मंतानो, मिमेट ओन्के वेरियट. नना वेहनद इदे.”

6 “हेय्युं कोळ्का पिट्टें रोंडु कोत्तांकु अम्मुड दांतां गदा! अय्नागानि अव्टेताल उंदि पिट्टेटुनगुडा पेन मति मर्गो.

7 मीवा तल्लाता उंदि-उंदि केल्लु लेक्किस मंता. अदुनहाटी वेरियमट! पेनदा मुन्ने मिमेट वेल्लेन कोळ्का पिट्टेंकन्ना बच्चोरो विल्वा मत्तोर आदिर.”

येसुना पोरोल एतालय सिग्गु अरमट

(मत्तयाल 10:32-33; 12:32; 10:19-20)

8 “नना मीकु वेहांतन, बोर अय्ते लोकुल्कुना मुन्ने नाकुन एरपाट कीतन इंचि ओप्कुंतोरो, मनकना रूपमते पुटतोन ननागुडा ओन पेनदा दूताना मुन्ने, ‘एरपाट कीतन’ इंचि ओप्कुंतन.

9 गानि बोर अय्ते लोकुल्कुना मुन्ने नाकुन ‘एरपाट किय्योन’ इंतोरो, ननागुडा ओन पेनदा दूताना मुन्ने ‘एरपाट किय्योन’ इंचि इंतन.

10 मनकना रूपमते पुटतोन नाकु विरोदमते बोर वळ्किना, पेन ओना तप्पुकुन मापि किय्यार. गानि पवित्र आत्माता अपमानम कियानोना तप्पुकुक मात्रम मापि हिल्ले.”

11-12 “मीकुन दर्मसास्त्रम कराहना लोहकुने, राज्येम कियानोरा मुन्ने इंका अदिकारिल्लुकनगा पूसकियालय ओतास्के, अगा मिमेट बतल वळकुगोमो अद, पवित्र आत्मा मीकु अस्केन कराहंता. अदुनहाटी बतल वळकना, बतल वळकानायो इंचि रंदि कियमट.”

तेल्वि तक्को सिरमंत मनकल

13 आ मंदिताल बोरो वरोर मनकल येसुन, “गुरु, नावा दादल नावा बाबाना अस्तिताल नाकु बतले हीसेक हिल्लोर, नावा पालुक वायना आस्ति नाकु पंचि हीम इंचि निमे ओन्क वेहा,” इंचि इत्तोर.

14 अस्के येसु ओन, “अरे दादा! मीवा आस्तिं पंचि हियालय नाकुन बोरन्ना ‘पेद्दा मनकल हिलाकॉटे न्यायम कियानोर’ इंचि इरतोर?” इंचि पूसकीतोर.

* 12:1 पुल्लटा पिंडि इत्ते तोळ इत्ताप, बतल पुल्लगा कियानद मत्ते अव्टे इचो पुल्लटा वस्तु वाटा पीता.

15 पजा येसु ओरतोनि, “बेस जेगर्ता मंचि, अन्नि लालचकुनाल मीवद मिमेटे लक्कु मंटु! बारित्ते मनकना पिस्वर वेल्लेन आस्ति मत्तेन बेस मनंता इंचि इनकुन्मट,” इंचि इत्तोर.

16 पजा येसु ओर्कु उंदि वेसुड वेहतोर: “वरोर वेल्लेन सिरमंत मनकल मत्तोर. उंदि मल्का बतल आता इत्ते, ओना नेदे इरगा पंटा पेयस्ता.

17 अस्के मनसुने ओनद ओरे, ‘पंटा अय्ते वेल्लेन पेयस्ता. गानि दीन इर्गलय मात्रम जेगा हिल्ले, बतल कीकन?’ इन्कुत्तोर.

18 मर्रा विचारम कीसि, ‘सरे! नना नावा पडना जेगातुन कुल्हाचि पेद्दागा कीतन. कीसि पूरा पंटातुन, सामानतुन अन्टे वाटसि इर्गतन.

19 पजा नना नावा जीवक, नीकु वेल्लेन वर्सानदाका हालानाल रसि आता गाटो दोसतन, तिन्नु, उन्नु आनंदमते मन्नु, रंदि कियमा, इंचि वेहांतन,’ इंचि इत्तोर.

20 गानि पेन ओन, ‘अरे तेलिवि तक्को मनका, इय्याला नर्कळके नीवा जीवा होनानय्ते निमे संपादिस्तादंता बोन्क आयार?’ इंचि इत्ता.

21 बच्चोर पेद्दा सिरमंत मनकल अयना ओर पेनदा मुन्ने सिरमंतुड आयोर, बारित्ते ओर ओनाहाटीगें आस्ति जमा कीतोर इंचि. ई वेसुडिते ई मनकना गति गुडा अल्हेन आता.”

रंदि कियामन्नि
(मत्तयाल 6:25-34)

22 पजा येसु ओना सिस्युल्कुंक इल्हा वेहालय दल्गतोर: “नना मीकु वेहनद बतल इत्ते, जीवा तिडिकन्ना मुक्केम, मेंदुल कपडीकन्ना मुक्केम आंदु. इंचि पिस्सनाहाटी तिनकोम बतल, उनकोम बतल, इंका मेंदुलाहेंका केर्कोम बतल इंचेके रंदि कियमट.

23 बारित्ते तिडिकन्ना पिस्वर मुक्केम, कपडीकन्ना मेंदुल मुक्केम.

24 आ काकाहकुन हुळाट! अव वीतों आनि कोय्यो. अचोने आयका अवुनगा गुम्मि इंका हिल्लें. अयना पेन अवुन पोस कीसंता. अदुनहाटी मिमेट अय्ते आ पिट्टेंकन्ना बच्चोनो विलवा मत्तोर आदिर.

25 रंदि कीसि ओना आवसुन उंदि गंटा एक्को बेरसागोटोर मीवा नड्डुम बोर्नना मंतोरा? हिल्लोर.

26 इसंटा सिन्ना-सिन्ना कबाहके मिमेट किया परिर. अय्ते इंका मिगुल्ता कबाहकुना बारेमते मिमेट रंदि बारि कीतिर?”

27 “आ पूतनहेके हुळट अव बल्हा बेर्ससंतांगो! अव कबळ किय्यो, कपडिं इंका कुट्टों. नना वेहानद बतल इत्ते, सुलेमान राजाल वेल्लेन सिरमंत मंचिगुडा ओना कपडिं आ पूतानाल उंदि पूतातच्चोगुडा सोकु मनाहिल्लें.

28 अय्ते जाडि इय्याला मंता, नाडि तडमिते वेसि दांता. अयना आ जाडिके पेनबाबाल इच्चोन बेसता कपडिं हीतोर. अय्ते अवुंकन्ना बेसता कपडिं मीकु हिय्या पर्रोरा रो, विस्वासम तक्को लोक्किरिटा?

29 अदुनहाटी बतल तिदकोम, बतल उंडकोम इंचेके मिमेट रंदि कियमट. अल्हेने अवुन दोर्किच्चुनाहाटी गाबरगुडा आयमट.

30 दुनियातोर अंटोर लोकुल्क इवुनाहाटीगें तनलाळसेक मनांतुर. गानि मीकु इव अन्नि गावाले इंचि मीवा पेनबाबांक एर्के मंता.

31 अदुनहाटी मिमेट मुन्ने स्वर्ग राज्यमतुन आनि पेनदा नीतितुन प्हकट. अस्के इव मीकु दोर्कनुं.”

आस्ति-पास्तिनपोर्रो विस्वासम इरमट
(मत्तयाल 6:19-21)

32 “अरे नावा सिस्युल्कुनिटा, ‘मीवा पेनबाबाल ओना राज्यमतुन मीकु हियालय वेल्लेन कुसिते तयार मंतोर. अदुनहाटी मोमोट वेल्ले मंदि हिल्लोम’ इंचि वेरियमट.

33 अय्ते मिमेट मिहगा मत्ता आस्तिनअंता अम्मिसि, गरिबोर्कुंक दान-दर्मम कीसि, बस्केने पडन आयाकॉटा मनना कोत्ताना संचितन दोर्किचकुंट. इंका मिमेट मीवाहाटीं स्वर्गमते दनम जमा कीम्ट.† अगा बोर दोंगलगुडा वायोर, दानकु सेदेलगुडा पिच्यो.

34 बारित्ते मीवा दनम बगा मत्ते अग्गेन मीवा मनसु मनंता.”

बस्केळकु तयार मंटु

(मत्तयाल 24:42-51)

35-36 “भरमिना कुळपुने होंचि वायना मालकुन एदुर हळसेक मनना सेवाकुलकुनलेसी कबळ कियालय बस्केळक नडिकट्टु दोहचि तयार मंटु. अल्हे मीवा वेडसिन इंका बस्केळक एल्गिचे इर्राट. अल्हा मत्ते बतल आंता इत्ते, मालक वासि तल्पुन तंता तन्मडे तल्पु तेंडालय अल्कगा मनंता.

37 मालक वातस्के एदुर हळसेक तेल्विते मत्ता सेवाकुलकु वेल्लेन आसिर्वाद दोर्कुंतोर आंदुर. नना मीकु निजम वेहासेक मंतन, मालक वासि अंतोर सेवाकुलकुन बेस उद्दा वेहांतोर. पजा नडिकट्टु दोहकुंचि औरे सेवाकुलकुना सेवा कियालय तयार आंतोर.

38 मालक बस्के वायिना, इत्ते नडजाम नर्का आयि हिलाकॉटे नडजाम नर्का दाटसि होतंका आयि वातस्के, बोर सेवाकुलक अय्ते तेल्विते मनांतुरो आ सेवाकुलकु वेल्लेन आसिर्वाद दोर्कुंतोर आंदुर.

39 गानि मिमेट उंदि पोल्ले बेस तेळियागोटकुंटु. अद बतल इत्ते, दोंगल बद वेलाक वांतोर इंचि ओक्कला लोता मालकुंक मुन्नेन तेळियसि मत्ते और तेल्वितेन मनांतोर आनि आ दोंगन लोते होळिया हिय्योर.

40 अल्हेने मिमेट इनकुनवा वेलाके मनकना रूपमते पुटतोन नना वांतन. अदुनहाटीं मिमेटगुडा बेस तयारते मंटु.”

दोका हिय्युवा सेवाकुनलेहका मंटु

(मत्तयाल 24:45-51)

41 अस्के पत्रु, “सामि, निमे ई वेसुडिं सिराप मावाहाटीगे वेहचंतिना, हिलाकॉटे अंतोर हाटीगा?” इंचि पूसकीतोर.

42 अस्के सामि इल्हा इत्तोर: “मालक हिल्वस्के ओनगा कबळ कियानोर्कुंक वेलापोर्रो गाटो-जावा दोस्सालय, वरोर बेस तेल्विगल्लोड, विस्वासमलायक दिवांजि मालाकुंक गावाले. अय्ते असोंटा सेवक बोर मंतोर?

43 बोर सेवक अय्ते, मालक मल्लिस वातस्के वेहता कबळ बरोबर कीसेक मनांतोर, औरे सेवक बेस आसिर्वाद दोर्कुंतोर आंद.

44 नना मीक निजम वेहांतन. मालक आ सेवाकुन ओना पूरा आस्ति-पास्तिनपोर्रो अदिकारि इंचि इर्रातोर.

45 गानि ओक्कला आ सेवकुडु, ‘नावा मालक वायालय अय्ते आल्सेमे मंता,’ इनकुंचि कळमता दासि मुरतळ, मांड्सा सेवाकुलकुन तन्नुड-गुद्दुड कियमळ, इरगा तिचि-उंचि बदमासिं कियमळ सुख कीतोर इनकुन!

46 अस्के आ सेवक विचारमगुडा किय्योर असोंटा रोजुने, गळियाते ओना मालक वायानुर. वासि, आ सेवाकुंक पेद्दा सिक्सा हीसि, ओन अविस्वासुलक मनना जेगाते वाटसीयनुर.”

47 “बा सेवक अय्ते, ओना मालाकुंक बतल गावालेनो तेळियसिगुडा, मालक वेहताप केंजाकॉटा, कियाकॉटा मनांतोर, आ सेवक मात्रम वेल्लेन देब्बा तितोर.

48 गानि तेळियका बदो कबळ कीसि देब्बाना पाल आता सेवाकुंक मात्रम तक्को देब्बां आंतां. पेन बोर्कु अय्ते बेसता कबळ कियनाहाटीं वेल्लेन गुनम हीता ओराहेकटाल वेल्लेन लेक्का तलकंता. अल्हेने बोन्क अय्ते एक्को अप्पजेपता, ओनहेकटाल अप्पजेपता दानकन्ना एक्कोने तलकंता.”

† 12:33 स्वर्गमते दनम जमा कीम्ट इत्ते मीवा दनमतुन पेनदा कबळहाटीं आनि बेस कबळहाटीं कर्स कीम्ट इंचि अर्तम.

येसुना पोल्ले पीसि ताकानोर्क तकलिप वांता
(मत्तयाल 10:34-36)

49 “नना ई बूमिंते लोकुल्लुकुनपोरोँ तळमितसोंटा न्यायम कियालय वातन. अद इंदकेन अंतुकुंचि मत्ते बच्चोनो बेस आयवड इंचि इनकुलतन.

50 गानि नाकु उंदि कस्टाल्लुकुना बापतिस्माः एतानद मंता, अद एतनदाका नाकु तिप्पल्क तप्पोँ.

51 नना इद बूमिपोरोँ सांति हियालय वातन इंचि मिमेट इन्कुंचतिरा? हिल्ले. नना अदुनहाटी वाया हिल्लेन. गानि मीकुन वेरे-वेरे कियालय वातन इंचि नना मीकु वेहासेक मंतन.

52 इंदकेटाल बदन्ना उंदि लोते हेय्युर मत्ते, ओरद ओर्के अर्काका इव्वुर उंदि पक्काक, मुव्वुर इंकुंदि पक्काक आसि वेरे आंतुर.

53 अल्हेने मर्रिनद बाबोनतोनि-बाबोनद मर्रिनतोनि, मिय्याटद तल्लुनतोनि-तल्लुनद मिय्यळतोनि, कोळियाटद पोरळतोनि-पोराटद कोळियळतोनि अर्काकोटा आंता.”

वेलातुन एरपाट कियमळ
(मत्तयाल 16:2-3)

54 पजा ओर मंदिक इल्हा वेहतोर. “मब्बु तेर्पेन पोळ्द अर्रनहेके हळसि मिमेट, ‘अद हुळट, पिर्ं वासेक मंता,’ इंचि वेहकुंतिर. अल्हेन आंतागुडा.

55 इंका होव्वोर वळि वायनद हळसि, ‘इंदके गर्मी अर्रता’ इंचि इंतिर. अल्हे आंतागुडा.

56 अरे डोंगिरिटा, मीकु बूमि, मब्बुना रूपाळ्कु एरपाट किया वांता. गानि इद वेलाते बतल जर्गसंता इदुन मिमेट बारि एरपाट कीसेक हिल्लिर?”

पगातोनतोनि बेस कलियसि मनना
(मत्तयाल 5:25-26)

57 “असल बेस न्यायम बद आंद, अद मीवद मिमेटे बारि निरनायम किया परसाहिल्लिर?

58 निमे नीवा पगातोनतोनि कलियसि कोरटते मजिस्टरनगा होननेके हरदेन ओनतोनि बेस संबंदम कल्पुकुन. अल्हा कियाकोंटे नीकुन नीवा पगातोर कोरटते मजिस्टरंक अप्पजेपनुर. मजिस्टर नीकुन पोलिसुल्लुकुंक अप्पजेपनुर, पोलिसुल्लुकु ओसि नीकुन जेलने वाटानुर.

59 नना नीकु निजम वेहांतन, कोत्तक-कोत्ता दोहनदाका निमे अगटाल पेयसा परिंन,” इंचि वेहतोर.

13

पापमताल मनसु मार्सकुंदु

1 अदे वेलाते अगा मत्ता लोकुल्लुकुनाल इच्चुर लोकुल्लुकु वासि येसुंक, “गालिल एरियाता इच्चुर मनकालोर गुळिते मोक्कु हीसेक मननेके पिलातुस ओना सिपाइल्लुकुन लोहचि ओर्कुन हव्का वेहतोर. आ सिपाइल्लुकु ओर्कुन गुळितेन हव्कतुर. इल्हा पिलातुस ओरा नेत्तुरतुन मनम मोक्कु हियना नेत्तुरते कल्पतोर,” इंचि वेहतुर.

2 अस्के येसु ओर्कु इल्हा जवाब हीतोर, “गालिल एरियाताल वाता ई मनकालोर्कुंक इंसंटा हामुर वाता अय्ते, ई मनकालोर गालिल एरियाता वेरे मनकालोर्कुंकन्ना एक्को पापम कीतुर इंचि मिमेट इन्कुंचतिरा?

3 नना वेहासेक! अल्हा बिल्लुकुले आयो. गानि पापमताल मनसु मार्सकुंचि पेनदाहेके तिरियाकोंटे मिमेटगुडा ओरालेसींगे हासि नासडेम आतिर.

4 सरे इंदके वेहाट! सिलो इनना गोपुरम*कूलसि अरताहेका पदूदेनमिदि मंदि मनकालोर हातुर. अय्ते ई गोपुरम कूलता वेलाते येस्सलेमते मत्ता वेरे मनकालोर्कुंकन्ना हासोत्ता ई पदूदेनमिदि मनकालोर एक्को तप्पु कीतुर इंचि इन्कुंचतिरा?

‡ 12:50 कस्टाल्लुकुना बापतिस्मा इत्ते येसु ओन्क मुने वायना हामुरता बारेमते वेहचंतोर. बारित्ते बापतिस्मा येतनेके एते मुळगिसि तेदंतुर, अल्हेन येसुंक कस्टाल्लुकुने अर्रनद मंता. * 13:4 गोपुरम इत्ते उंदि एल्लुंक एल्लु मत्ता मिदूदे आंद.

5 हिल्ले. नना मीकु वेहनद बतल इत्ते, पापमताल मनसु मार्सकुनाकुंटे मिमेट अंटोरगुडा ओरालेसीगे हासि नासडेम आतिर.”

कबळक ओज्जुवा मरा

6 ओर्कु बेस तेळियनाहाटी पजा येसु इंकुंदि वेसुड वेहालय सुख कीतोर. “वरोर मनकल ओना अंगुर तोटाते उंदि अंजिर मरा वाटतोर. उंदि रोज अद मरा कायां हादतना, हादा हिल्लेना, इंचि ह्वाललय होत्तोर, गानि अदुंक कायां हादसि मनाहिल्लें.

7 अस्के आ मनकल ओना तोटाते कबळ कियना जीतागानकु, ह्ळा, ई अंजिर मरा कायां हादता बांरे इंचि नना मूड वर्सानाल इगे दीन ह्वाललय वासंतन, गानि दीनकु बस्केने उंदि काया इका नाकु दिसा हिल्ले. इंसंटा मरातुन ईर्सि बता पायदा? नर्किसि पोहा, इंचि वेहतोर.

8 अस्के आ जीतागाड, मालक, ई उंदि वर्सामिड मन्निकांटी. नना दीन सुट्टु तव्बि बेस एरवु वाटंतन.

9 अस्केनना हादते सरे, हिलाकोंटे नर्किसि पोहा वच्चु,” इंचि इत्तोर.

नोमकेम रोजुननाड येसु उंदि मुरताटुन बेस कीतोर

10 उंदि नोमकेम रोजुननाड येसु उंदि दर्मसास्त्रम कराहना लोते कराहसेक मत्तोर.

11 देय्यम पीताहेका पद्देनमिदि वर्सानाल बिमार अर्सि मत्ता उंदि मुरतळ अगा मत्ता. दाना नळि वंकर आसि गूनि पेय्शि मत्ताहेका दान्क बेस नित्ता वायाकोदु.

12-13 येसु दान ह्ळसि ओना दमगेर्क केयतोर. केय्शि, “बाई! निमे नीवा रोगमताल पलाते अरतिन,” इंचि, पजा दाना तल्लापोर्रो कय इरतोर. कय इरता इरमळे अद बेस नित्तिसि पेनदुन तल्सकुनालय दल्गता.

14 बिमार मत्ता मुर्ताटुन नोमकेम रोजुननाड येसु बेस कीताहेका दर्मसास्त्रम कराहना लोता अदिकारिक इरगा होंगु वाता.† अस्के ओर लोकुलकुन, “कबाहक कियालय उंदि वारमते हांरं रोजकु मंतां गदा! अयते आ रोजकुने वासि मिमेट मीवा बिमारकुनाल बेस आम्टु, गानि नोमकेम रोजुननाड वासि आयो,” इंचि इत्तोर.

15 अस्के सामि जवाबुने ओर्कुन, “अरे डोंगि लोकुरिटा, नोमकेमनाडु मीवावेटाल हरेक मनकल कोंदातुन आयि गाडदितुन आयि लेहाकुंचि एर उहालय ओयिरा?

16 अयते पद्देनमिदि वर्सानाल पेद्दा देय्यम पीसि मत्ता अब्राहामुना वंसमता ई मुरताटुन, नोमकेम रोजुननाड बेस कीते इव्टे तप्पु बतल मंता?” इंचि इत्तोर.

17 येसु वळ्ळुता ई पोल्लें केंजसि बोर लोकुलक अयते ओना विरोदमते मत्तुरो, ओर्क अंटोर्क सिग्गु वाता. गानि येसु कीता इचंत्रम आयना कबाहकुन ह्ळसि लोकुलक मात्रम इरगा कूस आतुर.

पेनदा राज्येम बल्हा मनंता?

(मत्तयाल 13:31-33; मरकुस 4:30-32)

18 पजा येसु इल्हा वेहतोर. “पेनदा राज्येम बल्हा मनंता? नना दान बदुनलेहका मंता इनकन?

19 पेनदा राज्येम आवालकुना उंदि पेडेतसोंटद आंद. आ पेडेतुन बोरो वरोर मनकल ओसि ओना तोटाते वीततोर. अद मोलियसि, बेस्सि पेद्दा मरा आता. अस्के परियना पिट्टें दाना पंगांक गूडां दोहकुत्तां.”‡

20 येसु मरा इल्हा इत्तोर. “पेनदा राज्येमतुन नना बदुनलेहका मंता इंचि इनकन?

21 अद पुल्लटा पिडितसोंटद आंद. बंदो उंदि मुरतळ पुल्लटा इच्चुर पिडितुन मूड तव्वना पिडिते कल्पता. अस्के आ पिडिअंता पुल्लगा आता,” इंचि वेहतोर.

† 13:14 नोमकेम रोजुननाड बतले कबळ कियमळ हिल्ले. इका उंदि मुर्ताटुन बेस कियमळगुडा ओर्कु उंदि कबळ अनपिस्ता. अदुनहाटी आ अदिकारिक होंग वाता. ‡ 13:19 इस्राएल देसेमते आवालकुना मरा पदि प्टुक एत्तु मनंता.

इर्कुटोम हर्ति

(मत्तयाल 7:13-14,21-23)

22 येसु येस्सलेम होननेके वेल्लेन नाहकुने, सहरकुने होंचि अगाटा लोकुकुकुंके पेनदा पोल्ले कर्राहसेक होतोर.

23 अस्के बोरो वरोर मनकल येसुन, “सामि, पापमताल मुक्ति इच्चुर मंदिके दोर्कतना?” इंचि पूसकीतोर.

24 अस्के येसु ओन्क इल्हा वेहतोर. “मिमेट बस्केळ्ळक इर्कुटोम मत्ता हरदाल होळियालय इरगा कोसिस कीम्. § नना वेहानद बतल इत्ते, आ हरदाल वेल्ले मदि होळियालय ह्ळ्यांतुर गानि ओर होळिया पस्.

25 लोता मालक तेदसि उंदि मल्का तल्पु वाटानय्ते मिमेट पलाते नित्तिसि तल्पुन टोक-टोक कीसेके, ‘सामि मावाहाटी’ तल्पु तेंडा,’ इंचि इंदकिर. गानि, ‘मिमेट बगाटाल वातिर? नना मीकुन एरपाट किय्योन,’ इंचि ओर मीकुन इंतोर.

26 अस्के मिमेट, ‘नीवातोनि कलियासि मोमोट तित्तोम, उट्टोम. इंका निमे मावा नाटे वासि माकु बजारकुने पेनदा पोल्ले कर्राहतिन,’ इंचि इंदकिर.

27 गानि ओर मात्रम, ‘नना मीकु वेहासेक मिमेट बगाटाल वातिरो, बोर आदिरो नना मीकुन एरपाट किय्योन. अरे सेड्डा कबाहक कियानोरिटा, मिमेट इगेटाल पेय्सि होंटु,’ इंचि इंतोर.

28 “पेनदा राज्येमते अब्राहाम, इसाक, याकोब अल्हेने पेनदा कबुरतोर अंटोर्कुन मिमेट ह्ळ्यांतिर, गानि मीकुन मात्रम अगाटाल, पेन पलाते हीकटते वाटसीता. अगा सिराप अळमळ, पल्कु कोर्कमळे मंन्ता.

29 अस्के उत्तर-दक्खिनताहेंदाल, पोळ्द पेयसनाहेंदाल, पोळ्द अर्रानाहेंदाल लोकुल्क वासि, पेनदा राज्येमते उद्दानुर.

30 गानि ह्ळ्याट! मुन्ने मत्तोर इच्चुर पज्जो आयानुर आनि पज्जो मत्तोर इच्चुर मुन्ने आयानुर.”

येस्सलेमते येसुंक हामुर वांता

(मत्तयाल 23:37-39)

31 अच्चोटेन इच्चुर परिसिल्क वासि येसुन, “नीकुन अतिपस हेरोद राजाल हक्कालय ह्ळसंतोर, निमे इगेटाल बद्दना वेरे जेगाते पेय्सि होन,” इंचि इत्तुर.

32 अस्के येसु ओर्क इल्हा वेहालय दल्गतोर. सरे! मिमेट होंचि आ नक्काकु वेहत गदा, इय्याला नाडि नना देय्याल्कुन पेचाहसि गेदमंतन, बेस हिलवोर्कुन बेस कीतन, मन्ने नावा कबाटुन महांतन.

33 अयना येस्सलेम सहरता पलाते वरोर पेनदा कबुरतोंक हामुर वायमळ बेस आयो. अदुनहाटी इय्याला, नाडि, मन्ने नाकु ताकसेकेन मना पीता.

34 ए येस्सलेमतोरिटा, ए येस्सलेमतोरिटा! मिमेट पेनदा कबुरतोर्कुन हक्कानोर आंदिर, इंका पेन मिहगा लोहचीतोर पोर्री मिमेट बंडां हुक्कानोर आंदिर. कोर्क दाना पीसेन रेक्काना हिळ्ळ बल्हा जमा कीतनो, अल्हेन ननागुडा मीवा पिलाल्कुन जमा कियना इंचि बच्चुंगो मल्कां कोरतन. गानि मिमेट मात्रम कोराहिल्लिर.

35 ह्ळ्या, मीवा लोन मीहाटी कुल्ला होळ्समळ जर्गता. नना मीकु वेहानद बतल इत्ते, सामिना पोरोलते वायानोर आसिर्वाद दोर्कतोर इंचि बदवेरदाका अय्ते मिमेट इन्निरो अदवेरदाका नाकुन मर्रा ह्ळिर, इत्तोर.

14

येसु वरोर परिसिना लोन दांतोर

§ 13:24 येसु पेनदा राज्येमते होळियाना बारेमते वेहचंतोर. दीना अर्तम बतल इत्ते अगा होळियमळ वेल्लेन कस्टम.

1 उंदि नोमकेम रोजुननाड येसु परिसि अदिकारिल्कुनाल वरोर अदिकारिना लोन गाटो तिनालय होत्तोर. अगा मत्तोर अंटोर लोकुल्क येसुन बदन्ना पोल्लेते दोर्का पियालय ओनहेके बेस ह्ळसेक मत्तुर.

2 अगा येसुना मुन्ने वरोर काल्क-कय्क तोयाना बिमार मत्ता मनकल मत्तोर.

3 अस्के येसु, “नोमकेम रोजुननाड बिमार मत्तोर्कुन बेस कियमळ दर्मसास्त्रम परकारम बेसा, बेस आयोना?” इंचि मूसाना नियम बेस तेळियतोर्कुन आनि परिसिल्कुन पूसकीतोर.

4 गानि ओर बतले वळकाकोटा चुपचाप मत्तुर. पजा येसु आ तोयसि मत्ता मनकनपोर्री कय ताससि ओन बेस कीसि, अगटाल होना वेहतोर.

5 पजा, “मिहागटाल बोनादन्ना गाडदि आयि कोंदा आयि नोमकेम रोजुने कुहिते अरते, अदे रोजुने दान बिराना कुहिताल तेंडिरा?” इंचि येसु ओर्कुन पूसकीतोर.

6 अयना ओर मात्रम येसुंक जवाब हिया पराहिल्लुर.

बस्केळक सिन्नागासि मनना

7 पजा अगा बोजनमहाटी वाता मनकालोर्कु, पेद्दा मनकालोर उद्दाना जेगां पहकिसि उद्दालय ह्ळंदुर. अदुन ह्ळसि येसु ओर्कु इल्हा वेहतोर.

8 “बोरन्ना मीकुन मरमिने गाटो तिनालय केयतस्के मिमेट होंचि पेद्दा मनकालोर उद्दाना जेगाते उदमट. बारित्ते मीकुन बोर मनकल अयते केयतोर ओर मीकन्ना एक्को कदर मत्ता मनकनगुडा केय्मि मनानुर.

9 पजा मीकुन इव्वुर्कुन केयता आ मनकल मिहगा वासि, “निमे उद्दिदिसि मनना जेगाते ईन उद्दाहीम” इंचि मीकुन अगटाल तेहानुर. अस्के मीवद सिग्गु होंचि अंटोरा मुन्ने सिन्नाल्क उद्दाना जेगाते होंचि हिळु उद्दा पीता.

10 अदुनहाटी बोरन्ना मीकुन गाटो तिनालय केयंतोर अस्के मिमेट होंचि, सिन्नाल्क उद्दाना जेगाते हिळु उद्दिदिसि मंटु. बस्के अयते मीकुन केयता मनकल वासि मीकुन, ‘दादा, इगेटाल तेदसि आ बेसता जेगाते होंचि उद्दा,’ इंचि वेहनुर अस्के मीवातोनि कलियसि गाटो तिनना अंटोर हेडमितोरा मुन्ने मीकु बेस कदर दोर्कार.

11 बारित्ते, बोर अयते ओनद ओरे ‘नना पेद्दोन’ इंचि वेहकुंतोर, ओन पेन सिन्ना किय्यार आनि बोर अयते ‘नना सिन्नोन’ इंचि वेहकुंतोर, ओन पेन पेद्दा किय्यार.”

मीकु इनाम दोर्कता

12 पजा येसुन बोर अयते केयतोर ओर आ मनकंकगुडा येसु उंदि पोल्ले वेहतोर. “निमे नर्का-पिय्यल बस्के बोजनम हिथियिना आ बोजनमते नीवा दंटागाह्कुन, नीवा दादल-तम्मुह्कुन, जीवातोर-हेडमितोर्कुन, मीवा पक्का लोह्कुना सिरमंत लोकुल्कुन केयुमा. ओर्कुन केयते, निमे ओर्कुन केयताप ओरगुडा नीकुन केयांतुर, इल्हा नीवा बाकि *तीरंता.

13 ओर्कुन केयनदानकन्ना निमे गरिबोर्कुन, गुड्डोर्क-गूओर्कुन, ताका परवोर्कुन केया.

14 अस्के नीवा बाकि तीरसालय ओर नीकु बतल हिया पस्स. गानि पेनदा नदरते नीतिमंतुल्क मत्तोर हासि मर्रा जीवाते तेदतस्के पेनदाहेंदाल नीकु नीवा इनाम तप्पाकोटा दोर्कता.”

उंदि पेद्दा बोजनमता वेसुड

15 येसु इत्ता आ पोल्लेतुन केंजसि, उद्दिदिसि गाटो तिनानोराव्टेटाल वरोर मनकल येसुन, “पेनदा राज्येमते उद्दिदिसि बोजनम कियना मनकल आसिर्वाद दोर्कुंतोर आंद,” इंचि इत्तोर.

16 अस्के येसु वेसुडिते इल्हा वळकालय दलगतोर. वरोर मनकल पेद्दा कुळपु ईसि आ कुळपुंकु वेल्लेन मंदितुन केयतोर.

* 14:12 स्नम बाकि.

17 कुळपु तयार आतस्के, अन्नि तयारि आतां, बोर्कुन अयते केयतोम आ मनकालोर्कुन केय्ति तराहोंटु, इंचि आ मालक ओना दासुन लोहतोर.

18 गानि ओर अंटोर इल्हा विनंति कियालय दलगतुर. मोदाला कलियतोर, नना उंदि पूना पोलम अस्तन, नाकु दान हळापीता, निमे बतल इनिना बेसे, नना वाया पर्रीन, नाकुन मापि कीम इत्तोर.

19 इंकावरोर, नना हेय्युं जोडिं कोंदां अस्तन, अव बल्हा कबळ कीतंगों नाकु अवुन हळापीता. नाकुन मापि कीम, नना वाया पर्रीन, इत्तोर.

20 मर्ना इंकावरोर, नना इंदकेन मरमिं आतन, नना वाया पर्रीन, इत्तोर.

21 अस्के आ दासुड मल्सि वासि जर्गुतद अंता ओना मालकुंक वेहतोर. अस्के मालकुंक इरगा होंग वाता. पजा ओर ओना दासुंक इल्हा वेहतोर. निमे बिराना सहरता हर्कुन पीसि, मूला-मूलाक होंचि गरिबोर्कुन, गुडुडोर-गुनोर्कुन, कुंटोर्कुन इगे केयकुंचि वा, इत्तोर.

22 अस्के दासुड मालक वेहातापे कीतोर. पजा मर्ना मल्सि वासि मालकुंक इल्हा वेहतोर. मालक, निमे वेहातापे नना होंचि केय्ति तत्तन. अयनागानि इंका वेल्लेन जेगा मिगिल्सि मंता, इत्तोर.

23 अस्के मालक दासुंक इल्हा वेहतोर. “निमे रोडकुन पीसि, हर्कुन पीसि होंचि लोकुल्कुन बतिमलाडसि पीसि वा. नावा लोन पुरागा निडिसि मनगोम अचोने.

24 नना मीकु निजम वेहचंतन, नना मुन्ने केय्ति मत्ता वरोर मनकलगुडा नना हीता बोजनमता रुसि हळा पसर, इंचि इत्तोर.”†

पिलान परकारम पिस्वर मनना

25-26 येसुनतोनि वेल्लेन मंदि लोकुल्क ताकसि वासेके मत्तुर. अस्के येसु ओराहेके तिरियसि इल्हा वळकालय दलगतोर: “नहगा वांतन इंचि इनकुत्तोर बोरन्ना आयिर, ओर ओना यावन-बाबान, मुत्तो-पिलालकुन, तम्मुर-तादन, अक्कल-हेलाहकुन, इंका ओना जीवातुन एक्को पावरम कीते, ओर नावा सिस्युड आया परोर.

27 अचोने आयका बोर अयते ओना सतता कूस पीसिः नावा पज्जो वायोन इंतोर, ओरगुडा नावा सिस्युड आया परोर.”

28 “मीवाव्टेताल बोरन्ना आयिर, उंदि एत्तुंक एत्तु मिद्दे दोहंतन इनकुत्ते, ओर मोदाला आरामते उद्दिदिसि इद मिद्देतुन दोहालय बच्चोन वेल्ले कर्च वायार? इंका बतल-बतल अयते गावालेनो, अव अन्नि मंतंगां मरि हिल्लेंगां? इवुना बारेमते विचारम किय्योरा? कीतोर.

29-30 ओक्कला अल्हा कियाकोंटे ओर पायवा अयते दोहंतोर गानि मिद्देता कबळ मात्रम पुरागा किया परोर. असोंटस्के अदुन हळतोर अंटोर ओन कारेड्डाल्क कीसेके, अद हळट रो! ई मनकल मिद्दे दोहालय अयते सुस्व कीतोर गानि पुरागा दोहा पराहिल्लोर, इंचि इंतुर.”

31 “हिलाकोंटे, ‘नना पदि वेय्कुना सिपाइल्कुन पीसि इरवै वेय्कुना मंदि सिपाइल्कुन गेल्ला परांतना?’ इंचि गिच्चोगुडा विचारम कियाकोंटा लडाइ कियालय दांतोर! असंतोर बोरन्ना राजाल मंतोरा?

32 ओक्कला अल्हा कीते आ राजाल बोनतोनि अयते लडाइ कियानद मंता, ओना सिपाइल्क लक्कु मननेके इच्चुर विस्वासमता सिपाइल्कुन एदुर लोहचि सांति-समादानम कियना विचारम कीतोर.

33 इल्हेने मीवाव्टेताल बोरन्ना आयिर, मिहगा मत्तव अन्नि आस्ति-पास्तिन होळसोन इंतोर, ओर नावा सिस्युड आया परोर.”

रुसि हिलुवा होव्वोर

34 “होव्वोर बेसे मनंता गानि होव्वोर, होव्वोर रुसि वायाकोंटे, अव्टे मर्ना बल्हा होव्वोर रुसि तरा परांतोम?

† 14:24 इद वेसुडिते येसु बोजनम इरता मनकन पेनदालेसी हृप्संतोर. आनि बोजनमतुन बारे पेनदा राज्यमलेहका हृप्संतोर.

‡ 14:27 कूस पीसि तकलिप अर्गलय आनि हायालयगुडा तयार मनमळ.

35 असंटा होव्वोर तोळिते कल्पालयगुडा ओज्जो, एरवुहाटीगुडा ओज्जो. अद सिराप पलाते पोहचियालये ओज्जंता. बोर्कु केंजालय केव्क मंतां ओर केंजट.”

15

तप्सोत्ता गोर्रेता वेसुडि

1 उंदि रोज कर वसुल कियानुर आनि पापि लोकुल्क येसुना पोल्लें केंजालय ओनगा जमा आतुर.
2 जमा आतद हळसि, परिसिल्कु आनि दर्मसास्त्रम कराहना गुस्लुक येसुन, “ई मनकल पापि लोकुल्कनुन दग्गेर्क केय्सि उपसंतोर अल्हेने ओरतोनि कलियसि गाटोगुडा तितोर,” इंचि गुल्गसेक इत्तुर.

3 ओर इनानद केंजसि येसु ओर्क उंदि वेसुडि वेहतोर.

4 “मी लोपोटाल वरोनगा नूर गोर्रे मंतां इनकुंट. अबुनाल उंदि गोर्रे तप्पिस होनानय्ते, कळमता टोबै तोम्मिद गोर्रेन अग्गेन मंदा वाटसि, तप्सोत्ता आ उंदि गोर्रे दोर्कनदाका दान पहकालय होनोरा?

5 पजा अद गोर्रे दोर्कतस्के, ओर वेल्लेन कूस आसि दान हट्टापोर्रो वाटकुंचि पीसि वांतोर.

6 वासि, दंटातोर्कुन, लोता पक्कातोर्कुन केय्सि, ‘नावा तप्सोत्ता गोर्रे नाक दोर्कुता, नावातोनि कलियसि आनंदम कीम्ट,’ इंचि इंतोर.

7 नना मीक वेहानद बतल इत्ते, बोर्क अय्ते मनसु मार्सकुनना अब्सरम हिल्ले, असोटा टोबै तोम्मिद मंदि नीतिमंतुल्कुना बारेमते आयना आनंदमकन्ना, वरोर पापि मनकल मनसु मार्सकुत्ते ओनाहाटीं स्वर्गमते बच्चोरो आनंदम आंता,” इंचि वेहतोर.

कोत्ताना वेसुडि

8 “मर्रा उंदि वेसुडि वेहांतन केंजाट. उंदि मुरतटगा पदि एंडि कोत्तां मत्तां. आ पदि कोत्तानाल उंदि कोत्ता बगानो अरसि होत्ता. अस्के अद मुरतळ सिमलि निरिच्चि, लोनअंता हेय्सि आ कोत्ता दोर्कनदाका पहकंता.

9 पजा अद कोत्ता दोर्कतस्के, दाना दंटातवुन, लोता दग्गेटवुन केय्सि, ‘नावद बगानो अरसोत्ता कोत्ता दोर्कुता, मिमेट नातोनि कलियसि आनंदम कीम्ट,’ इंचि इंता.

10 नना मीक वेहांतन, इदुनलेसीगे वरोर पापि मनकल ओना पापमताल मनसु मार्सकुत्ते ओनाहाटीं स्वर्गमते पेन दाना दूतानतोनि आनंदम कींता,” इंचि इत्तोर.

लोताल पेय्सि होत्ता मरिना वेसुडि

11 येसु इंकुंदि वेसुडि वेहातोर. “वरोर मनकंक इव्वुर मर्क मत्तुर.

12 उंदि रोञ्च सिन्ना मरि ओना बाबोन, बाबा, संपत्तिताल बच्चोन नावा पालु मंता, अद नाकु पंचि हीम, इत्तोर. इत्तस्के ओना बाबो संपत्तितुन इव्वुर मर्कुंक पंचि हीतोर.”

13 “कोन्नि रोजकुना पजा, सिन्ना मरि ओना पालुक वाता संपत्तितुन बोत्तिगा पीकुंचि, बेकेनो लक्कु देसेम पेय्सि होत्तोर. अगा होंचि बोगम कबाहकुने ओना संपत्तितुन नासडेम कीतोर.

14 ओनगा मत्तव अंता मारतस्के आ देसेमते पेद्दा करवु अरता, ओनगा बतले हिलाकोटा आता.

15 अदुनहाटीं ओर आ देसेमता वरोर मनकनगा जीतम मत्तोर. आ मनकल ओना पोलाल्कुने पद्दिं मेहालय ओन लोहचीतोर.*

16 पजा ओर पद्दिं मेयाना मेतातुन तिचि पीर निहकन बारे इंचि इनकुंदुर, गानि अद मेता इंका ओनकु बारे हिय्या हिल्लुर.”

17 “अस्के ओनकु लोता मति वाता, नावा बाबानगा बच्चुरो जीतागाहक मंतुर, ओर तित्ते मारवच्चोन गाटो अगा मंता, गानि नना बारे इगे कर्वुक हासेके मंतन.

* 15:15 यहदि लोकुल्क पद्दिं मेहमळ इत्ते अंतोर्कन्ना सिन्नातनम इनकुंदुर. अल्हेने पद्दिंन इत्ते, अबुना हव्विन तित्ते मुट्टळ इन्दुर.

18 नना ई देसेम होळसि, नावा बाबानगा मल्लिस दांतन. होंचि, 'बाबा, स्वर्गमता पेन आनि नीकु विरोदमते नना पापम कीतन.

19 इंदके नना नीवा मर्रिन लायक हिल्लेन गानि निहगा नाकुन नीवा जीतागानलेसी ईरकुन इंचि इंतन,' इल्हा इंतन, इनकुत्तोर.

20 पजा ओर अगटाल ओना बाबोनहेके पेयसतोर. पजा ओर ओना बाबाना लोतुक वेल्लेन लक्कु मत्तोर अस्के ओना बाबाल ओन हळतोर. मर्रिन हळसि बाबोंक वेल्ले पापम अनपिस्ता. अदुनहाटी ओर एदुर वितसि होंचि ओन चातिक अदमुकुंचि बुरतोर.

21 अस्के मर्रि बाबोन, 'बाबा, स्वर्गमता पेन आनि नीकु विरोदमते नना पापम कीतन. इंदके नना नीवा मर्रिन लायक हिल्लेन,' इत्तोर."

22 गानि बाबाल ओन लोन तच्चि, जीतागाहकुनतोनि, बिराना होंचि बेसता कपडिं तच्चि इनकु केरहट, ईना वेलुंक उंदि मुद्दा दोस्सट, कालकुंक हेरपुहक केरहट.†

23 अल्हेने बेस बल्सता कुरांतुन तच्चि कोय्यट, अदुन तिचि मनम कूस आकोम.

24 बारित्ते, नावा मर्रि नहागटाल वेल्लेन लक्कु होंचि हासोत्ताप मत्तोर, इंदके ओर मल्लिस वातोर. तप्सोंचि मत्तोर गानि इंदके दोर्कतोर, इंचि इत्तोर. इल्हा ओर कूस आयालय दल्गुतोर.

पेद्दा मर्रि होंग आंतोर

25 "पजा बतल आता इत्ते, ओना पेद्दा मर्रि नेदहेके होंचि मत्तोर. ओर नेदाल लोन वायानेके लोता दगोरा एवतोर अस्के ओन्क पाटां पारानद, एगरानद अल्किर केंजावाता.

26 केंजा वातस्के ओर वरोन जीतागान केय्सि, लोन बतल जर्गुसंता? इंचि पूसकीतोर.

27 अस्के आ जीतागाड, 'नीवा तम्मुर बेस मल्लिस वातोर. अदुनहाटी नीवा बाबाल, बेस बल्सता कुरांतुन कोय्या वेहातोर,' इंचि इत्तोर."

28 "इद पोल्ले केंजसि पेद्दा मर्रिक इरगा होंग वाता. ओर लोप्पो होळियोन इंचि पलातेन मत्तोर. अस्के ओना बाबाल पलाते वासि, ओन समजांचलय दल्गुतोर.

29 गानि पेद्दा मर्रि बाबोन, इच्चु वर्सानाल नना नीवा सेवा कीसेके वातन, नीवद बद्दे आदेसतुन नना नेम्हा हिल्लेन. गानि नावा दंतातोरतोनि कलियसि कूस आयालय, नाकु निमे बस्केन उंदि एटि पोरिनगुडा हिया हिल्लिन.

30 गानि नीवा ई मर्रि, नीवा संपत्तितुन बोगम कबाहकुने पूरा नासडेम कीतोर, ओनाहाटी निमे बेस बल्सता कुरांतुन कोय्या वेहतिन, इंचि इत्तोर."

31 "इत्तस्के ओना बाबाल, नावा पेडा, निमे बस्केळकु नावातोनि मनांतिन, नहागा बतल-बतल अय्ते मंता, अद अंता पूरा नीवादे आंदु.

32 गानि ईर नीवा तम्मुर वेल्लेन लक्कु होंचि हासोत्ताप मत्तोर, इंदके पिस्सि मल्लिस वातोर. तप्सोंचि मत्तोर गानि इंदके दोर्कतोर. अदुनहाटी मनम कूस आयमळ गावाले इत्तोर." इल्हा वेहचि येसु वेसुडि वेहमळ महतोर.

16

उसार दिवांजि

1 पजा येसु सिस्त्र्युलकुंकगुडा वेहालय दल्गुतोर: "वरोर सिरमंत मनकल मत्तोर. ओनगा वरोर दिवांजि मत्तोर. सिरमंत मनकानगा बोरो लोकुल्लक वासि, 'नीवा दिवांजि नीवा दनमतुन नासडेम कीसंतोर,' इंचि वेहातुर.

2 अस्के सिरमंत मनकल दिवांजिन केय्सि, 'नीवा बारेमते इल्हा बारि केंजसेक मंतन? इंदके नीकुन दिवांजि कबळते ईरा पर्रोन, निमे इच्चुं रोजुक कीता कबाटद पूरा इसाब हीम,' इत्तोर.

† 15:22 बाबो मर्रिक, ओना अदिकारम आनि कदरतुन मर्रा हीतोर. इदुन हुप्सालय वेलुंक मुद्दा दोसतोर, कालकुंक हेरपुहक केराहतोर.

3 इत्ता पजा आ दिवांजि, 'इंदके नना बतल कीकन? नावा मालक अयते नाकुन कबळ पोर्रोटाल तेंडसंतोर. इंदके नहगा कास्तकारि कबळ कियानचचो बलम हिल्ले आनि बिचचम तलकालय नाकु सिग्गु वांता,' इंचि विचारम कियालय दलगतोर.

4 'नाकुन दिवांजिता कबाटाल तेंडिना गानि लोकुल्क ओरा लोहकुने केयमळ गावाले इत्ते नना बतल कियगोमो अद नाकु तेळियता,' इंचि इनकुत्तोर.

5 इनकुंचि सिरमंत मनकंक बोर अयते बाकि मत्तुर, ओर्कुन वरोन-वरोन केयतोर, केय्सि वरोन पूसकीतोर, 'निमे मालकुंक बच्चोन बाकि मंतिन?'

6 'नालुं वेय्कु लीटर्क जयतुन निय बाकि मंतन,' इंचि इत्तोर. इत्तस्के दिवांजि ओन, 'इद पीम नीवा काता बुक आनि बिराना दीन रोंड वेय्कु लीटर्क रासा,' इंचि इत्तोर.

7 मरां इंकावरोन, 'निमे बच्चोन बाकि मंतिन?' इत्तोर. ओर, 'नूर गिद्रुं दे गोहकु हियना मंतन,' इंचि इत्तोर. इत्तस्के ओन इंका, 'इद पीम नीवा काता बुक! इवने एनबै गिद्रुं दे रासा,' इंचि इत्तोर.

8 "पजा सेड्डा कबाहक कियाना दिवांजि तेल्चिते कीता कबाहकुन आ सिरमंत मनकल हळसि, 'निमे उसार मंतिन' इंचि ओन इत्तोर. इल्हेने पेनदा लोकुल्कुंकनना एक्को, पेनदुन एरपाट किय्युवा दुनियाता लोकुल्क वरोक-वरोर हियमळ-एतमळते वेल्ले तेल्चिते मनांतुर.

9 नना वेहानद बतल इत्ते, इद दुनियाते मिमेट संपलिच्ता दनमतुन कर्च कीसि, दंटातोर्कुन दोर्किचकुंटु, बारिलते अद दनम बस्के अयते मारंता अस्के, बस्केळक मनना लोहकुने मीक जेगा दोर्कीता.

10 "सिन्ना पोल्लेतेगुडा बोर अयते विस्वासमलायक मंतोर ओर पेद्रुदा पोल्लेतेगुडा विस्वासमलायक मंतोर. अल्हेने बोर अयते सिन्ना पोल्लेतेगुडा विस्वासमलायक हिल्लोर ओर पेद्रुदा पोल्लेतेगुडा विस्वासमलायक हिल्लोर.

11 अदुनहाटीं ओक्कला मिमेट दुनियाते संपलिच्ता दनमतगा विस्वासमलायक हिलाकोटें, पेन दाना राज्येमता निजम दनमतुन मीवा कयदे बल्हा हिय्यार?

12 मनद आयवा दनमता बारेमते मिमेट विस्वासमलायक हिलाकोटें, बद दनमतुन अयते पेन मीक हीतन इंचंता, अद मीक बल्हा दोर्कार?

13 "वरोर जीतागाल इव्वुर मालकुल्कुनगा सेवा किया पर्रोर. अल्हा सेवा कीति वरोन बेस पावरम कीतोर, इंकावरोन हयसोर, हिलाकोटें वरोना पोल्ले केंजंतोर, इंकावरोना पोल्ले बारे केंजोर. अल्हेने मिमेट पेनदुन आनि दनमतुन उंदे मल्का सेवा किया पर्रोर," इंचि वेहतोर.

पेनदा पोल्ले बस्केळक मनंता

(मत्तयाल 5:31-32; 11:12-13; मरकुस 10:11-12)

14 येसु इव पोल्लें वेहनेके, अगा परिसिल्क मत्तुर. ओर कोत्ताना पोर्रो बागा जीवा कियुंदुर. अदुनहाटीं येसुना पोल्लें केंजसि ओन कारेड्डाल्क कीतुर.

15 पजा येसु ओर्कुन, "मिमेट लोकुल्कुना मुन्ने, 'मोमोट नीतिमंतुल्कुम' इंतोर, गानि पेन मीवा मनसुन एरपाट कीता. बव पोल्लें अयते मनकना विचारमते कदरतव मंतां, अव पोल्लेन पेन बिल्कुल हय्सो."

16 "बापतिस्मा हिय्यना योहान वायानादाका, लोकुल्क मूसाना नियमकु आनि पेनदा कबुरतोर रासता पोल्लेन परकारम ताकुंदुर. दाना पजा, पेनदा राज्येमता बारेमते बेसता कबुर लोकुल्कुंक वेहमळ जर्गसिक मंता. वेल्लेटुर लोकुल्क पेनदा राज्येमते जबरदस्तिते होळियसेक मंतुर.

17 ओक्कला बमि, मब्बु नासडेम आसि होना पर्रंता गानि दर्मसास्त्रमते रासतद उंदि सिन्ना पोल्लेगुडा नासडेम आयो."

18 "बोरे आयिर, मुन्नेटा मुत्तोन होळसि, इंकुंदानतोन मरमिं आयानय्ते, ओर बोगमतनम कीतोर. अल्हेने बोरे आयिर, मुय्दोन होळसीता मुर्ताटुन मरमिं आयानय्ते, ओरगुडा बोगमतनम कीतोर."

सिरमंत मनकल आनि गरिब मनकल

19 इंकुंदि पोल्ले केंजाट, वरोर सिरमंत मनकल मत्तोर. ओर, एक्को दराता नेडि पंडिना रंगुना मलमल कपडिं केर्सि रोज सुकमते, आनंदमते मनुंदुर.

20 गानि वरोर लाजर इनानोर गरिब मनकल मत्तोर. ओनकु मेंदुलंता पुनकु आसि मत्तां. ओन रोज सिरमंत मनकना गलमातगा बोरो तच्चि, होळसि होंनुंदुर.

21 सिरमंत मनकल तिननेके हिळु अरतव मेत्कुल्क तिचि पीर निहंतन इंचि अगा हळसेक मनुंदुर. इंका ओना मेंदुलता पुनकुन नय्कु वासि नाकुंदुं.

22 उंदि रोज बतल आता इत्ते, आ गरिब मनकल हासोत्तोर. अस्के पेनदा दूतां वासि ओना जीवातुन स्वर्गमते पीसि ओसि, अब्राहामुना* पक्काते इरतां. कोन्नि रोजकुना पजा सिरमंत मनकल इंका हातोर. ओन बोदा दोसतुर.

23 सिरमंत मनकना जीवा नरकमते तकलिपने तनलाळसेक मननेके वेल्ले लक्कुने ओनकु अब्राहाम दिसतोर.† ओना पक्काते लाजर मत्तोर.

24 अस्के ओर अब्राहामुन जोरसे केय्सि, “मावा एनकटा मातिर दादा, नावापोर्रो दया कीसि लाजस्न नावाहेके लोहचीम. नना तडमिते तनलाळसेक मंतन. ओर वासि ओना वेल्लुन एते मुळाहचि नावा नाल्केतुन सल्लागा कियिरकांटी,” इंचि इत्तोर.

25 अस्के अब्राहाम ओन, “हळा पेडा, निमे मति कीम, निमे पिस्सि मननेके नीकु बतल गावाले मत्ता अव अन्नि दोर्कतां, गानि लाजस्क मात्रम अव अन्नि सुकाल्क दोर्का हिल्लें. इंदके इगे ईनकु बतल तकलिप हिल्ले गानि निमे मात्रम तडमिते तनलाळसेक मंतन.

26 मर्रा उंदि पोल्ले बतल इत्ते, मीवा-मावा नड्डुम उंदि पेदूदा लौदूका मंता. अदुनहाटीं मावाहेंदाल मीहेके बोर्नना वाकोम इत्ते वाया पस्स, मिहगटाल बोर्नना मावाहेके वाकोम इनना गानि वाया पस्स, इंचि इत्तोर.

27 अस्के आ सिरमंत मनकल, ‘अल्हा अय्ते मातिर दादा, नना नीकु विनंति कीतन, लाजस्न नावा बाना लोन लोहचीम.

28 बारित्ते नाक हेय्युर तादहक-तम्महक मंतुर. ईर होंचि इव पोल्लें ओर्क वेहते, ओर इसोंटा तकलिपना जेगाताल तप्पानुर,’ इंचि इत्तोर.

29 इत्तस्के अब्राहाम, ‘ओरगा मूसाल रासता नियमकु, पेनदा कबुरतोर रासता पुस्तकाल्क मंतां. अवुन हद्विसि, अल्हे केंजिर, अल्हे ताकिर,’ इत्तोर.

30 अस्के सिरमंत मनकल, ‘अल्हा आयो अब्राहाम दादा, हातोर लोप्पोटाल बोर्नना होंचि ओर्क वेहते, ओर पापाल्कुनाल मनसु मार्सकुंतुर,’ इंचि इत्तोर.

31 अस्के अब्राहाम, मूसाल रासता नियमकु, पेनदा कबुरतोर रासता पोल्लेन बोर् अय्ते केंजुर, ओर्कु वेहालय हाता मनकल जीवा अरसि होंचि वेहाना गानि ओर केंजुर,” इंचि ओन इत्तोर.

17

माप कियमळ आनि विस्वासमता बारेमते कराहमळ
(मत्तयाल 18:6-7,21-22; मरकुस 9:42)

1 उंदि रोज येसु ओना सिस्स्यल्कुन इल्हा इत्तोर. “पापमते अरहना पोल्लें वायाका मन्नों, अव अय्ते वांतंगे. गानि अव बोनाहेंदाल वांतांगो, ओन्क बच्चोन गोसा वायार!

2 नापोर्रो विस्वासम कियना ई सिन्ना पेडानसंटोन बोर्नना पापमते अरहते, ओना बोंळगेक जोत्ता बंडा दोहाचि ओन समुद्रमते ओसि वाटतेने ओनाहाटीं बेस मंनता.

3 अदुनहाटीं मिमेट उसारते मंटु.”

* 16:22 अब्राहामएनकटा इस्त्राएलतोर वंसमते अब्राहाम इनानोर पेदूदा मनकल मत्तोर ओर पेनदा पोल्लेते ताकुंदुर. † 16:23 यहदिल्लुकुना विचारमते, बोर् अय्ते सत्तेमते मंतुर, ओर हासोत्तारित्ते अब्राहामुना पक्काते दांतुर बोर् अय्ते सत्तेमते हिल्लुर ओर तिप्पल्क मत्ता जेगाते दांतुर, अब्राहामुना पक्काते मत्तुर, तिप्पल्कुना जेगाते मत्तुर ईर आकिर न्यायमदाका अग्गेन मंतुर.

“मीवा दंटातोर पापम कीते ओन समजांचट्ट, ओर कीता पापमताल मनसु मार्सकुत्ते, ओन मापि कीम्टु.

4 उंदि रोजुने ओर एडुं मल्कां तप्पु कीते, एडुं मल्कांगुडा ओर मिहगा वासि, नना तप्पु कीतन, इंदकेटाल इल्हा किय्योन, इंचि ओप्पुकुत्ते, ओन मापि कीम्टु,” इंचि येसु वेहातोर.

5 इल्हा येसु वेहतद केंजसि, “मावा विस्वासमतुन बेर्सागोटा सामि,” इंचि ओना प्रेरितुल्क इत्तुर.

6 अस्के सामि ओर्कुन इल्हा इत्तोर. “ओक्कला मीलोप्पो आवाल्कुना पेळेतच्चो विस्वासम मनिनागानि, मिमेट इद पेद्दा ताडि मरातुन, ‘निमे नीवा हिहकुनतोनि पीकका वासि, समुद्रमते होंचि अर्ग,’ इंचि इत्ते अद मरा मीवा पोल्ले केंजंता,” इंचि इत्तोर.

जीतागाना जिम्मेदारि

7 येसु मर्ग इल्हा वेहातोर, “मिहगा बोनागाना वरोर जीतागाल मंतोर इनकुट्ट, ओर नांगेल पूहाचि हिलाकोटे गोर्रि मेहाचि, बस्के अयते ओना कबाटाल लोन वांतोर, अस्के, ओर वाता वायमळे, ‘गाटो तिनालय उदा,’ इंचि इंतारा? बस्केने इन्निर.

8 गानि, ‘नाहाटी गाटो अट्टा, वैरे कपडिं केरसि नाकु गाटो वाटसि हीम, नना तित्ता पजा निमे तिन’ इंचि इंतार.

9 निमे वेहता कबळ जीतागाल कीतोर इंचि ओन्क, दन्यवाद इंचि बस्केने हिथ्यिर.

10 अल्हेने मिमेट इंका पेन वेहता कबळ पूरा मारतस्के, ‘मोमोट मामुल जीतागाह्कुम आंदुम, माक बद कबळ कियाना मत्ता अदे कबळतुन कीतोम’ इंचि इंटु,” इंचि येसु वेहातोर.

येसु मोडिरोगमतोर्कुन बेस कीतोर

11 पजा येसु येस्सलेम होनानेके सामरिया आनि गालिल एरियाना नड्डुमताल होंचेके मत्तोर.

12 अस्के बदो उंदि नाटेने होळियनेके कुस्टरोगम आतोर पदि मंदि, हर्दुक इच्चुर लक्कु नित्तिंसि मत्तुर.

13 ओर येसुन हळसि, “ए येसु, ए सामि! मावा पोर्गो दया कीम,” इंचि वरगेयतुर.*

14 येसु ओर्कुन हळसि, “मिमेट होंचि, मीवा मेंदुल पेर्मालोर्कुंक हुप्सट,”[†] इंचि इत्तोर. इत्तस्के ओर होननेके-होननेकेन बेस आतुर.

15 अस्के ओरागटाल वरोर मनकल नना बेस आतन, इंचि हळसि पेनदुन जोर-जोरसे तल्सकुंचेके येसुनगा मल्सि वातोर.

16 वासि ओना काल्कुनपोर्गे अरसि ओन्क दन्यवाद कीतोर. ओर सामरिया मनकल मत्तोर, इत्ते सिन्ना जातितोर मत्तोर.

17 अस्के येसु, “पूरा पदि मंदि बेस आया हिल्लिरा? कळमता तोम्मिद मंदि बेके होत्तुर?

18 पेनदुन स्तुति कियालय, ई सामरि जातितोन होळसि, कळमतोर बेस आतोर बोरे वाया हिल्लुरा?” इंचि ओन इत्तोर.

19 मर्ग येसु, “तेदिस होन! निमे विस्वासम कीताहाटीं बेस आतिन,” इंचि ओन इत्तोर.

पेनदा राज्येम वायमळ

(मत्तयाल 24:23,27,28,37-41)

20 “पेनदा राज्येम बस्के वांता?” इंचि उंदि मल्का परिसिल्कु येसुन पूसकीत्तुर. अस्के येसु, “पेनदा राज्येम कळकुंक दिस्सेक वायो.

21 पेन मीवा नड्डुम राज्येम कीता. अदुनहाटीं पेनदा राज्येम इगे मंता, अगा मंता इंचि लोकुल्क इन्नुर,” इंचि वेहातोर.

* 17:13 यहदि लोकुल्क कुस्टरोगम आतोर्कुन इट्टाकोंदु, ओर्कुन नाटेना पलाते इस्दुर. ☆ 17:14 लैव्यवस्ता 14:1-32

† 17:14 कुस्टरोगम आतुर बोरे अयते बेस आथुंदुर, ओर होंचि, मोमोट बेस आतोम, इंचि पेर्मालोर्कुंक ह्पिचुंदुर. पेर्मालोर्कु ओर्कुन मिमेट बेस आतिर इंचि इत्ते, ओर लोकुल्कने होंचि कलियुंदुर.

22 अद वेहता पजा सिस्स्युल्कुन इल्हा इत्तोर, “मनकना रूपमते पुटतोर वायाना रोजकुनाल उंदि रोजुन ह्ळना विचारम कीतिर, गानि मिमेट ह्ळा परिर इसोंटा वेला वायार.

23 अस्के, ह्ळटा! मनकना रूपमते पुटतोर इगे मंतोर, अगा मंतोर इचि लोकुल्क इनानुर, गानि मिमेट अगा होनमट, ओरा पज्जो ताकमट.✱

24 बारित्ते मब्बुने उंदि बाजुंक मेरस्ते इंकुंदि बाजुंक बल्हा वेलगु अरंतनो, मनकना रूपमते पुटतोन नना वायानस्केगुडा अल्हे आयार.

25 गानि दानकन्ना मुन्ने नाकु बागा तकलिप वायार. इद पीळितोर नाकुन ह्यसुर.”

26 नोहाना रोजकुने बल्हा जर्गता, अल्हेने मनकना रूपमते पुटतोन नना वायानस्के जर्गार.

27 नोहाल डोंगाते नैगनदाका लोकुल्क तिचेके-उंचेके मत्तुर, मरमिं कीसेके, आसेके मत्तुर. अस्के पेद्दा कम्मुड वासि अंतोर्कुन मुळाहता.

28 लोतुना कालमतेगुडा अल्हेने आता. लोकुल्क तिनुड, उनुळ, अस्सुड, अम्मुड, वीतुड लोहकु दोहूड कियुंदुर.

29 गानि लोतु सदोम सहरताल बस्के अय्ते पेयसतोर, अस्के मब्बुनाल तडमि डोग्गां अरसि अद नाटेनोर अंतोर्कुन नासडेम कीता.

30 अय्ते मनकना रूपमते पुटतोन नना वायाना रोजुनेगुडा अल्हे आयार.

31 अदुनहाटी अद रोज बोर अय्ते लोतपोर्री मंतोर, लोता लोप्पो मंदना सामानतुन पीसि वायालय हिळ रेयानायो. अल्हेने बोर अय्ते नेलिने कबळ कीसेक मंतोर, ओर मल्सि वायानायो.✱

32 लोतुना मुत्तो पेनदा पोल्ले केंजवा, सदोम सहरतुन तिरियसि ह्ळतस्के, दानकु बल्हा आता, अदुन मति कीम्टु.✱

33 “बोर अय्ते ओना जीवातुन ई दुनियाते पिसागोटालय ह्ळंतोर, ओर ओना जीवातुन पोगोटकुंतोर. बोर ओना जीवातुन नावाहाटी पोगोटकुंतोर, ओन्क बस्केळ्क पिस्सना पिस्वर दोर्कता.✱

34 नना मीक वेहानद बतल इत्ते, अद नर्का उंदि कटुलते इव्वुर मनानुर. ओरावेटाल वरोन तेहाकुंचि ओयमळ जर्गता, इकावरोन अग्गेन होळसमळ जर्गता.

35 अल्हेने रोंडु मुर्ताहक कूळसि गट्का नोरसेक मनंतां, उंदिदितुन ओयमळ जर्गता, इंकुंदिदितुन अग्गेन होळसमळ जर्गता.

36 इव्वुर मनकालोर पोलमते मत्ते, पेन वरोन पीसि ओयार, वरोन बारे अग्गेन होळसिय्यार,” इंचि इत्तोर.‡

37 अस्के सिस्स्युल्कु येसुन, “इव पोल्लें बगा आयानुं सामि?” इंचि पूसकीतुर. अस्के, “बगा अय्ते पीनगु मनंता, अग्गेन गद्दलि जमा आंतां,” इंचि येसु इत्तोर.

18

पारतना कीसेकेने मंदना

1 पजा येसु ओना सिस्स्युल्कुन, “रोज पारतना कीसेके मंदांना, पारतना कियानाहाटी बस्केने पजोळ्क आयामान्नि,” इल्हा इंचि उंदि वेसुडि वेहातोर.

2 “उंदि नाटेने वरोर न्यायम कियाना पेद्दा मनकल मत्तोर. ओर पेनदुक वेरियाकोंदुर, लोकुल्कुना पर्वा कियाकोंदुर.

3 अदे नाटेने उंदि मुंडामोस्ता मुरतळ मत्ता. अद ओनगा रोज वासि, ‘नावापोर्री अन्यायम आता, नाकु न्यायम कियमळ गावाले,’ इंचि ओन इनुंदु.

4 ओर वेल्लेने रोजकुनदाका दाना पोल्लेने केंजाकोटा मत्तोर. गानि उंदि रोज ओर इल्हा विचारम कीतोर. ‘नना पेनदुक वेरियानोन आयोन, मनकालोर्कुना पर्वा कियानोन आयोन.

✱ 17:23 मरकुस 13:21 ✱ 17:31 मत्तयाल 24:17-18; मरकुस 13:15-16 ✱ 17:32 उत्पत्ति 19:26

✱ 17:33 मत्तयाल 10:39 ‡ 17:36 इद वचनम कोन्नि पांडु लिपिने हिल्ले.

5 अयनागानि इद मुरतळ रोज वासि नाकुन परेसान कीसेक मंता. अदुनहाटीं इंदके नना दीना न्यायम कीतन. हिलाकोटे इद बस्केळके नाकुन परेसान किय्यार,' इनकुत्तोर.”

6 मर्रा सामि इत्तोर, “सेड्डा मजिस्टर बतल इत्तोर, अद पोल्लेतुन मति कीम्टु.

7 पेन पेरकुत्ता लोकुलक न्यायम आयागोम इंचि नर्का-पल्लिहें पेनदुन पारतना कीसेक मनांतुर, पेन ओर्क सहाय्यम कियालय आलसेम किय्यारा?

8 नना मीक वेहासेक मंतन, पेन ओरा न्यायम बिराना किय्यार. अयनागानि मनकना रूपमते पुटतोन नना मल्लिस वातस्के, इद बूमिते विस्वासम होळसाकोटा पारतना कीसेक मनानोर दोर्कानुरा?” इंचि वेहतोर.

मनम पेनदा मुन्ने सिन्नागासि मनमळ गावाले

9 बोर अयते लोकुलक मोमोटे नीतिमंतुलुकुम इन्कुंचि सतता पोर्रिन बरोसा इर्सि, इंकावरोन सिन्ना हळंदुर, ओराहाटीं इंका येसु उंदि वेसुडि वेहतोर.

10 इव्वुर मनकालोर गुळिते पारतना कियालय होत्तुर. ओरंटे वरोर बारे परिसि मनकल, इंकावरोर बारे कर वसुल कियानोर.

11 परिसि वेरे नित्तिसि पारतना कियालय दलग्तोर, ए पेनबाबा! नना इंका वरोनलेसी दोंगन आयोन, इंकावरोन बोकिचानोन आयोन, बोगम कबाहक कियानोन आयोन, ई कर वसुल कियानोनलेसी लोकुलकुन मुळहानोन आयोन.

12 वारमकु रोंडु मलकां ओक्कापोद्दु मंनंतन, नावा कमयता पदि तूसकुनाल उंदि तूसगुडा नीकु हीतन, इंचि इत्तोर.

13 “गानि कर वसुल कियानोर लक्कु निततोर, ओनकु पोर्रो हळालयगुडा दैरनेम आयाहिल्ले. ओर चातितुन तंचेके पारतना कीतोर, ‘ए पेनबाबा, नना पापि मनकन आंदुन, नावापोर्रो दया कीम,’ इंचि इत्तोर.

14 नना मीक वेहांतन गदा, ओरा इव्वुरा लोप्पोटाल कर वसुल कियानोरे पेनदा मुन्ने नीतिमंतुड आसि लोन होत्तोर. गानि परिसि नीतिमंतुड आयोर. बारित्ते, बोर ओनद ओरे नना पेद्दोन इंचि इनकुत्तोर, पेन ओन सिन्नगा कीता. अल्हेने बोर ओनद ओरे नना सिन्नोन इंचि इनकुत्तोर, पेन ओन पेद्दा कीता,” इल्हा वेहचि येसु सामि वेसुडितुन महतोर.

येसु सिन्ना पिलालकुंक आसिर्वाद हीतोर

(मत्तयाल 19:13-15; मरकुस 10:13-16)

15 उंदि रोज लोकुलक ओरा सिन्ना पिलालकुंक येसु आसिर्वाद हियाना इंचि पीसि वायालय दलग्तुर. गानि सिस्सुलक हळसि ओर्कुन रांगतुर.

16 गानि येसु पिलालकुन केय्मि इत्तोर, “पिलालकुन नाहेके वायाहीम्ट, ओर्कुन आपमट. पेनदा राज्येम इंसंटरदे आंद.

17 नना मीक निजम वेहांतन, बोरे आयिर ओरा मनसुने पेनदा राज्येमतुन सिन्ना पिलालकुनालेसी ओप्कुन्नुर, ओर पेनदा राज्येमते होळिया पर्स्स,” इंचि सिस्सुलकुंक वेहातोर.

सिरमंतुलक आनि पेनदा राज्येम

(मत्तयाल 19:16-29; मरकुस 10:17-30)

18 पजा यहुदिलकुना वरोर लीडर इल्हा इत्तोर, “गुरु, निमे बेसतोन आंदिन. बस्केळक पिस्सना पिस्वरता वारसदार आयानाहाटीं नना बतल कीति बेस?” इत्तोर.

19 अस्के येसु ओन इल्हा इत्तोर. “नाकुन बारि बेसतोर इतिन? बोरे बेसतोर आयोर, सिराप पेन उंदे बेसतद आंद.

20 नीकु पेनदा आदेसकु अयते एरपाटे मंतां: बोगमतनम कियमा, बोने हळुकुमा, दोंगातनम कियमा, आबद्दम गवाइ हियमा, तल्लुर-बाबोना कदर कीम,”* इत्तोर.

21 अस्के ओर, “नना अयते इव अन्नि सिन्नास्केटाल कीसेकेन वातन,” इंचि ओर इत्तोर.

22 ओर इत्तद केंजसि येसु ओन इल्हा इत्तोर. “इंदकेगुडा निहगा उंदि पोल्ले तक्को मंता. निहगा बतल अयते मंता, अदुनंता पूरा अम्मिसि, गरिबोर्कुंक तूसि हीम. अस्के नीकु स्वर्गमते दनम दोर्कार, पजा नहगा वासि ना पज्जो ताका,” इत्तोर.

23 गानि येसुना पोल्ले केंजसि, ओन्क इरगा दुक्कम वाता. बारिल्ले ओर वेल्लेन सिरमंत मत्तोर.

24 येसु ओर्कुन ह्ळसि इल्हा इत्तोर. “सिरमंतुल्क पेनदा राज्येमते होळियमळ इत्ते वेल्लेन कस्टम.

25 वरोर सिरमंत मनकल पेनदा राज्येमते होळियमळकन्ना लोटापेटा सूदि बोंगाताल होनमळ अल्कगा मंनंता,” इत्तोर.

26 अस्के बोर अयते येसुना पोल्ले केंजतुर, ओर, “अल्हा अयते मरि मुक्ति बोर्क दोर्का परंता?” इंचि इत्तुर.

27 अस्के, “मनकालोरतोनि आया पर्फवा पोल्ले, पेन किया परंता,” इंचि येसु ओर्कुन इत्तोर.

28 अस्के पन्न, “ह्ळा, मोमोट अयते लोन-दारा होळसिसि नीवा पज्जो वातोम,” इंचि इत्तोर.

29 अस्के येसु इल्हा इत्तोर, “नना मीक निजम वेहांतन. पेनदा राज्येमताहाटी ओना लोन-दारातुन, मुत्तोन, तम्मुहक-दादालोर्कुन, पिलाल्कुन, तल्लुर-बाबोन होळसीतोरो,

30 आ मनकंक इद कालमते होळसीतवुंकन्ना बच्चोरो एक्को संपत्ति, जीवातोर दोर्कानुर, अल्हेने वायाना कालमते बस्केळ्ळक पिस्सना पिस्वरगुडा दोर्कार,” इत्तोर.

येसु ओना हामुरता बारेमे वेहांतोर

(मत्तयाल 20:17-19; मरकुस 10:32-34)

31 पजा येसु ओना पन्नेड सिस्युल्कुन बाजूंक ओसि इल्हा इत्तोर, “ह्ळाट, मनम येस्सलेम होंचेके मंतोम. मनकना रूपमते पुटतोन, ना बारेमते पेनदा कबुरतोर बतलयते रासतुर, अव पूरा आंतां.

32 अगा नाकुन यहुदि आयवोरा कय्दे अप्पजेपनुर, अस्के ओर नाकुन सिडांचनुर, अपमानम कियानुर, नापोर्री उस्कानुर,

33 पोर्टूते तन्नुड आतस्के ह्ळकानुर. गानि म्ढोव रोजुने नना मर्रा जीवाते तेदंतन,” इंचि वेहतोर.

34 गानि ओना सिस्युल्कुंक मात्रम ओर वळ्ळकता पोल्ले तेळिया हिल्ले. अद पोल्ले ओराहाटी मर्ममते मत्ताहेंके, ओर्क बतल अर्तम आयाहिल्ले.

वरोर गुड्डिन येसु बेस कीतोर

(मत्तयाल 20:29-34; मरकुस 10:46-52)

35 पजा येसु यरिहो सहरता दग्गोरा एव्तोर. अगा हर्दा पक्काते वरोर गुड्डिड बिच्चागाड बिच्चम तल्कसेके उद्दिदिसि मत्तोर.

36 ओना पक्काताल लोकुल्कुना मंदा होनना सप्पुड केंजसि, “इगे बतल आसेके मंता,” इंचि पूसकीतोर.

37 अस्के बोरो ओन, “नासरेत नाटेना येसु इग्गेटाल होंचंतोर,” इंचि वेहतुर.

38 वेहतस्के, “येसु, दाविद राजाना वंसमतोना! नापोर्री दया कीम,” इंचि आ गुड्डिड वरगेयतोर.

39 अस्के ओना मुन्नेटाल होनानोर अंतोर ओन, “चुपचाप मन,” इंचि रांगतुर. गानि, “दाविद राजाना वंसमतोना, नापोर्री दया कीम,” इंचि जोरसे मोत्कुनालय दलगतोर.

40 अस्के येसु आगसि, “ओन नहगा पीसि वट्टु,” इंचि हुकुम कीतोर.

41 पजा ओन येसुनगा तत्तस्के, “नना नीहाटी बतल कियना इंचि नी मनसु मंता?” इंचि येसु ओन पूसकीतोर. अस्के, “सामि, नावा कळ्ळकुना नदर दिस्सानाल कीम,” इंचि आ गुड्डिड इत्तोर.

42 पजा येसु ओन, “इंदकेटाल ह्ळालय दलगा, नीवा विस्वासमे नीकुन बेस कीता,” इंचि इत्तोर.

43 अल्हा इत्ता इनुडे ओना कळ्ळकुंक नदर वासि पेनदुन तल्सकुंचेके ओना पज्जो होत्तोर. अगा मत्ता लोकुल्क अल्हा आतद ह्ळसि, ओरगुडा पेनदुन तल्सकुनालय दलगतुर.

19

येसु जकय्याना लोन दांतोर

1 अल्हा आता पजा, येसु यरिहो नाटेनाल होंचेके मत्तोर.

2 अद नाटेने वरोर जकय्या पोरोलतोर कर वसुल कियानोरा पोरो अदिकारि मत्तोर. ओर बागा सिरमंत मत्तोर.

3 येसु बोर आंदुर हळंतन इंचि ओर इनकुत्तोर, गानि अगा वेल्ले गर्दि मत्ताहाटी हळा परा हिल्लोर. बारित्ते ओर पोद्विगा मत्तोर.

4 अदुनहाटी ओर येसु होनना हर्दुक मुन्ने वितसि, ओन हळालय उंदि नेडि मरा पोरो एकतोर.

5 येसु अद मरातगा एवतस्के पोरो हळसि, “जकय्या, बिराना हिळ रेय्या! इय्याला नाकु नीवा लोने आगाना मंता,” इंचि इत्तोर.

6 इत्तारिते जकय्याल बिराना मराताल रेय्से, कुसिते येसुन ओना लोन ओतोर.

7 येसु जकय्याना लोन होत्तद हळसि लोकुलक, “ईर पापि मनकना लोन हेडमिं इंचि होत्तोर,” इल्हा गुल्गालय दल्यातुर.

8 पजा जकय्याल नित्तिसि सामिन, “सामि, नावा सम्सारमताल सगम गरिबोर्कुंक हीतन, नना बोनना मुळाहचि येततद मत्ते, येततादानकन्ना नालुं अंताल्क एक्को मलाहचि हीतन,” इंचि इत्तोर.

9-10 अस्के येसु, “तप्सि होत्ता पापि लोकुलकुन पहकिसि, ओर्कुन पिसागोटालय मनकना रूपमते पुटतोन नना वातन. अदुनहाटी ईरगुडा अन्नहामुना वंसमते पुटतोर आंदुर इंचि, इय्याला ईना लोतोर पापमताल पिस्तुर,” इंचि वेहतोर.

पदि बंगारम बंडिना वेसुडि
(मत्तयाल 25:14-30)

11 लोकुलक ओर वेहाना पोल्लें केंजसेके मत्तुर. अगटाल येस्सलेम सहर दगोरेने मत्ता. इंदके येसु येस्सलेमते एवतस्के ओर पेनदा राज्येम निलाहनुर इनकुंचेके मत्तुर. अदुनहाटी येसु ओर्क उंदि वेसुडि वेहतोर.

12 “वरोर पेद्दा वंसमतोर मनकल मत्तोर, ओर राजाल आसि वायालय लक्कुटा देसेम होत्तोर.

13 होनाका मुन्ने ओना पदि दासुलकुन केय्से, मनकंक पदि बंगारम बंडि हीसि, ‘नना मल्लि वायानादाका इव कोत्ताने मिमेट दंदा कीम्दु,’ इंचि इत्तोर.

14 “गानि नाटेना लोकुलक ओन हय्साकोंदुर, अदुनहाटी, ‘ओर मापोरो राज्येम कियमळ माकु इस्टम हिल्ले,’ इंचि पेद्दा राजांक वेहालय पेरतोर्कुन ओना पज्जेन लोहतुर.

15 पजा आ मनकल राजाल आसि मल्लि वातोर. ओर बोर्क अय्ते कोत्तां हीसि मत्तोर ओर दंदा कीसि बचचोन कमय कीतुरो हळानाहाटी आ दासुलकुन केया वेहतोर.

16 मोदाटा दासुड वासि, ‘मालक, निमे हीता पदि बंडिनतोनि नना इंका पदि बंगारम बंडिं कमय कीतन,’ इंचि इत्तोर.

17 अस्के राजाल, ‘निमे बेस कबळ कीतन, निमे बेसता दासुन आदिन, निमे सिन्ना कबळतगागुडा विस्वासमलायक मत्तिन, अदुनहाटी पदि नाहकुन ताकसालय नीकु अदिकारम हीतन,’ इंचि इत्तोर.

18 अल्हेने रोंडो दासुडगुडा वासि, ‘सामि! निमे हीता बंडिनतोनि नना इंका हेय्युं बंडिं कमय कीतन,’ इंचि इत्तोर.

19 अस्के राजाल ओनगुडा, ‘निमे हेय्युं नाहकुन पोरो अदिकारिन आकिन,’ इंचि इत्तोर.

20 पजा इंकावरोर दासुड वासि, ‘सामि! इद हळा निमे हीता बंगारमता बंडिं. इदुन नना पेगुने दोहाचि मक्किचि इरतन.

21 बारित्ते निमे कळक मनकन आदिन, अदुनहाटी नना वेरियतन. निमे बद अय्ते ईरा हिल्लिन अदुन तेंडकुंतिन, निमे वीतवगा कोय्यतिन,’ इंचि इत्तोर.

22 अस्के राजाल ओन इल्हा इत्तोर, 'अरे निमे लंडु दासुन आंदिन! नीवा तोळ्दाल पेयसता पोल्लेतेन नीवा न्यायम कीतन. नना कळक मनकन, नना बद अयते ईर् हािल्लेन अदुन तेंडकुंतन, नना वीतवगा कोय्यंतन इंचि नीकु एरपाटे मत्ता.

23 अयते नना हीता कोत्तातुन बेंकते बारि वाटा हिल्लिन? नना मल्सि वातस्के नावा कोत्तां वाड्डितोनि एक्कुंचि मन्नेन,' इत्तोर.

24 पजा दग्गेरा नित्तिसि मत्तोर्कुन इल्हा इत्तोर. 'मिमेट ओनागटाल आ बंगारम बंडितुन एत. एतसि पदि बंगारम बंडिं मत्तोनागा हीम्टु,' इत्तोर.

25 अस्के ओर, 'अयते सामि, ओनागा पदि बंगारम कोत्तां मंता गदा,' इंचि इत्तुर.

26 नना मीक वेहंतन, बोनागा अयते पेनदा पोल्लेन तेल्लिचकुनना बुद्दिद मंता, पेन ओन्क इंका हीता, गानि बोनागा पेनदा पोल्लेन तेल्लिचकुनना बुद्दिद हिल्ले, ओनागा मत्ता बुद्दिदतुनगुडा पेन एतकुन्ना.

27 गानि, 'ईर राज्ये कियामन्नि,' बोर पगातोरो अयते इत्तुरो, ओर्कुन नावा मुन्ने तच्चि हक्कट, इंचि मालक इत्तोर," इल्हा वेहचि येसु वेसुडितुन महतोर.

येसु सामि येस्सलेमते होळियंतोर

(मत्तयाल 21:1-11; मरकुस 11:1-11; योहान 12:12-19)

28 इव पोल्ले वेहता पजा येसु लोकुकुना मुन्ने-मुन्ने येस्सलेमताहेके ताकसेके पेयसतोर.

29 होननेके जयतुन मराकुना गुट्टापोरो मनना बैतपागे आनि बेतानिया इनना नाहकुना दग्गेरा एत्तोर. पजा येसु ओना इव्वुर सिस्स्युलुकुन केय्सि,

30 ओर्क इल्हा वेहचि नाटे लोहतोर. "मी मुन्ने दिस्सना नाटे होंट. मिमेट अद नाटे होळियतस्के बस्केने बोरे उदुदुवद उंदि गाडदि पोरि दोहचि मत्तद मीकु दिसंता, दान लेहकुंचि इग्गे पीसि वट.

31 ओक्कला अदुन पीसि वायनेके, 'दीन बारि लेहचंतिर?' इंचि बोर्नना पूसकीते, 'सामिक दीना अक्सरम मंता' इंचि वेहट," इत्तोर.

32 बोर्कुन अयते लोहमळ जर्गता, ओर नाटे होतस्के येसु वेहतापे ओर्क दिसता.

33 पजा ओर गाडदि पोरिन लेहनेके, दाना मालकुल्लक हळसि, "मिमेट गाडदि पोरिन बारि लेहसंतिर?" इंचि इत्तुर.

34 अस्के ओर, "सामिक दीना अक्सरम मंता," इंचि इत्तुर.

35 पजा गाडदि पोरिन येसुनगा तत्तुर. तच्चि ओरा कपडिं दानपोरो तारसि, येसुन दानपोरो उरिस्तुर.

36 उद्दिदिसि होननेके ओन्क कदर हियानाहाटीं लोकुल्लक ओर केर्ता कपडिं तेंडसि हर्दे तारतुर.

37 अल्हेने पजा ओर जयतुन मराकुना गुट्टा पोरोटाल हिळ्ळ रेयनेके ओना पज्जो वायाना ओना अंतोर सिस्स्युल्लक ओर हळता अद्बूतामाता कबाहकुनहाटीं वेल्ले कुसिते जोर-जोरते पेनदुन इल्हा तल्सकुनालय दल्गतुर.

38 "पेनदा अदिकारम पीसि वायाना राजाल वेल्लेन आसिर्वाद दोर्कतोर आंद.☆

पेनदाहेंदाल सांति वायि! पोरोटा पेद्दा पेनदा कदर आयि!"

इंचेके तल्सकुनालय दल्गतुर.

39 अस्के मंदिताल इच्चुर परिसिल्लक येसुनगा वासि, "गुरु! नीवा सिस्स्युलुकुन वरगेयमट इंचि गदारिच्चा," इंचि इत्तुर.

40 पजा येसु ओर्कुन, "नना मीक वेहंतन, ओक्कला ईरगिटा चुपचाप मत्ते, इव बंडां वरगेयालय दल्गांतां," इंचि इत्तोर.

येस्सलेमतुन हळसि येसु अळंतोर

41 पजा येस्सलेम सहरता दग्गेरा एव्त्स्के, अद सहरतुन हळसि येसु अळतोर.

42 अळसेके, “सांति दोर्कना पोल्लें इय्याला मीकु तेळियसि मल्ले बेस आसि मनवळ, गानि इंदके अव पोल्लें मीवा कळकुंक दिस्सों.

43 मीवा पगातोर सुट्टु आसि मीकुन नालुं मूलानाल तकलिप कियानुर, असोंटा वेला वायार.

44 मीवा पेन मीकुन पिसागोटालय मिहगा वाता वेलातुन एरपाट किया हिल्लिर. अदुनहाटीं मीवा पगातोर मीकुन, मीवा पिलालकुन तोळिते कल्पानुर. पजा बंडां उंदानपोरों उंदि इर्सि दोहता गुरेतुन कूलाहचि समानम कियानुर,” इत्तोर.

गुळिते अम्मनोर्कुन येसु गेदमंतोर

(मत्तयाल 21:12-17; मरकुस 11:15-19; योहान 2:13-16)

45 पजा येसु गुळिते होळियतोर, होळियसि अगा अम्मनोर्कुन गेदमालय दलगतोर.

46 पजा येसु ओर्कुन इल्हा इत्तोर. “नावा लोतुन पारतना कियाना लोन इंतुर, इंचि दर्मसास्त्रमते रासि मंता. ✱ गानि मिमेट दीन दोंगालक मक्कना जेगा कीतिर,” इत्तोर. ✱

47 इल्हा येसु रोज गुळिते पेनदा पोल्लें करहुंदुर. गानि पेद्दा पेर्मालोर्क, दर्मसास्त्रम कराहना गुस्लक, पेद्दा मनकालोर्क ओन हक्कालय हळुंदुर.

48 गानि अंतोर लोकुलक वेल्ले कुसिते येसु वेहाना पोल्लें केंजुंदुर. अदुनहाटीं ओन बल्हा हक्कना ओर्क आटम आयाकौंदु.

20

यहुदि पेद्दालक येसुन पोल्ले पूसकीतुर

(मत्तयाल 21:23-27; मरकुस 11:27-33)

1 उंदि रोजु येसु लोकुलकुंक गुळिते कराहसेके, बेसता कबुर वेहासेके मत्तोर. अस्के पेद्दा पेर्मालोर्, दर्मसास्त्रम कराहना गुस्लक, आनि यहुदि पेद्दालक येसुनगा वातुर.

2 वासि, “निमे इव कबाहक बद्द अदिकारमते कीसंतिन?”* इव कबाहक कियालय नीकु अदिकारम बोर हीतोर? माक वेहा,” इंचि इत्तुर.

3 अस्के येसु ओर्क इल्हा जवाब हीतोर, “ननागुडा मीकुन उंदि सवाल पूसकीतन, अय्ते वेहाट,

4 योहानुंक बापतिस्मा हियाना अदिकारम बगाटाल दोर्कता? स्वर्गमताला हिलाकौंटे मनकालोराहेंदाल दोर्कतना?” इत्तोर.

5 अस्के, ओर-ओर इल्हा वळ्ळकुत्तुर. “ओक्कला स्वर्गमताल दोर्कता इंचि मनम इनानय्ते, ‘मिमेट योहानुन बारि नम्मिर?’ इंचि इनानुर.

6 ओक्कला मनम मनकालोराहेंदाल इनानय्ते, अंतोर लोकुलक मनापोरों बंडां हुक्कानुर, बारिल्ले योहानुन पेनदा कबुरतोर इंचि ओर नमतुर,” इत्तुर.

7 अदुनहाटीं ओर, “ओन्क अदिकारम बगाटाल दोर्कतनो माक एर्का हिल्ले,” इंचि इत्तुर.

8 “अल्हा अय्ते, इव कबाहक बद्द अदिकारमते कीसंतनो, ननागुडा मीकु वेहोन,” इंचि येसु इत्तोर.

पेनदा मरिनगुडा हक्कंतुर

(मत्तयाल 21:33-46; मरकुस 12:1-12)

9 पजा येसु लोकुलकुंक ई वेसुडि वेहालय दलगतोर. “बरोर मनकल उंदि अंगुर तोटा कीतोर. पजा व्हेरतोरक बटाइक हीसि वेल्लेन रोजकुनाहाटीं व्हेर देसेम होत्तोर.

10 पजा बस्के अय्ते अंगुर पंडिं कोय्याना वेला वाता, अस्के ओरागटाल पंडिना तूस एतालय ओना बरोर दासुन बटाइतोरहेके लोहतोर. गानि बटाइतोर आ दासुन पीसि पक्का तंचि उत्ता कय्के वापस लोहतुर.

11 अस्के मालक इंकावरोन दासुन बटाइतोरहेके लोहतोर. आ बटाइतोर ओनगुडा पीसि तंचि कदर हिलाकोटा कीसि उता कयके वापस लोहतुर.

12 पजा मालक मूडोव दासुन लोहतोर. ओनगुडा बटाइतोर नोपि आयनाल तंचि तोटाता पलाते दोब्बिसीतुर.

13 पजा तोटाता मालक, 'नना बतल कीकन?' इंचि विचारम कीतोर. 'सरे, इंदके नावा पावरमगल्ला मरिन लोहंतन, अस्के ओन हळिसन्ना कदर हिय्युरा?' इनकुंचि ओना मरिन ओरहेके लोहतोर.

14 गानि बटाइतोर ओर वायानद हळसि, 'ईर अयते वारसदार आंदुर, दट ओन मनम हक्ककोम, अस्के ओना जायदाद मनाक आया परता,' इंचि वरोंक-वरोर इत्तुर.

15 पजा ओर अगा वातस्के, ओन तोटाता पलाते ओसि हक्कतुर.

"इंदके अंगुर तोटाता मालक वासि ओर्कुन बतल कियानुर?"

16 ओर वासि आ बटाइतोर्कुन हळिसि अद तोटातुन वैरेतोर्क बटाइक हिय्यानु," इत्तोर.

अद पोल्ले कैजसि, "अल्हा जर्गाकोटा पेन आपिकांटी," इंचि अगा मत्तोर इत्तुर.

17 अस्के ओरहेके हळसि येसु ओर्कुन इल्हा इत्तुर. "बद बंडातुन अयते मिस्त्रिलक कबळ्ळ ओज्जो इंचि हयसा हिल्लुर, अदे बंडा सेंकु मूलाता पुनादि बंडा आता.☆ इल्हा पेनदा पोल्लें रासि मंतां, इवुना अर्तम बतल आंदु?"

18 बोर अयते इद बंडापोर्री अररतुर, ओर तुकडां-तुकडां आयनुर, गानि अद बंडा बोरपोर्री अयते अरता, ओर पिच्चि-पिच्चि आयानुर," इंचि इत्तोर.

19 येसु वेहता पोल्लें कैजसि, दर्मसास्त्रम कराहना गुम्लक आनि पेद्दा पेर्मालोर्क, "ईर मनाकुने इंचंतोर," इंचि एरपाट कीतुर. अदे वेलाते ओन दोर्का पियालय हळतुर गानि लोकुलकुन हळसि वेरियतुर.

यहूदि पेद्दा मनकालोरा उपायाल्क

(मत्तयाल 22:15-22; मरकुस 12:13-17)

20 अस्के ओर, येसु बतलन्ना तप्पु वळ्ळकते ओन पीसि रोम सरकारता राज्यपालनगा ओकोम इंचि, ओनपोर्री नदर इरतुर. इच्चुर्कुन नीतिमंतुलकुनालेसी मंचि ओना आयडां गुंजालय येसुनगा लोहतुर.

21 आ आयडां गुंजानोर येसुनगा वासि इल्हा इत्तुर. "गुरु, निमे सत्तेम वळ्ळकानोन, निजम करहानोन आदिन, बोने सिन्ना-पेद्दा हळिन. पेनदा हर्दा बारेमते सत्तेमते कराहंतिन इंचि माक एरपाटे मंता.

22 अयते नियम परकारम, कैसर राजांक मोमोट कर दोहमळ न्यायमेना, आयोना?†" इत्तुर.

23 येसु ओरा पिलान एरपाट कीतोर.

24 कीसि, "नाक उंदि एंडि बंडि हुप्सट, दानपोर्री बोना पोदुवा आनि पोरोल मंता," इंचि इत्तोर. अस्के "कैसर राजानद," इंचि ओर इत्तुर.

25 अस्के, "कैसस्क दोहना कर कैसस्क दोहाटु, पेनदुक हियानव पेनदुक हीम्टु," इंचि येसु इत्तोर.

26 इल्हा लोकुलकुना मुन्ने येसुन ओना पोल्लेने ओर पिथ्या पर्राहिल्लुर. गानि ओना पोल्लें कैजसि इचंत्रम आसि चुपचाप आतुर.

सदुकिर्कुना उपायाल्क

(मत्तयाल 22:23-33; मरकुस 12:18-27)

27 पजा इच्चुर सदुकि इनना लोकुलक येसुनगा वातुर. मनकल हासि मर्रा जीवाते तेदोर इंचि ईर नम्मंतुर.

☆ 20:17 बजन संहिता 118:22 † 20:22 रोमि लोकुलक बोम्मा पूजे कियंदुर, यहूदि लोकुलक बारे बोम्मा पूजे कियाकोंदुर. अदुनहाटी कैसर राजांक कर दोहमळ इले यहूदि लोकुलक पेनदा नियमते न्यायम आयो इन्दुर, कर दोहाकोटे कैसर राजांक विरोद आयंदु.

28 वासि इल्हा सवाल पूसकीतुर. “गुरु, मूसाना नियम परकारम, वरोर मनकल पिलाल्क आयाका मुन्नेने हायानय्ते, ओना मुत्तोनतोनि ओना तम्पुर मरमि आसि, हातोना वंसम बेर्सागोटालय पिलाल्कुन कना परांतोर, इंचि मंता.

29 अय्ते, एडुर दादाल-तम्मुहक मत्तुर. ओरा लोप्पोटाल पेद्दोड मरमि आतोर, गानि पिलाल्क आयाका मुन्नेन ओर हातोर.

30 हातस्के ओना पज्जोटोर दान मरमि आतोर, ओरगुडा पिलाल्क आयाका मुन्नेन हातोर.

31 ओना पज्जोटोरगुडा दान मरमि आसि पिलाल्क आयाका मुन्नेन हातोर. इल्हा एडुरगुडा दानतोनि मरमि आसि, पिलाल्क आयाका मुन्नेन हातुर.

32 पजा आ मुरतळगुडा हाता.

33 अय्ते, हातोर अंतोर मर्रा जीवाते तेदतस्के, आ एडुर लोप्पोटाल अद बोना मुत्तो आयार? बारित्ते ओर एडुरगुडा दान मरमि आसि मत्तुर,” इत्तुर.

34 अस्के येसु इल्हा वेहतोर, “ई दुनियाता लोकुल्कुने मरमि आयमळ, मरमि कीसि हियमळ जर्गता.

35 गानि बोअर अय्ते हामुरताल मर्रा जीवाते तेदनलायक मनंतुर आनि मर्रा जीवाते तेदमळतुन दोर्किचकुंतुर, ओर वायाना कालमते बस्केने मरमि आयुर, मरमि कीसिगुडा हिय्युर.

36 ओर पेनदा दूतनलेसी मनांतुर, बस्केने हायुर. ओर हामुरताल मर्रा जीवाते तेदताहाटी, ओर पेनदा पिलाल्क आयानुर.

37-38 पोत्तना पोदाता बारेमते मूसाल बतल रासतोर मिमेट हदवा हिल्लिरा? अब्राहाम, इसाक, याकोब ईर वेल्लेने मुन्ने हासोत्तुर. अयना मूसाल पेनदुन अब्राहाम, इसाक, याकोब मोळकाना पेन इंचि इत्तोर. पेन हातोरद आयो गानि जीवाते मनानोरद आंद इंचि मनाकु एरपाट मंता. अद पेनदुन एरपाट कियानोरा अंतोरा जीवां पिसंतां. इल्हा हातोरगुडा जीवा अरंतुर इंचि मूसाल हुपिस्तोर.” इंचि येसु इत्तोर.

39 येसु वेहता पोल्लेतुन केंजसि, “गुरु! निमे बेस वेहतिन,” इंचि इच्चुर दर्मसास्त्रम कराहना गुरूक इत्तुर.

40 पजा येसुन सवाल पूसकियालय बोर्के हिम्मत आयाहिल्ले.

पेन लोहता पिसागोटनोर
(मत्तयाल 22:41-46; मरकुस 12:35-37)

41 पजा येसु ओर्कुन इल्हा इत्तोर. “किरिस्तु दाविदना मर्रि आंदुर इंचि दर्मसास्त्रम कराहना गुरूक बल्हा इना परांतुर?

42-43 कुद्दु दाविदे ओना बजन संहिता पुस्तकमते इल्हा रासतोर.

‘सामि, नावा सामिनः इत्तोर, बदवेरदाका अय्ते नीवा पगातोर्कुन,

नीवा काल्कुनगा तरौन, अदवेरदाका नावा तिना बाजुंक उद्दिदिस मन, इत्तोर.’*

44 इल्हा दाविद ओन, ‘सामि’ इंचि इत्तोर. अय्ते ओर दाविदना मर्रि बल्हा आया परांतोर?”

दर्मसास्त्रम कराहना गुरूकुनलेसी किया मनि
(मत्तयाल 23:1-36; मरकुस 12:38-40)

45 अंतोर लोकुल्क ओना पोल्लेतुन केंजसेके मननेके, येसु ओना सिस्कुल्कुन इल्हा इत्तोर,

46 “दर्मसास्त्रम कराहना गुरूकुनाल उसारते मंटु. पोर्रोटाल हिळुदाका पोळ्गु अंगिं केसि तिरियमळ, हाटुमकुने जोहार वेहागोटकुनमळ ओर्क बेस अनपिचंचता. अल्हेने दर्मसास्त्रम कराहना लोहकुने, कुळपुकुने पेद्दाल्क उद्दाना जेगाते उदमळ इत्ते ओर्क वेल्ले इस्टम.

47 ईर मुंडामोस्ता मुर्ताहकुन मुळहंतुर, लोकुल्कुंक हुप्सालय वेल्लेनजेम पारतना कीतुर. गानि ईर्क मात्रम पेन अंतोर्कन्ना एक्को सिक्सा हियार,” इंचि इत्तोर.

‡ 20:42-43 सामि इगे सामि इत्ते पेन लोहना पिसागोटना किरिस्तुना बारेमते आंद.

* 20:42-43 बजन संहिता 110:1

21

पेनदुक नच्चना दानम
(मरकुस 12:41-44)

1 पजा येसु इच्चुर लक्कु नदर वाटतोर अस्के सिरमंत लोकुल्लक दान पेडिते पेनदाहाटीं कोत्तां वाटनेके ओन्क दिसतुर.

2 अस्के मुंडामोस्ता उंदि गरिब मुरतळगुडा दान पेडिते रोंडु रागि कोत्तां वाटनेके येसु हळतोर.

3 अस्के येसु इल्हा इत्तोर. “नना निजम वेहांतन, इग्गे दान पेडिते कोत्तां वाटता अंतोर लोकुल्लकुंनना ई मुंडामोस्ता गरिब मुरतळे एक्को दानम कीता.

4 इल्हा नना बारि वेहासेके इत्ते, अंतोर बारे ओरा दनमताल इच्चुरे दानम कीतुर. गानि इद मुरतळ मात्रम दान्क पिस्सनाहाटीं इरतादानगुडा पेनदुक वाटसीता,” इत्तोर.

गुळि नासडेम आयना बारेमते येसु वळकांतोर
(मत्तयाल 24:1-9; मरकुस 13:1-13)

5 अस्के इच्चुर लोकुल्लक, “इद गुळिता बंडां ह्ळ्हाट बच्चोन सोक मंतां! इंका पेनदाहाटीं हीता सामानतोनि तयार कीता आ सिंगारम ह्ळ्हाट बच्चोन बेस मंता,” इंचेके वळकसेक मत्तुर.

6 अस्के येसु ओर्कुन, “इंदके मिमेट ह्ळ्हाटा इव बंडां उंदानपोर्ी उंदि मनाकोटा क्ळ्हाना वेला वायनद मंता,” इंचि इत्तोर.

7 अस्के सिस्युल्लक, “गुरु, इव पोल्लें बस्के जर्गनुं? इंका इव गटनां जर्गना मंता इन्नेके माकु बतल चिन्ह दिस्सार?” इंचि येसुन पूसकीतुर.

8 अस्के येसु इल्हा इत्तोर. “मीकुन बोरन्ना पसांचनुर, उसारते मंट. नावा पोरोल एतसेके बचुट्टोरो लोकुल्लक वासि, ‘ओन ननाने आंदुन, इंतुर. इंका अद वेला दग्गोरा एव्ता,’ इंचि इनानुर. असंतोरा पज्जो होनमट.

9 लडाई, जगडाल्कुना बारेमते केंजसि वेरियमट. इव अय्ते तप्पाकोटा मोदाला जर्गनुंगे. गानि अच्चोटेन आकिर वेला वायो.

10 “इंका देसेमपोर्ी देसेम, राज्येमपोर्ी राज्येम लडाई आयनुं.

11 पेद्दा बूकंपाल्क आयनुं, वैरे-वैरे जेगाने कर्बु अररि, तीराता रोगाल्क पुट्टानुं. मब्बुने वेल्लेन वेरियनसोटा गटनां जर्गनुं, पेद्दा-पेद्दा चिन्हां दिस अरानुं.

12 “गानि इवन्नि जर्गाका मुन्ने, मिमेट नावापोर्ी विस्वासम इरताहाटीं यहुदिल्लु मीकुन दोर्कापीसि, वेल्लेन तकलिप कीसि मीवा न्यायम कियनाहाटीं दर्मसास्त्रम कराहना लोह्कुने ओयानुर, ओसि मीकुन जेलने वाटानुर. पजा मीवा इच्चुर पगातोर मीकुन राजालोरा आनि राज्यपालना मुन्ने ओयानुर.

13 दीनहेंदाल मीकु नावा बारेमते गवाइ वेहालय हरिं दोर्कार.

14 इंचि मीवा न्यायम जर्गनेके बतल वळकना इंचेके मोदाले रंदि कियमट.

15 वेला वातस्के नना मीकु इसोटा पोल्लें आनि बुदिद हीतन गदा, मिमेट वळकानेके मीवा पगातोर केंजसि वळकाकोटा आयनुर, इंका मीवा पोल्लेक अड्डमगुडा वळका पराकोटा आयानुर.

16 अयना मीवा तल्लुर-बाबो, तम्मूह्क-दादालोर, जीवातोर-हेळमितीर मीवा दंतातोरे मीकुन पीसि पगातोर्कुंक हियानुर. अचोने आयका मीवाव्टेताल इच्चुर्कुन ह्ळ्कानुरगुडा.

17 नावा पोरोलताहेंका अंतोर लोकुल्लक मीकुन हय्सुर.

18 इदंता अयनागानि मीकुन बोरि नासडेम किया पररि.

19 पेनदापोर्ीटा विस्वासमते आकिरदाका निल्सि मत्ते, मिमेट मीवा जीवातुन कापाळकुना परांतिर.

येस्सलेम नासडेम आयमळ
(मत्तयाल 24:15-21; मरकुस 13:14-19)

20 “हूळाट! सिपाइल्क येस्सलेम सुट्टु आतद मिमेट बस्के अयते हूळांतिर, अस्के सहर नासडेम आयना वेला एव्ता इंचि इनकुंटु.

21 अस्के बोर अयते यहुदिया एरियाते मंतुरो ओर गुट्टनहेके वित्तट, बोर अयते सहरते मंतुरो ओर सहरता पलाते पेय्सि होनगोम अल्हेने नाटे मनना लोकुल्क सहरते होळिया मन्नि.

22 बारित्ते पेनदा पिलान परकारम अव सिक्सा हियना रोजुक आंदु. दर्मसास्त्रमते रासि मत्ता अन्नि पोल्ले पूरा आयना वेला आंदु.

23 अव रोजकुने पीटे मत्ता मुर्ताहकुंक आनि सिन्ने मर्तल्लुहकुंक* वेल्लेन तकलिप वांता. बारित्ते इद बूमिपोर्रो वेल्लेन तिप्पल्क वायाना मंता. आनि यहुदिलकुनपोर्रो पेन दाना होंगुन हुपिचना मंता.

24 इच्चुर मनकालोर कसेहकुने कोहककुंचि हायानुर, इक्किच्चुर मनकालोर्कुन बारे वेरे देसेमोर्कुंक दोर्कापीसि हियनुर. पजा यहुदि आयवा लोकुरा कालम मारनदाका, ओर येस्सलेमता लोकुल्कन ओरा कादा हिळु जारसि इरानुर.

वेरियाकोटा देरनेमते मनना

(मत्तयाल 24:29-31; मरकुस 13:24-27)

25 “पोळ्दुनपोर्रो, वेळसिपोर्रो, सुक्कनपोर्रो चिन्हां दिस्सानुं. इंका बूमिपोर्रो समुदमता आवाज आनि अउटे तेदाना पेद्दा तडाना सप्पुड केंजसि देसे-देसेल्कुना लोकुल्क इरगा वेरियानुर.

26 इरगा वेरियसि, इद दुनियाते वायाना तिप्पल्कुना बारेमते विचारम कीसि, लोकुल्कुना जीवा पेय्सोत्ताप आयार. बारित्ते मब्बुने मनना अन्नि सक्तिन कदलिचमळ जर्गता.

27 अस्के मनकना रूपमते पुटतोन नना, ताकत आनि पेद्दा महिमातोनि, मब्बु तेर्पेनपोर्रो वायानेके लोकुल्क हूळानुर.

28 इल्हा जर्गमळ सुस्व आतस्के मिमेट अंटोर मीवा तल्ला तेहिचि पोरोळ्क हूळट. बारित्ते पेन मीकु मुक्ति हियाना वेला दग्गेर्क एवसेकेन मंता.”

येसुना पोल्ले बस्केळक मनंता

(मत्तयाल 24:32-35; मरकुस 13:28-31)

29 पजा येसु ओर्क उंदि वेसुडि वेहतोर. “अद अंजिर मरातुन आनि केडाते मत्तव अन्नि मराकुन हूळट.

30 अवुना आर्किं रालतद हूळसि, एद्दि कालम दग्गेरा एव्ता इंचि मीकु बिराना तेळियसि दांता.†

31 इल्हा इव अन्नि गटनां जर्गनद हूळसि, पेनदा राज्येम दग्गेर्क एव्ता इंचि मिमेट एरपाट कीतिर.

32 नना मीकु निजम वेहांतन, बदवेरदाका अयते इव अन्नि पोल्ले पुरागा आयोंगो, अदवेरदाका ई पीळि‡ मुळगो.

33 इद बूमि, मब्बु नासडेम आसि होंदार, गानि नावा पोल्ले बस्केने नासडेम आयों.”

उसारते मंटु

34 “अदुनहाटीं मिमेट पारिं किय्युड, कल उनुड इंका इद दुनियाता रंदिनेन मीवा मनसु मनना आयो. गानि नना मरा वायना रोजु अचानक अरना कोम्मालेहका मीपोर्रो वासि अर्राकोटा मीवद मिमेट जेगर्ता मंटु.

35 बारित्ते अद रोजु इद बूमिपोर्रो मनना अंटोर लोकुल्कुनपोर्रो अल्हेन अरानद मंता.

36 अदुनहाटीं वेल्लेन उसारते मंचि, बव अयते गटनां जर्गनद मंता, अव अन्नि गटनानाल पिस्सनाहाटीं ताकत दोर्कगोम इंचि बस्केळक पारतना कीसेक मंटु. अल्हा मत्तिरित्ते, बस्के अयते मनकना रूपमते पुटतोन नना वांतन, अस्के नावा मुन्ने वेरियाकोटा नित्ता परकिट.”

* 21:23 मर्तल्लुहकुंक इत्ते सिन्ने पेडल मत्ता मुरतळ, पालु उहाना मुरतळ. † 21:30 मोदाटा बाइबलकुने इग्गुर इंचि रासि मंता. ‡ 21:32 ई पीळि इगे दीना अर्तम यहुदि जातिता लोकुल्क इंचिगुडा इनकुनावच्चु.

37 इल्हा येसु हरेक रोजु पोद्दाला गुळिते कराहसेक मनुंदुर. गानि नर्कळ्ळक मात्रम सहरताल पलाते जय्तुन इनना गुट्टातगा होंचि मनुंदुर.

38 हक्केर-हक्केरा अंतोर लोकुल्क तेदसि ओना पोल्लें केंजानाहाटी गुळितगा जमा आयुंदुर.

22

येसुन हक्कना पिलान

(मत्तयाल 26:1-5; मरकुस 14:1-2; योहान 11:45-53)

1 पुल्लगा आयवा पिडिता हारिना पंडुगु दगर्के एव्सि मत्ता. इद पंडुगुन दाटसि होनना पंडुगुगुडा इंतुर.*

2 अस्के पेद्दा पेर्मालोर, दर्मसास्त्रम कराहना गुस्लक ईर अंतोर उंदगा कलियसि, येसुन बल्हा हक्कना? येसुन बल्हा सपुडदाका दोर्कापीसि हक्कोम, इंचि पिलानकु कियालय दलगुतुर. गानि लोकुल्कुकु येसुनपोर्ी मत्ता विस्वासमतुन ह्ळसि ओर वेरियतुर.

यहदल येसुन दोर्कापीसि हियना आयडा कीतोर

(मत्तयाल 26:14-16; मरकुस 14:10-11)

3 पजा येसुना पन्नेंडु सिस्स्युल्कुनाल वरोर इस्कारियोत नाटेना यहदाना लोप्पो पेद्दा देय्यम होळियता.†

4 अस्के ओर पेद्दा पेर्मालोरगा आनि गुळिता कावेल कियना अदिकारिल्लुकु होंचि कलियतोर. कलियसि येसुन ओर बल्हा पीसि हिया परांतोर इदुना बारेमते, ओरतोनि वळकतोर.

5 यहदाना पोल्ले केंजसि पेद्दा पेर्मालोर आनि अदिकारिल्लक वेल्लेन कूस आसि ओर, ओन्क कोलतां हीतोम, इंचि ओष्कतुर.

6 अदुनहाटी गर्दि हिल्वद ह्ळसि येसुन ओरा कयदे पीसि हियालय मोका ह्ळसेक मनुंदुर.

सिस्स्युल्क पंडुगुना तयारि कीतुर

(मत्तयाल 26:17-19; मरकुस 14:12-16)

7 पजा दाटसि होनना पंडुगु एत्ता. मूसाना नियम परकारम अद पंडुगुना मोदाटा रोजु उंदि गोरि पोरिना मोक्कु हियमळ मत्ता.

8 अदुनहाटी येसु, पन्नन आनि योहानुन, “मिमेट मुन्ने होंचि दाटसि होनना पंडुगुना गाटो तयार कीम्टु अस्के मनम तिनकोम,” इंचि ओर्कुन लोहतोर.

9 अस्के, “मोमोट पंडुगुना गाटो तिनना तयारि बगा कीकोम इंचि नीवा मनसु मंता सामि?” इंचि ओर येसुन इंतुर.

10 अस्के येसु ओर्कु इल्हा वेहतोर, “मिमेट सहरते होळियतस्के, मीकु वरोर मनकल अळकाते एर पीसि होननेके कलियंतोर. ओर बद लोन अयते दांतोरो, अदे लोतागा मिमेटगुडा ओना पज्जो होंट.

11 अगा होत्तस्के, आ लोता मालाकुंक, ‘गुरु ओना सिस्स्युल्कुनतोनि कलियसि, दाटसि होनना पंडुगुना गाटो तिननाहाटी हेळमितोर आगाना अर्ी बगा मंता, इंचि गुरु पूसकीसंतोर,’ इंचि वेहाट.

12 अस्के ओर मीकु मिद्दे पोर्ीटा उंदि पेद्दा अर्ी सजांचि तयार कीसि मत्तद ह्ळसानुर. अदे अरति मिमेट पंडुगुना गाटो तयार कीम्टु,” इत्तोर.

13 अस्के ओर होंचि ह्ळतुर अयते, ओर बल्हा वेहतोर अल्हेने अगा मत्ता. पजा ओर अग्गेन दाटसि होनना पंडुगुना गाटो तयार कीतुर.

* 22:1 यहदि लोकुल्क बस्केळक पुल्लटा पिडिता हारि कीतुर. ई वारमता मोदाटा रोजुन दाटसि होनना पंडुगु इंतुर. ई पंडुगुने मात्रम वारममेड पुल्लगा आयवा पिडिता हारि कीतुर. † 22:3 यहदाना लोप्पो पेद्दा देय्यम होळियता दीना अर्तम यहदनहेंदाल देय्यम दाना कबळ कियमळ सुख कीता. ओना बुदिदेते, मनसुने देय्यमता विचारालक वायमळ सुख आतां.

येसुना सिस्स्युल्कुनतोनि आकिर बोजनम

(मत्तयाल 26:20-30; मरकुस 14:17-21; 1 कुरेति 11:23-25)

14 दाटसि होनना पंडुगुना गाटो तिनना वेला एवतस्के, येसु ओना प्रेरितुल्कुनतोनि कलियसि गाटो तिनालय उदतोर.

15 उदतस्के येसु ओर्कुन, “नाकु तिप्पल्क वायका मुन्ने मीवातोनि कलियसि ई दाटसि होनना पंडुगुना गाटो तिनना इंचि नाकु वेल्लेन आसे मत्ता.

16 नना मीकु वेहानद बतल इत्ते, इद पंडुगु बद पोल्लेतुन अय्ते हुप्संता, अद पोल्ले पेनदा राज्येमते पुरागा आयनदाका नना इद पंडुगुना गाटो तिन्नोन.”

17 पजा ओर अंगुर पंडिना पानकमतोनि निडिस मत्तद उंदि गिलास पीतोर आनि पेनदुक दन्यवाद कीसि अदुन ओना सिस्स्युल्कुंक हीतोर. हीसि, “इदेट, दीन मिमेट पंचकुंचि उंटु.

18 नना मीक वेहांतन, पेनदा राज्येम बदवेरदाका अय्ते वायोनो, अदवेरदाका, इय्याटाल नना अंगुर पानकम उन्नोन,” इंचि येसु इत्तोर.

19 पजा येसु उंदि हारितुन पीसि, पेनदुक दन्यवाद कीतोर. पजा आ हारितुन तुकडां कीसि ओना सिस्स्युल्कुंक पंचि हीसेक, “इद हारि इत्ते, मीवाहाटीं मोक्कु आयना नावा मेंदुलता चिन्ह आंदु, नाकुन मति कियनाहाटीं मिमेट इल्हेन कीसेक मंटु,” इंचि ओर्कु वेहतोर.

20 पजा अंतोरा तिनमळ आतस्के, अंगुर पंडिना पानकमते निडिस मत्ता गिलासुन पीसि, “इद पानकम इत्ते मीवातोनि पेन कियना पूना करारता चिन्ह आंदु. नना मीवाहाटीं नावा नेत्तुरतुन पोंगागोटंतन, अस्के पेन दाना राज्येमतुन निलाहंता.‡

21 “अयना हिक्के केंजाट, नाकुन दोकाते पीसि हियानोरगुडा इंदके इगे नातोनि गाटो तिनालय उद्दिदिसि मंतोर.

22 मनकना रूपमते पुटतोन नना, नावा बारेमते बल्हा अय्ते रासि मंता, अल्हे दांतन. गानि बोनाहेंदाल अय्ते नाकुन पीसि हियमळ जर्गता ओन्क बच्चोर गोसा आयार,” इत्तोर.

23 येसु वेहतदुन केंजसि सिस्स्युल्क, “अल्हा कियानोर मना नड्डुम बोर मंतोर मरि?” इंचि ओरद-ओरे वळ्ळकुनालय दल्गुतुर.

सेवाकुनलेसीं मनना

24 पजा “मना नड्डुम अंतोर्कन्ना पेद्दा बोर मनना?” इत्ता पोल्लेहाटीं सिस्स्युल्कुंक ओर्क-ओर्के पोल्ले आतां. §

25 अस्के येसु ओर्कुन इल्हा इत्तोर. “यहूदि आयवोरा राजालोर लोकुल्कुनपोर्रीं जबरदस्तिते राज्येम कीतुर. आनि ओरपोर्रीं अदिकारम ताकसालय ह्ळानोर, ‘मोमोट लोकुल्कुंक बेस सहायम कियानोरम,’ इंचि वेहकुंतुर.

26 गानि मिमेट ओरालेसीं कियमट. मी लोप्पोटाल बोर अय्ते पेद्दा मंतोर, ओर अंतोर्कन्ना सिन्नोनलेसीं आयना. अल्हेने बोर मीवा लीडर मंतोर ओर सेवाकुनलेसीं आयना. ☆

27 असल पेद्दा इत्ते बोर आंद? बोर अय्ते गाटो तिनालय उद्दंतोर ओरा? मरि उद्दुतोंकु गाटो वाटांतोर ओरा? गाटो तिनालय उद्दुतोरै पेद्दोड आंद. गानि नना अय्ते मीवा नड्डुम गाटो वाटाना सेवाकुनलेसीं मंतन.”

28 “मिमेट अय्ते नना तिप्पल्कुने मत्तस्केगुडा नावातोनि मत्तोर आंदिर.

29 अदुनहाटीं नावा बाबाल बल्हा नाकु राज्येम कियना अदिकारम हीतोर, अल्हेन ननागुडा मीकु अदिकारम हीतन.

‡ 22:20 मूसाना कालमते पेन लोकुल्कुनतोनि करार कियनेके, जिवरासिना मोक्कु हीसि अबुना नेत्तुर लोकुल्कुनपोर्रीं सल्लुंदुर. अल्हा कीतस्के अद करार गाट्टिगा आयुंदु. (निर्गमन 24:6-8) अदुनहाटीं येसु ओना नेत्तुर पोंगागोटसि पूना करार कियानुर.

§ 22:24 सिस्स्युल्कुना विचारमते येसु बिरानेन येस्सलेमते एवसि राजाल आंतोर, इंचि मत्ता. ओना राज्येमते सिन्नोड, पेद्दोड बोर इंचि ओर्क-ओर्के पोल्ले आतां. ☆ 22:26 मत्तयाल 20:25-26

30 अद अदिकारम बद इत्ते, मिमेटगुडा नावा राज्यमते नावातोनि उद्दिदिसि तिनकिर, उनकिर. इंका राजगद्देन पोरो उद्दिदिसि इस्त्राएलना पन्नेड गोत्राल्कुनोरा न्यायम कीकिर,” इंचि इत्तोर.

पत्रु तपिचकुंतोर इंचि येसु वेहांतोर

(मत्तयाल 26:31-35; मरकुस 14:27-31; योहान 13:36-38)

31 येसु मरा सिमोन पत्रुन, “सिमोनु, ए सिमोनु हिके केंजा! मीकुन अंतोर्कुन वंजिन हेचाहताप हेचाहचि मी अंतोरा विस्वासमता पट्टु हळानाहाटी पेद्दा देय्यम पेनदुन अदिकारम तलकता.

32 गानि निमे विस्वासमताल पजोळ्क होनाकोटा मनना इंचि नना नीवाहाटी पारतना कीतन. अयना निमे मरा विस्वासमते नाहेके तिरियतस्के नीवा दंताता विस्वासुल्कुना विस्वासमतुनगुडा गट्टिगा कीम,” इंचि वेहतोर.

33 गानि सिमोन पत्रु मात्रम, “सामि! नीवातोनि कलियसि जेलुंक होनालय, हायालयगुडा नना तयार मंतन,” इंचि इत्तोर.

34 अस्के येसु पत्रुन, “पत्रु नना वेहानद केंजा! इय्याला नर्कळ्क मोदाटा गोगोड कूसाका मुन्ने निमे, ‘नना येसुन एरपाट किय्योन,’ इंचि मूड मल्कां इनकिन,” इंचि इत्तोर.

तकलिप अर्रालय तयार मंटु

35 पजा येसु ओना सिस्स्युल्कुन, “उंदि मल्का नना मीकुन कोत्तना पाकिट, जोरा इंका हेरपुहक हिलाकोटेन लोहचि मत्तन. अस्के मीकु बतलनना तक्को होंचि मत्तना?” इंचि पूसकीतोर. अस्के सिस्स्युल्कु, “हिल्ले, बतले तक्को होना हिल्ले,” इंचि इत्तुर.

36 पजा येसु ओर्कु इल्हा वेहतोर. “मिहगा बोरगान्ना कोत्तना पाकिट मत्ते, दान पज्जेन पीकुन्निर, इंका जोरागुडा पीकुन्निर. अल्हेने कसेर हिलवोर ओना कपडिं अम्मिसि उंदि कसेर असकुन्निर.

37 बारित्ते, नना वेहानद केंजाट! दर्मसास्त्रमते, ‘ओन तपु कीतोरव्टे कल्पतरु,’^{*} इंचि नावा बारेमते रासि मत्ता. दर्मसास्त्रमते नावा बारेमते बतल अय्ते रासि मंता, अद इंदके नावातोनि निजम आयमळे गावाले,” इंचि वेहतोर.

38 अस्के सिस्स्युल्क, “इद हळा सामि, इव रोंडु कसेहक मंतां,” इंचि इत्तुर. इत्तस्के येसु, “सरे! आंतां,” इंचि इत्तोर.

जय्तुन इनना गुट्टातगा येसु पारतना कियमळ

(मत्तयाल 26:36-46; मरकुस 14:32-42)

39 पजा अद लोताल पेय्सि ओना अलवट परकारम, जय्तुन इनना गुट्टापोरो होत्तोर. ओना पज्जे ओना सिस्स्युल्कगुडा होत्तुर.

40 अगा होत्तस्के येसु ओना सिस्स्युल्कुंक, “मिमेट पट्टुने अर्राकोटा मननाहाटी पारतना कीसेके मंटु,” इंचि इत्तोर.

41 पजा येसु ओरागटाल, इच्चोन लक्कु होंचि टोंगरां ऊनसि इल्हा पारतना कियालय दलगतोर:

42 “ए पेनबाबा! ओक्कला नीवा इच्चा मत्ते, नाकु वायाना ई तकलिपतुन नावा पोरोटाल तपिच्चा. अयना नावा इच्चा मत्ताप आयो गानि नीवा इच्चा बल्हा मंता अल्हे जर्गि,” इंचि इत्तोर.

43 अस्के अगा उंदि पेनदा दूता स्वर्गमताल वासि ओन्क ताकत हियालय दलगता.

44 येसु वेल्लेन दुक्कमते निंडिसि पेनदुक पारतना कीतोर. ओर अल्हा पारतना कियनेके ओना सेमटा, नेत्तुरलेसी आसि बोट्टुक-बोट्टुक बूमिपोरो अरसेक मत्ता.*

45 पारतना कियमळ मारतस्के, सिस्स्युल्कुनगा वासि हळते, ओर दुक्कमते तकांचि निद्रा होंचि मत्तुर.

* 22:37 यसायाह 53:12

* 22:44 इद वचनम कोन्नि पांडु लिपिने हिल्ले.

46 अस्के येसु ओर्कुन, “मिमेट बारि निद्रा होत्तिर? तेदट! तेदसि मिमेट पट्टुने अर्नाकोटा मननाहाटी पारतना कीसेके मंटु,” इंचि इत्तोर.

यहुदल येसुन पीसि हीतोर

(मत्तयाल 26:47-56; मरकुस 14:43-50; योहान 18:3-11)

47 येसु इव पोल्ले वळकसेकेन मत्तोर. अचचोटेन अगा उंदि लोकुकुकुना मंदा वाता. अद मंदातुन यहुदल पीसि वातोर (ई यहुदल येसुना पन्नेड सिस्स्युकुनाल वरोर आंद). तच्चि ओर येसुन बुरालय ओना दग्गेर्क होत्तोर.

48 अस्के येसु ओन, “यहुदा, उंदि मुद्दु बुर्सि निमे मनकना रूपमते पुटतोन नाकुन दोर्कापीसि हियालय हळसंतिना?” इंचि इत्तोर.

49 येसुन पियानदुन हळसि कळमता सिस्स्युलक, “सामि, महगा कसेहक मंतां, मोमोट ईरकुन नक्कोमा?” इंचि पूसकीतुर.

50 अचचोटेन ओरा लोपोटाल वरोर सिस्स्युड पेर्मालोरा लीडरना वरोर दासुन कसेटे हीतोर अय्ते ओना तिना केव नेमसोत्ता.

51 अस्के येसु, “मान्नि, अल्हा कियमत,” इत्तोर. इंचि ओना नेमसोत्ता केवदुन इटसि ओन बेस कीतोर.

52 पजा येसु, ओन्क विरोदमते तेदता पेद्दा पेर्मालोर्कुन, गुळिता अदिकारिलकुन आनि यहुदिलकुना पेद्दालकुन इल्हा इत्तोर. “वरोन दोंगन पिय्यालय वाताप मिमेट कसेहक, गुत्पां पीसि नाकुन पिय्यालय वातिरा?

53 नना अय्ते रोज गुळितगा मीतोनि मनुंदुन, मिमेट अस्के नाकुन पिया हिल्लिर. अयना इद मीवा वेला आंद, हीकटता राज्येम कियना वेला आंदु,” इंचि इत्तोर.

येसुन पत्रु एरपाट किय्योन इंतोर

(मत्तयाल 26:57-58; मरकुस 14:53-54,66-72; योहान 18:15-18,25-27)

54 पजा ओर येसुन दोर्कापीसि, अगटाल पेद्दा पेर्माना लोन ओतुर. पत्रुगुडा लक्कुटाले ओना पज्जो-पज्जो होंचेके मत्तोर.

55 पेद्दा पेर्माना दाराते तडमि माससि ओर अंतोर सुट्टु उद्दिदसि मत्तुर. पत्रुगुडा ओरतोनि अग्गेन उदतोर.

56 पत्रु तळमितगा उद्दिदसि मत्ताहेंके तळमि वेलगु ओनपोर्रो अरसि उंदि दासि पोरिक ओर दिसतोर. अस्के आ दासि पोरि पत्रुनहेके हळसेक, “ई मनकलगुडा येसुनतोने मत्तोर,” इंचि इत्ता.

57 गानि पत्रु, “नना ओन एरपाट किय्योन बाई,” इंचि इत्तोर.

58 जेरासेप आतंका इंकावरोर मनकल पत्रुन हळसि, “निमेगुडा ओरावेटाल वरोन आंदिन गदा,” इंचि इत्तोर. अस्के पत्रु, “हिल्ले दादा, नना आयोन,” इंचि इत्तोर.

59 दग्गेर-दग्गेरा उंदि गंटा आता पजा, इंकावरोर मनकल, “ईर गालिल एरियाता मनकनलेसी वळकसंतोर, अदुनहाटी निजमे ईर येसुनतोनि मत्तोर,” इंचि इत्तोर.

60 अस्केगुडा पत्रु, “निमे बतल वळकसंतिन दादा! नना ओन असले एरपाट किय्योन,” इंचि इत्तोर. अल्हा इत्ता-इनुडे मोदाटा गोगोड कूसता.

61 अस्के सामि पत्रुनहेके तिरियासि हळतोर. अस्के, “इय्याला नर्कळक गोगोड कूसाका मुन्ने निमे नाकुन मूड मल्कां एरपाट किय्योन इंतिन,” इंचि येसु मुन्नेने वेह्चि मत्ता पोल्ले पत्रुंक मति वाता.

62 अस्के ओर पलाते होंचि इरगा अळतोर.

येसुन कारेड्डालक कीतुर

(मत्तयाल 26:67-68; मरकुस 14:65)

63 येसुन बोअर अय्ते पीसि मत्तुरो ओर कारेड्डालक कीसेके इरगा तनालय दलगतुर.

64 ओना कळ्कुंक कप्पिड गंडा दोह्चि, “इंदके नीकुन बोर तंतुर? माकु बविस्यवानि वेहा,” इंचि ओन पूसकीतुर.

65 अचोने आयका ओना अपमानम कियानाहाटीं वेल्लेन पोल्लें इत्तुर.

येसुन पंचादितगा ओतुर

(मत्तयाल 26:63-65; मरकुस 14:61-64)

66 पंगातस्के यहुदि पेद्रुदालक उंदि पंचादि उपिस्तुर, अगा पेद्रुदा पेर्मांलोर, दर्मसास्त्रम कराहना गुस्लक मत्तुर. अद पंचादिते येसुन पीसि तच्चि ओरा मुन्ने निलाहतुर.

67 पजा ओर येसुन, “ओक्कला निमे किरिस्तुन आते माक वेहा,” इंचि इत्तुर. गानि येसु, “ओक्कला नना वेहिनागानि मिमेट नम्मिर.

68 इंका नना सवालक पूसकिथ्यिनागानि मिमेट जवाबगुडा हिथ्यिर.

69 गानि इंदकेटाल, गडसेम मत्तंका मनकना रूपमते पुटतोन नना ताकतवर पेनदा तिना बाजुंक उद्दंतन,”* इत्तोर.

70 अस्के पंचादिते मत्ता अंतोर लोकुलक, “अथे निमे पेनदा मरिना?” इंचि इत्तुर. अस्के येसु, “मिमेट इनानद निजमे,” इंचि इत्तोर.

71 अस्के, “कुद्रुदु ओना तोळ्दाल ओरे वेहतद मनम केंजतोम. अथे मनाक बतल गवाइ गावाले?” इंचि इत्तुर.

23

येसुन पिलातुस राज्यपालना मुन्ने निलाहंतुर

(मत्तयाल 27:1-2, 11-14; मरकुस 15:1-5; योहान 18:28-38)

1 पजा पंचादिता अंतोर लोकुलक तेदसि येसुन अगटाल पिलातुस इनना राज्यपालनगा ओतुर.

2 ओसि, “ईर मावा यहुदि लोकुलकुंक एकरेवुलक वेहचि ओर्कु तप्पुड हरिं हुप्सानेके मोमोट हळतोम. इंका कैसर राजांक कर दोहामान्नि इंचि वेहांतोर. अचोने आयका ओनद ओरे, ‘नना किरिस्तुन, राजुन आंदुन,’ इल्हा वेहकुंतोर,” इंचि दोसेलक दोसालय दल्गतुर.

3 अस्के पिलातुस येसुन, “निमे यहुदिल्कुना राजुन आंदिना?” इंचि पूसकीतोर. अथे, “निमेन इंचंतिन गदा,” इंचि येसु इत्तोर.

4 अस्के पिलातुस पेद्रुदा पेर्मांलोर्कुन आनि लोकुलकुन, “नाकु ई मनकनगा बतले तप्पु दिस्सेक हिल्ले,” इंचि इत्तोर.

5 गानि लोकुलक मात्रम पिलातुस राज्यपालना पोल्ले केंजाकोटा, “ईर पुरागा यहुदि लोकुलकुना देसेमते ओना पोल्लें कराहचि अंतोर लोकुलकुंक एकरेवुलक वेहचंतोर. इद कबळ ईर गालिल एरियाते सुस्व कीसि इंदके इगोळदाका* एवतोर,” इंचेके इरगा लोल्लि कियालय दल्गतुर.

येसुन हेरोद राजानगा ओतुर

6 लोकुलक इनानदान केंजसि पिलातुस, “बतल, ई मनकल गालिल एरियातोर?” इंचि पूसकीतोर.

7 अव रोजकुने गालिल एरियापोरें हेरोद अतिपस राजाल राज्येम कीसिके मत्तोर. येसु गालिल एरियातोर इंचि तेळियतस्के, पिलातुस ओन हेरोद राजानहेके लोहचीतोर. आ वेलाते हेरोद राजालगुडा येस्सलेम सहरतेन मत्तोर.

8 हेरोद अतिपस राजाल येसुना बारेमते केंजसि मत्तोर अदुनहाटीं वेल्लेन वर्सानाल येसुन हळना आसते मत्तोर. इंका ओन्क येसुना कयदाल बतलन्ना चिन्ह हळानद मत्ता. अदुनहाटीं येसुन हळसि हेरोद राजांक वेल्लेन कुसि आता.

* 22:69 बजन संहिता 110:1 * 23:5 इगोळदाका इत्ते येस्सलेमदाका.

9 अस्के ओर येसुन वेल्लेन सवालक पूसकीतोर. गानि येसु बतले जवाब हिया हिल्लोर.

10 पेद्रु दा पेर्माँलोर आनि दर्माँसास्त्रम कराहना गुस्लक मात्रम येसुनपोर्रो ओरा मनसुक वाताप तप्पुक-दोसेलक दोस्सेक मत्तुर.

11 पजा हेरोदगुडा ओना सिपाइलकुनतोनि कलियसि येसुन कारेडुडालक कीसेके कव्तोर. येसुंकु राजालोर केराना कपडिं केराहचि ओर मर्रा पिलातुसुनहेके लोहचीतोर.

12 अदे रोजु हेरोद अतिपस राजाल आनि पिलातुस ईर इव्वुर दंटातोर आतुर. दीनकन्ना मुन्ने ओर वर्रो क वरोर विरोदमते मनुंदुर.

पिलातुस येसुंक हामुर सिक्सा हीतोर

(मत्तयाल 27:15-26; मरकुस 15:6-15; योहान 18:39-19:16)

13 पजा पिलातुस पेर्माँलोर्कुन, राज्येम कियानोर्कुन आनि लोकुलकुन केयतोर.

14 केय्सि ओर्कुन इल्हा इत्तोर, “लोकुलकुंक एकरेवुलक वेहचि ओर्क तप्पुड हरिं हृपिचचंतोर इंचि येसुन मिमेट इगे तत्तोर. नना मीवा मुन्नेन ईन बेस परमेरका कीसि पूसकीतन. मिमेट ईनपोर्रो दोसता तप्पुक-दोसेलकुनाल उंदिगुडा नाकु ईना लोप्पो दिसा हिल्लें.

15 इंका हेरोद अतिपस राजांकगुडा ईना लोप्पो तप्पुक-दोसेलक दोर्का हिल्लें. अदुनहाटी ओर ईन मर्रा नाहेकेन तिराहचि लोहतोर. ईन्कु हामुर सिक्सा हियनलायक ईर बतल तप्पु किया हिल्लोर.

16 अदुनहाटी नना ईन पोर्टे देब्बां तंचि होळसीतन,” इंचि इत्तोर.

17 इद पंडुगुने एडादिक वरोन यहुदि मनकन जेलनाल होळसा पिश्युंदु, †

18 अस्के अंतोर लोकुलक कलियसि उंदेतीर, “ई येसुंक हामुर सिक्सा हीम, मावाहाटी बरब्बन होळसीम,” इंचि इरगा वरगेयालय दल्गतुर.

19 (ई बरब्बल इनानोर सहरता मनकालोर्कुन सरकारता विरोदमते कीसि मत्तोर. इंका बचुद्रो लोकुलकुन हव्विसिगुडा मत्तोर. अदुनहाटी ओन जेलने वाटसि मत्तुर.)

20 पिलातुसना मनसुने येसुन होळसियानद मत्ता, अदुनहाटी ओर लोकुलकुंक इंकुंदि मल्का विनंति कीतोर.

21 गानि लोकुलक मात्रम, “ओन कूसुनपोर्रो मोल्लां कोह्विसि वेलाड वाटट, ओन कूसुनपोर्रो वेलाड वाटट,” इंचि इरगा मोत्कुंचेके मत्तुर.

22 अयना पिलातुस मूडो मल्का ओर्कुन, “बारि? ईर बतल तप्पु कीतोर? ईनकु हामुर सिक्सा हियनलायक नाकु बतले तप्पु दोर्काहिल्ले. अदुनहाटी नना ईन पोर्टे देब्बां तंचि होळसीतन,” इंचि इत्तोर.

23 गानि लोकुलक मात्रम उंदेतीर, “येसुन कूसुनपोर्रो वेलाड वाटा,” इंचि इरगा मोत्कुंचेके मत्तुर. ओरा मोत्कुन्मळता मुन्ने पिलातुसनद उंदिंका पोल्ले ताका हिल्ले.

24 अदुनहाटी पिलातुस, लोकुलकुना इच्चा परकारमे आयि, इंचि इत्तोर.

25 पजा सरकारता विरोद कीसि, लोकुलकुन हव्विसि जेलुंक होंचि मत्ता बरब्बन लोकुलक तल्कताहेंका ओन होळसिया वेहतोर. येसुन बारे लोकुलकुना इच्चा मत्ताप कीकुन्निर इंचि ओरा कय्दुक अप्पजेपतोर.

येसुन कूसुनपोर्रो वेलाड वाटमळ

(मत्तयाल 27:32-44; मरकुस 15:21-32; योहान 19:17-19,23-24)

26 सिपाइलक येसुन पीसि होननेंके, अचचोटेन कुरेनि‡ सहरतोर वरोर सिमोन इनना मनकल ओना सहरताल वासेके मत्तोर, ओर्क कलियतोर. अयते सिपाइलक ओन दोर्कापीसि येसुना कूसुन कांजसेक येसुना पज्जो-पज्जो ताका वेहतुर.

† 23:17 इद वचनम कोन्नि पांडु लिपिने हिल्ले.

‡ 23:26 कुरेनि कुरेनि सहर येस्सलेम दग्गोटा उंदि देसेमते मंता. सिमोन पंडुगुनाहाटी येस्सलेम वासि मत्तोर.

27 अस्के लोकुल्कुनद उंदि पेद्दा मंदा येसुना पज्जो होंचेके मत्ता. अद मंदाते इच्चुं मुर्ताहक इंका मत्तां, अव येसुनाहाटीं वेल्लेन बादाते इरगा अळसेके मत्तां. §

28 अस्के येसु अवुनहेके तिरियसि अवुन इल्हा इत्तोर. “ए येस्सलेम सहरता मुरताहकुनिटा! मिमेट नावाहाटीं अळमट, गानि मीवा मर्क-मियाहक, मीवा सतताहाटीं अळट.

29 बारित्ते मुन्ने इसोंटा तकलिपता रोजकु वायानव मंतां गदा, अव रोजकुने, ‘गोड्होत्ता मुरतळके सुकम मंता, पिलाल्क आयवा मुरतळके सुकम मंता, बस्केने मरतल्लुर आयवा मुरतळके सुकम मंता,’ इंचेके लोकुल्क इनानुर.

30 इंका ओर, ‘मावा पोरो वासि अरंट,’ इंचि गुट्टान इनानुर आनि ‘माकुन पूळसट’ इंचि गुप्पन इनानुर. ☆

31 मरा पच्चगा मननेकेन ईर लोकुल्क इल्हा कीसंतुर अयते, वत्सोत्ता मरातुन बल्हा कियनुरो? ”* इंचि इत्तोर.

32 पेद्दा तप्पु कीता इंका इव्वुर मनकालोर्कुनगुडा हामुर सिक्सा हिय्यालय येसुनतोनि ओसेक मत्तुर.

33 पजा ओर “तला बोरसेम” † इनना जेगातगा एवतुर. एवतस्के येसुन कूसुनपोरो मोल्लां कोह्किसि वेलाड वाटतुर. अल्हेने पेद्दा तप्पु कीता आ इव्वुर मनकालोर्कुनगुडा येसुनतोनि ओना तिना बाजुंक वरोन, रोड्डा बाजुंक वरोन कूसुनपोरो वेलाड वाटतुर.

34 अस्के, “पेनबाबा, ईर बतल कीसंतुरो, अद ईरके तेळियो. अदुनहाटीं ईर्कुन मापि कीम,” इंचि येसु इत्तोर. ‡ पजा सिपाइल्क सिट्टिं वाट्टिस ओना कपडिन पंचकुत्तुर.

35 अगा जर्गनदुंता लोकुल्क नित्तिसि हळसेक मत्तुर. राज्येम कियानोरगुडा, “ईर अयते इंकावरोन पिसागोटतोर. अयते ईर ओक्कला पेन पेरता किरिस्तु आयानयते, ओना जीवातुन ओरे पिसागोटकुन्निर,” इंचि कारेड्डाल्क कियुंदुर.

36-37 सिपाइल्कगुडा ओना दग्गेर्क होंचि ओन कारेड्डाल्क कीसेके, पुल्लटा पडिना पानकम उह्चेके, “ओक्कला निमे यहुदिल्कुना राजान आते, निमे नीवा जीवातुन पिसागोटकुन,” इंचि इत्तुर.

38 इंका ओना तल्लातगा पोरो, “ईर यहुदिल्कुना राजाल आंदुर,” इंचि उंदि पाटि पोरो रासि कूसुंक हिरकिस्तुर.

39 अगा येसुनतोनि वेलाड वाट्टिस मत्ता तप्पु कीता इव्वुर लोप्पोटाल वरोर, “निमे पेन लोहता किरिस्तुने गदा! अयते नीवद निमे पिसागोटकुंचि माकुनगुडा पिसागोटा,” इंचि ओना अपमानम कीतोर.

40 गानि तप्पु कीता इंकावरोर मनकल बारे अल्हा इत्ता मनकन गदरिच्चि, “ईन्क दोर्कता सिक्से नीकुगुडा दोर्कता. अयना नीकु पेन इत्ते वेरि हिल्लेना रो?”

41 मनम अयते तप्पु कीतोम इंचि न्यायम परकारम मनाकु सिक्सा दोर्कता. गानि ईर अयते बतले तप्पु किया हिल्लोर,” इंचि इत्तोर.

42 मरी येसुन, “येसु, निमे राजाल आतस्के नाकुन मति कीम,” इंचि इत्तोर.

43 अस्के येसु ओन, “नना नीकु निजम वेहचेके, निमे इय्यालेन नावातोनि स्वर्गमते मनकिन,” इंचि इत्तोर.

येसु जीवा होळसंतोर

(मत्तयाल 27:45-56; मरकुस 15:33-41; योहान 19:28-30)

§ 23:27 इद वचनम कोन्नि पांडु लिपिने हिल्ले. ☆ 23:30 होसे 10:8 * 23:31 असलते येसु इनानद बतल इत्ते, नना बतल तप्पु कियाकोन्ना नाकुन इल्हा कीसंतुर अयते मीवसोंटा तप्पु कीतोकुन बतल कियनुरो? येसु वेहता ई पोल्ले नल्पै वर्साना पज्जो जर्गनद मत्ता. इल्हा रोम सरकारता सिपाइल्क वासि येस्सलेमतुन नासडेम कीतुर. † 23:33 “तला बोरसेम” इद जेगा तला बोरसेमलेहका दिसंता बारे. अदुनहाटीं इद जेगाकु इल्हा पोरोल अरता. इदे जेगाते रोम सरकार तप्पु कीतोर्कुंक हामुर सिक्सा इत्ते कूसुंक वेलाड वाटना सिक्सा हियुंदुर. ‡ 23:34 ए पेनबाबा इंचि येसु इत्ता पोल्ले मोदाटा कोन्नि युनानि पुस्तकाल्कुने हिल्ले.

44 अद वेलाक पिययटा पन्नेड एगानस्केटाल अय्ते मूड एगनदाका पूरा बूमिअंता हीकट आता.

45 पोळ्दुना वेल्गुगुडा दिसाकोटा आता. अस्के येस्सलेम सहरते मनना गुळिता लोप्पो पवित्र जेगा आनि अन्नि जेगांकन्ना एक्को पवित्र जेगाता नड्डुम मत्ता परदा, पोर्गोटाल हिळुदाका हर्सि रौडु तुकडां आता. § 46 अस्के येसु, “ए पेनबाबा! नना नावा आत्मातुन नीवा कय्दे अप्पजेपंतन,”* इंचि लगांचि वरगेयसि जीवा होळस्तोर.

47 नूर मंदि सिपाइल्कुनपोर्गे मनना दरोगाल अगा जर्गतद हळसि, “ई मनकल निजमे नीतिमंतुड आंदुर,” इंचेके पेनदुन तल्सकुत्तोर.

48 अगा हळालय जमा आता अंतोर लोकुल्क अगा जर्गतदुनंता हळसि ओर ओरा चातिन तनकुंचेके मल्सि होत्तुर.

49 गानि येसुन एरपाट कियानोर अंतोर आनि गालिल एरियाताल ओना पज्जो-पज्जो वातव मुर्ताह्क इच्चुर लक्कु नित्तिसि अगा जर्गतदुनंता हळसेक मत्तां.*

येसुन गति कियमळ

(मत्तयाल 27:57-61; मरकुस 15:42-47; योहान 19:38-42)

50-51 पजा अगा यहूदिया एरियाता अरिमताइ नाटेनोर वरोर योसेप इनना मनकल मत्तोर, ओर यहूदिल्कुना पंचादिता मेंबर मत्तोर. अल्हेने ओर बेस नीतिमंतुड मत्तोर. पंचादिते येसुन हळ्कना बारेमते येतता निरनायम ओन्क इस्टम मनाहिल्ले. इस्राएल देसेमते पेन दाना राज्येम बस्के निलाहंता इंचि ओर एदुर हळसेक मत्तोर.

52 ई योसेप पिलातुसनगा होंचि येसुना पीनगुन गति कियनाहाटीं तल्कतोर.

53 तल्किसि येसुना पीनगुन कूसुनपोर्गोटाल हिळु रेहतोर. पजा एक्को दराता हामुर कप्पिडते ओना पीनगुन हटतोर. अल्हा कीसि बंडातुन तुल्हाचि तयार कीता बोंदाते ओसि इरतोर. अद बोंदाते दीनकन्ना मुन्ने बोना पीनगुन इर्गि हिल्लुर.

54 आ रोजु नोमकेमताहाटीं तयारिं कियना रोज* आंदु. जेरासेप अय्ते पोळ्द होंचि नोमकेम रोज होळियान्दे मत्ता.

55 पजा येसुनतोनि गालिल एरियाताल वाता मुर्ताह्क पीनगुन ओयनेके बोंदातुन हळनाहाटीं योसेपुना पज्जो होत्तां. इंका अव येसुना पीनगुन बोंदाते बल्हा इरतुर अदुनगुडा हळतां.

56 आयंका अव मुर्ताह्क अगटाल तिरियसि होंचि बेस गमागमा गब्बु वायना वस्तुक आनि अत्तर निय येसुना पीनगुंका होकानाहाटीं तयार कीतां. गानि वारमता नोमकेम रोजु होळियताहाटीं, आदेस परकारम बद्दे कबळ कियामान्नि इंचि लोने मत्तां.

24

येसु मर्रा जीवाते तेदंतोर

(मत्तयाल 28:1-10; मरकुस 16:1-8; योहान 20:1-10)

1 पजा वारमता मोदाटा रोजु इत्ते अय्यारम हक्केरेन पोळ्द पेय्सका मुन्नेन, आ मुर्ताह्क अव तयार कीता गमागमा गब्बु वायना वस्तुक पीसि येसुन इरता बोंदातगा एवतां.

2 एवतस्के बोंदाता हरदुक अड्डम ताससि मत्ता बंडा पक्काक दोब्बिसि मत्तदुन अव हळतां.

3 अस्के अव मुर्ताह्क लोप्पो होळियसि हळतां अय्ते अवंक अगा येसु सामिना पीनगु दिसा हिल्ले.

4 अव इदुना बारेमते इल्हा बल्हा आता इंचि विचारमते मननेकेन अचानक इव्वुर मनकालोर जगा-जगा मेर्सना कपडिं केर्सि अवनगा वासि निलतुर.

§ 23:45 अद परदा मत्तस्के लोकुल्क गुळि लोप्पोटा अन्नि जेगांकन्ना एक्को पवित्र जेगातगा होन्ना पराकोदु. ☆ 23:46

बजन संहिता 31:5 ☆ 23:49 योहान 19:25 * 23:54 नोमकेमताहाटीं तयारिं कियना रोज यहूदिल्कुना रिवाजते नोमकेम रोजुननाड बत्तले कबळ कियमळ हिल्ले. अट्टुळ-बोळसुळ बत्तले हिल्ले. अदुनहाटीं ओर उंदि रोज मुन्नेन अन्नि तयार कीकुंतुर. ओरा नोमकेम सुकरारम पोळ्द होंचि होळियसि सनेरम पोळ्द होंचि मारंता.

5 अस्के अव इरगा वेरियसि तल्ला हिळु वराहचि दंडम दोस्तां. पजा ओर मनकालोर अबुन इल्हा इत्तुर. “जीवाते मनना मनकन हातोरव्टे बारि प्हकसेक मंतिट?

6-7 ओर इग्गे हिल्लोर, हामुरताल जीवाते तेदतोर. ओर मीवातोनि गालिल एरियाते मननेके मीकु, ‘मनकना रूपमते पुटतोन नाकुन पापि मनकालोरा कय्दे पीसि हियमळ जर्गार, पजा ओर नाकुन कूसुनपोर्रीं वेलाड वाट्सि हळ्कानुर. गानि नना मूड रोजकुने मर्रा जीवाते तेदकन. इवन्नि निजम आयनुंगें,’ इंचि वेहिच मत्तोर. इद मीकु मति हिल्लेना?” इंचि इत्तुर.

8 अस्के अव मुरताहकुंक येसु मुन्ने वेहता पोल्लें मति वातां.

9 पजा अव मुर्ताहक बोंदातगा हळता पोल्लेन बोंदातगाटाल मल्सि होंचि पदाकोंडु प्रेरितुलकुंक आनि अगा मत्ता कळमता अंतोर सिस्सुलकुंक वेहतां.

10 अव मुर्ताहकुने, मगदलेनि नाटेना मरियम, योहानि, याकोबुना यावल मरियम, इका अबुनतोनि मत्ता मुर्ताहक. इवे मुर्ताहक अव हळतव, केंजतव अन्नि पोल्लें प्रेरितुलकुंक वेहतां.

11 गानि प्रेरितुलकुंक आ मुरताहकुना पोल्लें अट्टिगेन अनपिस्तां. अदुनहाटीं अबुना पोल्लेन ओर नम्मा हिल्लुर.

12 अयना पत्रु अगटाल तेदसि बोंदातेके विततोर. अगा लोप्पो होळियसि हळते, सिराप येसुना पीनगुन हुटसि मत्ता कपडिं बल्हा मत्तव अल्हे अरसि मत्तद दिसता. अगा अल्हा हळसि इल्हा बल्हा आता इंचेके ओनद-ओरे मनसुने विचारम कीसेके मल्सि लोन होत्तोर.

इमाउस नार होनना हरदे येसु दिसंतोर
(मरकुस 16:12-13)

13 अदे रोजु येसुना सिस्सुलकुनल बोरो इव्वुर इमाउस इनना नार होंचेके मत्तुर. अद नार येस्सलेम सहरताल दग्गेर-दग्गेरा पदाकोंडु किलोमिटरक लक्कु मंता.*

14 ओर इव्वुर येस्सलेमते जर्गता अन्नि गटनन बारेमते वळ्कसेक होंचेके मत्तुर.

15 ओर अव पोल्लें वळ्कसेके होंचेके मननेके येसु अचानक कुद्दु ओरगा वासि ओरतोनि कलियसि ताकालय दलगतोर.

16 गानि ओर बोर आंदुर इंचि ओर्क इव्वुर्क एरपाट आयाकोंटा कियमळ जर्गता.

17 पजा येसु ओर्कुन, “मिमेट बव पोल्लेना बारेमते वळ्कसेक ताकसंतिर?” इंचि पूसकीतोर. अस्के ओर इव्वुर दुक्कमते अग्गेन निततुर.

18 पजा ओर इव्वुरगटाल वरोर किलयुपास इननोर, “इव रोजकुने येस्सलेमते जर्गता गटनन बारेमते नीकु एरपाट हिल्लेना? पंडुगुंक वातोरव्टेटाल इव गटनां तेळियवोन निमे वरोने मंतिना?” इंचि जवाब हीतोर.

19 अस्के येसु, “बव पोल्लें आंदुं?” इंचि पूसकीतस्के ओर इल्हा वेहालय दलगतुर. “नासरेत नाटेना येसुना बारेमता पोल्लें आंदुं दादा. ओर इसंटा मनकल मत्तोर गदा, ओर बतल वेहिना, बतल किय्यिना पेनदा ताकततोने कियंदुर. ओर पेनदा कबुरतोर मत्तोर. लोकुल्लकुगुडा ओन बेसतोर इंचि इत्तुदुर.

20 गानि मावा पेद्दा पेर्मालोर, अदिकारिल्लक ओन्क हामुर सिक्सा हियमळ गावाले इंचि ओन पीसि पिलातुसना कय्दे हीतुर. पजा लोकुल्लक ओन कूसुनपोर्रीं मोल्लां कोह्किसि हळ्कतुर.

21 गानि इम्नाएल लोकुल्लकुन पगातोरा कयदाल ओर होळसियानुर इंचि मोमोट आसे पळतोम. इव अन्नि गटनां हन्नेट रोजे जर्गतां.”

22 “अचोने आयका मावाव्टेटाल इच्चु मुर्ताहकुगुडा माकुन इचंत्रमते अरहतां. अव इय्याला हक्केरेन बोंदातगा होंचि मत्तां.

* 24:13 इद वचनमते येसुना सिस्सुलकुनल इत्ते, सिराप ओना पन्नेड सिस्सुलकुनल इंचि आयो गानि येसु वेहताप ताकानोरव्टेटाल बोरो इव्वुर.

23 गानि अगा अवंक येसुना पीनगु दिसा हिल्ले. अदुनहाटीं अव मल्लिस वासि, माकु पेनदा दूतां दिसतां, अव माकु येसु जीवाते तेदतोर, इंचि वेहतां, इंचेके अव मुर्ताहक माकु वेहतां.

24 अवुना पोल्लें केंजसि मातोनि मत्तोर इच्चुर बौदातगा होंचि हळतुर. अय्ते अव मुर्ताहक बल्हा वेहतांगो अल्हेन मत्ता, येसु अगा मनाहिल्लोर,” इंचि वेहतोर.

25 अस्के येसु ओर्कुन, “अरे बुद्धिद तक्को लोकरुटा, पेनदा कबुरतोर मुन्ने वेहचि मत्ता पोल्लेन मिमेट बस्के नम्मतिर?

26 पेन लोहता पिसागोटना किरिस्तु स्वर्गमता महिमाते होळियका मुन्ने ओर इवन्नि तकलिप बोगांचेपीता,” इंचि इत्तोर.

27 पजा, मूसाना नियमते, अंतोर पेनदा कबुरतोर रासता पोल्लेने, अल्हेने दर्मसास्त्रमते ओना बारेमते बगा-बगा रासि मंतानो अवुनंता येसु ओर्कु बेस तेळियानाल वेहतोर.

28 पजा ओर्क होनना मत्ता नाटुक दगोर एवतुर. अस्के येसुंक इकिचो मुन्नेळक होनानद मंता इत्ताप ओर्क अन्पिस्ता.

29 अदुनहाटीं ओर ओन, “इंदके पोळद होत्ता, इय्याला निमे इगेन महगा आगा दादा!” इंचि वेल्लेन विनंति कीतुर. अस्के येसु ओरगा मननाहाटीं ओरतोनि लोप्पो होत्तोर.

30 पजा येसु ओरतोनि कलियसि गाटो तिनालय उदतस्के, हारितुन पीसि पेनदुक दन्यवाद कीतोर. पजा दान तुकडां कीसि ओर्क हियालय दलगुतोर.

31 अल्हा हारि तुकडां हियानेकेन ओरा इव्वुरा कळक जगारा आतां आनि ईर येसु आंदुर इंचि एरपाट कीतुर. गानि येसु ओर्क दिसाकोटा मायम आतोर.

32 पजा ओर इव्वुर ओरद-ओर, “हरपीसि मनातोनि वळकसेके ताकानेके ओर मनाकु दर्मसास्त्रमते रासि मत्ता पोल्लेना निजम अर्तमतुन बेस तेळियानाल वेहतोर. अस्के ओना पोल्लें केंजसि बच्चोन बेस अनपिच्चेक मत्ता!” इंचेके वळककुत्तुर.

33 पजा ओर अगटाल बिराना तेदसि मर्रां तिरियसि येस्सलेम होत्तुर. होत्तस्के अगा पदाकोंडु मंदि प्रेरितुल्क अल्हेने कळमता लोकुल्क उंदगा जमा आसि मत्तद ओर हळतुर.

34 अस्के आ जमातोर, “हो, इद निजमे! येसु सामि जीवाते तेदतोर. ओर सिमोन पत्रुंक दिसतोर,” इंचि वळकसेके मत्तुर.

35 अस्के ओर इव्वुरगुडा हरपीसि होननेके बतल-बतल जर्गता, इंका येसु हारितुन उराहचि ओर्क हियनेके ओर येसुन बल्हा एरपाट कीतुर, इंदंता अंतोर्क वेहतुर.

येसु ओना सिस्थुल्कुंक दिसंतोर

(मत्तयाल 28:16-20; मरकुस 16:14-18; योहान 20:19-23; प्रेरितुल्कुना कबाहक 1:6-8)

36 ओर इव्वुर इव पोल्लें अंतोर्क वेहचेकेन मत्तुर, अच्चोटेन येसु ओरा नड्डुम वासि निलतोर. निल्लिस, “मीकु अंतोर्क सांति दोर्कि,” इंचि इत्तोर.

37 अस्के ओर अंतोर, ‘मोमोट बूतमतुन हळसंतोम,’ इन्कुंचि इरगा वेरियतुर.

38 गानि येसु ओर्कुन, “मिमेट इच्चोन बारि वेरियतिर? मीवा मनसुने नावा बारेमते अनमानम बारि वाता?

39 नावा कयक-कालकुन हुळाट! नाकुन इट्टिस हुळाट, ननाने आंदुन! बूतमकु हव्विं-बोक्कां मन्नो गानि नाकु मंतां,” इंचि इत्तोर.

40 इल्हा वळकसेके येसु ओना कयक-कालकुन ओर्क हुपिस्तोर.

41 अस्के ओर वेल्लेन कुसिते, इल्हा बल्हा आता इंचेके इंचत्रम आसि ओर्क पुरागा विस्वासमगुडा आसेके मनाहिल्ले. येसु ओर्कुन अल्हा हळसि, “मिहगा बतलन्ना तिनालय मंतना?” इंचि पूसकीतोर.

42 अस्के ओर ओन्क उंदि बोळस्ता जिम्मा तुकडा हीतुर.

43 पजा येसु अद तुकडातुन ओरा मुन्नेन तित्तोर.

44 तित्तिरित्ते येसु ओर्कु, “इव पोर्ल्लें बव इत्ते, नाकुन हक्कका मुन्ने नना मीवातोनि मत्तन, अस्के मीकु वेहतव आंदुं. मूसाना नियमते, पेनदा कबुरतोरा पुस्तकाल्कुने आनि बजन संहिताने रासि मत्ता अन्नि पोर्ल्लें निजम आयनदे मत्ता,” इंचि इत्तोर.

45 पजा दर्मसास्त्रमते रासि मत्ता पोर्ल्लें तेळियना इंचि येसु ओर्क तेल्वि हीतोर.

46 हीसि ओर्कुन इल्हा इत्तोर. “दर्मसास्त्रमते रासि मत्ताप, किरिस्तुंक वेल्लेन तकलिपकु वासि ओर हायानुर, पजा मूड रोजकुने मर्रा जीवाते तेदानुर इद अदे पोर्ल्ले आंद.

47 पापाल्क मापि आयनाहाटीं मनसु मार्सकुनुळ अक्सरम मंता. इदे कबुरतुन येस्सलेमताल सुम्ब कीसि, दुनियाता अन्नि देसेल्कुना लोकल्कुंक किरिस्तुना अदिकारमते वेहमळ जरगार.

48 इव अन्नि पोर्ल्लेंक मिमेटे गवाइ मंतिर.

49 इंका नावा पेनबाबाल हीतन इंचि पोर्ल्ले हीता आ पवित्र आत्मातुन नना मिहगा लोहांतन. गानि बदवेरदाका अय्ते स्वर्गमताल पवित्र आत्माता ताकत मीपोर्री रेय्योनो, अदवेरदाका मिमेट इदे येस्सलेम सहरते मंटु,”[☆] इंचि इत्तोर.

येसुना स्वर्गमते तेदसि होनमळ

(मरकुस 16:19-20; प्रेरितुल्कुना कबाहक 1:9-12)

50 पजा येसु ओर्कुन येस्सलेम सहर दग्गेरा मनना बेतानि इनना नाटाहेके ओतोर. ओसि ओर ओना कय तेहचि ओर्कु आसिर्वाद हीतोर.

51 ओर्क आसिर्वाद हियानेकेन येसु ओरागटाल लक्कु आतोर. पजा ओन पेन स्वर्गमते तेहाचि ओता.

52 अस्के ओर अंटोर येसुंक टोंगरां ऊनसि, मोळ्किसि अगटाल वेल्लेन कुसिते येस्सलेम सहर मल्सि होत्तुर.

53 पजा ओर बस्केळक गुळिते जमा आसि पेनदा स्तुति कीसेके मनुंदुर.

योहान योहान रासता बेसता कबुर

इद पुस्तकमता बारेमते गिचचो परिचयम

रासतोना पोरोल: योहान

रासता कालम: इसवि सन 85-90

ई पुस्तकमते रासता मेन पोल्ले बतल इत्ते, येसुए पेनदा मरि आंदुर. पेनदा आत्माता ताकततोनि इद दुनियातोरुन ओरा पापालकुनाल पिसागोटलय, ओरे इद दुनियाते मनकना रूपमते पुटतोर. बोर अय्ते येसुनपोर्रो विस्वासम इरंतोर, सिराप ओरे स्वर्गमते दांतोर. इदे ई पुस्तकमता मेन पोल्ले आंद.

ई पोरोटा पोल्लेन रूजुव कियालय, येसु इद दुनियाते मननेके, लेक्का हिलुवा अद्बूतामाता चिन्हे, कबाहक कीसि हूपिस्तोर. अवटेताल एतुन अंगुर पानकमते मारियागोटमळ, मुपै एनिमिदि वर्सानाल बिमारते मत्ता मनकन बेस कियमळ, पुटतस्केटाल गुड्डिड मत्तोनि दिस्सानाल कियमळ, हासोचि मुस्गता लाजस्न जीवाते तेहमळ, हेय्युं वेय्कुना मंदिक गाटो तासमळ, समुद्रमता तळाने एतापोर्रो ताकमळ, इवन्नि मंतां.

आकिरते येसु उंदि मेन पोल्ले बतल वेहंतोर इत्ते, “मिमेट नावा पोरोल केंजसि विस्वासम कियाकोन्ना, नना कीता कबाहकुन हळसि अयना नावा विस्वासम कीम्ट. अल्हा कीतिरित्ते, मिमेट पेनबाबनतोनि स्वर्गमते मनंतोर,” इंचि वेहतोर. नीकु दोर्कता पिस्वर नीवद आंद. अदुनहाटी निरनायमगुडा नीवा कय्देन मंता. इंचि इद पुस्तकमतुन बेस हद्विसि निरनायम येता. पेनदा सांति बस्केळक नीवातोनि मन्निकांटी!

बगा बतल मंता

मोदोल पोल्ले 1:1-18

येसु सेवा कबळ सुस्व कीतोर 1:19-51

लोकुलकुना नड्डुम येसु सेवा कबळ सुस्व कीतोर 2:1-12:50

येस्सलेमते येसुना आकिर वारम 13:1-19:42

सामि मर्रा जीवाते तेदमळ आनि अंतोर्क दिसमळ 20:1-31

गालिलते मरंदि मल्का सामिना दिसमळ 21:1-25

पेनदा पोल्ले मनकना रूपमते वाता

1 बतले पुट्टका मुन्ने पोल्ले* मत्ता. आ पोल्ले पेनतोनि मत्ता. आ पोल्ले पेन आंद.

2 आ पोल्ले मुन्नेटाले पेनतोनि कलियसि मत्ता.

3 दुनियाते मननव अन्निटवुन, पेन अदुनहेदाले पुटिस्ता. अदुन होळसि बतले तयार आयाहिल्ले.

4 अदुन लोप्पो पिस्वर मत्ता. आ पिस्वरे अंतोर लोकुलकुनाहाटी वेलगु आता.

5 आ वेलगु हीकटते एल्गंता. हीकट वेलगुन बस्केने गेल्ला परो.

6 पेन वरोर कबुरतोन लोहता, ओन पोरोल योहान.†

7 आ वेलगुना बारेमते ओर गवाइ वेहतस्के ओना पोल्ले केंजसि, अंतोर लोकुलक आ वेलगुनपोर्रो विस्वासम कियना, इंचि ओर वेहालय वातोर.

8 आ वेलगु योहान आयोर. गानि लोकुलकुंक आ वेलगुना बारेमते गवाइ वेहालय योहान वातोर.

9 हरेक मनकंक निजमाता वेलगु हियानोर, इद दुनियाते वासेक मत्तोर.

* 1:1 पोल्ले इगे किरिस्तु इंचि अर्तम. † 1:6 योहान ईर बापतिस्मा हियना योहान आंदुर. येसुना प्रेरित आयोर.

10 ओर इद दुनियातेन मत्तोर. ओनाहेंदाले पेन ई दुनियातुन पुटिस्ता. गानि ई दुनिया ओन एरपाट किया हिल्ले.

11 ओर ओना लोकुकुनेन वातोर, गानि कुद्दु ओना लोकुकुके‡ ओन ओष्कुना हिल्लुर.

12 गानि बोर अय्ते ओन ओष्कुचि ओना पोरोल पोर्रो विस्वासम कीतुरो, ओर्क अंटोर्क पेनदा मर्क-मियाहक आयना अदिकारम ओर हीतोर.

13 पेनदा मर्क-मियाहक आयमळS इत्ते मनकना पीटाल, मनकना इच्चा मत्ताप पुटमळ, मुय्दोना इच्चा मत्ताप पुटमळ आयो. गानि पेने ओर्कुन दाना संतानम कीकुंता.

14 आ पोल्ले मनकना रूपमते मारियता. अद कुर्पा, सत्तेमतोनि पुरागा निडिस मना नड्डुम जेगा आता. मोमोट महिमातुन हळतोम. अद महिमा बाबाना वर्रो मर्रीना महिमालेसी मत्ता.

15 ओना बारेमते योहान, “नावा पज्जोटाल बोर अय्ते वायनद मत्तोर, ओर ईर आंदुर. ओर नाकन्ना वेल्लेन मुन्नेटाल मत्तोर इंचि नाकन्ना ओर वेल्लेन पेद्दोड,” इल्हा लोकुकुकुंक लगांचि मोत्कुंचेके गवाइ वेहतोर.

16 ओर अन्नि तीरकुने पुरागा मत्ताहेंका, ओनहेंदाल मनाकु अंटोर्क कुर्पाता आसिर्वाद पोर्रो आसिर्वाद दोर्कता.

17 मूसाल इनानोनहेंदाल पेन मनाकु नियमाल्क हीता. गानि कुर्पा, सत्तेम मनाकु येसु किरिस्तुनाहेंदाल दोर्कता.

18 पेनदुन बस्केने बोरे हळा हिल्लुर. गानि पेनबाबाना संकाते मनना ओना वर्रो मर्री, ओरे मनाकु ओन* हुपिस्तोर.

येसुना बारेमते योहानुना गवाइ

(मत्तयाल 3:12; मरकुस 1:1-8; लूकाल 3:15-17)

19 “निमे बोन आंदिन?” इंचि योहानुन पूसकियालय येस्सलेम सहरते मनना यहुदि पेद्दाल्क, इच्चुर पेर्मालोर्कुन आनि लेवि जातितोर्कुन,† ओनगा लोहतस्के योहानुना गवाइ इल्हा मत्ता.

20 अस्के, “नना किरिस्तुन आयोन,” इंचि योहान पोल्ले मक्साकौटा कबुल कीतोर.

21 अस्के पेर्मालोर्क आनि लेवि जातितोर, “अय्ते निमे एलियन आदिना?” इंचि पूसकीतस्के, “नना एलियागुडा आयोन,” इंचि योहान इत्तोर. अस्के ओर, “हिलाकौटे निमे पेनदा कबुरतोना?” इंचि इत्तस्के, “नना पेनदा कबुरतोनिंका आयोन,” इंचि योहान इत्तोर.

22 पजा ओर लोकुकुल्क ओन मर्री, “अय्ते मरि निमे बोन आंदिन? माकुन लोहतोर्कुंक मोमोट होंचि बतल वेहकोम? अदुनहाटी‡ नीवा बारेमते निमे बतल वेहकुंतिन, माकु वेहा,” इंचि पूसकीतुर.

23 अस्के, यसायाह इनना पेनदा कबुरतोर मुन्ने वेहताप, “सामिनाहाटी‡ सवरटा हरि तयार कीम्ट, इंचि केडाते मोत्कुनानोना अल्किरतुन ननाने आंदुन,” इंचि योहान ओर्क वेहतोर.

24-25 योहानुन पूसकियालय वाता परिसि लोकुकुल्क, “निमे किरिस्तुन आयिन, एलियन आयिन, पेनदा कबुरतोनगुडा आयिन. असौटस्के निमे लोकुकुकुंक बारि बापतिस्मा हीसंतिन?” इंचि योहानुन पूसकीतुर.

26 अस्के योहान, “नना अय्ते बापतिस्मा एततोनि हीतन. गानि इगे मीवा नड्डुम वरोर नित्तिसि मंतोर, ओन मात्रम मिमेट एरपाट किय्चिर.

27 नावा पज्जोटाल वायानोना कादा हेरपुमता नोंडे लेहना विल्लुवागुडा नाकु हिल्ले,” इंचि योहान जवाब हीतोर.

28 इवान्नि गटनं योर्दन बैरेटा हब्बेर, पोळ्द पेय्सनेके मनना बेतानि इनना नाटे जर्गतां. अगा योहान बापतिस्मा हियंदुर.

‡ 1:11 ओना लोकुकुके यहुदि लोकुकुल्क.

S 1:13 पेनदा मर्क-मियाहक आयमळ पेन बस्के अय्ते दाना आत्मातुन मनकालोरगा

ईरता अस्के ओर दाना मर्क-मियाहक आंतुर.

* 1:18 ओन पेनदुन.

† 1:19 लेवि जातितोर्कुन ईर लेविना वंसमतोर आंदुर.

‡ लोकुकुल्क पेनदा गुळिते साप-सपाइ, पेर्माल कबाहक कीसेक मनांतुर.

येसु सामिए पेनदा मरिं

29 इंकुंदि रोज योहान, येसु ओनाहेके वायनद हळसि, “अद हुळाट, दुनियातुन पापमता सिक्साताल तप्सानाहाटीं मोक्कु आयाना पेनदा गोरिं पोरिनसंटर!

30 नना दीनकन्ना मुन्ने वेहचि मत्तन गदा, नावा पज्जोताल वरोर वायाना मंतोर इंचि! अद ईना बारेमतेन आंद. ओर नाकन्ना वेल्लेन मुन्नेटाल मत्तोर, अदुनहाटीं ओर नाकन्ना पेद्दोड आंदुर.

31 ओर बोर आंदुर कुद्दु नाके तेळियो. गानि इस्राएलता लोकुकुकुं ओर दिसगोम, इंचि नना एततोनि बापतिस्मा हियालय वातन,” इंचि योहान इत्तोर.

32-33 मर्रा योहान येसुना बारेमते इल्हा गवाइ वेहालय दलगतोर, “नना कुद्दु ओन एरपाट कियाकौंदुन. गानि एततोनि बापतिस्मा हियालय नाकुन लोहता पेने नाकु वेहचि मत्ता, ‘पवित्र आत्मा पावरेम पिट्टे लेहका आसि बोनपोरिं अय्ते रेयनेके निमे हळतिन, ओरे लोकुकुकुं पवित्र आत्माते बापतिस्मा हियानोर आंदुर,’ इंचि. पवित्र आत्मा पावरेम पिट्टे लेहका आसि स्वर्गमताल हिळ्ळ रेय्शि, ओनपोरिं वासि उदतद नना हळतन. 34 इदंता नना नावा कळ्ळुकुन निंडा हळतन. अदुनहाटीं, ‘ईरे पेनदा मरिं आंदुर,‡’ इंचि नना गवाइ हीसंतन,” इंचि योहान वेहतोर.

येसुना मोदाटा सिस्युल्क

35 इंकुंदि रोज योहान ओना सिस्युल्कुनाल इव्वुर सिस्युल्कुनतोनि नित्तिसि मत्तोर.

36 अस्के येसु ओना दग्गेटाल होननद हळसि, “हुळाट, पेनदा गोरिं पोरि,” इंचि इत्तोर.

37 योहान इत्ता पोल्ले केंजसि ओना इव्वुर सिस्युल्कु येसुना पज्जो होत्तोर.

38 येसु पज्जोळ्ळ तिरियसि हळतोर अस्के ओर इव्वुर ओना पज्जो वायनद हळसि ओर्कुन, “मिमेट बतल पहकसंतिर?” इंचि पूसकीतोर. अस्के ओर, “रब्बी! § निमे बगा मनातिन?” इंचि इत्तोर.

39 अस्के येसु ओर्कुन, “वट हळकिर,” इत्तोर. ओर येसुनतोनि होंचि ओर मनना जेगातुन हळत्तुर. हळसि येसु मनना जेगातगा एवसि ओनतोनि अग्गेन मत्तुर. अस्के नुल्पेळतां नालुं एगसेक मत्ता.

40 योहानुना पोल्ले केंजसि येसुना पज्जो होत्ता इव्वुर सिस्युल्कुनाल वरोन पोरोल अंदरियल. ई आंदेयल, सिमोन पत्रु इनानोना तम्पुर आंदुर.

41 आंदेयल अगटाल सवरगा ओना दादल सिमोन पत्रुं होंचि कलियतोर. कलियसि, “दादा मोमोट मेसय्यांक इत्ते किरिस्तुंक कलियतोम,” इंचि इत्तोर.

42 पजा आंदेयल ओना दादल सिमोन पत्रुन येसुनगा पीसि वातोर. येसु सिमोन हळसि, “निमे योहानुना मरिं सिमोन आदिन. गानि इंदकेटाल नीकुन केपा इत्ते पत्रु इंचि केयानुर,” इंचि इत्तोर.

43 इंकुंदि रोज येसु गालिलि राज्येमते होनना निरनायम एततोर. अस्के पिलिपुन कलियसि, “निमे ना पज्जो वा,” इंचि इत्तोर.

44 पिलिपु, अंदरियल आनि पत्रु ईर मुव्वुरगुडा बेतसेदा इनना सहरतोर आंदुर.

45 पजा पिलिपु होंचि नतेनलुंक कलियतोर. कलियसि, “बोना बारेमते अय्ते मूसाल दर्मसास्त्रम रासतोर आनि पेनदा कब्रतोरगुडा रासतुर, ओर माकु दोर्कतोर. ओर नासरेत नाटेना योसेप इनानोना मरिं येसु आंदुर,” इंचि वेहतोर.

46 अस्के नतेनल, “अल्हाना! नासरेततालगुडा बेसता पोल्ले वाया परंतंगा?” इंचि इत्तोर. अस्के पिलिपु, “अय्ते निमेन वासि हळा!” इंचि इत्तोर.

47 येसु नतेनलुन ओनहेके वायनद हळसि ओना बारेमते, “अद हुळाट, निजम इस्राएल मनकल. ओनालोप्पो बतले आबद्दम पोल्ले हिल्ले,” इंचि इत्तोर.

48 अद केंजसि नतेनल, “नना बसंटोन, बसंटोन आयोन नीकु बल्हा एर्का?” इंचि येसुन पूसकीतोर. अस्के येसु, “पिलिपु नीकुन केयाका मुन्ने, निमे अंजिर मर्रा हिळ्ळ मत्तिन. अस्केन नना नीकुन हळतन,” इंचि इत्तोर.

‡ 1:34 ईरे पेनदा मरिं आंदुर पेन पेरतोर.

§ 1:38 रब्बी इद पोल्लेक गुरु इंचि अर्तम.

49 अस्के नतेनल, “रब्बी, निमे पेनदा मर्रिन आंदिन, इस्राएलता राजान आंदिन,” इंचि इत्तोर.

50 अस्के येसु, “नना नीकुन अंजिर मर्रा हिळु मन्नेकेन हळतन इंचि वेहताहेका नाकुन नम्मसंतिना? इंका मुन्ने इंदुकन्ना पेद्दे-पेद्दे पोल्ले हळकिन,” इंचि जवाब हीतोर.

51 पजा, “हिके केंजट, नना निजम-निजम वेहासेक! स्वर्गम बैय्यरा आयानद हळकिर, पेनदा दूतां मनकना रूपमते पुटतोना पोरो एक्कानदुन-रेयानदुन हळकिर,”[☆] इंचि ओर्क वेहतोर.

2

येसु एतुन अंगुर पानकम कीतोर

1 इद जर्गुता मूडोव रोजुननाड गालिल राज्येमता काना इनना नाटे मरमिं मत्तां, आ मरमिने येसुना यावलगुडा मत्ता.

2 मरमिंकु येसुन, ओना सिस्युल्कुनगुडा केय्सि मत्तुर.

3 मरमिने अंगुर पानकम मारतस्के, येसुना यावल, “ओरागटा अंगुर पानकम मारसोत्ता कोको,” इंचि येसुन इत्ता.

4 अस्के येसु, “यावा! निमे नाकु बारि वेहचंतिन? नना बतलन्ना कियना वेला इंका वाया हिल्ले,” इंचि इत्तोर.

5 पजा येसुना यावल अगा मत्ता जीतागाहकुन, “ईर मीकु बतल वेहंतोरो, मिमेट अदे कीम्टु,” इंचि इत्ता.

6 यहुदिल्कुना सुद्दिंकरन कियाना रिवाज कियनाहाटी अगा बंडातोनि तयार कीतव हासं पेरपुल्क मत्तां. आ उंद-उंदि पेरपु नूर (100) लीटर्कुना एर पियनलायक मत्ता.

7 “आ पेरपुल्कुने एर निहाट,” इंचि येसु आ जीतागाहकुंक वेहतोर. अस्के ओर आ पेरपुल्क सीगा निडानाल निहातुर.

8 अस्के येसु, “इंदके उंदि पेरपुनाल इच्चुर एर पीसि, ई कुळपु हियना पेद्दा मनकानगा ओम्टु,” इंचि आ जीतागाहकुंक वेहतोर, अस्के ओर ओतुर.

9-10 पजा आ पेद्दा मनकल एतुन गिचचो उंचि हळतोर अय्ते, अद एर पुरागा अंगुर पानकम आसि मत्ता. इद पानकम बोर तत्तोर, बगाटाल वाता इत्तद आ पेद्दा मनकंक तेळिया हिल्ले गानि आ जीतागाहकुंक मात्रम एर्का मत्ता. पजा आ पेद्दा मनकल मरमिना पेडन केय्सि, “अंतोर अय्ते पिक्वर अंगुर पानकम मोट्टा मोदाला हीतुर. लोकुल्क पीरनिंडा उट्टारित्ते, पज्जोटाल सप्पटा पानकम हीतुर. गानि निमे अय्ते पिक्वर अंगुर पानकम इदवेरदाकागुडा मिगलिच्चि इरतिन,” इंचि इत्तोर.

11 इल्हा येसु गालिल राज्येमता काना नाटे इचंत्रम आयना कबळ कीसि, ओना महिमातुन हुपिस्तोर. इद ओना मोट्टा मोदाटा चिन्ह आंद. अदुनहाटी ओना सिस्युल्क ओन नम्मुर.

12 पजा येसु, ओना यावल, ओना तम्मुहक, ओना सिस्युल्क अंतोर कलियसि कपर्नाहूम इनना सहर होत्तुर. ओर अंतोर अग्गेन कोन्नि रोजुक आगतुर.

येसु गुळितगा दांतोर

(मत्तयाल 21:12-13; मरकुस 11:15-17; लूकाल 19:45-46)

13 यहुदि लोकुल्कुनद दाटसि होनना पंडुगु* दगेर्क एवसि मत्ता. दानहाटी येसु येस्सलेम होत्तोर.

14 अगा होत्तस्के गुळिता लोप्पो, लोकुल्क पेनदुक मोक्कु हियालय कुरी, गोर्री, पावरेम पिट्टें अमसेक दिसतुर. अचोने आयका सरकार कोत्तां पेनदा गुळिते वाटालय कुदरो इंचि, आ कोत्तां बदलांचि यहुदिल्कुना कोत्तां हियानोरगुडा अगा उद्दिदस मत्तद येसु हळतोर.

☆ 1:51 उत्पत्ति 28:12 * 2:13 दाटसि होनना पंडुगु इजिप्त देसेमता गुलामगिरिताल यहुदि लोकुल्कुन पेन पेचाहचि तत्ता मतिते, इद पंडुगु कीतुर. गुलामगिरिताल पलाते अरता रोजु इजिप्त देसेमता हरेक लोता पेद्दा मर्रिन पेनदा दूता हळ्कुता. गानि यहुदिल्कुना लोतोर्कुनाल बोरे हाया हिल्लुर.

15 हळसि, उंदि नोंडे नोटसि पोट्टे तयार कीसि, गुळिताल अंटोर्कुन गेटुमतोर. गॉरे, कुरंन गुळिताल पलाते गेदमिसि, कोलतां बदलांचानोरा बल्लन बोर्ला वाटसि कोलतानंता लीकतोर.

16 पजा पावरेल्क अम्मनोर्कुन, “इवुन इगोटाल पलाते ओम्प्टु, नावा पेनबाबाना लोतुन हाटुमलेहका कियमत,” इंचि इत्तोर.

17 अगा जर्गतदुन हळसि, “नीवा लोता बारेमते नावा जीवा बागा तंलाडसंता,”[☆] इंचि दर्मसास्त्रमते दाविद राजाल रासता पोल्ले ओना सिस्युल्कुंक मति वाता.

18 येसु अल्हा कीतदुन हळसि यहुदि पेद्दाल्क ओनगा वासि, “इल्हा कियना अदिकारम नीकु मंता इंचि मोमोट नम्मनाहाटी निमे माकु बसोंटा चिन्ह हुपसतिन?” इंचि पूसकीतुर.

19 अस्के येसु, “इद गुळितुन कूल्हाट, नना मूड रोजकुने मरां निलाहंतन,” इंचि जवाब हीतोर.

20 अस्के यहुदि पेद्दाल्क, “इदु गुळितुन दोहालय नल्पै हासं वर्सा दल्गतां. अथे निमे दीन मूड रोजकुने बल्हा निलाहंतिन?” इंचि पूसकीतुर.

21 गानि येसु मात्रम ओना सतता मेंदुलता गुळिता बारेमते वळकतोर.

22 येसु हासि मरां जीवाते तेदतस्के ओना सिस्युल्कुंक इद पोल्ले मति वाता. अस्के ओर दर्मसास्त्रमते रासि मत्तादुन आनि येसु वेहता पोल्लेन नम्मतुर.

23 दाटसि होनना पंडुगुना वेलाते येसु येस्सलेम सहरते मत्ताहाटी, वेल्लेटोर लोकुल्क ओर कीता अद्बूताल्क हळसि, ओनपोर्रो विस्वासम इरतुर.

24-25 गानि अटोर लोकुल्क बोर-बसंतोर इंचि येसुंक एरपाट मत्ताहेंका, ओरा बारेमते येसुंक बोर गवाइ वेहना अव्वरम हिल्ले. अदुनहाटी ओर बोरे लोकुल्कन नम्मा हिल्लोर.

3

मरां पुट्टुमळ

1 परिसि लोकुल्कनाल^{*} वरोर निकोदेमस इनना मनकल मत्तोर, ओर यहुदिल्लुकुना लीडर मत्तोर.

2 ओर उंदि रोजु नर्कटा वेलाक येसुंक वासि कलियतोर. कलियसि, “रब्बी,[†] निमे कियना ई अद्बूतामाता कबाहक पेनदा तोळ हिल्ला बोरे किया परोर. दीनहेंदाल निमे पेनदाहेंदाल वाता गुर्ननिचि मोमोट तेल्लिचकुत्तोम,” इंचि इत्तोर.

3 अस्के येसु ओन, “नना निजम-निजम वेहासेक, बोरे आयिर, पूना रीतुने मरां पुट्टुवा, ओर पेनदा राज्यमतुन हळा परोर,” इंचि वेहतोर.

4 अस्के निकोदेमस, “गानि वरोर मातरल आता मनकल मरां बल्हा पुट्टा परंतोर? ओर ओना यावाना पीटे होळियसि मरां पुट्टा परंतोरा?” इंचि येसुन पूसकीतोर.

5 अस्के येसु ओन्क इल्हा वेहतोर: “नना निजम-निजम वेहासेक, वरोर मनकल एताल आनि पवित्र आत्माहेंदाल पुट्टुवद,[☆] ओर पेनदा राज्यमते होळिया परोर.

6 मना मेंदुल अथे तल्लुर-बाबोनहेंदाल पुट्टा परंता, गानि आत्मा मात्रम सिराप पवित्र आत्माहेंदाले पुट्टा परंता.

7 अदुनहाटी, मीकु मरां पुट्टे पीता, इंचि नना मीकु वेहतद केंजसि निमे इचंन्रम आयमा.

8 बल्हा अथे वळि दान इस्टमाताप बेके इत्ते हेक्के वित्तंता, दाना सप्पुडगुडा नीकु केंजा वांता, गानि अद बेंदाल वासंता, बेके होंचंता इत्तद मात्रम नीकु तेळियो. अल्हेन पवित्र आत्माहेंदाल पुट्टा हरेक मनकलगुडा मनंतोर,” इंचि येसु वेहतोर.

9 गानि “इद बल्हा आया परंता?” इंचि निकोदेमस येसुन पूसकीतोर.

[☆] 2:17 बजन संहिता 69:9 ^{*} 3:1 परिसि लोकुल्क यहुदिल्लुकुना उंदि गेंगुना पोरोल आंद. ई गेंगुना लोकुल्क मरां पुट्टुमळतुन नम्मंतुर. [†] 3:2 रब्बी इद इब्रानि पोल्ले आंद, गोडिते दीना अर्तम गुरू आंद. [☆] 3:5 यहजेकल 36:25-28

10 अस्के येसु ओन्क इल्हा जवाब हीतोर, “निमे अय्ते इस्राएल लोकुकुकुंकराहना पेद्दा गुस्न आदिन. अयना इव पोल्ले न्नीकु तेळियोगां?

11 नना निजम-निजम वेहासेक, माकु तेळियता पोल्लेगें मोमोट वेहांतोम, कळकुने हळता पोल्लेना गवाइ मोमोट मीकु वेहांतोम. अयना मिमेट मावा गवाइतुन ओप्कुचेक हिल्लिर.

12 नना मीकु इद दुनियाता पोल्ले वेहतेने मिमेट नमसेक हिल्लिर. अय्ते नना स्वर्गमता बारेमता पोल्ले वेहते मिमेट बल्हा नम्मतिर?

13 मनकना रूपमते पुटूतोन नना स्वर्गमताल वातन. इका नाकु तप्पा स्वर्गमते वैरे बोरे होना हिल्लिर.

14-15 नाकुन बोर अय्ते विस्वासम कीतोर, ओन्क बस्केळ्ळक पिस्सना पिस्वर दोर्कगोम इत्ते, मूसाल बल्हा बय्लि बूमिटे इत्तोळता तरासुन कोय्यापोर्रो वेल्लाड वाटसि मत्तोर, ✱ अल्हेने मनकना रूपमते पुटूतोन नाकुनगुडा वेल्लाड वाटमळ जर्गागोम,” इंचि येसु इत्तोर.

16 पेन दुनियातोरकुन इच्चोन पावरम कीता गदा, दाना वर्रो मर्रिनगुडा ई दुनियातोरहाटी हीता. ओन नम्मना हरेक मनकल नासडेम आयामन्नि गानि ओन्क बस्केळ्ळक पिस्सना पिस्वर दोर्कना इंचि अद अल्हा कीता.

17 पेन ई दुनियातोरक सिक्सा हिया वेहालय, दाना मर्रिन ई बूमिपोर्रो लोहा हिल्ले, गानि दुनियातोरकुन पिसागोटालय ओन लोहचीता.

18 ओन बोर अय्ते नम्मंतुरो, ओर्क ओर सिक्सा हिया वेहोर. गानि बोर अय्ते ओन नम्मुरो, पेनदा वर्रो मर्रिनपोर्रो विस्वासम कियवाहेका ओर्क पेन मुन्नेन सिक्सा हीसि इरता.

19 पेन मुन्नेन बारि सिक्सा हीसि इरता इत्ते, पेनदाहेंदाल उंदि वेलगु दुनियाते वाता. गानि दुनियातोर ओरा तप्पुड कबाहकुनहेका वेलगुने पिसनद होळसि हीकटते पिसमळतुने मेच्छुत्तुर.

20 तप्पुड हरदे ताकाना बोरे मनकल आयि, ओर वेलगुन मेच्छुन्नोर. ओना तप्पुड कबाहक बय्यर दिस अर्रतां इंचि ओर वेलगुने वायोर.

21 गानि सत्तेम हरदे ताकाना मनकल, ओर कियना कबाहक पेनदा सहायमते आसतां इनकुचि अव अंटोर्क बय्यर दिस्सनाहाटी ओर वेलगुने वांतोर.

येसु आनि बापतिस्मा हियना योहान

22 ई पोल्ले मारतस्के, येसु, ओना सिस्युल्कु अगटाल यहुदिया राज्यमते होत्तुर. होंचि अगाटा लोकुकुकुंकरा बापतिस्मा हीसेक कोन्नि रोजकु अग्गेन मत्तुर.

23 सलिम इनना नाटेंक दग्गेरा मनना एनोन पोरोलता जेगाते वेल्लेन एर मत्ताहेका, योहानगुडा अगा बापतिस्मा हियुंदुर. लोकुल्क ओना कय्दे बापतिस्मा एतालय अगा वायुंदुर.

24 ई गटनां योहानुन जेलने वाटका मुन्नेने जरगतां.

25 अस्के योहानुना सिस्युल्क आनि वरोर यहुदि मनकन नड्डुम सुद्दिकरन कियाना रिवाजता बारेमते रोंड-रोंड पोल्ले आतां.

26 दानहाटी योहानुना सिस्युल्कु योहानुनगा वासि, “गुस्, निमे योर्दन बेरेटा हब्बेरा मननेके नीवातोनि बोर अय्ते मत्तोर, निमे बोना बारेमते अय्ते गवाइ हीसि मत्तिनो, ओर इंदके लोकुकुकुंकरा बापतिस्मा हीसंतोर. अंतोर लोकुल्क ओनहेकेन होंचंतुर,” इंचि वेहतुर.

27 अय्ते योहान ओर्क इल्हा जवाब हीतोर, “स्वर्गमताल पेन हियवद बोनके बतल दोर्का परो.

28 नना किरिस्तुन आयोन. नना सिराप ओनाहाटी हर्रि तयार कियालय मुन्ने वातोन आंदुन. नना वेहता पोल्लेक मिमेट गवाइ मंतिर!

29 मरमिन पेडल मत्तागेन मरमिन पेगिड मनंता. नना अय्ते मरमिन पेडाना पक्काते निलसि मनना ओना दंटागानसंतोन आंदुन. मरमिना पेडल बतलन्ना वेहते अद केंजसि आ दंटागाल वेल्लेन कूस आंतोर. ननागुडा अल्हेन, लोकुल्क ओनगा होननद हळसि नना पुरागा कुसिते निंडसोत्तन.

30 इंदके ओना कदर वेल्लेन बेर्सगोम, नावा कदर वेल्लेन तक्को आयगोम अचोने!” इंचि योहान वेहतोर.

31 बोर अयते पोर्रोटाल वातोर, ओर अंटोर्कुंकन्ना पेद्दोड. बोर अयते इद दुनियाते पुटतोर, ओर इदे दुनियातोर आंदुर. अदुनहाटी ओर ई दुनियाते जरगानवुना बारेमतेन वळ्ळंतोर. गानि बोर अयते स्वर्गमताल वातोर ओर अंटोर्कुंकन्ना पेद्दोड आंदुर.

32 ओर अगा बतल अयते हळतोर, केंजतोर अदुना बारेमतेन गवाइ वेहंतोर, गानि ओना गवाइतुन बोरे नम्मुर.

33 ओर वेहता गवाइतुन बोर अयते नम्मंतुरो, ओर अंतोर पेने सत्तेम इंचि पक्का कबुल कीतुर.

34 बोन अयते पेन लोहचीता, ओन पेन दाना आत्माते पुरागा निहता. अदुनहाटी ओर सिराप पेनदा पोल्लेगें वेहांतोर.

35 पेन बाबल ओना मरिन इरगा पावरम कीतोर, इंचि मरिना कयदुक अग्नि अप्पजेपतोर.

36 पेनदा मरिन बोर अयते नम्मंतुरो, ओर्क बस्केळ्ळक पिस्सना पिस्वर दोर्कता. गानि बोर अयते मरिना पोल्ले केंजुरो, ओर्क बस्केळ्ळक पिस्सना पिस्वर अयते दोर्केन दोर्को, गानि ओनपोर्रो पेन होंग पीसि मनंता.

4

सामरिया राज्येमता मुरतळ येसुक कलियता

1 येसु योहानुंकन्ना एक्को मंदिक बापतिस्मा हीसंतोर, योहानुंकन्ना एक्को मंदितुन ओना सिस्युल्क कीसंतोर, इंचि परिसिल्लुकुंक तेळियता.

2 (निजम हळते, येसु कुद्दु बापतिस्मा हियाकौदुर, ओना सिस्युल्क बापतिस्मा हियुंदुर.)

3 इद पोल्ले सामिक तेळियतस्के ओर यहुदिया राज्येमतुन होळसि, मर्रा गालिल राज्येम होनालय पेयसतोर.

4 गानि इंदके ओन्क सामरिया* इनना राज्येमताल होनापीता.

5 इल्हा येसु सामरिया राज्येमते मनना सुकर इनना सहरते एवतोर. ई सुकर सहर, एनकटा यहुदिल्लुकुना मातिर दादल याकोब ओना मर्री योसेपुंक हीता जेगाक दग्गेरा मत्ता.

6 अगा याकोबुना कुहि मत्ता. वेल्लेन लक्कुनाल ताकसि वाताहेका नेरबळसि येसु, आ कुहिता पक्काते उदुतोर. अस्केळ्ळक पिथ्यल आसि मत्ता.

7-8 अस्के तिननाहाटी बतलन्ना तरालय येसुना सिस्युल्क नाटेंक होंचि मत्तुर. अदे वेलाते उंदि सामरिया मुरतळं एतुक वाता. अयते येसु, “उनालय नाकु इच्चो एर हीम,” इंचि अद मुरतटुन तल्कतोर.

9 अस्के अद मुरतळ, “निमे यहुदिन आसिगुडा, उंदि सामरिया मुरतटुन, उनालय एर हीम, इंचेके बल्हा तल्कसंतिन?” इंचि इत्ता. (यहुदिल्लक सामरिया लोकुल्लुकुनतोनि बदे संबंदम ईर्कौदुर. अदुनहाटी अद अल्हा इत्ता.)

10 अस्के येसु, “ओक्कला निमे, पेनदा वरमतुन आनि उनालय एर हीम इंचि नीकुन तल्कानोर बोर आंदुरो, एरपाट कीसि मत्ते, निमेने कुद्दु नाकुन एर तल्किस मन्नेन, अस्के नना नीकु पिस्वर हियना एर हीसि मन्नेन,” इंचि इत्तोर.

11 अस्के आ मुरतळ, “कुहि अयते वेल्लेन लोतु मंता महाराज. निहगा एर तोरालय बाल्दिगुडा हिल्ले. इसौटस्के ई पिस्वर हियना एर नीकु बल्हा दोर्कार?”

12 माकु ई कुहि मावा मातिर दादल याकोब हीतोर. ई कुहिता एर ओर कुद्दु उनुंदुर, इका ओना मर्क, एटि, गोळ्ळु-गोदां उनुंदुं. अयते निमे ओनकन्ना पेद्दोना?” इंचि पूसकीता.

13 अयते येसु, “ई एतुन उनना हरेक मनकंक मर्रा तप्पाकौटा द्पांता.

* 4:4 सामरिया इद उंदि राज्येम पोरोल आंदु. इद राज्येमते मनानोर्कुन यहुदि लोकुल्लक सिन्नगा हळंतुर, ओरा नीळगुडा यहुदिल्लक दादुर. † 4:7-8 सामरिया मुरतळ सामरिया एरियाते मनना मुरतटुन सामरि मुरतळ इंतुर.

14 गानि नना हियना एतुन बोर अय्ते उंटोरो, ओन्क मर्रा बस्केने दूपायो. नना हीता एर ओनालोप्पो बस्केने ऊरसेके मनना ऊटालेसी मारियसि, ओन्क बस्केने पिस्सना पिस्वरतुन हिय्यार,” इंचि जवाब हीतोर.

15 अय्ते अद मुरतळ, “अल्हा अय्ते अद एर नाकु हीम महाराज! अद एतुन नना उट्टुनित्ते नाकु बस्केने दूपा आयो, नाकु मर्रा बस्केने एर ओयालय इच्चोर लक्कु वायना अक्सरमगुडा मन्ने,” इंचि इत्ता.

16 अस्के येसु दान, “होन, होंचि नीवा मुय्दोन केय्पि तरा होन,” इंचि इत्तोर.

17 अस्के अद, “नाकु मुय्दो हिल्लोर,” इंचि इत्तस्के येसु, “निमे निजमे वेहतिन! नीकु मुय्दो हिल्लोर,” इंचि इत्तोर.

18 पजा येसु, “अद बल्हा इत्ते, नीकु हेय्युर मुय्दुर मत्तुर, निमे इंदके बोनतोनि अय्ते मंचंतिनो ओरगुडा नीवा मुय्दो आयोर. अदुनहाटी निमे निजम वेहतिन,” इंचि इत्तोर.

19 अस्के अद मुरतळ, “महाराज, नीवा पोल्लें केंजसि नाक अय्ते, निमे पेनदा कबुरतोन आंदिन इंचि नाकु तेळियता.

20 मावा एनकटा पेदूदाल्क इदे गुट्टापेर्री मोळ्कुंदुर. गानि मिमेट बारे, मोळ्कना असल जेगा येस्सलेमे आंदु इंतोर,” इंचि अद मुरतळ येसुन इत्ता.

21 अस्के येसु दान्क इल्हा वेहतोर: “बाई नाकुन नम्मा! पेनबाबांक मोळ्कनाहाटी इद गुट्टातगा हिलाकॉटे येस्सलेम सहर होनना अक्सरम हिल्ले, मिमेट बगानना मोळ्का परंतित, इसोटा वेला मुन्ने वासेक मंता.

22 मिमेट सामरिया राज्यमतोर मीकु तेळियवादान मोळ्कंतोर. गानि मुक्ति यहुदिल्लुकुनाहेंदाले वासेक मंता. अदुनहाटी मोमोट यहुदिल्लुक अय्ते माकु तेळियतदुने मोळ्कंतोम.

23 गानि पेनदुन निजम मोळ्कानोर पेनदा सत्तेमतुन एरपाट कीसि ओर पेनदा आत्माते मोळ्कना वेला मुन्ने वासेक मंता. आनि अद वेला एव्से मंतां. बारित्ते इल्हा मोळ्कानोर्कुने पेन मेचकुंता.

24 पेन आत्मा रूपमते मंता. अदुनहाटी दान मोळ्कानोर अंतोरगुडा आत्माते, सत्तेमते मोळ्कना,” इंचि वेहतोर.

25 पजा अद मुरतळ, “किरिस्तु इनना मेसय्याल वासेक मंतोर इंचि नाकु एरपाटे. ओर वातस्के माकु अंतोर्क अन्नि पोल्लें वेहानुर,” इंचि येसुन इत्ता.

26 अस्के, “नीतोनि वळ्कानोन, ननाने ओन आंदुन,” इंचि येसु इत्तोर.

27 अचचोटेन अगा ओना सिस्युल्क वातुर. येसु उंदि मुरतळतोनि वळ्कानद हळसि ओर्क वेल्ले इंच्चम आता. अय्नागानि बोरे ओन, “नीकु बतल गावाले? दानतोनि निमे बारि वळ्कसतिन?” इंचिगुडा इना हिल्लुर.

28 अस्के अद मुरतळ अळकातुन अग्गेन होळसि नाटे होंचि लोकुल्कुंक वेहता.

29 “इदवेरादाका नना कीतव अन्निना बारेमते वरोर मनकल वेहतोर. ओरे किरिस्तु बारे, मिमेट वासि हळट!” इंचि नाटेनोर्कुन इत्ता.

30 अस्के नाटेनोर नाटुन होळसि येसु मत्ता जेगातगा वातुर.

31 अद मुरतळ नाटे होतस्के, सिस्युल्क, “गिचचो तिन रब्बी!” इंचि येसुन विनंति कीतुर.

32 गानि येसु, “नहगा तिनालय इसंटा तिडि मंता गदा, अद तिडिता बारेमते मीकु बतले तेळियो,” इंचि सिस्युल्कुन इत्तोर.

33 अस्के सिस्युल्क, “गुस्नाहाटी बोरन्ना तिनालय बतलन्ना तत्तुरा?” इंचि ओरद-ओरे वळ्ककुनालय दल्गतुर.

34 अस्के येसु ओर्क इल्हा वेहतोर: “नाकुन लोहतोना इच्चा मत्ताप ताकमळ, ओर वेहता कबाहकुन पूरा कियमळ, इदे नावा तिडि आंद.

35 वंजि वीतता पजा, इंका नालुं नेल्क अय्ते वंजि कोताक वांता, इंचि मिमेट इंतोर. गानि नना वेहनद केंजट, कळ्क विच्चि पोलमतेके बेस हळट, पंटा कोताक वासि मंता.

36 पंटा कोय्यानोर बृति दोर्किच्छुंकेक मंतोर आनि बस्केळक पिस्सना पिस्वरताहाटीं पलम जमा कीसेक मंतोर. दीनहेंदाल वीततोर, कोय्यानोर इव्वुरगुडा कुसिते कलियसि मना परांतुर.

37 वरोर वीतंतोर, इंकावरोर कोय्यंतोर इनना वेसुड इगे निजम आंता.

38 बोरो वैरतोर कस्टपळसि पंडिस्ता पंटातुन कोय्यालय नना मीकुन लोहतन. मिमेट कस्टपळा हिल्लिर, गानि ओर कीता कस्टमता पायदा मीकु दोर्कसंता,” इंचि येसु वेहतोर.

39 “नना कीतव अन्निना बारेमते वरोर मनकल नाकु वेहतोर,” इंचि वेहता, आ मुरतटा गवाइतुन केंजसि, अद नाटेना वेल्लेन मदि सामरिया लोकुल्क, येसुनपोर्रो विस्वासम इरतुर.

40 सामरिया लोकुल्क येसुनगा वासि, “निमे महगा मन्नु,” इंचि विनंति कीताहेंके, येसु रोंड रोजकु अगा आगतोर.

41 येसु कराहता पोल्ले केंजसि इंका वेल्लेन लोकुल्क ओन विस्वासम कीतुर.

42 “सिराप निमे वेहताहेंकेन मोमोट येसुन नम्मा हिल्लोम. इंदके कुद्दु मोमोटे ओना पोल्ले केंजसि, दुनियातोरकुन पिसागोटना निजम किरिस्तु ईर आंदुर इंचि मोमोट विस्वासम कीतोम,” इंचि आ लोकुल्क मुरतटुन इतुर.

सायाबुना मरिन येसु बेस कीतोर

(मत्तयाल 8:5-13; लूकाल 7:1-10)

43 रोंड रोजकु आतंका, येसु अगटाल गालिल राज्येमते होत्तोर.

44 पेनदा कबुरतोंक ओना सतता देसेमते कदर दोर्को, इंचेके येसु मुन्नेने वेहचि मत्तोर.

45 दाटसि होनना पंडुगुनाहाटीं गालिल राज्येमता लोकुल्कगुडा येस्सलेम होंचि मत्तुर. अगा येसु कीतव अन्नि कबाहकुन ओर हळतुर. अदुनहाटीं येसु गालिल राज्येमते वातस्के ओर अंतोर येसुन बेस दग्गेरा कीकुत्तुर.

46 बद नाटे अय्ते येसु एतुन अंगुर पानकम कीतोर, अदे काना नाटे ओर मर्रा होत्तोर. गालिल राज्येमता कपर्नाहम इनना नाटे, राजाना हिळ कबळ कियाना वरोर सायाबुना मरि बिमार अरसि मत्तोर.

47 अय्ते यहुदिया राज्येमताल गालिल राज्येमते येसु वातोर इंचि ओन्क कबुर तेळियताहेंका ओर येसुंक कलियालय होत्तोर. होंचि येसुना काल्कुनपोर्रो अरसि, “नावा मरि इरगा बिमार आसि हायनाल आसि मंतोर, निमे ओन बेस कियालय नातोनि ताका,” इंचि विनंति कीतोर.

48 अस्के येसु, “चिन्हां, इचंन्रमता कबाहक हळवद मिमेट नम्मनोर आयिर!” इंचि ओन इत्तोर.

49 आ सायाब, “ना मरि हायका मुन्नेन निमे ताका सामि,” इंचि विनंति इत्तोर.

50 अस्के, “नीवा मरि पिस्संतोर, निमे होन,” इंचि येसु ओन इत्तस्के, ओना पोल्लेतुन नम्मिसि ओर तिरियसि होत्तोर.

51 ओर हरि पीसि होंचेकेन मत्तोर, नड्डुम हरदेने ओना जीतागाहक कलियसि, “सायाब, नीवा मरि बेस आतोर,” इंचि वेहातुर.

52 अस्के “नावा मरि बद वेलाक बेस आतोर?” इंचि ओर्कुन पूसकीतोर. “निन्ने पिय्यल उंद एगनेके ओना एळिक रेय्ता सायाब!” इंचि ओर वेहतुर.

53 अस्के आ सायाब ओर वेहतद केंजसि, बद वेलाते येसु, “नी मरि पिस्संतोर,” इंचि इत्तोर, अदे वेलाते ओना मरि बेस आतोर, इंचि ओन्क तेळियसोत्ता. अदुनहाटीं ओर, ओना लोतोर अंतोर येसुन नम्मुकुत्तुर.

54 यहुदियाताल गालिलते वासि येसु कीतद इद रोंडो इचंन्रमायना चिन्हे आंद.

5

बेतसेदा सेरवुना ओड्डुंक मत्ता हेय्युं गुडसैं

1 पजा येसु यहुदिल्कुना उंदि पंडुगुनाहाटीं येस्सलेम सहर होत्तोर.

2 येस्सलेम सहरते गौरी दरबाजा इनना जेगातगा उंदि सेरवु मंता, दान इब्रानि बासाते बेतेस्दा इंचि इंतुर. आ सेरवुना ओड्डुंक हेय्यु गुडसैं वाटसि मत्तां.

3-4 बदो उंदि वेलाते पेनदा दूता वासि अद एतुन लोपुंदु, अल्हा लोपतस्के, अद एते बोर मनकल अय्ते मुन्ने होळियंतोरो ओर मनकल ओना बसौटा बिमार अयना बेस आयुंदु, अदुनहाटी पेनदा दूता एतुन बस्के लोपार इंचि एदुर हळसेक गुड्डोर्कु, गूनोर्क, कुंटोर्क, लकवा बिमारतोर इल्हा वेल्लेन मंदि आ गुडसेने जेगा पीसि मनुंदुर.*

5 अगा मत्तोरव्टे मुपै एनिमिदि वर्सानाल बिमार मत्ता वरोर मनकल मत्तोर.

6 ओर अगा मींडसि मत्तद येसु हळतोर. हळसि ओर वेल्लेन वर्सानाल कुक्कि पीसि मत्तद एरपाट कीसि ओनगा होत्तोर. हौंचि ओन, “नीकु बिमारताल बेस आयानद मंतना?” इंचि पूसकीतोर.

7 अस्के आ मनकल, “नाकु बेस आयगोम इंचि मंता सामि! गानि बतल कीकन? एतुन लोपतस्के नाकुन आ एतगा ओयालय नहगा बोरे हिल्लुर. एतुन लोपतस्के मेल्लगा-मेल्लगा नना होननदाका बोरन्ना वरोर नाकन्ना मुन्नेन होळियंतोर,” इंचि वेहतोर.

8 अस्के येसु ओन, “अय्ते तेदा! तेदसि नीवा कटुल पीसि ताकसेक होन,” इंचि इत्तोर.

9 येसु ओन अल्हा इत्ता इन्मळे आ मनकल बेस आतोर. आसि, ओना कटुल पीसि ताकसेक होत्तोर. इद गटना यहुदिलकुना नोमकेम रोजुननाड जर्गता.

10 अदुनहाटी बिमारताल बेस आता मनकन, “नोमकेम रोजुने निमे इल्हा कटुल तेहचि ताकमळ मावा दर्मसास्त्रम परकारम न्यायम आयो,” इंचि यहुदि पेद्दाल्क इत्तुर.

11 जवाबुने आ मनकल, “नाकुन बेस कीतोर, नाकुन नीवा कटुल पीसि ताकसि होन इत्तोर,” इंचि वेहतोर.

12 अस्के “नीकुन कटुल पीसि ताका इंचि वेहतोर, ओर बोर आंदुर?” इंचि यहुदि पेद्दाल्क ओन पूसकीतुर.

13 गानि अगा वेल्लेन मंदि मत्तुर, येसुगुडा अगटाल पेय्शि होत्तोर. अदुनहाटी ओन बेस कीतोर बोर आंदुर इंचि, आ बेस आता मनकंकगुडा तेळिया हिल्ले.

14 इदंता आतंका येसु आ मनकंक गुळिते कलियसि, “हळा, निमे इंदके बेस आतिन! मरां पापि कबाहकुना जोलिक होन्मा. होत्तिनित्ते दीनकन्ना एक्को बिमार अरंतिन,” इंचि वेहतोर.

15 पजा आ मनकल यहुदिलकुना पेद्दाल्कुंक कलियसि, “नाकुन बिमारताल बेस कीतोर, येसु आंदुर,” इंचि वेहतोर.

16 येसु इसौटा कबाहक नोमकेम रोजुननाड कीतोर इंचि यहुदि पेद्दाल्क येसुन तकलिप कियालय दल्यातुर.

17 अस्के येसु ओर्कुन, “ना बाबाल बस्केळ्ळक कबळ कीसेकेने मनंतोर. अदुनहाटी ननागुडा कबळ कीसेकेने मनंतन,” इंचि इत्तोर.

18 येसु इल्हा इत्ताहेंका यहुदि पेद्दाल्क ओन हळ्कालय उंदे पट्ट पीतुर. बारित्ते नोमकेम रोजुने कबळ कियानायो इत्ता नियमतुन ओर हेळाहतोर. आनि पोरोटाल, पेनदुन “ना बाबाल,” इंचि वेहचि “नना पेनदुक समानमतोन” इंचि ओनद ओरे वेहकुत्तोर.

येसुनगा पेनदा अदिकारम मंता

19 अस्के येसु ओर्क इल्हा वेहतोर: “नना मीकु निजम-निजम वेहचंतन, मरिं ओनद-ओर बतले कियोर. गानि बाबो बतल-बतल अय्ते कीतोर, बाबो कियनदुन हळसि मरिं अल्हेन कीतोर.

20 मरिनपोरो बाबोक वेल्लेन पावरम मंता, अदुनहाटी ओर कियानव अन्नि कबाहकुन ओना मरिंक हूपिच्चंतोर. वायना रोजकुने इवुकन्ना पेद्दा-पेद्दा कबाहक कीसि मरिंक हूपसना मंता. अस्के मिमेट हळसि अंतोर इचंत्रम आकिर.

* 5:3-4 इद वचनम कोनि पांडु लिपिने हिल्ले.

21 बल्हा अय्ते बाबो हातोर्कुन मर्रा जीवाते तेहंतोरो, अल्हेन मर्रिगुडा ओन्क इस्टमातोर्कुन मर्रा जीवाते तेहंतोर.

22-23 बाबोनद अंटोर कदर कीतुर. अल्हेने मर्रिना कदरगुडा अंटोर लोकुल्क कियना इंचि बाबाल बोनदे न्यायम कियाकोटा, न्यायम कियना पूरा अदिकारम मर्रिक हीतो. मर्रिना कदर बोर किय्युरो, ओर मर्रिन लोहचीता बाबाना कदरगुडा किय्युर.

24 नना निजम-निजम वेहासेक, बोर अय्ते नना वेहना पोल्लेन केंजसि नाकुन लोहतोना पोर्री विस्वासम ईर्तोर, ओन्क बस्केळक पिस्सना पिस्वर दोर्कता. पेन ओन्क सिक्साता आदेस हि्य्यो, ओर हामुरताल पेय्सि पिस्वरतुन संपादिचकुंतोर.

25 नना निजम-निजम वेहासेक, हासोत्तोरगुडा पेनदा मर्रिना अल्किर केंजना वेला वासेक मंता. अद अय्ते वासे मंता. बोर अय्ते अद अल्किरतुन केंजांतुर, ओर्क पिस्वर दोर्कार.

26 बल्हा अय्ते पेनबाबाल कुद्दु पिस्वरता मालक आंदुर, अल्हेन मर्रिनगुडा पिस्वरता मालक कीतो.

27 इचोने आयाका, पेनबाबाना मर्रि मनकना रूपमते पुटताहाटीं ओन्क लोकुल्कुना न्यायम कियना अदिकारम हीतो.

28 मिमेट इदुन केंजसि इचंत्रम आयमट. बारित्ते मुन्ने इसोटा वेला वायनद मंता गदा, हातोरो अंटोर पेनदा मर्रिना अल्किर केंजानुर.

29 पजा बोर अय्ते बेस पुन्नेम कबाहक कीतुरो ओर अंटोर बस्केळक पिस्सना पिस्वरहाटीं मर्रा जीवाते तेदानुर. आनि पापि कबाहक कीतोरो बोर सिक्साताहाटीं मर्रा जीवाते तेदानुर.

30 नावद नना बतले किया पर्रीन. पेनबाबानाहेंदाल केंजतापे न्यायम कीतन. नना नावा इच्चातुन पूरा कियालय वाया हिल्लेन, नाकुन लोहचीता पेनबाबाना इच्चातुन पूरा कियालय वातन. अदुनहाटीं नना कियना न्यायम सत्तेम मंता.”

येसु गवाइ वेहांतोरो

31 “नावा बारेमते ननाने गवाइ वेहकुल्ले, नावा गवाइ निजमतद आयो.

32 गानि नावा बारेमते गवाइ वेहालय इंकावरोर मंतोर. ओर वेहना गवाइ सत्तेम इंचि नाक एरपाट मंता.

33 मिमेट मीवा मनकालोर्कुन योहाननेके लोहतिर. ओर मीकु सत्तेमता गवाइ वेहतुर.

34 मीकु मुक्ति दोर्कगोम, इंचि इव पोल्लें नना मीकु वेहासेक मंतन अचोने. गानि नावा बारेमते लोकुल्कुना गवाइता अक्सरम नाकु हिल्ले.

35 योहान वेडसिलेहका पोत्सि मीकु वेलगु हीतो. मीकुगुडा गडसेमताहाटीं आ वेलगुने कूस मनालय बेस अनपिस्ता.

36 गानि योहानुना गवाइकन्ना पेद्दा गवाइ नहगा मंता. बारित्ते पूरा कियनाहाटीं पेनबाबाल नाकु हीता कबाहक आनि नना कियना कबाहक. इवे पेनबाबाल नाकुन लोहतोर इत्तादांकु गवाइ मंता.

37 नाकुन लोहचीता पेनबाबाल कुद्दु नावा बारेमते गवाइ वेहतोर. गानि मिमेट बस्केने ओना अल्किर केंजा हिल्लिर, बस्केने ओना रूपमतुन हळा हिल्लिर.

38 अचोने आयका ओर लोहतोना पोर्री मिमेट विस्वासम ईर्वाहेंका, ओर कराहता पोल्लें मीवा मनसुना लोप्पो मना पर्री.

39 बस्केळक पिस्सना पिस्वर दर्मसास्त्रमहेंदाल दोर्कता इंचि मिमेट अव्टे पहकट, अदे दर्मसास्त्रम नावा बारेमते गवाइ वेहचंता.

40 अयना, बस्केळक पिस्सना पिस्वरहाटीं मिमेट नहगा वायालय हळिर.

41 नना मनकालोराहेंदाल कदर कोरोन.

42 बारित्ते मिमेट बसंतोर आंदिरो नाकु एरपाटे. मीलोप्पो पेनदाहाटीं पावरम हिल्ले.

43 नना नावा बाबाना पोरोल्ले वातन, गानि मिमेट नाकुन स्विकार किया हिल्लिर. गानि बोरन्ना व्हेतोरो, ओना पोरोल्ले ओरे वायानय्ते मिमेट ओन स्विकार कीतिर.

44 मीवद मिमेटे कदर कीकुनमळ इते मीकु वेल्लेन इस्टम. गानि पेनदाहेंदाल दोर्कना कदरतुन मात्रम बोरें पहका हळिर. असोंटस्के मिमेट नापोरो बल्हा विस्वासम किया परांतरि?

45 बाबाना मुन्ने नना मीपोरो तप्पु दोसतन इंचि इनकुन्मट. मिमेट अयते मूसाना पोरो आसे पडसि मनंतरि, आ मूसाले मीवापोरो तप्पु दोसंतोर.

46 मिमेटगिंटा मूसान पोरो विस्वासम कियानयते, नावापोरो इंका विस्वासम कीतिर, बारित्ते मूसाल नावा बारिमते रासतोर.

47 मूसाल रासता पोल्लेन पोरोगुडा मीवा विस्वासम हिल्ले अयते, नावा पोल्लेन मिमेट बल्हा नमकिर?" इंचि येसु इत्तोर.

6

येसु हेय्युं वेय्कुना मंदिक गाटो दोसमळ

(मत्तयाल 14:13-21; मरकुस 6:30-44; लूकाल 9:10-17)

1 अद आता पजा येसु गालिल इनना समुद्रमतुन* दाटसि हब्बेर ओड्डुंक होत्तोर.

2 बिमार मत्तोर्कुन बेस कीसि येसु इंचत्रम आयाना कबाहक कीतोर. आ कबाहकुन हळसि, वेल्लेन मंदि ओना पज्जो-पज्जो वासेक मत्तुर.

3 पजा येसु गुट्टापोरो एकसि, अगा ओना सिस्युल्कुनतोनि उदूतोर.

4 अव रोजकुने यहदिलकुना दाटसि होनना पंडुगु दग्गेर्क एवसि मत्ता.

5 पजा येसु अगटाल हळतोरयते, वेल्लेन मंदि ओनहेके वायनद ओन्क दिसतुर. अस्के, "ईरकु अंतोर्क तिनालय तिडि मनम बगाटाल अस्सि तरकोम?" इंचि पिलिपुन पूसकीतोर.

6 येसुं अन्नि एर्के मत्ता गानि पिलिपुना परिकसा हळालय, ओन इसोंटा सवाल पूसकीतोर.

7 अस्के पिलिपु, "ईराहाटी रोंड न्हकु एंडि स्पेना" हारि अस्सि तच्चि तासिना, वरो-वरोक उंद-उंदि मुक्कागुडा एव्वा परो," इंचि जवाब इत्तोर.

8-9 अस्के येसुना सिस्युल्कुनाल वरोर सिस्युड, सिमोन पन्नना तम्मुर अंदरियल‡ इनानोर, "इगे वरोर सिन्ने पेडानगा हेय्युं जोन्ना हारि, रोंड बोळस्ता जिम्मां मंतां, गानि इच्चा वेल्ले मंदिक इव बगा हालनूं?" इंचि येसुन इत्तोर.

10 अस्के येसु, "अंतोर लोकुल्कुन उदूदालय वेहाट," इंचि इत्तोर. अगा वेल्लेन पच्चाटा जाडि मत्ता. अगा उदतोरव्टेटाल दग्गेर-दग्गेर हेय्युं वेय्कुना मंदि मांडुसे मत्तुर.

11 पजा येसु आ हारिन कय्दे पीसि पेनदुक दन्यवाद कीतोर. पजा आ हारिन उदूतोर अंतोर्क वाटालय ओना सिस्युल्कुंक हीतोर. जिम्मानगुडा अल्हेन कीतोर. अंतोर पीरनिंडा तित्तुर.

12 ओर अंतोर पीरनिंडा तित्तंका, "बतंगे उततगा पोच्चमन्नि, मिगुल्लतव अन्नि जमा कीम्तु," इंचि येसु सिस्युल्कुंक वेहेतोर.

13 तिनालय लोकुल्कुंक हीता हेय्युं हारिनाल मयतव तुकडें जमा कीते, पन्नेंड तट्टां निडतां.

14 येसु कीता इसोंटा अदूबूतामाता चिन्हतुन हळसि लोकुल्क, "निजमे! इद दुनियाते वरोर पेनदा कबुरतोर वायानोर मत्तोर, ओर ईर आंदुर,"* इंचि इनालय दल्लुगुतुर.

15 पजा लोकुल्क ओन राजाल कियालय बल्हैना बल्मि कीतुर, इंचि ओन्क तेळियता. अदुनहाटी ओर वरोरें मरा गुट्टातेके पेय्सि होत्तोर.

येसु एतापोरो ताकंतोर

(मत्तयाल 14:22-27; मरकुस 6:45-52)

16 नुल्पेटा वेलाक येसुना सिस्युल्क गालिल समुद्रमता ओड्डुंक होत्तुर.

* 6:1 गालिल इनना समुद्रम इद उंदि पेदूदे सेरूव आंद. दीन तिबेरिया समुद्रमगुडा इंतुर. † 6:7 रोंड न्हकु एंडि स्पे मना कोत्तना लेक्काते, वरोर कुलिगाना एनिमिदि नेल्कुना जीतमतच्चोन आंता. ‡ 6:8-9 अंदरियल ईर सिमोन पन्नना तम्मुर आंदुर.

* 6:14 च्ववस्ताविक्कन 18:15-18

17 हीकट अयनागानि येसु वायाहिल्लोर इंचि सिस्स्युल्क उंदि डोंगाते उद्दिदस समुद्रमता हब्बेटा बाजुंक मनना कपर्नाहुम इनना सहर होनालय पेय्स्तुर.

18 वळि इग्गा वासेक मत्ताहेंका समुद्रमते पेद्दा-पेद्दा तडां तेदसेक मत्तां.

19 ओरा डोंगा हेय्युं-हारुं किलोमिटरक मुन्ने होत्ता बारे, अचानक येसु एतापोर्रो ताकसेके डोंगा दगोरा वायानद ओर ह्ळसि, इग्गा वेरियतुर.

20 गानि येसु, “ननाने आंदुन! वेरियमट,” इंचि ओर्कुन इत्तोर.

21 इत्तारित्ते ओर कूस आसि, येसुन डोंगाते उपिच्छुकुनालय तयार आतुर. अच्चोटेन ओर बगा अयते होनालय पेय्स्तुर अद जेगातगा ओरा डोंगा एवता.

लोकुल्क येसुन पहकंतुर

22-23 येसु सामि पेनदुक दन्यवाद कीसि, अंटोर्क हारिं हीता जेगातगा ओन्क कलियालय लोकुल्क इंकुंदि रोजु पंगासि जमा आयालय दल्गतुर. अगा सिराप उंदे डोंगा मत्ता. अद डोंगाते अयते सिराप ओना सिस्स्युल्के उद्दिदस होत्तुर. येसु ओरतोनि होना हिल्लोर. इंचि आ लोकुल्कुंक एरपाटे मत्ता. गानि पज्जोताल तिबेरिया नाटेनाल वेरे इच्चुं डोंगां अगा वासि मत्तां.

24 पजा आ लोकुल्क येसुन, ओना सिस्स्युल्कुन पहकतुर, गानि ओर्क बोरे दोर्का हिल्लुर. अदुनहाटी ओर लोकुल्क अगा मत्ता डोंगाने उद्दिदस येसुन पहकालय कपर्नाहुम होत्तुर.

पिस्वर हियना तिंदि येसु आंदुर

25 पजा लोकुल्क हब्बेर ओड्डु एवतंका येसुन अगा ह्ळसि, “रब्बी! निमे इगे बस्के वातिन?” इंचि पूसकीतुर.

26 अस्के येसु इल्हा वळकालय दल्गतोर: “नना निजम-निजम वेहासेक, नना कीता अदूबतामाता चिन्हन ह्ळसि मिमेट नाकुन पहकसेक हिल्लिर. नना मीकु पीरनिडा तिंदि तासतन इंचि नाकुन पहकसंतिर.

27 हवसोननसोंटा तिंदि पज्जो मिमेट होनमट. दानकु बद्दुल, बस्केळ्क पिस्सना पिस्वर हियानद, बस्केने हव्वाकोंटा मनना तिंदिंतुन पहकट. अदुन हियना अदिकारमता सिक्का पेनबाबाल नापोर्रो वाटतोर, अदुनहाटी असोंटा तिंदि, मनकना रूपमते पुटतोन नना, मीकु हिया परांतन.”

28 अस्के लोकुल्क, “अयते पेनदा कबळ कियालय, मोमोट बतल कियना?” इंचि येसुन पूसकीतुर.

29 पूसकीतस्के, “पेन बोन अयते लोहतनो, ओनपोर्रो मिमेट विस्वासम इरंट,” इंचि येसु जवाब हीतोर.

30-31 पजा लोकुल्क, “मावा एनकटा पेद्दाल्क इजिप्त देसेमताल वायनेके बय्लि जेगातगा मन्ना इनना तिंदि तित्तर. ओर्क तिनालय तिंदि मूसाल स्वर्गमताल हीतोर, इंचि दर्मसास्त्रमते रासि मत्तापे ओर्क आ तिंदि तिनालय दोर्कुता. अयते मोमोट नीपोर्रो विस्वासम इरल्य इंदके निमे माकु बसोंटा चिन्ह हुप्संतिन?” इंचि पूसकीतुर.

32 अस्के येसु, “नना निजम-निजम वेहासेक, स्वर्गमताल तिंदिंतुन मीकु हीतोर मूसाल आयोर, नावा बाबाल हीतोर. इंदके नावा बाबाल स्वर्गमताल वायना आ निजमाता तिंदिंतुन मीकु हीसंतोर.

33 बारित्ते पेनबाबाल स्वर्गमताल लोहतदे, इद दुनियातोरक पिस्वरतुन हीता. पेनबाबाल लोहचीता निजमाता तिंदि अदे आंद,” इंचि वेहतोर.

34 अस्के लोकुल्क, “अयते अद तिंदिंतुन माकु बस्केळ्क हीम सामि,” इंचि इत्तुर.

35 अस्के येसु ओर्क इल्हा वेहालय दल्गतोर, “पिस्वर हियना तिंदि ननाने आंदुन. नहगा बोर अयते वांतुर, ओर्क बस्केने करवेस्सो. बोर अयते नापोर्रो विस्वासम इरंतुर, ओर्क बस्केने दूपा आयो.

36 गानि नना मीकु मुन्नेन वेहताप, मिमेट नाकुन ह्ळसिगुडा नावापोर्रो विस्वासम इरा हिल्लिर.

37 अयना बाबाल बोर-बोर्कुन अयते नाकु अप्पजेपंतोर, ओरे नहगा वांतुर. नहगा वायानोर्कुन नना बस्केने मलाहचि लोहोन.

38 बारित्ते नना नावा इच्चां पूरा कियालय स्वर्गमताल हिळु रेय्मि वाया हिल्लेन. नाकुन लोहतोना इच्चातुन पूरा कियालय नना वातन.

39 नाकुन लोहतोना इच्चा बतल इत्ते, नाकु अप्पजेपतोर्कुन वरोरगुडा तप्सोनाकोटा हळना आनि आकिरता रोजु ओर्कुन मरा जीवाते तेहना.

40 नावा बाबाना इच्चा बतल मंता इत्ते, मरिनेके हळसि ओनपोरो विस्वासम कियानोर अंटोर्क बस्केळक पिस्सना पिस्वर दोर्कना. अल्हा बोर अयते विस्वासम ईरतुरो, ओर्कुन नना आकिरता रोजुने मरा जीवाते तेहांतन,” इंचि येसु ओर्क वेहतोर.

41-42 “स्वर्गमताल रेयता तिडि ननाने आंदुन,” इंचि येसु इत्तस्के यहूदि पेद्दाल्क ओरद ओरे येसुना बारेमते, “अरे! ईर योसेप इनानोना मरि आयोरा! ईना तल्लुर-बाबो मनाकु एरपाट. अयते ईर, नना स्वर्गमताल वातोनांदुन, इंचि बल्हा इंचंतोर?” इंचेके गुल्गालय दल्यातुर.

43 अस्के येसु ओर्कुन इल्हा इत्तोर, “मीवद मिमेटे गुल्गानुनमत.

44 नाकुन लोहचीता बाबाल, बोना मनसुने अयते नहगा वायना इच्चातुन पुटसंतोरो, ओरे नहगा वांतुर. वेरे बोरे वाया पस्स. आकिर रोजुने नहगा वातोर्कुन ननाने जीवाते तेहांतन.

45 पेनदा कबुरतोरा पुस्तकाल्कुने, अंटोर लोकुलकुंक पेने कराहंता, ✪ इंचि रासि मंता. बोर अयते बाबाना पोल्लें केंजांतुर, करियांतुर, ओर अंटोर नहगा वांतुर.

46 पेनबाबान बोरे हळा हिल्लुर. नना अगटाल वातोनांदुन, ननाने हळतन.

47 नना निजम-निजम वेहासेक, नापोरो विस्वासम कीतोन्कु बस्केळक पिस्सना पिस्वर दोर्कते इनकुंट.

48 पिस्वर हियना तिडि ननाने आंद.

49 मीवा एनकटा पेद्दाल्क बय्लि बूमिते पेन अरहता मन्ना इनना तिडि तित्तुर गानि हातुर.

50 गानि स्वर्गमताल हिळु वाता तिडितुन तित्तोर, बस्केने हायो.

51 स्वर्गमताल वाता जीवाते मनना तिडि ननाने आंद. बोर अयते ई तिडितुन तित्तुरो, ओर बस्केळक जीवातेन मनांतोर. ई तिडि ना मेंदुल आंद, नना इद मेंदुलतुन दुनियातोरा पिस्वरताहाटी हीतन,” इंचि इत्तोर.

52 इद केंजसि यहूदिल्क, “ओर मनकल ओना मेंदुलतुन मनाकु तिनालय बल्हा हिया परंतोर आयो?” इंचि ओरद-ओरे वदुरकुनालय दल्यातुर.

53 अस्के येसु, “हिके केंजट, निजम नना वेहांतन. मिमेट, मनकना रूपमते पुट्तोना, मेंदुलतुन तिन्वा, ओना नेत्तुरतुन उन्वा, मीकु पिस्वर हिल्ले.

54 गानि बोर अयते नावा मेंदुलतुन तित्तुर, नावा नेत्तुरतुन उंटुर, ओर्क बस्केळक पिस्सना पिस्वर दोर्कता. आकिर रोजुने ओर्कुन नना जीवाते तेहांतन.

55 बारित्ते नावा मेंदुल निजमाता तिडि आनि नावा नेत्तुर निजमाता उनानद आंदु.

56 बोर अयते नावा मेंदुलतुन तित्तुर, नावा नेत्तुरतुन उंटुर, ओर नातोनि, नना ओरतोनि निलसि मंनंतन.

57 नाकुन लोहता जीवाते मनना नावा बाबाना ताकततोनि, नना जीवाते मंतन. अल्हेन बोर अयते नावा मेंदुलतुन तित्तुर, ओर नाहेंदाल जीवाते मनांतुर.

58 स्वर्गमताल हिळु वाता निजम तिडि ननाने आंदुन. मीवा एनकटा पेद्दाल्क मन्ना इनना तिडि तिचिगुडा हातुर, गानि इद तिडितुन तिनानोर मात्रम बस्केळक जीवाते मनांतुर,” इंचि येसु ओर्क वेहतोर.

59 कपर्नाहूम सहरता दर्मसास्त्रम कराहना लोते, कराहनेके येसु इव पोल्लें वेहतोर.

वेल्लेटुर सिस्युल्क येसुन होळसीतुर

60 इव पोल्लेँ केंजसि, येसुना सिस्स्युल्कुनाल वेल्ले मंदि सिस्स्युल्क, “इव पोल्लेँ तेळियालय वेल्लेन कस्टम मंता, इवुन बोर केंजंतुर?” इंचि इनालय दल्गतुर.

61 सिस्स्युल्क गुल्गकुंचंतुर इंचि येसु एरपाट कीसि ओरतोनि इल्हा वळकालय दल्गतोर, “मीकु इव पोल्लेँ केंजसि, कस्टमासंतना?

62 अय्ते मनकना रूपमते पुटतोन नना, मुन्ने बगा मत्तन अगा मल्सि होननेके ह्ळानय्ते, अस्के मिमेट बतल इंदकिरो मरि?

63 मेंदुल पिस्वर हिया परो, दानकु बतल विल्लुवा हिल्ले. सिराप पेनदा आत्मे पिस्वर हीता. नना वेहना पोल्लेँगेँ आत्मा आनि पिस्वर आंद.

64 गानि मीलोप्पो इच्चुर नावा पोल्लेन नमवोरगुडा मंतुर,” इंचि इत्तोर. बारित्ते, ओन नम्मनोर बोर, ओन वैरे लोकुल्कुंक पीसि हियानोर बोर? इत्तद येसुंक मुन्नेटाले एर्का मंता.

65 पजा येसु, “नना मीकु वेहचि मत्तन गदा, बाबाल लोहवद बोरे नहगा वाया पस् इंचि. अदुनहाटीगे इव अन्नि पोल्लेँ नना मीकु वेहतन,” इंचि इत्तोर.

66 अस्केटाल वेल्लेटुर येसुना सिस्स्युल्क येसुन होळसि मल्सि होत्तुर, मर्रा बस्केने ओना पज्जो होना हिल्लुर.

67 अदुनहाटी येसु पन्नेंड सिस्स्युल्कुन, “मिमेटगुडा मल्सि होनालय ह्ळसतिरा?” इंचि पूसकीतोर.

68 अस्के सिमोन पत्रु, “सामि, मोमोट इंका बोनगा दाकोम? बस्केळ्क पिस्सना पिस्वर हियना पोल्लेँ अय्ते निहागेन मंता!

69 पेन लोहता पवित्रुन निमेन आंदिन इंचि मोमोट विस्वासम कीसि एरपाट कीतोम,” इंचि इत्तोर.

70 अस्के येसु, “मीकुन पन्नेंड मंदितुन ननाने पेरतन, अय्नागानि मी अव्टे वरोर देय्यम मंतोर,” इंचि सिस्स्युल्कुन इत्तोर.

71 येसु इद पोल्ले इस्कारियोत नाटेना सिमोनना मर्रि यहूदाना बारेमते वळ्कतोर. पन्नेंड मंदि सिस्स्युल्कुनाल ओर वर्रोरे येसुन पज्जोटाल दोकाते पीसि हियनोर मत्तोर.

7

येसुन ओना तम्मुहकगुडा नम्मुर

1 इद आता पजा, येसु गालिलतेन नार-नार तिरियसेक मत्तोर. यहूदि पेद्दाल्क ओन ह्ळकालय पोचादोस्सि मत्ताहेंका ओर यहूदिया राज्येमते होना ह्ळा हिल्लोर.

2 गानि अद वेलाते यहूदिल्कुना डेराना पंडुगु दग्गेर्क एवसि मत्ता,

3 अदुनहाटी येसुना तम्मुहक येसुन, “निमे इगेटाल यहूदिया होन. अस्केन निमे कियना अद्बूतामाता कबाहक नीवा सिस्स्युल्क ह्ळा परांतुर.

4 बोर अय्ते ओना पोरोल दुनियाक तेळियगोम इंचि इंतोरो, ओर बतले कबळ मक्किस किय्योर. निमे निजमे इसोंटा अद्बूतामाता कबाहक कियानय्ते, दुनियातोर मुन्ने कीसि ह्पसा,” इंचि इत्तुर.

5 ओना तम्मुहकगुडा ओन नम्मा हिल्लुर, अदुनहाटी ओर अल्हा इत्तुर.

6 अस्के येसु, “मीकु अय्ते अन्नि वेलां मंचिये, मिमेट बस्के इत्ते अस्के अगा होना परांतिर. गानि नना अगा होनना वेला इंका एव्वा हिल्ले.

7 दुनियातोर मीकुन हय्साकॉटा मना पस्. गानि नना दुनियातोर कबाहक बेसतव आय्यो इंचि दुनियातोर विरोदमते गवाइ हीतन, अदुनहाटी नाकुन दुनियातोर हय्सुर.

8 मिमेट पंडुगुंक होंट. नना वायना वेला इंका एव्वा हिल्ले, अदुनहाटी इद पंडुगुंक नना वासेक हिल्लेन,” इंचि येसु ओर्क वेहतोर.

9 ओर्क इव पोल्लेँ वेहचि ओर गालिलतेन मत्तोर.

10 गानि ओना तम्मुहक पंडुगुंक होतंका, पज्जोउटाल येसुगुडा अंटोर्क दिस्सेक आयो, गानि चुपचाप पंडुगुंक होतोर.

11 यहुदि पेद्दाल्क पंडुगुनगा, “ओर बगा मंतोर?” इंचेके ओन पहकालय दल्गतोर.

12 अद मंदिताल इच्चुर लोकुल्क बारे येसुना बारेमते, “ओर बेस मनकल आंदुर,” इंचि इनुंदुर. इकिच्चुर बारे, “हिल्ले रो! ओर लोकुल्कन गयबेत कीतोर,” इंचि गुसा-गूसा वळ्ळकुकुनुंदुर.

13 गानि यहुदि पेद्दाल्कुना वेंरेकु बोरे लोकुल्क येसुना बारेमते कुल्ला-कुल्ला वळ्ळकाकोंदुर.

पंडुगु जग्निके येसु कराहंतोर

14 पजा पंडुगु सुस्व आसि सगम पोळ्द आतंका, येसु गुळिते होंचि कराहलय दल्गतोर.

15 ओर कराहनदुन केंजसि यहुदि पेद्दाल्क, “ई मनकल अय्ते बदे इस्कुलते, बोरे गुस्नगा होंचि करिया हिल्लोर. अयना ईन्कु इच्चोन वेल्ले तेल्वि बगाटाल वाता?” इंचेके इचंत्रमते अरतुर.

16 अस्के येसु ओर्क इल्हा जवाब हीतोर, “नना कराहना पोळ्ले नावां आयो, नाकुन लोहचीता पेनदव आंदुं.

17 मीवा लोप्पोटाल बोरे आयिर, पेनदा इच्चा मत्ताप ताकतन इनकुनानय्ते, नना कराहना पोळ्ले नहगटाल वासंतंगा हिलाकोटे पेनदागटाल वासंतंगा, इंचि ओन्क तेळियंता.

18 बोर अय्ते ओना सतता पोळ्ले कराहंतोरो, ओर ओना पोरोल्लुने पेद्दा कियालय हळ्ळंतोर. गानि बोर अय्ते ओन लोहतोन्कु कदर दोर्कना इंचि इनकुंतोरो, ओर सत्तेम मनकल आंदुर, ओनगा बतले आबद्दम हिल्ले.

19 मूसाल अय्ते मीकु दर्मसास्त्रमतुन एव्विचि हीतोर. गानि मिहागटाल वरोरगुडा अवेट्टा नियमकुनपोरो ताकसेक हिल्लिर. अय्ते बारि नाकुन हक्कालय हळ्ळसंतोर?” इंचि येसु इत्तोर.

20 अस्के लोकुल्क, “नीकुन देय्यम पीताना बतला, अल्हा वळ्ळकसतिन! बोर नीकुन हक्कालय हळ्ळसंतुर?” इंचि येसुंक जवाब हीतुर.

21 अय्ते येसु इल्हा वळ्ळकालय दल्गतोर, “नोमकेम रोजुननाड नना उंदि अद्बूतामाता कबळ कीतदुन हळ्ळसि, मिमेट अंतोर वेल्लेन इचंत्रमते अरतिर.

22 कतना* कियना इंचि मीकु मूसाल वेहचि मत्तोर. असल निजम हळ्ळते, ई कतना रिवाज मूसाल सुस्व किया हिल्लोर. अद एनकटा पेद्दाल्कुनगटाल वाता. मिमेट अय्ते कतना कियना वेला वातस्के, नोमकेम रोजुननाडगुडा मीवा मर्कुना कतना कीतिर.

23 मूसाना नियम तप्पानायो इंचि, नोमकेम रोजुननाड बोनादन्ना कतना कियना वेला वायानय्ते मिमेट ओना कतना किया वच्चु. गानि अदे नोमकेम रोजुने नना वरोर मनकन पुरागा बेस कीते, मीकु नापोरो होंग बारि वायना?

24 मोकोम हळ्ळसि न्यायम कियमट, निजम-निजम न्यायम कीम्टु,” इंचि येसु इत्तोर.

येसु बोर आंदुर?

25 अस्के येस्सलेमतोर इच्चुर लोकुल्क, “यहुदि पेद्दाल्क बोन अय्ते हक्कालय हळ्ळसंतुरो, ओर ईर अय्ते आयोर गदा!

26 हळ्ळट, ओर लोकुल्कुना नड्डुम नित्तिसि बल्हा कुल्लम-कुल्ला वळ्ळसंतोर! अयनागानि ओन बोरे बतल इंचेक हिल्लुर. ईर किरिस्तु इंचि, मना पेद्दाल्कगुडा निजम एरपाट कीतुर बारे!

27 किरिस्तु वायनेके ओर बगाटाल वांतोर, बोनेके तेळियो. गानि ईर मनकल बगाटाल वातोर, मनाकु अंटोर्क एरपाटे मंता.” इंचि ओर वरोंक-वरोर वळ्ळकालय दल्गतुर.

* 7:22 कतना यहुदि आनि मुसलमान लोकुल्कुनद इद उंदि रिवाज आंद. इद रिवाज परकारम उळ्ळकानगटा कोस्सा तोल्लदुन कोय्यांतुर. इंसंटा रिवाज कीते पेनदातोनि करार कीताप इंचि ओर नम्मंतुर.

28 येषु गुळितगा कराहनेके इल्हा वळकालय दल्गतोर, “हो! नना बोन आंदुन, बगाटाल वातन इदंता मीकु एरपाटे मंता. गानि नावद ननेन इगे वाया हिल्लेन. नाकुन लोहतोर सत्तेमंतुड आंदुर, ओर बोर आंदुरो मीकु एरपाट हिल्ले.

29 गानि नना ओन एरपाट कीतन. बारित्ते ओरे नाकुन लोहातोर, नना ओनागटाले इगे वातन,” इंचि लगांचि वेहतोर.

30 पजा यहुदि पेद्रुदाल्क येषुन दोर्का पियालय हळतुर. गानि अस्केळ्ळक ओना वेला एव्वका मत्ता. अदुनहाटी वरोरगुडा ओन्क कय दोस्सा पराहिल्लोर.

31 अथना गुळितगा मत्ता मंदिताल वेल्लेटोर येषुन नमतुर. नम्मिसि, “किरिस्तु वातस्के, ईनकन्ना एक्को अद्रूबूतम आयना कबाहक कियनुरा?” इंचि ओर वळकालय दल्गतुर.

यहुदि पेद्रुदाल्क येषुन दोर्का पियालय हळांतुर

32 लोकल्क येषुना बारेमते इसोंटा पोल्लें गुसा-गुसा वळकानेंके परिसिल्कां केंजतुर. केंजसि पेर्मालोक आनि परिसिल्क येषुन दोर्का पियानाहाटी गुळितगा कावेल कीसेक मत्ता सिपाइल्कुन लोहतुर.

33 अस्के येषु ओर्क, “इंका जेरासेप नना मीतोनि मनंतन, पजा नाकुन लोहतोनगा नना तिरियसि दांतन.

34 मिमेट नाकुन पहककिर, गानि मीकु दोर्कोन. इंका नना मनना जेगातगा मिमेट वाया परिर,” इंचि वेहतोर.

35 अल्हा वेहाटेलक, यहुदि पेद्रुदाल्क ओरद-ओरे, “मनम पहकिना गानि दोर्काकोटा ओर बगा दांतोर आयावच्चु? युनानि देसेमते होंचि, सिल्लर-सल्लर आसि मनना मना लोकल्कुंक पेनदा पोल्लें अयते करहोर गदा! हिलाकोटे युनानि लोकल्कुनगा दांतोरा?

36 ‘मिमेट नाकुन पहककिर, गानि मीकु दोर्कोन. इंका नना मनना जेगातगा मिमेट वाया परिर,’ इंचि इत्ता पोल्लेंक अर्तम बतल आयावच्चु?’ इंचेके वळककुनालय दल्गतुर.

येसुन नम्मूर्तोक पेनदा आत्मा दोर्कता

37 अद पंडुगुना आकिरता रोजूकु वेल्लेन विल्लवा मनंता. अद रोजूने येषु नित्तिसि, “दूपातोर नहगा वासि उंडावच्चु.

38 दर्मसास्त्रमते रासि मत्ताप, नापोर्रो विस्वासम कीतोना लोप्पोटाल पिस्वर हियना एता बैरेह्क पोगुं,” इंचि लगांचि वेहतोर.

39 येषुनपोर्रो विस्वासम कीतोर्क पेनदा आत्मा दोर्कनद मत्ता. अदे आत्माता बारेमते वेहालय येषु इव पोल्लें वळकतोर. येषु हासि मर्रा महिमाते तेदानदे मत्तोर. अदुनहाटी पेन अदवेरदाका अद आत्मातुन बोर्के हिय्या हिल्ले.

40 इव पोल्लें केंजतोर इच्चुर लोकल्क, “निजमे! बोर पेनदा कबुरतोर अयते वायनद मत्तोर, ओर ईरे आंदुर,” इंचि इत्तुर.

41 इकिच्चुर बारे, “ओर किरिस्तु आंदुर,” इंचि इत्तुर. आनि इकिच्चुर लोकल्क, “अरे! गालिल एरियाताल किरिस्तु वांतोरा?

42 ‘किरिस्तु दाविद राजाना वंसंमते पुट्रिस, दाविद राजाल पुट्टा बेतलहेम नाटेनाले वांतोर,’ इंचि दर्मसास्त्रमते रासि हिल्लेना!” इंचि इत्तुर.

43 येषुना बारेमते लोकल्कुंक रकारकाल्कुना विचाराल्क मत्ताहेंका, लोकल्क ओरद ओर्के अर्काकोटा आसि वेरे-वेरे आतुर.

44 इच्चुर ओन दोर्का पियालय हळतुर, गानि बोर वरोरगुडा ओनपोर्रो कय वाटा पराहिल्लुर.

† 7:32 परिसिल्क पेनदुन कस कियनाहाटी यहुदि लोकल्कुना अन्नि नियमाल्कुन आनि अन्नि रीति-रिवाजकुन कडक पालन किया पीता, इंचि ईर नम्मंदुर. ईरगुडा यहुदि लोकल्कुनाल उंदि मतमतोर आंदुर.

विस्वासम कियुवा यहुदि पेद्दाल्क

45 गुळितगा कावेल कियानोर बोर अय्ते येसुन दोर्का पियालय होत्तुर, ओर उत्ता कय्के मल्सि वातुर. अस्के, “मिमेट ओन बारि पीसि तराहिल्लिर?” इंचि पेद्दा पेर्मांलोर आनि परिसिल्क ओर्कुन पूसकीतुर.

46 अस्के आ कावेल कियानोर, “ओर वळ्कताप बोरे मनकल बस्केने वळ्का हिल्लोर,” इंचि जवाब हीतुर.

47 पजा परिसिल्क ओर्कु इल्हा जवाब हीतुर. “ओर मीकुनगुडा पसांच्तोरा?

48 यहुदि पेद्दाल्कुनाल आयि, परिसिल्कुनाल आयि, बोर वरोरन्ना ओन नम्मुतोर मंतोरा? बोरे हिल्लुर.

49 गानि येसुन बोर अय्ते नम्मुतुरो ओर्क मूसाना नियमकु तेळियों, ओर्क तप्पाकोंटा सापनेम दल्यांता,” इत्तुर.

50 अगा निकोदेमस पोरोलतोर वरोर मत्तोर, ओर मुन्ने उंदि मल्का येसुंक कलियसि मत्तोर. ओरगुडा आ परिसिल्कुनाल वरोर आंदुर.

51 अय्ते ओर, “वरोर मनकंक मनम ओना गवाइ केंजाकोंटेने, ओर बतल कीतोर तेल्लिचकुनाकोंटेने मना दर्मसास्त्रमता नियमकुना परकारम, न्यायम किया परांतोमा?” इंचि ओर्कुन पूसकीतोर.

52 अय्ते ओर, “अरेय, निमेगुडा गालिल एरियातोना रो? होन! होंचि दर्मसास्त्रमते बेस पहकिसि हदवा, गालिलताल बोरे पेनदा कबुरतोर वायोर इंचि रासि मंता,” इत्तुर.

बोगमतनम कीता मुरतटुन येसु मापि कीतोर

53 पजा ओर अंतोर ओरा-ओरा लोह्कुने होत्तुर.

8

1 गानि येसु जय्तुन मराकुना गुट्टतेके होत्तोर.

2 हक्केरेन मर्रा गुळितगा वातोर. वेल्लेन लोकुल्क ओनगा जमा आतुर. येसु उद्दिदस ओर्क कराहलय दल्यातोर.

3-4 ओर्क कराहसेके मननेकेन, बोगमतनम कियनेके दोर्कता उंदि मुरतटुन, दर्मसास्त्रम कराहना गुस्ल्क आनि परिसिल्क ओनगा पीसि तच्चि लोकुल्कुना मुन्ने निलाहत्तुर. निल्हाचि, “गुरु, इद मुरतटुन बोगमतनम कियानेके मोमोट दोर्का पीतोम.

5 इंसंटा मुरतटुन बंडाने तंचि हक्कना इंचि मूसाना नियम मनाकु आदेस हीता. अय्ते दीना बारेमते निमे बतल इतिन मरि?” इंचि येसुन पूसकीतुर.

6 ओर वळ्कानेके बतलन्ना तप्पु कीते ओन दोर्का पियना उपायमते, ओर असोंटा सवाल पूसकीतुर. गानि येसु हिळ्ळु वंगिसि बूमिपोर्री बतलो वेलुने रासालय दल्यातोर.

7-8 ओर उंदे हट्टु पीताहाटी, येसु तेदसि ओर्कुन, “सरे! बंडाने तनाट्ट. गानि मिहगटाल बोर अय्ते बस्केने पापम किया हिल्लोर, मुन्ने ओरे दीन बंडाते तनना,” इंचि वेहतोर. पजा मर्रा वंगिसि बूमिपोर्री वेलुने रासालय दल्यातोर.

9 दान तत्तोर अंतोर येसु इत्तदुन केंजसि, मोदाला मातरालोर आनि पज्जोटाल अंतोर वरोन पज्जो वरोर अगटाल पेय्सि होत्तुर. ओर अंतोर अगटाल होत्तस्के लोकुल्कुना नड्डुम सिराप येसु आनि आ मुरतळे मत्तुर.

10 पजा येसु इंकुंदि मल्का तेदसि, “बाई, नीकु सिक्साता आदेस हियानोर बेके होत्तुर? नीकु बोरे सिक्साता आदेस हिथ्या हिल्लुरा?” इंचि पूसकीतोर.

11 अस्के अद मुरतळ, “नाकु बोरे सिक्साता आदेस हिच्या हिल्लुर सामि!” इंचि इत्तस्के येसु, “ननागुडा नीकु सिक्साता आदेस हिच्योन. होन, इंका बस्केने पापम कियमा,” इंचि दान्क वेहतोर.*

येसु दुनियातोरक वेलगु

12 पजा येसु, “नना दुनियातोरहाटी वेलगु आंदुन. बोर अयते नावा पज्जो ताकंतोर, ओनगा पिस्वरताहेके ओयना वेळसि मनंता, अदुनहाटी ओर बस्केने हीकटते ताकोर,” इंचि वेहतोर.

13 अस्के परिसिल्क, “नीवा बारेमते निमेन गवाइ वेहकुंचंतिन, अदुनहाटी नीवा गवाइते सत्तेम हिल्ले,” इंचि येसुन इत्तुर.

14 अयते येसु ओर्क इल्हा जवाब हीतोर, “नावा बारेमते ननाने गवाइ वेहिनागानि, नावा गवाइ मात्रम सत्तेम आंद. बारित्ते, नना बगाटाल वातन, बगा दांतन, इत्तद नाक एरपाट मंता. गानि नना बगा वातन, बगा दांतन मीकु बतले एरपाट हिल्ले.

15 मिमेट मनकना बुद्धिदते न्यायम कीतिर, गानि नना बोनदे न्यायम किय्योन.

16 ओक्कला नना न्यायम कियिनागानि नावा न्यायम निजम मनंता, बारित्ते नना वरोने हिल्लेन, नाकुन लोहचीता ना बाबाल नाक तोळ मंतोर.

17 इव्वुरा गवाइ उंदि आते, अद गवाइ निजम मनंता इंचि मीवा मूसाना नियमतेन रासि मंता.

18 दीन परकारम, नावाहाटी नना वरोर गवाइ आनि नाकुन लोहचीता ना बाबल इंकावरोर गवाइ,” इंचि येसु इत्तोर.

19 इद केंजसि ओर, “नीवा बाबाल बगा मंतोर?” इंचि पूसकीतुर. अस्के येसु, “असल नना बोन, नावा बाबाल बोर? मीकु एरपाट हिल्ले. मिमेट नाकुन एरपाट कियानयते, ना बाबान इंका एरपाट कीतिर,” इंचि ओर्क वेहतोर.

20 येसु इव पोल्लें, गुळिता लोप्पो कोलतां वाटना जेगातगा नित्तिसि कराहनैके वळ्ळकतोर. अयनागानि ओन बोरे दोर्का पिया हिल्लुर. बारित्ते ओना वेला एव्वनदे मत्ता.

येसुना पोल्लें यहूदि पेद्रुदाल्कुंक अर्तमायों

21 पजा इंकुदि मल्का येसु ओर्कुन, “नना अयते होंचंतन. मिमेट नाकुन पहककिर. मिमेट मीवा पापाल्क मापि आयका मुन्नेन हाकिर. नना बगा अयते होंचंतन अगा मिमेट वाया परिर,” इत्तोर.

22 अस्के यहूदि पेद्रुदाल्क ओरद ओरे, “नना बगा अयते होंचंतन अगा मिमेट वाया परिर, इंचि बारि इंचंतोर मरि? ओक्कला ओना जीवातुन ओरे पोळागोटकुन्नोर गदा!” इंचि वळ्ळकालय दलगतुर.

23 पजा येसु ओर्कुन, “मिमेट हिळ्तोर आंदिर, नना पोरोटोन आंदुन. मिमेट इद दुनियातोर आंदिर, गानि नना आयोन.

24 अदुनहाटीगे, मिमेट मीवा पापाल्क मापि आयका मुन्नेन हाकिर, इंचि नना इत्तन. ओन ननाने आंदुन इंचि विस्वासम कियाकोटे, मिमेट मीवा पापाल्क मापि आयका मुन्नेन हाकिर,” इंचि इत्तोर.

25 अस्के ओर, “अयते निमे बोन आदिन मरि? माकु वेहा,” इंचि पूसकीतस्के येसु, “नना बोन इंचि मीकु मुन्नेटाल वेहचेके वातानो, नना ओने आंदुन.

26 मीवा बारेमते वळ्ळकालय, मीवा न्यायम कियालय, नहगा वेल्लेन पोल्लें मंतां. गानि नाकुन लोहतोर सत्तेमंतुड आंदुर, इंचि नना सिराप ओनागटाल केंजता पोल्लेंगें लोक्कुंक वेहचंतन,” इंचि इत्तोर.

27 गानि येसु ओना बाबाना बारेमते वेहतोर इंचि ओर्क इंकागुडा अर्तम आयाहिल्ले.

28 अदुनहाटी येसु, “मनकना रूपमते पुटतोन नाकुन, बस्के अयते वेलाड वाटमळ जर्गंतनो, अस्के, ओन ननाने आंदुन इंचि, मीकु एरपाट आयार. अचोने आयका, नना सतागा बतले कीसेक हिल्लेन, गानि बव पोल्लें अयते बाबाल नाकु कराहतोर, अवे पोल्लें नना वेहतन.

* 8:11 इव वचनाल्क कोन्नि पांडु लिपिने हिल्लें.

29 नाकुन लोहतोर नावा तोळ मंतोर. नना बस्केळ्ळक ओन्क कुसि हियना कबाहके कीतन, अदुनहाटीं ओर नाकुन बस्केने ओटिगा होळसोर,” इंचि वेहतोर.

30 ओना ई पोल्लें केंजतोर, वेल्लेटोरे ओन नम्मुर.

पापमताल पलाते अरना बारेमते येसुना कराहमळ

31 पजा येसु, ओनपोरों विस्वासम कीता यहुदिल्कुनतोनि, “मिमेट नना कराहता पोल्लें पीसि ताकानयते निजमे नावा सिस्थुल्क आंतिर.

32 अस्के मिमेट सत्तेमतुन एरपाट कीकिर, आ सत्तेमे मीकुन होळसार,” इंचि इत्तोर.

33 अस्के ओर, “मोमोट अयते अब्राहामुना वंसंमतोरम आंदुम, इदवेरदाका मोमोट इद बूमिपोरों बोनदे कय हिळु दासुल्क आसि मना हिल्लोम. अयते, अद सत्तेम मीकुन होळसार, इंचि निमे बल्हा इतिन?” इंचि येसुंक जवाब हीतुर.

34 अस्के येसु ओर्क इल्हा वेहतोर, “नना निजम-निजम वेहासेक, पापम कियना हरेक मनकल पापमता दासुडे.

35 वरोर दासि मनकल मालकुना लोतोरतोनि बस्केळ्ळक मन्नोर, गानि मालकुना मरिं मात्रम बस्केळ्ळक मनांतोर.

36 अदुनहाटीं पेनदा मरिं मीकुन पापमताल होळसीतेने, निजमते मिमेट पापमताल पलाते अरतिर.

37 मिमेट अब्राहामुना वंसंमतोर इंचि नाकु एरके. अयनागानि नावा पोल्लेंक मीलोप्पो जेगा हिलुवाहेंका मीवा लोप्पोटाल इच्चुर नाकुन हक्कालय हूळसंतिर.

38 नना नावा बाबानतोनि मत्तस्के बतल अयते हूळतनो, अदे मीकु वेहचंतन. आनि मिमेटगुडा मीवा बाबानहेंदाल केंजतद कीसंतिर,” इंचि इत्तोर.

39 अस्के ओर, “अब्राहाम मावा बाबाल आंदुर,” इंचि इत्तुर. पजा येसु, “हिल्ले! मिमेटगिंटा अब्राहामुना पिलाल्क आसि मत्ते, ओर कीतापे मिमेटगुडा कीसि मन्नेर.

40 गानि नना पेनदागटाल केंजता सत्तेम पोल्लें मीकु वेहते, मिमेट नाकुने हक्कालय हूळसंतिर. अब्राहाम अयते अल्हा किया हिल्लोर.

41 मिमेट मीवा बाबाल कीताप कीसंतिर,” इंचि इत्तोर. अस्के ओर, “मोमोट बोगमतनम कीते पुट्टा हिल्लोम! माकु वरोंरे बाबाल मंतोर, ओर पेनबाबाले,” इंचि येसुन इत्तुर.

42 अस्के येसु ओर्कुन इल्हा इत्तोर, “पेन मीवा बाबाल आसि मत्ते मिमेट नाकुन पावरम कीसि मन्नेर. बारित्ते नना पेनदागटाल वातन. इगे नावद ननेन वाया हिल्लेन. पेने नाकुन लोहता.

43 नना वेहानदुन मिमेट असल केंजिर, अदुनहाटींगे नावा पोल्लें मीकु अर्तम आयों.

44 मिमेट देय्यमता पिलाल्क आंदिर, देय्यमे मीवा बाबाल आंदुर. अदुनहाटीं मीवा बाबाल कियना तप्पुड कबाहक कियमळ इत्ते मीकु वेल्लेन इस्टम. देय्यम मुन्नेटाले जीवां तिचेके वाता. अद सत्तेमतुन बस्केने हय्यो. दानागा सत्तेम हिल्लेन हिल्ले. आबद्दम वळ्ळकमळे दाना गुनम आंदु, अदुनहाटीं अद बस्केळ्ळक आबद्दमे वळ्ळकता, आबद्दमतुन पुट्टसंता.

45 अदुनहाटीं नना मीकु सत्तेम वेहिनागानि मिमेट नाकुन नम्मिर.

46 नना बतलन्ना पापम कीतन इंचि मिहागटाल बोरन्ना हुप्सा परातिरा? नना निजम वेहचंतन, अयते मिमेट बारि नाकुन नमसेक हिल्लिर?

47 बोर अयते पेनदा मनकल, ओर पेनदा पोल्लें केंजंतोर. गानि मिमेट पेनदा मनकालोर आयिर, अदुनहाटीं मिमेट अव पोल्लेन केंजसेक हिल्लिर,” इंचि येसु इत्तोर.

येसु सतता बारेमते आनि अब्राहामुना बारेमते वळ्ळंतोर

48 अस्के यहूदिल्क, “निमे सामरियातोनां आंदिन, नीकुन देय्यम पीता, इंचि इनानय्ते, मोमोट इनानद निजमे गदा?” इंचि येसुन पूसकीतुर.

49 अस्के येसु ओर्क इल्हा जवाब हीतोर, “नाकुन देय्यम पिया हिल्ले. नना नावा बाबाना कदर कीतन, गानि मिमेट नावा कदर कीसेक हिल्लिर.

50 नाकु कदर दोर्कना इंचि नना बस्केने इनकुनोन, गानि नाकु कदर दोर्कना इंचि इनानोर वरोर मंतोर. ओरे न्यायम कियानोर आंदुर.

51 नना निजम-निजम वेहासेक, बोरे आयिर नना कराहता पोल्लेनपोरो ताकानय्ते, ओर बस्केने हामुरतुन हळोर,” इंचि इत्तोर.

52 इदुन केजसि यहूदिल्क, “नीकु निजमे देय्यम पीता इंचि इंदके माकु एरपाट आता. अब्राहाम आनि पेनदा कबुरतोरगुडा हातुर, आनि निमे, ‘बोर आयिर, नना वेहता पोल्लेनपोरो ताकानय्ते, ओर बस्केने हामुरतुन हळोर’ इंचि वेहांतिन.

53 मावा एनकटा पेद्दा मातरल अब्राहामगुडा हातोर, निमे ओनकन्ना पेद्दोना? पेनदा कबुरतोरगुडा हातुर. नीवद निमे बोन आंदिन इंचि इनकुंचंतिन?” इंचि येसुन पूसकीतुर.

54 येसु ओर्क इल्हा जवाब हीतोर, “नावद ननाने कदर कीकुत्ते, अद कदरक बतले विलुवा मन्नो. गानि बोन अय्ते मिमेट, ‘मावा पेन आंदुर’ इंचि इतिरो, ओरे नावा बाबाल आंदुर, ओरे नाकु कदर हीसंतोर.

55 गानि मिमेट ओन एरपाट किथ्यिर, नना ओन एरपाट कीतन. ननागिंटा, ‘ओन नना एरपाट किथ्योन,’ इंचि इनानय्ते, ननागुडा मीलेसी आबद्दम वळकानोन आंतन. गानि नना ओन एरपाट कीतन, ओना पोल्लेनपोरो ताकंतन.

56 नना वायना रोजुन हळंतन इत्ता आसेते, मीवा एनकटा पेद्दा मातरल अब्राहाम, कूस मत्तोर. पजा अद रोजुन हळसि ओर वेल्लेन कूस आतोर,” इंचि इत्तोर.

57 पजा यहूदिल्क, “निमे अब्राहामुन हळतिना? नीकु अय्ते एबै वसांगुडा हिल्लें!” इंचि येसुन पूसकीतुर.

58 अस्के येसु, “नना निजम-निजम वेहासेक, अब्राहाम मातरल पुट्टका मुन्नेटाले नना मत्तन,” इंचि इत्तोर.

59 इद पोल्ले पोरोटाल, ओन बंडाने तंचि हळकना इंचि अंतोर बंडां पेरतुर. गानि येसु ओर्क दिसाकोटा मक्किंस गुळिताल पेय्सि होत्तोर.

9

पुटतस्केटाल कळक दिस्वोंक येसु दिस्सानाल कीतोर

1 हरपीसि होननेके-होननेके येसु, पुटतस्केटाल कळक दिसवोर वरोर मनकन हळतोर.

2 अस्के सिस्युल्कु, “गुरु, ईर इल्हा गुड्डिगा पुट्टालय कारनम बतल आंद? ईर पापम कीताहेंकाना इल्हा पुट्टोरा मरि ईना तल्लुर-बाबो पापम कीताहेंकाना?” इंचि येसुन पूसकीतुर.

3 अस्के येसु ओर्क इल्हा जवाब हीतोर, “ईर पापम कीताहेंकानो मरि ईना तल्लुर-बाबो पापम कीताहेंकानो ईर गुड्डिगा पुट्टा हिल्लोर. गानि ईनाहेंदाल पेनदा ताकत दिस अरना इंचि ईर इल्हा गुड्डिगा पुटतोर.

4 नाकुन लोहतोना कबाहकुन मनम, पोळद होनाका मुन्नेन महापीता. बोरे कबळ किया पस्स असोंटद नर्का वायनद मंता.

5 गानि नना इद दुनियाते मत्तचोनजेम दुनियातोरहाटीं नना वेळ्सी आसि मनंतन,” इंचि वेहतोर.

† 8:48 सामरियातोन मुन्नेटा कालमते इच्चुर यहूदिल्क यहूदि आयवोरतोनि मरमि आतुर. ईर लोकल्क यहूदिरां आनि यहूदि आयवोरां इळ्वुरा रीति-रिवाजिं पीसि ताकुंदुर. ओर ईरकु पुटतोर अंतोर सामरिया एरियाते मनुंदुर. ईरकुन यहूदिल्क सिन्ना जातितोर इंचि इट्टुर.

6 पजा ओर बूमिपोर्री उस्कतोर, उस्किसि आ उच्चलतोनि बुर्दा तयार कीसि आ बुर्दातुन आ गुड्डोना कळकुंक होकतोर. 7 होकसि, “निमे सिलोम सेरवुनगा होंचि कळकुन नोर्कुन,” इंचि येसु आ गुड्डोन इतोर. अस्के ओर गुड्डिड होंचि कळकुन नोरतस्के, ओना कळक दिसालय दल्गतां. अस्के ओर मल्लिस वातोर.

8 पजा ओना पका पीसीतोर, मुन्ने ओन बिच्चोम तल्कनेके हळतोर, इंदके ओन हळसि, “उद्दिदिस बिच्चोम तल्कसेक मनुंदुर, ओर ईर मनकल गदा!” इंचि वरोंक-वरोर पूसकियालय दल्गतोर.

9 इच्चुर लोकुल्क, “हो, ईर ओर आंदुर,” इतोर. इंकिच्चुर बारे, “आयोर रो! ओनसंतोर इंकावरोर आंदुर,” इंचि इतोर. गानि आ मनकल, “हिल्ले, ओन ननाने आंदुर,” इंचि इतोर.

10 अस्के ओर लोकुल्क, “अयते नीवा कळकुन बोर दिस्सानाल कीतोर?” इंचि ओन पूसकीतोर.

11 अस्के आ मनकल, “येसु पोरोलतोर वरोर मनकल बुर्दा कीसि, ना कळकुंक होकतोर, होकसि, ‘सिलोम सेरवुने कळकुन नोर्कुन,’ इंचि इतोर. होंचि नोरतन अयते, नावा कळक दिसालय दल्गतां,” इंचि ओर जवाब हीतोर.

12 लोकुल्क, “आ येसु बगा मंतोर?” इंचि पूसकीतस्के, “नाकु एर्का हिल्ले,” इंचि आ मनकल इतोर.

येसु बेस कीता गुड्डिन परिसिल्क चौकसि कीतुर

13 पजा आ लोकुल्क, मुन्ने गुड्डिड मत्ता मनकन परिसिल्कुनेके पीसि ओतुर.

14 येसु बद रोज अयते बुर्दा कीसि, कळक दिसवोना कळकुंक होकसि कळक दिस्सानाल कीतोर, अद रोज नोमकेम मत्ता.

15 तत्तस्के, आ मनकन, “नीवा दिसवा कळक बल्हा दिसालय दल्गतां?” इंचि परिसिल्कगुडा पूसकीतुर. अस्के आ मनकल, “ओर नावा कळकुंक बुर्दा होकतोर, पजा होंचि नोरतस्के, नावा कळक दिसालय दल्गतां,” इंचि इतोर.

16 ओर वेहतद केंजसि इच्चुर परिसिल्क, “ओर मनकल नोमकेम रोजुन नोमा हिल्लोर, अदुनहाटी ओर पेनदागटाल वायाहिल्लोर,” इंचि इतुर. इंकिच्चुर बारे, “गानि वरोर पापि मनकल इंसंटा अद्बूतामाता चिन्ह बल्हा हुप्सा परंतोर?” इंचि इतुर. इल्हा ओरद-ओर्के अर्राका ओर रोंड गेंक आतुर.

17 पजा परिसिल्क आ गुड्डितनमताल बेस आता मनकन, “ओर नीवा कळकुन बेस कीतोर, अयते निमे ओना बारेमते बतल इंतिन?” इंचि इंकुंदि मल्का पूसकीतुर. अयते आ मनकल, “ओर वरोर पेनदा कबुरतोर आंदुर,” इंचि इतोर.

18-19 आ मनकल गुड्डिड मत्तोर, इंदके मर्रा ओना कळक दिसालय दल्गतां, इत्ता पोल्लेतुन यहुदि पेद्दाल्क इदवेरादाका गुडा नम्मा हिल्लुर. अदुनहाटी ओर आ मनकना तल्लुर-बाबोन केयतुर. केय्सि, “ईर मी मर्रना? पुट्त्स्केटाल गुड्डिडगा पुटतोर इंचि मिमेट इंतोर? अयते मरि ईर इंदके बल्हा हळा परसंतोर?” इंचि पूसकीतुर.

20 अस्के ओना तल्लुर-बाबो, “ईर मावा मर्र आंदुर, ईर पुट्त्नेकेन गुड्डिडगा पुटतोर, इद माकु एरपाटे.

21 गानि इंदके ईर बल्हा हळा परसंतोरो माकु तेळियो, इंका ईन हळानाल बोर कीतोरो माकु तेळियो. इंदके ईर सतता बारेमते वळकनलायक आतोर, मिमेट ओने पूस कीम्ट, ओर वेहंतोर!” इंचि इतुर.

22 यहुदि पेद्दाल्कुंक वेरियसि ओना तल्लुर-बाबो अल्हा इतुर. बारित्ते येसुए किरिस्तु आंदुर इंचि बोर अयते ओपकुंतोर, ओन दर्मसास्त्रम कराहना लोताल पेचाहमळ जर्गता, इंचि ओर मुन्नेन उंदि आसि मत्तुर.

23 अदुनहाटीगे आ तल्लुर-बाबो, “इंदके ईर सतता बारेमते वळकनलायक आतोर, मिमेट ओने पूस कीम्ट,” इंचि इतुर.

24 अदुनहाटीं परिसिल्क, गुड्डितनमताल दिस्सानाल आता मनकन मरुंदि मल्का केय्सि, “ई मनकल पापि इंचि माकु एर्के, अदुनहाटीं पेनदुक कदर हीम,” इंचि इल्तुर.

25 अस्के गुड्डितनमताल दिस्सानाल आता आ मनकल, “ओर मनकल पापि आंदुरो, आयोरो नाकु एरका हिल्ले. गानि मुन्ने नाकु कळ्ळक दिस्साकोंदुं, इंदके दिसंतां, इद मात्रम नाकु एरका,” इंचि इल्तोर.

26 अयना परिसिल्क मर्रा ओन, “ओर नीकुन बतल कीतोर? ओर नीवा कळ्ळक दिस्सानाल बल्हा कीतोर?” इंचि पूसकीतुर.

27 अयते गुड्डितनमताल दिस्सानाल आता आ मनकल, “दीनकन्ना मुन्नेन नना मीकु वेहतन, गानि मिमेट केंजा हिल्लिर. अयते मर्रा-मर्रा बारि पूस कीसंतरि? मीकुगुडा ओना सिस्स्युल्क आयानद मंतना?” इंचि इल्तोर.

28 अस्के परिसिल्क, “निमेन ओना सिस्स्युन आदिन, मोमोट मूसाना सिस्स्युल्कुम आंदुम.

29 पेन मूसानतोनि वळ्ळकता इंचि माकु एरपाट मंता. गानि ई मनकल बगाटाल वातोर? माकु बतले एरपाट हिल्ले,” इंचेके ओन तेराहतुर.

30 पजा आ मनकल इल्हा वळ्ळकालय दल्गतोर, “इद वेल्लेन इंचंत्रम आयना पोल्ले आंद. ओर बगाटाल वातोर मीकु बतले एरपाट हिल्ले. अयनागानि ओर मात्रम नावा दिसुवा कळ्ळकुन दिस्सानाल कीतोर.

31 पेन पापि मनकालोरा पोल्लेतुन केंजो, गानि बोर अयते दान मोळ्ळकसेक दाना इच्चा परकारम ताकंतोरो ओना पोल्लेतुन मात्रम पेन केंजता, इंचि मनाकु एरपाट मंता.

32 इद दुनिया पुटतस्केटाल अयते इदवेरदाका, वरोर मनकल, पुटनेकेन गुड्डिडगा पुट्तोना कळ्ळकुन दिस्सानाल कीतोर इत्ता पोल्ले मनम बस्केने केंजा हिल्लोम.

33 ईर मनकलर्गिंटा पेनदागटाल वातोर आयाकॉटे, इसॉटव बवे कबाहक किया परा कोन्नेर,” इंचि ओर्क वेहतोर.

34 इव पोल्लें केंजसि परिसिल्क, “निमे अयते पुरागा पापमते पुट्टिस-बेरस्तोन आदिन. निमे माकु कराहंतिना?” इंचेके आ मनकन पेचाहचि गेदुमतुर.

निजम गुड्डिडर्क बोर?

35 आ मनकन पेचाहचि गेदुमतुर इंचि येसु केंजतोर. केंजसि, आ मनकंक कलियसि, “निमे मनकना रूपमते पुट्तोन पोर्रो विस्वासम इरंतिना?” इंचि ओन पूसकीतोर.

36 अयते आ मनकल, “नना ओनापोर्रो विस्वासम इरंताहाटीं ओर बोर आंदुर, नाकु वेहा सामि!” इंचि येसुन पूसकीतोर.

37 अस्के येसु, “निमे ओन हळ्ळतिन, ओर नीतोनि इंदके वळ्ळकसंतोर,” इंचि वेहतोर.

38 इद पोल्ले केंजसि, “नना विस्वासम कीतन सामि,” इंचि ओर येसुना काल्क मोळ्ळकतोर.

39 अस्के येसु, “नना इद दुनियाते न्यायम कियालय वातन. गुड्डिडर्क कळ्ळक दिस्सागोटालय आनि बोर अयते, ‘मोमोट अन्नि हळ्ळा परंतोम’ इनकुंतुर, ओर्क ओर गुड्डिडर्क इंचि हृप्सालय नना वातन,” ✨ इंचि इल्तोर.

40 अगा मंचि ओना इव पोल्लें केंजता इच्चुर परिसिल्क, “अयते मोमोटगुडा गुड्डिडर्क इंतिना मरि?” इंचि पूसकीतुर.

41 अस्के येसु, “मिमेटर्गिंटा गुड्डिडर्क आयानयते मिहगा पापम मना कोनवळ. गानि मिमेट, ‘मोमोट बेस हळ्ळा परंतोम’ इंतरि. अदुनहाटीं मीलोप्पो पापम मय्सि मनंता,” इंचि वेहतोर.

10

बेसता मेहानोर येसे आंद

1 येसु इल्हा वळ्कालय दलगतोर, “नना निजम-निजम वेहासेक, बोर अय्ते गॉर्ना पोदिते होळियनेके, गलमाताल होळियका गूरे पोरोटाल दुनकिसि होळियंतोर, ओर दोंगल आनि दोसकुनानोर आंदुर. 2 गानि बोर अय्ते गलमाताल होळियंतोर, ओर गॉर् मेहानोर आंदुर.

3 गॉर् मेहानोनहाटी गलमातगा कावेल कीसेक मनानोर गिल्कोम तेंडांतुर. गॉर् ओना लेंग केंजंतां. ओर ओना गॉर्न उंद-उंदाना पोरोल पीसि केय्से, अवुन पलाते ओतोर.

4 अन्नि गॉर्न पलाते ओसि, ओर अवुना मुन्ने-मुन्ने दांतोर. गॉर् ओना पज्जो-पज्जो दांता. बारित्ते अव ओना लेंगुन एरपाट कीतां.

5 गानि एरपाट हिलवोना पज्जो अव होन्नों, ओनागटाल लक्कु वित्तंतां. बारित्ते अव ओना लेंगुन एरपाट किय्यो,” इचि ओर्क वेहतोर.

6 येसु इद उदाहरन लोकलक्कु वेहतोर. गानि येसु बदुना बारेमते वळ्कतोर इत्तद ओर्क अर्तम आयाहिल्ले.

7 अदुनहाटी येसु मसंदि मल्का ओर्क इल्हा वेहतोर. “नना निजम वेहासेक केंजट, गॉर् होळियाना गलमा ननेन आंदुन.

8 नाकन्ना मुन्ने वातोर अंतोरे दोंगाल्क, दोसकुनानोर आंदुर. गानि गॉर् ओरा पोल्ले केंजा हिल्लें.

9 गलमा ननाने आंदुन. बोर अय्ते नहगटाल लोप्पो नेंगंतोर, ओन नना पिसागोटंतन. ओर लोप्पो-पलाते होनुळ-वायुळ कीतोर, तिनालय ओन्क मेता दोर्कता.

10 दोंगाल्क सिराप दोंगा कियालय, हळ्कालय, नासडेम कियालये वांतुर. गानि नना नावा गॉर्कु पिस्वर हियालय वातन. अदगुडा पुरागा पिस्वर हियालय वातन.

11 बेस मेहानोन ननाने आंदुन. बेस मेहानोर, गॉर्नाहाटी ओर ओना जीवा हीतोर.

12 गानि बूतिक मेहालय वातोर, ओर निजम मेहानोर आयोर. मेहनेके ओन्क तोडेल्लिगिता दिस्सानय्ते, गॉर्न अग्गेन होळसि बेकेनो वित्तंतोर. बारित्ते अव गॉर् ओनव आयो. अस्के आ तोडेल्लि वासि गॉर्न पोरो अर्ता आनि गॉर् बारे सिल्लर-सिल्लर आंता.

13 ओर बूतिक वातोर इचि अल्हा वित्तंतोर. ओन्क गॉर्ना पिकिर हिल्ले. अदुनहाटी ओर वित्तंतोर.

14-15 गानि नना बेस मेहानोन आंदुन. बल्हा अय्ते बाबाल नाकुन एरपाट कीतोर, नना बाबान एरपाट कीतन, अल्हेन नावा गॉर्न नना एरपाट कीतन, अव नाकुन एरपाट कीतां. नना नावा गॉर्नाहाटी जीवा हीतन.

16 इद पोद्दितव आयवा गॉर्गुडा नहगा मंतां. नाकु अवुनगुडा तरानद मंता, अवगुडा नावा लेंग केंजन्. अस्के अन्नि उंदे मंदा आसि मनंतां आनि अवुना मेहानोरगुडा वरोरे मनांतोर.

17 नना हासि मरा जीवाते तेदंतन इचि नना नावा जीवा हीसंतन, इदुनहाटीगे नावा बाबाल नाकुन वेल्लेन पावरम कीतोर.

18 नावा जीवातुन नहगटाल बोरे तेंडकुन्नु, नावा जीवातुन नना कुद्दे हीतन. नावा बाबाल नाकु आदेस हीताहेका नावा जीवातुन हियनद, हीसि मरा मल्लि तेंडकुनना अदिकारम नाकु मंता,” इचि येसु इत्तोर.

19 इव पोल्लेनहेदाल मसंदि मल्का यहुदिल्क वरोनद वरोक अर्का वेरे-वेरे आतुर.

20 ओरावेटाल वेल्लेदोर, “ओन्क देय्यम पीसि ओर पिस्सल आतोर, मिमेट ओना पोल्ले बारि केंजांतोर?” इचि इत्तुर.

21 गानि इच्चुर बारे, “इव पोल्ले देय्यम पीतोनां आयो. देय्यम बस्केनना कळ्क दिसवोना कळ्कुन दिस्सानाल किया परंतना?” इचि इत्तुर.

यहुदिल्क येसुना विरोद कीतुर

- 22 पीनि कालम वासि मत्ता. येस्सलेम सहरते गुळिते होळियाना हानुक* इनना पंडुगु मत्ता.
- 23 अय्ते गुळितगा येसु सुलेमान इनना पंदिरतगा तिरियसेक मत्तोर.
- 24 अस्के, इच्चुर यहुदि लोकुल्क येसुना सुट्टु आसि, “निमे इंका बच्चुं रोजकु माकुन मर्ममते ईरितिन? निमे गिंटा किरिस्तुन आयानय्ते माकु कुल्ला-कुल्ला वेहा,” इंचि पूसकीतुर.
- 25 अस्के येसु ओर्क इल्हा जवाब हीतोर, “नना मीकु मुन्नेन वेहतन, गानि मिमेट नम्मा हिल्लिर. नावा बाबाना पोरोल्लते नना कियना कबाह्के नावा बारेमते गवाइ वेहचंतां.
- 26 गानि मिमेट नावा गोर्रेना मंदातोर आयिर. अदुनहाटी मिमेट नापोर्रो विस्वासम कीसेक हिल्लिर.
- 27 नावा गोर्रे नावा लेंगुन केजंतां. नावा गोर्रेन नना एरपाट कीतन, अव नावा पज्जो-पज्जो वांतां.
- 28 नना अचुंक बस्केळक पिस्सना पिस्वर हीतन, अव बस्केने नासडेम आय्यो, नावा कय्दाल अवुन बोरे गुंजकुना परोर.
- 29 बारित्ते अवुन नाकु, नावा बाबाल हीतोर. नावा बाबाल अंतोरकन्ना पेद्दोड आंदुर. अदुनहाटी बाबाना कय्दाल अवुन बोरे गुंजकुना परोर.
- 30 बाबल, नना मोमोट इव्वुरोम उंदे आंद,” इंचि इत्तोर.
- 31 अस्के मसंदि मल्का यहुदिल्क येसुन हक्कालय बंडां पेरतुर.
- 32 अय्ते येसु, “नावा बाबाल नाकु वेहताप नना वेल्लेन बेसता कबाह्क मीकु कीसि हुपिस्तन. अव्टेटाल बद कबळहाटी नाकुन बंडाने तनालय हळसंतिर?” इंचि ओर्कुन पूसकीतोर.
- 33 अस्के ओर, “निमे कीता बेसता कबाह्कुनाहाटी नीकुन बंडाने तन्मोम. गानि निमे पेनदा अपमानम कीतिन. अचोने आयका निमे मनकन आसिगुडा नीवद निमे पेन इंचि वेहकुंतिन, अदुनहाटी मोमोट नीकुन बंडाने तनंतोम” इत्तुर.
- 34 अस्के येसु ओर्क इल्हा जवाब हीतोर, “मीवा मूसाना नियमते, ‘मिमेट पेनकु आदिर इंचि नना इत्तन,’ इंचि इच्चुर लीडर्कुन पेन इत्तद, रासि हिल्लेना?✽ मंता.
- 35-36 दर्मसास्त्रम बस्केने तप्यु वेहो. ओक्कला, पेन दाना पोल्ले, बोर्क-बोर्क अय्ते दोर्कतनो, ओर्कुन पेनकु इंचि इत्तय्ते, नाकुन बाबाल पेरसि इद दुनियाते लोहचीतस्के, ‘नना पेनदा मर्रिन’ इल्हा इंचि इत्ते, नना पेनदा अपमानम कीतन इंचि मिमेट बल्हा इंतिर?
- 37 नावा बाबाल कियना कबाह्क नना कियार्कोटे, नाकुन नम्मट.
- 38 गानि नना अव कबाह्कुन कीतन इंचि, नाकुन नम्मकोन्ना, नना कियना कबाह्कुनपोर्रो अयना विस्वासम ईरट. अस्के, बाबाल ना लोप्पो, नना बाबाना लोप्पो मंतोम इंचि मीकु तेळियार,” इंचि येसु इत्तोर.
- 39 अस्के ओर मसंदि मल्का येसुन दोर्का पियालय हळतुर, गानि ओर ओरा कय्दाल तपिचकुचि अगटाल होत्तोर.
- 40 येसु मर्रा योर्दन बेरेटा हब्बेरा, बगा अय्ते मुन्ने योहान बापतिस्मा हियुंदुर, अदे जेगाते होंचि अग्गेन मत्तोर.
- 41-42 अस्के ओनगा वेल्लेन मंदि वासि, “बापतिस्मा हियना योहान इचंन्रम आयनव बवे कबाह्क किया हिल्लोर. गानि ई मनकना बारेमते ओर बतल अय्ते वेहतोरो, अव अन्नि निजम आतां,” इंचि ओरद-ओरे वळ्कालय दल्गतुर. पजा अगा वेल्लेन मंदि येसुनपोर्रो विस्वासम कीतुर.

11

येसुना दंतगाड लाजर हांतोर

1 लाजर पोरोल्लतोर वरोर मनकल बिमार अरिं मत्तोर. ओर ओना मरियम आनि मार्ता इनना अक्काह्कुनतोनि बेतानि इनना नाटे मनुंदुर.

* **10:22** हानुक इत्ते, वेल्गुल्कुना पंडुगु इंचि अर्तम. इद पंडुगु बारि कीतुर इत्ते, एनकटा कालमते वेरे-वेरे देसेल्कुनोर अद गुळितुन अपवित्र कीसि मत्तुर. गानि मसंदि मल्का गुळितुन पवित्र कीसि, किरिस्तु पुट्टका मुन्ने 165 वा वसंति अद गुळिते पवित्र कबाह्कुन सुख कीतुर. इदने हानुक इत्तुर. ✽ **10:34** बजन संहिता 82:6

2 मुन्ने उंदि मल्का उंदि मुरतळ, सामिना काल्कुंक अत्तर निय होकसि दाना केल्लुके उसुमता, अद इदे मरियम आंद. ई बिमार अरता लाजर दाना तम्पुर आंदुर.

3 अदुनहाटी अव रोंड अक्काहक, “सामि, नीवा पावरमगल्लोड वरोर, बिमारते मंतोर,” इंचि येसुंक कबुर लोहतां.

4 अद कबुर केंजसि येसु, “लाजस्क अद बिमारी ओन हक्किसि ओयालय वाया हिल्ले, गानि पेनदा पेदातनमतुन हृप्सालय वाता. इदुनहेंदाल पेनदा मर्रिक कदर दोकार,” इंचि इत्तोर.

5 येसुंक मार्ताल, दाना अक्कल आनि लाजर ईर इत्ते पावरम.

6 लाजर बिमारते मंतोर इत्ता कबुर तेळियिनागानि येसु बद नाटे अयते मत्तोर, अदे नाटे इंका रोंड रोजकु आगतोर.

7 पजा येसु, “वट, मनम यहुदिया राज्येम मल्लिस दाकोम,” इंचि ओना सिस्स्युल्लुकुन इत्तोर.

8 गानि सिस्स्युल्लुक, “रब्बी, कोन्नि रोजकु मुन्नेन अगाटा यहुदि पेदूदाल्क नीकुन बंडाने तंचि हक्कालय हळतुर. अयना निमे मर्रा अग्गेन दांतिना?” इंचि येसुन इत्तुर.

9 अस्के येसु, “पोदूदाला पन्नेंड गटां मन्नोंगां? ई वेलाते ताकानोर दुनियाता वेलगुन हळसेक ताकंतोर, इंचि ओना कादुक बतल दल्गो ओर हिळ्ळ अर्रोर.

10 गानि नर्काटा वेलाते ताकानोना लोप्पो वेलगु मन्नो, अदुनहाटी ओना कादुक बतलन्ना दाल्गिसि ओर हिळ्ळ अर्रा परंतोर,” इंचि ओर्क वेहतोर.

11 इव पोल्ले आता पजा मर्रा येसु, “मना दंटगाड लाजर निद्रा होत्तोर, गानि ओन नना निद्रताल तेहालय दांतन,” इंचि सिस्स्युल्लुकुन इत्तोर.

12 अस्के सिस्स्युल्लुक, “सामि, ओक्कला ओर निद्रा होंचि मनानयते बेस आंतोर,” इंचि इत्तुर.

13 येसु लाजरना हामुरता बारेमते वळकतोर. गानि सिस्स्युल्लुक अयते लाजर निजम निद्रा होंचि आराम कीसंतोर इंचि इनकुत्तुर.

14 अदुनहाटी येसु ओर्क, “लाजर हासोत्तोर,” इंचि कुल्ला-कुल्ला वेहतोर.

15 वेहचि, “हासोत्तस्के नना ओनगा मना हिल्लेन. इद मीहाटीगे जर्गता, इंचि नना कूस मंतन. दीनहेंदाल मिमेट नापोर्री विस्वासम कीकिट. वट! इंदके मनम ओनगा दाकोम,” इंचि इत्तोर.

16 अस्के, “दट! येसुनतोनि हायालय मनमगुडा दाकोम,” इंचि एमडाल्लुकुनाल वरोर तोमल इनना सिस्स्युड कळमता सिस्स्युल्लुकुन इत्तोर.

हातोर्कुनगुडा जीवा अरहना ताकत येसुनगा मंता

17 बेतानि नाटे एवतस्के, लाजरन बोंदाते ताससि नालुं रोजकु आता, इंचि येसुंक तेळियता.

18 बेतानि नार येस्सलेम सहरताल दग्गेर-दग्गेरा मूड किल्लो मीटर्क लक्कु मंता.

19 तम्पुर हासोत्ताहेंका वेल्लेन दुक्कमते मनना मार्ता आनि मरियमुंक दैरनेम हियालय वेल्लेटोर यहुदिल्लुक वासि मत्तुर.

20 येसु वासंतोर इंचि मार्ताक तेळियतस्के ओन्क कलियालय अद एदुर होत्ता. गानि मरियम मात्रम लोने मत्ता.

21 मार्ताल येसुंक कलियसि, “सामि, निमे गिंटा इगे मंचि मत्ते, नावा तम्पुर हायाकोन्नेर.

22 गानि इंदके अयना बतल आयो. निमे पेनदुन बतल तल्लकते अद, नीकु पेन हीता, इंचि नाकु एरपाट,” इंचि इत्ता.

23 अस्के येसु, “नीवा तम्मुंक मर्रा जीवा अरंता,” इंचि इत्तोर.

24 पजा मार्ताल, “हो सामि, हातोर अंतोर्क जीवा अरंता आकिरता रोजुने, ओर मर्रा जीवाते तेदानुर इंचि नाकु एरपाट मंता,” इंचि इत्ता.

25 अद केंजसि येसु, “हातोर्कुन तेहानोन आनि पिस्वरतुन ननाने आंदुन. नापोर्री विस्वासम कीतोर, हायिनागानि मर्रा जीवाते तेदांतुर.

26 जीवाते मननेके नापोर्रो विस्वासम ईरनोर अंटोर्क बस्केने हामुर वायो. इद पोल्लेतुन निमे नम्मतिना मार्ता?" इंचि दान पूसकीतोर.

27 अस्के अद, "हो सामि, पेनदा मर्रिन निमेन आंदिन, इंचि नना नम्मंतन. इंका इद दुनियाते वायना मत्तोर किरिस्तुनगुडा निमेन आंदिन," इंचि इत्ता.

28 इच्चोन वळिकसि अद अगटाल पेय्सि होंचि, दाना अक्कल मरियमुन सपुडदाका पक्कक केयता. केय्सि, "गुरु वातोर, ओर नीकुन केयसंतोर," इंचि वेहता.

29 मार्ताना पोल्ले केंजता केंजमळे मरियम बिराना तेदसि येसुनगा होत्ता.

30 येसु इंका नाटे होळिया हिल्लोर. मार्ताल ओन्क बगा अय्ते कलियतनो, अदे जेगाते मत्तोर.

31 मरियमुंके दैरनेम हियालय दानतोनो लोते बोरे अय्ते मत्तुरो, आ यहुदिल्क मरियमुन कुस्कुने तेदसि होननेके हळसि, "अद लाजस्ना बोंदातगा होंचि अळंता बारे," इन्कुंचि ओरगुडा दाना पज्जेन होत्तुर.

32 येसु मत्ता जेगातगा मरियम एवसि, ओन हळता. हळसि ओना काल्कुनपोर्रो अरसि, "सामि, निमे इगे मंचि मत्ते ना तम्मुर हायाकोन्नेर," इंचि इत्ता.

33 मरियम आनि दानतोनो वातोर अंटोर यहुदिल्कुना अळ्ळ हळसि, येसुंके बादा अनपिस्ता. मनसुने ओर वेल्लेन दुक्कमते मत्तोर.

34 पजा येसु, "ओन मिमेट बगा इरतिर?" इंचि पूसकीतस्के, "वासि हळ्ळा सामि!" इंचि इत्तुर.

35 हळसि येसु अळतोर.

36 अस्के यहुदिल्क, "हळट, लाजर इत्ते ओन्क बच्चोन पावरमो!" इंचि इत्तुर.

37 गानि इच्चुर लोकुल्क, "ईर मनकल, वरोर गुड्डिंके कळ्ळ दिस्सानाल कीतोर अय्ते, लाजस्ना हामुरताल कापाळा पराकोन्नेरा?" इंचि इत्तुर.

हासोत्ता लाजस्के येसु जीवा अरहंतोर

38 येसुंके मसंदि मल्का मनसुने बादा अनपिस्ता. पजा ओर लाजस्ना बोंदातगा होत्तोर. अद बोंदा उंदि पडालेहका मत्ता. दाना सौर्रिक अड्डम उंदि बंडा दोब्बिसि मत्ता.

39 पजा येसु, "अद बंडातुन तेंडट," इंचि इत्तोर. गानि हासोत्तोना अक्कल मार्ताल, "सामि, ओर हासि नालुं रोजकु आसंता. अदुनहाटी ओना सेत्ता इरगा गब्बु पीसि मंदगोम!" इंचि इत्ता.

40 अस्के येसु, "निमे विस्वासम कियानय्ते पेनदा महिमातुन हळकिन, इंचि नना नीकु वेहा हिल्लेना?" इंचि दान इत्तोर.

41 अदुनहाटी ओर आ बंडातुन तेंडतुर. पजा येसु पोरो हळसेक, "बाबा, निमे ना पारतना केंजताहाटी, नीकु दन्यवाद.

42 निमे बस्केळ्ळे नावा पारतना केंजतिन इंचि नाकु एरके. गानि नाकुन निमेन लोहतिन इत्तादुन, ना सुट्टु निलसि मत्ता लोकुल्क नम्मुगोम इंचि ओराहाटीगे नना ई पोल्ले वळ्ळतन," इंचि इत्तोर.

43 इल्हा वळिकसि येसु, "ए लाजर, पलातुक पेय्सि वा!" इंचि लगांचि केयतोर.

44 अस्के हासोत्ता लाजर पलाते वातोर, अस्के ओना कय्क-काल्क हामुर कप्पिडते हट्टिस मत्तां, ओना मोकोमगुडा उंदि सेल्लाते हट्टिस मत्ता. पजा येसु, "ओना कट्टुकु लेहिचि ओन होना हीम्टु," इंचि इत्तोर.

येसुन हक्कालय यहुदिल्क पिलान कीतुर

(मत्तयाल 26:1-5; मरकुस 14:1-2; लूकाल 22:1-2)

45 येसु कीता अद कबळतुन हळसि, मरियमुनगा वाता यहुदिल्कुनाल वेल्ले मंदि यहुदिल्क, येसुन नम्मुर.

46 गानि ओरावटेताल इच्चुर लोकुल्क मात्रम, परिसिल्कुनगा होंचि येसु बतल-बतल कीतोर अदुन वेहतुर.

47 अदुनहाटीं पेर्मांलोक, परिस्विल्क कलियसि उंदि पेद्दा पंचादि उपिस्तुर. उपिच्चि, “ओर मनकल अय्ते वेल्लेन अद्बूतामाता चिन्हां कीसि हुपिच्चंतोर. अय्ते मनम बतल कीकोम?”

48 ओर कियानदुंता मनम इल्हेन हळसेक मत्ते, अंतोर ओने नम्मिसि ओन राजाल कींतुर. पजा रोम सरकारता सिपाइल्क वासि मना गुळितुन, मना लोकुल्कुन नासडेम कीसि पोहांतुर,” इंचि वळ्ळकतुर.

49 ओरव्ते वरोर कयपाल इनानोर मत्तोर. अद वर्सा ओरे पेद्दा पेर्मांल मत्तोर. ओर, “मीकु बतले तेळियोना!

50 देसेमता अंतोर लोकुल्क नासडेम आयनदानकन्ना, लोकुल्कुनाहाटीं वरोर मनकल हाते, बेस आयोना!” इंचि इत्तोर.

51-52 सिराप यहुदि लोकुल्कुना पायदाहाटीगे आयो गानि, पूरा दुनियाते बेके-बेकेनो सिल्लर आसि मत्ता पेनदा लोकुल्कुन उंदि कियालय, येसु ओना जीवातुन हीतोर इत्ता पोल्लेतुन ओर वेहतोर. इद पोल्ले ओर ओना सतता विचारमताल वळ्ळा हिल्लोर, गानि अद वर्सा ओर पेद्दा पेर्मांल मत्तोर इंचि बविस्यवानि कीतोर.

53 इल्हा अद रोजुनाल येसुन हळ्कालय यहुदि पेद्दाल्क पिलान कीतुर.

54 अदुनहाटीं येसु अस्केटाल यहुदिल्कुन नड्डुम अंतोर्क दिस्सेक वेलियाकौंदुर. पजा ओर येस्सलेम सहर होळसिसि बय्लि जेगाक दग्गेर मनना एप्राइम इनना नार होत्तोर. होंचि अगा ओना सिस्वुल्कुनतोनि मनालय दलगतोर.

55 अस्के यहुदिल्कुना दाटसि होनना पंडुगु दग्गेर्क एवसि मत्ता. अदुनहाटीं ओरा सततुन सुद्द कीकुनना रिवाज कियालय पंडुगुंक्नना मुन्नेन वेल्लेन लोकुल्क नाहकुनाल येस्सलेम होत्तुर.

56 ओर अंतोर येसुन प्हकसेक मत्तुर. गुळिते नित्तिसि, “मीकु बतल अनपिच्चेक, ओर ई पंडुगुनाहाटीं वांतोरा, वायोरा?” इंचि वरोंक-वरोर पूसकियुंदुर.

57 अचोने आयका पेर्मांलोक, परिस्विल्क, येसुन दोर्का पियनाहाटीं, “येसु बगा मंतोर इत्ता संगति बोर्कन्ना तेळियते, माक्क वासि वेहाट हळ्ळाट!” इंचि आदेस हीसि मत्तुर.

12

बेतानिया नाटे मरियम येसुंक् अत्तर निय होकंता

1 दाटसि होनना पंडुगुंक्नना हांर रोजकु मुन्नेन येसु बेतानिया इनना नाटे एवतोर. येसु बोन अय्ते हामुरताल जीवाते तेहतोरो आ लाजर ई बेतानियातेन मनुंदुर.

2 अगा येसुनाहाटीं नर्कटा गाटो तयार कीतुर. मार्ताल गाटो वाटता. लाजरगुडा गाटो तिनानोरतोनि उद्दिदिस मत्तोर.

3 अस्के मरियम, जटामासि इनना मराता एक्को दराता सगोम लीटर अत्तर निय तच्चि, येसुना काल्कुनपोर्रीं वळियता. वळियसि, दाना केल्लुकुने ओना काल्कुन उसुमता. अस्के अद नियदा गब्बु लोनंता विच्चका होत्ता.

4-5 गानि ओना सिस्वुल्कुनाल इस्कारियोत नाटेनोर यहुदल इननोर वरोर मत्तोर. ई यहुदले पज्जो, येसुन दोकाते पीसि हियानोर आंदुर. ओर, “अरेरे! ई अत्तर नियदुन मूड नुह्कुना एंडि स्पेक* अम्मिसि, आ रूपेन गरिब लोकुल्कुंक हियानायोना?” इंचि इत्तोर.

6 ओन्क गरिब लोकुल्कुना पर्वा मंता इंचि अल्हा इना हिल्लोर. गानि ओना दोंगा बुद्दिहेंदाल, ओनगा कोत्तना संचि मननेके, आ संचिते वाटता कोत्तानाल ओर दोसकुनुंदुर. अदुनहाटींगे ओर अल्हा वळ्ळकतोर.

7 अस्के येसु, “नना हायना रोजु दग्गेर एवताहाटीं नाकुन तयार कियालय अदुन होळसीम.

8 गरिब लोकुल्क बस्केळ्ळ मीतोने मनांतुर, गानि नना मीतोनि बस्केळ्ळ मनोन,” इंचि इत्तोर.

* 12:4-5 एंडि स्पेक उंदि एंडि स्पेता विल्लुवा, दग्गेर-दग्गेरा उंदि रोजुना कूलितचो मत्ता. इगे मूड नुह्कुना स्पे इत्ते, वरोर मनकना एडादिमेळ्ळा कलि आंता.

9 अच्छोटेन येसु अगा मंतोर इंचि तेळियतस्के, वेल्लेन यहुदि लोकुल्क, सिराप येसुन ह्वालये आयो गानि, येसु हामुरताल जीवाते तेहता आ लाजस्नगुडा ह्वाललय अगा होत्तुर.

10-11 ई लाजस्नहैकैन वेल्लेन मंदि यहुदिल्क ओर्कुन होळसि येसुनपोरीं विस्वासम इरतुर, अदुनहाटीं पेद्रुदा पेर्मालोर लाजस्नगुडा हक्कना पिलान कीतुर.

येसु वेल्लेन कदरते येस्सलेम सहरते होळियंतोर

(मत्तयाल 21:1-11; मरकुस 11:1-11; लूकाल 19:28-40)

12-13 इंकुदि रोजु, येसु येस्सलेम वासंतोर इंचि, पंडुगुंक वाता लोकुल्कुंक तेळियता अय्ते, वेल्लेन मंदि लोकुल्क कजूर मराकुना कोम्मना-कोम्मा पीसि ओन्क कलियालय एदुर होत्तुर. होंचि, “होसन्ना!† सामिना पोरोल्ले वायना इस्राएलता राजाना वेल्लेन दन्यवाद आयि, जय जोहार!” इंचि मोत्कुत्तुर.

14-15 दर्मसास्त्रमते रासि मत्ता पोल्ले पूरा आयगोम इंचि येसु उंदि लेय्या गाडदि पोरीं उद्दिस सहरतेके वासेक मत्तोर. दर्मसास्त्रमते रासता पोल्ले इल्हा मंता:

“सियोनता लोकुल्कुनिटा‡ वेरियमट्ट, हुळाट, मीवा राजाल गाडदि पोरीं उद्दिस वासंतोर.”*†

16 इव गटनां जर्गनिके येसुना सिस्स्युल्कुंक बतले तेळिया हिल्ले. गानि येसु हामुरताल जीवाते तेदसि महिमाते स्वर्गम होत्तस्के, जर्गता अन्नि गटनां, दर्मसास्त्रमते रासि मत्तापे जर्गतां, लोकुल्कगुडा ओनतोन अल्हेन कीतुर. इंचि ओर्क अर्तम आता.

17 येसु लाजस्न बोंदाताल केय्सि जीवा अरहतदुन ह्ळता लोकुल्क, ओर ह्ळतदुना बारेमते गवाइ वेहतुर.

18 येसु ई अद्बूतामाता चिन्ह हुपिस्तोर इंचि लोकुल्क केंजतुर, अदुनहाटीं ओर ओन्क कलियालय होत्तुर.

19 पजा परिसिल्क, “मना पिलानकु बता कबळ्क ओज्जा हिल्लें. हुळाट, पूरा दुनियंता ओना पज्जो अरसि होंचंता,” इंचि ओरद-ओरे वळ्कालय दल्गतुर.

येसु ओना हामुरता बारेमते वेहांतोर

20 पंडुगुने मोळ्कालय वाता लोकुल्कुनाल इच्चुर युनानि लोकुल्क§ मत्तुर.

21 ओर गालिल राज्येमता बेतसेदा नाटेना, पिलिपनगा वासि, “महाराज, माकु येसुन कलियाना मंता,” इंचि इत्तुर.

22 इद पोल्ले पिलिप, अंदरियल इनानोंक वेहतोर. पजा पिलिप आनि अंदरियल इव्चुर कलियसि येसुंक वेहातुर.

23 अस्के येसु इल्हा वेहालय दल्गतोर, “मनकना रूपमते पुटतोन नना, इंदके नावा महिमातुन हुप्सना वेला दगोर्क एत्ता.

24 नना निजम-निजम वेहासेक, वंजि पेडे बूमिंते अर्सि हासोन्नाकोट्टे अद उंदे मनंता. गानि अद हासोंचि मोल्का वाते मात्रम पेद्रुदा बेर्सि वेल्लेन पेडेकुन तयार कीता.

25 अल्हेने, बोरे आयिरि! इद दुनियाते ओर ओना जीवातुन पावरम कींतोर, ओर ओना जीवातुन पोळागोटकुंतोर. गानि बोर अय्ते इद दुनियाते ओना जीवाता पर्वा किय्योर, ओर ओना जीवातुन बस्केळ्क पिस्सना पिस्वरहाटीं कापाळसि इरंतोर.

26 बोर नावा सेवा कीतन इंतोर, ओर नावा पज्जो ताकना. बारित्ते नना बगा मनंतनो, अगा नावा सेवा कियानोरगुडा मना पीता. अल्हेने बोर नावा सेवा कींतोर, नावा बाबाल ओन्क कदर हींतोर.

27 इंदके नावा जीवा तकलिपते मंता. नना बतल इंदकन? बाबा, इद तकलिपता वेलाताल नाकुन तप्सा, इंचि इंदकना? इनोन. बारित्ते नना इद वेलाहाटीं गे वातन.

† 12:12-13 होसन्ना दीना असल अर्तम मुन्ने “कापाळा” मत्ता. गानि इंदके ई पोल्लेता वापर पेनदा स्तुति कियालय कीतुर.

‡ 12:14-15 सियोनता लोकुल्कुनिटा येस्सलेमता लोकुल्कुनिटा. * 12:14-15 जकर्याह 9:9 § 12:20 युनानि लोकुल्क ग्रीक लोकुल्क.

28 बाबा! नीवा पोरोल्क निमेन कदर हीम,” इंचि येसु इत्तोर. अल्हा इत्तस्के स्वर्गमताल उंदि अल्किर, “नना नावा महिमाता कदरतुन दीनकन्ना मुन्ने हीतन, मर्ना इंका हीतन,” इंचि केंजावाता.

29 अद अल्किरतुन केंजसि अगा नितिसि मत्ता इच्चुर लोकुल्क, “मब्बु उम्मसंता रो!” इंचि इत्तुर. इकिच्चुर बारे, “आयो, पेनदा दूता ओनतोनि वळ्ळता,” इंचि इत्तुर.

30 अस्के येसु, “अद अल्किर नाहाटीं आयो, मीवाहाटीं वाता.

31 इंदके इद दुनियाता न्यायम कियना वेला एवता. इद दुनियापोर्रो राज्येम कियना अदिकारिन पलाते पेचाहचि गेदमना वेला इंदके वाता.

32 बस्के अयते नाकुन बूमिताल पोरोळ्ळक तेहमळ जर्गतनो, अस्के अंतोर्कुन नाहेके इकुंतन,” इंचि इत्तोर.

33 इल्हा वळ्ळिसि येसु, ओन्क बसोंटा हामुर वायनद मंता इत्तदुन वेहतोर.

34 अस्के लोकुल्क, “किरिस्तु बस्केळ्ळक जीवातेन मनंतोर, इंचि मोमोट मूसाना नियमते केंजतोम. अयते, मनकना रूपमते पुटतोम बूमिताल पोरोळ्ळक तेहांतुर, इंचि निमे बल्हा वेहा परंतिन? ई मनकना रूपमते पुटतोर बोर आंदुर?” इंचि येसुन पूसकीतुर.

35 अस्के येसु, “वेलगु मीतोनि इंका जेरासेप मनंता. हीकट मीकुन मुच्चका मुन्नेन, वेलगुने मिमेट ताकसेके मंटु. बारित्ते हीकटते ताकानोर, ओर बगा दांतोर ओनद ओन्के तेळियो.

36 मीकु इद वेलगुना संतानम आयानद मत्ते, मिहगा वेलगु मननेकेन मिमेट दानपोर्रो विस्वासम ईर्ट,” इंचि येसु ओर्क वेहतोर. वेहचि ओर्क दिसाकोंटा ओरागटाल होत्तोर.

यहुदिल्क येसुनपोर्रो विस्वासम ईर्

37 लोकुल्कुना मुन्ने येसु वेल्लेन अद्बूतामाता चिन्हें कीतोर. अयना ओर लोकुल्क येसुनपोर्रो विस्वासम ईर् हिल्लुर.

38 दीनहेंदाल, यसायाह इनना पेनदा कबुरतोर, एनकटा रासता पोल्ले, पुरागा आता. अद पोल्ले इल्हा मत्ता: “सामि! मोमोट वेहता कबुरतुन बोर नमतुर? पेनदा ताकततुन बोर्क हुपिचमळ जर्गता?”*

39 ओर विस्वासम ईर् पराहिल्लुर. बारित्ते, यसायाहल इंकुदि जेगाते इल्हा रासतोर:

40 “ओर ओरा कळ्ळुकुन दिसाकोंटा कीतोर आनि ओरा मनसुन बंद कीतोर. अदुनहाटीं ओर कळ्ळुकुने हळा परसेक हिल्लुर, मनसुनाल ओर्क तेळियसेक हिल्ले. दीनहेंदाल ओर नाहेके तिरियुर, नना ओर्कुन बेस किय्योन.”*

41 यसायाहल येसुना महिमातुन हळताहेंकेन ओना बारेमते ओर इव पोल्लें वेहतोर.

42 अयनागानि वेल्ले मंदि यहुदि अदिकारिल्क येसुनपोर्रो विस्वासम इरतुर. अच्चे यहुदि पेद्दाल्कगुडा मत्तुर. गानि परिसिल्कुंक तेळियते, ओर्कुन दर्मसास्त्रम कराहना लोते होळिया हिश्युर इत्ता वेंक, ओर कुल्ला-कुल्ला ओप्कुनाकोंदुर.

43 बारित्ते, ओराहाटीं पेनदाहेंदाल दोर्कना कदरकन्ना, लोकुल्कुनहेंदाल दोर्कना कदरे ओर्क एक्को पावरम.

44 अस्के येसु वरगोय्से, “बोर अयते नापोर्रो विस्वासम ईरतोर, ओर सिराप ना पोर्रेन आयो गानि, नाकुन लोहचीतोन पोर्रोगुडा विस्वासम ईरतोर.

45 अल्हेन बोर अयते नाकुन हळांतोर, ओर नाकुन लोहचीतोनगुडा हळांतोर.

46 नापोर्रो विस्वासम ईर्नोर ओर बोरे आयिर, हीकटते मनानायो, इंचि नना इद दुनियाते वेलगुनलेहका वातन.

47 बोरे आयिर, ओक्कला नावा पोल्लें केंजसिगुडा अवुन परकारम ताकाकोंटे, ओना न्यायम नना किय्योन. बारित्ते नना इद दुनियाते न्यायम कियालय वाया हिल्लेन, गानि इद दुनियातोर्कुन पिसागोटलय वातन.

48 बोर अय्ते नाकुन हयसाका नावा पोल्लेन पिय्योर, ओना न्यायम कियनाहाटीं वैरे उंदि मंता. अद नना मीकु कराहता पोल्ले आंद. आकिर रोजुननाड ओना न्यायम नावा पोल्ले किय्यार.

49 बारित्ते नना नावा मनसुंक वाताप वळका हिल्लेन, गानि नना बतल वळकना, बतल वेहना, इंचि नाकुन लोहचीता बाबाले नाकु आदेस हीतोर.

50 ओना आदेस बस्केळक पिस्सना पिस्वरताहेके ओंता इंचि, नाकु एर्का मंता. अदुनहाटीं बाबाल नाकु बल्हा वेहना इंचि वेहतोरो, अल्हेन नना मीकु वेहचंतन,” इंचि ओर्क वेहतोर.

13

येसु ओना सिस्युल्कुना काल्क नोररंतोर

1 इद दुनियातुन होळसि पेनबाबानगा मल्सि होनना वेला दग्गेर्क एव्ता इंचि, येसुंक दाटसि होनना पंडुंगुक्कना मुन्नेन तेळियता. इद दुनियाते मनना ओना लोकुल्कुन ओर वेल्लेन पावरम कीतोर. अचोने आयाका अद पावरमतुन आकिरदाका ओरपोर्रो हुपिच्चेकेन मत्तोर.

2 येसु, ओना सिस्युल्क नर्कटा वेलाते गाटो तिनालय उद्दिदिस मत्तुर. गानि गाटो तिन्नका मुन्नेन देय्यम, इस्कारियोत नाटेना सिमोन इनानोना मरिं यहुदन लोप्पो वासि, येसुंक दोका हियालय ओन एकिकसता.

3 पेनबाबाल अन्नि अदिकाराल्क येसुना कय्दुक हीतोर, इंका ओर पेनदागटाल वातोर, पेनदागेन मल्सि दांतोर इत्तद अन्नि ओन्क एरपाटे मत्ता.

4 अदुनहाटीं ओर गाटो तिनालय उद्दिदिस मत्तागटाल तेदतोर. तेदसि, केरसि मत्ता अंगितुन तेंडतोर. तेंडसि उंदि सेल्लातुन नडिक हुटतोर.

5 पजा उंदि गमेलाले एर पीसि सिस्युल्कुना काल्क नोरसेके, नडिक हुटसि मत्ता सेल्लाते उस्मालय दल्गतोर. 6 अल्हा कीसेके ओर सिमोन पत्रुनगा वातोर. अस्के पत्रु, “निमे नावा काल्क बारि नोरसंतिन सामि?” इंचि येसुन पूसकीतोर.

7 अस्के येसु, “नना कियानद नीकु इंदके अर्तमायो, गानि मुन्ने-मुन्ने नीके तेळियार,” इंचि इत्तोर.

8 पजा पत्रु, “निमे नावा काल्क बस्केने नोरमा,” इंचि इत्तोर. अस्के येसु, “ननागिंटा नीवा काल्क नोरकॉटे, निमे नावोन आया परिन,” इंचि वेहतोर.

9 अस्के सिमोन पत्रु, “अय्ते सिराप नावा काल्के आयो, नावा कय्कुन, नावा तल्लातुनगुडा नोर्रां सामि!” इंचि इत्तोर.

10 पजा येसु, “बोर अय्ते एर तुंगतोर, ओर बेस साप मनंतोर. ओर सिराप काल्क नोरकुत्ते सालु, अल्हेन मिमेट बेस साप मंतरि, गानि मिहागटाल अंतोर बेस साप हिल्लिर,” इंचि वेहतोर.

11 ओन्क दोका हियानोर बोर इंचि, ओन्क एरपाट मत्ता. अदुनहाटीं ओर, “मिहागटाल अंतोर बेस साप हिल्लिर,” इंचि इत्तोर.

12 ओरां अंतोरा काल्क नोरमळ आता पजा, येसु अंगि केरसि, मुन्ने उद्दिदिस मत्ता जेगाते होंचि उद्तोर. उद्दिदिस इल्हा वळकालय दल्गतोर, “नना मीकु बतल कीतन, मीकु अर्तम आतना?”

13-16 मिमेट नाकुन गुरु, सामि इंचि केयंतोर. नना गुरु, सामिन आंदुन, अदुनहाटीं मिमेट इनानद बरोबरे. नना गुरुन, सामिन आसिगुडा मीवा काल्क नोरतन. अय्ते मिमेटगुडा वरोना काल्क वरोर नोरसेके सेवा कियना. नना मीकु निजम-निजम वेहासेक, वरोर दासि मनकल ओना मालकुंकना पेद्दा आयोर. अल्हेन वरोर कबुरतोर ओन लोहतोनकना पेद्दा आयोर. नना बल्हा अय्ते कीतनो, अल्हेन मिमेटगुडा कियना इंचि, इद उंदि उदाहरन हुपिस्तन.

17 इंदके इव पोल्लें मीकु तेळियतां. अदुनहाटीं मिमेट इवुन पीसि ताकतिरिल्ले, पेन मीकु आसिर्वाद हीता.”

येसु ओन्क दोका हियानोना बारेमते कुद्दु वेहांतोर

(मत्तयाल 26:20-25; मरकुस 14:17-21; लूकाल 22:21-23)

18 “नना मी अंतोरा बारेमते वळकसेक हिल्लेन. नना बोर्कुन अयते पेर्कुत्तन, ओरा बारेमते नाक बेस एरपाट. गानि, ना हारि तित्तोरे नाकु अड्डम आतोर, इल्हा दर्मसास्त्रमते रासि मत्ता पोल्ले पुरागा आयना इंचि इल्हा जर्गपीता.

19 इल्हा जर्गत्स्के, ओन ननाने आंदुन, इंचि मिमेट विस्वासम कियनाहाटीं, इव पोल्लें जर्गका मुन्नेन मीकु वेहासेक मंतन.

20 नना निजम-निजम वेहासेक, नना लोहतोन, बोर अयते स्विकार कीतोर, ओर नाकुन इंका स्विकार कीतोर. नाकुन स्विकार कियानोर, ओर नाकुन लोहचीतोनगुडा स्विकार कीतोर,” इंचि येसु इत्तोर.

21 इव पोल्लें वळकुड आतस्के येसुंक मनसुने बादा अनपिस्ता. पजा ओर, “नना निजम-निजम वेहासेक, मीवा लोप्पोटाल वरोर नाकुन दोकाते पीसि हीतोर,” इंचि इत्तोर.

22 येसु बोना बारेमते वळकतोरो इंचि तेळियका, सिस्स्युल्क वरोना मोकोम वरोर हळकुत्तुर.

23 येसुना सिस्स्युल्कनाल येसु बोन अयते पावरम कियुंदुरो, ओर येसुना दग्गेरेन उद्दिदस मत्तोर.

24 अयते सिमोन पत्रु, “येसु बोना बारेमते इंचंतोरो पूस कीम,” इंचि ओन्क कय सयगे कीतोर.

25 अस्के आ सिस्स्युड इंकिच्चो येसुनेके जर्गिसि येसुना रोमबोच्चेतगा तला इरसि, “ओर बोर आंदूर सामि?” इंचि पूसकीतोर.

26 अस्के येसु, “नना ई हारि तुकडातुन कुसिटे मुळ्हाचि बोनकयते हीतन, ओरे आंदूर,” इंचि जवाब हीतोर. पजा हारि तुकडातुन कुसिटे मुळ्हाचि इस्कारियोत नाटेना सिमोनाना मरिं यहुदांक हीतोर.

27 यहुदल हारि तुकडा एतता एतमळे, ओन देय्यम पीता. अस्के येसु यहुदन, “निमे कियनद बतलो, अद बिराना कीम,” इंचि इत्तोर.

28 गानि येसु ओन अल्हा बारि इत्तोर इत्ता संगति मात्रम अगा तिनालय उद्दिदस मत्तोर्कुंक बोर्के अर्तम आयाहिल्ले.

29 कोत्तना जोरा यहुदानगेन मनुंदु, अदुनहाटीं पंडुगुंक अब्सरम मत्ता बतलन्ना सामान अस्सि तरालय वेहतोर बारे, इंचि इच्चुर इनकुत्तुर. इंकिच्चुर बारे, अव्टेटाल इच्चुं गरिब लोकुल्कुंक हीम इंचि वेहतोर आंद, इंचि इनकुत्तुर.

30 पजा यहुदल हारि एक्कुचि, बिराना पलाते होत्तोर. अस्के वेल्लेन नकां आसि मत्ता.

येसु ओना हामुरता बारेमते वळकंतोर

(मत्तयाल 26:31-35; मरकुस 14:27-31; लूकाल 22:31-34)

31 यहुदल पलाते होत्तस्के, येसु इल्हा वेहालय दलगतोर. “मनकना रूपमते पुटतोंक नाकु, महिमा दोर्कना वेला इंदके एत्ता. नाकु जर्गाना अन्निटवुनहेंदाल पेनदुक महिमाता कदर दोर्कार.

32 नावाहेंदाल पेनदुक महिमाता कदर दोर्कानयते, पेन नाकु दाना कदर हिथ्यार. अद आल्सेम कियार्कोटा बिरानेन हीता.

33 नावा पिलाल्कनिटा! नना इंका गडसेम मीवातोनि मनंतन. पजा मिमेट नाकुन पहककिर. यहुदिल्कुना पेद्रुदाल्कुंक, नना बगा दांतन, अगा मिमेट वाया परिर, इंचि बल्हा नना वेहतनो, अल्हेन मीकुगुडा वेहचंतन.

34 अदुनहाटीं नना मीकु उंदि पूना आदेस हीसंतन, मिमेट वरोंक-वरोर पावरम कीम्टु. नना मीकुन बल्हा पावरम कीतन, अल्हेन मिमेटगुडा वरोंक-वरोर पावरम कीम्टु.

35 मीवा वरोनद वरोर पावरम कियमळतुन हळसि, मिमेट नावा सिस्स्युल्क आंदिर, इंचि अंतोर लोकुल्कुंक तेळियसि दांता,” इंचि येसु वेहतोर.

36 पजा सिमोन पत्रु, “निमे बेके दांतिन सामि?” इंचि पूसकीतोर. अयते येसु, “नना होनानगा, निमे इंदके वाया परिन. गानि नना होत्तंका पज्जोटाल वाकिन,” इंचि इत्तोर.

37 गानि पत्र, “इंदके नना नीतोनि बारि वाया पर्रीन सामि? नीवाहाटीं नना नावा जीवा हियालयगुडा तयार मंतन,” इंचि इत्तोर.

38 अस्के येसु, “बतल! निमे नावाहाटीं जीवा हीतिना? नना नीकु निजम-निजम वेहासेक, निमे मूड मल्कां, नाकुन एरपाट किय्योन, इंचि इंदकिन, अस्केन गोगोड कूसार,” इंचि इत्तोर.

14

पेनबाबानहेके होनना हरिं येसुए

1 इंका येसु, “मिमेट मीवा मनसुन कस्टमते वाटमट. पेनदापोर्रीं विस्वासम ईरंट, इंका ना पोर्गेगुडा विस्वासम ईरंट.

2 नावा बाबाना लोते वेल्लेन अर्रीं मंतां. ओक्कला हिलाकॉटे मंचि मत्ते, मीवाहाटीं जेगा तयार कियालय होंचंतन इंचि, नना मीकु वेहचि मन्नेन.

3 नना होंचि अवुन सदुरंतका, मल्सि वासि मीकुन औतन. अस्के नना मनानगेन, मिमेटगुडा मंदकिट.

4 नना होनना हरिं अयते मीकु एर्का मंता,” इंचि सिस्स्युल्कुन इत्तोर.

5 अस्के तोमल, “निमे बेके होंचंतिनो माकु अयते एरपाटे हिल्ले सामि! असोंटस्के, माकु नीवा होनना हरिं बल्हा तेळियंता?” इंचि इत्तोर.

6 पजा येसु, “हरिं, सत्तेम, आनि पिस्वर ननाने आंदुन. नाकुन होळसि बाबानगा बोरे एव्वा परोर.

7 नना बोन आंदुन, इंचि मिमेट एरपाट कीसि मत्ते, नावा बाबान इंका मिमेट एरपाट कीसि मन्नेर. इंदकेटाल मिमेट ओन एरपाट कीतिर, ओन हळतिरगुडा,” इंचि वेहतोर.

8 अस्के पिलिप, “सामि, माकु बाबान हुपिस्ते, अचोने सालु,” इंचि येसुन इत्तोर.

9 अस्के येसु ओन्क इल्हा वेहतोर, “नना इच्चुं रोजकुनाल मीवातोने मंतन, अयना निमे नाकुन एरपाट किया हिल्लिना पिलिपु? नाकुन हळतोर, ओर बाबान हळतोर. अयना, माकु बाबान हुप्सा, इंचि निमे बल्हा इंचंतिन?

10 नना बाबाना लोप्पो, बाबाल नावा लोप्पो मंतोर. इदुन निमे विस्वासम कीसेक हिल्लिना? नना वेहना पोल्लें ना इच्चटा नना वेहसेक हिल्लेन, गानि नावा लोप्पो मनना नावा बाबाल, ओना कबाहकुन नाहेंदाल कीकुंचंतोर.

11 नना बाबाना लोप्पो, बाबाल नावा लोप्पो मंतोर इत्ता पोल्लेपोर्रीं मिमेट विस्वासम ईरंट. हिलाकॉटे नना कियना कबाहकुनहेंदाल अयना नाकुन विस्वासम कीम्ट.

12 नना मीकु निजम-निजम वेहासेक, ओर अयते नाकुन नम्मंतुर, ओरगुडा नना कियनसोंटा कबाहक कियानुर. अचोने आयका नना कियना कबाहकुंकन्ना पेद्दा-पेद्दा कबाहक कियानुर. बारित्ते नना नावा बाबानाहेके होंचंतन.

13 अदुनहाटीं, मिमेट नावा पोरोलते बतल तल्किना, नावा बाबांक महिमा वायानाहाटीं नना अदुन कीतन.

14 ओक्कला मिमेट ना पोरोलते बतल तल्किना, अद नना कीतन.”

पवित्र आत्मा हीतन इंचि येसु पोल्ले हीतोर

15 “मिमेटगिंटा नाकुन पावरम कीते, नना वेहता आदेसकुन पीसि ताकट.

16 अस्के नना बाबांक विनंति कीतन. बाबाल मीवाहाटीं बस्केळ्ळक मीवातोनि मनालय इंकावरोर सहायम कियानोन हीतोर.

17 आ सहायम कियानोर इत्ते, पवित्र आत्मा मीकु सत्तेमतुन हुप्संता. दुनियातोर दानहेके हळसेक हिल्लुर, दान एरपाट कीसेक हिल्लुर. अदुनहाटीं अद दुनियातोरक दोर्को. गानि मिमेट दान एरपाट कीतिर. बारित्ते अद मीवातोनि मंता आनि पजा मीवा लोप्पेन मन्नार.

18 नना मीकुन दिक्कु हिलवोरलेहका होळसि होन्नोन, नना मिहगा मल्सि वांतन.

19 इंका कोन्नि रोजकु आता पज्जो, दुनियातोर नाकुन हळा पस्, गानि मिमेट नाकुन हळा परकिट. बारित्ते नना जीवातेन मनंतन, मिमेट इंका जीवातेन मंदकिर.

20 अल्हा जर्गतस्के, नना बाबाना लोप्पो, मिमेट ना लोप्पो, नना मीलोप्पो मंतन इंचि मीकु तेळियार.

21 बोर अय्ते नना वेहता आदेसकुन स्विकार कीसि अवुन पीसि ताकंतोर, ओर नाकुन पावरम कियानोर आंदुर. बोर अय्ते नाकुन पावरम कीतोर, ओन नावा बाबालगुडा पावरम कीतोर. पजा ननागुडा ओन पावरम कीसि, नना कुद्दु ओन्क दिस अरकन,” इंचि येसु वेहतोर.

22 पजा इस्कारियोत नाटेनोर आयका, इंकावरोर यहदल, “सामि, निमे माके बारि दिस अरकिन? दुनियातोरुकुं बारि दिस्सिन?” इंचि पूसकीतोर.

23 अस्के येसु ओन्क जवाब हीतोर, “नाकुन पावरम कियानोर अंतोर नना वेहता पोल्लेनपोर्रो ताकंतुर, आनि नावा बाबाल ओर्कुन जीवा कीतोर. असंतोन्गा मोमोट होंचि ओनालोप्पो जेगा पीतोम.

24 नाकुन पावरम कियवोर, ओर नावा पोल्लेनपोर्रो ताकोर. मिमेट केंजना पोल्लें नावां आयों, गानि नाकुन लोहचीता बाबानव आंदुं.

25 इव पोल्लें नना मीवातोनि मननेकेन वेहतन.

26 अय्नागानि, बाबाल नावा पोरोल्ले लोहना सहायम कियानोर, इत्ते पवित्र आत्मा, मीकु अन्नि पोल्लें करहार. अचोने आयका, नना मीकु वेहता अन्नि पोल्लें अद मीकु मति कीसि हिय्यार.

27 नना मीकु सांतितुन हीसि होंचंतन. दुनिया हियानसोंटा सांति आयो, गानि नना नावा सांतितुन मीकु हीसंतन. अदुनहाटी मिमेट मीवा मनसुन कस्टमते वाटमट, वेरिया हियमट.

28 नना लक्कु होंचंतन, गानि मर्रा तिरियसि मीहेके वांतन, इंचि नना मीकु वेहचि मत्तन, अदुन मिमेट केंजतिरे गदा! अय्ते, मिमेट नाकुन निजम पावरम कियानय्ते, नना बाबानाहेके होंचंतन इंचि वेहतस्के मिमेट कूस आसि मंदकिट. बारित्ते बाबाल नाकन्ना पेद्दोड आंदुर.

29 इव अन्नि पोल्लें निजम आयनुं अस्के, मिमेट विस्वासम कियगोम इंचि, नना इव पोल्लें जर्गका मुन्नेन वेहतन.

30 इंका मीतोनि एक्को वळकोन. बारित्ते दुनियापोर्रो राज्येम एलाना अदिकारि वासेकेन मंतोर. वासि अयना नावापोर्रो ओन्क बतले अदिकारम हिल्ले.

31 अयना, नना बाबान पावरम कीतन इत्ता पोल्ले, दुनियाक तेळियगोम इंचि, बाबाल नाकु हीता आदेस परकारमे नना कीतन. सेरे तेदट! मनम इगोटाल दाकोम,” इंचि येसु इत्तोर.

15

येसु वेलितसंतोर, विस्वासुल्क पंगांसंतोर

1 येसु इल्हा वेहतोर. “निजम अंगुर वेलितसंतोन ननाने आंदुन. नावा बाबाल बारे अंगुर तोटातुन बेस हळकुनानोर आंदुर. 2 नावा पंगानाल बव पंगांक अय्ते कायां हादोंगो, अवुन ओर नरकिस पोहांतोर. आनि हादाना पंगान बारे, इंका बेस हादगोम इंचि अवुना कोस्सन कत्रिचचंतोर.

3 दीनकन्ना मुन्ने नना मीकु वेहता पोल्लेहेंदाल मिमेट साप आतिर.

4 मिमेट नावातोनि बस्केळक कलियसि मंटु, अस्के ननागुडा इंका मीवातोनि बस्केळक कलियसि मनंतन. पंगा वेलिक अंटिस मनाकॉटे दान्क कायां हादों, अल्हेन मिमेटगुडा नावातोनि कलियसि मनाकॉटे बेसता कबाहक किया परिर.”

5 “ननाने अंगुर वेलितसंतोन आंदुन, मिमेट बारे पंगांसंतोर आंदिर. बोर अय्ते नातोनि कलियसि मन्तुरो, नना बोरतोनि कलियसि मनंतनो, ओर वेल्लेन बेसता कबाहक कीतुर. नाहगटाल वेरे आसि मंचि, मिमेट बतले किया परिर.

6 बोर अय्ते नावातोनि कलियसि मन्नुरो, ओर्कुन कबळक ओज्जुवा पंगान पोहताप पोहचियमळ जर्गता. पजा अव पंगां वत्तुतस्के, अवुन जमा कीसि तडमिते वाटसि बोळसंतुर.

7 मिमेट ना लोप्पो आनि नावा पोल्लें मीलोप्पो मनानय्ते, मीकु गावाले मत्तद बतल तल्किना, अद मीवाहाटीं कियमळ जर्गता.

8 मिमेट वेल्लेन बेसता कबाहक कियानय्ते नावा बाबांक वेल्लेन महिमा दोर्कता. दीनहेंदाल मिमेट नावा सिस्युल्क इंचि दिस अरंतिर.

9 नावा बाबाल नाकुन बल्हा पावरम कीतोर, अल्हेन नना मीकुन पावरम कीतन. मिमेट नावा पावरमते निलसि मंट.

10 नना नावा बाबाल वेहता आदेसकुनपोरों ताकसेके, ओना पावरमते निलसि मंतन. अल्हेन मिमेटगुडा नना वेहता आदेसकुनपोरों ताकतिरित्ते, नावा पावरमते निलसि मंनंतिर.

11 नावा कुसि मीलोप्पो मनना, आनि मीवा कुसि पुरागा आयना इंचि, नना मीकु इव पोल्लें वेहतन.”

12 “नना मीकुन बल्हा पावरम कीतनो, अल्हेन मिमेटगुडा वरोंक-वरोर पावरम कीकुंट, इदे नावा आदेस आंद.

13 वरोर मनकल ओना दंटागानाहाटीं ओना जीवा हियमळकन्ना पेद्दा पावरम बद्दे आयो.

14 नना हियना आदेसकुनपोरों गिंटा मिमेट ताकानय्ते, मिमेट नावा दंटातोर आदिर.

15 इंदकेटाल नना मीकुन दासुल्क इंचि केयोन. बारित्ते मालक बतल कीतोर अद ओना दासुंक बतल तेळियो. गानि नना अय्ते मीकुन दंटातोर इंचि केयंतन. बारित्ते नावा बाबाल नाकु वेहता अन्नि पोल्लें मीकु वेहतन.

16 नाकुन मिमेट पेरॉ हिल्लिर, गानि मीकुन नना पेरतन. पेरसि, मिमेट बेसता कबाहक कीसेक बेस पलम हियगोम, इंचि नना मीकुन निलाहतन. अल्हा कीति, मिमेट नावा पोरोल्ले बाबान बतल तल्किनागानि, अद मीकु दोर्कता.

17 मिमेट वरोंक-वरोर पावरम कीकुंट, इद मीकु नावा आदेस आंद.”

दुनियातोर मीकुन हय्सुर

18 “ओक्कला दुनियातोर मीकुन हय्साकोटे, मीकन्ना मुन्ने ओर नाकुन हय्सा हिल्लुर, इंचि मीकु एर्के.

19 मिमेट दुनियातोर्क नच्चताप मनानय्ते, ओर मीकुन पावरम कीसि मन्नेर. गानि मिमेट दुनियातोर्क नच्चताप मंचेके हिल्लिर. नना मीकुन इद दुनियाताल पेरतन. अदुनहाटीं दुनियातोर मीकुन हय्सुर.

20 वरोर दासुड ओना मालकुंकन्ना पेद्दोड आयोर, इंचि नना दीनकन्ना मुन्ने वेहता पोल्लेतुन मिमेट मति इर्कुंट. ओर नाकुने तकलिप कीतुर अय्ते, मीकुनगुडा तकलिप कीतुर. ओर नावा पोल्ले परकारम ताकानय्ते, मीवा पोल्ले पोरोंगुडा ताकंतुर.

21 नाकुन लोहचीतोन ओर एरपाट किय्युर, अदुनहाटीं ओर मीकुन नावा पोरोलहाटीं इव अन्नि तकलिप्क कीतुर.”

22 “उंदि वेला नना वासि ओरतोनि वळ्ळाकोटा मंचि मत्ते, ओरपोरों पापम मना कोनवळ. गानि इंदके मात्रम ओर्क ओरा पापमताल तपिच्चुनालय हरि हिल्ले.

23 नाकुन हय्सवोर, ओर नावा बाबान इंका हय्सोर.

24 वैरे बोर किया हिल्लोर असोटा, अद्बूतामाता कबाहक नना कियाकोटा मंचि मत्ते, ओरपोरों पापम मना कोनवळ. गानि इंदके ओर नना कीता अद्बूतामाता कबाहकून हळसिगुडा, नाकुन, नावा बाबान हय्सेक हिल्लुर.

25 नाकुन हय्साकोटा मनालय बतले कारनम हिलाकोन्ना ओर नाकुन हय्सुर, इंचि ओरा दर्मसास्त्रमते रासि मंता. अद पोल्ले पुरागा आयानाहाटीं गें इल्हा जर्गता.

26 गानि बाबानाहेंदाल नना लोहना सहायम कियानोर, इत्ते बाबानगटाल वायना सत्तेम आत्मा, बस्के अय्ते मिहगा वायार. अद मीकु नावा बारेमते गवाइ वेहंता.

27 नना सेवा सुख कीतस्केटाल मिमेट नातोनि मत्तिर, अदुनहाटीं मिमेटगुडा नावा बारेमते गवाइ वेहंतिर.”

16

- 1 “मिमेट विस्वासमताल पजोळ्क आयामान्नि, इंचि मीकु इव पोल्लें वेहतन.
- 2 विस्वासम कियवा पेद्दाल्क मीकुन दर्मसास्त्रम कराहना लोहकुनाल पेच्हांतुर. इंका मीकुन हळ्कना हरेक मनकल, नना पेनदा सेवा कीसंतन, इंचि इनकुनना कालम वायाना मंता.
- 3 बाबाल आनि नना बोर आंदुम, ओर्क तेळियो, अदुनहाटीं ओर मीकुन अल्हा कीतुर.
- 4 अद कालम वातस्के, नना वेहता पोल्लें मीकु मति वायाना इंचि, इव पोल्लें नना मीकु वेहचंतन. इव पोल्लें नना मीकु मुन्ने वेहा हिल्लेन, बारित्ते नना मीतोने मत्तन.”

पवित्र आत्माता कबाहक

- 5 “नना अय्ते इंदके नाकुन लोहतोनगा मल्लिस होंचंतन. गानि निमे बगा दांतिन इंचि मीवा लोप्पोटाल वरोरगुडा नाकुन पूसकीसेक हिल्लिर.
- 6 नना इव पोल्लें मीकु वेहताहेका, मिमेट वेल्लेन दुक्कमते मंतिर.
- 7 अयना नना मीकु निजम-निजम वेहासेक, नना मिहागटाल होत्ते, मीके पायदा आयार. बारित्ते नना होनाकॉटे सहायम कियानोर मिहगा वायोर. नना होनानय्ते ओन मिहगा लोहंतन.
- 8 ओर वातस्के पापम बारेमते, सत्तेम बारेमते आनि न्यायम बारेमते लोकुल्लुकुन ओप्संतोर.
- 9 ओर नापोरें विस्वासम ईरका पापम कीतुर, इंचि सहायम कियानोर ओर्क हुप्संतोर.
- 10 नना बाबानाहेके होंचंतन, मर्रा मिमेट नाकुन हळा परिर. अदुनहाटीं सहायम कियानोर सत्तेमता बारेमते लोकुल्लुकुंक तेळियागोट्टिस वेहंतोर.
- 11 इंका इद दुनियापोरें राज्येम एलाना अदिकारिना न्यायम अय्ते मुन्नेन आसि मंता. अदुनहाटीं सहायम कियानोर न्यायमता बारेमते लोकुल्लुकुंक तेळियागोट्टिस वेहंतोर.
- 12 मीकु वेहालय नहगा इंका वेल्लेन पोल्लें मंता, गानि अबुनंता इंदके ओर्सुकुना परिर.
- 13 गानि सत्तेम आत्मा वातस्के, अद मीकु पूरा सत्तेमतुन हुप्सार. अद दाना मनसुंक वाताप वळ्को, गानि बतल अय्ते अद बाबानगटाल केंजंता, अदे वेहंता. इंका मुन्ने जर्गना बारेमतेगुडा वेहंता.
- 14 अद नाहगटाल तेंडकुंचि, वासि मीकु वेहंता. अल्हा कीसेके अद नाकु कदर हीता.
- 15 बव अय्ते बाबानवो, अव अन्नि नावां आंदुं, अदुनहाटींगे, अद नाहगटाल तेंडकुंचि, वासि मीकु वेहंता, इंचि नना मीकु वेहतन.
- 16 इंका जेरासेप आते, मिमेट नाकुन हळा परिर, पजा इंका जेरासेपुंक, मिमेट नाकुन मर्रा हळ्किर,” इंचि येसु सिस्युल्लुकुंक वेहतोर.

दुक्कम कुसिते मारियंता

- 17 इद पोल्ले केंजसि, ओना इच्चुर सिस्युल्लुकु वरोंक-वरोर पूसकीसेक, “इंका जेरासेप आते, मिमेट नाकुन हळा परिर, पजा इंका जेरासेपुंक, मिमेट नाकुन मर्रा हळ्किर, बारित्ते नना बाबानगा दांतन, इल्हा मनाकु येसु बारि वेहचंतोर मरि?
- 18 इंका जेरासेप आते इनना पोल्लेक अर्तम बतल? असल ओर इनानद बतलो मनाकु अर्तमे आसेक हिल्ले,” इंचि वळ्कुकुनालय दलगतुर.
- 19 सिस्युल्लुकु ओन पूसकीतुर इंचि येसुंक तेळियता. अस्के येसु ओर्क इल्हा वेहतोर, “इंका जेरासेप आते, मिमेट नाकुन हळा परिर, पजा इंका जेरासेपुंक, मिमेट नाकुन मर्रा हळ्किर, इत्ता नावा पोल्लेता बारेमते मिमेट वरोंक-वरोर बतां पूस कीकुंचंतिर?
- 20 नना निजम-निजम वेहासेक, मिमेट मोल्लुकुंचि-मोल्लुकुंचि अळकिर, गानि दुनियातोर कुसिते मनानुर. मीकु दुक्कम वासि अळकिर, गानि मीवा दुक्कम कुसिते मारियंता.
- 21 उंदि मुरतळ दाना एरपूराना वेला एवतस्के, नोप्पि वासि वेल्लेन दुक्कमते मनंता. गानि दान्क पेडालो-पेगिडो पुटतस्के, उंदि जीवा दानहेंदाल इद दुनियाते वाता इत्ता कुसिते, मुन्ने बोगांच्ता तकलिपकु मर्रा दान्क मतिगुडा मन्नों.

22 इदगुडा अल्हेन! इंदके दुक्कम वांता, गानि नना मीकु मर्रा कलियंतन अस्के, मिमेट वेल्लेन कूस आकिर. अद कुसितुन मिहागटाल बोरे तेंडकुना पसर.

23 अद रोज मिमेट नाकुन बदे तल्किर. गानि नना निजम-निजम वेहासेक, मिमेट नावा पोरोल्ले बाबान बतल तल्किनागानि ओर मीकु अदुन हीतोर.

24 इदवेरदाका मिमेट ना पोरोल्ले बतले तल्का हिल्लिर. तल्कट मीकु दोर्कार, अस्के मीवा कुसि पूरा आयार.”

25 “इव पोल्लें नना मीकु उदाहरनकु हीसि वेहतन. गानि मुन्ने इंका बस्केने उदाहरनकु हीसि वेहोन. बाबाना बारेमते बल्हा मत्तद अल्हा कुल्ला कीसि वेहना वेला वायनद मंता.

26 अद रोज मिमेट नावा पोरोल्ले ओन तल्ककिट. अस्के नना मीवाहाटी बाबांक विनंति कीतन इंचि मीकु वेहासेक हिल्लेन.

27 बारित्ते मिमेट नाकुन पावरम कीतिर, नना पेनदागटाल वातन इत्ता पोल्लेतुन विस्वासम कीतिर, अदुनहाटी कुदुदु बाबाले मीकुन पावरम कीसंतोर.

28 नना बाबानगटाल इद दुनियाते वातन. इंदके मर्रा इद दुनियातुन होळसि बाबानाहेके होंचंतन,” इंचि येसु वेहतोर.

29 अस्के सिस्स्युल्क, “हळा! इंदके निमे उदाहरन हीसि वळ्कसेक हिल्लिन, कुल्ला-कुल्ला वळ्कसतिन.

30 नीकुन बोरे बतल पूसकियना अब्सरम हिल्ले. नीकु अन्नि तेळियंता इंचि माकु एर्का मंता. दीनहेंदाल, निमे पेनदागटाल वातिन, इंचि मोमोट विस्वासम कीतोम,” इंचि येसुन इत्तुर.

31 अस्के येसु, “इंदके अयना मिमेट विस्वासम कीतिरा?

32 हुळ्ळट, नाकुन वरोने होळसि, मिमेट बेकेटोर हेके आसि बोना लोन ओर होनना वेला वायनद मंता, अद वासे मंता. अयना नना वरोन हिल्लेन, नातोनि बाबाल मंतोर.

33 नाहगटाल मीकु सांति दोर्कि, इंचि इव पोल्लें मीकु वेहतन. दुनियाते मीकु तिप्पल्क-कस्टाल्क वायनुं, गानि नना दुनियाता ताकततुन गेल्सतन, अदुनहाटी मिमेट बेस दैरेनेमते मंदु,” इंचि येसु वेहतोर.

17

येसु सतताहाटी पारतना कीतोर

1-4 इव अन्नि पोल्लें वेहमळ आतस्के, येसु पोर्गे स्वर्गमताहेके हळ्सेक इल्हा पारतना कियालय दल्गतोर. “बाबा, अंतोर लोकुल्कुनपोर्गे निमे नाकु अदिकारम हीतिन. दीनहेंदाल निमे बोर्कुन अय्ते नाकु हीतिनो, ओर्क अंतोर्क नना बस्केळ्क पिस्सना पिस्वर हीकन. निमे वरोने सत्तेम पेनदुन आदिन, बोरे अय्ते नीकुन, निमे लोहता येसु किरिस्तुन एरपाट कीतुरो ओर्के आ बस्केळ्क पिस्सना पिस्वर दोर्कता. निमे नाकु बव कबाह्क अय्ते कियालय हीतिनो, अबुन पुरागा कीसि, नना बूमिपोर्गे नीवा महिमा कीतन. इंदके नावा वेला एल्ता. अदुनहाटी निमे नाकु कदर हीते, नना नीवा महिमा कीतन.

5 बाबा, दुनिया पुट्टुका मुन्ने नना नीतोनि मननेके बसोंटा महिमा मत्तानो, असोंटा महिमा इंदकेगुडा नी मुन्ने हीम.”

येसु ओना सिस्स्युल्कुनाहाटी पारतना कीतोर

6 “ई दुनियाताल निमे नाकु हीता लोकुल्कुंक, नना नीवा पोरोल्लुन हुपिस्तन. ओर बस्केळ्क नीवोर्के आंदुर. ओर्कुन निमे नाकु हीतिन. ओर नीवा पोल्लेपोर्गे ताकतुर.

7 निमे बतल अय्ते नाकु हीतिनो, अव अन्नि निहेंदाले दोर्कतव इंचि इंदके ओर्क तेळियता.

8 बारित्ते बव पोल्लें अय्ते निमे नाकु हीतिनो, अबुन नना ओर्क एविचतन. ओर अबुन ओप्कुत्तुर. नना निजम निहागटाले वातन, नाकुन निमेन लोहतन इंचि ओर विस्वासम कीतुर.

9 ईराहाटीगे नना पारतना कीसंतन. दुनियाताहाटी आयो. निमे बोर्कुन अय्ते नाकु हीतिनो, ओर नीवोरे इंचि ओराहाटीगे नना पारतना कीसंतन.

10 नहगा मनना अन्नि पोल्लें नीवंगें आंदुं, नीवां अन्नि पोल्लें नावां आंदुं. अवुनहेंदाल नाकु महिमा दोर्कता.

11 इंदकेटाल नना इद दुनियाते मनोन. नना निहगा वासंतन. गानि ईर ई दुनियाते मनंतुर. पवित्र बाबा! इंदके मनम उंदि आसि मत्ताप, ईरगुडा उंदि आसि मनालय, निमे नाकु हीता नीवा पोरोलता ताकतते ईरकुन कापाळा.

12 नना ई दुनियाते ईरतोनि मननेके, निमे नाकु हीता नीवा पोरोलता ताकतते ओर्कुन कापाळतन. सिराप, दर्मसास्त्रमते रासता पोल्ले पूरा आयनाहाटीं बोर अयते नासडेम आयना मत्ता ओन होळसि, वेरे बोरे नासडेम आया हिल्लुर, नना ओर्कुन कापाळतन.

13 नना इंदके निहगा वासंतन. गानि नावा आनंदम ओरा लोप्पो पुरागा आयना इंचि, इव पोल्लें नना इद दुनियाते मननेकेन वेहंतन.

14 नीवा पोल्ले नना ईरकु वेहतन. नना इद दुनियातोण आयोन. अल्हेन ईरगुडा इद दुनियातोण आयुर. अदुनहाटीं ई दुनियातोण ईरकुन हयसेक हिल्लुर.

15 निमे ईरकुन इद दुनियाताल ओम इंचि नना पारतना कीसेक हिल्लेन, गानि पेद्दा देय्यमताल* ईरकुन कापाळा इंचि पारतना कीसंतन.

16 नना ई दुनियातोण आयोन, अल्हेन ईरगुडा ई दुनियातोण आयुर.

17 नीवा पोल्ले सत्तेम आंद, नीवा सत्तेमते ओर्कुन पवित्र कीम.

18 बल्हा अयते निमे नाकुन ई दुनियाते लोहतिन, अल्हेन नना ईरकुन दुनियाते लोहतन.

19 नीवा सत्तेमते ओर पवित्र आयगोम इंचि, नावद ननेन उंदि पवित्र मोक्कुनलेहका आतन.”

अंतोर विस्वासुल्कुनाहाटीं येसु पारतना कीतोण

20 “नना सिराप ईराहाटींगे पारतना कीसेक हिल्लेन, गानि बोर अयते ईर वेहना पोल्लेतुण केंजसि नापोरें विस्वासम ईरंतुर, ओराहाटींगुडा नना पारतना कीसंतन.

21 बाबा! बल्हा अयते निमे नहगा, नना निहगा उंदि आसि मंतोमो, अल्हेन ओरगुडा उंदि आसि मननाहाटीं पारतना कीसंतन. नाकुन निमेन लोहतिन, इंचि दुनियातोण विस्वासम कियना इत्ते, ओरगुडा मनाटे उंदि आयापीता.

22-23 निमे ना लोप्पो मंतिन, नना नी लोप्पो मंतन. निमे नाकु हीता कदरतुण नना ओर्क हीतन. मनम इंदके बल्हा उंदि आसि मंतोमो, अल्हेन ओरगुडा उंदि आसि मंदना. अल्हा मत्तेने, नाकुन निमे लोहतिन आनि नाकुन पावरम कीताप ओर्कुनगुडा पावरम कीसंतिन, इंचि दुनियाक एरपाट आयापीता.”

24 “बाबा! बोर्कुन अयते निमे नाकु हीतिनो, ओर निमे नाकु हीता कदरतुण ह्ळानाहाटीं, नना बगा मत्ते अगा ओरगुडा मनना इंचि, नना पारतना कीसंतन. बारित्ते इद दुनिया पुट्टका मुन्नेन निमे नाकुन पावरम कीतिन.

25 बाबा! निमेन नीतिमंतुण आदिन. ई दुनिया नीकुण एरपाट किय्यो. गानि नना एरपाट कीतन. अल्हेन नाकुन निमेन लोहतिन इंचि ई सिस्युल्क एरपाट कीतुर.

26 ना पोरोटा नीवा पावरम ओरा लोप्पो मननाहाटीं आनि ननागुडा ओरा लोप्पो मनना इंचि, नीवा पोरोलतुण ओर्क एरपाट कीसीतन. इंका मुन्नेगुडा एरपाट कीसि हीसेक मनंतन,” इंचेके येसु पारतना कीतोण.

18

येसुन दोकाते पीसि ओंतुर

(मत्तयाल 26:47-56; मरकुस 14:43-50; लूकाल 22:47-53)

1 इव पोल्लें वळकमळ आतंका, येसु ओना सिस्युल्कुनतोनि, किद्रोन इनना कुरेटा लोद्दि दाटसि हळ्बेटा बाजूंक होत्तुर. अगा जयतुण मराकुना तोटा मत्ता, आ तोटाते येसु, ओना सिस्युल्क होळियतुर.

* 17:15 पेद्दा देय्यमताल इत्ते, करेव इनना देय्यमता कय्दाल.

2 येसु ओना सिस्युल्कुनतोनि अद तोटाते वेल्लेन मल्लां वासि मत्तोर. अदुनहाटीं ओन्क दोका हियना यहुदांकगुडा अद जेगा एरपाट मत्ता.

3 अय्ते यहुदल सिपाइल्कुना गेंगुन, पेद्दा पेर्मालोर, परिसिल्क लोहता गुळितगा कावेल कियानोर्कुन पीसि अगा वातोर. ओरतोनि दिव्ती, कंदिलि, लडाइ कियना विसें मत्तां.

4 ओन्क बतल जर्गनद मंता इत्तदुन एरपाट कीसि, येसु मुन्नेळ्ळक होत्तोर. होचि, “मिमेट बोन पहकसंतिर?” इंचि ओर्कुन पूसकीतोर.

5 अस्के ओर, “नासरेत नाटेना येसुन पहकसंतोम,” इंचि जवाब हीतुर. पजा येसु, “ओन ननाने आंदुन,” इंचि इत्तोर. येसुंक दोका हियना यहुदलगुडा ओरतोनि निलसि मत्तोर.

6 येसु ओर्कुन, “ओन ननाने आंदुन,” इंचि इत्तस्के, ओर पजोळ्ळक जरगिसि बूमिपोर्रो अरतुर.

7 येसु, “मिमेट बोन पहकसंतिर?” इंचि मर्रा उंदि मल्ला पूसकीतोर अय्ते ओर, “नासरेत नाटेना येसुन पहकसंतोम,” इंचि इत्तुर.

8 अस्के येसु, “ओन ननाने आंदुन इंचि वेहतन गदा! ओक्कला मिमेट नाकुन पहकानय्ते, ईरकुन होना हीम्टु,” इंचि इत्तोर.

9 बारित्ते, “निमे नाकु हीतोरव्टेटाल, नना वरोनिका तप्सोना हिय्या हिल्लेन,” इंचि ओर इत्ता पोल्ले पुरागा आयगोम इंचि अल्हा इत्तोर.

10 सिमोन पत्रु इनना सिस्युनगा उंदि पेद्दा कसेर मत्ता. ओर अद कसेटे वरोन हीतोर अय्ते, पेद्दा पेर्माना वरोर जीतागाना तिना केव नेमसि अरता. आ जीतागाना पोरोल मल्लकोसि.

11 गानि येसु, “नीवा कसेर दाळोतगा* ईर्रा. नावा बाबाल नाकु हीता तिप्पलता वाटिते नना उना मन्निआ?” इंचि पत्रुन इत्तोर.

12-13 अस्के अगा वाता सिपाइल्कुना गेंग, ओरा दरोगाल आनि गुळितगा कावेल कियानोर येसुन दोर्कापीसि दोह्चि वाटतुर. दोह्चि वाटसि, मोट्टा मोदाला ओन हन्ना इनानोना ओतुर. ई हन्नाल कयपा इनानोना मामाल आंदुर. अद वर्सा ई कयपाल पेद्दा पेर्माल मत्तोर.

14 “लोकुल्कुनाहाटीं वरोर मनकल हाते बेसे,”* इंचि यहुदि पेद्दाल्कुना मुन्ने वळ्ळिसि मत्तोर, ओर ईर कयपाल आंदुर.

पत्रु येसुना बारेमते आबद्दम वळ्ळंतोर

(मत्तयाल 26:69-70; मरकुस 14:66-68; लूकाल 22:55-57)

15 येसुन अल्हा पीसि होननेके सिमोन पत्रु आनि इंकावरोर सिस्युड, येसुन पज्जो होत्तुर. आ सिस्युड पेद्दा पेर्माना एर्कातोर मत्ताहेंका, पेद्दा पेर्माना दाराते येसुनतोनि ओरगुडा होत्तोर.

16 गानि पत्रु पलाते गलमातगेन नित्तिसि मत्तोर. अदुनहाटीं पेद्दा पेर्मांक एर्का मत्ता आ सिस्युड पलाते वासि, गलमातगा देकरेकहाटीं मत्ता मुरतदुन पूस कीसि, पत्रुन लोप्पो केय्चि तत्तोर.

17 गलमातगा देकरेकते मत्ता आ पासि कबळ कियाना मुरतळ, “निमेगुडा आ मनकना सिस्युल्कुनाल वरोन आंदिन गदा!” इंचि पत्रुन पूसकीता. अय्ते पत्रु, “नना आयोन,” इंचि इत्तोर.

18 अद वेलाते वेल्लेन पीनि मत्ता. अदुनहाटीं सेवाकुल्क आनि गुळितगा कावेल कियानोर, तडमि मासि, सेका कासेके मत्तुर. अगा पत्रुगुडा ओरतोनि नित्तिसि आरसेक मत्तोर.

पेद्दा पेर्माल येसुन सवाल पूसकियमळ

(मत्तयाल 26:59-66; मरकुस 14:55-64; लूकाल 22:66-71)

19 पजा पेद्दा पेर्माल येसुन, ओना सिस्युल्कुना बारेमते आनि ओना कराहमळ बारेमते पूसकीतोर.

20 अस्के येसु, “नना अंतोरा मुन्ने कुल्ला-कुल्ला वळ्ळतन, यहुदिल्क अंतोर जमा आयना दर्मसास्त्रम कराहना लोह्कुने, गुळिने नना बस्केळ्ळक कराहतन. नना मक्किचि बतले वळ्ळका हिल्लेन.

* 18:11 दाळोतगा नडिक उंदि संचि मंता अय्ते कसेर ईरतुर. इद पोल्ले आदिलाबाद गोंडिताल येततद आंद. ☆ 18:14 योहान 11:50

21 अयना इद सवाल नाकुन बारि पूसकीसंतिन? नना वेहतदुन केंजतोर्कुन पूस कीम, ओर्क एरपाटे नना बतल वेहतन,” इंचि जवाब हीतोर.

22 येसु अल्हा इतस्के, दग्गेरा नित्तिसि मत्ता वरोर गुळितगा कावेल कियानोर, “पेट्टदा पेर्माक इल्हेन जवाब हीतिना?” इंचि येसुना सेंपापोर्रो तंतोर.

23 अस्के येसु, “नना वळकतव्टे बतलन्ना तप्पु मत्ते इगे अंटोर्क वेहाट. गानि नना वळकतद निजम आते, नाकुन तनंतरि बारि?” इंचि पूसकीतोर.

24 पजा आ हन्नाल, दोह्वि मननेकेन येसुन कयपा इनना पेट्टदा पेर्मानिके लोह्वीतोर.

पत्रु आबद्दम वळकता वळकुळे गोगोड कूसंता

(मत्तयाल 26:71-75; मरकुस 14:69-72; लूकाल 22:58-62)

25 सिमोन पत्रु तडमितगा सेका कासेके मत्तस्के, अगा मत्तोर इच्चुर लोकुल्क ओन, “निमेगुडा ओना सिस्युल्कुनाल वरोन आदिन गदा?” इंचि पूसकीतस्के, “नना आयोन,” इंचि पत्रु आबद्दम वळकतोर.

26 पत्रु बोना केव्दुन अय्ते नर्कतोर, ओना जीवातोर वरोर, पेट्टदा पेर्मानगा सेवा कीसेक मत्तोर. ओर पत्रुन, “अद रोजु जय्तुन मराकुना तोटाते नीकुन नना, ओनतोनि ह्वतन,” इंचि इत्तोर.

27 मर्रागुडा पत्रु, “नना आयोने आयोन,” इंचि आबद्दम वेहतोर. ओर अल्हा इत्ता इन्मळे, गोगोड कूसता.

पिलातुस इनना राज्यपालना मुन्ने येसुन निलाहंतुर

(मत्तयाल 27:1-2, 11-31; मरकुस 15:1-20; लूकाल 23:1-25)

28 पजा हक्केनेन येसुन ओर कयपानगटाल रोम सरकारता राज्यपालना राजवाडाते ओतुर. अस्के रिवाज परकारम अपवित्र आयाकोंटा मनालय आनि दाटसि होनना पंडुगुना गाटो तिनगोम, इंचि ओर राजवाडाते नेंगा हिल्लुर.

29 अदुनहाटी रोम सरकारता राज्यपाल पिलातुस, पलाते ओरगा वासि, “ई मनकनपोर्रो मिमेट बद कसूर ताससंतरि?” इंचि ओर्कुन पूसकीतोर.

30 अस्के ओर, “ईर कसूर कियाकोंटे मंचि मत्ते, मोमोट ईन नीकु अप्पजेप्पा कोन्नेरम,” इंचि जवाब हीतुर.

31 “अल्हा अय्ते ओन ओसि, मीवा सतता नियम परकारम मिमेटे ओना न्यायम कीम्तु,” इंचि पिलातुस इत्तोर. अस्के यहुदिल्क, “हामुर सिक्सा हियना अदिकारम सिराप, रोम सरकारस्के मंता,” इंचि इत्तुर.

32 अद अल्हा बारि जर्गता इत्ते, येसुंक बसोंटा हामुर वायनद मंता इंचि येसु कुद्दु वेहता पोल्ले पुरागा आयनाहाटी अल्हा जर्गता.

33 पजा पिलातुस ओना राजवाडाते होंचि येसुनलोप्पो केया वेहतोर. केय्सि, “निमे यहुदिल्कुना राजाना?” इंचि पूसकीतोर.

34 अस्के येसु, “ई पोल्ले नी इच्चटा निमेन इंचंतिना? हिलाकोंटे नावा बारेमते नीकु बोर्न्ना वेहतुरा?” इंचि पिलातुसुन पूसकीतोर.

35 अय्ते पिलातुस, “नाकुन निमे यहुदि इनकुंचंतिना? कुद्दु नीवा लोकुल्क आनि ओरा पेर्मालीर नीकुन नाकु अप्पजेपतुर. निमे बतल कीतिन?” इंचि जवाब हीतोर.

36 अस्के येसु, “नावा राज्येम ई दुनियाक संबंदिस्तद आयो. ओक्कला नावा राज्येम ई दुनियाक संबंदिस्तद आसि मत्ते, नाकुन यहुदि पेट्टदाल्कुंक अप्पजेपकोंटा नावा सेवाकुल्क लडाइ कीसि मननेर. गानि इंदके नावा राज्येम ई दुनियाक संबंदिस्तद आयो,” इंचि जवाब हीतोर.

37 अस्के पिलातुस, “अल्हा अय्ते निमे राजाना?” इंचि इत्तोर. अय्ते येसु, “निमेन इंचंतिन नाकुन राजाल इंचि! नना अय्ते सत्तेम बारेमते गवाइ वेहालय पुटतन. इद कारनमहाटीगे नना ई दुनियाते वातन. सत्तेमते ताकाना हरेक मनकल, नावा अल्किरतुन केंजंतोर,” इंचि वेहतोर.

38 अद केंजसि पिलातुस, “सत्तेम इत्ते बतल?” इंचि येसुन पूसकीतोर. अल्हा पूस कीसि, पलाते यहुदिल्कुनगा होत्तोर. होंचि, “नाकु ईना लोप्पो अय्ते बतले कसूर दिस्सेक हिल्ले.

39 गानि दाटसि होनना पंडुगुना रोज, एडादिक उंदि मल्का, जेलने मत्तो न वरोन होळसना, इंचि मीवा उंदि रिवाज मंता. अय्ते मीवाहाटी नना ई यहुदिल्कुना राजान होळसमळ मीकु इस्टमेना?” इंचि ओर्कुन पूसकीतोर.

40 अस्के ओर वरगेयसेके मर्रा, “मान्नि ओन होळसमा, मावाहाटी बरब्बान होळसा,” इंचि इत्तुर. ई बरब्बल इनानोर, पेद्दा दोंगल मत्तोर.

19

येसुक हामुर सिक्सा हीतुर

1 अस्के पिलातुस येसुन दोर्कापीसि पोट्टे देब्बां तना वेहतोर.

2 सिपाइल्क बारे, उंदि हाहकुना वेलितुन किरिटम कीसि, येसुना तल्लक तासतुर. तासि ओन्क नेळि पंडि रंगुना कपडिं केराहतुर.

3 केराहता पजा, “यहुदिल्कुना राजांक जय” इंचेके ओना सेंपापोर्रो तंतुर.

4 पिलातुस मसंदि मल्का पलाते पेय्सि, “हुळाट, ओन्क सिक्सा हियालय, नाकु ओनालोप्पो बतले कसूर दोर्काहिल्ले, इद मीकु तेळियना इंचि नना ओन मीहेके पलाते तच्चंतन,” इंचि वेहतोर.

5 पजा येसु हाहकुना किरिटम, नेळि पंडि रंगुना कपडिं केरसि पलाते पेय्स्तोर. अस्के पिलातुस, “हुळाट ई मनकन,” इंचि ओर्कुन इत्तोर.

6 येसुन ह्ळसि, पेद्दा पेर्मांलोर आनि गुळितगा कावेल कियानोर, “ओन कूसुनपोर्रो वेलाड वाटा, ओन कूसुनपोर्रो वेलाड वाटा,” इंचि वरगेयतुर. अस्के पिलातुस ओर्कुन, “ओन ओसि मिमेटे कूसुनपोर्रो वेलाड वाटट, नाकु ओनालोप्पो बदे कसूर दोर्काहिल्ले,” इंचि इत्तोर.

7 अद केंजसि यहुदिल्क इल्हा जवाब हीतुर, “माकु उंदि नियम मंता. ओर, नना पेनदा मर्रिन, इंचि इत्तोर. अदुनहाटी मावा नियम परकारम ओर हायमळे गावाले,” इत्तुर.

8 ओर अल्हा इन्मळतुन केंजसि, पिलातुस वेल्लेन वेरियतोर.

9 अस्के पिलातुस येसुन मर्रा राजवाडाते ओसि, “निमे बगाटाल वातिन?” इंचि पूसकीतोर. गानि येसु बतले जवाब हिया हिल्लोर.

10 अदुनहाटी, पिलातुस येसुन, “निमे नातोनि बारि वळ्कसेक हिल्लिन? नीकुन होळसियना आनि कूसुनपोर्रो वेलाड वाटना अदिकारम नाके मंता, इंचि नीकु एर्का हिल्लेना?” इंचि पूसकीतोर.

11 अस्के येसु, “पोर्रो मनना पेन आ अदिकारम नीकु हीता, अचोने! हिलाकोटे नीकु नावापोर्रो बतले अदिकारम हिल्ले. अदुनहाटी, नाकुन नीवा कय्दुक अप्पजेपतोके एक्को पापम दल्गंता,” इंचि इत्तोर.

12 अस्केटाल पिलातुस, येसुन होळसालय वेल्लेन कोसिस कीतोर. गानि यहुदिल्क, “ओक्कला निमे ओन होळसियानय्ते, निमे कैसर* राजाना दंटातो न आयिन. इंका नना राजान इंचि इनना हरेक मनकल, महाराजाना विरोदमते वळ्कतोर आंतोर,” इंचेके वरगेयालय दल्गतुर.

13 अव पोल्ले केंजसि, पिलातुस येसुन मर्रा पलाते तत्तोर. तच्चि, न्यायम कियनेके उद्दना कुर्सिते उद्दतोर. अद कुर्सि मनना जेगातुन, इन्नानि बासाते, गब्बाता† इत्तुर.

14 अद रोज, दाटसि होनना पंडुगुना तयारि कियना रोज आंद. अस्केळ्क, पन्नेड एगसि मत्ता. अस्के, “इद हुळाट, मीवा राजाल!” इंचि पिलातुस यहुदिल्कुन इत्तोर.

15 अस्के यहुदिल्क, “ओन लक्कु ओम, ओन लक्कु ओम! ओसि कूसुनपोर्रो वेलाड वाटा,” इंचि वरगेयालय दल्गतुर. अय्ते पिलातुस, “बतलु! नना मीवा राजान, कूसुनपोर्रो वेलाड वाटकना?” इंचि

* 19:12 कैसर इद राजाना पोरोल आयो. रोम सरकारते अन्टिकन्ना पेद्दा पदवि आंद. † 19:13 गब्बाता इत्ते बंडां तारता जेगा इंचि अर्तम.

ओर्कुन पूसकीतोर. अस्के पेद्दा पेर्मालोर्, “माकु कैसर राजान होळसिसि वेरे बोरे राजाल हिल्लोर,” इंचि वरगेयतुर.

16 पजा पिलातुस, येसुन कूसुनपोर्रो वेल्लाड वाटालय ओरा कय्दुक अप्पजेपतोर अय्ते, ओर येसुन ओतुर.

येसुन कूसुनपोर्रो वेल्लाड वाटंतुर

(मत्तयाल 27:32-44; मरकुस 15:21-32; लूकाल 23:26-43)

17 येसु ओना कूसुन कांजसेक, “तला बोरसेम” इनना जेगातगा होत्तोर. इब्बानि बासाते, अद जेगातुन गोलगोता इंतुर.

18 अगा ओना काल्क-कय्कुंक मोल्लां कोहिकेसि ओन कूसुंक वेल्लाड वाटतुर. येसुन नड्डुम इरसि ओना रोंड बाजकुंक इकिव्वुर्कुन कूसुंक वेल्लाड वाटतुर.

19 अस्के पिलातुस, “नासरेत नाटेना येसु, यहुदिल्लुकुना राजाल,” इल्हा उंदि बल्लापोर्रो कसूर रासि, येसुना कूसुंक कोहका वेहतोर.

20 येसुन वेल्लाड वाटता जेगा सहरकु दग्गेरा मत्ता. अद बल्लापोर्रो इब्बानि, लटिन आनि युनानि बासाते रासि मत्ता. अदुनहाटी वेल्लेटोर यहुदिल्लुक, आ कसूरतुन हदवुंदुर.

21 पजा यहुदि पेद्दा पेर्मालोर् पिलातुसनगा होंचि, “यहुदिल्लुकुना राजाल इंचि रासमा. दान जेगाते, नना यहुदिल्लुकुना राजान, इंचि ओर इत्तोर, इल्हा रासा,” इंचि वेहतुर.

22 अस्के पिलातुस, “नना रासतन! रासतन. अचोने!”

23 सिपाइल्लुक येसुन कूसुनपोर्रो वेल्लाड वाटतंका, ओना कपडिं तेंडकुत्तुर. तेंडकुंचि, वरो-वरोंक उंदि-उंदि हिस्सा वायना हिसाबते, नालू पाल्क कीतुर. ओना अंगितुनगुडा तेंडकुत्तुर. अद अंगि पोर्रोटाल हिळुदाका पोळुंक-पोळुगु कुट्टु वाटाकेन मत्ता.

24 अदुनहाटी सिपाइल्लुक, “दीन मनम हराहमान्नि, गानि सिट्टिं वाटकोम. अस्के अद बोर्क दोर्कनो हळकोम,” इंचि ओर-ओरे इनकुत्तुर. “ओर नावा कपडिन हिस्सां कीसि, नावा अंगिहाटी सिट्टिं वाटंतुर,”* इंचि दर्मसास्त्रमते रासि मत्ता पोळ्ले पुरागा आयनाहाटी अल्हा जर्गता. सिपाइल्लुकगुडा अदुनहाटीगे अल्हा कीतुर.

25 येसुन वेल्लाड वाटता कूसुना दग्गेरा, येसुना यावल, ओना यावाना हेलड, कोल्पाना मुत्तो मरियम, आनि मगदलेनि नाटेना मरियम इव निलसि मत्तां.

26 येसु, ओना यावल आनि ओर बोन अय्ते पावरम कीतोर आ सिस्सुड, ओना दग्गेरा निलसि मत्तद हळसि, येसु ओना यावन, “यावा, ईर हळ्ळा नीवा मरिं!” इंचि वेहतोर.

27 पजा आ सिस्सुनहेके हळसि, “इद हळ्ळा, नीवा यावल!” इंचि वेहतोर. अस्केटाल आ सिस्सुड दान ओना यावल इंचि लोन ओतोर.

येसु जीवा होळसंतोर

(मत्तयाल 27:45-56; मरकुस 15:33-41; लूकाल 23:44-49)

28 पजा, ओर बद कबळहाटी वातोर, अद कबळ पूरा आता, इंचि ओर एपाट कीसि, दर्मसास्त्रमते रासि मत्तद पूरा आयनाहाटी, “नाकु दूपा आसंता,”* इंचि इत्तोर.

29 अगा उंदि अळका मत्ता, अय्ते मुरगिसि होत्ता अंगुर पंडिना पानकम मत्ता. ओर अद अळकाते दूदि मुळाहतुर आनि हिस्सोप इनना मराता कोम्मक कळाह्चि, येसुना तोळदागा ओतुर.

30 येसु आ मुरगिसोत्ता अंगुर पंडिना पानकमता रसि हळसि, “पूरा आता,” इंचि इत्तोर. अल्हा इंचि, हिळु तला वराहचि जीवा होळसतोर.

31 अद नोमकेम आनि दाटसि होनना पंडुगुना तयारि कियना रोज मत्ता. अद रोज्जे पीनगुल्कु कूसुनपोर्रो वेलाड मनमळ यहुदिल्कुंक इस्टम हिल्ले. अदुनहाटी यहुदि पेद्दाल्क पिलातुसनगा वासि, “ओरा काल्कुन उराहचि, सेत्तातुन हिळ्ळ रेहा वेहा,” इंचि पूसकीतुर.

32 अस्के सिपाइल्क वासि, येसुनतोनि कूसुनपोर्रो वेलाड वाटसि मत्ता इव्वुरा काल्कुन उराहतुर.

33 पजा ओर येसुनगा वासि हळतस्के, येसु हासे मत्तोर, इंचि ओना काल्क उराह हिल्लुर.

34 गानि ओराव्टेटाल वरोर सिपाइ येसुना संका हिळ्ळ, गोकांते कोह्कतोर. अय्ते कोह्कता कोह्कुकुळे नेत्तुर आनि एर पोंगता.

35 अदंता बोरे अय्ते हळतोर ओर, मिमेटगुडा विस्वासम कियगोम इंचि ओना गवाइ वेहतोर. ओर वेहता गवाइ निजम आंद. ओर सत्तेम वेहचंतोर इंचि ओन्क एरपाट.

36-37 “ओना बोक्कानाल उंदि बोक्किंका उंमंगो,” इंकुंदि जेगाते, “ओन कोह्कतोनहेके हळानुर”^{*} इंचि दर्मसास्त्रमते रासि मत्ता पोल्ले पुरागा आयगोम इंचि, इल्हा जर्गता.

येसुन बोदाते तासंतुर

(मत्तयाल 27:57-61; मरकुस 15:42-47; लूकाल 23:50-56)

38 अवंता आतंका, अरिमताइ नाटेना योसेप इनानोर, पिलातुसनगा होंचि, “येसुना पीनगुन हीम,” इंचि पूसकीतोर. पिलातुस ओम इत्तस्के ओर येसुना पीनगुन ओतोर. ‡

39 उंदि मल्का नर्कटा वेलाक वासि येसुंक कलियता निकोदेमसगुडा योसेपुनतोनि वातोर. ई निकोदेमस, दग्गेर-दग्गेरा मुपै (30) किल्लोना “बोलम” आनि “अगर” इनाना गमागमा गब्बु वायना वस्तुक पीनगुंक होकालय पीसि वातोर.

40 ओर इव्वुर कळसि, यहुदिल्कुना गति कियना रिवाज परकारम, आ गमागमा वायना वस्तुकुनंता येसुना मेंदुल्क होकतुर. होकसि, येसुना पीनगुन उंदि पूना पोळ्ळु कप्पिडते हुटतुर.

41 येसुन कूसुंक वेलाड वाटता जेगाक दग्गेरेन उंदि तोटा मत्ता. आ तोटाते उंदि पूना बोदा मत्ता, अद बोदाते अदवेरदाका बस्केने बोन्दे पीनगुन इरां हिल्लुर. §

42 अद बोदा दग्गेरा मत्ता, अचोने आयाका अद यहुदिल्कुना दाटसि होनना पंडुगुना तयारि कियना रोज मत्ता. अदुनहाटी ओर येसुन अदे बोदाते इरतुर.

20

येसु जीवाते तेदांतोर

(मत्तयाल 28:1-8; मरकुस 16:1-8; लूकाल 24:1-12)

1 वारमता मोदाटा रोज्जु, इत्ते अयतारमनाडु, मुसामुसा हीकट मननेकेन, मगदलेनि नाटेना मरियम बोदातगा होत्ता. अगा अद, बोदा हर्दुक अड्डम इरसि मत्ता बंडा तेंडसि मत्ताप हळता.

2 अदुनहाटी अद मरियम, सिमोन पन्नुनगा आनि येसु बोन अय्ते पावरम कियुंदुरो आ सिस्स्युनगा विच्चि होंचि, “सामिना पीनगुन बोदाताल बोरो तेंडसि ओतुर, अदुन बगा इरतुरो, माकु तेळियो,” इंचि वेहता.

3 अद वेहतद केंजसि, पन्नु आनि आ इंकावरोर सिस्स्युड बोदातेके होनालय पेय्स्तुर.

4 ओर इव्वुर वितसेके होननेके, आ इंकावरोर सिस्स्युड पन्नुकन्ना मुन्ने विच्चि, बोदातगा एवतोर.

5 अगा एवसि, ओर पलाताले माळकिस हळतोर, अय्ते ओन्क सिराप येसुंक हुटसि मत्ता कपडि दिसतां. गानि ओर लोप्पो नेंगा हिल्लोर.

6-7 पजा सिमोन पन्नुगुडा अगा एवतोर. लोप्पो होळियसि, येसुंक हुटसि मत्ता कपडिन हळतोर. गानि येसुना तल्लक हुटसि मत्ता कप्पिड मडता कीसि, वेरे जेगाते मत्तद ओन्क दिसता.

^{*} 19:36-37 निर्गमन 12:46; गिनति 9:12; बजन संहिता 34:20 ‡ 19:38 ई योसेपगुडा येसुना वरोर सिस्स्युडे, गानि

ओर यहुदि पेद्दाल्कुंक वेरियसि, लोप्पो-लोप्पो विस्वासम कियुंदुर. § 19:41 अद बोदाते अदवेरदाका बस्केने बोन्दे पीनगुन इरां हिल्लुर यहुदिल्क बोरना हाते, ओन बमिते पोक्का तव्बि बोदा तासुर. उंदि बंडातुन तुलाह्चि अय्ते ओना पीनगुन इरतुर.

8 पजा, बौदातगा मुन्ने एव्ता सिस्स्युडगुडा लोप्पो होळियसि, हळसि विस्वासम कीतोर.

9 अदवेरदाकागुडा, “येसु हासि तप्पाकौटा मर्रा जीवाते तेदंतोर,” इंचि दर्मसास्त्रमते रासि मत्ता पोल्ले ओर्क तेळिया हिल्ले.

10 पजा ओर सिस्स्युल्क ओरा लोहकुने मल्सि होत्तुर.

मगदलेनि मरियमुंक येसु दिसंतोर
(मरकुस 16:9-11)

11 मगदलेनि नाटेना मरियम मात्रम बौदाता पलाते निलसि अळसेके मत्ता. अळसेके-अळसेकेन अद लोप्पो माळकिस हळता.

12 अस्के, तेल्लटा कपडिं केरता रौंड पेनदा दूतां दान्क दिसतां. अव येसुना सेत्तातुन इरतागा उंदि बारे तल्लाताहेके, इंकुंदि बारे काल्कुनहेके उद्दिस मत्तां.

13 आ दूतां, “बाई, निमे बारि अळसंतिन?” इंचि पूसकीतस्के, “नावा सामिना मेंदुलतुन बौदाताल बोरो बेकेनो ओसि इरतुर, नाकु एरपाट हिल्ले,” इंचि मरियम इत्ता.

14 अल्हा इंचि अद पजोळ्क तिरियता. अस्के अगा येसु निलसि मत्तद दान्क दिसता. गानि ओरे येसु इंचि, अद एरपाट किया हिल्ले.

15 अस्के येसु, “बाई, निमे बारि अळसंतिन? बोर्कुन पहकसंतिन?” इंचि मरियमुन पूसकीतोर. अस्के मरियम ओन, ओर तोटाक कावेल मनानोर बारे इन्कुंचि, “महाराज, निमे गिंटा सामिना पीनगुन इगोटाल ओयानयते, अदुन बगा इरतिन नाकु वेहा नना हौंचि तरकुंतन,” इंचि इत्ता.

16 अयते येसु, “मरियम,” इंचि दान केयतोर. अस्के मरियम ओनहेके तिरियसि हळसि, दाना इन्नानि बासाते, “रबोनि*” इंचि इत्ता.

17 अस्के येसु, “इदवेरदाका नना बाबानगा होना हिल्लेन. निमे नाकुन इट्टुमा, गानि नावा तम्महकुनगा हौंचि इल्हा वेहा: नना नावा बाबाल आनि मीवा बाबाल, इंका नावा पेन आनि मीवा पेनदागा पोरौ हौंचंतन, इंचि ओर्क वेहा,” इंचि दानकु वेहतोर.

18 अस्के मगदलेनि नाटेना मरियम सिस्स्युल्कुनगा हौंचि, “नना सामिन हळतन, ओर मीकु इव पोल्लें वेहा इत्तोर,” इंचि ओर्क येसु वेहता पोल्लें वेहता.

19 अदे रोजु इत्ते वारमता मोदाटा रोजु, पोळ्द अर्रना वेलाक, सिस्स्युल्क अंतोर, यहुदि पेदू दाल्कुना वॅरिंक, तल्पुंक तालम वाटसि, उंदि अर्रते जमा आसि मत्तुर. अचानक, येसु ओरा नड्डुम वासि निल्सि, “मीकु सांति दोर्कि,” इंचि इत्तोर.

20 अल्हा वळ्किसि, येसु ओर्क ओना कयकुंक आनि पक्काक मत्ता देब्बां हुपिस्तोर. सामिन हळसि ओर वेल्लेन कुसिते निडिस होत्तुर.

21 येसु मर्रा उंदि मल्का ओर्कुन, “मीकु सांति दोर्कि. बाबाल नाकुन ई दुनियाते लोहाताप, ननागुडा मीकुन ई दुनियाते लोहंतन,” इंचि इत्तोर.

22 अल्हा वेहचि, “पवित्र आत्मा येतट,” इंचि ओरपोरौ उहकुतोर.

23 उह्किंसि, “मिमेट बोना पापाल्क मापि कीतिरो, ओरा पापाल्क मापि आंतां, मिमेट बोरा पापाल्क अयते मापि कियिरो, ओरा पापाल्क मापि आयौ,” इंचि ओर्क वेहतोर.

तोमांकु येसु दिसंतोर
(मरकुस 16:14-18; लूकाल 24:36-49)

24 येसु वासि मत्तोर अस्के, ओना पन्नेड सिस्स्युल्कुनाल वरोर, तोमल ईर एमडाल्कुनाल वरोर आंदुर, ई सिस्स्युड मनाहिल्लोर.

* 20:16 रबोनि रबोनि इत्ते इन्नानि बासाते गुरु इंचि अर्तम.

25 अदुनहाटीं सिस्युल्क, “मोमोट सामिन हळतोम,” इंचि ओन्क वेहतुर. गानि तोमल, “नना कुद्दु ओना कय्कुंक कोहकता पुनकुन हळसि, आ पुनकुने नना वेलु ईर्खा, इंका गोर्काति कोहकता बरांतगा कय ईर्खा, नना विस्वासम किय्योन,” इंचि इत्तोर.

26 ओर अल्हा इंचि एनिमिदि रोजुक आता पजा, सिस्युल्क मर्रा अदे लोते तल्पुंक तालम वाटसि जमा आसि मत्तुर. ई मल्का ओरतोनि तोमालगुडा मत्तोर. तल्पुंक तालम वाटसि मननेकेगुडा येसु ओरा नड्डुम वासि निल्लोर. निलसि, “मीकु सांति दोर्कि,” इंचि इत्तोर.

27 पजा येसु तोमान, “तोमा, नावा कय्दा पुनकुने नीवा वेलु ईर्शि हळा. नीवा कय हाहिचि, नावा पक्काक मनना गोर्का बरांति नीवा कय ईर्. निमे अनमानमते मन्मा, विस्वासम कीम,” इंचि वेहतोर.

28 अस्के तोमल, “ना सामि, ना पेनदुना,” इंचि तोमल येसुंक जवाब हीतोर.

29 पजा येसु ओन, “निमे नाकुन हळसि विस्वासम कीतिन. गानि बोर नाकुन हळाकोन्ना विस्वासम कीतोर, ओर आसिर्वाद दोर्कतोर आंद,” इत्तोर.

इद पुस्तकम रासता उददेसम

30 सिराप इवे आयका, सिस्युल्कुना मुन्ने येसु वेरे इंका वेल्लेन अद्बूतामाता चिन्हे कीसि हुपिस्तोर. इवन्नि ई पुस्तकमते रासमळ जर्गाहिल्ले.

31 गानि येसे किरिस्तु, ओरे पेनदा मर्रि, इंचि मिमेट विस्वासम कीसि ओना पोरोल्ले पिस्वर दोर्किचुकुननाहाटीं, इवन्नि रासमळ जर्गता.

21

गालिल सेरचुनगा येसु वातोर

1 इवंता आता पज्जो, येसु मर्रुदि मल्का सिस्युल्कुंक तिबेरिया समुद्रमता* ओड्डुंक सिस्युल्कुंक दिसतोर. अद इल्हा जर्गता:

2 अगा सिमोन पत्रु, एमडालकुनाल वरोर तोमल, गालिल राज्येमता काना नाटेना नतेनल, जब्दिना मर्क आनि येसुना इंका इव्वुर सिस्युल्कु जमा आसि मत्तुर.

3 अस्के सिमोन पत्रु, “नना जिम्मां पियालय दांतन,” इंचि ओर्कुन इत्तस्के ओर, “मोमोटगुडा नीतोनि वांतोम,” इंचि, हौचि डोंगाते उदतुर. गानि अद नर्कामेड ओर्क उंदिका जिम्मा दोर्काहिल्ले.

4 अद रोजु पंगा आयनेके येसु वासि ओड्डुनगा निलसि मत्तोर. गानि ओना सिस्युल्क, ओन येसु आंदुर इंचि एरपाट किया हिल्लुर.

5 अस्के येसु, “मिहगा इच्चुंगना जिम्मां मंतंगा, पिलाल्कनिटा?” इंचि पूसकीतोर. अयते ओर, “उंदिका हिल्ले,” इंचि इत्तुर.

6 अस्के येसु ओर्क, “डोंगाता तिना बाजुंक ओल्ला वाटट, अस्के मीकु जिम्मां अर्रांतां,” इंचि वेहतोर. येसु वेहतापे ओर ओल्ला वाटतुर. अस्के हुळाट! ओर ओल्लातुन ओड्डुंक इग्गा पराहिल्लुर, अचोने वेल्ले जिम्मां ओल्लाते अरतां. 7 अस्के येसु बोन अयते पावरम किय्युंदुरो आ सिस्युड, “ओर सामिए आंदुर,” इंचि पत्रुंक वेहतोर. अयते सिमोन पत्रु, ओर अल्हा वेहतदुन केंजता केंजमळे तेंडसि मत्ता कपडिं केरसि समुद्रमते दुन्कतोर.

8 ओड्डु वेल्ले लक्कु मनाहिल्ले. दग्गेर-दग्गेरा रोंड नुहकुना कूटां लक्कु मत्ता बारे. अदुनहाटीं कळमता सिस्युल्कु, जिम्माने निंडिस मत्ता ओल्लातुन इग्गिसेक अदे डोंगाते वातुर.

9 ओर ओड्डुंक एवतस्के, रेय्सि हळते, अगा ओर्क इच्चुं हारि आनि तडमि पोरो वाटसि, इच्चुं जिम्मां दिसतां.

10 अस्के येसु, “मिमेट इंद-इंदके पीता जिम्मानाल इच्चुं जिम्मां हीके पीसि वटु,” इंचि ओर्कुन इत्तोर.

* 21:1 तिबेरिया समुद्रम ई तिबेरिया समुद्रमतुन गालिल समुद्रम इंचिगुडा इंतुर.

11 अदुनहाटीं सिमोन पत्रु डोंगाते एक्किसि ओल्लातुन एताल ओड्डुंक इग्गुतोर. अद ओल्लाते नूटा एबै मूड पेद्दा-पेद्दा जिम्मां निडिस मत्तां. अचोने वेल्ले जिम्मां निडिस मनिनागानि अद ओल्ला हर्रा हिल्ले.

12 पजा येसु, “वट्ट, वासि नास्ता कीम्टु,” इंचि ओर्कुन केयतोर. सिस्स्युल्कुंक, ओर सामि इंचि एरपाट आताहाटीं, “निमे बोन आदिन?” इंचि पूसकियालय बोनके हिम्मत आयाहिल्ले.

13 अस्के येसु वासि, आ हारिन, जिम्मान येतसि ओर्क हीतोर.

14 येसु हासि मर्रा जीवाते तेदता पज्जो, इल्हा सिस्स्युल्कुंक ओर दिसमळ, इद मूळोव मल्का आंद,

येसु पत्रुंक अदिकारम हीतोर

15 अंतोरा तिनूळ आतास्के येसु सिमोन पत्रुन, “योहानुना मर्रि सिमोनु, ईर अंतोरकन्ना निमे नाकुन एक्को पावरम कीतिना?” इंचि पूसकीतोर. अस्के सिमोन, “हो सामि! नना नीकुन पावरम कीतन इंचि नीकु एर्के मंता,” इंचि इत्तोर. “अय्ते निमे नावा गोर्रि पोरिह्कुन मेहा,” इंचि येसु पत्रुंक वेहतोर.

16 रौंडो मल्का, “योहानुना मर्रि सिमोनु, निमे नाकुन पावरम कीतिना?” इंचि येसु पूसकीतस्के, “हो सामि! नना नीकुन पावरम कीतन इंचि नीकु एर्के मंता,” इंचि पत्रु इत्तोर. “अय्ते निमे नावा गोर्रिन बेस मेहा,” इंचि वेहतोर.

17 येसु मूळोव मल्का पत्रुन, “योहानुना मर्रि सिमोनु, निमे नाकुन पावरम कीतिना?” इंचि पूसकीतोर. “योहानुना मर्रि सिमोनु, निमे नाकुन पावरम कीतिना?” इल्हा मूळोव मल्का येसु पूसकीताहाटीं, पत्रुंक दुक्कम वासि, “हो सामि! नीकु अय्ते अंता एरपाट मंता. नना नीकुन पावरम कीतन इंचिगुडा नीकु एरपाटे मंता,” इंचि पत्रु इत्तोर. अस्के येसु, “अय्ते निमे नावा गोर्रि मेहा.

18 नना निजम-निजम वेहासेक, निमे लेयोन मत्तिन अस्के, नीवा कपडिं निमे हदुरकुनिदिन. नी इस्टमाता जेगातगा होनिदिन. गानि नीवा मातिरतनमते, निमे नीवा कय्क हाह्ते, बोरो व्हेतोर वासि नीवा कपडिं हदुरनुर नीकु इस्टम हिल्लुवा जेगाते नीकुन पीसि ओयनुर,” इंचि वेहतोर.

19 पत्रु बसौटा हामुर हासि, पेन्दुक महिमा हियनुरो, इदुन ओन्क हुप्सालय येसु अल्हा वळकतोर. अल्हा वळकता पजा, “नावा पज्जो ताका,” इंचि ओन्क वेहतोर.

20 पत्रु पजोळ्क मल्सि हूळतस्के, येसु बोन अय्ते पावरम कियुंदुरो आ सिस्स्युड, बोर अय्ते पंडुगुना गाटो तिननेके वेल्लेन दग्गेर उद्दिदिस, सामि, नीकुन बोर दोकाते पीसि हीतोर इंचि, पूसकीता आ सिस्स्युड, ओना पज्जो वायनद ओन्क दिसतोर.

21 ओन हूळसि पत्रु, “ईनद बता संगति सामि?” इंचि येसुन पूसकीतोर.

22 अस्के येसु, “नना मल्सि मर्रा वायनदाका ओर पिस्सि मनगोम इंचि नाकु इस्टमातस्के, ओना बारेमते नीकु बतल गावाले? निमे नावा पज्जो ताका,” इंचि पत्रुंक वेहतोर.

23 दानहेंदाल, आ सिस्स्युड हायोर इत्ता पोल्ले, कळमता विस्वासुल्कुना नड्डुम पैलांचि होत्ता. गानि आ सिस्स्युड हायोर इंचि येसु इना हिल्लोर. ओर सिराप “नना मल्सि मर्रा वायनदाका ओर पिस्सि मनगोम इंचि नाकु इस्टमातस्के, ओना बारेमते नीकु बतल गावाले?” इंचि इत्तोर.

आकिरता पोल्ले

24 ई सिस्स्युडे इव पोल्लेना बारेमते गवाइ वेहचि, रासतोर. ईना गवाइ निजम आंद इंचि मनाकु एरपाटे मंता.

25 बूमिपोर्री येसु कीतव इंका वेल्लेन पोल्ले मंतां. आ उंदुंदि पोल्लेतुन रासते, रासता पुस्तकाल्कुन ईर्रालय दुनियाते जेगा हाला पर्री बारे, इंचि नाकु अनपिच्चंता.

प्रेरितुल्कु प्रेरितुल्कुना कबाहक

इद पुस्तकमता बारेमते गिचचो परिचयम

रासतोना पोरोलः डाक्टर लूका

रासता कालमः इसवि सन 60-63

प्रेरितुल्कुना कबाहक इनना ई पुस्तकमतुन लूकाल इनना येसुना वरोर सिस्स्युड रासतोर. प्रेरित इत्ते 'पेन लोहचीता सिस्स्युल्क' इंचि अर्तम. दीनकन्ना मुन्ने ईर उंदि पुस्तकम रासतोर, अदुन पोरोल लूकाल रासतद बेसता कबुर. अथे मुन्नेटा पुस्तकमते लूकाल येसु सामि हासि तेदसि मर्रा स्वर्गमते तिरियसि होननदाकाटा संगति रासतोर. इद पुस्तकमते बारे येसु सामि स्वर्गमते तिरियसि होत्ता पज्जो पवित्र आत्माताहेंदाल ओना सिस्स्युल्क येसुना बारेमता बेसता कबुरतुन येस्सलेम, यहूदिया, सामरिया आनि पूरा दुनियाते तिरियसि बल्हा वेहतुर, वेहाना टाइमते ओर्कु बसंटा कस्टाल्क वातां, बता-बता कबाहक कीतुर, ओर बल्हा पिस्तुर, इदुना बारेमते रासतोर. इद पुस्तकम इत्ते, तियपिलुस पोरोलता वरोर बेस विस्वासि सायाबुंक रासता सिट्टि आंद.

बगा बतल मंता

गवाइहार्टी तयार आयमळ 1:1-26

येस्सलेमते येसुना बारेमते गवाइ 2:1-8:3

यहूदिया आनि सामरिया एरियाने येसुना बारेमता गवाइ 8:4-12:25

पौलुसना सेवा कबळ 13:1-28:31

लूकाल रासता इंकुंदि पुस्तकमता परिचयम

1 नावा पावरमगल्ला तियपिलुस,* नना मोदाटा पुस्तकमते सुस्वनाल येसु बतल-बतल कीतोर, बतल-बतल कराहतोर अदुना बारेमते रासतन.

2 अचोने आयका येसु पेर्कुत्ता प्रेरितुल्कुंक पवित्र आत्माहेंदाल आदेस हीसि, मर्रा स्वर्गमते तिरियसि होननदाका पूरा पिस्वरता बारेमते नना रासतन.

3 येसु हासोचि तिरियसि तेदतस्के, "नना पिस्सि मंतन," इंचि प्रेरितुल्कुंक गाट्टिगा रूजुव कीसि हुपिस्तोर. ओर नल्पै रोजकुनदाका ओर्क दिस्सेक, पेनदा राज्येम बारेमते वेहासेक मत्तोर.

4 उंदि मल्का ओरतोनि कलियसि मननेके येसु, "येस्सलेम सहर होळसिसि होनमट. नावा पेनबाबाल हीता पोल्लेता बारेमते नना मीकु मुन्नेन वेहचि मत्तन, अद पूरा आयानदाका एदुर हूळसेक मंटु.

5 बारित्ते, योहान एतोनि बापतिस्मा हीतोर, गानि मीवा बापतिस्मा कोन्नि रोजकुंक पवित्र आत्माताहेंदाल आयार," इंचि ओर्कुन इत्तोर.

पेन येसुन जीवाते मननेकेने स्वर्गमते ओता

6 पजा अंतोर प्रेरितुल्क उंदि जेगाते जमा आतुर. अस्के येसुन, "सामि, निमे इदे वेलाते इस्राएल देसेमता लोकुल्कुंक ओरा राज्येम मर्रा हीतिना?" इंचि पूसकीतुर.

7 अस्के येसु ओर्कुन, "अद सिराप पेनबाबांके तारिक आनि वेलाता निरनायम एतना अदिकारम मंता. दान एरपाट कियमळ मीवा कबळ आयो.

8 गानि पवित्र आत्मा मीपोर्री वातस्के मिमेट येस्सलेम सहर, पूरा यहूदिया एरिया, सामरिया एरिया अल्हेने बूमिता आकिरदाका नावा गवाइ आयना ताकत मीकु वायार," इंचि इत्तोर.

* 1:1 तियपिलुस ईर वेल्ले कदर मत्ता विस्वासि आंदुर. ई पोरोल्क अर्तम पेनदा पावरमतोर.

9 येसु इल्हा इत्तस्के, ओर हूळसेक मननेकेन ओन स्वर्गमते तेहाचि ओयमळ जर्गुता. ओर्के दिस्साकोटा उंदि मब्बु तेर्पे अड्डम वासि ओन मुच्चुता.

10 ओर पोर्रोळ्क तेदिस होननेके अगा मत्ता प्रेरितुल्क मब्बुनहेके उंदेतीर हूळसेक मत्तुर. अस्केने इच्चुर तेल्ला कपडिं केरतोर ओरगा वासि नित्तिसि,

11 “ए गालिल लोकुल्कुनिटा, मिमेट इल्हा नित्तिसि मब्बुनहेके उंदेतीर बारि हूळसेक मंतिर? येसुन मिहागटाल स्वर्गमते तेहकुंचि ओयमळ जर्गुता गदा! अय्ते बल्हा मिमेट ओन स्वर्गमते होननेके हूळतिरो, अल्हेने ओर मर्ग तिरीयसि वांतोर,” इंचि इत्तुर.

यहुदाना जेगाते इंकावरोन पेरमळ

12 पजा प्रेरितुल्क जय्तुन मराकुना गुट्टातगटाल नोमकेम रोजुनच्चो लक्कुं मत्ता येस्सलेम सहरते मल्सि वातुर.

13 ओर अगा वासि, बद मिद्देते मनुंदुरो अदे मिद्देता पोर्रोटा अरंति होत्तुर. अगा पन्नु, योहान, याकोब, अंदरियल, पिलिप, तोमल, बरतलमय, मत्तयाल, अल्पिना मरिं याकोब, सिमोन (जिलोति), याकोबुना मरिं यहदल ईर मत्तुर.

14 ईरतोनि इच्चुंग मुर्ताहक, येसुना यावल मरियम, ओना तम्मुहक ईर अंतोर उंदे मनसुने पारतना कीसेके मनुंदुर.

15 उंदि रोजु नूटा इरवै (120) विस्वासि दादालोरा नड्डुम पन्नु नित्तिसि,

16 “नावा विस्वासुल्कुनिटा! दाविद राजाल पवित्र आत्माहेंदाल दर्मसास्त्रमते रासि मत्ता पोल्लेतुन मुन्नेन इंचि मत्तोर, अद इंदके यहदाना हेंदाल पूरा आता. ई यहदाले येसुन पियानोर्कुंक मुन्ने अरतोर.

17 यहदल मना लोप्पोटोरे वरोर मत्तोर, मनातोनि कलियसि सेवा कियालय आसर आतोर,” इंचि इत्तोर.

18 तप्पु कबळ कीसि कमांचता कोत्ताने यहदल उंदि बूमि अस्तोर. अदे बूमि ते बोकबोर्ले अरताहेंका पीर पय्सि ओना पूरा पोदुहकंता पलाते पेयसतां.

19 इदु येस्सलेम सहरते मत्तोर्कुंक अंतोर्क तेळियता. दानहाटी ओरा बासाते आ नेदुन हकलदामा, इत्ते नेत्तुरता नेलिं इल्हा पोरोल अरता.

20 पन्नु मर्ग इल्हा इत्तोर,

“ओना लोन पाडासि दांता, अबुने मनालय वरोरगुडा पिस्सोर.

ओना पेद्दातनम, इंकावरोक दांता.”*

इल्हा बजन संहिताते रासि मंता.

21-22 “अदुनहाटी येसु सामि बच्चुं रोजकु मनातोनि कलियसि हेंचेके-वासेके मत्तोर, इत्ते योहानुना बापतिस्मातगटाल अय्ते येसुन मना नड्डुमताल स्वर्गमते तेहाचि ओयनदाका बोर अय्ते मनातोनि मनुंदुर ओरव्टेताल वरोन पेरते बेस मनंता. येसु हासि मर्ग जीवाते तेदतद ओर मनातोनि गवाइ हियमळ गावाले,” इंचि इत्तोर.

23 दानहाटी इच्चुर मनकालोर्कुन मुन्ने तत्तुर. अव्टेताल वरोर योसेप, ईन बरसब्बा इनुंदुर, इंका ईन युसतुस इंचिगुडा एरपाट कियुंदुर. इंकावरोर मत्तिया.

24-25 अस्के प्रेरितुल्क पारतनाते, “सामि! निमे अंतोरा मनसुन एरपाट कीतिन, यहदल अय्ते ओन्क हीता कबळतुन होळसिसि ओर होनना जेगाते होत्तोर. गानि निमे ईर इच्चुरा लोप्पोटाल प्रेरित इंचि नीवा सेवा कियालय बोन पेरकुत्तिन माकु हृप्सा,” इंचि तल्कतुर.

26 अस्के ओर ओराहाटी सिट्टिं वाटतुर अय्ते सिट्टि मत्तियाना पोरोलते पेयसता. अस्के पदाकौंडु मंदि प्रेरितुल्कुने आ मत्तियालगुडा कलियतोर.

† 1:12 नोमकेम रोजुनच्चो लक्कु अद कालमते नोमकेम रोजुने उंदि किलोमिटरकन्ना एक्को तिरीयाकौंदुर. * 1:19 मत्तयाल 27:5-8 * 1:20 बजन संहिता 69:25

2

पेनदा आत्मा विस्वासुलुकुना पोरो रेयमळ

1 पेंतेकोस्त पंडुगु* रोजुने अंटोर विस्वासुलुकु उंदि जेगाते जमा आसि मत्तुर.

2 अस्के उंदि मल्ला मब्बुनाल पेद्दा वळि-दुमारम लेहका वाता. ओर अंटोर उद्दिदिसि मत्ता लोन दाना सप्पुडतोनि पूरा निडिसि होत्ता.

3 अस्के तळमितालेसी पोत्तना नाल्के ओर्कु दिसतां, अव अगा मत्तोर पोरो उंद-उंदि रेयतां.

4 ओर अंटोर पवित्र आत्माते निडिसि होत्तुर, आ आत्मा ओर्कु वळकाना बलम हीता परकारम ओर वें-वें बासाने वळकमळ सुख कीतुर.

5 अद वेलाते, मब्बुना हिळु मत्ता वेल्लेने देसेलुकुना यहुदि विस्वासुलुकु येस्सलेमते मत्तुर.

6 आ सप्पुड केंजतस्के ओर उंदगा जमा आतुर. ओर अंटोर ओरा संतम बासाते वळकनद केंजसि इचंत्रम आतुर.

7 अस्के ओर इचंत्रम आसि, “ईर वळकानुर अंटोर गालिल एरियातोर गदा,

8 अरे मनम अंटोरम मना संतम बासातेन केंजसंतोम गदा! इद बल्हा मरि?

9 मनम पारति, मेदी, एलामि, मेसोपोटामिया, यहुदिया, कप्पुदुकिया, पुंतुस, आसिया

10-11 पुगरिया, पंपुलिया, ई जेगानाल, इजिप्त देसेमताल, कुरेनि सहर दग्गेरा मत्ता लिबिया देसेमताल, रोम सहरताल वाता यहुदिलुकुम, यहुदि मतम पीतोरम. क्रेति, अरब देसेमताल वाता अंटोरम पेनदा इचंत्रमाता पेद्दा कबाहकन मना-मना संतम बासाने केंजसेके मंतोम,” इंचि इत्तुर.

12 ओर अंटोर इचंत्रम आसि, “इद बतल आसंता” इंचि तेळियका वरोंक वरोर तलकतुर.

13 गानि वेंरेतोर अय्ते, “ईर अंगुर पंडिना पूना कल्लु उंचि मंतुर,” इंचि ओर्कुन कारेड्डाल्क कीतुर.

लोकुलुकुन मुन्ने पत्रुना बासन

14 अस्के पत्रु पदाकोंडु मंदितोनि नित्तिसि, लोकुलुकुकु अंटोर केंजा होनानाल जोरते वळकालय दल्यातोर. यहुदियाता दादालोरिटा, येस्सलेमते मनानोरिटा, नना वेहानद मीकु तेळियमळ गावाले. इंचि मिमेट अंटोर नावा पोल्लेतुन बेस केव दोस्सि केंजट.

15 मिमेट इनकुत्ताप ईर कल्लु उंचि रिम्मां आया हिल्लुर. इंदके हक्केटां तोम्मिद एगसंतां.†

16 गानि इय्यला इगे मिमेट हळता गटनना बारेमते योएल इनना पेनदा कबुरतोर इल्हा जर्गता इंचि मुन्नेने वेहचि मत्तोर, अद इल्हा मंता:

17 पेन इंता गदा,

“आकिर रोजकुने नना अंटोर लोकुलुकुनपोरो, नावा आत्मातुन कुम्मरिचंतन.

अस्के मीवा मर्क-मियाहक बविस्स्यवानि कियानुर,

मीवा लेय्युर्क दर्सनाल्क हळानुर, आनि मात्रालोर कलां हळानुर.

18 आ रोजकुने नना मुरतळ मांडसा इनाकोंटा,

अंटोर नावा दास-दासिहकुनापोरो,

आत्मातुन कुम्मरिचंतन आनि ओर बविस्स्यवानि कियानुर.

19 नना मब्बुने इचंत्रमता कबाहक हुप्संतन.

बूमिपोरो चिन्हां इत्ते, नेत्तुर, तडमि, मब्बुनसोंटा पोया हुप्संतन.

20 पेनदा आ बच्चोनो पेद्दा, बेसता रोज वायाका मुन्ने,

पोळद हीकटा, वेडसि बारे नेत्तुरलेहका आंता.

21 अस्के बोर अय्ते पेनदा पोरोल एतंतुरो,

ओर्कुन पापालुकुनाल पिसागोटमळ जर्गता.”☆

* 2:1 पेंतेकोस्त पंडुगु पूना पंटा पेयसतस्के यहुदि लोकुलुकु इद पंडुगु कीतुर. † 2:15 हक्केटां तोम्मिद एगसंतां अद कालमते यहुदिलुकु पदि एगनदाका पेनदा बक्तिते मनुंदुर, कल्लु उनाकोंदुर. ☆ 2:21 योएल 2:28-32

22 इस्राएल लोकलकुनिटा, इव पोल्लें केंजट. पेनः नासरेत नाटेना येसुनाहेंदाल पेद्द-पेद्दा कबाहक, इचंत्रमता कबाहक आनि चिन्हां मीवा मुन्ने हुपिच्चि, पेन लोहतोर ईर आंदुर इंचि रूजुव कीता, इद मीकु एरपाटे.

23 पेनदा उंदि पिलान आनि तेल्वि परकारमे येसुन मीवा कय्दे हियमळ जर्गुता. मिमेट सेड्डा मनकालोर्कुना सायता पीसि ओन कूस पोर्री मोल्लां कोहकिसि हक्कतिर.

24 गानि येसुन पेन हामुटाल अलग कीसि मर्रा जीवाते तेहाता, अदुनहाटीं हामुर ओन इर्रा पराहिल्ले.

25 ओना बारेमते दाविद राजाल इल्हा इत्तोर,

“नना पेनदुन बस्केळ्ळक, नावा मुन्नेन ह्ळसेक मत्तन,

नाकुन कस्टालकुनाल पिसागोटालय अद नावा तिना बाजुंक मंता,

26 इंचि नावा मनसु आनंदमते मंता, नावा तोड्डि कुसिते वळ्ळसेके मंता.

इचोने आयका नावा मेंदुलगुडा आसेते मंता.

27 निमे नावा आत्मातुन नरकमते होळसियिन,

निमे नीवा पवित्र मनकन, कळियसि होना हिथियिन.

28 निमे नाकु पिस्सना हरि हुपिस्तिन, नीवा लोप्पो नाकुन आनंदमते ईरतिन.”*

29 अय्ते नावा विस्वासुलकुनिटा! नना मीवा मुन्ने एनकटा मनकल दाविद राजाना बारेमते विस्वासमते वेहा परांतन, ओर हातोर, ओन बोदा दोस्तुर. ओना बोदा इदवेरदाकागुडा मना नड्डुम मंता.

30 ओर पेनदा कबूरतोर मत्तोर. ओना वंसमताल वरोन राजगद्देपोर्री उप्संतन इंचि पेन ओट्टू तिचि पोल्ले हीता, अद ओन्क एरपाटे मत्ता.

31 दानहाटीं मुन्ने बतल जर्गनद मंता अदुन एरपाट कीसि, ओन नरकमते होळसिया हिल्ले ओना मेंदुल कळियसि होना हिल्ले, इंचि वेहचि मत्तोर. इत्ते किरिस्तु हासि मर्रा जीवाते तेदतदुना बारेमते वेहता पोल्ले आंद.

32 आ येसुन पेने मर्रा जीवा तेहता इंचि मोमोट अंतोरम गवाइ मंतोम.

33 इंदके पेन येसुन दाना तिना बाजुंक उपिस्ता. पवित्र आत्मातुन हीतन इंचि पेन पोल्ले हीसि मत्ता अद ओन्क दोर्कता. येसु अदे पवित्र आत्मातुन वळियतोर, अदुन मिमेट ह्ळसेक, केंजसेक मंतिर.

34-35 बारित्ते दाविद राजाल स्वर्गमते होना हिल्लोर, गानि दीना बारेमते ओर कुद वेहतोर:

“पेन नावा सामिनतोनि इत्ता गदा, नना नीवा पगातोर्कुन नीवा कालकुनगा तरनदाका,

निमे नावा तिना बाजुंक उदसि मन.”*

36 “अदुनहाटीं इस्राएलता अंतोर लोकुलक बेस एरपाट कीकुनना पोल्ले बतल इत्ते मिमेट बा येसुन अय्ते कूस पोर्री मोल्लां कोहकिसि हक्कतिरो, पेन ओन सामि आनि किरिस्तु कीता,” इंचि पत्रु वेहतोर.

37 इव पोल्लें केंजनेके ओरा गुडें दडेल इत्तां. अस्के ओर, “दादालोरिता, इंदके मोमोट बतल कीकोम?” इंचि पत्रुन आनि अगा मत्ता प्रेरितुलकुन पूसकीतुर.

38 अस्के पत्रु, “मिमेट कीता पापालक मापि आयगोम इंचि मनसु मार्सकुंचि पेनदाहेके तिरियट, मिमेट अंतोर येसु किरिस्तुना पोरोलते बापतिस्मा एतट. अल्हा कीतिरित्ते मीकु पवित्र आत्माता वरम दोर्कता.

39 ई पोल्ले मीहाटीं, मीवा पिलालकुनाहाटीं आनि बोर अय्ते लक्कु मत्तोर्कुन मना सामि आता पेन, दग्गेरा केयता ओरा अंतोराहाटीं हीता.” इंचि ओर्कु वेहतोर.

40 पजा पत्रु, इंका वेल्लेने पोल्लेनहेंदाल गवाइ हीसि, “ई युगमता कराब लोकुलकुनाल मिमेट जेगर्ता मंटु,” इंचि विनति कीतोर.

‡ 2:22 पेन पेन बाबल, मरि (येसु), पवित्र आत्मा इव मड इंका उंदे पेन आंद.

☆ 2:28 बजन संहिता 16:8-11

☆ 2:34-35 बजन संहिता 110:1

41 अस्के बोर अयते ओना पोल्लेन ओप्कुत्तुर, ओर अंतोर बापतिस्मा एततुर. इल्हा ओर अंतोर कलियसि मूड वेय्कुना मंदि आतुर.

42 ओर अंतोर, प्रेरित्कुना कराहमळते, कूळमळते, हारि उरुहमळते §आनि पारतना कियमळते उंदि आसि मनुंदुर.

विस्वासुल्क कलियसि मनमळ

43 प्रेरित्कुल तीराता इचंन्रमा कबाहक, चिन्हां किय्युंदुर. अदुनहाटीं अंतोर पेनदा कदर कियालय दल्यातुर.

44 विस्वासुल्क अंतोर उंदासि कलियसि मनुंदुर. बोनगा बतल मनिनागानि दान अंतोर त्सकुनुंदुर.

45 अचोने आयका ओरा सम्सारमतुन, सामानतुन अम्मिसि अक्सरम मत्तोर्कुंक तूसि हियुंदुर.

46 रोज गुळिते उंदि मनसुने जमा आयुंदुर. ओर लोन-लोन हारि उराहचि, आनंदमते पीटे बतले अन्समन्स हिलाकौंटा अंतोर कलियसि गाटो तिनुंदुर.

47 ओर रोज पेनदा स्तुति कियुंदुर, अंतोर ओरतोनि कूस मत्तुर. पापमताल मुक्ति दोर्कतोर्कुन, सामि विस्वासुल्कुने कल्पुंदुर.

3

कुंठि बेस आतोर

1 उंदि मल्का पिथ्यटा पारतना वेलाक इत्ते मूड एगनेके पत्रु आनि योहान गुळिते होंचेके मत्तुर.

2 अस्के इच्चुर लोकुल्क पुट्रस्केटाल कुंठि मत्तोन वरोन तेहकुंचि तत्तुर. गुळिते होना-वाया कियानोर्कुन बिच्चम तल्कागोम इंचि ओन ओर रोज गुळिता सक्कगा इनना गलमातगा उपिच्चि ईरुंदुर.

3 पत्रु आनि योहान गुळिते होळियानद हूळसि ओर ओर्कुन बिच्चम तल्कतोर.

4 अस्के पत्रु योहानुनतोनि ओनाहेके उंदेतीर हूळसि, “माहेके हूळा” इंचि इत्तोर.

5 पजा ओराहेदाल बतलन्ना दोकार बारे इंचि आसेते, ओराहेके हूळसेक मत्तोर.

6 अस्के पत्रु, “नना अयते एंडि बंगाराल्क मत्तोन आयोन, गानि नहगा बतलयते मंतनो अदे नीकु हीतन, नासरेत नाटेना येसु किरिस्तुना पोरोलता बलमते नित्तिसि ताका,” इंचि इत्तोर.

7 पजा ओर ओना तिना कय पीसि तेहता तेहामळे ओना काल्कुने, टोंगराने ताकत वाता.

8 अस्के ओर दुनकिसि तेदसि ताकालय दल्युतोर, ताकसेके, दुन्किसेके, पेनदा स्तुति कीसेके ओरतोनि गुळिते होत्तोर.

9 ओर ताकानदुन आनि पेनदा स्तुति कियमळतुन अंतोर लोकुल्क हूळतुर.

10 ईर गुळिता सक्कगा इनना गलमातगा बिच्चम तल्ककुनानोर इंचि लोकुल्क एरपाट कीकुत्तुर. ओर बेस आतद हूळसि, इद बल्हा आता इंचि अंतोर वेरियसि इचंन्रमते अरतुर.

पत्रु पेनदा पोल्लें वेहतोर

11 आ कुंठि मनकल पत्रु आनि योहानुन पीसि नित्तिसि मत्तोर. ओर सुलेमान राजाना पंदिरतगा मत्तस्के अंतोर लोकुल्क इचंन्रम आसि आ जेगातगा विच्चि वातुर.

12 ओर्कुन हूळसि पत्रु इल्हा वळकालय दल्यातोर. “ए इझ्राएलता लोकुल्कुनिटा, मिमेट जर्गतदुन हूळसि इल्हा बारि इचंन्रम आसि माहेके हूळसेक मंतिर? मोमोट मावा ताकतते, मावा बक्तिते ईन ताकानाल-तिरियानाल किया हिल्लोम.

13 अब्राहाम, इसाक आनि याकोबुना पेन, इत्ते मना एनकाटोरा पेन, दाना सेवक येसुंक कदर हीता. गानि मिमेट ओन दोर्कापीसि हक्कालय हीतिर. अयना पिलातुस ओन होळसियाना विचारम कीतस्के मिमेट ओन होळसियामन्नि इत्तिर.

§ 2:42 हारि उरुहमळ अंतोर कलियसि गाटो तिल्ला पजा, पेन मनाहाटीं हाता इत्ता पोल्लेतुन मति कियानाहाटीं हारि तुकडा कीसि तिनुंदुर.

14 पवित्र आनि नीतिमंतुड* मत्ता येसुन ओप्कुन्ना हिल्लिर, गानि वैरेतोर जीवां तेंडाना पापि मनकन गावाले इत्तिर.

15 मिमेट लोकुल्लुकुंक बस्केळ्ळक पिस्साना पिस्वरता हरि हुप्सानोन हळ्ळतिर, गानि पेन ओन हातोरॉटेताल मर्रा जीवा अरहता, दीना मोमोट गवाइ मंतोम.

16 मोमोट येसुन नम्मुताहाटी ओना पोरोलतेन ईर कुटि बेस आतोर. ई मनकन मिमेट हळ्ळतिर, एरपाट कीतिर. येसुना पोरॉटा विस्वासमतेन ई मनकल पुरागा बेस आतोर. इदंता मी मुन्नेन जर्गुता.”

17 “नावा दादालोर तम्मूहकनिटा! मिमेट आनि मीवा राज्येम कियानोर बतल कीतिरो अद मीकु तेळियवा हेंकेन कीतिर इंचि नाकु एर्के.

18 येसु किरिस्तुंक तकलिप अर्रापींता इंचि पेन दाना कबुरतोरुंका हेंदाल मुन्नेन वेहचि मत्ता, अद इंदके पूरा आता.

19 दानहाटी मिमेट मनसु मार्सकुंचि पेनदाहेके तिरियसि वाते, मीवा पापालक पाय्शि दांता. अस्के मीकु पेनदा मुन्ने आत्मिक सांतिता वेला वायार.

20 पेन मुन्नेटाले तयार कीसि इरता येसु किरिस्तुन मीहाटी लोहार.

21 गानि पूरा दुनियातुन मोदाटालेसी बेस कीतन, इंचि पेन वेल्ले मुन्नेने पवित्र कबुरतोरॉहेंदाल वेहचि मत्ता. अद कालम वायनादाका किरिस्तु स्वर्गमतेन मंतोर.”

22-23 “पेन मीवा लोप्पोटाले वरोन नावसॉटा पेनदा कबुरतोन लोहार, ओर वेहतापे मिमेट ताकाना, बोर अय्ते ओर वेहताप ताकोर, ओर वेहताप ताकानोरॉटेताल वैरे आसि नासडेम आंतोर, इंचि मूसाल वेहचि मत्तोर.

24 अचोने आयका, सामवेल आनि ओना पज्जो वाता पेनदा कबुरतोर अंतोर इव रोजकुना बारेमते वळ्ळतुर.

25 “नीवा वंसमतोरॉहेंदाल बूमि पोरॉटोर्क अंतोर्क आसिर्वाद दोर्कता’ इंचि पेन अब्राहामुनतोनि इत्ता. मिमेट अय्ते आ करार कीता एनकाटोर आनि पेनदा कबुरतोर पिलालक आंदिर.

26 पेन ओना सेवक येसुन मर्रा जीवा अरहतस्के, मीकुन कराब हरदाल तप्पिचि आसिर्वाद हियनाहाटी मोदाला मीहेके लोहता,” इत्तोर.

4

पत्रुन, योहानुन पंचादिता मुन्ने निलाहमळ

1 पत्रु आनि योहान लोकुल्लुकुनतोनि वळ्ळकसेके मननेके पेर्मांलोक, गुळिता कावेल कियानोरा दरोगाल आनि सदुकिर ओरगा वातुर.

2 येसु बल्हा अय्ते हातोर लोप्पोटाल मर्रा जीवाते तेदतोर, अल्हेने हातोर मर्रा जीवाते तेदंतुर इंचि पत्रु आनि योहान लोकुल्लुकुंक कराहमळतुन हळ्ळसि ओर्कु इरगा होंग वाता.

3 पजा ओर ओर्कुन पीतुर गानि पोळ्ळु होत्ता इंचि इंकुंदि रोजुनदाका ओर्कुन जेलने बंद कीसि इरतुर.

4 गानि बोर अय्ते ओरा पोल्लें केंजतुरो, ओराॉटेताल वेल्लेन मंदि येसुनपोरॉ विस्वासम कीतुर. विस्वासम कीतोर लोप्पोटाल मांडूसा दग्गेर-दग्गेरा हेय्युं वेयकुनदाका आतुर.

5 इंकुंदि रोजु यहुदि पेद्दाल्क, राज्येम कियानोर आनि दर्मसास्त्रम कराहना गुस्लक* येस्सलेमते जमा आतुर.

6 इंका पेद्दा पेर्मांल हन्नाल ओना जीवातोर कयपाल, योहान, सिकंदर आनि ओना लोतुर अंतोर अगा मत्तुर.

7 ओर पत्रुन आनि योहानुन ओरा नड्डुम निलाहचि, “मिमेट बद ताकतते, बोना पोरोलते इव कबाहक कीतिर?” इंचि ओर्कुन पूसकीतुर.

* 3:14 पवित्र आनि नीतिमंतुड पिसागोटनोर (वरोर पिसागोटनोर वायानोर मत्तोर ओना बारेमे ई पोल्ले वेहचि मत्ता ओर येसु किरिस्तु आंदुर.) * 4:5 दर्मसास्त्रम कराहना गुर् इर दर्म नियमते मनना पोल्लें कराहंतुर.

8-9 अस्के पत्रु पवित्र आत्माते निंडसि इल्हा वळकालय दल्गतोर. ए लोकुकुनपोर्री राज्येम कियानोरिटा अल्हेने पेद्रुदाल्कुरिटा! इथ्याला वरोन कुंटीन बेस कीताहेंके, ओर बल्हा बेस आतोर, इंचि माकुन तल्कसेक मंतिर.

10 अय्ते मीकु अंटोर्क आनि इस्राएलता लोकुकुकुंक, नासरेत नाटेना येसु किरिस्तुना पोरोलतेन ई मनकल बेस आसि मी मुन्ने नित्तिसि मंतोर इंचि तेळियमळ गावाले. मिमेट, मीवा लोकुकुक, येसु किरिस्तुन क्लस पोर्री मोल्लां कोहकिसि हक्कतिर गानि पेन ओन हातोरा लोप्पोटाल मर्रा जीवाते तेहता

11 “मिमेट लोन दोहालय कबळक वायो इंचि पोहता बंडे, इंदके लोतुक अवसरमाता बंडा आता, इंचि दर्मसास्त्रमते रासि मंता. अदे बंडा ई येसु आंदुर.✱

12 येसुना पोरोल तप्पा मब्बुना हिळ मनानोरा बोना पोरोले मनाकुन पापमताल पिसागोट्टो, इंका बोरे मनाकुन पिसागोट्टोर,” इंचि वेहतोर.

13 ओर पत्रुन आनि योहानुन हळसि इस्कूल करियवोर, सादा मनकालोर आंदुर इनकुत्तुर, गानि ओरा दैनेम हळसि इचंन्रम आतुर. अस्के ईर येसुनतोन मत्तोर आंदुर इंचि ओर्कुन एरपाट कीतुर.

14 बेस आता कुंटी ओरतोनि नित्तिसि मत्तद हळसि ओर्कु अड्डम बतल वळका पराहिल्लुर.

15 अदुनहाटी ओर पत्रुन आनि योहानुन इगोटाल पलाते होंट इंचि इत्तुर आनि वरोंक-वरोर विचारम कियालय दल्गतुर गदा,

16 ई मनकालोर्कुन मनम बतल कीकोम? येस्सलेमते मनानुर अंटोर्क ईर कुंटीन बेस कीता चिन्ह एरपाटे, अदुन मनम निजम आयो इंचि इना परोम.

17 गानि इद पोल्ले एक्को लोकुकुकुंक तेळियामन्नि इत्ते ओर्कुन मनम, मिमेट येसुना पोरोल इंका बोना मुन्ने एतमट, इंचि वेराहकोम, इत्तुर.

18 अस्के ओर्कुन मर्रा केय्सि, “मिमेट येसुना पोरोलते बतले वळकमट, बतले कराहमट,” इंचि आदेस हीतुर.

19 गानि पत्रु आनि योहान, “पेनदा पोल्ले केंजाका मीवा पोल्ले केंजमळ इद पेनदा मुन्ने न्यायामेना? मिमेटे वेहाटु.

20 बदाय्ते मोमोट हळतोम, केंजतोम अदुन वेहाकोटा मनमळ मावातोनि आया परो,” इंचि इत्तुर.

21 अगा जर्गुतदुन हळसि, अंटोर लोकुकुक पेनदा स्तुति कियालय दल्गतुर. अदुनहाटी लोकुकुकुना वेंक ओर्क सिक्सा हियाका, ओर्कुन मर्रा वेराहचि होळसीतुर.

22 बोर मनकल अय्ते चमत्कार आसि बेस आतोरो, आ मनकल नल्चै वर्साना पोर्री मत्तोर.

पत्रु आनि योहान विस्वासुल्कुनगा मल्लिस वातुर

23 पत्रुन, योहानुन होळसीतस्के ओर ओरा दंटातोरगा वापस वासि, पेद्रुदा पेर्मालोर्क, यहुदि पेद्रुदाल्क इत्ता पोल्ले अंता ओर्कु वेहतुर.

24 ओर वेहतद केंजसि, ओर अंटोर कलियसि उंदे पेद्रुदा आवाजते पेनदुक पारतना कियालय दल्गतुर. “सामि! मब्बु, बूमि, समुद्रम आनि अवुना लोप्पो बतल अय्ते मंता, अवुन निमेन पुटिस्तिन.

25 नीवा पवित्र आत्माताहेंदाल नीवा सेवक, मावा एनकटा पेद्रुदा मनकल दाविद राजाना तोळदाल निमे इल्हा वेहतिन गदा, वेरे जाति लोकुकुक बारि लोल्लिं कीतुर? लोकुकुक वट्टिदे अवसरम हिल्ला पिलानकु बारि कीसेके?

26 ई बूमिपोर्रीटा राजालोर पेनदुक अड्डम लडाइहाटी तयार आतुर. राज्येम कियानोर अंटोर उंदि आसि, पेनदुक आनि दाना किरिस्तुंक अड्डम, आतुर.”✱

27 “निजमे, निमे पेरकुंचि लोहचीता नीवा पवित्र सेवक येसुना विरोदमते हेरोद आनि पुंतुस पिलातुसगुडा वेरे जातितोरतोनि, इस्राएल लोकुकुकुनतोनि कलियसि उंदि आतुर.

28 बारित्ते नीवा ताकत नीवा इच्छाते इल्हा जर्गना इंचि निमे मुन्नेने निरनायम कीतिन. अल्हेने जर्गसि पूरा आता.

29 अदुनहाटी, सामि! इंदके ओर वेराहसेक ह्ळा, नीवा पोल्ले दैरनेमते वेहालय सेवाकुल्लुक बलम हीम.

30 रोगाल्क बेस कियालय, नीवा पवित्र सेवक येसुना पोरोलते चिन्हां, इचंन्रमता कबाहक किया परालय नीवा कय हाहचि बलम हीम,” इंचि पारतना कीतुर.

31 पारतना कीतारित्ते, ओर जमा आसि मत्ता जेगा मेदुलता, ओर अंतोर पवित्र आत्माते निडिसोचि पेनदा पोल्ले वेरियाकोटा वेहालय दल्युतुर.

विस्वासुल्क उंदि आसि मनुंदुर

32 विस्वासुल्क अंतोर उंदि मनसु, उंदि जीवा आसि मत्तुर. बोरन्ना आयि बदे सोम्मु, इद नावद इंचि इनाकोदुर, गानि बोनगन्ना बतलन्ना मत्ते दान तूसकुनुंदुर.

33 येसु सामि हासि मर्रा जीवाते तेदतोर, इंचि ओना पेद्दा ताकतते प्रेरितुल्क गवाइ हियुंदुर. इल्हा ओर अंतोरपोर्री पेनदा कुर्पा मत्ता.

34-35 ओरा लोप्पो बोनके बतल तक्को मनाहिल्ले. बूमि, लोहकु मत्तोर, अबुन अम्मिसि वाता कोत्तन तच्चि प्रेरितुल्लुक हियुंदुर. बोन्क बच्चोर गरज मंता अच्चोर त्सि हियुंदुर.

36 साइप्रस दीबेते पुटता योसेप इनना लेवि वंसमतोर वरोर मत्तोर. ओन्क प्रेरितुल्क बरनाबास इंचि पोरोल दोस्तुर. बरनाबास इत्ते “अंतोर्कुन समत कियना मनकल” इंचि अर्तम.

37 ओर ओना नेलितुन अम्मिसि वाता कोत्तन अंता प्रेरितुल्लुक हीतोर.

5

हनन्या आनि सपीरा

1 हनन्या पोरोलतोर वरोर मनकल अल्हेने ओना मुत्तो सपीरा, ईर इव्वुर कूळसि ओरदे इच्छो बूमितुन अमतुर.

2 वाता कोत्तानाल इच्छुं कोत्तां इरकुत्तोर इंचि ओना मुत्तोंक एर्के मत्ता, कडमता कोत्तां ओसि प्रेरितुल्लुक हीतोर.

3 अदुन ह्ळसि पत्रु, “हनन्या! निमे बूमि अमता कोत्तानाल इच्छुं कोत्तां इरकुत्तिन. अय्ते पवित्र आत्मातोनि आबद्दम वळकालय नीवा मनसुने देय्यम बारि होळियता?

4 आ बूमि अम्मका मुन्ने नीवदे मत्ता गदा! अम्मुतंकागुडा वाता कोत्तन पोर्री नीवदे अदिकारम मत्ता. अय्नागानि पेनदुक इस्टम हिलवद कबळ कियालय नीवा मनसुने बल्हा वाता? निमे मनकलोरतोनि आयो गानि पेनतोनि आबद्दम वळकतिन,” इंचि इत्तोर.

5 ई पोल्लें केंजतारित्तेन हनन्याल हिळु अर्सि जीवा होळसतोर. अचोने आयका ई पोल्लें केंजतुर अंतोर्क पेद्दा वें दलगता.

6 अस्के लेय्युर्क तेदसि ओन्क कपडि ह्ट्सि* पलाते ओसि बोंदा दोस्तुर.

7 दगेर-दगैरा मूड गंटां आतंका ओना मुत्तो लोप्पो वाता. अगा बतल जर्गुता दान्क तेळिया हिल्ले.

8 अस्के पत्रु अद वातद ह्ळसि, “मीवा बूमि इच्चोट्टेके अमतिरा वेहा!” इंचि तल्कतस्के, “आ इच्चोट्टेके अमतोम,” इंचि अद इत्ता.

9 पत्रु दान मर्रा, “मिमेट इव्वुर सामिना आत्माता परिक्सा बारि ह्ळालय दलगतिर? ह्ळा नीवा मुय्दोन बोंदा दोसतोर गलमातगेन एवतुर, ओर नीकुन इंका अल्हेने ओयानुर.” इंचि इत्तोर.

* 5:6 कपडि ह्ट्सि अद कालमते हाता मनकन कपडि ह्ट्सि बोंदा दोसुंदुर.

10 ओर अल्हा इत्ता इन्मळे अद ओना कालुकुन मुन्ने अर्सि अल्हेन जीवा होळसीता.† पजा दाना मुय्दोन बोंदा दोस्ता लेय्युर्क लोप्पो वासि ह्ळतस्के अद मुरतळ हासि दिसता. ओर दान इंका तेहकुंचि ओसि दाना मुय्दोना पक्काते बोंदा दोस्तुर.

11 अस्के येस्सलेमता कलिसियातोर अंटोर, ई पोल्लें बोर अय्ते केंजतुरो ओर अंटोर बागा वेरियतुर.

प्रेरितुलुकुना कय्दे इचंन्रमाता कबाहक

12 अल्हेने प्रेरितुलुकुना कय्दाल वेल्ले चिन्हां, इचंन्रमाता कबाहक लोकुकुना मुन्ने आयुंदुं, विस्वासुल्क अंटोर गुळिते सुलेमान राजाना पंदिरतगा बस्केळ्ळ उंदि मनसुने जमा आयुंदुर.

13 अविस्वासुल्क ओरतोनि कलियालय वेरियुंदुर, गानि विस्वासुल्कुना बेस कदर कियुंदुर.

14 अयना वेल्लेन मंदि मुर्ताहक-मांडसा सामिन विस्वासम कीसि ओरगा वासि कलियुंदुर, इल्हा एककोते एकको मंदि बेरस्सेक होतुर.

15 प्रेरितुलुकुना कबाहकुन ह्ळसि लोकुल्क बिमार मत्तोर्कुन कटुल्कुने, केत्तिने पत्रु होनना हर्दागा तच्चि ईर्दुर. पत्रु होननेके ओना नीडायना बिमारतोर पोर्री अरते ओर बेस आयनुर इंचि लोकुल्कुना आसे मनुंदु.

16 अचोने आयका येस्सलेम सहरता पक्का पीसि मत्ता नाहकुनाल वेल्लेटुर बिमार मत्तोर्कुन, देय्याल्क पीतोर्कुन अगा पीसि वायुंदुर. ओर अंटोर प्रेरितुलुकुना कय्दे बेस आयुंदुर.

प्रेरितुलुकुन जेलने वाटमळ

17 अस्के पेद्दा पेर्माल, ओनातोनि मत्ता सदुकिर्क, प्रेरितुलुकुन ह्ळसि ओरा मनसु मसुलुंदु.

18 अदुनहाटीं प्रेरितुलुकुन पीसि जेलने वाटतुर.

19 गानि अदे नर्का उंदि पेनदा दूता वासि जेलना तल्पु तेंडसि ओर्कुन पलाते ओता.

20 ओसि, “होंटु, गुळिते नित्तिसि ई पूना पिस्वरता अन्नि पोल्लें अंटोर लोकुल्कुंक वेहाटु,” इंचि ओर्कु वेहता.

21 पेनदा दूता वेहतद केंजसि ओर पोळ्दु पेयसतंका गुळिते होंचि लोकुल्कुंक कराहलय दलगतुर. हीके, पेद्दा पेर्माल आनि ओना दंटातुर, इस्राएलता अंटोर पेद्दालुकुन पंचादिते केय्सि, प्रेरितुलुकुन जेलनाल तायालय लोहतुर.

22 गानि सिपाइल्क जेलने होंचि ह्ळतस्के अगा प्रेरितुल्क मना हिल्लुर, अदुनहेंके ओर मल्सि वासि,

23 “जेलता तल्पुकुंक अय्ते तालम वाटसि मत्ता. सिपाइल्कगुडा गलमानगा नित्तिसि मत्तद मोमोट ह्ळतोम, गानि तल्पु तेंडसि लोप्पो ह्ळतस्के लोप्पो बोरे मना हिल्लुर,” इंचि वेहतुर.

24 गुळितगा कावेल कियानोरा अदिकारि आनि पेद्दा पेर्मालोर इद केंजसि, “इंदके बतल आयार” इंचि वेल्ले विचारम कियालय दलगुतुर.

25 अस्के बोरो वरोर मनकल वासि, “हुळट, मिमेट जेलने वाटतुर गुळितगा नित्तिसि लोकुल्कुंक येसुना पोल्लें कराहसेक मंतुर.” इंचि वेहतोर.

26 अस्के आ अदिकारि, गुळिता कावेल कियानोर्कुन पीसि गुळितगा होतोर. होंचि, लोकुल्क मापोर्री बंडां हुक्सि हक्कानुर इत्ता, वेंरते ओर्कुन बतले बल्मि कियाकोटा पंचादितगा तत्तोर.

27 ओर्कुन पीसि तच्चि पंचादिता मुन्ने निलाहतोर. अस्के पेद्दा पेर्माल ओर्कुन,

28 “ई येसुना पोरोलते कस्हमट इंचि मोमोट मीकु कडक आदेस हिग्यिना गानि मिमेट पूरा येस्सलेम अंता ओना पोरोलते कराहतोर. अचोने आयाका ओन मोमोटे हक्कतोम इंचेके मावा पोर्री तपु दोसालय ह्ळसेक मंतर,” इंचि इतोर.

† 5:10 अल्हेन जीवा होळसीता हनन्याल आनि सपिरल ब्रुमि अमता कोलां पूरा हीतोम इंचि आबद्दम वळ्कतुर इंचि सिक्सा दोर्कता.

29 अदुनहाटीं पन्नु, कळमता प्रेरितुल्लुक, “माकु मनकालोरा पोल्लेँ आयो, गानि पेनदा पोल्ले केंजा पीता.

30 मिमेट येसुन कूस पोरो वेलाड वाटसि हक्कतिर गानि मावा पेद्दाल्लुकुना पेन ओन हामुरताल मरां तेहता.

31 हामुरताल तेहचि ओने पेन, राजाल आनि पिसागोटनोर इंचि निलाहता. मावा इस्राएलता दादालोर्कुंक मनसु मार्सकुनालय, पापाल्लुकुनाल मापि कियालय पेनदा तिना बाजुंक ओन कदर हीसि उपिस्ता.

32 इव अन्नि पोल्लेनहाटीं मोमोट गवाइ मंतोम. पेनदा पोल्लेँ केंजसि ताकानोराहाटीं पवित्र आत्मागुडा गवाइ मंता,” इंचि इत्तुर.

गमलियेल पेद्दा पंचादिता लोकुल्लुकुन सांत कीतोर

33 ओरा पोल्लेँ केंजसि, आ पंचादिता पेद्दाल्लुकुंक होंग वासि ओर्कुन हक्कना विचारम कीतुर.

34 गानि पंचादिता गमलियेल पोरोलतोर वरोर परिसि, ओर मूसाना नियमता गुरुजीगुडा मत्तोर, ओन अंतोर कदर कियुंदुर. ओर तेदसि प्रेरितुल्लुकुन गडसेम पलाते ओयालय वेहेतोर.

35 ओर्कुन पलाते ओतस्के, ओर पंचादिता मुन्ने, “मावा इस्राएलता लोकुल्लुकुनिटा! मिमेट ओर्कुन बतल कीतोम इंचतिरो, बेस विचारम कीसि कीम्टु.

36 बारित्ते कोन्नि रोजकु मुन्ने तियुदास पोरोलतोर वरोर मनकल, ‘नना पेद्दोन’ इंचि वेहेकुत्तोर. ओना पज्जो नालुं नुहकुना मंदि इंका मत्तुर. गानि ओन हक्कतुर, अस्के ओना पज्जो ताकानोर अंतोर बेंदोर-हेके पायसि होत्तुर.

37 अद आता पज्जो सिरगंतिता वेलाते गालिल एरियाता यहुदल इनानोर वातोर. ओर इंका वेल्लेने लोकुल्लुकुन ओनाहेके कीकुत्तोर गानि ओन इंका हक्कतुर. ओना पज्जो ताकानोर अंतोर बेंदोर-हेके पायसि होत्तुर.

38 अदुनहाटीं इंदके इंका नना मीकु वेहसेक मंतन, मिमेट पीतोर्कुन बतले कियमट, ओर्कुन होळसीम्टु. ओरां विचाराल्क, ओरां कबाहक मनकानव मनानयते मायसि दांतां.

39 गानि पेनदाहेंदाल मनानयते दान मिमेट आपा पर्रिर, मिमेट आपालय हळते मात्रम पेनदुक अड्डम आंतिट,” इंचि इत्तोर.

40 अस्के पंचादितोर, गमलियेलना पोल्ले केंजतुर. पजा प्रेरितुल्लुकुन लोप्पो केय्सि ओर्कुन पोद्दूते तन्ना वेहचि, येसुना पोरोलते बग्गेन वेहमटु इंचि वेहचि होळसीतुर.

41 प्रेरितुल्लुकुन होळसीतस्के, येसुना पोरोलताहाटीं मोमोट देब्बां तित्तोम, इंचि बेस आनंदमते पंचादिताल पेय्सि होत्तुर.

42 रोज गुळितगा, लोन-लोन होंचि, येसु ईर किरिस्तु आंदुर इंचि पेनदा बेसता कबुर वेहामळ, कराहमळ होळसा हिल्लुर.

6

एडुरकुन पेरकुनमळ

1 इल्हा विस्वासुल्क वेल्लेन बेर्सेक होत्तुर. अयते अवे रोजकुने युनानि बासा वळकाना यहुदिल्लुकु, इब्बानि बासा वळकाना यहुदिल्लुकुनतोनि, “रोज हिय्यना गाटोता बारमते मावा मुंडामोस्ता मुरताह्कनहेके बेस हळसेक हिल्लिर,” इंचि जगडम दोस्तुर.

2 अस्के आ पनेंड मंदि प्रेरितुल्लुक अंतोर विस्वासुल्कुकुन उंदगा केय्सि, “पेनदा पोल्लेँ कराहमळ पक्कक इरसि गाटो पंचि तासेक मनमळ मावाहाटीं बेस आयो.

3 अदुनहाटीं नावा विस्वासुल्कुनिटा! मिमेट मीव्छेटाले बेस कदर, बुद्दि आनि पवित्र आत्माते निडिस मत्ता एडुर मांडसातुन पेरकुंट. मोमोट ओर्कुन ई कबळ पोरो इरांतोम.

4 अस्के पारतना, पेनदा पोल्लेँ कराहना मावा सेवा कबळ आगाकोटा जर्गसेक मनंता.” इंचि वेहतुर.

5 इद पोल्ले अंटोर्कुंक नच्चुताहेंका ओर विस्वासमते, पवित्र आत्माते निडिस मत्ता स्टिपन इनानोन परेतुर. ओन वरोने आयका पिलिपुस, परकोरस, निकानोर, तिमोन, परमिनास आनि अंताकिया नाटेना निकोलस (ईर ओना जाति होळसि यहुदि जातिते वातोर) पोरोलतोर्कुन परेतुर.

6 पजा ईर एडुरकुन प्रेरितुल्लुकुना मुन्ने निलाहतुर. अस्के प्रेरितुल्लुक ओरपोर्रो कय इसिस पारतना कीतुर.

7 इल्हा पेनदा पोल्ले वेल्लेन मंदिक एवसेक होत्ता. येस्सलेमते विस्वासुल्लुकगुडा वेल्लेन आतुर. अचोने आयका वेल्लेन मंदि यहुदि पेर्मालोर्कुगुडा विस्वासमते वातुर.

यहुदिल्लुक स्टिपनुन पोर्रो एकरेवुल्लुक वेहांतुर

8 पेनदा कुर्पाते, ताकतते निडिस मत्ता स्टिपन लोकुल्लुकुना मुन्ने पेद्दा-पेद्दा इंचंत्रमता कबाहक, चिन्हां कियुंदुर.

9 गानि स्वतंत्रम दोर्कुता यहुदि लोकुल्लुकुना* दर्मसास्त्रम कराहना लोताल इच्चुर लोकुल्लुक वासि स्टिपनुनतोन जगडम दोसकुत्तुर. आ लोकुल्लुकुने कुरेनि, सिकंदरिया इनना सहरकुने मनना यहुदि लोकुल्लुक आनि किलिकिया, आसिया इनना एरियान पीसि मनना यहुदिल्लुक मत्तुर.

10 गानि वळ्ळकानाहाटी पवित्र आत्मा स्टिपनुंक तेल्चि हीता. अदुनहाटी आ लोकुल्लुक ओना पोल्लेँक अड्डम वळका पराहिल्लुर.

11 पजा आ यहुदि लोकुल्लुक वैरेतोर्क तेळियाकोटा इच्चुर लोकुल्लुकुंक लंचम हीसि, स्टिपन, मूसानद आनि पेनदा अपमानम आयना पोल्लेँ वळकानेँके मोमोट केंजतोम, इल्हा आबद्दम वळकालय वेहतुर.

12 अल्हेने ओर अगाटा लोकुल्लुकुन, यहुदि पेद्दालुकुन, दर्मसास्त्रम कराहना गुस्लुकुनगुडा एक्किस्तर. अस्के ओर स्टिपनुन दोर्कापीसि यहुदिल्लुकुना पेद्दा पंचादिते तत्तुर.

13 अयते आ पंचादिते लंचम तित्ता गवाइदार्क निलसि, “ई मनकल पवित्रमाता जेगा इत्ते गुळिता बारेमते इंका मूसाल वेहता नियमता बारेमते तप्पुड पोल्लेँ बस्केळ्ळक वळकसेक मनांतोर.

14 बारित्ते, नासरेत नाटेना येसु इद गुळितुन क्लाह्चि नासडेम कियानुर आनि मूसाल वेहता रीति-रिवाजकुन बदलांचनुर, इंचि वेहनेँके मोमोट केंजतोम” इल्हा गवाइ हीतुर.

15 अस्के अगा पंचादिते उदिदिस मत्ता अंटोर लोकुल्लुक स्टिपनुनहेके बागा हळतुर. अयते ओर्कु स्टिपनुना मोकम पेनदा दूताता मोकमलेह्का दिसता.

7

स्टिपनुना बासन

1 पजा पेद्दा पेर्माँल, “ईर वेहना पोल्लेँ निजमेना?” इंचि स्टिपनुन पूसकीतोर.

2 अस्के स्टिपन ओर्कु इल्हा वेहालय दल्लुतोर, “नावा दादालोर आनि बाबानसौटा पेद्दालुकुनिटा! नना वेहनद केंजट. मना एनकटा पेद्दा मनकल अब्राहाम मातरल मेसोपोटामिया देसेमतुन होळसि हारान इनना सहरते हेराका मुन्नेन पेन दाना महिमाते ओन्क दिसता.

3 दिस्सि, निमे नीवा देसेमतुन, नीवा जीवातोर्कुन होळसिसि नना नीकु हूपिचना देसेमते होन, इंचि ओन्क वेहता.

4 अस्के अब्राहाम कसदिल्लुकुना देसेम होळसि हारान एरियाते होंचि मनालय दल्लुतोर. ओना बाबाल हासोत्तंका पेन ओन अगटाल इंदके मिमेट मनना ई देसेमते लोहता.

* 6:9 स्वतंत्रम दोर्कुता यहुदि लोकुल्लुक यहुदिल्लुकुना गुलामगिरिताल पेयसता यहुदि लोकुल्लुक. ईरद वैरे उंदि दर्मसास्त्रम कराहना लोन मत्ता.

5 अयना पेन इगे ओन्क अळगुमेड बूमिगुडा हिय्या हिल्ले. गानि ओन्क संतानम हिल्लुवा रोजकुनेगुडा पेन, ई देसेमतुन, ई बूमितुन नीकु हीतन, नीवा पज्जोताल वायाना नीवा वंसमतोर्कुंक हीतन, इंचि ओन्क पोल्ले हीता.”

6 “अचोने आयका पेन ओनातोनि, नीवा वंसमतोर वेरे देसेमते होंचि मनांतुर, अगाटा लोकुल्क नीवा वंसमतोर्कुन नाळुं नुहकुना वर्सानदाका गुलामगिरिते इरसि, वेल्ले तकलिप हीतुर.

7 गानि बोर अयते नी वंसमतोर्कुन गुलामगिरिते इरीतुरो ओर्कु नना सिक्सा हीतन, पजा नीवा लोकुल्क अगटाल पेय्सि वासि इद जेगाते नाकु पूजा कियानुर, इंचि वेहता.”

8 “पजा पेन अब्राहामुनतोनि कतना* इनना उंदि करार कीता. अदुनहाटीं अब्राहामुंक इसहाक पुटतस्के ओर एनमिदि रोजकुनोर मनानेकेन ओना कतना कीतोर. इल्हेन इसाकुंक याकोब पुटतोर. पजा याकोबुंक पन्नेंडु मंदि मर्कु पुटतुर. ईरद अंतोरदगुडा कतना आता. इल्हा ई पन्नेंड मंदि मर्कुनाले मुन्ने इस्त्राएलता पन्नेंड वंसाल्कु तयार आतां. ईर ई पन्नेंड वंसाल्कुना मोदोल मनकालोर आतुर.”

9 “याकोबुना मर्कु ओराव्टेताल योसेप इनानोन पोर्री अळंदुर. अदुनहाटीं ओर ओन इजिप्त देसेमते गुलामगिरि कियालय अमतुर, गानि ओना पेन ओन्क सायता मत्ता.

10 ओन अन्नि कस्टाल्कुनाल दक्किस्ता. इंका पेन ओन्क बेस बुद्दि हीता. पेन हीता बुद्दिदतोनि ओर इजिप्त देसेमता पिरोन राजाना मनसु गेल्स्कुत्तोर. पजा इजिप्त देसेमता पिरोन राजाल ओना देसेमपोर्री, ओना राजवाडानपोर्री अदिकारि इंचि इतोर.”

11 “अच्चोटेन कनान आनि इजिप्त देसेमते पेद्दा करवु अर्सि लोकुल्क इरगा कस्टाल्कुने अरतुर. इंका मना एनकटा पेद्दाल्कुंक तिनालय बतल दोर्काकोटा आता.

12 इजिप्त देसेमते गाटो मंता इंचि तेळियतस्के याकोब मना एनकटा पेद्दाल्कुन अगा मोट्टा-मोदाटा मल्का लोहचीतोर.

13 ओर रोंडो मल्का होतस्के योसेप ओना बारेमते ओना दादालोर-तम्मुह्कुंक वेहतोर. अस्केन पिरोन राजांकगुडा योसेपना कानदानता बारेमते एरपाट आता.

14 अस्के योसेप ओना बाबाल याकोब आनि कानदानता अंतोर्कुन इत्ते पूरा डेब्बै हेय्युर मंदितुन इजिप्तते केया लोहतोर.

15 अस्के याकोब इजिप्त देसेमते होतोर. अग्गेन याकोब आनि मना अंतोर एनकटा पेद्दाल्क इंका हातुर.

16 पजा ओरा पीनगुल्कुन इस्त्राएल देसेमता सेकेम इनना सहर ओसि, अगा हामोर इनना मनकना मर्कुनहेंदाल नगादि कोलतां हीसि अब्राहाम उंदि बोंदा अस्सि मत्तोर, अदे बोंदाते ईरदगुडा गति कीतुर.”

17 “अब्राहामुंक पेन हीता पोल्ले पूरा आयना वेला दग्गेर्क एल्ता, अस्के इजिप्त देसेमते मना लोकुल्क वेल्लेन आतुर.

18 कोन्नि रोजकु आतारित्ते योसेपुन बारेमते बतले एरपाट हिल्लुवा बोरो वरोर दुस्ट मनकल इजिप्त देसेमता राजाल आतोर.

19 ओर राजाल मना लोकुल्कुंक वेल्ले तकलिप हीतोर. मना लोकुल्कुना पिलाल्क पिसा मन्नि इंचि ओर्कुन पलाते पोहचियालय वेहतोर.”

20 “अदे कालमते मूसाल पुटतोर. पेनदा नदरते आ पेडल सक्कगा मत्तोर. आ पेडल मूड नेल्क ओना बाबाना लोते मत्तोर.

21 पजा बस्के अयते आ पेडन ओना तल्लुर-बाबो पलाते होळसीतुरो अस्के पिरोन राजाना मिय्यड ओन तेहकुंचि ओसि, दाना मर्रिनलेसी पोस कीता.

22 मूसांक इजिप्त देसेमता बेसता विद्दे कराहमळ जर्गुता. मूसाल पोल्लेने आनि कबळते रोंडुने इंका बेस हुसार मत्तोर.”

* 7:8 कतना इद पद्दत मुसलमान आनि यहूदिल्लुकु लोकुल्क कीतुर.

23 “ओर नल्यै वर्सानोर आतोर अस्के ओना लोकुलकुंक इत्ते इस्राएलना लोकुलकुंक होंचि कलियना मनसु आता.

24 पजा अगा होतस्के इस्राएल लोकुलकुनाल वरोन मनकनपोर्रो इजिप्त देसेमता वरोर मनकल अन्यायम कियानद हळतोर. हळसि आ अन्यायम कियना इजिप्त मनकन हळ्किसि आ इस्राएल मनकन कापाळसि ओना बदला एतोर.

25 इस्राएल लोकुलकुन पिसागोटनाहाटी पेन ओन वाळकुंचंता इत्ता संगतितुन ओना लोकुलकु एरपाट कीतुर इंचि ओर इन्कुत्तोर, गानि अद ओर्क तेळिया हिल्ले.

26 इंकुंदि रोजु ओना लोकुलकुनाले बोरो इव्वुर मनकालोर उर्रै अर्रनद हळसि ओर्कुन कल्पना उद्देसमते, अरे मिमेट बसंटा मनकालोर आदिर? दादल-तम्मुहक आसिगुडा, वरोनपोर्रो वरोर अन्यायम कीसंतरि! इंचि ओर्कुन इत्तोर.

27 अस्के ओना पक्कातोनपोर्रो अन्यायम कीसेके मत्ता मनकल मूसन पक्कक दोळ्बिसि, माकुन जगडमताल पापसि, मावा न्यायम कियना अदिकारम नीकु बोर हीतोर?

28 निन्ने आ इजिप्त मनकन हळ्कुताप, नाकुनगुडा हळ्कतन इनकुंचतिना?” इत्तोर.

29 इद पोल्ले केंजसि मूसाल इजिप्त देसेम होळसिसि मिदान देसेमते पेय्सि होत्तोर. अगा होंचि वरोर पराय देसेमतोनलेसी पिसालय दल्गुतोर. अग्गेन मरमि आतोर, अस्के ओन्क इव्वुर मर्कु पुटतुर.

30 इल्हा नल्यै वर्सा आसि होत्तां. अय्ते उंदि रोजु मूसांकु सिनाइ इनना गुट्टा दग्गेरा बय्लि जेगाते पोत्तना पोदाता लोप्पो उंदि पेनदा दूता दिसता.

31 अदुन हळसि मूसांकु इचंत्रम आता. दग्गेर्क होंचि बेस हळकोम इंचि मुन्नेळ्क अळगु वाटनपेडकु ओन्क पेनदा अल्किर केंजावाता.

32 पेन मूसनतोनि, नना नीवा एनकाटोरा तादो-बाबुरा पेनदुन आंदुन, इत्ते नना अब्राहाम, इसाक, याकोबना पेनदुन आंदुन, इंचि वळ्कुतोर. अस्के मूसाल इरगा वेरियकुत्तोर. ओन्क तला तेहचि पोर्रोळ्क हळना हिम्मत आयाहिल्ले.

33 अस्के पेन ओन, निमे नित्तिसि मनना जेगा पवित्र जेगा आंदु. नीवा कालकुना हेरपुहक तेंडा.

34 इजिप्त देसेमते मनना नावा लोकुलकुना तकलिप नना हळतन, ओरा अळमळ नना केंजतन. इंचि ओर्कुन कस्टालकुनाल तेंडानहाटी नना हिळ्ळु रेयतन. अय्ते वा! इंदके नना नीकुन मर्रा इजिप्त देसेमते लोहंतन. इंचि इत्ता.✧

35 बा मूसन अय्ते इस्राएल लोकुलकु, माकुन जगडमताल पापसि, मावा न्यायम कियना अदिकारम नीकु बोर हीतोर? इंचि हय्साकोंटा पकाक दोबसीतुरो, आ मूसाने पेन पोत्ताना पोदाते दिसता पेनदा दूताता हेंदाल ओरा राज्येम कियानोर आनि पिसागोटनोर इंचि लोहता.

36 इल्हा मूसाल, एर्रा समुद्रम आनि बय्लि जेगाते नल्यै वर्सनदाका इचंत्रमता कबाहक कीसेक, चिन्हां हुप्पिचेक आ लोकुलकुन इजिप्त देसेमताल पलातुक पेचाहचि तत्तोर.

37 ईर, ओरे मूसाल आंदुर, बोर अय्ते इस्राएलना लोकुलकुन, पेन मीहाटी मीवा लोप्पोटाले वरोन नावसोंटा पेनदा कबुरतोन लोहंता, इंचि इत्तोर.✧

38 मना इस्राएल लोकुलकु बय्लि जेगाते मत्तस्के ओरतोनि कलियसि मत्तोर ईर मूसाल आंदुर. इंका सिनाइ गुट्टापोर्रो पेनदा दूतातोनि ईर मूसाल वळ्कुतोर. अचोने आयका पेन दाना पिस्वर हियना पोल्लेन मनाकु एवसानाहाटी बोन्क अय्ते हीतानो ओर ईर मूसाल आंदुर.

39 गानि मना एनकटा पेद्दाल्क मात्रम ओर वेहताप ताकालय तयार मना हिल्लुर. मर्रा ओरा मनसु इजिप्त देसेमताहेकेन तिरियता.

40 अस्के आ लोकुल्क वरोर हास्नां इनानोनतोनि, माकुन इजिप्त देसेमताल पलाते तत्ता आ मूसांक बतल आतानो माकु बतले तेळियसेक हिल्ले. अदुनहाटीं मावा मुन्ने ताकालय पेनकु तयार कीम, इंचि इत्तुर.

41 पजा ओर अंटोर कलियसि पेय्यातसंटा उंदि बोम्मा तयार कीसि, आ बोम्मक मोक्कुल्क हियालय दलगुत्तुर. आ बोम्मातुन ओर तयार कीता कुसिते दाना मुन्ने पेद्दा पंडुगु कीत्तुर.

42 दानहाटीं पेन ओरा हेकेटाल मोकम तिराहकुंचि, मब्बुने मनना पोडदुन, वेडसितुन, सुक्काना पूजा कियालय ओर्कुन कुल्ला होळसीता. इदुन बारेमते पेनदा कबुरतोरा पुस्तकमते, “ए इस्राएल लोकुरिटा, मिमेट नल्पै वर्सनदाका,

बय्लि जेगाते मोक्कुल्क, पूजें नावाहाटीं कीतिरा? हिल्ले.

43 मिमेट मोलेक इनना पेनदा डेरा आनि

मीवा रिपानः इनना सुक्का पेनदा बोम्मातुनगुडा मीवातोनि ओतिर.

मिमेट मोळ्कानाहाटीं मिमेटे तयार कीकुत्ता अन्नि बोम्मां ओतिर.

अदुनहाटीं नना मीकुन वेल्लेन लक्कु मनना,

बेबिलोन सहरकन्ना हब्बेर लोहांतन.”*†

इंचि रासि मंता.

44 मना एनकटा पेद्दाल्क केडाते मत्तस्के ओरगा उंदि गवाइता डेरा^S मत्ता. अद डेरा मूसाल तयार कीता डेरें आंदु, अद डेरा तयार कियाका मुन्ने पेन मूसांक उंदि डेरता नमुना हूपिचि, अद मत्तापे तयार कीम, इंचि आदेस हीता.*

45 मना एनकाटोरा मुन्नेटाल पेन पेचाहचि गेदुमता वेरे जातितोरा बूमितुन मना लोकुल्क, जोसुवाल इनना वरोर मनकन मुन्ने अरहचि एतकुत्तुर. अस्केगुडा इद डेरा ओरगा मत्ता. अद डेरा दाविद राजाना कालमदाका ओरागेन मत्ता.

46 दाविद राजांक पेन आसिर्वाद् हीता, अदुनहाटीं ओर याकोबुना पेनदाहाटीं* उंदि गुळि दोहाना इंचि आसे पडतो.

47 गानि पेनदाहाटीं गुळि अय्ते सुलेमान राजाल दोहतोर.

48 बच्चो बतल अयनागानि पेन मनकल दोहता गुळिते मन्नो. बारित्ते इदुन बारेमते पेनदा कबुरतोरे इल्हा रासतो.

49 “पेन इत्ता, स्वर्गम नावा राजगद्दे† आंदु, ई बूमि नना काल्क इर्ना पीटे आंदु.

अय्ते मिमेट नावाहाटीं बसोंटा गुळि दोहा परांतरि?

नावा आराम किय्यना जेगा बल्हा मंदार?

50 इव अन्नि नावा कय्दे कीतवे आयोंगा!”*†

51 अरे पिस्सा लोकुरिटा, मीवा मनसु बारे वेरे जातितोरा मनसुन लेह्का मंता, मीवा केव्क बारे पेनदा पोल्लें केंजाकॉटा डोप्पां अरसोत्तां. मिमेट बस्केव्क पवित्र आत्मातुन पक्काक दोबसेके, इंदके मिमेटगुडा मीवा एनकटा पेद्दालुकुनालेसीं कीसंतरि.

52 मीवा पेद्दाल्क तकलिप हियाकॉटा पेनदा कबुरतोन वरोनगुडा होळसा हिल्लुर. वरोर नीतिमंतुड वायानोर मंतोर, इंचि वेहानोर्कुन मीवा एनकटा पेद्दाल्क हक्कतुर. इंदके मिमेट बारे, ओर बा नीतिमंतुना बारेमते वेहचि मत्तुरो आ नीतिमंतुन दोकाते पीसि हक्कतिर.

53 पेनदा दूतानाहेंदाल मीकु मूसाना नियम अय्ते दोर्कुता, गानि मिमेट दाना परकारम ताका हिल्लिर.

स्टिपनुन हक्कंतुर

† 7:40 हास्न इर मूसाना दादाल आंदु. ‡ 7:43 रिपान इद उंदि पेनदा पोरोल आंद. ☆ 7:43 आमोस 5:25-27

S 7:44 गवाइता डेरा इत्ते इद डेरा ओरतोनि मत्ते पेन ओरतोनि मंता इंचि ओरा गवाइ. ☆ 7:44 निर्गमन 25:9; 25:40

* 7:46 याकोबुना पेनदाहाटीं इद पोल्लेता जेगाते बवो-बवो बायबलकुने “याकोबुना लोकुल्कनाहाटीं” इंचि मंता. † 7:49 राजगद्दे राजाल उद्दना कुर्सितुन राजगद्दे इंतुर. ☆ 7:50 यसायाह 66:1-2

54 ओना पोल्ले केंजसि पंचादिते मत्ता पेद्दाल्क वेल्ले होंगुंक वासि, ओनाहेके ह्ळसि पटपटा पल्कु कोर्कालय दल्गुतुर.

55 गानि पूरा पवित्र आत्मातोनि निडिस मत्ता आ स्टिपन स्वर्गमताहेके ह्ळतोर. अस्के ओर पेनदा महिमाता वेल्गुन आनि पेनदा तिना बाजुंक नित्तिसि मत्ता येसुन ह्ळतोर.

56 ह्ळसि, “ह्ळटा! स्वर्गम बय्यर आयानद आनि मनकना रूपमते पुटता पेनदा मर्रि पेनदा तिना बाजुंक नित्तिसि मत्तद नना ह्ळसंतन,” इंचि ओर इत्तोर.

57 अस्के आ मदि केव्क मुक्कुंचि, जोरसे वरगेयसेके अंतोर उंदेदम ओनपोर्री वासि अरतुर.

58 ओन इग्गिसेक नाटेन पलाते ओसि बंडाने तनालय दल्गुतुर. इद जर्गनदान ह्ळता गवाइदार्क ओरा कपडिं तेंडसि साऊल इनना वरोर लेय्योना काल्कुन मुन्ने इरतुर.

59 लोकुल्क बंडाने तनानेके स्टिपन, “येसु सामि, नावा आत्मातुन निमे एतकुन.” इंचि पारतना कीतोर.

60 पजा ओर टोंगरां ऊनसि, “हे सामि, ई पापम ईरापोर्री तासुमा,” इंचि जोरसे वरगेयसि, कळ्क मुचतोर. इल्हा साऊलगुडा ओना हामुरते पोत्तु आतोर.

8

विस्वासुल्कुंक कस्टाल्क वांता

1 अवे रोजकुनाल येस्सलेमता कलिसियातोरपोर्री पेद्दा कस्टाल्क वायालय सुस्व आता. प्रेरितुलुकुन होळसि कळमातोर अंतोर विस्वासि लोकुल्क यहुदिया, सामरिया एरियाता नाहकुने बेकेटोर हेके सिल्लर-सिल्लर आतुर.

2 बोरो इच्चूर विस्वासुल्क स्टिपनुन गति कीसि ओनाहाटी वेल्ले दुक्कमते मत्तुर.

3 साऊल बारे कलिसियातोर्कुन तकलिप हियमळ सुस्व कीतोर. ओर लोन-लोन होंचि मुर्ताह्क इनाका मांडसा इनाका अंतोर्कुन इग्गिसि ओसि जेलने वाटालय दल्गुतोर.

4 गानि सिलर-सिलर आसि होत्ता विस्वासि लोकुल्क मात्रम बगा-बगा अयते होत्तुरो अगा-अगा ओर लोकुल्कुंक पेनदा बेसता कबुर वेहुंदुर.

पिलिपुस सामरियाते होंचि येसुना बारेमते वेहांतोर

5 पिलिपुस इनना वरोर बक्तुड सामरिया सहरते होंचि अगाटा लोकुल्कुंक किरिस्तुना* बारेमते वेहामळ सुस्व कीतोर.

6 पिलिपुस कीता चिन्हां ह्ळसि लोकुल्क ओर वेहाना पोल्लेन मनसु ताससि केंजतुर.

7 वेल्लेन मंदिक देय्याल्क पीसि मत्तां, आ देय्याल्क इंका इरगा मोत्कुंचेके पलाते पेय्सि विततां. अचोने आयका अगा वेल्लेन मंदि कुंटोर्क, कय-काल्क अरसोनना रोगमतोरगुडा मत्तुर, ओर अंतोरगुडा बेस आतुर.

8 अदुनहाटी अद सहरते आनंदमे आनंदम मत्ता.

9 अद नाटे सिमोन पोरोलतोर वरोर मनकल मनुंदुर. ओर होदें-मंत्रालुकुना बलमते इचंत्रमाता कबाहक कीसि, नाके एक्को तेळियंता, इंचि वेहकुंचेके सामरिया सहरता लोकुल्कुन इचंत्रमते अरहुंदुर.

10 सिन्नाल्क, पेद्दाल्क अंतोर, “पेनदा पेद्दा ताकत इत्ते ईर आंदुर,” इनकुंचि, ओना पोल्ले केव ताससि केंजुंदुर.

11 बारित्ते ओर वेल्ले रोजकुनाल ओना मंत्रालुकुना बलमते अंतोर लोकुल्कुन इचंत्रमते अरहचि मत्तोर. दानहाटीगे लोकुल्क ओर बतल वेहिना नम्मुंदुर.

12 गानि पेनदा राज्येम आनि येसु किरिस्तुना पोरोलता बारेमते पिलिपुस वेहता बेसता कबुर केंजसि मुर्ताह्क-मांडसा नम्मिसि बापातिस्मागुडा एततुर.

* 8:5 किरिस्तु इत्ते अबिसेकम आतोर, इंचि अर्तम.

13 कुद सिमोन इंका नम्मिसि बापतिस्मा एततोर. इल्हा ओर पिलिपुस बेके होत्ते हेके होंचेके ओनतोने मनालय दलगुतोर. पजा पिलिपुस कियना चिन्हां, अद्बूताल्क ह्ळसि इचंन्रमते अर्स्टुर.

सामरिया सहरते पत्रु आनि योहान

14 सामरिया सहरता लोकुल्क पेनदा पोल्लेन स्विकार कीतुर इंचि बस्के अय्ते येस्सलेमते प्रेरितुल्लुकंके तेळियतनो, अस्के ओर पत्रुन आनि योहानुन सामरिया एरियाक लोहचीतुर.

15 पजा ओर अगा वासि अगाटोर्कुंक पवित्र आत्मा दोर्केना इंचि पारतना कीतुर.

16 बारित्ते दीनकन्ना मुन्ने ओरा बोरापोर्रेन पवित्र आत्मा वाया हिल्ले. ओर्कु सिराप येसु सामिन परोलते बापतिस्मा दोर्कुता अचोने.

17-18 पजा पत्रु आनि योहान ओरापोर्री कय इरता इर्दडे ओर्कु पवित्र आत्मा दोर्कुता. इदुन सिमोन ह्ळसि, प्रेरितुल्लुकनगा होत्तोर.

19 होंचि, “नना मीकु कोत्तां हीतन, गानि नना बोनपोर्री अय्ते कय इर्तनो ओन्क पवित्र आत्मा दोर्कागोट्टना ई बलमतुन नाकुगुडा हीम्टु,” इंचि इत्तोर.

20 अस्के पत्रु ओन, “निमे कोत्ताने पेनदा वरमतुन अस्सा परांतन इंचि इनकुत्तिन. अदुनहाटी नीवा कोत्तां नीतोने नासडेम आंतां.

21 पेनदा नदरते नीवा विचारम बेसतद आयो, इंचि ई सेवा कबाहकुने नीकु पोत्तु हिल्ले, पालु हिल्ले.

22 निमे कराब विचाराल्क कियमळ होळसिसि मनसु मार्सकुंचि पेनदुक पारतना कीम. अस्के नीवा इसोटा विचाराल्कनहाटी नीकु मापि दोर्का परारं.

23 नना नीकुन बेस ह्ळसंतन, नीवा लोप्पो वेल्लेन विसम निंडिस निमे पुरागा तप्पुड कबाहकुनतोनि दोहाचि मतिन,” इंचि इत्तोर.

24 अस्के सिमोन, “मिमेट इत्तद बद्दे पोल्ले नापोर्री वायामान्नि इंचि मिमेट सामिक नाहाटी पारतना कीम्टु,” इंचि इत्तोर.

25 पजा पत्रु आनि योहान सामिना बारेमते बतल अय्ते केंजतुर, ह्ळतुर अदुना गवाइ हीतुर. पजा सामि वेहता पोल्लेन वेहचि येस्सलेम मल्सि होनालय पेय्स्तुर. ओर होननेके सामरिया नाहकुने वेल्लेन जेगाने पेनदा बेसता पोल्लें वेहचेके होत्तुर.

पिलिपुस आनि इतोपिया देसेमता मनकल

26 अस्के सामिनद उंदि पेनदा दूता पिलिपुसुंक वेहता गदा, “निमे तयार आसि, येस्सलेमताल बद हरिं अय्ते गाजा सहरताहेके दांता, अदे हरिं पीसि दक्सिनतेके होन्नु, आ हरिं बय्लि जेगाताल दांता.”

27-28 पजा ओर तयार आसि होत्तोर. होननेके हर्दे ओन्क इतोपिया देसेमतोर वरोर आडिगुल्ला मनकल कलियतोर. ओर इतोपिया देसेमता रानि कंदाकेनगा कोत्ताना लेक्का ह्ळना पेदुदा अदिकारिनलेहका कबळ कियुंदुर. दाना पूरा कजाना ओना कय्दा हिडे मत्ता. ओर आरादनाहाटीं येस्सलेम वासि, मल्सि होननेके रतमते उदसि यसायाह इनना पेनदा कबुरतोना पुस्तकम हदविसेके मत्तोर.

29 अस्के पेनदा आत्मा, “निमे आ रतम दगोर्के होंचि दानतोनि ताका,” इंचि पिलिपुसुंक वेहता.

30 अस्के पिलिपुस वितसि होंचि आ रतमतुन अंदकुत्तोर. रतमते उदिस मनना मनकल यसायाहल रासता पुस्तकम हदवानदुन ह्ळसि, “निमे बतल अय्ते हदविसंतिनो अदुना अर्तम नीकु तेळियसेके मंतना?” इंचि ओर आ मनकन पूसकीतोर.

31 “इदुना अर्तम बतलो, बोर्नना वेहुवद नाकु बल्हा तेळियंता?” इंचि आ मनकल इत्तोर. पिलिपुसुन रतम पोर्री एक्किस ओना पक्काते उद्दालय वेहतोर.

32 ओर आ पुस्तकमते बतल अय्ते हदविसेके मत्तोरौ अद इल्हा मंता:

† 8:27-28 आरादना इत्ते निजम पेनदुक मोळकमळ. उदा. पाटां पारमळ, स्तुति कियमळ, पारतना कियमळ, बायबल हदुवमळ ई.

“हक्कालय ओयना गोर्रैतालेसीं ओन ओतुर,
 गोर्रै दाना मेंदुल्ला बूरातुन कतरिचिनेके बल्हा सपुडदाका मंता,
 अल्हेने ओरगुडा सपुडदाका मत्तोर,
 ओना तोळदाल उंदि पोल्लेगुडा पेयसा हिल्ले.

33 ओना अपमानम कीसि ओनपोर्रो अन्यायम कीतुर,
 बूमिपोर्रोटाळ ओना पिस्वरतुन तेंडतुर, ओना वंसमतोर बोर्रै हिल्लुर.”*
 इल्हा रासि मत्ता.

34 अस्के, “असल ई कबुरतोर बोना बारेमते वेहचंतोर? ओना सतता बारेमतेना, हिलाकोटे मरि
 इंका बोर्रैना वैरैतोना बारेमतेना? दया कीसि नाकु तेळियनाल वेहा,” इंचि आ आडिगुल्लोड पिलिपुसुन
 इत्तोर.

35 अस्के पिलिपुस, आ मनकल हदबुसेके मत्ता वचनाल्लुकुनाल मोदोल पीसि, येसुना बेसता
 कबुरदाका अन्नि ओन्क वेहतोर.

आडिगुल्ला मनकल बापतिस्मा एतंतोर

36 इल्हा हरि पीसि होननेके-होननेके ओर उंदि एर मत्ता जेगातगा एवतुर. अस्के एतुन हळसि,
 “हळा! इगे एर मंता. इंदके नाकु बापतिस्मा एतालय बतलन्ना तकलिप मंतना?” इंचि आ आडिगुल्ला
 मनकल इत्तोर.

37 ‡(निमे गिंटा मनसुनाल पुरागा विस्वासम क्रियानय्ते बापतिस्मा एता परांतिन, इंचि पिलिपुस
 वेहतस्के, ओर हां, येसु सामिए पेनदा मरि आंदुर इंचि नना विस्वासम कीतन, इंचि जवाब हीतोर.)

38 अस्के ओर रतमतुन आपालय वेहतोर. पजा पिलिपुस आनि आ आडिगुल्ला मनकल ईर इव्वुर
 एते रेयतुर. पिलिपुस आ मनकंक बापतिस्मा हीतोर.

39 ओर एताल पलाते पेयस्तस्के पिलिपुसुन सामिना आत्मा बेकेनो ओता. आ आडिगुल्लोड ओन
 मर्रा बस्केने हळा हिल्लोर. अयना आ आडिगुल्ला मनकल आनंदमते ओना हरि पीसि ओर होत्तोर.

40 इल्हा पिलिपुस अजोतु इनना सहरते दिसतोर. पजा ओर होननेके हरि पीसि कलियता नाहकंता
 पेनदा बेसता कबुर वेहचेके कैसरिया सहरते एवतोर.

9

साऊलना मनसु मारियमळ

1 अदे वेलाते साऊल सामिनपोर्रो विस्वासम क्रियानोर्कुन हक्कंतन इंचि बेदरिचेक मत्तोर. ओर
 पेद्दा पेर्मानगा होत्तोर.

2 होंचि, “दमिस्क सहरते मनना दर्मसास्त्रम कराहना लोहकुनाल बोर्रैना सामि वेहता हरि पीसि
 ताकाना मूरतळ आयि मांडसा आयि दोर्कुंते, ओर्कुन दोहाचि येस्सलेमते वापस थायाना अदिकारमता
 सिट्टि रासि हीम,” इंचि इत्तोर.

3 इल्हा ओर दमिस्क एरियाक दग्गेर एवतोर. अस्के उंदेदम मब्बुनाल ओना सट्टु उंदि वेलगु
 जग्गारा मेर्सता.

4 अल्हा आता आयमळ ओर बूमिपोर्रो अरतोर. पजा ओन्क, “साऊल, साऊल निमे नाकुन बारि
 तकलिप कीसंतिन?” इंचि इत्ताप उंदि अल्किर केंजावाता.

5 अस्के, “सामि! निमे बोन आंदिन?” इंचि साऊल पूसकीतोर. अस्के, “निमे बोन अय्ते तकलिप
 कीसंतिनो नना आ येसुन आंदुन.

6 निमे इंदके तेदसि सहरतेके होन. बतल क्रियमळो अद नीकु अगा वेहमळ जर्गता,” इंचि इत्तोर.

7 ओनतोनि होंचेके मत्ता मनकालोर्कु अल्किर अय्ते केंजतुर, गानि ओर्क अगा बोर्रै दिसा हिल्लुर.
 अदुनहार्टी ओर मूकालोरलेसीं वळकाकोटा अल्हे नित्तिसि मत्तुर.

8 अस्के साऊल बूमिपोर्रोताल तेदसि कळ्ळक उस्मिसि हळ्ळते अगा ओन्क बतले दिसा हिल्ले. पजा ओनतोनि मत्तोर ओना कय पीसि दमिस्कते ताकिच्चेके ओतुर.

9 मूड रोजकुनदाका ओर गुड्डोनलेहका आसि मत्तोर. अचोने आयका ओर बतल तिना हिल्लोर, उन्ना हिल्लोर.

10 दमिस्कते हनन्याल इनना पोरोलतोर वरोर सिस्युड मत्तोर. सामि ओन्क दर्सनम हीसि, “हनन्या!” इंचि केयतोर. अस्के ओर, “हां सामि,” इंचि इत्तस्के,

11 सामि ओन, “तेदा, तेदिस ‘सवरगा’ इनना हरदुक होन. अगा यहुदाना लोन मंता. ओना लोन तरसुस सहरताल वाता साऊल इनना वरोर मनकल मंतोर. अगा ओना बारेमते पूस कीम. ओर इंदके पारतना कीसेके मंतोर.

12 साऊल दर्सनमते, हनन्याल इनना मनकल ओनगा वासि ओन्क मर्रा कळ्ळक दिसगोम इंचि ओनपोर्रो कय तासताप हळ्ळतोर,” इंचि इत्तोर.

13 अस्के हनन्याल, “सामि, ई मनकल येस्सलेमते मनना नीवा पवित्र लोकुल्लुकुन बच्चोचो तकलिप कीता संगति नना वेल्लेन लोकुल्लुकुना तोळ्ळदाल केंजतन.

14 इग्गेगुडा नीवा पोरोल एताना हरेक विस्वासिन दोहाचि ओयना अदिकारम, पेद्दा पेर्मालोर्कुन हेंदाल एतकुंचि वातोर,” इंचि वेहतोर.

15 अस्के सामि ओन, “नावा पोरोलतुन वें जातितोरा नड्डुम, राजालोरा मुन्ने, इस्त्राएलता लोकुल्लुकुन मुन्ने वेहनाहाटी नना ईन नावा विसे इंचि पेर्कुल्लतन, अदुनहाटी निमे होन.

16 नावा पोरोल एतानाहाटी ओन्क बच्चोर कस्टाल्क अर्रा पीतानो नना कुद ओन्क हुप्संतन,” इंचि इत्तोर.

17 अस्के हनन्याल अगटाल पेय्सि साऊल बद लोते मत्तोर ओ अद लोन होत्तोर. होंचि ओनपोर्रो कय इर्सि, “साऊल दादा, निमे हरि पीसि वायानेके नीकु दिसतोर हळा! आ येसु सामिए नीकु मर्रा कळ्ळक दिसगोम, निमे पवित्र आत्माते पुरागा निडिस होनगोम इंचि नाकुन लोहतोर,” इल्हा वेहतोर.

18 अस्केने ओना कळ्ळकुनाल बतलो पोर्निसंटव रालसि, ओर हळ्ळालय दल्लुगुतोर. पजा तेदसि बापतिस्मा एततोर.

19 गाटो तित्तस्के ओन्क ताकत वाता. इल्हा ओर कोन्नि रोजकु दमिस्कते मत्ता सिस्युल्लुकुनतोनि अगने मत्तोर.

साऊल दमिस्कते येसुना बारेमते वेहांतोर

20 पजा ओर आल्सेम कियाकॉटा, “येसे पेनदा मर्रि,” इंचेके यहुदि लोकुल्लुकुना दर्मसास्त्रम कराहना लोहकुने होंचि येसुना बारेमते वेहालय सुस्त्र कीतोर.

21 अगा ओना पोल्लें केंजतोर अंतोर इचंत्रमते अर्सि, “येस्सलेमते येसुन नम्मूतोर्कुन दोर्कापीसि ओर्कुन हळ्ळुता मनकल ईर आयोरा? इंका इग्गेगुडा येसुन नम्मूतोर्कुन पीसि दोहाचि वाटसि पेद्दा पेर्मालोरा मुन्ने ओयाना विचारमते वातोर गदा!” इंचि इनालय दल्लुगुतोर.

22 गानि साऊलना कराहना तेल्वि मात्रम रोज-रोज बेरसेकेन होत्ता. अदुनहाटी दमिस्कते मनना यहुदिल्लुकुन, येसु सामिए किरिस्तु आंदुर, इंचि रूजुव कीसि ओर्कुन वळ्ळकाकॉटा कियुंदुर.

साऊलुन हळ्ळना पिलान

23 इल्हा वेल्लेने रोजकु आतारित्ते यहुदिल्लक साऊलुन हळ्ळना उपायम कीतोर.

24 गानि ओन हळ्ळालय नर्का-पियल सहरता गेटकुनगा यहुदिल्लक पोंचादोसि मनना संगति साऊलुकु तेळियसि होत्ता.

25 अस्के साऊलना सिस्युल्लक नर्कटा वेलाते ओन उंदि तट्टाते उपिच्चि सहरता सुट्टु मत्ता गुरे पोर्रोटाल वेलाड वाटसि हिळ्ळ रेहत्तुर.

येस्सलेमते साऊल

26 साऊल येस्सलेमते वातंका सिस्स्युल्लुकनतोनि कलियसि मनालय ह्ळतोर. गानि सिस्स्युल्लुक मात्रम ईर निजम सिस्स्युड आदुरो आयरो, इंचि विस्वासम हिलाका वेरियुंदुर.

27 बरनाबास मात्रम साऊलुन पीसि प्रेरितुल्लुकनहेके वातोर. साऊल वायनेके हर्दे येसु सामिन बल्हा ह्ळतोर, येसु सामि ओनतोनि बल्हा वळकुतोर, दमिस्कते ओर येसु सामिना पोरोलता बारेमते बल्हा वेरियाकॉटा वेहतोर, इव अन्नि पोल्लें ओर्कु वेहतोर.

28 इल्हा साऊल ओरतोनि कलियसि-मेलियसि मनुंदुर आनि वेरियाकॉटा येसु सामिना पोरोलता बारेमते वेहसेके येस्सलेमते तिरियुंदुर.

29 ओर युनानि बासा वळकाना यहुदिल्लुकनतोनि सामिना बारेमते वळकुंदुर, चर्चा कियुंदुर. गानि ओर मात्रम ओन ह्ळकालय ह्ळतुर.

30 बस्के अयते इद संगति दादालोर्कुक तेळियतनो अस्के ओर ओन मुन्ने कैसरिया ओतुर. पजा अगटाल ओना पुटता सहर तरसुसते लोहचीतुर.

31 इल्हा यहुदिया, गालिल, सामरिया एरियाता कलिसियानोर्कुक कोन्नि रोजकु सांति मत्ता. आ कलिसियानोर सामिंकु वेरियसि बेस बक्तितोनि पिसुंदुर, पवित्र आत्मागुडा ओर्कु बेस प्रोत्साहन हियुंदु, अदुनहाटी ओर बेस ताकतवान आतुर. इल्हा ओर वेल्लेन आसेक होतुर.

32 पजा पत्रु देसेमंता तिरियसेक-तिरियसेक लुद् दा इनना सहरते मनना पेनदा लोकुल्लुकनगा होतुर.

33 अगा ओर, लकवा बिमार आसि एनमिदि वर्सानाल कटुल पीसि मत्ता आनियासु पोरोलता वरोर मनकंक कलियतोर.

34 अस्के, “आनियासु, येसु किरिस्तु नीकुन बेस कीतोर, निमे तेदसि नीवा कटुल्लुन हद्दा,” इंचि पत्रु ओन इतोर. अस्केटद अस्केन आ मनकल तेदतोर.

35 अस्के लुद्दा आनि सारोन सहरकुने मनना वेल्ले लोकुल्लुक आनियासुन ह्ळसि सामिनहेके तिरियतुर.

हासोत्ता मुरतळकु पत्रु जीवा अरहंतोर

36 यापा सहरते उंदि विस्वासि मुरतळ मनुंदु, दाना पोरोल तबिता. तबिता इत्ते युनानि बासाते, दोरकस, इत्ते तल्लुर दुप्पि इंचि अर्तम. अद मुरतळ बस्केळक बेसता कबाहक कीसेके, गरिबोर्कुक दान-दर्मम कीसेके मनुंदु.

37 पत्रु लुद्दा सहरते मत्ता रोजकुनेन अद बिमार अर्सि हासोत्ता. अस्के दाना पीनगुंकु एर दोस्सि मिद्देता पोरोटा अरति इरतुर.

38 लुद्दा नार यापा सहरकु दग्गेरेन मत्ता. अयते पत्रु अगा मंतोर इत्ता संगति सिस्स्युल्लुकुंक तेळियतस्के इव्वुर मनकालोर्कुन ओनगा लोहचि, आलसेम कियाकॉटा ओरहेके वायालय विनंति कीतुर.

39 अस्के पत्रु बिराना तयार आसि ओरतोनि होतुर. ओर अगा एव्ता-एव्वुडे ओन मिद्दे पोरोटा अरति ओतुर. अगा ओर होतस्के अगा मत्ता मुंडामोस्ता मुर्ताहक, दोरकस अवुनतोनि मननेके कुट्टा अर्गिं आनि कपडिं पत्रुंकु ह्पिच्चेके ओन सुट्टु आसि अळालय दल्गतां.

40 गानि पत्रु अवुन अंटोर्कुन पलाते लोहचि टोंगरां ऊनसि पारतना कीतोर. पजा पीनगुनहेके तिरियसि, “तबिता, तेदा!” इंचि इतोर. अस्के अद पत्रुन ह्ळसि तेदिस उदुता.

41 पजा अद दाना काल्लुकनपोरो नित्तालय कय हीसि सहायम कीतोर. पेनदा लोकुल्लुकन, मुंडामोस्ता मुर्ताहकन केय्सि जीवाते मत्ता तबितान ओर्कु ह्पिस्तोर.

42 ई संगति पूरा यापा सहरअंता तेळियसि, वेल्ले लोकुल्लुक सामिन नम्मुकुत्तुर.

43 आयंका पत्रु यापा सहरतेन सिमोन इनना वरोर तोलकुन कबळ कियानोनगा वेल्लेन रोजकु आगतोर.

10

पत्रु आनि कुरनेलियुस

1 कैसरिया सहरते कुरनेलियुस पोरोलतोर वरोर मनकल मनुंदुर. ओर इटलि इनना पोलिस दलमते नूर मिलट्टी पोलिसुलुकुन पोर्रो दरोगाल मत्तोर.

2 कुरनेलियुस बेस नीतिमंतुड मत्तोर. ओर, ओना लोतोरगुडा पेनदुक वेरियुंदुर. ओर गरिब लोकुकुकुंक वेल्ले सहायम कियुंदुर. बस्केळक पेनदुक पारतना कीसेके मनुंदुर.

3 ओर उंदि रोज पियल मूड एगना पारतना कियनेके दर्सनमते उंदि पेनदा दूता ओनगा निजम वासि, “कुरनेलियुस!” इंचि ओन केयताप हळतोर.

4 अस्के कुरनेलियुस वेर-वेरियसेक पेनदा दूताहेके हळसि, “नीकु बतल गावाले वेहा,” इंचि इत्तोर. अस्के पेनदा दूता, “नीवा पारतनां पेन केंजता. गरिबोर्कुंक निमे कियना सहायमतुन पेन हळता.

5 निमे इंदके इच्चुर मनकालोर्कुन यापा सहर लोहचि सिमोन पोरोलता मनकन (ईन पत्रुगुडा इंतुर) निहगा केया.

6 ओर सिमोन इनना वरोर तोलकुन कबळ कियानोना लोते मंचंतोर. ओना लोन समुद्रम ओडुङ्क मंता.” इंचि ओन इत्ता.

7 इल्हा ओनतोनि वळकसेके मत्ता पेनदा दूता अगटाल होत्ता होनमळे, कुरनेलियुस ओना लोन कबळ कियाना जीतागाहकुनाल इव्वुर जीतागाहकुन आनि पेनदुक वेरियानोर अल्हेने ओन्क बेस सेवा कियना वरोर पोलिसुन, इल्हा मुव्वुर्कुन केयतोर.

8 पजा अगा बतल अय्ते जम्गुतनो, अद पूरा वेहचि ओर्कुन यापा सहरकु लोहचीतोर.

पत्रु पेनदा दर्सनम हळतोर

9 इंकुंदि रोजु ओर यापा सहर दग्गेरा एवतस्के पिय्यटा वेलाकु पारतनाहाटी पत्रु मिदूदेपोर्रो होत्तोर.

10 अस्के ओन्क कर्वीस्सि मत्ताहेंका बतलन्ना तिनकन बारे इंचि अनपिस्ता. गाटो वेसेकेन मत्ता अचचोटेन ओर उंदि दर्सनम हळतोर.

11 अद दर्सनमते, मब्बु बय्यर आसि, पोर्रोटाल बतलो उंदि वस्तु हिळु वायनद ओर हळतोर. अद उंदि पेदूदा सेदरलेहका मंता. दाना नालुं मूलां पीसि हिळु रेयताप ओर हळतोर.

12 अव्टे नालुं काल्क मत्ता अन्नि तीरकुना जिवरासी, बैंगाना जिवरासी आनि मब्बुने परियना पिट्टें मत्तां.

13 अस्के पत्रुंक उंदि अल्किर, “पत्रु, तेदा! अवुन हव्विस तिन,” इंचि केंजावाता.

14 गानि पत्रु, “मन्नि सामि, नावा पिस्वरते नना बस्केने मूसान नियम परकारम तिनुमा इत्तद, अपवित्रमातद तिंडि तिना हिल्लेन,” इंचि इत्तोर.✱

15 पजा अद अल्किर, “पेन सुदूद कीतद बतले वस्तु आयि, दान निमे असुदूद इंचि इनुमा,” इल्हा रोंडो मल्का ओन्क केंजावाता.

16 इल्हा मूड मल्कां जर्गुता. पजा अद सेदरतसोंटा वस्तु बिराने पोर्रोळ्क मब्बुनहेके तिरियसि होत्ता.

17-18 पत्रु आ हळता दर्सनमता अर्तम बतल आयावचु इंचि विचारम कीसेकेन मत्तोर, अद हळा! कुरनेलियुस लोहता मनकालोर सिमोनना गुयमाकुलुकुनगा वासि, “पत्रु इनानोर इदे लोते मंचंतोरा?” इंचि पूसकीतुर.

19 पत्रु इंकागुडा अदे दर्सनमता बारेमते विचारम कीसेके मत्तोर. अचचोटेन पेनदा आत्मा, “हळा, मुव्वुर मनकालोर नीकुन पहकसंतुर.

20 अय्ते तेदा, हिळु रेय्सि मनसुने बतले अनमानम इर्काकोटा ओरतोनि होन्नु. ओर्कुन ननाने लोहतन,” इंचि ओन इत्ता.

21 अस्के पत्रु हिळ् रेय्सि ओरगा होंचि, “मिमेट बोन अयते पहकसंतिरो ओर ननाने आंदुन. अयते मिमेट हीके बारिक वातिर?” इंचि पूसकीतोर.

22 अस्के आ मनकालोर, “माकुन उंदि पोलिस दलमता दरोगाल कुरनेलियुस इनानोर लोहतोर. ओर बेस नीतिमंतुड आनि पेनदुक वेरियसि ताकाना मनकल आंदुर. यहुदि जातिता लोकुलुकुने ओर बेस पोरोल होतोर. नीकुन ओना लोन केया वेहचि, नीहेंदाल ओन्क पोल्लें वेहालय उंदि पवित्र पेनदा दूता ओन्क वेहता,” इंचि इत्तोर.

23 पजा पत्रु ओर्कुन लोप्पो केय्सि ओर्कुन हेडमितोरलेसी हूळकुत्तोर. इल्हा इंकुंदि रोजु तया आसि ओरतोनि होतोर. होननेके यापा सहरता इच्चुर विस्वासुल्कगुडा ओनतोनि होतोर.

24 इंकुंदि रोजु ओर अंटोर कैसरिया सहरते एवतुर. अगा कुरनेलियुस ओना जीवातोर्कुन आनि दगोटा दंटातोर्कुन केय्सि ओना एदुर हूळसेक मत्तोर.

25 पत्रु लोप्पो होळियतस्के कुरनेलियुस ओना कालुकुनपोर्री अर्सि ओना कालुक मोळकतोर.

26 गानि पत्रु ओन तेहचेके, “अरेरे! नित्ता, ननागुडा नीलेसी वरोन मनकने आंदुन,” इंचि इत्तोर.

कुरनेलियुस दरोगान लोन पत्रु

27 पजा पत्रु कुरनेलियुसनतोनि वळकसेके-वळकसेके लोप्पो होतोर. अस्के अगा ओर वेल्लेने मंदि जमा आसि मत्तद हूळतोर.

28 हूळसि, “मीकु उंदि पोल्ले अयते एरपाटे, अद बतल इत्ते, यहुदि मनकल वेरे जातिता मनकनगा होनमळ, ओनतोनि बेसता संबंदम इरमळ यहुदि रीति-रिवाजकुने बेस आयो. गानि पेन मात्रम, नना बोने मनकन पास्कामन्नि, बोने अपवित्र इना मन्नि इंचि नाकु हुपिस्ता.

29 अदुनहाटी नाकुन मिमेट केयतस्के नना बतले विचारम कियाकांटा मीतोनि पेय्सि वातन. अयते मिमेट नाकुन बारि केयतिर नाकु वेहाट,” इंचि पत्रु ओर्कुन इत्तोर.

30 ओर अल्हा पूसकीताहाटी कुरनेलियुस, “मूड रोजकु मुन्ने* इदे वेलाकु पियल मूड एगानेके नना नावा लोन पारतना कीसेके मत्तन, अस्के उंदेदम तलातला मेर्सना कपडिने वरोर मनकल नावा मुन्ने वासि निततोर.

31 नित्तिसि, ‘कुरनेलियुस, नीवा पारतना पेन केंजता, गरिबोर्कुंक निमे कियना सहायमतुन पेन हूळता.

32 अदुनहाटी यापाते बोनना लोहचि पत्रुन केया लोहा. ओर समुद्रम ओड्डुनगा सिमोन इनना तोलुकुन कबळ कियानोन लोन आगसि मंतोर,’ इंचि इत्तोर.

33 अदुनहाटी नना बिराना नीकुन केया लोहतन, निमे इगे वासि बच्चोरो बेस आता. इंदके नीकु पेन बतल वेहतनो अव अन्नि केंजालय मोमोट अंटोरम इगे पेनदा मुन्ने जमा आतोम,” इंचि वेहतोर.

पत्रुना बासन

34 अस्के पत्रु वळकमळ सुख कीतोर. ओर इत्तोर, “पेन हरेक मनकन उंदेतीर हूळता इंचि इंदके नाकु निजम तेळियता.

35 दुनियाता अन्नि देसेलुकुना लोकुल्क ओर बोरेन्ना आयिर, ओर पेनदुक वेरियसि नीति कबाहक कियानयते पेन ओनपोर्री कूस मनंता.

36 येसु किरिस्तु अंटोरा सामि आंदुर. ओनहेंदाल पेन दाना सांतिता बेसता कबुर इस्राएलता लोकुल्कुंक हीता, अद कबुर इदे आंदुर.

37 बापतिस्माता बारेमते योहान वेहमळ सुख कीता पजा, गालिलते उंदि गटना सुख आता. इद गटनाता बारेमते पूरा यहुदिया एरियंता पैलांचता संगति मीकु एरपाटे मंता.

* 10:30 मूड रोजकु मुन्ने युनानि लोकुल्कुना नालुं रोजकु मना लेक्काते मूड रोजकु आंतां.

38 नासरेत नाटेना येसुन पेन पवित्र आत्मातोनि अबिसेकम कीसिं अदू बूतामाता ताकत हीता. पेन ओनतोनि मत्ताहेंका, ओर अंटोराहाटीं बेसता कबाहक कियुंदुर, देय्यालुकुना मुक्याना कयदा हिळु मत्तोर्कुन बेस कीसेके तिरियुंदुर, इद मीकु एरके.

39 येस्सलेम, यहुदिया देसेमते ओर कीता अन्नि कबाहकन मोमोट प्रेरितुलुकुम, कळुकुने हळतोम. इंका ओर ओन कूसुनपोर्रीं वेलाड वाटसि हळकतुर.

40 गानि पेन मात्रम ओन मूड रोजकुने मर्रा जीवाते तेहाचि दिस्सानाल कीता.

41 अंटोर लोकलुक ओन हळा हिल्लुर. गानि पेन माकुन मुन्नेन गवाइदार्क इंचि पेर्कुत्ता. अदुनहाटीं मोमोटे ओन हळतोम. ओर हासि तेदतारित्ते मोमोट ओनतोनि कलियसि तित्तोम, उट्टोम.

42 जीवाते मत्तोर्कुंक, हासोत्तोर्कुंक न्यायम कियानोर इंचि पेन ईने पेर्कुत्ता. इदुना बारेमते लोकलुकुंक बेसता पोल्लें कराहना, गवाइ वेहना इंचि ओर माकु आदेस हीतोर.

43 येसुनपोर्रीं विस्वासम ईरना हरेक मनकंक येसुना पोरोलते पापालक मापि आंतां, इंचि अंटोर पेनदा कबुरतोर्क गवाइ हीसि मत्तुर.”

वेरे जातितोर पोर्रीं पवित्र आत्मा रेयता

44 पन्ना वळकमळ सुख मनैकेने पेनदा बेसता पोल्लें केंजसेक मत्तुरा अंटोरपोर्रीं पवित्र आत्मा रेयता.

45 पवित्र आत्माता वरम वेरे जातितोर पोर्रीं गुडा वळियतदुन हळसि पन्नुनतोनि वाता कतना आता विस्वासुलुकुंक इचंत्रम आता.

46-47 ओर अंटोर्कुन ओर्कु तेळियवा बासाने पेनदा स्तुति कीतद केंजतुर. अस्के, “मनाकु दोर्कताप ईर्कगुडा पवित्र आत्मा दोर्कुता. ईर एते बापतिस्मा एता मन्नि इंचि बोर्नना अड्डम वळकानोर मंतुरा?” इंचि पन्नु इतोर.

48 इल्हा पन्नु, येसु किरिस्तुना पोरोलते ओर्कु बापतिस्मा हियालय आदेस हीतोर. इदंता आता पजा कोन्नि रोजकु पन्नु ओरतोनि मननाहाटीं अंटोर कलियसि पन्नुक विनंति कीतुर.

11

पन्नु येस्सलेमते मल्लिस वांतोर

1 वेरे जातितोरगुडा पेनदा पोल्लेतुन ओष्कुत्तुर इत्ता संगति, प्रेरितुलुकु आनि यहुदिया एरियाते मत्ता दादालोर केंजतुर.

2-3 गानि बस्के अयते पन्नु येस्सलेमते वातोर अस्के, इच्चुरकतना आता विस्वासुलुकु, “निमे वेरे जातितोरा* लोहकुने होंचि ओरतोनि गाटो बारि तित्तिन.” इंचि ओनतोनि जगडम दोस्तुर.

4 अस्के पन्नु बतल अयते जस्सुतनो अद बल्हा मत्तद अल्हे ओर्कु ई परकारम तेळियागोटिस वेहतोर.

5 “नना यापा सहरते पारतना कीसेक मननैके उंदि दर्सनम हळतन. अद दर्सनमते, पेदू दा सेदरतसोंटा उंदि वस्तुन नालुं मूलां पीसि मब्बुनाल हिळु रेहानद हळतन. अद हिळु रेयिसि नना मत्तागेन वाता.

6 नना दान लोप्पो बेस हळतस्के नाकु अव्ते बूमिपोर्रीं मनना नालुं कालुकुना जिवरासीं, केडा जिवरासीं, बेगना जिवरासीं आनि मब्बुने परियाना पिट्टें दिसतां.

7 अस्के नाकु, पन्नु तेदा, अवुन हळ्किसि तिन, इंचि वेहताप उंदि अल्लिकर केंजावाता.

8 अस्के, मन्नि सामि, मूसान नियम परकारम तिनुमा इत्तद, अपवित्रमातद नना बस्केने तिना हिल्लेन, इंचि इत्तन.

9 अदे अल्लिकर मब्बुनाल रोंडो मल्का, पेन सुदूद कीतद बतले वस्तु आयि, निमे दान असुदूद इंचि इनुमा, इंचि केंजावाता.

10 इल्हा मूड मल्कां आता. पजा अदुन मर्रा पोर्रींळक तेहाकुंचि मब्बुनहेके ओयमळ जर्गुता.”

† 10:38 अबिसेकम कीसि राज्येम ताकसना अदिकारम हीसि ओन्क निय होकमळ.

* 11:2-3 वेरे जाति इत्ते युनानि बासाते कतना आयवा लोकलुकु.

11 अस्केने नाकुन केय्सि ओयालय कैसरियाताल वाता मुब्बुर मनकालोर नना मत्ता लोतागा वासि निल्लुर.

12 बतले अनमानम कियार्कोटा ओरतोनि पेय्सि होन. इंचि पेनदा आत्मा नाकु वेहता. ईर हास्त्र विस्वासि दादालोरगुडा नावातोनि वातुर. मोमोट अंटोरम माकुन केया वेहता मनकना लोते होळियतोम.

13 आ मनकल माकु वेहतद बतल इत्ते, ओर उंदि पेनदा दूतातुन ओना लोते नित्तिसि वळ्ळकतदुन हळतोर. आ पेनदा दूता, यापाते मनकालोर्कुन लोहचि पत्रु इनना सिमोनन केयकुन.

14 ओर नीकु, नीवा लोतोर्कगुडा मुक्ति बल्हा दोर्कता, अदुन बारेमते वेहांतोर इंचि वेहता.

15 नना वळ्ळकमळ सुस्व कीतारित्ते पवित्र आत्मा मुन्ने मनापोर्रो बल्हा रेयतनो अल्हेन ओरापोर्रो इंका रेयता.

16 अस्के, योहान एततोनि बापतिस्मा हीतोर, गानि मीकु पवित्र आत्माते बापतिस्मा हियमळ जर्गता. इंचि सामि इत्ता आ पोल्ले नाकु मति वाता.

17 येसु किरिस्तुन मनम सामि इंचि विस्वासम कीतस्के मनाकु हीता वरमे ओर्कु इंका हीता. अय्ते पेनदुक अड्डम तिरियानोन नना बोन आंदुन?

18 ई पोल्लें केंजसि ओर अंटोर सपुडदाका आतुर. पेन वेरे जातितोर्कगुडा पिस्वर दोर्किचुकुननाहाटी मनसु मार्सकुनना वरम हीता, इंचि पेनदा स्तुति कीतुर.

अंताकिया सहरते पेनदा बेसता पोल्ले एंवता

19 स्तिपन हासोत्ता पज्जो वेल्लेन कस्टाल्क वातां, अदुनहाटीं लोकुल्क सिल्लर आसि हिके-हेके पायसि होत्तुर. आ लोकुल्क पिनिके, साइप्रस, अंताकिया इनना सहरकुने होंचि अगा सिराप यहुदिल्लुकुंके पेनदा बेसता पोल्ले वेहचेके मत्तुर.

20 ई विस्वासुल्कुनाले इच्चुर विस्वासुल्क साइप्रस आनि कुरेनि इनना सहरतोर मत्तुर. ओर अंताकियाक होंचि येसु सामिना बेसता कबुर युनानि लोकुल्कगुडा वेहतुर.

21 सामिना ताकत ओरतोनि मत्ता इंचि वेल्लेटुर लोकुल्क विस्वास कीसि सामिनहेके तिरियतुर.

22 बस्के अय्ते ई कबुर येस्सलेमता कलिसियातोर्क तेळियता, अस्के ओर बरनाबासुन अंताकियाक लोहतुर.

23 ओर अगा होंचि अगाटा लोकुल्कुनपोर्रो पेनदा कुर्पा[†] हळसि इरगा कूस आतोर, सामिनतोनि बस्केळताहाटीं पूरा मनसुनाल बेस विस्वासमते नित्तिसि मनना, इंचि ओर्क अटोर्क दैरनेम हीतोर.

24 ओर बेस मनकल मत्तोर, अचोने आयका विस्वासम आनि पवित्र आत्माते निडिस मत्तोर. इल्हा वेल्लेन मंदि सामिन नम्मिसि विस्वासुल्क आतुर.

25 पजा बरनाबास साऊलुन पहकालय तरसुस इनना सहर होत्तोर.

26 अगा ओन दोर्किचुकुचि अंताकियाक पीसि वातोर. अगा ओर इब्बुर अगाटा कलिसियातोर्क कलियसेके, वेल्लेन लोकुल्कुकुंकराहसेके मत्तुर. इल्हा ओर इब्बुर उंदि एडादिमेड अंताकियातेन मत्तुर. अय्ते मोट्टा मोदाला सिस्स्युल्कुन “किरिस्तुनोर[‡]” इंचि इन्मळ ई अंताकियातेन जर्गता.

27 अवे त्कुल्कुने इच्चुर पेनदा कबुरतोर येस्सलेमताल अंताकियाक वातुर.

28 ओरव्टे वरोर अगबुस पोरोलतोर मत्तोर. ओर पवित्र आत्माते निडिस, पूरा दुनियाते उंदि पेदूदा कर्वु अरानद मंता, इंचि वेहतोर. इदु कर्वु कलादियुस इनना राजाना कालमते अर्सि मत्ता.

29 अस्के अंताकियाते मत्ता अंटोर सिस्स्युल्क ओरा-ओरा एलवान परकारम यहुदियाते मनना विस्वासुल्कुकुंका सहायमहाटीं बतलन्ना लोहना इंचि निरनायम एततुर.

30 ओरा निरनायमनुसार सहायमहाटीं जमा कीता सोम्मुन ओर बरनाबास आनि साऊलुना कय्दे यहुदियाते मनना पेदूदाल्कुनहेके लोहचीतुर.

[†] 11:23 कुर्पा इत्ते उंदि परकारमता आसिर्वाद इत्ताप. [‡] 11:26 किरिस्तुनोर येसुनपोर्रो विस्वास कीसि ओर वेहताप ताकाना लोकुल्कुन किरिस्तुनोर लोकुल्क इत्तुर.

12

हेरोद राजल पन्न जेलने वाटंतोर

1 अवे रोजकुने हेरोद अग्रिपा राजाल कलिसियानाल इच्चुर मंदितुन तकलिप कियालय सुख कीतोर.

2 ओर योहानुना दादल याकोबुना तल्लातुन कसेटे कोय्से हक्का वेहतोर.

3 ओर कियना कबाहक यहुदि लोकुकुकुं बेस अनपिस्ता इन्कुचि हेरोद राजाल पन्न इंका दोर्का पीतोर. (इद गटना होयवा पिंडिता हारिना पंडुगुना* रोजु जर्गुता.)

4 दोर्कापीसि जेलने वाटतोर. पजा तेपाक नालुर सिपाइलक ओनगा कावेल कियना इंचि, पदाहास सिपाइलुकुना कय्दे ओन अप्पजेपतोर. दाटसि होनना पंडुगुं आतारित्ते पन्नान्यायम कियालय लोकुकुना मुन्ने तायाना विचारम हेरोद राजाना मनसुने मत्ता.

5 इल्हा पन्न ओर जेलने वाटसि इरतोर. गानि ओनाहाटी कलिसियातोर मात्रम आगाकोंटा उंदेतीर पेनदुक पारतना कीसेके मत्तुर.

पन्न जेलनाल पेयसंतोर

6 हेरोद राजाल पन्न पलाते पीसि वायना उंदि रोज मुन्ने, नर्काटा वेलाक पन्न इच्चुर सिपाइलुकुना नड्डुम निद्रा होंचेके मत्तोर. सिपाइलक ओन रोंडु गोल्सुकुने बेडी वाटसि इरतुर. पलाते तल्पुनगा कावेल कियानोर जेलता कावेल कीसेके मत्तुर.

7 अचानक सामिनद उंदि पेनदा दूता अगा दिसता. आ अर्ता पूरा वेल्गुनतोनि निडिस होत्ता. आ पेनदा दूता पन्न मेलाहचि, बिराना तेदा! इंचि ओन तेहाता. ओना कय्कुना बेडी लेंगसि हिळु अरतां.

8 अस्के, बिराना तयार आसि हेरपुहक केर्ता, इंचि पेनदा दूता ओन्क वेहता. अस्के अद वेहतापे ओर कीतोर. पजा पेनदा दूता, नीवा सेदर मुचकुंचि नावा पज्जो वा, इंचि इत्ता.

9 ओर पेनदा दूताता पज्जो-पज्जो होंचि जेलनाल पलाते अय्ते पेयसतोर, गानि पेनदा दूता बतल अय्ते कीसंतनो अद अंता निजमे जर्गुसंता इंचि ओर इनकुना हिल्लोर. ओर उंदि दर्सनम हळसंतन बारे इत्ताप अनपिस्ता.

10 पजा ओर मोदाटोन आनि ओना पज्जोटा कावेल कियानोन दाटसि सहरकु होनना कचि तल्पुनगाहकु वातुर. अस्के आ तल्पु ओराहाटी दानद अदे पेयस्ता. अस्के ओर दान दाटसि पलाते पेय्से होत्तुर. इच्चोन लक्कु होतंका अचानक आ पेनदा दूता ओन होळसि होत्ता.

11 पजा पत्रंक तेल्वि अरता. अस्के निजमे! सामिए ओना उंदि पेनदा दूतातुन लोहचि नाकुन हेरोद राजाना कय्दाल तप्पिस्तोर. यहुदि पेद्रु दालक नाकुन बतल-बल्हा कियाना इंचि विचारम कीसेक मत्तुरो, अव अनिटावुनालगुडा सामिए नाकुन पिसागोटतोर, इंचि इन्कुत्तोर.

12 इदंता तेळियता पजा ओर मरियम इनना मुरतटा लोन होत्तोर. ई मरियम योहान (ईन मरकुसगुडा इत्तुर) इनानोना यावल आंद. अगा वेल्लेन मंदि उंदगा जमा आसि पारतना कीसेके मत्तुर.

13 पन्न पलाताल तल्पुन तंतस्के तल्पु तेंडालय रूदा इनना उंदि दासि पेगिड वाता.

14 पन्नाना लेंग एरपाट कीसि अद वेल्ले आनंदमते तल्पु तेंडाकोंटेन मल्लिस लोप्पो वित्ति, “पन्न तल्पुनगा नित्तिसि मंतोर,” इंचि वेहता.

15 अस्के, नीकु पिसा पीताना? इंचि अगा मत्तोर इत्तुर. अद वेहनद निजमे इंचि बच्चोनो वेहता. अस्के ओर, अद ओना पेनदा दूता आयावच्चु, इंचि इत्तुर.

16 अयना पन्न तल्पुन अल्हेन तंचेके मत्तोर. पजा तल्पु तेंडतस्के पन्न हळसि ओर्कु इंचंन्रम आता.

17 अस्के पन्न ओर्कुन सपुडदाका मंटु इंचि कय्दे सय्गे कीसि वेहतोर. सामि ओन जेलनाल बल्हा पलाते तत्तोर, इद ओर्कु पूरा समजांचि वेहतोर. पजा, ई संगति याकोबुंक (येसुना तम्मुर) आनि कळमता विस्वासुलुकुं वेहाट, इंचि वेहचि अगटाल ओर इंकुदि वेरे जेगाते पेय्से होत्तोर.

* 12:3 होयवा पिंडिता हारिना पंडुगु इद यहुदि लोकुकुकुनद उंदि पेद्रु पंडुगु आंद. † 12:4 दाटसि होनना पंडुगु यहुदि लोकुकुकु गुलामगिरिताल पेयसतस्के कीता पंडुगु आंद. इद मार्च-एप्रिल नेलाते कीतुर.

18 पंग आतास्के, पत्रु बेके होतोर, बतल आता? इंचि सिपाइल्क पेद्रुदा गाबर आतुर.

19 हेरोद राजाल ओन पहकतोर. गानि पत्रु ओन्क बग्गेन दोर्का हिल्लोर. अस्के ओर कावेल इरता सिपाइल्कन पूस कीसि ओर्कुन हक्कना आदेस हीतोर. हेरोद राजाल यहुदियाताल कैसरियाते वासि मनालय दल्गुतोर.

हेरोदना हामुर

20 हेरोद राजाल सूर आनि सैदा सहरकुना लोकुल्लुकुनपोर्रो वेल्ले होंग आसि मत्तोर. ओर अंतोर उंदि आसि ओनतोनि वळकालय होत्तुर. राजाना वरोर बेस दग्गेटा सेवक बलासतुस इनानोन मुन्ने अरहचि, माकु सांति गावाले, इंचि ओन्क विनंति कीतुर. बारित्ते ईरा देसेमतोर्कु तिनालय तिंडि राजाना देसेमताले दोर्कुदु.

21 निरनायम कीता रोजु हेरोद राजाल, राजाल केराना कपडिं केरसि ओना राजगद्देपोर्रो उदसि लोकुल्लुकुंक बासन हियालय दल्गुतोर.

22 अस्के लोकुल्लुक, “इद अथे पेनदा लेंग आंदु, मनकानद आयो,” इंचि वरगेयालय दल्गुतुर.

23 अस्के राजाल पेनदा कदर कियाकोंटा पोंगसोत्तोर. अदुनहाटीं अस्केटद अस्केने सामिनद उंदि पेनदा दूता ओन बिमार अरहता आनि ओर पुळकु अरसि हासि होत्तोर.

24 गानि पेनदा पोल्ले मात्रम पैलांचेके होत्ता. अव पोल्ले केंजसि वेल्लेन लोकुल्लुक विस्वासमते वातुर.

25 बरनाबास आनि साऊल ओरा सेवा कबळ पूरा कीसि येस्सलेमताल वापस अंताकिया होत्तुर. होननेके मरकुस इनना योहानुनगुडा पज्जो पीकुंचि होत्तुर.

पौलुस मोदाटा पय्नेम पेय्संतोर

13

(13:1-14:28)

बरनाबासुन आनि पौलुसुन बेस कबळताहाटीं पेरमळ

1 अंताकिया सहरता कलिसियातोरव्टे इच्चुर पेनदा कबुरतोर आनि कराहनोर मत्तुर. ओर बोर इत्ते, बरनाबास, सिमोन ईन निगर (इत्ते कर्रेटोर) गुडा इनुंदुर, कुरेनि सहरता लुकियुस, साऊल, गालिल एरियाता राजाल हेरोद अंतिपासुनतोनि बेसता मनाहेम ईर आंदुर.

2 उंदि रोज ओर ओक्कापोद्दु मंचि सामिक आरादना कीसेके मननेके पवित्र आत्मा ओर्कुन, “नना बद कबळताहाटीं बरनाबासुन आनि साऊलुन पेरकुत्तनो, अदुन कियानाहाटीं ओर्कुन अलग कीम्दु,” इंचि इत्ता.

3 अस्के ओर ओक्कापोद्दु मंचि पारतना कीसि ओरापोर्रो कय इरसि ओर्कुन लोहचीतुर.

पौलुस आनि बरनाबास साइप्रस दीबेते दांतुर

4 पवित्र आत्माहेदाल ओर्कुन लोहतारित्ते ओर सिलुकिया सहरते होत्तुर, अगटाल उंदि डोंगाते उद्दिदिस साइप्रस दीबेहेके पेय्स्तुर.

5 पजा अदे दीबेते मनना सलमीस इनना सहरते एवतारित्ते, यहुदिल्लुकुना दर्मसास्त्रम कराहना लोहकुने होंचि पेनदा पोल्ले वेहालय दल्गुतुर. योहान (ईन मरकुसगुडा इनुंदुर) ओर्कु सहायम कियालय ओरतोनि मत्तोर.

6 पजा ओर पूरा दीबेतुन तिरियसेक पापूस इनना नाटे एवतुर. अगा ओर्कु वरोर यहुदि जातिता मंत्रगाड आनि पेनदा आबद्दम कबुरतोर कलियतोर. ओन पोरोल बार-येसु.

7 अगा वरोर सिरगु पौलुस इनना तेल्विता अदिकारि मत्तोर, ओनतोन बार-येसु मत्तोर. आ अदिकारि पेनदा पोल्ले केंजंतन इंचि बरनाबासुन आनि साऊलुन ओनगा केयतोर.

8 गानि एलिमल इनना मंत्रालुकुनोर (युनानि बासाते बार-येसुना पोरोल एलिमल मत्ता), बरनाबास आनि साऊलुक अड्डम आसि आ अदिकारि विस्वासम कियामान्नि इंचि आपालय हूळतोर.

9 अस्के साऊल (ईन पौलुस इंका इन्दुर) पवित्र आत्माते निडिसि, एलिमलनाहेके उंदेतीर हूळसेक,

10 “अरे! दोका हियानोना, अन्नि तीरकुना नडेह कियाना बुद्धिदं निडिसि मत्ता देय्यमता मरिना! अन्नि नीति पोल्लेक अड्डम तिरियना पगातोन आदिन. सामिना निजम पोल्लेतुन बदवेरदाका आबद्दम वळ्ळसेक मनांतिन?

11 इंदके हूळा! सामि नीवा पोरो कय तेहातोर, निमे गुड्डिन आंतिन. कोन्नि रोजकुनदाका पोळ्ळुनगुडा हूळाकोटा आंतिन,” इंचि इत्तोर. इत्तस्केने एलिमलना कळ्ळु मागुर-मागुर आतां. हिरे हीकट आसि दिसाकोटा आतां, अस्के, नाकुन बोरेन्ना कय पीसि ओयगोम, इंचि ओर हीके-हेके पहकालय दलगुतोर.

12 एलिमलुक अल्हा आतदुन हूळसि, सामिना बारेमते वेहता पोल्ले केंजसि इंचंरम आसि, आ अदिकारि सामिन विस्वासम कीतोर.

पिसिदिया एरियाता अंताकियाते पेनदा कबुर वेहमळ

13 आयंका पौलुस ओना दंटातोरतोनि पापूस सहरताल डोंगाते उदसि, पंपुलिया एरियाते मनना पिरगा सहरते होत्तुर. अगा होत्तारित्ते योहान ओर्कुन होळसिसि येस्सलेम मल्सि होत्तोर.

14 हेके पौलुस आनि बरनाबास पिरगा सहरताल तिरियसेके पिसिदिया एरियाते मनना अंताकिया सहरते एवतुर. नोमकेम रोजुने यहुदिल्लुकुना दर्मसास्त्रम कराहना लोते होंचि उदतुर.

15 अगा मूसाना नियम आनि पेनदा कबुरतोर रासतव पुस्तकालुकुन हद्वतुर. हद्वतस्के दर्मसास्त्रम कराहना लोता अदिकारिल्लुक पौलुसुन आनि बरनाबासुन, “दादालोरिटा! लोकुल्लुकुंकराहनाहाटी मिहगा बदाना प्रोत्साहन कियाना पोल्ले मत्ते करहट,” इंचि पूसकियालय लोहतुर.

पौलुसना बासन

16 अस्के पौलुस नित्तिसि, लोकुल्लुकुन सपुडदाका कियालय कय तेहाचि वळ्ळकालय दलगुतोर, इस्राएलता लोकुरिटा आनि पेनदुक वेरियना वेरे जातितोरिटा, केंजट.

17 ई इस्राएल लोकुल्लुकुना पेन, मना एनकटा पेद्दालुकुन पेर्कुत्ता. ओर इजिप्त देसेमतोरा कयदा हिळ्ळ बस्के अयते मत्तुरो, अस्के ओर्कुन पेद्दा कीसि, दाना पेद्दा बलमतोने आ देसेमताल पलाते तत्ता.

18 मना पेद्दालुकुन पेनदा पोल्ले केंजाकोदुर, अयनागानि दग्गेर-दग्गेरा नल्पै वर्सनदाका पेन ओर्कुन बय्लि जेगाते ओर्सकुत्ता.

19-20 कनान देसेमता एडुं जातिन नासडेम कीसि, अद बूमि इस्राएल लोकुल्लुकुंकरा, इद मीवा बूमि, इंचि हीता. इव अन्नि आयालय नालुं नुहकुना एबै वर्सा दलगतां. पजा सामवेल पोरोलता पेनदा कबुरतोर वायानादाका पेन ओर्कु बच्चुरो न्यायम कियानोर्कुन हीता.

21 आयंका वरोर राजाल गावाले इत्ताहाटी, पेन ओर्कु बेंजामिनना वंसमतोर कीस इननोना मरि साऊलुन हीता, ओर नल्पै वर्सा राज्येम कीतोर.

22 मर्रा साऊलुनगटाल राज्येम तेंडसि दाविदुंक हीता. दाविदुना बारेमते पेन इल्हा गवाइ वेहता, “यिस्सल पोरोलतोना मरि दाविद, नना इनकुत्ताप नाकु दोर्कतोर, नना वेहतव अन्नि ओर पूरा कीतोर,” इंचि वेहता.

23 “पेन हीता पोल्ले परकारम ईना वंसमताले इस्राएल लोकुल्लुकुंकरा मुक्ति हियानोर इंचि येसुन, पेन लोहता.

24 येसु वायाका मुन्ने, बापतिस्मा हियना योहान इस्राएलता अटोर लोकुल्लुकुन, मनसु मार्सकुंचि बापतिस्मा एतट,” इंचि वेहतोर.

25 योहान ओना कबाटुन पूरा महना वेलाते, “नना बोन इंचि मिमेट इनकुंचंतिर? मिमेट बोनय्ते एदुर हळसंतिर, ओन नना आयोन. ओर नावा पज्जो वायानुर, नना ओना कालुकुना हेर्पुहक तेंडना लायक इंका हिल्लेन,” इंचि इत्तोर.

26 मावा दादालोरिता, अब्राहामुना वंसमतोरिता आनि पेनदुक वेरियना वेरे जातितोरिता! मुक्ति हियना बेसता कबुरतुन पेन मनागा लोहचीता.

27 येस्सलेमते मनानुर आनि ओरा अदिकारिल्क येसुन एरपाट किया हिल्लुर. वारा-वारम नोमकेम रोजुने पेनदा कबुरतोरिा पोल्लें हदवुंदुर, गानि अदुन एरपाट कियवा, येसुन हक्किसि आ पेनदा कबुरतोरिा पोल्लेन पूरा कीतुर.

28 हामुर सिक्सा हियनलायक बतले तप्पु येसुनलोप्पो दोर्काकोन्नागानि ओन हक्कगोम इंचि पिलातुस राज्यपालुंक विनंति कीतुर.

29 येसुन बतल-बतल कियानुर इंचि रासि मत्तानो, अव अन्नि पूरा आतस्के ओन कूसुनपोर्रीटाल हिळु रेहचि बौदा दोस्तुर.*

30 गानि पेन ओन हामुरताल मर्रा तेहता.

31 तेहतारित्ते, गालिल एरियाताल येस्सलेमदाका ओनतोनो होत्तोर्कुंक वेल्लेने रोजकुनदाका ओर दिस्सेक मत्तोर. इंदके लोकुकुना मुन्ने येसुना गवाइ इंचि ओरे मंतुर.

32 पेन मना पेदूदालुकुंक मुन्नेने पोल्ले हीसि मत्ता. अदे पोल्लेता कबुरतुन मोमोट मीक वेहासेक मंतोम.

33 इल्हा पेन येसुन हामुरताल मर्रा तेहाचि, मना पेदूदालुकुंक मुन्नेने हीता पोल्ले, इंदके मनाहाटी निजम आता. इदु, बजन संहिता रौंडो बजनते इल्हा रासि मंता:

“निमे नावा मर्रिन आंदिन, इय्यला नना नीकु बाबोन आतन.” ✨

34 पेन ओन हातोरिा लोप्पोटाल तेहता, ओर मर्रा बस्केने कळियसि होन्नोर.

“नना दाविदुंक तप्पाकोटा हीतन इत्ता पवित्रमाता आसिर्वाद नीकु हीतन,” ✨

इंचि इत्ता.

35 अल्हेने इंकुंदि बजनते,

“नीवा पवित्र मनकन कळियसि होना हिथ्यिन.” ✨

इंचि इत्तोर.

36 “दाविद पेनदा इच्चा मत्तापे ओन्क हीता सेवा-कबाटुन ओना कालमते महाचि हातोर. हातस्के ओना पेदूदालुकुन बगा बौदा दोस्तुरो, अगगेन ओन इंका बौदा दोस्तुर ओर कळियसिगुडा होत्तोर.

37 गानि पेन तेहातोर मात्रम कळियसि होना हिल्लोर.”

38 अदुनहाटी मावा दादालोरिता! मिमेट दीन तेळियागोटकुंटु. येसुनाहेंदाले मीवा पापालुकुन पेन मापि कीता इंचि मोमोट वेहासेक मंतोम.

39 मूसाना नियम हेंदाल मीकु पापालुकुनाल मापि दोर्का, गानि येसुना पोर्री विस्वास इर्रानुर अंटोर्क ओरा पापालुकुनाल मापि दोर्कता.

40 अदुनहाटी पेनदा कबुरतोर रासता पोल्लें मीपोर्री वायाकौटा उसारते मंटु, इंचि पेन इल्हा इत्ता:

41 “नावा पोल्लेतुन पास्कानोरिता हूळाट, इचंत्रम आसि, हासि दांतिर.

बारित्ते, मीवा रोजकुने नना इसौटा कबळ कीतन गदा,

अदुना बारेमते बोर वेहिनागानि मिमेट विस्वासम किय्यिर,” ✨

इंचि पेन वेहता.

42 पौलुस, बरनाबास दर्मसास्त्रम कराहना लोताल पलाते पेयसतस्के, “इव पोल्लें वायाना नोमकेम रोजुने इंका एक्को माकु वेहाटु,” इंचि लोकुल्क ओरतोनो विनंति कीतुर.

* 13:29 बौदा दोस्तुर अद कालमते गुदुटातुन तुलाहचि सौर्रे कीसि, अवने पीनगु दोसुंदुर. ✨ 13:33 बजन संहिता 2:7

✨ 13:34 यसायाह 55:3 ✨ 13:35 बजन संहिता 16:10 ✨ 13:41 हबक्कुक 1:5

43 वेल्लेटुर यहदिल्कु अल्हेने यहुदि जातिते वाता वैरे जातितोर, पौलस, बरनाबासुना पज्जो होत्तुर. ओर, लोकुलुकुनतोनि वळकसेके, “बस्केळ्ळक पेनदा कुर्पाते मंटु,” इंचि ओर्कु वेहतुर.

44 इंकुंदि नोमकेम रोजुने सामिना पोल्ले केंजालय, पूरा नाटेनोर इत्ताप जमा आतुर.

45 अचचो वेल्ले मंदितुन हळसि यहुदिल्कुना जीवा मसुल्ता, अदुनहाटी ओर पौलसुना पोल्लेक विरोद कीसि ओन बदनाम कियालय दल्गतुर.

46 गानि पौलस आनि बरनाबास वेरियाकोटा, मीकु पेनदा पोल्ले मुन्नेने वेहना अक्सरम मत्ता, गानि मिमेट दान हयसका, बस्केळ्ळक पिस्सना पिस्वरकु लक्कु आताप हुपिस्तिर. अदुनहाटी इंदके मोमोट यहुदि आयवोरहेके दांतोम.

47 बारित्ते पेन माकु इल्हा आदेस हीता:

“सामि लोकुलुकुन बल्हा पिसागोटंतोर इदु पोल्ले निमे दुनियंता वेहगोम इंचि,

नाना नीकन वैरे जातितोरहाटी वेडसि हुप्सानोन कीतन, ”*

इंचि इत्तोर.

48 ई पोल्ले केंजसि वैरे जातितोर वेल्ले कूस आसि, सामिना पोल्लेता कदर कियालय दल्गतुर. बचटूकुन अय्ते बस्केळ्ळक पिस्सना पिस्वरताहाटी पेन पेरकुत्तनो, अचटुर येसुनपोर्रो विस्वासम कीतुर.

49 इल्हा सामिना पोल्ले पूरा एरियाता लोकुलुकुंक तेळियता.

50 गानि यहुदि लोकुलुकु मन्त्रम निजमाता पेनदुन आरादना किय्यानव सहरता कदरगल्ला वैरे जातिता मुर्ताहकुन, पेदुदालकुन एक्किस्तुर. अस्के ओर पौलस, बरनाबासुन पक्का तकलिप कीसि ओर्कुन आ एरियाताल पलाते पेचाहतुर.

51 ओर इव्वुर ओरा कालुकुना दुब्बा अग्गेन दुल्पिसि ओरापोर्रो विरोद हुप्पिचि इकोनिया सहरते पेय्सि होत्तुर.

52 गानि अंताकियाता विस्वासुल्क पवित्र आत्माते पूरा निडिस आनंदमते मत्तुर.

14

पौलस आनि बरनाबास इकुनियुम सहरते सेवा कीतुर

1 इल्हा पौलस आनि बरनाबास इकोनिया सहरते यहुदिल्कुना दर्मसास्त्रम कराहना लोते होत्तुर. अगा पेनदा पोल्ले बेस वेहतुर. अदुनहाटी यहुदिल्क आनि युनानि जातितोर वेल्लेटुर लोकुलुकु येसुनपोर्रो विस्वासम कीतुर.

2 गानि विस्वासम कियवा यहुदिल्कु, विस्वासुल्कुनतोनि जगडम कियालय वैरे जातितोर्कुन एक्किस्तुर.

3 अय्नागानि पौलस आनि बरनाबास अगा वेल्लेने रोजकु आगिसि मत्तुर. सामिना कुर्पाता बारेमते वेरियाकोटा वेहचेके मत्तुर. ओर वेहना पोल्ले निजम इंचि गवाइ हुप्सालय सामि ओरा कय्दाल चिन्हां, इचंन्रमता कबाहक हुप्सुंदुर.

4 गानि हेके सहरते वरोनद वरोंकु अर्काकोटा आता. इच्चुर यहुदिल्कुनहेके, इच्चुर बारे प्रेरितुलुकुनहेके आतुर.

5 वैरे जातितोर आनि यहुदिल्कु ओरा अदिकारिल्कुनतोनि कलियसि पौलसुन आनि बरनाबासुना कदर रेहचि बंडां हुक्कालय तयार आतुर.

6-7 इदु पोल्ले पौलसुंक आनि बरनाबासुंक एर्का आता. अदुनहाटी ओर लुकावनिया जिल्लाते विततुर. अद जिल्लाता लिसरा, दिरबे सहरते आनि दग्गेटा नाहकुने होंचि पेनदा बेसता कबुर वेहुंदुर.

पौलस आनि बरनाबास लुच्चाते सेवा कीतुर

8 लिसराते वरोर कुंटी मनकल उदिस मत्तोर. ओर पुटतगाटाल बस्केने ताका हिल्लोर.

9 पौलुस वेहना पोल्लेँ ओर केंजसेके मत्तोर. अस्के पौलुस ओन उंदेतीर ह्ळसि, ई कुंठिन लोप्पो बेस आयना विस्वासम मंता, इंचि इनकुत्तोर.

10 अस्के पौलुस ओन, “तेदसि बेस नित्ता,” इंचि लगाचि इत्तस्के, ओर एगरिसि तेदसि ताकालय दल्युतोर.

11 लोकुल्क पौलुस कीतदुन ह्ळसि, लुकावनिया बासाते, “पेनकु मनकना रूपमते मनागा रेयिसि वातां,” इंचि लगाचि इत्तुर.

12 ओर बरनाबासुन, जेयुस पेन, इत्तुर. * आनि पौलुस वळ्ळकानटे पेद्दा मत्तोर इंचि ओन, हिरमेस पेन,† इत्तुर.

13 जेयुस पेनदा गुळि, नाटुक मुन्ने मत्ता. दाना पेर्माँल, लोकुल्कनतौनि कलियसि, पौलुस आनि बरनाबासुनाहाटीं मोक्कु हियालय कौदां, पुंगाहकुना दुम्मे पीकुंचि सहरते नेगना गलमानगा तत्तोर.

14 गानि ओर इल्हा कीतद केंजसि, प्रेरित बरनाबास आनि पौलुस ओरां कपडिं हराहकुत्तुर.‡ लोकुल्कुना लोप्पो वितसि,

15 “ए लोकुरिटा, मिमेट इल्हा बारि कीसंतिर? मोमोटगुडा मीलेसींटा मनकालोरमे. मिमेट वट्टिट पोल्लेन होळसि, जीवाते मनना पेनदाहेके तिरियट. अदे पेन मळ्ळुन, बुमितुन, समुद्रमतुन आनि अट्टे मत्तव अन्नितवुन पुटिस्ता. इंचि अदे पेनदा बेसता कबुर वेहालय मोमोट वातोम.

16 मुन्नेटा कालमते पेन, अन्नि जातिना लोकुल्कन ओरा इस्टमाताप ओर्कुन मोळ्ळा हीता.

17 गानि मीकु मळ्ळुनाल पिर्दे हीता, कालमनुसार पंटा पंडिस्ता, तिनालय गाटो हीसि, मीकुन आनंदमते इरसि, ‘ननाने निजम पेनदुन आंदुन’ इंचि दाना बेसता कबाहकुनाहेदाल मीकु हूपिस्ता,” इंचि वेहतोर.

18 अच्चोन वेहिनागानि वेल्ले तिप्पलते ओर्क मोक्कु हियालय वातोर्कुन आपा परतुर.

19 आयंका पीसिदियाता अंताकिया सहरताल, इकोनिया सहरताल इच्चुर यहुदिल्क वातुर. वासि लोकुल्कन ओरा बाजुंक कीकुंचि, पौलुसुनपोर्रो बंडां हुक्तुर. ओर हातोर इनकुंचि ओन सहरता पलाते इगिसि ओतुर.

20 पजा सिस्युल्कु ओनगा वासि सुट्टु निततुर. अस्के पौलुस तेदिस सहरते होत्तोर. मर्रा इंकुंदि रोज बरनाबासुनतौनि दिरबे सहरते होत्तोर.

पद्येनम महाचि पौलुस अंताकिया सहरकु मल्लिसि वायमळ

21 पजा पौलुस आनि बरनाबास दिरबे सहरता लोकुल्कुक पेनदा बेसता कबुर वेहचि, वेल्लेटोर्कुन सिस्युल्कु कीतुर. पजा लिसरा, इकोनिया, पीसिदियाता अंताकिया सहरते मल्लिसि होत्तुर.

22 अगा हौंचि, “पेनदा राज्येमते होनना इत्ते तिप्पल्क वांतां, दानाहाटीं विस्वासमते गट्टिगासि मंटु,” इंचि वेहचि दैरनेम हीतोर.

23 पजा ओर, अगाटा हरेक कलिसियाने पेद्दाल्कन निलाहतुर. ओराहाटीं ओक्कापोद्दु मंचि पारतना कीसि, ओर बा सामिनपोर्रो अय्ते विस्वासम कीतुर, आ सामिक अप्पजेपतुर.

24 आयंका ओर पिसिदियाताल पंपुलिया एरियाते होत्तुर.

25 अगा हौंचि, पिरगा सहरते पेनदा बेसता पोल्लेँ वेहचि अतलिया सहरते होत्तुर.

26 अगटाल डोंगा उदसि सिरियाता अंताकियाते मल्लिसि होत्तुर. बद कबळ अय्ते ओर पूरा कीतुरो, अद कबळ पेनदा कुपांते अदे जेगाताल सुख कीसि मत्तुर.

27 अगा होत्तरित्ते, ओर कलिसियातोर्कुन जमा कीसि, पेन ओरा कय्दे बल्हा पेद्दा-पेद्दा कबाहक कीता, वेहतुर. वेरे जातितोर्कुनगुडा विस्वासम कियालय पेन बल्हा हारि कीता, इंचि वेहतुर.

28 आयंका सिस्युल्कनतौनि वेल्लेन रोजकु ओर अगा मत्तुर.

* 14:12 जेयुस पेन युनानि लोकुल्कुना मोदोल पेन. † 14:12 हिरमेस पेन युनानि लोकुल्कुना वेरे पेनकुंक कबुर हियना पेन.

‡ 14:14 कपडिं हराहकुत्तुर पेनकुद विरोदमते बददना पोल्ले केंजते यहुदि लोकुल्कुक होंग वासि कपडिं हराहकुंदुर.

15

येस्सलेमते उंदि पंचादि

1 पजा यहुदियाताल इच्चुर लोकुलक अंताकियाक वासि, “मूसाना नियम परकारम मीवद कतना आयाकॉटे मीकु मुक्ति दोर्का पर्री” इंचि अगाटा दादालोर्कुंक कराहलय दलगुतुर.

2 ओर लोकुलक कराहता पोल्लें पौलसुंक, बरनाबासुंक नच्चा हिल्लें. अदुनहाटी ओरा नड्डुम वेल्लेन लोल्लिं आतां. अय्ते ई लोल्लिंकु समादानम पूस कियनाहाटी पौलस, बरनाबास आनि इच्चुर विस्वासुलक येस्सलेम होंचि अगाटा प्रेरितुलुकुंक, पेद्दालुकुंक कलियना इंचि निरनायम कीतुर.

3 पजा अगाटा कलिसियातोर ओर्कुन साल्ना कीतुर. अय्ते ओर पिनिक्के, सामरिया इनना एरियानाल तिरियसेक येस्सलेम होतुर. होननेक्के वेरे जातितोर ओरा मनसु बल्हा मार्सकुत्तुर, अदुन बारेमते वेहासेक होतुर. इल्हा ओर अगाटा दादालोर्कुन इरगा कूस कीतुर.

4 ओर येस्सलेम एवतस्के, अगाटा कलिसियातोर, प्रेरितुलुक, पेद्दालुक ओर्कु बेस आनंदमते कलियतुर. पजा पौलस आनि बरनाबास पेन ओरतोनि मंचि बता-बता कबाहक कीता, अदंता वेहतुर.

5 अस्के परिसिलुकुनाल इच्चुर विस्वासुलक तेदसि, “वेरे जातितोरद कतना तप्पाकॉटा आये पीता, मूसाल वेहता नियम परकारम ओर ताके पीता,” इंचि इत्तुर.

6 अस्के ई पोल्लेन बारेमते विचारम कियालय प्रेरितुलुक आनि पेद्दालुक उंदगा जमा आतुर.

7 बच्चोनी जेम विचारम कीतारित्ते पत्रु तेदतोर. तेदसि, “नावा दादालोरिटा, वेरे जातितोर नावा तोळदाले पेनदा बेसता कबुर केंजसि विस्वासमते वायाना इंचि, वेल्लेन रोजकु मुन्ने पेन मना अंटोर नड्डुमताल नाकुन पेर्कुत्ता. इद संगति मीकु अंटोर्क एर्के मंता.

8 मनकालोर्कुना मनसुन एरपाट कियाना पेन, बल्हा मनाकु पवित्र आत्मातुन हीता, अल्हेने ओर्कु इंका हीसि ओरतोनि कलियसि मत्ता संगति मनाकु वेहता.

9 ओर विस्वासम कीताहेका पेन ओरा मनसुकुन इंका बेस कीसि, ओर्कु, मनाकु बतले बेदबावम इर्ा हिल्ले.

10 अय्ते मरि, मनमगुडा मना पेद्दालुकगुडा कांजा पर्र्वा कांडितुन मिमेट सिस्सुलुकुना हट्टनपोर्री ताससि, मीकु पेनदा परिकसा ह्ळानद मंताना?

11 येसु सामिना कुर्पाते मनाकु मुक्ति दोर्कता इंचि मनम नम्मंतोम गदा! अल्हेन ओर्कगुडा मुक्ति दोर्कता इंचि विस्वासम मंता.” इंचि इत्तोर.

12 अस्के बरनाबास आनि पौलस, पेन ओर्कुन वेरे जातितोर लोप्पो लोहचि ओराहेंदाल बसंटा चिन्हां, इंचंत्रमता कबाहक कीता, अदुन ओर वेहालय दलगुतुर अय्ते अंटोर लोकुलक सपुडदाका आसि ओरा पोल्लें केंजालय दलगुतुर.

13 ओरा वळकुमळ आतारित्ते याकोब इल्हा वळकालय दलगुतोर. नावा दादालोरिटा, नना वेहनद केंजट.

14 पेन मोट्टा मोदाला वेरे जातितोर पोर्री दाना दया हूपिच्चि ओरागटाल इच्चुर्कुन दाना लोकुलुकुन लेहका बल्हा कीकुत्ता, इदुना बारेमते सिमोन पत्रु मनाकु वेहचि मत्तोर.

15 पेनदा कबुरतोर वेहता पोल्लें इंका इद गटनकु कलियंतां. अव पोल्लें इल्हा रासि मंतां:

16 “नना तिरियसि वासि दाविदना अरसोत्ता राज्येमतुन मर्रा निलहंतन,

दाना नासडेम आता मुक्का-मुक्कातुन कल्पिसि अद मुन्ने मत्ताप मर्रा कीतन.

17 अस्के पेर्कुत्ता वेरे जातितोर आनि मिगिल्सि मत्ता अन्नि वेरे जातिनोर,

पेनदुन पहकानुर, इव पोल्लें पेन वेहता.✧

18 पेन कुद इदुन बारेमते वेल्लेन रोजकु मुन्ने वेहचि मत्ता.”

19 अदुनहाटी नावा विचारम बतल मंता इत्ते, मनसु मार्सकुचि पेनदाहेके तिरियता आ वेरे जातितोर्कुन मनम तकलिप कियामन्नि.

20 गानि बोम्मांक मोळकतदुन तिनामन्नि, व्यबिचारम कियामन्नि, गोंदके पिसकिसि हळ्कता जिवरासिता हळ्विं, नेत्तुरतुन तिनामन्नि इंचि ओर्क मनम रासि लोहकोम.

21 बारित्ते ओर एनकाटाल मूसाल वेहता नियमतुन, अन्नि सहरकुने वेहासेक अल्हेन हरेक नोमकेम रोजुननाड दर्मसास्त्रम कराहना लोते हद्विसि वेहासेक मंतुर, इत्तोर.

वेरे जाति विस्वासि लोकुलुकुंक उंदि सिट्टि

22 पजा प्रेरितुलुक, पेद्दालुक आनि कलिसियातोर अंतोर कलियसि, अगाटा विस्वासुलुकुनाल इच्चुर लोकुलुकुन पेरसि पौलस आनि बरनाबासुनतोनि अंताकियाक लोहना निरनायम कीतुर. पजा बरसब्बान* आनि सिलासुन ईर इव्वुर्कुन पेरतुर. ईर इव्वुरगुडा विस्वासुलुकुनाल मुक्य मनकालोर मत्तुर.

23 ओर होननेके ओरा कय्दे उंदि सिट्टि हीतुर, अद सिट्टिते इल्हा रासि मंता.

अंताकिया, सिरिया, किलिकिया सहरकुने मनना अंतोर वेरे जाति विस्वासुलुकुंक, येस्सलेमते मनना मीवा पेद्दालुक आनि प्रेरितुलुकुना हेंदाल जोहार.

24 मावा पावरमगल्ला दादालोरिता, माकुन पूस कियाकोंटेन महागटाल इच्चुर लोकुलुकु मिहगा वासि ओरा मनसुंक वाताप वळकिसि मी मनसुने अनमानम पुट्टिचि मीकु तकलिप हीतुर इत्ता संगति मोमोट केंजतोम.

25 अदुनहाटी मना पावरमगल्ला बरनाबास आनि पौलसुनतोनि, पेर्कुत्ता इच्चुर लोकुलुकुन मीहेके लोहना इंचि मोमोट अंतोरम कलियसि निरनायम कीतोम.

26 मना अंतोरा किरिस्तु येसु सामिना पोरोलहाटी बरनाबास आनि पौलस ईर ईरा जीवातुन इंका हियालय तयार आता मनकालोर आंदुर.

27 अय्ते मोमोट सिट्टिते रासता अन्नि पोल्लें यहदल आनि सिलास ओर ओरा तोळदाल मीकु वेहना इंचि ओर्कुन मीहेके लोहसेक मंतोम.

28-29 बोम्मांक मोळकतदुन मिमेट तिनमट, गोंदके पिसकिसि हळ्कता जिवरासिता हळ्विन, नेत्तुरतुन तिनमट, व्यबिचारमताल लक्कु मंट. इसंटा अवसरमाता नियमकुंक तप्पा इंका वेरे बद्दे बर्वु मीपोरो वाटा मन्नि इत्ता पोल्ले पवित्र आत्माकु आनि माकु बेस अनपिस्ता. मिमेटगिंटा इव पोल्लेनाल लक्कु मत्ते मीके बेस आयार. मीकु अंतोर्क जोहार.

30 इल्हा रासि ओर्कुन अगाटाल साल्ना कीतंका, ओर पजा अंताकियाक एवतुर. एव्सि, अंतोर विस्वासुलुकुन जमा कीसि अद सिट्टितुन ओरा कय्दे हीतुर.

31 सिट्टिते रासि मत्ता प्रोत्साहन हियना पोल्लें हद्विसि ओर्क अंतोर्क वेल्लेन कुसि आता.

32 यहदल आनि सिलास, ईर इव्वुरगुडा पेनदा कबुरतोर आंदुर. अदुनहाटी अगाटा विस्वासुलुकुनतोनि वेल्लेनजेम वळकिसि ओर्कुन विस्वासमते गट्टिगा कीसि ओर्कु प्रोत्साहन हीतुर.

33 इल्हा यहदल आनि सिलास कोन्नि रोजकु अगा मत्तुर. पजा अंतोर विस्वासुलुकु जमा आसि, ओर्कुन बोर अय्ते अंताकियाक लोहतुरो ओराहेके वापस येस्सलेम होनालय सांतिते साल्ना कीतुर.

34 गानि सिलास अंताकियातेन मनना विचारम कीतोर.†

35 पजा पौलस आनि बरनाबास कोन्नि रोजकु अंताकियातेन आगतुर. अगाटा वेल्लेन लोकुलुकुनतोनि कलियसि सामिना पोल्लें कराहसेक, बेसता कबुर वेहासेक मत्तुर.

पौलसनद रोंडो पर्येनम

(15:36-18:22)

पौलस, बरनाबास वेरे-वेरे आंतुर

* 15:22 बरसब्बा इन यहदल इंचिगुडा इंतुर. † 15:34 इद वचनम कोन्नि पांडु लिपिने हिल्ले.

36 इच्चुं रोजकु आतारित्ते, “मनम सामिना पोल्लें बव-बव सहरकुने वेहतोमो अव अन्नि सहरकुने मर्रा दाकोम. पेनदुन नम्मकुत्ता पजा अगाटा विस्वासुलुकुना पिस्वरकु बल्हा बतल मंतांगो ह्ळसि वाकोम,” इंचि पौलुस बरनाबासुन इत्तोर.

37 अय्ते बरनाबासुक मरकुसुन (ईन योहानगुडा इंतुर) इंका पज्जेके ओयाना मनसु मत्ता.

38 गानि, पेनदा कबळते आकिरदाका कलियसि मनाकोटा नड्डुमे पंपुलिया एरियाताल होळसि वापस होत्ता मरकुसुन पज्जो ओयमळ पौलुसुक नच्चा हिल्ले.

39 इल्हा ओर इव्वुर नड्डुम वेल्लेन पोल्लें आसि ओर वैरे-वैरे आतुर. अस्के बरनाबास मरकुसुन पीकुंचि डोंगाते उद्दिदिस साइप्रस इनना दीबेक होत्तोर.

40 पजा पौलुस ओनतोनि मननाहाटीं सिलासुन पेरकुंचि अगटाल होत्तोर. अय्ते अगाटा विस्वासुलुकुगुडा पौलुसुक आनि सिलासुक पेनदा कुर्पा दोर्कानाहाटीं पारतना कीसि ओर्कुन पेनदा कय्दे अप्पजेपतुर.

41 अस्के ओर सिरिया, किलिकिया इनना एरियानाल तिरियसेके अगाटा कलिसियानोर्कुंक कलियसि पेनदा विस्वासमते बेस एदगानाहाटीं ओर्कु बेसता पोल्लें वेहासेक होत्तुर.

16

पौलुसुक तिमोति कलियंतोर

1 पजा पौलुस मर्रा दिरबे इनना सहर होंचि अगटाल लिसरा इनना सहर होत्तोर. ह्ळा! अगा तिमोति पोरोलतोर वरोर सिस्स्युड मत्तोर. ओना तल्लुर यहुदि जातिता उंदि विस्वासि मुरतळ आंद. गानि ओना बाबाल वैरे जातितोर (युनानि जातितोर) मत्तोर.

2 लिसरा, इकोनिया सहरकुने मनना विस्वासुलुक ओन बेस मनकल इनुंदुर.

3 अय्ते पौलुस, तिमोतिन ओना पज्जेके ओयाना विचारम कीतोर. गानि अद एरियाते मनना अंतोर यहुदि लोक्कुंक, तिमोति वैरे जातितोना (युनानि जातितोना मर्रि) मर्रि इंचि एर्का मत्ता, अदुनहाटीं यहुदिलुकुंक समादानम आयना इंचि पौलुस तिमोतिना कतना क्रियागोटोर.

4 अस्के ओर येस्सलेमता प्रेरितुलुक आनि पेद्दालुक वेहता पोल्लेन सहर-सहर होंचि वेहचि, अव पोल्लेन परकारम ताकना इंचि वेहासेक होत्तुर.

5 इल्हा अगाटा कलिसियानोरा विस्वासम गट्टिगासि इंका वेल्लेन लोक्कुलुक विस्वासमते वासि रोज-रोज वेल्लेन मंदि आतुर.

पौलुसुन मेसिडोनिया एरियाते केयमळ

6 ओर्कुन पवित्र आत्मा, ‘आसिया एरियाते पेनदा पोल्ले वेहा मन्नि’ इंचि इत्ताहाटीं ओर अदे एरियाता पुगरिया, गलातिया एरियानाल होत्तुर.

7 पौलुस आनि तिमोति मूसिया एरियाता गेट्टुदाका एवतस्के ओर बिनुनिया एरिया होनना कोसिस कीतुर. गानि येसुना आत्मा अगा इंका होन्ना हिया हिल्ले.

8 अय्ते ओर मूसियाताल त्रोआस सहरते एव्तर.

9 अदे नर्का मेसिडोनिया एरियातोर वरोर मनकल, निमे मेसिडोनियाते वासि, मावा सहायम कीम, इंचेक विनति कीसिके मंतोर. इल्हा पौलुस दर्सनमते ह्ळतोर.

10 ओन्क इल्हा दर्सनम आतारित्ते, आ लोक्कुलुकुंक पेनदा बेसता पोल्लें वेहालय पेन माकुन केयता इल्हा इनकुंचि मोमोट अस्केन मेसिडोनिया होनानद विचारम पक्का कीतोम.*

लिदिया मुरताटद मनसु मारियमळ

11 इल्हा मोमोट त्रोआस सहरताल डोंगाते समुद्रम हर्रि पीसि सवरगा सुमानाके सहरते एव्वि, इंकुंदि रोजु नियापुलिस इनना सहर होत्तोम.

* 16:10 इगटाल ई पुस्तकमतुन रासता लूकलुगुडा पौलुसुनतोनि कलियतोर.

12 पजा अगटाल पिलिपिया इनना सहर होत्तोम. अद मेसिडोनिया एरियाता मुक्य सहर आंदु, अगा रोमि लोकुल्लुक मनुंदुर. अद सहरते मोमोट कोन्नि रोजकु मत्तोम.

13 उंदि नोमकेम रोज्जे, यहुदिल्लुकुना पारतना कियाना जेगा, सहरता पलाते बेरेड ओड्डुंक मंदार इंचेके मोमोट होत्तोम. अगा पारतनाकु वासि मत्ता मुर्ताहकुनतोनि उद्दिस वळकसेके मत्तोम.

14 अबुन लोप्पो उंदि लिदिया पोरोलता मुरतळ मत्ता. अद तुयतीरा सहरतद आंद. दान्क पेनदापोर्रो वेल्लेन विस्वासम मत्ता. अद वेल्लेन दरता नेडि पंडि रंगुना कपडिं अम्मुंदु. अद बेस मनसु दोस्सि मावा पोल्ले केंजसेके मत्ता. पौलुस वेहना पोल्लेन बेस केंजालय सामि दाना मनसुन तयार कीतोर.

15 अद आनि दाना लोते मत्तोर अंटोर बापतिस्मा एतारित्ते अद, “मिमेटगिटा नाकुन पेनदा निजम विस्वासि मुरतळ इंचि इनकुनानयते नावा लोन वासि आगट,” इंचि माकुन विनंति कीता. अस्के मोमोट दाना लोन होत्तोम.

पौलुस, सिलास जेलने अरंतुर

16 उंदि मल्का मोमोट पारतना कियाना जेगातेके होंचेके मत्तोम, अस्के माकु उंदि दासि पेगिड कलियता, दाना लोप्पो बविस्य वेहाना आत्मां मत्ता. अद लोकुल्लुकुंक ओरा बविस्य वेहचि दाना मालकुल्लुकुंक वेल्लेन दनम संपलिच्चि हियुंदु.

17 अद, “ई मनकालोर अन्निंकनना पेद्दा पेनदा सेवाकुल्लुक आंदुर. ईर मीकु मीवा पापमताल मुक्ति दोर्कना हर्दा बारेमते वेहासेक मंतुर,” इंचि वरगेयसेके पौलुस आनि मावा पज्जो वाता.

18 अद वेल्ले रोजकुनाल इल्हेने वेहासेक मत्ता अयते पौलुस परेसान आतोर. अदुनहाटीं ओर पजोळ्ळ तिरियसि, “येसु किरिस्तुना पोरोलते नना नीकु आदेस हीसेक मंतन, ई पेगिटाल पेय्सि होन,” इंचि आ आत्मातुन इत्तोर. अस्के आ आत्मा पेगिटाल बिराना पलाते पेय्सता.

19 पजा आ पेगिता मालकुल्लुकुंक दोर्कना दनम दोर्काकोंटा आताहेंके ओर पौलुसुन आनि सिलासुन दोर्कापीसि, इगिसेके नड्डुम सहरते अदिकारिल्लुकुना मुन्ने ओतुर.

20 रोमि अदिकारिल्लुकुना मुन्ने ओसि, “ईर यहुदि लोकुल्लुक आंदुर. मावा नाटेने वेल्ले तकलिप कीसंतुर.

21 ईर वेहना रीति-रिवाजकुन परकारम ताकमळ मावा रोमि लोकुल्लुकुना नियमकुना विरोदमते मंता,” इंचि इत्तुर.

22 लोकुल्लुकुना मंदागुडा पौलुस आनि सिलासुना विरोदमते तिरियतुर. रोमि अदिकारिल्लुक, पौलुस आनि सिलासुना कपडिं हराहचि ओर्कुन दुड्डुकुने तनना आदेस हीतुर.

23 ओर्कुन पक्का तंतारित्ते जेलने वाट्सि, ओरपोर्रो कडक पहारा इराना इंचि जेलना अदिकारिक आदेस हीतुर.

24 ओन्क इल्हा आदेस दोर्कतारित्ते ओर्कुन जेलना लोप्पोटा अरति वाट्सि, ओरां कालुकुन उंदि मोट्टुंकु बोल अरहचि दोहतोर.

25 नळजाम नर्काटा वेलाते पौलुस, सिलास पेनदा स्तुति पाटां पारसेके, पारतना कीसेक मत्तुर. जेलने मत्ता वैरतोर केंजसेके मत्तुर.

26 अस्के उंदेदम बूमि इल्हा कदुलता गदा, जेलना पुनादि कदुलसि जेलनव अन्नि तल्पुक उंदे मल्का कुल्ला आतां. जेलने मत्ता अंटोरा बेडीं लेंगसि होत्तां.

27 जेलना अदिकारि निद्राताल तेदसि हळतस्के जेलना तल्पुक कुल्ला दिसतां. अदुन हळसि, जेलने मत्तोर अंटोर पेय्सि वित्तरु बारे, इनकुंचि, ओनाद ओर कोहककुंचि हांतन इंचि कसेर तेहतोर.

28 गानि पौलुस, “मोमोट अंटोरम इगेने मंतोम, नीवद निमेने नुकसान कीकुनमा,” इंचि जोरते वरगेयतोर.

29 अस्के वरोनतोनि वेडसि ताया वेहचि आ अदिकारि बिराना लोप्पो होत्तोर. वनकुसेक पौलुस, सिलासुना कालुकुनपोर्रो अरतोर.

30 पजा ओर्कुन पलाते तच्चि, “दादालोरिटा, पापालुकुनाल मुक्ति दोर्कालय नाकु बतल किया पीता?” इंचि पूसकीतोर.

31 अस्के, “निमे येसु सामिना पोरो विस्वासम इर्रा, नीकु, नीवा लोते मत्तोर अंटोर्क मुक्ति दोर्कता,” इंचि ओर इत्तुर.

32 ओर ओन्क, ओना लोते मत्ता अंटोर्क पेनदा पोल्ले वेहतुर.

33 अस्के जेलना अदिकारि अदे नर्का अदे वेलाते ओर्कुन अगटाल ओसि, ओरां पुनकुन नोरतोर. पजा आल्सेम क्रियाकोटा ओर, ओना लोते मत्तोर अंटोर बापतिस्मा येततुर.

34 पौलुस, सिलासुन ओर ओना लोन पीसि ओसि ओर्कु गाटो दोस्तोर. इंदके पेनदापोरो विस्वासम इरताहेंके ओर, ओना लोते मत्तोर अंटोर इरगा कूस आतुर.

35 पंगातारित्ते रोमि अदिकारिल्लुक, ओर्कुन होळसीम्टु इंचि जेलना अदिकारिक वेहालय इच्चुर सिपाइल्लुकुन लोहतुर.

36 जेलता अदिकारि, “मीकुन होळसगोम इंचि रोमि अदिकारिल्लुक सिपाइल्लुकुन लोहचीतुर, इंदके मिमेट सांतिते पेय्सि होटु,” इंचि पौलुसुन इत्तोर.

37 अस्के पौलुस, “मोमोट इंका रोम देसेमता रहिवासिल्लुके आंदुम. अय्नागानि ओर मावा बतले तप्पु ह्ळकेने माकुन लोकुल्लुकुना मुन्ने तंतुर, जेलने वाटसीतुर. इंदके सपुडदाका बोर्कु एरपाट हिलाकोटा माकुन होळसियालय ह्ळसंतुर, गानि इल्हा आयापर्रो. माकुन होळसानद मत्ते ओर कुद इग्गे वासि होळसियिरकांटी,” इंचि इत्तुर.

38 सिपाइल्लुक होंचि रोमि अदिकारिल्लुकुंक इद संगति वेहचीतुर. पौलुस, सिलास इर रोम देसेमता रहिवासिल्लुक आंदुर इंचि रोमि अदिकारिल्लुकुंक तेळियतारित्ते ओर इरगा वेरियतुर.

39 आयंका रोमि अदिकारिल्लुक वासि ओर्कुन मापि तल्लिकिसि पलाते ओतुर. ओर्क विनति कीसि इद सहर होळसि होनालय वेहतुर.

40 पौलुस, सिलास जेलनाल पलाते पेय्सि लिदियाना लोन होत्तुर. विस्वासि दादालोर्कुंक कलियसि, ओर्कु प्रोत्साहन हीसि अगटाल पेय्सि होत्तुर.

17

तेसलोनि सहरते पौलुस आनि सिलास

1 पजा ओर अंपिपुलि आनि अपुलोनिया सहरकंता तिरियसेके-तिरियसेके तेसलोनि सहरते एवतुर. अगा यहुदिल्लुकनद उंदि दर्मसास्त्रम कराहना लोन मत्ता.

2 पौलुस ओना अलवट परकारम यहुदिल्लुकुना दर्मसास्त्रम कराहना लोतागा होत्तोर. होंचि मूड नोमकेमकुन दाका ओरतोनि दर्मसास्त्रमता बारेमते चर्चा कीतोर.

3 अगा ओर, किरिस्तुना हायमळ आनि हामुरताल तिरियसि तेदमळ बच्चोनो अवसरम मत्ता, इत्ता संगतितुन दर्मसास्त्रमताल हद्विसि ओर्कु बेस तेळियागोट्टिसि वेहतोर. पजा बा येसुना बारेमते अय्ते नना मीवा मुन्ने वेहसेक मंतनो आ येसे किरिस्तु आंदुर, इंचि ओर्कु वेहतोर.

4 इल्हा इच्चुर लोकुल्लुकुंक निजम अनपिच्चि ओर पौलुस, सिलासुनहेके कलियतुर. पेनदुक वेरियना वेल्लेटुर युनानि लोकुल्लुकुगुडा ओरतोनि कलियतुर. अचोने आयका वेल्लेन बेस पोरोल होत्ता मुर्ताहकगुडा ओरतोनि कलियसि मत्तां.

5 गानि यहुदिल्लुकुंक मात्रम मंटा अरसेक मत्ता. ओर इच्चुर बदमासुल्लुकुन जमा कीसि सहरते लोल्लिलं कीतुर. बल्हा कीसन्ना गानि पौलुस, सिलासुन लोकुल्लुकुना मुन्ने तायागोम इंचि ओर यासोन इनानोना वरोन लोतपोर्रो होंचि अरतुर.

6 पौलुस, सिलास ओर्कु दोर्का हिल्लुर अयते यासोनून आनि इच्चुर दादालोर्कुन सहरता अदिकारिलुकुन मुन्ने इग्गिस ओतुर. ओसि, “ईर मनकालोर पूरा दुनियातुने हिळु-पोर्गे कीतुर, इंदके इग्गेगुडा वातुर.

7 ईरकु यासोन ओना लोन मनालय जेगा हीतोर. ईर अंतोर कैसर* राजाना नियमकुंक अड्डम कबळ कीतुर. अचोने आयका ओर, इंकावरोर राजाल मंतोर ओना पोरोल येसु आंद,” इंचि वेहांतुर.

8 इद पोल्लेतुन केंजसि अगा मत्ता लोक्कुलक आनि सहरता अदिकारिलुकु इरगा होंगुंक वातुर.

9 पजा यासोनून हेंदाल आनि कळमातोरहेंदाल दंडगु तेंडकुंचि, रासकुंचि ओर्कुन होळसीतुर.

बिरिया इनना सहरते पौलुस आनि सिलास

10 पजा बिराना नर्काटद-नर्केन दादालोर पौलुस, सिलासुन बिरिया इनना सहर लोहचीतुर. ओर अगा एवतारित्ते यहूदिलुकुना दर्मसास्त्रम कराहना लोते होत्तुर.

11 तेसलोनि सहरता यहूदिलुकुंकन्ना इगेटा यहूदिलुकु बचचोरो बेस मत्तुर. ईर पौलुस वेहना पोल्लेन बेस मनसु ताससि केंजुंदुर. हरेक रोजु दर्मसास्त्रमतुन हद्दिवसि पौलुस वेहना पोल्लेनि निजमेना इंचि बेस अर्तम कीकुनुंदुर.

12 इल्हा वेल्लेन मंदि यहूदिलुकु विस्वासम कीतुर. यहूदिलुकुन लेहकने बेस कदर मत्ता युनानि मुर्ताहक-मांडुसागुडा विस्वासम कीतुर.

13 गानि बस्के अयते पौलुस, पेनदा पोल्लेनि बिरिया सहरतेगुडा होंचि कराहचंतोर इंचि तेसलोनि सहरता यहूदिलुकुंक तेळियतनो, अस्के ओर अगा वासि लोल्लिं कियमळ, लोक्कुलुकुंक एकरेवुलुकु वेहमळ सुस्व कीतुर.

14 अदुनहाटीं दादालोर पौलुसुन बिराना समुद्रम ओड्डुनहेके लोहचीतुर. गानि सिलास, तिमोति मात्रम अग्गेन आगतुर.

15 पौलुसुनतोनि बोर अयते होत्तुरो ओर पौलुसुन एतेंस इनना सहरदाका अरहतुर. पौलुसुन हेंदाल, सिलास, तिमोति बिराना ओनगा वायागोम, इंचि इत्ता आदेस पीकुंचि ओर अगटाल मल्सि बिरिया सहरकु वातुर.

एतेंस सहरते पौलुस

16 पौलुस, एतेंस सहरते सिलास आनि तिमोतिना एदुर हळसेक मत्तस्के, अद सहर बोम्मनतोनि निडिस मत्तद हळसि ओना मनसुने बागा दुक्कम वाता.

17 दानहाटीं ओर रोज-रोज दर्मसास्त्रम कराहना लोहकुने होंचि यहूदिलुकुनतोनि आनि पेनदुकु वेरियना वेरे जाति लोक्कुलुकुनतोनि चर्चा कियुंदुर. अचोने आयका चौकुलुकुने होंचि बोर दोर्कुते ओरतोने चर्चा कियुंदुर.

18 अस्के इच्चुर इपिकुरि आनि स्तोइकिं इनना एक्को तेल्चि मत्ता लोक्कुलुकु ओनतोनि जगडम दोसकुत्तुर. अक्टाल इच्चुर, “ई पिचुर-पिचुर वळकानोर बतल वेहांतन इंचंतोर?” इंचि इत्तुर. इंचिच्चुर बारे, “ईर अयते वेरे जातितोरा पेनदा बारेमते कराहनोर दिसंतोर” इंचि इत्तुर. पौलुस येसुना बारेमते आनि ओर हासि मर्रा जीवाते तेदतदुन बारेमते कराहुंदुर इंचि ओर अल्हा इत्तुर.

19 आयंका ओन पीसि अरियपगुसः इनना पंचादिते ओसि, “निमे कराहना ई पूना पोल्लेनि बतांगो माकु तेळियानाल वेहा.

20 इंका निमे माकु मोमोट बस्के केंजुवा, तेळियवा पोल्लेनि वेहचंतिन. ई पोल्लेना अर्तम बतलो माकु तेळियागोट्टिस वेहा.” इंचि विनंति कीतुर.

* 17:7 कैसर इद राजाना पोरोल आयो. रोम सरकारते अन्टिकन्ना पेदुदा पदवि आंद. † 17:18 इपिकुरि आनि स्तोइकि इद इब्बर मनकालोरा पोरोल आंद, ईर वेहता हरपीसि ताकानोर्कुन इपिकुरि आनि स्तोइकि इंचि इत्तुर. ‡ 17:19 अरियपगुस इद उंदि पंचादि पोरोल आंद.

21 एतैस सहरता लोकुल्क आनि व्हेटागटाल वासि अगा मनना पलाता लोकुल्क, बस्केळक बतलन्ना पूनद केंजालय आनि दाना बारेमते चर्चा कियमळ तप्पा इंका व्हे बतले कबळ कियार्कोदुर.

22 अस्के पौलुस, अरियपगुस इनना पंचादिते नित्तिसि इल्हा वळकालय दल्गुतोर. एतैसता लोकुरिटा! मिमेट अन्नि तीरकुने पेनदा कदर कीसंतरि इत्ता संगति नाकु दिस्संता.

23 नना मीवा सहरअंता तिरियसि मिमेट मोळकना अन्नि वस्तुकुन हळतन. अचोने आयका, “एरपाट हिलवा पेनदाहाटी” इंचि रासि मत्ता उंदि गद्देतुन इंका नना हळतन. अयते मीकु एरपाट हिलाकोन्ना मिमेट मोळकना आ पेनदा बारेमतेन नना मीकु वेहंतन.

24 इद दुनियातुन, इद दुनियाते मनना अन्निटवुन पुटिस्ता पेने, बूमि आनि स्वर्गमता सामि आंद. अदुनहाटी मनकालोर तयार कीता गुळिने अद मननो.

25 दानगा बतले तक्को हिल्ले. इंका अदे अंतोर्क ऊपिरि, पिस्वर आनि गावाले मत्तव अन्नि वस्तुक हीता. अयते असोटा पेनदुक मनकना कय बतल हिया परंता?

26 पेन वरोर मनकन तयार कीता. आ वरोर मनकनतोनि ई दुनियंता निडिस मननाहाटी अन्नि जातिना लोकुल्कन तयार कीता. इंका ओराहाटी उंदि वेला, ओर मनना जेगांक गेट्टुकु, इल्हा पेने कीता.

27 मनकालोर पेनदुन पहकागोम इंचि दाना मनसु मत्ता. ओक्कला पहकिस-पहकिस दान ओर दोर्काबिटकुनानुर. अयना अद मनागटाल बोर्के लक्कु हिल्ले.

28 मनम दानतोने पिस्सेक मंतोम, दानतोने तिरियसेक मंतोम, अद मंता इंचे मनम मंतोम. इचोने आयका, मनम दाना पिलाल्क आंदुम, इंचि मीवा लोप्पोटोरे इच्चुर पाटां रासाना लोकुल्कगुडा वेहातुर.

29 “अयते मनम पेनदा मर्कुम आसिगुडा, मनकल ओना तेल्विनुसार तयार कीता एंडि, बंगारम आनि बंडाता बोम्मानलेहका पेन मनंता इंचि बस्केने इननायो.

30 मुन्नेटा लोकुल्कना पेनदा बारेमते तेल्वि तक्को लेक्कनहेंका पेन ओर्कुन हळसिगुडा हळवाप कीता. गानि इंदके मात्रम दुनियाता अंतोर लोकुल्क मनसु मार्सकुननाहाटी आदेस हीसंता.

31 अद पेर्कुत्ता मनकनहेंदाल, इद दुनियाते मनना हरेक मनकना न्यायम नीतिते कियानाहाटी पेन उंदि रोजुन पिक्स कीता. अचोने आयका अद पेर्कुत्ता मनकन हातोराव्हेटाल मर्रा जीवा अरहचि अंतोर मनकालोर्कुंक अद हीता पोल्लेतुन रजुव कीता.”

32 बस्के अयते लोकुल्क, हातोराव्हेटाल मर्रा जीवाते तेदतोर इत्ता पोल्ले पौलुसना तोळ्दाल केंजतुरो, अस्के इच्चुर लोकुल्क ओन कव्तर. गानि इंका इच्चुर मात्रम, “निमे वेहना पोल्ले मर्रा बस्केनना केंजंतोम,” इंचि इत्तुर.

33 अस्के पौलुस पंचादिताल पेय्सि होत्तोर.

34 इच्चुर लोकुल्क विस्वासम कीसि पौलुसुंक कलियतुर. ओराव्हेटाल वरोर दियोनुस इनानोर मत्तोर, ओर अरियपगुस पंचादिता मंबर मत्तोर. अचोने आयका दामेरा इनना पोरोलतद उंदि मुरतळ ओरतोनि मत्ता, इंका व्हे लोकुल्कगुडा मत्तुर.

18

कुरिति इनना सहरते पौलुस

1 पजा पौलुस एतैस सहर होळसिसि कुरैति सहरते होत्तोर.

2 अगा ओर अकविला इनना पोरोलता यहुदि मनकंक कलियतोर. ई अकविलाल पुंतुस इनना एरियाते पुटतोर. रोम सहरते मनना अंतोर यहुदिल्कन कलादियुस राजाल पेय्सि होंटु इंचि आदेस हीतोर. अदुनहाटी ओर इटलि एरियाताल ओना मुत्तो पिरिसकिलानतोनि कुरिति वातोर. अयते पौलुस ओर्क कलियालय होत्तोर.

3 पौलुसुनद आनि अकविलानद इव्वुरद इंका डेरं निलाहना ददे मत्ता. अदुनहाटी पौलुस ओरगा वासि आगतोर. ओर अंतोर कलियसि कबळ कियालय दल्गुतुर.

4 ओर हरेक नोमकेम रोजुननाड यहुदिल्कुना दर्मसास्त्रम कराहना लोहकुने होंचि युनानि, यहुदि लोकुल्लुकनतोनि चर्चा कीसि ओर्कु बेस तेळियागोट्सि वेहुंदुर.

5 सिलास आनि तिमोति मेसिडोनिया एरियाताल वातस्के, पौलुस ओना पूरा वेला पेनदा पोल्ले कराहमळतेन तासुंदुर. इंका यहुदिल्कुनतोनि वळकिसि, येसे किरिस्तु आंदुर, इंचि वेहचि गवाइ हियुंदुर.

6 गानि यहुदि लोकुल्लुक पौलुसुन हयसा हिल्लुर. ओना अपमानम कीतुर. अस्के पौलुस ओना कपडिं दुल्पसेके ओर्कुन, “मीवा नेतुर मीवा तल्लापोर्रो अरिं. अवटे नावद बतल दोसेम हिल्ले. इंदकेटाल नना वैरे जातितोर हेके दांतन,” इंचि इत्तोर.

7 इल्हा पौलुस दर्मसास्त्रम कराहना लोताल पेय्सि दाना बाजुंक मनना तीतु-युसतुस पोरोलता वरोर वैरे जाति बक्तुना लोन होत्तोर.

8 यहुदिल्कुना दर्मसास्त्रम कराहना लोतुक अदिकारि मत्ता वरोर क्रिसपुस पोरोलता मनकल, ओना लोतोर अंतोर सामिना पोरो विस्वासम कीतुर. अचोने आयका कुरेंति सहरतोर वेल्लेटुर लोकुल्लुक पौलुसना पोल्ले केंजसि, सामिनपोरो विस्वासम ईर्सि, बापतिस्मा एतुर.

9 उंदि नर्का सामि दर्सनमते पौलुसुंक इल्हा वेहतोर, “निमे वेरियाकौटा वळकसेक होन, सपुडदाका मनमा.

10 इद सहरते नावा वेल्लेन लोकुल्लुक मंतुर, ननागुडा नीवातोनि मंतन. नीवा पोरो बोरे कय तेहुर नीकुन बोरे तकलिप किय्युर,” इत्तोर.

11 इल्हा पौलुस एडादि नरादाका अग्गेन मंचि ओर्कु पेनदा पोल्ले कराहतोर.

पौलुस गल्लिया इनना राज्यपालुन मुन्ने

12-13 गल्लिया पोरोलतोर वरोर अकाया इनना एरियाक राज्यपाल मत्तोर, अस्के यहुदिल्क अंतोर उंदि आसि, पौलुसुंक अड्डम तिरियतुर आनि ओन कोरटते पीसि वासि, “ई मनकल नियम परकारम हिलुवा पदतकुने पेनदुन आरादना कियालय लोकुल्लुकुंक वेहासेक मंतोर,” इंचि इत्तुर.

14 पौलुस वळकालय आतोर अचोटेन गल्लिया राज्यपाल यहुदिल्कुनतोनि, “मिमेट वेहना पोल्ले बदाना तप्पु कीतदुन बारेमते, हिलाकौटे पेद्दा अन्यायमता बारेमते आसि मत्ते, नना मीवद केंजालय अर्तम मनवड.

15 गानि इद केस, पोल्ले, पोरोलक आनि मीवा दर्मसास्त्रमता बारेमते मंता. अदुनहाटीं दीन मीवद मिमेटे नेमाहकुंट. इसौटा केसकुना न्यायम नना किय्योन,” इंचि इत्तोर.

16 इल्हा इंचि गल्लियाल ओर्कुन कोरटताल पलाते पेचाहतोर.

17 पजा यहुदिल्क, दर्मसास्त्रम कराहना लोतुक अदिकारि मत्ता सोस्तिनेस पोरोलतोन पीसि, कोरटता मुन्नेने तंतुर. अयनागानि गल्लियाल मात्रम जर्गनदाना बारेमते विचारम किया हिल्लोर.

पौलुस सिरिया एरियाता अंताकिया सहरते मल्सि वांतोर

18 पौलुस वेल्लेन रोजकुनदाका अग्गेन कुरेंति सहरते मत्तोर. आयंका अगा मत्ता विस्वासुल्लुकन होळसि, मोळकुकुत्ता परकारम पौलुस किंकिरया सहर होंचि केल्लक कोरियकुत्तोर. पजा ओनतोनि पिरिसकिला आनि अकविला* ईरकुन पीकुंचि सिरिया एरियाक होनना डोंगाते उद्दिदस इपीसि सहर होत्तोर.

19 इल्हा ओर इपीसि सहरते एवतुर. पजा पौलुस पिरिसकिल्लन आनि अकविलान अग्गेन होळसतोर. ओर वरोरे दर्मसास्त्रम कराहना लोते होंचि यहुदिल्कुनतोनि चर्चा कियालय दलगतोर.

20 आयंका ओर अंतोर, ओन इंका इच्चुं रोजकु अग्गेन मननाहाटीं विनंति कीतुर गानि ओर, मनोन, इत्तोर.

* 18:18 पिरिसकिला आनि अकविला ईर इक्कर मुत्तो-मुय्दो आंदुर.

21 गानि अगटाल पेयसका मुन्ने, “ओक्कला पेनदा मनसु मनानयते नना मिहगा मर्ना वांतन,” इंचि ओर इत्तोर. पजा इपीसिताल डोंगाते उद्दिस पेयसतोर.

22 पजा ओर कैसरिया सहरते एक्सि, अगटाल येस्सलेम सहर होत्तोर. अगा होंचि अगाटा कलिसियातोर्कुंक कलियसि जोहार कीतोर, पजा अगटाल अंताकिया सहर होत्तोर.

पौलसुना मूडो पयनेम

(18:23–21:16)

अप्पुलोस इनानोर इपीसि सहरते

23 अगा इच्चुं रोजकु मत्तारित्ते मर्ना ओर गलातिया आनि पुगरिया एरियाताल अंतोर सिस्स्युलुकुना विस्वासम गट्टिगा कीसेके तिरियतोर.

24 अचोटेन अप्पुलोस इनानोर वरोर यहुदि मनकल इपीसि सहरते वातोर. ओर सिक्ंदरिया इनना सहरते पुटतोर. ओर वेल्लेन तेल्वि मत्ता मनकल मत्तोर. ओन्क दर्मसास्त्रम पुरागा तेळियुंदु.

25 ओर सामि वेहता हर्दा बारेमते करियसि मत्तोर. ओर येसुना बारेमते कराहनेके वेल्ले कुसिते बल्हा मत्तद अल्हेन बरोबर कराहुंदुर. गानि बापतिस्माता बारेमते अयते सिराप योहानुना बापतिस्माता बारेमतेन एरपाट मत्ता.

26 अयते ओर यहुदिलुकुना दर्मसास्त्रम कराहना लोते होंचि वेरियाकोंटा वळकालय सुख कीतोर. उंदि मल्का ओर वळकानेके पिरिसकिला आनि अकविला ईर इव्वुर ओना पोल्लें केंजतुर. केंजसि ओन दग्गेर्क केयकुंचि ओन्क पेनदा हर्दा बारेमते इंका बेस तेळियागोट्टिस वेहतुर.

27 अयते अप्पुलोस अकाया इनना एरियाक होनना विचारम कीतोर. अस्के दादालोरगुडा ओन्क बेस दैरनेम हीतुर. अचोने आयका अकाया एरिया पीसि मनना सिस्स्युलुकुंक, ईन बेस दग्गेर कीकुट्ट, इंचि उंदि सिट्टि रासतुर. ओर अगा एवतारित्ते, पेनदा कुपहिंदाल विस्वासमते वाता लोकुलुकुंक वेल्ले सहायम कीतोर.

28 बल्हा इत्ते, अंतोर लोकुलुकुना मुन्ने यहुदिलुकुनतोन जिद्दुने चर्चा कियुंदुर. इंका दर्मसास्त्रमते, येसु सामिए किरिस्तु आंदुर, इंचि ओर्क हुपिच्चि दान रूजुव कियुंदुर.

19

पौलस आनि पवित्र आत्मा तेळियवा सिस्स्युलुकु

1 अप्पुलोस कुरैति सहरते मननेके, पौलस वेरे-वेरे नाहकु तिरियसेके इपीसि सहरते वातोर. अगा ओन्क इच्चुर सिस्स्युलुक कलियतुर.

2 “मिमेट विस्वासमते वातस्के मीपोर्रो पवित्र आत्मा वाताना?” इंचि पौलस ओर्कुन पूसकीतोर. अस्के, “मोमोट अयते पवित्र आत्मा मंता इंचिगुडा केंजा हिल्लोम,” इंचि आ सिस्स्युलुक इत्तुर.

3 पजा, “अयते मरि मिमेट बोना बापतिस्मा एततिर?” इंचि पौलस पूसकीतस्के, “योहानुना बापतिस्मा एततोम,” इंचि ओर वेहतुर.

4 अस्के, “योहान अयते पापालुकुनाल मनसु मार्सकुनना बारेमता बापतिस्मा हियुंदुर. इंका ओर लोकुलुकुंक, ओना पज्जोटाल वरोर वायानोर मंतोर, ओनपोर्रो, इत्ते येसुनपोर्रो विस्वासम कीम्टु, इंचि वेहुंदुर,” इंचि पौलस इत्तोर.

5 इद केंजिस ओर येसु सामिना पोरोलते बापतिस्मा एततुर.

6 पजा बस्के अयते पौलस ओरापोर्रो कय इरतोर अस्के ओर अंतोरपोर्रो पवित्र आत्मा रेयता. ओर वेरे-वेरे बासाने वळकालय, बविस्यवानि कियालय दलगुतुर.

7 ओर अंतोर कलियसि पन्नेंडु मंदि मत्तुर.

8 आयंका पौलस मूड नेलुकुनदाका यहुदिलुकुना दर्मसास्त्रम कराहना लोते होनुंदुर. वेरियाकोंटा ओरतोन चर्चा कीसि पेनदा राज्यमता बारेमते ओर्कु तेळियागोट्टिस वेहुंदुर.

9 गानि ओरंटे इच्चुर जिद्दिद मनकालोर मत्तुर. ओर विस्वासम किया हिल्लुर. अचोने आयका लोकुल्लुकुना मुन्ने पेन वेहता हर्दा बारेमते रोता-रोता पोल्ले वळ्ळकसेक मत्तुर. अदुनहाटी पौलुस, सिस्युल्लुकुन ओना पज्जो केयकुत्तोर. आ लोकुल्लुकुन अग्गेन होळसि रोज तरन्नुसना मिटिंग बंगलाते होचि चर्चा कियुंदुर.

10 रौंडु वर्सनदाका इल्हे ताकसेके मत्ताहाटी आसिया एरिया पीसि मनना अंटोर यहुदि आनि युनानि लोकुल्लुक पेनदा पोल्लेतुन केंजतुर.

इसकिवा पोरोलता पेद्दा पेर्माना मर्कु

11 पौलुसना कयदाल पेन पेद्दा-पेद्दा अद्बूतामाता कबाहक कीसेक मत्ता.

12 इंका लोकुल्लुक पौलुस इटता दस्तिगुड्डान, ओना सेल्लान रोगम मत्तोरगा ओते ओरा रोगाल्कंता होनुंदु, देय्याल्क इंका होळसि वित्तुंदु.

13-14 इच्चुर यहुदि लोकुल्लुक, सुट्ट-मट्टु एरियाने देय्याल्क पीसि मत्तोर्कुन मंत्रालुकुना बलमते बेस कीसेके तिरियुंदुर. इसकिवा इनना वरोर यहुदि पेद्दा पेर्माक एडुर मर्कु मत्तुर. ओर इल्हे कियुंदुर. अय्ते उंदि मल्का ओर सामि येसुना पोरोल येत्सि, “पौलुस बोना बारेमते अय्ते वेहचंतोरो आ येसुना पोरोलते आदेस हीसंतन, पलाते पेयसा” इंचि देय्याल्कुकुन इत्तुर.

15 अस्के आ देय्यम, “येसु अय्ते नाकु एके, इंका पौलुसगुडा नाकु एके. मरि मिमेट बोर आदिर?” इंचि ओर्कुन पूसकीता.

16 पजा आ देय्यम पीसि मत्ता मनकल ओरापोर्रो अरसि, ओर्कुन इरगा तंतोर. अदुनहाटी ओर इरगा देब्बां दल्लिसि नेत्तुर पोंगनेकेन अद लोताल कपडिं केर्रीकोटेन पेय्सि विततुर.

17 इद संगति इपीसिते मनना अंटोर यहुदिल्लुकुक, युनानि लोकुल्लुकुक तेळियता. अदुनहाटी ओर अंटोर इरगा वेरियतुर. येसु सामिना पोरोलता कदर बेस्सेके होत्ता.

18 इल्हा बोर लोकुल्लुक अय्ते विस्वासुल्क आतुरो, ओर कीता तप्पुकुन अंटोरा मुन्ने ओप्कुनालय दल्लगतुर.

19 होदें-मंत्रालुकु कियानोर वेल्लेटुर लोकुल्लुक ओरा पुस्तकाल्क उंदगा जमा कीसि अवुन अंटोरा मुन्ने बोळस्तुर. पजा आ पुस्तकालुकुना दरा लेक्का कीते एबै वेय्कुना (50,000) एंडि कोल्लानचचोर मत्ता.

20 इल्हा सामिना पोल्ले बेस मजबुत आसेके नालुं मूलां पैलांचेके होत्ता.*

पौलुस पिलान कीतोर

21 इंदता जर्गुता पज्जो, पौलुस मेसिडोनिया, अकाया इनना एरियानाल येस्सलेम होनना पिलान पवित्र आत्माता सहायमतोनि कीतोर. अगा होत्ता पज्जो, बल्हा कीसि अयना रोम सहरतुन ह्ळ्यापीता, इंचि इत्तोर.

22 दानहाटी ओर तिमोति आनि इरास्तुस पोरोलता इव्वुर सेवाकुल्लुकुन मेसिडोनिया एरियाते लोहचीतोर. ओर कुद बारे इंका इच्चुं रोजकु आसिया एरियातेन आगतोर.

इपीसि सहरते जगडाल्क

23 अव रोजकुने पेन वेहता हर्दा बारेमते वेल्लेन लोल्लिं आतां.

24 देमेत्रि पोरोलतोर वरोर कमसालोड मत्तोर. ओर अर्तेमि* इनना पेनदा गुळितालेसीटव एंडिता गुळिं तयार कीसि अम्मुकुनुंदुर. दीनहेंदाल ओनगा कबळ कियानोर्क रिक्म हित्ताकोटा कबळ दोर्कुंदु.

25 आ कमसालोड, ओनगा कबळ कियानोर्कुन आनि ओनालेसी कबळ कियाना इंका वैरेतोर्कुन अंटोर्कुन जमा कीसि ओर्कु इल्हा वेहतोर, “दादालोरिता! मीकु अय्ते एरपाटे गदा, ई दंदाहेंदाल मनाकु बेस कोत्तां दोर्कतां.

* 19:20 व्यवस्ताविवरन 18:10-14

* 19:24 अर्तेमि इद मुरतळ पेन आंद. दीन युनानि लोकुल्लुक मोळ्ळंतुर.

26 ई पौलुस इपीसि सहरता आनि दग्गेर-दग्गेरा पूरा आसिया एरियाता लोकुलुकुंक, 'मनकल कीता पेनकु निजम पेनकु आयों,' इंचि ओर्क एकरेवुलुक वेहसेक ओर्कुन बदलांचतोर. इद संगतितुन मिमेट हळतिर आनि केंजतिर गुडा.

27 दीनहेंदाल मना दंदाक मत्ता बेस पोरोल बदनाम आंता. मना पेद्दा पेन अर्तेमिना गुळिता इलवागुडा दांता. इचोने आयका सिराप आसिया एरियातेन आयो गानि पूरा दुनियाता अंटोर लोकुलुक मोळकनसोंटा ई पेनदुक मत्ता पेद्दातनमगुडा हिलाकोंटा आंता," इंचि इत्तोर.

28 इसोंटा पोल्ले केंजसि ओर इरगा होंगुक वासि, "इपीसितोरा पेन अर्तेमि अन्नि पेनकुंकनना पेद्दा पेन आंद," इंचि वरगेयालय दलगुतुर.

29 अदुनहाटी सहरते लोल्लि आता. पजा लोकुलुक मेसिडोनिया एरियाताल वाता गयुस आनि अरिसतरकुस पोरोलतोर इव्वुर्कुन दोर्का पीतुर. ईर इव्वुरगुडा पौलुसुनतौनि कलियसि पय्नेम कियुंदुर. अयते लोकुलुक अंटोर उंदि आसि ओर्कुन पीसि नाटकम बंगलातगा जोरसे इग्गिसेक पीसि विततुर.

30 पौलुस लोकुलुकुना मुन्ने होनना इनकुतोर गानि सिस्युलुकु ओन होना हिया हिल्लुर.

31 आसिया एरियाता इच्चुर अदिकारिलुक पौलुसना दंतातोर मत्तुर, ओरगुडा, "निमे नाटकम बंगलाते होंचि दोकाते अरमा," इंचि कबुर लोहचि ओन्क विनंति कीतुर.

32 अस्के बोरो बतलो, बोरो बतलो इल्हा पेद्दा लोल्लि कियालय दलगुतुर. वेल्ले मदिक अयते ओर अगा बताहाटी जमा आतुर अदगुडा एर्का हिल्ले.

33 यहुदि लोकुलुक सिंकंदर पोरोलतोन वरोर मनकन मंदिताल पेरसि मुन्ने निलाहतुर. सिंकंदर कय ऊपसि-ऊपसि लोकुलुकुंक समजांचलय हळतोर.

34 गानि ओरगुडा वरोर यहुदि मनकल आंदुर इंचि तेळियतारित्ते ओर अंटोर रोंडु गंटांनदाका उंदे आबाजते, "इपीसितोरा पेन अर्तेमि अन्नि पेनकुंकनना पेद्दा पेन आंद," इंचि वरगेयसेके मत्तुर.

35 अस्के सहरता अदिकारि मंदितुन सांत कीतोर. सांत कीसि, "अरे इपीसि लोक्किरिटा, बेस पोरोल होत्ता अर्तेमि पेनदा गुळितुन आनि स्वर्गमताल अरता दाना पवित्र बंडा बोम्मातुन बेस कापाळना सहर इपीसि सहर आंद, इद पोल्ले दुनियाकंता एरपाटे मंता.

36 इद पोल्लेतुन बोरे हिल्ले इन्नोर. अदुनहाटी मिमेट सांत मंटु, विचारम कियाकोंटा गाबर आसि बतले कियमट.

37 ईर मनकालोर अयते मना पेनदा गुळिताल बतले दोंगा किया हिल्लुर. मना पेनदा अपमानमगुडा किया हिल्लुर. अयनागानि मिमेट ईरकुन इगे पीसि वातिर.

38 ओक्कला देमेत्रिसुंक आनि ओनतौनि कलियसि कबळ कियानोर्कुंक गिंटा बोरादन्ना विरोदमते बतलन्ना वेहनद मनानयते कोरटकुना तल्पुक कुल्ले मंतां, अगा ओर वरोनपोर्री वरोर तल्पुक-दोसेलुक वेहकुना परांतुर. ओरां केंजालय अगा अदिकारिलुकगुडा मंतुर.

39 अयना इंका बतलन्ना वैरेतदुन बारेमते वळकानद मनानयते दाना पय्सला मना पंचादिते किया वच्चु.

40 इय्याला इगे बतल अयते जर्गतनो दीनद पूरा दोसेम मना तल्लापोर्रिन अर्नलायक मंता. इद जर्गुता गटना बेसताहाटीगे जर्गुता इंचि रूजुव कियालयगुडा मनागा बतले हिल्ले." इंचि इत्तोर.

41 इल्हा इत्ता पजा ओर पंचादि मारता इंचि वेहतोर.

20

पौलुस मेसिडोनिया दांतोर

1 लोल्लिंअंता मगता पज्जो पौलुस सिस्युलुकुन केय्सि, ओर्क बेस प्रोत्साहन हीसि ओर्कुन होळसि मेसिडोनिया एरियाक होत्तोर.

2 मेसिडोनिया एरियाताल होननेके आ एरिया पीसि मनना विस्वासुलुकुंक प्रोत्साहन हियानसोटव बचचोनो पोल्लें ओर्क वेहासेके होत्तोर. पजा ओर अकाया एरियाते* एवतोर.

3 अगा पौलुस मूड नेल्क मत्तोर. अगटाल डोंगाते उद्दिदिस सिरिया एरियाते होनना विचारम कीतोर, गानि अचचोटैन यहूदि लोकुल्क ओन हक्काना पिलान कीसंतुर इंचि तेळियतस्के ओर मर्रा मेसिडोनिया एरियाक मल्सि होनना निरनायम कीतोर.

4 बिरिया सहरता पिरुस इनानोना मर्रा सोपवु, तेसलोनि सहरता अरिसतरकुस आनि सेकुंदल, दिरबे सहरताल गयुसु, आसिया एरियाताल तुकिकुस आनि तोरोपिमुस, इंका तिमोति. ईर अंतोर आसिया एरिया एवनाल पौलुसुनतोनि मत्तुर.

5 ईर अंतोर मुन्ने होंचि त्रोआस सहरते मावा एदुर हळसेक मत्तुर.

6 गानि मोमोट पिलिपिया सहरताल होयवा पिडिता हारिना पंडगु होत्तारित्ते डोंगाते उदिस पेयसतोम. त्रोआस सहरते ओर्कु होंचि कलियालय माकु हेय्युं रोजकु दल्गतां. अगा मोमोट एडुं रोजकु मत्तोम.

वरोर लेय्या पेडांक पौलुस जीवा अरहंतोर

7 आयंका मोमोट वारमता मुन्नेटा रोजुं हारि उरहालय उंदगा जमा आतस्के पौलुस लोकुल्कनुनतोनि वळकालय दल्गुतोर. ओन्क इंकुंदि रोजु पय्नेम होनना मत्ताहाटीं ओर नळजाम नर्कादाका वेहतोर.

8 मोमोट जमा आसि मत्ता पोर्रोटा अंतरम पोर्रो वेल्लेने वेडसिं मत्तां.

9 अगा युतुकुस पोरोलतोर वरोर लेय्या पेडल किडकिते उद्दिदिस मत्तोर. पौलुस वेल्लेनजेम वळकसेक मननेके ओन्क इरगा निद्रा वासि मूडोव अंतरमताल डोलसि हिळु अरतोर, ओनगा होंचि तेहतारित्ते ओर हासि मत्तोर.

10 पौलुस हिळु रेय्सि ओन रोमबोच्चेक अदमुकुंचि, “वेरियमटु, इंदके ओनालोप्पो जीवा मंता,” इंचि इत्तोर.

11 आयंका पौलुस पोर्रो होत्तोर. हारिना तुकडां कीसि तिंचि पंगायनदाका ओरतोनि वळकसेक मत्तोर. पजा अगटाल पेय्सि होत्तोर.

12 लोकुल्क आ लेय्या पेडन जीवाते ओना लोन ओतुर, अदुनहाटीं ओर्कु बचचोरो बेस अनपिस्ता.

त्रोआस सहरताल मितुलेन सहर होनना पय्नेम

13 मोमोट पौलुसुन अग्गेन होळसि डोंगाते उदिस मुन्नेन अस्सुस सहरतेके होत्तोम. पौलुस कुद अस्सुसदाका ताकसि वासि अगा माकु कलियंतन इंचि वेहतोर.

14 ओर अस्सुस सहरते माकु कलियतस्के, ओन डोंगाते एकिकुंचि मोमोट मितुलेन सहरते होत्तोम.

15 अगटाल पेय्सि इंकुंदि रोजु मोमोट, कियुस इनना दीबेता मुन्नेळ्क एवतोम. मर्रा इंकुंदि रोजु सामोस इनना दीबेतुन दाटसि होत्तोम. मर्रा इंकुंदि रोजु आतारित्ते मोमोट मिलेतुस इनना सहरते एवतोम.

16 बल्हा कीसन्ना गानि पेंतेकोस्त पंडुगुंक येस्सलेम सहरते मनगोम इंचि पौलुस गाबर आसेक मत्तोर. अदुनहाटीं आसिया एरियाते वेल्ले रोजकु आगिसि वेला बरबाद कियमळ इस्टम हिलाका, इपीसिते आगाकॉटा मुन्नेळ्क पेय्सि होनना विचारम कीतोर.

पौलुस इपीसि सहरता पेदूदाल्कन केया वेहांतोर

17 पौलुस इपीसि सहरता कलिसिया पेदूदाल्कुंक कबुर लोहचि ओर्कुन मिलेतुस सहरते ओनगा केयतोर.

18 ओर अंतोर वातारित्ते पौलुस ओरतोनि इल्हा वळकालय दल्गुतोर. “नना आसिया एरियाते वातस्के, मोदाटा रोजुनाल मीवातोनि उंदि-उंदि निमसम बल्हा मत्तन, इद मीकु एरपाटे मंता.

* 20:2 अकाया एरिया दीन युनान देसेम इंचिगुडा इंतुर. † 20:7 वारमता मुन्नेटा रोजु यहदिलुकुना केलेंडरते वारमता मुन्नेटा रोजु सनेरम पोब्द होंचि सुस्व आंता. अय्यतारम पोब्द होंचि मारंता.

19 यहुदिलुकुनाहेंदाल नाकु बच्चोनो कस्टाल्क वातां. अयना, नना मनसुनाल गरिब आसि अळसेके सामिना सेवा कीतन.

20 मीवा बेसताहाटीं अवसरम मत्ता बदे पोल्ले आयि वेहालय नना बस्केने पजोळ्क आया हिल्लेन. नना अव पोल्लें अंतोर लोकुलुकुना नड्डुम, लोन-लोन होंचि वेरियाकोंटा कराहतन, इद संगति मीकु एर्के मंता.

21 पापालुकुनाल मनसु मार्सकुंचि पेनदाहाटीं पिस्सट, अल्हेने मना येसु सामिना पोर्री विस्वासम कीम्टु इंचि नना यहुदिलुकुंक, युनानि लोकुलुकुंक गवाइ हीसि वेहुंदुन.

22 इंदके पवित्र आत्मा वेहताप कियना इंचि नना येस्सलेम सहर होंचंतन. गानि अगा होत्तारित्ते नावद बतल आंतो नाकु एर्का हिल्ले.

23 उंदि पोल्ले मात्रम नाकु एपाट मंता. अद बतल इत्ते, अग्नि सहरकुने जेल, कस्टाल्क नावाहाटीं एदुर हळसंतां इंचि पवित्र आत्मा नाकु वेहासेक मंता.

24 नाकु नावा जीवाता पिकिर हिल्ले. नना अयते सिराप येसु सामिनहेंदाल नाकु दोर्कुता आ पंदेमतुन, सेवातुन पूरा कीतन. अद बतल इत्ते, पेनदा कुर्पाता बारेमते बेसता पोल्लेना गवाइ वेहामळ आंद.”

25 नना मी अंतोरतोनि कलियसि मंचि मीकु पेनदा राज्येमता बारेमते कराहसेक तिरियतन. मीवावटेताल बोरेगुडा नाकुन मर्रा बस्केने हळा परिर इंचि नाकु एर्के.

26 दानहाटीं इय्याला नना वेहासेक मंतन गदा, मीवा लोप्पोटाल बोरन्ना आयिर, हासोत्ते दान्क जबाबदारी नना आयोन.

27 बारित्ते नना पेनदा पूरा इच्चातुन मीकु वेहालय बस्केने पजोळ्क होना हिल्लेन.

28 पवित्र आत्मा मीकुन मीवा कलिसियातोरपोर्री कोहानोन-मेहानोन लेहका पेर्कुत्ता. अद मंदातुन पेन कुद्रुद दाना मर्रिना नेत्तुर हीसि असकुत्ता. अदुनहाटीं मीवद मिमेट अल्हेने मीवा जिम्मेदारिते मनना मंदातुनगुडा मिमेट बेस कापाळसेके मंट.

29 नना होत्तारित्ते कतरनाक तोडेल्लिनसंटा मनकालोर मीवा नड्डुम वासि मीकु नुकसान कीतुर इद नाकु एपाट मंता.

30 अचोने आयका मीवा लोप्पोटाले इच्चुर इसंटा मनकालोर पेयसंतुर गदा, ओर सिस्युलुकुन ओरा पज्जो इगुकुनालय आबद्दम पोल्लें वळकांतुर.

31 अदुनहाटींगे मिमेट हुसारते मंट. मूड वर्सनदाका वरो-वरोकु, नर्का-पियल अळसि-अळसि जेगर्ता मननाहाटीं वेहमळते नना बस्केने पजोळ्क होना हिल्लेन इद मति ईरंट.

32 इंदके नना मीकुन पेनदा कय्दे आनि दाना कुर्पाता कबुरता कय्दे अप्पजेपंतन. मीकुन बेस बेरसागोटना ताकत अद कबुरते मंता. पेन पवित्र कीता अंतोर लोकुलुकुना लोप्पो मीकुनगुडा वारसदार किया पर्रता.

33 नना बस्केने बोनेहेंदाले एंडि-बंगारम हिलाकोंटे बेसता कपडि गावाले इंचि आसे पडा हिल्लेन.

34 नना नावा कय्कुनतोने कबळ कीसि नावा अवसराल्कु आनि नातोनि मत्ता नावा दंटागाह्कुना अवसराल्कु तीरस्ता संगति मीकु कुद एपाटे मंता.

35 वेल्लेन कस्टम कीसेके नादान मत्तोर्कुंक मनम बल्हा सहायम कियगोम इत्ता संगतितुन नना मीकु नावा हरेक कबळताल कीसि हुपिस्तन. “एतकुनुळकन्ना हियमळतेन एक्को सुकम मंता,” इंचि कुद्रुद येसु सामि इत्ता पोल्लेतुन मतिते इरमळ बच्चोनो अवसरम मंता, इंचि इत्तोर.

36 इल्हा इंचि ओर टोंगरां ऊनसि, अंतोरतोनि कलियसि पारतना कीतोर.

37 अस्के ओर अंतोर इरगा अळसेके बेस पावरमतोनि पौलुसुंक कलियसि ओन बुरतुर.

38 मिमेट मर्रा ना मोकम बस्केने हळा परिर, इंचि पौलुस इत्ता पोल्लेताहेंदाल ओर अंतोर लोकुलुकुंक बागा दुक्कम वाता. पजा ओर अंतोर, ओन डोंगादाका सार्ला कीतुर.

1 ओर माकुन साल्ना कीतस्के मोमोट डोंगा उदसि सवरगा कोस इनना दीबेक होत्तोम. अगटाल इंकुंदि रोजु स्दास इनना दीबेक आनि अगटाल पतरा इनना सहर होत्तोम.

2 अगा माकु पिनिके इनना एरियाक होनानद उंदि डोंगा दोर्कता अय्ते मोमोट अंटे उदसि पेय्सतोम.

3-4 बस्के अय्ते माकु साइप्रस दीबे दिसालय दल्याता अस्के मोमोट दान मावा डेमा बाजुंक होळसि सिरिया एरियाहेके तिरियतोम. सूर सहर सिरिया एरियाते मत्ताहेंका डोंगाते मत्ता माल सूर सहरते रेहानद मत्ता. पजा मोमोटगुडा अग्गेन रेयतोम. अगा माकु सिस्युल्क कलियतुर अय्ते ओरतोनि मोमोट एडुं रोजकुनदाका आगतोम. ओर पवित्र आत्माहेंदाल, निमे येस्सलेम होनमा, इंचि पौलुसुन इत्तुर.

5 वारम आता पज्जो अगटाल मोमोट मावा पय्नेम पेय्सतोम. अगाटा विस्वासुल्क ओरा मुत्तोहक, पिलाल्क अंटेर सहरता पलाते समुद्रम ओड्डुनदाका मातोनि वातुर. अगा मोमोट टोंगरां ऊनसि पारतना कीतोम.

6 ओर माकुन साल्ना कीतंका मोमोट डोंगा एकतोम, ओर ओरा लोहकुने वापस होत्तुर.

7 सूर सहरताल डोंगाते उदसि पय्नेम कीसेके मोमोट पोलेमा इनना सहरते वासि रेयतोम. अगाटा विस्वासुल्कुंक कलियसि ओरतोनि मोमोट उंदि रोज मत्तोम.

8 *इंकुंदि रोजु मोमोट अगटाल पेय्सि कैसरिया सहर होत्तोम. अगा होंचि मोमोट, पिलिपुस पोरोलता पेनदा सेवाकुना लोन आगतोम. ई पिलिपुस येस्सलेम सहरते गाटो पंचि दोसनाहाटीं पेरता एडुर लोपोटाल वरोर मत्तोर.

9 ओन्क नालुं मरमिं आयवा मियाहक मत्तां. अय्ते अव नालुंगुडा बविस्वयवनि वेहुंदुं.

10 मोमोट अगा कोन्नि रोजकु आगसि मत्तोम, अस्के यहुदिया एरियाताल वरोर पेनदा कबुरतोर वातोर ओन पोरोल अगबुस.

11 ओर मावा दग्गेर्क वासि पौलुसना नडिता पट्टा तेंडकुंचि, ओना कय्कु-काल्कुन दोहकुंचि, “इद पट्टा बोनद अय्ते आंदो ओन येस्सलेम सहरते यहुदि लोकुल्क इल्हेन दोहाचि वैरे जातितोकुंक अप्पजेपंतुर, इंचि पवित्र आत्मा वेहासेक मंता,” इत्तोर.

12 इद केंजतारित्ते मोमोट आनि अगाटा लोकुल्क, निमे येस्सलेम सहर होनमा, इंचि विनंति कीतोम.

13 अस्के, “इल्हा अळसि-अळसि नावा मनसुन कमजोर बारि कीसंतरि? नना येस्सलेम सहरते सिराप दोहांतुर इंचि आयो गानि, येसु सामिना पोरोलहाटीं हायालयगुडा तयार मंतन,” इंचि पौलुस इत्तोर.

14 मोमोट बच्चोन वेहिनागानि ओर केंजवाहेंका, पेनदा इच्चा मत्ताप जर्गिकांटी, इंचि मोमोट सपुडदाका आतोम.

15 इल्हा कोन्नि रोजकुन पजा मोमोट मावा तयारि कीसि येस्सलेम सहर होत्तोम.

16 मावातोनि कैसरिया सहरतोर इच्चुर सिस्युल्क इंका वातुर. ओर माकुन साइप्रस दीबेतोर वरोर मनकल मनासोनना लोन ओतुर. मोदोलता विस्वासुल्कुनाल ओर वरोर सिस्युड आंदुर. माकु ओनागेन आगनद मत्ता.

पौलुस याकोबुंक कलियंतोर

17 मोमोट येस्सलेम सहर एवतस्के अगाटा विस्वासुल्क वेल्लेन आनंदमते माकुन कल्पुकुत्तुर.

18 इंकुंदि रोजु पौलुस माकुन अंटोर्कुन पीसि याकोबुंक* कलियालय होत्तोर. अगा येस्सलेम सहरतोर अंटेर विस्वासि पेदूदाल्क मत्तुर.

19 मोदाला पौलुस ओर्क अंटोर्क जोहार कीतो. पजा पेन ओन दाना सेवाते वाळकुंचि यहुदि आयवोरा लोप्पो बता-बता कबाहक कीता, अव उंदि-उंदि कबळता बारेमते ओर्क वेहतोर.

20 पौलुस वेहतद केंजसि पेदूदाल्क अंटेर पेनदा स्तुति कीतुर. पजा पौलुसुन, “दादा, बच्चोनेो वेय्कुना मंदि यहुदिल्कु इगे विस्वासुल्क आतुर इत्ता संगति निमे हळसेकेन मंतिन. ओर अंटेर मूसाना नियमतुन बेस पीसि ताकसेक मंतुर.

* 21:8 प्रेरितुलुकुना कबाहक 6:1-6

* 21:18 याकोब ई याकोब येसुना तम्पुर आंदुर. इंका ईर येस्सलेम कलिसियाता

पेदूदा मनकल आंदुर.

21 गानि, मूसाना नियमतुन पीसि ताकमट, मर्कुनद कतना कियमट इंका यहुदिलुकुना रीति-रिवाजकुन होळसीम्टु इंचि वैरे जातितोरा नड्डुम मनना यहुदिलुकुंन निमे कराहतिन इंचि बोरो इगो वेहतुर.

22 अय्ते इंदके बतल कीकोम मरि? निमे इगो वातिन इत्ता संगति ओर्कु बल्हैना तेळियते.

23 अदुनहाटीं निमे मोमोट वेहताप कीम. महगा मोक्कु मोळककुत्तोर नालुर मनकालोर मंतुर.

24 निमे ईरकुन नीतोनि ओम. ओरतोनि कलियसि नीवदगुडा सुद्दिदकरन कीकुन. अचोने आयका ओरा तल्ला कोरियनाहाटीं कसूक कोत्तां इंका निमेने हीम. इल्हा कीतिन इत्ते नीवा बारेमते केंजतद अंता वट्टि आबदुदमे. इंका निमे मूसाना नियम परकारमे ताकसंतिन इंचि ओर्कु तेळियसि दांता.

25 मोमोट अय्ते वैरे जातिता विस्वासुलुकुंक दीनकन्ना मुन्नेन उंदि सिट्टि रासि अव्टे, बोम्मांक मोळकतदुन तिनमट, गोंदके पिसकिसि हक्कता जिवरासिना हव्विं, नेत्तुर तिनमट, बोगमतनमताल लक्कु मंटु, इल्हा रासि लोहतोम,” इंचि इत्तुर.*

26 इल्हा पौलुस आ नालुकुन पीसि इंकुंदि रोजु ओरतोनि कलियसि ओरगुडा सुद्दिदकरन कीकुत्तोर. पजा अगटाल येस्सलेमता गुळिते होंचि, पुरागा सुद्दिदकरन आयगोम इत्ते बच्चुं रोजकु एदुर हळसेक मनापीतनो अदुन बारेमते पेर्मांलोर्कुंक वेहतोर. अचोने आयका आकिरता रोजकुने ओनतोनि वाता हरेक मनकंक ओना सतताहेंदाल मोक्कु हियापीता इंचिगुडा वेहतोर.

27-28 एडुं रोजकु पूरा आयानवे मत्तां, आसिया एरियाताल वाता इच्चुर यहुदिल्क पौलुसुन गुळिते हळतुर. ओर अंतोर लोकुलुकुंक पौलुसना बारेमते एकरेवुल्लक वेहचि ओन पीतुर. पजा वगोयसि, “इम्प्राएलता लोकुरिटा, मिमेट अंतोर माकु सहायम कीम्टु. ईर मनकल अन्नि एरियाने तिरियसि मना इम्प्राएलता लोकुलुकुना विरोदमते, मूसाना नियमता विरोदमते आनि ई गुळिता विरोदमते लोकुलुकुंक कराहसेक मंतोर. अचोने आयका इंदके युनानि लोकुलुकुन गुळिते केय्सि तच्चि पवित्रामाता गुळितुनगुडा हेळाहतोर,” इंचि इत्तुर.†

29 (तोरोपिमस पोगोलतोर वरोर इपीसिता मनकन पौलुसुनतोनि तिरियनेके लोकुलुकु हळसि मत्तुर, ओने पौलुस गुळिते तत्तोर बारे इनकुत्तुर.)

30 अस्के पूरा सहरअंता गजबज आता. लोकुलुकु अंतोर विच्चि वासि उंदगा जमा आतुर. पौलुसुन दोर्कापीसि गुळिताल पलाते इग्गिस ओसि, बिराना तल्पुक वाटतुर.

31 लोकुलुकु ओन हक्कना विचारम कीसेक मननेकेन रोमि पोलिस दलमता सिपाइलुकुना अदिकारिक, पूरा येस्सलेम सहरते लोल्लि आता इंचि कबुर तेळियता.

32 अस्के ओर बिराना इच्चुर सिपाइलुकुन आनि दरोगालोर्कुन पीसि पौलुसुन तनना यहुदिलुकुनहेके पेयसतोर. सिपाइलुकुना अदिकारि, सिपाइलुकुन हळतारित्ते यहुदिल्क पौलुसुन तनमळ आपतुर.

33 पजा आ सिपाइलुकुना अदिकारि पौलुसनगा होंचि ओन पीसि गोल्सुकुने दोहनाहाटीं आदेस हीतोर. आयंका ओर लोकुलुकुन, ईर बोर आंदुर, ईर बतल कीतोर? इल्हा पूसकीतोर.

34 अस्के इच्चुर लोकुलुकु उंदितीर, इंकिच्चुर लोकुलुकु इंकुंदि तीर वेहालय आतुर. इल्हा वेल्लेन लोल्लि आसि निजम बतल ओन्क तेळिया पराहिल्ले. अदुनहाटीं ओर पौलुसुन किल्लाते ओयालय आदेस हीतोर.

35-36 पौलुस पायरिनगळक एवतस्के वेल्लेन मंदि लोकुलुकु, “ओन हक्कट, ओन हक्कट,” इंचेके उंदेतीर मोत्कुंचेके इरगा लोल्लि कियालय दलगुतुर. अदुनहाटीं सिपाइलुकुंक ओन ओरा बुजालुकुन पोर्री तेहकुंचि किल्लाता लोप्पो ओया पीता.

37 सिपाइलुकु पौलुसुन किल्लाता लोप्पो ओयका मुन्ने, “नना नीतोनि बतलन्ना वळका परीतना?” इंचि पौलुस सिपाइलुकुना अदिकारिन पूसकीतोर. अस्के आ सिपाइलुकुना अदिकारि, “अब्बा! नीकु युनानि बासागुडा वळका वांताना?”

* 21:25 प्रेरितलुकुना कबाहक 15:20 † 21:27-28 यहुदिलुकुना गुळिते वैरे जातितोर्कुन होनमा इत्ता जेगाते होत्ते ओर्कुन हक्कुदुर.

38 अयते मरि कोन्नि रोजकु मुन्ने रोम सरकास्कं विरोद कीसि, नालुं वेयकुना आतंकवादिर्कुन बाय्लि जेगाते केय्कि ओता इजिप्त देसेमता मनकन निमेन गदा?" इंचि पौलुसुन पूसकीतोर.

39 अस्के, "नना किलिकिया एरियाता उंदि बेस पोरोल होत्ता तरसुस सहरता यहुदि मनकन आंदुन. नना नीकु विनंति कीतन, ई लोकुकुनतोनि नाकुन वळका हीम," इंचि पौलुस इत्तोर.

40 सिपाइलुकुना अदिकारिनहेंदाल वळकाना अदिकारम दोर्कतस्के पौलुस पायरिनपोरो नित्तिसि लोकुकुकं कय हुपिच्चि सपुडदाका मनालय सयगे कीतोर. लोकुकुक सपुडदाका आतास्के पौलुस इब्रानि बासाते वेहालय दलगुतोर.

22

पौलुसना बासन

1 "दादालोरिता आनि पेद्दालुकुनिटा, नाकु मीवा मुन्ने इच्चुर वळकानद मंता अदुन केंजट." इंचि पौलुस वळकालय दलगुतोर.

2 ओर इब्रानि बासाते वळकानदुन केंजसि लोकुकुक इंका इच्चो सपुडदाका आतुर.

3 "नना यहुदि मनकन आंदुन. नना किलिकिया एरियाता तरसुस सहरते पुटतन. इदे येस्सलेम सहरते बेसतन. इंका गमलियेल इनानोना कय्दा हिळु मंचेके ओनहेंदाल बेस सदवु कारियतन. अचोने आयका मना पेद्दालुकुना नियम्क, रीति-रिवाज्क मत्ताप बेस टेरनिंग दोर्कुता. मिमेट बल्हा अयते इय्याला पेनदाहाटी मीवा बक्तितुन हुपिच्चंतिरो, अल्हेन ननागुडा हप्सुंदुन.

4 नना पेनदा हरि पीसि ताकाना लोकुकुकुन बच्चोनो तकलिप कीतन, दीनहेंदाल इच्चुर लोकुकुकुना जीवा इंका होत्तां. मुरतळ-मांडसा इनाकोटा अंतोर्कुन पीसि जेलने वाटुंदुन.

5 पेद्दा पेर्माल आनि अंतोर यहुदि पेद्दालुकु नावा ई कबळहाटी गवाइ मंतुर. अचोने आयका दमिस्क सहरते मनना यहुदि दादालोर्कुंक सिट्टिं रासि दमिस्क सहर होनालय पेयसतन. अगा होंचि पेनदा हरि पीसि ताकानोर्कुन दोकापीसि येस्सलेमते तच्चि, ओर्कु सिक्सा आयगोम. इदे नावा उद्देसम मत्ता."

पौलुस ओना मनसु मारियता संगति वेहांतोर

6 इल्हा नना दमिस्क सहर होनालय पेयसतन. नना दमिस्क सहर दग्गेर्क एवतन बारे! अस्के पियल वेलाक मब्बुनाल उंदेदम उंदि पेद्दा वेलगु नावा सुट्टु जग्गरा मेसता.

7 नना अल्हेन बूमिपोरो हिळु अरतन. अस्के उंदि अल्किर, "साऊल, साऊल! निमे नाकुन बारि तकलिप कीसंतिन?" इंचेके नाकुन इत्ता.

8 अस्के, निमे बोन आदिन सामि? इंचि नना पूसकीतस्के, "निमे बोन अयते तकलिप कीसंतिनो आ नासरेत नाटेना येसुन आंदुन," इंचि आ अल्किर इत्ता.

9 नावातोनि मत्तुर ओर अद वेलगुन हळतुर गानि नावातोनि वळकता अल्किर मात्रम ओर्क केंजा वाया हिल्ले.

10 पजा, अयते नना बतल कीकन सामि? इंचि पूसकीतस्के, "निमे तेदसि दमिस्क सहरते होन. बव कबाहक अयते कियालय नना नीकुन पेरकुत्तनो अव कबाहक अगा नीकु वेहमळ जर्गता." इंचि सामि नाकु वेहतोर.

11 आ जग्गरा वेलगुन हळसि नावा कळकु दिस्साकोटा आतां. अदुनहाटी नावा दंटातुर नाकुन कय पीसि दमिस्क सहरते ओतुर.

12 अगा हनन्याल पोरोलतोर वरोर मनकल मत्तोर. ओर मूसाना नियम परकारम ताकुंदुर. अगाटा अंतोर यहुदिल्क इंका ओन बेस मनकल इनुंदुर.

13 ओर नाहेके वासि, नावा दग्गेरा नित्तिसि, "साऊल दादा! नीवा कळकु मरा दिस्सीकांटी," इंचि इत्तोर. ओर अल्हा इत्ता इन्मळे नावा कळकु दिसालय दलगातां. नना ओन हळतन.

14 पजा ओर नाकुन, “मना एनकटा पेदूदालुकुना पेन दाना इच्छातुन एरपाट कियालय, नीतिमंतुड आता दाना सेवकुन ह्वाललय, ओना तोळदा पोल्लेन केंजालय नीकुन पेर्कुलता.

15 निमे बतल अयते ह्ळतिन, बतल अयते केंजतिन अदुना बारेमते दानाहेंदाल अंटोर लोकुलुकुना मुन्ने गवाइदार आंतिन.

16 अयते इंदके आलसेम बारि कीसंतिन? तेदसि बापतिस्मा एतसि, सामिना पोरोलते पारतना कीम, अस्के ओर नीवा पापालुकुन नोरीतोर,” इंचि इत्तोर.

17 आयंका नना येस्सलेम तिरियसि वासि गुळिते पारतना कीसेके मत्तन, अस्के अल्हेन दर्सनम ह्ळतन.

18 दर्सनमते मननेकेन नना सामिन ह्ळतन, अस्के, “बिराना तेदसि येस्सलेम सहरताल पेय्सि होन, नावा बारेमते निमे वेहाना गवाइतुन ओर ओप्कुन्नुर,” इंचि सामि नाकु वेहतोर.

19 अस्के नना इत्तन. “सामि! यहुदिलुकुना दर्मसास्त्रम कराहना हरेक लोते होंचि नीपोरों विस्वासम कियानोर्कुन दोर्कापीसि ओर्कुन जेलने वाटता संगति आनि तंता संगति आ लोकुलुकुन बेस एरपाटे मंता.

20 अचोने आयका नीवा गवाइदार स्तिपनुन ह्ळकानेके, ह्ळकानटे नावदगुडा कय मत्ता, इंचि ह्पिच्चेक, ओन ह्ळकानोरा कपडिना कावेल कीसेक नना अग्गेन नित्तिसि मत्तन.

21 अस्के सामि नाकुन, निमे होन, नना नीकुन वेल्लेन लक्कु वेरे जातितोरा लोप्पो लोहंतन,” इंचि इत्तोर.

पौलसुन यहुदिलुकुना पेदूदा पंचादिता मुन्ने निलाहंतुर

22 इद पोल्ले वेहनदाका यहुदि लोकुलुक पौलसना बासन केंजतुर, पजा जोरसे वरगेयसि, “ई मनकल जीवाते मनमळ बेस आयो. इसंटा मनकन ई बूमिपोरोंटाल हिलाकोटा कीम्टु,” इंचि इत्तुर.

23 ओर जोर-जोरसे वरगेयसेक मत्तुर, अंगिपोरों केर्ता कोटकुन तेंडसि विसिरसेके मत्तुर, इंका मब्बुनहेके दुब्बा तेहासेक मत्तुर.

24 अस्के सिपाइलुकुना अदिकारि पौलसुन किल्लालते ओयानाहाटी आदेस हीतोर. “लोकुलुक ओना विरोदमते इल्हा बारिक वरगेयसंतुर, कारनम बतल आंद तेळियनाहाटी, ओन पोट्टे देब्बां तंचि-तंचि पूस कीम्टु,” इंचि वेहतोर.

25 गानि बस्के अयते पौलसुन पोट्टे देब्बां तनालय दोहचेके मत्तास्के, “तप्पु कीतोर इंचि निरनायम पेय्सका मुन्नेन वरोन रोम रहिवासिन पोट्टे देब्बां तनमळ मीवाहाटी न्यायामेना?” इंचि अगा नित्तिसि मत्ता वरोर दरोगान पौलस पूसकीतोर.

26 अल्हा इत्तद केंजसि आ दरोगाल सिपाइलुकुना अदिकारिनगा होंचि, “मिमेट इद बतल कीसंतिर? ईर रोम रहिवासि अले,” इंचि ओन इत्तोर.

27 अस्के आ सिपाइलुकुना अदिकारि पौलसुनगा वासि, “नाकु वेहा, निमे रोम रहिवासिन आंदिना?” इंचि पूसकीतस्के, “आ” इंचि पौलस इत्तोर.

28 पजा, “नना रोम रहिवासि आयानाहाटी वेल्लेन कोत्तां कर्स कीतन,” इंचि आ सिपाइलुकुना अदिकारि इत्तस्के, “नना अयते पुटतस्केटाले रोम रहिवासिन आंदुन,” इंचि पौलस इत्तोर.

29 पजा ओन पूसकियालय ह्ळसेक मत्ता सिपाइलुकुन बिराना पजोळक आतुर आनि सिपाइलुकुना अदिकारिगुडा, रोम देसेमता वरोन रहिवासिन दोहाचि वाटतोम, इंचि वेल्ले वेरियकुत्तोर.

30 यहुदि लोकुलुक पौलसुनपोरों बारि दोसेम दोस्तुर. निजम बतलो पलाते अरगोम इंचि सिपाइलुकुना अदिकारिना मनसुने मत्ता. अदुनहाटी सिपाइलुकुना अदिकारि इंकुंदि रोजु, पेदूदा पेर्मांलोर्कुन आनि यहुदिलुकुना पेदूदा पंचादितोर्कुन जमा आयालय आदेस हीतोर. अंटोर जमा आतास्के पौलसुन पेचाहचि ओरा मुन्ने तच्चि निलाहतोर.

23

1 पौलुस पेद्दा पंचादितगा जमातोर्कुन उंदेतीर ह्ळसि, “नावा दादालुरिटा! नना, इय्यालादाका पेनदा मुन्ने बेसता मनसुने पिसतन,” इंचि इत्तोर.

2 अस्के हनन्याल इनना पेद्दा पेर्माँल, “ओना तोड्डिड पोरोँ तन्नाटु,” इंचि पौलुसुना पक्काते नित्तिसि मत्तोर्कुँक आदेस हीतोर.

3 अस्के पौलुस ओन, “ए चुना होकता गुरेतसंतोना! पेन नीकुन तनंता. बारित्ते, निमे दर्मसास्त्रमता नियम मत्ताप नावा न्यायम कियालय उदतिन, गानि दानकु अड्डम नाकुन तनालय आदेस बल्हा हीतिन?” इंचि इत्तोर.

4 अस्के पक्काते नित्तिसि मत्तुर, “निमे पेनदा पेद्दा पेर्माना अपमानम कीसतिना?” इंचि इत्तुर.

5 “दादालुरिटा, ईर पेद्दा पेर्माँल आंदुर इंचि नाकु एरपाट मनाहिल्ले. बारित्ते, ‘नीवा अदिकारिनाहाटीं सेड्डा पोल्ले वळका मन्नि,’[☆] इंचि नियमते रासि मंता,” इल्हा पौलुस इत्तोर.

6 अगा यहुदिल्लुकुना पंचादिते उद्दिदसि मत्ता लोकुल्लुकुने इच्चुर सदुकिर आनि इच्चुर परिसिल्लुकु मंतुर इंचि पौलुसुंक तेळियतस्के, ओरा मुन्ने जोरसे वरगोय्सि, “दादालोरिटा! नना परिसिन आंदुन. नावा तादल-बाबोगुडा परिसिल्लुकु आंदुर. हातोर मर्रा जीवाते तेदांतुर इत्ता ओरा आसेतुन नना विस्वासम कीताहाटीं मीवा मुन्ने निल्लिस मंतन,” इंचि इत्तोर.

7 ओर इल्हा इत्तारित्ते परिसिल्लुकु आनि सदुकिर लोप्पो लोल्लि आसि, ओर अलग-अलग आतुर.

8 बारित्ते, हातुर मर्रा जीवाते तेदुर, पेनदा दूतां हिल्लें, आत्मां हिल्लें इल्हा सदुकिर इंतुर. गानि परिसिल्लुकु बारे इव अन्नि मंतां इंचि इंतुर.

9 अगा वेल्ले लोल्लिं आतां. अगा उद्दिदस मत्ता परिसि दर्मसास्त्रम कराहना गुल्लुकुनाल इच्चुर तेदिसि, “माकु ईना लोप्पो बतल तप्पु दिस्सेके हिल्ले. ईनतोनि बदाना आत्मा हिलाकोटे बदाना पेनदा दूता वळकिस मंदार,” इंचि इत्तुर.

10 इल्हा ओरा लोप्पो इच्चोर लोल्लिं आतां गदा, पौलुसुन हक्कानुर बारे इंचि सिपाइल्लुकुना अदिकारि वेरियतोर. पजा, “पौलुसुन ओरागटाल अलग कीसि किल्लाते पीसि ओम्ट,” इंचि सिपाइल्लुकुँक आदेस हीतोर.

11 अदे नर्का सामि पौलुसनगा वासि, “पौलुस निमे वेरियमा. बल्हा निमे येस्सलेमते नावा गवाइ हीतिन, अल्हेने रोम सहरते इंका नीकु नावा गवाइ हियनद मंता,” इंचि इत्तोर.

पौलुसुन हक्कना पिलान

12 इंकुदि रोजु हक्केरे पौलुसुन हक्कालय यहुदिल्लुकु पिलान कीसि, ओन हक्कवा मोमोट तिन्नोम-उन्नोम, इंचि ओट्टु तित्तुर.

13 इल्हा पिलान कीतोर् नल्पै मंदिकन्ना एक्को मत्तुर.

14 ओर पेद्दा पेर्माँलोर्कुनगा आनि यहुदि पेद्दाल्लुकुनगा होंचि, “मोमोट बच्चोरदाका पौलुसुन हक्कोम, अच्चोरदाका मोमोट बतले तिन्नोम-उन्नोम इंचि गट्टिंगा ओट्टु तित्तोम.

15 अदुनहाटीं इंदके मिमेट आनि यहुदिल्लुकुना पेद्दा पंचादितोर कलियसि सिपाइल्लुकुना अदिकारिनगा होंट. अगा होंचि, पौलुसुन, इंका बेस पूसकियानद मंता, ओन महगा लोहचीम, इंचि तेडियागोटसि वेहाट. ओर मिहगा एव्वका मुन्नेने ओन हक्कालय तयारते मंनंतोम,” इंचि इत्तुर.

16 गानि पौलुसुन हक्कालय कोरसंतुर इंचि पौलुसुना हेलटा मर्रि केंजतोर. अस्के ओर किल्लाते होंचि पौलुसुंक पूरा वेहतोर.

17 वेहतारित्ते पौलुस वरोन दरोगान केय्सि, “ई लेय्योन सिपाइल्लुकुना अदिकारिनगा ओम, ईर ओन्क बतलो वेहतोर अले,” इंचि इत्तोर.

18 अस्के दरोगाल सिपाइल्लुकुना अदिकारिनगा ओसि, “जेलने मनना पौलस इन मीहेके तायालय नाकुन विनंति कीतोर. ईर नीकु बतलो वेहंतोर अले,” इंचि इत्तोर.

19 पजा आ सिपाइल्लुकुना अदिकारि ओना कय पीसि, बोरे हिल्वगा ओसि, “वेहा, नावातोनि बतल वळकानद मंता?” इंचि पूसकीतोर.

20 अस्के लेय्योड, “यहुदिल्लुकु उंदि आसि, पौलसुन इंका बेस गट्टिगा पूसकियाना बहानाते नाडि यहुदिल्लुकुना पेद्दा पंचादिते केयागोटनाहाटी, नीकुन विनंति कीतुर.

21 गानि निमे ओरा पोल्लें कैजमा. बारिल्ले, नल्पैकन्ना एक्को लोकुल्लुकु पौलसुन हक्कवा मोमोट तिन्नोम-उन्नोम इंचि ओट्टु तित्तुर. निमे ‘ओन ओम्टु’ इंचि आदेस हियानद एदुर हळसंतुर,” इंचि वेहतोर.

22 वेहतस्के, आ सिपाइल्लुकुना अदिकारि, “निमे नाकु इव पोल्लें वेहतिन इंचि बोर्के वेहमा,” इंचि आ लेय्योन लोहचीतोर.

पौलसुन पिलिक्स राज्यपालनगा लोहमळ

23 अस्के आ सिपाइल्लुकुना अदिकारि ओना इव्वुर दरोगालोर्कुन केय्सि, “रोंडु नुहकु सिपाइल्लुकु, डेळ्बै मंदि गुराल्लुकुनपोर्रो उद्दिस होनानुर, रोंड नुहकु गोर्का पियानोर्कुन नर्काटां तोम्मिद एगानेके कैसरिया सहरते होनालय तयार ईरट.

24 पौलसुन ओयालय गुराल्लुकुन तयार ईरट. ओन बेस कापाळसि पिलिक्स राज्यपालनगा ओम्टु,” इंचि वेहतोर.

25 ओर उंदि इल्ला सिट्टि रासतोर.

26 “महाराज पिलिक्स राज्यपाल नीकु, कलादियुस लुसियाना हेंदाल जोहार.

27 यहुदिल्लुकु ई मनकन पीसि हक्कसेक मत्तुर, गानि ईर रोम रहिवासि इंचि नना केंजतस्के सिपाइल्लुकुन पीसि होंचि ओरागटाल ओन पिसागोटतन.

28 ओना तप्पु बतल आंदु, इदुन एरपाट क्रियालय ओन ओरा पेद्दा पंचादिते ओतन.

29 अगा ओर, ओनपोर्रो तप्पुक दोसतव अन्नि ओरा दर्मसाल्लुकुना हेंदाले मत्तां. अदुनहाटी ओन हक्कनसोटा हिलाकोटे ओन जेलने वाटानसोटा तप्पु ओनगा दिसा हिल्ले.

30 गानि ओन बोरो हक्कना मंता इंचि नाकु तेळियतस्के, ओन बिराना नीहेके लोहचीतन. ओनपोर्रो तप्पु दोस्सानोर बोर अय्ते मंतुर ओर नीवा मुन्ने वासि ओना तप्पु बतलो नीकु वेहगोम इंचि ओर्क आदेस हीतन,” इंचि सिट्टि रासतोर.

31 सिपाइल्लुकुंक बल्ला आदेस हीतोर, अल्हेने पौलसुन पीसि नर्कटद-नर्केन अंतिपत्रि सहरते ओतुर.

32 इंकुंदि रोजु गुराल्लुकुनपोर्रो होनानोर्कुन ओनतोनि होनालय होळसि, कळमातोर किल्लाते तिरियसि वातुर.

33 ओर कैसरिया सहरते एवतारिल्ले राज्यपालुंक सिट्टि हीसि पौलसुन ओना मुन्ने निलाहतुर.

34 राज्यपाल सिट्टि हद्दिसि, “निमे बद एरियातोन,” इंचि पौलसुन पूसकीतोर. ओर किलिकिया एरियातोर इंचि तेळियतारिल्ले,

35 “नीवा पोरो तप्पु दोस्सानुर इगे वातारिल्ले नीवा न्यायम कीतन,” इंचि ओर इत्तोर. पजा पौलसुन, हेरोद राजाना किल्लाते मनना जेलने ईर्सि, ओना पहारा कीम्टु, इंचि आदेस हीतोर.

24

पिलिक्स राज्यपालना मुन्ने पौलसुन निलाहमळ

1 हेय्युं रोजकु आतारिल्ले हनन्याल इनना पेद्दा पेर्मांल, इच्चुर यहुदि पेद्दाल्लुकुन, तिरतुल्लस पोरोलतोर वकिल्लुन पीकुंचि कैसरिया सहरते वासि, राज्यपालुना मुन्ने पौलसुना विरोदते केस कीतोर.

2 राज्यपाल पिलिक्स, पौलसुन केयतारित्ते, तिरतुल्लुस इनना वकिल पौलसुनपोर्रो तप्पु दोस्सि इल्हा इनालय दलगतोर, “राज्यपाल सायाब, नीवाहेंदाल मोमोट वेल्ले रोजकुनाल सांतिते मंतोम, नीवा तेल्विहेंदाल मावा देसेम सुदरांचेके मंता.

3 दीन मोमोट अन्नि जेगाने, अन्नि तीरकुने, पूरा मनसुने ओप्कुंतोम.

4 नना नीकु वेल्लेने पोर्ल्लें वेह्चि तिप्पल किय्योन, गानि मावां रोंड पोर्ल्लें केंजा इंचि विनंति कीतन.

5 ई मनकल जगडाल्क पुटिच्चानोर, दुनियाते मनना अंतोर यहुदिल्कुंक होंग वायागोटनोर आनि ईर नासरेत पार्तिता* लीडर आंदुर.

6 मावा गुळितुनगुडा हेडहासेक मत्तोर, गानि इन मोमोट दोर्का पीतोम. (मावा नियम मत्ताप ईना न्यायम कीतोम इंचि मोमोट हळतोम,

7 †गानि सिपाइल्कुना अदिकारि लुसियाल वासि जबरदस्तिते इन महागटाल इग्गिस ओतोर.

8 तप्पु दोस्सनुर मीवा मुन्ने वायना इंचि आदेस हीतोर.) मोमोट ईना पोर्रो बव तप्पुक अय्ते दोसतोम अव अन्नि निजमा-आबद्दमा निमेने पूस कीसि हळ्ळा, पूसकीते नीकु पूरा तेळियसि दांता,” इंचि इत्तोर.

9 अस्के यहुदिल्कगुडा ओनाहेके आसि, इवन्नि पोर्ल्लें निजमे, आंदुं इंचि इनालय दलगतुर.

10 पजा राज्यपाल, पौलसुन वळकालय सय्यो कीतस्के पौलस इल्हा वळकालय दलगुतोर. “निमे वेल्लेने वर्सानाल ई देसेमते न्यायम कीसेक मंतिन इंचि तेळियता. अदुनहाटी नीवा मुन्ने नना कुसिते नावा पोर्ल्लें वेहंतन.

11 नना येस्सलेमते पेनदुन मोळकालय होचि पन्नेंडु रोजकुंकनना एक्को आयाहिल्ले, इद पोर्ल्ले निजमे इंचि नीकु तेळियार.

12 नना गुळिते बोनतोने लोल्लि कीतद ईर हळ्ळा हिल्लुर, दर्मसास्त्रम कराहना लोहकुने आयि, सहरते आयि, लोकुल्कुनतोनि जगडम पुटिस्तदगुडा ईर हळ्ळा हिल्लुर.

13 इंदके नीवा मुन्ने, नावापोर्रो दोस्ता तप्पुकुन ईर निजम कीसि हुप्सा पर्स.

14 गानि उंदि पोर्ल्लेतुन नीवा मुन्ने नना ओप्कुंतन. नना पेनदा हर्दे ताकसि, मना पेद्दाल्कुना पेनदा सेवा कीतन. आ हर्दुन ईर तप्पुड पार्ति इंतुर. मूसाना नियमते, पेनदा कबुरतोर नियमते रासतव अन्नि पोर्ल्लेनपोर्रो नना विस्वासम कीतन.

15 नीतिते ताकानोर, नीतिते ताकवोर इक्कुरगुडा हातोर लोप्पोटाल मर्रा जीवाते तेदांतुर इंचि ईर आसे इरताप, ननागुडा पेनदापोर्रो आसे इंतन.

16 अदुनहाटी नना पेनदा मुन्ने आयि, लोकुल्कुना मुन्ने आयि, बस्केळ्ळक बेस मनसुने ताकालय हळंतन.”

17 नना वेल्लेने वर्सानाल येस्सलेमते हिलाका मत्तन, गानि इंदके मावा गरिब लोकुल्कुनाहाटी दान-दर्मम एविच्चि हियालय आनि गुळितगा पेनदुक मोक्कु हियालय वासि मत्तन.

18 नना गुळितगा सुद्दिदकरन कीकुंचि, दंडकाल्क महानेके नाकुन हळतुर. अस्के अगा वेल्ले मंदि मना हिल्लुर, लोल्लि मनाहिल्ले.

19 गानि आसियाताल वातुर इच्चुर यहुदिल्क अगा मत्तुर. नावदगिंगटा बतलन्ना तप्पु मंचि मत्ते, ओर नीवा मुन्ने वासि, नापोर्रो तप्पु दोस्सि मन्नेर.

20 हिलाकोटे, नना यहुदि पंचादिते निल्लिस मत्तास्के नावद बतल तप्पु दोर्कुतानो, अदन्ना इग्गे मत्तोर वेहिरकांटी.

21 “हातोर मर्रा जीवाते तेदांतुर,” इंचि ओरा मुन्ने नना जोरते इत्तन. इद उंदे पोर्ल्लेताहेंदाल नावा न्यायम मीवा मुन्ने जर्गसेक मंता, इंचि पौलस इत्तोर.

* 24:5 नासरेत पार्ति येसु नासरेत नाटेने बेसंतोर, अदुनहेंके येसुनपोर्रो विस्वासम कियवोर, विस्वासम कीतोर्कुन नासरेत पार्ति इंचि सिडांचुंदुर. विस्वासम कीतोर येसे किरिस्तु आंदुर इंचि नम्मंदुर. † 24:7 इद वचनम कोनि पांडु लिपिने हिल्ले.

22 पिलिक्सुंक, पेनदा हर्दा बारेमते बेस एरपाट मत्ता. अदुनहाटीं न्यायम कियानद आपसि, “सिपाइलुकुना अदिकारि लुसियाल वातारित्ते नीवा पोल्लेता पयसला कीतन,” इंचि इत्तोर.

23 पजा, “ईन दोहाकोटा जेलते इर्ना, ईना दंटातुर बतलन्ना हियालय वाते ओर्कुन आपमा,” इंचि दरोगांक आदेस हीतोर.

पिलिक्सुना मुन्ने पौलुस

24 कोन्नि रोजकु आतारित्ते पिलिक्स ओना यहुदि जातिता मुत्तो दुरसिल्लानतोनि अगा वातोर. पजा पिलिक्स पौलुसुन केया लोहतोर. अय्ते, येसु किरिस्तुनपोर्रो विस्वासम इर्ना बारेमते पौलुस ओर्कु वेहतोर.

25 गानि बस्के अय्ते, सत्तेमते बल्हा ताकाना, बल्हा ओप्केते मनना, पेन दुनियातोर न्यायम आकिरते बल्हा किय्यार इव पोल्लेना बारेमते पौलुस पिलिक्सुनतोनि चर्चा कीतोर, अस्के पिलिक्स वेरियसि, “इंदके निमे होन, वेला दोर्कतस्के नना नीकुन मर्ना केयंतन,” इंचि पौलुसुन इत्तोर.

26 पौलुस कोत्तां हियानुर बारे इंचि पिलिक्स आसे पळसि ओन ऊके-ऊके केय्सि ओनतोनि वळ्ळुंदुर.

27 रौडु वर्सा इल्हेने पेय्सि होत्तारित्ते पिलिक्सना जेगाते पुरकियुस पेसतुस पोरोलतोर राज्यपाल आतोर. पिलिक्स होनना वेलाते, यहुदिल्कुन कूस कियानाहाटीं पौलुसुन जेलतेन इत्तोर.

25

पौलुस कैसर राजानगा विनंति कीतोर

1 पेसतुस राज्यपाल कैसरिया सहरते वासि, मूड रोजकु आतारित्ते, अगटाल येस्सलेम सहरते होत्तोर.

2 अगा पेद्दा पेर्मालोर आनि यहुदि पेद्दाल्क वासि पेसतुस राज्यपालना मुन्ने पौलुसुनपोर्रो तप्पु दोस्तुर.

3 पौलुसुन नड्डुम हरदेन हळ्कना विचारम मत्ताहाटीं, “मावा पोरो दया कीसि ओन येस्सलेमते लोहचीम इंचि पेसतुस राज्यपालुन ओर विनंति कीतुर.”

4 अस्के पेसतुस इत्तोर, “पौलुस कैसरिया सहरता जेलते मंतोर, नना बिराना अगा दांतन.

5 अदुनहाटीं मिहागटाल यहुदि पेद्दाल्कुन नावातोनि लोहचीम्टु. आ मनकानद बतलन्ना तप्पु मत्ते, ओना तप्पुन मिमेट हप्सा परांतरि,” इंचि इत्तोर.

6 पेसतुस राज्यपाल एनमिदि पदि रोजकु ओरतोनि मंचि, कैसरिया सहरते वापस होत्तोर. इंकुंदि रोजु कोरटते न्यायम कियाना जेगातगा उद्दिदस पौलुसुन तायालय आदेस हीतोर.

7 पौलुस वातारित्ते, येस्सलेमताल वाता यहुदिल्कु ओना सुट्टु निततुर. ओनपोर्रो पेद्दा-पेद्दा तप्पुकु दोस्तुर, गानि उंदिका तप्पु निजम कीसि वेहा पराहिल्लुर.

8 अस्के, “नना यहुदिल्कुना दर्मसास्त्रमता नियमकुना अड्डम बतले कबळ किया हिल्लेन, गुळितगा बतले तप्पु कबळ किया हिल्लेन, कैसर राजांक अड्डम बतले वळका हिल्लेन,” इंचि पौलुस इत्तोर.

9 पौलुस अल्हा इत्तस्के, यहुदिल्कुन कूस कियालय, “इव पोल्लेना न्यायम येस्सलेमते नावा मुन्ने आयागोम इंचि नीवा मनसु मंताना,” इंचि पेसतुस पौलुसुन पूसकीतोर.

10 अस्के पौलुस इल्हा जवाब हीतोर, “इंदके नना कैसरना कोरटतगा नित्तिसि मंतन, इग्गेने नावा न्यायम आयापीता. यहुदिल्कुना विरोदमते नना बतल तप्पु किया हिल्लेन इंचि नीकुगुडा बेस एरपाट मंता.

11 ओक्कला नना तप्पु कीतोन आसि, नावा तप्पु हामुर सिक्सालायक मनानय्ते, नना हायालय तयार मंतन. गानि बव पोल्लेन पोरोटाल अय्ते लोकुल्क नापोर्रो तप्पु दोस्सेक मंतुरो, अव पोल्लें

ओक्कला आबदुदम पेयसानयते, नाकुन बोरे ओरा कयदे हिया पर्स. नावा न्यायम इग्गे आयाकोटे, कैसर राजाना मुन्ने आयागोम इंचि कोरसंतन.”

12 जवाबुने पेसतुस ओना पंचादिते उदता पेदुदालुकुनतोनि वळ्ळिकसि, “निमे कैसर राजानगा न्यायमताहाटीं विनंति कीतिन अयते ओनागेन दाकिन,” इंचि इत्तोर.

पौलसुन अग्रिपा राजाना मुन्ने केयमळ

13 कोन्नि रोजकु आतारित्ते, अग्रिपा राजाल* आनि ओना हेलड बर्निका, पेसतुस राज्यपालुंक कलियालय कैसरिया सहरते वातुर.

14 ओर इव्वुर वेल्लेने रोजकु अगा मत्तुर. मत्तस्के, पेसतुस राज्यपाल पौलसुना न्यायमता बारेमते अग्रिपा राजांक इल्हा वेहतोर. मुन्नेटा पिलिक्स राज्यपाल, वरोर मनकन इग्गेने जेलने इरसि होत्तोर.

15 नना येस्सलेमते मत्तास्के, पेर्मालोर्क आनि यहुदि पेदुदालुक ओनपोर्रो तप्पु दोस्सि, ओन्क सिक्साता आदेस हियालय नाकुन इत्तुर.

16 अस्के नना ओर्कुन इल्हा इत्तन, “बदवेरदाका अयते तप्पु कीता मनकल, तप्पु दोस्तोरा मुन्ने नित्तिसि, ओना तप्पुना बारेमते वळ्ळकोरो, अदवेरदाका ओन्क सिक्सा हियना रोमि लोकलुकुना रिवाज हिल्ले,” इत्तन.

17 अल्हा इत्तस्के, ओर लोकुलुक नावातोनि इग्गे वातुर. नना आल्सेम कियाका, इंकुंदि रोजु न्यायम कियाना जेगातगा उद्दिदेस, आ मनकन तायालय आदेस हीतन.

18 ओनपोर्रो तप्पु दोस्सानुर नित्तिसि ओना तप्पुक वेहतुर, गानि नना इनकुत्ताप बदे तप्पु ओनपोर्रो वेहा हिल्लुर.

19 सिराप ओर ओरा दर्मता बारेमते आनि येसु पोरोलता वरोर हासोत्ता मनकना बारेमते ओरा लोल्लि मत्ता. गानि पौलस मात्रम हासोत्ता येसु जीवाते मंतोर इंचि इंतोर.

20 इसोंटा पोल्लेन बल्हा न्यायम कीकन इंचि नाकु तेळियाकोदु. अदुनहाटीं नना, “इव पोल्लेना पयसला कियालय येस्सलेम दांतिना?” इंचि ओन पूसकीतन.

21 अस्के पौलस इत्तोर, “नावा न्यायम कैसर राजानगा आयागोम, अदवेरदाका इग्गेने जेलते मंनंतन,” इंचि विनंति कीतोर. अदुनहाटीं नना ओन कैसरनगा लोहनदाका ओर इग्गेने मन्निर, इंचि आदेस हीतन.

22 अस्के अग्रिपा राजाल, “आ मनकल इनना पोल्लें नाकु केंजना मनसु मंता,” इंचि पेसतुसुनतोनि इत्तोर. “अल्हा अयते, ओना पोल्लें नाडि केंजकिन,” इंचि पेसतुस इत्तोर.

23 इंकुंदि रोजु अग्रिपा राजाल आनि बर्निका बेस सोक आसि वातुर. सिपाइलुकुना अदिकारिलुक, सहरता पेदुदा मनकालोर्कुनतोनि कूळसि पंचादि कियाना जेगाते ओर होत्तुर. अस्के, पौलसुन पीसि वट्ट, इंचि पेसतुस आदेस हीतारित्ते, पौलसुन तत्तुर.

24 अस्के पेसतुस राज्यपाल इत्तोर, “अग्रिपा राजाल आनि इग्गे जमा आता लोकुरिटा! ई मनकन मिमेट हूळसंतिर, येस्सलेमतोर आनि इग्गेटुर वेल्लेटोरगुडा यहुदिलुक नहगा वासि, ईन जीवाते इरमळ बेस आयो, इंचि वरगेयसेक विनंति कीतुर.

25 गानि ईर हामुटा सिक्सालायक बतले तप्पु कियवाप नाकु दिसता. ओर कुद कैसर राजाना मुन्ने न्यायम आयागोम इंचि विनंति कीतोर, अदुनहाटीं ईन कैसर राजानहेके रोमते लोहना विचारम कीसेक मंतन.

26 गानि ईना बारेमते कैसर राजांक बतल रासाना नाकु तेळिया हिल्ले. अदुनहाटीं ईना पोल्लें केंजता पजा, बदन्ना पोल्ले नाकु रासालय दोर्कार बारे इंचि मीवा मुन्ने ईन तत्तन, कास कीसि अग्रिपा राजाना मुन्ने तत्तन.

* 25:13 अग्रिपा राजाल प्रेरितुलुकुना कबाहक 12:1 वचनमते मनना हेरोद राजाना मरि, ई अग्रिपाल आंदुर.

27 जेलते मत्ता मनकना बारेमते ओना तप्पु बतले वेहवा, उंदे मल्का ओन कैसर राजानगा लोहमळ नाकु बेस दिस्सो,” इंचि इत्तोर.

26

पौलुस अग्रिपा राजाना मुन्ने गवाइ वेहंतोर

1 “इंदके नीवा पोल्लें वेहा परांतिन,” इंचि अग्रिपा राजाल पौलुसुन इत्तोर. अस्के पौलुस, नना वळकंतन, इंचि वेहालय ओना कय तेहचि वळकुमळ सुस्व कीतोर.

2 अग्रिपा राजा! यहुदिल्क नावापोरों बव पोल्लेना बारेमते अथे तप्पु दोस्तुरो, अव अन्नि पोल्लेन नीवा मुन्ने वेहालय नाकु मोका दोर्कता इंचि नना कूस आसेक मंतन.

3 कास कीसि, यहुदिरा रीति-रिवाजकु, ओरा विचारालुकुना बारेमते नीकु बेस एरपाट मंता. अदुनहाटीं दया कीसि नावा नना वळकाना पोल्लेन बेस केंजा इंचि विनंति कीतन.

4 नना सिन्ना मत्तस्केटाल नावा लोकुकुनतोनि येस्सलेमते मत्तन. अदुनहाटीं नावा ताकमळ, नावा पिस्वर बल्हा मत्ता अंटोर यहुदिल्कुंक एरपाटे मंता.

5 (यहुदिल्क मोदोदाले नाकुन एरपाट कीतुर. अदुनहाटीं नावा बारेमते गवाइ वेहाना ओरा मनसु मत्ते, मावा दर्मता रीति-रिवाजकुन अंटोर्कन्ना एक्को नोमानोन ननाने इंचि ओर वेहा परांतुर) मावा दर्मतां रीति-रिवाजकुन, परिसिल्कु अंटोर्कन्ना एक्को नोमुंदुर, अवन नना वरोन परिसिन आंदुन. इदुन यहुदिल्कु बेस एरपाट कीतुर. ओर इनकुत्ते इद पोल्लेता गवाइगुडा हिया परांतुर.

6 पेन मावा एनकटा पेद्दालकुंक पोल्ले हीसि मत्ता, अदे पोल्ले निजम इंचि नना आसे पडतन. अदुनहाटींगे, इंदके नावा न्यायम आयना मंता.

7 अदे पोल्ले पूरा आंता इत्ता आसेते, मावा पन्नेंडु गोत्रालुकुना इझाएल लोकुल्क पूरा मनसुने नर्का-पिय्यल उदेतीर पेनदा सेवा कीसंतुर. इदे बरोसा इरताहाटीं राजा, यहुदिल्क नावापोरों दोसेम दोस्तुर.

8 अयना, पेन हातोर्कुन मर्रा तेहंता इत्ता पोल्लेपोरों मीवा लोप्पोटाल बोनके विस्वासम बारि हिल्ले?

9 मुन्ने ननागुडा, नासरेत नाटेना येसुना पोगोलता विरोदमते वेल्लेने कबाहक किय्याना इंचि विचारम कीसि मत्तन.

10 येस्सलेमते नना अल्हा कीतनगुडा. पेर्मांलोरकुनाहेंदाल अदिकारम दोर्किचकुंचि, वेल्लेटुर पेनदा लोकुकुन नना जेलने वाटतन. पेनदा लोकुकुन हक्कानेंके, हक्कट इंचि नना ओप्कुनुंदुन.

11 हरेक दर्मसास्त्रम कराहना लोते, ओर येसुना अपमानम कियानादाका, ओर्कुन नना तिप्पल्क किया वेहुंदुन. ओरापोरों नाकु इच्चोर होंग वायुंदु गदा, ओर्कुन तकलिप कियालय नना पलाते सहरकुनेगुडा होनुंदुन.

पौलुस ओर हळता दर्सनम बारेमते वेहांतोर

12 अल्हेने उंदि मल्का नना पेर्मांलोरकुनाहेंदाल अदिकारम एक्कुंचि दमिस्क सहर होंचेके मत्तन.

13 होननेके पिय्यल आता नना हर्देने मत्तन, अस्के मब्बुनाल उंदि पोळ्दुंकन्ना एक्को वेलगु नावा आनि नातोनि मत्तोर सुट्टु मेर्सता.

14 मेर्सतस्के मोमोट अंटोरम हिळु अरतोम. अस्के नाकु उंदि अल्किर केंजावाता, अद इब्बानि बासाते नाकुन इल्हा इत्ता, “साऊल, ए साऊल, नाकुन निमे बारि तकलिप कीसंतिन? मुल्कि पोरों कादे तंते नीके कस्टम,” इंचि केंजावाता.

15 अस्के, “सामि निमे बोन आंदिन?” इंचि नना पूसकीतन. सामि इत्तोर, “निमे बा येसुनय्ते तकलिप कीसंतिन ओने नना आंदुन.

16 गानि इंदके निमे तेदसि, कालुकुनपोरों नित्ता. नावा बारेमते निमे हळता पोल्लेन अल्हेन नना नीकु हृप्सना पोल्लेन लोकुकुकुंक गवाइ वेहालय, नावा सेवक इंचि नीकुन निलाहंतन.

17 नना नीकुन नीवा यहुदिल्कुनगा आनि यहुदि आयवोरगा लोहांतन, अल्हेन ओरागटाल नीकु कापाळंतन.

18 ओर्कुन हीकटताल वेल्गुनहेके, देय्यमता अदिकारमताल पेनदाहेके तिरियना हर्रि हृप्सालय नीकुन लोहसेक मंतन. ओर अल्हा तिरियते, ओरा पापाल्क मापि आंतां, अल्हेने नापोर्रो बोर अथे विस्वासम कीसि पवित्र आतुरो, ओरतोनि ओर्कु वारसाहक्क दोर्कार,” इंचि येसु नाकु वेहतोर.

19 अदुनहाटी अग्रिपा राजा! पोर्रोटाल नाक हृपिस्ता दर्सनम ह्ळसि, अद आदेस परकारम ताकतन.

20 आयंका, मुन्ने दमिस्क सहरतोरुक्क, पजा येस्सलेमते मनानोर्कुक्क, यहुदियाता पूरा एरियाते मनानोर्कुक्क आनि वैरे जातितोर्कुक्कगुडा मनसु मार्सकुंचि पेनदागा वट्ट. वासि, मनसु मार्सकुत्तोरालायकता बेसता कबाहक कीसि हृप्सट, इंचि वेहतन.

21 इदे कारनमहेंदाल यहुदिल्क नाकुन गुळिते पीसि हळ्कालय ह्ळसेक मत्तुर.

22 गानि इदवेरदाका पेन नाकुन सहायम कीता. अदुनहाटी नना इग्गे नित्तिशि सिन्नाल्क, पेद्दाल्क अंतोर मुन्ने गवाइ हीसेक मंतन. बव पोल्लें अथे आयानव मंतां इंचि पेनदा कबुरतोर आनि मूसाल मुन्नेन वेहतुर, अव पोल्लें तप्पा नना वैरे बतले वेहोन.

23 अव पोल्लें बव इत्ते, किरिस्तुंक्क तकलिष्कु बोगांचा पीता आनि हातोरालोपोटाल ओरे मोदाला मर्ग जीवाते तेदसि, यहुदिल्कुंक, यहुदि आयवोर्कुक्क वेल्गुना बारेमता पोल्लें वेहंतोर, इंचि पौलुस इत्तोर.

पौलुस अग्रिपा राजाना मनसुन तिराहलय ह्ळतोर

24 इल्हा ओर वेहासेक मननेके पेसतुस वरगेयसि, “पौलुस निमे पागल आतिन. एक्को करियतदे नीकुन पागल कीसंता,” इंचि इत्तोर.

25 अस्के पौलुस इल्हा इत्तोर, “पेसतुस महाराज, नना पागल आया हिल्लेन, निजमतुन नना बेस बुद्दिदे वेहासेक मंतन.

26 ई पोल्लें मूलाते मक्किसि कीतव आयों. इवन्नि पोल्लें अग्रिपा राजांक बेस तेळियसे मंतां, इंचि नाकु विस्वासम मंता. अदुनहाटी वेरियाकोटा ओना मुन्ने वळ्कसेक मंतन.

27 अग्रिपा राजा! पेनदा कबुरतोर रासतवुन विस्वासम कीतिना, कियिना? निमे विस्वासम कीतिन नाकु एरपाटे,” इत्तोर.

28 अस्के, “बिरानेन नाकुन किरिस्तुनोन कियालय ह्ळसंतिना?” इंचि अग्रिपाल पौलुसुन इत्तोर.

29 अस्के “बिरानेन आयि, आल्सेमते आयि, सिराप निमेने आयो, इय्याला इग्गे कैजानोर अंतोर, इव बेडी होळसि, कळमता अन्नि पोल्लेने नावालेसी आयना इंचि पेनदुक्क पारतना कीसेक मंतन,” इंचि पौलुस इत्तोर.

30 अल्हा इत्तस्के, अग्रिपा राजाल, ओना हेलड बर्निका, राज्यपाल आनि ओरतोनि उद्दिदिस मत्तुर अंतोर तेदतुर.

31 अगटाल पलाते पेय्सि ओर-ओरे इल्हा वळ्कालय दल्गुतुर, “हामुर सिक्सालायक हिलाकोंटे जेल सिक्सालायक ईर बतले तप्पु किया हिल्लोर,” इंचि इत्तुर.

32 पजा, “कैसर राजाना मुन्ने नावा न्यायम आयगोम इंचि, ईर इनाकोंटा मंचि मत्ते, ईन होळसालय कुदुरवळ,” इंचि अग्रिपा राजल पेसतुसुन इत्तोर.

27

पौलुसुन इटलि एरियाता रोम सहरते लोहमळ

1 आयंका माकुन डोंगाते उद्दिदिस, इटलि एरियाते लोहाना निरनायम कीतुर. कीसि, पौलुसुनतोनि इच्चुर जेलने मत्तुर्कुन, अगस्तुस* दलमता युलियुस पोरोलता दरोगाना कथे अप्पजेपतुर.

* 27:1 अगस्तुस ईर वरोर पेद्दा राजाल मत्तोर, ओना पोरोलतेन दलमता पोरोल वाता.

2 अद्रमुतियम सहरता डोंगाते मोमोट उदतोम, अद्र डोंगा आसिया एरियाता ओड्डु पीसि मत्ता नाहकुनाल पेयसता. मेसिडोनिया एरियाता तेसलोनि सहरतोर अरिसतरकुस[☆]गुडा मावातोनि मत्तोर.

3 इंकुंदि रोजु मोमोट सिदोन सहरतगा एवतोम. अगा एवतस्के युलियुस दरोगानकु पौलुसुनपोर्रो दया वाता. अदुनहाटी पौलुसुना दंटागाहक ओन अवरिचगोम इंचि, “निमे होंचि नीवा दंटागाहकुंक कलियसि वा,” इंचि दरोगाल पौलुसुन इत्तोर.

4 अगटाल मोमोट पेयसनहेके वळि माकु एदुर मत्ताहाटी साइप्रस दीबेता वळि वायवा बाजुनाल पेयसतोम.

5 मर्रा मोमोट किलिकिया आनि पंपुलिया एरिया दग्गेटा समुद्रम दाटसि, लुकिया एरियाता मूरा इनना सहरतगा रेयतोम.

6 अगा सिकंदरिया सहरताल इटलि एरियाक होनालय डोंगा तयार मत्ता. माकुन ओयना दरोगाल अद डोंगाते उपिस्तोर.

7 वळि माक एदुर मत्ताहाटी, मेल्लगा-मेल्लगा बच्चुंगो रोजकुनदाका वेल्ले कस्टमते कनिदुस सहरकु दग्गेरा एवतोम. एदुर वळि माकुन मुन्ने होना हियुवाहाटी, मोमोट क्रेति दीबेता ओड्डु साटने, सलमोने इनना जेगा पक्का पीसि दाटतोम.

8 अदुन दाटसि, समुद्रमता ओड्डुनाल वेल्ले तकलिपने डोंगातुन मुन्नेळ्ळक जर्पुसेके, डोंगा नित्तना बेसता जेगा, इनना जेगातगा एवतोम. अगटाल लसया सहर दग्गेरिने मत्ता.

9 पय्नेमते वेल्ले रोजकु आसि ओक्कापोद्दुना रोजगुडां पेय्सि होत्ता. वातावरनम कराब मत्ताहाटी डोंगातुन मुन्ने ओयालयगुडा वैरि मत्ता. अदुनहाटी,

10 “दादालोरिता! मनम इगेटाल पेयसते वेल्ले तकलिप आंता इंचि नाकु अनपिच्चेक मंता. डोंगा आनि अबुने मत्ता सामानयते मुळगारे गानि मना जीवां इंका होना परांतां,” इंचि पौलुस डोंगाते मत्तोर्कुन इत्तोर.

11 गानि पौलुसुना पोल्लेतुन दरोगाल केंजाका, डोंगा ताकिचनोर आनि डोंगा मालकुना पोल्लेतुन एक्को विस्वासम कीतोर.

12 अद जेगा पीनि कालमते (इग्गमते) मनालय बेस मनाहिल्ले, अदुनहेंके वेल्लेटुर लोकुल्क, “बच्चोन बिराना आया परते अच्चोन बिराना क्रेति दीबेता पिनिक्स सहरतगा होंचि आगते बेस मंता,” इंचि इत्तुर. बारित्ते पिनिक्स सहरतगा डोंगा आगना उंदि जेगा इल्हा मंता: दक्खिन-पस्चिम आनि उत्तर-पस्चिमता हेंदाल होळिया वांता. पीनि कालमते अद जेगाते वळि दल्गो.

समुद्रमते तुपान तेदमळ

13 पजा दक्खिन बाजुनाल वळि मेल्लगा-मेल्लगा वासेके मत्तयते ओर इंदके मनम पिनिक्स सहरते एव्वा परांतोम इंचि इनकुत्तुर. अस्के ओर अगटाल लंगर[‡] तेहकुंचि क्रेति दीबेता ओड्डु साटने डोंगातुन होना हीतुर.

14 गानि गळसेम मत्तारित्ते दीबेता हेंदाल उंदि पेद्दा वळि दुमारम तेदता. दानु उत्तर-पूर्वी तुपान इत्तुर.

15 मोमोट मत्ता डोंगा तुपान लोपपो दोर्कता. आ तुपानता वळि एदुर मत्ताहाटी डोंगा मुन्नेळ्ळक होना पराहिल्ले. अस्के मोमोट वळि दोब्बुतेके डोंगा होन्निकांटी इंचि दान अल्हेने होळसीतोम.

16 अल्हा मोमोट कौदा इनना सिन्ना दीबे साटने होननेके, डोंगाता पज्जो दोहचि इग्गिसि ओयना पडवन[§] वेल्लेन तकलिपने डोंगापोर्रो एक्किस्तोम.

☆ 27:2 कुलुसि 4:10; मिलेमोन 1:24 † 27:9 ओक्कापोद्दुना रोज इद रोजुने पेद्दा पेर्माळ एडादिक उंदि मल्का गुळिते होंचि ओनाहाटी आनि अंतोरा पापालकुंक मापि दोर्कनाहाटी मोक्कु हियुदुर. अद कालमते एते पय्नेमताहाटी वातावरनम कराब मंता.

‡ 27:13 लंगर डोंगा आगता बेके जर्गाकोटा मनालय आनि पय्नेम क्रियनेके मेल्लगा-मेल्लगा ताकालय कच्चितद उंदि कोंका मंता दाने लंगर इत्तुर. § 27:16 इग्गिसि ओयना पडवन वेल्लेटुर उदसि होनानद पेद्दा डोंगा मत्ता, डोंगा मुळगानयते पलाते पेयसालय पडवा मनुंद, अद पडवा डोंगाता पज्जो दोहचि मनुंद.

17 पडवां पोरो एक्किसतारित्ते, डोंगाते कबळ कियानोर बच्चुंगो उपायाल्क कीसि डोंगातुन नोंडेने, सुट्टु इगिस दोहतुर. सुरतिस इनना उस्के जेगाते डोंगा दिगाबडार इंचि आ वेंरेकु डोंगाता परदातुन रेह्चि, डोंगातुन वळिते होळसीतुर.

18 अस्के इंकुदि रोजु वळि दुमारमते पक्का तकलिप आताहेंके ओर माल पोहचियालय दल्युतुर.

19 मूडो रोजुने डोंगाता कबळक ओज्जना सामानगुडा ओरा कयकुनेन पोहचीतुर.

20 पजा वेल्लेने रोजकु माकु पोळ्दु, सुक्कां दिसा हिल्लें. तुपानते पक्का वळि वायुंदु, मोमोट पिस्सोम इंचि आसे होळसतोम.

21 वेल्ले रोजकुनाल बोरे बतल तिना हिल्लुर. अस्के पौलुस ओरा नड्डुम नित्तिसि इल्हा इत्तोर. दादालोरिता! नावा पोल्लें कैजसि क्रेति दीबेताल पेय्सका मंचि मत्ते, मनाकु ई तिप्पल वायाकोनवड, नुकसानगुडा आयाकोनवड.

22 अल्हा आयिनागानि मीकु विनंति कीतन, मिमेट दैरनेम इर्राट. मीवा लोप्पोटाल बोनदे जीवा होन्नो गानि डोंगाता मात्रम नुकसान आंता.

23-24 बारित्ते, बद अय्ते नावा पेन, नना अदे पेनदा सेवा कीतन दाना दूता निन्ने नर्का वासि, “पौलुस निमे वेरियमा, नीकु कैसर राजाना मुन्ने तप्पकोटा नित्तना मंता, हळा! नीतोनि डोंगाते मत्तुर अंतोर्कुनगुडा पेन पिसागोटंता,” इंचि इत्ता.

25 अदुनहाटी दादालोरिता! दैरनेम इर्राट. पेन नाकु बल्हा वेहता अल्हेने आयार, इंचि नाकु विस्वासम मंता.

26 गानि बल्हा अयना मनम बदन्ना दीबेतगा उस्केते होंचि हिरकंतोम, इंचि इत्तोर.

27 पडनालं रोजकु आयिना, मोमोट अद्रिया समुद्रमता एते हीके-हेके वळिक तिरियसेक मत्तोम. तिरियसेक मननेके नळजाम नर्काटा वेलाकु मनम बदन्ना ओड्डुक एवतोम बारे इत्ताप डोंगा ताकसानोर्कुक अनपिस्ता.

28 ओर समुद्रमता लोतु कहतुर अय्ते अगा नूटा इरवै पूटकु मत्ता. इंका इच्चुर लक्कु होत्ता पजा मरी कहतुर अय्ते अस्के टोंबै पूटकु मत्ता.

29 अस्के, बंडाना लोप्पो डोंगा हिरकार बारे इंचि वेरियसि, ओर डोंगाता पज्जोटा बाजुंक नालु लंगर्कु वाटसि बस्के पंगांता इंचि हळसेक मत्तुर.

30 डोंगा ताकसानोर्कु अगटाल वित्ताना मत्ताहाटी, “डोंगाता मुन्नेटा बाजुंक लंगर्कु वाटंतोम,” इंचि बोकिच्चि पडवां रेहतुर.

31 अस्के पौलुस, “इरगिता डोंगाते मनाकोटे मिमेट इंका पीस्सि,” इंचि सिपाइल्कुना अदिकारिन आनि सिपाइल्कुन इत्तोर.

32 अस्के सिपाइल्क, पडवां दोहता नोंडेन नेमाहचि पडवन एते अरहतुर.

33 पंगायना वेलाते पौलुस अंतोर्कुन गाटो तिनाहाटी विनंति कीसि इल्हा इत्तोर, “तुपान मगंता इंचि मिमेट एदुर हळ-हळसि, इय्यळक पडनालुं रोजकु आसंता. उपासम मंतिर, बतले तिना हिल्लिर.

34 अदुनहाटी मिमेट गाटो तिट्टु इंचि विनंति कीसेक मंतन. तिल्लेने मिमेट जीवाते मनांतिर. मीवा लोप्पोटाल वरोनदगुडा तल्लाता उंदि केल्ददगुडा नुकसान आयो,” इंचि इत्तोर.

35 अल्हा वेह्चि, अंतोरा मुन्ने ओर हारि पीतोर. पेनदुक दन्यवाद कीसि, हारितुन तुकडां कीसि तिनालय दल्युतोर.

36 ओन हळसि, अंतोर्क हिम्मत वाता, ओरगुडा तिनालय दल्युतुर.

37 डोंगाते मोमोट अंतोरम रोंडु नुहकुना डेब्बै हास् (276) मंदि मत्तोम.

38 ओर पीरनिंदा गाटो तित्तारित्ते, डोंगाते मत्तव गोहकुन समुद्रमते पोहचि डोंगातुन अल्कगा कीतुर.

39 पंगातारित्ते ओर्कु समुद्रमता ओड्डु दिसता, गानि अद बद देसेम इंचि एरपाट किया हिल्लुर. कुदुरते डोंगातुन इदे ओड्डुंक दल्लिाच्चि इरकोम इंचि विचारम कीतुर.

40 ओर लंगर्कुना नोडें नेमाहचि, अवनुन समुद्रमते होळसि, अस्केने पतवारकुंक* दोहाचि मत्ता नोडेंगुडा ओदोल कीतुर. ओदोल कीसि डोंगातुन वळि मुन्नेळ्ळक ओयि इंचि परदां एक्किचि डोंगातुन ओड्डुनहेके ओयालय दल्लुगुतुर.

41 गानि बगा अयते रौड समुद्राल्क कलियंतां, असोटा जेगातगा डोंगा होत्ता. अगा डोंगाता मुन्नेटा बाजु उस्केकु दल्लिसि, मुन्नेळ्ळक जर्गाकोटा दिगाबळता. पज्जोटा बाजु बारे जोरते वायाना तडां दल्लिसि डोंगा पय्यालय आता.

42 अस्के कैदिल्लुकु बोरे ईतारिं वित्ता मन्नि इंचि सिपाइल्क ओर्कुन हळ्ळकना विचारम कीतुर.

43 गानि दरोगांक पौलसुन पीसागोटनद मत्ता, अदुनहाटीं ओरा पिलानतुन आपिसि ओर्कु इल्हा आदेस हीतो, “बोर्के अयते ईता वांता, ओर मुन्नेने डेयसि ओड्डुंक पेयसट.

44 कळमातोरे बारे बल्लां आनि डोंगाता उरंगाता तुकडनपोर्री उद्दिदस पेयसट,” इंचि इत्तोर. इल्हा बोर्के बतल आयाकोटा अंतोर ओड्डुंक पेयसतुर.

28

माल्टा दीबिते पौलस

1 इल्हा मोमोट ओड्डुंक पेयसतारित्ते, अद माल्टा इनना दीबे इंचि माकु तेळियता.

2 आ दीबिते मनना लोकुल्क मावा पोर्री वेल्ले दया हूपिस्तुर. पिर्, इरगा पीनि मत्ताहेंके, तडमि माससि माकुन बेस दग्गेरा केयकुत्तुर.

3 पौलस जमा कीता कट्टेना हेरकितुन तडमिते वाटसेके मत्तोर. अस्के उंदि नय तरासु तळमि सेकाकु हेरकिताल पेय्सि ओना कय्दुक हुटकुत्ता.

4 तरासु कय्दुक वेलाड अरसि मत्तद हळसि दीबिता लोकुल्क वरोंक-वरोर इल्हा इत्तुर, “निजमे, ईर तप्पाकोटा बोनो गानि हळ्ळतोर. ईर समुद्रमताल अयते पिस्सि पेयसतोर गानि न्यायम मात्रम इन पिस्सा हियानाल हिल्ले,” इंचि इत्तुर.

5 गानि पौलस आ तरासुन तळमितेन दुल्पिसि वाटतोर. ओन्कुगुडा बतल आयाहिल्ले.

6 ओना मेंदुल तोयार हिलाकोटे ओर उंदे मल्का हिळ्ळ अरसि हायानुर इंचि लोकुल्क हळसेक मत्तुर. वेल्लेनजेम आयिनागानि ओन्क बतले आयाहिल्ले. अस्के ओरा मनसु मार्सकुंचि, “ईर अयते बदो पेन आंदुर,” इंचि इत्तुर.

7 आ दीबिता पेद्दा अदिकारि पबलियुस इनानोना बूमिं दग्गेरेने मत्तां. ओर माकुन केय्सि ओसि मूड रोजकुनदाका हेडमितोर्कुन हळ्ळकुत्ताप बेस हळ्ळकुत्तोर.

8 पबलियुसुना बानकु एडकि वासेके मत्ता. अल्हैने नेत्तुर बयलि दोस्सि, कट्टलते मीडसि मत्तोर. पौलस ओनगा लोप्पो होंचि पारतना कीसि, ओनपोर्री कय इरसि बेस कीतोर.

9 अल्हा आतद हळ्ळसि आ दीबिते बिमार अरिं मत्ता कळमतोरगुडा अगा वासि बेस आतुर.

10 ओर माकुन वेल्ले कदर कीतुर. मोमोट अगटाल पेयसनेके माकु बतल-बतल गावाले मत्ता अवन्नि डोंगाते तच्चि इत्तुर.

पौलस माल्टा दीबिताल रोम सहरताहेके होनमळ

11 मूड नेल्क आतारित्ते सिक्दरिया सहरताल वाता डोंगाते मोमोट पेयसतोम. आ डोंगा पीनि कालम पेयसनदाका माल्टा दीबितगा आगसि मत्ता. डोंगाता मुन्नेटा बाजुंक एमडालुकुना पेनकुना बोम्मा रेहचि मत्ता.

* 27:40 पतवार डोंगा ताकसेक मनानेके दान हीके-हेके तिराहनाहाटीं स्टेरिगतुन मेलाहते पतवार मेसलिसि डोंगा बरोबर दांता. पतवार डोंगाता हिळ्ळ एते मनंता.

12 मोमोट सरकुस सहरते एक्सि, अगा मूड रोजकु मत्तोम.

13 अगटाल मोमोट तिरियसि रेगियुम सहरते एवतोम. इंकुंदि रोजु दक्सिन बाजुनाल वळि तेदता. अस्के मर्रा उंदि रोजु अगटाल पेक्सि पुतियुलि सहरते वातोम.

14 अगा माकु इच्चुर विस्वासुलुक कलियतुर. ओर माकुन ओरतोनि एडुं रोजकु मंटु इंचि इत्तुर. इल्हा मोमोट रोम सहरते एवतोम.

15 बस्के अय्ते रोम सहरता विस्वासुलुकुंक मोमोट वासेक इंचि तेळियता, अस्के ओर माकु कलियालय अप्पियुस हाटुमदाका वातुर. इंका आगाना मूड जेगा इनना नारदाका वातुर. ओर्कुन हळसि, पौलुस पेनदुक दन्यवाद कीतोर, ओना दैरनेम बेरस्ता.

16 मोमोट रोम एवतारित्ते वरोर सिपाइना पहाराते पौलुसुंक मनालय अलग उंदि लोन दोर्कता.

पौलुस रोम सहरता यहुदिलुकुंक कलियंतोर

17 मूड रोजकु आता पजा पौलुस अगाटा यहुदि पेदुदालुकुन केयतोर. ओर उंदगा जमा आतारित्ते पौलुस ओरतोनि इल्हा वळकालय दलगुतोर, “दादालोरिता, मना लोकुलुकुन आयि मना एनकटा पेदुदालुकुना रीति-रिवाजकुन आयि नना बतले किया हिल्लेन गानि नाकुन येस्सलेमते रोम लोकुलुकुना कय्दे यहुदिलुकु पीसि हीतुर.

18 रोमि अदिकारिलुक नावा चौकसि कीतारित्ते नाहेके हामुर सिक्ससतसोंटा बतले तप्पु मनाहिल्ले. अदुनहाटी ओर नाकुन होळसीतोम इत्तुर.

19 गानि, ‘ईन होळसियामान्नि’ इंचि यहुदिलुकु इत्तुर. अदुनहाटी, ‘कैसर राजानगा नावा न्यायम आयागोम,’ इंचि नना विनंति कीतन, अचोने. इगे नना नावा लोकुलुकुनपोरों दोसेम दोसालय वाया हिल्लेन.

20 ई पोल्लेन मीतोनि कलियसि वळकालय मीकुन केयतन. वरोर वायाना मंतोर इत्ता आसेते, इस्त्राएल लोकुलुकु बोनद एदुर हळसेक मत्तुर, ओर वातोर इंचि नना विस्वासम कीताहाटीगे नाक बेडी अरतां,” इंचि पौलुस इत्तोर.

21 अस्के यहुदि पेदुदालुकु पौलुसुन इल्हा इत्तुर, “नीवा बारेमते यहुदिया एरियाताल बतले सिट्टि दोर्काहिल्ले. अगटाल वायाना दादालोरगुडा नीवा बारेमते बतल वेहा हिल्लुर, नीवा बारेमते बदे कराब पोल्लेगुडा इना हिल्लुर.

22 गानि अन्नि जेगाने नासरेत पाटित्तोर विरोदतेन वळकानद माकु एर्का मंता. अयना नीवा विचारम बतल मंता, इद मोमोट नीवाहेंदाले केंजंतोम,” इंचि इत्तुर.

23 अस्के ओनतोनि कलियालय उंदि रोजु पक्का कीतुर. पक्का कीता रोजुने ओर आगसि मत्ता लोतगा यहुदिलुकु वेल्लेटुर जमा आतुर. पौलुस हक्केटाल अय्ते पोळ्द हौननदाका पेनदा राज्येम बारेमते ओर्कु गवाइ वेहतोर. अल्हेने मूसाना नियमताल आनि पेनदा कबुरतोर रासता पुस्तकालुकुनाल येसुना बारेमते ओर्कु तेळियागोट्टिस वेहतोर.

24 ओर वेहता पोल्ले इच्चुर्कु नच्चुतां, इच्चुर्कु नच्चुवा ओर विस्वासम किया हिल्लुर.

25 पजा ओरद-ओर्के वरोन पोल्ले वरोंक अर्काका, अगटाल तेदसि होनालय आयामेके पौलुस इंकुंदि पोल्ले इत्तोर, पवित्र आत्मा यसायाह इनना पेनदा कबुरतोनाहेंदाल, मीवा एनकटा पेदुदालुकुनतोनि वेहता पोल्ले निजमे आंदु, अद इल्हा मंता:

26 “निमे लोकुलुकुनगा होंचि इल्हा वेहा,

मिमेत बस्केळ्ळक केंजसेके मनंतिर, गानि अर्तम कीकुन्निर.

मिमेत बस्केळ्ळक हळसेक मनंतिर, गानि एरपाट किथ्यिर.

27 बारित्ते ई लोकुलुकुना मनसु गट्टिगा आता,

ओर केळ्ळुने तक्को केंजांतुर, ओर ओरा कळ्ळक मुचुकुत्तुर.

अल्हा कियाकौटे ओर कळ्ळुने हळसि मन्नेर,

केवुकुने केजसि मन्नेर, मनसुने एरपाट कीसि मन्नेर,
 नावाहेके तिरियसि मन्नेर, नना ओर्कुन बेस कीसि मन्नेन.”[☆]

28 अदुनहाटी, मुक्ति हियना कबुरतुन पेन बै जातितोरगा लोहता. ओर अदुन केजंतुर, इंचि मिमेट
 एरपाट कियगोम.

29 पौलुस इव पोल्लें इत्तारित्ते यहुदिल्कु वरोंकु वरोर वरगेयसेके अगटाल पेय्सि होत्तुर.

30 अगा किरायता लोते पौलुस पूरा रोंड वर्सनदाका मत्तोर. बोर कलियालय वायिनागानि ओर्कुन
 बेस हळंदुर.

31 वेरियाकौटा, आगाकौटा पेनदा राज्येम बारेमते वेहंदुर, येसु किरिस्तुना बारेमते कराहंदुर.

रोम रोमि विस्वासुल्कुनाहाटीं पौलुसना सिट्टि

इद सिट्टिता बारेमते गिचचो परिचयम

रासतोना पोरोलः पौलुस

रासता कालमः इसवि सन 58

पौलुस इद सिट्टि रासाका मुन्ने रोम सहरते होना हिल्लोर. अदुनहाटीं इद सिट्टि रासि अगाटा विस्वासुल्कुंक ओर ओना सतता परिचयम वेहचंतोर. अयना अगाटा विस्वासुल्कुनाल इच्चुर विस्वासुल्क ओन्क एरपाट मत्तुर. अयते पौलुसुंक ओरगा होंचि कोन्नि रोजकु ओरतोनि मंचि, ओर्क येसु किरिस्तुना बारेमता बेसता कबुर वेहचि पजा अगटाल इसपानिया इनना देसेम होनना पिलान मत्ता.

दुनियाते मनना अन्नि जातिना लोकुल्क उंदच्चोने पापम कीसि मंतुर. पेनदा मुन्ने नित्तना इत्ते अंतोरगुडा नीतिमंतुल्क आयापीता, अस्केन पेनदा मुन्ने नित्ता परांतुर. बोर अयते येसु किरिस्तुनपोरों विस्वासम ईरंतुर पेन ओर्कुन नीतिमंतुल्क कीसि, पूना पिस्वर हीता. बच्चोन तकलिप्क-कस्टाल्क वायिनागानि ओप्के पीसि मनालय येसु किरिस्तु ओना पवित्र आत्माहेंदाल ताकत हीतोर.

इद सिट्टिता आकिर-आकिरते, मना पिस्वर पेनदा सेवाहाटींगे मंदना, विस्वासुल्क अंतोर पावरमते बेस कलियसि मंदना, मना दंटाता विस्वासुल्क हरिं तप्सि होनाकोटा ओर्कुन बेस हळकुनना. इल्हा अंतोर विस्वासुल्क कलियसि पिस्ते वेल्लेन सांति-समादानम दोर्कता. इसोंटा पोल्ले पौलुस रासतोर. बगा बतल मंता

परिचयम आनि मुक्य उद्देसम 1:1-17

यहुदिकं, यहुदि आयवोर्क इव्वुर्कगुडा मुक्ति अवसरमे 1:18-3:20

यहुदिकं, यहुदि आयवोर्क इव्वुराहाटीं पेनदा मुक्तिता हरिं 3:21-4:25

किरिस्तुना लोप्पो पूना पिस्वर 5:1-8:39

पेनदा पिलानते इस्राएल लोकुल्क 9:1-11:36

किरिस्तुन विस्वासम कीतोर बल्हा पिसगोम 12:1-15:13

मुन्नेटाहाटीं पिलानकु आनि जोहार 15:14-16:27

पौलुस रोमि विस्वासुल्कुंक सतता परिचयम कीतोर

1 नना पौलुस, येसु किरिस्तुना दासुन* आंदुन. नना मीकु इद सिट्टि रासेक मंतन. येसु किरिस्तुना कबाहक कियालय पेन नाकुन प्रेरित† इंचि पेरता. पेरसि दाना बेसता कबुर वेहालय लोहता.

2 पेनबाबाल हीतन इत्ता इदे बेसता कबुरता बारेमते पेनदा कबुरतोर मुन्नेने पवित्र दर्मसास्त्रमते रासि इरतुर.

3 इद बेसता कबुर, मनकना रूपमते पुटसि वाता पेनदा मरिना बारेमते मंता. ओर दाविद राजाना वंसंमते पुटतोर.

4 गानि मना सामि येसु किरिस्ते पेनदा मरि आंदुर इंचि हुप्सालय पेन दाना पवित्र आत्माता ताकतहेंदाल ओन हातोरा लोप्पोटाल मरि जीवाते तेहता.

5 अंतोर लोकुल्क ओन विस्वासम कियना, ओर वेहताप ताकना इंचि पेन नावापोरों कुर्पा हुपिच्चि नाकुन येसुनहेंदाल प्रेरित इंचि निलाहता.

6 येसु किरिस्तुना लोकुल्क आयनाहाटीं केयतोरव्ते मिमेटगुडा मंतरि.

* 1:1 दासु ईनकु कृति, बृति, वेला बतल मननो, बस्केळ्क मालकुना सेवा कीसेके मनांतोर.

† 1:1 प्रेरित इच्चुर्कुन पेरसि किरिस्तुना बारेमते वेहालय लोहचीतोर्कुन प्रेरितुल्क इंचि इंतुर.

7 रोम सहरते मनना मीकु अंटोर्क ई सिट्टि रासि नना बतल वेहासेक इत्ते, पेनदुक मिमेट इत्ते वेल्लेन पावरम. इंका अद मीकुन दाना पवित्र लोकलक आयालय केयता. मना पेनबाबाल आनि येसु किरिस्तु सामिनहेंदाल मीकु कुर्पा, सांति दोर्कि.

पौलुस पेनदुक पारतना कींतोर

8 मोदाला नना मीकु वेहानद बतल इत्ते, मीवा विस्वासम बारेमते पूरा दुनियाक तेळियसि होला. इदुन मति कीसेक मीवा अंटोराहाटी येसु किरिस्तुनहेंदाल पेनदुक दन्यवाद कीतन.

9 पेनदा मर्रिना बारेमता बेसता कबुरतुन वेहासेक, नावा पूरा मनसुनाल नना पेनदा सेवा कीसेक मंतन.

10 नना पारतना कियानस्के बस्केळक मीकुन मति कीतन. दीनकु आ पेने गवाइ मंता. पेनदा इच्चा मत्ते, ई मल्का अयना मिहगा वायना हरि दोर्कि इंचि इल्हागुडा नना पेनदुक पारतना कीसेक मंतन.

11 सामिनाहेंदाल नाकु दोर्कता आत्माता वराल्कुन मीतोनि पंचकुनना इंचि नावा इच्चा मंता. दीनहेंदाल मिमेट पेनदा बक्विते गट्टेगा बेर्सकिर, अदुनहाटी नना मिहगा वायालय हळसंतन.

12 इत्ते, मीकु-नाकु मनालोपो मत्ता विस्वासमताहेंदाल मनम वरोंक-वरोर प्रोत्साहन कीकुनना इंचि नावा मनसु मंता.

13 विस्वासुल्कुनिटा! नना मीकु वेहानद बतल इत्ते, यहुदि आयवा लोकुलकुंक बेसता कबुर वेह्चि ओर्क सहायम कीतन, अस्के ओर ओरा विस्वासमता पिस्वरते बेस बेर्सतुर. अल्हेन मिमेटगुडा मीवा विस्वासमता पिस्वरते बेस बेर्सना इंचि नना ऊके-ऊके मिहगा वायालय हळुदुन, गानि इदवेरादाका बतलन्ना-बतल अड्डम वासेक मत्ता, इद पोल्ले मीकु तेळियना इंचि नना वेहासेके मंतन.

14 युनानि बासा, युनानि रीति-रिवाजकु तेळियतोर, तेळियवोर लोकुलकुंक आनि करियतोर्क, करियवोर्क इल्हा अंटोर्के पेनदा पोल्ले वेहना जिम्मेदारि नावा पौरिन मंता.

15 अदुनहाटी रोम सहरते मनना मीकगुडा नना बेसता कबुर वेहालय तयार मंतन.

16 विस्वासम कियना अंटोर्कुंक, इत्ते मुन्ने यहुदिलकुंक पजा युनानि लोकुलकुंक मुक्ति हियालय ई बेसता कबुरते पेनदा ताकत मंता. अदुनहाटी नना पेनदा बेसता कबुर वेहालय सिग्गु अर्रीन.

17 बारित्ते पेनदा मुन्ने मनकल नीतिमंतुड बल्हा आंतोर इत्ता पोल्ले बेसता कबुर मनाकु वेहंता. सुस्वनाल आकिरदाका विस्वासमतेन इद आया परंता. “नीतिमंतुलक विस्वासमतोनि पिस्संतुर,” इंचि दर्मसास्त्रमते रासि मंता.

अंटोर पापम कीतोरे आंदुर

18 बेसता कबुर अंटोर लोकुलकुंक एविच्चना अक्सरम बारि मंता इत्ते, सत्तेम हर्दे ताकवा लोकुलक कराब कबाहक कीसि सत्तेमतुन दबांचि इरतुर. निजम पेन हिल्ले इत्ताप ताकसि, तप्पुड कबाहक कीतुर. अदुनहाटी पेन ओरपोर्गे स्वर्गमताल दाना होंगुन हुप्संता.

19 निजमाता पेन दाना गुनाल्कुन अंटोर लोकुलकुना मुन्ने हुपिस्ताहाटी इव अन्नि पोल्ले ओर्क एर्के मंता.

20 बल्हा इत्ते, इद दुनिया पुटतस्केटाल पेन तयार कीता दुनियातुन हळते, दाना बस्केने दिसुवा गुनम, बस्केळक मनना ताकत मनाकु दिसंता. अदुनहाटी पेनदुन एरपाट किय्योम इंचि मनकालोर इना पस्स.

21 ओर पेनदुन अयते एरपाट कीतुरे, गानि पेनदुन बल्हा अयते तल्सकुनागोम अल्हा तल्सकुन्नुर इंका दाना कदरगुडा किय्युर. अल्हा किय्यका ओर अट्टि विचाराल्क कीसि ओरा मनसुने हीकटा कीकुत्तुर.

22 “मोमोट तेल्विगल्लोरम,” इंचि वेहकुंचि ओर बुदिद हिल्वोरलेसी आतुर.

23 बस्केळक नासडेम आयाकोटा मंदना महिमागल्ला पेनदुन ओर मोळकका, दाना जेगाते नासडेम आयना मनकानव, पिट्टेनव, जिवरासिनव आनि तरासुनलेहका बेंगना जिवरासिना बोम्मां कीसि मोळकालय दलगतुर.

24 अदुनहाटीं ओरा मनसुने मत्ता बोगम विचारालकुन पूरा कीकुनालय पेन ओर्कुन होळसीता. अस्के ओर वरोना मेंदुल वरोंक कदर हिलाकोटा बोगमतनाल्क कीतुर.

25 पेनदा बारेमता सत्तेम पोल्ले आबद्दम आंद, इल्हा इन्कुंचि ओर्कुन तयार कीता पेनदुन मोळकका, अद तयार कीतवुन पेन इंचि मोळकालय दलगतुर. गानि अवुन तयार कीता पेने बस्केळताहाटीं तल्सकुननालायक मंता, आमीन.

26 अदुनहाटीं पेन ओर्कुन ओरा मनसुक वाता सिग्गु हिल्वा कबाहक कियालय होळसीता. अस्के मुर्ताहक मुय्दुरतोनि मीडानद होळसि, मुर्ताहकुनतोनि मुर्ताहके मीडसि बस्केने ओप्वा कबाहक कियालय दलगांतां.

27 अल्हेने मांडुसागुडा ओरा मुत्तोहकुनतोनि मीडानद होळसि, मांडुसातोनि मांडुसा मुत्तो-मुय्दोनेलेहका मीडसि बोगमतनम कियालय दलगतुर. इसोंटा बोगमतनम कीताहाटीं ओर्क ओरा पिस्वरते रोगाल्क-तकलिप वासि सिक्सागुडा दोर्कता.

28 पेनदा सत्तेमता पोल्लेतुन ओर एरपाट कियालय हूळा हिल्लुर. अयते ओर बद कबळ कियमळ बेस आयो, अदे कबळ कियालय पेन ओर्कुन होळसीता.

29 ओरा लोप्पो अन्नि तीरकुना कराब कबाहक, पगा, आस्ति, सीडातनम निडिस होत्ता. चुगलीं कियमळ, कळक पोतमळ, हळकमळ, जगडाल्क कियमळ, विरोद कियमळ, नळेह कियमळ इसोंटा गुनम निडिस ओर इंकावरोना बारेमते कराब विचारम कियानोर आतुर.

30 इंकावरोन तेंडसि पोहानोर, पेनदुन हय्सवोर, गरा कियानोर, पोंगुळ वळकानोर, कराब पोल्लें पुटिचचनोर, तल्लुर-बाबोना पोल्ले केंजवोर;

31 बुद्धि हिल्वोर, हीता पोल्लेपोर्रीं ताकवोर, जीवा नोयवोर, दया हिल्वोर आतुर.

32 इसोंटा मनकालोर्कुंक पेनदाहेंदाल हामुरता सिक्सा तप्यो इंचि ओर्क एरपाट मंचिगुडा ओर इल्हे ताकंतुर. अचोने आयका अल्हा ताकानोर्कुन “बेस ताकसेक मंतिट,” इंचि मेचकुकंतुर.

2

मिमेटगुडा पापि लोक्कुलक आंदिर

1 अरे तप्यु दोसना लोक्कुरिटा, मिमेट बोरन्ना आम्टु! मिमेटगुडा अदे तप्यु कियानोर आंदिर. अदुनहाटीं इंकावरोन पोरीं मिमेट तप्यु दोसमत. इल्हा वेंरेतोरपोरीं तप्यु दोस्सि, मीवद मिमेटे “दोसिर्क” इंचि हुपिचकुंतुर. दानहाटीं वेंरेतोरपोरीं तप्यु दोस्सि मिमेट तपिचकुना परिर.

2 इसोंटा तप्यु कबाहक कियानोरद पेन सत्तेमते न्यायम कीसि, ओर्क दगता सिक्सा हीता, इंचि मनाक् एरपाटे.

3 अयते मिमेटे वेहाट! बव कबाहकुनहेंका मिमेट वेंरेतोरपोरीं तप्यु दोस्सतिरो, अवे कबाहक मिमेट कीसि, पेनदा सिक्साताल तपिचकुंतोम इन्कुंचतिरा?

4 हिलाकोटे दाना दया, ओप्के आनि मापितुन गम्मत इन्कुंचतिरा? निजम बतले इत्ते, मिमेट मनसु मार्सकुनना इंचि पेने मीवापोरीं दया हुपिस्ता, इद मीकु तेळियोना?

5 गानि गाट्टि मनसु, हेंडुतनमहेंका बस्केने मिमेट मनसु मार्सा हळिर. इल्हा कीसि मीवा सिक्सातुन मिमेटे बेरसागोटसंतिर. बस्के अयते पेन दाना होंगुन मीपोरीं हुपिचि, मीकु सिक्सा हिथ्यार अस्के लोक्कुलक दाना सत्तेमता न्यायमतुन हळानुर.

6 आ रोजुने पेन हरेक मनकना न्यायम ओर कीता कबाहकुन हळसि कीता.

7 बोर अयते बस्केळक बेसता कबाहक कीसेके, पेनदाहेंदाल कदर, दोसेम हिल्वा पिस्वरतुन दोर्किचकुनालय हळांतुरो पेन ओर्क बस्केळक पिस्सना पिस्वर हीता.

8 गानि बोर अय्ते सत्तेमते ताकाकोटा तप्पुड कबाहक कीसेके सतताहाटी पिस्संतुर, ओरपोरो पेन होंग आसि सिक्सा हीता.

9 तप्पुड कबाहक कियना हरेक मनकंक तिप्पल्क, दुक्काल्क वांतां. अन्टे मोदाला यहुदिल्कुंक, पजा युनानिर्कुंक.

10 गानि अवे रोजकुने बेसता कबाहक कीसेक ताकानोर्कुंक पेद्दातनम, कदर, सांति दोर्कार. अन्टे मोदाला यहुदिल्कुंक पजा युनानिर्कुंक.

11 बारित्ते पेन मोकम हळसि कबळ किय्यो.

12 मूसाना नियम एरपाट हिल्वोर पापम कीते, मूसाना नियम परकारम सिक्सा आयाकोन्ना गानि सिक्सा अय्ते तप्पो. बोर अय्ते मूसाना नियम एरपाट मंचि पापम कीतुर, ओर्क मूसाना नियम परकारमे सिक्सा आंता.

13 बारित्ते, सिराप मूसाना नियम केंजानोर पेनदा मुन्ने नीतिमंतुल्क आयुर, गानि मूसाना नियम केंजसि दान परकारम ताकानोरे पेनदा मुन्ने नीतिमंतुल्क आंतुर.

14 यहुदि आयवोर्कुंक मूसाना नियम तेळियो. गानि ओक्कला ओरा मनसु मूसाना नियमते वेहताप मनानय्ते, ओर्क मूसाना नियम तेळियाकोन्ना गानि मूसाना नियम परकारम ताकतापे आंता.

15 मूसाना नियमकु ओरा मनसुने रासि मंतां इंचि ओर कियना कबाहके हुप्संतां. दीनकु ओरा पिस्वरगुडा गवाइ मंता. बारित्ते ओर तप्पुड कबळ कियनेके ओरा मनसे “इद तप्पु” इंचि दोसेम दोसंता. अल्हेने बेस कबळ कियनेके ओरा मनसे ओर्क “इद बेस” इंचि वेहंता.

16 नना वेहना बेसता कबुर परकारम, बोर्क तेळियाकोटा मनकालोर्क कीता कबाहकुन पोरोटाल, अद रोजुने पेन येसु किरिस्तुनाहेदाल लोकुल्कुना न्यायम किय्यार.

यहुदिल्क आनि ओरा नियम

17 अय्ते इदके मीवद मिमेट, “मोमोट यहुदिल्क” इंचि वेहकुंतिर, मूसाना नियमपोरो विस्वासम ईरतिर, “मोमोट पेनदुक वेल्ले दगोटोर्कुम” इंचि पेद्दातनम वेहकुंतिर,

18 मिमेट मूसाना नियम करियसि मंतिर इंचि पेनदा इच्चा बल्हा मंता आनि बेस हरि बद्दु इंचि मीकु तेळियता.

19 मिमेट इल्हा इंतिर गदा, “गुडिडिर्कुनलेसी मनानोर्कुंक हरि हुप्संतोम, हीकटा पिस्वर पिसानोर्कुंक वेल्गुनलेसी मंंतोम.”

20 मूसाना नियमते रासि मत्ता पोल्लेंगे सत्तेम आनि तेल्वि हियानव इंचि मीकु तेळियताहाटी, “मुर्कालोर्कुंक बुदि वेहानोरम, पिलालकुंक कराहनोरम,” इंचि मिमेट इनकुंतिर.

21 अय्ते मारि वेरेतोर्कुंक कराहना पोल्लें मीवद मिमेटे बारि कराहकुनिट? “दोंगातनम कियमट” इंचि कराहचि मिमेटे दोंगातनम कीतिर.

22 बोगमतनम कियामन्नि इंचि कराहचि, मिमेटे बोगमतनम कीतिर. बोम्मांक मोळ्का मन्नि इंचि कराहंतिर, गुळिते होंचि दोसकुंतिर.

23 महगा मूसाना नियम मंता इंचि पेद्दातनम वेहकुंतिर गानि नियमते ताकका पेनदा कदरगुडा किय्यिर.

24 “मीवा इसोटा कबाहकुनहेका यहुदि आयवोरा नड्डुम पेनदा अपमानम आंता,”* इंचि दर्मसास्त्रमते रासिगुडा मंता.

25 मिमेट मूसाना नियम परकारम ताकानय्ते, कतना* कीतद मीकु पाय्दा आंता. गानि मिमेटगिंटा मूसाना नियम परकारम ताकाकोटे मिमेटे कतना कीसिगुडा बतल पाय्दा हिल्ले.

26 बोरन्ना कतना कियवोर गिंटा मूसाना नियम परकारम ताकते, ओर कतना कियाकोन्नागानि पेनदा नदरते कतना कीतोना लेक्कातेन वांतोर.

* 2:24 यसायाह 52:5 * 2:25 कतना यहुदि आनि मुसलमान लोकुल्कुनद उंदि रिवाज आंद. इद रिवाज परकारम उळकानगटा कोस्सा तोलदुन कोय्यांतुर. इसंटा रिवाज कीते पेनदातोनि करार कीताप इंचि ओर नम्मंतुर.

27 मूसाना नियम मिहगा मंचि दाना परकारम कतना आसिगुडा मिमेट नियम परकारम ताकसेक हिल्लिर. अदुनहार्टी बोरद अयते कतना आयाहिल्ले, यहुदि आयवोर, मूसाना नियम मत्ताप ताकानोर मीपोर्री दोसेम दोस्सनुर.

28 सिराप यहुदि जातिते पुटतोर, पलाताल कतना आतोर ईर निजम यहुदि मनकालोर आयुर.

29 बोर अयते पेनदा इच्चा मत्ताप ताकंतुर ओरे निजम यहुदिल्क आंदुर. मूसाना नियम परकारम पलाताल आतदे कतना आयो, गानि पेनदा आत्माहेंदाल मनसु मारियता मनकालोरे निजम कतना आता यहुदिल्क आंदुर. इसंटा मनकालोर लोकुल्कुना कदरतुन आयो गानि पेनदा कदरतुन पहकंतुर.

3

हीता पोल्लेताल पेन पजोळ्क होन्नो

1 इद केंजसि, “अयते यहुदि आसि बतले पायदा हिल्लेना? कतनाकु इच्चोगुडा विलवा हिल्लेना?” इंचि मिमेट इनकुंतिर बारे.

2 विलवा अयते वेल्लेने मंता. अद बल्हा इत्ते, पेन दाना पोल्लेन* मोट्टा मोदाला यहुदिल्कुंके हीता.

3 यहुदिल्कुना लोप्पो पेनदा पोल्ले केंजवोर इच्चुर मत्तुर. ओर अल्हा मत्तुर इंचि पेन विस्वासमतद आयो इनकुंचतिरा?

4 अल्हा आयापर्री. लोकुल्क अंटोर आबद्दम वळकानोर आयिना, पेन मात्रम बस्केळ्क निजम मनंता. बारित्ते दर्मसास्त्रमते,

“निमे वळकते नीवा पोल्ले निजम इंचि दिस अरंता,

निमे न्यायम कियनेके नीवा पोल्ले गेल्संता,”

इंचि रासि मंता.☆

5 मना तप्पुड कबाहकुन हूळसि पेन बच्चोरो नीतिमंतुड इंचि एर्का आंता. इल्हा आतास्के पेन मनाकु सिक्सा हीसि अन्यायम कीसंता इंचि मनम इनकुना परंतोम. (इद नना मनकना विचारम मत्ताप वळकसंतन.)

6 गानि अल्हा इनकुनमळ तप्पु आंद, अल्हा गिंटा पेन कीते, अद दुनियातोरा न्यायम बल्हा किय्यार?

7 अचोने आयका, “मावा तप्पुड कबाहकुनहेंदाल पेने सत्तेमतद इंचि तेळियसि दाना कदरगुडा वेल्लेन आसेके अयते, पेन माकुन पापिक बल्हा इना परंता?” इंचिगुडा इच्चुर लोकुल्क लोल्लि कीतुर.

8 इल्हा कियानोर, “पापम कीते बेस जर्गसेक गदा! अयते दट पापम कीकोम,” इंचिगुडा इंतुर. इंका इल्हा मोमोटे कराहतोम इंचि इच्चुर लोकुल्क मापोर्री दोसेमगुडा दोसंतुर. गानि अल्हा कियानोर अंटोर्कुंक, पेन दगता सिक्सा हीता.

पापम हिलाकोंटा बोरे हिल्लुर

9 सरे! अयते मनम यहुदिल्कुम, यहुदि आयवोरकन्ना बेसतोर्कुमा? असले आयोम. बारित्ते यहुदिल्क आयिर, युनानिक आयिर. अंटोर पापम कीतोरे इंचि नना मीकु मुन्नेन वेहचि मत्तन.

10 दर्मसास्त्रमतेगुडा इदुना बारेमते इल्हा रासि मंता गदा:

“बोरे नीतिमंतुड हिल्लोर, वरोरगुडा हिल्लोर.

11 निजम तेळियतोर बोरे हिल्लुर, वरोरगुडा हिल्लोर.

पेनदुन पहकानोर बोरे हिल्लुर.

12 अंटोर पेनदा निजम हरदाल तप्पुड हर्दुक होत्तुर.

कबळ्क ओज्जनलायक बोरे हिल्लुर,

* 3:2 पोल्ले मूसाना नियमते मनना अन्नि पोल्लें इत्ते दर्मसास्त्रमते मत्तव अन्नि पोल्लें. ☆ 3:4 बजन संहिता 51:4

बेसता कबळ कियानोर बोरे हिल्लुर, वरोरगुडा हिल्लोर.*

13 ओरा तोळदाल पेयसना पोल्लें,

बौदा कुल्ला मत्ते पीनगुना गब्बु बल्हा वांता अल्हा मंतां.

ओरा तोळदाल पेयसना पोल्लें, इंकावरोन मुळाहनव आंदुं.*

तरासुना विसम वरोन बल्हा हव्कंता,

अल्हेन ओरा पेदविनाल पेयसना पोल्लें तकलिप कियानव आंदुं.*

14 ओरा पोल्लें सापनेम आनि कयमुलतोनि निंडिस मंतां.*

15 ओर बस्केळक इंकावरोन हव्कालय हळसेक मनांतुर.

16 ओर बगा अय्ते दांतुर अगा नासडेम कीसि दुक्कमतुन हीसि दांतुर.

17 सांति बगा दोर्कता अद हरि ओर्क एरपाट हिल्ले.*

18 ओरा कळकुना मुन्ने पेनदा वेंरे हिल्ले.”*

19 मूसाना नियम परकारम बोर अय्ते ताकंतुर ओराहाटीगे मूसाना नियम मंता, इद मनाकु एरपाटे. अयना पेन न्यायम कियनेके दुनियातोर अंटोर, इत्ते यहुदिल्क आयिर यहुदि आयवोर आयिर, अंटोर पेनदुक लेक्का हियमळे, बोरे तपिचकुना पम्.

20 मूसाना नियमता कबळताहेंदाल मनम अंटोरम पापिके इंचि तेळियंता अचोने. गानि अव्ते वेहचि मत्ताप ताकसि पेनदा मुन्ने बोरे नीतिमंतुल्क आयुर.

पेन मनकालोर्कुन नीतिमंतुल्क कीता

21 गानि इंदके मूसाना नियमते रासि मत्ता पोल्लेंगे कियवा मनकालोर्कुन नीतिमंतुल्क कियनाहाटी पेन इंकुदि हरि तयार कीता. अद हरदा बारेमते, मूसाल आनि पेनदा कबुरतोर पोल्ले हीसि मुन्नेन दर्मसास्त्रमते रासि इरतुर.

22 अद हरि बतल इत्ते, बोरे आयिर येसु किरिस्तुनपोरें विस्वासम इरते पेन ओर्कुन नीतिमंतुल्क कीता. इव्ते कुलम, जाति इल्हा बतल हिल्ले.

23 बारित्ते अंटोर लोकुल्क पापम कीसि, पेनदाहेंदाल दोर्कना कदरताल लक्कु आतुर.

24 गानि येसु किरिस्तु लोकुल्कुन पापालकुनाल इळबळिस्तोर. इल्हा पेन दाना कुपति येसु किरिस्तुन विस्वासम कियानोर्कुन अंटोर्कुन नीतिमंतुल्क कीता. दीनाहाटी मनम पेनदुक बतल हियना अक्सरम हिल्ले.

25-26 मना पापालकुना सिक्सातागा मोक्कु आयालय पेन येसुन लोहता. येसु किरिस्तु मना पापालकुनाहाटी मोक्कु आतोर इंचि मनम विस्वासम कीसि ओप्कुनगोम. दीनहेंदाल येसुनपोरें विस्वासम कीतोर्कुन पेन नीतिमंतुल्क कीता. इदवेरदाका बोर अय्ते पापम कीतुरो, ओर्क सिक्सा हियाकोटा पेन ओप्के पीसि मत्ता. इल्हा अद नीतिमंतुड इंचि हुपिस्ता.

27 अदुनहाटी मनम पेदिदुरकेम कियामन्नि. मनम पुन्नेम कबाहक कीतोम इंचि पेन मनाकुन नीतिमंतुल्क कीतना? हिलाकोटे मूसाना नियमपोरें ताकताहेंकेना? विस्वासम कीताहेंकेन मनम नीतिमंतुल्क आतोम.

28 मूसाना नियमते मत्ताप ताकताहाटी पेन मनाकुन नीतिमंतुल्क इना हिल्ले, गानि येसु किरिस्तु सामिनपोरें विस्वासम कीताहेंकेन नीतिमंतुल्क इत्ता.

29 अय्ते दीना अर्तम मिमेटे विचारम कीसि वेहाट. पेन सिराप यहुदिल्कुनदेना? यहुदि आयवोर्कुनद आयोना? पेन यहुदि आनि यहुदि आयवोर, इव्वुरदगुडा आंद.

30 अद बल्हा इत्ते, पेन उंदे आंद. कतना आतोर आयिर, कतना आयवोर आयिर, इव्वुर्कुनगुडा पेन ओरा विस्वासमहेंदाले नीतिमंतुल्क कीता.

* 3:12 बजन संहिता 14:1-3 * 3:13 बजन संहिता 5:9 * 3:13 बजन संहिता 140:3 * 3:14 बजन संहिता 10:7 * 3:17 यसायाह 59:7-8 * 3:18 बजन संहिता 36:1

31 “अल्हा अय्ते, विस्वासम कीताहेंका मनाकु मूसाना नियमता अक्केर हिल्ले, इनकुंचंतिरा?” अल्हा आयो. विस्वासमहेंदाले मूसाना नियमते मनम बेस ताका परंतोम.

4

अब्राहामुना विस्वासम

1 इंदके मना एनकटा पेद्दा मनकल अब्राहामुना बारेमते मनम बतल इनकोम? ओर नीतिमंतुड बल्हा आतोर?

2 ओक्कला अब्राहाम कीता बेसता कबाहकुनहेंका पेन ओन नीतिमंतुड इंचि मत्ते, गर्रा कियालय ओनगा बतलन्ना कारनम मंचि मनवळ, गानि पेनदा मुन्ने ओर अल्हा किया परोर.

3 दर्मसास्त्रम बतल वेहांता इत्ते, “अब्राहाम पेनदुन विस्वासम कीतोर, ओना विस्वासमतुन हळसि पेन ओन ‘नीतिमंतुड’ इंचि वेहता.”*

4 कबळ कियानोंक दोर्कनद कूलि आंद, दान इनाम इन्नुर. ओर कबळ कीतोर, इंचि अद ओन्क दोर्कता.

5 गानि पेनदा मुन्ने बोरे मनकल बेसता कबाहक कीसि नीतिमंतुड आयोर. पापिकुनगुडा मापि कियना पेनदापोरों विस्वासम इरतेने, अद ओन नीतिमंतुड कीता.

6 कबाहक कियाकोन्नागानि, पेन बोर्कुन अय्ते नीतिमंतुलक इंता, ओर आसिर्वाद दोर्कतोर आंदुर इंचि दाविदगुडा इंतोर. अद इल्हा मंता:

7 “बोरा तप्पु कबाहकुन पेन मापि कीता, बोरा पापालकुन मुच्चुता, ओर पेनदा आसिर्वाद दोर्कतोर आंदुर.

8 बोरा पापालकुना लेक्का पेन पिययो, ओर आसिर्वाद दोर्कतोर आंदुर.”

9 अय्ते, इसोंटा आसिर्वाद सिराप कतना आतोर्कुनाहाटीगेना मरि कतना आयवोरहाटीगुडा मंताना? हो, इळ्वुराहाटीगुडा मंता. बारित्ते मना एनकटा पेद्दा मनकल अब्राहामुन पेन ओना विस्वासमतुन हळसि नीतिमंतुड इंचि ओप्कुत्ता, इल्हा मनमे वेहांतोम गदा!

10 अय्ते पेन अब्राहामुन बस्के नीतिमंतुड इंचि इत्ता? कतना आतारित्तेना, कतना आयाका मुन्नेना? कतना आयाका मुन्नेन ओन नीतिमंतुड इंचि इत्ता.

11 अब्राहामुना कतना आयाका मुन्नेन ओर पेनदुन विस्वासम कीतोर. अदुनहाटी पेन ओन नीतिमंतुड इत्ता. नीतिमंतुना एरपाटता चिन्ह इंचि अब्राहामुंक कतना किया पीता. अदुनहाटी विस्वासम कियानोर अंतोर कतना आयाकोन्नागुडा नीतिमंतुलक आसि मंतुर. अदुनहाटी ओर, अंतोर विस्वासुलकुना बाबोनलेसी मंतोर.

12 कतना आतोर्क अटोर्कगुडा अब्राहाम मातिर दादले. गानि सिराप कतना आता इंचि ओर्क अब्राहाम मातिर दादल आया हिल्लोर. अब्राहामुना कतना आयाका मुन्ने ओना विस्वासम बल्हा मत्ता, अल्हेन ओर्कगुडा विस्वासम मत्ता इंचि अब्राहाम ओर्क मातिर दादल आतोर.

13 “मीकुन ई दुनियाता वारसदार्क कीतन,” इंचि पेन अब्राहाम आनि ओना वंसमतोर्क पोल्ले हीसि मत्ता. अब्राहाम मूसाना नियमते वेहताप ताकतोर इंचि पेन ओन्क पोल्ले हिया हिल्ले. गानि पेनदापोरों ओर विस्वासम कीसि नीतिमंतुड आतोर इंचि पेन ओन्क ई पोल्ले हीता.

14 ओक्कला मूसाना नियम परकारम ताकतोर, पेन हीता पोल्ले परकारम वारसदार्क आयानय्ते, विस्वासम इनना पोल्लेक बतले विलवा मन्नो, पेन हीता पोल्लेकगुडा अर्तम मन्नो.

15 पेन नियमकु हीतस्के अवुन पीसि ताका पीता. ताकाकोटे पेन सिक्सा हीता. गानि नियमकु हिलाकोटे अवुन नेम्हना सवालगुडा वायो.

* 4:3 उवात्ति 15:6

16 अदुनहाटी पेन अब्राहामुना वंसमतोर्क अंटोर्क हीता पोल्ले विस्वासम कीतोर्कुंक दाना कुर्पाताहेंदाले दोर्कता. इद सिराप मूसाना नियम परकारम ताकानोर्कुंके आयो गानि अब्राहामुनलेसीं विस्वासमते ताकानोर अंटोराहाटी मंता. ओर मना अंटोरा बाबल आंदुर.

17 “नना नीकुन वेल्ले लोकुल्कुना बाबो कीतन,”* इंचि पेन अब्राहामुना बारेमते इत्ता पोल्ले दर्मसास्त्रमते रासि मंता. पेनदा मुन्ने अब्राहाम मना अंटोर्क बाबोनलेसीगे मंतोर. हातोर्कुन पेन मर्रा जीवाते तेहंता. हिल्वदुनगुडा पुट्टीचंता असोंटा पेनदुन अब्राहाम विस्वासम कीतोर.

18 अब्राहामुंक पिलाल्क आयना आसे हिलाकोन्ना, ओर पेनदापोरों विस्वासम कीतोर. अदुनहाटी पेन ओन वेल्ले लोकुल्कुना बाबो कीता. “नीवा वंसमताहेंदाल लेक्का हिल्वा लोकुल्क आंतुर,” इंचि पेन वेहता परकारमे जर्गता.*

19 अस्के अब्राहामुना वयम नूर वर्सा मत्ताहाटी ओना मेंदुल कमजोर आसि मत्ता. अल्हेने ओना मुत्तो सारांकु पिलाल्क आयाना वयम दाटसि होत्ता. इवन्नि एरपाट मनिनागानि ओर विस्वासमते कमजोर आयाकोंटा गट्टिगा मत्तोर.

20 अब्राहाम पेन हीता पोल्लेपोरों बस्केने अनमानम किया हिल्लोर, गानि पेनदा विस्वासमते गट्टिगा आसि दाना महिमा कीतोर.

21 पेन ओन्क हीता पोल्ले, अद पूरा किया परांता इंचि अब्राहामुंक पुरागा बरोसा मत्ता.

22 इद पोल्लेताहाटीगे, “पेन ओन नीतिमंतुड इत्ता.”*

23 विस्वासमहेंदाल नीतिमंतुड कीता पोल्ले सिराप ओनाहाटीगे हिल्ले.

24 गानि अद मनाहाटीगुडा मंता. हातोरवेटाल येसु सामिन मर्रा जीवाते तेहता पेनदुन मनम विस्वासम कीतोम, इंचि अद मनाकुनगुडा नीतिमंतुल्क इंता.

25 मना पापाल्कुनाहाटी हायालय, पेन येसुन वैतोर कय्दे अप्पजेपता, आनि मनम पेनदा मुन्ने नीतिमंतुल्क आयालय ओन मर्रा हातोर लोप्पोटाल जीवाते तेहाता.

5

पेनतोनि सत्तेमते मनमळ

1 इल्हा, मना विस्वासमहेंदाल पेन मनाकुन नीतिमंतुल्क कीता. अदुनहाटी सामि येसु किरिस्तुनाहेंदाल, पेनतोनि मनक सांति मंता.

2 इदके मनम पेनतोनि कलियसि पिस्सना पिस्वरगुडा पेनदा कुर्पातेन दोर्कतद आंद. अचोने आयाका पेनदा महिमाता वेलगुने मनम उंदि रोज मनांतोम इत्ता आसेते वेल्लेन कूस मंतोम.

3 इच्चोने आयाका, विस्वासम कीताहेंका मनाकु तिप्पल्क वायिनागानि वेल्ले कुसिते मनंतोम. बारित्ते तिप्पल्क वातेने ओप्के पुट्टंता.

4 इल्हा ओप्के पीसि मत्ते मनालोप्पो बेसता गुनम वांता. बेसता गुनम मनाकु मुक्ति हियाना आसे पुट्टिचंता.

5 इद आसे मनाकुन नाराज किय्यो, बारित्ते पेन दाना पवित्र आत्मातुन मना पिस्वरते हीसि, अद मनाकुन वेल्लेन पावरम कीता इंचि हुपिस्ता.

6 बस्के अय्ते मनद मनम पिसागोटकुना पराकोंटा आतोम, असोंटा वेलाते मना पापि लोकुल्कुनाहाटी किरिस्तु ओना जीवा हीतोर.

7 वरोर नीतिमंतुनाहाटी बोरन्ना जीवा हिय्यालय तयार मनमळ वेल्लेने कस्टम, गानि वरोर बेसता मनकनाहाटी बोरन्ना जीवा हिय्यालय तयार आया परांतुर आयावच्चु.

8 गानि मनम इंका पापमतेन मत्तोम, अस्केने किरिस्तु मनाहाटी जीवा हीतोर. इदुना हेंदाल पेन मनापोरों बच्चोन पावरम कीता इंचि दिसंता.

* 4:17 उत्पत्ति 17:5

* 4:18 उत्पत्ति 15:5

* 4:22 उत्पत्ति 15:6

9 येषु सामिना नेत्तुरहेँदाल पेन मनाकुन नीतिमंतुल्क कीता. अदुनहाटीं पेनदा होंगुनाल मनाकुन तप्पाकोटा ओनाहेँदाले पिसागोटमळ जर्गीता.

10 उंदास्के मनम अंतोरम पेनदा पगातोरमे मत्तोम. अल्हा मननेकेगुडा अद दाना मर्रिना जीवातुन हीसि मनाकुन दाना दग्गेर्क कीकुत्ता. इंदके अय्ते मनम पेनतोनि कलियसि मंतोम. अदुनहाटीं किरिस्तुना पिस्वरताहेँदाल अद मनाकुन आकिर सिक्साताल तप्पाकोटा कापाळता.

11 सिराप इच्चोने आयो गानि मना सामि येषु किरिस्तुनाहेँदाल मनम पेनतोनि मर्रा कलियतोम, अदुनहाटीं मनम वेल्लेन कुसिते मंतोम.

आदाम आनि येषु

12 इद दुनियाते पापम आदामुनाहेँदाल वाता. पापमताहेँदाल हामुर वाता. दुनियाता अंतोर लोकुल्कगुडा पापम कीतुर, अदुनहाटीं अंतोर्के हामुर वाता.

13 मूसाना नियम वायका मुन्नेन इद दुनियाते पापम मत्ता. गानि अस्के मूसाना नियमकु मनवाहेँका पापमतुन पेन लेक्का किया हिल्ले.

14 अय्नागानि आदामुनस्केटाल अय्ते मूसाना कालमदाका मनकालोरपोर्रो हामुर राज्येम कीसेकेन मत्ता. आदाम पेनदा पोल्लेपोर्रो ताका हिल्लोर. लोकुल्क पेनदा पोल्लेपोर्रो ताकका ओनालेसी पापम किया हिल्लुर, अय्नागानि लोकुल्क हायुंदुर. ईर आदाम इत्ते मुन्ने वायाना किरिस्तुना चिन्हालेसी मंतोर.

15 गानि पेनदा वरम आनि आदामुना पापम, इव रोंड पोल्लेन नड्डुम मात्रम वेल्लेन परक मंता. वरोर कीता पापमहेँदाल वेल्लेन मंदिक हामुर वाता. गानि दानकन्ना एक्को पेनदा वरम* आनि कुर्पा मंता. ई कुर्पा येषु किरिस्तुनाहेँदाल वेल्लेन मंदिक दोर्कता.

16 पेन हीता वरम आनि आदाम कीता पापमता पलम, इव रोंड पोल्ले उंदेतीर हिल्लें. बारित्ते आदामुना पापम अंतोरपोर्रो सिक्सातुन तत्ता. गानि मनम वेल्लेन पापालक कीसिगुडा पेन हीता वरमनाहेँदाल नीतिमंतुल्क आतोम.

17 आदाम कीता पापमताहेँदाल अंतोर हामुरता कय हिळु मंतुर. गानि इंकावरोर इत्ते येषु किरिस्तुनहेँदाल बोर्क अय्ते पेनदा वरम आनि कुर्पा दोर्कता, ओर्क अंतोर्क पेनदुक नच्चना नीति पिस्वर दोर्कता.

18 इल्हा आदाम कीता पापमताहेँदाल अंतोर लोकुल्कुक सिक्सा दोर्कता. अल्हेने इंकावरोर इत्ते येषु किरिस्तु कीता बेस कबाटाहेँदाल, पेन अंतोर्क नीतिमंतुल्क आयालय उंदि हरि तयार कीसि ओर्क बस्केळक पिस्सना पिस्वर हीता.

19 वरोर आदाम पेनदा पोल्ले केंजवाहेँका वेल्लेन लोकुल्क पापिर्क आतुर. अल्हेने इंकावरोर मनकल इत्ते येषु किरिस्तु पेनदा पोल्ले केंजताहेँका, वेल्लेन लोकुल्क नीतिमंतुल्क आंतुर.

20 लोकुल्क बल्हा इरगा पापम कीसेक होंचंतुर अदुन ओर्क हुप्सनाहाटीं मूसाना नियम वाता. गानि लोकुल्क बच्चोन वेल्ले पापम कीसेक होत्तुर अचोने वेल्ले कुर्पा पेन कीसेक होता.

21 इल्हा बारि आता इत्ते, बल्हा पापम हामुरताहेँदाल राज्येम कीसेक मत्ता, अल्हेने पेनदा कुर्पागुडा सत्तेमतोनि मना सामि येषु किरिस्तुनहेँदाल बस्केळक पिस्सना पिस्वरताहाटीं राज्येम कीता.

6

पापमहेँदाल हामुर आनि किरिस्तुनहेँदाल पिस्वर

1 अय्ते मरि बतल इनकोम! पेन मनापोर्रो वेल्लेने कुर्पा कियाना इंचि पापम कीसेकेन दाकोमा?

2 बस्केने कियामन्नि. पापि गुनाल्कुनाल उंदि मल्का मनम बस्केळताहाटीं वैरे आसि हासोत्ताप आतोम. मर्रा असोंटा पापि गुनाल्कुने बल्हा पिसकोम?

* 5:15 पेनदा वरम मना पापालक मापि आतां. इत्ते पेन मनाकु उंदि पेद्दा इनाम हीता.

3 मनम अंटोरम येसु किरिस्तुनतोन कलियतोम इंचि हुप्सालय बापतिस्मा एततोम. अस्केने मनम ओनतोन हाताप आतोम. इद संगति मीकु तेळियोना?

4 बापतिस्माहेंदाल मनम येसु सामिनतोन हासि बोंदा दोसताप आतोम. बल्हा अयते पेनबाबाना महिमाता ताकतते किरिस्तु हामुरताल मर्रा जीवाते तेदतोर, अल्हेने मनमगुडा बापतिस्मा एतसि पूना पिस्वरते ताका परांतोम.

5 बारित्ते मनमगिंटा ओना हामुरते ओनतोन उंदि आते, ओना मर्रा जीवाते तेदमळतेगुडा मनम ओनतोन तप्पाकोंटा उंदि आंतोम.

6 मना पडना पिस्वर येसुनतोन क्लसुनपोर्रो हाता, अदुनहाटी पापमतोन निडिस मत्ता मना गुनम नासडेम आसि होत्ता. इंदके मनम पापमता अदिकारमते हिल्लोम इद मनाकु एरपाटे.

7 बोर अयते पडना पिस्वरतुन हाताप होळसीतोर, ओर ओना पापालकुनाल मुक्ति दोर्किशि नीतिमंतुड आतोर.

8 ओक्कला मनम किरिस्तुनतोन हायानयते ओनतोन मनम पिसंतोम इंचि मनाकु विस्वासम मंता.

9 किरिस्तु हामुरताल मर्रा जीवाते तेदतोर, ओर मर्रा बस्केने हायोर. अचोने आयका हामुरता ताकत ओन बस्केने बतल किया पर्रो, इद मनाकु एरपाटे.

10 पापमता अदिकारमतुन ओळिच्चनाहाटी ओर उदे मल्का हातोर. गानि ओर इंदके पिस्सना पिस्वर मात्रम पेनदाहाटी पिस्सेक मंतोर.

11 इल्हा मिमेटगुडा पापमताहाटी हातोरलेहका मंचि, पेनदाहाटी येसु किरिस्तुने जीवाते मंतोम इनकुंट.

12 अदुनहाटी रोंड रोजकु पिस्सना मीवा पिस्वरते पापमता राज्येम वायाकोंटा जेगर्ता मंट. इंका दाना सेड्डा आसेनाल लक्कु मंट.

13 मीवा मेंदुलतुन सेड्डा कबाहक कियालय पापमता कयदुक हियमट. अल्हा कियाकोंटा, “मनम हामुरताल जीवाते तेदतोरम,” इद पोल्लेतुन मति कीसि, मीपोर्रो पेनदुक अदिकारम हीम्टु आनि मीवा मेंदुलतुन नीति कबाहक कियनाहाटी पेनदुक अप्पजेप्पट.

14 अस्के मिमेट मूसाना नियमता कयदा हिळु हिल्लिर गानि पेनदा कुर्पाते पिस्सेक मंतिर इंचि मीपोर्रो पापम दाना अदिकारम ताकसो.

सत्तेमता सेवा कियना

15 इंदके पेनदा कुर्पा मनाकु दोर्कताहाटी मनम मूसाना नियमता कयदा हिळु हिल्लोम, अयते इंदके मनम पापम कीकोमा मरि? अल्हा बस्केने कियामन्नि.

16 सेवा कीतन इंचि मीवद मिमेट ओप्कुत्ते मिमेट बा मालकुनगा अयते सेवा कीसतिरो, ओन्क मिमेट निजमे दासुल्क आंतिर. इद पोल्ले मीकु तेळियोना? मिमेट पापमता दासुल्क आते अद मीकु हामुरता हरि हुप्संता. गानि मिमेट पेनदा पोल्ले केंजते अद मीकुन नीतिमंतुल्क कीता.

17 मुन्ने मिमेट पापमता दासुल्के मत्तिर, गानि मीकु एत्ता पेनदा पोल्लेन मिमेट बेस केंजसि, करियसि इंदके अबुन पीसि ताकसंतिर. इंचि पेनदुक नना दन्यवाद कीतन.

18 इंदके पेन मीकुन पापमता कयदाल होळसीता इंचि मिमेट सत्तेमता कबाहक कियालय पेनदा दासुल्क आतिर.

19 इव पोल्लेन अर्तम कीकुनना ताकत मीकु हिल्ले इंचि नना उंदि उदाहरन हीसि मीकु वेहासेके. दीनकन्ना मुन्ने मिमेट मीवा मेंदुलतुन रोता कबाहक, तप्पुड कबाहक कियालय अप्पजेपसि मत्तिर. दानहेंदाल वेल्लेन पापम आता. अल्हेने इंदके मिमेट मीवा मेंदुलतुन सत्तेमता कबाहक कियालय अप्पजेप्पट, अस्के मिमेट पेनदा पवित्र लोकुल्क आकिट.

20 मिमेट बस्के अयते पापमकु दासुल्क आसि मत्तिर अस्के मीपोर्रो नीतिता कबाहक कियालय दबाव मनाहिल्ले.

21 अयना मिमेट कीता कबाहकुनाहाटी इंदके मीकु सिग्गु वासंता. मिमेट अव कीतस्के मीकु बतल इनाम दोर्कता? अव कबाहकुनाहेंदाल सिराप हामुरे दोर्कुदु.

22 गानि इंदके पेन मीकुन पापमता कयदाल होळसीताहेका मिमेट दाना दासुल्क आतिर. अदुनहाटी इंदके मीकु दोर्कना इनाम बतल इत्ते, पेन मीकुन दाना पवित्र हर्दे ताक्किचि, आकिरते बस्केळ्क पिस्सना पिस्वरताहेके ओता.

23 पापि कबाहकुना कूलि इंचि मनाकु हामुर दोर्कता. गानि पेन मनाकु मना सामि येसु किरिस्तुनहेंदाल वरम इंचि बस्केळ्क पिस्सना पिस्वर हीता.

7

मरमिना उदाहरन

1 विस्वासुल्कुनिटा, नना मूसाना नियम तेळियसि मत्तोरतोनि वळ्कसेक मंतन. वरोर मनकल जीवाते मत्ताचुं रोजके ओनपोर्री मूसाना नियमता अदिकारम मंता इंचि मीकु तेळियोना?

2 सेरे, उंदि उदाहरन वेहांतन. मूसाना नियम परकारम उंदि मुरतळ दाना मुय्दो पिस्सि मत्ताचुं रोजके अद ओना मुत्तो आसि मंता. गानि दाना मुय्दो हासोत्ते, मूसाना नियम परकारम अद मुरतळ मुय्दोंक संबंदिस्ता नियमताल इळबळंता.

3 दाना मुय्दो जीवाते मननेकेन अद वेरे बोनतोना मरमिं आते, दान बोगमतनम कीता मुरतळ इंतुर. गानि दाना मुय्दो हासोनय्ते मात्रम आ नियमताल अद पलाते अरंता. अद वेरे मरमिं अय्नागानि दान बोगमतनम कीता इंचि इन्नुर.

4 अय्ते विस्वासुल्कुनिटा, इल्हेन मिमेटगुडा बस्के अय्ते किरिस्तुनतोनि हातिर अस्के मूसाना नियमताल इळबळतिर. इंदके बोरे अय्ते हातोरव्टेटाल मर्री जीवाते तेदतोर आ किरिस्तुनतोनि मिमेट कलिया परंतिर. दीनहेंदाल मनम पेनदा सेवाताहाटी बेसता कबाहक किया परांतोम.

5 मुन्ने मनम मना इस्ट परकारम ताकुदुम अस्के मना म्हेदुलतुन मनालोप्पो मत्ता पापि आसें वाळ्कनुंदुं, मूसाना नियम मनाकु तेळियतस्के आ आसें इंका बेरस्सेक होत्तां. दीनहेंदाल मनाकु हामुर दोर्कता.

6 मनम बद नियमते अय्ते दोह्चि वाटताप मत्तोमो, आ मूसाना नियमताहाटी इंदके मनम हासि, अव्टेटाल पलाते अरतोम. दानहाटी मनम आ रासि मत्ता पडना नियम परकारम इंदके पिस्सेक हिल्लोम. गानि पेनदा आत्मा हुपिस्ता पूना हर्दुन एरपाट कीसि अद वेहताप ताकसेके दाना सेवा कीसंतोम.

मूसाना नियम आनि पापम

7 अय्ते मूसाना नियम तप्पु इंचि नना वेहसेक इन्कुंचंतिरा? अल्हा असले आयो. ओक्कला मूसाना नियम हिलाकोटा मंचि मत्ते, असल तप्पु बतलो नाकु बस्केने तेळियाकोनवळ. ओक्कला मूसाना नियम, “वेरेतोर दानपोर्री आसे पळमा,” इंचि वेहाकोटा मंचि मत्ते, आसे पळमळ तप्पु इंचि नाकु तेळियाकोनवळ.

8 गानि पापम, मूसाना नियमते मत्ता आदेसकुन वाळ्कुंचि नावा लोप्पो अन्नि तीरकुना तप्पुड आसें पुटिस्ता. मूसाना नियम हिलाकोटे पापमकु जीवा हिलवापे.

9 दीनकन्ना मुन्ने मूसाना नियमतुन एरपाट कियाकोटेन पिस्सेक मत्तन. गानि बस्के अय्ते मूसाना नियमते मत्तव अन्नि आदेसकु* नाकु तेळियतां, अस्के नावा लोप्पो पापम कबळ कियालय दल्गिसि, नना पेनदा मुन्ने हासोत्ताप आतन.

10 बद आदेस अय्ते नाकु पिस्वर हियानद मत्ता, अदे आदेस नाकु हामुर हीता.

11 पापम मोका हळसि आदेसतुन वाळ्कुत्ता, नाकु दोका कीता. पजा अदे पापम नावा पिस्वरतुन नासडेम कीता.

12 गानि मूसाना नियम पवित्रमातद आंद. अव्टे रासि मनना आदेसाल्कगुडा पवित्र, नीतितव आनि बेसतव आंद.

* 7:7 निर्गमन 20:17

* 7:9 आदेस आदेस इत्ते सिनाइ गुट्टापोर्री मसांक पेन हीता पदि पोल्ले आंद.

13 अल्हा अय्ते आ पवित्रमाता बेस आदेसकुनाहेंदाले नाकु हामुर वाता इंचतिरा? अल्हा असले आयो. आ पवित्रमाता आदेसकुन वाळकुंचि पापम नाकु हामुरतुन हीता. अल्हा कीसि अद दाना असल रूपमतुन हुपिस्ता. पापम इत्ते बच्चोन कतरनाक आंद इंचि आ आदेसकुनाहेंदाल नाकु पुरागा तेळियनाहाटी अल्हा आता.

मनकना परिस्तिती

14 बारित्ते मूसाना नियम पेनदागटद आंद इंचि मनाकु एरपाट मंता. गानि नना पापि आसेने निंडिस मत्ताहेंका पापमता सेवा कियनाहाटी अम्मुळ होत्तोन आंदुन.

15 नना बतल कीसंतनो नाके तेळियसेक हिल्ले. नना बतल अय्ते कियगोमो, अद बारे कीसेक हिल्लेन आनि बद अय्ते कियमन्नो, अदुन बारे कीसंतन.

16 नना बतल अय्ते कियमन्नो अदुने नना कियानय्ते, मूसाना नियम बेसतद इंचि नना ओपकुंतन.

17 गानि कियामन्नि इत्ता कबाहकुन कियानोन नना आयोन, नाकुन अल्हा किया वेहानद नावा लोपपो मनना पापम आंद.

18 नावा लोपपो बदे बेसता पोल्ले हिल्ले इंचि नाकु एरपाटे मंता. बद अय्ते बेसतदो अदे कियना इच्चा नाकगुडा मंता, गानि अल्हा किया परसेक हिल्लेन.

19 बव अय्ते बेसता कबाहको अवे नना कियना इनकुंतन, गानि अव नना कियोन. बव तप्पुड कबाहक अय्ते कियना आयो इंचि इनकुंतनो, अवे तप्पुड कबाहक नना कीतन.

20 गानि नना बव कबाहक अय्ते कियानायो अवे कबाहक कियानय्ते, आ कबाहक कियानोन नना आयोन गानि नावा लोपपो मनना पापम आंद नाकुन किया वेहानद.

21 अदुनहाटी नना बस्के अय्ते बेसता कबाहक कियालय हूळंतन, अस्के नावा लोपपो मनना कराब गुनाल्क अल्हा कियालय नाकुन आपंतां.

22 पेन हीता नियमते नावा मनसु वेल्लेन कूस मंता.

23 गानि नावा मेंदुलपोरें मात्रम इंकुंदि बदो वेंर नियम अदिकारम ताकिस्ताप नाक दिस्सेक मंता. आ नियम, नावा बुद्दिदते मनना मूसाना नियमतोनि लडाइ कीसि नाकुन पापमता कय्दे अप्पजेपसंता.

24 अय्यो, नना बच्चोन गोसाते मंतन! हामुरता कय्दा हिळ्ळ मनना नावा ई पापि मेंदुलताल नाकुन बोर होळसा परंतोर?

25 मना सामि येसु किरिस्ते नाकुन होळसा परांतोर, नना पेनदुक दन्यवाद कीतन. नना मनसुनाल अय्ते पेनदा नियमतेन ताकाना इनकुंचंतन, गानि नावा मेंदुलते मनना कराब गुनाल्क नाकुन पापि कबाहक किया वेहचंतां.

8

पेनदा आत्माता ताकतते पिसमळ

1 अदुनहाटी बोर अय्ते येसुन नम्मिसि ओनतोनि कलियतुर, ओर्क पेन सिक्सा हिथ्यो. बारित्ते येसुन विस्वासम कीतोर, ओर ओरा बुद्दिद मत्ताप आयो गानि आत्मा वेहताप ताकंतुर.*

2 बारित्ते पेनदा आत्माता नियम येसु किरिस्तुनाहेंदाल मनाकु पूना पिस्वर हीता. मनाकुन पापम आनि हामुरता नियमताल तपिस्ता.

3 मनकालोरा बुद्दिद पापमता कय्दा हिळ्ळ मत्ताहेंका मनम मूसाना नियमतुन केंजाकोटा मत्तोम. अदुनहाटी अद नियम मनाकुन पिसागोटा पराहिल्ले, अदुन पेने पिसागोटा परता. अद बल्हा इत्ते, पेन दाना मरिन इद बूमिते लोहचीता. ओर मनकालोरा पापालकुन तेंडसि पोहनाहाटी, मनकाना मेंदुल्ले मारियतोर. अदे मेंदुल्ले ओर मना पापालकुना सिक्सातुन ओनपोरें एतकुत्तोर.

4 अल्हा बारि इत्ते, मूसाना नियमते रासि मत्ता आदेसकु मनाहेंदाल पूरा आयना इंचि. दीनहेंदाल इंदके मनम मना मनसुंक वाताप पिस्सेक हिल्लोम गानि पवित्र आत्मा वेहताप पिस्सेक मंतोम.

* 8:1 इद वचनम कोन्नि पांडु लिपिने हिल्ले.

5 पापि गुनाल्लकुना मनकल, पापि विचाराल्लके कीसेक मनंतोर, गानि पेनदा आत्मा वेहताप ताकाना मनकल आत्माकु गावाले मत्ता विचाराल्लके कीसेक मनंतोर.

6 इंका बोर मनकल अय्ते पापि गुनाल्लकुने पिस्सेक मनंतोरो, ओना हामुर तप्पो. बोर मनकल अय्ते आत्मा वेहताप कीतोरो, ओन्क पिस्वर, सांति दोर्कता.

7 बल्हा इत्ते, पापि गुनमता मनकल पेनदुक पगातोर आंदुर. इसोंटा मनकल पेनदा नियमते ताका हिल्लोर, आनि ताकोरगुडा.

8 पापि गुनाल्लकुने पिस्सना मनकल पेनदुन कूस किया पर्रोर.

9 गानि मीवा लोप्पोगिंटा पेनदा आत्मा मत्ते, मिमेट पापि गुनाल्लकुने पिस्सेक हिल्लिर गानि आत्मा वेहताप पिस्सतिर. बोना पिस्वरते अय्ते किरिस्तुना आत्मा हिल्ले, ओर किरिस्तुना मनकल आयोर.

10 मीवा लोप्पोगिंटा किरिस्तु मनानय्ते, मीवा मेंदुल पापम कीताहाटी हासि होत्ता, गानि पेन मीकुन सत्तेमतोर कीताहाटी, मीवा आत्मा बस्केळक पिस्सि मंता.

11 येसु किरिस्तुन हातोरव्टेटाल मरी जीवाते तेहता पेनदा आत्मा ओक्कला मीलोप्पो मनानय्ते, मीवा नासडेम आसि होनना मेंदुलतुनगुडा, मीलोप्पो मनना दाना आत्माहेंदाल जीवाते ईरता.

12 अदुनहाटी विस्वासुल्लकुनिटा, मनम मना पापि गुनाल्लकुंक बाकि मत्ताप, अव वेहताप पिस्सना अक्केर हिल्ले.

13 बारित्ते मिमेट पापि गुनाल्लकुने पिसानय्ते तप्पाकोटा हांतिर. गानि आत्माता सहायमतोनि मीवा पापि गुनाल्लकुन हक्कानय्ते मिमेट पिस्सतिर.

14 बोर अय्ते पेनदा आत्मा वेहताप ताकंतोर, ओर अंतोर पेनदा मर्क-मियाहक आंदुर.

15 पेन मीकुन मरी दासुल्लक कीसि वेराहलय दाना आत्मातुन हिया हिल्ले. गानि अद मीकुन दाना मर्क-मियाहक इनालय तयार कीता. दानहेंदाल मनम पेनदुन, “बाबालु,” इंचि केया परंतोम.

16 इंका पेनदा आत्मा मना आत्मातोनि कलियसि, मनम पेनदा मर्क-मियाहकुम इंचि गवाइ हीसेक मंता.

17 मनम पेनदा मर्क-मियाहक आताहाटी वारसदार्कगुडा आंदुम. पेनदा वारसदार्क आताहेंका किरिस्तुनतोनिगुडा मनम वारसदार्के. मनम ओनतोनि कलियसि ओना महिमाते पोत्तु आंतोम इनकुनानय्ते, ओना तकलिपतेगुडा पोत्तु आयापीता.

मनाकु पेनदा महिमाता वेलगु दोर्कता

18 नना मीकु इद बारि वेहचंतन इत्ते, मनाकु इंदके तकलिपकु, दुक्काल्क वांतंगे, गानि वायाना कालमते पेन दाना महिमाता वेलगुन हीसि बच्चोन मनाकु कदर हिथ्यार, दाना मति कीते इंदकेटा तकलिपकु बग्गेन दल्लगों इंचि नना इनकुंचंतन.

19 पेन दाना मर्क-मियाहकुंक हीता कदरतुन बस्के हुप्सार इंचि अद पुट्टिस्तव अनिटवे वेल्लेन आसेते एदुर ह्ळसेक मंता.

20 बारित्ते पेन पुट्टिस्तव अनिटव अवुना इच्चा परकारम बत्तक ओज्जाकोटा आया हिल्लें, गानि पेने दाना इच्चा परकारम अवुन बत्तक ओज्जाकोटा कीता.

21 इंचि पेन पुट्टिस्तव अनिटव नासडेम आयालय मंता. अदुनहाटी आ नासडेमताल तप्पिसि, पेनदा मर्क-मियाहकुनतोनि कलियसि पेनदा महिमा आयाना स्वतंत्रमतुन दोर्किच्चुकुनालय पूरा दुनियंता आसेते एदुर ह्ळसेक मंता.

22 उंदि मुरतळ एरपूराना वेलाते नोप्पि तेदसि बल्हा तनलाळंता, अल्हेने इद दुनियंता इदवेरादाका तनलाळसेक मंता, इद मनाकु एरपाटे.

23 पेन पुट्टिस्तवे आयाका, पेनदाहेंदाल मोदाटा पलम इंचि आत्मा दोर्कतोरम मनमगुडा, दाना मर्क-मियाहक आयालय मना कराब मेंदुलतुन होळसिसि पूना मेंदुल बस्के दोर्कार इंचि तनलाळसेक मंतोम.

24 मुक्ति दोर्कता इंचि इसोटा आसेते मनम मना परंतोम. गानि मनम बद आसेते अयते मंतोम, अद आसेतुन मनम मना कळकुने हळसेक मननेके, अद आसे बल्हा आया परंता? बतल अयते मनाकु दोर्कता, अदुन एदुर हळसेक बोरन्ना मनांतुरा? मन्नुर.

25 गानि बतल अयते मनाकु दोर्काहिल्ले, अदुना आसे पळानयते मात्रम मनम वेल्लेने ओप्केते, विस्वासमते एदुर हळसेक मनांतोम.

26 पारतना बल्हा कियमळो तेळियवस्के पवित्र आत्मा मनाकु सहायम कीता. मनाकु इनावायो असोटा पोल्लेन पवित्र आत्मा मनाहाटी पेनदागा तनलाळसेक विनंति कीसेक मंता.

27 मना मनसुने मत्ता विचाराल्कुन पेन बेस एरपाट कीता. अल्हेन आत्माता विचाराल्क बतल दानकु बेस एरपाट. अदुनहाटी पेनदा लोकुलकुंक गावाले मत्तदुनहाटी पवित्र आत्मा विनंति कियनेके पेनदा विचारम मत्तापे कीता.

28 बोर अयते पेनदुन पावरम कीतुर, बोर्कुन अयते पेन दाना पिलान मत्ताप केयता, ओर्क बसोटा परिस्तिति वायिना, पेन आ परिस्तिति ओरा बेसताहाटीगे कीता इत्ता पोल्ले मनाकु एरपाटे.

29 बारित्ते “बोर-बोर नापोरो विस्वासम कीतुर” इंचि पेन मुन्नेटाले एरपाट कीसि मत्ता. दाना मरिं येसु, ओर अंटोरा दादाल आयगोम इंचि पेन ओर्कुन येसुनसंटोर आयानाहाटी पेरता.

30 बोर-बोर्कुन अयते पेन पेरता ओर्कुन दाना हर्दे ताकालय केयता. इका बोर-बोर्कुन दाना हर्दे ताकालय केयता ओर्कुन नीतिमंतुल्क कीता. इल्हा नीतिमंतुल्क कीतोर्कुंक वेल्लेन कदरगुडा हीता.

31 इव अन्नि पोल्लें केंजतंका मनाकु उंदि विचारम तप्पाकोटा वांता, अद बतल इत्ते, पेने मना सायतक मत्तस्के मनाकु अड्डम तिरियनाहाटी पगातोर बोर मनांतोर?

32 पेन दानकु मत्ता वरोर मरिंनगुडा मनाहाटी हीता. वरोरे मरिं इंचि पज्जो-मुन्ने किया हिल्ले, अच्चोन बेस पेन आंदु. असोटास्के दाना मरिंनतोनि कळमातव अन्निगुडा मनाकु हिश्योना? तप्पाकोटा हीता.

33 कुदुदु पेने मनाकुन पेरसि नीतिमंतुल्क कीता. अयते मनापोरो दोसेम दोस्सानोर बोर आंदुर?

34 अयते मरि मनाकु सिक्सा तप्पो इंचि बोर इना परांतुर? सिराप पेने इना परंता. गानि येसु किरिस्तु मनाहाटी हातोर अस्के पेने ओन मरा जीवाते तेहाचि दाना तिना बाजुंक उपिस्ता. इंदके ओर अगा मनाहाटी पेनतोनि विनंति कीसंतोर.

35 अयते मनाकु बदे तिप्पल आयि, लोकुलकुना विरोद, दुक्कम, कर्बु, कपडिं दोर्काकोटा आयमळ, दोकाता जेगाते मनमळ आयि, कसेहक-गोर्कनि हक्कनसोटा वेला वायिनागानि इवन्नि येसु किरिस्तुना पावरमताल मनाकुन लक्कु किया परीं.

36 बारित्ते, “मोमोट नीवोर्क आताहाटी रोज-रोज लोकुल्क माकुन हक्कालय हळांतुर, मोक्कु हियालय मोळकुता गोरिनलेसीं मावा पिस्वर मंता,”[☆] इंचि दर्मसास्त्रमते रासि मंता.

37 इवन्नि तकलिप वायिनागानि, मनाकुन पावरम कियना किरिस्तु मनातोनि मत्ताहेंका मनमे गेल्संतोम.

38 बारित्ते नाकु इंदके पुरागा तेळियसोत्ता. अद हामुर आयि, पिस्वरे आयि, पेनदा दूतांगें आयिं, देय्याल्क-बूताल्क आयिं, इद कालम आयि, वायना कालम आयि, बवे सक्तिं आयिं,

39 बूमिता लोप्पोटव आयिं, बूमि पोरोटव आयिं. पेन पुट्टिस्तव बवे आयिं मना सामि येसु किरिस्तुनाहेंदाल मनापोरो मत्ता पेनदा पावरमताल लक्कु किया परीं.

9

यहूदिल्कुनपोरो पौलुस होंग आंतोर

1-3 नावा यहूदि लोकुल्क पेनदाल बल्हा लक्कु आसि मंतुर मरि? ओर अल्हा आताहाटी मनसुने नाकु वेल्लेन दुक्कम, बादा अनपिच्चंता. नना किरिस्तुना मनकन इंचि इदु पोल्ले निजम वेहचंतन,

आबद्दम आयो. नावा लोप्पो मनना पवित्र आत्मागुडा इद निजम इंचि गवाइ हीसंता. पेन नाकु सापनेम हीसि, नाकुन किरिस्तुनाल लक्कु किथ्यिना बेसे! नावा मनसु मात्रम नावा इस्नाएल लोकुल्क पिसगोम इंचि मंता.

4 पेनदा मर्क-मियाहक आयाना हक्क इस्नाएलना वंसंमते पुटतोरदे* आंद. पजा बय्लि बूमिते मत्तस्के पेनदा महिमा पेद्दा वेल्गासि इस्नाएलना वंसंमतोर्के दिसता. करार्क ओरतोने कीता, मूसाना नियम्कुगुडा ओर्के हीता, मोळकाना बेस रिवाजकु हीता, अचोने आयका ओर्क पोल्लेगुडा हीता.

5 एनकटा पेद्दाल्क अब्राहाम, इसाक आनि याकोब ईरगुडा ईरौरे आंदुर. अचोने आयका येसु किरिस्तुगुडा मनकन रूपमते ईरा वंसंमतेन पुटतोर. अन्निन ताकसना अदिकारम मत्ता पेने ई येसु किरिस्तु आंदुर. अव अन्नि बस्केळ्क ओने तल्सकुन्नि. आमीन.

6 पेन इस्नाएलना वंसंमतोर्के हीता पोल्ले तपता इंचि नना इंचेक हिल्लेन, गानि इस्नाएल देसेमते पुटतोर अंतोर इस्नाएलना वंसंमतोर आयुर इंचि नना वेहचंतन.

7 अचोने आयका अब्राहामुना वंसंमतोर अंतोरगुडा ओना निजम पिलाल्क इंचि मनम इनानायो. बारित्ते इदुना बारेमते दर्मसास्त्रमते, “सिराप इसाकुना वंसंमतोरे नीवा वंसंमतोर इंचि लेक्का कियमळ जर्गता,”* इल्हा रासि मंता.

8 दीना अर्तम बतल इत्ते अब्राहामुना वंसंमते पुटतोर अंतोर पेनदा मर्क-मियाहक आया पस्स. गानि पेन हीता पोल्ले परकारम बोर अय्ते पुटतुर ओरे अब्राहामुना निजम मर्क-मियाहकुना लेक्काते वांतुर.

9 अब्राहामुंक पेन हीता पोल्ले इल्हा मत्ता, “इत्ता वेलाक नना मर्रा मल्सि वांतन, सारालां वरोर मर्रिन कनंता.”*

10 आ मर्रि इत्ते मना एनकटा पेद्दा मनकल इसाक आंदुर. ओर रेबेका इनानदानतोनि मर्रिंमा आतोर अस्के अद नेला तप्सि एमडाल्कुन कंता.

11-12 गानि आ पिलाल्क पुट्टका मुन्नेन, ओर बद्दे मंचि-सेड्डा किय्यका मुन्नेन पेन रेबेकांकु, “मुन्ने पुट्टना पेडल पज्जो पुट्टनोना सेवा कियानुर,”* इंचि वेहचि मत्ता. पेन मनकालोर्कुन ओर कीता कबाह्कुकुन पोर्रोटाल केयो, गानि दाना इच्चा मत्ताप ओर्कुन केयंता, इंचि मनाकु दीनहेंदाल तेळियता.

13 दीना बारेमते दर्मसास्त्रमते, “नना याकोबुन कीतच्चोन पावरम, एसावुन किया हिल्लेन,”* इंचि रासि मंता.

14 इदुन केजसि मनम बतल इंदकोम मर्रि? पेन अन्यायम कीता इंदकोमा? असले आयो.

15 बारित्ते, “नना बोनपोर्रो दया हुपिच्चन, बोनपोर्रो दया कीकन, बोनपोर्रो दया हुपिच्चन, बोनपोर्रो दया कीकन, अद नावा इस्टम मत्ताप नना कीतन,”* इंचि पेन मूसांक वेहचि मत्ता.

16 इल्हा बोनपोर्रो दया किय्यना इंचि पेने निरनायम कीता. इद मनकना कय्दे हिल्ले. दान दोर्किच्चुकुननाहाटी मनम बच्चोन कस्टम किथ्यिना एर्तमि.

17 पेन पिरोनः राजानतोनि इत्ता पोल्ले दर्मसास्त्रमते इल्हा रासि मंता: “नावा ताकततुन नीवाहेंदाल हुप्संतन अस्के नावा पोरोल पूरा दुनियामेळ तेळियसि होन्नार. इदुनहाटीगे नना नीकुन राजाल इंचि निलाहतन.”*

18 दीनहेंदाल मनाकु बतल तेळियंता इत्ते, पेन अद इनकुत्तोन पोर्रो दया कीता, अल्हेने अद इनकुत्तोन कटकेलमरि कीता.

19 इसोत्तस्के, “पेन अय्ते अद इनकुत्तापे ई दुनियाते किया गोट्टंता. अयना मावा पोर्रेन बारि दोसेम दोसंता?” इंचि मिमेट नाकुन इनकिर.

* 9:4 वंसंमते पुटतोरदे यहूदि लोकुल्क. ✨ 9:7 उत्पत्ति 21:12 † 9:9 साराल इद अब्राहामुना मुत्तो आंद. इद गोडमुरादि मत्ता. ✨ 9:9 उत्पत्ति 18:10-14 ✨ 9:11-12 उत्पत्ति 25:23 ✨ 9:13 मलाकी 1:2-3 ✨ 9:15 निर्गमन 33:19 ‡ 9:17 पिरोन पिरोन राजाल इरगा कटकेलमरि मत्तोर, इंचि पेन ओन इंका कटकेलमरि कीता. कटकेलमरि मत्तोने पेन कटकेलमरि कीता अंतोर्कुन आयो. ✨ 9:17 निर्गमन 9:16

20 गानि मनका, पेनदुन मल्सि पूसकियानोन निमे बोन आंदिन? “निमे नाकुन इल्हा बारि तयार कीतिन?” इंचि अळका बस्केनना कुम्मन पूस कीतना?

21 उंदे तोळि मुद्दाताल सगोम बेस सिंगारम अळकां, इंका सगोमताल सादा अळकां तयार कियना अदिकारम वरोर कुम्मांकु हिल्लेना? तप्पाकोटा मंता.

22 अल्हेने पेनदुकगुडा अद इनकुत्ताप कियना अदिकारम मंता. गानि नासडेम आसि होनानोर्कुन नासडेम कीसि पोहका ओप्के पीसि मत्ता.

23 पेन अल्हा ओप्के पीसि बारि मत्ता इत्ते, पेन दाना महिमा आनि दया बच्चोन बेसतद इंचि बोरो लोकुकुक अय्ते हृप्सना मत्ता, अद ओर्कुन मुन्नेन पेरता.

24 मनम अंतोरम पेन पेरता लोकुकुके. गानि पेन सिराप मना यहुदिल्कुनाले पेरां हिल्ले, यहुदि आयवोर लोप्पोटालगुडा पेरता.

25 यहुदि आयवोरा बारेमते पेन होसे पोरोलता पेनदा कबुरतोना पुस्तकमते इल्हा वेहता:

“मुन्ने नना बोरो लोकुकुकुन अय्ते नावा लोकुकुक इंचि इना हिल्लेन,

इंदके ओर्कुन नना नावा लोकुकुक इंचि केयकन.

इंका दीनकन्ना मुन्ने बोर्कुन अय्ते नना पावरम किया हिल्लेन,

ओर्कुन नना पावरम कीकन.”

इल्हा पेनबाबाल रासा वेहतोर. अचोने आयका,

26 “मिमेट नावा लोकुकुक आयिर इंचि नना बगा अय्ते इत्तनो,

अग्गेन मिमेट जीवाते मनना पेनदा मर्क-मियाहक आतिट इंचि इनानुर,”*

इल्हा रासि मंता.

27 इंका यसायाह इनना पेनदा कबुरतोरागुडा इस्राएल लोकुकुकुना बारेमते बतल इत्तोर इत्ते,

“इस्राएल लोकुकुक समुद्रमते मनना उस्केलेसी लेक्का परवच्चुर मंतुर.

अयना पेन हियना सिक्साताल इच्चुरे पिस्संतुर.

28 बारित्ते ई दुनियाते मनना

अंतोर लोकुकुकुन पेन बिरानेन सिक्सा कियानद मंता, अद पुरागा कीता,”*

इंचि वेहतोर.

29 अचोने आयका,

“अन्निटकन्ना ताकतवार पेन ओक्कला मनाहाटी,

मना वंसमतोरवेटाल इच्चुर्कुन होळसाकोटा मंचि मत्ते,

मनम सदोम, गमोरा नहकुना लोकुकुकुनालेसी नासडेम आसि मन्नेरम,”*

इल्हागुडा यसायाहल मुन्नेन वेहचि मत्तोर.

बेसता कबुर आनि यहुदिल्क

30 अय्ते मनम इंदके बतल इनकोम? यहुदि आयवोर पेनदा मुन्ने नीतिमंतुल्क आयालय ह्ळा हिल्लुर गानि येसु ओराहाटी कीतदुन ओर विस्वासम कीतुर इंचि पेन ओर्कुन नीतिमंतुल्क कीता.

31 इस्राएल लोकुकुकु बारे मूसाना नियमते वेहताप ताकासि नीतिमंतुल्क आंतोम इंचि इनकुत्तुर. गानि ओर अल्हा नीतिमंतुल्क आया हिल्लुर.

32 बारित्ते ओर किरिस्तुन विस्वासम किय्यका बेसता कबाहक कीसि नीतिमंतुल्क आयालय ह्ळुत्तुर. इंचि येसु किरिस्तु इस्राएल लोकुकुकुनाहाटी ओरा हरदे, दल्गिसि हिळ्ळु अरहना बंडालेसी§ मंतोर.

33 इदुना बारेमते दर्मसास्त्रमतेगुडा इल्हा रासि मंता:

“ह्ळ्ळाट, सियोनते* नना उंदि बंडातुन इरसंतन,

* 9:26 होसे 1:10 * 9:28 यसायाह 10:22-23 * 9:29 यसायाह 1:9 § 9:32 हिळ्ळु अरहना बंडाइद

वचनमते हिळ्ळु अरहना बंडाता अर्तम येसु सामि आंदुर. * 9:33 सियोन इद येस्सलेम सहरता पडना पोरोल आंद.

अद बंडा इच्चुर्क दलगंता, इकिच्चुर बारे दान्क दल्लिसि हिळ्ळ अरंतुर.
बोर अय्ते दानपोर्रो विस्वासम इरंतुरो, ओरद बस्केने सिन्नातनम आयो.”*
इंचि रासि मंता.

10

1 विस्वासुल्कुनिटा! नावा इस्त्राएल लोकुल्कुंक पेन मुक्ति हिद्यि इंचि नावा वेल्लेन मनसु मंता.
अदुनहाटी नना पेनदुक पारतना कीसेकेन मंचंतन.

2 पेनदा सेवा कियना इंचि ओर्क वेल्लेन जिद्दु मंता, इदुन नना कुद्दु हळ्ळतन. गानि पेनदा सेवा
कियना निजम हरि ओर्क तेळियो.

3 बारित्ते पेने लोकुल्कुन नीतिमंतुल्क कीता इल्ता संगति ओर्क तेळियका, सतता नियमताहेंदाल
नीतिमंतुल्क आंतोम इंचि ओर इनकुत्तुर. इल्हा ओर पेन हुपिस्ता हर्दुन ओप्कुना हिल्लुर.

4 गानि येसुनपोर्रो विस्वासम कियानोर अंतोर नीतिमंतुल्क आयानाहाटी किरिस्तु मूसाना नियमता
आकिरि आंदुर.

पेन अंतोर्कुन पिसागोटंता

5 दर्मसास्त्रमते मूसाल बतल रासतोर इत्ते, “बोर अय्ते दर्मसास्त्रमते मत्ताप ताकसि नीतिमंतुड
आयालय हळंतुर, ओर उंदि नियमगुडा तप्पाकोटा ताका पीता, अस्केन ओर अवुनहेंदाल नीतिमंतुड
आंतोर.”*

6-8 मिमेट, “माकु पेनदा पोल्ले कराह्लासि स्वर्गमते होंचि किरिस्तुन इदु बूमिपोर्रो बोर तरा
परांतोर, हिलाकोटे हातोरवेटाल किरिस्तुन जीवाते तेहचि तरालय बोर दांतोर?” इंचि इनकुनमट.
गानि विस्वासम कीसि नीतिमंतुड आयनोरा बारेमते दर्मसास्त्रम बतल वेहंता इत्ते, “पेनदा पोल्ले
निहागेन मंता, नीवा मनसुना लोप्पो आनि नीवा तोळ्देन मंता.” मोमोट मीकु वेहता पोल्ले इवे आंदुं.

9 अद बल्हा इत्ते, नीवा पिस्वरते, येसुए नावा सामि इंचि निमे तोळ्दाल ओप्कुंचि, ‘ओन पेन
हातोरवेटाल मरा जीवाते तेहता,’ इंचि निमे नीवा मनसुनाल विस्वासम कीते, पेन नीकु मुक्ति हीता.

10 बारित्ते मनम मनसुनाल विस्वासम कीतोम इंचि मनाकुन पेन नीतिमंतुल्क कीता. तोळ्दाल
ओप्कुत्तोम इंचि मनाकु पेन मुक्ति हीता.

11 दर्मसास्त्रमतेगुडा इल्हा रासि मंता: “ओनपोर्रो विस्वासम कियानोर बोरे आयिर, पेनदा मुन्ने
ओनद बस्केने सिन्नातनम आयो.”*

12 पेनदापोर्रो विस्वासम इरंनोर बोरे आयिर, ओर यहुदि आयिर, युनानिर आयिर अंतोर उंदे,
अंतोर्कुंक ओर वरंरे सामि आंदुर. ओना पोरोल एतसि पारतना कियना अंतोर्कुंक ओर वेल्लेन आसिर्वाद
हीतोर.

13 “सामिना पोरोल एतसि पारतना कियनोर ओर बोर्नना आयिर पेन ओन पिसागोटंता,”* इंचि
दर्मसास्त्रमते रासतद मंता.

14 बोर अय्ते किरिस्तुनपोर्रो विस्वासम किया हिल्लुर, ओर ओना पोरोल बारि एतनुर? बोर अय्ते
ओना बारेमते केंजा हिल्लुर ओर बल्हा विस्वासम कियानुर? बोर अय्ते ओर्क वेहानोर हिल्लुर, ओर
बल्हा केंजानुर.

15 अल्हेने पेन बोर्कुने लोहाकोटे ओरगा होंचि ओर बल्हा वेहा परांतोर? असले वेहा परोर. दीना
बारेमते दर्मसास्त्रमते इल्हा रासतद मंता: “बेसता कबुरतुन पीसि वायना लोकुल्कुन हळ्ळते बच्चोने
कुसि आंता!”* इंचि रासि मंता.

* 9:33 यसायाह 8:14; 28:16 * 10:5 लैय्वस्ता 18:5 * 10:11 यसायाह 28:16 * 10:13 योएल
2:32 * 10:15 यसायाह 52:7

16 गानि इस्राएल लोकलुक अद बेसता कबुरतुन केंजसिगुडा अंटोर विस्वासम किया हिल्लुर. बारित्ते, “ए सामि! मोमोट वेहता कबुरतुन बोर नम्मुर?”* इंचि दीना बारेमते दर्मसास्त्रमते यसायाहल रासतोर.

17 इल्हा किरिस्तुना बारेमता बेसता कबुरतुन बोरन्ना वेहतेने केंजांतुर, केंजतेने विस्वासम किया परांतुर.

18 अयना नना उंदि पोल्ले पूसकीतन, इस्राएलतोर इद कबुरतुन केंजा हिल्लुरा? तप्पाकोटा केंजतुर. इदुना बारेमते इल्हा रासतद मंता:

“ओरा लेंग दुनियंता केंजा होल्ता, ओरा पोल्ले दुनियता मूला-मूलादाका एव्ता,”* इंचि दर्मसास्त्रमते रासि मंता.

19 अयना इंकुंदि पोल्ले पूसकीतन, इस्राएल लोकलुक कबुर केंजतस्के अद ओर्क तेळियतना तेळिया हिल्लेना? तप्पाकोटा तेळियता. मूसाना नियमते मुन्नेन रासि मत्ताप,

“विलवा हिलुवा यहुदि आयवोर्कुन नना पावरम कीसि,

मीकु कळक पोत्तानाल कीतन.

अल्हा कीसि नाकुन एरपाट कियवा यहुदि आयवोरहेंदाल,

मीकु होंगु वायनाल कीतन,”* इंचि पेन इस्राएल लोकलुकुन इत्ता.

20 पजा

“नाकुन पहकवोर नाकुन दोर्किच्चुत्तुर.

नाकुन पूसकियवोर्कुन ननाने कुद्दु दिसतन,”* इल्हा पेन वेहता पोल्लेतुन दैरनेम कीसि यसायाहलगुडा रासतोर.

21 गानि इस्राएल लोकलुकुना बारेमते पेन बतल इत्ता इत्ते,

“ना पोल्ले केंजाकोटा मर्लाबळता लोकलुकुनाहाटीं,

नना दिन्म एदुर हळसेक मत्तन,”* इंचि पेन वेहता पोल्लेतुन यसायाहल रासतोर.

इंचि पेन वेहता पोल्लेतुन यसायाहल रासतोर.

11

पेन दाना लोकलुकुन होळसो

1 अयते मरि, पेन दाना इस्राएल लोकलुकुन होळसीता इत्तापा? हिल्ले. बारित्ते ननागुडा इस्राएल मनकने आंदुन. नना अब्राहामुना वंसंम आनि बेंजामिन* गोत्रमतोन आंदुन.

2-3 पेनदुक मोदोलताले तेळियसि मत्ता. दाना इस्राएल लोकलुकुन अद होळसा हिल्ले. एलिया इनना पेनदा कबुरतोना बारेमते दर्मसास्त्रमते बतल रासि मंता मीकु तेळियोना? ओर इस्राएल लोकलुकुनपोर्रो तप्पुक दोस्सेके इल्हा इत्तोर, “ए सामि, ई लोकलुक अयते नीवा कबुरतोर्कुन हळकतुर, नीकु मोक्कु हिय्यना गद्देनंता कूलाहतुर. नना वरोने पिस्सि मंतन. इंदके नाकुनगुडा हळकालय हळसंतुर,”* इंचि इत्तोर.

4 गानि पेन ओन्क बसोटा जवाब हीता मीकु मति मंतना? “अल्हा इनकुनमा! बाला इनना पेनदुक बस्केने मोळकवसोटा एडुं वेय्कुना मंदितुन नावाहाटीं नना वेरे कीसि इरतन,”* इंचि पेन ओन्क वेहता.

5 अल्हेने इंदकेगुडा पेनदा कुर्पाहिंदाल इच्चुर लोकलुकुन दानाहाटीं वेरे कीसि इरता.

6 ओरा बेसता कबाह्कुन हळसि पेन ओर्कुन पेर्पा हिल्ले, गानि अद दाना कुर्पाहिंदाले ओर्कुन पेस्ता. ओक्कला अल्हा जर्गकोटा मंचि मत्ते, दाना कुर्पा निजम कुर्पा मनाकोनवड.

* 10:16 यसायाह 53:1; योहान 12:38 * 10:18 बजन संहिता 19:4 * 10:19 व्यक्ताविवरन 32:21

* 10:20 यसायाह 65:1 * 10:21 यसायाह 65:2 * 11:1 बेंजामिन इस्राएलतोर पन्नेड गोत्रालुकुनाल उंदि गोत्रम

आंद. * 11:2-3 1 राजा 19:10-14 * 11:4 1 राजा 19:18

7 इल्हा इस्राएल लोकुलक बद्दुन अयते मनसु तासि प्हकसेक मत्तुरो, अद ओर्क दोर्काहिल्ले. गानि पेन पेरकुत्तोरुकुंक मात्रम अद दोर्कता. कळमतोर बोर अयते मत्तुर, ओर पेनदा पोल्ले केंजाकोटा ओरा मनसुन गळसु कीता.

8 दर्मसास्त्रमतेगुडा इल्हेन रासि मंता:

“पेन ओर्कुन निद्रा मत्ताते वाटसीता, * कळक मंचिगुडा हिलवाप कीता.

केव्क मंचिगुडा हिलवाप कीता, इदवेरदाकागुडा ओरा गति इल्हे मंता.”*

9 इदुना बारेमते दाविद राजालगुडा दर्मसास्त्रमते इल्हा इत्तोर,

“ओर तिनूळ-उनुळ कियना वेलाते, उंदि गत्तरा वाताप ओर्क तकलिप वायि.

तकलिप वासि ओर हिळु अरिर, ओरा पापालकुना सिक्सा ओरे बोगांचिर.

10 ओरा कळकुंक हीकट वाताप आसि, निजम बतलो ओर्क दिसाकोटा आयि.

ओरा नडिं कस्टालकुना मोता कांजा पराका, बस्केळताहाटी गूनि आसि होन्नि,”*

इंचि इत्तोर.

11 अयते नना इंकुंदि पोल्ले पूसकीतन. इस्राएल लोकुलक पुरागा तेदा पराकोटा हिळु अरतरा? अरां हिल्लुर. गानि ओर पापम कीतुर इंचि ओर्क दोर्कना मुक्ति, यहुदि आयवोर्क दोर्कता. दीन हळसि यहुदि लोकुलकुना कळक पोत्तागोम इंचि पेन अल्हा कीता.

12 यहुदि लोकुलक किरिस्तुन हय्सका पापम कीतुर अयते दुनियाते मनना वेरे जातितोर्क पेन वेल्लेन आसिर्वादी हीता. यहुदि लोकुलकुंक नुकसान आताहेंका यहुदि आयवोर्क पायदा आता. इल्हा यहुदि लोकुलकुंक नुकसान आताहेंकेन अंटोर्क पायदा आता अयते, मिमेटे विचारम कीम्टु, ओक्कला ओरगिटा किरिस्तुनहेके पुरागा तिरियानयते दुनियाते मनना वेरे जातितोर्क बच्चोन वेल्ले आसिर्वादी दोर्कार!

यहुदिल्क विस्वासमते वांतुर इत्ता पौलुस आसे

13 इंदके यहुदि आयवोरवटेताल मिमेट बोर अयते विस्वासमते वातिर, मीक वेहानद बतल इत्ते, पेन नाकुन प्रेरित इंचि मीवाहाटी पेरता. अदुनहाटी नना कियना सेवा बच्चोनो बेसतद इंचि वेल्लेन कूस मंतन.

14 इल्हा कीतेनना मीकु आता पायदातुन हळसि नावा यहुदि लोकुलकुना कळक पोत्सि ओरावटेताल गिच्चचुरन्ना विस्वासमते वायानुर इंचि नावा आसे.

15 अद बल्हा इत्ते, इस्राएल लोकुलक पेनदाल लक्कु आताहेंका दुनियातोर पेनदुक दग्गेरा आतुर. इस्राएलके इस्राएल लोकुलकगुडा पेनदुक दग्गेरा आंतुर इनकुंट, अस्के इद पोल्ले वरोर हातोर्क मरा जीवा अरतापे आयोना!

16 ओक्कला अब्राहाम आनि एनकटा पेदू दालक पवित्रमातोर आते, ओरा पिलाल्कगुडा पवित्रमातोर आंदुर. ओक्कला मराता हिहकुगिटा पवित्रमातव आते, मराता कोम्मांगुडा पवित्रमातवे आंदुर.

17 यहुदिल्क इत्ते पेन पोस कीता जयतुन मराता कोम्मनसंटोर आंदुर. मिमेट यहुदि आयवोर इत्ते केडाते पुटसि-बेर्सता जयतुन मराता कोम्मनसंटोर आंदिर. पेन पोस कीता मराताल सगोम कोम्मन रेब्बिस पोहताप पेन दान नम्मुवा यहुदिल्कुन पोहचीता. पोहचि, केडाते पुट्सि-बेर्सता जयतुन मराता कोम्मन तच्चि रेब्बिस पोहता कोम्मना जेगाते अंटा वाटताप मीकुन ओरवटे कल्पता. अल्हासि पेन पोस कीता मराता हिहकुनाल मीकु ताकत दोर्कसंता.

18 बस्केळक आयि, हिहकुनाले कोम्मांक ताकत दोर्कता, कोम्मानाल हिहकुंक आयो इदुन मति ईर्ट. अदुनहाटी “रेब्बिस पोहता कोम्मांकन्ना मोमोटे बेसतोरम” इंचि पोंगमट.

19 इद केंजसि, “माकुन अंटा वाटालये कोम्मन रेब्बिस पोहता,” इंचि मिमेट इंदके इनकुंचतिर बारे!

20 मिमेट इनानद निजमे! गानि उंदि पोल्ले मति ईरट, ओर पेन पोरो विस्वासम कियवाहेका पेन ओर्कुन कोम्मन नर्किसि पोहताप पोहचीता. मिमेट बारे किरिस्तुनपोरो विस्वासम कीतिर इंचि पेनतोनि कलियसि मंतिट. अदुनहाटी वट्टिदे पोंगसेके तिरियाकोंटा पेनदुक वेरियसि मंटु.

21 बारित्ते पेन सतागा पोस कीता मराता कोम्मनसोंटा यहुदिल्लकुने रेब्बिस पोहता अय्ते, मिमेट अय्ते केडाते पुटसि-बेर्सता मराता कोम्मनसंटोर, विस्वासमते कमजोर आते मीकुन असले होळसो.

22 नना वेहानद बेस केंजट. मिमेट पेनदा दयातुन, दाना होंगुन बेस एरपाट कीम्टु. बोर अय्ते विस्वासमताल पजोळक आतुर, ओरापोरो पेन होंग हुपिस्ता. गानि मिमेट विस्वासमते ताकसेकेन मंतिर इंचि मीवापोरो पेनदा दया मंता. हिलाकोंटे मीकुनगुडा कोम्मन नर्किसि पोहताप तेंडसि पोहंता.

23 नर्किसि पोहता कोम्मनसोंटा यहुदि लोकुलक ओक्कला मरा पेनदापोरो विस्वासम कीते, नर्किसि पोहता कोम्मन मरा अंटा वाटताप पेन ओर्कुन मरा दानतोनि कल्पकुंता. बारित्ते पेन अल्हा क्रिया परंता.

24 मिमेट अय्ते केडाते पुटसि-बेर्सता जय्तुन मराता कोम्मनसंटोर आंदिर. यहुदिल्लक बारे पेन पोस कीता जय्तुन मराता कोम्मनसंटोर आंदुर. अयना मीकुन पेन दाना लोकुलकुने कल्पकुत्ता अय्ते, यहुदिल्लक पेनदागा मरा मल्लिस वायानय्ते अद ओर्कुन मरा अल्कगा कल्पकुना परंता.

पेन इस्राएल लोकुलकुन पिसागोटंता

25 विस्वासुल्लकुनिटा, “मोमोटे तेल्विगल्लोरम” इंचि मिमेट पोंगामन्नि. अदुनहाटी इस्राएलतोरा बारेमता उंदि मर्मम मीकु वेहना इनकुत्तन. अद बतल इत्ते, पेनदा विचारम परकारम, यहुदि आयवोर बचटुर लोकुलक अय्ते विस्वासमते वायनद मंता ओर अंटोर किरिस्तुनपोरो विस्वासम कियनदाका इस्राएलता इच्चुर लोकुलक पेनदा पोल्ले केंजाकोंटा गळसु आसि मनानुर.

26 गानि दाना पजा अंटोर इस्राएल लोकुलकुन पेन पिसागोट्टार. इदुना बारेमते इल्हा रासि मंता:

“पिसागोटनोर सियोनताल वायानुर,

ओर याकोब वंसंमतोर्कुन तप्पुड हरदाल तिराहचि बेसता हर्दुक तरांतोर,

27 नना ओरा पापालकुन मापि कीसि, ओरतोनि कीता करारतुन पूरा कीतन,”*

इंचि पेन इत्ता पोल्ले दर्मसास्त्रमते रासि मंता.

28 वेल्लेटोर इस्राएल लोकुलक किरिस्तुना बारेमता बेसता कबुरतुन नम्मुवाहेका इंदके ओर्कुन पेन बेसता कबुरता पगातोर इंता. दीनहेंदाल मीकु मात्रम पायदा आता. गानि अब्राहाम, इसाक, याकोब ई एनकटा पेद्दालकुंक हीता पोल्ले परकारम यहुदिल्लक इंदकेगुडा पेनदा पावरमगल्ला लोकुल्ले आंदुर.†

29 बारित्ते वरम हियमळता बारेमते आयि, दग्गेर्क केयकुनना बारेमते आयि, पेन बस्केने पजोळक आयो.

30 यहुदि आयवोर मिमेट, मुन्ने पेनदा पोल्ले केंजाकोंदिर. गानि इंदके यहुदिल्लक पेनदा पोल्लेतुन केंजवाहेका पेन मीकुन दग्गेरा कीसि मीवापोरो दया कीता.

31 अल्हेने इंदके यहुदिल्लक पेनदा पोल्ले केंजसेक हिल्लुर. अदुनहाटी पेन मीवापोरो दया कीता. इदे कुर्पिहेंदाल उंदि रोजु ओरपोरोगुडा पेन दया कीता.

32 बारित्ते, पेनदुक अंटोर लोकुलकुनपोरो दया कियानद मंता. अदुनहाटी पेन यहुदिल्लकुन, यहुदि आयवोर्कुन अंटोर्कुन दाना पोल्ले केंजाकोंटा, गळसु कीसि इरता.

33 ओहो, मावा पेनदा दनम, बुद्दि आनि तेल्वि बच्चोन पेद्देद आंद! अद बल्हा न्यायम कीता, बस्के कीता, इदुन बोरे एरपाट क्रिया परोर. दाना हरि बोर्के तेळियो.

34 दर्मसास्त्रमते इल्हा रासि मंता:

“पेनदा विचाराल्लकुन बोर एरपाट क्रिया परंतोर? पेनदुक बोरन्ना बुद्दि वेहा परांतोरा?*

* 11:27 यसायाह 59:20-21; 27:9 † 11:28 पेन पेद्दालकुंक हीता पोल्ले उत्पत्ति 12:2-3 वचनाल्लकुने रासि मंता.

* 11:34 यसायाह 40:13

35 हिलाकौंटे बोरन्ना पेनदुक बाकिक हीतोर मंतोरा, दान मरां तिरियसि तल्कालय?☆
हिल्ले.”

36 दुनियाते मनानव अन्नि पेनदागटाले वातां, अन्निन अदे पुटिस्ता, दुनियाते मनानव अन्नि दानाहाटीगे मंतां. युगा-युगाल्कुनदाका दानदे महिमा आयि, आमीन.

12

मीवा पिस्वरतुन पेनदुक अप्पजेप्पट

1 अय्ते विस्वासुल्कुनिटा! पेन मनापोर्रो कीता दयातुन मति कीसि, नना मीकुन बतिमलाडसि विनंति कियानद बतल इत्ते, मिमेट मीवा पिस्वरतुन पवित्र इरसि, पेनदुक नच्चनसोंटा मोक्कु हीताप मी पिस्वरतुन जीवाते मननेकेन अप्पजेप्पट. इल्हा कीतेन मिमेट पेनदा निजम सेवा कीसि तलस्कुत्ताप आंता.

2 मिमेट इद दुनियातोर पिसताप पिस्सामन्नि गानि मिमेट मीवा मनसु मार्सकुंचि पेनदुक नच्चना पिस्वर पिस्सट. अस्के पेनदा इच्चा बतलो एरपाट कीतिर. एरपाट कीसि, “अद इच्चा वेल्लेन बेसतद, कुसि हियानद, बतले तप्पु हिलवद,” इंचि मीकु तेळियंता.

3 पेन दाना कुर्पाते नाकुन सेवक इंचि निलाहता, दानहाटीं नना मीकु वरोर-वरोक बतल वेहसेक इत्ते, पेन मीक तूसि हीता विस्वासमता लेक्का परकारमे वळ्कना अचोने, दानकन्ना एक्को विचारम कियमट.

4 मना मेंदुल उंदे गानि दान्क कय्क, काल्क, कळ्क, केक्क, तोड्डि, मोसोर तल्ला इवन्नि मंतां. इवन्नि उंदे कबळ किय्यका, वेरे-वेरे कबाहक कीतां.

5 अल्हेन मनमगुडा वेल्लेन मंदि अय्नागानि किरिस्तुनतोनि कलियसि उंदे मेंदुललेहका मंतोम. इंचि मनम कय्क-काल्कुनलेहका उंदे मेंदुलक अंटिस मंचि वरोक-वरोर बेस कलियसि मंतोम.

6 पेन मनापोर्रो कुर्पा हृप्पिचि मनाकु वरोर-वरोक उंद-उंदि वरम हीता. आ वरमतुन एरपाट कीसि मनम पेनदा सेवा किय्यळ गावाले. ओक्कला बोनकन्ना पेनदाहेंदाल कबुर तच्चि वेहना वरम दोर्कते, ओर ओना विस्वासमता लेक्कातेन अद कबळ कियगोम.

7 सेवा कियना वरम दोर्कतोर ओर विस्वासमते सेवा कियगोम, पेनदा पोल्लें कराहना वरम दोर्कतोर ओर विस्वासमते पेनदा पोल्लें कराहना कबळ कियगोम.

8 कराहचि दैरनेम हियना वरम दोर्कतोर कराहचेके दैरनेम हीसेक होनना, दानम किया परानोर ओर पूरा मनसुनाल दानम कियगोम, लीडर आसि लोकुल्कुन ताकसना वरम दोर्कतोर जिम्मेदारिते ओर्कुन ताकिचोम आनि दया कियना वरम दोर्कतोर ओर कुसिते दया कियगोम.

9 लोकुल्कुंक हुप्सना इंचि पावरम कियमट, निजम पावरम कीम्टु. तप्पु कबाहकुन हय्समट, बस्केळ्क बेस कबाहक कीसेक मंटु.

10 उंदि कुटुंबतोरलेसी वरोक-वरोर बेस पावरम कीकुंटु, वरोक-वरोर कदर हियनेके, मनाकन्ना एक्को इंकावरोक कदर हीम्टु.

11 कबळते बस्केने लंडु कियमट, पेनदा सेवा कियनाहाटीं मीवा जीवा बस्केळ्क उसार ईरंट.

12 पेन हीता आसेते मिमेट बस्केळ्क कूस मंटु. तिप्पल्क वायिनागानि पजोळ्क होनाकौंटा ओर्सकुंटु. बस्केळ्क पारतना कीसेके मंटु.

13 पेनदा लोकुल्कुंक अव्वरम अरतस्के मिहगा मत्तद ओर्क हीसि सहायम कीम्टु, बोरन्ना विस्वासुल्क मी लोन वातस्के ओरा सेवा कियालय बस्केळ्क तयार मंटु.

14 मीकु तकलिप हियानोर्कुंक आसिर्वाद हीम्टु. आसिर्वाद हीम्टु गानि सापनेम हियमट.

15 कुसिते मननोरतोनि मिमेटगुडा कुसिते मंटु, अळानोरतोनि मिमेटगुडा अळट.

16 अंतोरतोनि बेस कलियसि मंटु, पोमाडेंगि वेहकुन्मटु. कदर हिल्ला लोकुल्कुनतोनि बेस कूळसि मंटु, मोमोटे तेल्विगल्लोरम इनकुनमटु.

17 बोरन्ना मीकु तकलिप हीते, मिमेट ओर्क तकलिप हीसि बदला येतमट. अंटोरा नदरते बद बेसो, अदे कियना विचारमते बस्केळक मंटु.

18 कुदुरतच्चोन अंटोरतोनि बेस कलियसि सांतिते मनना कोसिस कीम्टु.

19 “बदला येतना कबळ नावद आंद, मिमेट बदला येतमट,”* इंचि पेन वेहता पोल्ले पुस्तकमते रासि मंता. अदुनहाटी नावा पावरमगल्ला विस्वासुल्लकुनिटा, मिमेट बदला येतमट, ओरा बदला पेन येतंता, ओर्कुन पेनदुक होळसीम्टु.

20 अल्हा पगा येतनदानकन्ना

“मीवा पगातोर कर्बुनि मत्तस्के ओर्क गाटो दोस्सट,
दूपाते मत्तस्के एर हीम्ट.

अल्हा कीते, अय्यो! मोमोट बच्चोन पेद्दा तप्पु कीतोम,

इनकुंचि ओरद-ओर्के सिग्गु वांता.”*

21 मीवा कयदाल सेड्डा कबाहक आयाकोंटा उसारते मंटु, बेसता कबाहक कीसि सेड्डा कबाहकुन ओळिच्चट.

13

अदिकारिना कयदा हिळु मंदना

1 इदु दुनियापोर्रो मननव अन्नि अदिकाराल्क पेनदाहेंदाले वातव आंद, इंदके राज्येम कियनोर्कगुडा पेने अदिकारम हीता. अदुनहाटी राज्येम कियनोर वेहाताप अंटोर बेस केंजिस ताका पीता.

2 बारिल्ले, अदिकारि वेहाताप ताकवोर, पेन निलाहता पद्दतकुंक विरोद कीताप आंता. अल्हा ताकवोर ओनद-ओरे सिक्सा दोर्किचकुंतोर.

3 बेसता कबाहक कियानोंकु अदिकारिना वेंरे मन्नो, तप्पु कबळ कियानोंक अदिकारिना वेंरे मनंता. अदुनहाटी अदिकारिक वेरियाकोंटा मंदना इत्ते, मिमेट सत्तेमते ताकट. अस्के ओर मीकुन मेच्चुकुंतोर.

4 मीवा बेसताहाटीगे अदिकारिल्लक पेनदा सेवाकुल्लकुनलेसी कबळ कीसेक मंतुर. ओक्कला मिमेटगिंटा बतलन्ना तप्पु कीते ओर मीकु सिक्सा हीतुरे, इंचि मिमेट ओर्क वेरियसि मना पीता. तप्पु कबळ कियानोर्कुंक सिक्सा हियनाहाटीगे पेन ओर्कुन निलाहता.

5 अदुनहाटी मिमेट सिक्साताल सिराप तपिच्चुकुनालय आयो गानि, मना आत्मातुन कूस ईरलय ओर वेहाताप ताका पीता.

6 देसेमतुन ताकसना अदिकारिल्लक पेनदा सेवकुल्ले आंदुर. अदुनहाटी मिमेट ओर्क कर दोहसेक मंतिर.

7 सरकास्क बतलयते हियना मंतांगो अव हीसीम्टु, कर दोहनद दोहट्ट, तासिल दोहनद दोहट्ट, अदिकारिल्लकुंक वेरियसि मनना इत्ते ओर्क वेरियट, बोर्क कदर हियना मंता ओर्क कदर हीम्टु.

8 मिमेट इंकावरोन पावरम कीम्टु, पावरम कियमळ तप्पा बोर्के आधि बदे पोल्लेता बाकि मनमट. अल्हा मत्तोर मूसाना नियमतुन पालन कीताप आंतोर.

9 अदुनहाटी, “बोगमतनम कियमट, बोर्कुन हक्कमट, दोंगातनम कियमट, इंका वरोनदुनपोर्रो आस्ति कियमट,”* इंचि आदेसकुने रासि मंता. इंका बवन्ना वेंरे नियमकु मत्ते, अव अन्निगुडा उंदे पोल्लेते कलियंतां, अद बद पोल्ले इत्ते, “नीवद निमे बच्चोन पावरम कीकुंतिनो अचोने वेंरेतोर्कुनगुडा पावरम कीम.”*

10 वेंरेतोरपोर्रो पावरम ह्पिचनोर, ओरा नुकसान किय्योर. अदुनहाटी पावरमता पोल्लेने, दर्मसास्त्रमता पोल्लें निजम आंतां.

* 12:19 व्यवस्ताविवरन 32:35 * 12:20 नीतिवचन 25:21-22 * 13:9 निर्गमन 20:13-15 * 13:9 लैव्यवस्ता 19:18

11 मिमेट इवन्नि तप्पाकोंटा कियना. मनाहाटीं दुनियाताल मुक्ति हियना पेनदा वेला वेल्लेन दगोरा एत्ता. मनम सामिन विस्वासम कीता आ वेलाकन्ना, इंदके मना मुक्ति दगोरा मंता. अदुनहाटीं मिमेट निद्रताल तेदाना वेला वाता. तेदसि वेलातुन एरपाट कीसि ताकट.

12 इंदके हीकट मारालय आसि, पोळ्द पेयसालय आता. अदुनहाटीं हीकटते कियानसोंटव कराब कबाहकुन होळसिसि वेलरुने कियानसोंटा बेसता कबाहकुन मना जीवाते एतकुनकोम.

13 पोद्दला ओप्पनालायक मनम ताकाना. अदुनहाटीं लावारिस तिरिया मनि, कराब पारिं कियामन्नि, रिम्मा वायानव उनामन्नि, बोगम कबाहक कियामन्नि, जगडाल्क कियामन्नि, इंकावरोन पोरो कळ्क पोत्ता मन्नि, गानि मनम बेसता हर्दे ताकाना.

14 इत्ते, सामि येसु किरिस्तुना पोल्लेन मना जीवाते, मना मनसुनाल एतकुनना. मना मनसुने कराब गुनाल्लुकुंक हर्दि हियमट.

14

इंकावरोना कदर कीम्टु

1 बोर अय्ते विस्वासमते कमजोर मंतोर, ओन्क बेस कदर हीसि मीलोप्पो कल्पट. गानि ओनतोनि बद बेसतद, बद बेसतद आयो इंचि वळ्कसेक मनमट.

2 तिनमळ बारेमते केंजट. विस्वासमते मनानोरवेटेताल इच्चुर बारे, “तिननव बवय्ते मंतांगो, अन्नि तिनावच्चु,” इंचि इंतुर, गानि विस्वासमते पूने वातोर इच्चुर बारे, “हव्विं तिनामन्नि, सादा कुसिर तिनमळे बेस,” इंचि इंतुर.

3 हव्विं तिनानोर आयि, तिनवोर आयि, ओर इव्वुर्कुन पेन दाना मनकालोर इंचि पेर्कुत्ता. अदुनहाटीं हव्विं तिनानोर तिनवोन पास्कमनि, हव्विं तिनवोर तिनानोनपोरो तप्पु दोस्सामन्नि.

4 इंकावरोना जीतागान हळसि, “निमे बेस कबळ कीसंतिना हिल्लेना” इंचि वेहानद मीकु अब्सरम हिल्ले. अद कबटा लेक्का ओना मालके हळंतोर. पेन दाना मनकालोर्कुन गट्टिगा निल्ला परांता, अदुनहाटीं असोंटा विस्वासुल्क गट्टिगेन निल्लंतुर.

5 बोरो-बोरो बदाना उंदि रोजुन अन्नि रोजकुंकन्ना बेसता रोजु इंतुर. इंका बोरो बारे अन्नि रोजुक उंदेतीर समानमे इंचि इंतुर. बोरे आयिर मी मनसुने बद बेसतद इंचि अनपिस्ते अल्हेन कीम्टु.

6 बोरेन्ना बदाना उंदि रोजुन अन्नि रोजकुंकन्ना बेसता रोज इंचि नोमते, सामिनाहाटीगे नोमंतोर. अन्नि तिनानोरगुडा सामिनाहाटीं तितोर आनि पेनदुक दन्यवाद कीतोर. बोर अय्ते तिन्नोर ओरगुडा सामिनाहाटीं तिनाकोंटा मंचि पेनदुक दन्यवाद कीसेके मनांतोर.

7-8 मनालोप्पो बोरे आयिर, संतम ओनाहाटीगे इंचि पिसोर, सामिनाहाटीं पिस्संतोर. हायिनागानि सामिनाहाटीगे हांतोर. इल्हा मनम हायिना, पिस्सिना सामिना लोकुल्कुमे आंदुम.

9 जीवाते मत्तोर आयि, हासोत्तोर आयि, अंतोर्कुंक सामि आसि मनना इंचि किरिस्तु हासि मर्रा जीवाते तेदतोर.

10 अदुनहाटीं विस्वासमते गट्टिगा हिल्लुवा विस्वासिर आयिर, विस्वासमते गट्टिगा मत्ता विस्वासिर आयिर, निमे ओरापोरो तप्पु बारि दोस्संतिन? ओर्कुन बारि पास्कंतिन? बारित्ते मनद अंतोरद उंदि रोज पेनदा राजगदूदेता मुन्ने न्यायम आयना मंता.

11 दीना बारेमते पेनदा पुस्तकमते इल्हा रासि मंता:

“नना ओट्टु तिंचि वेहासेक मंतन, अंतोर लोकुल्क नावा मुन्ने टोंगरां ऊनसि,

ननाने पेन इंचि एरपाट कियानुर.”✧

इंचि मंता.

12 अदुनहाटीं मनम अंतोरम पेनदा मुन्ने नित्तिसि मना लेक्का हियापीता.

इंकावरोन पापमते अरहमट

13 इंदकेटाल मनम वरोना पोरोँ वरोर तप्पु दोस्सामन्नि. इच्चोरे आयाका, दंताता विस्वासिन विस्वासमताल तप्पिच्चना कबाहक, पापमते अरहना कबाहक मिमेट कियमट, दीन मति ईरंट.

14 नना येसु सामिनतोनि कलियसि मंतन इंचि अन्नि तिडिं नाकु ओज्जंतां, इदु नना एरपाट कीकुत्तन. गानि बोर्क अयते बदाना तिडि ओज्जाकोटे, ओर अदुन तिनाकोटा मत्तेने बेस मनंता.

15 निमे तिनानवुन हळसि, पूना विस्वासुलकुना मनसु नाराज आसि पेनदुन होळसीते, नीवा लोप्पो पेनदा पावरम हिल्ले इत्तापे. असल ओराहाटीगुडा किरिस्तु हातोर, गानि निमे नी गाटोताहेंदाल ओर्कुन नासडेम कियमा.

16 इत्ते, “नना बेस कीसंतन, बिल्कुल तप्पा हिल्लेन इनकुंतिन,” गानि इंकावरोना नदरते निमे तप्पंतिन. दीनहेंदाल नीवदे बदनाम आंता. इंचि तिनूळ-उनुळते जेगर्ता मन्नु.

17 पेनदा राज्येम, इत्ते मना पिस्वर पोरोँ किरिस्ते राज्येम कियना. दाना राज्येम इत्ते तिनमळ-उनमळता पोल्लेँगेँ अचोने इंचि इनकुनमट गानि पेनदा मुन्ने सत्तेमते पिसमळ, पवित्र आत्माहेंदाल दोर्कना सांति, आनंदमते मनमळ आंद.

18 इल्हा किरिस्तुना सेवा कीतोण पेन मेच्चुकुंता, लोकुलकुना नड्डुमगुडा ओनकु कदर दोर्कता.

19 अदुनहाटी मनम बस्केळक सांति दोर्कानव आनि विस्वासमते बेर्सना कबाहक कीकोम.

20 तिडिहाटी पेनदा कबळतुन नासडेम कियमट. अन्नि तिडिं बेसतवे गानि बदाना तिडि बोणकन्ना इस्टम हिलाकोटे, दान मनम तिंचि ओन विस्वासमताल हिळु अरहमळ मनद तप्पे आंदु.

21 हळ्विं तिनमळ आयि, अंगुर कल्लु उनमळ आयि, इंका बतलन्ना आयि पूना विस्वासुलकुंक इस्टम हिलाकोटे, निमे इव अन्निनाल लक्कु मत्तेने बेस मनंता.

22 इवुना बारेमते मीवा विस्वासम बल्हा मंतानो, अद मीकु आनि पेनदुके एरपाट मनगोम. बोर मनकल अयते ओना विस्वासमतुन पीसि “तप्तन-हेळतन” इंचेके अनमानम कियाकोटा मनांतोर, ओर वेल्लेन आसिर्वाद दोर्कतोर आंदुर.

23 गानि अनमानम कीसेक तिनानोर, पेनदा मुन्ने तप्पु कीतोना लेक्कातेने वांतोर. बारित्ते ओर पेन पोरोँ विस्वासम कियाका तिंचेके मंतोर. पेन पोरोँ विस्वासम कियवा कबाहक, ओन पापमते अरहंतां.

15

विस्वासमते कमजोर मत्तोर्कुंक सहायम कियना

1 अदुनहाटी, विस्वासमते गट्टिगा मत्तोरम मनम सिराप मनाकु सुकम हियना कबाहके कियाकोटा विस्वासमते कमजोर मत्तोर्कुना कबाहकुन हळसि ओप्के पीसि मंदगोम.

2 मना दंतातोर्कुना बेसताहाटी ओरा विस्वासम बेर्सना इंचि ओर्कुन कूस ईरना लायक मनम मनमळ गावाले.

3 किरिस्तु इद बूमिपोरोँ वातस्के ओनद ओरे कूस कीकुनालय वायाहिल्लोर. गानि, “पेनबाबा, नीकुन अपमानम कीतोरा अपमानम नाक आया पीता.”* इंचि किरिस्तुना बारेमते दर्मसास्त्रमते रासि मत्ताप जर्गता.

4 दर्मसास्त्रमते मुन्नेटाले रासि मत्तद उंदि-उंदि पोल्ले मनाकु कराहनाहाटीगे मंता. अदुन करियते मनम ओप्के पीसि दैरनेमते पिस्सा परांतोम इत्ता आसे दोर्कता.

5 अदुनहाटी मिमेट येसु किरिस्तुना विचारम मत्ताप, अंतोर कूळसि मंदालय पेन मीकु दैरनेम, ओप्के हिथिकांटी.

6 इल्हा मिमेट अंतोर उंदे मनसु, उंदे लेंग आसि मना सामि येसु किरिस्तुना पेनबाबन तल्सकुना परांतोर.

7 किरिस्तु मीकुन बल्हा ओप्कुत्तोर, अल्हेने मिमेटगुडा विस्वासमते कमजोर मत्तोर्कुन पेनदुक महिमा दोर्कना इंचि ओप्कुंटु.

* 15:3 बजन संहिता 69:9

8 नना वेहानद बतल इत्ते, एनकटा यहूदि पेद्दाल्कुंक पेन पोल्ले हीसि मत्ता, अद पोल्ले निजम आयाना इंचि, कतना आतोर लोप्पो किरिस्तु सेवक आसि वातोर. इद पोल्लेतुन मर्गाम्दु.

9 अचोने आयाका यहूदि आयवोरगुडा पेन ओरापोर्री कीता दयाताहाटी दान तल्सकुनना इंचि किरिस्तु वातोर. बजन संहिताते इल्हा मंता:

“नना यहूदि आयवोरतोनि कलियसि, नीकुन तल्सकुंतन.”✠

10 इंका इल्हागुडा रासि मंता.

“ए यहूदि आयवोरिटा, पेनदा लोकुल्कुनतोनि मिमेटगुडा कूस आम्दु.”

11 मर्रा इल्हागुडा रासि मंता:

“ए यहूदि आयवा लोकुरिटा, मिमेट सामिन तल्सकुंतु, पूरा देसेमतोर ओन तल्सकुंतु.”✠

12 मर्रा यसायाहल रासतोर:

“यिस्साना वंसंमताल वरोर पुट्टानुर, ओर अन्नि जातिनोरपोर्री राज्येम कियानुर,

इंका अंतोर ओनपोर्री आसे ईर्नुर.”✠

13 मिमेट विस्वासम कीताहाटी, मीकु आसे हियना पेन अन्नि तीरकुना कुसि, सांति हियिकांटी. इल्हा पवित्र आत्माता ताकतहेंदाल मीवा आसे बेरस्सेक होंदार.

14 विस्वासुल्कुनिटा! मीलोप्पो वेल्ले बेसतनम आनि तेल्वि मंता. अदुनहाटी मिमेट वरोंक-वरोर बुद्धिद वेहकुना परांतरि इंचि नाक पुरागा बरोसा मंता.

15-16 पेनदा कुर्पहेंदाल यहूदि आयवोरा नड्डुम येसु किरिस्तुना सेवक आसि पेर्मनालेसी बेसता कबुर वेहालय नाकु अदिकारम दोर्कता. अदुनहाटी कोन्नि पोल्ले मीकु मति कीसि हियना इंचि मीकु दैरनेमते रासतन. ना मनसुने बतल मंता इत्ते, यहूदि आयवोर पवित्र आत्माहेंदाल पवित्र आयाना आनि पेन ओर्कुन ओप्कुननालायक कियना.

17 येसु किरिस्तुना लोप्पो कलियसि मंचि, इल्हा पेनदा सेवा कीसेके इंचि नना वेल्लेन कुसिते मंतन.

18-19 यहूदि आयवोर नना वेहता पोल्लेन केंजतुर, नना कीतव चिन्हां आनि इंचंत्रमता कबाहकुन हळतुर. केंजसि, हळसि ओर किरिस्तुनपोर्री विस्वासम इरतुर. इल्हा नना पवित्र आत्माता बलमते येस्सलेम सहरताल इलुरिकुम एरिया एवनदाका किरिस्तुना बेसता कबुरतुन वेहतन. अदुनहाटी किरिस्तुनाहेंदाल कीता पोल्लेगें नना दैरनेमते वेहंतन. इवुक तप्पा वेंरे बवे पोल्ले वेहोन.

20 किरिस्तुना पोरोल बगा अथ्ते केंजा हिल्लुर अगा होंचि नना बेसता कबुर वेहना इंचि नावा मनसु तनलाळसेक मंता. गानि इंकावरोर दोहता पुनादिपोर्री लोन दोहमळ इस्टम हिल्लाहेंका, इंकावरोर वेहता नाहकुने होंचि वेहमळ नाकु इस्टम हिल्ले.

21 गानि दर्मसास्त्रमते इल्हा रासि मंता:

“ओना बारेमते बेसता कबुर एरपाट हिल्वोर ओन हळानुर.

ओना बारेमते केंजवोर, ओर्क तेळियार.”✠

पौलस रोम सहरते होत्तोर

22 इल्हा बेसता कबुर एववगा नना होनगोम इत्ता विचारमतेन मनुंदुन, अदुनहाटी नना मिहगा वाया पराहिल्लेन.

23 गानि इंदके, हीदा एरियाने येसु किरिस्तुना बेसता कबुर वेहना कबळतुन महतन, इगे बतल कबळ हिल्ले. अल्हेने वेल्लेने वर्सानाल मिहगा वांतन इंचि नावा जीवा तनलाळसेक मंता.

24 अदुनहाटी नना स्पेन देसेम होननेके मिहगा वांतन इंचि आसे पळसंतन. मीवातोनि कोन्नि रोजकु मंचि नावा मनसु निंडता पजा नाकुन अगटाल मुन्नेटा पथ्नेमताहाटी साल्गा कीम्दु.

25 गानि इंदके नना पेनदा लोकुल्कुंक सेवा कियालय येस्सलेम दांतन.

26 बारित्ते मेसिडोनिया, अकाया एरियातोर विस्वासुल्क संदा वाटसि, येस्सलेम सहरते मत्ता पेनदा लोकुल्कुनाल बोर अय्ते गरिब मंतुरो ओर्क सहायम कियना इंचि विचारम कीसि नाक हीतुर.

27 ओर इल्हा कीसि कूस मत्तुर, इल्हा कियमळे गावाले. बारित्ते यहुदि आयवोर्क पेनदा लोप्पो कलियालय आसिर्वाद दोर्कता, ओर यहुदि लोकुल्कुंक अक्सरम मत्तवुना सेवा कियमळ गावाले.

28 अदुनहाटी जमा कीता कोत्तन नना बेस ओसि ओर्क अप्पजेपंतन, पजा अगटाल होननेके मीकु कलियसि स्पेन देसेम दांतन.

29 नना मिहगा वातस्के मनम अंटोरम किरिस्तुना आसिर्वादते निंडांतोम इंचि नाकु एरपाटे.

30-31 विस्वासुल्कुनिटा! मना येसु किरिस्तु सामिनाहेंदाल आनि पवित्र आत्माता पावरमहेंदाल मीकु बतल विनति कीसेक इत्ते, यहुदिया एरियाते मनना अविस्वासि लोकुल्कुना कयदाल नना पिस्सना आनि येस्सलेमते नना कियना सेवातुन पेनदा लोकुल्क ओप्कुनना, इंचि मिमेट नावाहाटी उंदि मनसुने पेनदुक पारतना कीम्ट.

32 मनम पारतना कीताप पेनदुक इस्टम मत्ते, नना मिहगा वासि कोन्नि रोजकु मीवातोनि कुसिते मनंतन.

33 सांति हिय्यना पेन मीवा अंटोरतोनि मन्निकांटी. आमीन.

16

विस्वासुल्कुंक पौलुस जोहार वेहतोर

1 मना विस्वासि अक्कल पीबे इनानद बच्चोरो बेसतद आंद. अद किक्किरया नाटेना कलिसियाते सेवा कीसेक मंता.

2 अद वेल्लेटोर्क सहायम कीता, अल्हेने नाकगुडा सहायम कीता. अद मिहगा वायानय्ते, पेनदा लोकुल्क ओप्पनालायक मिमेट दान बेस हळकुंद. अल्हेने दान्क बतलन्ना अक्सरम मत्ते सहायम कीम्ट.

3 पिरिसकिला आनि दाना मुय्दो अकविलांक नावाहेंदाल जोहार वेहाट. ओर नावातोनि येसु किरिस्तुना सेवा कियानोर आंदुर.

4 ओर नाकुन पिसागोटनाहाटी ओरा जीवातुन हियालयगुडा तयार मत्तुर. नना ओर्क दन्यवाद कीतन. सिराप ननाने आयो गानि यहुदि आयवोरा अन्नि कलिसियानोरगुडा दन्यवाद कीतुर.

5 ओरा लोतगा जमा आयाना कलिसियातोर्कगुडा नावाहेंदाल जोहार वेहाट. आसिया एरियाते अंतोर्कन्ना मुन्ने किरिस्तुन विस्वासम कीतोर ना दंटागाल इपेनितुस इननोंक, नावा जोहार वेहाट.

6 मीवाहाटी वेल्ले कस्टपळतद मरियमुंक नावा जोहार वेहाट.

7 अंदरिनिकुस आनि युनियास ओर नावा जीवातोर आंदुर, ओर नातोनि जेलने मत्तुर, ओर प्रेरितुल्कुना लोप्पो पोरोल पेयसतोर इंचि अंटोर ओर्कुन एरपाट कीतुर, ओर नाकन्ना मुन्नेने किरिस्तुन विस्वासम कीतुर, ओर्क नावा जोहार वेहाट.

8 सामिन लोप्पो ना पावरमगल्ला अंपलितुसुंक जोहार.

9 मावातोनि कलियसि किरिस्तुना सेवा कियानोर उरबानुसुंक नावा जोहार, अल्हेने नावा पावरमगल्ला इस्तुकुसुंकगुडा नावा जोहार वेहाट.

10 किरिस्तुनलोप्पो तकलिप वायिनागानि होळसाकोटा इमानदारते मत्ता अपिलेस इननोंक नावा जोहार. अरिस्तुबुलुसना लोतोर्कुंकगुडा जोहार वेहाट.

11 नावा जीवातोर हेरोदियोकु जोहार वेहाट. नरकियुसुना लोतोर बोर अय्ते सामिन विस्वासम कीतुर ओर्क जोहार वेहाट.

12 तिस्पेना आनि तिस्पेसा इनना अक्काहक सामिनाहाटी कस्टपळतां, अंवुंक जोहार वेहाट. नावा पावरमगल्ला परसिस इनना अक्कलगुडा सामिनाहाटी वेल्ले कस्टपळता, दान्क जोहार वेहाट.

13 बोनय्ते पेन पेरकुत्ता, आ स्पुस इननोंक आनि ओना यावल इत्ते नावा यावानसोटद, ओर्क नावाहेंदाल जोहार वेहाट.

14 असुकिरितुसुंक, पिलगोनिक, हिरमेसुंक, पत्रुबासुंक आनि हिर्मोसुंक जोहार वेहाट, ओरतोनि मनना विस्वासुल्लुकुंकगुडा जोहार.

15 पिलोलोगुसुंक, युलियंक, नेरयुसुंक आनि ओना हेलडुक जोहार वेहाट, उलुम्पासुंक आनि ओरतोनि मनना पेनदा लोकुल्लुकुंक जोहार.

16 मिमेट वरोंक वरोर कलियतस्के पवित्र पावरमते जोहार कीम्टु. किरिस्तुना अन्नि कलिसियानाहेंदाल मीकु जोहार.

17 विस्वासुल्लुकुनिटा! इच्चुर लोकुल्लुक मिमेट करियता पोल्लेन हेळाहलय ई पोल्लेक विरोदमते वेंरे पोल्ले वेहचि मीलोप्पो वरोनद-वरोंक अर्राकौटा कीतुर. असंटोरतोनि उसारते मंचि, ओर्क लक्कु मंटु इंचि नना मीकु विनति कीसेक मंतन.

18 असंटोर मना सामि किरिस्तुना सेवा किय्युर, गानि ओरा पीटाहाटी सेवा कीतुर. ओरा तिय्यटा पोल्लेनाहेंदाल सीदा-सादा लोकुल्लुकुन मुळहंतुर.

19 बेसता कबुरता पोल्ले मत्ताप मिमेट ताकसेक इंचि अंटोर केंजतुर, अदुनहाटी नना वेल्ले कुसिते मंतन. मिमेट बेसता पोल्लेनहाटी बुद्धितोर आसि मंटु, सेड्डा पोल्लेनहाटी लक्कु मंटु इंचि नना मीकु वेहासेक मंतन.

20 मनाकु सांति हियना पेन बिराने देय्यमतुन मीवा कालुकुनगा तच्चि जारसि पोहंता. मना सामि येसु किरिस्तुनद मीवापोर्री कुर्पा मन्निकांटी, आमेन.

21 नावातोनि कलियसि किरिस्तुना सेवा कियानोर तिमोतिनाहेंदाल मीकु जोहार. नावा जीवातोर लुकियुस, यासोन आनि सोसिपत्रु ईराहेंदाल मीकु जोहार.

22 पौलुस वेहताप इद सिट्टिटुन नना तेरतियुस इननोन रासतन, सामिना लोप्पो मीकु अंटोर्क जोहार.

23-24 नाकुन, कलिसियातोर्कुन हेडमितोरलेसी बेस हळना गयुसनाहेंदाल मीकु जोहार. इद नाटेना कोत्तना व्यवहार कियानोर, इरास्तुसना हेंदाल मीकु जोहार. अल्हेने कवारतुस दादानाहेंदाल मीकु जोहार.

25-27 येसु किरिस्तुना बारेमते नना वेहता बेसता कबुर परकारम, पेन मीकुन विस्वासमते इका गट्टिगा कियो परांता. इद बेसता कबुर एनकटा कालमताल मर्ममते मत्ता. गानि इंदके पेनदा कबुरतोर रासता पुस्तकालुकुना हेंदाल मर्ममते मत्ता बेसता कबुरतुन बय्यारा कियालय माकु वेहता. अंटोर लोकुल्लुक इद कबुरतुन विस्वासम कीसि, पेनदा पोल्लेने ताकाना इंचि पेन आदेस हीता. आ बस्केळ्ळक मनना उंदे तेल्विगल्ला पेनदुन, मनम येसु किरिस्तुनाहेंदाल बस्केळ्ळक महिमा कीकोम. आमीन.

1 कुरेंति कुरेंति विस्वासुल्कुंक पौलसना मोदाटा सिट्टि

इद सिट्टिता बारेमते गिचचो परिचयम

रासतोना पोरोल: पौलस

रासता कालम: इसवि सन 56

कुरेंति सहरता विस्वासुल्कुनाहाटीं इपीसि सहरताल प्रेरित पौलस इद सिट्टि रासतोर. किरिस्तुना बेसता कबुर वेहालय रोंडो मल्का वातस्के, ई कुरेंति सहरते कलिसिया सुस्व कीतोर. अगा कोन्नि रोजकु मंचि अगटाल होत्ता पजा, अद कलिसियाते वेल्लेने समस्यां तयार आतां. अव समस्यांकु समादान वेहालय कुरेंति सहरता विस्वासुल्कुंक इद मोदाटा सिट्टि रासतोर. आ कलिसियातोर्कुंक वरोनद-वरोक अर्काकोटा आयमळ, पापम कबळ कियमळ इल्हा जर्गसेक मत्ता. इवन्निटवुंक समादानम बेसता कबुरता हेंदाले दोर्का परीता इंचि पौलस रासतोर.

मनम किरिस्तुना मनकालोर्कुम इंचि वट्टिदे मनानायो, गानि किरिस्तुनलेसीं ताकाना, पवित्र मनमळते बेस्सेके होंदना, वरोक-वरोर पावरम कियमळे पेद्दा पोल्ले आंद, इंचि रासतोर.

बगा बतल मंता

जोहार आनि परिचयम 1:1-9

कलिसियाते वरोनद वरोक अर्काकोटा आयमळ 1:10-4:21

कुटुंबते कलियसि पिसमळ 5:1-7:40

किरिस्तुनोर आनि बोम्मांक मोळकानोर 8:1-11:1

कलिसियाते कलियसि पिसमळ आनि आरादना 11:2-14:40

किरिस्तु आनि ओना विस्वासुल्क मर्रा जीवाते तेदमळ 15:1-58

यहुदियाता विस्वासुल्कुनाहाटीं चंदा जमा कियमळ 16:1-4

सतता बारेमते आनि आकिर बोदा 16:5-24

जोहर

1 नना पौलसुन, किरिस्तु येसुना प्रेरित आयालय पेन नाकुन दाना मनसुनाल केयता. नावा आनि सोस्तिनेस दादानाहेंदाल जोहर.*

2 कुरेंति सहरते मनानोर किरिस्तु येसुनलोप्पो पवित्र आता पेनदा कलिसियातोर्कुंक, आनि वेरे-वेरे जेगाने मना सामि इत्ते, ओरा आनि मना येसु किरिस्तुना पोरोलते आरादना कियाना अंटोर बक्तुल्कुंक रासता सिट्टि,

3 मना पेनबाबाल आनि सामि येसु किरिस्तुनाहेंदाल कुर्पा, सांति दोर्कसेक मन्निकांटी.

पौलस पेनदुन दन्यवाद कीतोर

4 किरिस्तु येसुनलोप्पो मीक पेन हीता कुर्पाताहाटीं, नना पेनदुन बस्केळक दन्यवाद कीतन.

5-6 किरिस्तुना गवाइ मीलोप्पो गट्टिगा मत्ता इंचि, मिमेट अन्नि तीस्कुने वळ्ळुकुमळते आनि बुद्दिदे निडिस होत्तिर.

7 अदुनहाटीं मिमेट पेनदा बद्दे आत्माता वरमते तक्को हिल्लिर, मिमेट मना सामि येसु किरिस्तु मर्रा वायानद एदुर हळसेक मंतिर.

8 सामि येसु किरिस्तु मर्रा वायाना रोजुने मिमेट दोसेम हिलाकोटा मंदना इंचि पेन मीकुन आकिरदाका गट्टिगा इरता.

* 1:1 इद सिट्टि पौलस रासतोर, गानि सोस्तिनेस सिराप जोहर वेहतोर.

9 पेन विस्वासम लायकतद आंद. अद दाना मरि मना सामि येसु किरिस्तुनतोन कूळसि मनालय मीकुन केयता.

विस्वासुल्कुंक वरोनद-वरोक अर्राकोटा आयमळ

10-11 विस्वासुल्कुनिटा! मीलोपो जगडाल्क आसेक मंतां इंचि क्लोयेना लोतोर नाक वेहतुर. अदुनहाटी मिमेट अंटेर उंदे पोल्लेते ताकाट्ट, मीलोपो वरोनद-वरोक अर्राकोटा मनमट, गानि मिमेट उंदे मनसुने, उंदे विचारमते कलियसि मंडु इंचि नना मीक मना सामि येसु किरिस्तुना पोरोलते विनंति कीसेक मंतन.

12 नना वेहना पोल्ले इदे गदा, मीववटेताल वरोर, “नना पौलसुनोन आंदुन,” इंकावरोर, “नना अप्पुलोसुनोन आंदुन,” इंकावरोर, “नना केपानोन आंदुन,” इंकावरोर, “नना किरिस्तुनोन आंदुन,” इंचि इतिर.

13 बतल, किरिस्तुन तूसुक कीतिरा? पौलसु कसुनपोर्री मीवाहाटी जीवा हीतोर? हिलाकोटे पौलसुना पोरोलते मिमेट बापतिस्मा एततिरा?

14 नना मिहागटाल क्रिसपुसुंक आनि गयुसुंके बापतिस्मा हीतन, बेस आता ओर्क आयाका बोनके हिया हिल्लेन, पेनदुक दन्यवाद कीतन.

15 हिलाकोटे नावा पोरोलतेन बापतिस्मा एततिर इंचि बोर्नना इंचि मन्नेर.

16 नना स्टिपनसना लोतोरकगुडा बापतिस्मा हीतन, ईर आयाका इंका बोर्कन्ना नना हीतना, नाक एर्का हिल्ले.

17 बारित्ते किरिस्तु नाकुन बापतिस्मा हियालय लोहा हिल्लोर, गानि बेसता कबुरतुन वेहालय लोहतोर. अदगुडा मनकना बुद्धि मत्ताप आयो, अल्हा वेहानयते किरिस्तु कसुनपोर्री हाता ताकततद अर्तम मन्ने.

पेनदा ताकत आनि तेल्वि किरिस्तु आंदुर

18 कसुता पोल्ले वेहमळ इत्ते नासडेम आयानोराहाटी मुर्कतनम आंदु, गानि पेन मनाकुन पिसागोटता, अदुनहाटी पेनदा पोल्ले मनाकु बलम आंदु.

19 इदुना बारेमते, दर्मसास्त्रमते इल्हा रासि मंता,

“तेल्विगल्लोर्कुना तेल्वितुन नासडेम कीतन,

उसारगल्लोर्कुना उसारतनमतुन पास्कंतन.” ✨

20 अयते, बगा मंतोर तेल्विगल्लोड? बगा मंतुर दर्मसास्त्रम कराहना गुम्लक? ई दुनियाता वाद-विवाद कियानोर बगा मंतुर? इद दुनियातोर तेल्वि पेनदा मुन्ने मुर्कतनम आंद.

21 बारित्ते, पेनदा तेल्वितुन, दुनियाता लोकुल्क ओरा सतता तेल्विते पेनदुन एरपाट किया हिल्लुर. मोमोट बदायते मुर्कतनमता कबुर वेहंतोमो, अदुना हेंदाल विस्वासम कीतोरक मुक्ति दोर्कना, इदे पेनदुक बेस अनपिच्चंता.

22 बारित्ते यहुदिल्क अयते चिन्हां गावाले इंतुर, युनानि लोकुल्क बारे तेल्वि पहकंतुर.

23 गानि मोमोट अयते कसुनपोर्री हाता किरिस्तुना पोल्लें वेहंतोम. इद यहुदिल्कुंक विस्वासम किया परवसोटा पोल्ले आंद. आनि यहुदि आयवोर्कुंक मुर्कतनमतसोटा पोल्ले आंद.

24 गानि पेन बोर्कुन अयते केयता, ओर यहुदिल्क आयिर, युनानिर आयिर, ओराहाटी पेनदा ताकत, पेनदा तेल्वि किरिस्तु आंदुर.

25 बारित्ते पेनदा मुर्कतनम इत्ते, मनकालोर्कुना तेल्विकन्ना वेल्ले तेल्वितद आंद, पेनदा ताकत कमजोर इत्ते, मनकालोर्कुंकन्ना वेल्ले बलमतद आंद.

26 विस्वासुल्कुनिटा! विचारम कीम्ट, दुनियाता लेक्काते मिमेट तेल्वितोर आयिर, एक्को बलमतोर आयिर, पेद्दा लोतोर आयिर, अयनागानि पेन मीकुन केयता.

27 बुद्धि मत्तोर्कुंक सिग्गु वायालय दुनियाते बुद्धि हिल्वोर्कुन पेन पेरता. बलमता मनकालोर्कुंक सिग्गु वायालय, दुनियाते बलम हिल्वोर्कुन पेन पेरता.

28-29 पेनदा मुन्ने बोरे मनकल पेद्दिर्केम कियामन्नि इंचि दुनियाते बतले हिल्वोर्कुन, हय्सवोर्कुन, बतले कबळक ओज्जुवोर्कुन, पेन पेरता.

30 पेनदाहेंदाले येसु किरिस्तुनलोप्पो मीवा पिस्वर मंता, किरिस्तुनाहेंदाल मनाकु तेल्वि, नीति, पवित्र आतोम आनि पापमता सिक्साताल पिसतोम.

31 अदुनहाटी, “पेद्दिर्केम कियानोर बोरे आयिर, सामि ओनाहाटी बतल्यते कीतोरो, अव्टे ओर पेद्दिर्केम कियागोम,” इंचि दर्मसास्त्रमते रासि मंता.

2

कूसुनपोर्रोटा किरिस्तुना बारेमते बेसता कबुर

1 विस्वासुल्कुनिटा! नना मिहगा वातस्के, नावा पेद्दा पोल्लेने हिलाकोटे पेद्दा तेल्विते पेनदा बारेमते गवाइ वेहा हिल्लेन.

2 गानि नना मीवा नड्डुम मननेके कूसुंक वेलाड वाटता येसु किरिस्तु आयाका इंका वेरे बद्दे पोल्ले वळकोन इंचि निरनायम कीसि मत्तन.

3 नना मिहगा मननेके मेंदुल्ले कमजोर आसि मत्तन. वेल्ले वेरेंते वनुकसेके मत्तन.

4 नावा वळकमळ आनि नना वेहता कबुर, नावा तेल्विता पोल्लेने मनाहिल्ले, गानि पेनदा आत्मा आनि ताकतते निडसि मत्ता.

5 अदुनहाटी मीवा विस्वासम मनकालोर्कुना तेल्वि परकारम आयो गानि पेनदा ताकत परकारम मनागोम.

पेनदा तेल्वि

6 मोमोट इद दुनियाता हिलाकोटे इद दुनियाते नासडेम आयाना अदिकारिल्लुकुना तेल्वि वेहोम, गानि विस्वासमते गट्टिगा मत्तोर्कुके तेल्वि वेहंतोम.

7 मोमोट मर्ममते मक्किचि मत्ता पेनदा तेल्वितुन वेहंतोम, अद बूमि पुट्टका मुन्नेने मावा पेद्दातनमहाटी पेन तयार कीसि इरता.

8 ई तेल्विता बारेमते दुनियाता अदिकारिल्लुकुंक बोर्के तेळिया हिल्ले, ओर्क गिंटा तेळियसि मत्ते, महिमागल्ला सामि येसु किरिस्तुन कूसुनपोर्रो मोल्लां कोहका कोन्नेर.

9 गानि दर्मसास्त्रमते,

“कळकुने बोरे हळवव, केळकुने बोरे केंजवव,

बोरा मनसुने वायवव पोल्लें, दानपोर्रो पावरम कियानोराहाटी पेन तयार कीसि इर्ता,” इंचि रासि मंता.✱

10 गानि पेन दाना आत्माताहेंदाल अवुन मनाकु हुपिस्ता. बारित्ते अद आत्माकु अन्नि एरपाटे, पेनदा मर्ममगुडा एरपाटे.

11 वरोर मनकना विचाराल्क मनकना आत्मा आयाका इंका बोरे एरपाट कीतोरो? अल्हेने पेनदा विचाराल्क पेनदा आत्मा आयाका इंका बोरे एरपाट किय्योर.

12 इंदके मनाकु दुनियाता आत्मा दोर्काहिल्ले, पेन हीता पोल्लें तेळियालय पेनदा आत्मा मनाकु दोर्कता.

13 माक इव पोल्लें मनकना तेल्विते कराहतव आयो गानि पेनदा आत्माते कराहतव आंदुं. अवे पोल्लेन मीक तेळियागोट्टिसि वेहंतोम.

14 बोनगा अय्ते पेनदा आत्मा हिल्ले ओर पेनदा आत्माता पोल्लेन ओप्कुन्नोर. ओनकु अव मुर्क पोल्लें अनपिच्चंतां. बारित्ते अव पोल्लें पेनदा आत्मातेने तेळिया परांतां, अदुनहाटीं ओनकु तेळिया पर्रीं.

15 बोनगा अय्ते पेनदा आत्मा मंता, ओर अन्निन अर्तम किया परांतोर, गानि ओना बारेमते वेरे मनकल बोरे अर्तम किया पर्रीं.

16 इदुन बारेमते,

“सामिना मनसु बोनकु तेळियंता, ओनकु बोर करहा परांतुर?

गानि किरिस्तुना मनसु मनागा मंता,

इंचि दर्मसास्त्रमते रासि मंता.”*

3

पेनदा दासुल्लुकुना विचारम अलग-अलग मंदनायो

1 विस्वासुल्लुकुनिटा! पेनदा आत्मा मत्तोर्कुनतोनि वळकताप मीवातोनि वळका पर्रींहिल्लेन. पेनदा आत्मा हिल्ला दुनियातोरलेसीं आनि किरिस्तुनलोप्पो इंदकेगुडा पिलालुकुनसंतोरे इंचि मीवातोनि वळकतन.

2 नना मीक पाल उहतन, गाटो तिहा हिल्लेन; बारित्ते मिमेट गाटो तिना पराकोंदिर, गानि इंदकेगुडा मिमेट गाटो तिना परानालायक हिल्लिर.

3 बारित्ते इंदकेगुडा मिमेट मेंदुल्ला इच्चा मत्तापे ताकसेक मंतिट. इंकावरोना पोर्री कळक पोत्तना, जगडालक कियाना गुनम मंता. अय्ते मिमेट मनकना इच्चाते ताकानोर आयिरा? दुनियाता लोकलुकुनालेसीं ताकसेक हिल्लिरा?

4 मिहगटाल वरोर, “नना पौलुसनोन आंदुन”, इंकावरोर, “नना अप्पुलोसनोन आंदुन” इंचि इंतिर. इल्हा मिमेट दुनियातोरलेसीं पेनदुन एरपाट कियवोर आतिरा बतला?

5 अप्पुलोस बोर आंदुर? नना पौलुसुन बोन आंदुन? मोमोट इव्वुरमगुडा पेनदा सेवाकुलुकुमे. पेन माक बतल अय्ते कबळ अप्पजेपता, अदुन वेहतोम, मिमेट विस्वासम कीतिर.

6 नना पेळे वाटतन, अप्पुलोस एर दोस्तोर, गानि दान बेसांगोटनद पेने आंदु.

7 इत्ते, पेळे वाटनोर आयिर, एर दोस्सानोर आयिर ईर पेदूदोर आयुर, गानि दान बेसांगोटनद पेने पेदूदेदि आंदु.

8 वरोर वाटतोर, वरोर एर दोस्तोर, इल्हा ओरा-ओरा कबळता इसाबते ओर्क बृति दोर्कार.

9 मोमोट पेनतोनि कलियसि कबळ कियानोर्कुम आंदुम, मिमेट पेनदा नेलितसंतोर, पेनदा लोतसंतोर आंदिर.

10 नाक पेन हीता कुपहिंदाल, वरोर बेसता मिस्त्रिनलेसीं पुनादि दोहतन, दानपोर्री इंकावरोर रदूदा दोस्सेक मंतोर, इल्हा वरोर-वरोर दानपोर्री दोस्सानोर बल्हा रदूदा दोस्सेक मंतोर, ओर बेस हळसि दोसना.

11 येसु किरिस्ते पुनादि आंदुर. ओर दोहता पुनादि आयाका, इंका बोरे वेरे पुनादि दोहा पर्र.

12 बोरन्नागिंटा बंगारम, एंडि, एक्को दराता बंडां, कट्टे, जाडि, बुस्सिते पुनादि दोहना मत्ते,

13 किरिस्तु मर्री वायाना रोजुने अंतोरा कबळ दिसंता. बारित्ते अद रोज ओर तळमितोनि वांतोर, बोर बतल कबळ कीतोर इंचि तळमिते परिकसा कियमळ जर्गीता.

14 अद पुनादिपोर्री दोहता कबळ निल्लिस मनानय्ते, ओनकु इनाम दोर्कता.

15 बोनदन्ना गिंटा ओर कीता कबळ वेसि होत्ते, ओनकु नुकसान आंता. ओर अय्ते पिस्संतोर गानि तळमिताल पेयसताप पिस्संतोर.

16 मिमेट पेनदा गुळि आंदिर, पेनदा आत्मा मीलोप्पो मंता, इद मीक तेळियोना?

17 बोरन्नागिंटा पेनदा गुळितुन नासडेम कियानय्ते, पेन ओन नासडेम किय्यार. पेनदा गुळि पवित्र मनंता, अद मिमेटे आंदिर.

18 बोरे आयिर ओनद-ओरे पसांचकुनामन्नि. बोरन्नागिंटा मिहागटाल ई दुनियाते नना तेल्चितोन इनकुनानय्ते, पेनदा नदरते तेल्चितोर आयालय, मोदाला मुर्कनलेसी आयापीता.

19 दुनियाता तेल्चि पेनदा मुन्ने मुर्कतनमतद आंद. बारित्ते, “पेन तेल्चितोर्कुन ओरा उस्सारतनमता लोप्पो पसांचंता,”[☆] इंचि दर्मसास्त्रमते रासि मंता.

20 आनि मर्रा, “तेल्चितोर्कुना विचाराल्क एर्तम आंदुं इंचि पेनदुक एरपाटे,”[☆] इंचिगुडा दर्मसास्त्रमते रासि मंता.

21 अदुनहाटीं नना ईना हेंदोन, नना ओना हेंदोन इंचि मनकालोर्कुना पोरों पेद्दिरकेम कियामन्नि, अन्नि मीवंगे आंदुं.

22 पौलुस आयिर, अप्पुलोस आयिर, केपाल आयिर, दुनिया आयि, पिस्वर आयि, हामुर आयि, ताकाना कालमता पोल्लें आयि, वायाना कालमता पोल्लें आयि, अन्नि मीवंगे आंदुं.

23 मिमेट किरिस्तुनोर आंदिर, किरिस्तु पेनदोड आंदुर.

4

पेनदा मर्ममता देकरेक कियानोर

1 अदुनहाटीं मोमोट किरिस्तुना सेवाकुल्कुम आनि पेनदा मर्ममता देकरेक कियानोरम आंदुम इंचि मीक तेळियमळ गावाले.

2 अल्हेने पेनदा मर्ममता देकरेक कियानोर विस्वासम कियानालायक मनमळ गावाले.

3 गानि नाकुन मीवाहेंदाल आयि हिलाकोटे लोकुल्कुना पंचायतता हेंदाल आयि, विस्वासमते मंतोरा हिल्लोरा इंचि परिकसा कीसि हळमळ गावाले इद नावाहाटीं सिन्ना पोल्ले आंद. नावद ननाने न्यायमगुडा किय्योन.

4 नहगा बतले दोसेम दिस्सेक हिल्ले, गानि नना दोसेम हिल्वोन आयोन. पेने नाकुन परिकसा कीसि हळंता.

5 अदुनहाटीं न्यायम कियाना वेला वायाका मुन्ने बोने न्यायम कियमट, सामि वायानाल एदुर हुळाट. ओर हीकटते मक्किस मत्ता पोल्लेन वेल्गुने तरंतोर, मनसुने मत्तवुन पलाते अरहंतोर. अस्के पेन अंतोर्कुन मिमेट बेस कीतिट इंचि मेचचुकुंता.

6 विस्वासुल्कुनिटा! नना मीवाहाटीं अप्पुलोसना आनि नावा उदाहरन हीसि वेहतन. बारित्ते “दर्मसास्त्रमते रासता पोल्लेक हब्बेर होनमट” इंचि मंता. इदुन पोरोंटाल मिमेट वरोन बेसतनमते, इंकावरोन विरोदमते पेद्दिरकेम कियमट.

7 बारित्ते नीकुन आनि इंकावरोन बोर अलग हळंतुर? निहगा मत्तव अन्नि पेन हीतवे गदा, अय्ते इवन्नि नावांगे बोरे हिया हिल्लुर इत्ताप बारि पेद्दिरकेम कीतिन?

8 ओहो! मीक गावाले मत्तव अन्नि पूरा आतां, मिमेट अय्ते सिरमंत आसि होत्तिर, मोमोट हिलाकुना मिमेट राजुल्कु आतिट. गानि मिमेट निजमे राजुल्कु आसि मत्ते मोमोटगुडा मीवातोनि राज्येम किय्येम.

9 गानि बोर्क अय्ते हामुर सिक्साता आदेस हियमळ जर्गता, असंतोरालेसी, प्रेरितुल्क आता मनाकुन पेन अंतोर्कुंनना आकिरते इरता, इंचि नाकु अनपिच्चंता. बारित्ते, मनम पेनदा दूतानाहाटीं, दुनियाताहाटीं, मनकालोराहाटीं सिराप तमासा हुप्सानोर आसि मंतोम.

10 मोमोट किरिस्तुनाहाटीं मुर्कालोरम आंदुम, गानि मिमेट किरिस्तुना लोप्पो तेल्चितोर आंदिर. मोमोट बलम हिल्वोरम आंदुम, गानि मिमेट बलम मत्तोर आंदिर. मिमेट कदर मत्तोर आंदिर, गानि मोमोट कदर हिल्वोरम आंदुम.

11 इदवेरादाका मोमोट कर्वुने-दूपाते मंतोम, केरालय कपळिं हिल्लें, देब्बां तिचेके मंतोम, लोन-दारा हिलाका मंतोम.

12 मावद मोमोटे कबळ कीसेक मंतोम. माकुन तेराहनोर्कुन, आसिर्वाद हीतोम. ओर माकुन तकलिप कीतुर, गानि मोमोट सहन कीतोम.

13 ओर मावा अपमानम कीतुर, मोमोट दयाते वळ्ळंतोम. इदवेरदाकागुडा दुनियाता नदरते मोमोट कचरालेसीं, मैलालेसीं मंतोम.

14 नना मीक सिग्गु वायागोम इंचि इव पोल्ले रासेक हिल्लेन, गानि नावा पावरमगल्ला पिलाल्कुनसंतोर इंचि तेळियागोटिसि वेहासेक मंतन.

15 मिहगा किरिस्तुना बारेमते कराहनोर पदि वेय्कुना गुरूक मंदानुर, गानि मिहगा वेल्लेटुर बाबुर हिल्लुर. बारित्ते मुन्ने ननाने किरिस्तु येसुना बेसता कबुर तत्तन, अदुन मिमेट विस्वासम कीतिर इंचि ननाने मीवा बाबोनसंतोन आंदुन.

16 अदुनहाटीं मिमेट नावालेसीं ताकट इंचि विनंति कीसेक मंतन.

17 इदे पोल्ले वेहनाहाटीं नना पावरम कियानोर आनि सामिना लोप्पो नावा विस्वासमगल्ला मर्रिनसंतोर तिमतिन मिहगा लोहतन. नना किरिस्तु येसुना बक्तिते बल्हा ताकसेक मंतानो, अल्हेने अन्नि जेगाना कलिसियाने नना कराहना बोदाता बारेमते ओर मीक मति कीसि हीतोम.

18 नना मिहगा वासेक हिल्लेन इंचि इच्चुर लोकुल्क पेद्दिरकेम कीसेक मंतुर.

19 गानि सामिना मनसु मनानय्ते नना बिराने मिहगा वांतन, अस्के पेद्दिरकेम कियानोरा पोल्लेन आयो गानि ओर्क बच्चोर ताकत मंतनो हळंतन.

20 बारित्ते पेनदा राज्येम पोल्लेने आयो गानि दाना ताकतते मंन्ता.

21 मीक बतल गावाले? नना मिहगा कट्टे पीसि वाकाना, हिलाकौटे पावरमते, मेत्ताटा आत्माते वाकाना?

5

विस्वासुल्क बोगमतनम कियामन्नि

1 मीवा नड्डुम वरोर बोगमतनम कीतिर इंचि नाक केंजावाता. ओर ओना बाबोना मुत्तो इत्ते सिन्ना यावान इरकुत्तोर अले! इसोंटा तप्पुड कबळ अविस्वासुल्कगुडा किय्युर.

2 इदुनाहाटीं मीक दुक्कम आया मत्ता, गानि मिमेट पेद्दिरकेम कीसेक मंतिर. असंतोन मीवा लोप्पोटाल पेचाहचि गेदुमगोम.

3 नना मिहागटाल मेंदुल्ते लक्कु मंतन, गानि आत्माते मीवातोनि मंतन. आत्माते मीवातोनि मत्ताहाटीं ओनद नना मुन्नेने न्यायम कीतन.

4 बस्के अय्ते मिमेट येसु सामिना पोरोलते उंदगा जमा आसि उदंतिर, अस्के आत्माते अगा मंन्तन, अल्हेने मना सामि येसुना ताकत मीवातोनि मंन्ता.

5 असोंटा तप्पुड कबळ कियानोना मेंदुल्लुन नासडेम कियालय पेद्दा देय्यमता कय्दे अप्पजेप्पना. बारित्ते, ओक्कला ओर पस्चातापम कियानय्ते, सामि वायाना रोजुने ओना आत्मा पिस्सार.

6 मिमेट पेद्दिरकेम कियमळ बेस आयो, इच्चुर पुल्लाटा पिंडि वेल्लेन पिंडिते कल्पते, पूरा पिंडितुन पुल्लगा कीता अद मीक एरपाटे मंता.

7 पळाना पुल्लाटा पिंडितसंतोन तेंडसि पोहाचि मिमेट पूना पिंडि मुद्दा आया परांतिर, बारित्ते मिमेट निजमे पुल्लाटोर आयवाहाटीं, येसु किरिस्तु मना दाटसि होनना पंडुगुना गौरे पोरिनलेसीं मोक्कु आतोम.

8 अदुनहाटीं मनम पळाना पुल्लाटा पिंडितसोंटा कराब कबाहकुने, दुस्त गुनाल्कुने आयो गानि इमानदारता, सत्तेमता पुल्लगा आयवा हारिनसोंटा पंडुगु कियमळ गावाले.

9 नना मुन्ने रासि लोहता सिट्टिते, बोगमतनम कियानोरतोनि कलियसि मनमट इंचि रासि मत्तन.

10 इदना अर्तम बोगमतनम कियानोरतोनि, आस्ति कियानोरतोनि, दोंगा कीसि तिनानोर्कुनतोनि, बोम्मांक मोळकानोर्कुनतोनि कलियसि मनामान्नि इत्ताप आयो. इल्हा इनानयते मरि दुनियातुने होळसा पीता.

11 नना इनना पोल्ले बतल इत्ते, मीवा लोप्पोटाल बोर्नना ओनद ओर विस्वासिन इंतोर, गानि ओर बोगमतनम कियमळ, आस्ति कियमळ, बोम्मान मोळकमळ, अपमानम कियमळ, रिम्मा आयमळ, दोंगा कीसि तिनमळ इसोंटा गुनम ओनालोप्पो मनानयते ओनतोनि कलियसि मनमट, ओनतोनि गाटो तिनमट इंचि रासि मत्तन.

12 विस्वासम कियवोरा न्यायम नना बारि कीकन? बोर् अयते विस्वासमते मंतुर, ओरा न्यायम मिमेट कियिरा?

13 विस्वासम कियवोरा न्यायम पेने कीता. अदुनहाटीं आ बोगमतनमतोन पेचाहचि गेदमट.

6

विस्वासुल्कुना नड्डुम जर्गना न्यायाल्क

1 बस्के अयते मीलोप्पो जगडम आंता, आ जगडमता न्यायम कियालय मिमेट पेनदा लोकुल्कुनगा होनाका विस्वासम कियवोरगा होंचि न्यायम कियाना हिम्मत बारि कीतिर?

2 पेनदा लोकुल्क आकिर वेलाते दुनियाता न्यायम कीतिर, इद मीक एरपाट हिल्लेना? मिमेट पूरा दुनियाता न्यायम कीतिर अयते, इव सिन्ना-सिन्ना पोल्लेना न्यायम कियानालायक हिल्लिरा?

3 मिमेट पेनदा दूतनगुडा न्यायम कीतिर इंचि मीक एरपाटे मंता. अयते रोजता पिस्वरते जर्गानव सिन्ना-सिन्ना पोल्लेन न्यायम मिमेट किया परिरा?

4 मीवा लोप्पोगिंटा इल्हा जगडाल्क मनानयते, बोर् अयते कलिसियाता पोल्लें बतले तेळियवोर मंतुर, असंतोरगा न्यायम किया वेहालय बारि दांतिर?

5 मी विस्वासुल्कुना नड्डुम न्यायम कियानालायक तेल्विगल्लोड वरोरगुडा हिल्लोरा? मीक सिग्गु वायगोम इंचि इल्हा इंचेके मंतन.

6 वरोर विस्वासि इंकावरोर विस्वासिक अड्डम न्यायम कियालय पंचादितगा दांतोर, अदगुडा विस्वास कियवोरा मुन्ने.

7 निजम इत्ते मीलोप्पो लोल्लिन कियमळे तप्पु आंद. दानकन्ना अन्यायम ओर्सकुनमळ बेस आयोना? नुकसानतुन ओफ्कुनमळ बेस आयोना?

8 अल्हा कियवा, मिमेट तप्पु कबळ कीतिर, अन्यायम कीतिर, अदगुडा मीवा दंटा विस्वासुल्कुंके कीतिर.

9-10 अन्यायम कियाना लोकुल्क पेनदा राज्येमते वारसदार आयुर इंचि मीक तेळियोना? मिमेट दोकाते अरमट. व्यबिचारम कियानोर, बोम्मांक मोळकानोर, बोगमतनम कियानोर, मांडसा मांडसातोनि बोगमतनम कियानोर, मुरतळ मुरतळतोनि बोगमतनम कियानद, दोंगातनम कियानोर, आस्ति कियानोर, कल्लु उनानोर, तेराहनोर, इंकावरोन मुळाहनोर पेनदा राज्येमता वारसदार आयोर.

11 मुन्ने मीवा नड्डुम इच्चर इल्हे मत्तिर. गानि मिमेट येसु किरिस्तुना पोरोलते आनि पेनदा आत्माते नोर्कुचि, पवित्र आसि नीतिमंतुल्क आतिर.

मेंदुलतुन पेनदा महिमाताहाटीं वाळकुंद

12 नना बतलन्ना किया वच्चु, गानि अव अन्नि पायदातव आयों. नना बतलन्ना किया वच्चु, गानि नना अवुना कयदा हिल्ल मुन्नेन.

13 गाटो पीटाहाटीं, पीर गाटोताहाटीं मंता इंचि मिमेट इंतिर, गानि पेन इव रोंडुन इंका नासडेम कीता. मेंदुल बोगमतनम कियालय आयो सामिनाहाटीं मंता, सामि मना मेंदुलताहाटीं मंतोर.

14 पेन दाना ताकततोनि सामिन हामुरताल जीवाते तेहता, अल्हेने मनाकुनगुडा हामुरताल जीवाते तेहंता.

15 मीवा मेंदुल्क किरिस्तुना मेंदुल्ला उंदि बागाल्क आंदुं इंचि मीक एरपाट मंता गदा! एरपाट मत्तस्के नना अबुन ओसि बोगमदाना मेंदुललेसीं कीकाना? बस्केने किय्योन.

16 बोर अय्ते बोगमदानतोनि मींडतोर, ओर दानतोनि उंदि मेंदुल आंतोर. “ओर इव्वुर उंदि मेंदुल आंतुर” इंचि दर्मसास्त्रमते रासि मंता.☆

17 गानि बोर अय्ते सामिनतोनि उंदि आंतोर, ओर ओनतोनि आत्माते उंदि आंतोर.

18 व्यबिचारमताल लक्कु मंटु. मेंदुल्ला पलाताल वायना पापाल्क अच्चोर बतल किय्यो, गानि बोर अय्ते व्यबिचारम कीतोर, ओर ओनादे मेंदुल्क अड्डम पापम कीतोर.

19 मीवा मेंदुल पवित्र आत्माता गुळि आंद, अद पेनदाहेंदाल मीलोप्पो वासि मनंता, ई मेंदुल मीवद आयो, इंचि मीक तेळियोना?

20 बारित्ते पेन मीकुन दरा दोस्सि अस्कुत्ता, अदुनहाटी मिमेट मीवा मेंदुलताहेंदाल दाना महिमा कीम्टु.

7

मर्मिना बारेमते

1 अव पोल्लेने बारेमते मिमेट नाक रासि मत्तिर. नना मीक वेहासेके, मांडसा बदन्ना मुरतटुन इट्टाकोटेन ओनाहाटी बेस मनंता.

2 गानि व्यबिचारम जर्गामन्नि इंचि हरेक मांडसक मुत्तो गावाले, हरेक मुरतळ्क मुय्दो गावाले.

3 मुय्दो ओना मुत्तोना हक्कु पूरा कियमळ गावाले, मुत्तो दाना मुय्दोना हक्कु पूरा कियमळ गावाले.

4 मुत्तोंक दाना मेंदुलपोर्री अदिकार हिल्ले गानि दाना मुय्दोंक अदिकार मंता, अल्हेने मुय्दोंक ओना मेंदुलपोर्री अदिकार हिल्ले गानि मुत्तोंक मंता.

5 अदुनहाटी मिमेट वरोंक-वरोर अलग मनमट. गानि कोन्नि रोजकु पारतना कियालय अलग मनकोम इंचि मिमेट इव्वुर इनकुत्ते, अलग मंटु. दाना पजा मर्रा कलियसि मंटु. बारित्ते, कुदता मनसुन आपकुना परवस्के देय्यम मीकुन पट्टुने अरहालय हळंता.

6 नना वेहानद आदेस आयो, गानि अल्हा कीते मीके बेस मनंता.

7 अंतोर लोक्कुल नावालेसीं मनागोम इंचि नाक अनपिच्चंता. गानि हरेक मनकंक पेनदाहेंदाल अलग-अलग वरम दोर्किस मंता, बोनको बंदो तीरनद, इंका बोनको इंकुदि तीरनद वरम दोर्किस मंता.

8 मरमि आयवोर्कुंक आनि मुंडा मोस्तवुंक नना वेहसेक मंतन, ओर नावालेसीं मरमि आयाकुंटा मत्तेने ओराहाटी बेस.

9 गानि ओरगिंटा कुदता मनसुन आपा पराकोटे मरमि आयिर. बारित्ते मेंदुल्ला इच्चा आसि तनलाळसेक मनना दानकन्ना मरमि आयमळ बेस.

10 गानि बोरां अय्ते मरमि आतां, ओर्क नावद आयो, सामिना आदेस मंता, मुत्तो दाना मुय्दोन होळसा मनि.

11 अदगिंटा होळसानय्ते, अद इंकावरोनतोनि मरमि आयाकोटेन मंदना, हिलाकोटे दाना मुय्दोनतोनि मर्रा सांतिते कलियसि मंदना. मुय्दो ओना मुत्तोन होळसिया मनि.

12 इंदके कळमतोराहाटी नना वेहसेक मंतन, पेन आयो. बोनदन्ना विस्वासि दादाना मुत्तो पेनदुन विस्वासम किय्यो, गानि दानकु ओनातोनि मनालय पसंद मत्ते, ओर दान होळसा मनि.

13 अल्हेने ओक्कला बदन्ना विस्वासि अक्कना मुय्दो विस्वासम किय्योर, गानि ओर दानतोनि कूस मंतोर, अय्ते अद ओन होळसा मनि.

14 बारित्ते अविस्वासि मुय्दो, विस्वासम कीता ओना मुत्तोनतोनि मंचि पवित्र आतोर. अल्हेने विस्वासम कियवा मुत्तो, विस्वासम कीता दाना मुय्दोनतोनि मंचि पवित्र आसि दांता. अल्हा आयाकुंटा मंचि मते मीवा पिलाल्क पवित्र आयाकोन्नेर, गानि ओर इंदके पवित्र मंतुर.

15 अघ्नागानि अविस्वासि मुत्तो आयि मुय्दो आयि ओक्कला ओर होळसंतन इनानय्ते होळसिरकांटी. इद पोल्लेतुन विस्वासम कियाना दादल आयि अक्कल आयि आपामन्नि. बारित्ते, पेन मनाकुन सांतिते पिसालय केयता.

16 ए मुरतदुना,* नीवा विस्वासम कियवा मुय्दोन पिसागोटंतिन इंचि नीकु बतल एरपाट? ए मांड्सातुना,† नीवा विस्वासम कियवा मुत्तोन पिसागोटंतिन इंचि नीकु बतल एरपाट?

पेन बारि केयतनो अदुनहाटीगे पिस्सट

17 गानि बल्हा अय्ते मीकुन सामि निलाहतोर, बल्हा अय्ते मीकुन पेन केयता, अल्हेने मिमेट मंट. इद अन्नि कलिसियाने नावा नियम आंद.

18 अद बल्हा इत्ते, पेनदुन विस्वासम कियाका मुन्ने कतना कीसि मनानय्ते, अदुन मकिच्चा मनि. पेनदुन विस्वासम कियाका मुन्ने कतना कियाकोटा मत्ते, ओर कतना कीकुन्ना मनि.

19 कतना कियाना, कियाकुन्ना बतल आयो, गानि पेनदा आदेसते ताकमळे पेदूदा पोल्ले आंद.

20 हरेक मनकन ओर बल्हा मननेके पेन ओन केयतनो, अल्हेने ओर मनागोम.

21 निमे गिंटा दास आसि मत्तस्के पेन केयते, निमे अदुना पिकिर कियमा. गानि अब्बेटाल इळबळाना मोका वाते, दाना पायदा एता.

22 बारित्ते, दास आसि मत्तस्के निमे सामिन विस्वासम कीतिन, अब्बेटाल इळबळतिन. इळबळतस्के सामिन विस्वासम कीतिन अय्ते किरिस्तुना दास आतिन.

23 पेन मीकुन दरा दोस्सि अस्कुत्ता, दानहाटी मनकालोरा दास आयमट्ट.

24 विस्वासुल्कुनिटा! पेन मीकुन केयतस्के बल्हा मत्तिरो, अल्हेने दानतोनि कलियसि मंट.

25 मरमिं आयववुना बारेमते सामि नाकु बतले आदेस हिया हिल्लोर, गानि नावा मनसुना पोल्ले मीक वेहसेक मंतन. सामिना दयाहेंदाल, नना दान बरोसा कीतन.

26 इंदकेटा तकलिपकुनाहाटी मनकल बल्हा मंतोर अल्हेने मत्ते बेस इंचि नना इनकुंचेके मंतन.

27 नीकु मुत्तो मत्ते अदुन होळसना कोसिस कियमा, मुत्तो हिलाकोटे मरमिं आयना विचारम कियमा.

28 निमे मरमिं कीकुत्ते बतल पापम आयो, लेय्या पेगिळ मरमिं कीकुत्ते अदगुडा बतल पापम आयो. अघ्नागानि बोर अय्ते मरमिं आंतुर, ओरा पिस्वरते तकलिपकु वांतां. असोटा तकलिपकुने अरनायो इंचि नना कोरसंतन.

29 विस्वासुल्कुनिटा! नना वेहानद बतल इत्ते, वेला तक्को मंता. अदुनहाटी इंदकेटाल मुन्ने बोन्क मुत्तो मंता, ओर मुत्तो हिल्वाप मंदना.

30 अळानोर मत्ते, अळवोर लेहका मंदना, आनंदमते मत्तोर आनंदमते हिल्वाप मंदना, सामानकु अस्सानोर बतले हिल्वाप मंदना.

31 इद दुनियाते मनम बतलय्ते कीतोम दाना लोप्पेन मंदनायो. बारित्ते दुनियातव अन्नि नासडेम आयानव आंदुं.

32 मिमेट बदे पोल्लेते पिकिर किया मनि इंचि नना इनकुंचेके मंतन. मरमिं आयवोर पेनदुन बल्हा कूस इराना इंचि पेनदा पोल्लेना पिकरते मनंतोर.

33 गानि मरमिं आता मनकल ओना मुत्तोन बल्हा कूस इराना इंचि दुनियाता पोल्लेने पिकरते मनंतोर.

34 अदुनहाटी ओरा मनसु रोंडु तीस्कुने कबळ कीता. अल्हेने मरमिं आयवा मुरतळ पेनदुन बल्हा कूस कियाना इंचि मेंदुल्ले आनि आत्माते पवित्र मंचि पेनदा पोल्लेना पिकरते मनंता. गानि मरमिं आता मुरतळ मुय्दोन बल्हा कूस इराना इंचि दुनियाता पिकरते मनंता.

35 नना मीवा पायदाताहाटीगे इद पोल्ले वेहासेक मंतन, मीकुन पसांचालय आयो. गानि मिमेट सत्तेमते ताकसि, उंदि मनसुने पेनदा सेवाते मंट.

* 7:16 ए मुरतदुना इग्गे दीना अर्तम, विस्वासम कीता मुत्तो. † 7:16 ए मांड्सातुना इग्गे दीना विस्वासम कीता मुय्दो.

36 बोरन्नागिंटा, “मना मिय्यटाः लेय्यातनम होंचेके मंता, दाना अपमानम आयाका मुन्ने मरमि कियमळ गावाले,” इंचि इनकुनानय्ते मरमि कीसि हिय्यिरकांटी, अद पापम आयो.

37 गानि ओर ओक्कला मरमि कीसि हियमळ अक्सरम हिल्ले इंचि मनसुनाल निरनायम कियानय्ते, अद दाना इच्चान आपापर्ते दान्क मरमि कियवा बेसे कीतोर.

38 बोर अय्ते ओना मिय्यटा मरमि कीतोर, ओर बेसे कीतोर. अल्हेने बोर अय्ते ओना मिय्यटा मरमि किया हिल्लोर ओर इंका बेसे कीतोर.

39 मुय्दो पिस्सि मत्तच्चोरजेम मुत्तो मुय्दोनतोनि होळसाकोंटा मनंता, गानि ओरगिंटा हायानय्ते अद बोनतोनना सामिन विस्वासम कीतोनतोनि मरमि आया परांता.

40 गानि अद इंकावरोनतोनि मरमि आयाकोंटा मत्तेने बेस इंचि नना इनकुंचेके मंतन, अल्हेने नावा लोप्पो मनना पेनदा आत्माता हेंदाले नना मीक वेहासेक इंचि इनकुंचेके मंतन.

8

मोळकता उपारम

1 इंदके, बोम्मनगा मोळकता उपारमता बारेमते वेहंतन, मनम अंतोरम तेल्चितोर्कुम इंचि मनाकु एरपाटे मंता. तेल्चिता हेंदाल गरां वांता, गानि पावरम बक्तित्तुन बेसांगोटंटा.

2 बोरन्नागिंटा नाक पूरा तेळियंता इंचि इनकुनानय्ते, ओन्क बतलय्ते तेळियमळ गावाले, अद इंदकेगुडा तेळिया हिल्ले.

3 गानि बोरन्नागिंटा पेनदुन पावरम कीते, पेनदुक ओर एरपाटे.

4 अदुनहाटीं बोम्मनगा मोळकता उपारमतुन तिनना बारेमते नना मीक वेहंतन, दुनियाते मनना बोम्माने पेन हिल्ले. पेन उंदे मंता, अद आयाका इंका वेरे पेन हिल्ले.

5-6 अय्नागानि स्वर्गमते आयि, बूमिपोरों आयि पेनकु, सामि इंचि इनानव वेल्लेने मंतां. गानि मनाकु उंदे पेन, ओरे मना बाबो आंदुर. ओनाहेंदाले इवन्नि तयार आतां, मनम ओनाहाटींगे मंतोम. अल्हेने सामि वरोरे आंदुर. ओर येसु किरिस्तु आंदुर. पेन, ओनाहेंदाले इवन्नि तयार कीता, मनमगुडा ओनाहेंदाले पिस्सि मनंतोम.

7 गानि अंतोर विस्वासुल्कुंक ई तेल्चि हिल्ले. इच्चुर मोदाटाले बोम्मन मोळिकसि मत्ताहाटीं, अगा मोळकता उपारमतुन तितुर. अदुनहाटीं ओरा कमजोर मनसु कराब आसि दांता.

8 गाटो मनाकुन पेनदा दग्गेर्क ओयो. मनम तिनाकुन्ना मनद नुकसान आयो, तिनना बतल पायदा आयो.

9 मिमेट बदन्ना उपारम तितिर आयावच्चु गानि उंदि पोल्ले मति इर्शट, मीवाहेंदाल विस्वासमते कमजोर मत्तोर पापमते अरनायो.

10 बारित्ते निमे तेल्चिता मनकन, निमेने गुळिते* बोम्मनगा मोळकता उपारमतुन तिनानय्ते, वरोर कमजोर विस्वासि अदुन हळतस्के, गुळिते मोळकतवुन तिनालय ओना मनसु आयोना?

11 ओनाहाटींगुडा किरिस्तु हातोर, इल्हा नीवा तेल्चिहेंदाल, विस्वासमते कमजोर मत्ता विस्वासि पेनदागटाल लक्कु आंतोर.

12 इल्हा निमे नीवा दंटाता विस्वासुल्कुना विरोदमते पापम कीसि, कमजोर विस्वासिना मनसुन नोप्पिचि, किरिस्तुना विरोदमते तप्पु कीतिन.

13 अदुनहाटीं ओक्कला उपारमताहेंदाल नना नावा दंटाता विस्वासुल्कुन पापमते अरहानय्ते, नना बस्केने हव्विं तिन्नोन. नावाहेंदाल ओर बस्केने पापमते अरां मनि.

9

प्रेरितुल्कुना अदिकाराल्क

‡ 7:36 मिय्यटा एरां बोदूट आता मिय्यड.

* 8:10 गुळिते पेनकु मनना गुळि.

1 नना दासतनमताल इळबळसि हिल्लेना? नना प्रेरितुन आयोना? मना सामि येसुन नना हूळा हिल्लेना? सामिना लोप्पो नावा कबळता पलम मिमेट आयिरा?

2 नना बेरे लोकुकुकुनाहाटीं प्रेरित आयाकोन्ना गानि मीवाहाटीं अयते प्रेरितुने आंदुन. नना सामिना लोप्पो प्रेरितुन इंचि मिमेटे सिक्कालेसीं निसान आंदित.

3 बोर अयते नावातोनि वाद-विवाद कियालय हूळांतुर, ओराहाटीं इद नावा जवाब आंद.

4 माकु तिनना-उनना अदिकारम हिल्लेना?

5 कळमता प्रेरितुल्क, सामिना तम्मुहक आनि केपल (पत्र) ईर ओरा मुत्तोहकुन पीकुंचि तिरियताप मोमोटगुडा विस्वासि मुरतळतोनि मरमि आसि पज्जेके पीकुंचि तिरियना अदिकारम माक हिल्लेना?

6 हिलाकोंटे पिस्वरहाटीं कबळ कियाकोंटा मनालय सिराप बरनाबास आनि नाके अदिकारम हिल्लेना?

7 बोर ओना संतम कोत्तां कर्स कीसि सिपाइना नौकरि कीतोर? बोर अंगुरता बगिचा कीसि अंगुर पंडिं तिनाका मनंतोर? आनि बोर गोळकु-गौरि पोसकीसि अबुना पाल उनाका मनंतोर? बोर मनोर.

8 नना मनकना रीतिते इल्हा इंचेके मंताना? हिल्ले.

9 “कळते बंति तिराहनेके कोंदांक मूसका बुट्टि दोहा मनि.” इद पोल्ले सिराप कोंदानाहाटींगे पेन वेहा हिल्ले, मूसाना नियमतेगुडा इल्हे रासि मंता.

10 मनाहाटींगुडा वेहता. बारित्ते ऊडानोर आसेतेन ऊडंतोर आनि बंति तिरहानोरगुडा पंताते पाल गावाले इत्ता आसेतेन बंति तिरहंतोर.*

11 मोमोट मीलोप्पो बेस आत्माता विज्जां वीततोम. अयते माक अक्सरम मत्तवुन मिमेट हीते, अबुन एतमळ बतल तप्पु आंदा? तप्पु आयो.

12 बेरेतोर्क गिंटा मीपोरीं अदिकारम मत्ते, दानकन्ना एक्को माक अदिकारम मनंता. गानि किरिस्तुना बेसता कबुरतुन वेहनेके मावाहेंदाल बतले अड्डम वायामनि इंचि मोमोट आ अदिकारम एताका अन्नि सहन कीसेक मंतोम.

13 मीक अयते एरपाटे मंता, गुळितगा सेवा कियानोर्कुंक गुळितगटाले गाटो दोर्कता. गदूदेतगा सेवा कियानोर्कुंक अगा अरतवुनाल तूस दोर्कता.*

14 अल्हेने किरिस्तुना बेसता कबुर वेहानोर्कुंक, बोर अयते अद कबुर केंजसि विस्वास कीतुर, ओरा हेंदाले पिस्वर दोर्कागोम इंचि सामि हुकुम हीतोर.

15 गानि बोरन्ना नावा पेद्दिरकेम एर्तम कियानादानकन्ना नाक हायमळे बेस अनपिचंचता. अदुनहाटीं नना बोनाहेंदाले पिस्वरता पाय्दा एता हिल्लेन, मिमेट नावाहाटीं इल्हा कीम्दु इंचिगुडा रासेक हिल्लेन.

16 नना बेसता कबुर वेहचि बतल पेद्दिरकेम कीसेक हिल्लेन. बारित्ते इद नावा जिम्मेदारि आंद, नाक बेसता कबुर वेहमळे गावाले. ओक्कला वेहाकोंटे नना बूळ्दि आकन.

17 नना ओक्कला नावा इच्चाताल इदुन कीते नाक इनाम दोर्कता. ना इच्चाताल कियाकोन्नागानि दाना जिम्मेदारि पेन नाक अप्पजेपता.

18 अयते नावा इनाम बतल? नना बेसता कबुर वेहनेके नाक दोर्कना अदिकारम एताका बेसता कबुर पुक्कटते वेहमळ, इदे नावा इनाम आंद.

19 बारित्ते, नना बोना कय्दा हिळु हिल्लेन, अयनागानि वेल्लेटोर्कुन किरिस्तुनगा पीसि वायाना इंचि नावद-नना अंतोरा दासुन आतन.

20 यहूदिल्कुन किरिस्तुनगा तरालय नना यहूदिल्कुनालेसीं आतन. मूसाना नियमते ताकानोर्कुन किरिस्तुनगा तरालय मूसाना नियमते ताकाना अक्सरम हिलाकोन्ना गानि नियम पीसि ताकतन.

21 मूसाना नियम पीसि ताकवोर्कुन किरिस्तुनगा तरालय नियम हिल्लोरलेसीं आतन. इत्ते पेनदा नियमतुन पास्कंतन इंचि आयो, गानि किरिस्तुना नियम पीसि ताकानोन आंदुन.

* 9:10 किरिस्तुना सेवा कियानोर बोरगा सेवा कीतोर ओरागेन तिदना. ☆ 9:13 लैब्यवस्ता 6:16,26; व्यक्ताविवरन 18:1-3

22 विस्वासमते कमजोर मत्तोर्कुन किरिस्तुनगा तरालय, नना ओरालेसी आतन. बल्हैना आयि इच्चुरन्ना पिसागोम इंचि, बोर बल्हा मंतुर, ननागुडा ओरालेसी आतन.

23 ओरतोनि बेसता कबुरता आसिर्वादते नाकगुडा तूस दोर्कना इंचि इवन्नि कीसेक मंतन.

24 पंदेम वाटसि वितनेके अंटोरे वित्तंतुर, गानि इनाम वरोके दोर्कता इंचि मीक एरपाटे मंता. मिमेटगुडा वितनेके इनाम दोर्कनालेसी वित्तट.

25 कर्सानोर अंटोर बेस करियसि ओरद-ओर तयारते मंनंतुर, अदगुडा नासडेम आयाना किरिटम दोर्किच्चुकुनालय इवन्नि कीतुर. गानि मनम अयते बस्केने नासडेम आयवा किरिटम दोर्किच्चुकुनालय कीतोम.

26 अदुनहाटी नना बद जेगातगळक अयते वित्तना, अगळक बेस वित्तंतन, ननागुडा पिळ्ळिकलते गुदूसेक लडांचंतन, वळिते लडांचताप आयो.

27 नना ना मेंदुल्लुन आपकुंचि इरंतन. नना वेरेतोर्कुक बेसता कबुर वेहचि, नावा लोपेने तक्को मत्ते नना बाता कबळतोम आयोन.

10

बोम्मना पूजा कियमट

1 विस्वासुल्लुकुनिटा! इद पोल्ले मीक तेळियका मनमळ नाक इस्टम हिल्ले. अद बतल इत्ते, मना एनकटा तादो-बाबुर अंटोर मब्बु तेर्पेता हिळु मंचि समुद्रमता नड्डुमताल ताकतुर.

2 इल्हा ओर मब्बु तेर्पे हिळु, समुद्रमता नड्डुम मत्ताहेंदाल ओर अंटोर मूसाना बापतिस्मा एततालेसी आता

3-4 ओर अंटोर उंदे आत्माता गाटो तित्तुर, उंदे आत्माता एर उट्टुर. पेन ओर्क बंडाताल एर हीता. अद बंडा इत्तेने किरिस्तु आंदुर, ओर ओरतोनि ताकुंदुर.

5 गानि पेन ओरवेटाल वेल्लेदुर लोकुल्लुकुनपोर्रो कूस मनाहिल्ले. अदुनहाटी ओर अदे बय्लि जेगाते हातुर.

6 बल्हा अयते मना तादो-बाबुर पेनदुक इस्टम हिल्ला पोल्लेने ताकतुर, अल्हा मनम ताका मनि इंचि इव पोल्लें मनाकु उदाहरनलेसी वेहंतां.

7 ओरागटाल इच्चुर बोम्मां कीसि मोळ्ळकतुर, अल्हा मिमेट बोम्मांक मोळ्ळकाना आयो. ओरा बारेमते, “लोकुल्लक तिनालय, उनालय उदतुर आनि तेदसि एगरालय दल्लतुर,” इंचि दर्मसास्त्रमते रासि मंता.

8 ओरागटाल इच्चुर बोगमतनम कियुंदुर. अदुनहाटी ओरावेटाल उंदे रोजते इरवै मूड वेय्कुना मंदितुन हक्कमळ जर्गता. मनम ओरालेसी बोगमतनम कियामन्नि.

9 ओरागटाल इच्चुर पेनदा पट्टु हळुंदुर, ओर तरासकु कस्किसि हातुर. मनम ओरालेसी किरिस्तुना पट्टु हळा मन्नि.

10 ओरागटाल इच्चुर गुल्लुंदुर, नासडेम कियाना दूता हेंदाल ओर नासडेम आतुर. ओरालेसी मिमेट गुल्लामट.

11 मना तादो-बाबुर्क जर्गता पोल्लें उंदि उदाहरनलेसी मंचि, मनम आकिर युगमते एवताहाटी मनाकु तेळियागोम इंचि रासमळ जर्गता.

12 बोर अयते नना विस्वासमते गट्टिगा नित्तिसि मंतन इंचि विचारम कीतोरो, ओर विस्वासमताल अरामान्नि इंचि कापाळकुनना.

13 अंटोर्क वायानसोटवे परिकसां मीक वातां, दानकन्ना एक्को परिकसां मीक वाया हिल्लें. गानि पेन विस्वासमगल्लद आंद. अद मीतोनि आया परवसोट्टा एक्को परिकसाने अर्रा हिय्यो, परिकसां वाते मिमेट सहन कियागोम इंचि अवेटाल पेय्सना हरिगुडा पेन कीता.

सामिना उपारम आनि बोम्मना उपारम

14 अदुनहाटी नावा पावरमगल्ला विस्वासुल्लकुनिटा! बोम्मना पूजेनाल लक्कु मंटु.

15 मिमेट बुद्धिमंतुल्लु आंदिर इंचि नना वेहसेक मंतन. नना वेहाना पोल्लेन मिमेट कुद निरनायम एतट.

16 मनम दन्यवाद कीसि, उंदे गिलासते अंगुर पानकम उट्टस्के, किरिस्तुना नेत्तुर मना अंतोराहाटी हीतोर इंचि हुपिच्चेक मंतोम. मनम उंदे हारितुन तुकडां कीसि तित्तस्के किरिस्तुना मेंदुल मना अंतोराहाटी हीतोर इंचि हुपिच्चेक मंतोम.

17 मनम अंतोरम उंदे हारिता तुकडां तित्ताहाटी, मनम वेल्लेटुर मंचिगुडा उंदे मेंदुललेसी मंतोम.

18 इस्राएल लोकुल्लुकुनहेके हळाट! गदूदेपोर्री मोक्कु हीतवुन तित्तस्के, गदूदेपोर्रीटा मोक्कु मावा अंतोराहाटी इंचि हुपिच्चेक मंतुर.

19 नना बतल वेहसेक इत्ते, बोम्मांक मोळकता गाटोक बतल हिल्ले, बोम्मन लोप्पोगुडा बतल हिल्ले.

20 इच्चोरे गदा, बोम्मांक मोळकानोर, देय्याल्लुकुंक मोळकसेक गानि पेनदुक आयो. अदुनहाटी मिमेट देय्याल्लुकुनतोनि पोत्तु आयमळ नाक इस्टम हिल्ले.

21 मिमेट सामिना गिलासतद आनि देय्यमता गिलासतद इल्हा रौंडुनद उन्ना पर्रिर, अल्हेने सामिना उपारम आनि देय्यमता उपारम रौंडुने पोत्तु आया पर्रिर.

22 इल्हा कीसि मनम सामिक होंग वायानाल कीतोम. मनम पेनदुकन्ना बलवंतुल्लुकुमा? आयोम.

23 अन्नि मनाहाटी बेसे आंदुं, गानि अन्नि कबळतव आयो. अन्नि मनाहाटी बेसे आंदुं, गानि अन्नि बक्तिते एद्रनाहाटी बेस आयो.

24 बोरे आयिर ओना पायदातुने हळा मनि, इंकावरोना पायदातुनगुडा हळना.

25 हाटुमताल बवन्ना हव्विं अस्सि तिनावच्चु. तिनकना, तिना मन्निआ इंचेके मीवा मनसुन सवाल कियमट.

26 बारित्ते, “बूमि, बूमि पोर्रीटव अन्नि सामिनवे आंदुं” इंचि दर्मसास्त्रमते रासि मंता.

27 बोर्न्ना विस्वासम कियवोर मीकुन गाटोक केयानय्ते, मीक होनना मनसु आते, होंट. अगा होत्ता पजा, बतलय्ते मीक तिनालय हींतोर अदुन मनसुने बतले सवाल कियका तिट्ट.

28 गानि मीकुन बोर्न्ना, “इद बोम्मनगा मोळकतद आंद,” इंचि इनानय्ते, वेहतोनाहाटी आनि बेस बुद्धिदताहाटी तिनमट.

29 इत्ते, “बेस बुद्धिद” मीवद आयो गानि मुन्नेटोना बेस बुद्धिदता बारेमते इंचेके मंतन. मीवाहाटी इंकावरोन बारि वेहा हिद्य्यना.

30 नना दन्यवाद कीसि गाटो तितन अय्ते, दन्यवाद कीताहाटी बदनाम बारि आयाना?

31 अदुनहाटी मिमेट उनमळ, तिनमळ बतल कियाना गानि पेनदा महिमाताहाटीगे कियाना.

32 यहुदि लोकुल्लुकुंक, युनानि लोकुल्लुकुंक आनि कलिसियातोर्कुंक अड्डम आयाना लायक मनमट.

33 ननागुडा ओर पिसागोम इंचि, नावा पायदा हळाका, वेल्लेटुर लोकुल्लुकुना पायदाताहाटी, अन्नि पोल्लेने अंतोर्कुन कूस इरंतन. बारित्ते ओर्क मुक्ति दोर्कगोम.

11

आरादनातस्के मुर्ताहक तल्ला मुचमळ

1 नना किरिस्तुनलेसी ताकतन, मिमेटगुडा नावालेसी ताकट.

2 अन्नि पोल्लेने नाकुन मिमेट मति कीसेक मंतिट, नना मीक कराहचि अप्पजेपता पोल्लेने ताकसेके मंतिट, इंचि नना मीकुन तल्लसकुंचेके मंतन.

3 गानि मीक इद पोल्ले तेळियमळ गावाले, किरिस्तु, मांडसाता तल्लातालेसी आंदुर, मांडसा मुरताहकुना तल्लातालेसी आंदुर, पेन किरिस्तुना तल्लातालेसी आंदु.

4 बोरन्ना मांडसा पारतना कियानेंके, हिलाकोंटे बविस्यवानि कियानेंके तल्लातुन मुच्चुकुनानयते ओर तल्लातुन* अपमानम कीतोर.

5 गानि बदनना मुरतळ पारतना कियानेंके हिलाकोंटे बविस्यवानि कियानेंके दाना तला मुच्चुकुनाकोंटे, अद दाना तल्लाता अपमानम कीताप आनि गुंडु कीताप आंद.

6 बदनना मुरतळ ओक्कला तल्लातुन मुच्चुकुनाकोंटे दाना केल्लुकुन कतरिचकुनना. अद केल्लुकुन कतरिचकुनमळ, हिलाकोंटे गुंडु कीकुनमळ इद सिग्गु पोल्ले आंद इंचि अनपिस्ते, अद तल्लातुन मुच्चुकुनना.

7 मांडसा ओना तल्लातुन मुचमळ बेस आयो, ओर पेनदा रूपम आनि महिमा आंदुर, गानि मुरतळ अयते मांडसाता कदर आंद.

8 बारित्ते, मांडसा मुरतटाल वायाहिल्लोर, गानि मुरतळ मांडसाताल वाता.

9 मांडसा मुरतटाहाटी तयार कियमळ जर्गाहिल्ले, गानि मुरतळ मांडसाताहाटी तयार कियमळ जर्गता.

10 अदुनहाटी पारतना कियानेंके पेनदा दूतां हळसेक इंचि मुरतळ, मांडसाता अदिकारमता कयदा हिल्ल मंतन इंचि ह्युप्सालय दाना तला मुच्चुकुनमळ गावाले.

11 अयनागानि पेनदा लोप्पो मांडसा हिल्ला मुरतळ मंदा पर्री, मुरतळ हिल्ला मांडसा मंदा पर्रीर.

12 बारित्ते, मुरतळ मांडसाताल तयार आता, अल्हेने मांडसा मुरतटाल पुटसेक मंतोर, गानि इवनि पेनदाले तयार आसेक मंता.

13 अयते, मिमेटे विचारम कीम्पु, मुरतळ तला मुचकुनवा पेनदा पारतना कियमळ बेसे ना?

14 मांडसा तल्लाता केल्लक बेसांगोटकुनमळ ओनाहाटी सिग्गु होनना पोल्ले आंद, इद मीक एरपाटे मंता.

15 गानि मुरतळ दाना केल्लक पोळगु बेसांगोटकुल्ले दानकु कदर आंद. दाना तल्लातुन मुचकुनालय पेन दानकु केल्लक हीता.

16 इदुना बारेमते बोरन्ना लोल्लि कियानयते, ओनकु तेळियाना गदा, मावा इसोंटा रीति आयो, कलिसियातोरदगुडा इसोंटा रीति आयो.

पेनदा उपारम

17 मिमेट कलिसियाने जमा आयमळ पायदा आयो गानि नुकसाने आंता. अदुनहाटी नना मीवा पेदूदातनम कीसेक हिल्लेन.

18 बस्के अयते मिमेट कलिसियाते जमा आंतिर, अस्के मीक वरोनद-वरोक अर्राका अलग आसेक मंतिट इंचि नना मोदाला कैजतन, इदुन नना नम्मंतनगुडा.

19 मीलोप्पो अलग आयमळ बेसे. बारित्ते बोर निजमते पिस्संतोर, ओर दिस्सि अर्रीतोर.

20 मिमेट सामिना उपारम तिनालय जमा आंतिर, गानि अदुन सामिना उपारम इन्नुर.

21 बारित्ते मिमेट तिनानस्के वरोक मुन्ने वरोर, बोनद ओर तिंतिर. अदुनहेंदाल बोरो कर्वुने मनंतुर, बोरो रिम्मांतुर.

22 मीक तिनालय-उनालय लोन हिल्लेना? हिलाकोंटे पेनदा कलिसियातोर्कुन हयसाकुंटा आनि गरिबोर्कुना इज्जत पोगोटालय आतिरा? इंदके मीकुन नना बतल इनकन? इदुनाहाटी मिमेट बेस कीतिर इनकना? बस्केने इन्नोन.

23 बारित्ते, सामिनाहेंदाल इव पोल्ले नाक दोर्कतां, अबुन नना मीक अप्पजेपतन. येसु सामिन बद रोज अयते पीसि हिय्याना मत्ता अद नर्का उंदि हारि एततोर,

24 पेनदुक दन्यवाद कीसि, हारितुन उराहतोर, उराहचि ओर्क हीसेक, “इद मीवाहाटी नावा मेंदुल आंद, नावा मतिताहाटी इल्हेने कीम्पु,” इंचि वेहतोर.

25 इल्हा अद तित्ता पजा, अंगुर पानकमता गिलास एतसि, “इद पानकम नावा नेत्तुरते पूना करार आंद, इदुन बस्के अयते उंतिर अस्के नावा मति कियाना,” इंचि वेहतोर.

* 11:4 तल्लातुन तल्लातुन इत्ते किरिस्तुन.

26 बारित्ते, मिमेट बस्के-बस्के अये इद हारितुन तितिर, अंगुर पानकम उंटिर, अस्के सामिना हामुरतुन ओर मल्सि वायानादाका वेहंतिर.

27 अदुनहाटी बोर अये सामिक इस्टम हिल्वा रीतुने ताकसि, हारितुन तितोर, अंगुर पानकम उंटोर, ओर सामिना मेंदुल आनि नेत्तुरता दोस्सि आंतोर.

28 इंचि हरेक मनकल कुद बल्हा मंतोर इंचि ओनद ओर परिक्सा कीसि हळकुत्ता पजाने हारितुन तिनमळ गावाले आनि अंगुर पानकम उनमळ गावाले.

29 बारित्ते सामिना मेंदुल बारेमते तेल्लिचकुनाका तिनमळ-उनमळ कीते, ओर ओना पोराने सिक्सा तरकुंतोर.

30 अदुनहाटी मीलोप्पो वेल्लेटुर कमजोर आतुर, बिमार्क आतुर, वेल्लेटुर हासिगुडा होत्तुर.

31 गानि मनम कुद बल्हा मंतोर इंचि परिक्सा कीसि हळते, पेन मनाकु सिक्सा हिय्यो.

32 गानि मनाकु दुनियातोरतोनि सिक्सा आयामान्नि इंचि सामि मनाकुन बेस पोल्ले वेहचि सुदरांचतोर.

33 अदुनहाटी विस्वासुलकुनिटा! सामिना उपारम तिनालय जमा आतस्के अंतोर वायानाल एदुर हळसि, कळसि तिदु.

34 बोरन्नागिंटा कर्वुने मल्ले लोने तिचि वायिर. इल्हा कलियमळता हेंदाल सिक्सा तपंता. कळमता पोल्लेन बारेमते नना वातस्के वेहंतन.

12

पवित्र आत्मा हिय्यना वरमकु

1 विस्वासुलकुनिटा! आत्माता वरालकुना बारेमते मीक तेळियका मनमळ नाक इस्टम हिल्ले.

2 मिमेट पेनदुन विस्वासम कियाका मुन्ने, वळकवा बोम्मान मोळकानाहाटी मीक बल्हा वेहते, मिमेट अल्हे तार्किदिर.

3 अदुनहाटी पेनदा आत्माते वळकानोर बोर आयिर, “येसु सापनेम दलगतोर आंदुर,” इंचि इन्नुर. अल्हेने पवित्र आत्माते ताकवोर बोर आयिर, “येसु सामि आंदुर,” इंचि इन्नुर.

4 वरमकु वरै-वरै मनना गानि पवित्र आत्मा उंदे आंद.

5 सेवागुडा वरै-वरै तीरकुना मनना गानि सामि वररै आंदुर.

6 वरै-वरै तीरकुना अदूबूतामाता कबाहक मनना गानि ओरा लोप्पो कबाहक कियालय दैरनेम हियना पेन उंदे आंदु.

7 अंतोर विस्वासुलकुंक पायदा आयागोम इंचि मा अवेटाल हरेक मनकानगा पेनदा आत्मा हियमळ जर्गता.

8 बल्हा इत्ते, अदे आत्माताहेंदाल वरोर बुद्धिता पोल्ले वेहंतोर, अदे आत्माताहेंदाल इंकावरोर तेल्विता पोल्ले वेहंतोर.

9 अदे आत्माताहेंदाल वरोर विस्वासमते गट्टिगा मनंतोर, अदे आत्माताहेंदाल इंकावरोक बिमार्क बेस कियाना वरम हियमळ जर्गता.

10 अद आत्मा बोर्को-बोर्को अदूबूतामाता कबाहक कियानद ताकत, बोर्को बविस्यवानि कियानद, बोर्को आत्मान लोप्पो तेडा बतल हळानद, बोर्को वरै-वरै बासां वळकानद आनि इंका बोर्को बासाना अर्तम वेहना वरम हीता.

11 गानि इवन्नि अद उंदे आत्मा दाना इस्टम वाताप वरोक-वरोक तूसि हीसि कबाहकुन पूरा कीता.

मेंदुल उंदि, दाना बागाल्क वेल्लेने

12 मना मेंदुल उंदे गानि अवने बागाल्क वरै-वरै मंतां. अवन्नि बागाल्क वेल्लेने मनना गानि उंदे मेंदुलतव आंद, अल्हेने किरिस्तुगुडा मेंदुललेसी मंतोर.

13 बारित्ते, मनम अंठोरम यहुदिल्क आयिना, युनानि आयिना, दासुल्क आयिना, दासुल्क आयाकोन्ना उंदे आत्माहेंदाल, उंदे मेंदुल आयालय बापतिस्मा एततोम, मना अंठोर्क उंदे आत्मा उहमळ जर्गता.

14 अदुनहाटी मेंदुलते सिराप उंदे बागम हिल्ले गानि वेल्लेने बागाल्क मंतां.

15 ओक्कला, काल गिंटा, “नना कय आयोन, अदुनहाटी मेंदुलता बागम आयोन,” इंचि इनकुनिना गानि अद मेंदुलता बागामे आंदु.

16 अल्हेने केव गिंटा, “नना कळ आयोन, अदुनहाटी मेंदुलता बागम आयोन,” इंचि इनकुनिना गानि अद मेंदुलता बागामे आंदु.

17 ओक्कला, पूरा मेंदुल कळे आसि मत्ते, बगाटाल केंजसि मन्नेम? पूरा मेंदुल केव्वे आसि मत्ते, बगाटाल मूस्किसि मन्नेम?

18 अदुनहाटी पेन दाना इच्चा मत्ताप, हरेक बागमतुन मेंदुलते बगा-बगा इरानो अगा इर्ता.

19 अव अन्नि गिंटा उंदे बागम मंचि मत्ते, मेंदुल बगा मनवळ?

20 अदुनहाटी बागाल्क वेल्लेने मंतां, गानि मेंदुल उंदे आंदु.

21 इंदके कळ कयदुन, “नीवातोनि नाक कबळ हिल्ले,” इंचि इना पर्री. आनि तला काल्कुन, “नीवातोनि नाक कबळ हिल्ले,” इंचि इना पर्री.

22 गानि मेंदुलते कमजोर मत्ताप दिस्सानव बागाल्के मनाकु वेल्ले अक्सरमतव आंदु.

23 मना मेंदुलते बव बागाल्कुनयते तक्को कदरतव इनकुंतोमो अवुने मनम एक्को कदर कीतोम, अव बव अयते सिंगारम हिल्लवव अव इंका एक्को सिंगारम आंतां.

24-25 गानि मुन्नेटाले सिंगारम मत्ता बागाल्कुन सिंगारम कियाना अक्सरम हिल्ले, गानि बवयते बागाल्क कदर हिल्लेंगो अवुंक एक्को कदर दोर्कमळ गावाले. अव बागाल्क सिन्ना-पेद्दा बतल इनाका उंदांक-उंदि रंदि कियमळ गावाले, इंचि पेन इल्हा मेंदुल तयार कीता.

26 अदुनहाटी ओक्कला मेंदुलतद उंदि बागम नोते, दानतोनि अव अन्नि बागाल्कुंक नोता. ओक्कला उंदि बागमकु कदर दोर्कते, अव अन्नि बागाल्क कूस आंतां.

27 अल्हेने मिमेट अंठोर कलियसि किरिस्तुना मेंदुल आदिर, हरेक मनकल आ मेंदुलता बागाल्क आदिर.

28 कलिसियाता लोप्पो पेन मोदाला प्रेरितुल्कुन, ओरा पज्जो पेनदा कबुरतोर्कुन, ओरा पज्जो पेनदा पोल्लें कराहनोर्कुन, ओरा पज्जो अद्बूतामाता कबाहक कियानोर्कुन, ओरा पज्जो बिमार्कुन बेस कियानोर्कुन, ओरा पज्जो सहायम कियानोर्कुन, राज्येम ताकसानोर्कुन आनि वेरें-वेरें बासां वळ्कानोर्कुन निलाहता.

29 इत्ते, अंठोर प्रेरितुल्क आयुर, अंठोर पेनदा कबुरतोर आयुर, अंठोर पेनदा पोल्लें कराहनोर आयुर, अंठोर अद्बूतामाता कबाहक कियानोर आयुर,

30 अंठोर्क बिमार्क बेस कियाना वरम दोर्काहिल्ले, अंठोर वेरें-वेरें बासां वळ्कानोर आयुर, अंठोर अव पोल्लेना अर्तम वेहा पर्र,

31 मिमेट पेद्दा-पेद्दा वराल्कुना आसेते मंटु, इवे आयाका इवुंकन्ना बेसता हर्रि वेहंतन.

13

पावरम कियमळ अन्निक्न्ना बेस पोल्ले आंद

1 नना मनकालोर्क आनि पेनदा दूतां वळ्कना बासां वळ्कतेगुडा, नावा लोप्पो पावरम हिलाकोटे, नना टंग-टंग इनना इत्तोळतसंठोन हिलाकोटे गल-गल इनना गज्जेनसंठोन आंदुन.

2 नाक गिंटा बविस्वयानि वेहना वरम मनना, अन्नि मर्माल्कु आनि तेल्विता पोल्लें तेळियना, गुट्टान जर्पनचचो पूरा विस्वासम मनना गानि नावा लोप्पो पावरम हिलाकोटे नना बतले कबळतोनि आयोन.

3 नावा पूरा दनमतुन गिंटा गरिबोर्कुंक तूसि हिथ्यिना, बेसता कबुर वेहनाहाटीं नावा मेंदुल बोळसालय हिथ्यिना, नावा लोपपो पावरम हिलाकोटे बतल पायदा मननो.

4 पावरमते ओपके मंता, दया मंता. पावरम इंकावरोन पोर्रो कळक पोल्ता हिथ्यो, पावरम पोमाडेंगि क्रिया हिथ्यो, पेद्दिरकेम क्रिया हिथ्यो.

5 रीति हिल्ला कबाहक क्रिया हिथ्यो, नाके पायदा गावाले इंचि इना हिथ्यो, सिडांचा हिथ्यो, बोर्नना तकलिपकु क्रियाना अदुन मनसुने इरा हिथ्यो.

6 कराब कबाहकुने कूस आया हिथ्यो, गानि सत्तेमते कूस आंता.

7 पावरम अन्नि पोल्ले सहन क्रिया वेहंता, अन्नि पोल्लेनपोर्रो विस्वासम क्रिया वेहंता. अन्नि पोल्लेनपोर्रो आसे इरा वेहंता, अन्नि पोल्लेने ओपकेते इरता.

8 पावरम बस्केने मारो. गानि बविस्थवानि वेहना वरम मारंता, वैरे-वैरे बासां वळकना वरम आगसि दांता, मर्मम तेल्लिचकुनना तेल्लि मत्ते अदगुडा कबळ क्रियो.

9 बारित्ते मना तेल्लि पुरागा हिल्ले अल्हेने बविस्थवानि वेहना वरम पुरागा हिल्ले.

10 गानि बस्के अयते अन्नि पुरागा क्रियाना पोल्ले वायार, अस्के पुरागा हिल्लेद मायसि दांता.

11 नना सिन्ना-पेडन मत्तस्के, सिन्ना-पेडनलेसीं वळकुंदुन, सिन्ना-पेडनलेसीं विचारम कियुंदुन, सिन्ना-पेडनलेसीं मनसु मत्ता, गानि पेद्दागा आतारिते सिन्ना-पेडनलेसीं वळकना पोल्ले होळसीतन.

12 इंदके मनाकु अद्दमते हळताप मागुर-मागुर दिस्सेक मंता, गानि आयंका ओना मुन्ने नित्तिसि हळंतोम. इंदके नाक पुरागा तेळियो, नावा बारेमते पेनदुक पुरागा तेळियंता. ओर वाता पजा, नाकगुडा पुरागा तेळियंता.

13 इंदके विस्वासम, आसे, पावरम इव मूड पोल्ले बस्केळक मनानवे आंदुं, गानि इवेटाल पावरम अन्निकन्ना पेद्दा पोल्ले आंद.

14

वैरे-वैरे बासां आनि बविस्थवानि

1 पावरम इद मीवा लक्से मन्निकांटी. आत्माता वराल्कुन पहकाट, बविस्थवानि वेहना वरम पहकसेकेन मंदु.

2 बारित्ते, तेळियवा बासाते वळकानोर, ओर मनकालोर्कुनतोनि आयो गानि पेनतोनि वळकंतोर. ओर मर्ममता पोल्ले पेनदा आत्माताल वळकंतोर, अव पोल्ले मनकालोर्कुंक तेळियो.

3 गानि बविस्थवानि वेहानोर, मनकालोर्कुना बक्तितुन बेसांगोटालय, दैरेनेम हियालय, सांतिते मनालय वेहंतोर.

4 वैरे-वैरे बासाते वळकानोर, ओनदे बक्तितुन बेसांगोटंतोर. गानि बविस्थवानि वेहानोर, कलिसियातोरा बक्तितुन बेसांगोटंतोर.

5 मिमेट अंतोर वैरे-वैरे बासाते वळकगोम इंचि नना इनकुंतन. गानि दीनकन्ना एक्को बविस्थवानि वेहमळे बेस इंचि इनकुंतन. बारित्ते वैरे-वैरे बासाते वेहानोर, कलिसियातोर्कुन बक्तिते बेसांगोटालय ओरा बासाते वेहाकोटे बतल पायदा हिल्ले. अदुनहाटीं वैरे-वैरे बासाने वेहानदाकन्ना बविस्थवानि वेहमळे एक्को पायदातद आंद.

6 विस्वासुल्कुनिटा! नना मिहगा वासि पेन नाक हीता पोल्लेन वेहकन, तेल्लिता पोल्लेन वेहकन, बविस्थवानि वेहकन, कराहकन अस्के मीक पायदा आयार. अवुन होळसिसि वैरे-वैरे बासाते वेहते मीक बतल पायदा आयार?

7 अल्हेने त्रीला आनि तरास बुरीते जीवा हिल्ले. अयनागानि अवुन बरोबर नेकिचाकोटे, बतल नेकसेक मंता इंचि बल्हा तेळियंता?

8 तूताकोमता आवाज बरोबर पेयसाकोटे लडाइ क्रियालय बोर तयार आंतुर?

9 अल्हेने मिमेटगुडा वैरेतोर्क तेळियना पोल्लेते वेहाकोटे, मीवा पोल्ले ओर्क बल्हा तेळियार? मिमेट वळिते वळकताप आंता.

10 दुनियाते बच्चुंगो तीरकुना बासां मंतां, गानि अर्तम हिल्वद बदे बासा हिल्ले.

11 अदुनहाटी अद बासाता अर्तम नाक तेळियाकोटे, नना वळ्कानोनतोनि वेरे देसेमतोन आंतन, ओर नावाहाटी वेरे देसेमतोर आंतोर.

12 अल्हेने मिमेटगुडा पेनदा आत्माता वराल्कुने निडिस मंतिट, अबुनाहेंदाल कलिसियातोर्कुना बक्ति बेर्सना कोसिस कीम्टु.

13 अदुनहाटी वेरे-वेरे बासाते वळ्कानोर, दाना अर्तम वेहाना ताकत हीम इंचि पारतना कियाना.

14 बारित्ते, ननागिंटा वेरे-वेरे बासाते पारतना कीते, नावा आत्मा पारतना कीता गानि नावा बुद्दि कबळ किय्यो.

15 अयते नाक बतल कियमळ गावाले? नना नावा आत्माते पारतना कीतन, नना नावा बुद्दिदेतेगुडा पारतना कीतन. नना नावा आत्माते पाटा पारंतन, नना नावा बुद्दिदेतेगुडा पाटा पारंतन.

16 ओक्कला निमे सिराप आत्माते दन्यवाद कियानयते, नीवा पोल्ले तेळियवोर अगा उद्दुता मनकल आमीन इंचि बल्हा इनानुर? निमे बतल वळ्कतिन ओनकु तेळिया हिल्ले.

17 निमे अयते पेनदुक बेस दन्यवाद कीतन, गानि इंकावरोना बक्ति बेर्सालय अद कबळ किय्यो.

18 मी अंतोर्कन्ना एक्को वेरे-वेरे बासाने वळ्कना वरम नाक मंता, अदुनहाटी नना पेनदुक दन्यवाद कीतन.

19 गानि कलिसियातोर्कुनतोनि वेरे-वेरे बासाते पदि वेय्कुना पोल्लें वळ्कनदानकन्ना, ओर्क कराहलय तेळियना बासाते हेय्युं पोल्लें ना बुद्दिदेते वेहामळे नाक बेस.

20 विस्वासुल्कुनिटा! मिमेट तेल्विते सिन्ना-पिलाल्कुनालेसीं मनमट, गानि पेद्दा मनकालोर्कुनालेसीं मंटु. कराब पोल्लेने सिन्ना-पिलाल्कुनलेसीं तेळियवाप मंटु. विचारम कियमळते पेद्दोरालेसीं मंटु.

21 दर्मसास्त्रमते, “नना तेळियवा बासाने वळ्कानोर्कुना हेंदाल, पराया लोकुल्कुना तोळ्दाल, ईरतोनि वळ्कंतन, अयनागानि ईर नावां केंजुर,” इंचि पेन वेहंता.

22 अदुनहाटी तेळियवा बासाते वळ्कमळ, विस्वासुल्कुनाहाटी आयो, गानि विस्वासम कियवोराहाटी चिन्ह आंद. बविस्वयानि वेहमळ विस्वासम कियवोराहाटी आयो, गानि विस्वासम कीतोराहाटी चिन्ह आंद.

23 ओक्कला कलिसियातोरे उंदगा जमा आतस्के, अंतोर तेळियवा बासाते वळ्कालय दल्गते, मीलोप्पो बासा तेळियवोर, अविस्वासि वायानयते, ओर मीकुन पागल आतुर इंचि इंतुर.

24 गानि मिमेटगिंटा तेळियना बासाते बविस्वयानि वेहते, बोरन्ना विस्वासम कियवोर हिलाकोटे तेळियवोर मनकल मिहगा वासि केंजते, ओना तप्पुक ओन्क तेळियसि, ओर पापमतुन एरपाट कीकुंतोर.

25 ओना मनसुने मक्किस् मत्तव पूरा दिसंतां. अदुनहाटी ओर बोकबोर्ले अर्सि पेनदुन मोळ्कंतोर आनि “निजमे पेन मीलोप्पो मंता,” इंचि ओप्कुंतोर.

आरादना कियाना तरिका

26 विस्वासुल्कुनिटा! इंदके बतल कियाना? बस्के अयते मिमेट जमा आंतिर, अस्के वरोर पाटा पारालय, वरोर कराहलय, वरोर पेनदा पोल्ले बैय्यरा कीसि वेहालय, वरोर वेरे बासाते वळ्कालय, वरोर वेरे बासाता अर्तम वेहालय तयार मनंतुर. इवन्नि कलिसियातोर्कुना बक्ति बेर्सनाहाटी आयमळ गावाले.

27 वेरे-वेरे बासाते वळ्कना मते, इव्वुर हिलाकोटे एक्कोते-एक्को मुव्वुर वरोन पजा वरोर वळ्किर आनि वरोर दाना अर्तम तेळियागोट्सि वेहिर.

28 गानि अर्तम तेळियागोट्सि वेहानोर गिंटा हिलाकोटे, वेरे बासाते वळ्कना मनकल कलिसियाते चुपचाप मंचि ओना मनसुने पेनतोनि वळ्कना.

29 पेनदा कबुरतोर इव्वुर हिलाकोटे मुव्वुरे वेहिर, कळमतोर वेहता पोल्लेन परिकसा कीसि हळिर.

30 गानि उद्दिदस मत्तोरव्तेताल बोर्कन्ना अदे वेलाते पेनदा पोल्ले दोर्कसि अदुन वेहंतन इनकुनानयते, मुन्नेटाल वेहासेक मत्तोर चुपचाप उद्दना.

31 मिमेट अंटोर करियना, अंटोर सांतिते मंदना इचि वरोर-वरोर बविस्यवानि वेहा परांतिट.

32 पेनदा कबुरतोर ओरा आत्मातुन ओर इनकुत्ताप तिरहा परांतुर.

33 बारित्ते पेन गळबळ कियानद आयो, सांति हियना पेन आंद. अन्नि कलिसियायाना पेनदा लोकुलक इल्हे मंनंतुर.

34 कलिसियायोर जमा आतस्के मुर्ताहक चुपचाप मंदना, बारित्ते अवुंक वळकना अदिकार हिल्ले. गानि कय हिळ मंदना आदेस मंता. इल्हा दर्मसास्त्रमतेगुडा रासि मंता.

35 अवुंक बतलन्ना करियना इच्चा मत्ते, लोन होत्ता पजा अव अवुना मुय्दुर्कुन पूसकियाना. बारित्ते कलिसियाते मुरतळ पूसकियमळ इत्ते सिग्गु होनना पोल्ले आंद.

36 बतल! पेनदा पोल्ले मिहगाटाले पेयसतना? सिराप मिहागळके वाताना?

37 बोर्न्नागिटा, “नना पेनदा कबुरतोण” हिलाकोटे, “नना पेनदा आत्मा मत्तोण” इचि इनकुनानयते, नना मीक रासता पोल्ले सामिना आदेसाल्क आंदुं इचि ओन्क तेळियाना.

38 गानि बोर्न्नागिटा इदुन ओप्कुनाकोटे, ओणगुडा ओप्कुनमट.

39 अदुनहाटीं विस्वासल्कुनिटा! बविस्यवानि वेहालय तयार मंटु, वेरे बासाते वेहते ओण आपमट.

40 गानि अन्नि पोल्ले बेस उंदान पज्जो उंदि जर्गिकांटी.

15

किरिस्तु जीवाते तेदमळ

1 विस्वासल्कुनिटा! नना मीक वेहता बेसता कबुरतुण मर्रा उंदि मल्का मति कीसि हीसेक मंतन. अद बेसता कबुरतुण ओप्कुत्तिर, अवने गट्टिगा निल्सिगुडा मंतिर.

2 नना वेहता बेसता कबुरतुण मिमेट होळसाकोंटा पीसि मत्ते पेन मीकुन पिसागोटंता. हिलाकोंटे मीवा विस्वासम कियमळ एर्तम आंता.

3 अदुनहाटीं अन्निक्न्ना मुन्ने नहगा एवता पोल्लेतुने मिहगा एविस्तन. अद बतल इत्ते, दर्मसास्त्रमता पोल्ले मत्ताप, किरिस्तु मना पापाल्कुनाहाटीं हातोर,

4 बौदा दोस्तुर, दर्मसास्त्रमते रासताप मूडो रोजुने जीवातेगुडा तेदतोर.*

5 जीवाते तेदतस्के केपांक* दिसतोर, पजा पन्नेंडु प्रेरितुल्कुंक दिसतोर.

6 अद आता पजा, हेय्युं नुहकुंकन्ना एक्को विस्वासल्कुंक उंदे मल्का दिसतोर. ओरागटाल वेल्लेटुर इदवेरदाकागुडा जीवाते मंतुर, गानि इच्चुर हातुर.

7 मर्रा याकोबुंक दिसतोर, दाना पजा अंटोर प्रेरितुल्कुंक दिसतोर.

8 नना नेलां निंडका मुन्नेन पुट्टोनलेसीं अंटोर्कन्ना आकिरते नाकुगुडा दिसतोर.

9 बारित्ते, नना अंटोर प्रेरितुल्कुन लोप्पो सिन्नोन आंदुन, नना पेनदा कलिसियातोर्कुन तिप्पल्क कीतोन आंदुन. अदुनहाटीं प्रेरित इनना लायकगुडा हिल्लेन.

10 गानि इंदके बतलयते मंतानो, पेनदा कुर्पाहेंदाले मंतन. अद कुर्पा नाक एर्तम आयाहिल्ले. नना कळमता प्रेरितुल्कुंकन्ना एक्को कस्टम कीतन. अय्नागानि निजम इत्ते नना किया हिल्लेन, पेनदा कुर्पा नावातोनि मत्ता, अदे कीता.

11 अदुनहाटीं नना पेनदा पोल्ले वेहना, ओर वेहना मोमोट अंटोरम उंदे पोल्ले वेहंतोम. अदुन मिमेट विस्वासम कीतिर.

मनम जीवाते तेदमळ

12 किरिस्तु हातोर लोप्पोटाल जीवाते तेदतोर इचि मोमोट गिटा कबुर वेहानयते, हातोर मर्रा जीवाते तेदुर इचि मीवा लोप्पोटोर इच्चुर इंतुर. अल्हा बारि इंतुर?

13 हातोर मर्रा जीवाते तेदाकोंटे, किरिस्तुगुडा हासि जीवाते तेदा हिल्लोर.

14 किरिस्तु गिंटा जीवाते तेदाकोंटे, मोमोट वेहाना बेसता कबुर एर्तमे, मीवा विस्वासमगुडा एर्तमे आंद.

15 अचोने आयाका, किरिस्तु हातोरा लोप्पोटाल जीवाते तेदतोर इंचि मोमोट मीक वेहतोम. हातोर गिंटा जीवाते तेदाकोंटे, पेन किरिस्तुनगुडा जीवाते तेहा हिल्ले इंचि तेळियंता. अदुना हेंदाल मोमोट पेनदा बारेमते आबद्दम गवाइ वेहताप आंता.

16 अल्हेने हातोर गिंटा जीवाते तेदाकोंटे, किरिस्तुगुडा जीवाते तेदा हिल्लोर.

17 किरिस्तु गिंटा जीवाते तेदाकोंटे, मीवा विस्वासम एर्तम आंद आनि मिमेट इदवेरादाका पापमतेन पसांचि मंतरि.

18 अल्हा अय्ते, किरिस्तुन विस्वासम कीसि हातोरगुडा नासडेमताल पिसा पर्राहिल्लोर.

19 सिराप इद बूमिपोर्रोटा पिस्वरहाटीगे किरिस्तुनपोर्रो मना आसे इत्ते, मना गति अंतोर मनकालोर्कुंकन्ना एक्को गोसातद आयार.

20 गानि निजम बतल इत्ते, किरिस्तु हामुरताल जीवाते तेदतोर. बोर अय्ते विस्वासुल्क हासि होत्तुर, ओरव्टेताल जीवाते तेदतोर ओरे मुन्नेटोर आंदुर.

21 बल्हा अय्ते वरोर मनकनहेंदाल हामुर वाता, अल्हेने वरोर मनकनहेंदाल हातोर मर्रा जीवाते तेदमळगुडा वाता.

22 बारित्ते, आदामुन लोप्पो अंतोर हासि दांतुर, किरिस्तुनलोप्पो अंतोर जीवाते तेहमळ जर्गार.

23 होके मनकल वरोन पजा वरोर, मोदाला किरिस्तु जीवाते तेदतोर, किरिस्तु मर्रा वाता पजा ओना लोकुल्क जीवाते तेदांतुर.

24 अदुन पजा, पूरा सरकार, पूरा अदिकार आनि ताकत इव अन्निन किरिस्तु नासडेम कीसि पेनबाबाना कय्दे राज्येम अप्पजेप्पंतोर. अस्के बूमिता आकिर आयार.*

25 बारित्ते, किरिस्तु ओना पगातोर्कुन काल्कुना हिळ्ळु थायनादाका, ओर राज्येम कियमळ गावाले.

26 हामुर अन्निकन्ना आकिर पगातद आंद, अदुनगुडा नासडेम कीतोर.

27 बारित्ते, पेन अन्निन किरिस्तुना काल्कुना हिळ्ळु इरता. अन्निन इंचि इत्ते, पेनदुन होळसिसि अन्निन इंचि बरोबर एर्का आंता.

28 अन्निन ओना अदिकारमते इरता पजा, पेन अन्निन ताकिचगोम इंचि मर्री कुद दाना अदिकारमते आंतोर. बारित्ते पेने अन्निन ताकिचंता.

29 मर्रा जीवाते तेदाकोंटे, हातोराहाटी येसुना पोरोलते बापतिस्मा एततुर, ओर बतल कियानुर? हातोर गिंटा जीवाते तेदाकोंटे ओराहाटी बापतिस्मा बारि एताना?

30 बस्केळ्ळक मना जीवातुन बारि डेंजरते इर्राना?

31 विस्वासुल्कुनिटा! मिमेट मना सामि येसु किरिस्तुना लोप्पो विस्वासमते गट्टिगा मत्ताहाटी, नना मीवा बारेमते पेद्दिदरकेम वेहकुंचेके मंतन. अदुनहाटीगे नावा हामुरतुन रोज ह्ळ्ळसेक मंतन.

32 इपीसि सहरतगा, नना केडा जिवरासिनसोटा मनकालोर्कुना रीतिते लडांचतन, अय्ते बतल पाय्दा आता? हातोर गिंटा तेदाकोंटे, दर्मसास्त्रमते रासि मत्ताप, “नाळि अय्ते हायानदे मंता, अदुनहाटी तिनकोम-उनकोम,” इंचि मन्नेम.*

33 गानि हातोर मर्रा जीवाते अर्स् इंचि इनानोरा हेंदाल दोकाते अरमट. “कराब लोकुल्कुना दंटा, बेस ताकानोर्कुन हेडहंता.”

34 अदुनहाटी नीतिते ताकसि उसारते मंदु, पापम कियमट. मील्लोप्पो बच्चुटुरो पेनदुन एरपाट कियवोरगुडा मंतुर, मीक सिग्गु वायागोम इंचि इद पोल्ले वेहसेक मंतन.

जीवाते तेदता मेंदुल

35 गानि बोरन्ना, “हातोर जीवाते बल्हा तेदंतोर? जीवा अरता पजा मेंदुल बल्हा मनंता?” इंचि पूसकिया परांतुर.

36 ए बुद्धिदे हिल्बोना! निमे बूमिंते एदता पेळे, मुन्ने हासि, पजाटाल मोलियंता.

37 निमे एदतद, मोल्का आयो, पेळे आंद. अद गोहकुना पेळे आयावच्चु, इंका बदाना पेळे आयावच्चु.

38 गानि पेन दाना इच्चातीर दान्क रूपम हीता. वेरे-वेरे पेडेक, वेरे-वेरे रूपम हीता.

39 गानि अन्नि मेंदुल्क उंदेतीर मन्नों, मनकना मेंदुल वेरे, जिवरासिना मेंदुल वेरे, पिट्टेना मेंदुल वेरे, जिम्माना मेंदुल वेरे मंता.

40 स्वर्गमते मनानोर्क मेंदुल मनंता अल्हेने बूमिपोर्रो मनानोर्कगुडा मेंदुल मनंता. गानि स्वर्गमतोरा मेंदुल्ला वेल्लु वेरे, बूमि पोरोटोरा मेंदुल्ला वेल्लु वेरे मनंता.

41 पोळ्दुना वेल्लु वेरे, वेळिसता वेल्लु वेरे, सुक्काना वेल्लु वेरे. सुक्काना वेल्लु उंदानद-उंदांक परक मनंता.

42 हातोर मर्रा जीवाते तेदमळगुडा इल्हे मंता. कळियसि होनना मेंदुल्लुन बूमिंते दोसंतोम, गानि बस्केने कळियसि होनवा मेंदुल मर्रा जीवाते तेदंता.

43 मेंदुल बूमिंते दोस्सनेके दाना कदर मन्नो, गानि अद मर्रा जीवाते तेदानेके दानकु वेरेने कदर दोर्कता. मेंदुल बूमिंते दोस्सनेके दानकु ताकत मन्नो, गानि अद मर्रा जीवाते तेदानेके वेल्लेने ताकतते तेदंता.

44 बूमिंते दोसतद मना दिस्सना मेंदुल आंदु, मर्रा जीवाते तेदानद आत्माता मेंदुल आंदु. अल्हेने दिस्सना मेंदुल मंता, आत्माता मेंदुलगुडा मंता.

45 दर्मसास्त्रमते इदुना बारेमते, “मोट्टा मोदाटा जीवाता मनकल आदाम आतोर” इंचि रासि मंता. आकिर आदाम, इत्ते किरिस्तु, पिस्वर हियना आत्मा आतोर.

46 गानि आत्माता मेंदुल मोदाटद आयो, दिस्सना मेंदुले मोदाटद आंद. दाना पजाने आत्माता मेंदुल वांता.

47 मोदाटा मनकल बूमिता तोळिते तयार आतोर, गानि पजाटाल वायाना मनकल स्वर्गमताल वातोर.*

48 तोळिताल तयार आतुर अंतोर मनकालोर्क, तोळिता मनकनलेसीगे आतुर. स्वर्गमता मनकालोर्क, स्वर्गमतालेसीगे मंतुर.

49 मनम बल्हा अय्ते तोळिते तयार आतोना रूपम एततोम, अल्हेने स्वर्गमताल वायानोना रूपमगुडा एतंतोम.

50 विस्वासुल्कुनिटा! नना वेहानद बतल इत्ते, हव्वि, नेत्तुरता मेंदुल्क पेनदा राज्येम दोर्का पर्रो, आनि कळियना मेंदुल्क, कळियवा मेंदुल्लगा अदिकार दोर्का पर्रो.

51 केंजाट, नना मीक मर्ममता पोल्ले वेहसेक मंतन. अद बतल इत्ते, मनम अंतोरम हायोम, गानि मना रूपम मारियंता.

52 इदंता, उंदि सेकंदतेन, कळु रेप्पा तंतचचोरजेमनेन जर्गता. आकिरता तूताकोम उह्कुता उह्कुळे, हातोर अंतोर बस्केने नासडेम आयाकोटा मननाहाटी मर्रा जीवाते तेदानुर आनि मना रूपम बारे मारियंता.

53 बारित्ते, कळियसि होनना मेंदुल बस्केने कळियसि होनवा मेंदुल्लेसी, आनि हायना मेंदुल बस्केने हायाकोटा मनना मेंदुल्लेसी मारिया पीता.

54 बस्के अय्ते कळियसि होनना मेंदुल, कळियसि होनवा मेंदुल्ले मारियंता आनि हायाना मेंदुल हायवा मेंदुल्ले मारियंता, अस्के दर्मसास्त्रमते रासि मत्ताप, “पेन हामुरतुन मिगसि वाटता” इंचि रासि मत्ता पोल्ले पूरा आंता.

55 “ए हामुरतुना! निमे माकुन बगा गेल्लिस्तन? ए हामुरतुना, नीवा कस्कना कौडि बगा मंता?”
इंचि रासि मंता.

56 हामुरता कौडि पापम आंद, पापमता ताकत मूसाना नियम आंद.

57 मना सामि येसु किरिस्तुनाहेंदाल पेन मनाकुन गेल्लागोटंता. अदुनहाटी पेनदुक दन्यवाद.

58 नावा पावरमगल्ला विस्वासुल्कुनिटा! सामिना लोप्पो मीवा कस्टम एर्तम होन्नो इंचि मीक एरपाटे मंता. अदुनहाटी मिमेट विस्वासमते हीके-हेके आयाकुंटा, गट्टिगा निल्लिस मंटु, सामिना कबळते इंका एक्को बेस्सेके हौंटु.

16

येस्सलेमता कलिसियातोरहाटी चंदा

1 येस्सलेमता पेनदा लोकुल्कुनाहाटी चंदा जमा कियाना बारेमते, बल्हा अयते गलातिया एरियाता कलिसियातोरक वेहतानो, अल्हेने मिमेटगुडा कियाना.

2 नना वाता पजाने चंदा जमा कियमट, गानि मीवळेटाल हरेक मनकल ओना कमाइता इसाबते वारमता मोदाटा रोज* इच्चुक कोतां जमा कीसि ईरंट.

3 नना वाता पजा, मिमेट बोर्कुनयते इद कबळताहाटीं पेरातिरो, ओर्क नना सिट्टिं हीसि, ओरा कय्देने मिमेट जमा कीता चंदा येस्सलेम लोहचीतन.

4 ओक्कला नना होनमळ कुदुरते, ओर नावातोनि वांतुर.

पौलसना पय्नेम होनना विचारम

5 नाक मेसिडोनिया एरियाते होनना मंता, मेसिडोनियाताल पजा मिहगा वांतन.

6 मिहगा वासि, आया परते कोन्नि रोजकु हिलाकोटे पूरा पीनि कालम मीवातोनि मनंतन. दाना पजा नाक बेके होनना मंता, हेके सार्ला कीम्टु.

7 बारित्ते, मेसिडोनियाते होनानेके नड्डुम आगसि मीक कलियमळ नाक इस्टम हिल्ले. सामिना इच्चा मते, मीवातोनि कोन्नि रोजकु मंदना इंचि नावा आसे मंता.

8 गानि इंदके, पेंतेकोस्त पंडुगुनदाका इपीसि सहरतेन मनंतन.

9 बारित्ते, इगे बेसता कबळ कियालय, नाक उंदि पेद्दा मोका दोर्कता, इंका विरोद कियानोरगुडा वेल्लेटुरे मंतुर.

10 तिमोति मिहगा वातस्के ओर मीवा नड्डुम दैरनेमते मननाल हळट. ओरगुडा नावालेसी सामिना सेवा कीसेक मंतोर.

11 अदुनहाटीं ओन बोरे सिन्नगा हळा मन्नि, ओन सांतिते नहगा लोहट. मिहगटा विस्वासुल्कुनतोनि ओर वायानुर इंचि नना एदुर हळसेक मंतन.

12 अप्पुलोस दादान, विस्वासि दादालोर्कुनतोनि होन इंचि नना बच्चुंगो मल्लां बतिमलाडसि वेहतन, गानि इंदके मिहगा वायाना विचारम ओनद हिल्ले, पजा मोका दोर्कतस्के वायानुर.

13 इंदके मिमेट उसारते मंटु, विस्वासमते गट्टिगा मंटु, दैरनेमते मंटु, बलमगल्लोर्क आसि मंटु.

14 मिमेट कियाना कबाहक अन्नि पावरमतेन कीम्टु.

15 विस्वासुल्कुनिटा! स्टिपनसना लोतोर्कुना बारेमते मीक एरपाटे मंता, ओर अकाया एरियाते मोदाला विस्वासम कीतुर. ओर पेनदा लोकुल्कुना सेवा कियालय ओरद-ओर अप्पजेपकुत्तुर.

16 मिमेटगुडा असंटोरा आनि ओरालेसी सेवा कियानोरा पोल्ले कैजसि ताकट इंचि बतिमलाडसंतन.

17 मिहागटाल मिमेट वायाकोन्ना गानि स्टिपनस, पुरतुनातुस, अकयकुस नहगा वातुर. ओर वाताहाटीं मिमेट वाताप आता. इंचि नना वेल्ले कूस आतन.

* 16:2 वारमता मोदाटा रोज इगे वारमता मोदाटा रोज इत्ते, अय्यारम.

18 ओर वातुर इंचि नावा जीवक आनि मीवा जीवक सांति दोर्कता. अदुनहाटीं इसंटोर्कुन कदर हीम्टु.

आकिरता जोहर

19 आसिया राज्येमते मनना कलिसियातोर मीक जोहर वेहतुर. अकविला, ओना मुत्तो पिरिसकिला आनि ओरा लोतागा जमा आयाना कलिसियातोरगुडा सामिना पोरोलते मीक जोहर वेहतुर.

20 इग्गेटा अंटोर विस्वासुल्क मीकुन जोहर कीसेक मंतुर. मिमेट वरोंक-वरोर पवित्र पावरमते कलियसि जोहार वेहकुंट.

21 नना पौलुसुन, नावा क्यदे जोहर इंचि मीक रासेक मंतन.

22 बोरन्नागिंटा सामिन पावरम कियाकौंटा मत्ते, ओन्क सापनेम दल्गि. “मारानाता” इत्ते, मा सामि वा.

23 सामि येसुना कुर्पा मी तोळ मन्निकांटी.

24 येसु किरिस्तुना लोप्पोटा नावा पावरम मीवा अंटोरतोनि मंदना. आमेन.

2 कुरेंति

कुरेंति विस्वासुल्कुक पौलसना रोंडो सिट्टि

इद सिट्टिता बारेमते गिचचो परिचयम

रासतोना पोरोल: पौलस

रासता कालम: इसवि सन 57

कुरेंति कलिसियातोक पौलस रासतद इद रोंडो सिट्टि आंदु. आबद्दम करहानोरा इच्चुर गुस्कुनाहेंदाल पौलस आनि कुरेंति कलिसियातोरा नड्डुम समस्या तयार आता. इच्चुर विस्वासुल्कगुडा पौलसुना पोल्लें केंजाकॉटा आतुर इंचि पौलसुंक तेळियता.

अदुनहाटी पौलस इद सिट्टि मेसिडोनिया सहरताल रासतोर. कलिसियाते बच्चोर तकलिप वायिना विस्वासुल्क किरिस्तुनलोप्पो गट्टिगा निल्सि मननाहाटी दैरनेम हियालय रासतोर. निजम पेनदा सेवा कियानोर बल्हा मनागोम इंचि तेडियागोटसि वेहालय रासतोर. अल्हेने इच्चुर विस्वासुल्क आबद्दम करहानोरा पोल्लें केंजसि पौलसुन विरोद कियुंदुर, अदुनहाटी पौलस ओना सतता अदिकारमतुन पीसि ओर्क इस सिट्टि रासतोर.

बगा बतल मंता

जोहार आनि परिचयम 1:1-11

कुरेंतिते पौलस आनि कलिसिया 1:12-7:16

यहूदियाता विस्वासुल्कुनाहाटी चंदा जमा कियमळ 8:1-9:15

पौलस प्रेरित आंदुर इंचि रूजुव कीसि हुप्संतोर 10:1-13:10

आकिरता बोदां 13:11-13

जोहर

1 पेनदा इच्चाताहेंदाल किरिस्तु येसुना प्रेरित आतोन नना पौलसुन आनि मना तम्मुर तिमोति ओक्कला कुरेंति सहरते मंदना कलिसियातोक अल्हेने अकाया एरियाता अंटोर पवित्र लोकुल्कुक सिट्टि रासेक मंतोम.*

2 मना पेनबाबाल आनि सामि येसु किरिस्तुनाहेंदाल मीक कुर्पा, सांति दोर्कसेके मनि.

पौलस पेनदुन दन्यवाद कींतोर

3 मना सामि येसु किरिस्तुना पेनबाबाल दयागल्लोड अल्हेने अन्नि तीरकुना सांति हियाना पेन आंदुर, अदुनहाटी ओन्क दन्यवाद आयि.

4 मनम इंकावरोंक सांति हियागोम इंचि पेन मनाकु अन्नि तकलिपकुने सांति हीसेक मंता. बोर अयते तकलिपते मंतुर, पेन मनाकु हीता सांतितुने मनम ओर्क हिया परगोम इंचि दाना इच्चा मंता.

5 बारित्ते मनम किरिस्तुनाहाटी बच्चोर एक्को तकलिप अरंतोम, अच्चोर एक्को किरिस्तुनहेंदाल मनाकु सांतिगुडा बेर्सके दांता.

6 मीक सांति आनि मुक्ति दोर्कागोम इंचे मोमोट तकलिप बोगांचेके मंतोम. माक सांति दोर्कता इत्ते, अद मीवा सांतिताहाटीगे आंद. इदुनहेंदाल बद तकलिपतुन अयते मोमोट ओर्सकुतोम, मिमेटगुडा अदे तकलिपतुन ओप्केते ओर्सकुना परातिर.

7 मावा तकलिपते मिमेट बल्हा कलियसि मतिरो अल्हेने मावा सांतितेगुडा मिमेट कलियसि मंतिर. अदुनहाटी मीवा बारेमते मावा आसे गट्टिगा मंता.

* 1:1 इद सिट्टितुन पौलस वरोरे रासतोर, सिलवानुस आनि तिमोति ओनतोमि जोहर इंचि बेहतुर.

8 विस्वासुल्कनिटा! आसिया एरियातें माक वेल्लेने तकलिप वाता, अद तकलिप मोमोट आपकुना परवच्चो मत्ता, मोमोट पिसंतोम इंचिगुडा इनकुना हिल्लोम. अद पोल्ले मीक तेळियसि मनागोम इंचि वेहासेक मंतोम.

9 निजमे, माक हामुरता सिक्सा दोर्कता इंचि इनकुंचेके मत्तोम, गानि कुद मनापोर्रो मनम बरोसा इरामन्नि, हातोर्कुन तेहाना पेन पोरोरो बरोसा इरमळ गावाले इंचि इल्हा जर्गता.

10 पेने माकुन इच्चोर पेद्रूदा हामुरता गंडेमताल पिसागोटता, पिसागोटसेक मंता, मुन्नेगुडा माकुन पिसागोटसेक मनंता इंचि माक अदुन पोरोरो आसे मंता.

11 वेल्लेटोरा पारतनाहेंदाल पेन मापोर्रो दया हुपिच्चि माकुन पिसागोटता, अदुनहाटी वेल्लेटुर लोकुल्क माहेंदाल पेनदुक दन्यवाद कीसेक मंतुर. अय्ते मिमेटगुडा अंटोर कूळसि माहाटी पारतना कीसि माक सहायम कीम्टु.

पौलुसना पय्नेमता पिलान बदलांचमळ

12 मोमोट दुनियाते मननेके कास कीसि मीवा नड्डुम मननेके, पेनदुक इस्टामाताप पवित्र आनि सत्तेमते मत्तोम, अद मनकना तेळिव्ते आयो गानि पेनदा कुर्पातोनि मत्तोम इंचि मावा मनसु गवाइ वेहासेक मंता. इद मावाहाटी पेद्रूदिकेमता पोल्ले आंद.

13-14 मिमेट हदविते मीक, तेळियाना पोल्लेगे मोमोट रासेक मंतोम, अव आयाका वेरे बवे पोल्ले मीक रासेक हिल्लोम. आनि आकिरदाका मिमेट अखुन कबुल कीतिर इंचि नाक आसे मंता. अचोने आयाका सामि येसु वायाना रोजुने मोमोट मीपोर्रो पेद्रूदिकेम कीताप, मिमेटगुडा मापोर्रो पेद्रूदिकेम कीकिट.

15-16 इद बरोसाता हेंदाले नना मोदाला मिहगा आगिसि, मिहागटाल मेसिडोनिया दांतन. मर्रा मेसिडोनियाताल मल्सि वायानेकेगुडा मीकु रोंडु पायदां आयगोम इंचि मिहगा आगंतन. पजा अगटाल मिमेट नाकुन यहुदिया एरियाताहाटी साल्ला किया परांतिर इंचि इनकुंचेके मंतन.

17 नना इव पिलानकु बतले विचारम कियाकेने कीतोर इंचेके मंतिरा? दुनियाता लोकुल्कुनालेसी उंदि मल्का “हो” इंचि इंकुंदि मल्का “हिल्ले” इंचि इनानोन आयोन.

18 पेन विस्वासमगल्लद आंद. अल्हेन मोमोटगुडा “हो” आनि “हिल्ले” इल्हा रोंडु पोल्ले वळकोम.

19 बारित्ते, नना, सिल्वानुस आनि तिमोति मोमोट मीवा नड्डुम पेनदा मर्रि येसु किरिस्तु आंदुर इंचि वेहतोम. येसु किरिस्तु “हो, हिल्ले” इल्हा रोंडु पोल्ले वळकोर गानि ओर बस्केळक “हो” इंचे इंतोर.

20 पेनदा अन्नि पोल्ले येसुनगा पूरा आतां. अदुनहाटी मनम आमीन इंचि पेनदा महिमा कीतोम.

21 मीवातोनि अबिसेकम कीसि, किरिस्तुनलोप्पो गट्टिगा निलाहनोर पेने आंद.

22 पेन मनापोर्रो सिक्का वाटता अल्हेने गेरंटितालेसी मनालोप्पो दाना पवित्र आत्मातुन इरता.

23 मीकुन इंका नोप्पिचमळ नाक इस्टम हिल्ले, अदुनहाटी नना इदवेरादाका मिहगा कुरेंति सहरे वाया हिल्लेन. इद पोल्ले निजम इंचि ना मनसुन हळना पेने गवाइ मंता.

24 मीवा विस्वासम पोरोरो अदिकारम हुप्सना इंचि मोमोट वेहासेक हिल्लोम, मिमेट विस्वासमते गट्टिगा निल्सि मंतिट, मीवा आनंदमते मोमोटगुडा मीवा तोळ मनंतोम.

2

1 नना मिहगा वासि मीक मर्रा दुक्कम वायागोटान इंचि मनसुने इनकुत्तन.

2 बारित्ते नना मीकुन दुक्कम कीते, नाकुन बोर आनंदम कियानुर? मीक तप्पा बोरे किय्युर!

3 नना अगा वातस्के नाक बोराहेंदाल अय्ते कुसि आयाना मंता, ओरा अंटोराहेंदाल नाक दुक्कम आयामान्नि इंचि नना मुन्ने अद सिट्टि* रासि लोहतन. नाक मी बारेमते विस्वासम मंता, नावा कुसि मीवा अंटोरदगुडा कुसि आंद.

4 नना नावा मनसुनाल वेल्ले दुक्कमते, बादते अळसेके अद सिट्टि रासि मीक लोहतन. नना मीक दुक्कम क्रियालय आयो गानि मीवापोर्रो नावा पावरम बच्चो वेल्ले मंता, अद मीक तेळियगोम इंचि नना रासि मत्तन.

तप्पु कीतोन मापि क्रियाना

5 बोर्नगाटा दुक्कम हियानय्ते, ओर सिराप नाकुने दुक्कम हीतोर इत्ताप आयो, तक्को-एक्को मीक अंटोर्कगुडा हीतोर. इदुना बारेमते नना दीनकन्ना एक्को बतल वेहोन.

6 असंटोनाहाटी मिमेट वेल्लेटुर हीता सिक्सा साल आंता.

7 अदुनहाटी ओन्क इंका सिक्सा हियाका, मापि कीसि, समजांचटु. अल्हा क्रियाकोटे ओर इंका एक्को रंदि कीसेक मनंतोर.

8 अदुनहाटी मिमेट ओनपोर्रो एक्को पावरमतुन हृप्सट इंचि मीक विनंति कीसेक मंतन.

9 मिमेट नना वेहता अन्नि पोल्लेने ताकंतिरा, ताकिरा इंचि मीकुन परिक्सा कीसि ह्ळालयगुडा अद सिट्टि रासतन.

10 मिमेट बोर्नना मापि कीते ओन ननागुडा मापि कीतन, नना बतलय्ते मापि कीतानो किरिस्तुना मुन्ने मीवाहाटी मापि कीतन.

11 मापि क्रियाकोटे देय्यम बस्केनना तकलिप हिय्या परांता. बारित्ते दाना गुनम बसोटदो मनक एरपाटे मंता.

पूना करारता सेवाकुल्क

12 नना बस्के अय्ते किरिस्तुना बारेमता बेसता कबुर वेहालय त्रोआस सहरते होत्तनो, अस्के सामिनाहेंदाल नाकु हरि पुटता.

13 ना तम्मुर तीतु अगा कलिया हिल्लोर, अय्ते ना मनसुंक सांति दोर्काहिल्ले. अदुनहाटी दांतन इंचि ओर्कु वेहचि, मेसिडोनिया एरियाते पेय्से होत्तन.

14 पेनदुक दन्यवाद आयि! अद किरिस्तुनलोप्पो मनाकुन बस्केळ्क गेल्सागोतसेक ओता आनि गमा-गमा गब्बुनसोटा दाना तेल्चितुन मनाहेंदाल अन्नि जेगाने पैलांचंता.

15 बारित्ते मुक्ति दोर्कानोरा लोप्पो आनि नासडेम आयानोरा लोप्पो मनम पेनदाहाटी किरिस्तुना बेसता गब्बु आंदुम.

16 नासडेम आयानोराहाटी हामुर गब्बुलेसी मंतोम आनि मुक्ति दोर्कानोराहाटी पिस्वरता बेसता गब्बुलेसी मंतोम. इसोटा कबळ क्रियानालायक बोर् मंतुर?

17 बोर् अय्ते पेनदा पोल्लें वेहचि सतता पायदा कीकुंतुर, असंटा वेल्लेटोरव्टेटाल मोमोट हिल्लोम. गानि मोमोट सत्तेम मनसुने, किरिस्तुना अदिकारमते पेनदा पोल्लें वेहासेक मंतोम. माकुन लोहता पेन माकुन ह्ळसेक मंता इंचि माक एरपाट मंता.

3

पूना करारता सेवाकुल्क

1 मावद मोमोटे मर्रा पेदूदातनम वेहकुंचेके मंतोम इनकुंचतिरा? हिलाकोटे वैरतोर्कुक अक्सरम मत्ताप माकगुडा मीवाहाटी सिपारिस सिट्टिं मिहगा तरमळ, मिहागटाल एतमळ अक्सरमा?

* 2:3 पौलस कुरेंति कलिसियातोरक मड सिट्टिं रासतोर, रोंडो सिट्टि दोर्काहिल्ले, अद सिट्टि इत्तेने गायब आता सिट्टि आंद.

2 मावा सिट्टिं अय्ते मिमेटे आंदिर, अद मावा मनसुने रासि मंता, अदुन अंतोर एरपाट कीतुर, हदवंतुर.

3 निजमे, मिमेट माहेंदाल हीता किरिस्तुना सिट्टि आंदिर इंचि अंतोर्क दिस्सेक मंतिट. अद साइते आयो गानि जीवाते मंदना पेनदा आत्माते रासि मंता, अद पर्पु बंडनपोर्री आयो गानि मनकना मनसुनपोर्री रासि मंता.

4 किरिस्तुनाहेंदाल माकु पेनदापोर्री इसोटा बरोसे मंता.

5 मावद मोमोटे बदाना पोल्लेता विचारम कियानालायक हिल्लोम, गानि इवुन कियाना बलम पेने माकु हीसेक मंता.

6 पेन माकुन पूना करारता सेवक आयाना लायकगुडा कीता. अद करार मूसाना नियमते रासि मत्ताप आयो गानि, पेनदा आत्माताहेंदाल मंता. मूसाना नियम हामुरतेके ओता गानि पवित्र आत्मा पिस्वरताहेके ओता.

पूना करारता महिमा

7-8 पर्पु बंडनपोर्री पेन दाना नियमकुन रासि मूसांक हीता, अस्के अवुन ओर इस्राएल लोकुकुकुं हियनेके ओना मोकम पेनदा महिमाता वेल्गुने निंडिसि मत्ता. गानि अद वेल्गु तक्को आयानेकेगुडा ओर ओना मोकमतुन ह्ळा पराहिल्लुर. इल्हा हामुरताहेके ओयाना मूसाना नियमता महिमाता वेल्गु इच्चोर मत्ता अय्ते, पेनदा आत्माता महिमाता वेल्गु इंका बच्चोर पेद्दा मनंता.

9 बारित्ते सिक्साहेके ओयाना मूसाना नियमे अच्चोर महिमाता वेल्गुने मत्ता, अय्ते मनकालोर्कुन नीतिमंतुल्क कियाना नियमते दानकन्ना इंका बच्चोर महिमाता वेल्गु मंदार.

10 इंदकेटा महिमाता वेल्गु, मुन्नेटा महिमाता वेल्गुं कन्ना बच्चोरो एक्को मंचि अद हिल्ले इत्ताप आता.

11 तक्को आसेके होनानदुना महिमाता वेल्गु इच्चोन मत्ते, इंका बस्केळ्क मनानदुना महिमाता वेल्गु बच्चोन वेल्ले मंदार!

12 अदुनहाटी इदे आसेता हेंदाल मनम बच्चोरो दैरनेमते वळ्कंतोम.

13 इस्राएल लोकुल्क तक्को आयाना महिमाता वेल्गुन ह्ळा मनि इंचि मूसाल ओना मोकमपोर्री मुस्कु वाटकुनुंदुर, गानि मनम ओरालेसी मुस्कु वाटकुन्नोम.

14 इस्राएल लोकुल्कुना मनसुक गट्टिगा आसि होत्तां. इव रोजकुनेगुडा बस्के अय्ते ओर पळाना नियम हदवंतुर, अस्के अदे मुस्कु ओरा मनसुन मुच्चंता. सिराप किरिस्तुनपोर्री विस्वासम इरते, किरिस्तुए ओरा मुस्कन तेंडा परांतोर.

15 निजमे, इंदकेगुडा मूसाना पुस्तकम हदवंतुर अय्ते मुस्कु वाटताप अव पोल्लेना अर्तम तेळियो.

16 गानि बस्के अय्ते ओरा मनसु सामिनहेके तिरियार, अस्के सामि ओरा मुस्कु तेंडसि ओर्क तेळियाना बुद्दि हि्य्यानुर.

17 सामि अय्ते आत्मा आंदुर. बगा अय्ते सामिना आत्मा मंता, अगा बोना कय्दा हिळु हिल्लोम.

18 मनम अंतोरम अद मुस्कन तेंडसि पोहतोम, इंदके अद्दमते ह्ळताप सामिना महिमाता वेल्गुन ह्ळसेक मंतोम. ओना आत्मा मनालोप्पो मत्ताहाटी ओनालेसीगे मनम मारियसेके मंतोम.

4

पौलुसना सेवाता बारेमते

1 पेन मापोर्री दया कीसि, दाना पोल्ले वेहाना इद सेवा माक हीता, अदुनहाटी मोमोट दैरनेमते वेहांतोम.

2 सिग्गु होनानव आनि मक्किंस कियाना कबाहकुन मोमोट होळसीतोम. इंकावरोन दोका हियमळ आयि, पेनदा पोल्लेतुन उल्टा-पल्टा कीसि वेहमळ आयि इसोटा कबाहक किय्योम. गानि पेनदा मुन्ने सत्तेम पोल्लेतुन वेहाना हेंदाल, मोमोट बसंतोरम इंचि हरेक मनकंक ओरा मनसुने तेळियंता.

3 मना बेसता कबुरगिंटा मुस्कु वाटताप मनानय्ते, अद नासडेम आयानोराहाटीगे मंता.

4 किरिस्तु पेनदा रूपम आंदुर, ओना महिमाता बेसता कबुरता वेल्गुन ह्ळा मनि इंचि ई दुनियातोर पैन विस्वासम कियवोरा मनसुन हीकट कीसि पोहता.

5 अदुनहाटी येसु किरिस्तु सामि आंदुर, ओनाहेंदाले मोमोट मी सेवाकुलकुम आंदुम इंचि प्रचार कीतोम, गानि मावा बारेमते मोमोट प्रचार कीकुन्नोम.

6 बारित्ते, “हीकटताल वेल्गु आयि” इंचि पेने इत्ता. मनम येसु किरिस्तुना मोकमते दिस्सना पेनदा महिमाता तेल्चितुन एरपाट कियागोम इंचि मनाकुन इदे वेल्गुने मना मनसुने मेसांगोटता.

7 मनालोप्पो मंदना इद वेल्गु पेद्दा दनमलेसी* मंता. गानि ई दनमतुन तोळिता अळकातसोंटा मना मेंदुलकुने पेने इरता. इदुनहेंदाल ई वेहा परवच्चो ताकत मनद आयो गानि पेनदाहेंदाल मंता इंचि माकु तेळियंता.

8 माकु नालुं मूलानाल आपत्ति अय्ते वांतां, गानि आपत्तिते अर्सि होन्नोम, वेल्लेने मलकां गाबर आंतोम, गानि आसे हिल्वाप मनोम.

9 लोकुलक तकलिप अय्ते कीतुर गानि पेन माकुन होळसो. पगातोर हिळु अरहंतुर गानि नासडेम आयोम.

10 येसुना पिस्वर मावा मेंदुलते दिस्सागोम इंचि येसुना हामुटुन बस्केळक मा मेंदुलते पीसि तिरियंतोम.

11 येसुना पिस्वर मावा हायाना मेंदुलते दिस्सागोम इंचि मोमोट पिसि मंचिगुडा बस्केळक येसुनाहाटी हामुरता कय्दे मनंतोम.

12 अदुनहाटी मावा लोप्पो हामुर, मीलोप्पो पिस्वर कबळ कीता.

13 दर्मासात्रमते, “नना विस्वासम कीतन, अदुनहाटी वळकतन” इंचि रासि मत्ताप मोमोट विस्वासम कीतोम, अदे विस्वासमता आत्मा मावा लोप्पो मंता इंचि मोमोट वळकतोम. बारित्ते अदे विस्वासमता आत्मा मावा लोप्पो मंता.

14 बारित्ते, सामि येसुन जीवाते तेहता पेने मोमोट येसुना लोप्पो कलियसि मत्ताहाटी माकुनगुडा जीवाते तेहंता आनि मीवातोनि माकुनगुडा दाना मुन्ने निप्संता इंचि माक एरपाटे मंता.

15 पेनदा कुर्पा वेल्लेटुर लोकुलकुनगा एवसि, दाना महिमा कियालय एक्कोते-एक्को दन्यवादाळक वेहाना पारतनां बेर्सागोम इंचि इवन्नि मीवाहाटी मंतां.

16 अदुनहाटी मोमोट दैरनेम होळसोम. मावा मेंदुल पलाताल जिग्गि हिलाकोटा आसेके मंता, गानि लोप्पो मंदना आत्मा मात्रम रोज पूनगा आसेके मंता.

17 बारित्ते, माकु गळसेमताहाटी वायाना तकलिपकु, मावाहाटी मोमोट विचारम किय्योम अच्चोर अक्सरम आतव आनि बस्केळक मंदना महिमातुन तयार कीतां.

18 अय्ते इंदके मोमोट दिस्साना वस्तुकुन पोर्रो आयो, गानि दिस्सुवा वस्तुकुन पोर्रो नदर वाटंतोम. दिस्साना वस्तुक गळसेम मनंतां, दिस्सुवा वस्तुक बारे बस्केळक मनंतां.

5

मावा स्वर्गमता लोन

1 बूमिपोर्रो मंदना लोतालेसी मावा मेंदुल मंता. अद लोन नासडेम आतस्के माकु मनालय स्वर्गमते लोन मंता, अद बस्केळक मंदना लोन मनकल तयार कीतद आयो, गानि पेने कीता इंचि माकु एरपाटे मंता.

2 इंदकेटा लोतसोंटा मेंदुलते मोमोट नेर्बळतोम, अदुनहाटी स्वर्गमता लोतुन केरानाहाटी वेल्ले तनलाळंतोम.

3 बारित्ते इदुन केर्तस्के मोमोट कुळके दिस्सोम.

* 4:7 दनम इगो दनम इत्ते पेनदा तेल्चि. विस्वासुलकुंक अप्पजेपता बेसता कबुर.

4 मोमोट इद बमिपोर्रीटा मेंदुल्लते मत्तच्चोरजेम बर्वुने तन्लाळसेक मनंतोम, इद मेंदुल्लतुन होळसीयगोम इंचि आयो, गानि हायना मेंदुल बस्केळक पिस्साना मेंदुल्लते मारियागोम इंचि मोमोट कोरसेक मंतोम.

5 इदे मेंदुलताहाटी पेन माकुन तयार कीता. इद गेरांटी इंचि मावा लोप्पो पवित्र आत्मातुन हीता.

6 अदुनहाटी बस्केळक दैरनेमते मनंतोम. मोमोट मेंदुल्लते मत्तच्चोरजेम सामिनगटाल लक्कु मंतोम इंचि माकु एरपाटे मंता.

7 बारित्ते मोमोट हळसि आयो गानि सामिनपोर्री विस्वासम कीसि ताकंतोम.

8 मोमोट दैरनेमते मनंतोम, मेंदुल्लतुन होळसिसि सामिनतोनि मनमळे बेस इनकुंतोम.

9 अदुनहाटी मोमोट इद मेंदुल्लते मनना, मनाकोन्ना, सामिक इस्टाम वाताप ताकमळे मावा उदूदेसम.

10 बारित्ते मनक अंटोर्क किरिस्तुना न्यायम कियाना राजगदूदे मुन्ने नित्ताना मंता. मनागटाल हेरेक मनकंक मनम कीता बेसता कबाहक आयि, कराब कबाहक आयि अवुना हिसाबते इनाम हिलाकोटे सिक्सा दोर्कता.

मोमोट किरिस्तुना राजदूतकुम

11 पेनदुक वेरियसि बल्हा पिस्साना इद माक तेळियंता, अदुनहाटी इदुन मोमोट लोकुल्लकुं क वेहांतोम. मोमोट बसंटरम इंचि मावा बारेमते पेनदुक पूरा एरपाटे. इव पोल्लें मीवा मनसुना लोप्पोगुडा एरपाट आता इंचि नावा आसे मंता.

12 मोमोट बेसतोर्कुम इंचि मरां मी मुन्ने वेहकुंचेके हिल्लोम, गानि इच्चुर लोकुल्लक मनसुने मत्ता पोल्लें आयाका पलाताल दिस्साना पोल्लेना बारेमते पेद्विद्रेकम कीतुर, ओराहाटी मावा बारेमते वेहालय मीक जवाब गावाले इंचि वेहासेक मंतोम.

13 माकुन गिंटा बोरन्ना पिस्सालोर इंचि इत्ते, पेनदाहाटीगे आतोम. बोरन्नागिंटा माकुन बेसता बुद्वितोर इंचि इत्ते मीवाहाटीगे आतोम.

14 किरिस्तु अंटोराहाटी हातोर इंचि मोमोट विस्वासम कीतोम. इंका मावा अंटोरा पळाना पिस्वरगुडा हाता इंचि विस्वासम कीतोम. अदुनहाटी किरिस्तुना पावरम माकुन ओप्केते इरसेक मंता.

15 अद बल्हा इत्ते, इंदकेटाल पूना पिस्वर पिसानोर ओर सतताहाटी आयो गानि ओराहाटी बोर अय्ते हासि जीवाते तेदतोर ओनाहाटी पिसागोम, अदुनहाटीगे ओर अंटोराहाटी हातोर.

16 अदुनहाटी इंदके मोमोट मनकना विचारम मत्ताप हळना आयो. मोमोट किरिस्तुनगुडा मनकना विचारम मत्ताप हळसि मत्तोम, गानि इंदके ओन अलग नदरते हळंतोम.

17 बल्हा इत्ते, इंदके बोर अय्ते किरिस्तुने मंतोर, ओर पूना मनकल आतोर. पळाना पिस्वर होत्ता, पूना पिस्वर सुम्ब आता.

18 इवन्नि पोल्लें पेनदाहेंदाले मंतां. पेने मनाकुन किरिस्तुनाहेंदाल दानतोनि कल्पिसि माकु कल्पना सेवा अप्पजेपता.

19 अद बल्हा इत्ते, लोकुल्लकुना पापाल्क लेक्का पिथ्याकेन, ओर्कुन किरिस्तुना हामुरताहेंदाल दानतोनि कल्पता. इल्हा कल्पना पोल्लेतुन लोकुल्लकुनगा ओयालय माकुन निल्लाता.

20 अदुनहाटी मोमोट किरिस्तुना राजदूतकुम आंदुम. मावाहेंदाल पेन मीक वेहासेक मंता इनकुंत. मिमेट पेनतोनि कलियसि मंदना इंचि किरिस्तुनाहेंदाल मोमोट मीक विनंति कीसेक मंतोम.

21 मनम किरिस्तुनाहेंदाल पेनदा लोप्पो नीतिमंतुल्लक आयागोम इंचि मना बदलाते मना पापाल्कुनाहाटी पापम कियवा किरिस्तु मोक्कु आतोर.

6

1 मोमोट पेनतोनि कलियसि कबळ कियानोर्कुम आताहाटी मीक विनंति कीसेक मंतोम, मीक दोर्कता पेनदा कुर्पातुन एर्तम आया हियमट.

2 बारित्ते पेनदा दर्मसास्त्रमते, “बेसता वेलाते नना नीवा पोल्ले केँजतन, मुक्तिता रोजुने नना नीकु सहाय्यम कीतन,” इंचि रासि मंता. हुळाट, बेसता वेला इदे आंद, इदे मुक्तिता रोजु आंद.

3 मावा सेवाते बतले तप्पु जर्गामान्नि इंचि, बदे पोल्लेते इंकावरोंक अड्डम ताकोम.

4 गानि अन्नि पोल्लेने मोमोट पेनदा बेसता सेवाकुल्लुकुम आंदुम इंचि हुपिच्चेक मंतोम. ओप्केते, बादाने, कस्टाल्कुने, तकलिपकुने,

5 देब्बां तिनमळते, जेलते होनमळते, मावा विरोदमते लोल्लिं आयमळते, कस्टम कियमळते, निद्र हायमळते, उपासमते,

6 पवित्र मनमळते, तेल्विते, ओर्सकुनमळते, दयाते, पवित्र आत्माते, कपटम इरांका पावरम कियमळते,

7 सत्तेम पोल्लेते, पेनदा ताकतते, नीतिता आयदार्क तिना कय्दे, रोड्डा कय्दे पीसि,

8 इंकावरोर माकुन कदर हिथ्यिना-हिथ्याकोन्ना, बेसतोर इन्निना-इन्नाकोन्ना, माकुन नळेह कियानोर इंचि इंतुर गानि मोमोट सत्तेमतोर्कुम आंदुम.

9 एरपाट कियवोरालेसीं मनना, अंतोर एरपाट कीतुर. हायानोरालेसीं मनना, जीवाते मंतोम. माकु सिक्सा हियाना गानि मोमोट हाया हिल्लोम.

10 मोमोट दुक्कमतेगुडा बस्केळ्ळक आनंदमते मनंतोम, मोमोट गरिब मनिनागानि वेल्लेटोर्कुन पेनदा लोप्पो सिरमंतुल्लक कीतोम. महगा बतल हिलाकोन्ना गानि अन्नि मत्तापे मंतोम.

11 कुरेंति सहरतोरिटा! मोमोट अन्नि पोल्लें मीक कुल्लम-कुल्ला वेहतोम, मीहाटीं मावा मनसु कुल्ला मंता.

12 मोमोट मीकुन लक्कु इरसेक हिल्लोम, गानि मिमेटे मावा दगोरा वायालय हळसेक हिल्लिर.

13 मोमोट कीतापे मिमेटगुडा मीवा मनसुन कुल्ला कीम्टु. इद नना मीकुन नावा पिलाल्क इंचि वेहासेक मंतन.

विस्वासुल्क, अविस्वासुल्क उंदि आया पर्स

14 विस्वासम कियवोरतोनि मिमेट जोडि आयमटु. बारित्ते नीतितद आनि नीति हिल्वद इव बल्हा कलिया परांतां? वेल्गु आनि हीकट बल्हा दंता आया परीता? आया परीं.

15 किरिस्तु आनि देय्यम उंदि बल्हा आया परांतुर? विस्वासिक अविस्वासिनतोनि बता पोत्तु?

16 बोम्मांक, पेनदा गुळिकु बाता संबंदम? बारित्ते मनम अय्ते जीवाते मनना पेनदा गुळि आंदुम. पेनदा दर्मसास्त्रमते, “नना ओरा लोप्पो मनंतन, ओरतोनि तिरियंतन, नना ओरा पेन आसि मनंतन, ओर नावा लोकुल्लक आयानुर,” इंचि रासि मंता.

17 पेन इल्हागुडा इंता गदा, “विस्वासम कियवोरगटाल पेय्सट, अलग आम्टु, सापसुतरा हिल्ला वस्तुकुन इटमट, अस्के नना मीकुन ओप्कुंतन.

18 नना मीवा बाबान आकन, मिमेट नावा मर्क-मियाहक आकिट इल्हा पेदूदा सक्तिमंतुड पेन इंता,” इंचिगुडा रासि मंता.

7

1 पावरमगल्लोरिटा! पेन हीता इव पोल्लें मनकगुडा दोर्किसे मंतां, अदुनहाटीं मनम मना मेंदुल्क, आत्माक अंटिसि मत्ता मुर्किंतुन नोर्सिं साप कीकोम, पेनदुक वेरियसि पूरा पवित्र आसेके दाकोम.

2 मीवा मनसुने मावाहाटीं जेगा हीम्टु. मोमोट बोनतोने अन्यायम किया हिल्लोम, बोने बोंकिच्चा हिल्लोम, बोनाहेंदाल गलत पायदा एता हिल्लोम.

3 नना इल्हा इंचि बतल मीवापोरीं तप्पु दोस्सेक हिल्लेन. मिमेट मावा मनसुने मंतिट, मोमोट हायिना, पिस्सिना मीवातोने मनंतोम इंचि नना मुन्नेने वेहतन.

4 नना मीवातोनि बतले मक्किचाकोटा वेहासेक मंतन, नाक मीपोरीं एक्को पेदिदरेकेम मंता. नना सांतिते निंडतन. मावा अन्नि तकलिपकुनेगुडा नना वेल्ले कुसिते मंतन.

पौलस कूस आयमळ

5 मोमोट मेसिडोनिया एरियाते वातस्केगुडा मावा मेंदुल्कु सुकम दोर्काहिल्ले, गानि नालं मूलानाल तकलिपके-तकलिपकु मनुंद, पलाताल जगडालक आनि लोपोटाल वेंते निडिसि मत्तोम.

6 अयना गानि कमजोर मत्तोर्कुंक दैरनेम हिय्याना पेन तीतुन महाग लोहचि माक दैरनेम हीता.

7 सिराप ओर वाताहेंकेन आयो गानि मीहेंदाल ओनकु दोर्कता आ दैरनेमता हेंदालगुडा. ओर नावापोरें मत्ता मीवा इच्चाना बारेमते, दुक्कमता बारेमते, जोसता बारेमते वेहतोर. अदुनहाटी नना इंका एक्को आनंदमते मंतन.

8 नना सिट्टिटे रासि मीकुन दुक्कमते अरहतन. मुन्ने ननागुडा दुक्कमते मत्तन गानि इंदके हिल्लेन, अद दुक्कम गळसेमताहाटीगे मत्ता.

9 इंदके नना आनंदमते मंतन, मीकुन दुक्कमते अरहतन इंचि आयो, गानि मीवा दुक्कमता हेंदाल मिमेट मनसु मार्सकुत्तिर इंचि. इवन्नि पेनदा इच्चा मत्तापे आतां इंचि मीक माहेंदाल बतले नुकसान आयाहिल्ले.

10 बारित्ते पेनदाहेंदाल वायाना दुक्कम, मनसु मार्सकुनागोटसि मुक्त्तिताहेके ओता, ई दुक्कमते नाराज हिल्ले. गानि ई दुनियाता दुक्कम हामुरताहेके ओता.

11 निजम हळते, पेनदाहेंदाल वाता दुक्कम बक्त्तिते मनालय मीकुन बच्चोनो बदलांचता. मीलोप्पो बच्चोनो जोस, सत्तेमतोरम इंचि ह्युपुसमळ, अन्यायमता विरोद कियमळ, वेंते मनमळ, नाकु कलियानाहाटी मीवा जीवा बागाने तन्लाळमळ, सेवाता इच्चा, तप्यु कीतोन सिक्सा कियमळ. इवन्नि पोल्लेने मीलोप्पो तप्यु हिल्ले इंचि मिमेट निजम कीसि ह्युपिस्तिर.

12 नना मुन्ने लोहता सिट्टिते, बोर तप्यु कीतोर? बोन्क अन्यायम जर्गता? इंचि ईराहाटी रासा हिल्लेन. गानि पेनदा मुन्ने मिमेट माकुन बच्चोन बेस हळकुंतिर इद मीक तेळियागोम इंचि रासि मत्तन.

13 अदुनहाटी माक सांति दोर्कता. मीवा अंटोरहेंदाल तीतुना जीवा कूस आसि आनंदम आतोर. ओना आनंदम हळसि मोमोटगुडा वेल्लेने आनंदम आतोम.

14 नना ओनतोन मीवा बारेमते पेद्दिरकेम वेहकुत्तन. मोमोट मीक वेहतव अन्नि पोल्ले निजमे आंदुं. अदुनहाटी तीतुना मुन्ने नावा पेद्दिरकेम निजम कीसि ह्युपिस्तिर, नाकुन सिग्गु होननाल किया हिल्लिर.

15 मिमेट अंटोर तीतु वेहताप नावा आदेसतुन केंजतिर, वेंते, कदर हीसि ओनकु कलियतिर. इद मति वातस्के मुन्नेटकन्ना इंका एक्को ओना पावरम मीवाहाटी बेर्साता.

16 अन्नि पोल्लेने मीपोरें नाक बरोसा मंता, इद नावाहाटी कुसिता पोल्ले आंद.

8

गरिब विस्वासुल्क एक्को दानम कियमळ

1 विस्वासुल्कुनिता! मेसिडोनिया एरियाता कलिसियातोर्कुंक पेन कीता कुर्पाता बारेमते मीक वेहसेक मंतोम.

2 अद बल्हा इत्ते, ओरापोरें वेल्लेने तकलिपकुना परिकसां वातां, ओर वेल्लेने कूस आनि गरिब आसि मत्तुर. अयना गानि लोकुल्कुंक हिय्याना सहायम वेल्लेन बेर्साता.

3 ओरा बारेमते ना गवाइ इदे गदा, ओर बच्चोर हिय्या पर्तुर अचोने आयो गानि, दानकन्ना एक्को कुसिते हीतुर.

4 पेनदा लोकुल्कुन सहायम कियाना सेवाते माकुनगुडा कलियालय दया कीम्पु इंचि ओर मावातोनि ऊके-ऊके वेल्ले विनंति कीतुर.

5 मोमोट आसे पळसि मत्ता दानकन्ना एक्को ओर कीतुर. ओरा पिस्वरंता पेनदाहाटी हीतुर, आनि पेनदा इच्चा मत्ताप मावाहाटीगुडा हीतुर.

6 इल्हा सहायम कियमळ मुन्ने तीतुए मीलोप्पो सुख कीतोर, अयते अदुन महना कबळगुडा कियिरि इंचि ओन विनंति कीतोम.

7 मिमेट विस्वासमते, पोल्लेने, तेल्विते, अन्नि तीस्कुने कोसिस कियमळते आनि मावा पोरो मिमेट कियाना पावरमते बेर्सेक मंतिट. अल्हेने दानम कियाना कबळतेगुडा बेर्सेक होंदना.

8 नना मीक आदेस हीसेक हिल्लेने, गानि कळमता विस्वासुल्क इद कबळते उसारते मंतुर, ओराचचोन मिमेटगुडा निजम पावरम कीसेक मंतरा इंचि परिकसा कीसि हळसेक मंतन.

9 मना सामि येसु किरिस्तुना कुर्पा बच्चोर पेद्दादि मीक एरपाटे मंता. ओनगा अन्नि मंचिगुडा मीवाहाटीं गरिब आतोर. ओना गरिबतनमताहेंदाल मिमेट दनवंतुल्क आयना इंचि ओर अल्हा आतोर.

10-11 इगे नना वेहाना पोल्ले इदे गदा, निरिटाल कोत्तां जमा कीसि हियमळ मोदाला मिमेटे सुख कीतिर, अद कबाटुन महमळ मीक बेस मंता. बारित्ते, कोत्तां जमा कियाना इंचि बल्हा अयते मीवा इच्चा मत्ता, अल्हा मिमेट हिय्या पतंच्चो जमा कीसि अद कबाटुन पूरा कीम्पु.

12 कोत्तां हिय्याना इंचि मीवा इच्चा मत्ते, मिमेट बच्चोन हीतिट, अद पोल्ले आयो गानि, मिमेट पूरा मनसुनाल हीते पेन अदुन ओप्कुंता.

13 इंकावरोना बर्वुन अल्कगा कियानाहाटीं मिमेट बर्वु कांजना इंचि नना इंचेक हिल्लेने गानि इव्वुर समानम मंदना.

14 इंदकेटा वेलाते मिहगा अन्नि मंता, अयते हिल्वोरा अक्सराल्कुने कबळक वायमळ गावाले. पजा उंदि वेला मिहगा हिल्वस्के ओर मीवा अक्सराल्कुने कबळक वायमळ गावाले, इल्हा इव्वुरगुडा समानम आंतिर.

15 इदुना बारेमते दर्मसास्त्रमते,

“वेल्ले जमा कीतोनागा, वेल्ले मिग्ला हिल्लें,
तक्को जमा कीतोनागा, तक्को होन्ना हिल्लें,”
इंचि रासि मंता.

तीतु आनि ओना दंटातुर

16 मी बारेमते ना मनसुने मत्ता इच्चातुन, पेन तीतुना मनसुनेगुडा पुटिस्ता. अदुनहाटीं पेनदुक नना दन्यवाद कीतन.

17 मोमोट तीतुन मीहेके लोहालय विनंति कीतस्के ओर अद पोल्लेतुन ओप्कुंचि कुद कुसिते मिहगा वायालय तयार आतोर.

18 अल्हेने तीतुनतोनि अन्नि कलिसियाने बेसता कबुरतुन वेहालय पोरोल पेयसतोर वरोर दादनगुडा लोहसेक मंतोम.

19 अचोने आयका, इद चंदातुन मोमोट येस्सलेम ओयानेके ओन मातोनि लोहना इंचि कलिसियातोर पेरतुर. मोमोट सामिना महिमाताहाटीं आनि मावा सहायम कियाना जिद दिस्सनाहाटीं इद चंदा ओसेक मंतोम.

20 ई जमा कीता चंदाता जिम्मेदारि मावा पोरो मत्ताहाटीं, माकुन बोरे तप्पु इनामन्नि इंचि उसारते ताकसेक मंतोम.

21 सिराप पेनदा मुन्नेने तप्पु हिल्व्वाप आयो, गानि मनकालोरा मुन्नेगुडा तप्पु हिल्व्वाप मंतोम.

22 अल्हेने ओरतोनि मोमोट इंकावरोन मना दादन लोहासेक मंतोम. आ दादन मोमोट बच्चुंगो मल्कां परिकसा कीसि हळतोम, ओर वेल्लेने पोल्लेने बेस मंतोर. ओर मीवापोरो वेल्लेने बरोसा कीताहाटीं, मीक इंका वेल्लेने सहाय्यम कियाना ओना इच्चा मंता.

23 ओक्कला बोरन्ना तीतु बोर आंदुर? इंचि पूसकीते, ओर नावा दंटातोर, नावातोनि कलियसि मीवा सेवा कियानोर आंदुर, इंचि वेहट. इंका विस्वासि दादालोरा बारेमते पूसकीते, ओर कलिसियातोर लोहचीतोर आनि किरिस्तुना कदरगल्लोर आंदुर, इंचि वेहट.

24 अदुनहाटीं मिमेट ओर्कुन बच्चोन पावरम कीतिट इंचि कलिसियाता मुन्ने हुप्सट, अल्हेने मीवा बारेमते मोमोट पेद्दिरकेम वेहकुत्तद निजम कीसि ओर्कु हुप्सट.

9

कुसिते दानम हियाना इंचि पौलुस वेहमळ

1 इंदके यहुदिया राज्येमता पेनदा लोकुकुनाहाटी कियाना ई सेवाता बारेमते मीक रासाना अक्सरम हिल्ले.

2 बारित्ते सहाय्यम कियालय मिमेट बस्केळक तयार मनंतरि नाक एरपाटे मंता. नना मीवा बारेमते, अकाया एरियाता लोकुलक उंदि बर्साताल चंदा हियालय तयार मंतुर इंचि मेसिडोनियाता लोकुलकुंक पेद्रिदरकेमते वेहुंदुन. इद केंजसि वेल्लेटुर लोकुलक चंदा हियालय तयार आतुर.

3 नना मीवा बारेमते पेद्रिदरकेम वेहता पोल्लें एर्तम आयामान्नि इंचि ई दादालोर्कुन लोहसेक मंतन, नना वेहतापे मिमेट चंदा तयार कीसि इरट.

4 मिमेट अल्हा तयार कीसि इर्काकौटे, मेसिडोनियातोर बोरन्ना नावातोनि वासि तयार हिल्वद हळते, मीवापोर्री बरोसा कीताहाटी मावा सिग्गु होनना वेला बायार. मीवदगुडा सिग्गु दांता इनमळ अक्सरम हिल्ले.

5 अदुनहाटी मिमेट चंदा हीतोम इंचि मोदाले पोल्ले हीसि मत्तिर. अय्ते आ चंदा मिमेट तयार कीसि इरट इंचि बतिमलाडालय ई दादालोर्कुन मुन्नेने मिहगा लोहमळ नना अक्सरम इनकुत्तन. ओर वाता पजा जबरदस्तिते आयो गानि, मीवा मनसुनाल हियमळ गावाले.

6 इद पोल्ले मति इरट: इच्चुन वीततोर इच्चुने पंटा कोय्यंतोर, वेल्ले वीततोर वेल्लेने पंटा कोय्यंतोर.

7 अदुनहाटी गुलगामान्नि, जबरदस्ति कियामान्नि हरेक मनकल बल्हा हीतन इंचि विचारम कीतोर, अल्हेने हियाना. अल्हा आनंदमते हियानोन पेन पावरम कीता.

8 मिमेट अन्नि बेसता कबाहक कियालय, मीक अक्सरम मत्तव अन्नि मिहगा बस्केळक मंदालय, पेन दाना दयाते अव अन्नि हिया परांता.

9 इदुना बारेमते दर्मसास्त्रमते,

“ओर गरिबोर्कुंक अन्समन्स कियाका हीतोर,
ओना नीति बस्केळक निल्लिस मनंता,”[☆]

इंचि रासि मंता.

10 अदुनहाटी वीतानोंकु पेन विज्जां हीता, तिनालय तिडि हीता. अद मीक वेल्ले विज्जां हीतस्के मीवा नीतिता पलम बेरसंता.

11 मिमेट बस्केळक अन्समन्स कियाकौंटा हियालय पेन मीकुन अन्निटवुने गट्टिगा कीता. अल्हेने मिमेट मावा कय्दे चंदा लोहतित इंचि वेल्लेटुर पेनदुक दन्यवाद कियानुर.

12 मिमेट कियाना सहायमता सेवाहेंदाल पेनदा लोकुकुना अक्सरालक पूरा आंतां, अचोने आयाका ओराहेंदाल पेनदुक वेल्ले दन्यवाद आसेक मनंता.

13 बारित्ते मिमेट इद सेवा कीसि, किरिस्तुना बेसता कबुरतुन ओपकुंचि अद मत्ताप ताकसेक मंतिर. अचोने आयाका पेनदा लोकुलकुंक, वेरें अंटोर्कुंक मीवा मनसुनाल सहायम कीसेक मंतिट. इदुन हळसि ओर पेनदा महिमा कीतुर.

14 मीवापोर्री पेनदा कुर्पा वेल्लेने मंता, अदुनहाटी ओर मीकुन हळना इंचि तनलाळसेके ओर मीवाहाटी वेल्लेने पावरमते पारतना कीतुर.

15 पेन हीता वेहा परवच्चो वरमताहाटी दानकु दन्यवाद आयि.

10

पौलुस ओना सेवाता बारेमते वेहमळ

1 नना पौलसुन, मीवातोनि मननेके सिन्नागासि मनंतन, गानि लक्कु मननेके वें हिलाकोटा मनंतन इंचि इच्चुर इंतुर. नना मीकु किरिस्तुना सादा-सिंपल आनि मेत्तटा गुनमता हेंदाल विनंति कीसेक मंतन,

2 नना वातारिते बोर अयते माकुन, “दुनियातोरालेसीं ताकसेक मंतुर” इंचि इनकुंतुर, ओरतोनि नाक कडक वळकाना वेला वायामन्नि इंचि विनंति कीसेक मंतन.

3 निजमे, मोमोट दुनियातोरालेसीं मंतोम, गानि दुनियातोरालेसीं लडाइ किय्योम.

4 मोमोट लडाइ कियाना विषें दुनियातोरसंटव आयों, गानि किल्लान कूलाहनाहाटीं पेनदाहेंदाल ताकततव आंदुं.

5 इवुनाहेंदाल मोमोट पेनदुन एरपाट कियालय बतां अयते आपंतां, अवुन अन्निन नासडेम कीतोम, ओरां अन्नि विचाराल्कुन मिळाहचि किरिस्तुना इच्चा मत्ताप ताकानाल कीतोम.

6 मिमेट किरिस्तुना पोल्लेते पुरागा ताकालय आतस्के, किरिस्तुना पोल्ले केंजवोर अंटोर्कुन मोमोट सिक्सा हियालय तयार मंतोम.

7 मिमेट सिराप मुन्ने मत्तवुन मीवा कळकुने हळसेक मतिट. मीक गिंटा बोर्कन्ना ओनद-ओन्क नना किरिस्तुनो न आंदुन इंचि बरोसा मनानयते बल्हा ओर किरिस्तुनोर आंदुर, अल्हेने मोमोटगुडा किरिस्तुनोर्कुम आंदुम इंचि ओन्क तेळियगोम

8 मीकुन नासडेम कियालय आयो गानि, मीकुन बेसांगोतालय सामि माक अदिकारम हीतोर इंचि नना इंकागुडा पेद्दिदरकेम वेहकुनिना नाक सिग्गु हिल्ले.

9 नना बारि वेहसेक इत्ते, नावा सिट्टिना हेंदाल नना मीकुन वेराहसेक मंतन इंचि मीक अनपिच्चमन्नि.

10 बारित्ते, “ओर सिट्टिने अयते मजबुत आनि कडक पोल्लें रासंतोर, गानि मेंदुल्ले कमजोर मंतोर, पोल्लेंगुडा बेस पेय्सो,” इंचि इच्चुर इंतुर.

11 अल्हा इनानोर्क इद पोल्ले तेळियि: मोमोट हिल्वस्के सिट्टिने बल्हा रासि वळकंतोमो अल्हेने मोमोट मीवातोनि मत्तस्के ताकंतोमगुडा.

12 बोर-बोर अयते ओरद-ओर पेद्दातनम वेहकुंतुर, गानि मोमोट ओरालेसीं वेहकुन्नोम, ओरा लोप्पो तुलना किय्योम. ओर वरोनद वरोर कहकुंचेके मंतुर, वरोनद-वरोर तुलना कीकुंचेके मंतुर. इद पेद्दा मुर्कतनम आंद.

13 मोमोट अयते मावा अदिकारता पलाते बस्केने होन्नोम, गानि पेन माक हीता गेट्टुना लोप्पोने मंचि मोमोट पेद्दिदरकेम कीतोम. इदे गेट्टुन लोप्पो मिमेट मंतोर.

14 मोमोटे मोदाला मिहगा किरिस्तुना बेसता कबुर तत्तोम. अदुनहाटीं मोमोट पेन हीता सेवातुन गेट्टुना लोप्पोने मंचि पेद्दिदरकेम कीतोम.

15 व्हेतोर कीता कबळतुन मोमोटे कीतोम इंचि पेद्दिदरकेम किय्योम. बल्हा-बल्हा मीवा विस्वासम बेस्सेके दांता, अल्हा-अल्हा मावा सेवा मना गेट्टुना लोप्पोने मीवाहाटीं पैलांचेके दांता इंचि आसे मंता.

16 इकावरोर कबळ कीता एरियाते होंचि पेद्दिदरकेम कियाका, मोमोट बोर होनवा एरियाते होंचि बेसता कबुर वेहंतोम.

17 गानि दर्मसास्त्रमते, “बोर अयते पेद्दिदरकेम कीतोर, ओर सामि कीता कबळतुन पीसे पेद्दिदरकेम किय्येर,” इंचि रासि मंता.

18 बोर अयते ओनद-ओर मेचकुंतोर ओर कबळतोर आयोर, गानि सामि बोनयते मेचकुंतोर ओर कबळतोर आंदुर.

11

पौलस आनि आबद्दम वेहाना प्रेरितुल्लक

1 नना इच्चुर बुद्दि हिल्वोनलेसी वळ्किना गानि नाकुन ओर्सकुंट, अल्हेने मिमेट नाकुन ओर्सकुंचेकेन मंतिर.

2 मीवा बारेमते नना आसेते मंतन, इद आसे नावा लोप्पो पेनदाहेंदाले मंता. बारित्ते ओना वरोरे मंदना मांडसाता कय्दे हियालय, मरमिं आयवा पवित्र लेय्याटालेसी मीकुन किरिस्तुना कय्दे अप्पजेप्पना इंचि नाक मंता.

3 गानि तरास चालाकिते हव्वान पसांचतापे, किरिस्तुनतोनि इमानदार, पवित्र मंदना मीवा मनसुनगुडा लक्कु किय्यार इंचि नना वेरियंतन.

4 बारित्ते बोरन्नागिंटा मिहगा वासि, मोमोट वेहवासोंटा वैरे येसुना पोल्ले मीक वेहते, हिलाकोंटे बदन्ना मुन्ने मिहगा हिल्वसोंटा आत्मा दोर्कते, हिलाकोंटे इंका बदन्ना मुन्ने मिमेट ओप्कुन्वसोंटा बेसता कबुर वाते, अदुन मिमेट कुसिते ओप्कुंतिर.

5 नना पेद्दा-पेद्दा प्रेरितुल्लुकन्ना सिन्नोन इंचि इनकुंचेक हिल्लेन.

6 नना वळ्कमळते कमजोर मनिनागानि तेल्विते हिल्लेन. इदुन मोमोट अन्नि पोल्लेने, अन्नि तीस्कुने मीक हुपिस्तोम.

7 मीक पेनदा बेसता कबुर पुक्कटते वेहतन, मीक पेद्दातनम वायागोम इंचि, नावद नना सिन्नातनम कीकुत्तन, इद बतल पापम कीताना?

8 मीवा सेवा कियालय नना वैरे कलिसियानाहेंदाल मदत एतसि ओर्कुन लुटांचतन.

9 नना मिहगा मत्तस्के, नावा अक्सराल्कुन पूरा कियालय बोनपोरों बर्वु आसि मना हिल्लेन. मेसिडोनिया एरियाताल वाता विस्वासि दादालोर नावा अक्सराल्कुन पूरा कीतुर. इदवेरादाका नना बदे पोल्लेते मीपोरों बर्वु आया हिल्लेन, इंका मुन्नेगुडा आयोन.

10 किरिस्तुना सत्तेम नावा लोप्पो मंता, अदुनहाटी अकाया एरियातोर बोरे नावा इद पेद्दिदकेमतुन विरोद किया पर्र.

11 नना मिहगाटाल मदत एता हिल्लेन इत्ते, मीपोरों नाक पावरम हिल्ले इत्तापा बतल? असले आयो! मीकुन नना बच्चोन पावरम कीतन अद पेनदुक एरपाट.

12 ओर बतलय्ते कीसेक मंतुर अदे कबळ मोमोट कीसेक मंतोम इंचि बोर अय्ते पेद्दिदकेम वेहकुंचेके मंतुर, ओर्कुन कमजोर कियानाहाटीं नना बतलय्ते कीतन, अदे कीसेक मनंतन.

13 बारित्ते इसोंटा लोकुल्लक आबद्दम प्रेरितुल्लक आंदुर. ओर आबद्दम वळ्कंतुर, ओर इंकावरोन पसांचना कबळ कीतुर, ओर किरिस्तुना प्रेरितुल्लकुनालेसी मनंतुर.

14 इवने इचंत्रम बतल हिल्ले, देय्यमगुडा वेल्गु हिय्याना पेनदा दूतालेसी आंता.

15 अदुनहाटीं देय्यमता सेवाकुल्लकगुडा सत्तेमते ताकाना सेवाकुल्लकुनलेसीं मारियते इद पेद्दा पोल्ले आयो, गानि आकिरते ओर कियाना कबळता इसाबते सिक्सा आयार.

पौलुस किरिस्तुना प्रेरित आताहाटीं तकलिप अरमळ

16 नना मर्रा वेहसेक मंतन, नाकुन बोरे मूर्कुड इनकुनमट, मिमेटगिंटा नाकुन मूर्कुडे इनकुनानय्ते बतल आयो, अल्हेने ओप्कुंट, इदुनहेंदाल नाकगुडा इच्चुर पेद्दिदकेम कियालय दोकार.

17 नना इंदके वेहना पोल्ले सामिना विचारम मत्ताप आयो, गानि वरोर मूर्कुड वेहताप वेहासेक मंतन.

18 वेल्लेटुर लोकुल्लक ओर कीता पोल्लेन पोरोटाल पेद्दिदकेम वेहकुंतुर, ननागुडा अल्हेने वेहकुंतन.

19 मिमेट अय्ते बुद्दि मत्तोर आंदिर, अदुनहाटींगे बुद्दि हिल्वोरा पोल्लेन कुसिते ओर्सकुंचेके मंतिर.

20 अचोने आयाका, ओर मीकुन गुलाम किय्यिना, लुटांचना, मीवा पायदा येताना, ओरद-ओरे पेद्दा कीकुन्निना, मीकुन सेंपापोरों तनिना इवन्नि मिमेट ओर्सकुंचेके मंतिर.

21 नाक सिग्गु वायाना पोल्ले बतल इत्ते, ओर कीताप मोमोट किया हिल्लोम. गानि बोरे आयिर पेद्दिदरकेम कियालय दैरनेम कीते, ननागुडा मूर्कुनालेसी दैरनेमते पेद्दिदरकेम कीतन.

22 ओरद-ओर इब्रि जातितोर्कुम इंचि इंतुर, ननागुडा इब्रि जातितोने. ओर इस्राएल मनकालोर्कुम इंतुर, ननागुडा इस्राएल मनकने. ओर अब्राहामुना वंसमतोर्कुम इंतुर, ननागुडा अब्राहामुना वंसमतोने.

23 ओर किरिस्तुना सेवाकुल्क आंदुरा? नना ओर्कन्ना एक्को किरिस्तुना सेवा कियानोन आंदुन इंचि पिस्सनलेसी इंचेके मंतन. ओर्कन्ना एक्को कस्टम कीतन, ऊके-ऊके जेलुंक होनुंदुन, देब्बां तिनुंदुन, बच्चुंगो मल्कां हायाना वेला वासि मत्ता.

24 नना हेय्युं मल्कां यहुदिल्लकुना कय्दे मुप्पै तोम्मिद पोट्टे देब्बां तित्तन.

25 मूड मल्कां नाकुन दुड्डुने तंतुर, उंदि मल्का बंडाने तंतुर, मूड मल्कां नावा पय्नेमते डोंगां पैतां, उंदि मल्का नर्का-पल्लिं पिय्यल-पोळ्दु समुद्रमते मत्तन.

26 ऊके-ऊके पय्नेमते होनुंदुन. बैरहकुना दोका, दोंगालकुना दोका, नावा लोकुलकुनाहेंदाल दोका, वेरे जातितोरहेंदाल दोका, सहरते दोका, बय्लि जेगाते दोका, समुद्रमते दोका, विस्वासुल्कुम इंचि नळेह कियाना मनकालोर्कुना हेंदालगुडा नाक दोका मत्ता.

27 नना मेहनतते, कस्टमते मत्तन. बच्चुंगो मल्कां निद्र हिलाकोटा मनमळते, कर्वुने-दूपाते, उपासम, पीनिते मत्तन, कपडिं हिलाका मत्तन.

28 इच्चोरे आयाका, अन्नि कलिसियाना पिकिर नाकुन रोज परेसान कीसेक मनुंद.

29 बोर्नना विस्वासि विस्वासमते कमजोर आते, ननागुडा कमजोर आताप नाक अनपिच्चोना? बोर्नना मनकल इंकावरोन विस्वासमताल अरहानय्ते नाक होंग वायोना?

30 नाकु गिंटा पेद्दिदरकेम कियाना मत्ते, नना किया पर्खा कबाहकुना बारेमते पेद्दिदरकेम कीतन.

31 नना वळकानद आबद्दम आयो इंचि सामि येसुना पेनबाबांका एरपाटे मंता. ओन्क बस्केळ्ळ दन्यवाद आयि.

32 नना दमिस्क सहरते मत्तस्के, अरितास राजाना हेंदाल ओना राज्यपाल नाकुन पियालय सहरते पहारा कीसेक मत्तोर.

33 गानि अस्के नाकुन इच्चुर उंदि तट्टाते उप्पिचि गूरेता किळकिताल हब्बेर रेहतुर. इल्हा नना ओना कय्दाल पिस्तन.

12

पौलसना दर्सनाल्क

1 नना पेद्दिदरकेम कीते नाक बतल पायदा दोर्को, गानि पेद्दिदरकेम किया पीसेक मंता. सामि नाक हीता दर्सनम आनि हुपिस्ता मर्ममता पोल्लेन बारेमते वेहंतन.

2 किरिस्तुन विस्वासम कीतोर वरोर मनकल नाक एरपाट. पडनालुं वर्साना मुन्ने पेन ओन मूडो स्वर्गमदाका पीसि ओता. अस्के ओर मेंदुलते मत्तोर, मना हिल्लोरा नाक तेळियो. पेनदुके तेळियंता.

3-4 आ मनकल मेंदुलते मत्तोर, मना हिल्लोरा? अद नाक तेळियो, पेनदुके तेळियंता. गानि इच्चोर एरपाट गदा, ओन पेन सुकमता जेगाते ओता. मनकंक वेहालय अदिकारम हिल्वसोंटव पोल्ले अगा ओर केंजतोर.

5 इसोटा मनकना बारेमते नना पेद्दिदरकेम वेहकुंतन. गानि ना बारेमते नावा कमजोरिन तप्पा, इंका बवे पोल्लेन बारेमते पेद्दिदरकेम वेहोन.

6 नना पेद्दिदरकेम वेहतेगुडा, निजम वेहताहाटी नाकुन मूर्कुड इनावायो. गानि नना अल्हा वेहोन. बारित्ते नना कीता कबाहकुन हळता दानकन्ना आनि वेहता पोल्लेन केंजता दानकन्ना एक्को मान नाक हिय्यामन्नि.

7 नाक हुपिस्ता मर्ममता पोल्ले वेल्लेने मत्ताहाटी नावा लोप्पो पेद्दिदरकेम वायामन्नि इंचि पेन नावा मेंदुलते उंदि हापु इरता. अद नाकुन दबांचि इर्ललय देय्यमता दूतालेसी कोहकसेके मनंता.

8 अद हापु नहागटाल तेंडा इंचि, मूड मल्कां सामिन विनंति कीतन.

9 गानि सामि नाकुन, “नावा कुर्पा नीकु सालांता, बारित्ते निमे कमजोर मत्तस्केन नावा ताकत कबळ कीता,” इंचि जवाब हीतोर. अदुनहाटीं नना कमजोर मत्तस्के किरिस्तुना ताकत नाकु तोळ आयागोम इंचि वेल्लेने कुसिते पेद्दिरकेम कीसेक मंतन.

10 नना कमजोर आतस्केने, किरिस्तुना लोप्पो गट्टिगा मंनंतन. अदुनहाटीं कमजोर आयिना, अपमानम आयिना, कस्टम आयिना, सताव आयिना आनि आपत्ति वायिना नना कुसिते मंनंतन.

कुरेंतिता कलिसियाताहाटीं पौलसना पिकिर

11 मीवा बल्मितेन नना मुर्कनलेसीं पेद्दिरकेम कीसेक मंतन. नना कदरलायक हिल्लेन आयावच्चु, गानि पेद्दा-पेद्दा प्रेरितुल्लुकुंकनना बदे पोल्लेते तक्को हिल्लेन, अदुनहाटीं मिमेट नावा पेद्दिरकेम किया मत्तिर.

12 मीवा नड्डुम नना ओक्केते मत्तन, नावाहेंदाल चिन्हां, इचंन्रमता कबाहक, पेनदा पेद्दा-पेद्दा कबाहक जर्गताहाटीं ननागुडा निजम प्रेरितुने इंचि दिसंता.

13 वेंरे कलिसियांकनना मिमेट बद पोल्लेते तक्को मत्तिट? सिराप इदे गदा, नना मीपोरें बर्वु आसि मना हिल्लेन, इदे नावा तप्पु, नावा तप्पुन मापि कीम्टु.

14 इंदके नना मूडो मल्का मिहगा वायालय तयार मंतन, इंदकेगुडा नना मीपोरें बर्वु अरहोन. बारित्ते पिलाल्क तल्लुर-बाबोनहाटीं दनम संपालिच्चुर गानि, तल्लुर-बाबो पिलाल्कुनाहाटीं दनम संपालिच्चंतुर. अदुनहाटीं नाक मीहेंदाल बतल मन्नि, मिमेटे गावाले.

15 नना मीवा आत्माता पायदाताहाटीं नना इरगा कुसिते कर्स कीतन, अवसरम अरते नना कुद्दु कर्स आंतन. नना मीकुन वेल्ले पावरम कीतन इंचि मिमेट नाकुन तक्को पावरम कीतिरा?

16 नना अय्ते मीपोरें बर्वु वाटा हिल्लेन गानि, “पिलान कीसि माकुन बोंकिचोर” इंचि मिमेट नाकुन इना वच्चु.

17 नना मिहगा लोहता लोकुल्लुकुनाल बोरा हेंदालनना कपटमते नना पायदा एततना?

18 नना तीतुन मिहगा होन इंचि विनंति कीसि, ओनतोनि वरोर दादानगुडा लोहतन. तीतु कपटमते मीहेंदाल बतलनना पायदा एततोर? अल्हा एतोर. नना आनि तीतु इव्वुरोम उंदे आत्माते, उंदे रीतुने ताकंतोम.

19 महगा तप्पु हिल्ले इंचि हुप्सालय इवन्नि मोमोट मीक वेहसेक मंतोम इंचि मिमेट इनकुंचंतिर आयावच्चु, गानि आयो. मोमोट अय्ते पेनदा मुन्ने किरिस्तुना अदिकारमते वळ्ळंतोम. पावरमगल्लोरिटा! इवन्नि पोल्लें मीवा विस्वासम बेर्सनाहाटींगे वेहसेक मंतोम.

20 बारित्ते नना मिहगा वातास्के, मिमेट इनकुत्ताप नना मीक दोर्का पर्रोन आयावच्चु इंका नना इनकुत्ताप मिमेट मंदक होननिर. बोर्क एरपाट, मीलोप्पो जगडाल्क, कळ्ळ पोतमळ, हौग, सतता पायदा, अपमानम, पेद्दिरकेम, चुगलीं, लोल्लिं इसोंटवगुडा दिस अर्रांनुं इंचि नना वेरियसेक मंतन.

21 अल्हेने नना मर्रा वाता पजा, इच्चुर विस्वासुल्क कराब कबाहक, बोगमतनम, लंजेतनम इसोंटा पापाल्कुनाल मनसु मार्सकुनांकुटे नाक वेल्ले दुक्कम आयार. अचोने आयाका पेनदा मुन्ने नावा सिग्गु होनना वेला वायारो बतल इंचिगुडा वेरियतन.

13

पौलसना आकिरता पोल्लें

1-2 नना रोंडो मल्का मिहगा वासि मत्तस्के, पापम कियमट इंचि वेहचि मत्तन. इंदके नना मिहागटाल लक्कु मंतन गानि, मर्रा उंदि मल्का अदे पोल्लेतुन नना वायाका मुन्ने मीक वेहसेक मंतन. नना मूडो मल्का वातस्के, बोर अय्ते मुन्ने पापम कीतुर, इंदकेगुडा कीसेकेने मंतुर ओर्कु, अल्हेने

कळमतोर अंटोर्क सिक्सा तप्पो. बारित्ते दर्मसास्त्रमते, “हरेक पोल्लेतुन निजम कियालय इव्वुर हिलाकोटे मुव्वुर गवाइदार्कुना अब्बरम मनंता, ☆” इंचि रासि मंता.

3 किरिस्तुनाहेंदाल वळकंतोर इत्तदुना बारेमते, मिमेट आनवल बतल इंचि पूसकीतिर. किरिस्तु मीहाटी कमजोरि आयो गानि मीलोप्पो ताकत आसि मनंतोर.

4 बारित्ते, किरिस्तु कमजोर आसि मत्तस्के ओन कूसुनपोर्रो मोल्लां कोह्किसि वेलाळ वाटतुर, अयना गानि पेनदा ताकतते ओर मर्रा तेदसि जीवाते मंतोर. मोमोटगुडा ओनालेसीगे कमजोर मंतोम, गानि मोमोट मीवाहाटी पेनदा ताकतते किरिस्तुनतोनि जीवाते मनंतोम.

5 मिमेट नाकुन परिक्सा कीसि हळना दानकन्ना, मिमेट विस्वासमते मंतरा हिल्लिरा, मीवद-मिमेट परिक्सा कीसि हळ्ळाट. अस्के येसु किरिस्तु मीलोप्पो मंतोर इंचि अनपिच्चोना? अल्हा अनपिच्चाकोटे मिमेट ओना लोकूलक आयिर इनकुंटु.

6 नावा आसे मंता, मिमेट परिक्सा कीसि हळते, मोमोट निजमे किरिस्तुना प्रेरितुलकुम इंचि मीक अनपिच्चंता.

7 ओक्काला मोमोट निजम प्रेरितुलकुनालेसी मीक दिस्साकोन्नागुडा, बतल सत्तेम मंता अदे कियाना इंचि मीहाटी पेनदुक पारतना कीसेक मंतोम.

8 मिमेट सत्तेमते ताकते दानकु विरोद मोमोट किय्योम, गानि सत्तेमताहाटीगे सहायम कीतोम.

9 मोमोट कमजोर मत्तोरालेसी दिस्साना गानि बतल आयो, मिमेट ताकतते मत्ते माक आनंदम आंता. इल्हा मिमेट ताकतते बेसेक होंदना इंचि, मोमोट पारतना कीसेक मंतोम.

10 अदुनहाटी सामि मीकुन नासडेम कियालय आयो गानि, गट्टिगा निलाहलय नाक अदिकारम हीतोर. नना मिहगा वातस्के नावा अदिकारमते मीतोनि कडक वळकना वेला वायामन्नि इंचि, मिहागटाल लक्कु मनेकेने इव पोल्लें रासेक मंतन.

11 विस्वासुलकुनिटा! नना आकिरते वेहानद इदे गदा, कुसिते मंटु. मीवा गुनम बेस इर्राट, वरोंक-वरोर दैरनेम हीम्टु, उंदि मनसुने मंटु, सांतिते मंटु, अस्के पावरम आनि सांति हियाना पेन मीवातोनि मनंता.

12 मिमेट वरोंक-वरोर कलियतस्के पवित्र पावरमते जोहार कीम्टु.

13 इग्गेटा पवित्र लोकूलक अंटोर मीकु जोहर वेहासेक मंतुर.

14 सामि येसु किरिस्तुना कुर्पा, पेनदा पावरम आनि पवित्र आत्माता तोळ मी अंटोरतोनि मन्निकांटी.

गलातिया गलातिया विस्वासुल्लुकुंक पौलुसना सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 48-55

इद सिट्टि गलातिया इनना एरियाते मनना विस्वासुल्लुकुंक पौलुस रासतोर. इद एरिया दक्खिन आसियाते वांता. इद सिट्टि पौलुस गलातियाते मनना विस्वासुल्लुकुंक बारि रासतोर इत्ते, अगाटा विस्वासुल्लुकुंक तप्पुड बोदां केंजसि निजम विस्वासमताल लक्कु आतुर. ओर्कुन मर्रा निजम विस्वासमते तरानाहाटी पौलुस इद सिट्टि रासतोर.

पौलुसुन प्रेरित इंचि बोरे मनकालोर पेरा हिल्लुर गानि कुद्दु पेने ओन येसु किरिस्तुना कबळहाटी पेरता. पौलुसना उद्देसमगुडा यहुदि आयवोर लोप्पो होचि किरिस्तुना बारेमता बेसता कबुर वेहनद मत्ता.

इद सिट्टिते पौलुस इंका इल्हा रासतोर गदा, दुनियातोर अंतोर पापम कीसि पेनदा पावरमताल लक्कु आतुर. गानि येसु किरिस्तुनपोर्रो विस्वासम कीसि मर्रा पेनदुक दग्गेरा आयावच्चु. येसु किरिस्तुन पोर्रेटा विस्वासमहेंदाल पेनदा पावरम मनकंक दोर्कता. दीनहेंदाल ओरा कबाहकगुडा बेस जर्गतां. बगा बतल मंता

जोहार आनि परिचयम 1:1-10

पौलुस प्रेरित आंदुर इंचि रूजुव कीसि हृप्संतोर 1:11-2:21

पेनदा कुर्पाता बारेमता बेसता कबुर 3:1-4:31

विस्वासुल्लुकुना जिम्मेदारि 5:1-6:10

आकिरता बोदां 6:11-18

गलातियाता विस्वासुल्लुकुंक पौलुसुनहेंदाल जोहार

1 नना येसु किरिस्तुना वरोर प्रेरितुन* आंदुन, नावा पोरोल पौलुस. नना प्रेरित इंचि मनकालोराहेंदालो हिलाकर्णेते बोरो वरोर मनकल नाकुन कीताहेंका आया हिल्लेन, गानि कुद्दु येसु किरिस्तु आनि ओन हामुरताल मर्रा जीवाते तेहता आ पेनबाबाले नाकुन केयतोर.

2 इद सिट्टि गलातिया इनना एरियाते मनना कलिसियानोर्क, इत्ते मीवाहाटीगे नना नावातोनि मनना दादालोराहेंदाल रासतन.

3 मना पेनबाबाल आनि मना सामि येसु किरिस्तुनहेंदाल मीकु कुर्पा, सांति दोर्कि.

4 मनम मनना ई पापि दुनियाताल मनाकुन पिसागोटना इंचि मना पेनबाबाना इच्चा मत्ता. अदुनहाटी येसु किरिस्तु मनाहाटी ओना जीवा हीसि पेनबाबाना इच्चातुन पूरा कीतोर.

5 दुनियाता लोकुल्लुकु युगा-युगाल्लुकुनदाका ओनदे कदर किथियेर, आमीन.

निजमाता बेसता कबुर उंदे आंदु

6 बद पेन अथे येसु किरिस्तुना कुर्पाहेंदाल मीकुन दग्गेरा कीकुत्ता, असोटा पेनदुन इच्चोन बिराना होळसिसि, बदो वैरे बेसता कबुरतेके तिरियतिर. इदुन केंजसि नाकु वेल्लेन इच्चंन्रम आसंता.

7 असल निजम बतल इत्ते, वैरे बदे बेसता कबुर हिल्ले. गानि इच्चुर लोकुल्लुकु मंतुर ओर मीकुन गयबेत कीसि किरिस्तुना बारेमता बेसता कबुरतुन बदलांचलय हळसंतुर.

* 1:1 प्रेरित इद पोरोल्लुकु "पेन लोहचीतोर" इंचि अर्तम. येसु पन्नेड मंदितुन पेरुकुत्तोर ओरे प्रेरितुल्लुकु आंदुर.

8 ओक्कला मोमोट आयि स्वर्गमताल वाता पेनदा दूता आयि, मोमोट मीकु वेहता बेसता कबुर तप्पा इंका वेंरे कबुर वेहानयते, असंटोर्कुन पेन नासडेम कीसि पोहि.

9 मोमोट मीकु मुन्ने वेहता पोल्लेतुन इंकुंदि मल्का वेहचंतोम बेस केंजट. बोरें आयिर, मिमेट मुन्ने नम्मुता बेसता कबुर तप्पा वेंरे कबुरगिंटा वेहानयते पेन ओन नासडेम किट्टिये.

10 अयते नना इंदके लोकुल्लक नाकुन मेच्चुकुनगोम इंचि ह्ळसंतना मरि पेनदा आसिर्वाद दोर्कगोम इंचि ह्ळसंतना? हिलाकोटें लोकुल्लकन कूस कियानसंटोना? ओक्कला नना लोकुल्लकन कूस कियानसंटोन आसि मत्ते किरिस्तुना सेवाकुन आयाकोन्नेन.

पौलुस वेहना बेसता कबुर पेनदागटाल वाता

11 विस्वासुल्लकुनिटा, नावा पोल्ले बेस केंजट! नना वेहता बेसता कबुर मनकनहेंदाल आयो, इद मिमेट मतिते तासकुंदु.

12 इंका इद नाकु बोर मनकालोरहेंदालगुडा दोर्काहिल्ले आनि बोर मनकल नाकु कराह हिल्लोर. इदु नाकु कुदुदु येसु किरिस्ते कुल्ला कीसि वेहतोर.

13 नना यहुदि रिवाजते पिसनेके नावा पिस्वर बल्हा मत्ता मीकु एरपाटे. अस्के नना पेनदा कलिसियातुन इरगा तकलिप कीतन, ओर्कुन नासडेम कियालय बस्केळक ओरा पज्जो अरसि मनुंदुन.

14 यहुदिल्लकुना रीति-रिवाजकुने ताकमळते नना नावा वय्सुनोर्कन्ना उंद अळगु मुन्नेन मनुंदुन. नावा तादो-बाबुरहेंदाल दोर्कता रीति-रिवाजकुन पोरें ताकमळ नाकु वेल्लेन इस्टम मत्ता.

15 गानि पेन मात्रम नना यावाना पीटे मननेकेन नाकुन पेरता. पजा दाना कुपांते नाकुन केय्सि, दाना मरि येसु किरिस्तुना बारेमते तेळियागोट्टिस वेहता.

16 अदुनहाटीं नना यहुदि आयवा लोकुल्लकुन लोप्पो होंचि दाना मरिना बारेमता बेसता कबुरतुन वेहा परतन. इल्हा जर्गतस्के नना बोरें मनकंक होंचि कलिया हिल्लेन बोने बतल पूसकिया हिल्लेन.

17 नाकन्ना मुन्ने आता प्रेरितुल्लक कलियना इंचि येस्सलेमगुडा होना हिल्लेन. दाना बदुल, अस्केटद अस्केन नना अरब इनना देसेम होंचि, पजा दमिस्क सहरतेन मल्लिस वातन.

18 पजा मूड वर्सा आतंका नना केपांकां कलियालय येस्सलेम होंचि, ओनतोनि पदहेन रोजकु मत्तन.

19 गानि याकोब इनना सामिना तम्मुक तप्पा इंका बोरें प्रेरितुंक कलिया हिल्लेन.

20 नना पेनदा मुन्ने निल्लिस वेहचंतन, बतल अयते नना मीकु रासेक मंतन, अव्टे गिचचोगुडा आबदुदम हिल्ले.

21 पजा नना सिरिया, किलिकिया इनना एरियाने होत्तन.

22 गानि यहुदिया एरियाते मनना कलिसियानोर अयते नाकुन बस्केने ह्ळा हिल्लुर.

23 ओर नाकुन एरपाट कियाकोन्ना, “बोर मनकल अयते मना लोकुल्लकुन मुन्नेटा कालमते तकलिप कीसि नासडेम कियालय ह्ळुंदुर, ओर इंदके किरिस्तुना बारेमता बेसता कबुरतुन वेहचंतोर,” इंचि वेंरेतोर वळकानेके मात्रम केंजतुर.

24 इल्हा इंचेके ओर नावाहेंदाल पेनदुन तल्लसकुनुंदुर.

2

पौलुसना पोल्लेन प्रेरितुल्लक ओप्कुंतुर

1 पजा पडनालु वर्सा आतंका नना मरि येस्सलेम होत्तन. अस्के नातोनि बरनाबास मत्तोर. मोमोट होननेके नातोनि तीतु इनानोनगुडा पीसि ओतन.*

2 नाकु अगा तप्पाकोटा होनापीता इंचि पेन वेहचि हुपिस्ताहाटीं नना होत्तन. पेनदाहाटीं नना कीता कस्टम एर्तम आयानायो इंचि यहुदि आयवोर्क नना वेहता बेसता कबुरतुन अगटा लीडुर्कुन बाजुंक केय्सि ओर्क वेहतन.

† 1:18 केपा पन्न केपा इंचिगुडा केयुंदुर. * 2:1 प्रेरितुल्लकुना कबाहक 15:2

3 नातोनि मत्ता तीतु युनानि मनकल आंदुर. अयना ओना कतना कियनाहाटीं ओर लीडर्क जबरदस्ति किया हिल्लुर.

4 गानि मावा लोपो इच्चुर लोकुल्क विस्वासुल्कुनलेसी आसि मक्किस् होळियतुर. येसु किरिस्तु माकुन यहुदिल्कुना नियमाल्कुना गुलामगिरिताल पलाते पेचाहतदुन चुपचाप हळसि, माकुन मर्रा गुलामगिरिते अरहचि नासडेम कियना उदूदेसमते ओर वातुर.

5 गानि येसु सामिना बेसता कबुरता सत्तेम बस्केळ्ळक मीलोपो मनना इंचि मोमोट मात्रम ओरा पोल्लेन असले नम्मा हिल्लोम.

6 अगा मत्ता लीडर्क, नना वेहतवटे बवे पोल्लें कल्पा हिल्लुर. पेनदा मुन्ने अंटोर समानमे. अदुनहाटीं ओर लोकुल्क बच्चोर पेदूर्दोर्क अयना बेसे, नाकु बतल पिकिर हिल्ले.

7-9 गानि कतना आतोर्कुंक बेसता कबुर वेहना जिम्मेदारि पेन पत्रुंक हीतापे, कतना आयवोर्कुंक बेसता कबुर वेहना जिम्मेदारि पेन नाकु हीता, इंचि याकोब, केपाल* आनि योहान ई पोरोल होत्ता पेदूर्दा मनकालोर तेलपिच्चुत्तुर. यहुदिल्कुनाहाटीं प्रेरित इंचि पेन पत्रुन पेरसि ओन्क बेस हिम्मत हीता. अल्हेन नाकगुडा अदे पेन यहुदि आयवा लोकुल्कुनाहाटीं प्रेरित इंचि सेवा कियालय हिम्मत हीता. पेन नाकु हीता आसिर्वादतुन मतिते इरसि ओर नाकुन, बरनाबासुन ओप्कुत्तुर. पजा ओर बारे यहुदिल्कुनगा मोमोट बारे यहुदि आयवा लोकुल्कुनगा होनना इंचि ओर निरनायम कीतुर.

10 ओर माकु उंदे पोल्ले वेहतुर, अद बतल इत्ते मोमोट अगा होत्तस्के गरिब लोकुल्कुंक सहायम कियना इंचि. नाकगुडा अदे कबळ कियना आसे मत्ता.

पौलुस पत्रुंक विरोद कीतोर

11 कोन्नि रोजकुंक केपल अंताकिया सहरते वातोर. अगा वातस्के ओर उंदि तप्पु कीतोर. अदुनहाटीं ओर कीतद तप्पु इंचि ओन्क मोकोम मुन्नेन वेहतन.

12 असल बतल आता इत्ते, याकोबनगटाल इच्चुर यहुदि विस्वासुल्क केपानगा (पत्रु) वातुर. आ लोकुल्क वायनदाका केपल यहुदि आयवा विस्वासुल्कुनतोनि कलियसि तिनुड-उनुळ कियुंदुर. गानि बस्के अयते ओर वातुर, अस्केटाल मात्रम कतना आता लोकुल्कुंक वेरियसि, केपल यहुदि आयवा विस्वासुल्कुनाल लक्कु आतोर.

13 इंका ओर कियनद हळसि वेरे यहुदि विस्वासुल्कगुडा अल्हे कियालय दलगतुर. अचोने आयका बरनाबासगुडा ओरव्टेन कलियतोर.

14 पजा ओर बेसता कबुरता सत्तेमतुन एरपाट कीसि ताकसेक हिल्लुर इंचि नाकु तेळियतस्के नना केपन, “निमे यहुदि जातितोन आसिगुडा यहुदिल्कुना रीति-रिवाजकुन पीसि ताकसेक हिल्लिन. असोर्टस्के यहुदि आयवोर्कुन यहुदिल्कुना रीति-रिवाजकुन पीसि ताकालय बारि जबरदस्ति कीसंतिन?” इंचि अंटोर मुन्नेन पूसकीतन.

15 बोर्कुन अयते मना यहुदिल्क पापिर्क इंचि इंतुर आ जातिते मनम पुट्टा हिल्लोम, मनम पुटतस्केटाल यहुदिल्कुमे.

16 अयना मूसाना नियमतुन पीसि ताकते आयो, गानि येसु किरिस्तुन विस्वासम कीतेन वरोर मनकल नीतिमंतुड आंतोर इंचि इंदेके मनाकु एरपाट मंता. अदुनहाटीं येसु किरिस्तुन विस्वासम कीताहेंका नीतिमंतुल्क आयगोम इत्ता उदूदेसमते मनम यहुदिल्क येसुनपोर्री विस्वासम कीतोम. बारित्ते मूसाना नियमतुन पीसि ताकतोर बोरे मनकल नीतिमंतुड आयोर.

17 नीतिमंतुल्क आयनाहाटीं नियमाल्कुन पीसि ताकका, मनम किरिस्तुन विस्वासम कीतोम. इंचि इच्चुर यहुदिल्क मनाकुन पापिर्क इंचि इनकुंतुर. इत्ते बतल किरिस्तु पापम किया वेहालय वातोर? अल्हा असले आयो.

18 यहुदिल्कुना बव नियमकुन अयते नना होळसीतनो, अवे नियमकुनपोर्री मर्रा ताकानयते नना मूसाना नियमाल्क तपतोने आंतन.

* 2:7-9 केपाल ईरे पत्रु आंदुर.

19 इत्ते मुन्ने नना मूसाना नियम परकारम ताकसेके पिसालय ह्ळंडुन, गानि बस्केळ्ळक अवुन पीसि ताका पराकौंदुन. इंदके पेनदाहाटीं पिस्सना इंचि अवुनंता होळस्तन. दीना अर्तम बतल इत्ते यहूदिल्कुना रीति-रिवाजकुनाहाटीं नना हाताप आतन.

20 नाकुन किरिस्तुनतौनि कूसुनपोरों वेलाड वाटमळ जर्गता इत्ते, इंदके नावा पळाना पिस्वर हासोत्ता. गानि नावा लोप्पो किरिस्तु जीवाते मंतोर. इंदके नावा ई मेंदुलते मनना जीवा, नाकुन बच्चोनी पावरम कीसि नावाहाटीं ओना जीवातुन हीता पेनदा मरिनपोरों नना विस्वासम कीताहेंका दोर्कतद आंद.

21 पेनदा कुर्पातुन नना विलवा हिल्ले इंचेक हिल्लेन. गानि मूसाना नियम परकारम ताकसि मनकालोर नीतिमंतुल्क आयानय्ते मनाहाटीं येसु किरिस्तु हायना अब्सरम मनाहिल्ले मरि.

3

विस्वासम कियानोंके पेनदा आसिर्वाद दोर्कता

1 ए गलातिया एरियाता लोकरिटा, मिमेट निजमे बुद्दिद हिल्लेवर आंदिर. येसु किरिस्तुन कूसुनपोरों बारि वेलाळ वाटतुर? दाना अर्तम बतल? इंदता नना मीकु बेस तेळियानाल वेहचि मत्तन. असल मीकुन तप्पुड हर्दुक तिराहतोर बोर?

2 इंदके मिमेटे वेहाट, मूसाना नियम परकारम ताकताहेंका मीकु पवित्र आत्मा दोर्कतना मरि किरिस्तुना बारेमता बेसता कबुरपोरों विस्वासम इरताहेंकाना?

3 पवित्र आत्माता सहायमतौनि सुख कीता मीवा पूना पिस्वरतुन मिमेट मीवा बलमतेन पुरागा कियालय ह्ळसंतरिा? मीकु गिचचोगुडा बुद्दिद हिल्लेना?

4 बेसता कबुरताहेंका मिमेट वेल्लेन तिप्पल्क अरतिर, अदंता एर्तमेना? नना मात्रम ओप्कुन्नोन.

5 पेन मीकु दाना पवित्र आत्मातुन हीसि मीवा नड्डुम पेद्दा-पेद्दा अद्बूताल्क कीता. अद बल्हा? मिमेट मूसाना नियम परकारम पिस्सतिट इंचा? हिल्ले. मिमेट किरिस्तुना बारेमता बेसता कबुर केंजसि दानपोरों विस्वासम कीतिर इंचि अल्हा कीता.

6 दर्मसास्त्रमते वेहताप, अब्राहाम पेनदा पोल्ले केंजसि विस्वासम कीतोर, * इंचि पेन ओन नीतिमंतुड इत्ता. इदगुडा अल्हेन आंद.

7 अदुनहाटीं बोर अय्ते पेनदापोरों विस्वासम इरंतोर, ओर अब्राहामुना निजमाता वंसमतोर आंदुर, इद मीकु तेळियगोम.

8 यहूदि आयवोर अंटोर्कुन पेन ओरा विस्वासमतुन ह्ळसि नीतिमंतुल्क कीता इंचि दर्मसास्त्रमते रासि मंता. इदुना बारेमते पेन अब्राहामुंक, “अन्नि जातिनोर्कुंक नीवाहेंदाले आसिर्वाद दोर्कता,” * इंचि मुन्नेन वेहचि मत्ता.

9 इंचि अब्राहामुनलेसीं पेनदा पोल्लेपोरों बोर अय्ते विस्वासम इरंतोर, ओन्के अब्राहामुंक दोर्कताप पेनदाहेंदाल आसिर्वाद दोर्कता.

10 गानि बोर अय्ते मूसाना नियमतुन नम्मिसि मनंतोरो, ओन्क सिराप सापनेमे दोर्कता. बारित्ते, “मूसाना नियमते रासि मत्ता अन्नि नियमकुन अन्नि वेलाते बरोबर पीसि ताकवोर अंटोर्क पेनदा सापनेम दल्यंता, *” इंचि दर्मसास्त्रमते रासतद मंता.

11 दीनहेंदाल इंदके मनाकु तेळियता गदा, मूसाना नियमतुन पीसि ताकानोर बोरे पेनदा मुन्ने नीतिमंतुड आयोर. बारित्ते, “पेनदुन विस्वासम कीसि नीतिमंतुड आतोरे पिसनुर,” * इंचि दर्मसास्त्रमते रासि मंता. *

* 3:6 उत्पत्ति 15:6 * 3:8 उत्पत्ति 12:3 * 3:10 व्यवस्ताविवरन 27:26 * 3:11 पेनदुन विस्वासम कीसि नीतिमंतुड आतोरे पिसनुर पेनदापोरों विस्वासम इरसि बोर अय्ते नीतिमंतुड आंतोर, ओन्के बस्केळ्ळक पिस्सना पिस्वर दोर्का.

* 3:11 हबक्कुक 2:4

12 इगे मूसाना नियम आनि विस्वासमकु बतले संबंदम हिल्ले. बारिल्ले, “बोर अयते अवुन पीसि ताकंतोर, ओर अवुनतोने पिसंतोर,”[☆] इंचि दर्मसास्त्रमते रासि मंता.

13 “मराकु वेलाड वाटता हरेक मनकल सापनेम दलगतोर,”[☆] इंचि दर्मसास्त्रमते रासतद मंता. अदुनहाटी मूसाना नियमहेका मनाकु दलगता सापनेमतुन किरिस्तु कुद्दु येतकुत्तोर. इल्हा किरिस्तु सापनेम दलगतोर आसि मनाकुन आ सापनेमताल कापाळतोर.

14 अब्राहामुंक पेन हीता आसिर्वाद येसु किरिस्तुनहेंदाल यहुदि आयबोर्कगुडा दोर्कना इंचि किरिस्तु मनाकुन पिसागोटतोर. दीनहेंदाल मनम ओनपोर्रो विस्वासम कीसि पेन हीता पोल्ले परकारम पवित्र आत्मातुन दोर्किचकुना परंतोम.

मूसाना नियम आनि पेनदा पोल्ले

15 अयते विस्वासुल्लकुनिटा! मना रोजता पिस्वरताल उंदि पोल्ले नना मीकु वेहांतन. अद बतल इत्ते, मनकालोरा नड्डुम आता करारतुनगुडा, “इद करार ताको, हिलाकोटे इदुन बदलांचा पीता,” इंचि मनम इना परोम.

16 अल्हेन अब्राहाम आनि ओना वंसंमतोनतोनि पेन कीता करारता बारेमते मंता. गानि दर्मसास्त्रमते, “वंसंमतेोर्क” इंचि रासि हिल्ले. अगा अल्हा रासि मंचि मत्ते वेल्लेन मंदिताहाटी आसि मनवळ. गानि अल्हा रासाकोटा वरोनाहाटी इत्ताप, “नीवा वंसंमतोन्क” इंचि रासि मंता. आ वरोर इत्ते किरिस्तु आंदुर.

17 इंदके इदुन बेस केंजाट! नालुं न्हकुना मुप्ये वर्साना पज्जो वाता मूसाना नियम, पेन मुन्नेन कीसि मत्ता करारतुन बल्हा बदलांचा परंता? बदलांचा परो. अदुनहाटी अद इंदकेगुडा ताकसंता.

18 ओक्कला वारसान हक्क गिंटा मूसाना नियमतुन पीसि ताकताहेका दोर्कता इनानयते, अद पेन हीता पोल्ले परकारम दोर्कतद आयो. गानि अब्राहामुंक अयते अद पेन हीता पोल्ले परकारमे दोर्कता.

19 अयते मरि पेन मूसाना नियमकु बारि हीता इंतोर? पेन अब्राहामुनतोनि उंदि करार कीता. अद करार परकारम ओना वंसंमताल वरोर वायनद मत्ता. ओर वायनजेम पापम इत्ते बतल मनाकु तेळियनाहाटी पेन अव नियमकु हीता अचोने. पेन ई नियमकुन दाना दूतानहेंदाल मूसाना कय्दुक हीता. बारिल्ले मूसाल पेन आनि लोकुल्लकुनाहाटी नड्डुम मनकल मत्तोर.

20 इव्वुर्कुन कल्पालय नड्डुमतोना अक्सरम मनंता. गानि इगे पेन सीदा अब्राहामुनतोनि करार कीता.

मूसाना नियमते पिस्वर हिल्ले

21 अयते मरि मूसाना नियमकु पेन हीता पोल्लेना विरोदमते मंतंगा? असले हिल्लें. ओक्कला मूसाना नियमकु पिस्वर हियानव अयते, मनम अवुनतोने नीतिमंतुल्लक आसि मन्नेरम.

22 गानि दर्मसास्त्रम अयते, “पूरा दुनिया पापमते दोहिचि मंता,” इंचि वेहंता. अल्हा बारि आता इत्ते, हीता पोल्ले परकारम दोर्कना आसिर्वाद, येसु किरिस्तुनपोर्रो विस्वासम कीतोर्के दोर्कना इंचि.

23 गानि येसु किरिस्तुनपोर्रो विस्वासम कियना कालम वायका मुन्ने मनम मूसाना नियमकुने दोहिचि वाटताप मत्तोम. इंदके बोर मनकल अयते अव नियमकुने दोहिचि वाटताप मंतोरो, ओर येसु किरिस्तुनपोर्रो विस्वासम कीसि अव नियमकुनाल पलाते अर्रा परंतोर इंचि पेन मनाकु हुपिस्ता.

24 इत्ते मनम किरिस्तुनपोर्रो विस्वासम कीसे नीतिमंतुल्लक आयना इंचि, ओर वायनदाका मूसाना नियमकु मनाहाटी वरोर बेस ऊळगेम कियानोन लेहका मनाकुन किरिस्तुक दग्गेरा कियना कबळ कीसेक मत्तां.

25 इंदके किरिस्तुन विस्वासम कियना कालम वाता, अदुनहाटी मनाकु मूसाना नियमता कय्दा हिळु मनना अक्सरम हिल्ले.

26 येसु किरिस्तुनपोर्रो विस्वासम कीताहेका मिमेट अंतोर इंदके पेनदा पिलाळक आतिर.

27 अद बल्हा इत्ते, बोर अय्ते किरिस्तुना पोरोल्ते बापतिस्मा येतंतुरो, ओर अंतोर किरिस्तुने कलियसोत्तुर.

28 इंदके यहुदि, युनानि, जीतागाड, मालक, मांड्सा, मुरतळ इल्हा बतले परक हिल्ले. किरिस्तुने मिमेट अंतोर उंदे.

29 मिमेट किरिस्तुना लोकल्क आतिर, इत्ते अब्राहामुना वंसमतोर आंदिर. दीनहेंदाल पेन अब्राहामुंक हीता पोल्ले परकारम, पेन ओन्क हियना आसिर्वादाता वारसदार्कगुडा आंदिर.

4

मनम दासुल्क आयोम पेनदा मर्कुम

1 नना वेहानद बतल इत्ते, वारसदार बदवेरादाका सिन्ना पेडल मनंतोर, अदवेरादाका ओर लोता मालक आसिगुडा जीतागानलेसीं मनंतोर.

2 इत्ते, बाबो निरनायम कीता वेला एवनदाका ओर ओन कापाळनोरा आनि दनमता देकरेक कियानोरा कयदा हिळु मनंतोर.

3 अल्हेने मनमगुडा सिन्ना पेडनलेसीं तेळियवोर्कुम मत्तस्के, दुनियाता नियमकुने दोहचि वाटताप अवुना दासुल्क आसि मत्तोम.

4 गानि बस्के अय्ते पेन निरनायम कीता वेला एवता, अस्के दाना मर्रिन ई दुनियाते लोहता. ओर मूसाना नियम परकारम ताकानोरा लोप्पो उंदि मुरतटा पीटे पुटतोर.

5 बारिल्ले, मनम पेनदा पिलाल्क आयना इंचि, मूसाना नियमकुने दोहचि वाटताप मत्ता मनाकुन लेहलाये पेनदा मर्रि वातोर.

6 मनम पेनदा पिलाल्क आताहाटीं अद मनालोप्पो दाना मर्रिना आत्मातुन लोहता. अद आत्मा मनालोप्पो मंचि पेनदुन, “बाबा! बाबा!” इंचेके केयसेक मंनता.

7 अदुनहाटीं मिमेट इंदके दासुल्क आयिर, गानि पेनदा मर्क आंदिर. मिमेट मर्क आताहाटीं पेन मीकुन दाना वारसदार्कगुडा कीता.

पेनदुन एरपाट कीसि ताकाना

8 दीनकन्ना मुन्ने मिमेट निजम पेनदुन एरपाट किया हिल्लिर, अदुनहाटीं अट्टि पेनकुना कयदा हिळु मत्तिर.

9 गानि इंदके पेनदुन एरपाट कीतिर. निजम हळते पेने मीकुन एरपाट कीता. अदुनहाटीं मिमेट दुनियातां अंगळमतव रीति-रिवाजकुने पजोळ्क बारि होंचंतिर? मर्रा मीकु अवुना कयदा हिळे मनना मंताना?

10 मिमेट रोजकु, नेलां, कालाल्क, वर्सा इवुन नोमसेक मंतिर.

11 नना मीवाहाटीं कीता कस्टम वट्टिदे आंता बारे इंचि नाकु मीवा बारेमते वेरिं वस्सेक मंता.

12 विस्वासुल्कुनिटा, नना मीलेसीं नियमकुन नोमवोन आतन, मिमेटगुडा नावालेसीं आम्टु, इंचि मीकुन विनंति कीसेक मंतन. इदवेरादाका मिमेट नापोर्रीं बतले अन्यायम किया हिल्लिर.

13 मुन्नेटा मल्का नना वातस्के, ना जीवा बेस मनाहिल्ले, अस्के मीकु किरिस्तुना बेसता कबुर वेहतन. अद मीकु एरपाटे.

14 ना जीवा बेस हिल्वका मीकु कस्टम आयिनागानि मिमेट नाकुन सिन्ना हळ्वा हिल्लिर, बेस हळतिर. नाकुन पेनदा दूतालेसीं, येसु किरिस्तुनलेसीं बेस हळतिर.

15 नना निजम वेहंतन, अद वेलाते ना सेवाहाटीं नाक कळ्दा अक्सरम मंचि मत्ते, कळु इंका तेंडसि हियालय मिमेट तयार मत्तिर. अच्चोन नावापोर्रीं पावरम कियिंदिर इंचि नना वेहा परांतन, अय्ते अद कुसि इंदके बेके होत्ता?

16 नना मीवातोनि निजम वळ्कताहाटीं मीकु पगातोन आताना?

17 आबद्दम पोल्लें कराहनोर मीकुन ओरा पट्टुने अरहालय वेल्लेन कोसिस कीसेक मंतुर. ओरा अद कोसिस मीवा बेसताहाटीं आयो गानि मिमेट ओरा लोप्पो कलियसि मंचि मावाहेंदाल अलग आयना इंचि ओरा विचारम मंता.

18 नना मिहगा मनिना, हिलाकुना गानि बस्केळ्ळक बोरन्ना बेसता पोल्लें कराहते वेल्लेने कुसिते ओना पज्जो होनना.

19 ना पिलाल्कनिटा, मीकु बदवेरादाका किरिस्तुनलेसीं गुनम वायोनो अदवेरादाका, एरपूरनेके बल्हा नोप्पि वांतंगो अल्हेने नना मीवाहाटीं मर्रा उंदि मल्का तकलिपि अरसेक मंतन.

20 मीवा बारेमते नना बतल कीकन नाक तोससेक हिल्ले. अदुनहाटीं इंदके नना मिहगा वासि, मीतोनि वैरे तरिकाते वळ्ळकना इंचि नावा आसे मंता.

21 मूसाना नियमते ताकंतोम इननोर्कुन नना पूसकींतन, अवने बतल रासि मंता मीकु एरपाट मंताना?

22 अब्राहामुंक इव्वुर मर्क मत्तुर, वरोर दासिदानकु पुटोर, इंकावरोर बारे ओना मरमिना मुत्तोंक पुटोर, इंचि दर्मसास्त्रमते रासि मंता.

23 दासिदानकु पुटता पेडल इस्माइल, मनकना विचारमताल पुटोर. आनि मरमिना मुत्तोंक पुटता पेडल इसाक बारे पेन हीता पोल्ले परकारम पुटोर.

24 इव पोल्लें उंदि उदाहरनलेसीं मंतां. इव रोंड मुत्तोहकु इत्ते, पेन लोकुलकुनतोनि कीता रोंड करारकुनालेसीं मंतां. उंदि करार इत्ते सिनाइ गुट्टाता* करार आंदु. ई करारता हेंदाल पुटता पिलाल्क, हाजिरानालेसीं दासुल्क आतुर.

25 हाजिरा अरब देसेमता सिनाइ गुट्टालेसीं मंता इनकुट्ट, हाजिरा आनि दाना मर्कगुडा सिनाय गुट्टातगा हीता आ नियमकुना कय्दा हिळे मंतुर, अदुनहाटीं हाजिरा इत्ते इंदकेटा येस्सलेमतोरलेसीं आंद.

26 गानि स्वर्गमता येस्सलेम बारे मरमिना मुत्तो सारानालेसीं मंता, अद मना विस्वासुल्कुना तल्लुर आंदु.

27 दर्मसास्त्रमते इल्हा रासि मंता:

“गोड्डुमुर्गा मुरतटुना! निमे बोर्कुन कना हिल्लिन, निमे कूस आम.

एरपूराना तकलिपि आयवादाना, निमे कुसिते केया.

बारित्ते मुय्दो मत्ता मुरतळ्ळकन्ना, मुय्दो होळ्ळसीता मुरतळ्ळे वेल्लेटुर पिलाल्क मंतुर.”*

28 अदुनहाटीं विस्वासुल्कुनिटा, मनम मनकल विचारम कीताप आयो गानि पेन करार कीताप इसाकुनालेसीं दाना मर्क आतोम.

29 अस्के मनकना विचारमते पुटोर, पेन करार कीता परकारम पुटतोन बल्हा तकलिपि कियुंदुरो अल्हेने इंदकेगुडा जर्गसेक मंता.

30 गानि दर्मसास्त्रमते बतल रासि मंता? “दासिदानकु पुटता मर्रिक, मरमिना मुत्तोंक पुटता मर्रिनतोनि वारसान हक्क दोर्का परो. अदुनहाटीं दासिदान दाना मर्रिन पलाते पेचहट!” इल्हा रासि मंता.

31 अदुनहाटीं विस्वासुल्कुनिटा, मनम दासिदानोर्कुम आयोम गानि मरमिना मुत्तोना पिलाल्कुम आंदुम.

5

यहूदि आयवोर्क कतनाता अब्सरम हिल्ले

1 मनम नियमकुना लोप्पो दासुनलेसीं मनमान्नि इंचि किरिस्तु मनाकुन अवेटाल इळबळिस्तोर. अदुनहाटीं विस्वासमते गट्टिगा मंटु, मिमेट नियमकुना बर्वु दासुल्कुनलेसीं मर्रा कांजमटु.

* 4:24 सिनाइ गुट्टा इदे गुट्टातगा इषाएल लोकुलकुंक पेन पदि पोल्लें हीता. ☆ 4:27 यसायाह 54:1

2 केंजाट, नना पौलसून मीकु वेहसेक मंतन, मिमेट कतना कीसि दर्मसास्त्रमता नियम मत्ताप ताकंतोम इनानय्ते, मीकु किरिस्तुनाहेंदाल बतल पाय्दा आयो.

3 सिराप कतना कीकुत्तेने पेनदा मुन्ने नीतिमंतुड आंतन इंचि इनकुंचि कतना कीतोर मूसाना पूरा नियमकु मत्ताप ताका पीता, इंचि नना मीकु मरा उंदि मल्का वेहासेक मंतन.

4 मी लोप्पोटाल बोर अय्ते मूसाना नियम मत्ताप ताकसि नीतिमंतुल्क आंतोम इंचि इनकुंचेके मंतरि, मिमेट किरिस्तुनाल अलग आतिर, ओना कुर्पाताल लक्कु आतिर.

5 बारित्ते मनम विस्वासमताहेंदाल पेनदा मुन्ने नीतिमंतुल्क आतोम इंचि आसे इरतोम. अदे आसेताहाटीं आत्मा बलमते दाना एदुर ह्ळसेक मंतोम.

6 येसु किरिस्तुनलोप्पो कतना कियिना, कतना कियाकोन्ना अद बाता कबळतद आयो, गानि पावरमते कबळ कियना विस्वासमे कबळतद आंद.

7 मिमेट मुन्ने बरोसाते बेस बेरस्सेक मत्तिर. गानि इंदके मीकुन बोरो आपसेक मंतुर, इंचि सल्टेम हर्दे ताकसेक हिल्लिर.

8 इद आपाना कबळ मीकुन केयता पेनदद आयो.

9 वेल्लेने बेस पिंडिते इच्चुर पुल्लाटा पिंडि वाटते, पूरा पिंडितुन पुल्लागा कीसि पोहंता इद मनाकु एरपाटे.

10 नना कराहता निजम पोल्लें मत्ताप मिमेट ताकंतिर इंचि नाकु सामिनाहेंदाल पूरा बरोसा मंता. मीवा विस्वासमतुन तप्सानोर बोरन्ना आयिर ओर्क तप्पाकोंटा सिक्सा दोर्कता.

11 विस्वासुल्कुनिटा! ननागिंटा कतना कियना इंचि वेहासेक तिरियसि मत्ते, नाकुन यहुदिल्क वेल्लेन तकलिप कियाकोन्नेर, येसु सामि कूसुनपोर्री हीता मोक्कुता हेंदाले बस्केळ्क पिस्सना पिस्वर मंता इंचि वेहताहेंकेन ओर्क होंग वाता.

12 मीकुन कतना कियागोम इंचि तिप्पल्क कियानोर, कुद आडिगुनलोरलेसीं आते बेस मंन्ता.

पेनदा आत्मा वेहताप ताकाना

13 गानि विस्वासुल्कुनिटा! पेन मीकुन नियमकुना लोप्पोटाल इळबळिस्ता. अदुनहाटीं नना वेहासेक मंतन, मिमेट मीवा पापि विचाराल्कुन पूरा कियालय मीकु विचारम वाताप ताकानायो गानि पावरमते वरोंक-वरोर सहायम कीसेक मंदना.

14 बारित्ते मूसाना अन्नि नियमकु उंदे आदेसते कलियसि मंतां. अद बतल इत्ते, “मीवद मिमेट बच्चोन पावरम कीकुंतिर, अचोने पावरम इंकावरोनगुडा कीम्टु.”

15 गानि मिमेटगिंटा नय्कु बल्हा उंदांक-उंदि कस्कसेक, इग्गिस तिचेके मंन्तंगो अल्हा मनानय्ते उसारते मंटु! उंदि रोज मिमेट वरोनहेंदाल वरोर नासडेम आया परातिर.

16 नना वेहानद बतल इत्ते, पेनदा आत्मा मीकुन ताकिस्ताप ताकट, अल्हा ताकते मीवा मनसुना पापि विचाराल्कुनाल लक्कु मंन्तिर.

17 बल्हा इत्ते, मनकना पापि विचाराल्क, पेनदा आत्माता विचाराल्कुंक अड्डम मंन्तां अल्हेन पेनदा आत्माता विचाराल्क मनकना पापि विचाराल्कुंक अड्डम मंन्तां. इव रोंडुना विचाराल्क बस्केने कलियों. अदुनहाटीं मिमेट बतल अय्ते कीतोम इतिर, अद किया परिर.

18 गानि मिमेट पेनदा आत्मा ताकिस्ताप ताकते, मिमेट मूसाना नियमकुना कय्दा हिळु हिल्लिर.

19-21 मनकना पापि कबाहक मनाकु एरपाटे मंतां. अव इव आंदुं: बोगमतनम, अपवित्र कबाहक, सिग्गु हिल्वा कबाहक, बोम्मा पूजें, होदें, वरोंक-वरोर हय्साकोंटा मनमळ, जगडाल्क, कळ्क पोत्तमळ, होंग, नाके गावाले इनमळ, लोक्कुना नड्डुम पुटपाट कियमळ, वैरे गेंग तयार कियमळ, कल्लु उनमळ, विद्दुरतनम इसोंटव इंका वेल्लेन पोल्लें मंतां. इसोंटा कबाहक कियानोर पेनदा राज्यमते वारसदार आया पस्स. इद पोल्ले नना मीकु मुन्नेने वेहतन, अल्हेने इंदकेगुडा वेहासेक मंतन.

22 पेनदा आत्माता कबाहक इल्हा मंतां: पावरम कियमळ, कुसिते मनमळ, सांतिते मनमळ, ओपके पीसि मनमळ, दया कियमळ, मंचितनम, इमानदारते मनमळ, मेल्लगा मनमळ, बसोंटा परिकसा वायिनागानि अब्दे अर्काकोटा सततुन आपकुनमळ.

23 इल्हा ताकते इवुंक अड्डम बदे नियम हिल्ले.

24 बोर अयते येसु किरिस्तुन विस्वासम कीतोर मंतुर, ओर ओरा पापि विचाराल्कुन, पापि आसेन कूसुनपोरो वेल्लाड वाटताप अवुंक लक्कु आतुर.

25 मनमर्गिटा पेनदा आत्माते पिसानयते, आत्मा वेहतापे ताककोम.

26 इंकावरोर होंगुंक वायाकोटा, गरी कियाकोटा, कळ्ळ पोततकोटा मनम मंदकोम.

6

वरोक वरोर सहायम कीम्टु

1 गानि विस्वासुल्कुनिटा! मीलोपपो बोरन्ना पापम कीते, पेनदा आत्माते ताकानोर मिमेट होंगुंक वायाकोटा ओनगा होंचि ओन बेस समजांचि, सत्तेम हर्दे तट्ट. अल्हेने मिमेटगुडा असोंटा परिकसाते अर्गामनि इंचि, उसारते मंटु.

2 मिमेट तकलिपते वरोक-वरोर सहायम कीम्टु, अल्हा कीतेने किरिस्तु हीता नियमतुन पूरा किया प्रांतिर.

3 बारित्ते, बोरे आयिर पेद्दातनम हिलाकुना गानि पेद्दातनम हुप्संतुर, असंतोर ओरद-ओरे पसांचकुंचेके मंतुर.

4 हरेक मनकल ओना सतता कबाहकुन कुद्दु परिकसा कीसि हळना, वैरेतोना कबाहक बल्हा मंता इंचि हळना आयो. अस्के ओना कबाहक बेस मत्ते ओर सतता कबाहकुन हळसि कूस आयावच्चु.

5 बारित्ते बोरे आयिर, ओना जिम्मेदारि ओरे एतमळ गावाले.

6 बोर अयते पेनदा पोल्ले करियतुर, ओर अन्नि बेसता वस्तुक ओन्क कराहतोंक पंचि हियमळ गावाले.

7 पेनदुक बतल तेळियो इंचि नाळेम कीसि पसांचमट्ट, मिमेट बवयते वीतकिर, अवने कोयकिर.

8 बोर अयते ओना पापि गुनम वेहताप वीतंतोर, ओर नासडेमता पंटा कोय्यंतोर. गानि बोर अयते आत्मा वेहताप वीतंतोर, ओर आत्माताहेंदाल बस्केळ्ळ पिस्सना पिस्वरता पंटा कोय्यंतोर.

9 मनम उंदेतीर बेसता कबळ कीते, पेन निरनायम कीता वेला एवतस्के मनाकु दाना पायदा दोर्कता. अदुनहाटीं मनम नेरबळाकोटा बेस कबळ कियाना.

10 अयते मरि, मनाकु बल्हा मोका दोर्कते अल्हा अंतोराहाटीं, एककोते-एक्को मना विस्वासुल्कुनाहाटीं बेस सहायम कीकोम.

सिट्टिटा आकिर पोल्लें

11 हुळाट, इद सिट्टि पेद्दा-पेद्दा अक्सराल्कुने नावा कयदे मीकु रास्संतन.*

12 नालुरा मुन्ने नना बेसतोन इंचि हुप्सानोर, ओरे मीकुन कतना कियागोम इंचि बल्मि कीतुर. इल्हा बारि कीतुर इत्ते, किरिस्तुना कूसताहेंका वायाना तकलिपताल तपिच्चुननाहाटीं ओर इल्हा कीतुर.

13 बोर अयते कतना कीसि मंतुर, ओरगुडा मूसाना नियमते ताकुर. गानि ओर वेहताप मिमेट कतना कीते ओर्क पेद्दातनम दोर्कता इंचि, ओर मीकु इल्हा वेहांतुर.

14 गानि नना अयते, मना सामि येसु किरिस्तु कूसुनपोरो हातोर इंचि विस्वासम कीतन, दीन पोर्ने नाकु पूरा विस्वासम मंता. आ कूसुनहाटींगे दुनियाता पोल्लें नाक कलियो, नावा पोल्लें ओर्क कलियो.

* 6:11 पौलस सिट्टिं रासानेके कुद रासाकोंदुर गानि इंकावरोनतोन रासा वेहुंदुर. अद सिट्टि ओरे रासतोर इत्ताप मनना इंचि आकिर पोल्लें मात्रम ओर कुद रासुंदुर. इल्हा ओनद उंदि रिवाज मत्ता.

15 बारित्ते कतना कियिना, कतना कियाकोन्ना बतल पायदा हिल्ले. पेन मनालोप्पो पूना पिस्वर हीता अदे पायदातद आंदु.

16 अदुनहाटी, बचुटुर अय्ते ई नियमते ताकंतुर अचटूर्कुंक आनि पेनदुन विस्वासम कीता अंतोर इम्राएल लोकुकुंक सांति, दया दोर्किकांटी.

17 इंदकेटाल आबद्दम कराहना पोल्लें केंजसि मिमेट नाक मर्रा तकलिप हियमटु. येसु सामिना पोल्लें वेहताहाटीगे नना नावा मेंदुलपोर्री देब्बाना बर्ी पीसि तिरियसेक मंतन.

18 विस्वासुल्कुनिटा! मना सामि येसु किरिस्तुना कुर्पा मी अंतोरतोनि मन्निकांटी. आमीन.

इपीसि

इपीसि विस्वासुल्लुकंक पौलुसना सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 60

पौलुस इद सिट्टितुन जेलने मत्तास्के रासतोर. पौलुस येसुना बारेमता बेसता कखुर वेहालय रोंडो मल्का पय्नेम होत्तास्के ओर ई इपीसि सहरतेगुडा होंचि मत्तोर. ओर ई सहरते मोदाला होत्तस्के वेल्ले रोजकु मनाहिल्लोर गानि ओना मूडोव मल्का पय्नेम होत्तस्के अगा कोन्नि वर्सनदाका मत्ताप प्रेरितुल्लुकुना कबाहक पुस्तकमते मनाकु तेळियसि दांता.

पेनदा लोप्पो अंटोर विस्वासुल्लुकु उंदासि पेनदा उदूदेसमतुन एरपाट कीसि पिसागोम, अल्हेने कलिसिया इत्ते उंदि मेंदुललेसीं मंता. दान्क किरिस्तु तल्लालेसीं मंतोर. अय्ते मनम विस्वासुल्लुकुम आ मेंदुल्ला बागाल्कुम आंदुम. मेंदुल्ला बागाल्क बल्हा उंदान्क-उंदि बेस कलियसि मनंतंगो अल्हेने मनमगुडा मत्ते, पेन दाना उदूदेसम परकारम मनाकु पिस्वरतुन हींता. पेनदा पोल्लेतुन इपीसि सहरता विस्वासुल्लुकुंक वेहनाहाटी पौलुस इद सिट्टि रासतोर. अचोने आयाका वरोर विस्वासि किरिस्तुना लोप्पो बल्हा मनना, मुत्तो-मुय्दो, मालक-दासुड, तल्लुर-बाबो मर्क-मियाहक बल्हा मनना इवन्नि अवसरमाता पोल्लेगुडा पौलुस इद सिट्टिते रासतोर.

बगा बतल मंता

जोहार आनि परिचयम 1:1-2

किरिस्तु आनि कलिसिया 1:3-3:21

किरिस्तुन विस्वासम कीसि दुनियाते पूना पिस्वर पिसमळ 4:1-6:20

आकिरता बोदां 6:21-24

जोहार

1 नना पौलुसुन, पेनदा इच्चा परकारम, किरिस्तु येसुना प्रेरितुन आतन. इपीसि सहरते मनना किरिस्तु येसुन विस्वासम कियाना पेनदा लोकुल्लुकुंक नना इद सिट्टि रासेक मंतन.

2 मना पेनबाबानहेंदाल आनि सामि येसु किरिस्तुनाहेंदाल मीकु कुर्पा, सांति दोर्किकांटी.

किरिस्तुनहेंदाल दोर्काना आसिर्वाडाल्क

3 मना सामि येसु किरिस्तुना पेनबाबांक दन्यवाद. ओर किरिस्तुनाहेंदाल, मना बक्तिकु संबदिस्तव स्वर्गमते मनना अन्नि आसिर्वाडाल्क मनाकु हीसीतोर.

4 अद बल्हा इत्ते, मनम पेनदा नदरते पवित्र आनि दोसेम हिलाकोटा मंदना इंचि, पेन ई दुनियातुन पुट्सकामुन्नेन अद मनाकुन किरिस्तुना लोप्पो पेरकुत्ता.

5 पेनदा पावरमता पिलान परकारम, येसु किरिस्तुनाहेंदाल मनम दाना पिलाल्क आयाना इंचि अद मनाकुन मुन्नेन पेरता. ई पिलान पेनदा इच्चा परकारम मत्ता इंचि पेनदुकु इल्हा कियमळते कुसि दोर्कता.

6 दाना पावरमगल्ला मरिं मनाहाटी कीतदुन पीसि, अद मनापोर्रो लेक्का परवचचोन कुर्पातुन पुक्कटते कुम्मरिच्ता. अदुनहाटीं मनम पेनदा महिमाता स्तुति कीकोम.

7 किरिस्तु ओना सतता नेत्तुरतुन पोंगागोटताहेंका मना पापाल्क मापि आसि मनाकु मुक्ति दोर्कता. इल्हा पेन दाना वेल्लेन कुर्पातुन मनापोर्रो कुम्मरिच्ता.

8 अद मना बुदिदक, तेल्विक हालानाल दाना दया हियमळ जर्गता.

9 पेन मुन्नेने निरनायम कीता, दाना इच्चा परकारम मत्ता मर्ममता पिलानतुन, मनाकु किरिस्तुनाहेंदाल कुल्ला कीसि वेहता.

10 अद बतल इत्ते, पेन दाना पिलान परकारम इन्कुत्ता वेला एवतस्के, स्वर्गमते मत्तव, बूमिपोर्रो मत्तव अन्निगुडा उंदगा कीसि अवुन किरिस्तुना अदिकारम हिळु हियमळ गावाले.

11 पेन अन्निटवुन दाना इच्चा मत्ताप पिलान कीसि ताकसंता. अदे पिलान परकारम मनाकुन पेनदा लोकुल्क इंचि मुन्नेने किरिस्तुना लोप्पो पेरमळ जर्गता.

12 मनम बोर अय्ते मुन्नेटाले किरिस्तुनपोर्रो आसे इरतोम, दाना महिमातुन तल्सकुनागोम इंचि दाना विचारम मंता.

13 मीकु मुक्ति हीता बेसता कबुर सत्तेम आंद अदुन मिमेटगुडा केंजतिर. केंजसि किरिस्तुना लोकुल्क आयानाहाटी ओनपोर्रो विस्वासम इर्तिट. अस्के पेन हीता पोल्ले परकारम पवित्र आत्माता सिक्का मीपोर्रो वाटमळ जर्गता.

14 पेन बोर्कुन अय्ते अस्कुत्ता ओरा मुक्तिहाटी, दाना पवित्र आत्मातुन वारसान हक्कता उंदि इसारालेसी मनागा इरता. अदुनहाटी लोकुल्क दाना महिमातुन तल्सकुंतुर.

इपीसि विस्वासुल्कुनाहाटी पौलुसना पारतना

15-16 अदुनहाटी बस्केटाल अय्ते नना, सामि येसुना पोरोटा मीवा विस्वासम बारेमते आनि पवित्र लोकुल्कुन मिमेट बेस पावरमते ह्ळांतिर इत्तदुना बारेमते केंजतन, अस्केटाल नना नावा पारतनाते मीकुन मति कीसेके, मीवाहाटी पेनदुक बस्केळ्ळक दन्यवाद वेहासेक मंनंतन.

17 अचोने आयाका मना सामि येसु किरिस्तुना पेन, इत्ते महिमाते निडिस मत्ता पेन बाबल, ओना बारेमते मिमेट इंका बेस एरपाट कियानाहाटी ओना पवित्र आत्माहेंदाल मीकु बुद्दि आनि बेस तेल्पिचकुननाहाटी तेल्वि हिथ्यिर इंचि पारतना कीसेक मंनंतन.

18 अल्हेने, पेन मीकुन बद आसेताहाटी केयता? दाना पवित्र लोकुल्कुंक अद हिथ्याना वारसानहक्कताल दोर्काना महिमाता दनम बल्हा मंता? इदुना बारेमते तेळियानाहाटी मीवा मनसुना वेळसि एल्गागोट्टि.

19-20 अचोने आयाका किरिस्तुन हामुरताल मर्रा जीवाते तेहाचि स्वर्गमते दाना तिना बाजुंक उपिचनेके पेन दाना पेद्दा ताकततुन हुपिस्ता. अय्ते मनम किरिस्तुन विस्वासम कियानोरम उंदि आयालयगुडा अदे पेद्दा ताकत दानागा मंता. पेनदा ताकत बस्केन मारो, इदुन पेन मीकु तेळियागोट्टि इंचि नना विनंति कीसेके मंनंतन.

21 इद कालमतेन आयो गानि, मुन्ने वायाना कालमतेगुडा किरिस्तुनलेसी कदर आनि अदिकारम मत्तोर बोरे मन्नोर. इल्हा किरिस्तु दुनियाते मनना राज्येम कियाना अदिकारिल्क, वैरे अदिकाराल्क, कळ्ळुकुंक दिस्सुवव अन्नि ताकतकु आनि इंका अन्निटवुंकुन्ना पेद्द दौड आंदुर.

22 पेन इव अन्निटवुन किरिस्तुना कालकुना हिळु कीसि, इव अन्निटवुनपोर्रो ओन्क अदिकारम हीता. हीसि ओरे अन्निटवुना मुक्यल आयागोम इंचि ओन कलिसियाकु हीसीता.

23 कलिसियातोर इत्ते किरिस्तुना मेंदुल आंदुर. ओना मेंदुलतुन ओर अन्नि तीरकुने, अन्नि पोल्लेने पुरागा निह्चि अन्निटतुन पुरागा कियानोरगुडा ओरे आंदुर.

2

पेनदा दयातेन मुक्ति दोर्कता

1 मुन्ने मिमेट तप्पु कबाहक कीसि, पापाल्क कीसि आत्माते हासि मत्तिर. गानि मीकुनगुडा किरिस्तु जीवाते तेहातोर.

2 मिमेट मुन्ने इद दुनियातोर ताकाना रीति-रिवाजकुन पीसि ताकिदिर. पोरो वळिते तिरियना देय्यालकुना मुख्यल बल्हा ताकिस्ते अल्हा ताकिदिर. इंदकेळकगुडा पेनदा पोल्ले परकारम ताकवोर लोप्पो अद आत्मा कबळ कीसेके मंता.

3 मनम अंटोरमगुडा मुन्ने मना मेंदुल्ला आसेन परकारम पिस्सुंदुम, मेंदुल आनि मनसुना इच्चां पुरागा कियानाहाटीं कराब विचाराल्क कीसेके, ओरा नड्डुम ओरालेसीं ताकतोरमे आंदुम. पेनदुन बरोसा कियवोरा गुनम मत्ताप मना गुनमगुडा मत्ताहेंका, मनम पेनदुक होंग वायाना पिस्वर पिस्सेक मत्तोम.

4 गानि पेन बच्चोने दयागल्लद आंद, अद दाना पेद्दा पावरमते मनाकुन पावरम कीता.

5 मनम तप्पु कबाहक कीसि हासि मत्तास्के मनाकुन अद किरिस्तुनतोनि जीवाते तेहाता. पेन कुर्पा कीताहेंकेन मीकु मुक्ति दोर्कता.

6 अचोने आयाका किरिस्तु येसुनतोनि मनाकुन जीवाते तेहाचि, स्वर्गमते ओनतोनि मनाकुनगुडा उपिस्ता.

7 इंका किरिस्तु येसुन मनाहाटीं लोहचि मनाकुन वेल्लेन पावरम कीता. इल्हा पेन मनापोरो लेक्का हिल्वच्चोने कुर्पा कीता, इदुन वायाना कालमते अंटोर्क हृप्सानाहाटीं पेन अल्हा कीता.

8 पेन कुर्पा कीताहेंकेन मिमेट किरिस्तुनपोरो विस्वासम कीतिर. मीवा विस्वासमतुन पीसि मीकु मुक्ति दोर्कता. इंदंता मीवा कय्दाल जर्गतद आयो गानि पेन हीता वरम आंद.

9 इद कबाहकुनाहेंदाल दोर्कतद आयो, अदुनहाटीं बोरे पोंगुडतनम वेहकुना मन्नि.

10 बारित्ते, पेने मनाकुन पुट्टिस्ता. मनम किरिस्तु येसुनलोप्पो बेसता कबाहक कियाना इंचि अद मनाकुन पुट्टिस्ता. अव बेसता कबाहक बव आंदुंगो अवुन पेन मुन्नेने तयार कीसि इरता.

येसुना लोप्पो मनम अंटोरम उंदे आंदुम

11 मिमेट यहुदि आयवोर इंचि मीवा कतना आयाहिल्ले. गानि बोरद अयते कतना मनकानाहेंदाल आतानो, ओर मोमोट कतना आतोरम, इंचि वेहकुंतुर. मीकुन बारे, कतना आयवोर, इंचि कारेड्डाल्क कीतुर. अदुनहाटीं मिमेट बल्हा मनिदिरो अदुन मति कीम्ट.

12 अद कालमते मिमेट किरिस्तुनलोप्पो कलियका मत्तिर, मिमेट इस्राएल लोकुल्क आयवाहेंका मीकु पेनदा नियमाल्क दोर्का हिल्लें, करार्क कियाना बारेमते पेन हीता पोल्लेताल मीकुन लक्कु इरमळ जर्गता. मिमेट इद दुनियाते बदे आसे हिलुवा, पेन हिलुवा पिस्वर पिस्सेक मत्तिट.

13 मुन्ने मिमेट पेनदागटाल लक्कु मत्तिर. गानि किरिस्तुना नेत्तुरहेंदाल इंदके मिमेट किरिस्तु येसुना लोप्पो पेनदुक दग्गेरा आतिर.

14 बारित्ते, यहुदिल्क आनि यहुदि आयवा मना नड्डुम मनाकुन वेरे कियानाहाटीं पगातद उंदि गूरे मत्ता, अदुन क्लाहचि मनाकुन इव्वुर्कुन कल्पतोर किरिस्ते आंदुर. ओनाहेंदाले मनाकु सांति दोर्कता.

15 यहुदिर्कुन आनि यहुदि आयवोर्कुन इव्वुर्कुनगुडा उंदगा कल्पिसि वरोर पूना मनकन पुट्टिस्ताप, अंटोर्कुन उंदि कीतोर. इल्हा वेरे-वेरे आसि पिसानोर्कुन कल्पतोर. इल्हा ओर्कुन कल्पानाहाटीं ओर ओना मेंदुल्लुन हीसि आदेसाल्कुना बव अयते यहुदिल्कुना नियमाल्क मत्तांगो, अवुन नासडेम कीतोर. आनि मनाकु सांतितुन हीतोर.

16 पजा ओर ओना जीवा कूसुनपोरो हीसि मना नड्डुम मत्ता पगातुन नासडेम कीतोर. इल्हा वेरे-वेरे आसि मत्ता मनाकुन उंदि मेंदुल कीसि पेनदा लोप्पो कल्पतोर.

17 किरिस्तु इद दुनियाते वासि, पेनदागटाल लक्कु आसि मत्ता मीकु आनि दग्गेरा मत्ता ओर्कु सांतिता बेसता कबुरतुन वेहातोर.

18 बारित्ते ओनाहेंदाले मनम इव्वुरमगुडा उंदे पवित्र आत्माते पेनबाबानगा होना परांतोम.

19 अदुनहाटीं मिमेट इंदके परायतोर, वेरे देसेमतोर आयिर, गानि पवित्र लोकुल्कुनतोनि दंटाते कूळसि मननोर आनि पेनदा लोता लोकुल्क आदिर.

20 अचोने आयाका प्रेरितुल्क आनि पेनदा कबुरतोरा पुनादिपोरोँ येसु किरिस्तुन मूला बंडालेसी ईसिँ दोहता लोह्कु मिमेटे आदिर.

21 पूरा लोन ओनाहेंदाले तयार आंता आनि सामिना लोप्पो उंदि पवित्र गुळि आयालय बेरसेकेन होंचंता.

22 अव्टे मिमेटगुडा पेनदा आत्माहेंदाल पेनदुक मनालय उंदि आसि जेगा तयार कीसेक मंतरि.

3

मर्ममते मत्तव पेनदा पोल्लें पलाते अरमळ

1 मिमेट यहुदिल्क आथिर. अयनागानि मीकु किरिस्तु येसुना बारेमता बेसता कबुर वेहताहाटीं नना पौलुस, जेलने बंद मंतन.

2 पेन दाना कुर्पाता बारेमते मीकु वेहना जिम्मेदारि नाकु हीता इंचि मिमेट केंजसे मंदकिट.

3 पेनदा सत्तेम मोदाला मर्ममते मत्ता, गानि अदुन इंदके पेन नाकु बैय्यरा कीसि हूपिस्ता. इदुना बारेमते मीकु नना मुन्ने गिचचचो रासि मत्तन.

4 अदुन मिमेट हदुवकिर अस्के किरिस्तुना बारेमता आ मर्ममता पोल्लें नाक बल्हा तेळियतां इंचि मिमेट एरपाट कीकिट.

5 आ मर्ममता सत्तेमतुन पवित्र आत्माहेंदाल पेन दाना प्रेरितुल्कुंक आनि दाना कबुरतोर्कुंक इंदके बल्हा वेहतानो, अल्हा अस्केटा कालमता लोकुल्कुंक वेहमळ जर्गाहिल्ले.

6 आ मर्ममता पोल्ले बतल इत्ते, यहुदि आयवोर लोकुल्क बेसता कबुर केंजसि किरिस्तु येसुनपोरोँ विस्वासम इरतुर, अदुनहेंदाल ओरगुडा यहुदि विस्वासुल्कुनतोनि कलियसि येसुनगा दोर्काना हक्कुने वारसदार्क आतुर. इल्हा ओर उंदि मेंदुलतोर आनि पेन हीता पोल्लेते हिस्सादार्क आतुर.

7 पेन दाना कुर्पाता वरम परकारम अद नाकु हीता ताकतहेंदाले नना ई बेसता कबुर वेहाना सेवाकुन आतन.

8 पवित्र लोकुल्कुना लोप्पो नना अंतोर्केन्ना सिन्नोन आंदुन. अयना पेन नापोरोँ कुर्पा कीता. अद बतल इत्ते, किरिस्तुनगा लेक्का हिलुवा आसिर्वादाल्क मंतां, अदुना बारेमते यहुदि आयवोरगा होंचि वेहना वरम पेन नाकु हीता.

9 अन्निटतुन पुट्टिस्ता पेन, मोदोलताल मर्ममते ईसिँ मत्ता दाना पिलानतुन बल्हा पुरागा कीता, इत्तदुना बारेमते हेरेक मनकंक कुल्ला-कुल्ला कीसि वेहनाहाटीं नाकुन पेस्ता.

10 इंदके पोरोँ वळिते राज्येम कियाना सक्तिकं आनि अदिकारम ताकिचानवुंक पेन दाना बचुंचुंगो तीरकुना तेळितुन कलिसियाहेंदाल हृप्संता.

11 मुन्नेटाले पेन इल्हा कियाना विचारमते मत्ता. इंदके मना सामि किरिस्तु येसुनाहेंदाल पुरागा कीता.

12 किरिस्तुनपोरोँ विस्वासम इरताहाटीं, इंदके वेरियाकोटा दैरेनेमते पेनदा दग्गेरा होना परीतोम.

13 मीहाटीं नाकु आयाना तकलिपकुन हळसि मिमेट पजोळ्क आयमट इंचि मीकु विनंति कीसेक मंतन. नना अर्रना तकलिपकुनाहेंदाल मीके कदर दोर्कता.

मनसुने किरिस्तु मननाहाटीं पौलुसना पारतना

14 इदुनाहाटीं गें नना पेनबाबाना मुन्ने टोंगरां ऊनसि पारतना कीसेके मंनंतन.

15 सिराप ओनाहेंदाले स्वर्गमते आनि बूमिपोरोँ मनना हेरेक कुटुंबकु पोरोल इरमळ जर्गता.

16 पेनबाबाल ओना वेल्लेन कदरगल्ला महिमाता दनमतुन पीसि, ओना आत्मातोनि मीवा पिस्वरतुन लोप्पोटाल इरगा गट्टिगा किथिर इंचि पारतना कीसंतन.

17 दीनहेंदाल मीवा विस्वासम परकारम किरिस्तु मीवा मनसुने जेगा पीसि मंनंतोर. अस्के मरा हिह्कु बल्हा बूमिने लोप्पोळ्क होंचि मरातुन गट्टिगा पीसि मंनंतंगो, अल्हेन मिमेटगुडा पेनदा पावरमता पुनादिपोरोँ हिह्कुनलेसी गट्टिगा निल्सि मंदकिट.

18 पेनदा लोकुल्कुनतोनि मीकुगुडा किरिस्तुना पावरमता नेरवुन, पोङ्गुन, एत्तुन आनि लोतुन तेल्पिचकुनना ताकत दोर्कि.

19 अचोने आयाका, मना तेल्वितोनि मनम तेल्पिचकुना पर्रोम, असोटा किरिस्तुना पावरमतुन तेल्पिचकुंकि, पेनदा गुनमते पुरागा निडिस होंट, इंचि पारतना कीसेके मंतन.

20 इंदके पेन मना पिस्वरता लोप्पो दाना ताकत परकारम कबळ कीसेकेन मंता. इच्चोने आयो, मनम तल्लकानदुंकन्ना, मनम विचारम कियानादानकन्ना एक्को, अद मनालोप्पो कबळ किय्या पर्रता.

21 कलिसियाते किरिस्तु येसुनाहेंदाल बस्केळ्ळक पीळि-पीळिनदाका पेनदुके कदर दोर्कि, आमीन.

4

येसु सामिना लोप्पो अंटोर कलियसि मनना

1 मीकुन पेन दाना लोकुल्क आयानाहाटीं केयता, अयते दाना लोकुल्क बल्हा अयते पिसानो अल्हा मिमेट पिस्सट इंचि, सामिनाहाटीं जेलुंक होल्लोन नना मीकु विनति कीसंतन.

2 दीना अर्तम बतल इत्ते, मिमेट सादा सिंपल मनना, बोर बतल इनिनागानि ओप्के पीसि मनना, वर्रोक-वर्रोर ओर्सकुंकेके पावरमते पिस्सट.

3 पेनदा पवित्र आत्मा मीकुन सांतिते उंदि कीता. अयते आ सांतिता एकतातुन मिमेट बेस कापाळसि इर्रांना कोसिसते मंट.

4 अंटोर विस्वासुल्कुनद उंदे मेंदुल आंद. अव्ते मनना पवित्र आत्मागुडा उंदे आंद. अल्हे अंटोर विस्वासुल्कुनगुडा पेन उंदे आसेते पिस्सालय केयता.

5 मना अंटोरा सामि वर्रोर, मनम अंटोरम उंदे विस्वासम कीतोम आनि बापतिस्मागुडा उंदे बापतिस्मा एततोम.

6 मनाकु अंतोर्क वर्रोर पेनबाबाल मंतोर, ओरे मना अंटोरा पोर्रो मंतोर, ओर मना नड्डुम मंतोर, अंटोरा नड्डुम ओरे मंतोर.

पेन हियाना वराल्क

7 गानि किरिस्तु, वेरे-वेरे कबाह्क कियानाहाटीं, मनावटेटाल वरो-वर्रोक ओना पूरा मनसुनाल उंद-उंदि विसेस कुर्पाता वरम हीतोर.

8 अदुनहाटींगे ओना बारेमते दर्मसास्त्रमते इल्हा रासि मंता:

“ओर पोर्रो एत्तु एक्किसि होल्लोर, जेलने मत्तोर्कुन दोहचि ओतोर,

मनकालोर्कुंक वराल्क हीतोर.”*

इंचि रासि मंता.

9 ओर, “पोर्रो एक्किसि होल्लोर” इत्ता पोल्लेता अर्तम बतल? दीना अर्तम, ओर बूमिता हिळुदाकागुडा रेय्सि वातोर इत्तापे गदा!

10 बोर अयते हिळु रेय्सि वातोर, ओरे बतले तक्को मनाकोटा अन्निटतुन पुरागा कियानाहाटीं अन्नि मळ्ळुकुंकन्ना एत्तु जेगाते एक्किसि होल्लोर.

11-12 ओर, पेनदा सेवाहाटीं पवित्र लोकुल्कुन तयार कियालय आनि किरिस्तुना मेंदुललेसी मनना कलिसियातोर्कुन बेस बक्किते, बरोसाते बेर्सांगोटनाहाटीं, इच्चुर्कुन प्रेरितुल्क, इच्चुर्कुन पेनदा कबुरतोर, इच्चुर्कुन बेसता कबुर वेहानोर आनि इक्किच्चुर्कुन बारे पास्टर आनि कराहनोर इंचि पेर्सि ओर्कु वराल्क हीतोर.

13 दीनहेंदाल मनम अंटोरम पेनदा मर्रिना पोर्रोटा विस्वासम आनि ओना बारेमता जानकारिते उंदासि मनंतोम. इंका बद्दे पोल्लेते आयि किरिस्तु बल्हा अयते बतले तक्को हिलाकोटा मत्तोर, अल्हेने मनमगुडा मना पर्रतोम.

14 इल्हा मत्ते बतल आंता इत्ते, बोर अय्ते आबद्दम, तप्पुड बोदां कराहचि मनाकुन विस्वासमता हरदाल तप्सालय ह्ळ्ळंतुरो, असंतोरा पोल्लेने अर्काकोंटा, वळिकु हीके-हेके आयाकोंटा मन्तोम. इल्हा मुन्ने मनम सिना पिलाल्कुनलेहका आयोम.

15 इंका पावरमते निजम वळ्ळसेक, मना तल्लालेसी मनना किरिस्तुना बेसतनम मनालोप्पो बेर्सि, मनम हरेक पोल्लेते ओनालेसी आयागोम.

16 मेंदुल्ले मनना कील्कु-नराल्कु मेंदुल्ला वैरे-वैरे बागाल्कुन बल्हा अय्ते उंदाङ्कु-उंदि अंटिच्चि इरींतगो, अल्हे किरिस्तुना मेंदुल आसि मत्तोर्कुन ओरे अंटिच्चि इरींतोर. मेंदुल्ला हरेक बागम, मेंदुल्लतोनि कलियसि अवुना कबाहक अव बरोबर कीतेने मेंदुल बेस बरोबर मन्ता. अल्हेने कलिसियातोरगुडा वरोन-वरोर पावरमते ह्ळ्ळसेक, ओर्क पेन हीता कबाहकुन बरोबर कीते, ओर पेनदापोर्रीटा बरोसाते बेस बेर्सितुर.

पेन हियाना पूना गुनाल्कुने बेस एदगट

17 अदुनहाटीं सामिना पोरोलते नना मीकु विनंति कीसि वेहानद बतल इत्ते, यहुदि आयवोर बल्हा ओरा बत्तक ओज्जुवा विचाराल्कुन परकारम ताकंतुरो, अल्हा मिमेट इंदकेटाल मरी ताकमट.

18 ओरा विचाराल्क बत्ताके ओज्जाकोंटा आतां. ओर्कु तेल्वि तक्को मत्ताहाटीं ओरा मनसु बंडालेसी गट्टिपळसोत्ता. अदुनहाटीं ओर पेनदुन तेल्पिचकुना हिल्लुर. इल्हा पेन हिय्याना पूना पिस्वरताल ओर्कुन लक्कु कियमळ जर्गता.

19 ओर्कु सिग्गु इत्तद बतले हिल्लुवाहेंका अन्नि तीरकुना कराब कबाहक कियाना लालचतेन ओर कूस मन्तुर.

20 गानि मिमेट किरिस्तुना बारेमते करियतस्के इसोटा पोल्लें करिया हिल्लिर.

21 मिमेट निजमे किरिस्तुना बारेमता पोल्लें केंजतिर. अचोने आयाका येसुना बारेमता सत्तेमतुन, बल्हा मत्तद अल्हे करियतिर.

22 अय्ते मीवा पडाना पिस्वरते मत्ता गुनाल्कुन इंदके तेंडसि पोहाट. अव गुनाल्क मीलोप्पो कराब कबाहक कियाना आसे पुट्टिचि मीकुन पाडगीसि पोहांतां.

23 मिमेट बतल अय्ते करियतिरो अदुन पीसि, मीवा आत्माते पूना गुनाल्क वासि मिमेट बेस एदगट.

24 पूना गुनाल्कुन पेन दानालेहका सत्तेमते तयार कीता, पवित्र कीता. अदुनहाटीं मीवा पडाना गुनाल्कुन होळसिसि पेन हियाना पूना गुनाल्कुने ताकट.

पेनदा आत्माकु दुक्कम हियमट

25 मनम अंतोरम उंदे मेंदुल्ला वैरे-वैरे बागाल्क आताहाटीं, इंदकेटाल वरोनतोनि-वरोर आबद्दम वळ्ळमळ होळसिसि, हरेक मनकल सत्तेमे वळ्ळगोम.☆

26 होंग आम्टु गानि, पापम कियमट. पोळ्द अर्का मुन्नेन मीवा होंग सल्लारगोम.☆

27 मीवा पिस्वरते देय्यमतुन होळिया हियमट.

28 बोर अय्ते मुन्ने दोंगातनाल्क कियुंदुर, ओर इंदके अदुन होळसियना. सतता कय्कुने कस्टम कीसि, बेस तरिकाते कमांचना. अस्केन, अवसरम मत्तोर्क ओर सहायम किया परंतोर.

29 मीवा तोळ्दाल बस्केन कराब पोल्ले पेयसानायो. केंजानोर्कुंक कुर्पा दोर्किसि, ओरा बक्तिते पायदा वायाना बेसता पोल्लेंगे पेयसगोम. ओरा अवसरमतुन पीसि मिमेट वळ्ळकाना.

30 मुक्तिता रोजुनदाका, “इं ना लोक्कलक” इंचि पेन मीपोर्री उंदि सिक्का तंचि इर्ता. अदुनहाटीं मिमेट दाना पवित्र आत्माकु दुक्कम वायाकोंटा पिस्सट.

31 मिहगा मनना हेळाहना गुनम, पगा, होंग, वरगेयना बुद्दि, अपमानम कियाना बुद्दि इसोटा अन्नि कराब गुनाल्क-पोल्लेन मिहागटाल लक्कु कीम्टु.

32 वरोनपोरोँ वरोँक जीवा नोसि बेस दया हूपिच्चेक, पेन बल्हा किरिस्तुनाहेंदाल मीवा तप्पुकुन मापि कीता, अल्हेन मिमेटगुडा वरोना तप्पुक वरोर मापि कीम्ट.

5

पावरमते पिस्सट

1 मिमेट पेनदा पावरमगल्ला पिलाल्क आंदिर, अदुनहाटी पेन कीताप मिमेटगुडा कीम्ट.

2 किरिस्तु मनाकुन पावरम कीसि मनाहाटी पेनदा मुन्ने मोकुकु आसि, पेनदुक नच्चना गुगलेमलेसी ओनद ओर बलि आतोर. अदे पावरमते मिमेटगुडा ताकट.

3 मीवा नडुडुम बोगमतनमता बारेमते, अन्नि तीरकुना अपवित्र पोल्लेना बारेमते इंका आस्तिक संबंदिस्ता पोल्लेना बारेमते आयि, बस्केने उद्दुलि जर्गानायो. बारित्ते पवित्र लोकुकल्क इसोंटवुना बारेमते उद्दुलिगुडा किय्युर.

4 अचोने आयका रोता पोल्लें, तेल्वि तक्को पोल्लें, कराब कारेडुडाल्क मिमेट कियानायो, मीकु अव सोबांचों. मीवा तोळदाल सिराप पेनदुक दन्यवाद इनना पोल्लेंगे पेय्सगोम.

5 बारित्ते, बोगमतनम कियानोर, अपवित्र मनकल हिलाकोटे लालचि मनकल (लालच कियमळ इत्ते, बोम्माना पूजें कीतापे आंता) ईरुकु बोर्के आयि, किरिस्तुना आनि पेनदा राज्येमते वारसाहक्क हिल्ले, इंचि मीकु तेळियसे मंता.

6 उत्तुता पोल्लें वळ्किसि मीकुन बोर्न्ना पोक्कते अरहानायो हुळाट. बारित्ते इसोंटा कबाहकुनहेंकेन पेन दाना आदेस परकारम ताकवोरपोरोँ होंग हुपसंता.

7 अदुनहाटी मिमेट इसोंटा लोकुकुकुनतोनि पोत्तु कियमट.

वेलगुने पिस्सट

8 उंदास्के मिमेट हीकटते पिस्सेक मत्तिर. गानि सामिनपोरोँ बरोसा इरताहाटी इंदके मीकु पेनदा वेलगु दोर्कता. अदुनहाटी वेलगुने पिस्सानोरा संतानमलेहका ताकट.

9 वेलगुने पिस्सते सिराप अन्नि तीरकुना बेसतनम, नीतितनम आनि निजम इवे दिसंतां.

10 इंका बतल कीते सामिंकु कुसि दोर्कार, इंचि सामिन कूस कियाना विचारमतेन बस्केळ्ळक मंट.

11 अचोने आयका, बताके ओज्जुवा हीकटता कबाहकुने मिमेट पोत्तु आयमट. गानि असोंटा कबाहकुन पलाते अरहट.

12 बारित्ते मक्किस कियना ओरा कबाहकुना बारेमते वळ्कमळगुडा पेद्दा सिगलसेटे आंद.

13 गानि इसोंटा पलाते अरता अन्नि कबाहक वेलगुने दिस अरंतां. अन्निटवुन दिस्सानाल कियानद वेलगु आंद.

14 अदुनहाटीगे मरि,

“अरे निद्राते मनानोना, हातोराव्टेताल तेदसि उद्दा.

किरिस्तुना वेलगु नीपोरोँ मेसंता,”*✱

इंचि रासि मंता.

बुद्दिदेते ताकट

15 अदुनहाटी मिमेट बल्हा ताकंतिर? परमेका कीसि हुळाट. बुद्दि हिल्वोनलेसी ताकमट, बुद्दि मत्तोनलेसी ताकट.

16 इव रोजुकु बेसतव आयों, इंचि दोर्कता हरेक मोकातुन बेसताहाटी वाळकुंट.

17 अदुनहाटी सामिना इच्चा बतल मंतानो, बेस एरपाट कीसि ताकट, बुद्दि हिल्वोरलेसी मनमट.

18 इगा कल उंचि उंगसेके मनमट, कल रिम्माते मीहेंदाल पापम जर्गा परंता. कल उंचेके मनानदानकन्ना पवित्र आत्माते निडिसि मंट.*✱

19 इंकावरोनतोनो वरोर बस्केळ्ळक बक्ति पाटां, पेनदुन तल्सकुनना पाटां, पेनदा पाटां पारसेके, सामिन मीवा मनसुने बस्केळ्ळक मति कीसेके मंटु.☆

20 अन्नि पोल्लेनाहाटी, मना सामि येसु किरिस्तुना पोरोलते मना पेनबाबांक बस्केळ्ळक दन्यवाद कीसेके मंटु.

21 मनसुने किरिस्तुना वें ईर्सी वरोंक-वरोर लोंगिस मंटु.

मुत्तो-मुय्दोंक कोन्नि आदेसाल्क

22 मरमिं आता मुरताहकुनिटा, बल्हा अयते मिमेट सामिंकु लोंगिस मंतिटो, अल्हेन मिमेट मीवा मुय्दुर्कुंकगुडा लोंगिस मंटु.☆

23 बारित्ते, किरिस्तु बल्हा कलिसियाता तल्लालेसीं मंचेके कलिसियातुन ताकसंतोर, अल्हेन मीवा मुय्दो मीकु तल्लालेसीं मंतोर. कलिसियातुन पिसागोटनोरगुडा किरिस्ते आंदुर.

24 कलिसियातोर अंटोर बल्हा किरिस्तुंक लोंगिस मनांतुर, अल्हेने, मुत्तोहकगुडा अन्नि पोल्लेने अबुना मुय्दुर्कुंक लोंगिस मनागोम.

25 अयते ए मरमिं आता मांडसुरिटा! किरिस्तु बल्हा कलिसियातुन पावरम कीसि, दानाहाटी ओना सतता जीवातुन हीतोर, अल्हेन मिमेटगुडा मीवा मुत्तोहकुन पावरम कीम्टु.

26 अस्के दान किरिस्तु, पेनदा पोल्लेतोनिं* सक्कगा साप नोर्सीं पवित्र कीतोर.

27 अस्के अद पवित्र आनि दोसेम हिलाकोंटा आंता. पजा दान बदे कसुरता डाग हिल्लुवा, पापमता मच्चा हिल्लुवा इंका बदे तप्पु हिल्लुवा जगाजगा मेर्सना कलिसिया कीसि, ओना दग्गेरा निल्लाकुंतोर.

28 अल्हेने मुय्दुर्कुंकगुडा ओर ओरा मेंदुल्लुन बल्हा पावरम कीतुर, अल्हेन ओर ओरा मुत्तोहकुन पावरम कियगोम. सतता मुत्तोन पावरम कियानोर, सतातुनगुडा पावरम कीतोर.

29-30 बोरे मनकल बस्केने ओना सतता मेंदुल्लुन हय्साकोंटा मनाहिल्लोर. दान्क बदुल ओर दान बेस ऊळगेम कीतोर. अल्हेन कलिसियातोर मनम अंटोरम किरिस्तुना मेंदुल्ला वें-वें बागाल्क आंदुम. अदुनहाटी किरिस्तु ओना कलिसियातुन बेस हळकुंतोर.

31 इदुना बारेमते दर्मसास्त्रमतेगुडा,

“इदुनहाटीगे वरोर मांडसा ओना तल्लुर-बाबोन होळसि,

ओना मुत्तोनतोनो कलियसि मनांतोर, ओर इव्वुर उंदे मेंदुल आसि पिस्संतुर,”

इंचि रासि मंता.☆

32 इद अयते उंदि पेद्दा मर्मम आंद. अयना नना अयते किरिस्तु आनि कलिसियाता बारेमते वेहचंतन.

33 बल्हैना बेसे! मीवाव्टेताल हरेक मांडसा, मीवद मिमेट सतातुन बच्चोन पावरम कीतिरो, अचोने मीवा मुत्तोनगुडा पावरम कीम्टु. अल्हेने मुत्तोगुडा मुय्दोना कदर कियगोम.

6

पिलाल्क, तल्लुर बाबो बल्हा मनना?

1 पिलाल्कुनिटा, सामिना पोल्ले परकारम, मिमेट मीवा तल्लुर-बाबो वेहताप ताकट, इदे मीवाहाटी बेस.

2-3 बारित्ते, “मिमेट मीवा तल्लुर-बाबोना कदर कीम्टु, अस्के मीकु अन्नि बेसे जर्गता आनि बूमिपोर्रो मीवा आव्सुगुडा बेरसंता,” इल्हा दर्मसास्त्रमते रासि मंता. पेन हियाना पोल्ले कलियसि मनना मोदाटा आदेस इदे आंद.☆

4 बाबालोरिटा! मिमेट मीवा पिलाल्कुंक होंग वाया हियमट. दान्क बदुल सामि वेहता हरदुन, पोल्लेन ओर्क कराहसेके ओर्कुन बेस पोस कीम्टु.☆

☆ 5:19 कुलसि 3:16 ☆ 5:22 कुलसि 3:18; 1 पत्र 3:1; उत्पत्ति 3:16 * 5:26 पोल्लेतोनि इग्गे पेनदा पोल्ले उंदि एतसोटद इंचि अर्तम कीकुनना. ☆ 5:31 उत्पत्ति 2:24 ☆ 6:2-3 निर्गमन 20:12; व्यवस्ताविवरन 5:16

☆ 6:4 व्यवस्ताविवरन 6:7; नीतिवचन 3:11-12; नीतिवचन 19:18; नीतिवचन 22:6

मालक आनि दासुड बल्हा मनना?

5 दासुल्कुरिता! इद बूमिपोर्रोटा मीवा मालकुल्कुना पोल्लेपोर्रो मंटु. मिमेट किरिस्तुना कदर कीताप, ओरदगुडा कपटम हिलुवा मनसुनाल कदर कीसेके ओर्कु वेरियसि ताकट.

6 सिराप लोकुल्क कूस आयगोम इंचि हृप्सालय सेवा कियानोरलेसी मिमेट कियमट. दानकु बदुल, पेनदा इच्चा परकारम किरिस्तुना सेवा कियाना दासुल्कुनलेसी मनसु तासि कबळ कीम्टु.

7 मिमेट कियना सेवा मनकानद आयो गानि सामिना सेवा आंद इन्कुंचि कुसिते कीम्टु.

8 कबळ कियानोर दासुडे आयिर, दासुड आयवोर आयिर! ओर कियाना बेस कबळतुन पीसि ओन्क सामिनाहेंदाल इनाम दोर्कता, इद मिमेट मति इर्राट.

9 मालकुरिता! मिमेट मीवा दासुल्कुन वेरहुळ-बेदरिच्चुळ कियमट, ओर्कुन बेस हळकुंटु. मीवा इव्वुरागुडा मालक स्वर्गमते मंतोर. ओर सिन्ना-पेद्दा हळोर, इद मति इर्कुट.✱

पेन हीता आयुदाल्कुन वाळकुंटु

10 आकिरते नना वेहानद बतल इत्ते, सामिनतोनि ओना पेद्दा ताकतते उंदासि मंटु.

11 देय्यमता ताकतता मुन्ने वेरियाकोटा नित्तालय मिमेट पेन हीता अन्नि आयुदाल्कुन* वाळकुंटु.

12 मना लडाइ मनकालोरा विरोदमते आयका, हीकट राज्यमतुन ताकसानोरा विरोदमते, हीकट राज्यमता अदिकारिल्लुकुना विरोदमते, हीकट राज्यमते मनना सक्तिना विरोदमते आनि मब्बुने दिस्सना दुस्ट सक्तिना विरोदमते मंता.

13 इंचि आ सेड्डा रोजकु वातस्के वेरियाकोटा नित्तालय मिमेट पेन हीता अन्नि आयुदाल्कुन पीकुंटु. अस्के मिमेट कियानद अन्नि पुरागा कीसि आकिरदाकागुडा नित्तिसि मना परकिट.

14 अदुनहाटी मिमेट सत्तेमतुन नडि पट्टालेह्का दोह्चि, नीतितुन इनुम अंगिलेह्का† मेंदुल्क केरसि,✱

15 सांति हियना बेसता कबुरतुन वेहना तयारिता हेरपुह्कुन कालकुंक केरसि तयारते मंटु.✱

16 इव अन्निकन्ना मुक्केमातद बतल इत्ते, लडाइ कियनेके मिहगा डालुनलेह्का‡ विस्वासम मनगोम. अस्के देय्यमताहेंदाल पोतसेके वायना अन्नि बानाल्कुन मिमेट आपा परकिट.

17 इंका मुक्तिंतुन हेल्मेटलेह्का§ तल्लक कळाह्सि, आत्माता कसेर इत्ते पेनदा पोल्लेतुन कसेरलेह्का कय्दे पीकुंटु.✱

18 अन्नि वेलाने पवित्र आत्माते बस्केळ्ळक पारतनां, विनंति कीसेके मंटु. इंका अंतोर विस्वासुल्कुनाहाटी आगाकोटा बस्केळ्ळक पारतना कीसेके मंटु.

19 इंका नना बस्के-बस्के अय्ते पेनदा पोल्लें कराहलय तोड्डि तेहांतन, अस्के-अस्के नाकुंदि बेसता कबुर दोर्कालय नावाहाटीगुडा पारतना कीम्टु. दीनहेंदाल नना पेनदा बेसता कबुरते मत्ता मर्ममतुन वेरियाकोटा वैरेतोर्क वेहा परकन.

20 दीनाहाटीगे नना कयकुंक बेडी वाटसि मत्ता पेनदा कबुरतोन आतन. दीनहेंदाल नना बल्हा अय्ते वळ्ळागोमो अल्हा वळ्ळकालय नाकु दैरेनेम दोर्कानाहाटी पारतना कीम्टु.

21 तुकिकुस इन्ना वरोर पावरमगल्ला दादाल मंतोर. ओर सामिना वरोर बेस विस्वासमगल्ला सेवक आंदुर. नना इगे बल्हा-बतल मंतन इंचि अन्नि पोल्लें मीकु वेहानुर.

22 मावा परिस्तिति बल्हा मंता इद मीकु तेळियागोम आनि मी अंतोरा जीवांक दैरेनेम, सांति दोर्कगोम, इंचि नना ओन मिहगा लोहतन.

✱ 6:9 व्यवस्ताविवरन 10:17; 2 इतिहास 19:7 * 6:11 आयुदाल्क विसरे. † 6:14 इनुम अंगि इत्ते लडाइ कियनेके मेंदुल्क कसेटे कोहकतस्के कसेर होळियाकोटा केरन्द उंदि इनुमता अंगि. ✱ 6:14 यसायाह 11:5; यसायाह 59:17

✱ 6:15 यसायाह 52:7; नहम 1:15 ‡ 6:16 डाल लडाइ कियनेके मुन्नेटा सिपाइ कसेटे तंतस्के ओना कसेटुन आपालय कय्दे पियानद उंदि वस्तु. § 6:17 हेल्मेट तल्लक देब्बा दल्गाकोटा तासकुनना उंदि वस्तु. इद कालमते लोकुल्क मोटोर सायकलते होननेके तासकुंतुर. ✱ 6:17 यसायाह 49:2; इब्रि 4:12

23 अंतोर विस्वासुल्कुंक पेनबाबाल आनि सामि येसु किरिस्तुनहेदाल, सांति आनि विस्वासमतोनि पावरम दोर्कि.

24 मना सामि येसु किरिस्तुन बोर अयते आगाकोंटा पावरम कीतुर, ओर अंतोरतोनि पेनदा कुर्पा हमेसा मन्निकांटी.

पिलिपिया पिलिपिया विस्वासुल्कुंक पौलुसना सिट्टे

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 60

पौलुस इद सिट्टितुन जेलने मत्तास्के पिलिपिया कलिसियातोर्क रासतोर. जेलनाल पेय्सि बेसता कबुर वेहना कबळतुन मर्रा सुख कियना इंचि ओना आसे. इंका पौलुस इल्हा रासतोर गदा, “येसु किरिस्तु बोगांचतसोंटा तकलिपकु आनि इंदके नना बोगांचनसोंटा तकलिपकु, येसु किरिस्तुनपोर्रो विस्वासम इरताहाटी मीकगुडा वायावच्चु, असोंटस्के किरिस्तुनपोर्रो विस्वासम इरताहाटी दोर्कता तकलिपकुन पेनदा आसिर्वाद इनकुंटु,” इंचि रासतोर.

पौलुस इद सिट्टि रासता इंकुंदि कारनम बतल इत्ते, पिलिपियाते, “मूसाना नियमकु वेहताप ताकट, हिलाकांटे मीकु मुक्ति दोर्का,” इंचि तप्पुड बोदां कराहनोर मत्तुर. ओरा कराहमळ पौलुसुंक इस्टम हिलाका, “नय्कुनलेहका मुचहनोरगटाल हुसारते मंडु,” इंचि वेहालय पौलुस इद सिट्टि रासतोर. अचोने आयका कस्टाल्क, दुक्काल्क वाधिनागानि किरिस्तु हुपिस्ता हरदेने अंटोर विस्वासुल्क कलियसि कुसिते ताकना इंचिगुडा पौलुस रासतोर.

बगा बतल मंता

जोहार आनि परिचयम 1:1-11

पौलुसना सतता परिस्तिती 1:12-26

किरिस्तुनतोनि पिस्सना पिस्वर 1:27-2:18

तिमोति आनि इपपरदिसुनाहाटी पिलानकु 2:19-30

पगातोरगटाल जेगर्ता मनना बारेमते 3:1-4:9

पौलुस आनि पिलिपियाता ओना दंटागाह्क 4:10-20

आकिरता बोदां 4:21-23

पिलिपिया कलिसियातोर्क पौलुसना जोहार

1 पिलिपिया सहरते येसु किरिस्तुना लोपपो मनना पेनदा अंटोर पवित्र लोकुल्कुंक, पेद्दाल्कुंक आनि अदिकारिल्कुनाहाटी नना पौलुस, नावा दंटातोर तिमोति, मोमोट येसु किरिस्तुना सेवाकुल्कुम इद सिट्टि रासेक मंतोम.

2 मना पेनबाबानाहेंदाल, मना सामि येसु किरिस्तुनहेंदाल मीकु कुर्पा, सांति दोर्कि.

पौलुसना पारतना

3 मीकुन नना बस्के-बस्के अय्ते मति कीतन, अस्के-अस्के पेनदुक दन्यवाद कीतन.

4-5 बेसता कबुर केंजसि विस्वासम कीता रोजुनाल अय्ते इदवेरदाकागुडा बेसता कबुरतुन वेहना नावा कबळते मिमेट नाकु तोळ मंतिर. अदुनहाटी नना बस्के-बस्के अय्ते पारतना कीतन अस्के-अस्के वेल्लेन कुसिते मीवाहाटी पारतना कीतन.

6 मीवा नड्डुम इच्चोन बेसता कबळतुन पेने सुख कीता. इद कबळ पुरागा आयनदाका, इत्ते येसु किरिस्तु मर्रा तिरियसि वायना रोजुनदाका पेने इद कबाटुन ताकिच्चेक ईरता इंचि नाकु पुरागा बरोसा मंता.

7 नना मीवा बारेमते इल्हा विचारम कियमळ बेसे आंद. बारिल्ले, नना जेलने मत्तस्के आयि, बेसता कबुर वेहचि अय्ते मत्ता निजमतुन हुपिच्चि कापाळसेके तिरियतस्के आयि, इव अन्निटवुने

पेनदाहेंदाल कुर्पा दोर्कता, अबुने नावातोनि मिमेटगुडा तोळ मंतिर. अदुनहाटीं मिमेट इत्ते नाकु वेल्लेन पावरम!

8 किरिस्तु येसुनलेसीं ननागुडा मीकुन पावरम कीतन, इंचि नावा जीवा मीकुन ह्ळानाहाटीं बस्केळक तनलाळंता. दीनकु कुद्दु पेने गवाइ मंता.

9 मीवा पावरम बेस बेरस्सेक मनना, पेनदाहेंदाल मीकु बुद्दि, मंचि-सेड्डातुन एरपाट कियना तेल्चि बेरसना इंचि नना बस्केळक पेनदुक पारतना कीसेक मंनंतन.

10 दीनहेंदाल मिमेट मंचि-सेड्डातुन एरपाट कीसि बेस पिस्वर पिसकिट. अस्के किरिस्तु वातस्के मिमेट अंटरगुडा ओना मुन्ने नीतिमंतुलक आनि दोसेम हिलवोर आसि निलकिट.

11 मीवा पिस्वरते येसु किरिस्तु मत्ताहाटीं, मिमेट बस्केळक नीति कबाह्के कीसेक मंदना. दीनहेंदाल पेनदा पोरोल, कदर वेल्लेन बेरस्सेक दांता.

बेसता कबुर बेर्सताहाटीं पौलुसना कुसि

12 नावा विस्वासुल्लकुनिटा! मिमेट उंदि पोल्ले अर्तम कीकुटु, नावा पिस्वरते जर्गता अन्नि गटनां किरिस्तुना बारेमता बेसता कबुर बेरसालये सहायम आतां.

13 इल्हा जर्गताहेंकेन, किरिस्तुनाहाटींगे नाकुन जेलने वाटतुर इंचि राजवाडाते कावेल कियना अंटर सिपाइल्लुकुं आनि अगा मत्ता अंटर लोकुल्लुकुं तेळियसोत्ता.

14 इचोने आयका, नना जेलने मत्ताहेंका सामिनाहाटीं वेल्लेन मंदि विस्वासुल्लुकुंक दैरनेम दोर्कता. ओर बोर्के वेरियाकोंटा वेल्लेन दैरनेमते किरिस्तुना बारेमता पोल्लेतुन वेहालय तयार आतुर.

15 अव्टेटाल इच्चुर कळक पोत्सि, नावा पोर्रोटा पगा तीरिचकुनालय किरिस्तुना बारेमते वेहचंतुर, इंका इच्चुर बारे बेस उद्देसमते वेहचंतुर.

16 बेस उद्देसमते वेहानोर, नावा पोर्रोटा पावरमहेंका अल्हा कीतुर. बारित्ते येसु किरिस्तुना बारेमता बेसता कबुर सत्तेम आंद इंचि हुप्सालये नना इगे मंतन इंचि ओर्क एरपाट मंता.

17 गानि नापोर्रो कळक पोत्सि, किरिस्तुना बारेमता पोल्लेतुन वेहना लोकुल्लक मात्रम नना जेलने मननेके नाकु इरगा तकलिप आयागोम इंचि, ओरा सतता पाय्दाहाटीं अल्हा कीसंतुर.

18 अयना बतल आयो. बेस उद्देसमते आयि, कराब उद्देसमते आयि, अद बल्हे आयि! किरिस्तुना बारेमतेन वेहमळ जर्गसंता इंचि नाकु वेल्लेन कुसि आसंता. आनि नना इल्हेन कुसिते मंनंतन.

19 बारित्ते मीवा पारतनां अल्हेन येसु किरिस्तुना आत्माता सहायमतोनि नाकु वायना ई कस्टाल्लेक नाकुन तप्पाकोंटा पलाते पेचहंतां इंचि नाकु एरपाट मंता.

20 नाकु बसोंटा परिस्तिति वायिना सिग्गु अर्ोन, नना इदवेरादाका दैरनेमते किरिस्तुना सेवा कीतन, अल्हेने इंदकेगुडा कीसेक मंतन. नना हायिना-पिस्सिना नावा पिस्वरताहेंदाल किरिस्तुना पोरोल्लतुन अंटर कदर कियगोम इंचि नना वेल्लेन आसेते एदुर ह्ळसेक मंतन.

21 बारित्ते नना पिस्संतन इत्ते किरिस्तुनाहाटींगे. नना हायिनागानि किरिस्तुनगेन दांतन इंचि हामुरगुडा नावा पायदातदे आंद.

22-23 इव रौंडुन नड्डुम नना इरगा अचाहताप आतन. नना पिस्सि मत्ते पेनदाहेंदाल इनाम दोर्कनलायक बेस कबळ किया परंतन. इल्हा नना हामुरतुन पेरकाना मरि पिस्वरतुन पेरकाना नाकु बतले तेळियसेक हिल्ले. नाक अयते इद मंदुलतुन होळसि किरिस्तुनगेन होंचि मंदकन बारे अनपिच्चंता. बारित्ते इदे बच्चोनी बेस.

24 गानि नना मीवाहाटीं, पिस्सि मनमळ वेल्लेन अक्सरम.

25 नना पिस्सि मंचि, मिमेट विस्वासमते बेस गट्टि पळना इंका मीवा पिस्वरते मीकु बेस कुसि दोर्कनाहाटीं सहायम कीसेके मीवातोने मंनंतन इंचि नाकु पूरा बरोसा मंता.

26 इल्हा नना बस्के अयते मर्रा मिहगा वांतनो, अस्के सामि नावाहेंदाल बतल-बतल अयते कीतोर अबुन केंजसि मिमेट येसु किरिस्तुन वेल्ले कदर हीकिट.

बेसता कबुरते वेहताप पिप्सालय पौलसना विनंति

27 बद्द बतले आयि, मीवा पिस्वर मात्रम किरिस्तुना बेसता कबुरते मत्ताप मनना. अस्के बतल आंता इत्ते, नना मिहगा वायिना, वायाकोन्ना मिमेट अंतोर उंदे आत्माते गट्टिगा बेस मंतिर आनि बेसता कबुरहाटी अंतोर कलियसि पिस्सेक मंतिर इंचि वैरेतोरा हेंदाल नना केंजना.

28 बदे पोल्लेक आयि, बेसता कबुर वेहते तकलिप कियानोकुकु मिमेट वेरियमट, दैरनेमते मंद्, मीवा दैरनेमतुन हूळसि, मोमोट नासडेम आंतोम, पेन ओर्कुन कापाळता इंचि तकलिप कियानोकुकु तेळियंता. इद पेनदा कबळे आंद.

29 सिराप किरिस्तुन विस्वासम कियालये आयो गानि ओनाहाटी तिप्पल्क अरालयगुडा पेन किरिस्तुनहेंदाल मीकु आसिर्वाद हीता.

30 नना अरता तिप्पल्कुन मिमेट हूळतिर, इंदके केंजसंतिर आनि मिमेटगुडा अदे तिप्पल्कुने मंतिर.

2

वरोंक-वरोर बेस हूळना

1 किरिस्तुनतोनि कलियसि मीवा दैरनेम बेसता, ओना पावरमहेंदाल मीकु समादानम दोर्कता, मिमेट ओना आत्माते उंदि आतिर, इंका ओना दया मीतोनि मंता.

2 इव अन्नि पोल्लें निजमे गदा! अय्ते मीवा अंतोरा विचाराल्क बस्केळ्ळक उंदे मन्निकांटी, मिमेट वरोंक-वरोर उंदच्चोने पावरम कीम्ट, मीवा अंतोरद उंदे मनसु, उंदे उद्देसम मनना. इल्हा पिसतिरित्ते नना निजमते पुरागा कूस मनंतन.

3 सतता पाय्दाताहाटी आयि, पेद्दातनम हूप्सालय आयि बदे कबळ कियमट. गानि वैरेतोरा कदर कीसेके मनम कुद्दु ओरा मुन्ने सिन्नोड आसि मनना.

4 बोरे आयिर, सिराप सतता इस्टाल्कुना बारेमतेन आयो, गानि वैरेतोरा बारेमतेगुडा विचारम कियोगोम.

येसु सामिनलेसी सिन्नागासि पिस्सना

5 येसु किरिस्तुना गुनम मत्तापे मीवा गुनमगुडा मनना.

6 ओर अय्ते कुद्दु पेने आंदुर, अयना पेनदालेसी मनना विचारमगुडा किया हिल्लोर.

7 दान्क बदुल ओर ओनगा मत्ता अदिकाराल्कुन होळ्सीतोर. होळसिसि वरोर दासुनलेसी आसि मनकन रूपमते इद बूमिपोर्रो पुटतोर.

8 इल्हा मनकना रूपमते पुटसि ओनद ओर सिन्नगा कीकुत्तोर. इच्चोने आयका पेनबाबाना इच्चातुन पूरा कियालासि कूसुनपोर्रो जीवातुनगुडा हीतोर.*

9 अदुनहाटी पेन ओन अन्निटवुंकन्ना पेद्दोड कीसि ओना पोरोल्लतुन अन्नि पोरोलीकन्ना पेद्दा कीता.

10 बारित्ते, मळ्बुन पोरोटव, बूमि पोरोटव, बूमि हिळतव अन्नि येसुना मुन्ने टोंगरां ऊनसि ओन्के मोळ्काना.

11 इंका “येसु किरिस्ते सामि आंदुर,” इंचि हरेक नाल्के ओप्कुनगोम. इल्हा पेनबाबांक कदर दोर्कना इंचि अल्हा कीता.

इद बूमिपोर्रो वेडसीलेसी पिस्सट

12-13 अदुनहाटी नावा पावरमगल्ला विस्वासल्कुनिटा! नना मीकु वेहनद बतल इत्ते, नना मीवातोनि मत्तस्के बस्केळ्ळक मिमेट नना वेहतापे ताकतिट. इंदके नना मीवातोनि हिलाकोन्ना गानि अस्केटदानकन्ना एक्को जेगर्ताते सामिना आदेसकुन पीसि ताकट. पेनदा इच्चा परकारम बतलन्ना कीकुनगोम इंचि मीवा मनसुने वाता इत्ते, अद इच्चा पेने मीवा मनसुने वाटता. अदुन पूरा कियालय

* 2:8 पेद्दा-पेद्दा तप्पुक कीतोकुंके ई कूसता सिक्सा हीतुर.

गावाले मत्ता ताकतगुडा मीकु पेने हीता. इंचि पेनदुन बेस कदर कीसेके, वेंरे कोद्दिगा पेन हीता मुक्ति परकारम मत्ता कबाहक कीसेके पिस्सट.

14 बद कबळ कियिनागानि गुल्गाकोटा, जगडम कियाकोटा कीम्ट.

15 अस्के मिमेट बतले दोसेम हिलवा बेस लोकुल्क आकिट. तप्पुड कबाहक किय्याना ई दुनियाता लोकुल्कुना नड्डुम आनि पापि लोकुल्कुना नड्डुम मिमेट बतले दोसेम हिलवोर आसि पेनदा मर्क-मियाहकुनलेसी मंदकिट. इंका मिमेट हीकटते पिस्वर पिस्सना लोकुल्कुना नड्डुम पोत्तना वेडसीलेसी दिसकिट.

16 पिस्वर हियना पेनदा पोल्लेतुन गट्टिगा पीसि ताकट. इदुना हेंदाल किरिस्तु वायाना रोजुने, मीवाहाटी नना कीता कस्टम, वितलाटा एर्तम आयाहिल्ले इंचि कुसिते वेहंतन.

17 पेनदा सेवा कियिनाहाटी मिमेट उंदि मोक्कुनलेहका आसि वेल्लेन तिप्पल्क अरसंतिर. इदंता मीकु पेनदापोरें वेल्लेन विस्वासम मत्ताहेंका आसंता. अदुनहाटी इसोंटा मीवा मोक्कुनतोनि नावा जीवा हीसि नेत्तुर वारागिच्चालयगुडा नना पजोळ्क होन्नेन, गानि वेल्लेन कूस मनंतन.

18 इल्हा मिमेट इरगा कूस मंट, मीवातोनि ननागुडा कूस मनंतन.

तिमोति आनि इपपरदिस ईर बेस सेवाकुल्क आंदुर

19 तिमोतिन मिहगा बिरानेन लोहकन इंचि नना सामि येसुनाहेंदाल आसे पळसंतन. ओर मीवा बारेमता कबुर नाकु वासि वेहनुर, अस्के नाकु इरगा कुसि आथार.

20 मीवा बेसताहाटी मनसुनाल चिंता कियानोर नहगा ओन्क तप्पा वेंरे बोरि हिल्लोर.

21 अंतोर ओर-ओरा कबाहकुने मुळ्गिसि मंतुर, येसु किरिस्तुना बारेमते विचारम कियानोर बोरि हिल्लुर.

22 गानि तिमोति असंतोर आथोर. वरोर मरि बाबनतोनि कलियसि कबळ कीताप, ओर बेसता कबुर वेहना सेवते नावातोनि इमानदारिते कस्टपळतोर. ओना गुनम बसंतदो मीकु बेस एरपाट.

23 जेलनाल नाकुन होळ्सीतुरो, होळ्सुरो इद पोल्ले तेळियतारिते ओन नना मीहेके लोहकन इंचि आसे पळसंतन.

24 ननागुडा बिरानेन मिहगा वांतन, इंचि सामिनपोरें नाकु पुरागा बरोसा मंता.

25-26 नाकु अब्सरम अरतस्के सहायम कियिनाहाटी मिमेट इपपरदिसुन नाहेके लोहतिर. बेसता कबुर वेहनेके वरोर सिपाइन लेहका ओर नावा तोळ मत्तोर आंदुर, ओर नावा तम्मुनसंतोर आंदुर. गानि ओन मर्रा मीहेके लोहना इंचि नावा मनसु मंता. मीकुन हळालय ओर इरगा गाबर आसंतोर. ओर बिमार अरता संगति मिमेट केंजतिर इंचि ओन्क तेळियतस्के ओर वेल्लेन नाराज आतोर.

27 ओर बिमार अर्सि हायानाल आसि मत्तोर इद निजमे! गानि पेनदा दया ओनपोरें मत्ताहेंका ओन्क बतल आयाहिल्ले. ओर बिमारताल बेस आयाकोटा मंचि मत्ते, नावा दुक्कम इंका बेरसि मनवळ इंचि पेन नावा पोर्गेगुडा दया हुपिच्चि ओन बेस कीता.

28 अयते ओन मिहगा बल्हैना लोहना इंचि नना विचारम कीतन. ओर मिहगा वाते मिमेट ओन हळसि कूस आकिट, अस्के नावा चिंतागुडा तक्को आंता.

29-30 मिमेट नावाहाटी किया पर्वा सेवातुन ओर ओना जीवाक तेगिचि पूरा कीतोर. किरिस्तुना कबळतुन पूरा कियिनाहाटी ओर हायालय आसि मत्तोर. अदुनहाटी ओर मिहगा वातस्के मावा दंताता विस्वासि इंचि सामिना पोरोलते मिमेट ओन बेस कल्पकुंट. ओनालेसी सेवा कियिना हरेक मनकना बेस कदर कीम्ट.

3

विस्वासमतेन नीतिमंतुल्क आया परांतुर

1 विस्वासुल्कुनिटा! आकिरते नना इंकुंदि मल्का वेहांतन, पेनदापोर्रोटा मीवा विस्वासमते मिमेट कूस मंडु. रासता पोल्लेगें ऊके-ऊके रासालय नाक बतल तकलिप आयो. बारित्ते इव पोल्ले मीकुन तप्पुड बोदानाल कापाळंतां.

2 अदुनहाटीं तप्पुड कबाहक कियना नयकस्केल गुनमतोरगटाल जेगर्ता मंडु. कतना* रिवाज कीतिन नीतिमंतुल्क आंतुर इंचि ओर कराहंतुर.

3 गानि मनकालोरा कबाहकुनपोर्रो बरोसा इरताहेंका मनाकु मुक्ति दोर्कता इंचि आयो. येसु सामि मनाकुन पिसागोटोर इंचि ओन्क मनम बस्केळक कदर हीतोम. अदुनहाटीं पेनदा आत्मा वेहताप दान मोळकानोरम मनमे निजम कतना आतोरम आंद, ओर आयुर.

4 बोर्न्नागिंटा सतता कबाहकुनपोर्रो बरोसा इरसि पोंगसेके तिरियानय्ते, नावा कबाहकुनपोर्रो बरोसा इरसि पोंगालय ओनकन्ना एकको कारनाल्क नहगा मंतां.

5 अद बल्हा इत्ते, नना पुट्टा एनिमिदि रोजकुंके नावा कतना आता, नना इस्राएल देसेमते पुट्टा पिच्चर यहुदि जातितोन, बेंजामिनना गोत्रमतोन आंदुन, मूसाना नियमकुन उंदि पोल्लेगुडा तप्पाकोंटा पीसि ताकाना परिसिल्कुना गुंपुनोन आंदुन, इब्रानि कुंटुबते पुट्टा इब्रानि मनकन आंदुन.

6 जोसने वासि, नना कलिसियातुन वेल्लेन तकलिप कियुंदुन. इंका मूसाना नियम परकारम नीतिते ताकमळते अय्ते नना बदे तप्पु किया हिल्लेन.

7 इव अन्नि पोल्ले नाकु वेल्लेन पायदातव इंचि नना मुन्ने इनकुनुंदुन. गानि इंदके किरिस्तु नावाहाटीं कीतदुन मुन्ने, अव अन्नि एर्तमे इंचि नाक तेळियसोत्ता.

8 अचोने आयाका, नावा सामि येसु किरिस्तुन एरपाट कीतदे पेदुदा पोल्ले आंद. कळमतव अन्नि अट्टि पोल्लेगें, येसु किरिस्तुन दोर्किच्चुकुनालय अव अन्निन नना लेक्का किय्योन कचरा इनकुंतन.

9 इंका किरिस्तुनतोनि उंदि आसि मनमळे नावा उदुदेसम. मूसाना नियमपोर्रो बरोसा कीसि नीतिमंतुड आया पराहिल्लेन, गानि किरिस्तुनपोर्रो विस्वासम कीताहाटीं पेनदा नदरते नीतिमंतुड आतन.

10-11 येसु किरिस्तुन आनि ओर हासि मर्रा जीवाते तेदता ताकततुन तेलपिचकुनना इंचि नाकु मंता. ओर बोगांच्ता तकलिपकु आनि हामुरतुनगुडा बोगांचि, ओनलेह्केन नाकु आयगोम. बल्हा अय्नागानि उंदि रोजु पेन नाकुन हामुरताल जीवाते तेहंता इंचि नावा आसे.

पेनदा इनामतुन दोर्किच्चुकुनालय वित्सेक मनना

12 पोरो बव पोल्ले अय्ते रासतन, अव नावा पिस्वरते पूरा आतां इंचि वेहोन. अगा एवतन इंचि इनोन, गानि बगा एवालथ अय्ते किरिस्तु नाकुन पीतोर, अगा एवालथ नना वित्सेक मंतन.

13 विस्वासुल्कुनिटा! नना अगा एवतन इंचि विचारम किय्योन, गानि इद कबळ कीतिन. पज्जो जर्गता पोल्लेन मति मर्रासि, मुन्ने जर्गना पोल्लेन अंदकुनालय वित्सेक मंतन.

14 स्वर्गमतगा एवानोर्कुंक पेन बद इनाम हीतन इंचि केयता, अद इनामतुन येसु किरिस्तुनाहेंदाल दोर्किच्चुकुनालय नना वित्सेक मंतन.

15 अदुनहाटीं मना लोप्पोटाल विस्वासमते बेस बेर्सतोरम मनम अंतोरम, इव अन्नि पोल्लेना बारेमते उंदासि मंदकोम. ओक्कला बद्दना पोल्ले बारेमते मीवद वेरे बतलन्ना विचारम मत्ते, अदुनगुडा पेन मीकु समजांचि वेहंता.

16 अय्नागानि मनम मात्रम पेन मनाकु इदवेरादाका हुपिस्ता सत्तेमतुन पीसे ताकसेक मनना.

17 विस्वासुल्कुनिटा! मिमेट अंतोर उंदासि, नना ताकतापे ताकट. इंका मोमोट वेहताप बोर अय्ते ताकसंतुरो, ओर्कुन हळसि मिमेट करियट.

* 3:2 कतना यहुदि आनि मुसलमान लोक्कुनन्द उंदि रिवाज आंद. इद रिवाज परकारम उळकानगटा कोस्सा तोलदुन कोय्यांतुर. इसंटा रिवाज कीते पेनतोनि करार कीताप इंचि ओर नम्मंतुर.

18 बारित्ते वेल्लेटुर लोकुकल्क किरिस्तु कूसुनपोर्रो हातोर इत्ता पोल्लेक विरोदमते ताकसेक मंतुर. ओर किरिस्तुना कूसता पगातोर आंदुर. ओरा बारेमते नना मीकु बच्चुंगो मल्कां वेहतन, इंदकेगुडा अळसेके वेहासेक मंतन.

19 आकिरते ओर नासडेमा[†] आयानुर, ओरा पिस्वर पीटाहाटीगे. सिग्गु होनना कबाहक कीसेके ओर पेददातनम वेहकुंतुर. दुनियाता पोल्लेन पोर्रेन ओरा मनसु मंतना.

20 गानि मनम अयते ई दुनियाता लोकुकुकुम आयोम, मनम स्वर्गमता लोकुकुकुम आंदुम. अगाटाले मनाकुन पिसागोटानोर सामि येसु किरिस्तु वांतोर इंचि मनम ओना एदुर हळसेक मंतोम.

21 अन्नितवुन ओना कयदा हिळु ईरना ताकत ओनगा मंता. ओर वातस्के आ ताकततोने मना नासडेम आयाना इद मेंदुलतुन बदलांचि ओर हासि तेदतस्के ओन्क दोर्कतसोंटा महिमाता मेंदुललेसीं कियानुर.

4

बस्केळक कुसिते मनना बारेमते पौलुस कराहंतोर

1 अदुनहाटीं विस्वासुल्कुनिटा! मिमेट सामिना विस्वासमते गट्टिगा मंट. मीकुन हळगोम इंचि नावा जीवा बच्चोरो तनलाळसेक मंता. नावा पावरमतोर मिमेटे आंदिर. किरिस्तु वातस्के, नना नावा कबळ महतन इंचि हुप्सानोर मिमेटे आंदिर.

2 युवादिया, सुंतुके अक्काहकुनिटा मिमेट येसु किरिस्तुनोर आंदिर, अदुनहाटीं मिमेट जगडाल्क होळसि सामिना लोप्पो उंदि मनसुने मनना इंचि नना विनंति कीसंतन.

3 नावा दंटातोना! अव रोंड मुर्ताहक जगडाल्क होळसि उंदासि मनालय निमे सहायम कीम इंचि नीकु विनंति कीसेक मंतन. बारित्ते किलेमेन्स आनि नावातोनि कबळ कियानोरतोनि कलियसि अव रोंड मुर्ताहक बेसता कबुर वेहालय वेल्ले कस्टपळतां. अल्हा कबळ कियानोरा पोरोल्क पेनदागा मनना बस्केळक पिस्सना पिस्वरता पुस्तकमते रासि मंता.

4 मिमेट सामिना लोप्पो बस्केळक कुसिते मंट, नना मर्रा इदे पोल्ले वेहासेक मंतन मिमेट बेस कुसिते मंट.

5 मिमेट सादा-सिंपलतोर इंचि अंतोर्क तेळियनाल पिस्सट, बारित्ते सामि वायाना वेला दगोरा मंता.

6 बदे पोल्लेक पिक्किर कियमट, गानि अन्नि पोल्लेनहाटीं पेनदुक पारतना कीसि मीवा अब्सरमतुन वेहाट्ट, दन्यवाद कीसि दान तल्कट.

7 अस्के बोरे अर्तम किया परवसोंटा सांतितुन पेन मीकु हीता. मिमेट येसुनोर आताहाटीं अद सांति मीवा मनसुन, विचाराल्कुन बेस कापाळसि ईरता.

8 विस्वासुल्कुनिटा! आकिरते इंकुंदि पोल्ले वेहानद मंता. अद बतल इत्ते, बव पोल्लें अयते सत्तेम, तल्सकुननालायक मंतां, अव पोल्लेना बारेमतेन विचारम कीसेक मंट. इत्ते, बरोसालायक पोल्लें, कदरलायक पोल्लें, नीतिता पोल्लें, पवित्र पोल्लें, कुसिता पोल्लें, सोबांचना पोल्लें इवे पोल्लेना बारेमते विचारम कीसेके मंट.

9 मिमेट नावाहेंदाल करियसि दोर्किचकुत्ता पोल्लें, केंजता पोल्लें, आनि हळता कबाहक इव मत्ताप ताकट. अस्के सांति हियना पेन मीकुन कापाळता.

पिलिपिया कलिसियातोर्क पौलुसना जोहार

10 मिमेट मर्रा उंदि मल्का नावा बारेमते विचारम कीसि नाक सहायम कीतिर. अदुनहाटीं नना सामिना लोप्पो वेल्लेन कूस मंतन. इल्हा सहायम कियना इंचि मिमेट मुन्नेन विचारम कीसि मत्तिर, गानि मीकु मोका दोर्काहिल्ले.

† 3:19 नासडेम नासडेम इत्ते, नरकमते बस्केळक पोत्तना तळमिते मंचि तनलाळसेक मनमळ.

11 नाकु बद्दुनदो अब्सरम मंता इंचि नना इल्हा इंचेक हिल्लेन. बारित्ते बसोंटा परिस्तिति वायिनागानि कुसितेन पिसमळ नना करियतन.

12 बतले हिलवस्के बल्हा पिस्सना, मत्तस्के बल्हा पिस्सना इद इंका नाक तेळियता. बसोंटा वेला वायिना, बसोंटा परिस्तिति वायिना, कर्वेस्सि मनिना, पीर निडिस मनिना, वेल्ले मत्तस्के बल्हा मनना, तक्को मत्तस्के बल्हा मनना इव अन्नि नना करियतन.

13 किरिस्तु नाक ताकत हीसेक इंचि, बसोंटा परिस्तिति वायिनागानि नना अन्नि किया परांतन.

14 बतलन्ना आयि, मिमेट नावा तकलिपते सहायम कीतिर, बेस कीतिर.

15 नना सुम्बुने बेसता कबुर वेहचि मेसिडोनिया इनना मीवा एरियाताल होत्तन. अस्के मिमेट पिलिपियाता विस्वासुल्क तप्पा, बेरे बदे कलिसियातोर नाक सहायम किया हिल्लुर. इद पोल्ले मीकु एरपाटे.

16 इल्हेने नना बस्के अय्ते तेसलोनि सहरते मत्तन, अस्केगुडा अब्सरम मत्तस्के नाक मिमेट वेल्लेन मल्कां सहायम कीतिर.

17 नाक मीहेंदाल सहायम गावाले इंचि आयो, गानि मिमेट कियना बेसता कबाहकुनहेंका मीकु पेनदाहेंदाल आसिर्वाद दोर्कसेकेन मनना इंचि नावा विचारम मंता.

18 नहगा अन्नि मंतां, नाक बच्चोर अय्ते गावाले दानकन्ना एक्को मंतां. मिमेट इपपरदिसुनतोनि लोहता सहायम नाक दोर्कता. अवुनतोनि नावा अब्सराल्क अन्नि तीरतां. बल्हा अय्ते मोक्कु हीतारित्ते पेन दाना गब्बु एतंता, अल्हेने मिमेट लोहतवुन पेन कुसिते एतकुंता.

19 नना सेवा कियना पेनदागा मनाकु गावाले मत्तादुंकन्ना एक्को संपत्ति मंता. अदुनहाटी मनाकु बतल अब्सरम मनिनागानि, मनम किरिस्तु येसुना लोकुल्क आताहाटी पेने दाना महिमाहेंदाल अदुन पूरा कीता.

20 मना पेनबाबान युगा-युगाल्कुनदाका स्तुति कीकोम. आमीन.

21 येसु किरिस्तुन विस्वासम कीतोर अंतोर पेनदा लोकुल्कुंक नावा जोहार. इगे नावातोनि मत्तोर विस्वासुल्कगुडा मीकु जोहार वेहसेक मंतुर.

22 इगेटा पेनदा लोकुल्क अंतोर, कास कैसर राजांक सेवा कियानोर विस्वासुल्क मीकु जोहार वेहसेक मंतुर.

23 मना किरिस्तु येसु सामिना कुर्पा मीवा आत्मातोनि मन्निकांटी.

कुलुसि

कुलुसि विस्वासुल्कुंक पौलुसना सिट्टि

इद सिट्टिेता बारेमते गिचचो परिचयम

रासतोना पोरोल: पौलुस

रासता कालम: इसवि सन 60

इद सिट्टिे कुलुसि सहरता विस्वासुल्कुनाहाटी येसुना प्रेरित पौलुस रासतोरे. इद कुलुसि सहर आसिया एरियाते वांता. इगेटा विस्वासुल्क पौलुसुनाहेंदाल आयो, गानि कुलुसि सहरतोरे वरोर इपप्रास इनानोना हेंदाल विस्वास कीतुर.

अगाटा कलिसियाते इच्चुर लोकुल्क आबद्दम कराहनोर मंतुर इंचि इपप्रासुनाहेंदाल पौलुसुंक तेळियता. ओर तप्पुड बोदा वेहुंदुर आनि रीति रिवाजकु, पद्दतकु मत्ताप ताकतेने मुक्ति दोर्कता इंचि करहुंदुर.

अदुनहाटी पायदा हिल्वव दुनियाता रीति रिवाजकु, पद्दतकु कराहानोरा पोल्ले केंजमट इंचि वेहालय पौलुस इद सिट्टिे रासि विस्वासुल्कुनगा लोहतोर. अल्हेने मिमेट वरोक-वरोर पावरम कीम्ट, विस्वासमते गट्टिेगा मंटु, किरिस्तुना पोल्लेते बेस्सेके होंट इंचिगुडा वेहतोर.

बगा बतल मंता

जोहार आनि परिचयम 1:1-8

किरिस्तुना स्वभावम आनि कबळ 1:9-2:19

किरिस्तुनतोनि पिस्सना पूना पिस्वर 2:20-4:6

आकिरता बोदां 4:7-18

जोहार

1-2 पेनदा इच्चाताल किरिस्तु येसुना प्रेरित आतोन नना पौलुसुन आनि तम्मुर तिमोतिनाहेंदाल, कुलुसि सहरते मंदना पवित्र अल्हेने किरिस्तुनलोप्पो विस्वासमलायक कलिसियाता लोकुल्कुंक इद सिट्टिे रासेक मंतन. मना पेनबाबानाहेंदाल मीक कुर्पा, सांति दोर्किकांटी.

दन्यवादता पारतना

3 मोमोट मीवाहाटीं बस्केळक पारतना कीसेके, मना सामि येसु किरिस्तुना पेनबाबांक दन्यवाद कीसेके मंतोम.

4 बारित्ते, किरिस्तु येसुना पोरोटा मीवा विस्वासम आनि अंतोर पेनदा लोकुल्कुन मिमेट कियाना मीवा पावरमता बारेमते केंजतोम.

5 मीवाहाटीं स्वर्गमते उंदि आसे इर्सि मंता इंचि, अदुना बारेमते मिमेट मुन्नेने बेसता कबुरता सत्तेम पोल्लेते केंजतिर.

6 अदे बेसता कबुर मिहगा वासि, पूरा दुनियाते पैलांचि लोकुल्कुना पिस्वरतुन बदलांचेके मंता. अल्हेने बस्के अयते अदुन मिमेट केंजतिर, केंजसि पेनदा निजम कुर्पातुन एरपाट कीसि स्विकार कीतिर, अस्केटाल अद मीवा पिस्वरतुनगुडा बदलांचेके मंता.

7 आ बेसता कबुर मावा पावरमगल्ला इपप्रासुनाहेंदाल मिमेट करियतिर. ओर मावातोनि कलियसि कबळ कियानोर आनि मीवाहाटीं किरिस्तुना विस्वासमलायक सेवक आंदुर.

8 पवित्र आत्माते मत्ता मीवा पावरमता बारेमते ओरे माक वेहतोर.

9 अदुनहाटीं मोमोट अव पोल्ले केंजतस्केटाल, मिमेट पूरा आत्माता तेल्चिते, बुद्दिदेते दाना इच्चा मत्ताप निडागोम इंचि बस्केळक पारतना कीसेके मंतोम.

10 इदुनहेंदाल, मिमेट अन्नि तीस्कुने सामिन कूस कियालय मीवा पिस्वर दानकु इस्टमाताप मनंता, मीक हरेक बेसता कबळते पलम दोर्किसि, पेनदा तेल्विते बेस्सके दांतिट.

11 दाना महिमाता अन्नि तीरकुना बलमतोनि मीकन गट्टिगा कीता, अदुनहाटी अन्नि तीरकुना ओप्के, ओर्सकुनमळ इद मीक आनंदमतोनि दोर्कता.

12-13 अदुनहाटी पेनबाबांक मिमेट दन्यवाद कीम्टु. ओर मनाकुन वेलगुने मंदना पेनदा लोकुकुना वारसानहक्कुते तूस एताना लायक कीतोर. मनाकुन हीकटता कय्दाल इळबळिच्चि ओना पावरमगल्ला मरिना राज्यमते होळाहतोर.

14 ओना मरिनाहेंदाले मनाकु मुक्ति दोर्कता, इत्ते ओनाहेंदाल पापालकुनाल मापि दोर्कता.

किरिस्तुंक अन्निनपोर्रो अदिकारम मंता

15 ओर दिस्सवसॉटा पेनदा रूपम आंदुर, ओर दुनिया पुट्टका मुन्नेटाले मत्ताहाटी, दुनियाते पुटतवुने अन्निनपोर्रो पेदूदोड आंदुर.

16 बारित्ते, स्वर्गमते आयि, बूमिपोर्रो आयि, दिस्सानव आयि, दिस्सुवव आयि, राजगदूदें आयि, सरकार आयि, पेदूदाल्क आयिर, आदिकारिल्क आयिर इव अन्निन ओनतोनि, ओनाहेंदाल आनि ओनाहाटी पुटिचमळ जर्गता.

17 पुटिस्ता अन्निने ओरे मोदाटोर, ओनाहेंदाले अन्नि नित्तिसि मंतां.

18 मेंदुललेसी मंदना कलिसियाकु ओर तल्ला आंदुर. अन्नि पोल्लेने पेदूदोड आयागोम इंचि हातोरा लोप्पोटाल मोट्टा मोदाला तेदतोर ओरे आंदुर. ओरे मोदोल आंदुर.

19 बारित्ते ओनालोप्पो पेनदा गुनम पूरा निडसि मत्तेने बाबो कूस मनंतोर.

20 कूसुनपोर्रो किरिस्तु पोंगागोटता नेत्तुरताहेंदाल, बूमिपोर्रो आनि स्वर्गमते मंदना अन्नि वस्तुकुन ओनतोनि कल्पिसि ओरा नड्डुम सांति मनागोम इंचि पेनदा इच्चा.

21 दीनकन्ना मुन्ने मिमेट पेनदागटाल लक्कु मत्तिर, कराब कबाह्कुनाहेंदाल दाना पगातोर आसि मत्तिर.

22 इंदके मीकन पेनदा मुन्ने पवित्र, डाग हिलाकोटा, दोसेम हिलाकोटा निल्हागोम इंचि ओर ओना हामुरहेंदाल मीवा मेंदुल्ला हव्वितुन ओना मेंदुल्ले कल्पकुत्तोर.

23 गानि मिमेट विस्वासमते हीके-हेके आयाकुंटा गट्टिगा निल्सि मंटु, मिमेट केंजता बेसता कबुरता आसेतुन होळ्ळसमट. अद बेसता कबुर मब्बुन हिळता अंतोर लोकुकुकुंक वेहमळ जर्गसेक मंता. अदे सेवा कियानाहाटी नना, इत्ते पौलसुन पेनदा सेवक आतन.

कलिसिया बेर्सानाहाटी पौलस तकलिप अरमळ

24 किरिस्तुना मेंदुलतसॉटा कलिसियाताहाटी बवय्ते बादां तकको मत्तां. अव बादन नावा मेंदुलताहेंदाल पूरा कीसेके मंतन, अदुनहाटी इंदके मीवाहाटी बवय्ते नावा दुक्काल्क मंतां अबुने नना आनंदमते मंतन.

25-26 पेनदा पोल्लेतुन मीकु पूरा वेहानाहाटी पेन नाक अप्पजेपता जिम्मेदारिहेंदाल नना कलिसियाता सेवकुन आतन. अद पोल्ले वेल्लेन कालालकुनाल, पीळि-पीळिनाल मर्ममते मत्ता, गानि इंदके दाना पवित्र लोकुकुकुंक तेळियागोटता.

27 यहूदि आयवोरा लोप्पो इद मर्ममता महिमाता विलुवा बतल आंद मना लोकुकुकुंक तेळियाना इंचि पेन इनकुत्ता. मीवाल्लोप्पो महिमाता आसे आसि मनना किरिस्ते आ मर्मम आंद.

28 हरेक मनकन किरिस्तुनलोप्पो पूरा कीसि पेनदा मुन्ने निल्हागोम इंचि, मोमोट किरिस्तुना बारेमते हरेक मनकंक कडकते वेहांतोम, हरेक मनकंक पूरा तेल्विते करहंतोम.

29 इदुनहाटी किरिस्तुना पूरा ताकत नावा लोप्पो गट्टिगा कबळ कीसेके मंता, दानाहेंदाल नना मनसु दोस्सि बागा कस्टम कीसेके मंतन.

2

1 मिमेट नाकुन ह्ळाकोन्ना गानि मीवाहाटी, लोदिकिया सहरते मंदना विस्वासुल्कुनाहाटी आनि कळमता अंठोर विस्वासुल्कुनाहाटी नना वेल्लेन कस्टम कीसेके मंतन, इद मीक तेळियाना इंचि नावा इच्चा मंता.

2-3 इद कस्टम बारि कीसेके इत्ते, मिमेट मीवा विस्वासमते दैरनेमते मनना, मिमेट पावरमते वरोंक-वरोर कलियसि मंदना, मीक पूरा बुद्धिदता पूरा दनम दोर्कना, पेनबाबाना मर्मम इत्ते किरिस्तुना लोपो मक्किस् मत्ता बुद्धिद, तेल्विता कजानातुन एरपाट कियाना.

4 बोरन्ना तिय्यटा पोल्लेनतोनि मीकुन पसांचामन्नि इंचि नना इद वेहासेक मंतन.

5 नना मेंदुल्ले मिहागटाल लक्कु मंतन, गानि आत्माते मिहागेन मंतन. मीवा रोजता पिस्वर आनि किरिस्तुनलोपो मंदना मीवा गट्टि विस्वासम ह्ळसि नाक वेल्लेन कुसि आसेक मंता.

किरिस्तुनलोपो निडिसि मंतिर

6 इंदके मिमेट किरिस्तु येसुन सामि इंचि स्विकार कीतिर, अय्ते ओर बल्हा वेहतोर अल्हेने ताकाटु.

7 मराता हिह्कुनलेसी मिमेट किरिस्तुनलोपो होळियसि होंटु, बेस्केके होंटु. मीक कराहतालेसी विस्वासमते गट्टिगा आसेके होंटु, बस्केळक पेनदुक दन्यवाद कीसेके मंटु.

8 मिमेट जेगर्ताते मंटु! बोरन्ना वासि मीकुन दुनियाता तेल्वि पोल्लें, एर्तम दोका हि्य्यना पोल्लें वेह्चि पसांचा परांतुर, अव पोल्लें मनकालोर्कुना रीतिरिवाजकुनालेसी, दुनियाते एनकटा कराहता पोल्लेनलेसी मंतां गानि किरिस्तुना पोल्लेनलेसी हिल्लें.

9 बारित्ते पेनदाव अन्नि गुनाल्क किरिस्तुना मेंदुल्ले मनंतां.

10 अंठोर राज्येम कियानोर्कुनपोरों, अदिकारकुनपोरों किरिस्तु तल्लालेसी मंतोर, ओनालोपो मिमेट पूरा आतिर.

11 मीवा मेंदुल्ला पापालक पायताहाटी ओनालोपो मीकुन कतना कियमळ जर्गता. अद कतना कय्दे कीतद आयो गानि किरिस्तुनलोपो कीतद आंद.

12 अचोने आयाका, मिमेट बापतिस्मा एतताहेंका किरिस्तुनतोनि बोंदा दोस्ताप आतिट. हातोरवेटाल ओन जीवाते तेहाता पेनदा सक्ति पोर्री मिमेट विस्वासम इरताहाटी ओनतोनि जीवातेगुडा तेदतिट.

13 मिमेट तप्पु कबाहक कीतिर, यह्दि आयवोर मत्तिर, अदुनहाटी आत्माते हासि मत्तिर. गानि पेन मना अन्नि पापालकुन मापि कीसि किरिस्तुनतोनि मीकुन जीवाते तेहता.

14 नियमकुना पुस्तकम मनाकु विरोदमते मत्ता, गानि पेन किरिस्तुन कुसुनपोरों मोल्लां कोह्किसि अद पुस्तकमताल मनाकु विरोदमते मत्ता पोल्लें तेंडसि पोहता.

15 इल्हा राज्येम कियानोर्कुक आनि अदिकारकुंक पेन ताकत हिलाकोटा कीता. कीसि किरिस्तु कुसुनपोरों जीवा हीसि गेल्सताहाटी ओरा अंठोरा मुन्ने तमासा आसि सिग्गु हिलाकोटा आता.

16 अदुनहाटी मीवा तिनना-उनना बारेमते आयि, पंडुगुना बारेमते आयि, अमासा हिलाकोटे नोमकेम रोजुना बारेमते आयि बोर्कुने मीवा न्यायम किया हियमटु.

17 इवन्निगुडा मुन्ने वायाना निजम पोल्लेना नीडा आंद, आ निजम पोल्ले किरिस्तु आंदुर.

18 बोरन्ना सतागा सिन्नातनम ह्पिचुकुनानोर, दूताना पूजा कियानोर, ह्ळता पोल्लेनपोरों, ओना मनसुना पालतु पोल्लेनपोरों पेद्दिरकेम कियानोना हेंदाल मीवा पेनदा इनामतुन तपिचुकुना हियमटु.

19 असोंटा मनकल पूरा मेंदुल्ला कील्कुन, नराल्कुन उंदि कीसि, पेनदाहेंदाल मेंदुल्लुन बेसांगोटना तल्ला, इत्ते किरिस्तुन पीसि मन्नोर.

20-21 गानि इंदके मिमेट दुनियाता पोल्लेनाल किरिस्तुनतोनि हासि होत्तिर, अय्ते “अद इटमट, अदुन तिनमट, अदुन पियमट” इंचि दुनियातोरालेसी नियमकुने बारि ताकसेक मंतिट?

22 इवन्नि पोल्ले वाळकुत्तारित्ते नासडेम आसि होनना वस्तुकुनलेसीं मंतां, बारित्ते अव सिराप मनकना नियमाल्क आनि कराहमळ्क संबंदिस्तव आंदुं.

23 इव नियमकुने मना मनसुनाल तयार कीता बक्ति कियालय, सिन्नातनम हुपिच्चकुनालय, मना मेंदुलतुन तीराता कस्टम कीकुनालय बुद्धि अय्ते मंता, गानि मना मेंदुलता कराब इच्चान आपालय इव बतल कबळ्क ओज्जो.

3

1 मिमेट किरिस्तुनतोनि जीवाते तेदसि मंतिट, किरिस्तु स्वर्गमते पेनदा तिना बाजुंक उदसि मंतोर, अय्ते अगाटा पोल्लेन दोर्किच्चकुनना कोसिस कीम्टु.

2-3 इंदके मीवा पडाना पिस्वर हासि होत्ता आनि मीवा पूना पिस्वर किरिस्तुनतोनि पेनदा लोपो मक्किचि मंता. अदुनहाटी मिमेट बूमिपोर्रोटा पोल्लेने आयो गानि स्वर्गमता पोल्लेने मनसु ईरट.

4 मनाकु पिस्वर हीता किरिस्तु बस्के अय्ते मर्रा दिस्सानुर, अस्के मिमेटगुडा ओनतोनि ओना महिमाते दिस्किर.

पळाना पिस्वर आनि पूना पिस्वर

5 अदुनहाटी बूमि पोर्रोटव मना कराब गुनाल्क इत्ते बोगमतनम, कराब विचाराल्क, जोसते मनमळ, इंकावरोनद आसे पडमळ, आस्ति कियमळ इद अय्ते बोम्मांक मोळ्कता लेक्कातेन वांता. इव अन्निन हव्विस पोहाट.

6 इवुनाहाटीगे पेनदा होंग दाना पोल्ले केंजवोरा पोर्रो वांता.

7 मिमेटगुडा मुन्ने आ पिस्वरते पिसानस्के, ओरालेसीगे ताकिदिर.

8 गानि इंदके मिमेट होंग आयमळ, गुल्गमळ, पगा पियमळ, अपमानम कियमळ, तोळ्दाल कराब पोल्ले वळ्कमळ इवन्निन होळ्सीम्टु.

9 मिमेट वरोंक-वरोर आबद्दम वळ्कमट, बारित्ते मीवा पडाना गुनमतुन आनि दाना कबाहकुन तेंडसि पोहतिर.

10 इंदके पूना पिस्वर पिसमळ सुख कीतिर, मनाकुन पुटिस्ता पेनदा गुनम मत्ताप, मिमेट तेल्वि दोर्किच्चकुनालय पूना तयार आसेक मंतिट.

11 इवने युनानि आयिर, यहूदि आयिर, कतना कीतोर आयिर, कतना कियवोर आयिर, केडाते मनानोर आयिर, स्कूति जातितोर्क आयिर, दासुड आयिर, दासुड आयवोर आयिर ईरा लोपो बतल तेडा हिल्ले. किरिस्तु अन्निने, अंतोर लोपो मनंतोर.

12 पेन मीकुन पवित्र आनि पावरमगल्ला लोकुलकुनलेसीं पेर्कुत्ता. अदुनहाटी दया कियमळते, पायदा कियमळते, सिन्नागासि मनमळते, सादा-सिपल मनमळते ओप्के पीसि ताकट.

13 सामि मीवा तप्पुकुन मापि कीतोर, अय्ते मिमेटगुडा वरोना तप्पुकु वरोर मापि कीम्टु. मीलोपो बोनकन्ना इंकावरोन पोर्रो बतलन्ना तप्पु दोस्साना मत्ते, ओर ओप्केते वरोनद वरोर तप्पुकुन मापि कीकुंटु.

14 अचोने आयाका मिमेट अंतोर उंदासि पावरमते दोहताप मंट.

15 मीवा मनसुने किरिस्तुना सांतिता राज्येम ताकिकांटी, इदुनहाटीगे मीकुन उंदि मेंदुल आसि केयमळ जर्गता. पेनदुक बस्केळ्क दन्यवाद कीम्टु.

16 किरिस्तुना पोल्ले मीलोपो निंडिसि मन्निकांटी, मिमेट पूरा तेल्विते वरोंक-वरोर करहट, तेळियागोट्सि वेहाट, पेनदुक दन्यवाद कीसेके मना मनसुनाल बजनकु, कीर्तनकु, पाटां पारसेके होंट.

17 अचोने आयाका, पोल्ले आयि, कबळ आयि बतल किथ्यिना मिमेट सामि येसुना पोरोलतेन कीम्टु. ओनाहेंदाले पेनबाबांक दन्यवाद कीम्टु.

पूना पिस्वरते मनमळ

18 मरमिं आता मुरताहकुनिटा! मिमेट पेनदुक नच्चानालायक मीवा मुय्दुर्कुना पोल्लेपोर्रो ताकट.

19 मुय्दुर्कुनिटा! मीवा मुत्तोहकुन पावरम कीम्ट, अबुनतोनि कडकते मनमट.

20 पिलालकुनिटा! मिमेट अन्नि पोल्लेने मीवा यावल-बाबाल वेहताप ताकट, इल्हा ताकते सामिक आनंदम आंता.

21 बाबोरिटा! मिमेट मीवा पिलालकुन चिड-चिड कियमट, अल्हा कीते, ओर निरास आंतुर.

22 दासुल्कुनिटा! मिमेट अन्नि पोल्लें ई दुनियाते मनना मीवा मालकुल्क वेहताप कीम्ट. मिमेट कियानद मनकालोर्कुन कूस कियाना दासुनलेसी हृप्सालय आयो गानि बेस मनसुने, पेनदा वेरेंते कीम्ट.

23-24 मिमेट बतलयते कीतिर मीवा मनसुनाल कीम्ट, मिमेट मनकालोर्कुनाहाटीं आयो गानि सामिनाहाटीं कीसेके मंतिट. मिमेट सामि किरिस्तुना सेवा कीसेके मंतिट. अदुनहाटीं ओनाहेंदाल मीकु वारसानता इनाम दोर्कता, इद मीकु एरपाटे मंता.

25 पेन बोने मोकम हळसि न्यायम किय्यो, बोर अयते तप्पु कीतोर, दाना सिक्सा ओनकु दोर्कता.

4

1 मालाकुल्कुनिटा! स्वर्गमते मीकुगुडा वरोर मालक मंतोर, इदुन मति इर्सि मिमेट मीवा दासुल्कुनतोनि न्यायमते, बेदबाव हिलाकोटा ताकट.

पारतना कियालय वेहमळ

2 मिमेट बस्केळक पेनदुक पारतना कीसेके मंट. दानकु दन्यवाद कीसेके जेगर्ताते मंट.

3 नना किरिस्तुना मर्ममता पोल्ले वेहताहाटीं जेलते मंतन, इदे पोल्लेतुन मोमोट अंतोर्क वेहानाहाटीं पेन माकु मोका हिग्यि इंचि मावाहाटीं गुडा पारतना कीम्ट.

4 नाकु बल्हा वेहाना मंता अल्हेने नना इद कबुरतुन बेस तेळियागोट्टिस वेहानाहाटीं पारतना कीम्ट.

5 विस्वासम कियवोरतोनि बेस तेल्चिते ताकट, मोका दोर्कतस्के ओर्क बेसता कबुर वेहाना पायदा तप्पाकोटा एतट.

6 हरेक मनकंक बेस जवाब हिया वायमळ गावाले इंचि मीवा पोल्ले बस्केळक कुर्पाते आनि होव्वोर वाटते रसि मत्ताप मना पीता.

आकिरता पोल्लें

7 पावरमगल्ला तुकिकुस दादल विस्वासमलायक सेवक आंदुर. ओर नावा बारेमते अन्नि पोल्लें मीक वेहांतोर, ओर नावातोनि कलियसि सामिन लोप्पो सेवा कियानोर आंदुर.

8 ओर मावा बारेमते अन्नि पोल्लें मीक तेळियागोट्टिस मीवा मनसुकुंक दैरनेम हियाना उदूदेसमते नना ओन मीहेके लोहतन.

9 नना ओनतोनि मीवा लोप्पोटोरे विस्वासमलायक, पावरमगल्ला उनेसिम दादानगुडा लोहतन, ओर इग्गेटव अन्नि पोल्लें मीक वेहानुर.

10 नावातोनि जेलने मनना अरिसतरकुस पोरोलतोर दादल मीक जोहार वेहासेक मंतोर, अल्हेने बरनाबासुना दग्गेटा दादाल मरकुस इनानोरगुडा मीक जोहार वेहासेक मंतोर. (नना मीक मुन्नेने वेहताप, मरकुस मिहगा वाते ओन बेस हुळाट.)

11 युसतुस इनना येसुगुडा मीक जोहार वेहासेक मंतोर, कतना आतोराव्टेटाल सिराप ईर मुव्वेरे पेनदा राज्येमताहाटीं नावातोनि कबळ कीसेक मंतुर, ईराहेंदाल नावा जीवाक सांति दोर्कसेक मंता.

12 किरिस्तु येसुना दासुड इप्रास ईर मीवा लोप्पोटोरे आंदुर, मीक जोहार वेहासेक मंतोर. मिमेट पेनदा इच्चा मत्ताप पुरागा आसि, विस्वासमते गट्टिटगा निल्सि मनागोम इंचि ओर बस्केळक मीवाहाटीं जोर हीसि पारतना कीसेके मंतोर.

13 मीवाहाटीं, लोदिकिया आनि हियरापोलि सहरता विस्वासुल्कुनाहाटीं ओर वेल्लेने मेहनत कीसेके मंतोर इंचि, इद पोल्लेक नना ओना गवाइ मंतन.

14 पावरमगल्ला डाक्टर लूकाल आनि देमास ईर मीक जोहार वेहासेक मंतुर.

15 लोदिकियाता विस्वासुल्लकुंक आनि नुंपा अक्कांक अल्हेने दाना लोतागा जमा आयाना कलिसियातोरुंक नावा जोहार वेहाट.

16 इद सिट्टिटुन मिमेट हदुव्ता पजा, इदुन लोदिकिया सहरता कलिसियातोरुंक लोहचि, अगागुडा हदवा वेहाट आनि लोदिकियाताल वाता सिट्टिटुन मिमेटगुडा मीवा कलिसियाते हद्विसि वेहाट.

17 अल्हेने अरकिपुसुंक, “सामि नीकु अप्पजेपता सेवातुन तप्पाकोटा पूरा कीम,” इंचि वेहाट.

18 नना पौलसुन, नावा कय्देन रासि मीकु जोहार वेहासेक मंतन, नना जेलते मंतन इंचि पारतनाते मति कीम्ट. पेनदा कुर्पा मीवातोनि मन्निकांटी. आमेन.

1 तेसलोनि

तेसलोनि विस्वासुल्कुंक पौलुसना मोदाटा सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 50-54

तेसलोनि सहर मेसिडोनिया एरियाता राजदानि मत्ता. अगा यहूदि आयवोर मनुंदुर, गानि ओर यहूदि मतमतुन नम्मुंदुर. पौलुसनाहेंदाल अगागुडा विस्वासुल्क तयार आतुर. पौलुस वेहता बेसता कबुरतुन लोकुल्कु विस्वासम कीसंतुर इंचि यहूदिल्क पौलुसुन विरोद कियालय दल्गातुर. अदुनहाटी पौलुस तेसलोनि सहर होळसि एतेंस सहरते होत्तोर. अगटाल विस्वासुल्कुना परिस्तिति कन्कुनालय तिमोतिन मर्रा तेसलोनि सहरते लोहतोर. ओर वापस वासि अगाटा विस्वासुल्कुना परिस्तिति पौलुसुंक वेहतोर.

पौलुस अगाटा परिस्तिति केंजसि कूस आतोर. पजा तेसलोनि सहरता विस्वासुल्क, दैरेनमते आनि विस्वासमते गट्टिगा मंदालय ओर्क इद मोदाटा सिट्टि रासि लोहतोर.

अल्हेने किरिस्तु बस्के मल्सि वायानुर, ओर वायाका मुन्ने हाता विस्वासुल्कुनद बतल आंता? इसोंटा पोल्ले इद सिट्टिते रासि मंतां.

बगा बतल मंता

जोहार आनि परिचयम 1:1

दन्यवाद आनि स्तुति कियमळ 1:2-3:13

किरिस्तु वेहताप पिस्साना बारेमता बोदां 4:1-12

किरिस्तु मर्रा वायना बारेमते समजांचि वेहामळ 4:13-5:11

आकिरता पोल्ले 5:12-22

आकिरता बोदां 5:23-28

जोहार

1 नना पौलुस, सिल्वानुस* आनि तिमोति मोमोट इद सिट्टि मीक तेसलोनि सहरते मंदना कलिसियातोराराहाटी रासेके मंतोम.† मिमेट पेनबाबाल आनि सामि येसु किरिस्तुनतोन कलियसि मंतिट इंचि मीक पेनदाहेंदाल कुर्पा, सांति दोर्किकांटी.

तेसलोनि कलिसियातोर विस्वासम

2 मोमोट पारतनाने मीवा मति कीसेके, मी अंटोराहाटी पेनदुक बस्केळक दन्यवाद कीतोम.

3 मिमेट विस्वासमते कियाना कबाटुन, पावरमते कियाना मीवा कस्टमतुन अल्हेने सामि येसु किरिस्तुनापोरोंटा आसेते ओप्के पीसि मत्तादुन मोमोट मना पेनबाबाना मुन्ने बस्केळक मति कीसेके मंतोम.

4 विस्वासुल्कुनिटा! पेन मीकुन पावरम कीसि पेर्ता इंचि माक एरपाटे मंता.

5 बारित्ते, मोमोट वेहता बेसता कबुर सिराप पोल्लेनतोन आयो गानि ताकतते, पवित्र आत्माते आनि पूरा गट्टि विस्वासमते मिहगा वाता. मोमोट मीवा नड्डुम मंचेके बल्हा ताकतोम मीक एरपाटे मंता.

6 मिमेट वेल्ले दुक्कमते मत्तस्केगुडा पवित्र आत्मा हियना कुसिते बेसता कबुरतुन केंजतिर. मिमेट मावालेसी, सामिनलेसी ताकालय सुस्व कीतिर.

7 इल्हा मिमेट अकाया आनि मेसिडोनिया राज्येमता विस्वासुल्क मीकुन हळसि ताकालय, मिमेट ओर्क उंदि उदाहरनलेसी आतिर.

* 1:1 सिल्वानुस सिल्वानुस इले सिलास आंदुर, ओन्क रोंडु पोरोली मत्तां. † 1:1 इद सिट्टि पौलुस रासतोर, सिल्वानुस आनि तिमोति ओनतोन जोहार वेहतुर.

8 बारित्ते मीहेंदाल सामिना पोल्ले सिराप मेसिडोनिया आनि अकाया राज्येमतेन एवता इंचि आयो गानि पेनदापोर्रोटा मीवा विस्वासमता बारेमते अन्नि जेगाने तेळियसि होत्ता. अदुनहाटीं मोमोट मीक वेहाना बतल अक्सरम हिल्ले.

9 बारित्ते मोमोट मिहगा वातस्के, मिमेट माकुन दग्गेरा कीसि बल्हा बेस हळतिर, औरे मावा बारेमते वेहासेक मंतुर. अल्हेने मिमेट बोम्माना पेनकुन होळसिसि, जीवाते मनना निजम पेनदा सेवा कियालय बल्हा मलतिर इंचि वेहासेक मंतुर.

10 पेन येसुन हातोरव्टेटाल तेहता. इंदके स्वर्गमताल दाना मर्री येसु मल्सि वायानदुन एदुर हळसेक मंतिर, इंचि इव पोल्ले अंटोर्क वेहासेक मंतुर. वायाना पेनदा होंगुनाल औरे येसु मनाकुन पिसागोटंतोर.

2

तेसलोनि सहरते पौलुसना सेवा

1 विस्वासुल्कुनिटा! मोमोट मिहगा वातद एर्तम आयाहिल्ले इंचि मीक एरपाटे मंता.

2 गानि दीनकन्ना मुन्ने पिलिपिया सहरते माकुन बदनाम कीसि वेल्लेन दुक्कम हीतुर. लोकुल्क माकुन बागाने विरोद कीतुर. विरोद कियिनागानि पेनदा बेसता कबुर मीक वेहालय पेन दैरनेम हीता, इदगुडा मीकु एरपाटे मंता.

3 बारित्ते मावा बोदा गलतितेनो, कराब विचाराल्कुनेनो, पसांचना उद्देसमते वेहतद आयो.

4 गानि पेन माकुन दाना बेसता कबुरता लायक कीसि, बेसता कबुरतुन वेहालय माक अप्पजेपता. अदुनहाटीं मावा मनसुन परिकसा कीसि हळना पेनदुन कूस कियालय वेहंतोम गानि मनकालोर्कुन कूस कियालय पेनदा पोल्ले वेहोम.

5 बारित्ते मोमोट मीकुन बस्केने बुद्दगिच्चना पोल्ले वळका हिल्लोम. अल्हेने मावा आस्तिताहाटीं मीकुन नळेह किया हिल्लोम, दीनकु पेने गवाइ मंता, इंचि मीक एरपाटे मंता.

6 इच्चोरे आयाका, मोमोट अयते किरिस्तुना प्रेरितुल्कुम इंचि मीपोर्रो मावा अदिकारम हूपिस्तोमे, गानि मिमेट आयि, वैरेटोर आयि, इंका बोनाहेंदाले आयि पेद्दातनम दोर्किच्चुनालय मोमोट हळा हिल्लोम.

7 तल्लुर दाना पिलाल्कुन बल्हा अवरिचकुंतनो, अल्हे मोमोटगुडा मीकुन बेस हळकुत्तोम.

8 अदुनहाटीं मीपोर्रो इच्चोर पावरम मंता गदा, मोमोट मीक सिराप पेनदा बेसता कबुरे आयो, मावा जीवागुडा हियालय तथार मत्तोम. मिमेट अच्चोर पावरमतोर आसि मत्तिट.

9 विस्वासुल्कुनिटा! मावा कस्टम, तकलिप मीक मते मंदार. मोमोट मीक बोनके बर्वु आयामन्नि इंचि नर्का-पिय्यल कबळ कीतोम. अल्हा कीसेके पेनदा बेसता कबुर मीक वेहचि मत्तोम.

10 मी विस्वासुल्कुना नड्डुम मोमोट बल्हा पवित्रते, सत्तेमते, दोसेम हिलाकोटा मत्तोम, इदुना मिमेटे गवाइ मंतिट, पेनगुडा गवाइ मंता.

11-12 पेन मीकुन दाना राज्येमते आनि दाना पेद्दातनमते कलियालय केयता, अदुनहाटीं दानकु नच्चनालायक मिमेट ताकट इंचि वेहतोम. बाबाल बल्हा ओना पिलाल्कुन अवरिचकुंतोर अल्हेने, मोमोट मीक हरेक मनकंक तेळियागोटिसि वेहासेके, दैरनेम हीसेक, विनंति कीसेके मत्तोम, इद मीक एरपाटे.

13 बस्के अयते पेनदा पोल्ले मावाहेंदाल मिहगा एव्ता, अस्के अद मनकालोराहेंदाल वातद आयो, गानि पेनदाहेंदाल वाता निजम पोल्ले आंद इंचि मिमेट केंजसि ओष्कुत्तिर. अदुनहाटीं मोमोट पेनदुकु बस्केळक दन्यवाद कीतोम. मीवा विस्वासुल्कुना नड्डुम पेनदा पोल्लेगुडा कबळ कीसेके मंता.

14 अद बल्हा इत्ते, विस्वासुल्कुनिटा! यहुदिया राज्येमते येसु किरिस्तुनलोप्पो मत्ता पेनदा कलिसियातोरलेसी मिमेट ताकसेक मंतिट. बारित्ते बल्हा मिमेट मीवा देसेमतोराहेंदाल तकलिप बोगांच्चिरो, अल्हेने ओर ओरा यहुदिल्कुनाहेंदाले तकलिप बोगांच्चुर.

15 और सामि येसुन आनि पेनदा कबुरतोरकुन हक्कतुर. ओर माकुन पलाते दोबतुर. पेन ओरतोनि कूस हिल्ले. ओर अंटोर लोकुलकुना विरोदमते मंतुर.

16 पेनदा पिसागोटमळ बारेमते यहुदि आयवोरकुनतोनि वळ्ळकते, ओर माकुन आपंतुर. इल्हा कीसि बस्केळ्ळ ओरा पापालकुन निहकुंतुर. गानि आकिरते पेनदा होंग ओरपोर्री रेयंता.

पौलुस ओर्क मर्रा कलियंतन इनकुनमळ

17 विस्वासुलकुनिटा! गडसेमताहाटीं मोमोट मिहागटाल लक्कु आतोम, गानि मनसुनाल लक्कु आया हिल्लोम. मर्रा मोमोट वेल्लेने आसेते मीवा मोकम हळना इंचि बच्चोरो कोसिस कीतोम.

18 बारित्ते माक मिहगा वायागोम इंचि मंता. नना पौलुस, बच्चुंगो मल्कां कोसिसगुडा कीतन, गानि देय्यम माक अड्डम आयुंदु.

19 मावा आसे आयि, मावा कुसि आयि, मना येसु सामि मर्रा वायानस्के ओना मुन्ने मावा पेद्दातनमता किरिटम आयि! बतल आंद? मिमेट आयिरा?

20 हो, मावा पेद्दातनम, मावा कुसि मिमेटे आंदिर.

3

तिमोतिन लोहमळ

1 अदुनहाटीं, इंका सहन कियमळ मातोनि आया पर्राका, एतेंस सहरते होंचि ओटिगा मंदना विचारम कीतोम.

2-3 किरिस्तुना बेसता कबुरतुन मावातोनि कलियसि वेहानोर पेनदा दासुड तिमोति तम्मुन मिहगा लोहोम. मीक बसोंटा तकलिप वायिनागानि पजोळ्ळ-मुन्नेळ्ळ आयाकोंटा विस्वासमते गट्टिगा मंदना इंचि ओर मीकु समजांचि वेहतोर. बारित्ते इसोंटा तकलिपकु बोगांचालये पेन मनाकुन निलाहता इंचि मीक एरपाटे.

4 मोमोट मीवातोनि मत्तस्के, इसोंटा तकलिपकु वांतां इंचि मुन्नेने वेहतोम. अल्हेने जर्गता, अद मीक एरपाटे.

5 अदुनहाटीं नना आगा पर्राहिल्लेन. पट्टु हळानोर मीवा पट्टु हळतोरा बतला, मोमोट कीता कस्टम एर्तम आताना बतला इंचि, मीवा विस्वासमतुन कन्कुनालय नना तिमोतिन लोहतन.

6 गानि तिमोति इंदके मिहागटाल महगा, मीवा विस्वासम आनि पावरमता बारेमते बेसता कबुर पीसि वातोर. मोमोट बल्हा मीकुन हळालय बागा तनलाळंतोम, अल्हेने माकुन हळालय मिमेटगुडा मावा बस्केळ्ळ मति कीतिट इंचि वेहतोर.

7 अदुनहाटीं विस्वासुलकुनिटा! मोमोट तकलिपते, दुक्कमते मनिनागानि मीवा विस्वासमताहेंदाल, मीवा बारेमते माकु सांति दोर्कता.

8 बारित्ते मिमेट सामिन लोप्पो गट्टिगा निल्सि मत्ते, मोमोट जीवाते मत्तापे.

9 मीवाहेंदाल मोमोट मना पेनदा मुन्ने वेल्ले कुसिते मंतोम. अदुना बारेमते मीवाहाटीं मोमोट पेनदुक वेल्लेने दन्यवाद कीतोम.

10 मोमोट मीकुन हळसि, मीवा विस्वासमते तक्को मत्तदुन पूरा कियाना इंचि नर्का-पिय्यल पेनदुक पारतना कीसेके मंतोम.

11 इंदके मना पेनबाबाल आनि मना येसु सामि, मोमोट मिहगा वायालय हर्रि तयार कियिरकांटी.

12 मोमोट मीकुन पावरम कीताप, मिमेटगुडा मीलोप्पो वरोंक-वरोर पावरम कियालय, अंटोर लोकुलकुनतोनि पावरम बेसालय सामि मीक सहायम कियिरकांटी.

13 बस्के अय्ते मना सामि येसु ओना अंटोर पवित्र लोकुलकुनतोनि वांतोरो, अस्के मनम पेनबाबाना मुन्ने पवित्रते दोसेम हिलाकोंटा मनालय मना मनसुकुन गट्टिगा कियिरकांटी, आमीन.

4

पेनदुन कूस कियाना पिस्वर

1 विस्वासुल्कुनिटा! बल्हा पिसते पेनदुन कूस ईरा परांतोम इंचि मिमेट मावाहेंदाल करियतिर, अल्हेने मिमेट पिस्सेकगुडा मंतिट, इंकागुडा मुन्ने अल्हेने पिस्सेक होंट इंचि विनति कीसेके मंतोम आनि येसु सामिना लोप्पो तेल्लिचिचि वेहासेक मंतोम.

2 मोमोट येसु सामिनाहेंदाल बव-बव आदेसकु हीसि मत्तोम, अव मीक एरपाटे.

3 बारित्ते मिमेट बोगमतनमताल लक्कु मत्ते पवित्र मनतिर, इदे पेनदा इच्चा आंद.

4 मीवा लोप्पोटाल हरेक मनकल ओना मेंदुल्लुन* ओप्के पीसि, पवित्र, कदर कियानालायक मनमळ गावाले.

5 लालचते मनानोर पेनदुन एरपाट किय्युर, असंटोरतोनि इल्हा मनमळ आयापरीं.

6 दीना बारेमते बोर आयिर दंताता विस्वासिन पसांचामन्नि, पसांचते सामि ओर्क सिक्सा हीतोर इंचि मोमोट मीक मुन्नेने गट्टिगा वेहतोम.

7 बारित्ते पेन मनाकुन पवित्र मनालय केयता, कराब मनालय आयो.

8 अदुनहाटीं बोर अयते इद पोल्लेतुन पास्कंतोर, ओर मनकन पास्कोर गानि मीक पवित्र आत्मा हियना पेनदुन पास्कंतोर.

9 इंदके वरोंक-वरोर पावरम कियमळ मिमेट पेनदाहेंदाले करियतिर. अदुनहाटीं दादाल-तम्महकुनालेसी मिमेट वरोंक-वरोर पावरम कीम्टु इंचि रासनद अब्सरम हिल्ले.

10 मिमेट मेसिडोनिया राज्यमते मनना अंटोर विस्वासुल्कुन पावरम कीसेके मंतिट. गानि विस्वासुल्कुनिटा! मिमेट इंका एक्को पावरम कीम्टु इंचि मोमोट विनति कीसेके मंतोम.

11 मोमोट मीक आदेस हीताप, सांतिते पिस्सना, बोना कबाहक ओरे कियाना, बोना कयकुने ओरे कबळ कियाना कोसिस कीम्टु.

12 इल्हा मत्ते मिमेट विस्वासम कियवोरा मुन्नेगुडा कदरलायक मनतिर, बोना पोरोने बर्वु आयिर.

सामिना मर्रा वायमळ

13 विस्वासुल्कुनिटा! हातोर बारेमते मीक तेळियाकोटा मनमळ माक इस्टम हिल्ले. बदे आसे हिल्वोर दुक्कमते मनंतुर, गानि ओरालेसी मिमेट मनमट.

14 बारित्ते येसु हासि मर्रा जीवाते तेदतोर इंचि मनम विस्वासम कीतोम, अल्हेने बोर अयते येसुन विस्वासम कीसि हातुर, ओर्कुन पेन येसुनतोनि पीसि वायार.

15 सामिना पोल्ले परकारम मोमोट मीक वेहानद बतल इत्ते, सामि मर्रा वायानस्के मनम पिस्सि मनिनागानि, हाता विस्वासुल्कुंकन्ना मुन्ने सामिनगा होना पर्रींम.

16 बारित्ते सामि स्वर्गमताल हिळु रेयानुर अस्के पेद्दा आवाजते आदेस हियमळ, पेद्दा दूताता पोल्लेते आनि पेनदा तूताकोमता आवाज कियमळ जर्गता. अस्के बोर अयते किरिस्तुनलोप्पो हातुर, ओर मुन्ने जीवाते तेदानुर.

17 पजा ओरतोनि पिस्सि मत्ता मनाकुनगुडा, मब्बु तेर्पनपोरीं वळिते किरिस्तुनतोनि कलियालय तेहकुंचि ओयमळ जर्गता. इल्हा मनम बस्केळ्ळक सामिनतोनि मनंतोम.

18 अदुनहाटीं इव पोल्लेनाल वरोंक-वरोर दैरनेम हीसेक मंटु.

5

सामि वायानाहाटीं तयारते मंटु

1 विस्वासुल्कुनिटा! अव गटनां जर्गना वेला, कालमता बारेमते मोमोट मीक रासाना अब्सरम हिल्ले.

* 4:4 मेंदुल्लुन इगो मेंदुल्लुन इत्ते मुल्लोनि इंचि अर्तम.

2 बारित्ते नर्कटा वेलाते दोंगल बल्हा अचानक वांतोर, अल्हेने सामि वायाना रोजुगुडा मनंता इंचि मीकु एरपाटे.

3 बस्के अयते लोकुल्क, “मोमोट सांतिते मंतोम, माक वेंरे हिल्ले,” इंचि वेहासेक मनंतुर, अस्केने पीटे मंदना मुरतळकु बल्हा नोप्पि तेदंतां अल्हा, पीळा ओरापोर्री अचानक वांता. ओर बल्हा किथिनागानि पिस्सुर.

4 गानि विस्वासुल्कुनिटा! अद रोजु दोंगानलेसीं अचानक मीपोर्री वायालय मिमेट बारे हीकटते हिल्लिर.

5 मिमेट अंतोर वेल्गु आनि पोद्दलता पिलाल्क आंदिर, मनम नर्का आनि हीकटतोरम आयोम.

6 अदुनहाटीं मनम वेंरेतोरलेसीं मीडसि मनमळ आयो गानि तेल्विते, उसारते मंदकोम.

7 मीडानोर नर्कळक मीडंतुर, रिम्मा आयानोर नर्कळके रिम्मा आंतुर.

8 गानि मनम पोद्दलतोरम आताहाटीं सांतिते मंदकोम. मना चातितुन कापाळना कच्चिता अंगिलेसीं विस्वासम आनि पावरमते ताककोम. मना तल्लक टोपिलेसीं मुकितता आसे इरकोम.

9 बारित्ते पेन मनापोर्री होंग हुप्सालय आयो, गानि मना येसु किरिस्तु सामिनाहेंदाल मुक्ति दोर्किचकुनालय मनाकुन निलाहता.

10 मनम हायिना, पिस्सिना किरिस्तुनतोनि मंदना इंचि ओर मनाहाटीं जीवा हीतोर.

11 अदुनहाटीं, मिमेट इंदके कीसेके मंतिट अल्हेने वरोंक-वरोर दैरनेम हीम्टु, वरोन-वरोर विस्वासमते निलाहट.

आकिरता पोल्ले

12-13 विस्वासुल्कुनिटा! बोर अयते मीवा नड्डुम कस्टपळसि, सामिना हर्दे मीकन मुन्ने अर्सि ताकिचेके कराहंतुर, ओर्क मिमेट कदर हीम्टु. ओर कियाना बेसता कबाहकुनाहाटीं पावरमते ओर्क एक्को मान-मर्यादा कीम्टु, वरोंक-वरोर बेस सांतिते मंटु, इंचि मीकु विनंति कीतन.

14 मावा विस्वासुल्कुनिटा! लंडोर्कुंक समजांचि वेहाट, वेरियानोर्कुंक दैरनेम हीम्टु, कमजोर मत्तोर्कुंक सहायम कीम्टु, अंतोरतोनि ओक्केते मंटु इंचि मोमोट मीक तेळियागोटिस विनंति कीसेके मंतोम.

15 मीलोप्पो बोरन्ना सेड्डातनमता बदला सेड्डातनम कियार्कोटा हळकुंटु. गानि बस्केळक वरोंक-वरोर आनि अंतोराहाटींगुडा बेस कियालय कोसिस कीम्टु.

16 बस्केळक कुसिते मंटु.

17 बस्केळक पारतना कीसेके मंटु.

18 अग्नि परिस्तितिने मिमेट पेनदुक दन्यवाद कीम्टु, बारित्ते मिमेट येसु किरिस्तुनलोप्पो इल्हे मंदना इंचि पेनदा इच्चा मंता.

19 पवित्र आत्माता वेल्गुन पिस्सुमट.

20 पेनदा कबूरतोर पोल्लेन पास्कमट.

21 गानि अग्निटवुन परिकसा कीसि हुळाट, बव बेसतवो अवुन पीसि मंटु.

22 अग्नि तीरकुना कराब पोल्लेनाल लक्कु मंटु.

23 सांति हियना पेने कुद मीकन पुरागा पवित्र किथिकांटी, मावा येसु किरिस्तु सामि मर्रा वायानादाका मीवा आत्मातुन, जीवातुन, मेंदुलतुन दोसेम हिलाकोटा कापाळिकांटी.

24 मीकन केयता पेन विस्वासमगल्लद आंदु, अद अल्हेने कीता.

25 विस्वासुल्कुनिटा! मावाहाटीं पारतना कीम्टु.

26 अंतोर विस्वासुल्क, वरोंक-वरोर कय कल्पिसि पवित्र पावरमते जोहार कीम्टु.

27 इद सिट्टिट अंतोर विस्वासुल्क केंजानाल हद्विसि हुप्सा इंचि नना सामिना अदिकारमते वेहासेक मंतन.

28 मना सामि येसु किरिस्तुना कुर्पा मीपोर्री मन्निकांटी. आमेन.

2 तेसलोनि

तेसलोनि विस्वासुल्कुंक पौलुसना रोंडो सिट्टि

इद सिट्टिटा बारेमते गिचचो परिचयम

रासतोना पोरोल: पौलुस

रासता कालम: इसवि सन 50-54

इद सिट्टि पौलुस रासतद आंदु. पौलुस तेसलोनि सहरता विस्वासुल्कुंक मोदाटा सिट्टि रासता कोन्नि रोजकुना पजा, अगाटा विस्वासुल्कुना लोप्पो पूना परिस्तिति सुख आता. अद बतल इत्ते, “सामि मल्सि वायाना रोजु वाता” इंचि रासतदुन ओर बच्चुंगो तीरकुना अर्ताल्कु तेंडालय दल्गतुर. इच्चुर लोकुल्कुनद सामिना न्यायम सुख आता इंचि ओरा विचारम मत्ता. अदुनहाटी दुनिया मुळगाना वेला दग्गेरेने मंता इंचि कबळ कियाकोटा, ओर लंडु आसि मनुंदुर.

इसोंटा तप्पुड विचाराल्क, ओरा मनसुनाल तेंडसि पोहालय पौलुस तेसलोनि सहरता विस्वासुल्कुंक रोंडो सिट्टि रासतोर. अल्हेने, “सामि मल्सि वायाना रोजु वाता” इंचि इच्चुर इनुंदुर, अद पोल्ले ओर्क बेस तेळियागोम इंचि पौलुस इद सिट्टि रासतोर.

बगा बतल मंता

जोहार आनि परिचयम 1:1-2

स्तुति आनि आदेसाल्क 1:3-12

किरिस्तु मरा वायना बारेमते समजांचि वेहामळ 2:1-17

किरिस्तु वेहताप पिस्साना बारेमता बोदां 3:1-15

आकिरता बोदां 3:16-18

जोहार

1-2 नना पौलुस,* सिल्वानुस आनि तिमोति मोमोट इद सिट्टि मीकु तेसलोनि सहरते मंदना कलिसियातोर्कुंक रासेक मंतोम. मना पेनबाबाल आनि सामि येसु किरिस्तुनाहेंदाल कुर्पा, सांति दोर्किकांटी.

तेसलोनि विस्वासुल्कुना विस्वासम आनि पिस्वर

3 विस्वासुल्कुनिटा! मीवा विस्वासम वेल्ले बेरस्सेक मंता, मिमेट वरोन-वरोर कीकुनना पावरम वेल्ले बेरस्सेक मंता. अदुनहाटी मोमोट बस्केळ्ळ मीवा बारेमते पेनदुक दन्यवाद कियमळ गावाले. इदे बरोबर मंता.

4 अचोने आयाका मिमेट तकलिपकुन, बादन ओप्के पीसि पेनदा लोप्पो गट्टिगा विस्वासमते निल्सि मंतरि. अदुनहाटी मोमोट मीवा बारेमते पेनदा कलिसियाने पेदूदातनम वेहकुंचेके मंतोम.

5 इद पेनदा सत्तेम न्यायमता रुजुव आंदु. मिमेट पेनदा राज्यमते होननालायक आयागोम इंचि इवन्नि बादां अरसेक मंतरि.

6 बोर अय्ते मीकुन तकलिप कीतुर, दानकु बदुल पेन ओर्क तकलिप हियमळ न्यायमे आंद.

7 बस्के अय्ते सामि येसु ओना बलमगल्ला दूतनतोनि पोत्तना तळमिंते स्वर्गमताल दिस्सानुर, अस्के तकलिपते मत्तोर्कुंक आनि माकु सांति हियानुर.

8 बोर अय्ते पेनदुन एरपाट किय्युर, बोर अय्ते मना सामि येसुना बेसता कबुरतुन पीसि ताकुर, ओर्क पेन सिक्सा हिय्यार.

* 1:1-2 इद सिट्टि पौलुस रासतोर, सिल्वानुस आनि तिमोति ओनतोनि नमस्कारम वेहतुर.

9 ओर सामिना मुन्नेटाल आनि ओना ताकतता महिमाताल लक्कु आसि ओर्क बस्केळ्क मनना नासडेमता सिक्सा आथार.

10 बस्के अयते येसु सामि मर्रा वायानुर अस्के ओना पवित्र लोकुकुनाहेंदाल महिमा एतंतोर आनि विस्वासम कीतुर अंतोराहेंदाल ओर पेद्दातनम दोर्किचकुंतोर. बारित्ते मोमोट वेहता गवाइतुन मिमेट विस्वासम कीतिट.

11 इदुनहाटी, मना पेन मीकुन बताहाटी अयते केयता अदुनलायक मिमेट मनालय, अन्नि बेसता कबाहक पूरा कियालय आनि विस्वासमतव पूरा कबाहक पेनदा ताकततोनि पूरा आयालय मोमोट मीवाहाटी बस्केळ्क पारतना कीसेके मंतोम.

12 इल्हा मना पेन आनि मना सामि येसु किरिस्तुना कुर्पातुन पीसि, मीवाहेंदाल मना येसु सामिना पोरोल्क कदर दोर्काना आनि ओनहेंदाल मीक कदर दोर्काना.

2

सेड्डा पोल्लें जर्गातां

1 विस्वासुल्कुनिटा! इंदके मना सामि येसु किरिस्तु मर्रा वायाना बारेमते, आनि मनम जमा आसि ओनतोनि कलियाना बारेमते मीक विनंति कीसेके मंतोम.

2 अद बतल इत्ते, सामि मल्सि वायाना रोजु वाता इंचि मिमेट आत्माताहेंदाल* आयि, पोल्लेताहेंदाल आयि, मावाहेंदाले सिट्टि वाता इत्ताप आयि मीक केंजा वाते, मीवा मनसुन हीके-हेके आया हियमट्ट, वेरियमट.

3 बोरे आयिर बदे रीतुने मीकुन दोका किया हियमट्ट; बारित्ते मुन्ने वरोना पोल्ले वरोर केंजाकोंटा आयाना कालम वायार, पजा पेनदा पोल्लेतुन विरोद कियाना नासडेमता मर्रि दिस्सानुर, दाना पजाने किरिस्तु मर्रा वायाना रोजु वाथार.

4 आ नासडेमता मर्रि, पेन इंचि इनानवुन अन्निन, मनकालोर मोळ्कानवुन अन्निन विरोद कीसि, ओनद ओरे पेद्दोन इंचि वेहकुंतोर. ओर पेनदालेसी पेनदा गुळिते होंचि उद्दानुर, आनि ननाने पेनदुन इंचि वेहकुनानुर.

5 नना मीवातोनि मत्तस्के इव पोल्लें वेहतन, मीक मति हिल्लेना?

6 पेनदा पोल्लेक विरोदमते तिरियानोर ओना वेला वातारित्तेन दिस्सानुर, इंदके ओन बतल आपसेके मंतानो मीक एरपाटे मंता.

7 पेनदा पोल्लेतुन विरोद कियानोना मर्ममता ताकत इंदकेगुडा कबळ कीसेकेन मंता; गानि दान आपानोन पक्कक कियानादाका पेन ओन आपसेकेने मंनता.

8 बस्के अयते पेनदा पोल्लेतुन विरोद कियानोर दिस्सानुर, अस्के येसु सामि ओना तोळ्दा ऊपिरते ओन हक्किसि, ओर वायानेंके दिस्सना वेलगुने ओन नासडेम कियानुर.

9 पेनदा पोल्लेतुन विरोद कियानोर वायमळ इत्ते, देय्यमतदे उंदि कबळ आंदु, ओर वासि आबद्दम पोल्लेने देय्यमतव अन्नि ताकतकुनतोनि चिन्हां, इचंत्रमता कबाहक कियानुर.

10 पजा कराब कबाहक कीसि नासडेम आयानोर्कुन अन्नि तीस्कुने पसांचंतोर. बारित्ते बद सत्तेमतुन अयते पावरमते ओप्कुचि मत्ते मुक्ति दोर्किस मनवळ, ओर अदुन ओप्पकुन्ना हिल्लुर.

11 अदुनहाटी ओर आबद्दमतुने विस्वासम किथ्यिर इंचि पेन ओरा लोप्पो गयबेत कियाना सक्तितुन लोहंता.

12 बचुदुर अयते सत्तेम पोल्लेतुन विस्वासम कियवा, कराब कबाहकुने कूस आंतुर, ओर अंतोर्क पेन सिक्साता आदेस हिय्यार.

13 सामिना पावरमगल्ला विस्वासुल्कुनिटा! मिमेट पवित्र आत्माताहेंदाल पवित्र आसि, सत्तेमते विस्वासम ईसि पिंसालय पेन मीकुन मुन्नेने पेरता. अदुनहाटी माकु मीवा बारेमते पेनदुक बस्केळ्क दन्यवाद कियमळ गावाले.

* 2:2 आत्माता बविस्यवानि.

14 इल्हा मिमेट मना सामि येसु किरिस्तुना महिमातुन दोर्किच्छुकुनना इंचि, पेन मोमोट वेहता बेसता कबुरताहेंदाल मीकुन केयता.

15 अदुनहाटीं विस्वासुल्कुनिटा! गट्टिगा निल्सि मंटु, मावा तोळदाल पेयसता पोल्लेहेंदाल, सिट्टिटाल बव रीति-रिवाजकु अयते मीक कराहतोम अबुन पीसि ताकट.

16 मना सामि येसु किरिस्तु आनि पेनबाबाल मनाकुन पावरम कीसि, ओना कुपहेंदाल बस्केळक मनना सांति, बेसता आसे हीतो.

17 मीवा हरेक बेस कबळते, हरेक पोल्लेते पेन मीकुन गट्टिगा किथ्यिकांटी, इंका मीवा मनसुने सांति हिथ्यिकांटी.

3

माहाटीं पारतना कीम्टु

1 विस्वासुल्कुनिटा! मीक आकिरते वेहानद बतल इत्ते, सामिना पोल्ले मीलोपो पैलांचतापे, वेंरोला लोपोगुडा बिराना पैलांचि पेदूदातनम दोर्कनाहाटीं पारतना कीम्टु.

2 अल्हेने अंटोर लोकुल्क विस्वासुल्क आयुर, अदुनहाटीं तेडा आनि दुस्त लोकुल्कुनाल पेन माकुन पिसागोट्टि.

3 गानि सामि विस्वासमगल्लोड आंदुर; ओर मीकुन देय्यमता कयदाल कापाळसि गट्टिगा निलाहंतोर.

4 मोमोट आदेस हीताप मिमेट ताकसेके मतिट. मुन्नेगुडा अल्हे ताकतिर इंचि सामिन लोपो माक मीवा बारेमते बरोसा मंता.

5 सामि मीवा मनसुकुन पेनदा पावरमते अल्हेने किरिस्तुना गट्टि ओप्केते ताकसा परांतोर.

जिम्मेदारिते कबळ किय्याना

6 विस्वासुल्कुनिटा! बोर अयते लंडु आसि मंतुर, मोमोट वेहता रीति-रिवाज परकारम ताकसेक हिल्लुर, असोंटा हरेक मनकानाल लक्कु मंटु इंचि मना सामि येसु किरिस्तुना पोरोलते मीक आदेस हीसेक मंतोम.

7 मोमोट मीवातोनि मत्तस्के लंडु आसि मना हिल्लोम, अदुनहाटीं मालेसीं बल्हा ताकाना इंचि मीक कुद एपाटे मंता.

8 मोमोट बोनगागुडा पुक्कटता गाटो तिना हिल्लोम, मी लोपोटाल बोनके बर्वु आयामन्नि इंचि नर्का-पिय्यल कबळ, कस्टम कीसि गाटो तित्तोम.

9 माक मीपोर्रो बर्वु आयाना अदिकारम हिल्ले इत्ताप आयो, गानि मिमेटगुडा मावालेसीं मंदना इंचि मीक हुप्सालय मोमोट कबळ कीसि तित्तोम.

10 मोमोट मीवातोनि मत्तस्के, “बोर्कन्नागिटा कबळ कियानद हिलाकोटे, ओर गाटो तिनामन्नि” इंचि आदेस हीसि मत्तोम.

11 गानि मिहगा इच्चुर लोकुल्क लंडोर्क मंतुर, ओर बतले कबळ किय्युर, सिराप इंकावरोना जोलिक होनना कबाहक कीसेके मनंतुर इंचि मोमोट केंजतोम.

12 असोंटा लोकुल्क चुपचाप कबळ कीसि ओरा पिस्वरता कमाइ कियिरकांटी, ओर्क मोमोट सामि येसु किरिस्तुना पोरोलते आदेस हीसि, बुद्धि वेहंतोम.

13 विस्वासुल्कुनिटा! मिमेट बेसता कबाहकुने नेरबळताप मनमट.

14 बोर्कन्नागिटा इद सिट्टिते रासता पोल्लेन केंजसि ताकाकोटे, ओनपोर्रो नदर इरिट, ओनकु सिग्गु वायागोम इंचि ओनतोनि दंटा पियमट.

15 अयना ओन पगातोन्लेसीं हळमट, गानि तम्मुनालेसीं ओन्क वें वेहाट.

आकिरता पोल्ले

16 कुद सांति हियना सामि, बस्केळ्ळक अन्नि तीस्कुने मीक सांति हियेर, बस्केळ्ळक मी अंटोरतोनि मन्निकांटी.

17 नना पौलुसुन आंदुन, नावा कयदेने मीक जोहार रासेक मंतन. अन्नि सिट्टिने इद नावा आनवल आंद, नना इल्हे रासंतन.

18 मना सामि येसु किरिस्तुना कुर्पा मी अंटोरतोनि मन्निकांटी.

1 तिमोति

तिमोतिकु पौलुसना मोदाटा सिट्टे

इस सिट्टेता बारेमते गिचचो परिचयम

रासताना पोरोल: पौलुस

रासता कालम: इसवि सन 64

इद सिट्टे पौलुस ओना मर्रिनसोंटा तिमोतिकु रासतोर. इपीसि सहरते मनना विस्वासुल्कुन पेन हुपिस्ता हरदाल तप्सनाहाटी तप्पुड बोदा कराहनोर वेल्लेन लोकुल्क तयार आतुर. अयते आ तप्पुड बोदानाल अगटा विस्वासुल्कुन बल्हा तपिचचना, ओर्कुन विस्वासमते बल्हा गट्टिगा किय्याना, इंका ओर अंतोरतोनि बल्हा कलियसि-मेलियसि बक्तिते मनना. इसोंटव वेल्लेन पोल्ले पौलुस इद सिट्टेते रासि तिमोतिकु हिम्मत हीतोर.

पेन उंटे आंद. इंका पेनदाल लक्कु आता अंतोर लोकुल्कुन मर्रा पेनतोनि कल्पानोरगुडा वरौरे आंदुर. ओरे मनकना रूपमते पुटता पेनदा मर्रि येसु किरिस्तु. अंतोर लोकुल्कुना पापालक मापि आयनाहाटी येसु कुद्दु कुसुनपोरौ ओना जीवातुन हीतोर. इचोने आयका अंतोर विस्वासुल्क वैरैतोरतोनि बल्हा मान-मर्यादाते मनना, पेन हुपिस्ता हर्दे बल्हा ताकाना इल्हा वेल्लेन पोल्ले तिमोतिकु इद सिट्टेते पौलुस रासि लोहतोर.

बगा बतल मंता

जोहार आनि परिचयम 1:1-2

कलिसिया आनि अगाटा अदिकाराल्कुना बारेमते समजांचि वेहामळ 1:3-3:16

तिमोतिकु ओना कबाह्कुना बारेमते समजांचि वेहामळ 4:1-6:21

तिमोतिकु पौलुसना जोहार

1 इद सिट्टे पौलुसुनद आंद. मनम बोनपोरौ अयते आसे पडसि मंतोम, आ किरिस्तु येसु आनि मनाकुन कापाळाना पेनदा आदेसताहेंदाल नना किरिस्तु येसुना प्रेरित* आतन.

2 विस्वासमते नावा निजम मर्रि आता तिमोतिकु इद सिट्टे रासतन. मना पेनबाबानाहेंदाल आनि मना सामि येसु किरिस्तुनहेंदाल नीकु कुर्पा, दया आनि सांति दोर्कि.

तप्पुड बोदानाल जेगर्ता मनना बारेमते

3 नना मेसिडोनिया राज्येम होननेके नीकु नना विनंति कीसि वेहतन. दाना परकारम निमे इपीसि सहरते मन्नु. निमे अगा मत्ते, बोर अयते सत्तेमकु बदुल वैरे बोदां कराहंतुर, ओर्कुन अल्हा कराहकोंटा आपा.

4 पुट्टिचि वेहना कतां, वंसाल्कुना जोली ओर होळसियालय आदेस हीम. बारित्ते अबुनहेंदाल वाद-विवादकु आंतां विस्वासमहेंदाल जर्गना पेनदा पिलानगुडा पुरागा आयो.

5 ई आदेसता उद्देसम, पवित्र गुंडेताल, मनसुना बेस पोल्लेताल आनि निजम विस्वासमताल पुट्टना पावरम आंद.

6 इच्चुर लोकुल्क इवनाल तप्पिसि वट्टि पोल्ले वळकालय दलगतुर.

7 ओर वेहना पोल्लेना अर्तम बतलो ओर्के तेळियाकोन्ना, गट्टि विस्वासमते ओर, मूसाना नियमाल्कुना गुस्लक आयाना इनकुंचंतुर.

8 मूसाना नियमकुने मत्ताप बरोबर ताकानयते, अद मंचिदे इंचि माकु एरपाटे.

* 1:1 प्रेरित इद पोरोल्क "पेन लोहचीतोर" इंचि अर्तम. येसु पन्नेड मंदितुन पेरकुत्तोर ओरे प्रेरितुल्क आंदुर.

9 इंका इव नियमकु नीतिमंतलुकुनाहाटीं रासमळ जर्गाहिल्ले. गानि अव अय्ते, नियमकुन पीसि ताकवोराहाटीं, आदेसकुन पीसि ताकवोराहाटीं, बक्ति कियवोर आनि पापि लोकुकुनाहाटीं, अपवित्र आनि सत्तेमते ताकवोराहाटीं, तल्लुर-बाबोन हक्कानोराहाटीं, मनकालोर्कुन हक्कानोराहाटीं,

10 बोगमतनम कियानोराहाटीं, मांडसा-मांडसातोनि बोगमतनम कियानोराहाटीं, मनकालोर्कुन दोर्कापीसि अम्मानोराहाटीं, आबद्दम वळ्कानोराहाटीं, तप्पुड गवाइ वेहानोराहाटीं इंका सत्तेम पोल्लेन आबद्दम कियानोराहाटीं ई मूसाना नियमकु मंतां.

11 तलसकुननालायक पेनदाहेंदाल वाता महिमामय बेसता कबुरतुन नना कराहना इंचि नाकु अप्पजेपमळ जर्गता.

पौलसुनपोर्रो पेनदा दया मंता

12 मना सामि येसु किरिस्तु नाकु बलम हीतोर अदुनहाटीं नना ओन्क दन्यवाद कीतन. इंका नाकुन विस्वासम लायकतोर इन्कुंचि ओना सेवाताहाटीं निलाहतोर.

13 मुन्ने नना बदनाम कियुंदुन, तकलिप हियुंदुन, तेंडसि पोहचि वळ्कुंदुन. अयना नाकु सामिना दया दोर्कता, बारित्ते नना कियानद बतलो तेळियका, अविस्वासमते अल्हा कीतन.

14 मना सामिना कुर्पा नाकु वेल्लेन दोर्कता. अचोने आयका, येसु किरिस्तु ओनगा मनना विस्वासम आनि पावरमगुडा नाकु हीतोर.

15 पापिकुन पिसागोटनाहाटीं येसु किरिस्तु इद दुनियाते वातोर. ई पोल्ले सत्तेम आनि पूरा ओष्कननालायक मंता. अंतोर्कन्ना पेद्दा पापिन नना आंदुन.

16 अयनागानि येसु किरिस्तु नापोर्रो दया हुपिस्तोर. अल्हा दया हुपिच्चि, मुन्ने बोर अय्ते बस्केळक पिस्सना पिस्वर दोर्कना इंचि ओनपोर्रो विस्वासम कींतुरो, ओर्क ओना अंतेम हिल्लुवा सहनमतुन हुपिचनाहाटीं उंदि उदाहरनता रूपमते नावसोंटा पापिन इरतोर.

17 बस्केळक मनना राजाल, बस्केने नासडेम आयवोर, बस्केने दिस्सोर असोंटा मावा उंदे पेनदुक पीळि-पीळिनदाका कदर, पेदातनम दोर्कि. आमीन.

तिमोतिना जिम्मेदारि

18-19 कोको तिमोति! पेनदा कबुरतोर नीवा बारेमते मुन्ने बव पोल्लें अय्ते वेह्चि मत्तुरो, आ पोल्लेना परकारम, निमे नीवा विस्वासमतुन गट्टिगा पीसि, मनसुना बेस पोल्ले पीसि वरोर बेस सिपाइलेहका लडाइ कीसेके मनना इंचि नना नीकु आदेसतुन अप्पजेपसतन. बारित्ते मनसुना पोल्लेतुन हय्सका वेल्लेन मंदि लोकुलक, उंदि डोंगा रोंडु तुकडां आसोत्ताप, ओर ओरा विस्वासमतुन नासडेम कीकुत्तुर.

20 विस्वासमतुन नासडेम कीकुत्तोरवेटाल हुमिनयुस आनि सिकंदर ईर इव्वुर मंतुर. पेनदुन बदनाम कियार्कोटा बल्हा मनना इत्ता पोल्ले करियना इंचि नना ईर्कुन देय्यम्क अप्पजेपतन.

2

मुर्ताहक-मांडसताहाटीं नियमकु

1 अन्निटकन्ना मुन्ने नना नीकु विनंति कीतन गदा, पेनदुक विनंति कियनेके, पारतना कियनेके, वरोनाहाटीं वरोर पारतना कियनेके, दन्यवाद कियनेके अंतोर लोकुराहाटीं कियगोम.

2 मनम राजालोराहाटीं आनि पेद्दा-पेद्दा अदिकारिल्लुकुनाहाटीं पारतना कियगोम. अल्हा कीते मनम आरामते, सांतिते आनि पेनदुक नच्चना कदरगल्ला पिस्वर पिसा परांतोम.

3 इल्हा कियमळ मंचिद आंद. मनाकुन कापाळना पेनदा नदरतेगुडा इदे ओष्कननालायक मंता.

4 लोकुलक अंतोर्कुं क मुक्ति दोर्कना आनि निजमतुन एरपाट कियना इंचि पेनदा इच्चा मंता.

5 बारित्ते पेन उंदे आंद. इंका मनकन आनि पेनदुन कल्पालय नड्डुमगुडा वरौरे मंतोर. ओरगुडा वरोर मनकले. ओरे किरिस्तु येसु आंदुर.

6 अंतोर लोकुकुक मुक्ति अस्सि हियनाहाटी ओर सततुन कुदुवा इरसि ओनद ओर अप्पजेपकुत्तोर. मंचि वेलापोरौ ओना गवाइ हीतोर.

7 इदे गवाइतुन वेहनाहाटी, नाकुन प्रचार कियानोर प्रेरित इंचि पेरमळ जर्गता. इंका यहुदि आयवोर्कुंक विस्वासम आनि सत्तेमता बारेमते कराहनोर इंचि निलाहमळ जर्गता. नना निजम वेहचंतन, आबद्दम वेहासेक हिल्लेन.

8 अदुनहाटी पारतना कियना अन्नि जेगाने मनसुने बतले होंगु-जगडम इरौकोटा पवित्र कय्कु पोरौ तेहचि मांडसा पारतना कियना इंचि नावा इच्चा मंता.

9-10 अल्हेने मुरताहकुना हेंदाल नना कोरानद बतल इत्ते, अब सादा-सिंपल कपडिं पोंडसि, साप मनसुने मनगोम. इंका बेस कबाहक कीसि पेनदा बेस बक्ति कियनावुनलेसी मनगोम. गानि बंगाराल्क, डिस्को पूसाना दुम्मे वाटकुंचि, वेल्लेन दराता कपडिं केरसि, रका-रकाल्कुना जेडां वाटसि सिंगाराल्क अरानायो. बारित्ते मुरताहकुंक अदे बेस.

11 मुरतळ सिराप सांतिते कय हिल्लु मंचि अन्नि करियगोम.

12 उंदि मुरतळ, मांडसक कराहमळ, ओनपोरौ अदिकारम ताकिचमळता बारेमते, नना ओप्कुन्नोन. मुरतळ सिराप चुपचाप मनगोम.

13 बारित्ते पेन मोदाला आदामुन कीसि पज्जोटाल हव्वान कीता.

14 इचोने आयका, आदाम पसांचा हिल्लोर गानि मुरतळ पसांचि पापमते अरता.

15 गानि अद ओक्कला विस्वासम, पावरम, पवित्र आनि ओक्केते पिलाल्क कंचेके तल्लुना जिम्मेदारि पूरा कियानय्ते, दानकु तप्पाकोटा मुक्ति दोर्कार.

3

कलिसियाता अदिकारिल्क बल्हा मनना?

1 ओक्कला बोरन्ना मनकल कलिसियाता पेद्दा मनकल आयना मनसु इरते, ओर तप्पाकोटा बेस कबळ कियना इनकुंतोर, इत्ता पोल्ले मात्रम निजम आंद.

2 पजा आ पेद्दा मनकना पिस्वरते बतले दोसेम मननायो. ओर उंदे मुरतटा मुय्दो आयगोम, ओर ओप्के पीसि मनानोर आयगोम, ओर विचारम कीसि ताकानोर आयगोम, अंतोर ओना कदर कियनालायक ओर मनगोम, ओर वैरौर्कुन बेस हळकुनानोर आयगोम आनि वैरौर्क कराहनालायकगुडा मनगोम.

3 इंका ओर कल्लु उनानोर, मर्लाबळानोर, जगडम कियानोर मनमन्नि गानि मेत्तटा मनसुनोर मनगोम. ओन्क कोत्तना लालच मनमन्नि.

4 ओर ओना सतता कुटुंब बारेमता अन्नि जिम्मेदारि बेस हळकुनानोर मनगोम, ओना मर्क-मियाहक ओना देकरेकते मंचेके ओना बेस कदर कियनोर मनगोम.

5 बारित्ते वरोर मनकंक ओना कुटुंबता देकरेक किय्युडे तेळियाकोटे, ओर पेनदा कलिसियाता देकरेक बल्हा किया परांतोर?

6 इंका ओर पूने-पूने विस्वासमते वातोर आयामन्नि, बारित्ते असंटोक्कु गर्ग वासि देय्यम्क दोर्कार्नासोटा सिक्साता आदेस ओन्क दोर्कार.

7 इचोने आयका वैरौ लोकुकुना विचाराल्कगुडा ओना बारेमते बेस मनगोम. अल्हा मनाकोटे ओर सिग्गु पोळगोट्टुकुंचि देय्यमता कय्दुक दोर्का परांतोर.

कलिसियाता सेवक

8 कलिसियाता सेवाकुलकगुडा अल्हेन कदरलायक मनना. ओर रौंड नाल्केनोर इत्ते चुगली कियानोर मनामन्नि, ओर्कु कल्लु उनना अलवट मनामन्नि, ओर तप्पु कबाहक कीसि संपादिचनोर मनामन्नि.

9 ओर विस्वासम बारेमता मर्ममतुन मनसुना बेस पोल्ले वेहताप तेल्लिचकुंचि दान गट्टिगा पीसि मनानोर आयगोम.

10 ईरा गुनम बसंटदो तेळियनाहाटी ईरदगुडा परिकसा येतगोम. परिकसाते ओरगा बतले दोसेम दोर्काकोटे, ओर्कुन कलिसियाता सेवक इंचि कबळ किया हियना.

11 इल्हेने मुर्ताहकगुडा अंटोर कदर हियनलायक मनगोम. अवुनगा वेरेतोर्कुन अपमानम कियना गुनम मनामन्नि. गानि बेस ओप्केते अन्नि पोल्लेने विस्वासम कियनलायक अव मनगोम.

12 कलिसियाता सेवाकुंक उंदे मुत्तो मनगोम. ओर ओना सतता मर्क-मियाहक आनि ओना संसारमतुन बेस ताकसानोर आसि मनगोम.

13 बारित्ते बोर अय्ते सेवक इंचि कबळ कीतोर ओर बेस कदर दोर्किचुकुना परांतोर. अचोने आयका किरिस्तु येसुना पोर्गे मनना ओना विस्वासमते ओन्क वेल्लेने दैरेनेम दोर्कता.

मना विस्वासमता मर्मम

14-15 नाकु निहगा बिराना वायना आसे मंता. गानि ओक्कला नाकु वायालय आल्सेम आते, पेनदा कुटुंबते, इत्ते जीवाते मनना पेनदा कलिसियाते वरोर मनकल बल्हा मनगोम इत्ता पोल्ले नीकु एरपाट आयगोम इंचि इद सिट्टि रासेक मंतन. बारित्ते कलिसिया निजमता निटड गुंजा आनि पुनादि आंदु.

16 मना बक्तिता सत्तेमता मर्मम वेल्लेन पेद्देद, इव्ते बतले अनमानम हिल्ले: किरिस्तु मनकना रूपमते पुटतोर, ओनगा बतले दोसेम हिल्ले इंचि पवित्र आत्मा वेहता, पेनदा दूतांक ओर दिसतोर, ओना बारेमते दुनियाता अन्नि देसेल्कुना लोकुलुकुंक प्रचार कियमळ जर्गता, दुनियातोर ओनपोर्गे विस्वासम इरतुर आनि पेनदा कदरते ओन मर्रा स्वर्गमते तेहामळ जर्गता.

4

तप्पुड बोदानाल जेर्गता!

1 वायना रोजकुने, इच्चुर लोकुलुकु दोका हियना आत्माना बोदां आनि देय्यमता पोल्ले केंजसि ओरा विस्वासमतुन होळसंतुर, इंचि पवित्र आत्मा किलियर वेहंता.

2 बोरा बोदां अय्ते काचाहता सलाकिते बोळिस हासोंचि मंतां, असोंटा दोका हियानोर आनि आबद्दम वळकना मनकालोराहेंदाल इल्हा जर्गता.

3 मरमिं आयामन्नि इंचि ओर कराहंतुर, इंका बव वस्तुक अय्ते पेन दाना विस्वासुल्कुनाहाटी आनि निजमतुन एरपाट कियनोराहाटी दान्क दन्यवाद हीसि तिनालय कीता, अव कोन्नि वस्तुकुन तिनामन्नि इंचि ओर कराहंतुर.

4 गानि पेन कीता अन्नि वस्तुक बेसतवे आंद. पेनदुक दन्यवाद कीसि तिल्ले बवे वस्तुक मन्नि इननालायक मन्नों;

5 बारित्ते पेनदा पोल्ले आनि पारतना अद वस्तुन पवित्र कीता.

किरिस्तुना बेस सेवक आयगोम

6 ओक्कला निमे इव आदेसकुन विस्वासुलुकुंक कराहनय्ते, निमे विस्वासम कियना बव पोल्ले आनि सत्तेम बोदानापोर्गे ताकंतिनो अवुनहेंदाल बेरसता, येसु किरिस्तुना वरोर बेस सेवक आकिन.

7 बक्ति हिल्लव अल्हेन तयार कीसि वेहना कतानाल मंट. बस्केळक बक्ति पिस्वरते मुन्नेळक ताकाना कोसिसते मंट.

8 बारित्ते मेंदुलताहाटी कियना टेरनिंगते गोडच्चेन पायदा मंता. गानि पेनदा बक्ति कीते, अव्ते अन्नि तीरकुना पायदा मंता. इंदकेटा पिस्वर आनि मुन्नेटा पिस्वरहाटी पेन हीता पोल्ले अव्ते कलियसि मंता.

9 ई पोल्ले पुरागा ओष्कुननालायक आनि विस्वासम कियनलायक मंता.

10 इदुनाहाटीगें मनम बागा कस्टपळसेके, पोराटम कीसेके मुन्नेळ्ळ ताकसेके मंतोम. बारित्ते मनम मना आसे, बस्केळ्ळ जीवाते मननद आनि अंटोर लोकुल्कुन कापाळना पेनदापोर्रो इरतोम, विसेस कीसि दान विस्वासम कियानोर्कुन पिसागोटना पेनदापोर्रो इरतोम.

11 इवे पोल्लें कियालय आदेस हीसि अंटोर्क करहा.

12 नीवा लेय्यातनमहेंदाल बोरे नीकुन सिन्नगा ह्ळानायो. गानि वळ्ळकुमळते, ताकमळते, पावरम ह्प्समळते, विस्वासमते, पवित्र मनमळते विस्वासुल्क नीकुन ह्ळसि करियगोम, अल्हा मन्नु.

13 नना बदवेरदाका अय्ते वायोनो अदवेरदाका निमे अंटोर नड्डुम दर्मसास्त्रमतुन हदवुसेके, प्रचार कीसेके, कराहसेके मन्नु.

14 पेद्दाल्क नीपोर्रो कय्क इर्सि पारतना कियनेके, बविस्वयवनि कियानोर वेहता आ वरम नीकु दोर्कता. अद वरमतुन निमे वाळकुन, दान मति मर्गुमा.

15 इवे पोल्लेन निमे नीवा मनसुने इर्सि अवुना परकारमे ताकसेक मन. अस्के निमे बक्तिते बेस बेर्सनद अंटोर लोकुल्कुंक दिस अर्रता.

16 निमे नीवा पिस्वर बारेमते आनि निमे वेहना पोल्लेन बारेमते वेल्ले जेर्गताते मन. अल्हा मत्तिनित्ते, नीवद निमे कापाळकुंतिन, नीवा पोल्लें केंजानोर्कुनगुडा कापाळंतिन.

5

बोनतोनि बल्हा वळकना बारेमते कोन्नि पोल्लें

1 पेद्दा वयम मनकन तेराहताप वळ्ळुमा, गानि ओन नीवा बाबाल इन्कुचि ओन्क तेल्लिचि वेहा. सिन्नोर्कुन तम्मुर इन्कुचि ओरतोनि व्यवहार कीम.

2 अल्हेन पेद्दा वयम मुर्ताहकुन यावहक इन्कुचि आनि सिन्ना वयम मुर्ताहकुन हेलाहक इन्कुचि पुरागा पवित्र मंचेके अवुंक तेल्लिचि वेहा.

3 बव मुर्ताहक अय्ते निजम मुंडामोसि मंतां, अवुना निमे कदर कीम.

4 ओक्कला बद्दना मुंडामोस्ता मुरतळ्ळु मर्क-मियाहक आयि, तंगमर्क-मियाहकगिटा मत्ते, मोदाला ओर बेस बक्तिते ताकसेके सतता कुटुंबतुन पोस कियमळ करियगोम. पजा सतता तल्लुर-बाबो ओराहाटी कीता मंचितनमता स्नम तिरिचनाहाटी, ओर्क मंचितनमतुन मलाहचि हियगोम. बारित्ते इल्हा कियमळ पेनदुक नच्चनालायक मंता.

5 बद्द मुरतळ अय्ते निजमते मुंडामोसि, बोरे दिक्कु हिलाका उंदे मनंता, अद मुरतळ दाना आसे पेनदापोर्रो इर्सि, नर्का-पल्ही पेनदुक विनति, पारतनां कीसेके मनंता.

6 गानि बद्द मुरतळ अय्ते सिराप सुकमता आसेते पिसंता, अद मुरतळ पिस्सि मंचिगुडा हाता लेक्कातेन वांता.

7 इंचि बोरे तप्पुने दोर्काकोटा मननाहाटी, इव पोल्लेना बारेमतेगुडा अंटोर विस्वासुल्कुंक आदेस हीम.

8 ओक्कला बोरन्ना ओना हेडमितोर्कुन बेस ह्ळकुनाकोटे, विसेस कीसि सतता लोतोर्कुन बेस ह्ळकुनाकोटे, ओर विस्वासमता कदर कियवोर आंतोर. अचोने आयका विस्वासम कियवोक्कना एक्को कराब मनकना लेक्काते वांतोर.

9 मुंडामोस्ता मुरतटा वय्यु अरवै वर्साकन्ना तक्को मनानय्ते, आ मुरतटा पोरोल मुंडामोस्ता मुरताहकुना रजिस्टरते रासानायो. अचोने आयका आ मुरतळ मुन्ने वरोने मुय्दोन मरमिं आसि मत्तद आयगोम.

10 इका अद मुरतळ बेस कबाहकुने बेस पोरोल तरकुंचि मनगोम, मर्क-मियाहकुन पोस कीतद आयगोम, वाता हेळमितोरा सेवा कीतद आयगोम, पवित्र लोकुल्कुना काल्क नोरतद आयगोम, तकलिपने मत्तोर्कुंक सहायम कीतद आयगोम इका अन्नि परिस्तितिने बेस कबाहक कियालय अप्पजेपतद आयगोम.

11 गानि लेय्यातनमते मुंडामोस्ता मुरताहकुना पोरोल अद रजिस्टरते रासमा. बारित्ते बस्के अय्ते अवुना मेंदुलात इच्चां एक्को आसि, किरिस्तुनापोर्रोटा विस्वासम तक्को आंता, अस्के अवुंक मरमिं आयाना इच्चा आंता.

12 इल्हा अव अवुना मोदाटा निरनायमताल तपिचकुं चि सिक्साता आदेस तरकुंतां.

13 अचोने आयका लोन-लोन तिरियना अलवट अर्सिं लंडुंक हेडंतां. सिराप लंडुंक हेळमळे आयो, गानि हेकेटां-हीकेटां जोलीं केंजंतां, वेरेतोरा कबाहकुने कय कुच्चंतां, बव पोल्ले अय्ते अव वळकना आयोनो, असोटा पोल्ले वळकालय दलगंतां.

14 अदुनहाटीं लेय्यातनमते मुंडामोस्ता मुर्ताहक मरमिं आसि, पिलालकुन कंचेके संसारम कियना इंचि नावा इच्चा मंता. अल्हा कीते पगातोर्कुंक तप्पुक दोसना मोका दोर्को.

15 नना इल्हा वेहना कारनम बतल इत्ते, कोन्नि मुर्ताहक हर्षि तप्पि देय्यम हरदे ताकसंतां.

16 बदन्ना विस्वासि मुरतटा लोन ओक्कला मुंडामोस्ता मुर्ताहक मत्ते, अवुंक आ लोता विस्वासि मुरतळे कुद्दु सहायम कियगोम, अवुना मोता कलिसियातोरोपोर्रो वाटानायो. अस्के निजमते मुंडामोसि मत्ता मुरताहकुंक कलिसिया सहायम कियगोम.

17 कलिसिया ताकसानोरवेटाल बोर अय्ते बेस कलिसिया ताकसंतोरो, ओन्क वेल्ले कदर हियगोम. विसेस कीसि बोर अय्ते प्रचार कियालय, कराहलय कस्टपळंतोरो ओन्क रौंड अंताल्क कदर दोर्कुगोम.

18 बारित्ते, “बंति तिराहनेके कोदाता मुस्किरकु मूस्का बुट्टे दोहामन्नि,”* आनि “बूतिगानकु बूति दोर्कना,”* इंचि दर्मसास्त्रम वेहंता.

19 कलिसिया ताकसाना पेद्दा मनकना पोरो बोर्ना दोसेम दोसते, इव्वुर-मुव्वुरन्ना गवाइदार्क हिल्वद निमे अद दोसेमतुन नम्मूमा.

20 बस्केळक पापम कीसेक मनानोन अंतोरा मुन्ने तेरहा. अस्के कळमातोरो अल्हा कियार्कोटा वेंते मनांतुर.

21 पेन, किरिस्तु येसु आनि पेन पेरता पेनदा दूतन मुन्ने इर्सिं नना नीकु गट्टिगा आदेस हीसेक गदा, बदे उंदि बाजुन पियाकोटा, सिन्ना-पेद्दा इनाकोटा निमे इव नियमकुन पीसि ताका.

22 कलिसियाता पेद्दा मनकल इंचि निलाहनाहाटीं, बोन पोर्न गाबर आसि कय इरमा. वेरेतोरा पापालकुने निमे पालिगाड आयमा. इंका नीवद निमे बस्केळक पवित्र ईर्कुन.

23 सिराप एरे उंचेके मन्मा, नीवा पीर साप मननाहाटीं, इंका वेरे बिमार्क ऊके-ऊके वायाकोटा मननाहाटीं, अस्के-अस्के अंगुर पानकम उंचेके होन.

24 कोन्नि लोकुल्कुना पापालक बय्यर दिस अरंतां, न्यायम जर्गनाहाटीं अवुन मुन्ने तरांतुर. गानि कोन्नि लोकुल्कुना पापालक मात्रम पज्जोताल दिस अरंतां.

25 इल्हेने बेस कबाहकगुडा बय्यर दिस अरंतां, बव बेस कबाहक दिस अरौंगो, अवगुडा वेल्ले रोजकु मक्किस् मन्नों.

6

दासुल्कुनाहाटीं कोन्नि नियम्कु

1 बोर अय्ते दासि कबळ कीसेके मंतुरो, ओर अंतोर ओरा मालकुल्कुन अन्नि तीरकुना मान-मर्यादालायक इनकुनगोम. अस्केने पेनदा पोरोल आनि कराहता पोल्ले बदनाम आयार्कोटा मंता.

2 इंका बोर दासुल्कुना मालकुल्क अय्ते विस्वासमते मंतुर, आ दासुल्क ओरा मालकुल्कुन, ‘ईर मना विस्वासि आंदुर’ इंचि ओन सिन्नगा हळानायो. मीवा सेवाता पायदा येतानोरगुडा मीवसोटा पावरमगल्ला विस्वासुल्क आंदुर. इंचि ओरद इंका एक्को सेवा कियना. इसोतव पोल्ले निमे ओर्क कराहचि गट्टे दैरेनेम हीम.

आबद्दम बोदा आनि निजम दनमता आस्ति

3 इंका ओक्कला बोरन्ना ई पोल्लें तप्पा वें कराहनय्ते, अचोने आयाका मना सामि येसु किरिस्तुना निजम पोल्लेन पियाकोंटा, ओर वेहता बक्तितुन ओष्कुनाकोंटे,

4 ओर इरगा गरति निडिस मंतोर, ओन्क बतले तेळियो. असंतोर लोल्लिं आनि पोल्लेन पीसि जगडाल्क कियना बिमार आसि मंतोर. दीनहेंदाल अय्ते कळ्ळक पोतमळ, जगडम, अपमानम, कराब अनमानाल्क तयार आंता.

5 आनि इसोंटोरा नड्डुम बस्केळ्ळक लोल्लिं-जगडाल्क आसेकेन मनंतां. इंका इसंतोरा बुद्धि हेळसोंचि, ओर निजमताल लक्कु आतोर आंद. अदुनहाटी ओर पेनदा बक्तितुन कमाइ कियना उंदि हारि इनकुंतुर.

6 पेनदा बक्ति समादानमते कियमळे पेद्दा दनम आंद.

7 बारित्ते मनम ई दुनियाते वायनैके बतल तरा हिल्लोम, इगोटाल होननेकेगुडा बतले ओया परोम.

8 अदुनहाटी मनगा तिनालय तिडि, केरालय कपडिं मत्ते, अव्टेन मनम समादानम मनना.

9 गानि सिरमंत आंतोम इनकुनना लोकुल्क कतरनाक परिकसाने, उरिने, अव्सरम हिल्वव वेल्लेन नुकसान कियनसोंटा इच्चाने हिरकंतुर. असोंटा इच्चां मनकालोर्कुन हेळाहचि नासडेम कीतां.

10 बारित्ते कोत्तन पोरोटा पावरम, अग्नि रकाल्कुना सेड्डातनाल्कुंक हारि पुट्टिचंता. बचुद्रो लोकुल्क ओरा इच्चान दोर्किचुकुननाहाटी विस्वासमताल तप्पोत्तुर आनि ओरा पिस्वरते वेल्लेन दुक्कमतुन संपादिचुकुंतुर.

तिमोतिकु पौलसना आकिर आदेसकु

11 गानि निमे पेनदा बक्ति कियाना मनकन आदिन. इव अग्नि सेड्डातनाल्कुनाल लक्कु मंचेके नीतिते, बक्तिते, विस्वासमते, पावरमते, दैरनेमते आनि सादा-सिंपल पज्जो ताका.

12 नीवा विस्वासमतुन दक्किचुकुनालय बेस लडाइ कीसेके मन्नु, बस्केळ्ळक पिस्सना पिस्वरतुन गाट्टिगा पीसि ताका, इद पिस्वरहाटीगे नीकुन केयमळ जर्गता. ई मंचि पोल्लेतुन निमे वेल्लेन मंदि गवाइदार्कुना मुन्ने ओष्कुत्तिन.

13-14 अग्निद्वुन जीवाते इरना पेनदा मुन्ने आनि पुंतुस पिलात्तुसना मुन्ने बेस गवाइ हीता किरिस्तु येसुना मुन्ने, नना नीकु आदेस हीसेके गदा, मना सामि येसु किरिस्तु मरा वायनदाका, निमे ई आदेसतुन बदे तप्पु डागु आनि दोसेम अंटाकोंटा कापाळसेके इरि.

15 राजुल्कुना राजु, सामिल्कुना सामि, अग्निपोरो अदिकारम इरना आ आसिर्वाद दोर्कता, बरोबर वेलाकु ओन मनाकु हुप्संतोर.

16 ओन्क बस्केने हामुर हिल्ले. मनम बोरे होना परोम असोंटा वेल्गुने ओर मनंतोर. ओन इदवेरादाका बोरे हळा हिल्लुन, बस्केने हळा पस्सगुडा. अंटावुंकन्ना बलमाता आ पेनदुके बस्केळ्ळक कदर दोर्कि. आमीन.

17 ई दुनियाते मनना सिरमंत लोकुल्क, गरि कियामग्नि. नासडेम आसि होनना दनम पोरो आसे इरकोंटा, जीवाते मनना पेनदापोरो विस्वासम इराना. आ पेने मना आनंदमहाटी गावाले मत्तव आ अग्नि बेसतवुन इरगा हीता, इंचि ओर्क आदेस हीम.

18 इचोने आयका इंका ओर्क आदेस हीम गदा, ओर बेस कबाहक कीसेक मनना, बेस कबाहक कीसे सिरमंत आयाना. मनागा मत्तदुनाल अव्सरम मत्तोंक, पंचि हियालय बस्केळ्ळक मनसुनाल तयार मनगोम.

19 इल्हा कीसेके मत्ते, मुन्नेटा पिस्वरहाटी ओर उंदि बेस पुनादि तयार कीकुंतुर, आनि बस्केळ्ळक पिस्सना पिस्वर पिस्सेक मनंतुर.

20 तिमोति, नीकु अप्पजेपतदुन निमे कापाळकुन. बक्ति हिल्ला कराब पोल्लेनाल लक्कु मन. इंका इदे “निजम तेल्चि” इंचि वेहना आबद्दम कतानाल लक्कु मन.

21 इच्चुर लोक्कुलक असोटा पोल्लेन नम्मिसि विस्वासमतल तप्सोत्तुर. पेनदा कुर्पा बस्केळ्ळक नीतोनि मन्निकांटी.

2 तिमोति तिमोतिकु पौलुसना रोंडो सिट्टि

इद सिट्टिटा बारेमते गिचचो परिचयम

रासतोना पोरोल: पौलुस

रासता कालम: इसवि सन 67

इद तिमोतिकु पौलुस रासता रोंडो सिट्टि आंदु. पेनदा बेसता कबुरतुन वेहताहेंका ओन्क जेलुंक होनापीता. जेलुंक होंचि ओर वेल्लेन कस्टाल्क बोगांचेक मंतोर. जेलते ओर हायनाल आतोर. अयनागानि ओना मरिनसोंटा तिमोति सामिना विस्वासमते इंकिचचो गट्टि पडना इंचि इद सिट्टि रासतोर.

इव आकिर रोजकु आंदु, इव रोजकुने निमे तप्पुड बोदां वेहानोरगटाल, बोगमतनम कियानोरगटाल इंका सतता सुकाल्कुनाहाटीगे आसेते मनानोरगटाल जेगर्ता मन. बारित्ते इसोंटा लोकुल्क ओर्क नच्युता पोर्ले वेहनाहाटी कराहनोर्कुने हेळाहंतुर. अदुनहाटी पेनदा सत्तेम पोर्लेतुन वेहालय निमे बस्केळ्क तयारते मन. इल्हा पौलुस इद सिट्टि रासि तिमोतिकु दैरनेम हीतोर.

बगा बतल मंता

जोहार आनि परिचयम 1:1-2

स्तुति आनि किरिस्तु वेहताप पिस्साना बारेमते बोदां 1:3-2:13

तेल्पिच्चि वेहमळ आनि वें वेहमळ 2:14-4:5

पौलुसना सतता परिस्तिती 4:6-18

आकिरता बोदां 4:19-22

1 पेनदा इच्छाताहेंदाल किरिस्तु येसुना प्रेरित आता पौलुसना इद सिट्टि आंद. किरिस्तु येसुनपोर्रो विस्वासम इरते, बस्केळ्क पिस्सना पिस्वर दोर्कता इंचि पेन पोर्ले हीसि मत्ता, इदुना बारेमते वेहनाहाटी नाकुन लोहचियमळ जर्गता.

2 नावा पावरमगल्ला मरिं तिमोतिकु नना रासतन. नीकु मना पेनबाबनहेंदाल, सामि किरिस्तु येसुनाहेंदाल कुर्पा, दया, सांति दोर्किकांटी.

दन्यवाद आनि दैरनेम

3 नावा पारतनाने नीकुन बस्केळ्क मति कीसेके, ना तादो-बाबुरालेहका नना मनसुना पोर्लेते, बद पेनदद अयते सेवा कीसंतनो, अद पेनदुक दन्यवाद वेहचंतन.

4 नावाहाटी निमे पोंगागोटता कांडेरतुन मति कीसि नना नर्का-पिय्यल नीकु कलियाना इंचि इच्छा कीसंतन, इवटेन नावा आनंदम पुरागा आंता.

5 नीवा आ सत्तेम विस्वासम नाकु मति मंता. आ विस्वासम, मुन्ने नीवा काको लुइस आनि नीवा यावल युनिसनगागुडा मनुंदु, अदे विस्वासम निहगागुडा मंता इंचि नाकु बरोसा मंता.

6 इदुनहाटी नना नीकु मति कीसि हियानद बतल इत्ते, नना नीवा पोर्रो कय इरतस्के, पेनदाहेंदाल नीकु उंदि वरम दोर्कता. अद वरमतुन निमे बस्केळ्क एल्गिच्चि इर्ना.

7 बारित्ते मनाकु पेन हीता आत्मा मनाकुन पिरकिर्क किय्यका, मनालोप्पो अद बलम, पावरम आनि ओप्केतुन निहंता.

8 अदुनहाटी मना सामिना बारेमते आयि, ओनाहाटी जेलने मनना नावा बारेमते आयि वेरेतोर्क गवाइ वेहालय बस्केने सिग्गु अरमा. दानकु बदुल, बेसता कबुरतुन वेहनाहाटी पेन हीता बलमते निमे नातोनि तकलिष्क सहन कियालय तयार मन्नु.

9 पेन मनाकुन कापाळसि, दाना पवित्र पोल्लेते केयता. इदंता मना कबाहकुनहेंदाल जर्गाहिल्ले गानि सिराप ओना पिलान परकारम आनि ओना कुर्पाहेंकेन जर्गता. ई दया-मायातुन पेनबाबाल मनाकु ई दुनिया पुट्टका मुन्नेन किरिस्तु येसुनाहेंदाल हीतोर.

10 गानि इंदके इद पोल्ले, मनाकुन कापाळना किरिस्तु येसु वाताहेंका मनाकु तेळियसोत्ता. ई किरिस्ते हामुरतुन रद्द कीसि, बेसता कबुरताहेंदाल पिस्वरतुन आनि बस्केळ्ळक जीवाते मनानदुन पलाते अरहतोर.

11 इदे बेसता कबुरतुन प्रचार कियनाहाटीं प्रेरित अल्हेन कराहनोर इंचि नाकुन निलाहमळ जर्गता.

12 इदुनाहाटींगे नना इद जेलते तकलिष्क बोगांचेक मंतन. अयनागानि नना सिग्गु अर्रीन. बारित्ते नना बोनपोर्रो विस्वासम इरतन ओर नाकु एर्के. इंका ओर नाकु बतल अयते अप्पजेपतोरो* अदुन, मल्सि वायाना आ रोजु वायनदाका कापाळा परांतोर इंचि नाकु बरोसा मंता.

13 किरिस्तु येसुना लोप्पो मनना विस्वासम आनि पावरमताहेंदाल निमे बव सत्तेम पोल्लें अयते नाहेकेटाल केंजतिनो, अवन पीसि वेंरेतोराहाटीं मन्नु.

14 मनालोप्पो मनना पवित्र आत्माता बलमतोनि, नीकु अप्पजेपता मंचितनमतुन निमे कापाळकुन.

15 आसिया राज्यमते मनानोर अंतोर नाकुन होळसि होत्तुर इत्ता पोल्ले नीकु एरपाटे. अव्टे पुगिलस आनि हिरमुगिनेसगुडा मंतुर.

16 नावा कय्कुंक बेडीं वाटसि मंतां इंचि सिग्गु अर्काकोटा, उनेसिपुस्स इनानोर, नाकु ऊके-ऊके कलियसि नाकु वेल्लेन दैरनेम हीतोर. सामि ओना कुटुंबमपोर्रो दया हुप्सिरकांटी.

17 अचोने आयका ओर रोम सहरते वातस्के, नना दोर्कनदाका नाकुन मनसु तासि प्हकसेक मत्तोर.

18 नना इपीसि सहरते मननेके, ओर नाकु वेल्लेन रकालकुना सहायम कीतोर नीकु अयते बेस तेळियसि मंता. सामिना मल्सि वायाना आ रोजुने, ओनपोर्रो दया हुप्सालय पेन सहायम कियि इंचि नना कोरसेक मंतन.

2

येसु किरिस्तुना बेस सिपाइ आयना

1 ना मर्री तिमोति, किरिस्तु येसुनगा मनना कुर्पाते निमे बेस ताकतवर आम.

2 वेल्लेन मंदि लोकलकुना मुन्ने नाहेंदाल निमे केंजता पोल्लेन, बोर अयते वेंरेतोर्क कराह परांतुर, असोटा विस्वासमलायक मनानोर्कुंक अप्पजेप्पा.

3 किरिस्तु येसुना वरोर बेस सिपाइनालेसीं निमेगुडा तकलिष्क बोगांचा.

4 लडाइहाटीं पेयसता बोरे सिपाइ वट्टि सम्सारम पोल्लेने हिरकोर. बारित्ते ओन्क अद नवकरि बोर अयते हीतोरो ओन्क कुसि हियमळे ओना गुरि मनंता.

5 अल्हेने वरोर कुस्ति अर्रानोर नियमकुन पीसि कुस्ति अर्काकोटे ओन्क किरिस्टम दोर्को.

6 कस्टपळना कास्तकारि मनकंक, पंडता पंटाता मोदाटा पाल एतना अदिकारम मंता.

7 नना वेहना पोल्लेना बारेमते विचारम कीम, अन्नि पोल्लें तेळियानाहाटीं सामि नीकु बुद्दिद हियानुर.

8 नना वेहता बेसता कबुर परकारम, दाविद राजाना वंसंमते पुटसि, हामुरताल मर्रा जीवाते तेदता येसु किरिस्तुन मतिते इर्रा.

9 इदे बेसता कबुर वेहताहाटीं नना जेलुंक होत्तन. वरोर तप्पु कीतोना कय्कुंक वाटताप नावा कय्कुंक बेडीं वाटतुर. गानि पेनदा पोल्ले मात्रम बेडिने दोह्चि हिल्ले.

10 अदुनहाटींगे नना, किरिस्तु येसुना लोप्पो दोर्कना मुक्ति पेन पेरतोर्क, बस्केळ्ळक मनना दाना महिमातोनि दोर्कना इंचि बच्चुं कस्टाल्क अयना सहन कीतन.

* 1:12 बद अयते नना ओन्क अप्पजेपतनो.

11 इद पोल्ले विस्वासम कियनलायक मंता, अद बतल इत्ते, ओक्कला मनम ओनतोनि हातोम इनानय्ते, ओनतोनि पिस्संतोमगुडा.

12 मनम ओर्सकुंचेके मनानय्ते, ओनतोनि राज्येम इंका कीतोम. ओक्कला मनम ओन एरपाट किय्योन इनानय्ते, ओर इंका मनाकुन एरपाट किय्योर.

13 मनम विस्वासमलायक मनाकोन्ना ओर मात्रम विस्वासमलायक मनंतोर. बारित्ते ओनद ओर बस्केने एरपाट किय्योन इंचि इन्नोर.

पेन पेरता सेवाकुड

14 इव अन्नि पोल्लें निमे ओर्कु मति कीसि हीसेक मन्नु. इंका केंजानोर्कुन हेळाहनालायक बतले पायदा हिल्लुवा पोल्लेनाहाटी लोल्लिं कियामन्नि, इंचि ओर्कुन सामिना मुन्ने निलाहचि दटांचि वेहा.

15 बस्केने सिग्गु होनाकोटा, पेनदा पोल्लेता सत्तेमतुन बरोबर कराहोनोलेसी पेन निल्लाहाता बरोर सेवाकुड आसि मनालय कोसिस कीम.

16 बक्ति हिल्लुवा वट्टिट पोल्लेनाल तप्पिच्चुकुन, असोटा पोल्लें लोकुल्लुकुन हेळाहचि पेनदागटाल इंकिच्चो लक्कु कीतां.

17 असोटा लोकुल्लुकुना वळ्ळकमळ उंदि कुल्लिसि-कुल्लिसि पेद्दागा आयना पुन्नुलेहका मनंतां. हुमिनयुस आनि पिलेतुस असंटोरे आंदुर.

18 ओर इव्वुरगुडा सत्तेम हरदाल तप्पोंचि, हासि मर्रा जीवाते तेदमळ आसोत्ता इंचि इंतुर. इसोटा पोल्ले वळ्ळिसि ओर इच्चुर लोकुल्लुकुन विस्वासमतुन हेळाहचंतुर.

19 गानि पेन दोहता पुनादि बस्केळ्ळक नित्तिसि मनंता. अद पुनादिपोर्रो, “सामिक ओना लोकुल्लुकु बोर आंदुर, ओन्क एरपाटे,” आनि “सामिना पोरोल एताना हरेक मनकल, तप्पुड कबाहकुनाल लक्कु मनगोम,” इंचि सिक्का वाटसि मंता.

20 सिरमंतुल्लुकुना लोहकुने सिराप एंडि-बंगारमता बोळिंमं मनंतां इंचि आयो, अगा कट्टेटव आनि तोळितवगुडा बोळिं मनंतां. अव्ते एक्को इल्लुवातवुन पेद्दा-पेद्दा कबाहकुनेन वाळकुंतुर आनि तक्को इल्लुवातवुन बारे बस्केळ्ळक वाळकुंतुर.

21 अदुनहाटी बोरन्ना मनकल इल्लुवा तक्कोतोर मनानय्ते, ओर पेद्दा-पेद्दा कबाहकुने वाळकुनना बोळिल्लेहकाटोर आयनुर. अस्के ओर पवित्र आसि ओना मालकुना कबळ्ळक ओज्जंतोर पजा अन्नि तीरकुना बेसता कबाहक कियालय ओर तयार मनंतोर.

22 लेय्यातनमते वायाना कराब इच्चानाल लक्कु मन. पवित्र मनसुने सामिक आरादना कीसेके मनानोरतोनि कलियसि नीतिते, विस्वासमते, पावरमते, सांतिते मनालय कोसिस कीम.

23 तेल्वि तक्को अल्हेन बेकार पोल्लेनाल लक्कु मन. नीकु अय्ते एरपाटे, असोटा पोल्लें वाद-विवाद जगडाल्लुकुन पुटसंतां.

24 इंका सामिना सेवाकुड बस्केने जगडम कियकोटा, अंतोरपोर्रो दया हुप्पिचानोर आयगोम, ओर कराहनालायक मनगोम, ओप्केते मनगोम.

25 नीवा विरोदमते वळ्ळकानोर्कुंक सांत मनसुने तेळियागोट्टिस वेहा. सत्तेमता बारेमते तेल्विचकुननाहाटी पेन ओर्कु मार मनसु हिय्यार.

26 अस्के ओर्कु बेस तेल्वि वासि, ओरा सतता इच्चातुन दोर्किच्चुकुननाहाटी देय्यमता कयदाल इळबळानुर. बारित्ते देय्यम सतता इच्चान दोर्किच्चुकुननाहाटी ओर्कुन दोहचि वाटसि इर्ता.

3

आकिर रोजकुना तकलिप्क

1 आकिर रोजकुने इरगा तकलिपकुना कालम वायना मंता, इद मति इर्ता.

2 बारित्ते अव रोजकुने मनकालोर सतता बारेमतेन विचार कीतुर, कोत्तन पावरम कीतुर, सतता बारेमते पेद्दा-पेद्दा पोल्लें वेहकुंतुर, गरति मनंतुर, बदनाम कियानोर आंतुर, तल्लुर-बाबोना पोल्ले केंजुर, दन्यवाद वेहुर, अपवित्र आंतुर,

3 दया-माया मन्नो, मापि कियना मनसु मन्नो, वैरेतोर अपमानम कीतुर, ओप्केते मन्नुर, ओरा जीवा नोय्यो, जिवरासिनलेहका कीतुर, बेसतदुन हय्सुर,

4 पसांचंतुर, मंचि-सेड्डा विचारम किय्युर, सतता बारेमते पोंगुडतनम पोंगंतुर, पेनदा पावरमकन्ना सुकमतुने एकको पावरम कीतुर,

5 पलाताल पेनदा बक्ति कीतापे दिसंतुर गानि आ बक्तिता बलमतुन मात्रम नम्मुर. इसंटोरगटाल लक्कु मन.

6 ई लोकलुकुने इच्चुर इसंटोर मंतुर गदा, बव मुर्ताहक अय्ते कमजोर मनसुने पापमता मोताते रकारकालुकुना आसेने निंडिस पिस्सेक मंतां, अव मुरताहकुना लोहकुने होंचि अवुन ओराहेके कीकुंतुर.

7 इव मुर्ताहक बस्केळक करियसेकेन मंतां, गानि सत्तेम बतल अव तेल्लिचकुन्नों.

8 यन्नेस, यंत्रेस इनानोर मूसांक अड्डम तिरियतुर. ओरालेसीगे ई मनकालोरगुडा सत्तेमकु अड्डम तिरियंतुर. ई मनकालोरा बुद्धि हेळसोंचि विस्वासमते हरि तप्सि मंतुर.

9 गानि ईर इंका मुन्नेळक होना पस्स. बारित्ते मूसांक अड्डम तिरियता इव्वुर मनकालोर बल्हा तेल्वि तक्कोतोर इंचि अंटोर्क तेळियसि होत्ता, अल्हेन ईरा तेल्वि तक्कोतनमगुडा अंटोर्क तेळियसि होन्नार.

पौलसना आकिरता आदेस

10 गानि निमे नावा कराहमळतुन, ताकमळतुन, नना पिस्सना उद्देसमतुन, विस्वासमतुन, ओप्केतुन, पावरमतुन, नावा दैरेनेमतुन,

11 नना अंताकिया, इकोनिया आनि लिसरा इनना सहरकुने बोगांच्ता तकलिष्क, नना अरता बादां, इव अन्नि नीकु एपाटे मंतां. आयना इव अन्नि तकलिष्कुनाल सामि नाकुन कापाळतोर.

12 किरिस्तु येसुना लोप्पो पेनदा बक्तिते ताकतन इंचि इच्चा ईराना अंटोर्क कस्टाल्क अय्ते वायानुंगे.

13 गानि कराब कियानोर, मुळाहनोर, वैरेतोर्कुक दोका हीसेक, ओर दोकाते अरसेक इंकिच्चो कराब आंतुर.

14 गानि निमे बतल करियतिनो, बतल विस्वासम कीतिनो आनि अवुन निमे बोनहेंदाल करियतिन नीकु एपाट मंता. अवुने उंदेतीर ताकसेक मन.

15 अचोने आयका, निमे सिन्नास्केटाल पवित्र दर्मसास्त्रमता पोल्लेन करियतोन आंदिन. अव नीकु किरिस्तु येसुनपोरों विस्वासम इरते दोर्कना मुक्तितुन दोर्किच्चुकुननाहाटी बुद्धि, तेल्वि हीतां.

16 दर्मसास्त्रमते रासि मनना पूरा पोल्लें पेन वेहताहेंकेन रासतव आंदुं. अव पोल्लें कराहनाहाटी, तेळियागोटिस वेहनाहाटी, तप्पुन सुदरांचनाहाटीं आनि नीतिमंतुल्लक आयानाहाटीं टेरेनिग हियालय कबळक ओज्जंतां.

17 अद बल्हा इत्ते, दर्मसास्त्रमहेंदाल पेन दाना हरेक मनकन पुरागा दानालायक कीसि, अन्नि तीरकुना बेसता कबाहक कियनाहाटीं, ओर्कुन तयार कीता.

4

1 पेनदा मुन्ने आनि जीवाते मत्तोरद, हातोरद न्यायम कियना किरिस्तु येसुना मुन्ने इंका ई दुनियाते ओना मर्रां वायमळतुन आनि ओना राज्येमतुन मुन्ने इरसि नना नीकु आदेस हीतन गदा, इद दुनियाते पेनदा मुन्ने, मर्रां वासि राज्येम कियानुर अस्के जीवाते मत्तोरद आनि हातोरद न्यायम कियना येसु किरिस्तुना मुन्ने, नना नीकु दटांचि वेहानद बतल इत्ते,

2 पेनदा पोल्लेतुन, टाइम दोर्किना दोर्काकोन्ना प्रचार कियालय तयार मन, अन्नि तीरकुना ओप्केते ओर्कु कराहसेके, दटांच्सेके तेळियागोटिस वेहा.

3 नना इल्हा बारि वेहासेक इत्ते, बेस बोदातुन लोकल्क केंजुर असोंटा कालम वायना मंता. ओर ओरा मनसुंक वाताप ताकंतुर, ओरां दुर्दा केव्कुंक बतल अय्ते केंजमळ इस्टमो, असोंटा पोल्लें कराहना गुस्कुन सततातोनि कल्पकुंतुर.

4 ओर सत्तेम पोल्लेन केंजुर, तयार कीसि वेहना कतां केंजालय दांतुर.

5 गानि निमे बसोंटा परिस्तिती वायिना, पजोळ्क होनाकोंटा नित्तिसि मन. तकलिप्क वाते सहन कीम, बेसता कबुरतुन वेहाना नीवा कबळतुन कीसेके, निमे कियना पेनदा सेवाता कबळ पुरागा कीम.

6 नना अय्ते पेनदुक मोक्कु हियना पट्टुनगड्क* एवतन. दुनियातुन होळसि होनना नावा वेला दग्गेर्क एत्ता.

7 सामिना पोरोँटा विस्वासम बारेमता लडाइते, नना लडाइ बेस कीतन, नना बेस वित्तुतन. नावा विस्वासमतुन नना कापाळकुत्तन.

8 नावाहाटी ईर्सि मत्ता नीतिता किरिटम, सत्तेमते न्यायम कियना सामि, ओर मल्सि वातानाडु नाकु अदुन हीतोर. सिराप नाके आयो गानि, बोर-बोर अय्ते ओर दिस्सना रोजुन पावरमते एदुर हळसेक मंतुरो, ओर्कु अंतोर्कगुडा हीतोर.

तिमोतिकु पौलुसना आकिर पोल्लें

9 बच्चोर बिराना आते अच्चोर बिराना निमे नहगा वायाना कोसिस कीम.

10 बारित्ते देमासु इनानोर ई दुनियाता पावरमते नाकुन होळसि तेसलोनि सहर होत्तोर. क्रेसेंस इनानोर गलातिया एरियाते होत्तोर आनि तीतु इनानोर दलमतिया राज्यमते होत्तोर.

11 सिराप लूकाले नातोनि मंतोर. निमे वायनेके मरकुसुन नीतोनि पीसि वा. सेवा कबळते ओर नाकु वेल्लेन सहायम कीतोर.

12 तुकिकुस इनानोन नना इपीसि सहर लोहतन.

13 त्रोआस सहरते करपुस इनानोना लोन नना नावा कोट ईर्सि वातन. निमे वायनेके दान पीसि वा. अल्हेने नावा पुस्तकाल्क, विसेस कीसि तोलतोनि तयार कीता, हुटसि मत्ता पुस्तकाल्कगुडा पीसि वा.

14 सिकंदर इनना कम्मरि नावाहाटी वेल्लेन कराब कबाहक कीतोर. ओर कीता कबाहकुन पीसि, सामिगुडा ओन्क अल्हे हियानुर.

15 मनम वेहता पोल्लेंक ओर वेल्लेन अड्डम तिरियतोर. अदुनहाटी निमेगुडा ओनागटल जेगर्ता मन.

16 नावा न्यायम जर्गनेके, नना मोट्टा मोदाटा जवाब हीतस्के, नावाहेंदाल जवाब हियालय बोरे मना हिल्लुर. अंतोर नाकुन होळसि होत्तुर. ओर अल्हा कीतदुनहाटी पेन ओर्कुन लेक्का तल्काकोंटेन बेस.

17 गानि नाहेंदाल बेसता कबुर अंतोर्क एव्सि, दान यहूदि आयवोर अंतोर केंजगोम इंचि, सामि नाकु तोळ मंचेके नाकु बलम हीतोर. इल्हा नाकुन सिंहम तोळदाल कापाळतोर.

18 सामि मनना स्वर्ग राज्यमते नना होनालय, ओर नाकुन हरेक कराब कबाटाल कापाळनुर. ओनके बस्केळ्ताहाटी पेदुदातनम दोर्कि. आमीन.

पौलुस आकिरते अंतोर्क जोहार कीतोर

19 पिरिसकिला, अकविला आनि उनेसिपुस्सना लोतोर्कुंक नावा जोहार वेहा.

20 इरास्तुस इनानोर कुरेंति सहरते आगतोर. तोरोपिमुस इनानोर बिमार मत्ताहाटी नना ओन मिलेतुस इनना सहरतेन होळसि वातन.

21 पीनि कालम वायाका मुन्नेन निमे इगे वायना कोसिस कीम. इब्लुस, पुदेंस, लिनुस, क्लवदिया आनि कळमातोर अंतोर दादालोर नीकु जोहार वेहचंतुर.

22 सामि नीवा आत्माकु तोळ मन्निर. सामिना कुर्पा नीकु तोळ मन्निकांटी.

* 4:6 पट्टु बलि पीटम.

तीतू तीतूंक पौलुसना सिट्टि

इद सिट्टिता बारेमते गिचचो परिचयम

रासतोना पोरोलः पौलुस

रासता कालमः इसवि सन 60

वेल्लेन देसेल्लकुने होंचि येसु सामिना बारेमता बेसता कबुरतुन कराहलय पेन पौलुसुंक आदेस हीता. पौलुस येस्सलेमते मननेके तीतू इनना वरोर लेय्योड ओनतोनि मनुंदुर.

येसु सामि हासि मर्रा जीवाते तेदसि स्वर्गम होत्ता पजा, दग्गेर-दग्गेरा मुप्यै वर्साना पज्जो पौलुस इद सिट्टि तीतूंक रासतोर.

पौलुस आनि तीतू पेनदा बेसता कबुरतुन प्रचार कियालय केरेतु इनना सहर होत्तुर. केरेतु सहरते अंतोर विस्वासुल्लक पूनोर्के मत्ताहेंका ओराहाटी पेदू दाल्लकुन निलाहनेके बव पोल्लेना अक्सरम मंता अव अन्नि पोल्लें पौलुस इद सिट्टिते रासतोर. अचोने आयका अगा तप्पुड बोदां कराहना गुस्ल्लकुगुडा मत्तुर. ओरा बोदानाल सततुन कापाळकुंचेके ओर कराहना बोदान बल्हा आपाना इत्ता पोल्लेंगुडा पौलुस इद सिट्टिते रासतोर.

पेनदुन विस्वासम कीता लोकुल्लक बल्हा आनि बद तरिकाते पिस्वर पिस्सना इत्ता पोल्लेंगुडा विस्वासुल्लकुंक कराहनाहाटी पौलुस तीतूंक इद सिट्टिते रासतोर. पेनदा इच्चा परकारम पिस्वर पिसानय्ते, पेनदाहेंदाल दोर्कना बस्केळ्ळक पिस्सना पिस्वर दोर्कता इत्ता मेन पोल्ले इद पुस्तकमते पौलुस रासतोर.

बगा बतल मंता

जोहार आनि परिचयम 1:1-4

कलिसियाता अदिकारिल्लक 1:5-16

कलिसियाते बोन्क बद बोदा कराहना 2:1-15

बोदां आनि वें वेहमळ 3:1-11

आकिरता बोदां 3:12-15

पौलुस तीतूंक जोहार वेहांतोर

1 नना पौलुस, पेनदा दासुन आनि येसु किरिस्तुना प्रेरित *आंदुन. पेन पेरता लोकुल्लकुना विस्वासमतुन बेर्सागोटलय, ओर्क सत्तेमता बारेमते तेळियागोट्टिस वेहालय नाकुन लोहमळ जर्गता.

2 ई सत्तेम, बस्केळ्ळक पिस्सना पिस्वरता आसे पोरो निल्लिस मंता. बस्केने आबदूदम वळ्ळुवा पेन इदुन हीतन इंचि वेल्लेन मुन्ने पोल्ले हीसि मत्ता.

3 बरोबर गावाले मत्ता वेलातेन पेन दाना पोल्लेन मनाकु वेहचि हूपिस्ता. इदे बेसता कबुरतुन वेहनाहाटी मनाकुन कापाळना पेन नाकु आदेस हीसि अप्पजेपता.

4 विस्वासमते नावा समानम मनना नावा मर्रि तीतूंक इद सिट्टि नना रासेक मंतन. पेनबाबनहेंदाल आनि मनाकुन पिसागोटनोर किरिस्तु येसुनहेंदाल नीकु कुर्पा, सांति दोर्किंकांटी.

केरेतु दीबेते तीतू कियना कबाहक

* 1:1 प्रेरित इद पोरोल्लक “पेन लोहचीतोर” इंचि अर्तम. येसु पन्नेड मंदितुन पेरकुत्तोर ओरे प्रेरितुल्लक आंदुर. इच्चुर्कुन पेरसि किरिस्तुना बारेमते वेहालय लोहचीतोर्कुन प्रेरितुल्लक इंचि इंतुर.

5 क्रेति दीबेते, बव कबाहक अय्ते मय्सि मंतां, अव कबाहकुन सुदरांचनाहाटीं आनि नना नीकु आदेस हीता परकारम निमे हरेक सहरते पेद्दालकुन निलाहना इंचि नीकुन नना अगा होळसि वातन.

6 निलाहना पेद्दा मनकनपोरीं बदे दोसेम मननायो, ओन्क उंदे मुत्तो मनगोम. ओना मर्क-मियाहक विस्वासुल्क आसि ओर सिग्गु हिल्वा कराब कबाहक कियानोर, बोना पोल्ले केंजाकोटा मनानोर इंचि ओरापोरीं तप्पु मनामन्नि.

7 बारित्ते आ अदिकारि पेनदा कबाटुन मुन्ने ताकसानोर आंदुर. अदुनहाटीं ओनपोरीं बदे दोसेम मननायो, ओर जिद्दिद मनकल मनामन्नि, ओर बिराना होंगुंक वायानोर आयामन्नि, ओर कल्ल उनामन्नि, जगडाल्क कियामन्नि, तप्पुड कमाइ कियानोर आयामन्नि.

8 गानि आ अदिकारि हेडमितोन बेस हळकुनानोर आयगोम, बेस कियमळतुन पावरम कियानोर आयगोम, मनसुना आसेन आपिसि पीसि मनानोर आयगोम, ओर सादा-सिंपल मनागोम, पवित्र आनि सततुन आपकुंचि मनानोर आयगोम.

9 इंका ओन्क कराहता सत्तेम पोल्लेतुन ओर विस्वासमते गट्टिगा पीसि मनगोम. अल्हा मत्तेने ओर लोकुल्कुंक सत्तेम पोल्ले वेहचि ओर्क कराह परांतोर आनि एदुर वळकानोरा तोड्डिंड मुच्चा परांतोर.

10 बारित्ते विसेस कीसि कतना कीतोरव्टेताल वेल्लेटुर लोकुल्क मर्लाबळानोर, बतक ओज्जाकोन्ना वट्टिदे वळकानोर, दोका कियानोर वेल्लेन मंतुर.

11 ईरकुन वळकाकोटा कियमळे गावाले. बारित्ते ईर लोकुल्क, बव पोल्ले अय्ते कराहना आयनो, अव पोल्ले कराहचि तप्पुड कमाइ कियनाहाटीं अन्नि कुटुंबाल्कुनंता पाळ कीतुर.

12 क्रेति दीबेतोर वरोर ओरा कबुरतोर, “केरेतु दीबेता लोकुल्क बस्केळ्क आबद्दम वळकंतुर, केडा जिवरासिनसंतोर, लंडु आनि तिडितोर,” इंचि वेहतोर.

13 ओर वेहता गवाइ निजमे आंद. अदुनहाटीं आबद्दम बोदातुन नम्मना विस्वासुल्कुंक गट्टिगा वें वेहा. अस्केन ओर सत्तेम विस्वासमते गट्टिपळांतुर.

14 यहूदिल्कुना तयार कीता वेसुडिन पोरीं विस्वासम इर्काकोटा, सत्तेमताल तप्पोत्ता मनकालोरा आदेसकुनाल लक्कु मनांतुर.

15 मनसु पवित्र मत्तोर्कुंक अन्नि वस्तुक पवित्रे मंतां, गानि हेळसोत्ता मनसु आनि पेनदापोरीं विस्वासम हिल्वोर्क मात्रम बतले पवित्र मन्नो. ओरा मनसु, मनसु वेहता पोल्ले इव रोंडगुडा हेळसोचि मंतां.

16 पेन माकु एरपाटे इंचि ओर वेहांतुर, गानि ओरा कियना कबाहक हळते, ओर पेनदुन एरपाट किय्युर इत्तद दिस अर्ता. ओर हय्सवोर, वेहता पोल्ले केंजवोर आंदुर, ओर असल बदे बेस कबळ कियनालायक हिल्लुर.

2

बोन्क बद बोदा कराहना

1 निमे मात्रम बस्केळ्क सत्तेम बोदाकु ओप्पनालायक पोल्ले करहा.

2 ओप्केते, इमानदार मनमळते, सततुन आपकुनमळते, विस्वासमते, पावरमते, दैरनेमते, ओर्सकुनमळते गट्टिगा मंदालय मातरलोर्कुंक करहा.

3 अल्हेने मातरिहकुंक करहा गदा, अवुना पिस्वर पवित्र लोकुल्कुना पिस्वरलेहका मंदना. वेंरेतोर पोरीं दोसेल्क दोस्साकोटा, कल्कु उनाकोटा, अव बस्केळ्क बेसता बारैमतेन कराहगोम.

4 अल्हेने अव लेय्या मुरताहकुंक, अवुना मुय्दुर्कुन, पिलाल्कुन पावरम कियाना,

5 सततुन आपकुंचि पिस्साना, पवित्र मंदना, लोतुन आवारिचकुनना, दयाता गुनम मंदना, मुय्दोना पोल्लेपोरीं बेस मंदना, इंचि कराह. अल्हा कराहते, अवुनाहेंदाल पेनदा पोल्ले बदनाम आयाकोटा मंता.

6 अल्हेने लेय्युर्कुंक जोर हीसि वेहा गदा, ओर सततुन आपकुंचि पिस्सिरकांटी.

7 बेस कबाहक कीसि निमे अन्नि पोल्लेने ओराहाटीं उंदि उदाहरनलेसी मन्नु. नीवा कराहमळ सत्तेम आनि लोकुलक बेस केंजनालायक मनगोम.

8 निमे कराहना बोदा इच्चोन सत्तेम मनना गदा, अठ्ठे बोरे तप्पु तेंडामन्नि आनि नीवा विरोदमते वळ्कानोर्कुंक मना बारेमते बतले तप्पु दोर्कका ओर्क सिग्गु वायगोम.

9 दासुल्लकुंक करहा गदा, बस्केळ्ळक ओर ओरा मालकुल्लकुना पोल्लेपोर्रो मंदना आनि अन्नि परिस्तितीने मालकुल्लकुंक तिरियसि वळ्काकोटा, ओर्कुन कूस कियना.

10 इंका मालकुल्लकुनगटाल दोंगातनम कियामन्नि गानि अन्नि पोल्लेने बेस विस्वासमलायक ओर मंदना. अल्हा मत्ते, मनाकुन कापाळना मना पेनदा बारेमता कराहमळतुक ओर इंकिच्चो कदर तरांनोर आंतुर.

11 बारित्ते अंटोर लोकुल्लकुंक मुक्ति हियनाहाटीं पेन दाना कुर्पातुन हुपिस्ता.

12 अद दया मनाकु, मनम पेनदुक नच्चुवा पिस्वर आनि सततुन आपकुंचि, इद दुनियाते बेस बक्तिते, सवरटा हर्दे आनि पेनदुक नच्चना पिस्वर पिसगोम, इंचि कराहंता.

13 अचोने आयका मना कदरगल्ला पेन आनि मनाकु मुक्ति हियना येसु किरिस्तु ओना महिमामते वांतोर इत्ता आ सक्कटा आसेतुन मनम एदुर हळ्सेक मंदना इंचेकगुडा कराहंता.

14 इंका किरिस्तु मनाकुन अन्नि तीरकुना तप्पुड कबाहकुनाल तपिच्चि, बस्केळ्ळक बेसता कबाहके कियगोम इंचि मनसु इराना ओना सतता लोकुल्लक मनम आयगोम इंचि, मनाकुन पवित्र कियनाहाटीं ओना सतता जीवातुन हीतोर.

15 इव अन्नि पोल्लें निमे पूरा अदिकारमते दटांचि तेळियागोट्टिस वेहा, करहा. नीकुन सिन्नगा बोने हळा हियमा.

3

पिसालय मंचि हरिं

1 राज्येम कियानोरद आनि अदिकारिल्लकुना पोल्ले केंजसि ओर वेहताप ताकना, इंचि लोकुल्लकुंक मति कीसि हीम. इंका कदरलायक मंदना हरेक बेस कबळ कियालय बस्केळ्ळक तयार मंदना.

2 बोर्कुने बदनाम कियानायो, बोरतोने जगडाल्क कियानायो, मेत्तटा गुनम मंदना आनि अंटोरतोनि सादा-सिंपलते कलियसि मंदना इंचि ओर्क वेहा.

3 मुन्ने मनमगुडा तेल्चि तक्कोतोरम, बोरदे पोल्ले केंजवोरम, वेंरेतोर पोल्लेने मुळ्गुतोरम, वेंरे-वेंरे इच्चां आनि सुकालकुना गुलामगिरि कीसेके मत्तोम. इंका होंगु-पगाते निडिस मत्ता पिस्वर पिसुंदुम, कळ्ळकु पोत्तुमळ, वेंरेतोर मनाकुन हय्साकोदुर, मनमगुडा वरोंक-वरोर हय्साकोदुम.

4 गानि मनाकुन पिसागोटना पेनबाबाल ओना बेसतनम आनि पावरमते निडिस मत्ता दयातुन मनापोर्रो हुपिच्चि,

5 मनाकुन कापाळतोर. मनम कीता नीति कबाहकुनाहेंका ओर मनाकुन कापाळा हिल्लोर गानि ओना सतता दयाहेंदाले मनाकुन कापाळतोर. पूना रीतुने पुट्टना एर तुंगमळहेंदाल आनि पवित्र आत्मा मनाकुन पूनगा कियमळहेंदाल इल्हा आता.

6 ई पवित्र आत्मातुन, मनाकुन पिसागोटना येसु किरिस्तुनाहेंदाल ओर मनापोर्रो इरगा वळियतोर.

7 ओर इल्हा बारि कीतोर इत्ते, मनम ओना कुर्पाहेंदाल नीतिमंतुल्लक आयगोम आनि बस्केळ्ळक पिस्सना पिस्वरता आसेते मनम ओना वारसदार्क आयाना इंचि.

8 इद पोल्ले निजम आंद. आनि निमे इव पोल्लें दटांचि वेहाना इंचि नावा इच्चा मंता. निमे दटांचि वेहतेने, बोर अयते पेनदुन विस्वासम कीतुर, ओर जेर्गताते मंचेके बेसता कबाहक कीसेके मनांतुर. बारित्ते इव अन्नि मनकालोरहाटीं बच्चोने बेस आनि पायदता पोल्लें आंद.

9 गानि अर्तम हिल्ला लोल्लिनाल, वंसाल्कुना बारेमता पोल्लेनाल, जगडाल्कुनाल इंका मूसाना नियमकुना बारेमता लोल्लिनाल निमे लक्कु मन. अव बतक ओज्जानव आयों, अवुनाहेंदाल बतल पायदा इंका वायो.

10-11 अल्हा चुगली कीसि बेरे-बेरे कियालय ह्ळानोंक, उंदि-रोंड मल्कां दटांचा. केंजाकोंटे, ओर मनकल हरि तप्सि पापम कीसंतोर, ओनद-ओरे दोस्सि इंचि ह्पिचकुंचंतोर इंचि एरपाट कीसि ओना दंटा होळसीम.

मतिते इरानालायक कोन्नि पोल्ले

12 बस्के अयते नना, अरतिमास इनानोन हिलाकोंटे तुकिकुस इनानोन निहगा लोहकन, अस्के बल्हा कीसि अयना निमे, निकोपोलिस सहरते नाकु वासि कलियना कोसिस कीम. बारित्ते पीनि कालमते नना अगोन मनंतन इंचि निरनायम येततन.

13 जेनास वकील आनि अप्पुलोसुंक ओरा पय्नेमते ओर्क बतले तक्को होनाकोंटा ह्ळकुंचि, ओर्कुन सालीं कीम.

14 अवसराल्कुन दोर्किचकुननाहाटीं मना लोकुल्कगुडा बेस कबाहक कीसेके मनमळ करियगोम, अल्हा कीते ओर पलम हियानोरलेहका मनांतुर.

15 नावातोनि मनानोर अंटोर नीकु जोहर वेहचंतुर, इंका विस्वासमहेंदाल मनाकुन पावरम कियानोर्कुगुडा जोहर. पेनदा कुर्पा मी अंटोरतोनि मन्निकांटी.

पिलेमोन पिलेमोनुंक पौलुसना सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 60

पौलुस जेलने मत्तस्के इद सिट्टि रासतोर. रोम सरकारता कैदिल्कुना लोप्पोटाल ओनेसिमुस पोरोलतोर वरोर मत्तोर. ओर ओना मालक, इत्ते पिलेमोनागटाल वित्तिस मत्तोर. पौलुस जेलने मत्तस्के ओन्कु अगा ओनेसिमुस कलियतोर, अस्के पौलुस ओनकु पेनदा पोल्ले वेहचि ओन विस्वासमते तत्तोर. पिलेमोन ओना सेवक ओनेसिमुसुन माप कीसि, ओन वरोर दासुनलेसी आयो गानि वरोर विस्वासि तम्मुनलेसी मरी ओनगा ईरना इंचि पौलुस पिलेमोनुंक इद सिट्टि रासतोर.

बगा बतल मंता

जोहार आनि परिचयम 1-3

पिलेमोनना तारिप कियमळ 4-7

ओनेसिमुसनाहाटी विनंति कियमळ 8-22

आकिरता बोदां 23-25

जोहर

1-2 नना पौलुस, किरिस्तु येसुना बारेमता बेसता कबुर वेहताहाटी कैदिन आसि जेलने मंतन. ना तम्मुनलेसी मनना तिमोतिनाहेंदाल ना पावरमगल्ला दंटातोर पिलेमोनुंक, मावा हेलड अपियांक, बेसता कबुर वेहानाहाटी मावालेसी लडाइ कियना अरकिपुसुंक, अल्हेने नीवा लोते जमा आयाना कलिसियातोरक इद सिट्टि रासेक मंतन.

3 मना पेनबाबानाहेंदाल आनि सामि येसु किरिस्तुनाहेंदाल मीकु कुर्पा, सांति दोर्किकांटी.

पिलेमोनना पावरम आनि विस्वासम

4-5 पिलेमोन, सामि येसुना पोरोटा नीवा विस्वासम बारेमते, अल्हेने पेनदा लोकुल्कुनपोरोर्गे निमे हुप्सना पावरम बारेमते नना केंजतन. अदुनहाटी नना पारतना कियनेके बस्केळक नीकुन मति कीसि पेनदुक दन्यवाद वेहंतन.

6 येसु किरिस्तुना अन्नि बेसता पोल्लेना तेल्वि, नीकु दोर्कताहाटी वेरेतोरगुडा नी विस्वासमते पोल्तु आयागोम इंचि नना पारतना कीसेक मंतन.

7 तम्मा! निमे पेनदा लोकुल्कुन पावरम कीसि ओरा मनसुकुंक सांति हीतिन. अदुनहाटी नी पावरमहेंदाल नाकुगुडा वेल्लेन सुकम, सांति दोर्कता.

ओनेसिमुसनाहाटी विनंति कियमळ

8-9 बद्द अव्वरमो अदुन कीम इंचि, किरिस्तुना पोरोल्ले नीकु वेहाना अदिकारम नाकु मंता. अयनागानि नना पौलुसुन, मातरन आसि किरिस्तु येसुनाहाटी जेलते मंचि, पावरमते नीकु विनंति कीसंतन.

10 ओनेसिमुसुनपोरोर्गे निमे दया हुप्सा इंचि नीकु विनंति कीसंतन. नना जेलते मननेके ओर पेनदुन विस्वासम कीसि नावा मरिं आतोर.

11 मोदाला ओर नीकु बता कबळक ओज्जाकोटा मत्तोर. गानि इंदके ओर मना इव्वुर्कगुडा कबळक ओज्जंतोर.

12 अयते नना बच्चोरो पावरम किय्याना ना मरिंनसोटा ओनेसिमुसुन नीहेके वापस लोहचंतन

13 बेसता कबुर वेहताहाटीं नना जेलते मंतन. नीवा बदलिपोर्रो ओनेसिमुस नावा सेवा कीते बेस मनंता इनकुंचि ओन नाहगेन इराना विचारम कीसि मत्तन,

14 गानि निमे किय्याना इसोंटा बेसता कबळ कुसिते कियगोम, बल्मितोनि जर्गामन्नि इंचि नीवा पोल्ले हिल्ला नना इल्हा कियमळ नाकु बेस दल्गाहिल्ले.

15 ओनेसिमुस कोन्नि रोजकु निहागटाल लक्कु आसि मत्तोर, गानि बोर्क एपाट! बस्केळताहाटीं नीकु दग्गेरा आयगोम इंचि अल्हा जर्गता बारे!

16 इंदकेटाल ओनेसिमुसुन दासुनलेक्काते आयो गानि, दासुंकन्ना एक्को, इत्ते नीवा दंटाटा वरोर विस्वासि दादाना लेक्काते हळकुन. नना अय्ते ओन बच्चोनो पावरम कीतन. गानि इंदके ओर सामिन विस्वासम कीसि, नीतोनि मनंतोर, निमेगुडा ओन नाकन्ना एक्को पावरम कीम.

17 ओक्कला निमे नाकुन सेवाल्लोप्पो नीवा पालिगाड इनकुनानय्ते, नाकुन दग्गेरा कीकुत्ताप ओनगुडा दग्गेरा कीकुन.

18 ओर नीवद बतलन्ना नुकसान कीते, नीकु बतलन्ना बाकिर्गिटा मत्ते, नावा पोरोलते रासि इर्रा.

19 अदुन निहचींतन इंचि, नना पौलस, नावा सतता कय्दे रासि हीसेक मंतन. अल्हा हळते निमेन नाकु बाकि मंतिन. इद नीकु वेहना अक्सरम हिल्ले.

20 अदुनहाटीं नावा तम्मा! सामिना पोरोलते ओनेसिमुसना बारेमता विनंतितुन ओप्कुंचि, किरिस्तुना लोप्पो नावा मनसुंकु सांति हीम.

21 नना वेहतद निमे केंजंतिन इत्ता बरोसाते इद सिट्टि रासेक मंतन. अचोने आय्का नना वेहतादानकन्ना निमे एक्को कीतिन इंचि नाक एर्के.

22 अल्हेने, नाहाटीं मंदालय उंदि जेगा हळसि इर्रा. मिमेट किय्याना पारतनां केंजसि सामि नाकुन मिहगा लोहंतोर बारे इत्ता आसे नाकु मंता.

आकिरता जोहर

23 किरिस्तु येसुनाहाटीं जेलने अरता एपप्रास इनानोर इगे नातोनि मंतोर, ओर मीकु जोहार वेहचंतोर.

24 अल्हेने नातोनि कलियसि कबळ कियाना मरकुस, अरिसतरकुस, देमास, लूकाल इरगुडा नीकु जोहार वेहासेक मंतूर.

25 मना सामि येसु किरिस्तुना कुर्पा मीवा आत्मांकु तोळ मन्निकांटी, आमीन.

इब्रि लोकुकुलकुनाहाटीं रासता सिट्टि

इद सिट्टिता बारेमते गिचचो परिचयम

येसुना सिस्स्युल्क येसुना बारेमता बेसता कबुरतुन दुनियाते होंचि वेहतुर. अदुनहाटीं वेल्लेन यहुदिल्क येसुनपोर्रो विस्वासम कीतुर. पजा ओर वेंरे लोकुकुलकुनाहेंदाल वेल्लेन तकलिपकु बोगांचतुर. अस्के, आ यहुदि विस्वासुल्क येसुनपोर्रोटा विस्वासमतुन होळसि मर्रा पळाना रीति-रिवाजकुन पीसि ताककोम इंचि विचारम कीतुर. इल्हा विचारम कियाना आ यहुदि विस्वासुल्कुना देरनेमतुन बेसांगोटनाहाटीं, येसुना वरोर बक्तुड ओर्क ई सिट्टि रासतोर.

पडाना नियम परकारम पेनदा बद इच्चा अयते पुरागा आया हिल्लेनो, आ इच्चातुन येसु किरिस्तु पुरागा कीतोर इत्ता पोळ्लें, इद सिट्टिते वेल्लेन उदाहरन हीसि रासि मंतां. कास कीसि इद सिट्टिते मूड पोळ्लें मनाकु दोर्कतां:

- (1) येसु किरिस्तु पेनदा मर्रि आंदुर, ओर कुदुदु तकलिपकु बोगांचेके पेनदा इच्चातुन पुरागा कियालय तयार आतोर. ई येसु किरिस्तु इत्ते, पेनदा अन्नि दूतांकन्ना, पेनदा कबुरतोर्कन्ना, मनकालोर्कुंकन्ना बच्चोनो पेदुदोड आंदुर.
- (2) येसु किरिस्तुंकन्ना मुन्ने मत्ता पेदुदा पेर्मालोरा लोप्पोटाल, येसु वरोरे बस्केळ्ळक जीवाते मनना पेदुदा पेर्मल इंचि पेन रूजुव कीसि हुपिस्ता.
- (3) जिवरासिना मोक्कुल्क आनि रीति-रिवाजकु मनाकुन पापमताल पिसागोट्टंतां इंचि यहुदिल्क नम्मंदुर, गानि सिराप येसु किरिस्तु वरोरे, पापमताल, हामुरताल, हामुरता वेंरेंताल पिसागोटा परंतोर इंचि इद सिट्टिते रासतद मंता.

बगा बतल मंता

किरिस्ते पेनदा मर्रि, वारसदार आनि महिमा आंदुर 1:1-3

किरिस्तु पेनदा दूतांकन्ना पेदुदोड आंदुर 1:4-2:18

किरिस्तु मूसाल आनि येहोसुंकन्ना पेदुदोड आंदुर 3:1-4:13

किरिस्तुना पेर्मलतनम अंटवुंकन्ना पेदुदेद आंद 4:14-7:28

किरिस्तुनाहेंदाल वाता करार अन्नि करास्कन्ना पेदुदेद आंद 8:1-9:22

किरिस्तुना मोक्कु अन्नि मोक्कुल्कुंकन्ना पेदुदेद आंद 9:23-10:39

किरिस्तु विस्वासमकन्ना पेदुदोड आंदुर 11:1-12:29

आकिरता बोदां आनि आदेसाल्क 13:1-25

येसु किरिस्तु पेनदा मर्रि आंदुर

1 वेल्लेन मुन्नेटा कालमते पेन बच्चुंगो मल्कां बच्चुंगो तीरकुने पेनदा कबुरतोरहेंदाल मना तादो-बाबुरतोनि वळ्ळता.

2 गानि ई आकिरता रोजकुने बारे, पेन दाना मर्रिनाहेंदाल मनातोनि वळ्ळता. दाना मर्रिनाहेंदाले इद पूरा दुनियातुन तयार कीसि, ओन ई दुनियाता वारसदार इंचि निलाहता.*

3 आ मर्रि पेनदा महिमाता वेलगु आंदुर. इका पेनदा गुनम आनि मर्रिना गुनम उंदेतीर मंता. मर्रि ओना बलमगल्ला पोळ्लेने ई दुनियातुन ताकिच्चेके मंतोर. ओर मना पापाल्कुनंता नोर्सि मनाकुन पवित्र कीतोर. पजा एत्तुने स्वर्गमते मंदना अन्निटकन्ना पेदुदा पेनदा तिना बाजुंक होंचि उदतोर.*

येसु पेनदा दूतांकन्ना पेद्दोड

4 इल्हा ओर पेनदा दूतांकन्ना वेल्ले बेस पोरोल आनि कदर दक्किचकुत्तोर.

5 बारित्ते, पेन दाना मरिना बारेमते,

“निमे नावा मरिन आंदिन, इय्याला ननाने नीकुन पुटिस्तन. ✱ इंका
नना ओना बाबोन आंदुन, ओर ना मरि आंदुर.”✱

इंचि येसुन तप्पा बस्केने बदे दूतातुन पेन इना हिल्ले.

6 इदे आयवा, बस्के अय्ते पेन दाना तोल्सूर मरिन बूमितगा तत्ता, अस्के, “पेनदा अन्नि दूतां ओन मोळ्किं,”✱ इंचि इत्ता.

7 पजा पेन दाना दूताना बारेमते वेहतस्के, “अद दाना दूतन वळिलेहका आनि दाना सेवकुल्लुकुन पोत्तना तळमिलेहका कीता,”✱ इंचि वेहता.

8 गानि दाना मरिना बारेमते,

“पेनदुना, नीवा राजगद्दे बस्केळ्क निल्सि मनंता,
निमे नीतिते राज्येम कियानदुन आंदिन.

9 सत्तेमतुन निमे पावरम कीतिन, सत्तेम हिलुवादान निमे हय्सिन.

अदुनहाटीगे नना, नीवा पेनबाबन, नीवा दंटातोरा लोप्पोटाल नीकुन पेरसि,

वेल्ले आनंदमता निय होक्सि नीवा अबिसेकम* कीतिन,”✱

इंचि पेन इत्ता.

10 इच्चोने आयका, पेन दाना मरिना बारेमते,

“सामि! मोट्टा मोदाला बूमिक पुनादि दोहतोन निमेने आंदिन.

मब्बुकुन नीवा कय्दे तयार कीतिन.

11 अव अन्नि नासडेम आसि होनानुं, गानि निमे बस्केळ्क मनांतिन,

कपडि पडन आसि हसोत्ताप, अव अन्नि पडानव आसि होनानुं.

12 निमे सेद्दरतुन आटमूट कीताप, अवुन आटमूट कीकिन.

अव कपडिनालेसी बदलांचनुं, गानि निमे मात्रम बस्केळ्क उंदेतीर मनानोन आदिन,

नीवा कालाल्क बस्केने मारो,”✱

इंचि इत्ता.

13 मरा, “बदवेरदाका अय्ते नीवा पगातोरुंन नीवा काल्कुना हिळु तर्रोनि अदवेरदाका,

निमे नावा तिना बाजुंक उद्दिदिसि मन्नु,✱ इंचि बद्दे दूतातुन बस्केने पेन इना हिल्ले.”

14 पेनदा अन्नि दूतां दाना सेवा कियाना आत्मांगें आय्योंगां! बोर्क अय्ते पापाल्क मापि आसि मुक्ति दोर्कतनो ओर्कु सहायम कियानाहाटी पेन इवुन लोहांता.✱

2

अन्निटकन्ना मंचि मुक्ति

1 अदुनहाटी मनम केंजता सत्तेम पोल्लेनाल लक्कु आयामन्नि इंचि अवुनहेके मनम बेस लक्से हियगोम.

2 बारित्ते, पेनदा दूतानाहेंदाल वेहता पोल्ले सत्तेम इंचि रूजुव आता,✱ अस्के आ पोल्ले परकारम कबळ कियाका तप्पु कीतोर्कु आनि ताकुवोर्कु दग्गुता सिक्सा दोर्कता.

✱ 1:5 बजन संहिता 2:7 ✱ 1:5 2 समुल्ल 7:14 ✱ 1:6 बजन संहिता 97:7 ✱ 1:7 बजन संहिता 104:4

* 1:9 अबिसेकम राजाल आसि राजगद्देपोरो उपिच्चका मुन्ने ओना अबिसेकम किया पीता. ✱ 1:9 बजन संहिता 45:6-7

✱ 1:12 बजन संहिता 102:25-27 ✱ 1:13 बजन संहिता 110:1; मत्तयाल 22:44; मरकुस 12:36; ल्काल 20:42-43

✱ 1:14 बजन संहिता 103:20-21 ✱ 2:2 गलातिया 3:19

3 अयते इच्चोर पेद्दा मुक्तिता कबुरतेके लक्से इर्कांटे, वायाना सिक्साताल मनम बल्हा तपिच्चुकुना परीतोम? इदुना बारेमते मोट्टा मोदाला सामिए वेहतोर. अद कबुरतुन सामिनगटाल बोर अयते केंजतुरो, ओर अद कबुरतुन मनाकु तेळियागोट्टिस रूजुव कीतुर.

4 अचोने आयका पेनगुडा चिन्हां, इंचंन्रमता कबाहक, तीराता अदूबूताल्क आनि पवित्र आत्माता वराल्क दाना इच्चा परकारम दाना बक्तुल्कुंक हीसि, ई मुक्तिता बारेमते गवाइ हीसेक मत्ता.

येसु मनकना रूपमते मारियमळ

5 मुन्ने वायाना बद दुनियाता बारेमते मोमोट वेहचंतोम, आ दुनियातुन पेन दाना दूताना कय हिळ्ळु इर्हा हिल्ले.

6 इदुना बारेमते दर्मसास्त्रमते उंदगा बोरो वरोर गवाइ वेहासेक इल्हा इत्तोर:

“मनकल इत्ते असल बोर आंदुर, ओना बारेमते निमे इच्चोन विचारम कीसंतिन.

हिलाकॉटे निमे इच्चोर पिकिर कियनाहाटी,

असल मनकना रूपमते पुटतोर बोर आंदुर?

7 निमे ओन पेनदा दूतांकन्ना गिचचो सिन्नगा कीतिन,

गानि निमे ओन्क पेद्दातनम आनि कदरता किरिटम हीसि,

निमे नीवा कयदा कबाहकुनपोर्रो ओन्क अदिकारम हीतिन,

8 अन्निटतुन ओना काल्कुनगा इरतिन.”*

इंचि इत्तोर. पेन अन्निटवुनपोर्रो ओन्क अदिकारम हीता, ओना अदिकारमते हिलाकॉटा बतातुने होळसा हिल्ले. गानि इंदके अन्नि ओना अदिकारमते मत्ताप दिस्सेक हिल्ले.

9 अयना जेरासेपताहाटी पेनदा दूतांकन्ना सिन्नागासि मत्ता येसुन मनम हूळसंतोम. पेनदा कुर्पाहेंदाल अंतोर मनकालोरहाटी ओर ओना जीवातुन हीसि हामुरता रूसि हूळतोर. हामुरतुन सहन कीताहाटी पेन ओन्क पेद्दातनम आनि कदरता किरिटम केराहता.

10 पेन अन्निटवुन सतताहाटी तयार कीता आनि सतागे अन्निटवुन ताकिच्चंता. आ पेन दाना महिमाता राज्येमते वेल्लेन मंदितुन सतता मर्क-मियाहक कीसि तरांनाहाटी, दाना सतता मरि येसुन पेरता. मनाकु मुक्ति दोर्कगोम इंचि येसुन अद वेल्लेन तिप्पल्कुनतोनि ओन पुरागा कीता.

तम्मुर-हेलड इनालय येसु सिग्गु अर्रोर

11 मनाकुन पवित्र क्रिययाना येसु आनि पवित्र आतोरम मनम, वरोर बाबाना पिलाल्कुमे आंदुम. अदुनहाटी मनाकुन तम्मुरहक-हेलाहक इंचि वेहालय येसु सिग्गु अर्रोर.

12 अदुनहाटी,

“नावा तम्मुरहकुंक-हेलाहकुंक नीवा पोरोल वेहकन,
कलिसियातोर मुन्ने नना नीकुन तल्सकुनकन,”*

इंचि ओर पेनदुन इत्ता पोल्ले दर्मसास्त्रमते रासतद मंता.

13 मर्रा,

“नना पेनदापोर्रो बरोसा इर्तन.” अचोने आयका,

“इग्गे नना, नाकु पेन हीता पिलाल्कुनतोनि मंतन,”*

इंचि दर्मसास्त्रमते रासतद मंता.

14-15 पेनदा पिलाल्क आता मनम, मेंदुल रूपमते मत्ताहाटी येसुगुडा हरेक पोल्लेते मनालेहका आसि वातोर. मना पिस्वरंता हामुरता वें मनागा मत्ताहेंका देय्यमता अदिकारम मनापोर्रो मत्ता. गानि येसु ओना हामुरताहेंदाल, देय्यमता अदिकारमतुन नासडेम कीसि, मनाकुन हामुरता वेंताल इळबळिस्तोर.

16 पेनदा दूतांक सहायम कियालय येसु असले वायाहिल्लोर गानि अब्राहामुना वंसमतोर्के सहायम कियालय वातोर.*

17 इदुनाहाटीं गें येसुंक अन्नि तीरकुने ओना तम्मुहक-हेलाहकुनलेसीं रूपम येतमळ अब्सरम मत्ता. इल्हा रूपम येतते ओर पेनदा मुन्ने सेवा कियाना वरोर दयागल्लोड आनि विस्वासमलायक पेद्दा पेर्मल आंतोर. अस्केन ओर लोकुल्लकुना पापाल्कुनाहाटीं मोक्कु हिय्या परंतोर.

18 ओर कुद्दु परिकसाते अर्सिं तिप्पल्क बोगांचि मंतोर, अदुनहाटीं इंदके बोर अय्ते परिकसाते अर्सिं तिप्पल्क बोगांचंतुरो, ओर्कु ओर सहायम किया परंतोर.

3

येसु मूसांकन्ना पेद्दोड

1 अदुनहाटीं, पवित्र विस्वासुल्कुनिटा! मुक्तिता पालिगाहक आयालय पेन मीकुन केयता. येसुन पेन पेद्दा पेर्मल आनि प्रेरित आयालय लोहचीता इंचि मनम ओप्कुत्तोम, अय्ते ओना बारेमते मिमेट विचारम कीम्टु.

2 पेनदा पूरा कुटुंबमते मूसाल अन्नि कबाहकुने विस्वासमलायक मत्तोर, अल्हेने येसुगुडा ओन निल्हाता पेनदाहाटीं विस्वासमलायक मत्तोर.

3-4 हरेक लोतुन दोहानोर बोरन्ना वरोर मनकल मनंतोर, गानि अन्निन तयार कीतोर मात्रम पेने आंदु. बल्हा अय्ते लोतुकन्ना लोन दोहानोंक एक्को कदर मनंता, अल्हेन येसुगुडा मूसांकन्ना एक्को कदरगल्लोड इंचि पोरोल तरकुत्तोर.

5 वायाना कालमते पेन बतल-बतल अय्ते वेहाना मंतानो, अवुना गवाइ लोकुल्लकुंक वेहनाहाटीं मूसाल, पेनदा पूरा लोतोरगा वरोर विस्वासमलायक सेवक आसि मत्तोर.

पेनदा लोकुल्लकुना आरामता बारेमते

6 गानि पेनदा विस्वासमगल्ला मर्रि, किरिस्तु, पेनदा पूरा लोतोरगा अदिकारि आसि मत्तोर. मनमगिंगटा मना विस्वासम आनि आसेता बारेमते आकिरदाका इरगा गट्टिगा मत्ते, मनमगुडा पेनदा लोतोरम आसि मनंतोम.

7-8 अस्के पवित्र आत्मा दर्मसास्त्रमते इल्हा इंता:

“मिमेट इय्याला पेनदा पोल्लें कैजानय्ते,

पेन वेहतद मोमोट कैजोम इंचेके,

इस्त्राएल लोकुल्लक बय्लि जेगातगा पेनदा पट्टु ह्वाललय बल्हा मुजोरि कीतुरो,

अल्हा मिमेट मीवा मनसुकुने मुजोरि कियमट.

9 अगा नल्पै वर्सनदाका नना कीता कबाहकुन ह्ळसिगुडा,

मीवा पेद्दाल्क परमेर्का कीसि नावा पट्टु ह्ळतुर.

10 अदुनहाटीं नना आ पीळिता लोकुल्लकुनपोर्रो होंग पीसि,

‘ईरा मनसु बस्केळ्क नहागटाल तप्सोचि लक्कु मनंता,

ईर नावा हरदुन बस्केने एरपाट किया हिल्लुर,’

इंचि ओर्कुन इत्तन.

11 अदुनहाटीं नना होंगुने, ‘ओर्कुन आराम दोर्कना जेगाते बस्केने होळिया हिय्योन,’

इंचि ओट्टु तिचि वेहतन.”☆

इंचि इत्ता.

12 विस्वासुल्कुनिटा, जेगर्ता! जीवाते मंदना पेनदापोर्रोटा विस्वासमताल लक्कु कियागोट्टनसोंटा कराब, विस्वासम हिल्ला मनसु, मीलोप्पो बोरगेन मनानायो.

* 2:16 मनम येसुन विस्वासम कीतोम इंचि, मनमगुडा अब्राहामुना वंसमतोरमे आंदुम. ☆ 3:11 बजन संहिता 95:7-11

13 गानि पापम मीलोप्पो वासि मीवा मनसु मुजोरि कियाकॉटा मननाहाटी, “इय्याला” इनना वेला मनानेकेने दररोज वरोक-वरोर दैरनेम हीसेक मंटु.

14 बारित्ते, सुस्वने मनम इर्ता बरोसातुन मना पिस्वरता आकिरदाका गट्टिगा पीसि मत्तेन, मनम किरिस्तुना पालिगाहक आंतोम.

15 दीनकन्ना मुन्ने दर्मसास्त्रमते इल्हा वेहतद मंता:

“मिमेट इय्याला पेनदा अल्किर केंजानयते,
पेन वेहतद मोमोट केंजोम इंचेके,

इसाएल लोकुल्क बय्लि जेगातगा पेनदा पट्टु हळालय बल्हा मुजोरि कीतुरो,
अल्हा मिमेट मीवा मनसुकुने मुजोरि कियमट.”*

इंचि रासि मंता.

16 पेनदा पोल्ले केंजसिगुडा दाना विरोदमते ताकतोर बोर आंदुर? मूसानतोनि कलियसि इजिप्त देसेमताल पलाते अरता आ अंतोर लोकुल्के गदा!

17 नल्चै वर्सनदाका पेन बोरा पोरो होंग पीसि मत्ता? पापम कीसि बय्लि जेगाते बोरा पीनगुल्क अयते अर्सि मत्तांगो, ओरा पोरेन आयोना?

18 “ओर्कुन आराम दोर्कना जेगाते बस्केने होळिया हिय्योन,” इंचि पेन बोरा बारेमते ओट्टु तित्ता? दाना पोल्ले परकारम बोर अयते ताका हिल्लुरो, ओरा बारेमतेन गदा!

19 इल्हा ओर्कु विस्वासम हिलुवाहेंकेन, ओर आराम दोर्कना जेगाते होळिया पराहिल्लुर, इंचि मनाकु तेळियंता.

4

आराम दोर्कना जेगाते होळियमळ

1 आराम दोर्कना जेगाते होळियाना बारेमता पेन हीता पोल्ले, इदवेरदाकागुडा ताकसेके मंता. अद मना लोप्पोटाल बोनागटालन्ना तप्सोनामनि इंचि, मनम पेनदा वेरेंते मंदकोम.

2 बारित्ते, ई आराम दोर्कना जेगाता बारेमता बेसता कबुर इसाएल लोकुल्कुक एवताप मनकगुडा वेहमळ जर्गता. गानि ओर आ कबुरपोरो विस्वासम इर्ता हिल्लुर, अदुनहाटी ओर्कु दानद बतले पायदा आयाहिल्ले.

3-4 विस्वासम कीतोरम मनम, आ आराम दोर्कना जेगाते तप्पाकॉटा होळियंतोम. बारित्ते एडोव रोजुना बारेमते इल्हा रासतद मंता:

“पेन अद कीता अन्नि कबाहकुनाल एडोव रोजुनाड आराम कीता,”

इंचि रासि मंता. अयना आ जेगातुन तयार कियाना कबळ, पेन दुनियातुन पुटिस्तस्केन पुरागा कीसि इर्ता. बारित्ते, विस्वासम ईस्वोरा बारेमते पेन होंगुने इल्हा इत्ता:

“ओर्कुन आराम दोर्कना जेगाते बस्केने होळिया हिय्योन,

इंचि ओट्टु तिचि वेहतन.”* इल्हा इत्ता.

5 आनि मर्ता, “ओर्कुन आराम दोर्कना जेगाते

बस्केने होळिया हिय्योन,”

इंचि इंकुदि मल्का इत्ता.

6 दीनकन्ना मुन्ने मना पेद्दाल्क बेसता कबुर परकारम ताकुवाहेंका ओर आराम दोर्कना जेगाते होळिया पराहिल्लुर. अयना अद आराम दोर्कना जेगाते इच्चुर लोकुल्क इदकेगुडा होळियाना मंता.

7 अदुनहाटी, पेन उंदि रोज इंकुदि रोज तयार कीसि इरता, अदुन “इय्याला” इंचि इंतुर. पेद्दाल्क हारि तप्ता वेल्लेन वर्साक, बल्हा अयते मुन्ने वेहताप,

“मिमेट इय्याला पेनदा पोल्ले केंजानयते,

इथ्याला पेन वेहतद मोमोट केंजोम इंचेके,
 इस्त्राएल लोकुल्क बय्लि जेगातगा पेनदा पट्टु ह्ळालय बल्हा मुजोरि कीतुरो,
 अल्हा मिमेट मीवा मनसुकुने मुजोरि कियमट,*[☆]
 इंचि दाविदना बजन संहिता पुस्तकमते पेन वेहता.

8 ओक्कला जोसुवाल ओर्कुन आराम कियाना जेगाते ओसि मत्ते इंकुंदि रोजुना बारेमते पेन मरी वळकाकोनवळ.

9 अदुनहाटी पेनदा लोकुल्क आराम कियाना रोजु इंका वायानदे मंता.*

10 बल्हा अयते पेन दाना कबाह्कुन महाचि एडोव रोजु आराम कीता, अल्हेन दाना आराम कियाना जेगाते होळियानोरगुडा ओरा कबाह्कुन महाचि आराम कियानुर.*

11 इस्त्राएल लोकुल्क पेनदा पोल्ले परकारम ताकुवाहेंका ओर नासडेम आतुर, गानि मनम ओरालेसी आयाकोटा, पेनदा पोल्ले परकारम ताकसेके अद जेगाते होळियाना इरगा कोसिस कियोगोम.*

12 बारित्ते पेन वेहता ई पोल्ले, जीवा मत्तद आनि बलमगल्लद आंद, अद रोंडु बाजकुनाल करा-करा मनना कसेरकन्ना एक्को करा-करा मंता. अद बल्हा बोक्कानाल पूलगुन वेंरे-वेंरे कीता, अल्हेन आत्माताल जीवातुन वेंरे कीता. इंका अद मनसुना विचाराल्कुन, अवुना उद्देसाल्कुना बारेमते बरोबर वेहा परीता.

13 इद दुनियाते मनानव बतांगे पेनदा नदरताल मक्किसि हिल्लें. मनम मना बारेमते लेक्का अप्पजेप्पना पेनदा मुन्ने अन्निगुडा कुल्ला-कुल्ला मंतां.

येसु अंतोर्कन्ना पेद्दा पेर्मल

14 अंतोर्कन्ना पेद्दा पेर्मल, स्वर्गमते होत्ता पेनदा मरिं येसु, मनातोनि मंतोर. अदुनहाटी अंतोरा मुन्ने ओप्कुत्ता मना विस्वासमतुन मनम गट्टिगा पीसि मंदकोम.

15 मना पेद्दा पेर्मल येसुंकुगुडा मनालेसी पापम कियाना अन्नि परिकसां वातां, गानि ओर बस्केने पापमते अर्रा हिल्लोर. अदुनहाटी ओर मना कमजोरिन, दुक्काल्कुन तेल्लिचकुंतोर.

16 अयते वट! गट्टिगा दैरनेम कीसि मनम पेनदा दयाता राजगद्दे दगेर्क दाकोम. दीनहेंदाल मनाकु अक्सरम मत्तस्के, मना सहायमहाटी ओना कुर्पा आनि दया दोर्कार.

5

पेद्दा पेर्माना कबाह्क

1 हरेक पेद्दा पेर्मन, लोकुल्क ओरा लोप्पोटाल परीतुर. लोकुल्कुना पापाल्क मापि आयानाहाटी लोकुल्कुनाहेंदाल ओर पेनदुक मोक्कुल्क हिथ्यना, सेसां* वाताना कबळ कियालय ओन निलाहंतुर.

2 आ पेर्मलगुडा वेल्ले तीरकुने कमजोर मंतोर, अदुनहाटी तेळियका तप्पु कीतोकुंन, हर्रि तप्पोल्लोर्कुन ओर दयाते ह्ळा परीतोर.

3 अदुनहाटी ओर लोकुल्कुना पापाल्क मापि आयालय मोक्कु हीताप, ओना सतता पापाल्कुनाहाटीगुडा मोक्कु हियापीता.*

4 बल्हा अयते मोट्टा मोदाटा पेद्दा पेर्मल आयानाहाटी पेन हास्नुन केयता, अल्हेन पेन केयवद बोरे मनकल ओनद ओरे पेद्दा पेर्माना कदरता जेगा येता परीर.

5 अल्हेन किरिस्तुगुडा ओनद ओर पेद्दा पेर्मल आया हिल्लोर. गानि बद पेन अयते ओन, “निमे नावा मरिंन आंदिन, इथ्याला ननाने नीकुन पुटिस्तन,” इंचि इत्तानो अदे पेन ओन पेद्दा पेर्मल इंचि निल्हाता.*

☆ 4:7 इब्रि 3:7-8; बजन संहिता 95:7-8 ☆ 4:9 उत्पत्ति 2:2-3 ☆ 4:10 उत्पत्ति 2:2 ☆ 4:11 2 पव्र 1:10-11 * 5:1 सेसां परिकु, कोत्तां, जोन्नां, वंजि इवन्निन पेनदा गद्देतगा जमा कीतुर, इन्दुने सेसा इंतुर. ☆ 5:3 लैव्यवस्ता 16:6 ☆ 5:5 बजन संहिता 2:7

6 अल्हेन, “निमे मेल्किसेदेकुनलेहका बस्केळताहाटीं पेद्दा पेर्मल आसि मंदकिन”[☆] इंचि मसंदि जेगातेगुडा पेन ओन इत्ता.

7 येसु इद बूमिपोर्री मनकना रूपमते मत्ता रोजकुने, ओन हामुरताल कापाळाना पेनबाबांक अळसि, मोत्कुंचि विनति-पारतनां कीतोर. अस्के ओना बक्तिंतुन पीसि पेन ओना पारतनातुन केंजता.

8 येसु कुद्दु पेनदा मर्री आसिगुडा तिप्पल्क बोगांचेके, पोल्लेपोर्री ताकमळ इत्ते बतल, करियतोर.

9 इल्हा, ओन्क बल्हा अयते आयाना मत्ता अल्हा पुरागा आसि, ओना पोल्लेपोर्री ताकाना अंटोराहाटीं ओर, बस्केळताहाटीं मुक्ति हियानोर आतोर.

10 इल्हा पेन ओन मेल्किसेदेकुनलेहका पेद्दा पेर्मल इंचि निलाहता.

पेनदा मनमळता बारेमता तेल्वि बेसीहिल्ले

11 ई मेल्किसेदेकुना बारेमते वेहकोम इत्ते वेल्लेन पोल्लें मंतां. गानि मिहगा केंजना मनसु हिल्लावहेंका, बेस तेळियागोट्टिस वेहमळ इत्ते वेल्लेन कस्टम.

12 अल्हा हळते इदवेरदाका मिमेट गुस्लक आया मत्ता. गानि इंदके मीके वेंरे बोरन्ना वासि पेन हिय्यना मुक्ति बारेमता पोल्लें मर्रा कराहना अक्सरम मंता. मिमेट इदवेरदाकागुडा पाल उनानोरालेसीगे मंतिट, गाटो तिननालायक आया हिल्लिट.

13 बारित्ते पाल उनना हरेक पेडल, ओर पसि पेडले मनंतोर. ओन्क नीति पोल्लेना बारेमते तेळियो.

14 गानि बोर अयते तेल्वि बेरिं, मंचि-सेड्डातुन एरपाट कीसि अल्हा ताकतुरो, ओर गाटो तिनानोरालेसी आतुर.

6

1 अस्के किरिस्तुना बारेमते सुस्वने करियता बोदाना बारेमते मर्रा-मर्रा वळकमळ होळसिसि, गिचचो मुन्नेळक होंचि पेद्दा बेसंतोरालेक्कते दाकोम. मसंदि मल्का हामुरतेके ओयाना कबाहकुनाल मनसु मार्सकुन्मळ, पेनदापोर्री विस्वासम इरमळ,

2 बापतिस्माता बारेमते करियमळ, तल्लापोर्री कय इरमळ, हासि मर्रा जीवाते तेदमळ आनि बस्केळताहाटीं मनना न्यायम बारेमते करियमळ, इसोटा किरिस्तुना बारेमते सुस्वने करियता बोदाना बारेमते मीकु मर्रा-मर्रा वेहाना अक्सरम हिल्ले.

3 अयना पेनदा इच्चा मत्ते इल्हागुडा कीकोम.

विस्वासमताल पजोळक आतोरा गति

4 बोर अयते पेनदुन विस्वासम कीसि पजा आ विस्वासमताल पजोळक आंतुर, ओर्कुन मनम बल्हा मर्रा मलाहकोम? बारित्ते ओर्क अयते ओरा पिस्वरते उंदि मल्का वेल्गु दोर्किस मत्ता,

5 ओर अयते स्वर्गमताल दोर्कना वराल्कुना रुसि हळतुर, पवित्र आत्माते पालिगाहक आतुर, इका पेनदा बेस पोल्लेनद आनि वायना कालमता ताकतता रुसि हळतुर,

6 असंतोर पेनदा मर्रिन मर्रा अंटोरा मुन्ने कूसुनपोर्री वेलाड वाटसि ओन बदनाम कीसंतुर. अदुनहाटीं असंतोर्कुन पेनदा विस्वासमताल लक्कु आयानयते मर्रा मनसु मार्सकुननालायक कियमळ असल कुदरेन कुदरो.

7 विस्वासमताल पजोळक होत्ता ई लोकुल्क, कराब बूमितसंतोर आंदुर. बारित्ते, बूमि दानपोर्री अरता पिरदा एतुनंता उंचि, दान ऊळाना कास्तकारि मनकंक बेस पंटा हियानयते पेन दान्क आसिर्वाद हीता.

8 गानि अदे बूमि ओक्कला हाहकु, हाहकुना पोदां पुट्टिचानयते अद कबळक ओज्जाकोटा आसि पेनदा सापनेमलायक आंता. आकिरते दान बोळसि पोहमळ जर्गता.

पेन बस्केने मति मर्गी

9 अयते नावा पावरमगल्लोरिता, मोमोट इंदके इल्हा वळकसंतोम. अयना मीहेंदाल मोमोट इवुंकन्ना बेस पोल्लें आसे पडसंतोम. मिमेट कियाना कबाह्कुन हळसि, मीकु निजमे मुक्ति दोर्कता इंचि माकु बरोसा मंता.

10 बारित्ते, पेन अन्यायम कियानद आयो. दाना पोरोलते मिमेट कियाना बेस कबाह्कुन, दाना पवित्र लोकुल्लुकुनपोर्रो मिमेट हूपिस्ता पावरमतुन आनि कीसेके मनना सहायमतुन अद बस्केने मति मार्गो.

11 मनम बदुनाहाटीं अयते आसे पळसि एदुर हळसेक मंतोमो अद दोर्कनदाका, मी लोप्पोटा हरेक मनकल पुरागा गट्टि आसेते आकिरदाका कोसिस कीसेके मनना इंचि मोमोट मनसुनाल कोरसंतोम.

12 अदुनहाटीं मिमेट लंडोर्क आयमत. गानि बोर लोकुल्लुक अयते विस्वासम आनि ओप्केहेंदाल पेन हीतन इत्तादुन दक्किचकुंतुरो ओरा अळगुने अळगु वाटसि मिमेट ताकट इंचि कोरसंतोम.

पेन हीता पोल्ले

13 पेन अब्राहामुंक पोल्ले हीतस्के, ओट्टु तिनानाहाटीं दानकन्ना पेदूदोड बोर हिलुवाहेंका अद दाना सतता ओट्टु तित्ता.

14 तिंचि, “नना नीकु तप्पाकोटा आसिर्वाद हीतन, इंका नीवा वंसंमतुन वेल्लेन बेसांगोट्टंतन,”* इंचि इत्ता.

15 इल्हा अब्राहाम वेल्ले ओप्केते एदुर हळतोर इंचि पेन ओन्क हीतन इंचि पोल्ले हीतद ओन्क दोर्कुता.

16 मनकालोर्क ओट्टु तिनानस्के, ओरकन्ना पेदूदोरद ओट्टु तितुर. ओरा हरेक जगडमता पैसला आ ओट्टु तिननाहेंदाले पक्का आंता.

17 पेन दाना पिलानतुन बस्केने मार्सा इत्ता संगति, अद पोल्ले हीतोर्कुंक बेस तेळियाना इंचि पेनदा इच्चा मंता. अदुनहाटीं अद अल्हा ओट्टु तिंचि दाना पोल्लेता गेरांति हीता.

18 पेन हीता पोल्ले आनि ओट्टु, इव रोंडु बस्केने बदलांचो. इवुना बारेमते पेन बस्केने आबदूदम वळका पर्रो. मनम बद आसेहेके अयते होनालय पेयसतोमो, अद आसेहेके मनम इकिचो गट्टि दैरेमते होनना इंचि पेन अल्हा माकु रोंडु मल्लां गेरांति हीता.

19 अद आसे इत्ते मना जीवाहाटीं उंदि कोय्याता कुसितसोंटद आंद. अद बेस गट्टिगा आनि मेसलाकोटा पीसि मंनता. पेन मनना पवित्र जेगातगळक अद मनाकुन एव्सा परंता.

20 अद जेगातगा येसु मनाहाटीं मनाकन्ना मुन्नेन होळियतोर. होळियसि मेल्लिकसेदेकुना रीतिते बस्केळताहाटीं पेदूदा पेर्मल आतोर.

7

मेल्लिकसेदेक पेर्मल आंदुर

1 ई मेल्लिकसेदेक सालेम सहरता राजाल आनि अन्निटकन्ना पेदूदा पेनदा पेर्मल मत्तोर. अब्राहाम वेंरे राजालोरतोनि लडाइ कीसि ओर्कुन गेल्लिस, मल्लिस वायनेके मेल्लिकसेदेक ओन्क कलियसि आसिर्वाद हीतोर.

2-3 अस्के अब्राहाम लडाइते गेल्लिस तत्ता पूरा दनम-संपतितुन तूस कीसि, पदोव तूस मेल्लिकसेदेकेक हीतोर. मेल्लिकसेदेक इनना पोरोल्लुकु अर्तम, “नीतिता राजाल” इंका इब्रानि बासाते सालेम इनना पोरोल्लुकु “सांति” इंचि अर्तम आंद. इत्ते ओन सुकमता राजाल इंचिगुडा इनावच्चु. मेल्लिकसेदेकुना तल्लुर-बाबो बोर आंदुर, ओना तम्मुहक-तादालोर बोर आंदुर, ओना पुट्टुकु-हामुरता बारेमतेगुडा दर्मासन्नमते बतले रासि हिल्ले. पेनदा मर्रिनलेहका ओरगुडा बस्केळताहाटीं पेर्मल आसि मंनतोर.

* 6:14 उत्पत्ति 22:16-17

4 ई मेलिकसेदेक इत्ते बच्चोन पेद्दा मनकालो मनमे विचारम कियाना मंता. मना मोदोलता मनकल अब्राहाम पगातोरहेंदाल गेल्सता बेसता मालुना पदिताल उंदि तूस ओन्क हीतोर.

5 मूसाना नियमते उंदि आदेस मंता. अद बतल इत्ते, लेवि वंसमताल पेर्मांलोर आतुर, वेरे वंसमता लोकल्क ओर अब्राहामुना वंसमतोर आयिना ओरा तम्मुहक-तादालोर, ओरा कमयता पदिताल उंदि तूस पेर्मल आतोकुं हिय्युडे गावाले.*☆

6 गानि मेलिकसेदेक लेविना वंसमतोर आयोर. अयनागानि मेलिकसेदेक, बोन्क अय्ते पेन पोल्ले हीसि मत्ता आ अब्राहामुनाहेंदाल पदि तूसकुनाल उंदि तूस येतकुंचि ओन्क आसिर्वाद हीतोर.†☆ दीनहेंदाल मेलिकसेदेक पेद्दोड आंदुर.

7 इंदके पेद्दोड सिन्नौक आसिर्वाद हीतोर इत्ता पोल्लेपोर्रो बतले अनमानम हिल्ले.‡

8 लेविना वंसमताल पेर्मांलोर आतोर पदिताल उंदि तूस येतंतुर. गानि ओर अय्ते उंदि रोज हायना मनकालोरे आंदुर. गानि बस्केळ्क पिस्सि मनना मेलिकसेदेकगुडा पदिताल उंदि तूस येतंतोर इंचि गवाइ वेहताप दर्मसास्त्रमते रासि मंता.

9 अल्हा ह्ळते, पदिताल उंदि तूस येताना लेविगुडा अब्राहामुनाहेंदाल, पदिताल उंदि तूस मेलिकसेदेकुक हीतोर इंचि इनावच्च.

10 अद बल्हा इत्ते, अब्राहाम मेलिकसेदेकुक कलियसि पदोव तूस हीतस्के, लेवि पुट्टा हिल्लोर, अयनागानि ओर ओना तादो-बाबो अब्राहामुना मेंदुलते जीवा पेळेतालेसी मत्तोर. ☆

येसु मेलिकसेदेकनसोटा पेर्मले

11 मूसाना नियमते, लेविना वंसमतोरे पेर्मांलोर्क आयाना इंचि रासतद मंता. अय्ते ओर कियाना कबाहकुनहेंदाल लोकल्क पुरागा नीतिमंतुल्क आया पर्सि मत्ते, हारूननसोटेन वरोन पेर्मन पेन लोहचि मनवळ. गानि मेलिकसेदेकना रीतिते वरोर पेर्माना अवसरम बतल मत्ता?

12 बारित्ते पेर्माना कबळ मारियतस्के, मूसाना नियमगुडा मारिया पीता.

13 इवन्नि पोल्ले इंदके वेरे कानदानते पुट्टा येसुना बारेमते वेहासेक मंता. ई कानदानते पुट्टोर बोरेगुडा मोक्कु हिय्यना जेगातगा सेवा किया हिल्लुर.

14 मना सामि यहुदाना वंसमते पुट्टोर. ई कानदानतोर पेर्मांलोर आयाना बारेमते मूसाल बग्गेन बतल रासा हिल्लोर, इंचि अंटोर्क तेळियसे मंता.☆

15 गानि मेलिकसेदेकनसंतोर इंकावरोर पेर्मल वांतोर इत्तस्के, इद पोल्ले इंकिचो किलियर आंता.

16 उंदि कानदानतोर पेर्मांलोर आयाना, इंचि मूसाना नियमते रासतद मंता. गानि येसु आ हिसाबते पेर्मल आया हिल्लोर. ओनगा बस्केळ्क पिस्सि मनना बलम मंता, अदे बलमते ओर पेर्मल आतोर.

17 बारित्ते, “मेलिकसेदेकना रीतिते निमे बस्केळ्ताहाटीं पेर्मल आसि मंदकिन,” इंचि ओना बारेमते दर्मसास्त्रमते रासतद मंता.

18-19 इल्हा, मूसाना नियमते रासि मत्ता आदेसाल्क लोकल्कन नीतिमंतुल्क किया पराहिल्ले. अद नियम कमजोर आसि बताके ओज्जाकोटा आता इंचि, पेन दान पक्काक इरता. दाना जेगाते, पेन दानकन्ना मंचि आसेतुन इरता. इद आसेतुन पीसि मनम पेनदा दग्गेर्क होना परातोम.

20-21 इंकुंदि पोल्ले बतल इत्ते, हारूनना कानदानतोर ओट्टु तिनाकोटेन पेर्मांलोर आतुर. गानि येसु पेर्मल आयानेके पेन ओन इल्हा इत्ता: “निमे बस्केळ्ताहाटीं पेर्मल आसि मंदकिन इंचि पेन ओट्टु तित्ता, अद दाना पोल्लेतुन बस्केने मार्सी,” इंचि रासतद मंता. इल्हा पेन ओट्टु तित्ताहाटीं येसु पेर्मल आतोर.

22 अदुनहाटीं इंदके पेनदा मुन्नेटा पडाना करारकन्ना, पूना करार बच्चोनो बेसतद इंचि येसु गेरांति आसि निल्लोर.

* 7:5 लेविना बाबो याकोब आंदुर. ओनागटाले इझाएलतोर अंतोर पुट्टुर. अब्राहाम याकोबना मातिर दादाल आंदुर. ☆ 7:5 गिनति 18:21-28 † 7:6 मेलिकसेदेकना कालमते लेवि पुट्टा हिल्लोर. ☆ 7:6 उत्पत्ति 14:19-20 ‡ 7:7 मेलिकसेदेक वयसुने अब्राहामुंका ना पेद्दोड आंदुर. ☆ 7:10 उत्पत्ति 14:18-20 ☆ 7:14 उत्पत्ति 29:34-35

23 इंकुंदि पोल्ले बतल इत्ते, वेल्लेटोर लोकुल्लक पेर्मालोर आसि मत्तुर, गानि हामुर ओर्कु हमेसाताहाटीं पेर्मल आसि मनालय अड्डम आता.

24 गानि येसुक बस्केने हामुर हिल्ले, इंचि ओना पेर्मलतनम बस्केळताहाटीं मनंता.

25 अदुनहाटीं येसु, ओनाहेंदाल बोर अय्ते पेनदागा वांतुरो, ओराहाटीं विनंति कियालय ओर बस्केळक जीवातेन मनंतोर. इल्हा येसु माकुन पुरागा पिसागोटा परींतोर.

26 येसु पवित्र मत्तोर, ओनगा बतले कसूर मनाहिल्ले, ओन्क बस्केने पापम अंटा हिल्ले, पापिल्लुकुनाल लक्कु मत्तोर. अदुनहाटीं ओन स्वर्गमकन्ना एत्तु तेहामळ जर्गता. इसांटा पेद्दा पेर्मले मनाहाटीं बेस कुदरंतोर.

27 वेरे पेद्दा पेर्मालोर मुन्नेन सतता पापालक मापि आयगोम इंचि मोक्कु हींकुंतुर आनि पज्जोताल वेरे लोकुल्लुकुना पापालक मापि आयालय मोक्कुल्लक हींतुर. इल्हा ओर दिन्म कियुंदुर. गानि किरिस्तु लोकुल्लुकुना पापालक मापि आयानाहाटीं उंदे मल्का ओना मेंदुल्लुन मोक्कु हींतोर. अदुनहाटीं ओन्क वेरे पेर्मालोरलेसीं कियाना अक्सरम हिल्ले.

28 मूसाना नियम कमजोर मनकालोर्कुन पेद्दा पेर्मालोर इंचि निलाहंता. गानि मूसाना नियमकन्ना पज्जोताल, ओट्टुनतोनि वाता आ पोल्ले, पेनदा मर्रिन पेद्दा पेर्मल इंचि निल्हाता. आ मर्रिं अनि तीरकुने पुरागा मंतोर. ओर बस्केळताहाटीं पेद्दा पेर्मल आसि मंतोर.

8

येसु मना पेद्दा पेर्मल आंदुर

1 इदवेरदाका वेहासेक वाता पोल्लेता मेन पोल्ले बतल इत्ते, स्वर्गमते अन्निककन्ना पेद्दा पेनदा तिना बाजूंक राज्येम कियालय बोर अय्ते उद्दिदिसि मंतोरो, ओरे मावाहाटीं पेद्दा पेर्मल आतोर्.✱

2 कुद्दु पेने निल्हाता अन्निककन्ना पवित्र जेगा आनि निजम डेराते येसु सेवक आसि पेनदा सेवा कीसेके मंतोर.

3 हरेक पेद्दा पेर्माना कबळ अय्ते पेनदुक मोक्कु हियमळ, दानम वाटमळ आंद. अल्हेने मावा पेद्दा पेर्मल येसुनगागुडा मोक्कु हियालय बतलन्ना मनमळ अक्सरम मंता.

4 मूसाना नियम परकारम दानम वाटानोर बूमिपोर्रीं वेल्लेन पेर्मालोर मंतुर. अदुनहाटीं येसु बूमिपोर्रीं मंचि मत्ते, पेर्मलगुडा आयाकोन्नेर.

5 पेनदा डेरा निल्हाका मुन्ने, “निमे गूट्टापोर्रीं नावातोनि मत्तस्के नना नीकु बद नक्से हुपिस्तनो, बरोबर अल्हेने नाहाटीं डेरा निल्हा,” इंचि पेन मूसांक वेहचि मत्ता. दीना अर्तम बतल इत्ते, पोर्रीं स्वर्गमते मंदना पेनदा डेराता नीडालेसींगे, इद बूमिते पेर्मालोर सेवा कियाना जेगा मनंता.✱

6 गानि इंदके पेनदा पूना करारते माकुन कल्पानोर येसे आंदुर. इद करार, मुन्नेटा पडाना करारकन्ना बच्चोनो बेस मंता. अद बल्हा इत्ते, पूना करारते पेन वेहता पोल्ले, मुन्नेटा पडाना करारते मत्ता पोल्लेकन्ना बच्चोनो बेस मंतां, इल्हा इद बूमिते मनना पेर्मालोर्कन्ना येसुक वेल्ले बेस सेवा दोर्कता.

7 ओक्कला पडाना करारते बतले दोसेम हिलाकोंटा मंचि मत्ते, पूना करारता अक्सरमे अर्कोनवड.

8 गानि पेन दाना लोकुल्लुकुनगा दोसेल्लक दिसतस्के ओर्कुन इल्हा इत्ता:

“ह्ळाट, नना इझाएल राज्येमतोनि आनि यहूदिया राज्येमतोनि,

पूना करार कियाना रोजकु वासेकेन मंतां.

9 नना ओरा तादो-बाबुर्कुन कय पीसि इजिप्त देसेमताल पलाते तच्चि मत्तन.

अस्के ओरतोनि कीता करारलेहका इद पूना करार मनो.

नना ओरतोनि कीता करार परकारम ओर ताका हिल्लुर,

अदुनहाटीं नना ओर्कुन लेक्का किय्योन.

10 गानि अव रोजकु दाटसोत्ता पजा,

नना इस्राएल लोकुलकुनतोनि कियाना पूना करार इल्हा मनंता.

नना नावा नियमकुन ओरा मनसुलकुने रासि, अबुन ओरा बुद्धिदेते इरानालायक कीतन.

नना ओरा पेनदुन आकन, ओर नावा लोकुलक आयानुर.

11 अद वेलाते सिन्नालक-पेद्दालक अंतोरै नाकुन एरपाट कीसि मनांतुर,

अदुनहाटी, पेनदुन एरपाट कीम्टु, इंचि लोता पक्कातोर्क आयि जीवातोर्क आयि,

ओर-ओरा नाटेनोर्क वेहना अवसरम हिल्ले.

12 बारित्ते, ओर कियाना तप्पुड कबाहकुन नना दयाते मापि कीकन,

ओरा पापालकुन मर्रा बस्केने मति किय्योन, ”*[†]

इंचि रासतद मंता.

13 इदुन पेन “पूना करार” इत्ताहाटी मोदाटा करार कबळक ओज्जाकोटा आसि पडानद आसोत्ता.

अद इंदके बिराने दिसाकोटा आथार.

9

बूमिपोर्रोटा आरादना आनि स्वर्गमता आरादना

1 इस्राएल लोकुलकुनतोनि कीता मोदाटा करारते, पेनदुन मोळकाना बारेमते नियमकु रासतव मत्तां. आ नियम परकारम मोळकानाहाटी इद बूमिते उंदि डेरा मत्ता.*

2 अद डेरा इल्हा मत्ता. आ डेराता मुन्नेटा अरति पोतसेके मनना पतें इरालय उंदि दीसोडि आनि उपारमता हारि इरालय उंदि टेबल मनुंदु. अद अरतिन पवित्र जेगा इंतुर.

3 दीना पज्जो इंकुंदि परदा मत्ता, अद परदाता पज्जोटा अरतिन अन्निटकन्ना पवित्र जेगा इंतुर.

4 अद अरति गुगलेम वाटनाहाटी बंगारमतोनि तथार कीतद उंदि दूपम कुळकां आनि करारकुना संदगु मत्ता..* आ करारकुना संदगु पुरागा पिच्चर बंगारमता पालिस हीसि मत्ता. आ संदगुने उंदि बंगारमता बुड्डि मत्ता, अवटे ‘मन्ना’ इरसि मत्ता* इंका आ संदगुने हारुनना दूडुडु मत्ता, अदुंक इगुर वासि मत्ता.* इंका अवटे पेनदा करार्क रासि मत्ता बंडाता बल्लांगुडा मत्तां.*

5 आ संदगुना म्ताता पोरोटा बाजुन “पापालक मापि कियाना जेगा” इंतुर. महिमाता वेल्गुने निंडिसि मत्ता रौडु कर्बुब इनानवुना बोम्मां आ जेगापोर्रो नीडा कीसि कावेल कीसेके मनुंदु. इव अन्निटवुना बारेमते तेल्लिचिचि वेहालय इंदके वेला हिल्ले.

6 इल्हा इवन्नि तथार कीता पजा, डेरालोप्पो मोळकाना जेगातगा पेर्मालोर होंचि रोज सेवा कीसेके मनुंदुर.

7 गानि इंकुंदि परदाता पज्जोटा अरति, सिराप पेद्दा पेर्मल ओना सतता पापालकुनाहाटी आनि लोकुलक तेळियका कीता पापालकुनाहाटी मोक्कु हियालय नेत्तुर पीसि, वर्साक उंदि मल्ले दांतोर.

8 इवुनंता हळसि बतल अर्तम आंता इत्ते, बदवेरदाका अयते इसोटा मोदाटा डेरा मनंतनो, अदवेरदाका अन्निटकन्ना पवित्र जेगाते होनालय हारि कुल्ला हिल्ले, इंचि पवित्र आत्मा वेहांता.

9 ई डेरा इत्ते, इंदकेटा कालमते जर्गनदुना बारेमता उंदि चिन्ह आंद. अगा हियना मोक्कुलक, दानम वाटमळ इवंता मनकाना मनसुन पुरागा समादानम किय्यो.

* 8:12 यिर्मयाह 31:31-34 * 9:1 अद डेरा मूसाना कालमते तथार कीतद आंद. † 9:4 दूपम कुळका इद वेल्लेन पेद्देद मत्ता. दूपम अयते पोरोटा बाजुने वाटुंदुर, गानि लोप्पोगुडा सामान इरालय जेगा मनुंदु. * 9:4 निर्गमन 30:1-8 * 9:4 निर्गमन 16:33-34 * 9:4 गिनति 17:8-10 * 9:4 निर्गमन 34:28 † 9:5 रौडु कर्बुब इवुन इन्नानि बासाते कर्बुबीम इंतुर. अवगुडा उंदि तीरता द्वांगे. पेन पापालकुन मापि कियाना जेगा ई संदगुना पोरोटा बाजुनेन मंता. अद बंगारमते मेत्तिसि मंता. पेर्मल पापालकुनाहाटी मोक्कु हीतस्के, नेत्तुरतुन अग्गेन पोंगागोट्टंतोर. अस्के अदुन हळसि पेन लोकुलकुना पापालक मापि कीता.

10 अद बल्हा इत्ते, तिनूळ-उनुळ कियाना मोक्कुल्क, पवित्र आयाना कबाहक इव नियमकु सिराप पलाताल पवित्र आयानाहाटीगें कबळ्ळक ओज्जंतां. गानि पेनदा पूना करार वातस्के इव बवे बतले कबळ्ळक ओज्जों.

येसुए कुद्दु मोक्कु आयमळ

11 गानि किरिस्तु पेद्दा पेर्मल आसि, माहाटी बेसता पोल्लें पीसि वातोर. ओर इंदके स्वर्गमते मनना अन्निटवुंकनना पेद्दोड आनि अन्नि तीरकुने पुरागा मनना डेरातागा सेवा कियालय होळियतोर. अद मनकानाहेंदाल कीतद आयो, इत्ते अद दुनियातद आयो.

12 ओर अगा एटिना नेत्तुरो, पेय्याना नेत्तुरो पीसि होळिया हिल्लोर. गानि ओना सतता नेत्तुरतुन पोंगागोटसि, उंदे मल्का आ अन्निटकनना पवित्र जेगातगा होळियतोर. अदुनहेंदाल मनम अन्नि पापालकुनाल बस्केळ्ळाहाटी मुक्तिंतुन दोर्किचकुत्तोम.

13 मूसाना नियम परकारम, एटिं, कोंदाना नेत्तुर, कमरिस्ता पेय्याता बूळ्ळिद, मुट्टुने मत्तोरपोरों सल्लानय्ते अव सिराप ओरा मेंदुलतुन पलाताले पवित्र कीतां.

14 गानि किरिस्तुना नेत्तुर, हामुरताहेके ओयाना कबाहक कियाना मना मनसुन अवुंकनना बचचोर सुद्द किय्यार! अद बल्हा इत्ते, बस्केळ्ळक मनना पेनदा पवित्र आत्माता बलमतोनि, बतले दोसेम हिल्लुवा येसु, पेनदा मुन्ने सतागा मोक्कु आतोर. बस्केळ्ळक जीवाते मंदना पेनदुन मनम मोळ्ळकाना इंचि येसु अल्हा कीतोर.

15 पडाना करारते मत्ता नियमकुन पीसि ताकुवाहेंका अस्केटा लोकुल्क पापम कीसि अद करारतुन नेम्हातुर. ओर्कुन ओरा पापालकुना सिक्साताल तप्सानाहाटी किरिस्तु हासोत्तोर. इल्हा पेन अद केयता लोकुल्कुन पूना करारते कल्पंता. अद केय्ति मत्तोर्कुंक, दाना बस्केळ्ळक मनना वारसान हक्कुन हीतन इंचि केय्ति पोल्ले हीतानो, ओर्क अद दोर्कता. इल्हा किरिस्तु ई पूना करारते नड्डुमतोर आतोर.

16-17 वरोर मनकल ओना बूमिं-जेगां बोन्क आयाना इंचि रासंतोर, ओर हातास्केन ओर रासि इरता कायदोम सेल्लांता. ओर पिस्सि मत्ताचुं रोजकु अद कायदोम सेल्लो. पेनदा करारगुडा इल्हे मंता.

18 इंचे मरि, मोदाटा करारगुडा नेत्तुर पोंगागोट्टुवा निल्ला पराहिल्ले.

19 अदुनहाटी मूसालगुडा दर्मसास्त्रमते रासि मत्ता अन्नि आदेसकुन अंतोर लोकुल्कुंक वेहतोर अस्के, कुरी-एटिना नेत्तुरतुन येते कल्पिसि, जूपा इनना पोर्काताS कोम्माक गोरेंता एर्ग बूरा हुट्टिस, दर्मसास्त्रमता पुस्तकालकुनपोरों आनि अंतोर लोकुल्कुनपोरों सल्लतोर.

20 पजा, “पेन मीकुन बद आदेसकुना परकारम ताकट, इंचि वेहतानो, ई नेत्तुर अदे करारतद आंद,” इंचि वेहतोर.✽

21 अल्हेने, मोळ्ळकाना डेरापोरों आनि मोळ्ळकानेके वाळ्ळकुनना अन्नि वस्तुकुन पोर्गुडा मूसाल आ नेत्तुरतुन सल्लतोर.

22 मूसाना नियम परकारम हळ्ळते, दग्गेर-दग्गेरा अन्निगुडा नेत्तुर सल्लिसे सुद्द कियमळ गावाले. नेत्तुर पोंगागोट्टाकौटा पापालकुंक मापि हिल्ले.✽

येसुना हामुरताहेंदाल पापालक मापि आंतां

23 अदुनहाटी स्वर्गमते मनना वस्तुकुनालेसी दिस्सानव मनकालोर तयार कीता ई नकलि वस्तुकुन, जिवरासिना मोक्कु हीसि पवित्र कियाना अक्सरम अरता. गानि स्वर्गमते मनना वस्तुकुन पवित्र कियोगोम इत्ते, ई जिवरासिना नेत्तुरकनना इंका बचचोनो बेसता मोक्कुल्क हियापीता.

24 बूमिपोरों मनकालोर कीता अन्निटकनना पवित्र जेगा इत्ते, स्वर्गमते मनना निजम पवित्र जेगातसोंटा उंदि पोटवे आंद. बारिल्ले, मनकालोर कीता पवित्र जेगाते किरिस्तु होळिया हिल्लोर, गानि इंदके ओर मना अंतोराहाटी सीदा स्वर्गमते होळियसि पेनदा मुन्ने विनंति कियालय निल्लिस मंतोर.

25 अचोने आयका, एटा-एटा पेद्दा पेर्मल मोक्कु हियालय सतता नेत्तुर आयो गानि जिवरासिना नेत्तुर पीसि बूमिपोर्गोटा अन्निटकन्ना पवित्र जेगाते होळियंतोर. अल्हा ऊके-ऊके सतता मोक्कु हियालय किरिस्तु स्वर्गमते होना हिल्लोर.

26 ओक्कला अल्हा ऊके-ऊके मोक्कु हियमळगिंटा आसि मत्ते, दुनिया पुट्टस्केटाल इदवेरदाका बच्चुंगो मल्कां किरिस्तुंक ओना जीवा हिय्या पियवड. गानि इद युगमता आकिरते, किरिस्तु सतता मोक्कु हीसि, पापमतुन नासडेम कियानाहाटी उंदे मल्का वातोर.

27 बल्हा लोकुकलक अंतोर उंदि मल्का हासि दांतुर, पजा पेन ओरा न्यायम कीता, इंचि मुन्नेन निरनायम कीसि मंता,

28 अल्हेन किरिस्तु, वेल्लेटोरा पापालकुन नासडेम कियानाहाटी उंदे मल्का ओना सतता जीवातुन मोक्कु हीतोर. ओर मसंदि मल्का मल्सि वायना मंतोर. अयते ई मल्का ओर पापमतुन नासडेम कियालय आयो, गानि ओनाहाटी बच्चो नो ओप्लेते बस्के वांतोर इचेके एदुर हळसेक मनानोर्कुन पिसागोटनाहाटी वायानुर.

10

1 मूसाना नियम अयते, मुन्ने बव बेस पोल्लें जर्गानव मंतांगो, अवुना सिराप नीडे आंद, निजम रूपम आयो. अदुनहाटी एटा-एटा पेर्माळोर, आगाकोटा हिय्यना उंदे तीरकुना मोक्कुलक, पेनदा दग्गेर्क होनानोर्कुन पापमताल पुरागा पवित्र किया पर्रीं.

2 ओक्कला अल्हा आसि मत्ते, बक्तुलकुना मनसुलकुने, “मोमोट पापिर्क” इत्ता विचारम वायाकोनवळ आनि ओर सुद्द आसि मत्ताहाटी मोक्कुलक हियमळ आपिसि मन्नेर. 3-4 गानि एटिना नेत्तुर आयि, कोंदा ना नेत्तुर आयि, पापालकुन बस्केने लक्कु किया पर्रीं. बारित्ते एटा-एटा ओर हिय्यना मोक्कुलक, ओर्क ओरा पापालकुन मति कीसि हीसेकेन मंतां.

किरिस्तु मनाकुन पवित्र किया पर्रींतोर

5 अदुनहाटीगे, किरिस्तु इद दुनियाते वातस्के पेनतोनि इल्हा इत्तोर:

“निमे मोक्कुलक आयि, दानालक आयिं कोराहिल्लिन,
गानि नाहाटी उंदि मेंदुल तयार कीतिन.

6 कमुरबोलि आयिं, पापम मापि आयानाहाटी हीता मोक्कुलक आयिं,
नीकुन कूस किय्यो.”

7 अस्के किरिस्तु,

“पेनदुना! दर्मसास्त्रमते नावा बारेमते रासि मत्ता परकारम,
नीवा इच्चातुन पुरागा कियालय नना वातन.”*

इंचि इत्तोर.

8 पोर्री वेहताप, “मोक्कुलक, दानालक, कमुरबोलि आनि पापम मापि आयानाहाटी हिय्यना मोक्कुलक इवन्निगुडा निमे कोराहिल्लिन इव नीकुन कूस किय्यो,” इंचि पेनतोनि वेहतोर.

9-10 अल्हा वेहचि, “पेनदुना हळा! नीवा इच्चातुन पुरागा कियालय नना वातन,” इंचि इत्तोर. पेनदा इच्चातुन पुरागा कियानाहाटी येसु किरिस्तु ओना सतता मेंदुलतुन उंदे मल्का मोक्कु हीतोर. हीसि रोंडो करारतुन सुस्व कियानाहाटी, मोदाटा करारतुन बंद कीतोर. इल्हा पेन मनाकुन पवित्र कीता.

11 मोदाटा करार परकारम, हरेक पेर्मल सेवाताहाटी ओन्क रोजु गद्दे मुन्ने निल्ले पीता आनि हीता मोक्कुलके ऊके-ऊके हियापीता. गानि अव मोक्कुलक मात्रम बस्केने पापालकुन लक्कु किया पर्रीं

* 10:7 बजन संहिता 40:6-8

12 गानि किरिस्तु अय्ते मना पापाल्कुन लक्कु कियालय, हमेसाताहाटी उंदे मल्का ओना मेंदुलतुन मोक्कु हीतोर. हीसि पेनदा तिना बाजुंक होंचि उद्दिसि मंतोर.

13 इल्हा अस्केटाल, किरिस्तु ओना पगातोर्कुन पेन ओना काल्क इराना कुत्तुललेसीं बस्के कीता इंचेके एदुर हळसेक मंतोर.*

14 बारित्ते, पवित्र आयानाहाटी पेन वेरे कीता मनासंतोर्कुन, ओर सिराप उंदे मल्का मोक्कु आसि, हमेसाताहाटी अन्नि तीरकुने पुरागा कीतोर.

15-16 इदुना बारेमते इल्हा रासतद मंता:

“अव रोजकु दाटसि होत्ता पजा,

नना इस्त्राएल लोकुलकुनतौनि कियाना पूना करार इल्हा मंता.

अद बतल इत्ते, नना नावा नियमकुन ओरा गुंडेने रासि, अवुन ओरा मनसुलकुने वाटंतन,”

इंचि पेन वेहता. इल्हा पवित्र आत्मागुडा मनाकु दर्मसास्त्रमते गवाइ वेहता.*

17 अचोने आयाका,

“ओरा पापाल्कुन आनि ओर कीता तप्पु कबाहकुन मर्रा बस्केने मति किय्योन,”*
इल्हागुडा पवित्र आत्मा वेहता.

18 पेन मावा अन्नि पापाल्कुन मापि कीता अय्ते, इंका मर्रा अवुनाहाटीं मोक्कुलक हिय्यना अव्सरमे हिल्ले.

दैरनेमते पेनदा दग्गेर्क दाकोम

19 अय्ते विस्वासुलकुनिटा, येसु मनाहाटी ओना नेत्तुरतुन पोंगागोटतोर. अदुनहाटीं मनाकु इंदके आ पूनद, जीवाते मनना हरि पीसि पवित्र जेगाते होनना दैरनेम वाता.

20 येसु ओना मेंदुलताहेंदाल परदातुन पक्काक कीताहाटीं, मनम पेनदागा विस्वासमते होना परंतोम.

21 अचोने आयाका, येसे मना पेदूदा पेर्मल आंदुर, ओर पेनदा लोकुलकुनपोर्री अदिकारि आंदुर.

22 अदुनहाटीं मनम सत्तेम मनसुने, पुरागा विस्वासमते, इंका मना विवेकमतुन दोसेम हिलाकोंटा कियानाहाटीं मना मनसुनपोर्री किरिस्तुना नेत्तुर सल्सि, इंका मेंदुलतुन बेस साप एते नोर्सि पेनदा दग्गेर्क दाकोम.*

23 मनाकु बद पेन अय्ते पोल्ले हीतानो अद विस्वासमगल्लद आंद. अदुनहाटीं मनम वेरेतोर मुन्ने ओप्फुत्ता आसेताल पजोळ्क आयाकोंटा, गट्टि दैरनेमते मंदकोम.

24 मनम वरोंक-वरोर पावरम कियालय, बेसता कबाहक कियालय आनि बतल-बल्हा कीते बेस इंचि वरोंक-वरोर दैरनेम हियालय विचारम कीकोम.

25 आरादनाहाटी उंदगा जमा आयाना जेगाते वायाकोंटा मनमळ इच्चुर्कु अलवट आसि मंता. गानि मनम ओरलेहका मनमन्नि. मुक्केमाता पोल्ले बतल इत्ते, येसु सामि मरुंदि मल्का वायाना रोजु दग्गेर्क वासंता, अदुनहाटीं मनम अंतोरम उंदासि, वरोंक-वरोर दैरनेम हीसेक मुन्ने अरकोम इंचि इंकिचो जिद्दिते वेहासेक मंदना.

26 इव पोल्लें नना बारि रासेक इत्ते, सत्तेम इत्ते बतल मनाकु तेळियता. इल्हा सत्तेम तेळियसिगुडा तेळियवाप पापम कीसेके होत्ते, इव पापाल्कुनाहाटीं मात्रम इंका बद्दे मोक्कु हिल्ले.

27 गानि दाना बदुलते, बोर अय्ते पेनदा विरोदमते ताकतुरो ओराहाटीं पेन सिक्साता आदेस हीसि, ओर्कुन बरा-बरा पोत्तना तळमिटे वाट्टिस बूळ्दि किय्यार इत्ता, वेरियानसोंटा पोल्लें मात्रम मिगिल्सि मंतां.*

28 मूसाना नियमतुन विरोद कियाना मनकाना बारेमते, इव्वुर हिलाकोंटे मुव्वुर गवाइदार्कुना पोल्लें केंजसि ओनापोर्री दया कियाकोटेन ओन्क हामुर सिक्सा हीतुर.*

* 10:13 बजन संहिता 110:1 * 10:15-16 यिर्मयाह 31:33 * 10:17 यिर्मयाह 31:34 * 10:22

इपीसि 5:26; 1 पत्र 3:21 * 10:27 यसायाह 26:11 * 10:28 व्यवस्ताविवरन 17:2-7

29 अय्ते, इंदके पेनदा मरिंन पास्काना मनकंक, बद नेत्तुरहेंदाल अय्ते पवित्र कियमळ जर्गता आ पूना करारता नेत्तुरतुन, पवित्र आयो इंचि इनना मनकंक, कुर्पा हुप्साना पेनदा आत्मातुन पास्कानोक, बच्चोन पेद्दा सिक्सा दोर्कारो, मिमेटे विचारम कीसि हळट.

30 बारित्ते पेन इत्ता गदा,

“बद्दला येताना कबळ नावद आंद, ननाने बद्दला येतंतन,” आनि मर्रा,

“सामि ओना लोकुल्लकुना न्यायम कीतोर,”✠

इंचि इत्ता. इद पोल्ले मनाकु एरपाटे मंता.

31 जीवाते मंदना पेनदा कय्दे दोर्कना सिक्सा इत्ते, इरगेन वेरियानाल मनंता.

32 मिमेट बेसता कबुर केंजसि पेनदा वेलगुन दोर्किचकुत्ता आ एनकटा रोजकुन मति कीम्टु, अव रोजकुने बच्चुंगो तकलिपकु वातां, अयना मिमेट ओर्सकुत्तिट.

33 बस्के-बस्के अय्ते अंतोरा मुन्ने मीकुन रोता-रोता पोल्लें इंचि बदनाम कियमळ जर्गता. इंका बस्के-बस्केनो अय्ते, इसोंटा तिप्पल्क बोगांचनोरा तोळने मिमेट निल्लिर.

34 अचोने आयका बेसता कबुर वेहताहाटी जेलने अर्सि दुक्कमते मत्तोरा दुक्कमते मिमेट कलियतिर. मीवा संपत्तितुन दोसकुंचि ओयिना गानि मिमेट कुसिते मत्तिट. बारित्ते दोसकुंचि ओतादानकन्ना बेसतद, बस्केळक मनानद संपत्ति पेन मीहाटी इरता इंचि मिमेट तेल्लिचकुत्तिर.

35 पेनदापोर्रोटा मीवा विस्वासमतुन पीसि, मीकु वेल्लेन पेद्दा इनाम मंता. अदुनहाटी बतल आयिनागानि मिमेट विस्वासमताल पजोळक होनमट.

36 मिमेट दैरनेमते सहन कियमळ अक्सरमे मंता, अल्हा मत्तेन मिमेट पेनदा इच्चातुन पुरागा किया परकिट आनि पेन मीकु बतल अय्ते हीतन इंचि पोल्ले हीतानो अद मीकु दोर्कार.

37-38 बारित्ते,

“बोर सामि वायानोर मंतोर, ओर बिरानेन वांतोर, ओर आल्सेम किय्योर.

ओर वायनादाका, नावापोर्रो विस्वासम कीता नीतिमंतुल्क विस्वासमतेन पिस्संतुर.

गानि ओराव्टेटाल बोरन्ना ना पोरोटा विस्वासमताल पजोळक आते, ओन नना मेच्चुकुन्नोन,”✠

इंचि दर्मसास्त्रमते पेनदा पोल्ले रासतद मंता.

39 गानि मनम अय्ते, विस्वासमताल पजोळक आसि, नासडेम आयानोर लेसीटोरम आयोम. विस्वासम कीताहाटी मनम पेनदाहेंदाल पिसांतोम.

11

विस्वासमते पिसतोरा बारेमते कोन्नि पोल्लें

1 विस्वासम इत्ते बतल? मनम आसे पळसि मत्तव पोल्लें मनाकु तप्पाकोटा दोर्कानू आनि मना कळ्ळुक दिस्साकोन्नागानि अव मंतां इत्ता गेरॉटिए, विस्वासम आंद.

2 मना एनकटा पेद्दालकुनगा इसोंटा विस्वासम मत्ता, अदुनहाटीगे पेन ओर्कुन मेच्चुकुत्ता.

3 विस्वासमहेंदाले, पेन इद दुनियातुन दाना पोल्लेतोने पुटिस्ता इत्ता पोल्ले, मनम तेल्लिचकुना परतोम. दीना अर्तम बतल इत्ते, मनाकु इंदके दिस्सानव अन्नि पोल्लें, दिसुवा पोल्लेनाहेंदाल पेन कीता,✠ इंचि मनाकु तेळियता.

4 विस्वासमहेंदाले आदामना मरिं आबेल, ओना दादाल काइनुंकन्ना बच्चोनो बेसता मोक्कु पेनदुक हीतोर. काइन बतल अय्ते हीतोर अदुन पेन मेच्चुना हिल्ले गानि, आबेलना मोक्कुन पेन मेच्चुंचि ओन नीतिमंतुड इंचि गवाइ हीता. आबेल अय्ते हातोर, गानि ओना विस्वासमहेंदाल मनम इदवेरदाकागुडा करियसेक मंतोम.✠

✠ 10:30 व्यवस्ताविवरन 32:35-36

✠ 10:37-38 हबक्कूक 2:3-4

✠ 11:3 उत्पत्ति 1:1; योहान 1:3;

बजन संहिता 33:6; 33:9

✠ 11:4 उत्पत्ति 4:3-5; 4:10

5 विस्वासमहेंदाले हानोकुंक हामुर वायाका मुन्नेन, उंदि रोज ओर गायप आतोर. बारित्ते पेन ओन तेहाकुंचि ओता. अदुनहाटी ओना जाळा बोनके दोर्काहिल्ले. पेन ओन स्वर्गमते ओयाका मुन्ने ओर पेनदुन कूस कीतोर इंचि ओना बारेमते दर्मसास्त्रमते रासतद मंता.*

6 विस्वासम हिल्वद पेनदुन बोरे कूस किया पर्र. पेनदागा वायाना हेरेक मनकल, पेन निजमते मंता आनि दान हट्टु पीसि पहकानोंक अद बेसता इनाम हीता इंचि विस्वासम किया पीता.

7 विस्वासमहेंदाले नोहाल, कम्मुड वायाना मंता इंचि पेन ओन्क वेरें वेहतस्के ओर कम्मुडतुन बस्केने ह्ळा हिल्लोर गानि, पेनदा पोल्लेक कदर हीसि, कम्मुड वायाका मुन्नेन ओना कुटुंबतोर्कुन कापाळनाहाटी पेद्दा डोंगा तयार कीतोर. इल्हा ओर दुनियातोर अंतोर तप्तर इंचि ओना विस्वासमहेंदाल पेन दुनियातोर्कुन दोसिल्क इंचि वेहता. ओना इदे विस्वासमहेंदाल ओर, पेनदा मुन्ने नीतिमंतुल्क आतोर लोप्पो कलियतोर.*

8 विस्वासमहेंदाले पेन अब्राहामुन, “नना नीकु हुप्साना देसेमते होन, अगाटा पूरा जेगा नीकु हीकन” इंचि इत्तस्के, बेके होनना इंचि तेळियाकोन्ना गानि तेळियवा जेगाहेके होनालय पेयसतोर.

9 विस्वासमहेंदाले अब्राहाम, पेन ओन्क हीतन इंचि पोल्ले हीता देसेमते होंचि, पराइ देसेमतोनलेसी डेरा वाट्सि पिस्सेक मत्तोर. ओनतोन ओना मरिं इसाक आनि इसाकुना मरिं याकोब, ईरगुडा अद देसेमता वारसदारके. ओरगुडा अगा डेरं वाट्सि पराइ देसेमतोरलेसी पिस्सेक मत्तोर.

10 बारित्ते, कुद्दु पेने सारे पीसि, पुनादि दोह्चि, बस्केळताहाटी निल्हाता सहरते मनालय ओर विस्वासमते एदुर ह्ळसेक मत्तूर.

11 विस्वासमहेंदाले अब्राहामुंक ओना मुत्तो सारानतोन कलियसि, मातिरतनमतेगुडा मरिन कनाना बलम दोर्कता. बारित्ते, ओन्क संतानम हीतन इंचि बद पेन अयते पोल्ले हीतानो, अद पोल्ले तप्पो इंचि ओर दानपोर्री विस्वासम इरतोर.*

12 अदुनहाटी डुग-डुग मातरल आसि हासोत्तोनलेह्का मत्ता वरोरे अब्राहामुंक पेन, मब्बुने मनना सुक्कनचचोन आनि समुद्रम ओडुङ्क मनना उस्केतचचोन, लेक्का पस्वचचो संतानमतुन हीता.*

13 पेनदापोर्री विस्वासम इरतोर अंतोरगुडा दानपोर्री विस्वासम इरसे हासोत्तूर. पेन हीतन इंचि पोल्ले हीतद ओर्कु दोर्काहिल्ले. गानि पेन हीतन इत्तादुन लक्कुटाले ह्ळताप ह्ळसि कूस आतूर. पजा मनम इद बूमिपोर्री पय्नेम कीसेके वाता पराइतोरम इंचि ओष्कुत्तूर.

14 इसोँटा पोल्लें बोर अयते वळ्कंतुरो, ओर ओरा सतता देसेमतुन पहकसंतूर इंचि मनाकु अर्ताम आंता.

15 ओक्कला, ओर होळसि वाता देसेमता बारेमते विचारम कीसि मत्ते, ओर्क ओरा होळसि वाता देसेम मल्सि होनना मोका दोर्किसि मनवळ. गानि ओर होळसि वाता देसेमता विचारमते मना हिल्लूर.†

16 दाना बदलते ओर, होळसि वाता देसेमकन्ना एक्को बेसता देसेम, इत्ते ओराहाटी पेन स्वर्गमते तयार कीसि इरता देसेमते होनना विचारमते मत्तूर. अदुनहाटी पेन, “नना ओरा पेनदुन” इंचि इनालय सिग्गु अर्ती.

17 विस्वासमहेंदाले, पेन अब्राहामुना पट्टु ह्ळतस्के, ओर ओना वरोरे मरिं इसाकुन मोक्कु हियालय तयार आतोर. पेन हीतन इंचि मत्ता पोल्लेतुन ओर विस्वासम कीसि मत्तोर.

18 अयना, “इसाकुनाहेंदाल नीकु दोर्काना वंसंम नावा लोकुल्क आयानुर,” इंचि पेन अब्राहामुंक मुन्नेन पोल्ले हीसि मत्ता. आयनागानि ई इसाकुने अब्राहाम, पेनदुक मोक्कु हियालय तयार आसि मत्तोर.

* 11:5 उत्पत्ति 5:22-24 * 11:7 उत्पत्ति 6:13-22; 7:1 * 11:11 विस्वासमहेंदाले अब्राहामुना मुत्तो साराल, मातिरतनमतेगुडा नेला तप्सि मरिन कंता. बारित्ते, दान्क संतानम हीतन इंचि बद पेन अयते पोल्ले हीतानो, अद पोल्ले तप्पो इंचि अद विस्वासम कीता. इल्हा कोन्नि पडाना पांडु लिपिने रासि मंता. * 11:11 उत्पत्ति 17:19; उत्पत्ति 21:1-2 * 11:12 उत्पत्ति 15:5; उत्पत्ति 22:17; उत्पत्ति 32:12 † 11:15 अब्राहाम बेबिलोन देसेमता ऊर इनाना नाटे पट्टोर. (उत्पत्ति 11:28) गानि कनान देसेमते वाता पञ्जो, ओर ओना पट्टा देसेम बस्केने तिरियसि होना हिल्लोर. इसाक, याकोब अद देसेमताल पोरीह्कन तत्तूर गानि अद देसेम होंचि अगा जेगा पिथ्या हिल्लूर.

19 बारित्ते, पेन हासोत्तोर्कुंकगुडा जीवा अरहा परंता, इंचि ओर विस्वासम कीतोer. हातोन जीवाते तेहाचि हीतापे, पेन अब्राहामुंक ओना मर्रिन हीतागुडा.✱

20 विस्वासमहेंदाले इसाक, ओना याकोब, एसाव इनना इव्वुर मर्कुंक, वायाना कालमते ओर्कु बल्हा जर्गार इंचि आसिर्वाद हीतोer.✱

21 विस्वासमहेंदाले याकोब, जीवा होळसका मुन्ने, योसेपुना इव्वुर मर्कुन वरो-वरोन केय्से, आसिर्वाद हीतोer आनि दुडुडुना पोर्रो ऊनसि पेनदुन आरादना कीतोer.✱

22 विस्वासमहेंदाले योसेप, इस्राएल लोकुल्क इजिप्त देसेमताल पेय्से होनानुर इंचि जीवा होळसका मुन्ने वेहा परतोer. अचोने आयाका, अद देसेमताल पेय्से होननेके ओना बोक्कनगुडा पीसि पेय्सना इंचि आदेस हीतोer.✱

23 विस्वासमहेंदाले, मूसाल पुट्रस्के ओना तल्लुर-बाबो ओन मूड नेल्क मक्किच्चि इरतुर. “मावा पेडल सक्कगा मंतोर” इंचि तल्लुर-बाबो तेल्लिचकुत्तुर. अदुनहाटी “इन्निर्तोर्क पुटता अंतोर मांडूसा पिलाल्कुन हक्कट” इंचि राजाल हीता आदेसुंक ओर वेरियाकॉटा मत्तुर.✱

24 विस्वासमहेंदाले मूसाल पेदूदा बेर्सतस्के, पिरोन राजाना मिथ्यटा मर्रिन इंचि वेहकुनालय ओप्कुना हिल्लोर.

25 दान्क बदुलते, पापमहेंदाल दोर्कना जेरसिपाटा सुकमते पिस्सनदानकन्ना, पेनदा लोकुल्कुनतोनि कलियसि तिप्पल्क बोगांचमळे बेस इन्कुत्तोर.

26 पेनदाहेंदाल दोर्कना इनामुनाहाटी ओर उंदितीर एदुर हळसेक मत्तोर. अदुनहाटी ओर इजिप्त देसेमता दनम-संपत्तिकन्ना, किरिस्तुनाहाटी अपमानम सहन कियमळतुने पेदूदा दनम इन्कुत्तोर.

27 विस्वासमहेंदाले, इजिप्त देसेमता राजाल होंगुंक वायिनागानि, वेरियाकॉटा मूसाल इजिप्त देसेम होळसीतोer. बोर्के दिसुवा पेन ओन्क दिसताप, ओर गट्टि दैरेनेमते मत्तोर.

28 इजिप्त लोकुल्कुना तोल्सूर मर्कुन हक्कालय पेन लोहता दूता, इस्राएलतोरा मर्कुन इट्टानायो इंचि, विस्वासम कीताहाटीगे मूसाल, गौरंता नेत्तुरतुन लोता दारसाकक होकालय वेहचि, दाटसि होनना पंडुगुन सुस्व कीतोer.

29 विस्वासमहेंदाले, इस्राएल लोकुल्क, वत्तुता बूमिपोर्रो ताकताप, एर्रा समुद्रमते ताकसेके होनना दैरेनेम कीतुर. ओरालेह्केन इजिप्त लोकुल्क कियालय हळतुर अथ्ते, अव्टेन मुळिगसि हातुर.✱

30 विस्वासमहेंदाले, इस्राएल लोकुल्क यरिहो सहरता गुरे सुट्टु एडुं रोजकु तिरियतुर, अस्के आ गुरे कुलसि अरता.✱

31 विस्वासमहेंदाले, यरिहो सहरता रहाब इनना वेस्या, तेळियाकॉटा जाळा कियालय वाता इस्राएलतोर्कुन दाना लोते केय्से सांतिते सहायम कीता, अदुनहाटी पेनदा पोल्ले केंजवा लोकुल्कुनतोनि दाना नासडेम पेन किया हिल्ले.✱

32 इंका नना बोरा-बोरा बारेमते वेहासेक मंदकन? गिदोन, बाराक, समसोन, इपताल, दाविद राजाल, सामवेलनसोटा पेनदा कबुरतोer. ईरा बारेमते वेहालय नाकु पुरसत हिल्ले.

33 विस्वासमहेंदाले इरव्टेटाल इच्चुर लोकुल्क राज्येल्क गेल्सतुर, इच्चुर लोकुल्क सत्तेम कबाहक कीतुर, इच्चुर लोकुल्क, पेन हीतन इंचि पोल्ले हीतदुन दोर्किच्चकुत्तुर, इच्चुर लोकुल्क सिंहाना कतराताल पलाते अरतुर.

34 इंकिच्चुर लोकुल्क पोत्तना तडमितुन पिरहातुर, इच्चुर लोकुल्क तलवारकुना अय्दरताल तपिच्चकुना परतुर, इंकिच्चुर बारे बलम हिल्वस्केगुडा बलमगल्लोर्क आतुर, लडाइने वीस्ल्क आतुर आनि पराइ देसेमता सिपाइल्कुन गेदुमिसीतुर.

✱ 11:19 उत्पत्ति 22:1-18 ✱ 11:20 उत्पत्ति 27:27-40 ✱ 11:21 उत्पत्ति 48:8-20 † 11:22 नीवा वंसमंतोर नालु न्हुकुना वर्सनदाका पगातोरा कय्दा हिळ्ळु मंदानुर इंचि पेन अब्राहामुंक वेहचि मत्ता. गानि ओर्कुन तिप्पल्क कियानोर्क सिक्सा हीसि नावा लोकुल्कुन अगटाल पेचाह्चि तरकन इंचि पेन वेहचि मत्ता (उत्पत्ति 15:13-14). पेनदा इदे पोल्लेतुन योसेप विस्वासम कीसि इल्हा इतोer (उत्पत्ति 50:24-25). ✱ 11:23 निर्गमन 1:22; 2:1-2 ✱ 11:29 निर्गमन 14:21-31 ✱ 11:30 यहोस् 6:12-23 ✱ 11:31 यहोस् 2:8-14

35 विस्वासमहेदाले कोन्नि मुरताहकुंक, अवनुना हासोत्ता जीवातोर्क, मर्रा जीवा अर्सि वापस दोर्कतुर.

गानि इक्किच्चुर मात्रम पेनदापोर्रो विस्वासम इरताहाटी देब्बां तिचि-तिचि हासोत्तुर. हासि मर्रा जीवाते तेदतस्के, पेन माकु बेसता पिस्वर हिय्यार इत्ता आसेते, इगेटा पिस्वरतुन दक्किच्चुकुनालय पेनदुन होळसा हिल्लुर.

36 इक्किच्चुकुन बारे कारेड्डालक कीसेके पोट्टेने तंतुर, इंका गोलसुकुने दोह्वि जेलने वाटतुर.

37 सगोमतोर्कुन अय्ते बंडाने तंतुर, ओरने कोय्सि तुकडां कीतुर, ओरा पट्टु हळतुर, S तलवारकुने कोह्विसि हक्कतुर. गरिब-कंगाल आसि दुक्कमते, एटि-गोर्रिना तोलकु मुचकुंचि बेके-बेकेनो तिरियसेके मत्तुर. लोकुलक ओर्कुन बागेने तकलिप कीतुर.

38 दुनियाता लोकुलक, पेनदापोर्रो विस्वासम इरतोरालायक मना हिल्लुर. अदुनहाटी ओर उस्के बूमिने, गुट्टानपोर्रो, पडाने, बंडा सौरिने मंचेके तिरियुंदुर.

39 ईरा अंतोरा विस्वासमतुन हळसि पेन अय्ते ओर्कुन मेच्चुत्ता. गानि पेन ओर्कु बद् आसिर्वाद अय्ते हीतन इंचि पोल्ले हीसि मत्तानो, अद् आसिर्वाद मात्रम ओर्कु दोर्काहिल्ले.

40 बारित्ते अन्निटकन्ना बेसतद् उंदि पोल्ले पेन मनाहाटी मुन्नेटाले तयार कीसि इरता. अद् पोल्लेतुन मनाकु, ओर्कु उंदे मल्का दोर्काना इंचि पेन अल्हा कीता.

12

पेन मना बाबाल आंदुर

1 इचोन मंदिता गवाइ, मब्बुनलेसी मना सुट्टु आताप मंतां. अदुनहाटी मनाकुन आपाना हरेक बर्वुन आनि अल्कगा पट्टुने अरहना पापमतुन होळसिसि, पेन मनाकु हुपिस्ता हरदे ओप्केते वितकोम.

2 वितनेके मना नदर येसुनपोर्रिन इरकोम. मनालोप्पो विस्वासमतुन पुट्टिचानोर आनि दान पुरागा कियानोर ओरे आंदुर. मुन्ने दोर्काना आनंदमहाटी येसु कूसुनपोर्रो जीवा हियालयगुडा तयार आतोर. अगा ओन्क जर्गता अपमानमतुनगुडा लेक्का किया हिल्लोर. इंदके ओर पेनदा राजगद्देता तिना बाजुंक उद्दिदिसि मंतोर.*

3 पापि लोकुलक ओना पोर्रेटा पगाते ओन बच्चोनों तिप्पल्क-बादां कीतुर. गानि मिमेट दैरेनेम होळसि विस्वासमताल पजोळ्क आयामान्नि इंचि ओर अवन्नि ओर्सकुत्तोर. मिमेट ओना बारेमते विचारम कीम्टु.

4 मिमेट पापमतोनि लळांच्चेके, उंदि पोल्ले मति इर्राना. अद् बतल इत्ते, येसु बल्हा ओना जीवातुन हीतोर, अल्हा मीकु मीवा नेत्तुर पोंगागोट्टाना अक्सरम अर्राहिल्ले.

5-6 मीकुन अंतोर्कुन मर्क-मियाह्क इन्कुंचि, मीकु दैरेनेम हियानाहाटी पेन मीकु वेहता आ पोल्लेतुन पुरागेन मति मसंग्तिरा?

“नावा मर्रिना, पेन हीता टेरनिंगतुन, मामुल पोल्ले इनकुन्मा.

पेन नीकुन सुद्रांचनस्के, निमे दैरेनेम होळसमा, बारित्ते, पेन बोन अय्ते पावरम कीतानो ओन्क टेरनिंगगुडा हीता.

अचोने आयका, अद् बोन अय्ते मर्रि इंचि इंतानो, ओन्क सिक्सागुडा हीता,”

इंचि रासतद् मंता.*

7 पेन मीकुन दाना मर्क-मियाह्कनलेसी हळता. अदुनहाटी मीकु बस्के अय्ते तिप्पल्क वांतां, अस्के पेन मीकुन सुद्रांचनाहाटी टेरनिंग हीसंता इंचि अदुन ओर्सकुट्टु. बारित्ते मर्रि सुद्रांचनाहाटी ओन्क टेरनिंग हियवोर बोरन्ना बाबो मनंतोरा?

8 पेन दाना अंटोर मर्क-मियाह्कुकुन सुद्रांचनाहाटीं टेरनिंग हीता. आ टेरनिंगगिंटा मीकु दोर्काकोंटे, मिमेट दाना निजम मर्क आयिर.

9 मनाकुन पुटिस्ता मना बाबुर्क अय्ते मनम सुद्रांचनाहाटीं टेरनिंग हीतुर. अदुनहाटीं मनम ओरा कदरगुडा इरतोम. अय्ते मनम बस्केळक पिस्सि मननाहाटीं, मना आत्मांकु बाबो आता पेनदुक मनम बच्चोन वेल्ले लोंगिस मत्ते बेस? विचारम कीम्टु.

10 मनाकुन पुटिस्ता बाबुर्क, कोन्नि वर्सानाहाटीं ओर्क तेळियताप, मनम सुद्रांचना इंचि टेरनिंग हीतुर. गानि पेन मना बेसताहाटीं, मनाकुन दानालेह्का पवित्र कियालय टेरनिंग हीता.

11 इंदके इव टेरनिंगकु येतनेके मनाकु कुसि अनपिचो, दुक्कम वांता. गानि बोर अय्ते ओर्सकुंचेके टेरनिंग बेस मनसु तासि करियंतुरो, ओर्कु सत्तेम, सांतिते निडता पिस्वर दोर्कता.

12 अदुनहाटीं, अरसोत्ता मीवा कय्कुकुन आनि ताकत हिलुवा मीवा टोंगरन मजबुत कीम्टु. *

13 मिमेट मीवा विस्वासमता हर्दे सवरगा ताकाटु. * अस्के बोर अय्ते विस्वासमते कुंटी आसि मंतोरो, ओर विस्वासमते इंकिचो कुंटी आयाकोंटा गट्टि पळानुर.

विस्वासमते पिसानोर्क कोन्नि जेगर्ता

14 अंटोर मनकालोरतोनि सांतिते कलियसि पवित्र मनना कोसिस कीम्टु, अल्हा मनाकोंटे बोरे मनकल सामिनगा होना परीर.

15 पेनदा कुर्पाताल वरोरगुडा तप्सोनामान्नि इंचि जेगर्ता मंटु. अल्हा तप्सोंचि हेळतोर बोर्न्ना मी नड्डुम मनानय्ते, ओर कळमातोर्कुन हेळाहचि, पेनदाल लक्कु कीतोर. इदुन जरा जेगर्ता हुळट. *

16 मीवा नड्डुम बोरे व्यबिचारम कियानोर हिलाकोंटे, एसावुनलेसी नीति हिलुवा मनकल मनानाम्नि. उंदि पूताता गाटोहाटीं ओर ओना जेस्टम पालुंक विलुवा हिय्याकोंटा तम्मुंक अम्मुक्त्तोर. *

17 पजा एसावुना गति बतल आता मीक अय्ते तेळियसे मंता. वारसान हक्कुनाहाटीं बाबोनगा आसिर्वाद येतालय होत्तस्के, बाबो ओन्क आसिर्वाद हिय्या हिल्लोर. ओर अळसि-अळसि वेल्ले कोसिस कीतोर गानि ओन्क मनसु मार्सकुनालय मोका दोर्काहिल्ले. *

18-19 इस्राएल लोकुल्क अय्ते कय्दे इट्टा परानाल मत्ता गुट्टातगा होत्तुर. अद गुट्टा तळमिते पोतसेके मत्ता, हिर्-हीकाटा, वळि-दुमारम, अद गुट्टातगा मत्ता. गानि मिमेट अय्ते असोंटा गुट्टातगा होना हिल्लिर. अद गुट्टातगा इस्राएल लोकुल्क, तूताकोमता आवाज आनि पेनदा वळकना पेदूदा लेंगुन केंजतुर. केंजसि, “मर्ग बस्केने इसोंटा लेंग माकु केंजा वायामान्नि” इंचि पेनदुक विनंति कीतुर. *

20 बारित्ते, “इद गुट्टातुन, उंदि जिवरासि इट्टिना, दान बंडाने तंचि हक्काना,” इंचि पेन आदेस हीसि मत्ता, अद आदेसतुन ओर सहन किया परीहिल्लुर. *

21 अगा जर्गता गटना इच्चोन वेरियानाल मत्ता गदा, अदुना बारेमते मूसालगुडा, “नना इरगा वेरियसि गजा-गजा आसंतन,” इंचि इत्तोर.

22 गानि मिमेट अय्ते सियोन गुट्टातगा वातिट. जीवाते मनना पेनदा, स्वर्गमते मनना येस्सलेम सहर इदे आंद. कुसिते उंदगा जमा आता, लेक्का हिलुवच्चोन पेनदा दूतानगा मिमेट वातिट.

23 नीतिमंतुड लोकुल्कुना आत्माना कलिसियातगा मिमेट वातिट. आ कलिसियातगा अंटोरा पोरोलीं रासि मंतां, अंटोर्क जेस्टम पालना अदिकारम मंता. अंटोर्कुन पेन दानतोनि मनालय पुरागा कीता. दुनियाते मनना अन्निटवुना न्यायम कियाना पेनदागा मिमेट वातिट.

* 12:12 यसायाह 35:3 * 12:13 नीतिवचन 4:26 * 12:15 व्यवस्ताविवरन 29:18 * 12:16 उत्पत्ति 25:27-34 * 12:17 उत्पत्ति 27:36-38 * 12:18-19 निर्गमन 20:18-21; व्यवस्ताविवरन 5:23-25

* 12:20 निर्गमन 19:12-13

24 इंका पूना करारता नड्डुमतोर आता येसुनगा मिमेट वातिट. आदामना मरि आबेलना नेत्तुर इत्ते, ओना दादाना बद्दला येतालया पेनदुन केयताप मत्ता.☆ गानि येसुना नेत्तुर अय्ते मीवापोर्रो सल्लिस मीवा पापालकुन मापि कीम इंचि पेनदुन केयताप मंता.

25 इद दुनियाते, लोकुलकुंक जेगर्ता मनालय पेन वेहतस्के, ओर पेनदा पोल्ले केंजा हिल्लुर. अदुनहाटी ओर पेन हीता सिक्साताल तपिच्चकुना पराहिल्लुर. अय्ते इंदके मनम स्वर्गमताल वेहनोना पोल्लेतुन केंजाकोटे, पेन हिय्यना सिक्साताल बल्हा तपिच्चकुना परातोम? अदुनहाटी जरा जेगर्ता मंट, बोर अय्ते वळकसंतोरो ओना पोल्लेन पास्काकोटा, बेस केंजट.

26 अद कालमते पेन वळकतस्के, दाना आवाजते, बूमिअंता गजा-गजा ऊंगता.☆ गानि इंदके, “नना सिराप बूमितुने आयो गानि, मब्बुनगुडा मरंदि मल्का गजा-गजा ऊपांतन,” इंचि पेन पोल्ले हीता.☆

27 “मरंदि मल्का” इनना पोल्लेता अर्तम बतल इत्ते, इद दुनियाते गजा-गजा आयानव बव अय्ते मंतांगो, अव अनि तयार कीतव आंदु, अदुनहाटी अव नासडेम आसि दांतां, गानि बव अय्ते गजा-गजा आयाकोटा मनंतांगो, अव बस्केळक अल्हेन मनंतां.

28 बोरे कदलिच्चा पस्वसोटा राज्ये मनाकु दोर्कसेक मंता. अदुनहाटी मनम पेनदुक दन्यवाद वेहकोम. अचोने आयाका, दाना वेंरे मनसुने इर्सि दाना सेवा कीसेके, दान्क नच्चना आरादना कीसेके मंदकोम.

29 बारित्ते, मना पेन, बूळ्दि कीसि पोहना तळमिलेसीटद आंदु.☆

13

पेनदुन कूस कियमळ

1 मिमेट अंतोर उंदि लोतोरलेसी वरोंक-वरोर पावरम कीसेके मंट.

2 वाता हेळमितोर बोरे आयिर, ओर्कुन बेस हळकुंट. इल्हा इच्चुर लोकुलक, एरपाट कियाकोन्नागानि पेनदा दून बेस हळकुत्तुर.

3 पेनदुन विस्वासम कीताहाटी बोर अय्ते जेलने मंतुरो, ओरा मति कीतस्के, मिमेट कुद्दु ओरतोनि जेलने मत्ताप विचारम कीम्टु. अल्हेने, बोर अय्ते पेनदुन विस्वासम कीताहाटी तिप्पल्क बोगांचेके मंतुरो, ओर्कुन मति कीतस्के मिमेट कुद्दु ओरतोनि तिप्पल्क बोगांचेके मत्ताप मति कीम्टु.

4 मरमिन आनि मुत्तो-मुय्दोना संबंदमतुन कदर कियाना, ओर वरोनपोर्रो विस्वासम कीसि बदनाम आयाकोटा मंदना. व्यबिचारम कियानोर्कुन आनि बोगमतनम कियानोर्कुन पेन न्यायम कीता, इदुन मतिते इर्राट. अदुनहाटी मुत्तो-मुय्दो वरोनपोर्रो वरोर विस्वासम कीसि बदनाम आयाकोटा मंदना.

5 दनमताहाटी मिमेट आसे पडानायो. मिहगा बतल अय्ते मंता अय्तेन कूस मंट. बारित्ते पेने कुद्दु इल्हा इत्ता:

“नना नीकुन बस्केने होळसोन, नना नीकुन बस्केने दिक्कु हिल्वोन किय्योन,”☆ इंचि वेहता.

6 “अदुनहाटी, मनम, पेन नाकु सहायम कियानद आंद,

नना असले वेरियोन, मनकल नाकुन बतल किया परांतोर?”☆

इंचि दैरेनेमते इना परातोम.

7 मीकु मोट्टा मोदाला पेनदा पोल्ले वेहता मीवा पेद्दालकुन मति कीम्टु. ओर बल्हा आकिरदाका पेनदापोर्रो विस्वासम इरसि पिस्तुरो मति कीसि, अल्हेन मिमेटगुडा ताकट.

8 येसु किरिस्तु मुन्ने मत्तापे, इंदके आनि बस्केळ्दाकागुडा मारियाकोटा उंदेतीर मंतोर.

☆ 12:24 उत्पत्ति 4:10 ☆ 12:26 निर्गमन 19:18 ☆ 12:26 हामौ 2:6; न्यायियो 5:4; बजन संहिता 68:8

☆ 12:29 व्यवस्ताविकरन 4:24; व्यवस्ताविकरन 9:3; यसायाह 33:14 ☆ 13:5 बजन संहिता 37:25; व्यवस्ताविकरन

31:8; यहोस् 1:5 ☆ 13:6 बजन संहिता 56:11; 118:6

9 अदुनहाटी, वेरेतोर वासि कराहना रका-रकालकुना बोदां केंजसि मिमेट गयबेत आयमट. बोनके बतल पायदा वायवा, तिदाना नियमकुन पीसि तनलाळसेक मत्ते मना मनसुंकु ताकत दोर्को, गानि पेनदा कुर्पातेन मनसुंकु ताकत वांता.

10 मनागा उंदि इसोंटा गद्दे मंता गदा, आ गद्देपोर्रोटा गाटो डेराने सेवा कियाना यहूदि याजकुलकुंक तिनना अदिकारम हिल्ले.

11 बारित्ते, पापालक मापि आयानाहाटीं मोळकालय, पेद्रूदा पेर्मल जिवरासिना नेत्तुरतुन अय्ते अन्निकन्ना पवित्र जेगाते ओंतोर, गानि जिवरासिना मेंदुल्लतुन मात्रम डेराना पलाते बोळसंतुर.✱

12 अय्ते येसुगुडा, ओना नेत्तुरते लोकुल्लकुन पवित्र कियानाहाटीं येस्सलेम सहरता पलाते तिप्पल्क बोगांचि जीवा होळसतोर.

13 अदुनहाटीं वट्ट! मनमगुडा येसुना पोरोटा अपमानमतुन मनापोरो येतकुंचि, येसुनालेसी तिप्पल्क बोगांचालय डेराना पलाते दाकोम.

14 इद दुनियाते हमेसा मनालय मनाहाटीं बदे सहर हिल्ले. गानि वायाना कालमते मनाहाटीं तयार आयाना सहरते मनालय, आसेते मंतोम.

15 अदुनहाटीं, येसु मनाहाटीं कीतदुन मति कीसि, बस्केळक मना तोळदाल पेनदा पोरोल येतसि, पारतना-दन्यवादाळकुना मोक्कुल्ल हीसेक मंदकोम.

16 वेरेतोरहाटीं बेस कियमळतुन आनि मिहगा मत्तवेटाल ओर्कु तूस हियमळतुन होळसमट. इल्हा कियमळगुडा उंदि मोक्के आंद. दीनहेंदाल पेन कूस मंता.

17 मीवा पेद्रूदालक वेहताप मिमेट ताकट. ओर्कु लोंगिस मंट. मीवा जीवाता कावेल कियमळे ओरा जिम्मेदारि आंद. ओर्कु मीवा बारेमते, पेनदागा लेक्का हिथ्या पीता. ओर वेहताप मिमेट ताकते, ओरा कबळ ओर कुसिते कीतुर, हिलाकोटे ओर दुक्कमते कबळ कीतुर. ओर दुक्कमते कबळ कियानय्ते मीकु बतल पायदा वायो.

18 माहाटीं पारतना कीसेके मंट. अन्नि तीरकुने मोमोट निजम बतल अदे कीसेके, बेस कदरते पिस्सेक मंतोम. इंका मावा बुद्धिगुडा सल्लेम मंता इत्ता बरोसा माकु मंता.

19 अचोने आयाका, नना मीकु विनंति कीसि वेहना पोल्ले बतल इत्ते, पेन नाकुन बच्चोन बिराना आते, अचोने बिराना मिहगा लोहना इंचि पारतना कीम्ट.

20-21 सांति हिथ्यना पेन दाना विचारम परकारम मिमेट कियालय, मीकु अन्नि तीरकुना बेसता पोल्लें हिथ्यि. येसु किरिस्तुनाहेंदाल मीवा पिस्वरते दान्क नच्चना पोल्लें जर्गि. किरिस्तु येसुना नेत्तुरहेंदाल पेन मातोनि बस्केळक मननाहाटीं पूना करारतुन निल्लाता. इद पूना करार निल्लना इंचि पेन येसुन हामुरताल मर्रा जीवाते तेहाता. इल्हा येसु किरिस्तु मावा बेस मेहानोर आतोर. मनकालोर अंतोर बस्केळताहाटीं ओन्के कदर हिथ्यिर. आमीन.

आकिरता पोल्लें

22 विस्वासुल्लकुनिटा! मिमेट पेनदा बक्त्तिते इंकिच्चो गट्टि पळना इंचि, इव इच्चुं पोल्लें नना इद सिट्टिते मीहाटीं रासतन. इवुन बेस सहन कीसेके केंजट इंचि नना मीकु विनंति कीसंतन.

23 मना तम्मुनसोंटा तिमोति जेलनाल पेयसता पोल्लेतुन मिमेट तेलिचकुंकुट. ओर ओक्कला नहगा बिराना वाते, नना ओनतोनि, मीकु कलियालय वांतन.

24 मीवा लीडरकुंक आनि पेनदा अंतोर पवित्र लोकुल्लकुंक, नावा जोहार वेहाट. इटलि देसेमते मनना विस्वासुल्लक मीकु जोहार वेहासेक मंतुर.

25 पेनदा कुर्पा मी अंतोरतोनि बस्केळक मन्निकांटी. आमेन.

याकोब याकोब रासता सिट्टि

इद सिट्टिटा बारेमते गिचचो परिचयम

रासतोना पोरोल: याकोब

रासता कालम: इसवि सन 45-50

याकोब येसु सामिना तम्मुर आंदुर. लोकलुक, पेनदा विस्वासुलुकुन तकलिप कियुंदुर. अदुनहाटी विस्वासुलुक वेरे-वेरे देसेमते पेय्सि होतुर. ओर्क दैरनेम हियालय याकोब इद सिट्टि रासतोर.

मीक तकलिप वायिना आनंदमते ओपकेते अदुन ओर्सकुंदु, गरिब आथिर सिरमंत आथिर बेदबाव कियमट, इच्चाना पज्जो ताकसि पापम कियमट, विस्वासमते कबळ कीम्पु, नालकेतुन आपट, पेद्विरकेम कियमट आनि विस्वासमते गट्टिगा निल्सि मंडु इंचि विस्वासुलुकुक वेहतोर.

बगा बतल मंता

जोहार आनि परिचयम 1:1

विस्वासम आनि बुद्धि 1:2-8

गरिबतनम आनि दनम 1:9-11

पट्टु हळमळ आनि परिकसा 1:12-18

केंजमळ आनि कियमळ 1:19-27

बेदबावम कियमळ बारेमते 2:1-13

विस्वासम आनि बेस कबाहक 2:14-26

विस्वासि आनि ओना वळकमळ 3:1-18

विस्वासि आनि दुनिया 4:1-5:6

समजांचि वेहामळ 5:7-20

जोहार

1 नना याकोबुन, पेन आनि सामि येसु किरिस्तुना सेवकुन आंदुन. वेरे-वेरे देसेलुकुने पैलांचि होंचि मत्ता पन्नेडु गोत्रालुकुनोर्कुंक* नना इद सिट्टि रासेके मंतन. मीक अंतोर्क जोहार.

परिकसां आनि आनंदम

2 नावा विस्वासुलुकुनिटा, बस्के अय्ते मीवापोर्री तीर-तीराता परिकसां वांतां, अस्के अद मीवा पूरा आनंदमता पोल्ले इनकुंदु.

3 बारित्ते विस्वासमता परिकसानाहेंदाले ओपके पुटंता इंचि मीक एरपाटे मंता.

4 मिमेट ओपकेतुन दाना कबळ पूरा किया हीम्पु, अस्के मिमेट विस्वासमते गट्टिगा, पुरागा आनि बवे पोल्लेने बतले तक्को हिलाकौटा आतित.

5 गानि मीवा लोप्पोटाल बोनकन्ना बुद्धिद तक्को मत्ते पेनदुन तल्कट, अस्के पेन हीता. बारित्ते अद बतले तप्पु दोस्साका, तल्कतोर अंतोर्कुंक वेल्लेने हीता.

6 गानि अनमानम कियाका विस्वासमते तल्कमळ गावाले. अनमानम कियानोर समुद्रमते वळिक वायाना एता तळानसंतोर आंदुर.

7-8 असंतोर रौंडु तीस्कुने विचारम कियाना मनकल आंदुर, ओर बदे हर्दे गट्टिगा मन्नोर. अदुनहाटी सामिनाहेंदाल बतलन्ना दोर्कता इंचि इनकुना मन्नि.

गरिब आनि सिरमंतुड

* 1:1 पन्नेडु गोत्रालुकुनोर्कुंक ईर यहदि विस्वासुलुकु आंदुर, ओरा देसेमताल पलाते एककोते-एक्को सिरिया आनि आसिया एरियाते मंचेके मत्तुर.

9 गरिब विस्वासि, पेन ओनकु हीता पेद्दातनमता हेंदाल आनंदमते मंदना.

10 अल्हेन सिरमंत विस्वासि, पेन हीता सिन्नातनमता हेंदाल आनंदमते मंदना. ओर जाडि पुंगार राल्सि होत्ताप हासि दांतोर.

11 बारित्ते पोळ्दु पेयसंता अस्के एर्ना एद्दि मनंता, दानहेंदाल जाडि वतसि दांता, पजा दाना पुंगाह्कु राल्सि होंचि सिंगारम हिलाकोटा आंता. अल्हेने सिरमंत मनकलगुडा ओना कमाइ कियाना विचाराल्कुनेन मुळिगसि मंचि नासडेम आसि दांतोर.

12 बोर अय्ते परिक्सां वातस्के अबुन ओर्सकुंतोर, ओर आसिर्वाद दोर्कतोर आंदुर. बारित्ते परिक्साने गट्टिगा नित्तिसि मंचि बोर अय्ते पेनदुन पावरम कींतोर, ओनकु पिस्वरता किरिटम हीतन इंचि पेन पोल्ले हीसि मत्ता, अद ओनकु हिय्यार.

13 पेन परिक्सां वाया हिय्यो अल्हेन बोर्कुने परिक्साने अरहो. अदुनहाटीं बोर्कन्ना परिक्सां वायानय्ते, पेनदाहेंदाले परिक्सां वासेक मंतां इंचि इना मन्नि.

14 गानि हरेक मनकन, ओना लालच दानहेके गुंजकुंता. पजा पसांचि, ओन परिक्साते अरहंता.

15 आयंका आ लालच नेला तप्सि एरपूरताप, पापमतुन कनंता आनि पापम बेर्सि हामुरतुन पुटसंता.

16 नावा पावरमगल्ला विस्वासुल्कुनिटा! मिमेट पसांचकुनमट.

17 हरेक बेसता वरम आनि अन्निकन्ना बेसता इनाम पोर्रोटाले वांता, वेल्गुल्कुना पेनबाबानगटाल वांता, ओनालोप्पो बतले तेडा हिल्ले, ओर नीडातालेसी बदलांचानोर आयोर.

18 ओर पुटिस्तवुन लोप्पो मोट्टा मोदाटा पलम मनमे आयागोम इत्ता ओना सतता इच्चातुन पीसि, सत्तेम पोल्लेताल मनाकुन पुटिस्तोर.

केंजमळ आनि केंजताप ताकमळ

19 नावा पावरमगल्ला विस्वासुल्कुनिटा, मिमेट इद पोल्ले तेलिचकुंदु, हरेक मनकल केंजालय बिराना तयार मंदना, वळ्कालय ओप्के मंदना आनि बिराना होंग वायाकोटा मंदना.

20 बारित्ते मनकना होंग पेनदा नीति पोर्रो कबळ किय्यो.

21 अदुनहाटीं मीलोप्पो मत्ता कराब पोल्लेन आनि दुस्ट मनसुन तेंडसि पोहाचि, पेन मीवा मनसुने हीता बेसता पोल्लेतुन मिमेट पेद्दातनम ह्ळाकोटा पीकुंदु. बारित्ते अद मीवा आत्मान पिसागोटनाहाटीं बलमतद आंद.

22 अद पोल्ले सिराप केंजालये आयो गानि अद वेहताप ताकानोर आम्टु. अल्हा ताकाकोटे मीवद मिमेटे पसांचकुंतिर.

23-24 बारित्ते बोर अय्ते पेनदा पोल्ले केंजसि अदुना परकारम ताकोर, आ मनकल अदूदमते मोकम ह्ळसि पलाते होत्ता पजा बल्हा मत्तानो इंचि बिराने मसंगसंतोर आंदुर.

25 गानि बोर अय्ते मुक्तिता तप्पु हिल्ला नियम मत्ताप ताकंतोर आनि अदुन मरगोर, असंटोना कबळ लोप्पो पेनदा आसिर्वाद मनंता.

26 बोरन्नार्गिटा ओनद-ओर बक्तुन इनकुंतोर गानि ओना नाल्केतुन आपकुन्नोर, अय्ते ओर, ओनद-ओर पसांचकुंचेके मंतोर. ओना बक्ति एर्तमे आंदु.

27 बोर अय्ते दिक्कु हिल्वोर्कुना, मुंडामोस्तवुना तकलिप लोप्पो सहायम कींतोर, इद दुनियाता कराब कबाह्कुनाल लक्कु मनंतोर, असंटोर मना पेनबाबाना मुन्ने दोसेम हिल्वोर पवित्र आंदुर.

2

बोनद बेदबाव कियामन्नि

1 नावा विस्वासुल्कुनिटा! मीवा विस्वासम मना महिमाता सामि येसु किरिस्तुनपोर्रो मंता, अदुनहाटीं मीलोप्पो बेदबाव मनान्नि.

2 बारित्ते, वरोर मनकल बंगारमता मुद्दा, एक्को दरातव कपडिं केर्सि, इंकावरोर गरिब मनकल बौतुल कपडिं केर्सि पारतना कियाना लोते वातुर इनकुंदु,

3 अस्के मिमेट एक्को दराता कपडिं केर्सि वातोनहेके ह्ळसि, “निमे इगे बेसता जेगाते उद्दा” इंचि वेहचि, गरिब मनकन, “निमे अगा नित्ता हिलाकोटे नावा काल्कुनगा उद्दा” इंचि वेहानयते,

4 मिमेट मीवा लोप्पेन बेदबाव कीताप आया हिल्लिरा? इंका दुस्त विचारमते न्यायम कीतोर आया हिल्लिरा?

5 नावा पावरमगल्ला विस्वासुल्कुनिटा! केंजाट, ई दुनियते बोर अयते गरिब मंतुर ओर्कुन विस्वासमते दनवंतुल्क कीतन इंचि, आनि दान पावरम कीतीकुंक दाना राज्यमते वारसदार्क कीतन इंचि, मुन्नेने पोल्ले हीसि मत्ता, अद हियालय ओर्कुन पेरता.

6 गानि मिमेट आ गरिब मनकन अपमानम कीतिर. मीपोर्रो अदिकारम ताकिच्चेके, मीकुन कोरटते इग्गिसेक ओयानुर दनवंतुल्के गदा?

7 किरिस्तुना कदर हियना पोरोल मीक दोर्कता, अद पोरोलतुनगुडा अपमानम कियानुर ई दनवंतुल्क गदा?

8 मिमेटगिटा, “नीवद-निमे पावरम कीतापे पक्कातोर्कुनगुडा पावरम कीम,” इंचि दर्मसास्त्रमते वेहताप ताकानयते, मिमेट निजमे बेस कीसेक मंतिट.

9 गानि ओक्कला मिमेट बेदबाव कियानयते, मिमेट पापम कीसेक मंतिट, दर्मसास्त्रम मीकुन दोसिल्क कीता.

10 बारित्ते बोरे आयिर दर्मसास्त्रमतव अन्नि पोल्लेने पालन कीसिगुडा उंदि पोल्ले तपते, ओर अन्नि पोल्लेने दोसि आंतोर.

11 बल्हा इत्ते, “बोगमतनम कियमत” इंचि पेन वेहता, आनि अदे पेन, “इंकावरोन ह्व्कमत” इंचिगुडा वेहता. निमे व्यबिचारम किया हिल्लिन गानि इंकावरोन ह्व्कतिन, अयते निमे दर्मसास्त्रमता पालन किया हिल्लिन.

12 बोरद अयते पापमताल इळबळिचना नियम परकारम न्यायम आयाना मंता. मिमेट ओरालेसींगे वळकट, कबळ कीम्टु.

13 बारित्ते बोर अयते दया किय्योर, न्यायम कियाना रोज पेन ओनपोर्रो दया किय्यो. दया कियानोर न्यायमतुन गेल्संतोर.

विस्वासम आनि बेसता कबाह्क

14 नावा विस्वासुल्कुनिटा! बोरन्नागिटा नाक विस्वासम मंता इ-कुंचि, विस्वासम परकारम कबळ कियाकोटे, अद विस्वासम बता पायदातद असोटा विस्वासम ओन पिसागोटा परंतना?

15 बोरन्ना दादाल आयि, अक्कल आयि ओर्क केरालय कपडिं, तिनालय रोजता तिडि हिल्ले,

16 अस्के मिमेट ओर्कुन, “सांतिते होंटु, गरम कपडिं केरंट, पीरमेड तिंटु,” इंचि इनकिर. गानि ओरा मेंदुल्क अक्सरम मत्तव ओर्क हिय्यिर, अयते दाना बता पायदा?

17 अल्हेने विस्वासम मत्ताप कबळ हिलाकोटे, आ विस्वासमगुडा हातापे आंद.

18 गानि बोरन्ना, “नीकु विस्वासम मंता, नाक बेसता कबळ मंता” इंचि इत्तोर इनकुंटु. अस्के, “बेसता कबळ हिल्ला विस्वासम नाक हुप्सा, बेसता कबळताहेंदाल विस्वासम नीकु हुप्संतन” इंचि ओर इनानुर.

19 पेन उंदे मंता इंचि मिमेट विस्वासम कीतिर, बेसे आंद. गानि देय्याल्कुगुडा विस्वासम कीसि गजा-गजा वनकंतां.

20 अरे बुदिद हिल्ला मनका! कबळ हिल्ला विस्वासम एर्तम इंचि, नीकु तेळियोना?

21 मना एनकटा बाबो अब्राहाम ओना मर्रि इसाकुन मोक्कु हियालय गद्देपोर्रो इरतोर, अयते पेन ओना कबळतुन ह्ळसि, नीतिमंतुड इंचि ओन ओप्कुत्ताना हिल्लेना?

22 मिमेट ह्ळसेक मंतिट, विस्वासम ओर कीता कबाह्कनतोनि कलियसि मंता, अल्हेन विस्वासम ओना कबाह्कनाहेंदाल पूरा आता.

23 अयते, “अब्राहाम पेन पोरो विस्वासम कीतोर, अस्के पेन ओन नीतिमंतुड इत्ता,” इंचि दर्मसास्त्रमता पोल्ले पूरा आता. अल्हेने अब्राहाम पेनदा दंटातोर इंचि पोरोल दोर्किच्कुत्तोर.

24 अदुनहाटीं मनकल सिराप विस्वासम कीतेने आयो गानि बेसता कबाहकुनालगुडा पेन ओन नीतिमंतुड कीता.

25 अल्हेने रहाब इनना वेस्यागुडा कबरयालोकुर्कन दाना लोते मक्किचि ईर्सि, इंकुंदि हरदाल वापस लोहता. अद बेसता कबळ कीताहाटीं नीति मुरतळ आता.

26 बल्हा अय्ते आत्मा हिल्वा मेंदुल हांतानो, अल्हेने कबळ हिल्वा विस्वासमगुडा हातापे.

3

नाल्के तळमितसोंटद आंद

1 नावा विस्वासुल्कुनिटा! मिहागटाल वेल्लेदुर कराहनोर आयमटु, बारित्ते मनम कराहनोकुर्क वल्ले गट्टिगा न्यायम जर्गता इंचि मीक एरपाटे मंता.

2 मनम अंतोरम बच्चुंगो तप्पुक कीतोम, गानि बोर अय्ते वळ्ळकानेके उंदिगुडा तप्पु किय्योर, ओर अन्नि गुनाल्कुने पूरा मत्ता मनकल आंदुर आनि ओर ओना मेंदुलतुनगुडा पगमते दोहताप ईरा परांतोर.

3 गुर्म मना कय्दे ताकागोम इंचि दाना तोड्डिते कल्लेम दोसंतोम, अस्केने दाना पूरा मेंदुलतुन तिरहा परांतोम.

4 अल्हेने डोंगन हुळाट, अव वेल्लेन पेद्दगा मनंतां, वेल्ले वळिते ताकंतां, अय्नागानि अबुन ताकसानोर सिन्ना पतवार* हेंदाल बेके इत्ते हेके तिरहा परांतोर.

5 अल्हेने मना मेंदुलते सिन्ना नाल्के मंता, अद पेद्दा-पेद्दा पोल्लें पोंगंता. हुळाट, सिन्ना मिन्गुरते पेद्दा केडा वेसि दांता.

6 मना नाल्केगुडा तळमितालेसीं मंता. दानगा अन्नि कराब पोल्लें निंडिसि मंतां. अद मना मेंदुल्ले मंचि पूरा मेंदुलतुन बदनाम कीसि मना पिस्वरते तडमि दोसंता. अद तडमि नरकमताल वांता.

7 बारित्ते अन्नि तीरकुना केडा जिवरासीं, पिट्टें, पुळकु आनि समुद्रमते मंदना जिवरासिन मनकल ओना कय्दे कीकुन्ना परांतोर, कीकुल्लोरगुडा.

8 गानि नाल्केतुन आपमळ बोनतोने आयापर्पो. अद आग्वद, कराबतद आंद. दानगा हामुरता विसम निंडिसि मंता.

9 इदुनतोने मनम मना सामि पेनबाबाना स्तुति कीतोम, आनि इदुनतोने मनम पेन दाना रूपमते पुटिस्ता मनकालोकुर्कन सापनेम हीतोम.

10 उंदे तोळदाल आसिर्वाद, सापनेम रोंडु पेयसंतां, नावा विस्वासुल्कुनिटा, इल्हा आयामन्नि.

11 बतल, उंदे ऊटाताल उनाना एर, होव्वोर एर रोंडु पेयसंतां?

12 नावा विस्वासुल्कुनिटा, अजिर मराकु जय्तुन पंडिं हादांतंगा हिलाकोटे अंगुर वेलिक अंजिर पंडिं हादांतंगा? हादों. अल्हेने होव्वोर एता ऊटाताल, उनाना एर पेयसा पर्पो.

देय्याल्कुना तेल्वि आनि पेनदा तेल्वि

13 मीलोपो तेल्वितोर, तेल्वियतोर बोर मंतोर? ओर ओना बेसता पिस्वर हेंदाल, तेल्विते सीदा-सादा मंचि ओर कियाना कबाहकुन हुप्सना.

14 गानि मीवा मनसुने वेल्लेने कूटा-कूटा, लालचता इच्चां निंडिस मल्ले, नीवा तेल्विता बारेमते पेद्दिरकेम कीसि, सत्तेमता विरोदमते पापम कियामन्नि.

15 ई तेल्वि पोर्पोटाल रेय्सि वातद आयो, गानि दुनियातागटाल, मनकनगटाल आनि देय्यमतगटाल आंद.

16 बल्हा इत्ते, बगा अय्ते कूटा-कूटा आनि लालचता इच्चां मनंतंगो, अगा आपत्ति आनि अन्नि तीरकुना कराब कबाहक मनंतां.

* 3:4 पतवार डोंग ताकसेक मनानेके दान हेके-हीके तिराहनाहाटीं स्टेरिगतुन मेलाहते पतवार मेसलिसि डोंगा बरोबर दांता. पतवार डोंगाता हिळ् एते मनंता.

17 गानि पोरोटाल वायाना तेल्चि अद मोदाला अय्ते पवित्र मनंता, आयंका सांति हियानद, सीदा-सादा गुनमतद, इंकावरोना पोल्ले केंजालय तयारते मनानद, दया आनि बेसता कबाहक कियानद, अद बेदबाव कियवद, इमानदारते मनानद आंद.

18 सांतितुन वरोक-वरोर कल्पानोर्क, सांतिता विज्जाता हेंदाल नीतिता पंटा दोर्कता.

4

मनालोप्पो जगडाल्क आयाना कारनम

1 मीलोप्पो लडाई, जगडाल्क, आयाना कारनम बतल? मीलोप्पो मंदना कराब आसेना लडाइताहेंदाले गदा.

2 मिमेट इच्चा कीतिट गानि अद मीक दोर्को, अदुनहाटीं मिमेट इंकावरोन हक्कंतिर. गावाले इंचि इनकुंतिर गानि अद मीक दोर्को, मिमेट लडाई, जगडाल्क कीतिर. अय्ते मीक दोर्कवा कारनम बतल इत्ते, मिमेट पेनदुन तल्कसेक हिल्लिर.

3 मिमेट तल्कंतिर गानि मिमेट मीवा सुकमताहाटीं कराब आसेतेन तल्कंतिर, अदुनहाटीं मीक दोर्को.

4 विस्वासम हिल्वोरिता! दुनियातोनि दंटा कियमळ इत्ते पेनदुक पगा आयमळ इद मीक तेळियोना? अदुनहाटीं बोर अय्ते दुनियातोनि दंटा कीतोर, ओर पेनदुक पगातोर आंतोर.

5 दर्मसास्त्रमते वेहता पोल्ले एर्तेम इंचि मिमेट इनकुंचंतिरा? बद पवित्र आत्मातुन अय्ते पेन मनालोप्पो इरता, अद मना नुकसान आयगोम इंचि कोरंतना?

6 पेन अय्ते इंका एक्को कुर्पा कीता. अदुनहाटीं, “पेन पेद्दिरकेम कियानोर्कुंक विरोद कीता आनि सिन्नातनम आसि मनानोर्कुंक कुर्पा कीता,” इंचि दर्मसास्त्रमते रासि मंता.

7 अदुनहाटीं पेनदा पोल्लेपोरोर् ताकट, देय्यमकु एदुर तिरियट. अस्के अद मिहागटाल वित्तंता.

8 मिमेट पेनदुक दगोरा वट, अस्के पेन मीवा दगोरा वांता. ए पापि लोकरुटिता! मीवा पापाल्कुन नोरांटा. रोंडु मनसुकुने ताकानोरिता, मीवा मनसुन साप इरांटा.

9 पापि लोक्कुळ्कम इंचि दुक्कमते मंडु, अळट. मिमेट कव्वानद होळसिसि दुक्कमते मंडु, आनंदमते मनानद होळसिसि नाराजते मंडु.

10 सामिना मुन्ने मिमेट सिन्नातनम आसि मंडु, अस्के मीकुन पेन पोरोळ्क तेहांता.

तप्पु दोसना अदिकार मीक हिल्ले

11 विस्वासुल्कुनिटा! वरोना-वरोर अपमानम कीकुनमट, बोर अय्ते ओना दंटातोन अपमानम कीतोर, ओनपोरोर् तप्पु दोसंतोर, असोंटा मनकल दर्मसास्त्रमता अपमानम कीतोर, दानपोरोर् तप्पु दोसंतोर. अय्ते निमे गिंटा दर्मसास्त्रमपोरोर् तप्पु दोसते, निमे नियम परकारम ताकानोन आयिन गानि न्यायम कियानोनालेसी आतिन.

12 दर्मसास्त्रम हियानद आनि न्यायम कियानद पेन उंदे आंद. दानके पिसागोटना आनि नासडेम किथ्याना ताकत मंता, गानि निमे बोन आदिन पक्कातोनापोरोर् तप्पु दोस्सानोन?

मना पिस्वर पेनदा कय्दे मंता

13 केंजाट, “इय्याला हिलाकोंटे नाडि पलाना सहरते होंचि, वसामिड मंचि, दंदा कीसि कमांचकोम,” इंचि मिमेट इतिट.

14 गानि नाडि बतल आंता मीक तेळियो, मीवा पिस्वर इत्ते गळसेम दिस्सि मरां दिसाकोंटा आयाना मूळमतसोंटद आंद.

15 अदुनहाटीं मिमेट, “सामिना इच्चा मत्ते मनम जीवाते मंदकोम, इदो, अदो बदो उंदि कबळ कीकोम,” इंचि इनमळ गावाले.

16 गानि इंदके मीवा पोल्लेने मिमेट गरांते मनंतिर, इसोंटा अन्नि तीरकुना गरां बेस आयो.

17 अदुनहाटीं बोर अय्ते बेस कबळ कियाना इंचि तेळियसिगुडा ओर कियार्कोटे, ओनाहाटीं अद पापम आंद.

5

दनवंतुल्कुंक वेहमळ

1 दनवंतुल्कुनिटा, केंजाट! मीपोर्रो वायाना गंडाल्कुनाहाटीं वरगेयाटु, अळट.

2 मीवा दनम नासडेम आंता, मीवा कपडिन सेदेल पीता.

3 मीवा बंगारम, एंडि सिलुम पीता. अद सिलुम मीक अड्डम गवाइ वेहचि, तळमितालेसीं मीवा मेंदुलतुन नासडेम कीता. मिमेट ई आकिर युगमतेगुडा दनम जमा कीसेक मंतरि.

4 हुळाट! मीवा नेदे कबळ कीता बूतिनोर्कुंक मिमेट बूति हिया हिल्लिर, अद बूति मीक अड्डम वरगेयसेक मंता, बूतिनोर्कुना अळमळ स्वर्गमते मंदना बलमगल्ला सामिना केळ्कुंक केंजावाता.

5 मिमेट ई दुनियाते अन्नि तीरकुना आरामते, सुकमते पिस्तिर आनि मिमेट हायना रोजुनाहाटीं मीवा मनसुन बल्सागोटिर.

6 नीतिमंतुनपोर्रो मिमेट दोसेम दोस्सि हळ्कतिरगुडा. गानि ओर मीपोर्रो मर्लाबळा हिल्लोर.

ओप्केते ताकाना

7 अदुनहाटीं विस्वासुल्कुनिटा! सामि मर्रा वायानादाका ओप्के पीसि मंदु. बल्हा इत्ते, वरोर कास्तकरि मनकल ओना नेदा पिस्वरता पंटाहाटीं मोदाटा पिर्र आनि आकिरता पिर्र वायानादाका ओप्केते एदुर हळांतोर,

8 अल्हेने सामि मल्लिस वायना वेला दग्गेरा वासि मंता. अदुनहाटीं मिमेटगुडा मीवा मनसुन गट्टिगा कीसि, ओप्केते मंदु.

9 विस्वासुल्कुनिटा! वरोनपोर्रो वरोर चुगलीं वेहमट, अल्हा वेहतिर इत्ते मी पोरोने दोसेम दोसमळ जर्गता. हुळाट, न्यायम कियानोर गलमातगा नित्तिसि मंतोर.

10 विस्वासुल्कुनिटा! सामिना पोरोलता बारेमते वेहता पेनदा कबुरतोर तकलिप बोंगाचिगुडा ओप्केते मत्तुर, मिमेटगुडा ओरालेसीं मंदु.

11 हुळाट! बोर अय्ते ओप्के पीसि मत्तुर, ओर्कुन आसिर्वाद दोर्कतोर इंतोम. अय्यूब* ओप्के पीसि मत्ताहेंका ओन्क पेनदाहेंदाल आसिर्वादगुडा दोर्कता इंचि मिमेट केंजातिरे. इदुनहेंदाल पेन एक्को जीवा कियानद, दया कियानद आंदु, इंचि तेळियंता.

12 गानि नावा विस्वासुल्कुनिटा! अन्निंकन्ना पेद्दा पोल्ले बतल इत्ते, मिमेट स्वर्गमतद आयि, बूमितद आयि आनि बदे पोल्लेतद आयि ओट्टु तिनमट. मत्ते मंता इंट, हिलाकोटे हिल्ले इंट. इल्हा इत्ते पेन मीकु सिक्साता आदेस हिय्यो.

पारतनाता ताकत

13 मीवा लोप्पोगिंटा बोरन्ना दुक्कमते मत्ते ओर पारतना कियाना, आनंदमते मत्ते पेनदा स्तुति कीसेक पाटां पाराना.

14 मीवा लोप्पोगिंटा बोरन्ना बिमारते मनानय्ते, कलिसियाता पेद्दाल्कुन केयाना. ओर वासि सामिना पोरोलते ओनकु निय होकसि, पारतना किथ्थिर.

15 ओर विस्वासमते कीता पारतनाते बिमारतोर बेस आयानुर. सामि ओन बिमारताल तेहाचि निप्संतोर, ओर पापम किथ्थिनागानि ओना पापमतुन मापि कीतोर.

16 अदुनहाटीं मिमेट वरोना मुन्ने वरोर मीवा पापाल्कुन ओप्कुंटु, वरोनाहाटीं वरोर पारतना कीम्टु, अस्के मिमेट बेस आकिट. नीति मनकना पारतनाते वेल्लेने ताकत मनंता.

* 5:11 अय्यूब अय्यूब पोरोलता वरोर मनकना बारेमते पडाना नियमते रासि मंता. ओर पेनदा बेसता बक्तुड मत्तोर.

17 एलियालगुडां मनासोंटा गुनमता मनकल मत्तोर, ओर पिर्न वायामन्नि इंचि ऊके-ऊके पारतना कीतोर, अयते मूडुननरा वर्सनदाका बूमिपोर्री पिर्न वाया हिल्ले.

18 दाना पजा, पिर्न वायागोम इंचि मर्रा पारतना कीतोर, अस्के मब्बुनाल पिर्न वाता आनि बूमिपोर्री पंटा पेयसता.

19 नावा विस्वासुल्कुनिटा! मीवा लोप्पोटाल बोरन्ना सत्तेमता हरदाल तप्सि होनानयते, ओन इंकावरोर बोरन्ना सत्तेमता हर्दे वापस ताथाना.

20 ओनकु इद तेळियना गदा, बोरन्ना सत्तेमता हरदाल तप्सि होत्ता पापि मनकन, सत्तेमता हर्दे वापस थायते ओर ओना जीवातुन हामुरताल पिसागोटतोर आनि ओना अन्नि पापाल्कुन मुच्चि हीतोर.

1 पत्र पत्र रासता मोदाटा सिट्टि

इद सिट्टिता बारेमते गिचचो परिचयम

रासतोना पोरोल: पत्र

रासता कालम: इसवि सन 65-67

रोम राज्येमते वैरे-वैरे एरियाने पैलांचि, पराय देसेमतोरालेसी मत्ता विस्वासुल्कुनाहाटी पत्र इद सिट्टि रासतोर. ओर सामिना लोप्पो विस्वासमते गट्टिगा मत्ताहाटी लोकुल्कुनहेंदाल ओर्क वेल्ले तकलिपकु मत्तां, ओर दुक्कमते मत्तुर.

अदुनहाटी पत्र ओर्क दैरनेम हीसेक मंतोर. बोर अय्ते तकलिपकुन, दुक्कमतुन ओप्के पीसि ओर्सकुंचेके विस्वासमते गट्टिगा मनंतुर, ओरापोरों पेनदा दया बस्केळक मनंता. आनि सामि येसु किरिस्तु मल्लि वातस्के दाना पलम ओर्क दोर्कता, इंचि इद सिट्टिते रासतोर.

बगा बतल मंता

जोहार आनि परिचयम 1:1-2

पेनदा मुक्तिता बारेमते मति कीसि हियमळ 1:3-12

पवित्र पिस्वर पिस्सनाहाटी बोदा 1:13-2:10

तिप्पल्क वातास्के विस्वासुल्कुना जिम्मेदारिना बारेमते पोल्ले 2:11-4:19

गरा हिलाकोटा मनमळ आनि पेनदा सेवा कियमळ 5:1-11

आकिरता बोदां 5:12-14

पत्र विस्वासुल्कुंक जोहार कीतोर

1 नना पत्रुन, येसु किरिस्तुना प्रेरितुन आंदुन. रोम देसेमता पुंतुस, गलातिया, कप्पुदुकिया, आसिया आनि बितुनिया राज्येल्कुने पैलांचि होंचि, पराय देसेमतोर आसि मत्ता लोकुल्कुंक नना इद सिट्टि रासेके मंतन.

2 पेनबाबाल मीकुन मुन्नेन पेरसि निलाहतोर. अदुनहाटीगे, मिमेट येसु किरिस्तु वेहताप ताकगोम, ओना पोंगता नेत्तुरते मीवा पापाल्क पायसि होनगोम इंचि पवित्र आत्माताहेंदाल मीकुन पवित्र कीतोर. पेनदा कुर्पा, सांति मीक इरगा दोर्किकांटी.

बस्केळक पिस्साना आसे

3 मना सामि येसु किरिस्तुना पेनबाबाना दन्यवाद आयि! ओना वेल्ले दयाताहेंदाल मनाकुन पूना रीतुने पुटिचमळ जर्गता. अद बल्हा इत्ते, पेनबाबाल येसु सामिन हातोर लोप्पोटाल मरा तेहाचि, मनाकु उंदि पिस्वरता आसे हीतोर.

4 इंका अद बस्केने नासडेम आयवद, तप्पु हिल्लवद आनि कर्गुवसोंटा वारसान हक्क स्वर्गमते मीवाहाटी ईसि मंता.

5 आकिरि रोजकुने पेन अंटोर्कुंक हुप्सालय तयार कीसि इरता मुक्ति, मीकु दोर्कनाहाटी मीवा विस्वासम परकारम पेन मीकुन दाना बलमते कापाळसि स्वर्गमते इरसंता.

6 अदुनहाटी मिमेट इरगा कूस आम्पु. इंदके मीक गडसेमताहाटी बच्चुंगो तीरकुना परिकसां सहन किया पीता.

7 नासडेम आयाना बंगारमतुन तळमिटे करगागोटसि परिकसा कीतुर. गानि आ बंगारमकन्ना बच्चोरो विलुवाता मीवा विस्वासमतुनगुडा परिकसा एतमळ जर्गता. येसु किरिस्तु मरा वातस्के, मीकुन मेक्कुंचि पेद्दातनम आनि कदर दोर्काना कारनम आयगोम.

8 मिमेट येसुन ह्ळाकोन्ना गानि पावरम कीतिट; इंदके ओर दिसाकोन्ना ओन विस्वासम कीसि, पोल्लेने वेहा परवच्चोन आनंदमते आनि महिमाते निंडिस मंतिर.

9 इल्हा मीवा विस्वासमता पलम इंचि मिमेट मीवा आत्मांकु मुक्ति दोर्किचेके मंतिट.

10 मीक दोर्कना मत्ता कुर्पाता बारेमते बोर पेनदा कबुरतोर अय्ते बविस्यवानि कीसि मत्तोर, ओर इदे मुक्तिता बारेमते पूसकीसेके, पहकसेक मत्तुर.

11 किरिस्तु बल्हा तकलिप वासि हायनुर, दाना पजा बल्हा ओनकु स्वर्गमते कदर दोर्कार इंचि ओरा लोपो मनना किरिस्तुना आत्मा मुन्नेन वेहचि मत्ता. गानि इव पोल्लें बोना बारेमते, बस्के आयनुं इंचि पेनदा कबुरतोर पहकुंदुर.

12 इव पोल्लें ओरा पायदाताहाटीं आयों गानि मीवाहाटीं इंचि पेने ओर्क तेळियागोटिसि वेहचि हुपिस्ता. इदवेरादाका बदाय्ते बेसता कबुर वेहतुर, अद स्वर्गमताल लोहचीता पवित्र आत्माहेंदाले मीक वेहतुर. इव पोल्लेना बारेमते पेनदा दूतांगुडा बल्हा आंतानो इंचि ह्ळना इच्चाते मंतां.

पवित्र आम्टु

13 अदुनहाटीं मिमेट बेसता बुद्दितोनि, हुसारते मंटु. येसु किरिस्तु मर्रा मल्सि वातस्के मीक दोर्कना कुर्पाताहाटीं पूरा आसेते मंटु.

14 येसु किरिस्तुना बारेमते मीक तेळियवस्के मीलोप्पो मत्ता कराब अलवटकुना जोलिक होनाकॉटा, पोल्ले वेहते केंजाना पिलालकुनालेसीं मंटु.

15 गानि बद् पेन अय्ते मीकुन केयता, अद पवित्र मंता. अल्हेने मिमेटगुडा मीवा ताकमळते अन्नि तीरकुने पवित्र मंटु.

16 बारित्ते दर्मसास्त्रमते, “नना पवित्र मंतन इंचि मिमेटगुडा पवित्र आम्टु,” इल्हा पेन इंता.

17 हरेक मनकन सिन्ना-पेदू दा इनाकॉटा ओरा कबाहकुन ह्ळसि न्यायम कियाना पेनदुन मिमेटगिंटा “बाबा” इंचि पारतना कीते, दुनियाते मतच्चोरजेम परायतोरम इंचि वेंरिते ताकाटु.

18-19 मीवा तादो-बाबुरागटाल ताकसेके वाता एर्तम पिस्वरतुन, नासडेम आयाना एंडि-बंगारम इळबळिचा हिल्ले, गानि दोसेम हिल्वद, मर्का हिल्वद गोरि पोरिनसॉटा किरिस्तुना विलुवाता नेत्तुरताहेंदाल मिमेट इळबळतिर, इदु मीकु एरपाटे मंता.

20 दुनिया पुट्टका मुन्नेन किरिस्तुन पेन पेरता, गानि मीवाहाटीं इव आकिर रोजकुने ई दुनियाते वातोर.

21 ओनहेंदाल मिमेट पेनदापोरें बरोसा कीतिर. पेन ओन हातोर लोप्पोटाल मर्रा जीवाते तेहाचि, ओन्क पेदूदातनम हीता. अदुनहाटीं मीवा आसे आनि विस्वासम पेनदापोरें मंता.

22 मिमेट सत्तेमता हरिं ताकसि मीवा आत्मातुन पवित्र कीकुत्तिर. अदुनहाटीं मिमेट वरोंक-वरोर पावरम कीसेके मंतिट. अल्हेने इंदके मीलेसीं विस्वासुल्क आतोर्कुन मिमेट पूरा मनसुनाल पावरम कीम्टु.

23 इंदके मिमेट पूना पिस्वरते पुटतिर, नासडेम आयाना पेडेहेंदाल आयो, गानि बस्केन नासडेम आयवद, बस्केळक जीवाते मनना पेनदा पोल्लेताहेंदाल, पूना पिस्वरते पुटतिर.

24-25 दर्मसास्त्रम इल्हा वेहंता गदा,

“अंतोर मनकालोर जाडितालेसीं मंतुर,

ओरा अन्नि पेदूदातनाल्क पुंगाहकुनालेसीं मंतां.

जाडि वतंता, पुंगाहकु रालंतां.

गानि सामिना पोल्ले मात्रम पीळि-पीळिनदाका मनंता.” ✧

इदुने मीक बेसता कबुर इंचि वेहमळ जर्गता.

2

पेनदा लोकुल्क इत्ते जीवाते मनना बंडानसंटोर

1 पेन बच्चोर दया कियानद आंद इंचि मिमेट अय्ते एरपाट कीतिट. अदुनहाटीं अन्नि तीरकुना तप्पु कबाहक, अन्नि तीरकुना बोंकिचमळ, नडेह कियमळ, कळ्ळक पोतमळ, अन्नि तीरकुना अपमानम कियमळ इवुन होळसीम्ट.

2-3 इंदके पुटता पसिबाला बल्हा पाल उन्नालय तनलाळता, अल्हेने मिमेटगुडा बेसता पाललेसीं मनना पेनदा पोल्लेताहाटीं तनलाळट. अल्हा तनलाळते मिमेट मुक्तिहाटीं पेनदा पोल्ले परकारम बेरस्सेक दांतिट.

4 मिमेट जीवाते मंदना बंडातसोंटा किरिस्तुनगा वट, मनकालोर्क ओन हय्सा हिल्लुर गानि ओर पेनदा लोप्पो पेरकुत्तोर आनि विलुवातोर आंदुर.

5 मिमेटगुडा जीवाते मंदना बंडानलेसीं पवित्र आत्माता लोन दोहचेक मंतिट. येसु किरिस्तुनाहेंदाल पवित्र आत्माता बक्तितुन मोक्कु हीताप पेनदुक ओप्पनालायक मनालय, मिमेट पवित्र पेर्मांलोरलेसीं निलाहतुर आदिर.

6 बारित्ते दर्मसास्त्रमते पेन इल्हा इत्ता गदा:

“नना सियोनते सेंकुमूला बंडतसंटोन वरोन इरसेक मंतन,
ओन नना पेरतन, ओर वेल्ले विलुवातोर आंदुर.

ओनापोर्री बोर अय्ते विस्वासम इरंतोर, ओर बस्केने सिग्गुना पाल आयोर.”*

7 अदुनहाटीं मिमेट विस्वासम कीतिर इंचि अद बंडा मीक विलुवातद, गानि बोर अय्ते अदुन विस्वासम किय्युर, ओराहाटीं दर्मसास्त्रम इल्हा वेहता गदा:

“बद बंडातुन दोहानोर बतक ओज्जो इत्तुर,

अदे बंडा इंदके सेंकु मूलाता मोदोल बंडा आता.”*

8 इंका दर्मसास्त्रमते इल्हा मंता गदा,

“अद बंडा लोकुल्कुक दल्गंता, इंका पर्पु बंडा ओर्कुन हिळ्ळ अरहंता.*

बारित्ते, ओर पेनदा पोल्लेने ताकवाहेंके, बंडा दल्गिसि हिळ्ळ अरंतुर.

ओर हिळ्ळ अरंनहाहाटींगे इल्हा निलाहमळ जर्गता.”

9 गानि मिमेट अय्ते पेन पेरकुत्ता वंसमतोर, राजुल्कुनसोंटा पेर्मांलोर्क, पवित्र राज्यमतोर, पेनदा लोकुल्क आदिर. अदुनहाटीं मिमेट दाना अदूबूतामाता कबाहकुन वेहाना इंचि मीकुन हीकटताल अदूबूतामाता वेल्गुने तत्ता.

10 मुन्ने मिमेट पेनदा लोकुल्कगुडा मना हिल्लिर, गानि इंदके मिमेट पेनदा लोकुल्क आतिर. मुन्ने मीपोर्री पेनदा दया मनाहिल्ले, गानि इंदके मीवापोर्री पेनदा दया मंता.

11 नावा पावरमगल्लोरिटा, मिमेट वैरे देसेमतोर, वैरे नाटेनोर आसि मंतिर. अदुनहाटीं मी आत्माकु अड्डम मनानव दुनियातां अन्नि सेड्डा आसेनाल लक्कु मंटु इंचि विनंति कीसेके मंतन.

12 मिमेट अविस्वासुल्कुना नड्डुम मंतिट इंचि बेस ताकट. ओर मीकुन कराब लोकुल्क इंचि बदनाम किय्यिनागानि मीवा बेस कबाहकुन हळसि, पेन वायाना रोजुने ओर इंका पेनदा कदर कियानुर.

अदिकारम मत्तोर्कुना पोल्लें केंजना

13-14 मिमेट सामिनाहाटीं दुनियाते मनना अदिकारिल्लुकुना कय्दा हिळ्ळ मंटु. राजाल पेदूदोड इंचि ओना कय्दा हिळ्ळ मंटु. अदिकारिल्लुकुना पोल्ले केंजाट, बारित्ते बेसता कबळ कियानोर्कुंक मेच्चुनालय आनि कराब कियानोर्कुंक सिक्सा हियालय ओर्कुन लोहमळ जर्गता.

15 बारित्ते, मीवां बेसता कबाहकुन हळसि, तेल्वि तक्को लोकुल्कुना तोड्डिड बंद कियाना इंचि पेनदा इच्चा मंता.

16 मिमेट बोना कयदा हिळ्ळु हिल्लावप मना परांतित गानि “बोना कयदा हिळ्ळु हिल्लोम” इंचि मीवा मनसुंक वाताप कराब कबाहकुने ताकमट, पेनदा सेवाकुल्लुकुनलेसी ताकट.

17 अंतोरा कदर कियाना, मना दंतता विस्वासुल्लुकुन पावरम कियाना. पेनदुक वेरियसि ताकना, राजाना कदर इराना.

18 जीतागाहकुनिटा, मिमेट मीवा मालकुंक पूरा कदर हीसेक ओरा कयदा हिळ्ळु मंटु. सिराप बेसता गुनम, सादा सिंपल मत्तोरहेकेन आयो गानि कडक मनना मालकुनगा गुडा ओर वेहताप ताकट.

19 बारित्ते बोरे आयिर पेनदा लोप्पो ताकानेके तप्पु हिलाकोन्ना गानि देब्बां तिन्निना, तिप्पल्लक वायिना, ओप्के पीसि मनानय्ते अद मेचुकुनना पोल्ले आंद.

20 निमे तप्पु कीसि देब्बां तिन्निन, ओप्के पीसि मत्तिन, अय्ते अव्टे नीकु बता पायदा वाता? गानि निमे ओक्कला बेसता कबाहक कीसि देब्बां तिचि ओप्के पीसि मनानय्ते, पेनदुक नच्चानोन आदिन.

21 इदुनहाटीगे मीकुन पेन केयता आनि किरिस्तु मीवाहाटीं तकलिप अरतोर, मिमेट इंका ओना अळगुने अळगु वाटसि ओना पज्जो तकलिप अर्सि ताकना इंचि उंदि उदाहरनलेसी पेन मीकुन निलाहता.

22 ओर बतले पापम किया हिल्लोर, ओना तोळ्दाल बस्केने बोकिच्चना पोल्ले पेयसा हिल्ले.✱

23 ओन तेरहिना गानि दानकु बदुल ओर बोने तेरहा हिल्लोर. ओन बच्चोनो तकलिप कीतुर गानि दानकु बदुल ओर बोर्कुने बेदरिचा हिल्लोर, दानकु बदुल सत्तेमते न्यायम कियाना पेनदुक ओनद-ओर अप्पजेपतोर.

24 मनम पापालुकुनाहाटीं हासि होंचि सत्तेमताहाटीं पिसागोम इंचि येसु ओना मेंदुल्लुन कूस पोरो हीतोर. ओर तित्ता देब्बाना हेंदाल मना बिमार्क बेस आतां.

25 मुन्ने मिमेट हरि तप्ता गोरनलेसी तिरियसेक मत्तिर. गानि इंदके मीवा जीवातुन कापाळसि कोहानोनगा मल्लि वातिर.

3

मुत्तो-मुय्दोना ताकमळ

1-2 अल्हेने मुत्तोहकुनिटा, मिमेट मीवा मुय्दुरा कयदा हिळ्ळु वेंरते मंटु. ओक्कला ओर पेनदा पोल्लेते ताकाकोटे, पोल्लेनतोनि आयाकोन्ना मीवा पवित्र आनि सत्तेमते ताकानदुन हळसि विस्वासमते वायानुर.

3 मीवा केल्लुकुन तीराता जेडां वाटमळ, बंगारमता नगां केरमळ, एक्को दराता कपळिं पोंडमळ इसोंटा पलाताल दिस्सना सिंगारम कियमट.

4 गानि दानकु बदुल मीवा मनसुना गुनम सादा-सिंपल, नासडेम आयवा सांत आत्माते सिंगारम कीम्टु. इसोंटद पेनदा मुन्ने बच्चोनो विलुवातद आंद.

5 एनकटा कालमते पेनदापोरो आसे इराना पवित्रमाता मुर्ताहक बेसता गुनमते सिंगारिचुंदु आनि मुय्दोना पोल्लेते ताकुंदु.

6 बल्हा अय्ते अब्राहामुना मुत्तो साराल ओन मालक इंचि केयुंदु, ओर वेहताप ताकुंदु, अल्हेने मिमेटगुडा बेसता कबाहक कीसेके बदे पोल्लेक वेरियाकोटा मत्ते, दाना मियाहक आंतिर.

7 अल्हेने मुय्दुर्कुनिटा! मीवा मुत्तोहकुंकगुडा मी अचोने पेनदा कुर्पाता वारसान हक्क मंता. गानि अलुक मीलेसी ताकत हिल्ले. अदुनहाटी मिमेट मुत्तोहकुंक बेस कदर हीसि पिस्सट. अस्के मीवा पारतनाकु बतले अड्डम वायो.

येसुनाहाटीं तकलिप अराना

8 आकिरते, मिमेट उंदि मनसुने वरोंक-वरोर पावरम कियमळते, उंदि लोतोरलेसी जीवा कियमळते, इंकावरोनहाटीं जीवा नोयमळते, सादा-सिंपल मनमळते अंतोर उंदि आसि मंटु.

9 कराबता बदला कराबतोनिए एतमट; तेराहतोर इंचि तेराहमट गानि ओर्क आसिर्वाद हीम्टु. बारित्ते मीक आसिर्वाद दोर्काना इंचि पेन मीकुन केयता.

10 दर्मसास्त्रम वेहाताप,

“बोर अय्ते पिस्वरतुन मेचकुंचि, बेसता रोजकु हळंतन इंतोर,

ओर ओना नाल्केताल कराब पोल्लें,

ओना पेद्विनाल आबद्दम पोल्लें वळकमळ आपापीता.

11 ओर कराब कबाहकुन होळसिसि बेसता कबाहक कियाना,

ओर सांतितुन पहकिसि दान पीसि ताकाना.

12 बारित्ते सामिना नदर नीतिमंतुल्लकुना पोर्रो मनंता,

ओरा पारतनातुन केव हीसि केंजंतोर, गानि दुस्टुल्लकुंक सामि विरोद कीतोर.”*

13 ओक्कला मिमेट बेस कियानाहाटीगे जोसने मत्ते, मीकुन बोर हेळाहनुर?

14 ओक्कला मिमेटगिंटा नीति कबाहक कियानेंके मीक कस्टाल्क वायिना, पेन मीक आसिर्वाद हिय्यार. ओर वेराहते मिमेट वेरियमट, परेसान आयमट.

15 गानि मीवा मनसुने किरिस्तु मावा सामि इंचि ओनकु कदर हीम्टु. येसुना पोर्रोटा मीवा आसेता बारेमते बोरन्ना मीकुन पूसकीते, मिमेट सादा-सिंपल आनि मान-मर्यादाते बस्केळक वेहालय तयार मंटु.

16 गानि मिमेट किरिस्तुना लोप्पो बेस पिसमळतुन हळसि बोर अय्ते मीवा अपमानम कीतुर, असंतोर्क मीवा ताकमळतुन हळसि सिग्गु वायानाल मीवा विवेक बुद्दिदतुन बेस इर्सि ताकट.

17 ओक्कला बेसता कबाहक कीताहाटीगे तकलिप बोगांचमळ पेनदा इच्चा मत्ते, कराब कबाहक कीसि तकलिप बोगांचना दानकन्ना, इदे बेस.

18 बारित्ते अंतोरा पापाल्लकुनाहाटी किरिस्तु उंदे मल्का हातोर. मनाकुन पेनदागा ओयालय वरोर नीतिमंतुड अनीतिमंतुनाहाटी हातोर. मेंदुलताल ओन हक्कतुर गानि आत्माते ओन जीवाते तेहमळ जर्गता.

19 ओर हातोरा आत्मानगा होंचि, दोहचि वाटताप मत्ता आत्मांकु पेनदा कबुर वेहतोर.

20 एनकटा नोहाना कालमते डोंगा तयार कियानेंके लोकुल्लक वायानुर इंचि पेन ओप्के पीसि एदुर हळसेक मत्ता, गानि लोकुल्लक पेनदा पोल्ले केंजा हिल्लुर. सिराप एनमिदि लोकुल्लक पेनदुन नम्मिसि आ कम्मुळता एताल पिस्तुर.

21 आ एताल पिस्ता आनवल इत्तेने बापतिस्मा आंद. बापतिस्मा एतमळ इत्ते मेंदुलता मुर्कि होनालय आयो गानि येसु किरिस्तु हासि मर्रा जीवाते तेदताहेंदाल मनाकुन पिसागोटसि, विवेक बुद्दिदताहाटी पेनदुन विनंति कियाना करार आंद.

22 इंदके येसु किरिस्तु स्वर्गमते होंचि पेनबाबाना तिना बाजुंक उदुतोर. अगा पेनदा दूतां, अदिकाराल्क, सक्तिं ओना कय हिळु मंतां.

4

विस्वासुल्लकुना मनमळ

1 बल्हा अय्ते किरिस्तु मेंदुल्ले मत्तस्के तकलिप बोगांचतोर, मिमेटगुडा ओनसोटा मनसु इर्सि दान मीवा विस्सेलेसीं वाळकुंटु. बारित्ते, बोर अय्ते तकलिप बोगांचतोर, ओर पापमतुन होळसीतोर.

2 ओर वायाना रोजकुने मेंदुल्ला इच्चाना परकारम आयो गानि पेनदा इच्चा परकारम पिस्संतोर.

3 मोदाला मिमेट यहुदि आयवोरा इच्चाना परकारम बोगमतनम कियमळ, जोसते मनमळ, कल्लु उनमळ, पाटिं कियमळ, रिम्मा आयमळ, नियमकु विरोदमते ताकमळ, बतक ओज्जुवा बोम्मन मोळकमळ इल्हा कियिंदिर, इद वेल्लेने आता.

4 इंदके मिमेट असोटा पेद्दा बोगमतनाल्लकुने ओरतोनि कलियसेके हिल्लिर इंचि ओर इचंत्रम आसेक मंतुर. अदुनहाटी ओर मीकुन बदनाम कीसंतुर.

5 गानि हातोरा, पिस्तोरा न्यायम कियालय तयार मनना पेनदुक ओरा पिस्वरता लेक्का हियापीता.

6 मेंदुल्ले मत्तास्के न्यायम मनकालोरा इच्चातुन पीसि आयिनागानि, आत्मा मात्रम पेनदा इच्चा परकारम पिस्साना इंचि बोर अय्ते हासि मत्तुर, ओर्कगुडा बेसता कबुर वेहमळ जर्गता.

7 इंदके दुनियाते मनना अन्निटवुना आकिर रोजकु दग्गेरा एवतां. अदुनहाटी मिमेट पारतना कियानेके बेस विचारमते, तेल्विते मंटु.

8 अन्निकन्ना पेद्दा पोल्ले बतल इत्ते, वरोंक-वरोर एक्को पावरम कीम्टु, अल्हा कीते वेल्लेने पापाल्कुन मापि किया परकिर.

9 बतले गुल्गाकोटा वरोंक-वरोर हेडमितोरलेसी बेस हळकुंटु.

10 अंटोर्क वैरे-वैरे वरम दोर्कता, अदुनहाटी वरोंक-वरोर सेवा कियालय पेनदा तीरतीराता कुर्पा दोर्कता बेसता दिवांजिनलेसी अदुन वाळकुंटु.

11 बोन्क अय्ते पेनदा पोल्ले वेहाना वरम दोर्कता, ओर पेन वेहतापे वळकना. बोर अय्ते सेवा कीतोर्, ओर पेन हिय्यना बलमतेने कियाना. अन्नि पोल्लेने येसु किरिस्तुनाहेंदाल पेनदुके महिमा दोर्काना. महिमा आनि ताकत युगा-युगाल्कुनदाका पेनदादे आंद. आमीन.

12-13 नावा पावरमगल्लोरिता! मीवा परिक्षा कियानाहाटी मीवापोर्री तळमितसोटा तकलिपकु वांतां, अस्के मिमेट “बस्केने जर्गवद जर्गना मंता” इंचि, परेसान आयमटु. गानि मोमोटगुडा किरिस्तुना दुक्कमते पोत्तु आतोम इंचि कुसिते मंटु. किरिस्तु मल्लिस वासि ओना पेद्दातनमतुन हुपिस्तस्के मिमेट वेल्ले कूस आकिट.

14 मीकुन ओक्कला बोरन्ना किरिस्तुना पोरोलताहेंदाल अपमानम कीते, मिमेट आसिर्वांद दोर्कतोरे आंदिर. बारित्ते पेनदा महिमाता आत्मा मीपोर्री मंता.

15 गानि मीवा लोप्पोटोर बोरे आयिर, हक्कताहेंका, दोंगातनम कीताहेंका, तप्पुड कबळ कीताहेंका, वैरेतोरा कबळते कय वाटताहेंका दुक्कम बोगांचा मन्नि.

16 ओक्कला मीलोप्पो बोरन्ना किरिस्तुनोर आताहाटी तकलिपकु बोगांचनय्ते, ओर सिग्गु अर्नायो, गानि किरिस्तुना पोरोल दोर्कताहाटी पेनदुक महिमा हियागोम.

17 बारित्ते न्यायम कियाना वेला एवता. पेन मनातोने न्यायम सुख कीता अय्ते, बोर अय्ते पेनदा बेसता कबुरतुन केंजुर ओरा गति बतल आयार?

18 ओक्कला नीतिमंतुके मुक्ति दोर्कुळ कस्टम आयानय्ते, दुस्टुल्क आनि पापिल्कुनद बतल आयार?

19 अदुनहाटी बोर अय्ते पेनदा इच्चा मत्ताप तकलिप अरसेक मंतुरो, ओर बेसता कबाहक कीसेके, मनाकुन पुटिस्ता विस्वासमल्ला पेनदुक ओरा आत्मानु अप्पजेप्पना.

5

पेनदा मंदा

1 मीलोप्पो बोर अय्ते पेद्दाल्क मंतुर, ओरालेसीगे ननागुडा पेद्दा मनकन, किरिस्तु बोगांचता तकलिपकुना गवाइतोन, ओर मल्लिस वायानस्के ओना पेद्दातनमते कलियानोन आंदुन इंचि, नना आ पेद्दाल्कुंक वेहासेक मंतन.

2 मीवा जिम्मेदारिते मत्ता पेनदा मंदातुन पोस कीम्टु. इद कबळ बलमिते आयो गानि पेनदा इच्चा परकारम कुसिते कीम्टु, दोंगा कमाइताहाटी आयो गानि मनसुनाल कीम्टु.

3 मीकु अप्पजेपता मंदापोर्री अदिकारम ह्पसाकोटा, ओरा मुन्ने उंदि उदाहरनलेसी मंटु.

4 इल्हा मत्तिर इत्ते अंटोर्कुक्कन्ना पेद्दा कोहानोर किरिस्तु वायानुर अस्के, बस्केने कळियसि होनवसोटा पेद्दातनमता किरिटम मीकु दोर्कार.

5 अल्हेने ए लेय्युरिता! मिमेटगुडा पेद्दाल्क वेहताप ताकट, वरोंक-वरोर सेवा कियानाहाटी सिन्नागासि मुन्ने ताकट. बारित्ते,

पेन गर्रा कियानोर्कुंक अड्डम तिरियंता,

गानि सादा-सिंपल मंचि ताकानोर्कुंक कुर्पा हीता.*

6 पेन मीकुन इनकुत्ता वेला वातारिते पेद्दा कियाना इंचि मिमेट दाना बलमगल्ला कय्दा हिळ्ळ सिन्नागासि मंटु.

7 पेन मीवा रंदि कीता, अदुनहाटी मीवा अन्नि रंदि अदुनपोर्रेन होळसीम्टु.

8 मीवा पगातद पेद्दा देय्यम बोन तिनकन इंचि सिंहमतालेसी वरगेयसेके नालुं मूलां तिरियसेक मंता, अदुनहाटी हुसारते, तेल्विते मंटु.

9 मिमेट विस्वासमते गट्टिगा मंचि, दान्क विरोद कीम्टु. दुनियाते मनानोर विस्वासुल्कगुडा इल्हेने तकलिप बोगांचेके मंतुर इद मीक एरपाटे मंता.

10 अन्नि तीरकुना कुर्पा कियाना पेन मीकुन किरिस्तुना लोप्पो दाना बस्केळ्ळक मनना पेद्दातनमहाटी केयता. मिमेट कोन्नि रोजकु तकलिपकु बोगांचतंका अदे पेन मीकुन दानलायक कीता, मीकु बलम हीसि निलाहंता.

11 दानादे राज्येम युगा-युगाल्कुनदाका मन्निकांटी, आमीन.

आकिरता जोहार

12 विस्वासमगल्ला तम्मुर इंचि नना नम्मूता सिल्वानुसना कय्दे इद सिन्ना सिट्टि रासतन. इदे पेनदा निजम कुर्पा आंदु, इव्ठे मिमेट गट्टिगा निल्सि मंटु, इंचि नना मीकु इद सिट्टिते रासि तेळियागोत्सि वेहासेक मंतन.

13 मीवा लेसीगे बेबिलोनते पेन पेरता लोकुल्क मंतुर, ओर मीक जोहार वेहासेक मंतुर. नावा मर्रिनसंतोर मरकुसगुडा मीक जोहार वेहासेक मंतोर.

14 मिमेट वरोंक-वरोर कय कल्पिसि पवित्र पावरमते जोहार कीम्टु. बोअर अय्ते किरिस्तुने मंतुर मी अंतोर्क सांति दोर्कि.*

2 पत्र पत्र रासता रोंडो सिट्टि

इद सिट्टिता बारेमते गिचचो परिचयम

रासतोना पोरोलः पत्र

रासता कालमः इसवि सन 67

मोदाटा सिट्टि पत्र बोर्क अयते लोहचि मत्तोर, ओर्के मरा इद रोंडो सिट्टि रासतोर. मरा बारि रासतोर इत्ते, मुन्ने लोकुल्कुनहेंदाल विस्वासुल्कुंक तकलिपकु वायुंदुं, गानि इंदके परिस्तिति अल्हा हिल्ले, बदलांचता. अगाटा विस्वासुल्कुना लोप्पोने तप्पुड बोदा कराहनोर पुटसि सत्तेम पोल्लेक हारि हिलाकोटा आसेके मत्ता.

अदुनहाटी विस्वासुल्क तप्पुड पोल्लेने अर्काकोटा सत्तेमते, विस्वासमते गट्टिगा मंदना आनि पेनदा पोल्ले मत्ताप ताकाना इंचि पत्र इद रोंडो सिट्टि रासतोर.

बगा बतल मंता

जोहार आनि परिचयम 1:1-2

विस्वासिना दर्सनम 1:3-21

तप्पुड बोदां कराहनोर 2:1-22

किरिस्तुना आकिरता वायमळ बारेमते 3:1-18

जोहार

1 नना सिमोन पत्रुन, येसु किरिस्तुना दासुन आनि प्रेरितुन आंदुन. बोर अयते मना पेन आनि मुक्ति हियना येसु किरिस्तुना सत्तेमताहेंदाल मावालेसी विलुवाता विस्वासम दोर्किचकुत्तुर, ओर्क इद सिट्टि रासेके मंतन.

2 पेन आनि मना सामि येसुना तेल्विहेंदाल मीकु कुर्पा, सांति वेल्लेने बेस्सेके मन्निकांटी.

पेन मनाकु अन्नि हीता

3 मना पिस्वर आनि बक्तिताहाटी पेन दाना ताकतताहेंदाल मनाकु बतल गावाले अव अन्नि हीता. मनम अदुन एरपाट कीताहाटी अव मनाकु दोर्कतां. अद मनाकुन दाना महिमा आनि बेसतनमहेंदाल केयता.

4 दुनियाते मनना कराब आसेनाल पुट्टना रोता गुनमताल तपिचकुंचि, मनम पेनदा बेस गुनमता हिस्सेदार्क आयाना इंचि अद मनाकु विलुवाता पोल्ले हीता.

5 अदुनहाटी मिमेट अन्नि तीरकुना कोसिस कीम्टु गदा, विस्वासमते बेसता गुनाल्क, बेसता गुनाल्कुने तेल्वि,

6 तेल्चिते सततुन आपकुनमळ, सततुन आपकुनमळते दैरनेम, दैरनेमते बक्ति.

7 बक्तिते दादल-तम्मुना कूळमळ, दादल-तम्मुना कूळमळते पावरम कल्पट.

8 ओक्कला इव अन्नि पोल्ले मीलोप्पो मंचि बेस्सेके होनानयते, अव मीकुन मना सामि येसु किरिस्तुना तेल्विता बारेमते एक्को हुसार, बेस कबळलायक कीतां.

9 गानि बोनागा इव गुनाल्क हिल्लेंगो ओर गुड्डि आंदुर, लक्कुटा नदर हिल्वोर आंदुर. ओना पडाना पापालकुन पेन नोर्सि ओना सुदिदकरन कीतदगुडा मति मर्गतोर.

10 अदुनहाटी विस्वासुल्कुनिटा! पेन मीकुन केय्पि पेरता इत्ता पोल्लेतुन पक्का कियालय बस्केळक आतचचोन कोसिस कीम्टु, अल्हा कीते मिमेट बस्केने विस्वासमताल अर्सि होनिनर.

11 इल्हा मिमेट मना सामि, मुक्ति हियना येसु किरिस्तुना बस्केळक मंदना राज्येमते वेल्ले कदरते होळिया परांतिट.

12 अदुनहाटीगे, इव पोल्लेन मीक तेळियसि मनिना, मीकु दोर्कता सत्तेमते मिमेट गट्टिगा निल्सि मनिना, नना मीकु बस्केळक मति कीसि हीसेक मनंतन.

13 नना इद मेंदुलते मत्तचचोरजेम मीक इवुन मति कीसि हीसि मीकुन हुसार कियमळे, बेस इनकुंतन.

14 बारित्ते, मना सामि येसु किरिस्तु नाकु हुपिस्ताप, नावा मेंदुलतुन बिराने होळसंतन इंचि नाकु एरपाट मंता.

15 अदुनहाटी नना हासोत्तंकागुडा मिमेट इव पोल्लेन बस्केळक मति कियनलायक मिमेट आयगोम इंचि नना कोसिस कीसंतन.

16 बारित्ते, मना सामि येसु किरिस्तुना ताकत आनि ओना मल्सि वायाना बारेमते मोमोट मीकु वेहतस्के, तयार कीसि वेहता कतन कल्पिसि वेहा हिल्लोम. गानि मोमोट ओना पेद् दातनमता वेलगुन कळकुने हळसि वेहतोम.

17 बस्के अय्ते पेनबाबानाहेंदाल कदर आनि महिमा दोर्कता, अस्के आ स्वर्गमताल, “ईर नावा पावरमगल्ला मरिं आंदुर, ईनतोनि नना आनंदमते मंतन,” इंचि उंदि अल्किर आ महिमाता वेलगुनाल केंजावाता.

18 स्वर्गमताल वाता आ अल्किरतुन केंजतस्के, मोमोट पवित्र गुट्टापोरें येसुनतोनि मत्तोम.

19 मनाकु पेनदा कबुरतोरा पोल्लेपोरें एक्को बरोसा अनपिस्ता. अद पोल्ले हीकटते एलगना वेळसिलेसी दिसंता. अदुनहाटी पंगातारित्ते हक्केटा सुक्का मीवा मनसुने एलगनदाका आ पोल्ले परकारम ताकते मीके बेस.

20 दर्मसास्त्रमते मत्तव पेनदा कबुरतोरा पोल्ले ओरा सतता मनसुना विचारमतोनि रासतव आयों, इदुन मिमेट मुन्ने एरपाट कियमळ गावाले.

21 बारित्ते बवे बविस्यवानि मनकना इच्चाताहेंदाल वाया हिल्लें, गानि पवित्र आत्माते निंडता लोकुल्के पेनदाहेंदाल वळकुंदुर.

2

आबद्दम कराहनोर

1 अस्के बल्हा लोकुल्कुना नड्डुम आबद्दम कबुरतोर मत्तुर, अल्हेने मीवा नड्डुमगुडा आबद्दम कराहनोर मंदानुर. नासडेम कियाना नियमकुन ओर मक्किंस पीसि वांतुर आनि बोर सामि अय्ते ओर्कुन अस्तोर, ओनगुडा ओर ओफ्कुन्नुर. इल्हा ओरद-ओरे नासडेमतुन बिराना ओरापोरें तरकुंतुर.

2 वेल्ले लोकुल्क ओरा सिग्गु हिल्ला कबाह्कन हळसि ओरालेह्केन कियानुर. ओरसंतोराहाटीगे सत्तेमता हरिं बदनाम आंता.

3 आबद्दम कराहनोर, आस्तिताहाटीं तिय्यटा पोल्ले वेहिचि मीकुन ओरा पायदाहाटीं वाळकुंतुर. ओर्क हीता सिक्साता आदेस मुन्नेटाल मंता, ओरा नासडेम कूर्कसेके हिल्ले.

4 बारित्ते, बस्के अय्ते पेनदा दूतां पापम कीतां, अस्के पेन अवुनगुडा होळसा हिल्ले. न्यायमता रोजु वायानादाका अवुन नरकमते हीकटता पोक्काने वाटसि इरता.

5 अचोने आयाका पेन एनकटा कालमता दुनियातुनगुडा होळसा हिल्ले, अद कालमते बक्ति हिल्ला लोकुल्कुना दुनियापोरें पेद् दा कम्मुळतुन वायागोटता. गानि सत्तेमता पोल्ले वेहता नोहानतोनि एडुरकुन पिसागोटता.

6-7 अल्हेने सदोम, गमोरा सहरकुने लोत इनानोर वरोर नीतिमंतुड मत्तोर. ओर आ सहरता दुस्ट लोकुल्कुना दुस्ट कबाह्कनाहेंका वेल्ले दुक्कमते मनुंदुर. अदुनहाटीं पेन ओन सिक्साताल पिसागोटसि, आ सहरकुन बूळ्दि कीसि पोहता. इल्हा बोर अय्ते बक्ति हिलाका पिसंतुर ओर्कु इसोंटा सिक्सा वांता इंचि उदाहरनलेसीं हुपिस्ता.

8 आ नीतिमंतुड ओरा नड्डुम मत्ताहाटी ओर कियाना रोता कबाहक हूळसि, ओरा पोल्लें केंजसि, ओना जीवाक रोज-रोज इरगा बादा अनपिचुंदु.

9 इल्हा, बक्तिगल्लोर्कुन परिकसानाल बल्हा कापाळना आनि बक्ति हिल्लोर्कुन न्यायमता रोजुनदाका सिक्साते बल्हा वाटसि इराना इत्तद सामिक तेळियसे मंता.

10 कास कीसि, बोर अयते पापमते अल्हेन मेंदुलता आसेता अदिकारमते मंतुर, ओर इरगा गर्रा आनि जिद्दिदेते निंडसि मत्ताहेका स्वर्गमकु संबदिचि मत्तोर्कुनगुडा तेराहलय वेरियुर.

11 पेनदा दूतां अयते ओरकन्ना एक्को ताकत, बलम मत्तव आंदुं, अयना सामिना मुन्ने ओरा बारेमते तेराहनसोंटा पोल्लें वळिकसि ओरपोर्रा दोसेम दोस्सों.

12 गानि ईर ई लोक्कुलक ओर्क तेळियवा पोल्लेना बारेमते तेराहसेक मनांतुर, दोर्कापीसि हळ्कानाहाटी पुटता बुद्दिदे हिल्ला जिवरासिनसंतोर ईर आंदुर. अवुनालेसी ईरगुडा नासडेम आंतुर.

13 ओरा तप्पुड कबाहकुन पीसि ओर्कु पलम दोर्कता. पोद्दला तिनूळ-उनुळ कियमळतेन वेल्लेन कुसि मंता इनकुंतुर. ओर मीवातोनि कलियसि गाटो तिननेकैगुडा अल्हेन कीसि ओर ओरा मजां येतसेके मंनंतुर. अदुनहाटी ओर मीवा नड्डुम उंदि डाग आनि कलंक आंदुर.

14 ओरा कळ्ळक बोगमतनमते निंडिस मंतां. ओर पापम कियका मन्ना पर्र. विस्वासमते गट्टिगा हिल्लोर्कुन नळेह कीसि पापमते अरहंतुर. ओरा मनसु आस्तिक अलवट आसि मंता. ओर सापेनमते मत्तोरा मर्क आंदुर,

15 ओर सवरटा हरदाल तप्सोत्तोर आंदुर, बोअरना मर्रि बिलाम इननोना हर्रि पीतुर. बिलामुंक्कु कराब कबाहकुना कूलि पसंद मत्ता.

16 गानि ओर कीता कराब कबाहकुनाहाटी ओनकु तेळियागोट्टिसि वेहमळ जर्गता. वळ्ळा वायवा उंदि गाडदि मनकना लेंगुने आ पेनदा कबुरतोना मुर्कतनमतुन आपता.

17 ओर एर हिल्ला कुहि आनि दुमारम तेहकुंचि ओयाना मब्बु तेर्पे आंदुर. ओराहाटी बस्केळ्ळक हीकट मनना उंदि जेगा तयार कीसि मंता.

18 ओर बत्तक ओज्जुवा पोंगुळ पोल्लें वळ्ळसेके मंनंतुर, तप्पुड हर्रि ताकानोरवेटाल तपिचुंकि इंदके-इंदकेने बेसता हर्दे वातोर्कुन, ओर ओरा मेंदुलता रोता आसेना हेंदाल बोगमतनमते अरहंतुर.

19 ओर कुद्दे कराब कबाहकुना दासुलक आसि, इंकावरोन असोंटा गतिताल तेंडांतोम इंचि पोल्ले हीतुर. बारित्ते वरोर मनकन बतलयते गेल्लसंतोरो, ओर अदुना दासुड आसि मंनंतोर.

20 ओरगिटा मना सामि मुक्ति हियना येसु किरिस्तुना तेल्विता हेंदाल दुनियाता कराब कबाहकुनाल पलाते अरतंका, मर्रा अवे कराब कबाहकुने हिरकिसि अवुना लोप्पोने ताकते, ओना गति मुन्नेटा गतिकन्ना आकिरता गति वेल्ले कराब मंनता.

21 बारित्ते ओर सत्तेमता हरदुन एरपाट कीसि, ओर्क हीता पवित्र आदेसताल तप्पि होनमळकन्ना, अद हर्रि ओर्कु तेळियका मनमळे बेस मत्ता.

22 इद ओरा बारेमते, “नय अद कक्कुतदुन तिनालय मर्रा मल्लंता, बेस नोरता पद्दिदे मर्रा बुर्दातेन पोर्लीता,” इनना निजम सात्रम परकारम जर्गता.

3

येसु मर्रा वांतोर

1 पावरमगल्लोरिता! इद रोंडो सिट्टिने नना मीक रासतन. इव रोंडु सिट्टिने मीवा पवित्र मनसुन जेगर्ताते इर्राट इंचि नना मति कीसि हीतन.

2 अदुनहाटी मिमेट पवित्र पेनदा कबुरतोर मुन्नेने वेहचि मत्ता पोल्लेन अल्हेने प्रेरितुल्लकुना हेंदाल वेहतव सामि आनि मुक्ति हियानोना आदेसकुन मति इर्रागोम.

3 आकिर रोजकुने मीकुन कोरेड्डालक कियानोर वायानुर, वासि ओर ओरा कराब इच्चाना परकारम ताकानुर, इद पोल्ले मीक मुन्ने तेळियमळ गावाले.

4 इंका ओर वासि, “ओर मर्रा वांतोर इंचि हीता पोल्ले बतल आता? मावा एनकटा पेद्दाल्क अय्ते हासोत्तुर, दुनिया पुटतस्केटाल अन्नि पोल्लें बल्हा मत्तव अल्हे मंतां,” इंचि मीकुन पूसकीतुर.

5 इंका ओर, वेल्लेन वर्सा मुन्ने पेन दाना पोल्लेतोनि बूमितुन, मब्बुन एताल पुटिस्ता. पुट्टिचि एतुन वैरे कीसि निल्हाता, इद पोल्ले ओर्क तेळियसिगुडा मति मसंगतुर.

6 अद कालमता दुनिया कम्मुळते मुळगिसि एताहेंदाले नासडेम आता.

7 गानि इंदके मनना मब्बु, बूमितुन, अदे पोल्लेते तळमितोनि नासडेम कियाना रोजुनदाका कापाळसि इरसेक मंता. बक्ति हिल्वोरा न्यायम नासडेम आयाना रोजुनदाका अल्हेन मनंता.

8 गानि पावरमगल्लोरिता! सामिनगा उंदि रोजु वेय वर्सानालेसीं आनि वेय वर्सा उंदि रोजुनलेसीं मनंतां इद पोल्लेतुन मति मर्गमट्ट.

9 सामि हीता पोल्ले पूरा कियालय ओर आल्सेम कीसेक मंतोर इंचि इच्चुर इंतुर, ओर अल्हा आल्सेम कीसेक हिल्लोर. गानि बौरे मनकल नासडेम आयाकोटा, अंटोर्क ओरा मनसु मार्सकुनना मोका दोर्कना इंचि मीवा बारेमते ओर्सुकुंचेके मंतोर.

10 गानि सामि मल्सि वायाना रोजु दोंगानलेसीं वांता. अस्के मब्बु पेद्दा आवाजतोनि दिसाकोटा आंता. मब्बुने मनानव अन्नि तळमिते कर्गिस दांतां आनि बूमि, बूमिपोर्गे मत्तव अन्नि वेसि दांतां.

11 इवन्नि नासडेम आयाना मंता, अदुनहाटीं मिमेट पवित्र अल्हेन पेनदा पिस्वरते बल्हा मंदगोम, विचारम कीम्ट.

12 पेन वायाना रोजुनाहाटीं मिमेट एदुर हळसेक मंतरि, अद बिराना वायाना इंचि कोरसेके मंट. अद रोजु मब्बु तळमिते वेसि नासडेम आंता आनि अकुने मत्तव अन्नि बारे तळमि दगडाकु कर्गिस दांतां.

13 गानि पेन हीता पोल्ले परकारम मनम पूना मब्बु, पूना बूमिताहाटीं एदुर हळसेक मंतोम. अगा सत्तेमे निल्सि मनंता.

14 अदुनहाटीं पावरमगल्लोरिता, मिमेट इवुनाहाटीं एदुर हळसेक मंतिट, अय्ते पेनदा मुन्ने सांतिते, डाग हिलाकोटा, दोसेम हिलाकोटा मनालय कोसिस कीम्ट.

15 मना सामिना ओप्के पीसि मनमळ मना मुक्तिहाटींगे इंचि इनकुंट. सामि हीता बुद्धि परकारमे मना पावरमगल्ला पौलुस दादल मीक इव पोल्लें रासतोर.

16 इवुना बारेमते ओर ओना अन्नि सिट्टिने रासतोर. गानि अब्बेटाल इच्चुं पोल्लें तेळियालय वेल्लेन कस्टम मंतां. करियवोर, उंदि पोल्लेते निल्सि मनवोर, वैरे दर्मसास्त्रमते मत्ता पोल्लेन कीताप इवुनगुडा कीतुर. अल्हा कीसि ओरा नासडेमतुन ओरे तरकुंतुर.

17 अदुनहाटीं पावरमगल्लोरिता! मीक इव पोल्लें मुन्नेटाले एरपाट मंतां, नीति हिल्वा लोकुलकुना तप्पुकुने हिरकिसि, मीवा गट्टिगा निल्सि मत्ता हरदाल तप्पिसि होनाकोटा हुसारते मंट.

18 मना सामि मुक्ति हियना येसु किरिस्तुना कुर्पाते, तेल्चिते मिमेट बेस्सिके होंटु. इंदके बस्केळक ओन्के पेद्दातनम दोर्किकांटी, आमीन.

1 योहान

योहान रासता मोदाटा सिट्टि

इद सिट्टिता बारेमते गिचचो परिचयम

रासतोना पोरोल: योहान

रासता कालम: इसवि सन 85-95

येसुना वरोर प्रेरित योहान इद सिट्टि विस्वासुल्कुनाहाटी रासतोर. अदुनहाटी ओर येसुनतोनि मत्तास्केटा ओना अनुबवमतुन इद सिट्टिते रासि वेहतोर.

येसु किरिस्तु पुरागा पेन आनि पुरागा मनकलगुडा आंदुर. ओनापोरो विस्वासम इरतेने, मना पापालक मापि आसि मनाकु बस्केळक पिस्साना पिस्वर दोर्कता. पडाना रीति-रिवाज्जुकुन पीसि मनम ताका परोम, इंचि अवुनाहेंदाल मनाकु बस्केळक पिस्साना पिस्वर दोर्का परो.

बोर अय्ते किरिस्तुनपोरो विस्वासम कीतुर, ओर अंटोर वरोक-वरोर पावरम कीसेके बेस कलियसि मंदना, अर्तम हिलुवा नियमाल्कुन होळसिसि किरिस्तु हुपिस्ता हरदेन ताकाना. इसोटा पोल्ले इद सिट्टिते योहान रासतोर.

बगा बतल मंता

जोहार आनि परिचयम 1:1-4

वेलगु आनि हीकटा 1:5-2:29

पेनदा पिलाल्क आनि देय्यमता पिलाल्क 3:1-24

सत्तेम आनि आबद्दम 4:1-6

पावरमता कबळ बतल 4:7-21

गेल्लसना विस्वासम 5:1-21

पिस्वर हिय्यना पोल्ले

1 मोट्टा मोदोल्लाल बोर अय्ते मत्तोर, ओना बारेमते मोमोट मीकु वेहचंतोम. ओन मोमोट केंजतोम, ओन मावा कळ्ळकुने हळतोम, मंचिगा हळसि मावा कय्कुने ओन इट्तोम. पिस्वर हिय्यना पोल्ले ओर आंदुर.

2 आ बस्केळक पिस्साना पिस्वर हिय्यना पोल्ले मोदाला पेनबाबानतोनि मत्तोर. ओन पेन मनकाना रूपमते मारियागोटसि बूमिते लोहताहेंका मोमोट ओन हळतोम, इंचि गवाइ वेहांतोम. अल्हेने आ बस्केळक पिस्साना पिस्वरता बारेमता कबुर मीकु वेहांतोम.

3 मोमोट अय्ते पेनबाबानतोनि ओना मरि येसु किरिस्तुनतोनि कलियसि उंदासि पिस्सेक मंतोम, अदुनहाटी मोमोट बतल अय्ते हळतोम, केंजतोम, अदुना बारेमते मीकुगुडा वेहासेक मंतोम. दीनहेंदाल मिमेटगुडा मातोनि कलियसि मनम उंदासि मंदकोम.

4 मिमेट मातोनि कलियसि मावा आनंदम पुरागा आयाना इंचि मोमोट इव पोल्ले मीकु रासेक मंतोम.

पेन वेलगु आंद

5 येसुनाहेंदाल मोमोट बद कबुर अय्ते केंजतोमो, अदे कबुर मीकु वेहांतोम. अद बतल इत्ते, पेन वेलगु आंद, दानागा गिचचोगुडा हीकट हिल्ले.

6 ओक्कला मनम पेनतोनि कलियसि मंतोम इंचि वेहचि, हीकटते ताकानय्ते मनम आबद्दम वळ्ळंतोम, सत्तेमते ताकसेक हिल्लोम.

7 गानि पेन बल्हा वेलगुने मंता, अल्हा मनमगुडा वेलगुने ताकानय्ते, मनम वरोनतोनि वरोर कलियसि उंदासि मत्ताप मनंतोम. अस्के पेनदा मरि येसुना नेत्तुर, मनाकुन मना अन्नि पापाल्कुनाल पुरागा बेस साप कीता.

8 ओक्कला मनमर्गिटा, महगा बदे पापम हिल्ले इंचि वेहकुनानय्ते, मनद मनमे पसांचकुंचंतोम, मनालोप्पो सत्तेम हिल्ले.

9 गानि पेन नीति आनि विस्वासमगल्लद आंद. अदुनहाटीं ओक्कला मनम मना पापाल्कुन दाना मुन्ने ओपकुनानय्ते, अद मना पापाल्कुन मापि कीसि, मनाकुन मना अन्नि तप्पुड कबाहकुनाल बेस साप कीता.*

10 ओक्कला, “मोमोट पापम क्रिया हिल्लोम” इंचि मनम इनानय्ते, मनम पेनदुन आबद्दम हिळ्ळ अरहंतोम. दाना पोल्ले मनालोप्पो हिल्ले.

2

येसु मना दंतातोर आंदुर

1 नावा पिलाल्कुनिटा! मिमेट पापम क्रियामन्नि इंचि नना इव पोल्लें मीकु रासेक मंतन. गानि ओक्कला बोरन्ना पापम क्रियानय्ते, मनाहेंदाल पेनबाबानतोनि वळ्ळालय ओनगा वरोर सहायम क्रियानोर मंतोर, ओरे नीतिमंतुड येसु किरिस्तु आंदुर.

2 मना पापाल्क मापि आयाना इंचि ओर मनाहाटीं मोक्कु आतोर. ओर सिराप मना पापाल्क मापि आयानाहाटींगे आयो, पूरा दुनियातोर पापाल्क मापि आयानाहाटीं मोक्कु आतोर.

3 मनम ओक्कला ओना आदेसकुन पीसि ताकानय्ते, ओन मनम बेस तेल्लिचकुत्तोम इंचि मनाकु बरोबर तेळियंता.

4 बोर अय्ते, “नना पेनदुन तेल्लिचकुत्तन,” इंचि इंतोर, गानि दाना आदेसकुन पीसि ताकोर ओर पोंगुळ आंदुर. ओनगा सत्तेम हिल्ले.

5 गानि बोर अय्ते पेनदा पोल्लेतुन पीसि ताकंतोर, ओनगा पेनदा पावरम निजमे पुरागा आता. दीनहेंदाले, मनम वरोनतोनि वरोर कलियसि उंदासि मंतोम इत्तद तेळियसि दांता.

6 बोर अय्ते, “नना पेनतोनि कलियसि पिस्सेक मंतन,” इंचि वेहंतोरो, ओर कुद्दु किरिस्तु पिसतसोंटा पिस्वर पिसागोम.

पूना तरिकाते पडाना आदेस

7 नावा पावरमगल्लोरिटा! नना इंदके मीकु पूना आदेस रासेक हिल्लेन, मोदोताल मीकु तेळियसि मत्ता पडाना आदेसे आंद.

8 अयना नना उंदि पूना आदेसतुन मीकु रासेक मंतन. इद किरिस्तुना लोप्पो, मीलोप्पो सत्तेमते मंता. बारित्ते हीकट माय्सि होनालय आसंता, सत्तेमता वेलगु अय्ते मेसैकेन मंता.

9 बोर अय्ते, “नना वेलगुने मंतन,” इंचि वेहकुंचि, ओना दंता विस्वासिन हय्सोर, ओर इंकागुडा हीकटतेन मंतोर.

10 बोर अय्ते ओना दादन पावरम कींतोर, ओर वेलगुने निल्लिस मंनंतोर. ओनगा पापमते अरना लायकतद बदे पोल्ले हिल्ले.

11 गानि बोर अय्ते ओना दादन हय्सोर, ओर हीकटते मंतोर. हीकटतेन पिस्सेक मंतोर. हीकटहाटीं ओना कळ्ळु दिस्साकौंटा आताहाटीं, ओर बेके होंचंतोरो ओनद ओन्के तेळियो.

12 नावा पिलाल्कुनिटा! किरिस्तुना पोरोलतेन मीकु मीवा पापाल्कुना मापि दोर्कुता. अदुनहाटींगे नना मीकु इव पोल्लें रासेक मंतन.

13 बाबोरिटा! मोट्टा मोदोल्ताल मत्तोम मिमेट तेल्लिचकुत्तिर, इंचि नना मीकु रासेक मंतन. लेय्युरिटा! मिमेट सेड्डातनमतुन* गेल्सतिर, इंचि नना मीकु रासेक मंतन. पिलाल्कुनिटा! मिमेट पेनबाबान तेल्लिचकुत्तिर इंचि नना मीकु रासेक मंतन.

* 1:9 बजन संहिता 32:5; नीतिवचन 28:13 * 2:13 सेड्डातनमतुन देय्यमतुन.

14 बाबोरिटा! मोट्टा मोदोलताल मत्तोन मिमेट तेल्लिचकुत्तिर, इंचि नना मीकु रासेक मंतन. लेय्युरिटा! मिमेट गट्टिपळतिर. पेनदा पोल्ले मीलोप्पो निल्सि मनंता. मिमेट सेड्डातनमतुन गेल्सतिर, इंचि नना मीकु रासेक मंतन.

15 दुनियातुन आयि दुनियाते मनना वस्तुकुन आयि पावरम कियमट.† ओक्कला बोरन्नागिंटा दुनियातुन पावरम कियानय्ते, ओनगा पेनबाबाना पावरम हिल्ले.

16 बारित्ते दुनियाते मननव इत्ते, मेंदुल्ता इच्चा, कळ्ळुकुना इच्चा आनि पिस्वरता गरा इव पेनबाबानगटाल वातव आय्यो. इव ई दुनियातवे आंदुं.

17 ई दुनिया, दुनियाताल वाता इच्चां, इव रौडगुडा माय्शि होनानुं, गानि बोर अय्ते पेनदा पोल्लेपोर्री ताकंतोरो, ओर मात्रम बस्केळ्ळक पिस्सि मनानुर.

किरिस्तुना पगातोर

18 पिलाळ्कुनिटा! इद आकिरता वेला आंद, किरिस्तुना पगातोर वायानुर इंचि मिमेट केंजसि मत्तिर. अल्हेने इंदके किरिस्तुना वेल्लेटोरे पगातोर वातुर. इदुनहेंदाल, इद आकिरता वेला आंद इंचि मनाकु तेळियंता.

19 ओर लोकुळ्क मना लोपोटाले पेय्सतुर, गानि ओर मनोर्क आयुर. ओर निजमे मनोर्क आसि मत्ते मनातोनि मंचि मन्नेर. ओर बोरे मनोर्क आयुर इंचि मनाकु तेळियानाहाटी ओर अल्हा पेय्शि होत्तुर.

20 गानि मीवद अय्ते पवित्र मत्तोनहेंदाल अबिसेकम आता, अदुनहाटी मिमेट अंटोर सत्तेमतुन एरपाट कीतिर.

21 मीकु सत्तेम तेळियो इंचि नना मीकु रासा हिल्लेन. मीकु सत्तेम एरपाटे मंता, इंका सत्तेमताहेंदाल बद्दे आबद्दम पोल्ले वायो इंचिगुडा मीकु तेळियसे मंता. अदुनहाटी नना मीकु रासतन.

22 बोर अय्ते, येसुन “किरिस्तु” इंचि ओप्कुन्नोरो, ओर असल आबद्दम वळ्ळकानोर आंदुर. ओरे किरिस्तुना पगातोर आंदुर. ओर बाबन, मर्रिन ओप्कुन्नोर.

23 बोर अय्ते मर्रिन ओप्कुन्नोर, ओर बाबोनगुडा ओप्कुन्नोर. मर्रिन ओप्कुनानोर बाबोनगुडा ओप्कुंतोर.

24 मोदोलताल मिमेट बतल अय्ते केंजतिरो, अदुन मीलोप्पो बस्केळ्ळाहाटी इराट. अल्हा इरानय्ते, मिमेट मर्रि आनि बाबोनतोनि उंदासि मंदकिट.

25 किरिस्तु मनाकु बस्केळ्ळक पिस्सना पिस्वर हीतन इंचि पोल्ले हीतोर, अद इदे आंद.

26 मीकुन पसांचालय हळना लोकुळ्कुना बारेमते नना इव पोल्ले मीकु रासेक मंतन.

27 गानि बदनतोनि अय्ते मीवा अबिसेकम आता, अद मीलोप्पो निल्सि मनंता. अदुनहाटी बोर मीकु कराहना अवसरम हिल्ले. मीलोप्पो मनना अबिसेकम, मीकु अन्निटवुना बारेमते कराहंता. अद सत्तेम आंद, दाना कराहमळ आबद्दमतद आयो. अद मीकु बल्हा कराहंता, अल्हा मिमेट किरिस्तुना लोप्पो निल्सि मंट.

28 अदुनहाटी नावा पिलाळ्कुनिटा! मिमेट किरिस्तुने निल्सि मंट. अल्हा मत्ते, ओर बस्के अय्ते इद ब्रूमिटे मल्सि वायानुर अस्के, मनम वेंरि हिल्वोरम आसि ओर वातंका ओना मुन्ने सिग्गु वायाकौंटा मंदा परकोम.

29 मिमेट ओक्कला किरिस्तु नीतिमंतुड इंचि तेल्लिचकुत्तोर आयानय्ते, सत्तेमता कबळ कियाना हरेक मनकल पेनदाहेंदाले पुट्टोर इंचिगुडा मीकु तेळियंता.

† 2:15 दुनियातुन आयि दुनियाते मनना वस्तुकुन आयि पावरम कियमट दीना अर्तम बतल इत्ते, इद दुनियाताहेंदाल दोर्कना सुकम, दिस्तदुनना हळसि आसे पडमळ, दुनियाते सुकम हिय्याना वस्तुनाहाटीगे तन्नाडमळ. इसौटा पोल्लेन पावरम कियाना मनकल पेनदुन पावरम कियोर इत्ताप.

3

मनम पेनदा पिलाल्कुम आंदुम

1 हुळट! पेन मनाकुन बच्चोन वेल्ले पावरम कीता! अदुनहाटीं मनाकु पेनदा पिलाल्क इंचि पोरोल दोर्कता, आनि मनम आंदुमगुडा. गानि दुनियातोर पेनदुन एरपाट किय्युवाहेंका ओर मनाकुन तेल्लिचकुन्नुर.

2 नावा पावरमगल्लोरिता! इंदके मनम पेनदा पिलाल्कुम आंदुम. गानि वायाना कालमते मनम बल्हा बतल मनंतोम इत्तद, इंका तेळिया हिल्ले. अय्नागानि, किरिस्तु मर्रा मल्लिस वायानुर अस्के, ओर बल्हा मंतोर अल्हे ओन मनम ह्ळांतोम. अस्के मनमगुडा ओनालेसीगे मनंतोम इंचि माकु एरपाट मंता.

3 किरिस्तुनपोर्रीं इसोटा आसे इर्रांना हरेक मनकल किरिस्तु पवित्र मत्ताप कुदूदुगुडा पवित्र कीकुंतोर.

4 पापम कियाना हरेक मनकल, दर्मसास्त्रमता विरोदमते मनंतोर. दर्मसास्त्रमता विरोदमते ताकमळ इत्तेन पापम आंद.

5 गानि पापाल्कुन लक्कु कियानाहाटीगे किरिस्तु वातोर इंचि मीकु एरपाटे मंता. ओनगा बतले पापम हिल्ले.

6 बोर अय्ते किरिस्तुना बक्त्तिने निल्लिस मनंतुर, ओर पापम कीसेके मन्नुर. गानि बोर अय्ते पापम कीसेके मनांतुर, ओर किरिस्तुन ह्ळा हिल्लुर, ओन एरपाटगुडा किया हिल्लुर.

7 पिलाल्कुनिटा! मीकुन बोर पसांचकोटा जेगर्ता मंदु. बोर अय्ते सत्तेम कबाहक कीतोर, ओर किरिस्तुनलेसीं नीतिमंतुडे आंदुर.

8 पापम कीसेके मनना हरेक मनकल देय्यमता बाजुनोरे आंदुर. बारिस्ते सुस्वनाले देय्यम पापम कीसेके वासंता. गानि देय्यमता कबाहकुन नासडेम कियानाहाटीगे पेनदा मर्रि इद दुनियाते वातोर.

9 पेनदा संतानम आतोर बोर आथिर, ओरा लोप्पो पेनदा गुनम मनंता. अदुनहाटीं ओर पापम किय्युर. ओर पेनदा संतानम आताहाटीं, ओर पापम किय्ये पर्र.

10 इदुन पीसे, पेनदा पिलाल्क बोर आंदुर, देय्यमता पिलाल्क बोर आंदुर? इत्तद तेळियसि दांता. बोर अय्ते सत्तेमते ताकुर, ओरा दादन पावरम किय्युर, ओर पेनदा संतानम आयुर.

वरोक-वरोर पावरम कियाना

11 मनम वरोक-वरोर पावरम कियागोम इनना ई बोदा, मिमेट सुस्वनेन केंजतद आंद.

12 मनम काइनुनालेसीं मननायो. ओर देय्यमता बाजुनोरे आसि ओना तम्मून हक्कतोर. ओर ओना तम्मून बद कारनमते हक्कतोर? बारिस्ते, ओना तम्मूना कबाहक नीतितव मत्तां आनि ओना कबाहक बारे तप्पुनव मत्तां.

13 विस्वासुल्कुनिटा! मीकुन दुनियातोर हय्युर, अस्के मिमेट इचंत्रम आयमट.

14 मनम मना दंटाता विस्वासुल्कुन पावरम कीतोम. अदुनहाटीं मनम हामुरताल पेय्सि पिस्वरते वातोम, इंचि मनाकु एरपाट मंता. बोर अय्ते पावरम किय्योर ओर हातोनलेसीं मंतोर.

15 बोर अय्ते ओना दादन, तम्मून हय्योर, ओर मनकन हक्कानसंतोर आंदुर. मनकन हक्कानोनगा बस्केळ्क पिस्सना पिस्वर मन्नो इंचि मीके अय्ते एरपाटे मंता.

16 किरिस्तु मनाहाटीं ओना सतता जीवा हीतोर. दीनाहेंदाल, पावरम इत्ते बतल मनाकु तेळियता. अदुनहाटीं मनम मना दंटा विस्वासुल्कुनाहाटीं जीवा हियालय तयार मनगोम.

17 गानि बोनागन्ना वेल्लेन दनम-संपत्ति मंचि, ओना दादांको, तम्मूंको अवसरम मंता इत्तद तेळियसिगुडा ओना जीवा नोय्याकोटे, ओनगा पेनदा पावरम मंता इंचि बल्हा इनकोम?

18 अदुनहाटीं नावा पिलाल्कुनिटा! मनम मना पावरम सिराप तोळ्दा पोल्लेनेन आयो गानि, सत्तेमते बेसता कबाहक कीसि पावरम ह्पसाना.

19 अल्हा कीतेन, मनम सत्तेमता बाजुनोरम इंचि मनाकु एरपाट आंता. अस्के मनम वेरियाकोटा दैरनेमते पेनदा मुन्ने नित्ता परतोम.

20 मना मनसु मनापोर्रो दोसेम दोस्सिनागानि मना मनसुंकन्ना पेन बच्चोनो पेदूदेद आंद, दान्क अन्नि तेळियंता.

21 पावरमगल्ला दंतातोरिटा! मना मनसु मनापोर्रो दोसेम दोस्साकोटे, पेनदा मुन्ने मनम दैरनेमते मना परतोम.

22 इंका दाना आदेस परकारम ताकसेके, अद कूस आयाना कबाहक कीसेके मत्ते, मनम बतल तल्किना अद मनाकु हींता.

23 दाना आदेस बतल इत्ते, मनम दाना मरिं येसु किरिस्तुनपोर्रो विस्वासम इराना आनि ओना आदेस परकारम मनम वरोंक-वरोर पावरम कियाना.

24 बोर अयते पेनदा आदेस परकारम ताकंतोर, ओर पेनदा लोप्पो निल्सि मनंतोर, ओनालोप्पो पेन निल्सि मनंता. इल्हा, पेन मना पिस्वरते निल्सि मनंता इंचि, मनाकु हीता पवित्र आत्माहेंदाल, एरपाट आंता.

4

सत्तेमता आत्मा आनि आबदूदमता आत्मा

1 पावरमगल्लोरिटा! नहगा पेनदा आत्मा मंता इनना अंतोरपोर्रो विस्वासम कियमट. मोमोट पेनदा कबुरतोरम इंचेके, तप्पुड बोदां कराहनोर वेल्लेन मंदि दुनियाते वेलियसंतुर. अदुनहाटीं बरोसा कियाका मुन्ने आ वळ्कानोनगा मनना आत्मां पेनदागटाल वातावेना इंचि, परिक्सा कीसि हळुट.

2 पेनदा आत्मातुन मिमेट इल्हा एरपाट किय्याना; बद आत्मा अयते, “येसु किरिस्तु मनकना रूपमते वातोर,” इंचि ओप्कुंता, आ हरेक आत्मा पेनदाहेंदाल वातद आंद.

3 गानि बद आत्मा अयते, येसु मनकना रूपमते वातोर इंचि ओप्कुन्नो, अद आत्मा पेनदाहेंदाल वातद आयो. अद किरिस्तुना पगातोना आत्मा आंद. असोटा आत्मा वायाना मंता इंचि मिमेट मुन्नेन केंजसि मत्तिर, अद इंदके दुनियाते वासि मंता.

4 पिलाळ्कुनिटा! मिमेट पेनदा हेंदोर आंदिर. मीलोप्पो मनना आत्मा, दुनियाते मनना आत्माकन्ना बच्चोनो पेदूदेद आंद. अदुनहाटीं आ आबदूदम कबुरतोर आत्मान मिमेट गेल्सतिर.

5 आबदूदम कबुरतोर आत्मां दुनियातव आंदु, अदुनहाटीं अव दुनियाता पोल्लेंगे वळ्कंतां, दुनियातोर अवुना पोल्लें केंजंतुर.

6 गानि मनम पेनदा लोक्कुळ्क आंदुम. पेनदुन एरपाट कियानोर, मना पोल्लें केंजंतुर. गानि पेनदुन एरपाट कियवोर, ओर मना पोल्लें केंजुर. इल्हा मनम, बद सत्तेमता आत्मा आनि बद आबदूदमता आत्मा इंचि परक एरपाट किया परतोम.

पेन पावरम आंद

7 पावरमगल्लोरिटा! पावरम पेनदाहेंदाल वातद आंद. अदुनहाटीं मनम वरोंक-वरोर पावरम कियागोम. पावरम किय्यना हरेक मनकल पेनदा संतानम आंदुर. ओर पेनदुन एरपाट कीतोर.

8 पेन पावरम आंद. अदुनहाटीं बोर अयते पेनदुन पावरम किय्योर, ओर पेनदुन एरपाट किय्योर.

9 दाना मरिंनाहेंदाल मनाकु बस्केळ्क पिस्साना पिस्वर दोर्कना इंचि पेन दाना वरोर मरिन, इद दुनियाते लोहता. इल्हा पेन, मनापोर्रोटा दाना पावरमतुन मनाकु हुपिस्ता.

10 मनम पेनदुन पावरम कीतोम इंचि आयो, गानि पेने मनाकुन पावरम कीता. अदुनहाटींगे, पेन दाना मरिन मना पापाल्क मापि आयाना इंचि मोक्कु आयालय लोहता. इदे निजम पावरम आंद.

11 पावरमगल्लोरिटा! पेन मनाकुन इच्चोन पावरम कीता अयते, मनमगुडा वरोंक-वरोर पावरम कियगोम.

12 पेनदुन बोर बस्केन ह्ळा हिल्लुर. गानि मनम, वरोंक-वरोर पावरम कियानयते पेन मनालोपो मनंता आनि दाना पावरम मनालोपो पुरागा आंता.

13 इल्हा पेन मनालोपो मनंता, मनम पेनदा लोपो मनंतोम इंचि मनाकु एरपाट आंता. बारित्ते, पेन मनाकु दाना सतता आत्मातुन हीता.

14 दीन मनम ह्ळतोम आनि मनम दीना साक्सि मंतोम, मना पेन बाबल दुनियाता पापाल्क पायिचालय ओना मर्रिन लोहतोर.

15 बोरन्ना ओक्कला, येसुए पेनदा मर्रि इंचि ओप्कुनानयते, पेन ओनालोपो निल्सि मनंता, ओर पेनदा लोपो निल्सि मनंतोर.

16 पेन माकुन पावरम कीता इंचि इंदके तेल्लिचकुत्तोम. माकु दानपोर्रो विस्वासमगुडा मंता. पेन पावरम आंद. अदुनहाटी बोर अयते पावरम कीतोर, ओर पेनदा लोपो मनंतोर, पेन ओनालोपो मनंता.

17 मनालोपो पेनदा पावरम पुरागा आंता. अदुनहाटी पेन न्यायम कियाना रोजुने मनम वेरियाकोंटा मना परकोम. बारित्ते किरिस्तु मत्तापे, मनमगुडा इद दुनियाते पिस्सेक मंतोम.

18 पावरमते वेंरे मनो. पुरागा आता पावरम, वेंरेतुन पोळागोट्टंता. वेंरे सिक्साक संबंदिस्तद आंद, अदुनहाटी बोर अयते वेरियंतुरो, ओरगा इसोंटा पावरम पुरागा आयापर्रो.

19 मनम पावरम कीतोम, बारित्ते मुन्ने मनाकुन पेन पावरम कीता.

20 ओक्कला बोरन्ना, “नना पेनदुन पावरम कीतन,” इंचि वेह्चि, ओना दादन हय्साकोंटे, ओर आबद्दम मनकल आंदुर. बारित्ते ओर ह्ळना ओना दादाने ओर पावरम कियुवस्के, ह्ळवा पेनदुन ओर बल्हा पावरम किया परांतोर?

21 पेनदाहेंदाल मनाकु इदु आदेस दोर्कता.

बोर अयते पेनदुन पावरम कीतोर, ओर ओना दादानगुडा पावरम कियाना.

5

1 येसु, किरिस्तु आंदुर इंचि बोरयते विस्वास कीतोर, ओर पेनदा मर्रि आंतोर आनि बोरयते पेनतोनि पावरम कीतोर, ओर दाना मर्रिनतोनि इंका पावरम कीतोर.

2 इल्हा मनम बस्के अयते पेनदुन पावरम कीतोम आनि दाना आदेसकुना परकारम ताकंतोम अयते, अस्के एरपाट कीतोम गदा मनम पेनदा मर्कुनतोनिगुडा पावरम कीतोम.

3 पेनदा आदेसकुना परकारम ताकते, दानतोनि पावरम कीतोम इंचि एरपाट आंता. दाना आदेसकु कटिनम (वसेम आयवसोंटव) हिल्ले.

4 बारित्ते बोरयते पेनदा मर्रि आंतोर, ओर दुनियातुन गेलसंतोर आनि मना विस्वासमहेंदाले दुनियापोर्रो मनाकु गेल्लु दोर्कता.

5 येसु पेनदा मर्रि इंचि बोरयते विस्वासम कीतोर, ओर दुनियापोर्रो गेलसंतोर.

6 मनागा एर आनि नेत्तुरतोनी वातोर, ओर येसु किरिस्तु आंदुर. सिराप एतोनि आयो, एर आनि नेत्तुरतोनी. आनि ओना साक्सि हियानद आत्मा आंद. बारित्ते आत्मे सत्तेम आंद.

7 साक्सि हियनोर मुव्वुर आंदुर.

8 आत्मा, एर आनि नेत्तुर आनि ईर मुव्वुरा साक्सि उंदे आंद.

9 मनम मनकनाहेंदाल हीता साक्सितुन मानांचंतोम अयते, पेनदाहेंदाल हीता साक्सि बच्चोर पेद्दा. बद्द साक्सि अयते पेन तना मर्रिना बारेमते हीता. अदे साक्सि पेनदा साक्सि आंद.

10 बोरयते पेनदा मर्रिनपोर्रो विस्वास इरंतोर, ओर ओनालोपो पेनदा साक्सितुन इरंतोर. पेन इत्ता पोल्लेनपोर्रो बोरयते विस्वास इरंतोर, ओर पेनदुन आबद्दम कीतोर. बारित्ते पेन तना मर्रिना बारेमते हीता साक्सितुन ओर विस्वास किया हिल्लोर.

11 पेन मनाकु बस्केळ्ळ पिस्सना पिस्वर हीता, ई पिस्वर दाना मर्रिनगा मंता. इदे पेनदा गवाइ आंद.

12 बोरय्ते पेनदा मर्रिन स्विकार कीतोर, ओनाकु ई पिसवर दोर्कता गानि बोनगा अय्ते पेनदा मर्रि हिल्लोर, ओनगा ई पिसवर हिल्ले.

इंदके हामुर हिल्वा पिस्वर मनद

13 पेनदापोर्री विस्वास इर्रानोरिता! बस्केळ्ळक पिस्सना पिस्वर मिहगा मंता. दीन मिमेट्टु एरपाट कीम्टु इंचि नना मीकु इव पोल्लें रासा मंतन.

14 मना पेन पोर्री इदु विस्वास मंता. मनमगिंटा दाना मनसु मत्ताप तल्कानय्ते अद मनद केंजंता.

15 आनि मनम बतलय्ते दान तल्कंतोम अद केंजंता, इदु मनाकु एरपाट मंता. दानहाटीं मनम दान बतलय्ते तल्कंतोम, अव मनाकु दोर्कतां इदिका मनाकु एरपाट मंता.

16 ओक्कला मना दंटा विस्वासि हामुर हिल्वा पापम कियनेंके हूळानय्ते ओनाहाटीं पारतना कियागोम. पेन ओना पापमताल पायिचंता. इत्ते बोरय्ते हामुरते होनानसोंटा पापम कीतोर ओनाहाटीं आयो. इसोंटा पापमगुडा मंता दाना परिनाम हामुरे. नना मीकुन इसोंटा पापमताहाटीं पेनदुन तल्कागोम इंचेके हिल्ले.

17 अन्नि कराब कबाहक पापमे आंदु. गानि अन्नि पापालक हामुरताहेके ओयों.

18 मनाकु एरपाट, बोरय्ते पेनदा मर्रि आतोर, ओर पापम किय्योर. पेनदा मर्रि ओना कापाळांतोर. आ देय्यम ओना बतल किया पर्री.

19 मनाकु एरपाट मनम पेनदा हैंदोरम आंदुम. पूरा दुनिया आ देय्यम कय्दे मंता.

20 गानि मनाकु एरपाट मंता, पेनदा मर्रि वासि, मनम निजम पेनदुन एरपाट कियागोम इंचि मनाकु तेल्वि हीतोर. बारित्ते मनम निजम पेनदुन एरपाट कियागोम इंचि. इत्ते, मनम पेनदा मर्रि येसु किरिस्तुनलोप्पो मंतोम. पेनबाबाले निजम पेन आंदुर आनि बस्केळ्ळक पिस्सना पिस्वर ओर्रे आंदुर.

21 पिलालकुनिटा! मिमेट्टु मूर्तिनाल लक्कु मंटु.

2 योहान योहान रासता रोंडो सिट्टि

इद सिट्टिता बारेमते गिचचो परिचयम

रासतोना पोरोल: योहान

रासता कालम: इसवि सन 85-95

येसुन नम्मकुत्ता विस्वासुल्कु बद्द सत्तेमतुन पीसि ताकाना? येसु किरिस्तु मनकना रूपमते पुट्टिस वायाहिल्लोर इंचि वेहानोर वेल्लेन मंदि मंतुर. अय्ते ओरागटाल बल्हा जेगर्ता मंदगोम? मनम कीता विस्वासमता पलम पुरागा दोर्कनदाका मुन्ने बल्हा पिस्साना? तप्पुड बोदां कराहना गुस्कुन एरपाट कीसि, ओरा बोदानाल लक्कु मनना. इसोंटा पोल्लेना बारेमते योहान इद सिट्टिते रासतोर.

बगा बतल मंता

जोहार आनि परिचयम 1-3

पावरम कियमळ बारेमता पोल्ले 4-6

तप्पुड बोदां कराहनोरागटाल जेगर्ता मंद् 7-11

आकिरता बोदां 12-13

वरोंक-वरोर पावरम कियमळ बारेमता पोल्ले

1-2 नना मीवा कलिसियाते बेस पोरोल होत्ता मनकन आंदुन. पेन पेरता बाई आनि दाना पिलाल्कुंक,* इद सिट्टि रासेके मंतन. नना मीकुन पावरम कीतन. नना वरोने आयो, पेनदा सत्तेमतुन तेल्लिचकुत्तोर अंतोरे मीकुन पावरम कीतुर. बारिल्ले, मनम सत्तेमतुन तेल्लिचकुत्तोम. अदुनहाटीं अद्द सत्तेम मना पिस्वरतगा निल्लिस मंता आनि बस्केळ्ळे अद्द मनातोनि मंता.

3 पेनबाबानहेंदाल आनि पेनबाबाना मरिं येसु किरिस्तुनहेंदाल कुर्पा, दया, सांति इव सत्तेमते आनि पावरमते बस्केळ्ळक मनातोने मन्निकांटी.

4 पेनबाबाल मनाकु हीता आदेस परकारम, नीवा इच्चुर पिलाल्क, सत्तेमते ताकानदुन ह्ळसि नाकु वेल्लेन कुसि आसेके मंता.

5 अय्ते बाई! नना मीकु बतल विनंति कीसेके इत्ते, मनम वरोंक-वरोर पावरम कियाना. इद पूना आदेस इंचि नना मीकु रासेक हिल्लेन, गानि मुन्नेटाल मनगा मत्तादे आंद.

6 मिमेट सुस्वनाल बतल अय्ते केंजतिरो, अल्हेने वरोंक-वरोर पावरम कीम्टु इंचि पेन आदेस हीता. आ आदेसकुना परकारम ताकमळे पावरम कियमळ आंद.

तप्पुड बोदां कराहनोरागटाल जेगर्ता मंद्

7 येसु किरिस्तु मनकना रूपमते पुट्टिस वायाहिल्लोर इंचि वेहचि पसांचनोर वेल्लेन लोक्कुल्क इद दुनियाते पेयसतुर. इसंतोरे ह्ळा! पसांचनोर आनि किरिस्तुना पगातोर्क.

8 मोमोट कीता कबाहक, मीहेंदाल एर्तम आयाकोटा ह्ळकुंद्. कीता कबाहकुना पुरागा इनाम दोर्कानादाका जेगर्ता मंद्.

9 किरिस्तु कराहता बोदा परकारम ताकाकोटा बोर अय्ते मुन्ने-मुन्ने दांतोर, ओर पेनतोनि कलिया हिल्लोर. गानि बोर अय्ते किरिस्तु कराहता बोदा परकारम ताकंतोर, ओनतोनि पेनबाबाल, मरिं इब्बुरगुडा मनांतुर.

10 ओक्कला बोरन्ना मिहगा वासि, किरिस्तु कराहता बोदा तप्पा वेरे बोदा कराहनय्ते, ओन मी लोता लोप्पो वाया हियमट्ट, इंका ओन्क जोहारगुडा कियमट्ट.

* 1:1-2 पेन पेरता बाई आनि दाना पिलाल्कुंक दीना अर्तम पेन पेरता कलिसियातोर. योहान इद सिट्टि इदे कलिसियाक्क रासतोर.

11 बारित्ते, बोर अय्ते असंटोन हेरा हींतोर, ओर ओना तप्पुड कबाहकुने कलियसि मत्तोना लेक्काते वांतोर.

आकिरता जोहार

12 इंका वेल्लेन पोल्लें मीहाटीं रासाना इंचि नावा मनसु मंता. गानि अबुन नना साइते कायदोमपोर्रो रासोन. बारित्ते, मिहगा वासि मीकुन कलियसि, मीतोने अन्नि पोल्लें वळ्ळकाना इंचि मनसुने आसे पडसेक मंतन. अस्के मना कुसि इत्तदगुडा पुरागा आंता.

13 पेन पेरता मीवा अक्कना पिलाल्क,† मीकु जोहार वेहासेक मंतुर.

† 1:13 पेन पेरता मीवा अक्कना पिलाल्क योहान इदे कलिसियाताल इद सिट्टि रासि लोहातोर.

3 योहान योहान रासता मूडो सिट्टि

इद सिट्टिटा बारेमते गिचचो परिचयम

रासतोना पोरोल: योहान

रासता कालम: इसवि सन 85-95

अद कालमते तप्पुड बोदां कराहनोर वेल्लेन मंदि वासि कलिसियातुन पाड किय्युंदुर. गानि अव्टेटाल इच्चुर सत्तेम बोदां कराहनोरगुडा मत्तुर. अय्ते कलिसियाते पेद्दा इंचि निल्ला मनकल, कलिसियाता कळमातोर्कुन आनि पलाताल कलिसियाते वायाना हेडमितोर्कुन बल्हा हळ्ळुकुनना? इदुना बारेमते योहान रासतोर. तप्पुड बोदानोर्कुन एरपाट कीसि ओरागटाल लक्कु मनना आनि सत्तेम बोदां कराहनोर्कुंक सहायम कियाना, इल्हा अंटोर्कुनगुडा कलिसियाता पेद्दा मनकल बेस हळ्ळुकुनागोम इंचि योहान इद सिट्टिते रासतोर.

बगा बतल मंता

जोहार आनि परिचयम 1-4

गयेसुंक जोहार वेहमळ 5-8

दियुतिरपेसना बारेमते 9-10

देमेतिरयुसना बारेमते 11-12

आकिरता बोदां 13-15

योहानुनाहेंदाल गयेसुंक जोहार

1 नना योहानुन, कलिसियाते बेस पोरोल होत्ता वरोन मनकन आंदुन. नना बोन अय्ते निजमते पावरम कीतन आ गयसुंक इद सिट्टि रासेक मंतन.

2 पावरमगल्ला दंटातोना! निमे बक्तिते पेनतोनि बल्हा बेस मंचतिनो, अन्नि पोल्लेनेगुडा निमे अल्हेने मन, नीकु बदे रोगम वायाकोंटा निमे बस्केळ्ळक सुकमते मनना इंचि नना पारतना कीसेके मंतन.

3 बारित्ते, गयसु निजमे सत्तेमते ताकसंतोर इंचि इच्चुर दादालोर निहागटाल वासि, नीवा बारेमते गवाइ वेहतुर. अदुन केंजसि नाकु वेल्लेन कुसि आता.

4 नावा पिलाळ्ळक सत्तेमते ताकसेक मंतुर, इत्ता पोल्ले नाकु वेल्लेन कुसितुन हीता. दीनकु तप्पा इंका बद्दे पोल्ले केंजसि नाकु इच्चोन कुसि आयो.

5 पावरमगल्ला दंटातोना! निमे एरपाट कियवोर निहगा वायिनागानि, वाता दादालोराहाटीं निमे बतल अय्ते कीतिनो, अद निमे वेल्ले विस्वासमतोनि कीतिन.

6 ओर दादालोर नीवा पावरमता बारेमता गवाइ कलिसियाते वेहतुर. पेनदा लोकुल्लुकुन बल्हा अय्ते साल्ता कीतुरो अल्हा, निमे ओरा सेवा कीसि साल्ता कियानय्ते, नीवाहाटीं इंका बेस मंता.

7 बारित्ते ओर किरिस्तुना सेवाहाटीं पेय्स्तुर आंद. विस्वासम कियवोराहेंदाल ओर बतले सहायम येतुर.

8 असोंटा मनकालोर्कुंक मनम सहायम कीसि ओर्कुन बेस हळना. अस्के मनमगुडा सत्तेमताहाटीं कबळ कियानोरा लेक्काते वांतोम.

दियुतिरपेस आनि देमेतिरयुस

9 नना कलिसियातोर्क उंदि सिट्टि रासि लोहतन. गानि कलिसियाते पेद्दा आयालय हळना दियुतिरपेस इनानोर नना वेहानदुन ओप्कुंचेक हिल्लोर.

10 अचोने आयका, कलिसियाते पूने वायाना विस्वासुल्कुन ओर अयते बेस हळोर आनि हळकुंतोम इनानोर्कुनगुडा बेस हळा हिय्योर. इंका बोर अयते बेस हळकुंतुरो ओर्कुन कलिसियाताल पलाते पेच्हांतोर. मावा बारेमते कराब-कराब पोल्लें वळकंतोर, अदुनहाटी नना बस्के अयते वांतन, अस्के ओना बारेमते कलिसियाते अंटोर्क वेहांतन.

11 पावरमगल्ला दंटातोना! निमे ओनालेसी कराबता जोलिक होन्मा, सिराप बेस बतल अदे कीसेके मन. बेसता कबाहक कियानोर पेनदा मनकल आंदुर, सेड्डा कबाहक कियानोर पेनदा मनकल आयोर.

12 देमेतिरियुसना बारेमते अंटोरगुडा बेसतोर इंचि गवाइ वेहांतुर. पेनदा सत्तेमते ताकतोर इंचि सत्तेमता नदरतेगुडा ओर बेस मनकल आंदुर. ओर बेसतोर इंचि ननागुडा गवाइ हीतन, नावा गवाइ सत्तेम इंचि मीकु अयते एरपाटे मंता.

आकिरता जोहार

13 नीकु वेहालय नहगा इंका वेल्लेन पोल्लें मंतां, गानि साइतोनि ई कायदोमते रासमळ नाकु इस्टम हिल्ले.

14 बिरानेन नीकु कलियना इंचि नना आसे पडसेक मंतन. कलियतस्के, मनम मोकोम मुन्नेन वळक्कुनकोम.

15 पेन बाबल हिय्यना सांति बस्केळक नीतोनि मन्निकांटी. इग्गटा नीवा दंटागाहक नीकु जोहार वेहासेक मंतुर. अगा मनना अंटोर दंटागाहकुंक पोरोल येत्सि नावा जोहार वेहा.

यहूदल यहूदल रासता सिट्टि

इद सिट्टिेता बारेमते गिचचो परिचयम

रासतोना पोरोल: यहूदा

रासता कालम: इसवि सन 70-80

इद पुस्तकमतुन याकोबना तम्मुर यहूदल रासतोर. येसु किरिस्तुना तम्मूहकुनाल ईर वरोर तम्मुर आंदुर.

उंदि मल्का पेनदुन विस्वासम कीता पजा पापम किथ्यिना बतल आयो इंचि अगाटा आबद्दम कराहना गुरूक विस्वासुलकुंक करहुंदुर. अदुनहाटी यहूदल विस्वासमतुन कापाळनाहाटी आबद्दम कराहनोरा विरोदमते इद सिट्टिे रासतोर.

बगा बतल मंता

जोहार आनि परिचयम 1-2

तप्पुड बोदां कराहनोरा नासडेम बारेमते कोन्नि पोल्लें 3-16

विस्वासमते गट्टिेगा मनालय केयमळ 17-23

आसिर्वाद आनि दन्यवाद 24-25

जोहर

1 नना यहूदन, येसु किरिस्तुना सेवकुन आनि याकोबुना तम्मून आंदुन. पेनबाबाल मीकुन केय्ति पावरम कीतोर आनि येसु किरिस्तुना कय्दे कापाळसेक मंतोर, मी अंतोर्क नना जोहर कीतन.

2 मीक दया, सांति, पावरम वेल्लेन दोर्किकांटी.

सत्तेमतुन कापाळमळ

3 पावरमगल्लोरिटा! मनाक अंतोर्क दोर्कता मुक्तिता बारेमते मीकु रासाना इंचि इनकुंचेके मत्तन, गानि इंदके विस्वासमता बारेमते रासि दाना सत्तेमतुन कापाळनाहाटी मीक तेळियागोटसि वेहाना इंचि नाक अक्सरम अनपिस्ता. ई सत्तेमतुन पवित्र लोकुलकुंक बस्केळताहाटी उंदे मल्का हियमळ जर्गता.

4 बारित्ते चुपचाप इच्चुर लोकुलक मीलोप्पो होळियतुर, ओर पेनदा बक्तुलक आयुर. ओर पेनदा कुर्पातुन बिगडांचि पापमता कबाहक कियानाहाटी मना वरोरे मालक सामि येसु किरिस्तुन ओष्कुन्नु. असंतोर्क सिक्सा आंता इंचि मोदाटाले दर्मसास्त्रमते रासि मंता.

5 मीक इवन्नि पोल्लें मोदाटाले एरपाट मंतां, अय्नागानि इव पोल्लें मीक मति कीसि हीतन इंचि इनकुंचेके मंतन. पेन दाना लोकुलकुन इजिप्त देसेमताल पेचाहता पजा बोअर अय्ते दान विस्वासम किया हिल्लुर, ओर्कुन नासडेम कीता.

6 अचोने आयाका, बवय्ते पेनदा दूतां अवुना अदिकारमता जेगान ईर्हि हिल्लें, अल्हेन अव जेगान होळसीतां, पेन अवुनगुडा न्यायम कियाना रोजुनहाटी हीकटते बस्केन नेम्मुवा गोल्लसुकुने दोहचि इर्ता.

7 अल्हेने सदोम, गमोरा सहरतोर, अल्हेन पकापीसि मत्ता सहरकुनोर व्यबिचारम कीतुर आनि परायतोर पज्जो अर्सि मत्तुर. इद उंदि उदाहरनलेसीं, ओर बस्केळक पोत्तना तळमिंते सिक्सा बोगांचेक मंतुर.

8 अल्हेने कलां* हळना लोकुलकगुडा मेंदुल्लतुन पापमते अरहंतुर, पेनदा अदिकारमतुन हय्सुर आनि स्वर्गामकु संबंदिचि मत्तोर्कुना अपमानम कीतुर.

* 1:8 कलां मनसुने इनकुनमळ गुडा कलांगे आंदं.

9 गानि पेनदा पेद्दा दूता मिकायेलगुडा बस्के अयते मूसाना पीनगुना बारेमते देय्यमतोनि लोल्लि कीता, अस्के अदुन बतले अपमानम आयानसोंटा पोल्लें इना हिल्ले गानि, “पेने नीकुन तेरहिकांटी” इंचि सिराप इच्चोने इत्ता.

10 ई लोकुल्लुकुं बव पोल्लें अयते तेळियों अवन हय्सुर, गानि बुद्दि हिल्ला जिवरासिनलेसीं बव पोल्लें अयते ओर्क तेळियंतां अवनहेंदाले ओर नासडेम आंतुर.

11 अय्यो, बच्चोर गोसा आयार! बारित्ते ओर काइन ताकता हर्दे ताकतुर, पाय्दाताहाटीं बिलाम इनानोर कीता तप्पु कीतुर आनि कोरह बल्हा विरोद कीसि नासडेम आतोर, अल्हे ईरगुडा नासडेम आंतुर.

12 ईर, मिमेट कलियसि-मेलियसि तिदना बोजनाल्लुकुन हेळाहनोर आंदुर, इंका मीवातोनि उद्दिदस सिग्गु हिलाकोंटा तिचि पीर निहकुंतुर. ओर वळितोनि वित्ताना मब्बुनसंतोर आंदुर. आकि रालाना कालमते कायां हिलाका रोंडु मल्लां हासि पीकिसि पोहता मराकुनसंतोर आंदुर.

13 ओर, समुद्रमता तडाने एतपोरों तेलाना कराब पोंगुरतालेसीं सिग्गु हिल्ला कबाहक कियानोर आंदुर. ओर हारिं तप्पि तिरियना सुक्कानसंतोर आंदुर. ओराहाटीं बस्केन मारवा हिरि-हीकट तयार कीसि मंता.

14-15 आदामनगटाल एडुंगो पीळितोर हानोक इनानोर ईरा बारेमते इल्हा बविस्यवानि कीतोर, “हळा, सामि वेय्कुना पवित्र लोकुल्लुकुनतोनि अंतोरा न्यायम कियालय वांतोर. ओर अंतोर बक्ति हिल्ला लोकुल्लुकु ओर कीता अन्नि तप्पुड कबाहकुनाहाटीं अल्हेन बक्ति हिल्ला पापि लोकुल्लुकु सामिक विरोदमते वळकतव अन्नि पोल्लेनाहाटीं ओर्क सिक्सा हियमळ जर्गता,” इंचि वेहतोर.

16 इसोंटा लोकुल्लुकु गुल्गसेक मनानोर, नसीब बरोबर हिल्ले इनानोर, ओरा इच्चां मत्ताप ताकानोर, पेद्दिदकेम पोल्लें वळकानोर, सतता पाय्दाताहाटीं तिथ्यटा पोल्लें वळकानोर आंदुर.

विस्वासमते गट्टिगना मनालय केयमळ

17-18 पावरमगल्लोरिता! मना सामि येसु किरिस्तुना प्रेरितुल्लुकु मीवातोनि मुन्नेने, “आकिर वेलाते बक्ति हिल्ला इच्चां मत्ताप ताकानोर, मीकुन सिडांचंतुर,” इंचि वेहतुर, इव पोल्लेन मिमेट मति कीम्ट.

19 ई लोकुल्लुकु मीलोप्पो वरोनद-वरोक अर्काकोंटा कीतुर, ईरा मनसुंक वाताप ताकंतुर, ईरा लोप्पो पेनदा आत्मा हिल्ले.

20 गानि पावरमगल्लोरिता! पवित्र आत्माते पारतना कीसेके वेल्ले पवित्र विस्वासमते मीवद मिमेट बेर्सेक होंटु.

21 बस्केळक मनना पिस्वरताहाटीं मना सामि येसु किरिस्तुना दयाता आसेते एदुर हळसेक पेनदा पावरमते निल्लि मंटु.

22 बोर अयते विस्वासमतुन अनमानम कीतुर, ओरापोरों दया कीम्ट.

23 तळमिताल इग्गिस पिस्सागोटताप इच्चुकुन पिस्सागोटट आनि वेल्लेटोरा पोर्रीं वेरेंतोनि मिमेट दया कीम्ट. गानि मेंदुल्ले कियाना पापाल्लुकुन मिमेट हय्समट.

24 पेन मीकुन तप्पुळ बोदानाल हिळु अर्काकोंटा कापाळसि, दाना महिमाता मुन्ने आनंदमते आनि दोसेम हिलाकोंटा निल्ला परांता,

25 अद उंदे पेनदुक, मनाकु मुक्ति हियानोर सामि येसु किरिस्तुनाहेंदाल, महिमा, पेद्दातनम, ताकत, अदिकारम मुन्नेटा कालमते मत्ताप इद कालमते आनि युगा-युगाल्लुकुनदाका मन्निकांटी, आमीन.

पेन हपिस्ता पोल्लें योहानुंक पेन हपिस्ता पोल्लें

इद पुस्तकमता बारेमते गिचचो परिचयम

रासतोना पोरोल: योहान

रासता कालम: इसवि सन 96

इद पुस्तकम येसु सामिना वरोर सिस्स्युड योहान रासतोर. येसुन नम्मुताहाटीं ओन पतमोस दीबिटे मनना जेलने वाटतुर. ओर जेलने मननेकेन, वायाना कालमते जर्गाना पोल्लें येसु सामि ओन्कु हपिस्तोर. अवे पोल्लेन योहान ई पुस्तकमते रासतोर.

अद कालमते लोकुल्क येसुनपोरीं विस्वासम कीताहाटीं, रोम सरकार वेल्ले तकलिप हियुंदु, गानि कस्टाल्क, तिप्पल्क अय्ते वायनुंगे, अयना बोर अय्ते आकिरदाका विस्वासमते गट्टिगा निल्सि मनांतोर, ओन्के पिस्वरता इनाम दोर्कता, इल्हा वेहचि येसु सामि आ तकलिपते मत्ता विस्वासुल्कुना विस्वासमतुन गट्टिगा कीतोर. येसु सामि मर्रा मल्सि वायानादाका बोर अय्ते विस्वासमते गट्टिगा मनंतुर, ओर्क पूना बूमि, पूना मब्बु, पूना येस्सलेम दोर्कता इंचि येसु सामिनाहेंदाल योहान ई पुस्तकम रासतोर.

बगा बतल मंता

जोहार आनि परिचयम 1:1-8

एडुं कलिसियानोर्क रासता सिट्टिं आनि अवुना मुक्य उद्देसम 1:9-3:22

एडुं सिक्कां तंचि मत्ता पुस्तकम 4:1-8:5

एडुं तूताकोम्कु 8:6-11:19

मासुल तरास आनि रौंडु जिबरासिं 12:1-13:18

तीराता दर्सनाल्क 14:1-15:8

पेनदा होंगुना एडुं वाटिं 16:1-21

बेबिलोनता नासडेम आनि देय्यमता ओडुमळ 17:1-20:10

आकिरता न्यायम 20:11-15

पूना स्वर्गम, पूना बूमि, पूना येस्सलेम 21:1-22:5

आकिरता बोदा 22:6-21

योहानुंक पेन हपिस्ता पोल्लें

1 इव पोल्लें, वायाना कालमते बिरानेन जर्गानव आंदुं, इवुन येसु किरिस्तु ओना सेवाकुल्कुंक वेहना इंचि पेन ओन्क अप्पजेपता. अस्के येसु ओना उंदि दूतातुन योहान इनना वरोन सेवाकुनगा लोहचि, ओन्क रासालय वेहतोर.

2 अस्के ओर पेनदा पोल्लेता बारेमते, येसु किरिस्तुना गवाइता बारेमते आनि ओर हळता अन्नि पोल्लेना बारेमते गवाइ वेहतोर.

3 पेनदाहेंदाल वाता ई वायाना कालमते जर्गाना पोल्लेन बोर अय्ते हदवंतुर, केंजांतुर आनि अष्टे रासि मत्ता परकारम ताकंतुर ओर आसिर्वाद दोर्कतोर आंदुर. बारित्ते इव पोल्लें जर्गाना वेला दग्गेर्क एवता.

योहान येसुना पोल्लेन एडुं कलिसियानोर्क वेहांतोर

4-5 आसिया राज्येमते मनना एडुं कलिसियानोर्क नना योहानुन बतल रासेक इत्ते, इंदके मनानद, मोदोलताल मत्तद आनि मुन्ने वायाना मंता आ पेनदाहेंदाल, दाना राजगद्देता मुन्ने मनना आ एडुं आत्मानाहेंदाल इंका विस्वासमलायक गवाइ मत्ता येसु किरिस्तुनाहेंदाल मीकु कुर्पा, सांति दोर्किकांटी.

येसु हातोरार्वेटाल जीवाते तेदता मोदाटा मनकल आंदुर. ओर ई बूमिपोर्रीटा राजालोरा राजाल आंदुर. मना अंटोर्कुन पावरम कियानोर आंदुर, इंका ओना नेत्तुरतुन पोगागोटसि मनाकुन मना पापालकुनाल पायसतोर.

6 मना पेनबाबाना पेद्दातनम, अदिकारम बस्केळक मननाहाटी ओर मनाकुन पेनदा राज्येतोर आनि पेर्मालोर्क कीतोर. आमीन!

7 ह्ळ्ळट, येसु किरिस्तु मब्बु तेर्पेनतोन वासेक मंतोर. अंतोर ओन ह्ळ्ळनुर. ओरवटे ओन कोहकतोरगुडा मंदानुर. दुनियातोर अन्नि वंसालकुना लोकुलक सातितुन तंचेके दुक्कम कियानुर. हो इल्हे आयार आमीन!

8 “ननाने अल्पा आनि ओमेगा* आंदुन. ननाने मोदाटोन, इंदके मनानोन, मर्रा वायानोन आनि अन्निटकन्ना सक्तिमंतुनगुडा ननाने आंदुन” इंचि पेन इंता.

किरिस्तुना दर्सनम

9 नना योहानुन मीवा दादान आंदुन. येसु बोगांसता तिप्पलकुने, राज्येतोर आनि ओपके पियमळते मीवातोन दंटाते मंतन. नना पेनदा पोल्ले आनि येसुना बारेमते गवाइ वेहताहाटी पतमोस इनना दीबेतगा बंद कीसि मंतन.

10 सामिना रोजुननाड, इत्ते अयतारम, नना पवित्र आत्माते निडिस मत्तन. नावा पज्जो तूताकोमता आवाजनसोटा पेद्दा आवाज केंजावाता.

11 “निमे बतल अयते ह्ळ्ळतिन अदुन पुस्तकमते रासि, इपीसि, स्मरना, पेर्गमम, तुयतीरा, सरदिस, पिलाडेलपिया आनि लोदिकिया इव एडुं कलिसियानोर्क लोहचीम” इंचि इत्ता.

12 अस्के, नातोनि बोर वळ्ळसेक मंतोर इंचि ह्ळ्ळलय पज्जो तिरियसि ह्ळ्ळतन अयते, नाक बंगारमता एडुं दीसोडिं दिसतां.

13 अव एडुं दीसोडिन नड्डुम वरोर मनकना रूपमते पुटतोर मत्तोर. ओर पोडगु कपडि केरसि मत्तोर ओना सातिक बंगारमता पट्टा दोहचि मत्ता.

14 ओना तल्ला, ओना केलक तेल्ला गोर्रीता बूरालेसी, बर्पुनलेसी तेल्लगा दिस्सेक मत्ता. ओना कळ्ळक तळमिता वेल्लुनलेसी मत्तां.

15 ओना काल्क कोल्मिते वाटसि एर्गा आता इत्तोळलेसी मेर्सेक मत्तां. ओना लेंग समुद्रमता वेल्लेने एता तळालेसी मत्ता.

16 ओर ओना तिना कयदे एडुं सुक्कान पीसि मत्तोर. ओना तोळ्ळाल रौडु बाजुकुंक आयदार्क मत्ता कसेरलेसी पेय्सेक मत्ता. पिय्यल आतस्के पोळ्ळु बल्हा मेर्सेता अल्हा ओना तोड्डि मेर्सेक मत्ता.

17 बस्के अयते ओन नना ह्ळ्ळतन, अस्के नना हाताप आसि ओना काल्कुनगा अरतन. अस्के ओर ओना तिना कयदुन नापोर्री इरसि, “निमे वेरियमा सुख आनि आकिर ननाने आंदुन, नना पिस्सि मंतन.

18 नना अयते हासि मत्तन गानि ह्ळ्ळा, इंदके नना बस्केळताहाटी पिस्सि मंतन. हामुर आनि नरकमता चाबि नहागेन मंता.

19 निमे इदवेरादाका ह्ळ्ळता पोल्ले, बव अयते जर्गसेक मंतांगो आनि मुन्ने जर्गानव अन्नि पोल्ले रासि इर्वा.

20 निमे नावा तिना कयदे ह्ळ्ळता एडुं सुक्कां आनि बंगारमता एडुं दीसोडिना मर्ममता अर्तम इल्हा मंता; एडुं दीसोडिं इत्ते एडुं कलिसियां आंदु आनि एडुं सुक्कां इत्ते, उंदि-उंदि कलिसियाता उंदि-उंदि दूता आंदु” इंचि इत्ता.

2

इपीसि कलिसियातार्क पेनदा पोल्ले

* 1:8 अल्पा आनि ओमेगा ग्रीक बासाते अल्पा सुखना अक्सरम आनि ओमेगा आकिरता अक्सरम आंदु.

1 इपीसि सहरता कलिसियाता दूताक इल्हा रासा. बोर अयते ओना तिना कय्दे एडुं सुक्कां पीसि मनांतोर, आनि बंगारमता एडुं दीसोडिन नड्डुम तिरियंतोर इव ओना पोल्लें आंदु.

2 निमे क्रियाना कबाहक, नीवा मेहनत आनि ओप्के नाक एरपाटे. अल्हेने निमे सेड्डा लोकुल्लुकुन हय्सिन आनि बोर अयते “नना प्रेरित” इंचि इनकुंतुर गानि ओरा परिकसा एततस्के ओर नीकु आबद्दम वळ्ळकतद दिसतुर.

3 निमे ओप्के पीसि मनांतिन. नावा पोरोलहाटीं तकलिप अरसेक मंतिन गानि तकांचा हिल्लिन इंचि नाक एरपाटे.

4 गानि नीवा विरोदमते नाकु उंदि पोल्ले मंता. अद बतल इत्ते, निमे मुन्ने नाकुन बल्हा पावरम कियिदिनो अल्हा इंदके कीसेक हिल्लिन.

5 निमे बद परिस्तितिते अयते अरतिनो अदुन मति कीम. मनसु मार्सकुंचि मुन्ने कीता कबाहकुन मर्रा कीम. निमे गिंटा मनसु मार्सकुनाकुंटे नना वासि नी वेडसितुन अद जागाताल तेंडसि पोहांतन.

6 अयना नी लोप्पो इद उंदि बेसता पोल्ले मंता अद बतल इत्ते, निमे निकोलिया लोकुल्लुकुना कबाहकुन हय्सिन, अवुन ननागुडा हय्सोन.

7 पवित्र आत्मा कलिसियातोरक बतल वेहांता अदुन, केव्क मत्तोर बेस केंजिर. बोर अयते गेल्लांतोर नना ओन्क स्वर्गमते पेनदागा मनना पिस्वरता मराता पंडि तिनालय हीतन.

स्मुरनाता कलिसियातोरक पेनदा पोल्लें

8 स्मुरना सहरता कलिसियाता दूताक इल्हा रासा. बोर अयते मोदोल आनि आकिर आंदुर, बोर अयते हासि मर्रा जीवाते तेदतोर ओर बतल इंतोर इत्ते,

9 “नीवा तिप्पल्क आनि गरिबतनम नाकु एरपाटे. (गानि निमे सिरमंतुने आंदिन) बोर अयते नीवा अपमानम कीतुर, मोमोट यहुदिल्क आंदुम इंचि इंतुर, गानि असल ओर आयुर. ओर देय्यमता दर्मसास्त्रम कराहना लोतुर आंदुर.

10 बव तिप्पल्क अयते नीकु वायानव मंतां अवुना बारेमते निमे वेरियमा. हुळाट! देय्यम मी अव्टेटाल इच्चुर लोकुल्लुकुन जेलने वाटंता, मीवा विस्वासमता परिकसा एतालय अल्हा जर्गार. मीकु पदि रोजकु तिप्पल्क अर्रापीता. हायाना वेला वायिनागानि मिमेट विस्वासमते गट्टेटगा मंट. अस्के मीकु पिस्वरता किरिटम हीतन” इंचि इत्ता.

11 पवित्र आत्मा कलिसियातोरक बतल वेहांता अदुन, केव्क मत्तोर बेस केंजिर. बोर अयते गेल्लांतोर ओन्क रोंडो हामुरताहेंदाल बतल नुकसान आयो.

पेर्गममता कलिसियातोरक पेनदा पोल्लें

12 पेर्गममता सहरता कलिसियाता दूताक इल्हा रासा. बोर अयते रोंडु आयदार्कुना कसेर पीसि मनांतोर ओर बतल इंतोर इत्ते,

13 बगा अयते देय्यमता राजगदूदे मंता अग्गेन निमे मनांतिन इंचि नाकु एरपाटे. अयना ना पोरोलते निमे निल्लि मंतिन. नावा विस्वासमगल्ला सेवक अंतिपान मीवा नड्डुमे देय्यम मनना जेगाते हव्कतुर, अव रोजकुनेगुडा निमे नावा पोर्रीटा विस्वासमताल पजोळ्ळक होना हिल्लिन.

14 गानि नीवा विरोदमते नाकु कोन्नि पोल्लें वेहनद मंता. इस्पाएल लोकुल्लुकुन हिड अरहानाहाटीं बिलाम इनना कबुरतोर बालाक इनना राजांक बतल अयते कराहतोरो, अवुन पीसि ताकानोर मीवा नड्डुम मंतुर. बोम्मांक मोळ्ळकता वस्तुकुन तिनगोम, बोगमतनम कियगोम इजि बिलाम करहुंदुर.

15 अल्हेने मीलोप्पो इच्चुर लोकुल्लक निकोलियातुरा करहाताप ताकानुर मंतुर, ओर्कुन ननागुडा हय्सोन.

16 अदुनहाटीं मीवा मनसु मार्सकुंट. इल्हा कियाकौंटे नना बिरानेन मिहगा वासि, ना तोळ्ळा कसेरतोने ओरतोनि लडाइ कीतन.

17 पवित्र आत्मा कलिसियातोरक बतल वेहांता अदुन, केव्क मत्तोर बेस केंजिर. बोर अय्ते गेल्लांतोर ओन्क मक्किचि इरता मन्ना आनि उंदि तेल्ला बंडा हीतन. आ बंडापोर्रो उंदि पूना पोरोल रासि मनंता अद बोन्क अय्ते दोर्कार ओन्के तेळियार.

तुयतीराता कलिसियाता दूताक पेनदा पोल्लें

18 तुयतीराता सहरता कलिसियाता दूताक इल्हा रासा. बोना कळ्ळक अय्ते पोत्तना तळमिलेसीं मंतां, काल्क कोल्मिते काचाहता इत्तोडिलेसीं मंतां आ पेनदा मरिं इल्हा वेहांतोर:

19 निमे कियाना कबाहक, ना पोरोटा नीवा पावरम, विस्वासम, निमे कियाना सेवा, तिप्पल्कुने नीवा ओक्के, इव अन्नि नाकु तेळियसे. नीवा सुस्वना कबाहकुंकन्ना इंदकेटा कबाहक एक्को बेस मंतां.

20 गानि नी विरोदमते नाकु उंदि पोल्ले वेहानद मंता. जेजेबेल इनना मुरतळ, नना पेनदा कबुरतदुन इंचि वेहकुंचेके नावा सेवाकुल्लुकुंक, बोम्मांक मोळ्ळकता वस्तु तिनगोम, बोगमतनम कियगोम इंचि कराहचि ओर्कुन पसांचेके मंता. असोटा मुर्तादुन निमे निहगा मना हीसंतिन.

21 मनसु मार्सकुननाहाटीं नना दानकु मोका हीतन, गानि बोगमतनमताल मनसु मार्सकुनालय दाना इच्चा हिल्ले.

22 अय्ते ह्ळट! नना दानु कटुल पिया गोतंतन, दानतोनि बोर अय्ते बोगमतनम कीतुर ओरगुडा असोटा कबाहकुनाल मनसु मार्सकुनाकुंटे ओर्कुन बागा तिप्पल्कुने अरहंतन.

23 अद कराहता पोल्लेन पीसि ताकाना दाना पिलाल्कुन नना हक्किसि पोहंतन. अस्के, बुद्दितुन आनि मनसुन एरपाट कियानोन ननाने आंदुन इंचि अन्नि कलिसियातोरक तेळियार. पजा मीकु वरो-वरोक मिमेट कीता कबाहकुन पीसि, इनाम हीतन.

24 गानि तुयतीराते अद कराहताप ताकवोर कळ्ळमतोर मिमेट बोर अय्ते विस्वासिर मंतिरो, मीक नना बतल वेहांतन इत्ते, मिमेट देय्यमता लोप्पोटा मर्ममतुन एरपाट किया हिल्लिर अदुनहाटीं नना मीपोर्रो इंका बर्वु वाटोन.

25 नना मल्सि वायनदाका सिराप मिहगा मनना विस्वासमतुन गट्टिगा पीसि मंटु.

26 बोर अय्ते गेल्लि आकिरदाका नावा कबाहकुन कीतोर ओन्क नना अन्नि दुनियाता अन्नि देसेल्कुना लोकुल्लुकुनपोर्रो अदिकारम हीतन.

27 कुम्मल कीता अळकन कच्चिता दुडुडुने तुकडां-तुकडां कीताप लोकुल्लुकुनपोर्रो ओर राज्ये म कीतोर. बाबानाहेंदाल नाकगुडा इसोटे अदिकारम दोर्कता.

28 अल्हे ननागुडा ओनकु हक्केटा सुक्कातुन हीतन.

29 कलिसियातोरक पवित्र आत्मा बतल वेहांता अदुन, केव्क मत्तोर बेस केंजिरकांटी.

3

सरदिसता कलिसियातोरक पेनदा पोल्लें

1 सरदिस सहरता कलिसियाता दूताक इल्हा रासा. बोनागा अय्ते पेनदा एडुं सुक्कां आनि एडुं आत्मां मंतां ओर बतल इंतोर इत्ते, निमे कियाना कबाहक नाकु एरपाटे; नीवद निमे “जीवाते मंतन” इंचि इनकुंचंतिन गानि असल इत्ते निमे हासि मंतिन.

2 निमे तेळ्विते मन, पेनदा मुन्ने नीवा कबाहक पुरा आताप नाक दिस्सेक हिल्ले. अदुनहाटीं, मय्सि मत्ता कबाहकुन पुरागा कीम. मायसि होनालय आता विस्वासमतुन गट्टिगा कीम.

3 अदुनहाटीं केंजता बोदातुन निमे बल्हा ओप्कुत्तिनो अदुन मति कीम. मति कीसि अल्हे ताका आनि मनसु मार्सकुन. ओक्कला निमे जेगर्ता मनाकोटे, नना वरोर दोंगानलेसी वांतन, नना बद वेलाक निहागा वांतन, दाना पत्तागुडा नीकु दल्गो.

4 गानि सरदिस सहरता इच्चुर विस्वासुल्क, ओरा कपडिंक डाग अंटाकोटा इरताप, ओरा ताकमळतुन बेस इरतुर. ओर तेल्ला कपडिं केरताप सत्तेमते नावातोनि ताकनुर; ओर अल्हा ताकना लायक मंतुर.

5 बोर अय्ते गेल्लांतोर, ओन्क इसोंटा तेल्ला कपडिं केर्समड जर्गार आनि नना ओना पोरोलतुन पिस्वरता पुस्तकमताल तंचि पोहोन. अल्हेने नावा बाबाना मुन्ने आनि दूताना मुन्ने ओना पोरोलतुन ओपकुंतन.

6 पवित्र आत्मा सरदिसता कलिसियातोरक बतल वेहांता अदुन, केव्क मत्तोर बेस केजिरकांटी.

पिलदेलपियाता कलिसियातोरक पेनदा पोल्लें

7 पिलाडेलपिया सहरता कलिसियाता दूताक इल्हा रासा. बोर अय्ते पवित्र आनि सत्तेमतोर मंतोर, ओर दाविदना अदिकारता चाबि इरंतोर, ओर तेंडता तल्पुन बोरें बंद किया पर्रोर आनि ओर बंद कीता तल्पुन बोरें तेंडा पर्रोर, ओर बतल इंतोर इत्ते,

8 निमे क्रियाणा कबाहक नाक एरपाटे, नीवा ताकत तक्को मंता गानि नावा पोल्लेता पालन कीतिन आनि नावा पोरोलतुन एतोन इंचि इना हिल्लिन. अदुनहाटीं ह्ळा! नीवा मुन्ने उंदि तल्पु कुल्ला कीसि इरतन, अदुन बोरें बंद किया पर्रोर.

9 ह्ळा! नना देय्यमता दर्मसास्त्रम कराहना लोता लोकुल्कुन निहगा वायागोटंतन, ओर “मोमोट यहूदिर्क आंदुम इंचि इंतुर” ओर यहूदि आयूर गानि ओर आबदुदम वळ्कसेक मंतुर. नना ओर्कुन निहागा तायसि नीवा काल्क मोळ्का गोटांतन. अस्के नना मीकुन बच्चोन पावरम कीतन इंचि ओर्क तेळियंता.

10 निमे ओप्के पीसि नावा पोल्लेते ताकतिन अल्हेन, केंजतिनगुडा. अदुनहाटीं ई दुनियाता लोकुल्कुना पट्टु ह्ळालय बतलय्ते परिक्सा वायाना मंता, अव्टेताल नीकुन कापाळंतन.

11 नना बिरानेन निहागा वांतन. नीवा किरिटमतुन निहागटाल बोरें गुंजा मन्नि इंचि, निहागा बतलय्ते विस्वासम मंता अदुन इंका गट्टिगा पीसि ताका.

12 बोर अय्ते गेल्लांतोर, ओन नना नावा पेनदा गुळिते बस्केने पलाते पेयसाकोटा उंदि कंबालेसी निपसंतन. नना ओनपोर्री नावा पेनदा पोरोल, नावा पेनदागटा स्वर्गमताल हिळु वायाना पूना येस्सलेमता पोरोल आनि नावा पूना पोरोल रासंतन.

13 पवित्र आत्मा पिलदेलपियाता कलिसियातोरक बतल वेहांता अदुन, केव्क मत्तोर बेस केजिरकांटी.

लोदिकियाता कलिसियातोरक पेनदा पोल्लें

14 लोदिकिया सहरता कलिसियाता दूताक इल्हा रासा. बोर अय्ते आमीन इननोर, विस्वासमगल्लोड, निजम गवाइ वेहानोर, इंका पेन तयार कीता अन्नित्कुने मोदोल मनकल आसि मंतोर, इव पोल्लें ओनव आंदुं.

15 निमे क्रियाणा कबाहक नाकु एरपाटे, विस्वासमते निमे सल्लागा हिल्लिन गरम हिल्लिन. निमे सल्लागा हिलाकोटे गरम मंचि मत्ते बेस आसि मनवळ.

16 निमे सल्लागा हिल्लिन, गरम हिल्लिन एच्चगा मंतिन. अदुनहाटीं नीकुन नना ना तोळ्दाल पलाते कक्कंतन

17 निमे अय्ते, “नना सिरमंतुन, नहगा अन्नि मंतां, नाकु बतल तक्को हिल्ले”, इंचि इनकुंचतिन. गानि नीकु इदु एरपाट हिल्ले गदा, निमे पेद्दा हेडसोत्तोन, गति हिल्वोन, गरिबोन, गुड्डिन, कुळकें मंतिन इंचि.

18 अदुनहाटीं, निमे विस्वासम लोपुपो निजम मत्ता मनकल आयानाहाटीं नना नीकु उंदि उपायम वेहांतन अद बतल इत्ते, तळमिते सुद्द कीता बंगारम निमे नहागटाल एता. दानहेंदाल निमे सिरमंतुन आकिन. कुळकें मत्तद ह्ळसि सिग्गु होनामन्नि इंचि केरालय तेल्ला कपडि नहागटाल एता. कळ्क बेस दिस्सनाहाटीं कळ्कुने वाटालय मत्तु अस्सा.

19 बोन-बोन अय्ते नना पावरम कीतन, ओनकु गट्टिगा वेह्चि, सुद्रांचा गोट्टंतन. अदुनहाटीं इरगा जोसुने मंचि मनसु मार्सकुन्नु.

20 ह्ळा, नना तल्पुनगा नित्तिसि तल्पुन टोक-टोक तंतस्के; बोर अय्ते ना लेंग केंजसि तल्पु तेंडांतोर, नना ओनगा लोप्पो दांतन, होंचि ओनतोनि कलियसि गाटो तितन, आनि ओर नातोनि तितोर.

21 बल्हा अय्ते नना गेल्लिसि नावा पेनबाबानतोनि ओना राजगद्देपोरों होंचि उदतन. अल्हे बोर अय्ते गेल्लांतोर ओन नना नातोनि नावा राजगद्देपोरों उपसंतन.

22 पवित्र आत्मा लोदिकियाता कलिसियातोरक बतल वेहांता इत्ते, केव्क मत्तोर बेस केंजिरकांटी.

4

पेन योहानुंक स्वर्गम हृषसंता

1 इव अन्नि आतस्के, स्वर्गमते उंदि तल्पु कुल्ला मत्तद नाकु दिसता. मोट्टा मोदाला नना केंजता आवाज तूताकोमता आवाजलेह्का मत्ता. अदे आवाज नाकुन, “निमे इगे पोरों वा, इव अन्नि आतस्के बव पोल्लें अय्ते जर्गानव मंतांगो अवुन हृषसंतन,” इंचि इत्ता.

2 अस्केने नना पवित्र आत्माते निडतन. नाक स्वर्गमते राजगद्देपोरों बोरो वरोर उद्दिदस मत्तद दिसतोर.

3 आ राजगद्देपोरों बोर अय्ते उद्दिदस मत्तोर ओर यसब आनि मानिक इनना मेर्सना बंडालेसीं दिस्सेक मत्तोर. आ राजगद्देता सुट्ट मरकत इनना मेर्सना बंडानलेसीं उंदि सिंगिड दिस्सेक मत्ता.

4 राजगद्देता सुट्ट इरवै नालुं राजगद्दे मत्तां. अव राजगद्देन पोरों इरवै नालुर एनकटा पेद्दाल्क तेल्ला कपडिं केरसि उद्दिदस मत्तुर. ओरा तल्लानपोरों बंगारमता किरिटाल्कु दोस्सि मत्तां.

5 आ राजगद्देताल पिडगु वाटाना वेलगु, उस्मना आवाज आनि पेद्दा लेंग पलाते पेय्सेक मत्ता. राजगद्देता मुन्ने तळमितव एडुं वेडसिं पोतसेके मत्तां. अव वेडसिं इत्ते, पेनदा एडुं आत्मा आंदुं.

6 राजगद्देता मुन्ने अद्दमतसोंटा समुद्रम दिस्सेक मत्ता. आ राजगद्देता नड्डुम, सुट्ट नालुं जीवाते मत्ता जिवरासीं नित्तिसि मत्तां. अवुंक पज्जो-मुन्ने कळ्के कळ्क निडिस मत्तां.

7 मोदाटा जिवरासि सिंहमतालेसीं, रोंडो जिवरासि कोंदातलेसीं, मूडो जिवरासिता मोकोम मनकनलेसीं मत्ता. आनि नालुंगो जिवरासि गुव्वा डेगातलेसीं दिस्सेक मत्ता.

8 जीवाते मनना नालुं जिवरासिक हास्-हास् रेक्कां मंतां, अवुना मेंदुलता सुट्ट, लोप्पो कळ्के-कळ्क मंतां. अव पोद्दाला नकां पल्हीं आराम कियाकोटा उंदेतीर, “निमेने पवित्र, पवित्र, पवित्र, सामि पेनबाबाल, अन्निटकन्ना सक्तिमंतुन आंदिन. निमेने मुन्नेटाल मत्तिन, इंदके मत्तिन, मुन्नेगुडा मनांतिन” इंचि इंचेक मत्तां.

9 बस्के अय्ते अव नालुं जिवरासीं, राजगद्देपोरों उद्दिदस मत्ता बस्केळ्क जीवाते मनना पेनदा स्तुति, महिमा, दन्यवाद कीतां,

10 अस्के ओर इरवै नालुर पेद्दाल्क पेनदा मुन्ने टोंगरां ऊनसि ओरा तल्लानपोरों मत्ता किरिटाल्कुन हिळ्ळु इर्सिं,

11 “निमेने ई दुनियाता अन्नि वस्तुक तयार कीतन, इव अन्नि नीवा इच्चा परकारम तयार आतां. नीवा इच्चा परकारमे मंतां, निमेने मावा पेन, मावा सामिन आंदिन. महिमा, स्तुति आनि ताकत नीवदे आंदुं,” इंचि इंतुर.

5

एडुं सिक्कां तंचि हटसि मत्ता पुस्तकम

1 पजा आ राजगद्देपोरों उद्दिदस मत्तोना तिना कय्दे नाकु उंदि पुस्तकम दिस्ता. अद लोप्पो, पलाते रोंडु पक्काने रासि मत्ता आनि दान्क एडुं सिक्कां तंचि गुंडगां हट्टिसि मत्ता.

2 वेल्लेन ताकत मत्ता उंदि पेनदा दूतातुन नना अगा हळतन. पेद्दा आवाजते अद, “गुंडूर्गा हृदिसि मत्ता पुस्तकमपोर्रीटा एंडु सिक्कान नेम्हाचि, दान विच्चनालायक बोर मंतोर?” इंचि इनालय दल्गता.

3 गानि स्वर्गमते आयि, बूमिपोर्री आयि, बूमि हिळु आयि अद पुस्तकमतुन विच्चिसि दाना लोप्पो हळना लायकतोर बोरे मनाहिल्लोर.

4 अद पुस्तकमतुन विच्चिसि हळानालायक बोरे दोर्कुवाहेंका नना इरगा अळतन.

5 अस्के “निमे अळमा. हळा! आ गुंडूर्गा हृदिसि मत्ता पुस्तकमपोर्रीटा सिक्कान नेम्हाचि अदुन विच्चिसि हळानाहाटीं दाविदना वंसमतोर, यहुदाना गोत्रमता सिंहम इंचि पोरोल होतोर वरोर, गेल्लिस मंतोर” इंचि आ पेद्दाल्कुना अवेटाल वरोर नाकुन इतोर.

6 अस्के आ राजगद्दे, जीवाते मनना नालुं जिवरासीं आनि पेद्दाल्कुना नड्डुम, मोक्कु हीतदुनलेसी उंदि गोर्री पोरि नित्तिसि मत्तद नना हळतन. दान्क एंडु कोह्कु, एंडु कळ्ळ मत्तां. आ एंडु कळ्ळ इत्ते, पेन बूमिपोर्री अन्नि दिक्कुल्लुने लोहता दाना एंडु आत्मां आंदु.

7 अद गोर्री पोरि, राजगद्देपोर्री उद्दिदस मत्तोनागा वासि, ओना तिना कय्दे मत्ता पुस्तकमतुन तेंडकुत्ता.

8 बस्के अय्ते गोर्री पोरि आ पुस्तकमतुन तेंडकुत्ता, अस्के आ नालुं जिवरासि आनि इरवै नालुर पेद्दाल्क गोर्री पोरिना मुन्ने काल्कुनगा बोक्-बोर्ले अर्सि मोळ्ळतुर. ओर अंतोरा कय्दे उंद-उंदि टांबुरा आनि दूपमते निडिसि मत्ता बंगारमता कुळ्ळां मत्तां. आ दूपमते निडिसि मत्ता कुळ्ळां इत्ते, पेनदा लोकुल्लुना पारतनां आंदु.

9-10 पज्जो ओर अंतोर उंदि पूना पाटा पारालय दल्गतुर, “निमे इद पुस्तकमतुन एतसि, दाना सिक्कान नेम्हाचि विच्चनालायक मंतिन. बारित्ते, निमे मोक्कु आसि नीवा नेत्तुर कुदुवा दोस्सि हरेक जातिताल, हरेक बासानोरवेटाल, हरेक लोकुल्लुनाल आनि हरेक देसेमतोरवेटाल पेनदाहाटीं अस्कुत्तिन. निमे ओर्कुन पेनदाहाटीं दाना राज्यमतोर आनि पेर्मांलोकं कीतिन. ओर बूमिपोर्री राज्येम कीतुर.”

11 पजा नना अगा हळते, आ राजगद्दे सुट्टु, अव नालुं जिवरासिना सुट्टु आनि पेद्दाल्कुना सुट्टु पेनदा वेल्लेन दूताना लेंग केंजावाता. अव दूतां लेक्कुते लाकुल्ल, कोट्टुने मत्तां.

12 “मन्कालोर इद गोर्री पोरिन हळ्कि स मत्तुर गानि, संपत्ति, बुद्दि, बलम, कदर, महिमा आनि स्तुतिता लायक इदे आंद,” इल्हा अव अन्नि दूतां पेद्दा आवाजते इंचेके मत्तां.

13 अचोने आयाका स्वर्गमते, बूमिपोर्री, बूमि हिळु, समुदम आनि अवुने मनानव अन्निगुडा, “राजगद्देपोर्री उद्दुनोनद आनि गोर्री पोरिनद, स्तुति, कदर, महिमा आनि बलम बस्केळ्ताहाटीं मन्निकाटी,” इंचि इनानद नना केंजतन.

14 अस्के जीवाते मनना नालुं जिवरासीं “आमीन” इत्तां. पजा पेद्दाल्क टोंगरां ऊनसि आरादना कीतुर.

6

गोर्री पोरि एंडु सिक्कान लेहमळ

1 पजा एंडु सिक्कानाल उंदि सिक्कातुन आ गोर्री पोरि नेम्हाचि विच्चुता. अस्के जीवाते मत्ता आ नालुं जिवरासिनाल उंदि जिवरासि, पिडगु वाटते वायानसोटा आवाजते, “वा” इत्तद नना केंजतन.

2 अस्के अगा नाकु उंदि तेल्ला गुर्गम दिसता, दानपोर्री वरोर बानम पीसि उद्दिदस मत्तोर. ओन्क उंदि किरिटम हियमळ जर्गता. ओर लडाई गेलसतोर, अय्नागानि इंका गेलसना इंचि पेयसतोर.

3 गोर्री पोरि रोंडो सिक्कातुन नेम्हाचि विच्चुता अस्के, जीवाते मत्ता आ नालुं जिवरासिनाल रोंडो जिवरासि, “वा” इंचि इत्तद नना केंजतन.

4 अस्के उंदि एर्राटा गुर्म पलाते पेयसानद नना हळतन. लोकुल्क वरोंक-वरोर हक्कुकुनना इंचि, अद गुर्मपोरो उद्दिस मत्तोन्कु, बूमिपोरोटाल सांतितुन येतकुनना अदिकारम हियमळ जर्गता. ओन्क उंदि पेद्दा कसेर हियमळ जर्गता.

5 बस्के अय्ते गोरि पोरी मूडो सिक्कातुन नेम्हाचि विच्चुता, अस्के मूडो जिवरासि, “वा” इत्तद नना केंजतन. पजा नाकु अगा उंदि करे रंगुना गुर्म दिसता. आ गुर्मपोरो उद्दिस मत्तोना कय्दे उंदि तराजु मत्ता.

6 अच्चोटेन, जीवाते मत्ता आ नालुं जिवरासिना नड्डुमताल, “उंदि रोजुना बूतितच्चोन कोत्ताने, उंदि किलो गोहकु दोर्कता, इंका अचोने कोत्ताने मूड किलोना जोन्नां दोर्कता. गानि नियदुन, अंगुर पानकमतुन नासडेम कियमा,” इंचि उंदि लेंग केंजावाता.

7 गोरि पोरी नालुंगो सिक्कातुन नेम्हाचि विच्चुतस्के जीवाते मत्ता आ नालुं जिवरासिनाल नालुंगो जिवरासि, “वा” इत्तद नना केंजतन.

8 पजा नाकु अगा उंदि पस्पु रंगुना गुर्म दिसता. आ गुर्मपोरो उद्दिस मत्तोना पोरोल हामुर, ओना पज्जो-पज्जो नरकम वासेक मत्ता. ओन्क बूमिता नालुं बागालुकुनाल उंदि बागमपोरोटा लोकुल्कुकुन कसेरते, कर्लुने, बिमार्कुने आनि केडाता जिवरासिन हेंदाल नासडेम कियाना अदिकारम हियमळ जर्गता.

9 गोरि पोरी हेय्युंगो सिक्कातुन नेम्हाचि विच्चुतस्के, पेनदा पोल्ले लोकुल्कुकुं वेहताहाटीं आनि ओरा गवाइ वेहताहाटीं मोक्कु हिय्यना गद्दे हिळु हक्किसि मत्तोर्कुना आत्मान हळतन.

10 आ आत्मां पेद्दा आवाजते, “ए सामि, पवित्र आनि सत्तेम मनानोन, माकुन हक्कुता बूमिपोरोटा लोकुल्कुकुना न्यायम निमे बस्के कीतिन? ओरा न्यायम कीसि मावा नेत्तुरता बदला बस्के एतांतिन?” इंचि वरगेयालय दल्यतां.

11 पजा ओके अंटोर्क तेल्ला कपडिं हीसि, “मीकुन हक्कुतापे मीवा दंटाता सेवाकुल्कुकुन आनि विस्वासुल्कुकुन हक्कना मंता, ओरा लेक्कांगुडा पुरागा आयानदाका मिमेट गळसेप आराम कीम्टु,” इंचि ओर्कु वेहतोर.

12 गोरि पोरी हासंगो सिक्कातुन नेम्हाचि विच्चुता, अस्के पेद्दा बुकंप आतद नना हळतन. अस्के पोळ्दु करे गोंगोळिलेसीं करेगा आनि वेळिसअंता बारे नेत्तुरलेसीं एरंगा आता.

13 पेद्दा वळि दुमारम वाते तोया मराता पंडिं बल्हा हिड अरंता, अल्हेने सुक्कां मब्बुनाल बूमिपोरो अरतां.

14 मब्बु उंदि कागदेम हुटताप हुटकुचि मायसोत्ता. अल्हेन हरेक गुट्टा, दीबे अवुना जागानाल जर्गतां.

15 अस्के बूमिपोरोटा राजालोर, अदिकारिल्क, सायाबुल्क, सिरमंतुल्क, ताकतवर्क, दासुल्क, दासुल्क आयवोर, इल्हा अंटोर लोकुल्क गुट्टाना बुयारालुकुने, पेद्दा बंडा सोरिने होंचि मकतुर.

16 मक्किसि गुट्टां आनि बंडानतोनि, “मापोरो अर्सि, राजगद्देपोरो उद्दिस मत्तोना नदरताल आनि गोरि पोरीना होंगुनाल माकुन मक्किचट.

17 बारित्ते, पेनदा होंग हुप्सना कतरनाक रोजु एवता. ओरा मुन्ने बोर नित्ता परांतुर?” इंचि इनालय दल्यतुर.

7

1,44,000 लोकुल्कुकुं सिक्कां तनमळ

1 इवन्नि जर्गतारित्ते, बूमिता नालुं मूलांक पेनदा नालुं दूतां नित्तिसि मत्तद नना हळतन. अव बूमिपोरो आयि, समुद्रमते आयि आनि बवे मराकुन पोरो आयि वळितुन वायाकोंटा आपसि पीसि मत्तां.

2-3 अस्के मर्रा उंदि दूतातुन जीवाते मनना पेनदा सिक्कातुन पीसि पोळ्द पेयसानहेंदाल पोरो वासेक मनानद हळतन. बव नालुं दूतांक अय्ते, बूमितुन आनि समुद्रमतुन नासडेम कियाना अदिकारम

हीसि मत्ता, अव नालुं दूतन अद पेद्दा आवाजते, “बदवेरादाका अयते मोमोट पेनदा सेवाकुल्लुकुना कपालमपोर्री सिक्कां तन्नोम अदवेरादाका बूमितुन आयि, समुद्रमतुन आयि, अल्हेने मराकुन आयि नासडेम कियमट” इंचि इत्ता.

4 अस्के सिक्कां तंचि मत्तोर्रा लेक्का केंजतन अयते, ओर उंदि लक्सा नल्पै नालु वेय्कु मत्तुर आनि अव्टे इस्नाएलना हरेक वंसंमता लोकुल्लक मत्तुर.

5-8 यहुदाना वंसंमताल पन्नेड वेय्कु लोकुल्लुकुं सिक्का तनमळ जर्गता. स्खेनना वंसंमताल पन्नेड वेय्कु, गादना वंसंमताल पन्नेड वेय्कु, अस्सेरना वंसंमताल पन्नेड वेय्कु, नप्तालिना वंसंमताल पन्नेड वेय्कु, मनसेना वंसंमताल पन्नेड वेय्कु, सिमोनाना वंसंमताल पन्नेड वेय्कु, लेविना वंसंमताल पन्नेड वेय्कु, इसाकुना वंसंमताल पन्नेड वेय्कु, जबलुनना वंसंमताल पन्नेड वेय्कु, योसेपना वंसंमताल पन्नेड वेय्कु, बेंजामिनना वंसंमताल पन्नेड वेय्कु, इल्हा पन्नेड गोत्राल्लुकुना लोकुल्लुकुं सिक्कां वाटमळ जर्गता.

राजगद्देता मुन्ने वेल्लेन लोकुल्लक

9 अद आता पजा, पेनदा राजगद्दे आनि गोर्री पोरिना मुन्ने तेल्ला कपडिं केरसि, कजूर मराता कोम्मां क्यदे पीसि हरेक जातितोर, हरेक बासातोर, हरेक लोकुल्लक आनि अन्नि देसेल्लुकुनोर इल्हा लेक्कुते बोरे लेक्का पर्स् अचचोन मंदितुन नना हळतन.

10 ओर अंतोर पेद्दा आवाजते, “राजगद्देपोर्री उद्दिदिस मनना मना पेनबाबानगा, गोर्री पोरिनगा मुक्ति हियना सक्ति मंता” इंचि इनालय दलगतुर.

11-12 अन्नि दूतां राजगद्दे सुट्ट, पेद्दाल्लक आनि जीवाते मत्ता आ नालुं जिवरासिना सुट्ट नित्तिसि मत्तां. अव अन्नि दूतां राजगद्दे मुन्ने बोक्-बोर्ले अर्सि पेनदुन आरादना कीसेके इल्हा इनालय दलगतां, “आमीन, स्तुति, महिमा, तेल्वि, ताकत आनि दन्यवाद बस्केळताहाटीं मावा पेनदावे आंदुं, आमीन” इंचि इत्तां.

13 अस्के पेद्दाल्लुकुना अव्टेताल वरोर “तेल्ला कपडिं केरसि मन्नानुर ईर बोर आंदुर? ईर बगाटाल वातुर?” इंचि नाकुन पूसकीतोर.

14 अस्के, “नीकु एरपाटे महाराज,” इंचि नना ओन इत्तन. अस्के ओर, “ईर अंतोर वेल्ले तिप्पल्लुकुनाल पलाते वातोर आंदुर. ईर ईरा कपडिं गोर्री पोरिना नेत्तुरते हुक्किसि तेल्लगा कीतुर आंदुर.

15 अदुनहाटीं ईर अंतोर इंदके पेनदा राजगद्दे मुन्ने मंतुर. नर्का-पिय्यल गुळितगा मंचि दाना सेवा कीतुर. राजगद्देपोर्री उद्दिदिस मनानोर ईरापोर्री डेरा कीसि कापाळांतोर.

16 ईरकु इंदकेटाल बस्केने दूपा आयो, कर्वेस्सो, अचोने आयाका ईरकु पोळ्ळुना एद्दिहेंदाल दगळागुडा दलगो.

17 बारित्ते ईर अंतोर्कुन मेहानोर, राजगद्दे नड्डुम उद्दिदिस मनना गोर्री पोरि आंदुर. ओर ईरकुन पिस्वरता एता उटानगा ओतोर. पेन ओरा कळ्ळुकुना कंडेह्कुन पुरागा उसमंता,” इंचि वेहतोर.

8

एडुंगो सिक्कातुन विचचुमळ

1 गोर्री पोरि एडुंगो सिक्कातुन नेम्हाचि विचचुतस्के स्वर्गमते सगम गंटादाका सुम-साम आता.

2 अस्के पेनदा मुन्ने नित्तिसि मननव एडुं दूतन नना हळतन. अवुंक एडुं तूताकोम्कु हियमळ जर्गता.

3 अगा इंकुंदि पेनदा दूता गद्देतगा वासि नित्तुता. दाना क्यदे बंगारमता गुगलेम कुळका मत्ता. दान्क राजगद्दे मुन्ने मनना बंगारमता गद्देपोर्री अंतोर पेनदा लोकुल्लुकुना पारतनांतोनि गुगलेम वाटानाहाटीं वेल्लेन गुगलेम हियमळ जर्गता.

4 अस्के पेनदा दूताना कयदाल अद गुगलेमता पोया पेनदा लोकुल्लुकुना पारतनांतोनि पेनदागा एवता.

5 आ दूता दूपमता कुळकाते गद्देतगा मत्ता तळमितुन निहाचि अदुन बूमिपोर्री पोह्चीता, अदुनहेंदाल मब्बु गळ-गळा इंचेके उरमालय, मेर्सालय, बुकंप आयालय दलगता.

एडुं दूतां तूताकोम्कु उहकमळ

6 अस्के तूताकोम पीसि मत्ता अव एडुं दूतां तूताकोम्कु उहकालय तयार आतां.

7 मोदाटा दूता तूताकोम उहकता, अस्के नेत्तुर कलियसि मत्ता बंडां आनि तळमि बूमिपोर्री अरता. अरतस्के बूमिता मूड बागाल्कुनाल उंदि बागम आनि मराकुना मूड बागाल्कुनाल उंदि बागम कर्विसोत्ता. इंका पच्चाटा जाळिगुळा पुरागा वेसोत्ता.

8 रोंडो दूता तूताकोम उहकता, अस्के तळमितोनि पोतसेके मत्ता उंदि पेद्दा गुट्टातसोंटद बतलो समुद्रमते वाटमळ जर्गता. दानहेंदाल समुद्रमता मूड बागाल्कुनाल उंदि बागम नेत्तुरलेसी आसोत्ता.

9 अदुनहेंदाल समुद्रमते जीवाते मत्ता जिवरासिना मूड बागाल्कुनाल उंदि बागम जिवरासी हासोत्तां. आनि समुद्रमते मत्ता जहाजकुना मूड बागाल्कुनाल उंदि बागम नासडेम आता.

10 पेनदा मूडो दूता तूताकोम उहकता, अस्के मब्बुनाल डिळितलेसी पोतसेके उंदि पेद्दा सुक्का बूमिपोर्री अरता. अद सुक्का मूड बागाल्कुनाल उंदि बागम बैरेहक आनि एता उटानपोर्री अरता.

11 अद सुक्काता पोरोल कयमुल. दानहेंदाल एता मूड बागाल्कुनाल उंदि बागम एर कयमुल आसोत्ता. अद एर उट्टाहाटी वेल्लेन मनकालोर हासोत्तुर.

12 नालुंगो दूता तूताकोम उहकता, अस्के पोळ्दु, वेडसि आनि सुक्कां इवुना मूड बागाल्कुनाल उंदि बागम नासडेम आता. अदुनहाटी अवुना मूड बागाल्कुनाल उंदि बागम हीकट आता. पोद्दालानर्कागुडा मूड बागाल्कुनाल उंदि बागम हीकट आसोत्ता.

13 पज्जो उंदि गुव्वा डेगातुन मब्बुन नड्डुमताल परियसेक वायनद हळतन अद जोरते इल्हा इनानद केंजतन: “इंदके मूड दूतां अवुना तूताकोम उहकानदे मंता, अव अवुना तूताकोम उहकतस्के बूमिपोर्री मनना अंटोर्क इरगा गोसा आयार! गोसा आयार! गोसा आयार!”

9

कपालमपोर्री सिक्का हिलवोर्कु वायना गंडाल्कु

1 पजा हेयुंगो दूता तूताकोम उहकता, अस्के मब्बुनाल उंदि सुक्का बूमिपोर्री अरता. आ सुक्काक वेल्लेन लोत मत्ता पोक्काता चाबि हीतद नना हळतन.

2 आ सुक्का, लोत मत्ता पोक्काता तल्पुन तेंडता, अस्के पेद्दा बट्टिताल पेय्सना पोयालेहका आ पोक्काताल पोया पेय्सता. दानहेंदाल पोळ्दु, वळि हीकट आसोत्तां.

3 आ पोयाताल गोल्लाबामा पुळ्कु पेय्सि बूमिपोर्री वातां. बूमिपोर्रीटा मिच्चोर्क बसोंटा ताकत मंतनो असोंटदे ताकत अवुंक हियमळ जर्गता.

4 आ गोल्लाबामांकु, बूमिपोर्रीटा जाळितुन आयि, बवे पच्चाटा पोर्का, मराकुन आयि, नासडेम कियानायो. बोरा कपालमपोर्री अयते पेनदा सिक्का तंचि हिल्लेनो सिराप ओर्कुने नासडेम कियाना इंचि वेहामळ जर्गता.

5 मनकालोर्कुन हळ्काना अदिकारम अयते अवुंक हिल्ले, गानि हेयुं नेल्कुनदाका ओर्कुन तकलिपते अरहना अदिकारम हियमळ जर्गता. अवुनाहेंदाल आयाना तकलिप, मनकन मिच्चो कस्कुते बल्हा मनंता अल्हा मत्ता.

6 अव रोजकुने लोकुल्क हामुरतुन पहकंतुर, गानि ओर्कु हामुर दोर्को. हामुर कोरांतुर गानि ओर्कु हामुर दोर्को.

7 आ गोल्लाबामां, लडाइहाटी तयार कीता गुर्गाल्कुनलेसी दिस्सेक मत्तां. अवुना तल्लानपोर्री बंगारमता किरिटम दोसताप मत्ता. अवुना मोकाल्क मनकालोरा मोकाल्कुनलेसी दिस्सेक मत्तां.

8 अवुना केलक मुरताहकुना केल्कुनलेसी मत्तां. अवुना पल्कु सिंहमता पल्कुनलेसी मत्तां.

9 अव कच्चिता अंगिं केरसि मत्तां. अवुना रेक्काना आवाज अय्ते, लडाइ कियालय वित्तना वेल्लेन गुराल्कुना रताल्लकुनलेसी मत्तां.

10 अवुंक मिच्चोनलेसीं तोकां, कौडिं मत्तां. मनकालोर्कुन हेय्युं नेल्कुनदाका तकलिपते अरहचि इराना ताकत, अवुना तोकाने मत्ता.

11 वेल्लेन लोत पोक्काता दूता, अवुंक राजाल आसि मत्ता. इब्रानि बासाते दान अबदोन आनि ग्रीक बासाते अपुलोन इंचि इंतुर.

12 इद मोदाटा गंडम पेय्सि होत्ता. मुन्ने इंका रौंडु गंडाल्कु वायानव मंतां.

हासंगो तूताकोम उहकमळ

13 हासंगो दूता तूताकोम उहकता, अस्के पेनदा मुन्ने मत्ता बंगारमता गदूदेता नालुं कोह्कुनाल उंदि लेंग नना केंजतन.

14 आ लेंग, तूताकोम पीसि मत्ता हासंगो दूतातुन, “परात इनना पेदूदा बरेटगा दोहासि मत्ता नालुं दूतन होळसीम,” इंचि इत्ता.

15 अदे वेला, अदे रोजु, अदे नेला, अदे वर्साताहाटीं होळसालय पेन अवुन तयार कीसि मत्ता. बूमिपोरौटा लोकुल्कुना मूड बागाल्कुनाल उंदि बागम लोकुल्कुन हक्कानाहाटीं आ नालुं दूतन होळसीयमळ जर्गता.

16 आ गुराल्कुनपोरौ वायना सिपाइल्क लेक्काते पुरा इरवै कोट्कु मत्तुर इत्तद नना केंजतन.

17 नना हळता दर्सनमते, आ गुराल्कुनपोरौ उदिदिस मत्तोर केरता कच्चिता अंगिं, तळमितलेसीं रगारगा, नेळि पंडि रंगुलेसीं आनि गंदकम रंगुनव मत्तां. अवुना तल्लां सिंहमता तल्लानलेसीं दिस्सेक मत्तां. इंका अवुना तोळ्दाल तळमि, पोया, गंदकम पेय्सेक मत्ता.

18 आ मूड गंडाल्कुनाहेंदाल इत्ते, गुराल्कुना तोळ्दाल पेय्सना तळमि, पोया, गंदकम इवुनाहेंदाल बूमिपोरौटा मूड बागाल्कुना लोकुल्कुनाल उंदि बागम लोकुल्कुन हक्किसि पोहमळ जर्गता.

19 आ गुराल्कुना ताकत अवुना तोडिडने, तोकाने मत्ता. अवुना तोकांक तरास तल्लानलेसीं तल्लां मत्ताहाटीं, अव लोकुल्कुन कस्किसि ओर्कुन तिप्पल्क किय्युंदुं.

20 अव गंडाल्कुनाहेंदाल अच्चोन तिप्पल्क वायिनागानि बोर अय्ते हाया हिल्लुरो, ओर ओरा कराब कबाह्कुनाल मनसु मार्सकुन्ना हिल्लुर. ओर देय्याल्कुन इत्ते, वळ्का पर्स्वव, केंजा पर्स्वव, ताका पर्स्वव बंगारम, एंडि, रागि, बंडा, कट्टेतोनि तयार कीता बोम्मन मोळ्कसेकेन मत्तुर.

21 अचोने आयका लोकुल्कुन हक्कमळ, होदें कियमळ, बोगमतनाल्क कियमळ, दोंगातनाल्क कियमळ इसौटा कबाह्कुनालगुडा मनसु मार्सकुन्ना हिल्लुर.

10

पेनदा दूता आनि सिन्ना पुस्तकम

1 पजा, उंदि ताकतवर दूता मब्बु तेर्पेतुन मुचकुंचि स्वर्गमताल हिळ् रेय्सि वायानद नना हळतन. दाना तल्लापोरौ सिंगिड मत्ता. मोकोम पोळ्दुनलेसीं आनि काल्क तळमिता कंबालेसीं मत्तां.

2 विच्चिसि मत्तद उंदि सिन्ना पुस्तकम दाना कय्दे मत्ता. अद दाना तिना कादुन समुद्रमपोरौ, आनि रोड्डा कादुन बारे बूमिपोरौ इरता.

3 पजा सिंहम मोत्कुत्ताप पेदूदा आवाजते मोतकुत्ता. अस्के एडुं मल्कां उस्मताप गड्डेल इंचि आवाज वाता.

4 आ एडुं मल्कां गड्डेल इत्ता आवाज वातस्के, अवुन नना रासानदे मत्ता, अस्केने स्वर्गमताल उंदि लेंग, “एडुं मल्कां उस्मता आवाजताल केंजता पोल्लेन रासमा, अवुन मक्किचि इर्रा,” इंचि इत्तद नना केंजतन.

5 समुद्रमपोरौ आनि बूमिपोरौ काल्क इरसि नित्तिसि मत्ता दूता, स्वर्गमताहेके तिना कय हाहतद नना हळतन.

6 पजा अद दूता, बोरे अयते स्वर्गमतुन आनि अव्टे मनना अन्निटवुन, बूमितुन आनि अव्टे मनना अन्निटवुन, समुद्रमतुन आनि अव्टे मनना अन्निटवुन तयार कीतोर, बस्केळ्ळक जीवाते मनना आ पेनबाबाना पोरोलते ओट्टु तिचि इल्हा इत्ता, “इंका आल्सेम आयो.”

7 गानि एडुंगो दूता दाना तूताकोम बस्के अयते उहकारो, अस्के पेन दाना सेवाकुल्लु आता कबुरतोर्कुंक वेह्चि मत्ता परकारम, दाना मर्ममता पोल्लें पुरागा आयनुं.

8 स्वर्गमताल वाता बद लेंगुन अयते नना केंजसि मत्तानो, अदे लेंग मरां नाकुन, “होन! होंचि समुद्रमपोरों आनि बूमिपोरों काल्क इरसि नित्तिसि मनना दूताता कय्दे, विच्चिसि मत्ता पुस्तकमतुन तेंडकुन,” इंचि इत्तद नना केंजतन.

9 अस्के आ दूतातगा होंचि, “नीवा कय्दे मनना अद सिन्ना पुस्तकमतुन नाकु हीम,” इंचि इत्तन. अस्के अद नाकुन, “इदे दीन पीसि तिन्नु. इद नीवा पीटुन अयते कयमुल कीता, गानि नीवा तोड्डुक मात्रम तेनेलेसी तिथ्यगा दल्गंता” इंचि इत्ता.

10 अस्के आ पुस्तकमतुन दूताता कय्दाल तेंडकुंचि तित्तन. तित्तस्के अयते ना तोड्डुक अद तेनेलेसी तिथ्यागेन दल्गता गानि पीर मात्रम कयमुल आसोत्ता.

11 पजा आ दूता नाकुन, “मसंदि मल्का निमे होंचि हरेक बासा वळकानोर्कुंक, राजुल्लुकुंक, वेल्लेन लोकुल्लुकुंक आनि दुनियाता अन्नि देसेल्लुकुंक, वायाना कालमते ओरपोरों बतल जगानंद मंतानो, अदुना बारेमते बविस्वयानि वेहा” इंचि इत्ता.

11

इव्वुर गवाइदार्क

1 पजा, कहाना पट्टिटसोंटद उंदि पट्टि हीसि बोरो नाक इल्हा वेहतोर, “निमे तेदसि, पेनदा गुळितुन आनि गदूदेतुन कहा. इंका गुळितगा बच्चोर लोकुल्लुक अयते आरादना कीतुर ओर्कुन लेक्का.

2 गानि गुळिता पलाते दारातुन कहामा, अद यहदि आयवोर्कुंक हीसि मंता. पवित्र सहरतुन नल्पै रोंडु नेल्लांदाका ओर जारांतुर.

3 पजा नना नावा इव्वुर गवाइदारकुंक बविस्वयानि कियाना अदिकारम हीतन, ओर पोतां हुटकुंचि पनेंड न्हकुना अरवै रोजकुनदाका बविस्वयानि कीतुर.”

4 आ इव्वुर गवाइदार्क इत्ते, बूमिपोरोंटा सामिना मुन्ने नित्तिसि मनना रोंडु जय्तुन मराक आनि रोंडु दीसोडिं आंदुं.

5 ओक्कला बोरेन्ना आ गवाइदार्कुनपोरों अन्यायम कियालय हळते, ओरा तोळदाल तळमि पेय्शि ओरा नुकसान कियालय हळना पगातोर्कुन बूळ्दि कीसि पोहंता. अवुना नुकसान कियालय हळानोर्कुंक तप्पाकोटा इसोंटा हामुरे वायार.

6 आ गवाइदार्क बविस्वयानि कियाना रोजकुने ओक्कला पिर्ग वायानयते अदुन आपाना अदिकारम ओर्कु हीसि मत्ता. अचोने आयाका ओर्कु बस्के अनपिस्ते अस्के, एतुन नेत्तुरते मार्समळ आनि बूमिपोरोंटा लोकुल्लुकुंक तीराता तकलिप्क हियना अदिकारमगुडा ओर्कु हीसि मत्ता.

7 पेनदा बारेमते ओरा गवाइ वेहामळ आतस्के, लोत पोक्काताल उंदि जिंवरासि पलाते पेय्शि वासि ओरतोनि लडाइ किय्यार. लडाइ कीसि ओर्कुन गेल्लि हक्कार.

8 ओरा पीनगुल्लुकु आ पेदूदा सहरता हर्दे अरसि मनंतां. इगेन ओरा सामिनगुडा कूसुनपोरों वेलाड वाट्टिस मत्तुर. वेरे अर्तमते, अद सहरतुन सदोम आनि इजिप्त इंचि इंतुर.

9 मडूननरा रोजकुनदाका अन्नि जातिनोर, हरेक बासा वळकानोर, अंटोर लोकुल्लुक, दुनियाता अन्नि देसेल्लुकुनोर ओरा पीनगुल्लुकुन हळांतुर, गानि ओर्कुन बोदा मात्रम दोस्सा हिथ्युर.

10 ओर इव्वुर कबुरतोराहेंदाल बूमिपोरों वेल्लेन तकलिपकु वासि मत्तां. अदुनहाटीं ओर हातुर इंचि बूमिपोरोंटा लोकुल्लुक वेल्लेन कुसिते पंडगुल्लुकु कियानुर, वरोंक-वरोर इनामकु हीकुनानुर.

11 गानि मूडुननरा रोजकुना पज्जो, पेनदाहेंदाल पिस्वरता ऊपरि वासि ओरव्ठे नेंगता. अस्के ओर तेदसि निततुर. अस्के ओर्कुन ह्ळता लोकुल्क इरगा वेरियतुर.

12 पजा स्वर्गमताल उंदि पेद्दा लेंग, “इगे पोर्रो वट्टु” इंचि इत्तद ओर इव्वुर गवाइदार्क केंजतुर. केंजसि उंदि मब्बु तेपेंते कलियसि ओरा पगातुर ह्ळानेंकेन स्वर्गमताहेके पोर्रो होत्तुर.

13 अच्चोटेन अदे वेलाते अगा पेद्दा बुकंप आता, अद सहरता पदि बागाल्कुनाल उंदि बागम नासडेम आता. अद बुकंपता हेंदाल एडुं वेय्कुना लोकुल्क हासि होत्तुर. आनि बोर अय्ते पिस्सि मत्तुरो, ओर इरगा वेरियतुर, वेरियसि स्वर्गमते मनना पेनदा महिमा कीतुर.

14 रोंडो गंडम आसोत्ता. ह्ळ्ळट! मूडो गंडम बिरानेन वासेक मंता.

एडुंगो दूता तूताकोम उह्कमळ

15 एडुंगो दूता तूताकोम उह्कता, अस्के स्वर्गमते पेद्दा आवाज केंजावाता. अद आवाज, “दुनियाता पूरा राज्येम मना सामिनद आनि ओना किरिस्तुनद आता. युगा-युगाल्कुनदाका ओर राज्येम कीतोर,” इंचि इत्ता.

16 अल्हा इत्तस्के, राजगद्देन पोर्रो उद्दिदस मत्ता आ इरवै नालुर पेद्दाल्क पेनदा मुन्ने काल्कुनगा बोकबोर्ले अर्सि, पेनदुक आरादना कीतुर.

17 कीसि, “अन्निटकन्ना एक्को सक्तिमंतुन आता मावा पेनदुना! निमे मुन्ने मत्तिन, इंदकेगुडा मंतिन. इंदके निमे नीवा ताकततुन हृपिच्चि राज्येम कियालय सुस्व कीतिन. अदुनहाटी मोमोट नीकु दन्यवाद कीतोम.

18 नीकुन एरपाट कियवा लोकुल्क नीवा विरोद कीताहाटी नीकु होंग वाता. हातोरान्यायम कियाना वेला इंदके एत्ता. अल्हेने नीवा सेवाकुल्कुंक, नीवा पोल्लें वेहाना कबुरतोर्कुंक, नीवा लोकुल्कुंक, नीकु वेरियसि पिस्साना सिन्नाल्कुंक-पेद्दाल्कुंक इनाम हियना वेला एवता. अचोने आयाका बूमितुन नासडेम कीतोर्कुन नासडेम कियाना वेलागुडा वाता,” इंचि इत्तुर.

19 पजा स्वर्गमते मत्ता पेनदा गुळि कुल्ला आता. अय्ते अगा पेनदा करारकुना संदुग दिस्ता. अस्के इरगा मेर्समळ, उस्ममळ, पिडगु वाटमळ, बुकंम आयमळ जर्गता पजा इरगा बंडां अरतां.

12

मुरतळ आनि उंदि पेद्दा मासुल तरास

1 अद आता पजा, स्वर्गमते नाकु उंदि पेद्दा चिन्ह दिस्ता. अद बतल इत्ते, उंदि मुरतळ पोडदुन कप्पिडलेसी पोंडसि मत्ता. दाना काल्कुना हिळु वेळसि आनि तल्लापोर्रो बारे पन्नेड सुक्काना किरिटम मत्ता.

2 अद मुरतळ पीटे मत्ता. मुरतटा एरपूराना वेला वासि मत्ताहेंका अद नोप्पिने तनलाळसेक मत्ता.

3 पजा स्वर्गमते नाकु इंकुदि चिन्ह दिस्ता. अद बतल इत्ते, उंदि एर्राटा पेद्दा मासुल तरास मत्ता. दानकु एडुं तल्लां, पदि कोह्क मत्ता. एडुं तल्लानपोर्रो एडुं किरिटाल्कु मत्तां.

4 अद तरास दाना तोकाते, मब्बुने मनना सुक्काना मूड बागाल्कुनाल उंदि बागम सुक्कान इग्गिस बूमिपोर्रो अरहता. एर पूरालय आसि मत्ता मुरतळ, एर पूरतारित्ते, दाना पेळान मिंगनाहाटी आ तरास, मुरतटा मुन्ने होंचि नित्तिसि मत्ता.

5 अद मुरतळ वरोर मर्रिन कंता. ओर अन्नि राज्येल्कुनपोर्रो कच्चिता सलाकिलेसी कडक राज्येम कियानोर मत्तोर. गानि आ पेळान पेनदागा, दाना राजगद्देतगा ओयमळ जर्गता.

6 अस्के अद मुरतळ बय्लि जेगातेके वित्तुता. अगा दानाहाटी, पन्नेड नुह्कुना अरवै रोजकुनदाका बेस ह्ळकुननाहाटी पेन जेगा तयार कीसि मत्ता.

मासुल तरासतुन स्वर्गमताल पलाते गेदुममळ

7 पजा स्वर्गमते उंदि लडाइ आता. पेनदा मिकायेल इनना दूता, दाना दंटा दूतन पीसोंचि, मासुल तरास आनि दाना दूतानतोनि लडाइ कीता. अस्के मासुल तरासगुडा दाना दूतन पीसि मिकायेलुनतोनि लडाइ कीता.

8 गानि मासुल तरास, दाना दूतां लडाइ गेलसा परा हिल्लें. अदुनहाटीं स्वर्गमते मनालय अवुंक जेगा दोर्काहिल्ले.

9 पजा अद मासुल तरासतुन आनि दाना दूतन बूमिपोर्रीं दोब्बिसीयमळ जर्गता. अद तरास दाना दूतनतोनि कलियसि पूरा दुनियातुन पसांचेके मंता. इद मासुल तरासुन पडाना तरास, हिलाकोटे पसांचनदु, हिलाकोटे देय्यम इंचि इंतुर.

10 पजा स्वर्गमताल उंदि पेदूदा लेंग केंजावाता. अद इल्हा मत्ता, “मा पेनदा मुन्ने मावा विस्वासुलकुनपोर्रीं नर्का-पिय्यल बस्केळ्ळक दोसेम दोस्सेके मनानदुन हिळु बूमिपोर्रीं दोब्बिसीयमळ जर्गता. अदुनहाटीं पेन मनाकु हियना मुक्ति, ताकत, राज्येम आनि दाना किरिस्तुना अदिकारम पलाते अरता.

11 गोर्रिं पोरिना नेत्तुरताहेंदाल, ओर वेहता गवाइ हेंदाल देय्यमतुन गेलसतुर. ओर्कु हामुर वायिनागानि ओर ओरा जीवाता पर्वा किया हिल्लुर.

12 अदुनहाटीं स्वर्गम आनि स्वर्गमते मनानोरिता मिमेट कुसिते मंटु. गानि बूमिपोर्रीं आनि समुद्रमते मनानोर्क मात्रम बच्चोन गोसा वायार! बारित्ते देय्यमतगा वेल्ले टाइम हिल्ले इंचि दान्क तेळियसे मंता, अदुनहाटीं अद वेल्लेन होंगुने मिहगा वाता,” इंचि केंजावाता.

मुरतटुन तिप्पल्क कियमळ

13 बस्के अथ्ते अद तरासतुन बूमिपोर्रीं दोब्बिसीतुर, अस्के अद तरास आ पेळान कंता मुर्ताटुन परेसान कियालय दान पज्जो दल्गता.

14 गानि दानाहाटीं पेन तयार कीसि इरता जेगातगळ्ळक, अद तरासुनाल तपिचुंकुचि परियिसि होनालय पेन दानकु गदूदल रेक्कानसोंटव रोंडु रेक्कां हीता. दानहेंदाल मडुननरा वर्सनदाका अद मुरतटुन बेस हळकुन्मळ जर्गता.

15 आ मुरतळ कम्मटे पोंगिस होनना इंचि तरास दाना तोळ्दाल बेरेडतालेसीं एर पेचाहता.

16 गानि बूमि आ मुरतळ्ळक सहायम कीता, तरास तेंडता एतुन अद मिंगसि वाटता.

17 इदुनहेंदाल तरासुंक मुरतळ पोर्रीं बागा होंग वाता. अस्के तरास आ मुरतटा कळमता वंसंमतोरतोनि, पेनदा आदेसकुनपोर्रीं ताकानोरतोनि आनि येसुना गवाइ वेहानोरतोनि लडाइ कियालय होत्ता.

18 पजा अद तरास समुद्रमता उस्के पोर्रीं होंचि नित्तुता.

13

समुद्रमताल रोंडु जिवरासीं पेसमळ

1 पजा नना उंदि जिवरासि समुद्रमताल पेयसानद हळतन, दानकु पदि कोहकु, एडुं तल्लां मत्तां. कोहकुनपोर्रीं पदि किरिटाळ्ळु मत्तां, तल्लानपोर्रीं पेनदुन अपमानम कियानव पोरोलीं रासि मत्तां.

2 नना हळता जिवरासि सिर्तांगडुनलेसीं मत्ता, दाना काल्क एडजुना काल्कुनालेसीं मत्तां आनि दाना तोड्डि सिंहमता तोड्डिडलेसीं मत्ता. मासुल तरास दाना ताकत, दाना राजगदूदे आनि पेदूदा अदिकारम आ जिवरासिक हीता.

3 अद जिवरासिता एडुं तल्लानाल उंदि तल्लाक हायानसोंटा देब्बा दल्लिसि पुन्नु आसि मत्ता, गानि अद पुन्नु बेस आतद हळसि, दुनियातोर अंटोर इचंत्रम आसि दान पज्जो होनालय दल्गतुर.

4 अद जिवरासिक मासुल तरास अदिकारम हीताहाटीं अंटोर मासुल तरासतुन मोळ्कालय दल्गतुर. पजा ओर, “अद जिवरासितालेसीं बोरन्ना मंतुरा? दानतोनि बोरन्ना लडाइ किया परांतुरा?” इंचि अद जिवरासितुनगुळा मोळ्कालय दल्गतुर.

5 अद जिवरासि पेद्दिदरकेमते आनि अपमानम कियाना पोल्ले वळ्कानाहाटीं पेन दानकु नल्पै रौंडु नेल्लांदाका अदिकारम हीता.

6 पजा अद जिवरासि, पेनदुन, दाना पोरोलतुन, दाना जागातुन, अल्हेने दानतोनि स्वर्गमते मनानोर्कुनगुडा अपमानम कियालय दल्गता.

7 दान्क पेनदा लोकुल्लुकुनतोनि लडाइ कीसि ओर्कुन गेल्लसानद अदिकारम हियमळ जर्गता. इच्चोने आयाका दान्क हरेक जाति, हरेक बासा, हरेक लोकुल्लुकु आनि दुनियाता अन्नि देसेल्लुकुना लोकुल्लुकुनपोर्रीं अदिकारम हियमळ जर्गता.

8 बूमिपोर्रीं मनना अंटोर इद दुनिया तयार आतागटाल, बोरा पोरोल्लुक अय्ते, मोक्कु आता गोर्रीं पोरिना पिस्वरता पुस्तकमते हिल्लेंगो, ओर अद जिवरासितुन मोळ्कानुर.

9 बोर्क अय्ते केव्क मंता ओर बेस केंजिरकांटी.

10 जेल्लुक होनना मत्तोर, जेलने अरानुर. बोर अय्ते कसेटे हक्कतोर, ओनगुडा कसेटेन हक्कमळ जर्गार. इदुन पीसि पेनदा लोकुल्लुकुना विस्वासम, ओप्के दिस अरंता.

बूमिताल पलाते तेंडता जिवरासि

11 पजा नना मसंदि जिवरासितुन बूमि लोप्पोटाल पोर्रीं वायानद हळतन, दान्क गोर्रीं पोरिनलेसीं रौंडु कोहकु मत्तां. अद मासुल तरासुनलेसीं वळ्कसेक मत्ता.

12 इद जिवरासि, हायानसोंटा देब्बा दल्लिसि बेस आता मोदाटा जिवरासिता पूरा अदिकारम दाना मुन्नेने वाळकुंचि कबळ कियुंदु आनि बूमिपोर्रीं मनना अंटोर्कुन आ मोदाटा जिवरासितुन मोळ्कानाल कियुंदु.

13 अल्हेने लोकुल्लुक हळानेंकेन स्वर्गमताल बूमिपोर्रीं तळमि अरहुंदु, इल्हा अरहचि अद पेद्दा-पेद्दा चिन्हां हृप्सुंदु.

14 मोदाटा जिवरासिता मुन्ने इद जिवरासिक चिन्हां हृप्सना अदिकार दोर्कता, अदुनहाटीं चिन्हां हृपिच्चेक बूमिपोर्रीं मनना लोकुल्लुकुन, “बद जिवरासिक अय्ते हायानसोंटा देब्बा दल्लिसि मत्ता, अद जीवाते मंता अदुना बोम्मा कीम्टु,” इंचि बोर्किचुंदु.

15 मोदाटा जिवरासिता बोम्मा वळ्कागोम इंचि बोम्माते जीवोत्रम वाटानद, आनि अदुन बोर अय्ते मोळ्कुर, ओर अंटोर्कुन हक्कना अदिकार दीनकु हियमळ जर्गता.

16 अचोने आयाका अद, सिन्नुर-पेद्दुदुर, सिरमंत-गरिब, दासुल्लुक आयवोर, दासुल्लुक ईर अंटोर्कुन ओरा तिना कयपोर्रीं हिलाकोंटे कपालमपोर्रीं उंदि-उंदि सिक्का वाटागोटा.

17 अद सिक्का इत्ते जिवरासिता पोरोल हिलाकोंटे दाना उंदि नंबर आंद. इल्हा सिक्का बोर्क अय्ते मन्नो ओनकु बतले अम्मावायो, आनि एतावायो.

18 इद पोल्ले तेळियगोम इत्ते बुद्दि गावाले. बुद्दि मत्ता मनकल जिवरासिना लेक्का कियिरकांटी. अद लेक्का वरोर मनकन हृप्संता आनि अद हारं न्हुकुना अरवै हारं आंद (666).

14

गोर्रीं पोरि आनि 1,44,000 लोकुल्लुक

1 मर्रा नना सियोन इनना गूट्टापोर्रीं पेनदा गोर्रीं पोरि नित्तिसि मत्तद हळतन. अगा दानतोनि उंदि लक्सा नल्पै नाल्लु वेय्कुना (1,44,000) मंदि मत्तुर. ओरा कपालमपोर्रीं गोर्रीं पोरिना आनि दाना बाबाना पोरोल रासि मत्ता

2 नना स्वर्गमताल उंदि इसोटा आवाज केंजतन गदा, अद पोंगाना एता वेल्लेन वर्दानालेसीं आनि बागा मब्बु उस्मनालेसीं मत्ता. अद आवाज टांबुरा नेकिसते बल्हा केंजा वांतनो अल्हे केंजा वासेक मत्ता.

3 आ उंदि लक्सा नल्चै नालुं वेय्कुना मंदि राजगद्देता मुन्ने, नालुं जिवरासिना मुन्ने आनि पेद्दाल्कुना मुन्ने पूना पाटा पारसेके मत्तुर. बूमिपोर्रोताल पेन अस्कुत्ता लोकुल्कुनाल ईर तप्पा बोरे आ पाटा पारा पराहिल्लुर.

4 ईर अंतोरगुडा मरमिं आयवोर, मुर्ताह्कुनाल लक्कु मंचि सतातुन पवित्र इरतोर आंदुर. गोर्रे पोरि बगा-बगा अय्ते होनुंदु ईर अंतोर दाना पज्जो-पज्जो होनानोर आंदुर. ईर अंतोरगुडा पेन आनि गोर्रे पोरिनाहाटीं मोदाटा पलम आयगोम इंचि अस्कुत्तोर आंदुर.

5 ओरा तोळदाल बस्केन आबद्दम पोल्ले पेयसा हिल्ले, ओर बेकसुर लोकुल्क आंदुर.

मूड दूताना आदेस

6 अद आता पजा नना पेनदा इंकुंदि दूतातुन मब्बुना नड्डुमताल परियसेक मननद हळतन, दानागा बूमिपोर्रो मनना अंतोर्क, हरेक जातितोर्क, हरेक बासा वळ्कानोर्क, अंतोर लोकुल्कुंक आनि दुनियाता अन्नि देसेल्कुना लोकुल्कुंक वेहालय बस्केळ्क पिस्सना पिस्वर बारेमता बेसता कबुर मत्ता.

7 अद दूता पेद्दा आवाजते, “पेन न्यायम कियाना वेला दमगेर्क एवता. अदुनहाटीं दानकु वेरियट्ट, दाना महिमा कीम्टु. स्वर्गमतुन, बूमितुन, समुद्रमतुन आनि एता ऊटान तयार कीता पेनदा आरादना कीम्टु” इंचि इत्ता.

8 अद आता पजा इंकुंदि दूता वासि, “नासडेम आता, नासडेम आता, पेद्दा बेबिलोन सहर नासडेम आता, अद अन्नि जातिना लोकुल्कुंक दाना बोगमतनमता होंग वायानसोंटा कल्लु उहता” इंचि इत्ता.

9-10 पजा इंकुंदि मूडोव दूता वासि, “बोरे आयिर अद जिवरासितुन आनि दाना बोम्मातुन मोळ्किसि, ओना कपालमपोर्रो आयि हिलाकोंटे कयपोर्रो आयि दाना चिन्हाता सिक्का वाटकुंतोर, ओरगुडा तालिते वळियसि मत्ता पेनदा होंगुना पिव्वर कल्लु उनानुर, उंचि पवित्र दूतन मुन्ने, गोर्रे पोरिन मुन्ने रमा-रमा पोत्तना तळमिते आनि गंदकमता सिक्साते अरानुर.

11 अल्हा ओर वेयनेके पेयसना पोया बस्केळ्क पोरोर्रे तेदसेकेन मनंता. बोर अय्ते आ जिवरासितुन आनि दाना बोम्मातुन मोळ्कंतुर, दाना पोरोलता चिन्हाता सिक्का वाटकुंतुर ओर नर्का-पिय्यल तकलिपतेने मनंतुर,” इंचि इत्ता.

12 अदुनहाटीं पेनदा आदेस परकारम ताकानोर आनि येसु सामिना पोरोर्रे विस्वासम कियाना पेनदा लोकुल्क तिप्पल्कुने ओप्के पियमळे गावाले.

13 अस्के स्वर्गमताल उंदि आवाज, “इल्हा रासा, बोर अय्ते सामिन विस्वासम कीसि हातुर, ओर इंदके नसिबतोर आंदुर,” इंचि नाक केंजावाता. “हो! निजमे, ओरा कस्टमताल ओर्क आराम दोर्कता. ओर कीता कबाहक ओरतोने दांतां,” इंचि आत्मा इत्तद केंजावाता.

बूमिपोर्रोटा पंटातुन कोयमळ

14 पजा नना हळतस्के, नाक तेल्ला मब्बु तेर्पे दिसता. आ तेल्ला मब्बु तेर्पेपोर्रो मनकना रूपमते पुटोनलेसीं वरोर उद्दिदस मत्तोर. ओना तल्लापोर्रो बंगारमता किरिटम आनि ओना कय्दे वेल्लेन करा-करा मत्ता उंदि हेटेळ मत्ता.

15 इंका उंदि दूता पेनदा गुळिताल पेय्सि, मब्बु तेर्पेपोर्रो उद्दिदस मत्तोन, “बूमिपोर्रोटा पंटा कोताक वासि अदुन कोय्याना वेला एवता अदुनहाटीं निमे नीवा हेटेटे अद पंटातुन कोय्या” इंचि जोरसे वेहाता.

16 अस्के तेल्ला मब्बु तेर्पेपोर्रो उद्दिदस मनानोर ओना हेटेळ तिरहातोर, तिराहचि बूमिपोर्रोटा पंटातुन कोयमळ जर्गता.

17 अस्के पेनदा इंकुंदि दूता स्वर्गमते मनना गुळिताल पेयसता. दानागा गुडा वेल्लेन करा-करा मत्ता हेटेळ मत्ता.

18 अस्के गद्देताल पेनदा इंकुंदि दूता वाता. अद दूताक तळमिता अदिकारम हीसि मत्ता. इरगा करा-करा मत्ता हेटेळ पीसि मत्तोनु पेद्दा आवाजते, “बूमिपोर्रो मनना अंगुर पंडिना पंटा पंडता अदुनहाटी नीवा इरगा करा-करा मत्ता हेटेटे अंगुर गुत्ति कोय्या” इंचि इत्ता.

19 अस्के आ दूता दाना हेटेटे, बूमिपोर्रोटा अंगुर पंडिना गुत्ति कोय्सि, पेनदा होंगु इनना अंगुर पंडिना गानगुने वाटसीता.

20 पजा सहरता पलाते मत्ता गानगुनगा गानगु पियमळ जर्गता. अद गानगुताल नेत्तुर पोरो वाता. अद नेत्तुर इच्चोर पेयसता गदा, गुराळ्कुना मोसोटुन दोहाना पट्टानच्चोर एत्तु आनि मूड नुह्कुना किलोमिटर पोंगसेक होत्ता.

15

पेनदा होंगुने निडता बंगारमता एडुं वाटिं

1 अस्के स्वर्गमते नना मसुंदि पेद्दा इचंन्रमता चिन्ह हळतन. अद बतल इत्ते, एडुं दूतानगा, एडुं गंडाल्कु मत्तां. अव आकिरता गंडाल्कु आंदुं. अव आता पजा पेनदा होंगु सल्लारंता.

2 बोर अय्ते आ जिवरासि, बोम्मा आनि दाना पोरोलता नंबरतोनि लडाइ कीसि गेल्लिस मत्तुर, ओर अंटर पेनदा टांबुरां पीसि आ समुद्रमता ओड्डुनपोर्रो नित्तिस मत्तद नना हळतन

3 पेनदा सेवाकुड मूसाना पाटा आनि गोर्रो पोरिना पाटा पारसेके ओर इल्हा इनुंदुर, “ए अन्निकन्ना एक्को सक्तिमतुन आता मावा सामि पेनदुना, नीवा कबाहक पेद्देय आनि इचंन्रमतव आंदुं, निमे बस्केळ्ळक मंदना राजान आदिन, नीवा हरिं नीतितद, आनि सत्तेमतद आंदुं,

4 हे सामि सिराप निमेने पवित्र मंतिन, असोटस्के नीकु वेरियाकोटा, नीवा पोरोलता महिमा कियाकोटा बोर मना परीतोर? नीवा न्यायमतुन अंटर हळतुर, अदुनहाटी दुनियाता अन्नि देसेल्लुकुना लोकुळ्ळक निहगा वासि नीके मोळ्ळकानुर.”

5 अद आता पजा, गवाइता डेराता गुळितुन, स्वर्गमते कुल्ला कीसि मत्तद नना हळतन.

6 आ गुळिताल एडुं दूतां एडुं गंडाल्कुन पीसि पलाते पेयसांतां, अव जगा-जगा तेल्लगा मेर्सना कपडिं केरसि मत्तां. अवुना सातिक बंगारमता पट्टां दोहाचि मत्तां.

7 अस्के आ नालुं जिवरासिनाल उंदि जिवरासि, अव एडुं दूतांक, बंगारमता एडुं वाटिं हिता. आ वाटिने युगा-युगाल्ळक जीवाते मंदना पेनदा होंगु निडिस मत्ता.

8 अस्के अद पूरा गुळि पेनदा महिमाता वेल्गुने आनि ताकतहेंदाल पोयातोनि निडिस होत्ता. पजा आ एडुं दूताना अव एडुं गंडाल्कु पूरा मारनदाका अद गुळि लोप्पो बोरे नेंगा पराहिल्लुर.

16

एडुं गंडाल्कु

1 अस्के गुळिताल उंदि पेद्दा आवाज आ एडुं दूतनतोनि, “होन्टु! पेनदा होंगुना अव एडुं वाटिन बूमिपोर्रो वळियट्टु” इत्तद नाकु केंजावाता.

2 अदुनहाटी पेनदा मोदाटा दूता होंचि, दाना वाटितुन बूमिपोर्रो वळियसीता, अस्के अद जिवरासिता निसानि मत्तोर्कु आनि बोर अय्ते दाना बोम्मातुन मोळ्ळ्ळदुर ओर्कु इरगा नोयाना लसा-लसा पुनकु आतां.

3 पेनदा रोंडो दूता दाना वाटितुन समुद्रमते वळियसीता, अस्के अद समुद्रम हाता मनकना नेत्तुरलेसीं आसोत्ता, पजा समुद्रमते मनानव अन्नि जिवरासि हासोत्तां.

4 पेनदा मूडोव दूता दाना वाटितुन बेरेहकुने आनि एता ऊटान पोरो वळियसीता, अस्के अवटे मत्ता पूरा एर नेत्तुरलेसी आसोत्ता.

5 एतापोरो अदिकारम मत्ता पेनदा दूता इल्हा इनानद नना केंजतन, “ए पवित्र पेनदुना, निमे इंदके मंतिन, मोदालागुडा मत्तिन. निमे न्यायम कियाना पेनदुन, निमेने इवुना इल्हा न्यायम कीतिन.

6 बारित्ते ओर नीवा पवित्र लोकुकुकुन, नीवा कबुरतोर्कुन हक्किसि ओरा नेत्तुर पोंगागोटतुर. अदुनहाटी निमे ओर्कु उनालय नेत्तुर हीतिन, ओर इदुना लायके मंतुर,” इंचि इत्ता.

7 अच्चोटेन मोक्कु हिय्याना गदूदेताल, “ए पेनबाबा, सामि, निमेने अन्निटकन्ना सक्तिमंतुन आता पेनदुन आंदिन. निमे कियाना न्यायमते निजम आनि सत्तेम मंता,” इंचि नाकु केंजावाता.

8 नालंगो दूता दाना वाटितुन पोडदुन पोरो वळियसीता, अस्के लोकुकुकुन दाना दगळाते कर्वगोटाना अदिकारम पोळ्दुंक हियमळ जर्गता.

9 कडक दगाडहेंदाल लोकुल्क कर्विसोत्तुर, अस्के आ गंडालुकुन पोरो अदिकारम मत्ता पेनदुन अपमानम कीतुर गानि ओर दाना महिमा कियानाहाटी सतता पापालुकुनाल मनसु मार्सकुन्ना हिल्लुर.

10 पेनदा हेय्युंगो दूता दाना वाटितुन आ जिवरासिता राजगदूदेपोरो वळियसीता. अस्के दाना राज्येमते पुरागा हीकट आता. पजा तिप्पल्कुंक आगा पराका लोकुल्क ओरा नाल्के ओरे कोर्कुकुनालय दल्यात्तुर.

11 ओर्क वाता तिप्पल्क, ओर्क आता पुनकुन हेंदाल स्वर्गमते मनना पेनदा अपमानम कीतुर. गानि ओर कीता पापालुकुनाल मनसु मार्सकुना हिल्लुर.

12 पेनदा हांसो दूता दाना वाटितुन परात इनना पेदूदा बेरेटे वळियसीता. अस्के अद बेरेटा एर बोत्तिगा इनकिसि होत्ता, पोळ्द पेयसना दिक्कुने मनना राजालोर्कुंक हारि आयगोम इंचि आ दूता अल्हा कीता.

13 पजा नना अद मासुल तरासता तोळ्दाल, आ जिवरासिता तोळ्दाल, पेनदा आबदूदम कबुरतोना तोळ्दाल पन्नेतसोटा मूड दुस्तात्मां पलाते पेयसानद हळतन.

14 इव चिन्हां हृप्सना देय्याल्कुना आत्मां आंदु. आत्मा अन्निटकन्ना एक्को सक्तिमंतुड आता पेनबाबानतोनि आकिरता रोजकुने लडाइ कियानाहाटी, दुनियाता अंतोर राजालोर्कुन उंदि कियालय ओरगा होंचेके मंतां.

15-16 अव आत्मां आ राजालोर्कुन इब्रानि बासाते अरमिगदोन इनना जेगातगा कल्पतां. अदुनहाटी येसु, “हुळाट नना मिहगा दोंगानलेसी वांतन, बोर अयते तेल्बिते मंचि, केराना कपडिन कापाळकुंतोर ओर आसिर्वाद दोर्कतोर आंद. बोरे आयिर अल्हा मनाकोटे मैदुल कुळ्के दिस्सि लोकुकुकुना मुन्ने ओनद ओर सिग्गु पोगोटकुत्तोर आंतोर” इंचि वेहतोर.

17 पेनदा एडुंगो दूता दाना वाटितुन वळि पोरो वळियसीता, अस्के स्वर्गमते मनना गुळिता राजगदूदेताल पेदूदा आवाजते, “बोत्तिगा आता” इत्तद केंजावाता.

18 अस्के मब्बु मेर्सालय, गळ-गळा इंचि उरमालय दलगता, पजा इद बूमिपोरो लोकुकुल्क पुटतस्केटाल अयते, बस्केने आयाहिल्ले असोटा पेदूदा बुकंप आता.

19 अस्के आ पेदूदा सहरता मूड तुकळां आतां. वेरे-वेरे देसेल्कुना सहरकंता कृल्सि अरतां. पेन दाना तलातला आयाना होंगुना अंगुर कल्दुन पेदूदा बेबिलोन सहरकु उहानाहाटी अद मति मर्गाहिल्ले.

20 दीबे अवुना जागाताल मायसोत्तां, गुट्टां बग्गेन दिसाकोटा आतां.

21 मब्बुनाल एबै किलो वजन मत्ता बर्प बंडां लोकुकुकुनपोरो अरताहाटी लोकुकुकुंक इरगा तकलिप आसि, ओर पेनदा अपमानम कीतुर. अद तकलिप वेल्लेने कतरनाक मत्ता.

1 अस्के गंडालकुना एडुं वाटिं पीसि मत्ता दूतानाल उंदि दूता नाकुन, “हिकके वा! वेल्लेन एता जलनपोर्रो उद्दिदस मत्ता बोगमदान्कु दोर्काना सिक्सा बंदो नीकु हृप्संतन,

2 बूमिपोर्रोटा राजालोर दानतोनि बोगमतनम कीतुर, दाना बोगमतनमता कल्दुन उंचि बूमिपोर्रोटा लोकुकक रिम्मालोर आतुर.” इंचि इत्ता.

3 नना पवित्र आत्माते निडतस्के, आ दूता नाकुन बय्लि जेगाते ओता. अगा पदि कोहकु आनि एडुं तल्लां मत्ता उंदि एर्राटा जिवरासिपोर्रो उंदि मुरतळ उद्दिदस मत्तद नाकु दिस्ता. आ जिवरासिता मेंदुलमेड पेनदा अपमानम कियाना पोल्लेगे रासि मत्तां.

4 अद मुरतळ नेडि पंडि रंगु आनि एर्रा रंगुना कपडिं केरसि मत्ता. इंका डिस्को पूसां, मोतीना दुमें वाटकुंचि मत्ता. अल्हेने दाना कयदे बंगारमता वाटिं मत्ता. अद वाटिते दाना बोगमतनम कियाना अपवित्र वस्तु आनि दाना पापालक निडिस मत्तां.

5 दाना कपालमपोर्रो, “पेद्दा बेबिलोन, बोगामोताहकुना अल्हेन हयसुवा वस्तुकुना तल्लुर” इंचि मर्ममते रासि मत्ता.

6 अद मुरतळ पेनदा लोकुककुना नेत्तुरतुन आनि येसु सामिना गवाइताहाटी जीवा हीतोरा नेत्तुरतुन उंचि रिम्मा आतद हळसि नाकु वेल्ले इचंत्रम आता.

7 अस्के पेनदा दूता नाकुन, “निमे इचंत्रम बारि आतिन? नना इद मुरतळता आनि अद उद्दिदस मत्ता पदि कोहकु आनि एडुं तल्लां मत्ता जिवरासिता मर्ममतुन वेहांतन,

8 निमे हळता जिवरासि मोदाला मत्ता गानि इंदके हिल्ले, अद वेल्लेन लोत पोक्काताल पेय्शि नासडेमते अरार. दुनिया पुटतस्केटाल बूमिपोर्रो मनानोरा बोरा पोरोलीं अयते पिस्वरता पुस्तकमते रासि हिल्लें, ओर अद जिवरासितुन हळसि, ‘इद मोदाला मत्ता, इंदके हिल्ले गानि मर्रा वायानद मंता’ इंचि इचंत्रम आयानुर.

9 इव पोल्ले तेळियगोम इत्ते तेल्वि-बुद्दि गावाले. अव एडुं तल्लां इत्ते, अद मुरतळ उद्दिदस मत्ता एडुं गट्टां आंदुं.

10 अल्हेने एडुर राजालोर इंचिगुडा दाना अर्तम आंद. एडुर राजालोरव्हेटाल हेय्युर अयते अर्सोत्तुर. इंदके वरोर मंतोर, इंकावरोर इदवेरदाका वायाहिल्लोर. ओर वातस्के ओन्क कोन्नि रोजकु राज्येम किये पीता.

11 मोदाला मत्ता इंदके हिल्ले इत्ता जिवरासि इत्ते, एनमिदो राजाल आंदु. ओरगुडा एडुर राजालोरसंतोरे गानि ओरगुडा नासडेम आयानुर.

12 निमे हळता पदि कोहकु इत्ते, ओर पदि राजालोर आंदुर. आ राजालोर इदवेरादाका राज्येम ताकसा हिल्लुर गानि ओर्कु आ जिवरासितोनि उंदि गंटादाका राज्येम ताकसना अदिकारम हियमळ जर्गता.

13 ओर अंतोर उंदि मनसु आसि ओरा ताकत, अदिकारमतुन अद जिवरासिक हीतुर.

14 ईर राजालोर गोर्रिं पोरिनतोनि लडाइ कियानुर. गानि गोर्रिं पोरि सामिल्लकुना सामि, राजालोरा राजाल आताहाटी, अद दाना केयतोर, पेरतोर आनि विस्वासुल्लुकुनतोनि कलियसि आ राजालोर्कुन गेलसंता,” इंचि इत्ता.

15 अद आता पजा दूता नातोनि, “बोगामोतळ उद्दिदस मत्ता बव एता जलां अयते निमे हळतिन, अव जलां इत्ते, वेरे-वेरे लोकुकक, वेरे-वेरे लोकुककुना मंदां, वेरे-वेरे देसेल्लुकुनोर, वेरे-वेरे बासां वळकानोर आंदुर.

16 इंका निमे हळता जिवरासि आनि दाना पदि कोहकु, आ बोगमतनम कीता मुरतटुन हैय्सों. दान दिक्कु हिल्लाकोटा कीसि दाना कपडिं हिलाकोटा कीतां. दाना मेंदुलता हव्विन तिचि, तळमिते वाटसीतां.

17 बारिल्ले पेनदा पोल्ले पुरागा आयानदाका, ओर अंतोर राजालोर उंदि मनसु आसि ओरा राज्येमतुन जिवरासिक हियना इंचि पेने ओरा मनसुने वाटता.

18 इंका निमे हळता मुरतळ इत्ते, दुनियाता राजालोरपोर्री राज्येम कियाना पेद्दा सहर आंदु” इंचि वेहता.

18

बेबिलोनता नासडेम

1 अद आता पजा नना उंदि पेनदा दूतातुन स्वर्गमताल हिळु रेयसेक मत्तद हळतन, आ दूताक वेल्लेने अदिकारम हीसि मत्ता. दाना महिमाता वेल्गुने बूमिअंता जग्गरा आता.

2 आ दूता पेद्दा आवाजते वरगेयसि, “हिळारता, बेबिलोन पेद्दा सहर हिळारता. इंदके अद देय्याल्क, दुस्ट आत्मां मनना जागा आता. बताके ओज्जुवव आनि हय्सुवा पिट्टें अगा जागा पीतां.

3 बारित्ते, दाना बोगमतनमता कल्लु अन्नि देसेल्कुनोर उट्टुर. बूमिपोर्रीटा राजालोर दानतोनि बोगमतनम कीतुर, अद बोगमतनम कीसि कमय कीता दनमताहेंदाल बूमिपोर्री दंदा कियाना लोकुल्क सिरमंतुल्क आतुर” इंचि वेहता.

4 अस्के स्वर्गमताल इंकुंदि आवाज इल्हा केंजावाता गदा, “ना लोकुल्कुनिटा दाना पापमते कलियमट, दानपोर्री वायना गंडाल्कु मीपोर्री वायामन्नि इत्ते दानगटाल पलाते पेयसट.

5 दाना पापाल्कगुडा वेल्लेन आसि स्वर्गमदाका एवतां, पेनगुडा दाना तप्पुड कबाह्कुन मति कीता.

6 अद मीतोनि बल्हा कीतनो अल्हे मिमेटगुडा दानतोनि कीम्टु, अद कीता कबाह्कुनाहेंदाल दान्क रौडु अंताल्क हीम्ट. बद वाटिते अयते अद मीकु निहाचि हीता अदे वाटिते मिमेटगुडा रौडु अंताल्क निहाचि हीम्ट.

7 अद बल्हा अयते पेद्दिरकेमते, सुकमते मत्ता, अल्हेने दान्क तिप्पल्क, दुक्काल्क हीम्ट. बारित्ते अद दाना मनसुल्कुने, नना रानिन आंदुन, मुंडामोस्तादान आयोन, इंका नना बस्केने तिप्पल्कुने अर्रीन,” इंचि इनकुंता.

8 अदुनहाटीं हामुर, दुक्कम, कर्बु इवन्नि तकलिपकु उंदे रोजुने दानपोर्री वायानुं, दाना न्यायम कियाना सामि पेनबाबाल दानकन्ना वेल्लेन बलम मत्तोर आताहाटीं अदुन तळमिते बोळिसि बूळिद कियानुर.

9 बूमिपोर्रीटा बोर राजालोर अयते दानतोनि बोगमतनम कीसि सुकमते मत्तुर, आ राजालोर दानु वेयानद हळसि, सतता साति तंचेके अळानुर.

10 ओर दाना तकलिपकुन हळसि, वेरियसि वेल्लेन लक्कु होंचि नित्तिसि, “अय्यो पेद्दा सहर, ताकत मत्ता बेबिलोन, उंदे गंटालोप्पो नीपोर्री पेनदा सिक्सा वासि अरता” इंचि इनानुर.

11 ई बूमिपोर्री दंदा कियानोर, अद वेय्यनदुन हळसि, इंदके ओरा सामानतुन अस्सानोर बोर हिल्लुर इंचि अळानुर, दुक्कम कियानुर.

12-13 अव सामान बव इत्ते, बंगारम, एंडि, डिस्को पूसां, मुच्याल्कु, मेत्तटा कपडिं, नेडि पंडि रंगुना कपडिं, रेसिम कपडिं, अन्नि रकाल्कुना गमागमा गब्बु वायाना कट्टें, एक्को दराता कट्टें, कच्चि, इत्तोडिता सामान, नुनटा बंडाना टाइल्स्कु, अन्नि तीरकुना मसालां, मसालाले वाटाना सेक्का, दालचिनि, * मसालां, ऊदु, अत्तरनिय्कु, अंगूर कल्लु, निय्कु, मैदा, गोह्कु, गोडकु-कोंदा, एटिं-गोर्री, गुरील्कु, रताल्कु, दासुल्क, लोकुल्कुना जीवां अम्मंदुर, गानि इंदकेटाल इवुन बोर अस्सुर.

14 नीकु इस्तामाता पंडि निहागटाल लक्कु होत्तां, रसि आता तिडि, नीकु सुकम दोर्कना वस्तुक नासडेम आतां. मर्री अव निहागटोर्क बोर्के बस्केने दोर्को.

15-17 इव वस्तुकुन अम्मिसि अद सहरताहेंदाल सिरमंतुल्क आता आ दंदा कियानुर, दाना तिप्पल्कुन हळसि वेरियसि लक्कु होंचि, “नेडि पंडि रंगुना आनि एर्री रंगुना कपडिं, बंगारम, डिस्को पूसां, मुच्याल्कुना दुम्मे वाटसि मत्ता पेद्दा सहरतुना, उदे गंटालोप्पो नासडेम आसोत्तिन इंचि बादा

* 18:12-13 इदु उंदि मसालाले मनना उंदि सेक्का आंदु.

पळसेके अळंतुर.” जहाजकु ताकसानुर, अव्ठे उद्दिदिस होनानुर, अव्ठे कबळ कियानुर, अल्हेने समुद्रमताहेंदाल कोत्तां कमांचना हरेक मनकल दान नासडेम आयानद ह्ळसि लक्कु होंचि नित्तांतुर.

18 अद सहर वेयाना पोया ह्ळसि, “अद सहरतालेसीं पेद्दा सहर बदाना मंताना?” इंचि इनानुर.

19 पजा ओर वेल्लेन दुक्कमते, ओरा तल्लनपोरों दुब्बा दोसकुंचि, दुक्कमते, अळसेके, वरगेयसेके, “अय्यो पेद्दा सहरतुना, समुद्रमते जहाजकु मनना हरेक मनकल नीहेंदाल सिरमंतुल्क आतुर. गानि उंदे गंतालोप्पो निमे पुरागा नासडेम आतिन” इंचि इनालय दलगंतुर.

20 “ए स्वर्गमते मनानोरिटा, पेनदा पवित्र लोकुल्कुनिटा, प्रेरितुल्कुनिटा आनि पेनदा कबुरतोरिटा, अद सहर नासडेम आताहाटीं कूस आम्टु, अद सहर मीकुन हारिं तप्पिस्ता इंचि पेन दानकु दगता सिक्सा हीता” इंचि आ पेनदा दूता वेहता.

21 अस्के वेल्लेन बलम मत्ता उंदि पेनदा दूता, जोत्तातसोंटा पेद्दा बंडातुन तेहचि समुद्रमते वाटसि इल्हा इत्ता, “पेद्दा बेबिलोन सहरतुन नासडेम कियानाहाटीं पेनगुडा इल्हे पोच्चंता, पजा अद मर्रां बस्केन दिस्साकोटा आयार.

22 टांबुरा नेकसानोरा, पाटा पारानोरा, त्रीला उहकानोरा, तूताकोम उहकानोरा आवाज इंदकेटाल बस्केने नीवा लोप्पो केंजा वायो. निहगा कबाहक कियानोरगुडा इंदकेटाल बस्केने दिस्सुर. जोत्ता नोराना आवाज गुडा निहगा केंजा वायो.

23 इंदकेटाल नीवा लोप्पो पंतेना वेळसि बस्केने दिस्सो. मरमिने एगराना-दुनकाना सप्पुड बस्केने केंजा वायो. बारित्ते निहगा दंदा कियाना लोकुल्क पूरा बूमिपोरों पेद्दाल्क मत्तुर, इंका निमे नीवा होदें-मंत्राल्कु कीसि अन्नि देसेल्कुनोर्कुन पसांचतिन.

24 निहगा पेनदा कबुरतोरानेत्तुर, पेनदा लोकुल्कुना नेत्तुर अल्हेने वेरे लोकुल्कुना नेत्तुर दिस्ता” इंचि वेहता.

19

स्वर्गमते पेनदा स्तुति

1 अस्के स्वर्गमते वेल्लेन मंदिलेसीं पेद्दा आवाजते, “हालेलुया! मुक्ति, महिमा आनि ताकत मा पेनदा कय्देन मंता,

2 अद कियाना न्यायम सत्तेमतद आनि नीतिगल्लद आंदु, बारित्ते बेबिलोन सहर बोगमतनम कीसि पूरा दुनियातुन हेळाहता. अदुनहाटीं पेन दान्क सिक्सा हीसि दाना सेवाकुल्कुना बदला येतता,” इंचि इनानद केंजावाता.

3 मरुंदि मल्का ओर, “हालेलुया! अद सहर वेयाना पोया युगा-युगाल्कुनाहाटीं पेय्सेकेन मंता,” इंचि इत्तुर.

4 अस्के आ इरवै नालुर एनकटा पेद्दाल्क आनि आ नालुं जिवरासीं राजगद्देपोरों उद्दिदिस मत्ता पेनदा काल्कुनगा टोंगरां ऊनसि, “आमीन हालेलुया!” इंचि मोळ्कतुर.

5 अस्के राजगद्देताल उंदि आवाज, “ए पेनदुक वेरियसि पिस्साना दाना सेवाकुरिटा, मिमेट सिन्ना-पेद्दा बोरे आम्टु, अंतोर पेनदा स्तुति कीम्टु,” इंचि इनानद केंजावाता.

6 पजा नाकु वेल्लेन मंदितालेसीं आवाज, वेल्लेन एता तळाना आवाज आनि मब्बु उस्मताप आवाज केंजावाता. अद आवाज, “हालेलुया! सामि मना पेनबाबाल वेल्लेन सक्तिमंतुड आंदुर. ओरे राज्येम ताकिचेके मंतोर.

7 गोरें पोरिना मरमिं दग्गेर्क एवतां, मरमिं आयालय मरमिना पेगिडगुडा तयारे मंता. अय्ते वट्ट, मनम आनंदमते, कुसिते दाना स्तुति कीकोम.

8 दान्क पौडालय साप-सुतरा तेल्लाटा आनि मेर्सना मलमल कपडिं हीतुर. आ मलमल कपडिं इत्ते, पेनदा लोकुल्क कीता नीति कबाहक आंदु” इंचि वेहानद नना केंजतन.

9 पजा पेनदा दूता नाकुन, “गोरे पोरिना मरमिना गाटो तिनालय बोर्कुनयते केयमळ जर्गता ओरे आसिर्वाद दोर्कतोर आंदुर.” पजा, “इद पेनदा सत्तेम पोल्ले आंद, इदुन रासा,” इंचि मर्रा इत्ता.

10 पजा नना आ दूताता काल्क मोळ्कालय दाना काल्कनपोर्रो अरतन अयते अद नाकुन, “निमे नाकुन मोळ्कमा. ननागुडा नीलेसी, नीवा दंटाता विस्वासुल्कनलेसी येसुना बारेमता गवाइ वेहासेके सेवा कियानोने आंदुन. निमे सिराप पेनदुने मोळ्का. बारित्ते येसुना बारेमता गवाइ इत्तेने बविस्वयवानिता आत्मा आंद.”

तेल्ला गुर्रमपोर्रो उदमळ

11 अस्के स्वर्गम कुल्ला आसि मत्तद हळतन, अगा नाकु उंदि तेल्ला गुर्रम दिस्ता. दानपोर्रो उद्दिदिस मत्तोने, विस्वासमगल्लोड, सत्तेमतोर इंतुर. ओर नीतिते न्यायम कीसि लडाइ कीतोर.

12 ओना कळ्क पोत्तना तळमितालेसी मंतां, ओना तल्लापोर्रो वेल्लेन किरिटाळ्कु मत्तां. ओनापोर्रो उंदि पोरोलगुडा रासि मंता, आ पोरोलता अर्तम ओन्क तप्पा बोर्के तेळियो

13 ओर नेत्तुरते मुळहाता कपडिं केरसि मत्तोर. ओना पोरोल “पेनदा पोल्ले” आंद.

14 स्वर्गमते मनना सिपाइल्क तेल्लगा साप-सुतरा मलमल कपडिं केरसि, तेल्ला गुर्राल्कनपोर्रो उद्दिदिस ओना पज्जो-पज्जो होंचेके मत्तुर.

15 अन्नि देसेल्कुनोर्कुन हक्कनाहाटी ओना तोळ्दाल उंदि वेल्लेन करा-करा मत्ता कसेर पलाते पेयसंता. ओर आ देसेल्कुनापोर्रो कडक राज्येम ताकसंतोर आनि अन्निटकन्ना सक्तिमंतुड पेनदा होंगुना अंगुर रसमता गानगु पोक्कातुन जारांतोर.

16 ओना कपडि आनि तोडापोर्रो, “राजालोर्कुना राजाल, सामिल्कुना सामि,” इंचि रासि मंता.

17 अस्के पोळ्दुनपोर्रो उंदि दूतातुन निलसि मननद नना हळतन. अद मब्बुन पोरोर्रि परियना अन्नि पिट्टेन पेद्दा आवाजते, “वट! पेनदा गाटो तिननाहाटी जमा आम्टु,

18 मिमेट वाते, राजालोरा हव्विं, सिपाइल्कुना हव्विं, अदिकारिल्कुना हव्विं, गुर्राल्कुना हव्विं, गुर्राल्कु ताकसानोरा हव्विं, दासुल्कुना हव्विं, दासुल्क आयवोरा हव्विं, इल्हा सिन्ना-पेद्दा अन्नि लोकुल्कुना हव्विं तिनालय मीकु दोर्कता” इंचि इत्ता.

19 अस्के अद जिवरासि, दुनियाता राजालोर आनि ओरा सिपाइल्क गुर्रमपोर्रो उद्दिदिस मत्तोनेतोनि आनि ओना सिपाइल्कनतोनि लडाइ कियालय जमा आतद नना हळतन.

20 पजा अद जिवरासितुन आनि पेनदा आबद्दम कबुरतोन दोर्का पियमळ जर्गता. ओर कीता चिन्हाना हेंदाल, अद जिवरासिता सिक्का तंचि मत्तुर्कुन आनि दाना बोम्मातुन मोळ्कानोर्कुन पसांचमळ जर्गता. ओर इव्वुर्कुनगुडा गंदकमते रमारमा पोल्सेके मनना तळमि गुंडमते जीवाते मननेकेन वाटसीयमळ जर्गता.

21 कळ्मातोर्कुन बारे आ गुर्रमपोर्रो उद्दिदिस मत्तोना तोळ्दाल पेयसता कराकरा कसेटे हक्कमळ जर्गता. पजा पिट्टे वासि ओरा अंतोरा हव्विन पीरमेड तित्तां.

20

वेय वर्सानाहाटी देय्यमतुन दोहाचि इरमळ

1 पजा उंदि दूता, स्वर्गमताल हिळ्ळ रेय्सि वायनद नना हळतन. दानागा वेल्लेन लोत पोक्काता तालम कय्क आनि उंदि पेद्दा गोल्सु मत्ता.

2 पजा आ दूता, बदुन अयते इबलीस, देय्यम इंतुरो आ पळाना मासुल तरासतुन दोर्कापीसि वेय वर्सानाहाटी दोहाचि वाटता.

3 पजा, वेय वर्सा निडनदाका वेरे-वेरे देसेल्कुनोर्कुन बोर्किच्चा मन्नि इंचि आ दूता दान वेल्लेन लोत पोक्काते वाटसि बंद कीसि दानपोर्रो सिक्कां तंता. वेय वर्सा निडतस्के जेरासेपताहाटी दान होळसा पिथ्यार.

4 मर्रा राजगद्दे हळतन. अबुनपोर्रो उद्दिदस मत्तोर्कुंक न्यायम कियाना अदिकारम हीसि मत्ता. इंका येसुना बारेमते गवाइ वेहताहाटीं आनि पेनदा पोल्ले वेहताहाटीं बोरा तल्लां अयते कोयमळ जर्गता, बोर अयते जिवरासितुन हिलाकोटे दाना बोम्मातुन मोळ्का हिल्लुर आनि कपालमपोर्रो हिलाकोटे कयदापोर्रो दाना चिन्ह वाटकुना हिल्लुर असंटोरा आत्मान नना अगा हळतन. ओर मर्रा जीवाते तेदसि किरिस्तुनतोनि कलियसि वेय वर्सनदाका राज्येम कीतुर.

5-6 इदे मोट्टा मोदाटा हासि मर्रा जीवाते तेदमळ आंद. कळमातोर बोर अयते हासि मत्तुरो, ओर इव वेय वर्सा निडनदाका मर्रा जीवाते तेदा हिल्लुर. इल्हा मोट्टा मोदाटा मर्रा जीवाते तेदतोर बोर अयते मत्तुरो ओर पवित्र आनि आसिर्वांद दोर्कतोर आंदुर. ओरपोर्रो रोंडो हामुरता ताकत कबळ किय्यो. गानि ओर पेनदा आनि किरिस्तुना पेर्मालोर् आंतुर. आसि किरिस्तुनतोनि कलियसि वेय वर्सा राज्येम कीतुर.

देय्यमतुन तळमिते वाटमळ

7 वेय वर्सा आतारित्ते, दोहाचि मत्ता देय्यमतुन होळ्सीयमळ जर्गा.

8 अस्के आ देय्यम पलाते वासि, बूमिपोर्रो नालुं मूलाने मनना अन्नि देसेल्कुनोर्कुन इत्ते, गोग, मागोग इनना लोकुल्कुन नडेह कीसि लडाइहाटीं जमा कीता. समुद्रमता उस्केलेसी लेक्का परवच्चोन लोकुल्क ओर मंतुर.

9 ओर पूरा बूमिअंता पैलांचि होत्तुर. पजा ओर पेनदा लोकुल्कुना डेरां आनि पेनदा पावरमगल्ला सहरता सुट्टु आतुर. गानि स्वर्गमताल तळमि हिळु रेय्से ओर्कुन नासडेम कीसि पोहता.

10 अस्के, जिवरासितुन आनि आबद्दम कबुरतोर्कुन बगा अयते मुन्नेन वाटतुरो, अदे गंदकमतोनि बगा-बगा पोतसेके मनना तडमिते, ओर्कुन नडेह कियाना देय्यमतुन वाटमळ जर्गता. अगा ओर नर्का-पिय्यल युगा-युगाल्कुनाहाटीं तडमि मंटाते तनलाळसेक मनांतुर.

हासि मत्तोरान न्यायम कियमळ

11 पजा नना, उंदि तेल्लाटा राजगद्दे आनि दानपोर्रो उद्दिदस मत्तोन हळतन. बूमि, मब्बु ओना मुन्नेटाल पेय्से वित्तुतां. मर्रा अवुंक बग्गेन जेगा दोर्काहिल्ले.

12 पजा, हासि मत्ता सिन्नाल्कुन-पेट्टुदाल्कुन अंटोर्कुन राजगद्देता मुन्ने नित्तिसि मत्तद नना हळतन. पुस्तकाल्क विच्चिसि मत्तां. पजा इंकुंदि पुस्तकम विच्चुमळ जर्गता, अद पुस्तकम इत्ते पिस्वरता पुस्तकम आंद. पुस्तकाल्कुने रासि मत्ता पोल्लेन पोर्रोटाल, हासि मत्तोर कीता कबाह्कुन पीसि ओरा न्यायम कियमळ जर्गता.

13 अस्के समुद्रम, दानागा हासि मत्तोर्कुन अप्पजेपता. पातालम आनि नरकम, अबुनगा हासि मत्तोर्कुन अप्पजेपता. ओर कीता कबाह्कुन पीसि ओरा अंटोरा न्यायम कियमळ जर्गता.

14 पजा पातालमतुन आनि नरकमतुन तळमिता सेरवुने वाटमळ जर्गता. ई तळमिता सेरवु इत्ते रोंडो हामुर आंदु.

15 पिस्वरता पुस्तकमते बोरा-बोरा पोरोलीं अयते रासि मना हिल्लेंगों, ओर्कुन अंटोर्कुन तळमिता सेरवुने वाटमळ जर्गता.

21

पूना स्वर्गम, पूना बूमि

1 पजा नना उंदि पूना स्वर्गम, उंदि पूना बूमितुन हळतन. बारित्ते, मोदाटा स्वर्गम, मोदाटा बूमि मायम आसि होत्ता, इंका समुद्रमगुडा मनाहिल्ले.

2 अस्के, पेनदागटाल पवित्र सहर पूना येस्सलेम, स्वर्गमताल हिळु रेयानद नना हळतन. मरमिना पेडानाहाटीं, मरमिना पेगिड बल्हा तयार आंता, अल्हा अद सहर दिस्सेक मत्ता.

3 पजा राजगद्देतगटाल उंदि पेद्दा लेंग इल्हा केंजावाता, “हुळाट, पेन इंदके मनकालोरा नड्डुम जेगा आता. अद ओरतोने मनंता. ओर दाना लोकुल्क आंतुर, अद कुद्दु ओरा पेन आसि ओरतोने मनंता.

4 अद ओरा कळकुना कांडेहकुन उस्मंता. मोदाटा पोल्लें मायसोत्तां, अदुनहाटी ओर्कु हामुर, दुक्काल्क, बादां, तिप्पल्क मन्नों,” इंचि केंजावाता.

5 अस्के राजगद्देपोरी उद्दिदस मल्लोर ओर, “हुळाट! नना अन्निटवुन पूनाव कीसि वाटंतन” इंचि इल्लोर. मरी ओर, “इव पोल्लें सत्तेम, विस्वासमलायकतव आंतुं, इवुन रासा,” इंचि नाकु वेहतोर.

6 पजा मरुदि मल्लका नाकु इल्हा वेहतोर, “इव पोल्लें पुरागा आतां. अल्पा आनि ओमेगा, मोदोल आनि आकिर ननाने आंतुन. दूपाते मल्लोर्कुक नना पिस्वरता एता ऊटाताल एर पुक्कटते हीतन.

7 गेल्लसानोर अंतोर इव अन्निटवुना वारसदार्क आंतुर. नना ओरा पेनदुन आंतन, ओर नावा पिलाल्क आंतुर.

8 गानि वेरियानोर, विस्वासम हिल्लोर, कराब कबाहक कियानुर, हक्कानुर, बोगमतनम कियानुर, होदें कियानुर, बोम्मान मोळकानुर आनि आबद्दम वळकानुर अंतोर, गंदकमते गबा-गबा पोतसेके मनना तळमिता सेरवुने अरानुर. इद्दु रौडो हामुर आंद,” इंचि वेहतोर.

पूना येस्सलेम सहर

9 पजा, एडुं वाटिने आकिरता एडुं गंडाल्कुन पीसि मत्ता एडुं दूतानाल उंदि दूता नहगा वासि, “हिकके वा! नना नीकु मरमिना पेगिटुन, इत्ते गोरें पोरिना मुत्तोन हुप्संतन” इंचि इत्ता.

10 अस्के आ दूता, नना पवित्र आत्माते निडिसि मन्नेके नाकुन उंदि पेद्दा एत्तु गुट्टापोरी ओता. ओसि, पेनदागटाल पवित्र येस्सलेम सहर स्वर्गमताल हिळु रेयानदुन नाकु हपिस्ता.

11 अद सहर पेनदा महिमाता वेल्गुने निडिस मत्ताहेंका दाना कांति यसब इनना वेल्लेन दाराता बंडालेसी मेर्सेक मत्ता.

12 अद सहर सुट्टु उंदि पेद्दा एत्तु गुरे मत्ता. दान्क पन्नेड गल्मां मत्तां. पन्नेड गल्मानगा पन्नेड दूतां मत्तां. आ गल्मनपोरी इझाएल लोकुल्कुना पन्नेड वंसाल्कुना पोरोलीं रासि मत्तां.

13 पोळ्द पेयसनहेके मूड गल्मां, पोळ्द अरनहेके मूड गल्मां, दक्खिनतेके मूड गल्मां आनि उत्तरतेके मूड गल्मां मत्तां.

14 अद सहर सुट्टु मत्ता गुरे पन्नेड पूनादिनपोरीं निल्लिस मत्ता. आ पन्नेड पूनादिनपोरीं गोरें पोरिना पन्नेड प्रेरितुल्कुना पन्नेड पोरोलीं रासि मत्तां.

15 नातोनि वळ्कता दूतातगा, अद सहरतुन, दाना गुरेन आनि दाना गल्मन कहालय, बंगारमता उंदि सलाकि मत्ता.

16 अद सहर नालुं मूलाना आकारमते दोहाचि मत्ता. अद सहरता पोडगु आनि नेर्वु समानम मत्ता. अद बंगारमता पट्टिते सहरतुन कहता, अस्के अद सहर 2,400 किलोमिटर पेयसता. सहरता एत्तु, नेर्वु, पोळ्गु समानम मत्ता.

17 पजा आ दूता सहरता गुरेतुन कहतस्के, आ गुरे मनकना कूटाते इत्ते दूताता कूटातेगुडा नूटा नल्पै नालुं कूटां मत्ता.

18 अद गुरे यसब इनना एक्को दाराता बंडाते दोहाचि मत्ता आनि अद सहर काचुनलेसी मेर्सेना पिच्चर बंगारमते दोहाचि मत्ता.

19-20 अद सहरता पुनादि, रका-रकाल्कुना एक्को दाराता बंडां वाटसि दोहाचि मत्ता. मोदाटा पुनादि यसब बंडाते, रौडो पुनादि निल्लमनि बंडाते, मूडो पुनादि यमुना बंडाते, नालुंगो पुनादि मरकत बंडाते, हेय्युंगो पुनादि गोमेद बंडाते, हासंगो पुनादि मानिक बंडाते, एडुंगो पुनादि पीतमनि बंडाते, एनमिदो पुनादि पेरोज बंडाते, तोम्मिदो पुनादि पुकराज बंडाते, पदो पुनादि लहसनि बंडाते, पदाकौडो पुनादि दुप्रकांत बंडाते आनि पन्नेडो पुनादि याकूत बंडाते दोहाचि मत्ता.

21 आ पन्नेंड गल्मां पन्नेंड मुच्याल्लुकुनतोनि तयार कीसि मत्तां. उंद-उंदि गल्मा उंद-उंदि मुच्येमतोनि दोहाचि मत्ता. सहरता हर्रि, काचुनलेसीं मेर्सना पिच्चर बंगारमते तयार कीसि मत्ता.

22 अद सहरते नाकु गुळि दिसा हिल्ले. बारित्ते अगाटा गुळि अन्निटकन्ना सक्तिमंतुड आता पेनबाबाल आनि गोर्रि पोरि आंद.

23 अद सहरते वेलगु हियालय पोळ्दु, वेडसिता अब्सरम हिल्ले, बारित्ते पेनदा महिमाता वेलगु अगा कांति हीता आनि गोर्रि पोरि दाना वेळसि आंद.

24 अन्नि देसेल्लुकुना लोकुल्लक दाना वेडसिता वेलगुने ताकानुर आनि दुनियाता राजालोर अद सहरते ओरा पेद्दातनम पीसि वायानुर.

25 अद सहरते नर्का बस्केने आयो. अदुनहाटीं दाना गल्मां बस्केळ्ळक कुल्लाये मनंता.

26 अद सहरता लोप्पो अन्नि देसेल्लुकुना लोकुल्लक ओरा पेद्दातनम आनि कदर पीसि वांतुर.

27 गोर्रि पोरिना पिस्वरता पुस्तकमते बोरा पोरोलीं अय्ते रासि मंतां, ओरे अद सहरते होळिया परांतुर. गानि अपवित्र लोकुल्लक, पापि कबाहक कियानुर हिलाकोटे आबद्दम वळ्ळकानुर अद सहरते होळिया पर्र.

22

पिस्वर हिय्यना बेरेड

1-2 अस्के पेनदा दूता नाकु सक्कगा मिटकरा मनना पिस्वरता एर हिय्यना बेरेटुन हुपिस्ता. अद बेरेड पेनदा आनि गोर्रि पोरिना राजगद्देताल सुस्व आसि, अद सहरता पेद्दा हरदा नड्डुमताल पोंगसेक मनुंदु, अद बेरेटा ओड्डुंक रोंडु पक्काने पिस्वर हिय्यना मराक मत्तां. अव मराक वर्साता हरेक नेलाते पन्नेंड तीरकुना पंडि हादसेकेन मनुंदु, दुनियाता अन्नि देसेल्लुकुना लोकुल्लक अव मराकुना आकिने बेस आयुंदुर.

3 अद सहरते वायना रोजकुने बस्केने सापनेम मन्नो. बारित्ते अगा पेनदा आनि गोर्रि पोरिना राजगद्दे मनंता. अवुना सेवाकुल्लक पेनदा सेवा कियानुर.

4 ओर दाना मोकोम हळ्ळांतुर. ओरा कपालमपोर्रि पेनदा पोरोल रासि मनंता.

5 अगा हीकट बस्केने मन्नो. ओर्कु पोळ्दु, वेडसि वेलगुना अब्सरम मन्नो. बारित्ते सामि पेनबाबाले ओर्कु वेलगु हियानुर. युगा-युगाल्लुकुनदाका ओरे राज्येम ताकसंतोर.

6 पजा अद पेनदा दूता नातोनि, “इदवेरादाका बतल अय्ते वेहामळ जर्गता अव पोल्लें विस्वासमलायक आनि सत्तेम पोल्लें आंदुं, बव पोल्लें अय्ते बिराना जर्गमळ अब्सरम मंता, अव पोल्लेन दाना सेवाकुल्लुकुं हप्सानाहाटीं, कबुरतोरा आत्मान ताकसाना पेने दाना दूतातुन लोहता,” इंचि इत्ता.

येसु किरिस्तु मर्रा वायमळ

7 इवन्नि आता पजा येसु सामि, “हूळ्ळाट! नना बिरानेन वासेक मंतन. इद पुस्तकमते वेह्चि मत्ता पोल्लेन परकारम बोर अय्ते ताकंतोर, ओरे आसिर्वाद दोर्कुंतोर आंद,” इंचि वेहतोर.

8 नना योहानुन, इव पोल्लें केंजतन, हळतन. केंजुड, हळुड आतस्के, अव पोल्लें वेहता दूताता काल्क मोळ्ळकानाहाटीं दाना काल्कनपोर्रि अरतन.

9 गानि अद नाकुन, “निमे नावा काल्क मोळ्ळकमा, ननागुडा नीलेसीं, नी दंटाता कबुरतोरलेसीं, इद पुस्तकमते वेह्चि मत्ता पोल्लेन परकारम ताकानोरलेसीं पेनदुन मोळ्ळकानोने आंदुन. निमे सिराप पेनदुने मोळ्ळका,” इंचि इत्ता.

10 अद दूता मर्रा नातोनि, “इद पुस्तकमते वेह्चि मत्ता पोल्लें निजम आयाना वेला दगोरा एवता, अदुनहाटीं इद पुस्तकमतुन निमे मक्किचि ईर्मा,” इंचि इत्ता.

11 “अन्यायम कीसेके मनानोर अन्यायम कीसेकेन मन्निरकांटी, हेळसोत्तोर ओर हेळसोंचे मन्निरकांटी, नीतिमंतुड मत्तोर, ओर नीतिमंतुडे मन्निरकांटी, पवित्र मत्तोर, ओर पवित्र मन्निरकांटी,” इंचि इत्ता.

विस्वासुल्कुनाहाटी गवाइ

12 पजा येसु सामि, “हृळाट! नना बिरानेन वासेक मंतन. हरेक मनकंक ओर कीता कबाहकुन पीसि, ओन्क इनाम हीतन.

13 ननाने अल्पा, ननाने ओमेगा आंदुन. ननाने मोदाटोन, ननाने आकिर आंदुन. इंका ननाने सुस्व कियानोन, ननाने महानोन आंदुन.

14 बोर अय्ते ओरा कपडिं हुक्सि बेस साप कीतुर ओर आसिर्वाद दोर्कतोर आंदुर. ओर्क पिस्वर हियना मराता पंडि तिनालय आनि आ गल्माताल सहरते होळियालय अदिकारम दोर्कार.

15 गानि नयकस्केल लोकुल्क, होदेगाहकु, बोगमतनम कियानुर, हक्कानुर, बोम्मांक मोळकानुर, आबद्दमतुन पावरम कियानुर, आबद्दम वळकानुर अंतोरगुडा सहरता पलातेन मनांतुर.

16 येसुन आंदुन. दाविदना वंसंमतोन ननाने आंदुन. हक्केटा मेर्सना सुक्कातुनगुडा ननाने आंदुन, इंचि इव पोल्लेना बारेमता गवाइ कलिसियातोरक वेहनाहाटी नावा उंदि दूतातुन मिहगा लोहतन” इंचि वेहता.

17 पेनदा आत्मा आनि मरमिना पेगिड, “हिव्के वा” इंचि वेहांता. केंजानोरगुडा, “वा” इंचि इन्निरकांटी. द्पा आसि मत्तोर बोरे आयिर इद पिस्वर हियना एतुन पुक्कटते उन्ना वच्चु.

आकिरता पोल्लें

18 इद पुस्तकमते वेह्चि मत्ता वायाना कालमते जर्गना पोल्लेन केंजना हरेक मनकंक इल्हा गट्टिगा वेहासेक मंतन गदा, बोरन्ना इव पोल्लेन बतलन्ना एक्को कल्पानय्ते, इद पुस्तकमते रासि मत्ता गंडाल्कु पेनबाबाल ओनपोर्री वायागोटनुर.

19 अल्हेने ओक्कला बोरन्ना, इद पुस्तकमते रासि मत्ता मुन्ने जर्गाना पोल्लेनाल, बदन्ना पोल्लेतुन तक्को किथ्यिना, इद पुस्तकमते वेह्चि मत्ता, पिस्वर हियना मरा आनि पवित्र सहरताल पेन ओना हिस्सातुन तेंडकुंता.

20 इव अन्नि पोल्लेना गवाइ हीता येसु सामि, “हो नना बिरानेन वासेक मंतन” इंचि वेहासेक मंतोर. आमीन! वा! येसु सामि वा!

21 पेनदा अंतोर लोकुल्कुनपोर्री येसु सामिना कुर्पा मन्निकांटी! आमीन!